


# QARAAKYA QUA TIMWATORA



The New Testament in the Omwunra-Toqura (South Tairora)  
Language of Papua New Guinea

## **QARAAKYA QUA TIMWATORA**

### **The New Testament in the Omwunra-Toqura (South Tairora) Language of Papua New Guinea Nupela Testamen long tokples Omwurna-Toqura long Niugini**

copyright © 2000 Wycliffe Bible Translators, Inc.

Language: Omwunra-Toqura (South Tairora) (Tairora, South)

Dialect: Omwunra-Toqura

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2016-08-30

---

PDF generated using Haiola and XeLaTeX on 28 Dec 2024 from source files dated 31 Aug 2023

73e2f29d-4ca4-50e6-a471-722ac8ab5666

## Contents

FRT . . . . .	1
Matiu . . . . .	3
Maaki . . . . .	81
Ruku . . . . .	130
Ioni . . . . .	209
Kyaiqa Varora . . . . .	263
Romeni . . . . .	335
1 Korinti . . . . .	370
2 Korinti . . . . .	406
Karesia . . . . .	429
Epesaasi . . . . .	442
Piripai . . . . .	454
Korosi . . . . .	463
1 Tesaronaika . . . . .	471
2 Tesaronaika . . . . .	478
1 Timoti . . . . .	482
2 Timoti . . . . .	492
Taitaasi . . . . .	499
Pirimoni . . . . .	503
Hivuru . . . . .	505
Iemisi . . . . .	534
1 Pitaa . . . . .	544
2 Pitaa . . . . .	554
1 Ioni . . . . .	560
2 Ioni . . . . .	569
3 Ioni . . . . .	571
Iuti . . . . .	573
Qovarama Kyora . . . . .	576
Bible reading . . . . .	616

**Qaraakya Qua Timwatora**  
**The New Testament in the Omwunra-Toqura (South**  
**Tairora) language of Papua New Guinea**  
**Nupela Testamen long tokples Omwurna-Toqura long**  
**Niugini**

*Qaraakya Qua Timwatora*

The New Testament in the Omwunra-Toqura (South Tairora) language of Papua New Guinea  
[omw]

Translation by Wycliffe Bible Translators

© 2000, Bible League International

Print publication, 2000 by Bible League International

Web version

© 2014, Wycliffe Bible Translators, Inc.  
<http://www.Wycliffe.org>

<http://pngscriptures.org>

<http://www.ScriptureEarth.org>

This translation is made available to you under the terms of the Creative Commons license (Attribution-Noncommercial-No Derivative Works).  
<http://creativecommons.org/licenses/by-nc-nd/3.0>

**Your are free to share** — to copy, distribute and transmit the text under the following conditions:

- **Attribution.** You must attribute the work to *Wycliffe Bible Translators* (but not in any way that suggests that they endorse you or your use of the work).
- **Noncommercial.** You may not use this work for commercial purposes.
- **No Derivative Works.** You may not alter, transform, or build upon this work.
- **In addition,** you have permission to port the text to different file formats, as long as you don't change any of the text or punctuation of the Bible.

**Notice** — For any reuse or distribution, you must make clear to others the license terms of this work.

**Tok Orait**

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em i tok olsem **yu ken givim kopi long narepela manmeri**. Yu ken wokim kopi na givim long husat i laikim. Tasol, yu mas tok klia dispela samting i kam long <http://tokplesbaibel.org>. Yu no ken kisim mani na salim dispela. **Yu mas givim nating**. Na tu, **yu no ken senisim Tok**.

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa.

Sapos yu laik stremt samting i no orait long dispela tok orait, stremt tok, salim Buk Baibel, o tainim Tok bilong God long nupela tok ples, yu ken **askim mipela**.

Olgeta tok orait na lo long tok ples English i stap long <http://creativecommons.org/licenses/by-nc-nd/3.0/legalcode>.

Sapos yu gat askim long dispela, **plis askim mipela**.

## **Hini mpo mouku mwia nrutu**

Omwunra-Toqura[tab]Pata nrutu

## MATIU

# Matiuva Iesusiva nrohurara tura

*Iesusi Karaisira okyara mwihua nyutu  
(Ruku 3:23-28)*

- <sup>1</sup> Iesusi Karaisira okyara mwataamama vahiro. Evarahaamuvavata Ntevitivavata mwitanahua mwia haivaqahuatana varura.
- <sup>2</sup> Evarahaamuva Aisaakira qova varuvaro  
Aisaakiva Iaikopura qova varuvaro  
Iaikopuva Iutaaravata mwia qata  
vakyaanramwu sova varuvaro
- <sup>3</sup> Iutaava Peresikya Saraakya sova varuvaro  
mwitanahua nyova Temaava varura.  
Peresiva Hesaroninra qova varuvaro  
Hesaroniva Raminra qova varuvaro
- <sup>4</sup> Ramiva Aminantaapura qova varuvaro  
Aminantaapuva Nasoninra qova varuvaro  
Nasoniva Saramoninra qova varuvaro
- <sup>5</sup> Saramoniva Mpoasira qova varura.  
Mpoasira mwia nrova Rehaapiva varura.  
Mpoasiva Ompetira qova varura.  
Ompetira mwia nrova Rutiva varura.  
Ompetiva Iesira qova varuvaro
- <sup>6</sup> Iesiva Ntevitira qova varura.  
Ntevitiva nronraqama viro vunyaa vaisivanto varura.  
Ntevitiva Soromoninra qova varura.  
Soromoninra nrova tauraaqama kyero  
Iuraiaara nraatavanto varura.
- <sup>7</sup> Soromoniva Riampoaminra qova varuvaro  
Riampoamiva Apaisaara qova varuvaro  
Apaisaava Esara qova varuvaro
- <sup>8</sup> Esava Sihosapatira qova varuvaro  
Sihosapativa Soraaminra qova varuvaro  
Soraamiva Asaiaara qova varuvaro
- <sup>9</sup> Asaiaava Sotaaminra qova varuvaro  
Sotaamiva Ehaasira qova varuvaro  
Ehaasiva Hesekaiaara qova varuvaro
- <sup>10</sup> Hesekaiaava Manasaara qova varuvaro  
Manasaava Emosira qova varuvaro  
Emosiva Sosaiaara qova varuvaro
- <sup>11</sup> Sosaiaava Sekonaiaaravata mwia  
qatanramwuvata sova varura.  
Mwi entara mpo mwatanaahua  
ekyaa Isareru rupa kyeta sitaqita  
mwatukya mpo Papironini uro kyovaro
- <sup>12</sup> Sekonaiaava Siatierira qova varuvaro  
Siatieriva Serapaperira qova varuvaro
- <sup>13</sup> Serapaperiva Apaiaatira qova varuvaro

Apiaatativa Eraiaakiminra qova varuvaro  
Eraiaakimiva Esora qova varuvaro

<sup>14</sup> Esova Setokira qova varuvaro  
Setokiva Ekiminra qova varuvaro  
Ekimiva Eraiaatira qova varuvaro  
<sup>15</sup> Eraiaatativa Eriesaara qova varuvaro  
Eriesaava Mataaninra qova varuvaro  
Maataniva Iaikopura qova varuvaro  
<sup>16</sup> Iaikopuva Iosepira qova varuvaro  
Iosepiva Mariaara mwia vaativanto varura.  
Mariaava Jesusira mwata tora.

(Tirenramwu Jesusirara Karaisirave, Mesaiaave, Kotiva titai vaisirave tunanra.)

<sup>17</sup> Jesusi Karaisira kuaa okyara vahirero Evarahaamunraqatairo Ntevitiraqaa mwia haivaqahua 14 nramwu mwi okyarahua varura. Ntevitiraqatairo Papironini rupaqita uro kyo entaraqaa mwia haivaqahua 14 nramwu mwi okyarahua varura. Papironini rupaqita uro kyoraqatairo Karaisiva qovara hu entaraqaa mwia haivaqahua 14 nramwu mwi okyarahua varura.

### *Iosepiva taqovaro Mariaava nraaqiara tuaqama vura*

<sup>18</sup> Iesusi Karaisira mwatato okyarava mwataamama vahiro. Mwia nronra Mariaara Iosepira qati titovaro hia mwikyantiri nrohu vakya Mariaava taqovaro Kotira mwanraquravanto mwia nraaqiara mwiva nraaqiara tuaqama vura.

<sup>19</sup> Mwiva nraaqiara tuaqama viro varuvaro mwia vaativanto Iosepiva kyuqe vaisi ntapihi kyero nrohi varu vaisiva variqarora tiro, mwiva tiqaro, Nte nraakyne qora suqaa Mariaara titaariro kyauruankyorave. Kyai mwia uqeta kyena titaariro quarive, tiro.

<sup>20</sup> Iosepiva mwitaama riero vaitero ruvata taqe varuvaro Kotiva tito vaisiva, nyaamwunyaava mpovanto qovarama viro tiqaro, Ntevitira mwaaquo, Iosepio, hia aatu hiqara Mariaara varaante. Kotira mwanraqura mwiva nraahu mwia nraaqiara mwiharo mwiva nraaqiara tuaqama viho.

<sup>21</sup> I nraatavanto qoraisi nraaqiara mwata tairara e mwia nrutu nteqarama Jesusirave qiante. Jesusiva nraakyne qora kyaahaqama nyatero mwihua uaquia hi kyaiqara uti quara nruka nyatero mwihua huvantu kyaaninranra tira, e mwia nrutu nteqara Jesusirave qiante, tura.

<sup>22</sup> Haaru Kotiva nai poropeti vaisi nroqitairo timwa to quava qutaa vahiarive tiro, Kotiva tito vaisiva qovarama viro mwitaa tura. Haaru Kotira qua qovarama kye varuva, poropeti vaisivanto mwitaama tiro:

<sup>23</sup> Nraakiara hia qoraisivatama kyero nrohiari nraakyeva nraaqiara tuaqama viro nraaqiara mwataananrove. Mwihua mwianra Imaanuerivave tivarave, tura.

*(Aisaiaa 7:14)*

Imaanuerira mwi nrutura okyara vahirero mwataamama vahiro: Kotiva tirivata varivave, tura.

<sup>24</sup> Iosepiva vaitoraqitairo siviro mwiva Kotiva tito vaisiva tu quara riero mwiva tunte hiro Mariaara uro varatero varurama.

<sup>25</sup> Mwiva hia Mariaaravata nrohuvaro Mariaava qati variqiro viro uro uro qoraisi nraaqiara mwata tovaro Iosepiva mwia nrutu nteqaro, Jesusivave, tura.

<sup>1</sup> Herotiva nronraqama viro varu entara Mariaava Vetarahemini Iutia mwataqaa variqaro Iesusira mwata tero. Mwiva mwia mwata tero varuvata vaisi mponramwuhanta mpo okyara mpo okyara taqo vaisinramwuhua huarri nri ntora vevasaita Ierusaremini nri ntora.

<sup>2</sup> Mwinramwuhua nri nteta kyapara hita tiqata, Nraaqiara mpo Iutaqa ntaqikyiani vaisira tanave mwata taiharo variho? Tirenramwu huarri nri ntainani variqata mwia qovora taqeta mwia nrutu tuaahererera nrunrahuave, tita.

<sup>3</sup> Mwinramwuhua mwitaa tuvaro Herotiva mwivavata mwi quara riero nrihanrama viro mwiva mwianra airi nraato tiqaro varura. Ekyaa Ierusaremini varuhuavata mwi quara rieta airi nraato tiqata varuvaro

<sup>4</sup> Herotiva vaisi nronranramwuanra aakyara ntero. Kotira kyaiqa vara mwate varu vaisinramwuhua vunyaahuave, mwaanra okyara ti varu vaisihuave, mwiva mwihuara aakyara ntovata nrita ntuvaantuama varuvaro Herotiva mwihua kyapara hiro tiqaro, Tanave Kotiva titairaro tumuani nraaqiarara Karaisira mwia nrova mwia mwata taani mwatava vaiho? tiro.

<sup>5</sup> Herotiva mwitaa tuvata mwihua tiqata, Vetarahemi Iutia mwataqaaave. Haaru Kotira qua qovarama kye varu vaisiva mwaa quara qara ntumwa tero tiqaro:

<sup>6</sup> Vetarahemi Iutia mwataqaa vahiaravave.

Nraakye qoravanto iara hia qumina mwatuqyave tivarave.

Iqitairo vunyaa vaisivanto qovarama viro mwiva Kotira nraakye qora Isareriqaa kyuqema kyero ntaqikyiqiro quaninrave, turave. *(Maikaa 5:2)*

Haaru poropeti vaisivanto mwitaa turara tita, tire.

Karaisirara Vetarahemiqi mwata taananrove turo, tita.

<sup>7</sup> Mwihua mwitaa tuvaro Herotiva tuqeta kyero mpo okyara mpo okyara taqo vaisinramwuhua nrushua nyaanrama kyero tiqaro, Taireve qovora mwiva qovarama viho? tiro.

<sup>8</sup> Mwitaa tuvata mwinramwuhua Herotira timwa mwuvaro riero mwiva mwinramwuhua Vetarahemini sitero tiqaro, Nkyenramwu uqinrakye mwi nraaqiarara puua hirerata quate. Nkyenramwu mwia puaama kye taqetama vaakyama nivata nrumu timwa mpivaqe ntevata uro nraaqiara mwia nrutu tuaahera mwataankye, tiro.

<sup>9</sup> Herotiva mwitaa tuvata mwihua aanraqaa vi varuvaro qovoravanto vaakya mwihua huarivanto nri ntonani variqata taqova mwihua vuni mwiva nraante vuva uro nraaqiara mwiva varuraqa ra kyero mwiaqaa vahura.

<sup>10</sup> Mwiaqaa vahuvata mwihua qovora mwia taqeta mpoqama kyeta qamwatora.

<sup>11</sup> Mwinramwuhua nraamwuqi vera nteta taqovaro nraaqiara mwiva nai nronra Mariaakyantiri varuvata mwihua taqetama mwatasata tori kyauru ravi variqata mwia nrutu tuaahereqatama mwia qamwata mwateta. Mwihua qamwata mwateta mwiaqataita mpo inraikya mpo inraikya tuaqitai ohi kyeta koriqo ututo inraikyavave, munra kyuqe mwunta quani inraikyavave, vahamwenra kyuquerave, ohi kyeta mwatoria.

<sup>12</sup> Mwia mwi kyeta varita vaite varuvaro Kotiva ruvaatakyaa mwihua timwa nyinro tiqaro, Hia Herotira uro timwa mwiate, tuvata mwihua sivita mpo aanraqamateta nkyiari mwaatanianra nrumu ntanteta vurama.

### *Jesusira vitero Isipini aatu vurama*

<sup>13</sup> Mwihua vuvaro Iosepiva vaite varuvaro Kotiva tito vaisiva qovarama viro ruvaatakyaa mwia timwa mwinro tiqaro, Sivira ena nrahesi nraaqiaravata sitera Isipini aatu quante. Mwini uro varirage nte qakyo uro mponanre qianinra riaante. Herotiva i nraaqiara puaama kyero ru kyarero uti variho, tiro.

<sup>14</sup> Mwitaa tuvaro Iosepiva siviro entaqi nraahu nai nraaqiaravata nai nraatavata sita varero Isipini anra vuva uro mwini

<sup>15</sup> variqiro vi varuvaro Herotiva qutu vurama. Herotiva qutu vuvaro mwiaqaatairo haaru Kotira qua qovarama kye varu vaisiva tu quava quttaa vahurama. Haaru mwiva Kotiva mwataama tiho tiro: Nte Isipisaina ntene maaqu nraanraanrinro mwiva nriananrove, tura. *(Hosaaia 11:1)*

### *Herotiva nraaqiaranramwu ru kyora*

<sup>16</sup> Herotiva variqaro taqovata huari vu nri ntonanyaais vaisinramwu mwia qua nteqakye hia mwia timwa mwinraitita, vuvaro mwia mpoqama kyero raraqa tovaro variqaro uro mpo hu vaisihua sitero tiqaro, Ekyaa qoraisi nraaqiara taara ihi varaahuave, hia taara ihi varaahuave, Vетарахемини variahuavata, mwia vara ututu variahuavata, ekyaa ru taiqa kyaate, tiro. Mwiva qovoravanto qovarama vu entara huari vu nri ntonanyaahua timwa mwito quara rieqaro taara ihi varehuavata, hia taara ihi varehuavata, ru taiqa kyaate, tura.

<sup>17</sup> Mwihua ru taiqa kyaate tuvaro haaru Kotiva poropeti vaisi Ieremaiaara nroqitairo tu quava mwivauma vahiro. Mwataama tiro:

<sup>18</sup> Ramaa mwatuqyaqitairo nronraqama kyero ntate variani quara nraakye qora rievarave.

Tiri taatova Reserva nai nraisiara ntate variananrove.

Mwia nraisi ekyaa qutu virara tiro, mwia mwutukya qihakya hiariva hia variraro mwiva nronraqama kyero ntate variananrove, tura. *(Ieremaiaa 31:15)*

### *Isipisairo nrunra*

<sup>19</sup> Herotiva variro qutu vuvaro Iosepiva Isipini varuvaro Kotiva titova qaiqaa qovarama viro Iosepira ruvaatakyaa

<sup>20</sup> timwa mwinro tiqaro, Sivira nraaqiaravata, mwia nronravata, sita varera Isareri mwata Iutiaani nrumeru ntantera quante. I nraaqiara ru kyarera hiahua qutu quavo, tiro.

<sup>21</sup> Mwitaa tuvaro Iosepiva siviro nraaqiaravata, mwia nronravata, sita varero Isarerianra viro.

<sup>22</sup> Mwiva mwinianra viqaro riovoro Akerausiva nai qora Herotira mwaata varero Iutiaqaa ntaqikyi varuvaro Iosepiva mwini quaro tiro aatuma kyero varuvaro Kotiva ruvaatakyaa qaiqaa timwa mwuvuro mwiva hia Iutiaani virairo qaqlira kyero

<sup>23</sup> Karirini uro mwatuqya mpo Nasaretini nai nrahesi nraaqiaravata varura.

Nasaretini uro varuvaro haaru Kotiva nai poropeti vaisinramwu nroqitairo tu quava quttaa vahiro. Mwi quava Iesusirara mwataama tiro:

Nraakye qoravanto mwianra Nasaretinyaa vaisive tivarave, tura.

## 3

### *Ioninra nramanri nyi varu vaisirara tura*

*(Maaki 1:2-8; Ruku 3:1-18; Ioni 1:19-28)*

<sup>1</sup> Mwi entara Ioniva nramanri nyi varu vaisiva nri ntero Iutiaani qumina mwataqa variqaro nraakye qora timwa nyinro tiqaro,

<sup>2</sup> Nkye uaqia hi kyaiqara uti varira qaqlira kyaate. Kotiva nraakye qoraqaa ntaqikyiari entava qaumatoma vaiho, tura.

<sup>3</sup> Haaru Ioniva hia varu entara Aisaiaava poropeti vaisivanto variqaro mwi vaisiva qovarama quananrove tura. Aisaiaava Ioninranra mwataama tiro:

Mwiva qumina mwatani variro aakyara ntero tiqaro,

Nronravanto quani aanranra terama mwateta

mwia aanra avuqavuma mwataivaro mwiva mwivauma qio quarive qiananrove, tura.

*(Aisaiaa 40:3)*

<sup>4</sup> Ioniva tuavaaqa ututova vahirero kameri quara mwia kyaahi nraahu vara kyero ututero reti tavaarana rupa tora. Mwiva hia kyara vara tu kyero nranraitiro, mwiva kainyaaqavata, voravanto kuruto nramanrinravata, nraahu nreqanro varura.

<sup>5</sup> Ioniva qua timwa nyi varuvata nraakye qora Ierusaremisaitave, ekyaa Iutiasaitave, Iotaani nramanri tokya hini hini varuhuave, mwihua hisai hisai ntuvantuama vita

<sup>6</sup> nkyiari qora kyaiqa varora timwa qovarama kyovaro Ioniva Iotaani nramanriqi variqaro nramanri nyi varura.

<sup>7</sup> Ioniva variqaro taqovata Parisivantovata, Saitiusivantovata, nramanri vararerata mwiva hunani nruvaro mwiva mwihuara tiqaro, Nkye quaiha nraaqiaravantoma variavo. Kotiva nraakye qora rirera uti varihata tava nkyiara aatu ntugema kyeta quate tihatave nkye mwaini nte hunani nriavo?

<sup>8</sup> Nkye qutaaqama kyeta uaquia hi kyaiqara qaqira kyarerata uti varivera, nkye kyuqe kyaiqa varavaqe tire taqaare.

<sup>9</sup> Nkye hia nkyeta vaitutu hira qua tiqata, Evarahaamuva tiri tiqova varihatara tita, tire qio varuro, qiate. Kotiva qiove tirera, ori mwaanramwuhua vaisi tuemwa vita Evarahaamunra nraisi varivarave.

<sup>10</sup> Kotiva kyatari teqa kyarero kyaari okyaraqi terama taiho. Hia kyuqe tamwa riaaninra mwiva teqaaqama kyero kyairaro qiana itamwa kyaananrove, tiro.

<sup>11</sup> Nkye uaquia hi aanranra qaqira kyeta kyuqe hiani aanranraqaa nraahu virerata utuavana nte qumina nramanri nkyi nyi varuquo. Ni naakiara nrianriva Kotira mwanraqura nkyi nyiananrove. Mwiva qia itaaninra votihira nkyi nyiananrove. Mwiva nronravanto ni naatara kyaariva nriananrove. Nte qumina vaisi variqananra tina, nte hia qio mwia kyuqu nraamwu varaqina uro mwianinrave.

<sup>12</sup> Mwiva nai kyavoi kyauquqi tu varero kyakuma voti hira ntitata hirero uro ntero ntitatama kyero nronra nraahu nai kyavoiqotairo vaqitaqiro uro nai nraamwuqi vatero qumina kyapivata mwanrevata vaqitaqiro uro hia qipa quani qiaraqi tuto kyairaro itamwa kyaananrove, tiro. Ioniva mwi quara turama.

#### *Ioniva Jesusira nramanri mwunra (Maaki 1:9-11; Ruku 3:21-22)*

<sup>13</sup> Ioniva nramanri nyi varuvaro mwi entara Iesusiva Karirisairo Ioniva mwia nramanri mwianrive tiro, mwiva varura Iotaani nramanriqi viro.

<sup>14</sup> Mwiva mwini uro ntovaro Ioniva Iesusirara tiqaro, Qaqao, e nramanri ni mpiataara vaiharama e nianra nramanri ni mpiante ti variaro, tiro.

<sup>15</sup> Ioniva mwitaa tuvaro Iesusiva nai timwa mwinro tiqaro, Mate qati kyera nramanri nraahu ni mpiante. Kotiva avuqavu hi quara timwa taira, mwi quara tiretana riemwaqita virerave, tiro. Mwitaa tuvaro Ioniva eo timwa kyero Iesusira nramanri mwinro.

<sup>16</sup> Nramanri mwuvaro Iesusiva nramanriqitairo qatinani mwaanri ntovaro mate mwipiara nyaamwuvanto qatua vuvaro Ioniva taqovaro Kotira mwanraquravanto nyaamwa minrunra voti huva tuminro Iesusiraqaa varuvaro

<sup>17</sup> nyaamwusairo quavanto tiqaro, Mwaa ni maaqueve. Ni mutukyavanto mpogama kyero mwianra vaiho. Nte mwianra qamwateqanama varuquo, tiro. Tura.

## 4

#### *Iesusiva uaquia hi kyaiqara utuarive tiro Saataaniva mwia mwataara hura (Maaki 1:12-13; Ruku 4:1-13)*

<sup>1</sup> Iesusiva nramanri varovaro Saataaniva mwia mwataara hiarive tiro, Kotira mwanraquravanto Iesusira vitaqiro uro hia vaisivata varura quminasata kyora.

<sup>2</sup> Kyovaro Iesusiva mwini 40 entara variqaro hia kyaravata nrovaro kyara nraataa huvaro varura.

<sup>3</sup> Kyara nraataa huvaro varuvaro Saataaniva nri ntero Iesusirara tiqaro, E qutaa Kotira mwaacquanto varirera, ori mwaanramwunranra tiraro mpereti tuemwa virara nraante, tiro.

<sup>4</sup> Mwitaa tuvaro Iesusiva mwia nai timwa mwinro tiqaro, Qaqao, Kotira mpukuqi vahi quava tiqaro,

Vaisivanto kyara nraaninranra nraahu riemwaqiro quariva hia qio qati variqiro quananrove. Mwiva ekyaa

Kotira nroqitairo qiani quara riemwaqiro viqaro qioma qati variqiro quananrove, turave, tiro. *(Lo 8:3)*

<sup>5</sup> Iesusiva mwitaa tuvaro Saataaniva mwia vitaqiro Ierusaremini Kotira nraamwu qiana nai verani vahuraqa uro kyero mwiaqaa mwia mwaamwianrama tero

<sup>6</sup> tiqaro, E qutaaqama kyera Kotira mwaacquanto varirera, mwaqaataira mpua mwatani hatohira quante. Kotira mpukuqi vahi quava tiqaro, Kotiva iara rieqaro mwiva tirata nyaamwunyaahua iqaa kyuqema kyeta ntaqikyivarave, turave.

E ena kyuqu oriqa ntuteqa kyerorave tita, nyaamwunyaahua nkyiari kyauquqo i tu vareta vivarave, turave, tiro. *(Ihi 91:11-12)*

<sup>7</sup> Saataaniva mwitaa tuvaro Iesusiva mwia nai timwa mwinro tiqaro, Qaqao, Kotira mpukuqi qua mpo vahiva tiqaro,

Nronravanto i mwanriqvanto varirara tira, e hia mwia mwataara hiante, turave, tiro. *(Lo 6:16)*

<sup>8</sup> Iesusiva mwitaa tuvaro Saataaniva mwia vitaqiro uro taaqi nritarora qiana kyero ekyaa vunyaa vaisivanto nkyiari mwata mpoqaa mpoqaa ntaqikyura ekyaa mwi mwata maatara mwia kepukya inraikya rirante nraamwutero tiqaro,

<sup>9</sup> E ni kyuqu tarani tumu ntira variqara ni nutu nraahu tuaahera matairera, nte ekyaa mwi inraikyara i mwianinrave, tiro.

<sup>10</sup> Mwitaa tuvaro Iesusiva nai timwa mwinro tiqaro, Qaqao, Saataanio, hiante quante, Kotira mpukuqi vahi quava tiqaro,

Mwanriqvanto Kotiva nronravanto varirara tira, e mwia nrutu nraahu tuaahereqara mwia kyaiqa nraahu varaqira quante turave, tiro. *(Lo 6:13)*

<sup>11</sup> Iesusiva mwitaa tuvaro Saataaniva mwia mwini kyero vuvata nyaamwunyaahua tumu Iesusira kyaahaqa hora.

### *Iesusiva Karirini nai kyaiqa tohara tora*

*(Maaki 1:14-15; Ruku 4:14-15)*

<sup>12</sup> Iesusiva riovata Ioninra ntavaaqavu kyeta karavuqi kyaavaro variho tuvaro riero, Iesusiva nrumu ntantero Karirini vura.

<sup>13</sup> Mwiva mwini vuva hia uro Nasareti nai mwaatani variraitiro, uro Kapenaamini variqiro vura. Kapenaami mwiva Kariri kyaarerera tokyasataa vhura. Mwi mwatava vahirero Sepiuraaninravata, Napatarairavata mwata vhura.

<sup>14</sup> Iesusiva mwini uro varuvaro haaru Aisaiaava Kotira qua qovarama kyo quava qutaa mwivau vhura. Aisaiaava haaru mwataama tiro:

<sup>15</sup> Nte Sepiuraaninra mwataravata, Napataraira mwataravata, tirerave.

Mwi mwatava kyaarerera tokyani vahirave.

Iotaani nramanri vaiharo mwi mwatava uromwi vahata mwi mwataraga Kariri mwataqa mpo mwatanaa mpo mwatanaahua variarave.

<sup>16</sup> Mwihua kyokiraqi variqita vita, mwiaqaataita omwavanto nronraqama kyero itaaninra taqevarave.

Mwihua kyokiraqi variavaro

qutu qua okyarava mwihua ntumwaqu kyaihata variavaro mwiaqaatairo omwavanto ntuvaahama nyatarero uti varirave, tura. *(Aisaiaa 9:1-2)*

**17** Mwi entaraqaatairo Jesusiva nai kyaiqa toharama kyero nraakye qora timwa nyiqiro viro tiqaro, Kotiva nraakye qoraqaa ntaqikyiariva qaumato vahirara tita, nkye uaquia hi aanranra qaqlira kyaate, tiro. Turama.

*Jesusiva vaisi taaratana taaratana nyaanrama kyero sitora  
(Maaki 1:16-20)*

**18** Jesusiva Kariri kyaarerera tokyasataa viqaro taqovata qate vakye taaratana varura. Vakyaava Saimoniva mwia mpo nrutu Pitaava varuvaro mwia qatavanto Enturuva varura. Mwitanahua tavukya kyaiqa vare varuhua variqatara tita, mwitanahua nramanriqi vahe nte varura.

**19** Mwitanahua vahe nte varuvaro Jesusiva mwitanahuara tiqaro, Nkyetana ni naakiara ni pataqita nriate. Nkye tavukya vahe ntamwa kyeta varaantema kyetama nkyetana ni pataqita nrivaqena nte nkyi nyaamwutaarita nkye vaisi sitevarave, tiro.

**20** Mwitaa tuvata mate mwiqiara mwitanahua nkyiari vahe mwini kyeta Jesusira vataqita vurama.

**21** Mwitanahua mwia vataqita vuvaro Jesusiva pataqia viqaro taqovata vaisi mpotana Sepetira mwaaqutana Iemisivavata mwia qata Ionivavata varura. Mwitanahua mpotuqi variqata nkyiari sora Sepetiravatama kyeta vahe terahi varuvaro Jesusiva mwitanahua nyaanrama kyovata

**22** mwitanahua mate mwiqiara nkyiari mpotuvata nkyiari soravata mwini kyeta Jesusira vataqita vurama.

*Jesusiva qua mwakyaakya timwa nyinro nriqa vuhua kyuqema nyatora  
(Ruku 6:17-19)*

**23** Jesusiva Karirini mpo mwatukya mpo mwatukya nrohiqaro mwaanra nraamwuqi vera ntero variqaro mwakyaakya timwa nyiqanro Kotiva nraakye qoraqa ntaqikyiani quara, kyuqe qua timwa nyiqiro vi varuvata tauma rumpuara utuhuave, nriqa vuhuave, mwihua varuvaro Jesusiva mwihua kyuqema kyovata qio varura.

**24** Jesusiva mwitaamaqiro vi varuvaro mwia quavanto ekyaa Siriaani vuvata mwi mwatanaahua nkyiari nraakye qoraqa mpo qara mpo qarama kyero nriqa vuhua, tauma rumpuara utuhuave, nronraqama kyero nriqa vuhuave, vaana kyapata varuhuave, mwamwanta ntirintiri hi varuhuave, hini mwamwanta qutu vu vaisihuave, mwihua mwihua ekyaa sitaqita Jesusiva hunani uro kyovaro mwiva mwihua kyuqema kyovata qio varura.

**25** Jesusiva aanrani vi varuvata nraakye qora airivanto mwia vataqita vi varura. Karirisairove, Ntekaporisi mwatukyanramwuqitairove, Ierusaremisairove, Iutiasairove, Iotaani nramanri qarahi hisataasairove, nraakye qoravanto hisai hisaita ntuvaantuama vita mwia vataqita vura.

## 5

*Jesusiva taaqiqaa variqaro mwakyaakya timwa nyunra*

**1** Jesusiva variqaro taqovata airi nraakye qora ntuvaantuama vita varuvaro mwiva taaqiqaa uro mwatakyaa viro varuvata mwia nraaqiaranramwuvata mwiva varunani uro varuvaro

**2** Jesusiva mwakyaakya tohara tero mwiva nai nraaqiaranramwu timwa nyinro tiqaro,

**3** Nte Kotiva hi inraikyarara vehiqamama varuqo ti vari nraakye qorahua mwihua varivarо Kotiva mwihuama kyuqema nyataananrove.

Kotiva mwihuaqa ntaqikyiqiro vi varirata mwihua mwia nraakye qorama varivarave.

**4** Mwutukya uaquia hirata ntate varihua, mwihua varivarо Kotiva mwihuama kyuqema nyataananrove. Kotiva mwihua mwutukya qihakyama nyataananrove.

<sup>5</sup> Tirema variqata hia nkyiarivata uaqama nyaterara riehua varivaro Kotiva mwihua kyuqema nyataananrove.

Kotiva mwaa mwataro mwihua kyaama tairara tita, mwihua mwia varevarave.

<sup>6</sup> Ntapihi kye nrohi okyarara kyakya hiarhua, mwihua varivaro Kotiva mwihua kyuqema nyatero mwi okyararaqo mwihua qioqama nyataananrove.

<sup>7</sup> Mpohuara po kye ti nraakyе qorahua, mwihua varivaro Kotiva mwihua kyuqema nyatero mwihuara po kye timwa nyataananrove.

<sup>8</sup> Quttaaqama kye Kotira nraahu vataqi vihua, mwihua varivaro Kotiva mwihuama kyuqema nyataananrove.

Mwi nraakyе qorahua Kotira taqevarave.

<sup>9</sup> Ntaqirera hivata vaitutu hi vari nraakyе qorahua, mwihua varivaro Kotiva mwihua kyuqema nyataananrove.

Kotiva mwihuara ni nraaqiarave tiratama varivarave.

<sup>10</sup> Kotirara rieqata ntapihi kye nrohi varivata mwia kyaara mwihua uaqama nyate vari nraakyе qorahua, mwihua varivaro Kotiva mwihua kyuqema nyataananrove.

Kotiva mwihuqa ntaqikyiqiro vi varirata mwihua mwia nraakyе qorama varivarave.

<sup>11</sup> Nkye ni pataqi vi varivata mwia kyaara nkyiara uaqia hi quara timwaqi vita, nkyi uaqama nyateta, nkyiara mpo qua mpo qua unra quave, uaqia hi quarave, nkyiara timwaqi vi varivata, nkye ni pataqi vi varivaro Kotiva nkyi kyuqema nyataananrove.

<sup>12</sup> Nkyi uaqama nyataantema kyeta haaruvata vaisi mpo uhua Kotira qua qovara hu vaisihua uaqama nyatorave. Nkyi mwitaama kyeta uaqama nyataivata nkye qamwateqa variate. Kotiva nkyi kyaiqa kyuqe kyaiqara rieqaro mwia qiata nyaamwuni kyuqe inraikya nkyini terama tairave.

### *Nkye hore voti hiahuate tura*

(Maaki 9:50; Ruku 14:34-35)

<sup>13</sup> Mwaa mwataro nraakyе qora variavata nkye mwihua utaqaa variqata nkye hore votima kyeta variavo. Horevanto uaqama viro hia qiyaa hirera, hia qio qaiqaa utu kyairaro qiyaa hiananrove. Horevanto uaqama virera, qio uaqama virave timwa kyeta mwia qaqlira kyaivata nraakyе qoravanto mwiaqaa ntamwaqita vivarave.

### *Nkye omwa voti hiahuate tura*

(Maaki 4:21; Ruku 8:16, 11:33)

<sup>14</sup> Mwaa mwataro nraakyе qora variavata nkye omwavanto itaintema kyeta variavo. Mwatukya mpovanto taaqiqaa vahiariva hia uqeta vahiananrove.

<sup>15</sup> Hia mpovanto omwa qupi kyero tave vara kyero mwia ntumwaqu tairave. Qaqao, nraamwuqi variahuavata ekyaa taqaate tiro, omwa qupi kyero virira nyaamwuni hiritairave.

<sup>16</sup> Nkye mwia votima kyeta nraakyе qora suqaa qoqaa nrohiqata omwavanto itaintema kyeta variqita vivata mwihua nkye kyuqe kyaiqa vare varira taqeta, nkyi sova nyaamwuni varira mwia nrutu tuaaheraqita quate.

### *Mosesiva qua mwaanra timwa torara tura*

<sup>17</sup> Nkye nianra tiqata, Mosesiva timwato quaravata, poropeti vaisinramwuvanto timwato quaravata, vara qaqlira kyarero nrivave, tivorave. Nkye nianra mwitaama kyeta nraato rievora. Hia nte mwihua qua qaqlira taiqa kyarerave. Mwi quava qutaa mwivau vahiarive tina, ntevata nruvave.

<sup>18</sup> Nte nkyi timwa nyianinra riaate. Nyaamwuvantovata mwatavantovata taiqa viraro ekyaa mwaanra qua mwiva qati nraahu vahiqiro quananrove. Mwi quaraqitairo ekyaa quave pata uapaa qua mwi quavavata vahiqiro viraro ekyaa inraikyavanto qovarama quananrove.

<sup>19</sup> Mosesivavata poropeti vaisinramwuvantovata timwato quava vaharo mpovanto mwi quaraqitairo pata uaquia nteqa kyero mpohuaravata tiqaro, Nkye mwi quara pata uaquia vahira qiomia nteqa kyevarave, tirera, mwi vaisiva variro nyaamwuni Kotiva ntaqikyianinrani viraro Kotiva mwi vaisirara, E ni nraaqiara mwatumwi mpiato nraahu variaravama variaro, qiananrove. Vaisi mpovanto Mosesira quavata poropeti vaisi quavata riemwaqiro viqaro mpohuaravata mwi quara riemwaqita quate tirera, mwi vaisiva variro nyaamwuni Kotiva ntaqikyiani mwatukyaranviraro Kotiva mwianra, E ni nraaqiara nritarera virito variaravama variaro, qiananrove.

<sup>20</sup> Nte nkyi timwa nyinrenrave. Parisi vaisinramwuvata, mwaanra okyara qia vaisinramwuhuavata, mwihua nkyiari riemwa kyeta tiqata, Tire Kotira qua rieqata ntapihi kye nrohi varuro, ti variarave. Nkye hia mwihua nraatara kyeta kyuqe aanraqaa vivera, nkye Kotiva ntaqikyiani mwatukyaraqi hia qio vivarave.

*Mpohua ru kye okyarara tura  
(Ruku 12:57-59)*

<sup>21</sup> Haaru Mosesiva nkyi haivaqahuara timwato quara nkye mwi quara riaarave. Mwataama tiro: Hia mpore ru kyaante. Mpore ru kyaari vaisiva, mwiva quaqaa variananrove, turave.

<sup>22</sup> Mwiva mwitaa tura kyai nte qaiqaa nkyi timwa nyianri. Nai qata vakyaara raraqa taariva, mwi vaisivavata mpore ru kyaiva quaqaa varintema kyero quaqaa variananrove. Nte qaiqaavata nkyi timwa nyinrenrave. Nai qata vakyaara mwaaquvantove qiani vaisira mwia vitaqira uro nronra kaanasorinramwuvanto varinani kyairaro mwiva qua vararive. Nai qata vakyaara e uera vaisivanto hia vu nraatovata vahivave qiai vaisiva, mwivavata mpore ru kyero qua varaintema kyero qua varairaro mwia uro qutu quahua vi mwatarata qiaqi tuto kyaananrove.

<sup>23</sup> Mwi quara rieqarama e mwaanra nraamwu nronraqi variqara mpo inraikya Kotira mwinra mwia qamwata mwatarera hira taqairaro i qata vakya mpoqvanto iqaa qua vataariva qati vahirera,

<sup>24</sup> Kotira mwinrenra hina inraikyara mwiaqaa qati vatera, uro ena qata vakya mwiavata variqara mwi quara nraante timwa ntapihi kyera mwiaqataira uro mwi inraikyara Kotira mwiqanra qamwata mwataante.

<sup>25</sup> Mpovanto iqaa qua vatarero i vita varero ko nraamwuqiara virara mwikyantiri aanrani viqarama qamwanrama kyerama mwi quara ntapihi kyaante. E hia mwitaa hiraitira, ko nraamwuqi viraro ko rie vari vaisiva iqaa qua vatero pipi titairaro i vitaqiro uro karavuqi kyaananrove.

<sup>26</sup> Nte qutaa qianinra riaante. E karavuqi variqira vira karavu kyoqaa hiqara hia ekya mwi munimanra kyairaro hia qio i qamwanrama titairara vinanrave, tiro. Iesusiva mwi quara turama.

*Nraata vaati ntugeeqaa hi okyarara tura*

<sup>27</sup> Iesusiva mwitaa timwa kyero mwiva mwihua timwa nyinro tiqaro, Haaru Mosesiva timwato quara mpo qua nkye riaarave. Mwi quava mwataama tiro: Hia mpore nraatavata mpore vaativata api nrohiante, turave.

<sup>28</sup> Kyai nte qaiqaa nkyi timwa nyiankye. Vaisivanto nraakye taqero nai nraatoqitairo nraahu riero, Nte mwiaavata nrohina variataarave, qianinranra Kotiva tiqaro, E vaakyama nraata vaati ntugeeqaa kyera hiaro, timwa kyero mwi vaisiraqaa qua vataananrove.

<sup>29</sup> Mwianra rieqara e kyaatutanyaa vuqotaira taqe variqara uaquia hi kyaiqara uti varirera, qaiqaavata mwitaamaqina quankyo tira, mwia vauru kyera qaqlira kyaante. E vu kuaiku nraahu vahirara hia uaquia hi kyaiqara utiraitira, nyaamwuni qiomia vinanrave. E vu taaratana vahiariva uaquia hi kyaiqara utuqira vira nraakiara qutu viraro i qia nronra itaaninraqi tuto kyaananrove.

<sup>30</sup> E kyauqu kyaatutaqotaira uaquia hi kyaiqara uti varirera, e mwitaamaqina quankyo tira, mwia teqa kyera qaqlira kyaante. E kyauqu kuaiku vahiariva hia uaquia hi kyaiqara utiraitira, nyaamwuni qoma vinanrave. E kyauqu taaratana vahiariva uaquia hi kyaiqara utuqira viraro i qia nronra itaaninraqi tuto kyaananrove.

### *Nai nraata ekyaara titaa okyarara tura*

<sup>31</sup> Haaru Mosesiva timwato quava mwataama tiro: Vaisivanto nai nraata qaqlira kyarero hiqaro nai nraata qara mpo mwinro, Nte mwia qaqliram kyaquo, timwa kyero qara mwiananrove, turave.

<sup>32</sup> Kyai nte qaiqaa nkyi timwa nyiankye. Mwia nraatavanto hia mpo vaisintiri api nrohiraitiro variraro mwia vaativanto mwia qaqlira kyairaro mwia nraatavanto vaisi kyaata varairera, Kotiva mwitaama qiananro: Mwi nraakyeva qaraakya vaisintiri nrohiqaro nraata vaati ntugema kyaihomma qiananrove. Mwia vaati hoqarenaava mwia qaqlira kyaiharo mwia kyaara mwitaa iho. Mwitaa ihana nte mwia vaati i tau-raanaanraqa qua vatena qaraakya vaati mwiaqaavata qua vataaninrave, qiananrove, tiro. Jesusiva mwi quara turama.

### *Kyauqu nriqiqaa vate okyarara tura*

<sup>33</sup> Jesusiva mwitaa timwa kyero mwiva qua timwa nyiqiro viro tiqaro, Haaru Mosesiva qua mpo nkyi haivaqahuara timwato quara nkye mwi quaravata ntapihi kyaarave. Mwataama tiro: E kyauqu nriqiqaa vatera tiqara, Kotira vuqaa variqanama nte quitaama mwitaa hirerave, tina quara nteqa kyelerorave. Kotira nrutu nteqara timwa tena quarara rieqara varaante, turave.

<sup>34</sup> Kyai nte qaiqaa nkyi timwa nyiankye. Kyauqu nriqiqaa vateqata, tire quita mwitaa hirerave, tiqatama hia Kotira nrutu nteqata mwitaa qiate. Hia mpo inraikya mpo inraikya nrutu nteqata, Tire quita mwitaa hirerave, qiate. Kotiva nyaamwuni mwatakyaa viro varirara tita, mwianra rieqatama hia nyaamwu nrutu nteqatama, Tire quita mwitaa hirerave, qiate.

<sup>35</sup> Kotiva nai kyuqu tutu kyero mwaa mwataraqaa mpiami vatero varirara tita, mwianra rieqatama hia mwaa mwataro nrutu nteqata, Tire quita mwitaa hirerave, qiate. Ierusaremvanto nronra vunyaa vaisivanto variari mwatuqyava vahirara tita, mwianra rieqatama hia mwi mwatuqyara nrutu nteqatama, Tire quita mwitaa hirerave, qiate.

<sup>36</sup> Hia nkyeta qita nrutu nteqata, Tire quita mwitaa hirerave, qiate. Nkye hia qio nkyeta qita kyaahira, Eqara kyaahive, upi kyaahive, vahianti tivarave. Nkye hia qio mwitaa tirara tita, nkye qumina nkyeta qita nrutu nteqata, Tire mwitaa hirerave, tivorave.

<sup>37</sup> Nkye variqata mwitaa hirerave tivera, nkye qati eo nraahu tiqatama mwitaa hiata. Hia mwitaa hivera, qati hiave nraahu qita. Hia mpo qua mpo quanti qiate. Mpo qua mpo quavanto Saataaninraqatairo qovara hiananrove, tiro. Jesusiva mwitaa tura.

### *Ru vunti okyarara tura*

(Ruku 6:29-30)

<sup>38</sup> Jesusiva mwitaa timwa kyero timwa nyiqiro viro tiqaro: Mosesiva qua mpo timwatora nkyevata riaarave. Mwataama tiro: Mpowanto i vu vauru kyairara, e nai vuvata qoma vauru kyenanrave. Mpowanto i vai ntuvihau kyairera, e nai vaivata qoma ntuvihau kyenanrave, turave.

<sup>39</sup> Mwi quara vahiana kyai nte nkyi qaiqaa timwa nyiankye. Uaqia hiari vaisiva mpovanto nkyi uaqlama nyatairerata hiama nkye nai uaqlama mwataate. Mpowanto i nraatokyai ntuteqa kyairera, hia nai ntuqtiraitira, mwia qaqlira kyairaro hini nraatokyavata ntuteqa kyaarive.

**40** Mpowanto i sioti vararero i vita varero ko nraamwuqi uro kyarero uti varirera, ena sioti mwiganrama kyairaro i vaaqatuavata varaarive.

**41** Mpowanto i antua kyero, Nte hu inraikyara quqira vaini mpona uro mataante, tirera, vara quqira uro nyianrani mwataante.

**42** Mpowanto mpo inraikyara i kyapara hirera, mwia mwiante. Mpowanto iara mpo inraikya mpiraqe qakyo varaqina nruru ina mwiankye tirera, eo tira mwia mwiante, tiro. Iesusiva turama.

*Nkyeta nramwutaahuara mwutukya vahirata variate tura*

(Ruku 6:27-28, 32-36)

**43** Iesusiva mwitaa timwa kyero timwa nyiqiro viro tiqaro: Haaru nkyi haivaqahua tu quara nkye riaarave. Mwihua mwataa turave: Ina nramwunaanranra nraahu i mwutukyavanto vahiarive. Nramwutaara uaqama mwatena vu nraatova vahiarive, turave.

**44** Kyai nte qaiqaa nkyi timwa nyiankye. Nkyeta nramwutaa mwihuara nkyi mwutukya vahirata variate. Nkyi uaqama nyatehuara Kotira kyapara hivaro mwiva mwihua kyaahaqama nyataarive.

**45** Nkye mwitaa hiqatama nkye nkyi sova nyaamwuni varira mwia nraaqiarama varivarave. Kotiva tiharo huarivanto kyuqe vaisiqaa itero uaquia hia vaisihuqa itairave. Kotiva vati vara kyaiharo vativanto ntapihi kyeta nrohi varia vaisihuqa tumihanro hia ntapihi kyeta nrohi varia vaisihuqa tuminrave. (Nkyevata nkyeta sova hintema kyeta kyuqe vaisiaravata qora vaisiaravata kyuqemaqita quate.)

**46** Nkyiara mwutukya vahiarihuara nraahu nkyi mwutukya vahirera, Kotiva nanra inraikyara rieqarove nkyi kyuqema nyataananro? Taakisi vare variahua mwihua hia kyuqe vaisi variqatavata mwihua nkyiari hena vaisiara mwutukya vahihata variarave.

**47** Nkye nkyeta nramwunaahua nraahu qua mwanteta kyauqu nyivera, nkye nanra kyuqe inraikyaqove Kotira qua hia riaahua nraatara kyevara? Nkye mwihua votima kyeta nraahuma varivarave.

**48** Nkyi sova nyaamwuni variva, mwiva hia uaquia hi kyaiqara utiraitiro, avuqavuma kyero nrohi varivave. Nkye mwia votima kyeta avuqavuma kyeta nrohiqata variqita quate tuqo, tiro. Iesusiva mwitaa turama.

## 6

*Vehi nraakye qora kyaahaqama nyate quara tura*

**1** Iesusiva mwitaa timwa kyero mwihua timwa nyiqiro viro tiqaro, Nkye mpohuara kyuqe hirerata, uqeta kyeta mwihua kyaahaqama nyataate. Hia qoqaa tiri mwahuta qiate titi mpohua kyaahaqama nyataate. Nkye vaisivanto taqaate titi, mpohua kyaahaqama nyataivera, nkyi sova nyaamwuni variva mwiva hia mwianra rieqaro nkyi mpo inraikya nyiananrove.

**2** E mpovanto mwi quara rieqara mpo inraikya vehi vaisi mwinrenra hiqara uqeta kyera mwiante. Hia nraakye qora suqaa nronraqama kyera aakyaraqitaira nraanrama kyera mwiante. Mpo vaisinramwuvanto kumwaanriqama kyeqata kyuqe kyaiqa vare variahua, mwihua mwaanra nraamwuqi variqatave, aanrani viqatave, nraakye qora suqaa nronraqama kyeta ntoma vuateqata nyaanrama kyeqata vehi nraakye qora munima nyi variarave. Mwihua hia vehi nraakye qora mwihuara nronraqama kyeta rieqata mwitaa hiavo. Mwihua tiri mwahuta qiate tiqata mwitaa hiarave. Nte nkyi timwa nyuquo. Mwihua nraakye qoravanto mwahuta timwa nyataavata vaakyama nkyiari kyoqaa vara kyaavo.

**3** E mpovanto munimave, mpo inraikyave, vehi vaisi mwinrenra hiqara uqeta kyera mwiante. I nraaqani variarivavata hia mwia mwinanra taqaarive.

<sup>4</sup> E mwitaa hiraro mwi inraikyava uqeta kyero vahiarive. Mwitaa hiraro i qova ekyaa uqeta vare varia kyaiqara taqe variva, mwiva mwianra rieqaro i kyugema mwataananrove.

### *Mwataama kyeqata Kotiravata qua qiate tura*

<sup>5</sup> Nkye Kotiravata qua tirerata kumwaanriqama kyeta kyuqe kyaiqa vare variahua hia mwihua hiante hiate. Mwihua mwahuta tirara qamwateqata mwihua mwaanra nraamwuqive, nraakye qora ntuvaantuama vita varia aanranraqaave, variqata Kotirara aakyara nte variarave. Nte qianinra riaate. Mwihua nraakye qoravanto mwahuta timwa nyataavata vaakyama nkyiari kyoqaa vara kyaavo.

<sup>6</sup> E mpovanto ena qora Kotiravata qua tirera enanraa varirera ena nraamwuqi vera ntera qesa tita tera uqeta kyera i qova uqeta varira vatama kyera qua qiante. E mwitaa hiraro i qova ekyaa uqeta vare varia kyaiqara taqe variva, mwiva i kyugema mwataananrove.

<sup>7</sup> Nkye Kotiravata qua tiqata hia qumina airi qua ntikara qiate. Mpo mwatanaahua hia Kotira qua riaa nraakye qorahua mwitaa ti variarave. Nkyevata mwihua hiante hivorave. Mwihua tiqata, Qaiqaavata qaiqaavata qumina qua qiararo tiri mwanriqavanto tiri qua qio riaananrove, qiarave.

<sup>8</sup> Nkye hia mwihua nraantantaate. Nkye hia Kotirara ntumwa hiamwa hia entara Kotiva vaakya nkye ekyaa inraikyara aara ntaara ntapihi kyaiho.

<sup>9</sup> Nkye qio mwataama kyeqata Kotiravata qua qiate:

Tiri tiqova, e nyaamwuni variaravave.

Tire kyuqema kyeta i nrutu kyuqera tuaaherauro.

<sup>10</sup> E tiriqaa ntaqikyina entava qamwanrama nrianrive.

Nyaamwunyaahua i kyakya hira vataqi quantema kyera e tiri kyaahaqa hiraqe tire mwatanu variarahuavata i kyakya hira vataqi quare.

<sup>11</sup> Tire mate kyara nraananra tiri timwiantre.

<sup>12</sup> Tiri apiqama timwa taavata tire mwi quara qaqlira kyaurantema kyera tire i apiqama mwatauna quara nruka timwa taante.

<sup>13</sup> Uaqia hi kyaiqava tiri mwataara hiankyo tira, e tiri tivita vare viraqe tire kyuqe hi aanranraqaa quare.

E tiri kyaahaqa hi variraro Saataaniva hia tiri uaqjama timwataarive.

[E vunyaava kepukyaqama kyera ntaqikyi variaravave. I nrutu nraahu tuaaheraqi quararo i nrutuvanto qati nraahu vahiqiro quananrove. Qutaave.]

Mwitaa timwa kyeqata Kotiravata qua qiate, tiro. Iesusiva turama.

<sup>14</sup> Mwitaa timwa kyero Iesusiva mwihua timwa nyinro tiqaro, Mpohua nkyi uaqjama nyataivata nkye qaqlira kyeta hia nkyiarivata uaqjama nyataivera, nkyi sova nyaamwuni variva, mwivavata nkyi uaqia hi quara qaqliram kyaananrove.

<sup>15</sup> Nkye mwihua uaqia hi kyaiqara utirara qati nraahu riemwaqi vivera, nkyi sovavata nkye uaqia hi kyaiqara uti quara qati nraahu riemwaqiro quananrove, tiro.

### *Kotirara rieqata kyara aurama te quara tura*

<sup>16</sup> Mwitaa timwa kyero Iesusiva tiqaro, Nkye kyara aurama tarera hita, hia unraqama kyeqata kyuqe kyaiqa vare varia vaisihua hiante hiate. Nraakye qoravanto mwihua kyara aurama tera taqe qata po qiate tita, mwihua ua viri rateqata nrohi variarave. Nte qianinra riaate. Mwihua nraakye qoravanto po timwa nyataavata vaakyama nkyiari kyoqaa vara kyaavo.

<sup>17-18</sup> E mpovanto kyara aurama tarera hiqara uqeta kyera aurama taante. Nraakye qoravanto iara qatima kyara nre variho qiate tira, ena viri hiqama kyera qiahi ntumwa kyera nrohiante. Mwitaa hiraro i qova uqeta variva ekyaa uqeta vare varia kyaiqara taqe variva, mwivama i kyugema mwataananrove.

*Nyaamwuni kyoqaa ntuvantua hirara tura*  
*(Ruku 12:33-34)*

<sup>19</sup> Hia mwaa mwataraqaa variqata kyoqaa ntuvantua taate. Mwaa mwataraqaa kyoqaa ntuvantua taavaro uapaa tove hakuavantove, puaataqataivave, mwi inraikyara nramwa kyero vara uaqiamma kye varirave. Mpuara vaisivantovata ntukuraa kyeqata mwi inraikyara vare variarave.

<sup>20</sup> Mwata mwaaqa vatera eqeta nyaamwuni uapaa tove hakuavantove, puaataqataarivave, mpuara vaisivantove, hia nkyi kyoqaa vara kyeta uaqiamma kyenani vataate.

<sup>21</sup> Nkye mwaa mwataraqaa kyoqaa ntuvantua taivera, nkye mwaa mwataraqaa vhiani inraikyarara nraahu mwutukya vahirata riemwaqita vivarave. Nkyi kyoqaa nyaamwuni ntuvantua viro vahirera, nkye nyaamwuni vhiani inraikyarara nraahu mwutukya vahirata nronraqama kyeta riemwaqita vivarave.

*Vuvanto omwa votima kyero iteqaro mwamwanta ntuvahama mwatero*  
*(Ruku 11:34-36)*

<sup>22</sup> Vuvanto omwa votima kyero iteqaro mwamwanta ntuvahama mwatero. I vuvanto kyuqema vahirera, ekyaa i mwamwantaqi kyuqema kyero ntuvahaananrove.

<sup>23</sup> I vuvanto uaquia hirera, i mwamwantavanto kyokiraqima vhiananrove. I utaqivata hia ntuvaharaitiro kyokira rirera, qikye, i utaqi anomma kyero kyokira ruanrove.

*Kotiraravata munimanravata tura*  
*(Ruku 16:13)*

<sup>24</sup> Kyaiqa vaisi mpovanto hiama qio kuaa vakya nronra vaisi taaratanaqaa kyaiqa varaanarove. Mwiva mwitaa hirera, mporara mwia mwutukya vahiraro mporara hia mwia mwutukya vhiananrove. Mwiva mpora qua riero mpora qua qoririma kyaananrove. E hiama qio Kotiravata munimavata kuaa vakya vataqira vinanrave.

*Hia mpo inraikyara uahivaro nkyi mwutukyavanto nronraqa hiarive tura*  
*(Ruku 12:22-31)*

<sup>25</sup> Mwi quara rieqanama nte nkyiara mwitaama tuqo, Nkye qati variqita virarave, kyara nrenranrave, nramanri nrenranrave, nkyeta nyamwantarave, tuavaaqa utirarave, hia mwi inraikyara mwi inraikyarara airi nraato tivaro nkyi mwutukyavanto nronraqa hiarive. Nkye qati variqi viva vuni vahiro kyara nreva nraakiaranima vaiho. Nkyi mwamwantavanto vuni vahiro nkye tuavaaqa ututeva nraakiaranima vaiho.

<sup>26</sup> Nyaamwa hiteta nrohi variahua taqaate. Mwihua hia kyara vara tu kyeta vantuqita uro nraamwuqi vate variarave. Nyaamwavanto variavaro nkyi sova nyaamwuni variva mwihua kyara ruara hirave. Nyaamwa qumina inraikyaqaa-vata Kotiva ntaqikyi variva nkyi nraakye qoraqaa hiave Kotiva kyuqema kyero ntaqikyianano?

<sup>27</sup> Nkyiqitairo ta vaisivave nte qamwanrama qutu quankyo tiro, qati variani entara mponramwu tomaqa taananrove? Hiama qio vaisi mpovanto mwitaa hiananrove.

<sup>28</sup> Nkye nanraqamave nkyeta tuavaaqa utirara nronraqama kyeta rie variavo? Maunra paira mwukyauqi vahirara rieqata variate. Mwi inraikyava hia kyaanta huvu kyero tuavaaqa haqire varirave.

<sup>29</sup> Nte nkyi timwa nyuqo. Haaru Soromoniva kyuqema kyero mwunruqama tova hia maunra pairavanto iteru ntuvahaira nraatara kyairave.

<sup>30</sup> Kotiva mwivama uakukyaqi vahi maunranra mwunruqama mwatairave. Mwi maunrava mate vahirata hura qia qura kyaivaro itamwa kyaananrove. Qio Kotiva qumina uakukyaqi pataqia vahi maunranravata mwunruqama mwataivara tiro, mwiva hiave nkyivata kyuqema kyero tuavaaqa utu nyataananrove? Qikye, Kotiva

nkyi kyaahaqama nyate variva varihata nkye hia mwianra kepukyaqama kyeta riaavo.

<sup>31</sup> Kotiva nkyi kyaahaqama nyate varirara tita, hia nkye nronraqama kye vu nraato tuqi viqata, Nanra kyarave nraananrave? Nanra nramanrive nraananrave? Nanra tuavaaqave utuananrave? timwaqita quata.

<sup>32</sup> Kotira qua hia riaa nraakye qorahua, mwihua mwitaa timwaqita vi variarave. Nkye hia mwihua nraantantaate. Nkyi sova nyaamwuni variva nkye ekyaa mwi inraikyarara aara ntaara ntapihi kyeroma variho.

<sup>33</sup> Nkye Kotiva nkyiqa ntaqikyianinranravata, mwiva nkyiara avuqavuma kye nrohiate qianinranravata, nronraqama kye riemwaqita quate. Nkye mwitaa hivaro Kotiva nkye aara nte inraikyaravata hini mwi inraikyaravata nkyi nyiananrove.

<sup>34</sup> Hura qovara hiani inraikyarara hia nronraqama kyeta riaate. (Nkye mate mwaa iherara variahuave.) Hura vari nraakye qorahua hura qovara hiani inraikyarara qio riemwaqita vivarave. Kuua enta kuua enta mwiva nanrianra muaanravata nraahu vahivave, tiro. Iesusiva turama.

## 7

### *Nkye hia mpore kyaiqa pupiteqata mwia kyaiqa tukya hiate tura (Ruku 6:37-38, 41-42)*

<sup>1</sup> Iesusiva mwitaa timwa kyero mwiva timwa nyiqiro viro tiqaro, Kotiva nkyita kyaiqavata tukya hiankyo tita, nkye hia uaqama vu nraato tiqata mpore kyaiqa tukyama kye mwiva mwitaa mwataa hivave qiate.

<sup>2</sup> Nkye mpore kyaiqa tukyama kyeta mwitaa mwataama vahirave tivaro Kotiva nkyita kyaiqavata tukyama kyero mwitaa mwataama vahiravema qiananrove. Nkye mpohua kyaiqa tukya hira kuua mwivauma Kotiva nkyitavata tukya hiananrove.

<sup>3</sup> E nanraqamave mwata mwumwuvanto ena qata vakya vuqi viqetaira taqe-qarama hia ena vuqi kyatari aka nronravanto viqetaira taqera hiaro?

<sup>4</sup> Kyatari aka nronravanto i vuqi viqetero vaihara nanraqamave ena qata vakyaara kyaiqe i vuqitaina mwata mwumwu qatinani venta kyaankye ti variaro? Hia mwitaa qianta.

<sup>5</sup> E kyuqe kyaiqa varauqo tiqara unraqanraa hi variaravave. Tauraaqama kyera ena vuqitaira kyatari aka venta kyera mwiaqaataira kyuqema kyera taqe-qarama ena qata vakya vuqitairavata qio mwata mwumwu venta kyenanrave.

<sup>6</sup> (Mpo hia vaisihua quara vairi votima kyeta variarave.) Nkye Kotirani kyuqema kyero kyotataqama vahiani inraikyara hia vairi mwiante. Nkye kyuukyukyakaara hia quara hianani kyaate. Nkye mwitaa hivaro mwi inraikyara ntamwa ntautiqama kyero mwiaqaatairo tuqasaa viro nkyita kutuananrove.

### *Iesusiva Kotira kyapara hiate tura (Ruku 11:9-13)*

<sup>7</sup> Nkye Kotira kyapara hivaro mwiva mwi inraikyara nkyi nyianrive. Nkye puaamaqi vitama qio mwi inraikyara puaama kyevarave. Nkye qesa ntukutivaro Kotiva qatua nyataarive.

<sup>8</sup> Kotira mpo inraikyara kyapara hiariva qioma varaananrove. Mpo inraikyara puaamaqiro quariva qioma taqaananrove. Qesa ntukuakua hiani vaisira qatuama mwataananrove.

<sup>9</sup> Nkyi nraaqiara sohuaqitairo tavave mwia mwaaquvanto qamaanra nyaanru tiraro mwia qova ori mwiananro? Mwia qova hiama mwitaa hiananro.

<sup>10</sup> Mwia mwaaquvanto tavukyara nyaanru tiraro mwia qarurave mwiananro? Mwiavata hiama mwitaa hiananro.

<sup>11</sup> Nkye hia kyuqe hia nraakyе qorahua variqatavata nkye nkyeta nraaqiara kyuqe inraikya nraahu nyi variarave. Nkyi sova Kotiva mpo? Nkyi sova nyaamwuni variva nkyi nraatara kyero mpo inraikyara nyaanru qiani vaisira kyuqe inraikya nraahu mantaquma kyeroma mwiananrove.

<sup>12</sup> Nkye mpohuara tiri mwitaa mwataama kyeta kyuqema timwataate tintema kyeta nkye mwihua mwitaama nyataate. Mosesivavata poropeti vaisinramwuvata timwato quava mwia okyara mwitaamama vahiro.

*Aanra taaratanaanra tura*  
(Ruku 13:24)

<sup>13</sup> Qesa taaratana vahirave. Mpo pata vaiharo mpo nronra vahirave. Nkye qesa pata mwina nraahu quate. Nraakyе qora ekyaara taiqa vinaniara qua aanrava, aanra nronra qihakya hiva vaiharo mwi aanranraqaanaa qesavantovata nronra vahata nraakyе qora airivanto qesa mwina vi variarave.

<sup>14</sup> Nraakyе qora ekyaara enta kyuqema kyeta qati nraahu variqita quananianra, vi qesava pataqia vaiharo mwiminamate qua aanravavata pataqia mwukyaari tukye qua aanrava vahata kuaiqia kuaiqia vairima vahata nraahu mwi aanranra puaama kyeta vi variarave.

*Unra qua timwa nyi vari vaisihuara tura*  
(Ruku 6:43-44, 13:25-27)

<sup>15</sup> Vaisi imponramwuvanto tiqata, Tire Kotira qua nkyi timwa nyi varuro, tiqata unra ti variahua mwihua nyaatu rauriqata variate. Mwihua sipisipi nraantantamwa kyeta nrohiqatavata mwihua mwaatira utaqi qaakyau vairima variarave.

<sup>16</sup> Nkye mwihua nrohi varira taqetama mwihua qora okyara ntapihi kyevarave. Vaisivanto uaini tamwa hiqirero mwiva hia auqururoraqaatairo hiqirave. Mwiva fiki tamwa hiqirero hia uvi auqu vataa kyataripaatairo hiqirave.

<sup>17</sup> Mwia votima kyero kyuqe kyatarivanto kyuqe tamwa nraahu rie variharo qora kyatarivanto qora tamwa nraahu rie varirave.

<sup>18</sup> Kyuqe kyatarivanto hiama qora tamwa riaananrove. Qora kyatarivanto hiama kyuqe tamwa riaananrove.

<sup>19</sup> Kyatari hia kyuqe tamwa riaira mwia teqa kyeta qiaqi tuto kye variarave.

<sup>20</sup> Nte qaiqaa nkyi timwa nyuqo. (Unraqama kye tiqata, Tire Kotira qua timwa nyi varurahuave, qaihua nkye mwihua nrohi varira taqetama mwihua qora okyara ntapihi kyevarave, tiro.) Qio nkye mwi vaisihua varaqita vi kyaiqara taqetama nkye ntapihi kyeta mwihua qora kyaiqa taqevavarave tuqo.

<sup>21</sup> Hia ekyaara nraakyе qora nianra tiri nronravantove ti varihua Kotiva ntaqikyiani mwatuqyaraqi vivarave. Ni kova nyaamwuni varira mwia qua riemwaqiro quariva, mwiva nraahuma mwia mwatuqyaraqi quananrove.

<sup>22</sup> Nraakiara ekyaara entaqaa nraakyе qora airivanto nianra tiqata, Po, nronrao, nronrao, i nrutu nteqata Kotira qua ti variavanarave. I nrutu nteqata tire vaisiqitai vaana airi siteta i nrutu nteqata nronra kyaiqa varavanarave, tivarave.

<sup>23</sup> Mwihua mwitaa tivaqena nte, Qaqao, hia nkyi taqauhuave. Nkye qora kyaiqa vare variahuave. Niqaataita nyianrani quate, qianinrave.

*Nraamwu taaratanaanra tura*  
(Ruku 6:47-49)

<sup>24</sup> Ni qua riero nte tuntema kyero vare variani vaisira okyara nkyi timwa nyinrenrave. Mwi vaisiva vu nraato vataava kepukya nraamwu hoqa taani vaisira votima kyeroma variananrove.

<sup>25</sup> Mwi vaisiva oriqa nai nraamwu hoqa tairara tiro, vativantove, humwunravantove, toqa vaururuvantove, nronraqama kyero nteqaro mwia venta kyaaninrave tiharovata mwi nraamwuva hia tuma ntiraitiro, kepukyaqama vahirave.

<sup>26</sup> Ni qua riero qaqira kyero hia nte tuntema kyero variani vaisira okyara nkyi timwa nyinrenrave. Mwi vaisiva hia vu nraatovata vahiva nai nraamwu nruqasata hoqa taani vaisira votima kyero variananrove.

<sup>27</sup> Mwi vaisiva nai nraamwu nruqasata hoqa tairara tiro, vativantove, humwunravantove, toqa vaururuvantove, nronraqama kyero nteqaro mwia nraamwu venta kyaiharo nraamwuvanto tuto ntiharo humwunravanto raaqu kyairarama tuqo, tiro.

<sup>28</sup> Iesusiva mwi quara mwi quara mwihua timwa nyi taiqa kyovata nraakye qora mwini ntuvaantuama vuhua tiqata, Qikye, mwiva nraahumwa mpo qarama kyero qua ti variho.

<sup>29</sup> Mwiva hia mwaanra okyara ti varia vaisihua timwa timwiantema kyero timwa timwiho. Mwiva nronra vaisivanto qiantema kyeroma ti variho, tita tura.

## 8

*Tauma rumpuaravanto uaqlama kyo vaisira Iesusiva kyuqema kyora  
(Maaki 1:40-44; Ruku 5:12-14)*

<sup>1</sup> Iesusiva mwakyaakya timwa nyi taiqa kyero taaqi mwia mwini kyero tumi varuvata nraakye qora airivanto mwia nraakiara mwia vataqi vi varura.

<sup>2</sup> Vi varuvaro vaisi mpovanto tauma rumpuaravanto uaqlama kyova uro Iesusira vuqaa tori kyauru raviro variro tiqaro, Nronrao, e ni kyaahaqa hiataa hirera, e qioma ni rumpuara kyuqema matenanrave, tiro.

<sup>3</sup> Mwitaa tuvaro Iesusiva nai kyauqu mpiami mwia mwamwantaqaa vatero tiqaro, Nte kyaahaqa hiataa ihana nte i mwitaama mwatarerave. Nte i rumpuara tavanta quarive tuqo, tuvaro mwia rumpuaravanto mwia mwamwanta vauruqiro vuva qamwanrama kyero tavanta vuvaro mwiva qio varura.

<sup>4</sup> Mwiva qio varuvaro Iesusiva mwia timwa mwinro tiqaro, Hia mpohua timwa nyinraitira, viraro Kotira kyaiqa vara mwate variari vaisiva i mwamwanta taqaarive. Mwiaqaataira e Mosesira mwaanra qua rieqarama munra quani qiara quratarata nraakye qoravanto iara tiqata, Qutaama mwia mwamwantavanto kyuqema viho, qiate, tiro.

*Iesusiva ntaqi varu vaisira mwia kyaiqa vaisi kyuqema mwatora  
(Ruku 7:1-10)*

<sup>5</sup> Iesusiva mwitaa timwa kyero Kapenaamini vuvaro Romeni vaisivanto 100 ntaqu vaisihuaqaa ntaqikyi varuva Iesusira uro qintorama kyero po kye tiro tiqaro,

<sup>6</sup> Nronrao, ni kyaiqa vaisi mwamwantavanto hia qakyaa iharo nronraqama kyero nriqa viharo variho, tiro.

<sup>7</sup> Mwitaa tuvaro Iesusiva tiqaro, Qio nrinraqetana mwiva hinani quarahua nte uro mwia kyuqema kyaankye, tiro.

<sup>8</sup> Mwitaa tuvaro nronra vaisi mwiva qaao tiro, Nte kyuqe vaisi variariravauma e ni nraamwuqi qio vinanrave. E mwaini variqara mwianra kyuqema quante tiraro mwiva kyuqema quarive.

<sup>9</sup> Nte i votima kyena vaisiqaa ntaqikyi varuvave. Nte ntaqi vaisira mpora quante tuqaro mwiva virave. Nte mpora nriante tuqaro mwiva nrinrave. Nte ntenu kyaiqa vaisiara mwitaa hiante tuqaro mwiva mwitaa hirave, tiro.

<sup>10</sup> Vaisi mwiva mwitaa tuvaro Iesusiva qikye timwa kyero tuqasaa viro nraakye qora mwia vataqita nruhuara tiqaro, Nte nkyi timwa nyianinra riaate. Mwi vaisiva mpo mwatanaava variqaro nronraqama kyero nianra rieqaro nianra mwiva qioma ni kyaahaqama mataananrove tirave. Hia nte mwiva tintema kyero qua ti vaisira Isarerisaisiqitaina mpo puaama kyauquo.

**11** Mwaa quara riaate. Nraakiara nyianra mponasai mponasaita nraakye qora airivanto Kotira mwatuqyaqi nruru variqata mwihua nkyi haivaqara Evarahaamunravata, Aisaakiravata, Iaikopuravata variqata kyara nrevarave.

**12** Mwihua varivata mwaa mwatanaahua tire Kotira nraakye qorama varuro ti variahua, mwihua mwi kyarara uro nraanre tivarо mwihua ntavaaqavu kyero mwaaqani mwaati tuto kyairata mwihua kyokira ruaninraqi varita ntateqata nkyiari aanrai teti nreqata varivarave, tiro.

**13** Iesusiva mwitaa timwa kyero nronra vaisi mwianra tiqaro, Ena mwaatani quante. E nianra ni kyaahaqama materavave qiananranra tiro, i quavanto mwivauma vahiananrove, tiro. Mwitaa tuvaro mate mwipiara mwia nrotuavata mwia kyaiqa vaisi nriqa vuva taiqa vuvaro qio varura.

*Pitaara nrinraatarara kyuqema kyora*

(Maaki 1:29-31; Ruku 4:38-39)

**14** Iesusiva Pitaara nraamwuqi uro ntero taqovaro Pitaara nrinraatarara mwia mwamwanta qiara utovaro vaite varuvaro

**15** Iesusiva uro mwia kyauquqaa tu varovaro mwia nriqa vuva taiqa vuvaro mwi nraakyeva siviro mwihua kyara uta nyinrenro uti varura.

*Nraakye qora airintikara kyuqema nyatora*

(Maaki 1:32-34; Ruku 4:40-41)

**16** Iesusiva mwini varuvaro entama vuvata mwi mwatanaahua vaanavanto utaqi varuhua sitaqita Iesusiva varunani uro kyovaro Iesusiva quaqtairo vaana titamwa kyovata nritareta vuvaro Iesusiva nriqa vuhuavata kyuqema kyovata qio varura.

**17** Iesusiva mwitaamaqiro vuvaro Aisaiaava poropeti vaisivanto haaru timwato quava qutaa mwivau vahura. Aisaiaava Iesusira okyarara mwitaama tiro:  
Mwi vaisiva tiri nriqa quaninra taiqa kyaananrove.

Mwiva tiri nriqa quaninra kyuqema kyaananrove, tura.

(Aisaiaa 53:4)

*Iesusira vataqi virerata uti varuhua*

(Ruku 9:57-60)

**18** Iesusiva taqovata nraakye qora airivanto ntuvaantuama vita mwia vara ututu varuvaro Iesusiva tiqaro, Kyai kyaareraqaa qareta vutura hini tokyani uro variare, tura.

**19** Qakyo mwini virera huvaro vaisi mpovanto mwaanra okyara ti varu vaisiva uro ntero Iesusirara tiqaro, Mwaanra ti variarao, nte i nraaqiara varirerave. E mpona mpona vinanra nte ivatama kyena nraahu virera teramama varuqo, tiro.

**20** Mwitaa tuvaro Iesusiva mwia timwa mwinro tiqaro, (E ni pataqira virera hiqara paparuqa hivorave.) Qaakyau vairivanto nkyiari nruaunrutaaraqi vaite variarave. Nyaamwavanto nkyiari nraamwuqi vaite variarave. Nte mwatani mwatatai nraaqiarava vaitaani nraamwuva hia vaiho, tiro.

**21** Iesusiva mwitaa tuvaro mwia vataqi nrohi varu vaisiva mpovanto tiqaro, Nronrao, kyai nte ntene kora nraante uro quntamwa kyena nritarena i vataqi quankye, tuyaro

**22** Iesusiva qaqao tiro, E ni pataqira nriante. Qutu qua vaisihua votima kye variahua qioma qutu quani vaisira quntamwa tevarave, tiro.

*Iesusiva toqa vaururuara qao tuvaro tirema vahura*

(Maaki 4:36-41; Ruku 8:22-25)

**23** Iesusiva mwitaa timwa kyero mputuqi mwaanri ntovata mwia nraaqiaranramwuvanto mwiatama kyeta vurama.

**24** Mwihua kyaarera mwiaqaa vi varuvaro mate mwipiara toqa vauruvanto kyaareraqaa nronraqama kyero tiqaro nramanri ventaqiro nri vi varuvaro nramanrivanto

mputuqi mwaanri ntero mputu rauru kyarero uti varura. Mwihua rauru kyaaqara hi varuvaro Iesusiva mwiqi vaite varuvata

<sup>25</sup> mwia nraaqiaranramwu Iesusiva vaitonani uro mwia vaurama kyeta tiqata, Nronrao, sivira tiri kyaahaqa hiante. Tire nramanri nreta qutuarava pataqia vaiho, tita.

<sup>26</sup> Mwihua mwitaa tuvaro Iesusiva tiqaro, Nkye nanraqamave aatu hiavo? Nkye nianra kepuqyaqama kyeta riaataara vaihata hia mwitaa hiavo, tiro. Mwitaa timwa kyero Iesusiva siviro toqa vaururuaravata, nramanrianravata tiqaro, Qio eqaante, tuvaro nramanrivanto itomwi viro tirema vahurama.

<sup>27</sup> Tirema vahuvata mwia nraaqiaranramwuvanto nro qaqaama tetu kyaauqu ntukik-inraaqata kyeta tiqata, Qikye, mwiva nataa hi vaisivave variho? Toqa vaururuvantavata nramanrivantovata mwia qua rie variho, tura.

### *Iesusiva vaisi taaratana utaqitairo vaana titamwa kyora*

(Maaki 5:1-17; Ruku 8:26-37)

<sup>28</sup> Mwihua mwitaa timwa kyetama mputuqi vuhuama vutura qarahi hini Kataraani uro ntovata vaisi taaratana vantu mwihua uro qintorama kyora. Mwitanahua vaana kyapata varutanahua vaisi quntamwa tora ori ataamwuqi variqata mwitanahua mpoqama kyeta vaisi ntuqutirerata uti varuvata nraakye qoravanto mwitanahua nyaatu aatu hiqata hia mwitanahua varu aanranra mwini vi varura.

<sup>29</sup> Mwitanahua ori ataamwuqitaita uro Iesusira qintorama kyeta aakyara nteta tiqata, E Kotira mwaqvavantove. Tiritana nataa hirerarave nrianro? Tiritana ruari entava hia nrihanra e qamwanrama kyera tiritana rirerarave nrianro? tita.

<sup>30</sup> Mwitanahua mwitaa tuvaro vutura mposata quara airivanto uhiqa nre varuvata

<sup>31</sup> vaisi taaratana utaqi varu vaanahua Iesusirara po tita tiqata, E tiri titairera e tiri titairaqe tire quaraqi uro variare, tita.

<sup>32</sup> Mwitaa tuvaro Iesusiva qio quate tuvata mwihua nritareta uro quaraqi varuvata quara mwihua hianteta okai qoraqhuraqi tutontita nramanriqi ntumwa vita nramai nreta qutu vura.

<sup>33</sup> Mwitaa huvata quaraqa ntaqikyi varuhua taqeta hianteta uro mwatukya nronraqi quara qutu vuhuara timwa nyita vaana utaqi varu vaisitananravata timwa nyuvata

<sup>34</sup> mwi mwatukyaraqinaahua ekyaa mwihua Iesusira hunta kyarerata vuhua uro nteta mwianra tiqata, Po, e hia tiri mwaata mwaini variante. Sivira mwaqaataira quante, tita.

## 9

### *Iesusiva hini mwamwanta qutu vu vaisira kyuqema kyora*

(Maaki 2:1-12; Ruku 5:17-26)

<sup>1</sup> Mwihua mwitaa tuvaro Iesusiva mputuqi mwaanri ntero nrumu ntantero nramanriqaama tero nai mwaatani uro ntora.

<sup>2</sup> Uro ntovata vaisi mponramwuvanto vaisi mpo hini mwamwanta qutu vura taintamaqita Iesusiva varunani uro kyovaro Iesusiva ntapihi kyovata mwi vaisinramwuhua nkyiari nraahu tiqata, Qutaama mwi vaisira kyuqema kyaananrove, tu vaisihua varuvaro mwiva hini mwamwanta qutu vu vaisirara tiqaro, Ni maaquo, kepuqyaqama kyera variante. E Kotira qua nteqa kyaananra nte nrukama mwatauqo, tiro.

<sup>3</sup> Iesusiva mwitaa tuvata mwaanra okyara ti varu vaisinramwuhua qaqao timwa kyeta nai timwa mwi nai timwa mwi hita tiqata, Mwaa vaisiva mwitaa tiqaroma Kotirara uaquia hi quarama ti variho, tita.

<sup>4</sup> Mwihua mwitaa tuvaro Iesusiva mwihua su nyaatoqi vahu quara ntapihi kyero mwihuara tiqaro, Nanraqamave nkye uaquia hi quara nkyeta su nyaatoqi mwitaama kyeta riaavo?

<sup>5</sup> Nkye nianra tiqata, Mwiva qumina vaisi variqarora tiro, hiama qio nai hena vaisivanto Kotira qua nteqa kyaaninra nruka mwataananrove, qiarave. Qio mpo kyaiqa mpo? Qiove nte mwaa vaisira kyuqema kyaaninrave? Nkye ni timwa mpivaqe riaankye, tiro.

<sup>6</sup> Jesusiva mwitaama kyero ntumwahiamwama nyatero mwihuara tiqaro, Nte mwatani mwatatai nraaqiaravama varuqaro ni nronraqama kyaihana nte qioma mwatani variqana vaisivanto Kotira qua nteqa kyaaninra nruka mwataaninrave. Nkye ni quara qutaa quave qiate tina, nte mwaa vaisirara mwataa tirerave, tiro. Mwitaa timwa kyero Jesusiva hini mwamwanta qutu vu vaisira mwianra tiqaro, Sivira ena taintavata tu varera ena mwaatani quante, tiro.

<sup>7-8</sup> Mwitaa tuvaro mwi vaisiva siviro nai mwaatani vuvata mwini ntuaantuama vuhua mwi kyaiqara taqeta aatu hita Kotira nrutu tuaahereta tiqata, Kotiva mwi vaisira kepuqyama kyaiharo mwi kyaiqara varaiho, tita turama.

*Iesusiva Matiura nraanrama kyero vitora  
(Maaki 2:13-17; Ruku 5:27-32)*

<sup>9</sup> Jesusiva mwiaqaatairo vuva viqaro taqovaro vaisi mpovanto Matiuba taakisi vareqaro haraara nraamwuqi varuvaro mwiva mwianra tiqaro, Ni pataqira nriante, tuvaro Matiuba siviro mwia vataqiro vurama.

<sup>10</sup> Mwia vataqiro vuvaro Jesusiva nai nraaqiaranramwu kyapata uro Matiura nraamwuqi kyara nre varuvata airi vaisi taakisi vare varuhuavata, uaquia hi kyaiqara uti varuhuavata, Jesusira vatama kyeta kyara nre varura.

<sup>11</sup> Nre varuvata Parisi vaisinramwuvanto mwihua taqeta Jesusira nraaqiaranramwuanra qaqao tita, Nanraqamave nkyi nronravanto taakisi vare variahuvata, uaquia hi kyaiqara uti variahuvata, kuaaqi kyara nre variho? tita.

<sup>12</sup> Mwinramwuhua mwitaa tuvaro Jesusiva tiqaro, Qati variahua hia totaava hinani vi variarave. Nyiqa vihua nraahu totaava hinani vi variarave.

<sup>13</sup> Tire ntapihi kyeta nrohi varurahuave qiahua hia nte mwihua nyaanranrenra tumuvave. Nte uaquia hi kyaiqara uti varia nraakye qorahua nyaanranrenra tumuvave. Kotira mpukuqi qara ntumwato quava Kotirara mwitaama tiho:  
Vaisivanto quara rukyero mpianinranra  
hia nte mwianra qamwataaninrave.

Vaisivanto mporara po kye timwa mwateqaro kyaahaqama mwataaninra  
nte mwianrama qamwataaninrave, turave. *(Hosaiia 6:6)*

Nkye mwi quara okyarara nraato tita uro puaama kyeta taqeta riemwaqita quate, tiro.

*Kyara aurama terara Jesusira kyapara hura  
(Maaki 2:18-22; Ruku 5:33-39)*

<sup>14</sup> Jesusiva mwitaa tuvata Ioninra nraaqiaranramwuvanto Jesusiva hunani uro nteta mwia kyapara hita tiqata, Tirevata, Parisi vaisinramwuvantovata, kyara aurama te varuro. Nanraqamave i nraaqiaranramwuvantovata hia kyara aurama taraitita, qati kyara nre variavo? tita.

<sup>15</sup> Mwitaa tuvaro Jesusiva mwihua timwa nyinro tiqaro, Nraakye varaari vaisiva nai vataahuavata varirera, tavave mwia vataahua mwihuara kyara aurama taate qiananro? Qaqao, hia mpovanto mwitaa qiananrove. Mpo enta nri ntairata mwihuqaqitai nraakye varaani vaisira vara qatinani kyairata mwi entaraqaataitama mwia vataahua ntateqata kyara aurama tevarave, tiro.

*Hia haaruua okyaravata qaraakya okyaravata kuaaqi tutaate tura*

<sup>16</sup> Mwitaa timwa kyero Jesusiva mpo quaqaa ntumwa kyeqaro timwa nyinro tiqaro, Mpovanto tuavaaqa nrihi ntupema vira haqirarerero hiro hiama qaraakya tavuna toqa

kyero mwiaqaa taaqau tero haqiraananrove. Nraakiara tuavaaqa mwia higairaro qaraakya tavuna haqirama taariva viro qiquqama viraro nrihi tuavaaqa mwivavata nronraqama kyero ntupe hiankyo tiro, hia mwitaa hirave.

<sup>17</sup> Qaiqaa tirerave. Hia mpovanto qaraakya uaini tati kyero memenra pahiqo ututai taqura haaruaa taquqi qaiqaa vara kyero raurirave. Mpovanto mwitaa hirera qaraakya uainivanto tapitero taqu mwia takuma viraro qatinani ntamwa viraro taqu mwivavata uaqima quananrove. Mwitaa hiankyo tiro vaisivanto memenra pahiqo ututai taqura qaraakya taqu vara kyero qaraakya uaini rauri variharo uainivantovata taquvantovata qio vahirave, tiro.

*Mwaanra nraamwuqaa ntaqikyi varu vaisira nraamwunranravata nraakye mpovata tura*

(Maaki 5:22-43; Ruku 8:41-56)

<sup>18</sup> Iesusiva mwitaa ti varuvaro mwaanra nraamwuqaa ntaqikyi varu vaisiva mpovanto uro Iesusira vuqaa tori kyauru raviro tiqaro, Ni naamwunravanto qutuma viho. E nrinra ena kyauqu mwiaqaa vatairaro qati siviro variarive, tiro.

<sup>19</sup> Mwitaa tuvaro Iesusiva siviro nai nraaqiaranramwu kyapata mwi vaisira vataqiro viro.

<sup>20</sup> Aanraqaa vi varuvaro nraakye mpovanto nriqa vuvaro 12 ihiara qati nraahu tora taqamwaqiro vu nraakyeva Iesusira mwoqani uro variqaro Iesusira vaaqa viti kyaatu kyero.

<sup>21</sup> Mwi nraakyeva nai riero tiqaro, Nte mwia vaaqa viti kyaatu kyaariro ni nriqa viva taiqa viraqe qioma varianinrave, timwa kyero Iesusira vaaqa viti kyaatu kyora.

<sup>22</sup> Kyaatu kyovaro Iesusiva tuqasaa viro mwia taqero tiqaro, Ni naamwunravo, kepuqyqama kyera variante. E nianra ni kyaahaqa hiarivave qiararoma i mwamwantavanto kyuqema viho tuvaro mate mwiqiara mwi nraakyeva kyuqema viro varura.

<sup>23</sup> Iesusiva vuva uro mwaanra nraamwuqaa ntaqikyi varura mwia nraamwuqi vera ntero taqovata mpo uhua po kye tiqata ntate ntoma vaarara vuate varuvata mpo uhua nronraqama kyeta ntate varuvaro

<sup>24</sup> Iesusiva tiqaro, Nkye tumitareta quate. Mwi qiaatarava hia qutu viho. Qati vaitema variho, tuvata mwihua nai mwianra nraahu raima mwatora.

<sup>25</sup> Iesusiva mwihua sitovata veva ntovaro mwi qiaatarara vatoraqi vera ntero mwia kyauquqa tu varovaro mwi qiaatarava qati sivura.

<sup>26</sup> Iesusiva mwitaa hu quava ekyaa mwi mwataraqi viro nrinro huvata ekyaa riemwa ntora.

*Iesusiva vaisi taaratana su qipa vuhua ntapairi kyora*

<sup>27</sup> Iesusiva mwiaqatairo aanraqaa vuvata vaisi taaratanaavanto vu qipa vu tanahua mwia vataqi vita mwia nraanramaqita vita tiqata, Ntevitira mwaquo, qati tiritanana po kye timwa timwataante, tita.

<sup>28</sup> Mwitanahua mwitaa timwaqita vuvaro Iesusiva nraamwuqi vera ntero varuvata mwitanahua mwiva varunani uro ntovaro Iesusiva mwitanahua kyapara hiro tiqaro, Nkyetana nianra quataave mwiva tiritana tivu ntapairi timwataananroveve qiafo? Tivaqena riaankye, tuvata mwitanahua, Nronrao, eo, tita.

<sup>29</sup> Mwitanahua mwitaa tuvaro Iesusiva mwitanahua suqaa nai kyauqu vatero tiqaro, Nkyetana nianra quataa mwitaa hiananrove qiavenama nkyitana su ntapairi nyatauqo, tuvaro

<sup>30</sup> mwitanahua suvanto ntapairi vuvata qio taqeta. Mwitanahua qio taqe varuvaro Iesusiva kepuqyqama kyero timwa nyinro tiqaro, Hia mwi quara mpohuavata timwa nyiate, tiro.

<sup>31</sup> Iesusiva qao tu quara mwitanahua qaqlira kyeta uro mwi quara mpohua mpohua timwa nyiqi vi varuvaro mwi quava mwi mwataraqi viro nrinroma vura.

*Iesusiva hia qua tu vaisira kyuqema kyora*

<sup>32</sup> Mwitanahua vuvata vaisi mponramwuvanto nkyiari hena vaisi mpo vitaqita uro Iesusiva varunani kyora. Vaanavanto mwi vaisiraqi varuvarora tiro, mwiva hia qua tuvata mwia vitaqita Iesusiva varunani uro kyovaro

<sup>33</sup> Iesusiva vaana mwia titovaro nrinarovaro mwi vaisiva qua tuvata nraakye qora mwini ntuvantuama vuhua, Qikye, tire Isarerivanto haaruvata hia mwataa hi kyaiqara taqaunanrave, tita.

<sup>34</sup> Mwihua mwitaa tuvata Parisi vaisinramwuvanto qaqao, tita. Vaana vunyaava mwia kyaahaqa hi variharoma Iesusiva vaana site variho, tura.

*Iesusiva nraakye qorara po timwa nyatora*

<sup>35</sup> Iesusiva mpo mwatukya mpo mwatukya nronra mwatukyaqvata pata mwatukyaqvata nrohiqaro mwaanra nraamwuqi vera ntero variqaro Kotiva nraakye qoraqaa ntaqikyiani quara kyuqe qua timwa nyiqiro viqaro mpo qara mpo qarama kyero nriqa vuhuavata kyuqemaqiro vura.

<sup>36</sup> Mwiva mwitaamaqiro vi varuvata nraakye qora airivanto mwiva hunani ntuvantua hita vita nrita hi varuvaro Iesusira mwutukyavanto mwihuara ua huvaro mwiva tiqaro, Po, vaisivanto hia ntaqikyi varihata sipisipinramwu nkyiariara api nrohita hia qio nkyiari kyaahaqa hiraitita, pupohaihata varia sipisipihua votima kyetama mwaa nraakye qorahua nrohi variavo, timwa kyero mwihuara po kye timwa nyatero.

<sup>37</sup> Iesusiva nraakye qorara po kye timwa nyatero nai nraaqiaranramwuanra tiqaro, Taqaate, kyara airivanto keko tihata mwia vantu vareta nrihua hia airivanto variavo.

<sup>38</sup> Nkye aakyo qora kyapara hivaro mwiva kyaiqa vaisi mponramwuvata sitairata uro kyara vantuate, tiro. (Iesusiva kyara keko tiho tura mwiaqaa ntumwa kyero nraakye qorara tura.)

## 10

*Iesusira nraaqiara 12 nramwu nyutu*

(Maaki 3:13-19; Ruku 6:12-16)

<sup>1</sup> Iesusiva nai nraaqiara 12 nramwu nyaanrama kyero sita vatero mwinramwuhua nraakye qoraqitaita vaana siteta nataa nataama nriqa quarihuave kyuqema nyataate tiro, mwiva mwinramwuhua nronraqama kyora.

<sup>2</sup> Mwiva nronraqama kyo vaisihua nyutu vahirero:

Vuni Saimoninra. mwia nrutu mpo Pitaara,

mwia qata Enturura,

Sepetira mwaaqu Iemisira,

Iemisira qata Ioninra,

<sup>3</sup> Piripira, Pataromiunra, Tomaasira,

Matiura taakisi vare varu vaisira, Arapiaasira mwaaqu Iemisira,

Tatiaasira,

<sup>4</sup> Saimoninra. mwia nrutu mpo Serotira,

Iutaasi Isikeriotira. mwiva Iesusira nramwutaahua suqaa qovarama kyo vaisira.

*Iesusiva nai nraaqiara 12 nramwu kyaiqa nyinro sitovata vura*

(Maaki 6:7-13; Ruku 9:1-5)

<sup>5</sup> Iesusiva nai nraaqiara 12 nramwu sitero qua timwa nyinro tiqaro, Nkye vihuama hia mpo mwatanaa mwaatani quate. Hia Sameriaa nraakye qora mwatukyaqvata quate.

<sup>6</sup> Nkye hia mwini viraitita nkye sipisipivanto raupirima viva apiqama vintema kyeta variahua Isareris nraakye qoraqi nraahu quate.

<sup>7</sup> Nkye uro variqata mwitaamama timwa nyiate. Kotiva nkyiqa ntaqikyiariva nkyi qaumatoma nri ntaiho, qiate.

<sup>8</sup> Nkye nriqa vihua kyuqema nyataate. Nkye qutu vihua sivuma kyaate. Nkye mwamwanta vauruqiro quani tauma rumpuarava vaisiqaa vahianinra nruka nyataate. Nkye vaanavanto vaisi utaqi variahua sitaivata nritaraate. Nte hia nkyiara munimanra nyaanru tiraitina qati nkyi nronraqama kyaurara tita, nkyevata nraakye qora qatima kyuqema nyataate.

<sup>9</sup> Hia nronra munimave, pata ori munimave, ntumwa vareta quate.

<sup>10</sup> Nkye virera hita hia kyara tuaqi ntita, tuavaaqave, kyuqu nraamwuve, kyauruve, mwi inraikyara hia vararaitita, qatima quate. Nkye kyaahaqama nyatarera ihua mwihuama nkyiqa ntaqikyiate.

<sup>11</sup> Nkye nronra mwatukyaqive, pata mwatukyaqive, uro ntetama nkyi qamwata nyataani vaisira puaama kyetama mwia nraamwuqi nraahu variqita vita mwi mwatukyara kyetama quate.

<sup>12</sup> Nkye nraamwuqi vera ntarera hita, mwiqi varihua qua mwanteqatama, Nkyi mwutukyavanto qihakya hirata variate, qiate.

<sup>13</sup> Nkye mwitaa tivata mwiqi varihua nkyi kyuqema kyeta sita vataivera, Kotiva mwihua mwutukya qihakya nyataananrove. Mwihua hia nkyi kyuqema kyeta sita vataivera, Kotiva mwihuaqitairo mwutukya qihakya hira mwia vara kyaananrove.

<sup>14</sup> Mpo nraamwuqinaahuave, mpo mwatukyaqinaahuave, hia nkyi qamwata nyateta hia nkyi quavata riaivera, nkye nkyetaqaatai ntuvengrauma kyeta mwi mwatukyaraq tuto kyeta quate.

<sup>15</sup> Nte qutaaqama kyena nkyi timwa nyianinra riaate. Nkyi qua hia rie nraakye qorahuaqaa Kotiva nronra muaanra vataananrove. Haaru Sotomiqi varuhuavata, Komoraaqi varuhuavata, uaquia hi kyaiqara nraahu uti varurave. Nraakiara ekyara entaqaa Kotiva ko tiqaroma mwi vaisihuaqaa pataqia qua vatero nkyi qua hia rie nraakye qorahua mwihuaqaa nronraqama kyeroma qua vataananrove, tiro. Iesusiva nai nraaqiaranramwu timwa nyunrama.

### *Iesusira nraaqiaranramwu uaqama nyaterara tura*

<sup>16</sup> Iesusiva mwitaa timwa kyero timwa nyiqiro viro tiqaro, Nkye mwaa quara riaate. Nte nkyi sitaarita nkye sipisipi votima kyeta vivata mpo ihua qaakyau vairi votima kyeta nkyi uaqama nyatarerata uti varivarave. Mwianra rieqatama nkye qaruravanto rauru kyeqaro nrohintema kyeta nrohiate. Nyaamwa mpohiva hia nai hena nyaamwavata ntaqintema kyeta nkyevata hia mpohua uaqiamaqita quate.

<sup>17</sup> Nkye vaisi mponramwuanra rauriqata variate. Mwihua nkyi ntavaaqavuqita uro nkyiari kaanasori nraamwuqi kyeta nkyiqa qua vatevarave. Nkye mwaanra nraamwuqi varivata nkyi ntutu kyeta vatevarave.

<sup>18</sup> Nkye ni kyaiqa vare varivata mwia kyaara nkyi ntavaaqavuqita uro nronra vaisi suqaavata, vunyaa vaisi suqaavata, kyevarave. Nkyi uro kyaivata nkye mwihua vata mpo mwatanaa mpo mwatanaavata ni qua nraahu timwa nyiate.

<sup>19-20</sup> Mwi entara nkyi ntavaaqavuqita uro kyaivata hia nkyi mwutukyavanto nronraqa hirata, Nanra quave qiananrave? qiate. Mwi entara hia nkye nkyeta nraato tu kyeta tiraitita varivaro nkyi sora mwanraquravanto nkyiara mwitaa mwitaa qiate tiqaro nkyi nroqitairo qua qiananrove.

<sup>21</sup> Nraakiara mpo hihua nkyiari qatave nkyiari vakyaarave qovarama kyaivata ru kyevarave. Mwihua qohua nkyiari nraaqiara qovarama kyaivata ru kyevarave. Mwihua nraaqiaranramwuvanto nkyiari nyohua sohua qua hia riaraitita, mwihua ru kyaate tivata ru kyevarave.

<sup>22</sup> Nkye ni kyaiqa vare varivata mwia kyaara nkyi qoririma nyatevarave. Mwitaamaqita vivaro hia qamwanrama pupohairaro mpo enta mpo enta kepukyaqama

kyero variqiro vi variari vaisiva, mwiva qio variraro ekyaara entaqaa Kotiva mwia vitaananrove.

<sup>23</sup> Nkye mwi mwatuqyaraqi varivata nkyi qoraqama nyateqata nkyi ru kyarera utivera, nkye aatu ntugema kyeta mpo mwatuqyqaqi quate. Nte qianinra riaate. Nkye Isareriqi nrohiqata ni qua hia ekyaas mwatuqyqaqi timwa nyi taiqa kyaivaqena nte mwatani mwatatai nraaqiarava qaiqaa tumuaninrave.

<sup>24</sup> Qumwanraa vaisivanto nai qua mwaanra timwa mwi vari vaisira hia nraatara kyairave. Kyaiqa vaisivantovata hia nai nronra vaisi nraatara kyairave.

<sup>25</sup> Qumwanraa vaisivanto variqi viro nai qua mwaanra timwa mwi variani vaisira nraantantamwa viro mwiaqatairo mwiva nte qioma kuaa qarama varuqo qiananrove. Kyaiqa vaisivanto variqi viro nai nronra vaisi nraantantamwa viro mwiaqatairo mwiva nte qioma kuaa qarama varuqo qiananrove. Mwihua nianra e vaana vunyaava Pierisepuriva variaro qiarave. Mwihua vaakya uaqia hi nrutura mwia ni mpiahura tita, mwihua nraakiara nkyi ni nraaqiaranramwuvata anomia kyeta uaqia hi nrutura nyivarave.

### *Kotirara nraahu aatu hiqata variate tura (Ruku 12:2-7)*

<sup>26</sup> Nkye mwi quara rieqatama hia vaisi nraatu aatu hiqata variate. Mpovanto taqaankyo tiro ntumwaqu taani inraikyara, nraakiara ekyaas mwi inraikyara qoqaa nraahu qovarama kyaananrove. Mate uqeta taani inraikyara nraakiara qovarama kyairaro qoqama vahiananrove.

<sup>27</sup> Mate nte kyokiraqi variqana nkyi timwa nyi varu quara nkye nraakiara ntuvaa-haaninraqa variqata timwa nyiate. Mate nte tirema kyena nkyi timwa nyi varuqata riaa quara nraakiara mwatuqyqaqa variqata aakyara ntamwa kyeta qiate.

<sup>28</sup> Nkyi mwanraqura hia rukyaraitita mwamwanta nraahu rukye vaisihua hia mwihua nyaatu aatu hiate. Nkye Kotira nraatu aatu hiqata variate. Vaisivanto qutu viro qutu vihua qiaqi vinani viraro Kotiva mwia mwamwantavata mwia mwanraquravata qio ru taiqa kyaarivama variho.

<sup>29</sup> Qio quataave vaisivanto pata munima kuaaru kyero uapaa nyaamwa varairave? Nkye uapaa nyaamwave qiera Kotiva mwiaqaaavata ntaqikyima variho. Kotiva hia qiove tirera, uapaa nyaamwa mwiva hiama qio tumu ntuananrove.

<sup>30</sup> Kotiva nkyiqa ntaqikyiqaroma nkyi okyara ekyaas taqe variva, mwiva nkyi qita kyaahivata ekyaas kyaara ntumwa tairave.

<sup>31</sup> Nkye uapaa nyaamwa nraatara kyaahuave. Kotiva uapaa nyaamwaqaa ntaqikyiqaro nkyiqaavata nritarero kyugema kyero ntaqikyi varirara tita, hia aatu hiqata variqita quate, tiro.

### *Hia aatu hiraitiro nte Iesusira nraaqiarama varuqo qiani vaisirara tura (Ruku 12:8-9)*

<sup>32</sup> Iesusiva mwitaa timwa kyero timwa nyiqiro viro tiqaro, Vaisi mpovanto nraakye qora suqaa variqaro nianra vutu kyero timwa nyinro tiqaro, Nte mwia nraaqiarama varuqo, tirera, ntevata ni kova nyaamwuni varira vuqaa variqana vutu kyena tiqana, Nai mwi vaisivavata ni nraaqiarama variho, qianinrave.

<sup>33</sup> Mpovanto nraakye qora suqaa variqaro nianra tiqaro, Qaqao, hia nte mwia nraaqiarama varuqo, tirera, ntevata ntene kova nyaamwuni varira vuqaa variqana nai mwi vaisirara tiqana, Qaqao, mwiva hia ni nraaqiarama variho qianinrave.

### *Nraakye qora ntainra kyarera tumuvave tura (Ruku 12:51-53, 14:26-27)*

<sup>34</sup> Nkye nianra tiqatama, Mwiva tumu varihatara tita, nraakye qora mwatani varihua mwaateraqama kyeqata variqita vivarave, qiaovo. Nkye mwitaave qiaovo?

Qaqao, nte mwatani tumu varurara tita, mwatani varihua ni nramwutaaqa hiqata varivararo nronraqama kyeta ntaqiva qovara hiananrove.

<sup>35</sup> Ni kyaara qovavata mwaaquavantovata nramwutaaqa hiqata varivarave. Ni kyaara nrovavata nraamwunravantovata nramwutaaqa hiqata varivarave. Ni kyaara mwia nraaqutuvanto nai nraaqutuntiri nramwutaaqa hiqata varivarave.

<sup>36</sup> Vaisi mpovanto varirata mwia vataahua mwia nraamwuqi varihua mwihuama mwia nramwutaaqa hivarave.

<sup>37</sup> Mpowanto nianra mwutukya vahianinravata nraatara kyero nai nronranrave, nai qorarave, mpoqiaavata mwutukya vahiariva mwi vaisiva hiama qio ni nraaqiara variananrove. Mpowanto nianra mwutukya vahianinravata nraatara kyero nai mwaaquarave, nai nraamwunranrave, mpoqiaavata mwutukya vahiariva mwi vaisiva hiama qio ni nraaqiara variananrove.

<sup>38</sup> Mpowanto hia nai rukye hirite kyatarira vara qu varero ni naakiara nrianriva, mwiva hiama qio ni nraaqiara variananrove.

<sup>39</sup> Vaisivanto nai mwatani qati varianinranra nraahu nronraqama kyero riaariva, mwi vaisiva ekyaarama qutu quananrove. Vaisi mpovanto nianra riemwaqiro viqaro uro qutu quariva, mwi vaisiva ekya entama qati variqiro quananrove.

### *Mwia qiata kyuqe kyoqaa varerara tura*

*(Maaki 9:41)*

<sup>40</sup> Nte nkyi sitaarita vivaro vaisi mpovanto nkyi qamwata nyateqaro mwiva nivatama qamwata mataananrove. Mwiva ni qamwata mwateqaro ni kova ni titairavatama qamwata mwataananrove.

<sup>41</sup> Kotira qua qovarama kyero timwa nyi variari vaisiva, poropeti vaisivanto nri ntairaro vaisi mpovanto mwia qua riarera qamwata mwatairera, Kotiva poropeti vaisi mwia kyuqema mwataintema kyero mwi vaisiravata kyuqema mwataananrove. Avuqavuma kyero nrohi variari vaisiva nri ntairaro vaisi mpovanto mwianra avuqavuma kyero nrohi vari vaisirave kyaiqe mwia qamwata mwataankye tirera, Kotiva avuqavuma kyero nrohi vari vaisira kyuqema mwataintema kyero mwi vaisiravata kyuqema mwataananrove.

<sup>42</sup> Vaisi mpovanto ni nraaqiara pata mporu taqero mwiva Iesusira nraaqiarave timwa kyero qamwata mwateqaro antaani nramanrinra kyaqa kyero mwia mwinrenra, Kotiva hia mwi vaisira qaqlira kyaraitiro, mwia kyoqaa kyuqema kyero mwataananrove, tiro. Iesusiva turama.

## 11

*Ioniva nramanri nyi varuva nai nraaqiara mponramwu sitovata Iesusira kyapara hirerata vura*

*(Ruku 7:18-35)*

<sup>1</sup> Iesusiva mwi quara nai nraaqiaranramwu timwa nyitero mwiva mwini kyero mwakyaakya nraakyne qora timwa nyinrenro Karirini mpo mwatukya mpo mwatukyaqira vura.

<sup>2</sup> Iesusiva mwini vuvaro Ioniva karavuqi variqaro riovoro Kotiva tito vaisiva nronra kyaiqa vare varuvaro mwiva nai nraaqiaranramwu sitovata mwinramwuhua uro Iesusira ntumwahiamwa hita tiqata,

<sup>3</sup> Kotiva titairaro nraakiara nrianriva qutaa e mwaa mwivave? Tire vaisi mpo vekyave variananrave? tita.

<sup>4</sup> Mwinramwuhua mwitaa tuvaro Iesusiva mwihua timwa nyinro tiqaro, Nkyenramwu mwaini nrnumu variqata taqaarave, riaarave, nrnumu ntanteta uro Ioninra timwa mwiate.

<sup>5</sup> Vu qipa quahua qatima taqe variavo. Kyuqu uaqiamama vihua qatima nrohi variavo. Rumpuara taumavanto mwamwanta nre vari nraakye qorahua mwamwanta tavanta vihatama variavo. Nraato tita vihua qaiqaa qioma riaavo. Qutu quahua sivita qatima variavo. Vehi nraakye qora Kotira qua kyuqe qua nrumu rie variavo. Mwi quara mwi quara uro Ioninra timwa mwiate.

<sup>6</sup> Nianra hia taara nraato tiraitiro kepukyaqama kyero kuaa vu nraato nraahu riemwaqiro vi variariva, mwivama qamwateqaro variananrove, tiro.

<sup>7</sup> Iesusiva mwitaa tuvata Ioninra nraaqiaranramwuvanto nrumu ntante vi varuvaro Iesusiva nraakye qora ntuvaantuama vuhua Ioninranra timwa nyinro tiqaro, Nkye haaru nanra inraikya taqarerata qumina mwatani vurave? Toqavanto omwa ahikya tiharo hini viro hini nrinro hira taqarerata vurave?

<sup>8</sup> Nkye hia mwia taqarerata viraitita, mpo nanra inraikya taqarerata vurave? Kyuqe tuavaaqa ututo vaisira taqarerata vurave? Qaqao, kyuqe tuavaaqa utute varia vaisihua hia qumina mwataqa variarave. Mwi vaisihua vunyaa vaisi nraamwuqi nraahu variarave.

<sup>9</sup> Nkye nanra inraikya taqarerata vurave? Kotira qua qovarama kyaani vaisira poropeti vaisi taqarerata vurave? Eo, mwiave. Qio kyai nte nkyi timwa nyianrita riaate. Nkye mwi entara poropeti vaisi nraatara kyai vaisira taqorave.

<sup>10</sup> Kotira mpukuqi Kotiva Ioninranra mwataama tiro:  
Taqaante, ni qua timwa nyiani vaisira nte titaairo mwiva nraante i vuni viqaro i aanra terama mwataananrove turave, tiro. *(Marakai 3:1)*

<sup>11</sup> Iesusiva mwitaa timwa kyero mwihuara tiqaro, Kyai nte nkyi timwa nyianrita riaate. Mwatani mwatataa nraakye qorahua variavaro Ioniva nramanri nyi vari vaisiva ekyaa mwihua nraatara kyaivama variho. Ioniva mwitaama variharo nraakiara Kotiva ntaqikyiani nraakye qorahuaqitairo nai vara mwataniqa hiariva nraahuma Ioninra nraatara kyaananrove.

<sup>12</sup> Ioniva nramanri nyi varu vaisiva qovarama vu entaraqatairo ntaqi varia vaisihua Kotiva ntaqikyiani quara ntumwaqu kyarerata Ioninra ntavaaqavu kyaahua mwaa entara nivata ntavaaqavu kyarerata uti variarave.

<sup>13</sup> Haaru poropeti vaisinramwuvantovata, Mosesivavata, Kotiva ntaqikyiani quara timwa qovaramaqi vi varuvaro Ioniva qovarama vurave.

<sup>14</sup> Ioniva varirero mwiva nkyi haivaqava Iraisaava qaiqaa mwatani qovarama quari vaisivama variho. Nkye mwi quarara qutaave tivera, nkye Ioninranra mwiva Iraisaavavema tivarave.

<sup>15</sup> Nkyi nyaato vahirera, nkye mwi quarara nraato tita mwia okyara ntapihiate, tiro.

<sup>16</sup> Iesusiva mwitaa timwa kyero tiqaro, Mwaa entara varia nraakye qorahua, mwihua nanra inraikya votima kyetave variavo? Nte nanra quaqa ntumwa kyena qiaritave nkye mwi quara ntapihi kyeta rievarave? Kyaiqe nkyi timwa nyiankye. Mwihua nraaqiara uapaahua mwatukyaqaa ntuvaantuama vita ntarerata variante hiavo. Nkyiari hena nraaqiara mpo hiahua nyaanrama kyeta tiqata,

<sup>17</sup> Tire ntoma vaara vuataurata nkye ihi ntaataara vaihatama nkye hia ihi ntaavo. Tire nteqatama ntate ihira turata nkye ntataataara vaihatama hia ntataavo qiarave. Mwaa entara varia nraakye qorahua mwihua votima kyeta variarave.

<sup>18</sup> Ioniva nri ntero kyara aurama tero hia uainivata nrovata mwihua mwianra tiqata, Vaana kyapata varivave, turave.

<sup>19</sup> Nte mwatani mwatatai nraaqiarava nri ntena kyaravata nramanrivata nrauqata mwihua nianra tiqata, Mwia taqaate. Mwiva mpoqama kyero kyara nre varivave. Mwiva uaini nreqanro uera nte varivave. Mwiva taakisi vare variahuavata, uaqia hia vaisihuavata, totiqa hi varivave, qiarave. Mwihua nianra mwitaa ti variarave. Qio quavanto kyuqe qua vahirera, mwi quara riemwaqira virava taqairaro kyuqe qua nraahu vahiananrove, tiro.

*Mpo mwatukyanramwuanra po kye timwa nyatora  
(Ruku 10:13-15)*

<sup>20</sup> Iesusiva mwatukya mwinramwunraqi airi kyaiqa nronra kyaiqa vara nyatovata mwi mwatanaahua hia uaqia hu aanranra qaqira kyaraitita varuvaro Iesusiva po kye timwa nyatero mwi mwatanaahuara tiqaro,

<sup>21</sup> Po, nkye Korasinivantovata Vetasaitaavantovata nkye taqevarave. Nte nkyi suqaa nronra kyaiqa varauntema kyero haaru mpovanto nronra kyaiqa Taiaa mwatanaahuave Saitoni mwatanaahuave vara nyatarerave tutirio, mwi mwatanaahua mpo mwatanaahuara tita, vaakyama qainaama tuavaaqa ututeta nkyiari mwamwantaqa qaupa quteta uaqia hi aanranra qaqrirama kyotirio.

<sup>22</sup> Nte nkyi suqa nronra kyaiqa varauqata nkye hia uaqia hi aanranra qaqrirama kyera mwia kyaara entaqaa Kotiva ko tiqaro Taiaa mwatanaahuqaavata Saitoni mwatanaahuqaavata qua nronra vatero nkyiqa qua nronra mpoqiatavata vataananrove.

<sup>23</sup> Po, nkye Kapenaamiqi variahua nkye tiqata, Kotiva tiri nronraqama kyairaqla nyaamwuni quananrave, qiaovo. Qaqao, hiave. Kotiva nkyi vara kyero qaqrirama kyairata nkye qutu vihua varira qiaqima uro varivarave. Nte nkyi suqa nronra kyaiqa varauntema kyero haaru mpovanto Sotomi mwatukyaqi variqaro mwi mwatanaahua nronra kyaiqa vara nyataankye tutirio, mwi mwatanaahua uaqia hi aanranra qaqrirama kyovaro Kotiva hia mwi mwatukyara taiqa kyovaro mwaa entara mwi mwatukyava qatima vahitirio.

<sup>24</sup> Nte nkyi suqa nronra kyaiqa varauqata nkye hia uaqia hi aanranra qaqrirama kyera mwia kyaara nraakiara ekyara entaqaa Kotiva ko tiqaroma Sotomi mwatanaahuqaavata qua nronra vatero nkyi Kapenaamiqinaahuqaavata qua nronra mpoqiatavata vataananrove, tiro.

*Iesusiva nai qorara aakyara ntora  
(Ruku 10:21-22)*

<sup>25</sup> Iesusiva mwitaa timwa kyero mwi entara Kotirara aakyara ntero tiqaro, Ko, e nyaamwuqaavata mwataqaavata ntaqikyi variaravave. E mwi inraikyara mwi inraikyara uqeta tera nronra vaisi ekyaa okyara taqaa vaisihua hia nyaamwutaratiria, qumina nraakye qora nyaamwute variananranra tina, nte i nrutu tuaherauquo.

<sup>26</sup> Eo, ko, qio e ena kyakya hiraqa mwitaa hiataa iharara tira, mwitaa hiaro, tiro.

<sup>27</sup> Iesusiva mwitaa timwa kyero tiqaro, Ni kova nianra ekyaa inraikyaraa ena ntaqikyante tirave. Hia qumina vaisivanto ni mwia mwaaqu okyara ntapihirave. Ni kova nai nraahu ni okyara ntapihi kyairave. Hia qumina vaisivanto ni kora okyarara ntapihirave. Nte mwia mwaaquvanto nraahu mwia okyara ntapihi kyaurave. Nte tahuave timwa nyiataa hiraqena timwa nyianrihua mwihuavata ni kora okyara ntapihi rievarave, tiro.

*Niqaatai nrumu tekya hira varaate tura*

<sup>28</sup> Iesusiva mwitaa timwa kyero tiqaro, Nkye nronra muaanra ntai inraikyara ventaqua vaantaqua ihata vare variavaro pupohaihata variahua nte nkyiara tirerave. Nkye nte hiarinani nrivaqena nte nkyi qati varira nyianrita nkye tekya hiate, tuquo.

<sup>29</sup> (Purimakauvanto qua riaarive tiro kyatari kohi kyero vaataariqaa rupatairaqaa ntumwa kyena tirerave.) Nkye kyatari nte nyianinra vara kyeta nkyeta qumwuqa vataivave nte ntena kyaiqa nkyi nyaamwu taankye. Hia nte ntena nutu tuaheraraiti, nte qihakyma kye varurara tita, nkye qiomma tekya hivarave.

<sup>30</sup> Nte nkyi qumwuqa kyatari qu nyataariva kyuqema kyero vahiananrove. Nte nkyiqa muaanra vataariva vuvua taananrove, tiro. Iesusiva turama.

## 12

*Mwaanra entara tura  
(Maaki 2:23-28; Ruku 6:1-5)*

<sup>1</sup> Mwi entara Iesusiva mwaanraqa aakyo utaqi kyakuma voti hora uiti tutoraqi nrohi varuvata mwia nraaqiaranramwu nraataa huvata uiti tamwa nteqa kyeta uru mwia nre varura.

<sup>2</sup> Nre varuvata Parisi vaisinramwuvanto mwihua taqeta Jesusirara tiqata, Ena nraaqiaranramwu taqaante. Mwaanra entaqaa hia mwitaa hiate qiarama mwihua mwitaa hi variavo, tita.

<sup>3</sup> Mwihua mwitaa tuvaro Iesusiva nkyiari timwa nyinro tiqaro, Haaru nkyi haivaqava Ntevitivavata, mwia vatama kyeta nruhuavata, nraataa huvata varuvaro Ntevitiva mwi entara mwitaa hora mwi quara nkye hia qaraqi kyaara ntumwa kyeta riaarave iho?

<sup>4</sup> Mwi entara Ntevitiva Kotira nraamwuqi vera ntero mpereti Kotirani vatora vara kyero nreqanro nteqa kyero nai mwiatama kyeta nruhuavata hini nyuvata nronrave. Kotira kyaiqa vara mwate varu vaisihua nraahu nraataara vahuvare qumina vaisivanto hia qio nraananrove tu quara Ntevitiva qumina vaisivanto mwi kyarara nreqanronra tiro, mwi quara nteqa kyorave.

<sup>5</sup> Nkye Mosesira qua mpo hia kyaara ntumwa kyeta riaarave iho? Kotira kyaiqa vara mwate varia vaisihua mwaanra entaqaa Kotira nraamwuqi mpo kyaiqa mpo kyaiqa vare variarave. Mwihua mwaanra entaqaa mwi kyaiqara varaqita viqata qao timwa taa quara nteqakye variavaro quavanto hia mwihuaqaa vahirave.

<sup>6</sup> Nkye Kotira nraamwuanra nronraqama kyeta rie variarara nte nkyi timwa nyinrenrave. Kotira nraamwu nraatara kyauva nte mwainima varuqo.

<sup>7</sup> Kotira mpukuqi mwitaama tiro:

Vaisivanto quara rukyeqaro mpi kyaiqara  
hia mwi kyaiqarara ni mutukya ntihana varuqo.

Vaisivanto mporara po kye timwa mwateqaro  
kyahaqama mwataira, nte mwi kyaiqararama  
ni mutukya ntihana varuqo, turave.

*(Hosaaia 6:6)*

Nkye mwi quara okyara ntapihi kyeta rieqata nrohiatirio, nkye hiama qati varia vaisihuaqaa qua vate variatirio.

<sup>8</sup> Ni mwatani mwatatai nraaqiarara nronraqama kyaihana variqana nte mwaanra entaqaa ntaqikyiqana qiomma ntena kyakya hiani kyaiqara varaaninrave, tiro. Iesusiva turama.

*Iesusiva vaisi mpo kyauqu kyuqema kyora  
(Maaki 3:1-6; Ruku 6:6-11)*

<sup>9</sup> Iesusiva mwini kyero vuva uro mwihua mwaanra nraamwu mpoqi varura.

<sup>10</sup> Varuvaro vaisi mpovanto mwia kyauqu tapanra vuva varuvata mwipi varuhua Iesusiraqaa qua vatarera uti variqata mwia ntumwahiamwa hita tiqata, Vaisivanto mwaanra entaqaa hena vaisi mwamwanta kyuqema mwatairera, mwiva mwitaa hiqaro tiri mwaanra qua nteqave kyaananro, hiave nteqa kyaananrove? tita.

<sup>11</sup> Mwihua mwitaa tuvaro Iesusiva nkyiari timwa nyinro tiqaro, Nkyiqitairo vaisi mpo sipisipivanto mwaanraqa mwata quvuteraqi ntumwa virera, mwi vaisiva nai sipisipi pati mwaanri qatinani kyaananrove iho, hiave pati mwaanri kyaananrove? (Mwiva mwaanra entaqaa nai quara pati mwaanri kyaananrove.)

<sup>12</sup> Vaisivanto sipisipi nraatara kyairara tiro, vaisivanto mwaanra entaqaa vaisi mpo kyuqema mwatairera, hiama Mosesira mwaanra qua nteqa kyaananrove. Mwitaa hiqaro mwiva kyuqe kyaiqa varaananrove, tiro.

<sup>13</sup> Mwitaa timwa kyero Jesusiva vaisi mwianra tiqaro, Ena kyauqu tutuante, tuvaro nai kyauqu tutuvaro mwia kyauquvanto kyuqema viro hini kyauqu votima viro vahura.

<sup>14</sup> Mwaanra entaqaa mwia kyauqu kyuqema kyovata Parisi vaisinramwu veva nteta viqata Jesusira ru kye quara nai timwa mwi nai timwa mwi hi varura.

*Kotiva Jesusirara ni kyaiqa vaisima variho timwa tora*

<sup>15</sup> Mwihua mwia ru kyarerata qua ti varura Jesusiva riero mwi mwatukyara kyero vuvata nraakye qora airivanto mwia vataqita vuvaro Jesusiva mwihuaqitai nriqa vuhua ekyaa kyuqema kyero

<sup>16</sup> mwihuara tiqaro, Hia nte kyaiqa varaaninranra mpohua timwa nyiate, tiro.

<sup>17</sup> Jesusiva mwitaa timwa kyero mwitaamaqiro vuvaro haaru Aisaiaava vetato entaqaa tu quava mwivau vahura. Aisaiaava Kotiva mwitaama tiho, tiro:

<sup>18</sup> Ni kyaiqa vaisi taqaate.

Nte mwia vara mwaamwianra taurave.

Ni mutukyavanto mwianra vahana

nte mwianra qamwateqana varuqo.

Nte ntena mwanaraqura mwiaqaa vataariro

mwiva avuqavu hiani okyarara

mpo mwatanaa mpo mwatanaahua ekyaa timwa nyiananrove.

<sup>19</sup> Mwiva hia antua qua tiraitiro,

hia aakyara ntamwa kyero timwaqiro virata

aanraqaataitavata nraakye qoravanto

hia mwia qua rievarave.

<sup>20</sup> Omwave quntove ntavaka viro vahianinra

mwiva hia mwini ekyara nteqa kyaananrove.

Omwa qipa virera uti varianinra

hia mwiva ekyara qipa kyaananrove.

Mwiva mwitaa hiqaro qihakyma kyero variqiro viraro

avuqavu hiani okyarava nritarero vahiananrove.

<sup>21</sup> Ekyaa mpo mwatanaa mpo mwatanaahua mwia nrutu

rieqatama mwiva nraahu tiri kyaahaqa hiarivave

tivarave, tura.

(Aisaiaa 42:1-4)

Kotiva mwitaa tiho timwa kyero haaru Aisaiaava mwitaa tura.

*Vaana mwihua vunyaava Jesusira kyaahaqa hi variho tura*

(Maaki 3:20-30; Ruku 11:14-23, 12:10)

<sup>22</sup> Jesusiva varuvata mpo uhua vaisi mpo vita vareta nrunra. Vaanavanto mwia utaqi varuvavora tiro, mwi vaisiva vu qipa vuva variqaro hia quavata tiraitiro varuvavora Jesusiva mwia kyuqema kyovaro mwi vaisiva qio taqebaro qio quavata ti varura.

<sup>23</sup> Mwitaa huvata nraakye qora mwini varuhua mwi kyaiqara taqeta nrihanrama vita Jesusirara tiqata, Qikye, Ntevitira mwaaquvanto qovara hiariva mwaa mwi vaisivave iho? tita.

<sup>24</sup> Mwihua mwitaa tuvata Parisi vaisinramwuvanto mwi quara rieta qaqao tita, Pierisepuriva vaana vunyaava Jesusira kyaahaqa hi variharora tiro, mwiva qio vaana site varihata nritareta vi variavo, tita.

<sup>25</sup> Parisi vaisinramwuvanto mwitaa ti varuvaro Jesusiva mwihua su nyaato tura ntapihi kyero mwihuara tiqaro, Kuua mwatanaa variqaro tukyama viro nai ri nai ri hi variariva qamwanramama taiqa quananrove. Ta mwatanaavave, ta mwatukyaraqinaavave, ta nraamwunraqi varihuave mwitaa hivera, mwihua qamwanrama taiqa vivarave.

**26** Saataaniva ntaqikyi variari vaanahua utaqa ntainra vita nai ri nai ri hivera, nataama kyerove Saataaniva mwihuqaqa ntaqikyiqiro vi variraro kepukyaqama vahiananrove.

**27** Nkye nianra tiqata, Pierisepuriva mwia kepukyaqama kyaiharora tiro, mwiva vaana site varivave. Nianra mwi quava qutaa vahirera, mpo tava nkyi vaisi mponramwu kyaahaqa hi varihatave mwihuavata vaana site variavo? Nkye nianra qia quarara nkyi sataqita nrohi varia vaisihuama unra quave tivarave. Nkyi sataqita nrohi varia vaisihua ti quava nkyi tu varaananrove.

**28** Kotira mwanraquravanto ni kepukyaqama kyaihana nte vaana site varuqo. Mwi quava qutaa qua vahirara tita, nkye mwianra rieqatama Kotiva tiriqaa ntaqikyiar entava nri ntaiho qiate.

**29** Qaiqaavata nkyi timwa nyinrenrave. Nraamwu qova kepukyo vaisivanto variraro mpuara vaisivanto hia mwia rupataraitiro, mwia nraamwuqitairo hia qio mpuara varaananrove.

**30** Hia nivatama kyero variariva, mwi vaisiva ni nramwutaama variananrove. Mpowanto ni sipisipi hia nyaanrama kuaaqaa mataariva varirera, mwi vaisiva ni sipisipi sataqiro uro mpona mpona raupirima kyaarivama variananrove.

**31** Mwianra rieqanama nte nkyi timwa nyuqo. Nraakye qoravanto uaquia hi kyaiqara mpo qara mpo qara hianinra utirave, uaquia hi quara mpo qara mpo qarama kye mpohuara tirave, Kotiva ekyaa mwi quara nruka nyaterovata vaisivanto Kotira mwanraqurara uaquia hi quara qianinra hiama nruka mwataananrove.

**32** Vaisi mpovanto ni mwatani mwatatai nraaqiarara uaquia hi quara tirera, Kotiva mwi vaisira qua nruka mwataananrove. Vaisi mpovanto Kotira mwanraqurara uaquia hi quara tirera, Kotiva mwaa entaravata, nraakiaravata, hia mwi vaisira qua nruka mwataananrove.

*Uaqia hi kyatariva uaquia hi tamwanra nraahu riairave, tura  
(Ruku 6:43-45)*

**33** Kyatarivanto kyuqe kyatarivahirera, kyuqe tamwa riaananrove. Uaqia hiari kyatariva vahirera, uaquia hi tamwanra riaananrove. Vaisivanto kyatarivahirera, kyuqe kyatarirara kyuqe kyatarive, uaquia hi kyatarirave, qiananrove.

**34** Nkye quaiha uaquia hira nraaqiarama variavo. Nkye uaquia hia vaisihua variqata nkye nataama kyetave kyuqe qua tivarave? Mwia mwutukyaqive mwia nraatoqive mpo inraikya varaariva vaharo nrovanto timwa qovara hirave.

**35** Vaisi kyuqeva nai qiataqitairove vu nraatoqitairove kyuqe kyaiqa varaariva vaharora tiro, mwiva kyuqe kyaiqa nraahu vare varirave. Uaqia hi vaisiva nai qiataqitairove vu nraatoqitairove uaquia hi kyaiqara utuariva vaharora tiro, mwiva uaquia hi kyaiqara uti varirave.

**36** Nte qianinra riaate. Nraakiara ekyara entaqa Kotiva ko tigaroma mwaa entara nkye mpo qua mpo qua qumina qua ti varirara rieqaroma Kotiva nkyiara nkye nanraqamave mwi quara mwatani varu entara turave, qiananrove.

**37** Nkye mwaa entara kyuqe qua nraahu timwaqita vivera, mwi entara nkyita quavanto nkyi huvantu nyataananrove. Nkye mwaa entara uaquia hi quara timwaqita vivera, mwi entara nkyita quavanto nkyita rupaananrove, tiro. Iesusiva turama.

*Nronra kyaiqa tinraamwutaante tura  
(Maaki 8:11-12; Ruku 11:29-32)*

**38** Iesusiva mwitaa timwa kyero varuvata Parisi vaisi hininramwuvata, mwaanra okyara ti varu vaisihuavata, Iesusirara tiqata, Mwaanra ti variara vaisio, nronra kyaiqa tirinramwu tivuqaa varairaqtama tire i okyara taqtama qutaama e Kotiva titaihara tumuanra vaisiva variaro qiare, tita.

<sup>39</sup> Mwinramwuhua mwitaa tuvaro Jesusiva tiqaro, Uaqia hi kyaiqara nraahu uti variahuate, Kotirara qumimaqama kyeqata nrohi variahuate, mwitaa hiahuama nronra kyaiqa tinraamwutairaqla qutaave qiare ti variarave. Hia nte nkyi suqaa nronra kyaiqa vararerave. Kotiva haaru nkyi haivaqara poropeti vaisi Ionaanra mwitaama kyontema kyero Kotiva nivata mwitaa hiananrove. Mwianra rieqatama nkye nianra Kotiva titavave tivarave.

<sup>40</sup> Tavukya nronravanto mwia atahu kyovaro Ionaava taarampo enta entaqivata iheravata tavukya vikyokyaqi varurave. Kuua qarama kyena ntevata mwatani mwatatai nraaqiarava taarampo enta mwata utaqi variqina quaninrave.

<sup>41</sup> Ionaava taarampo enta tavukya vikyokyaqi variro mwiaqatairo uro Niniveqi varuhua Kotira qua timwa nyuvata mwi mwatanaahua qamwanrama kyeta mwia qua rieta uaqia hu aanranra qaqla kyeta varurave. Nraakiara ekyaara entaqaa mwi mwatanaahua Kotiravatama kyeta variqata nkyiqa qua vateqata mwitaama tivarave, Tire Ionaanra qua rieqatama uaqia hi aanranra qaqla kyaavanarave. Ionaanra nraatara kyo vaisiva nkye varunani uro ntovata nkye hia mwia qua riorave, tivarave.

<sup>42</sup> Haaru vetato entaqaa nkyi haivaqava Soromoniva mpo okyara mpo okyara taqe varuva varuvaro vunyaa nraakye mpovanto mwia qua riarero vevara nai nyianra taisairo uro Soromoninra qua riorave. Mwi nraakyeva mwitaa hurara tiro, mwivavata nraakiara ekyaara entaqaa nkyiqa qua vateqaro mwitaama qiananrove. Nte nyianrasaina Soromoninra qua riarerana nriavarave. Nkye haaru varuvaro Soromoninra nraatara kyo vaisiva varuvata nkye hia mwia qua riorave, qiananrove, tiro. Jesusiva turama.

### *Vaana okyarara tura*

(Ruku 11:24-26)

<sup>43</sup> Jesusiva mwitaa timwa kyero tiqaro, Vaanavanto vaisi utaqitairo nritarero quariva aahara mwataqaa viqaro kyai nte ho hiankye timwa kyero taqairaro hia ho hiariva vahiraro

<sup>44</sup> mwiva nai tiqaro, Kyai nte nrumu ntantena vaakya qaqla kyau nraamwunra vaisi utaqi uro qaiqaa variakye, timwa kyero uro taqaiharo mwi nraamwuvuva qumina vaharo ntupi kyero hiqama kyero avuqavuma taiva vahirave.

<sup>45</sup> Mwiaqatairo vaana mwiva uro nai hena vaana 7 nramwu nai mwivata nraatara kyeta uaqla hi kyaiqara uti variahua nyaanrama kyero sita varero uro mwi vaisira utaqi varirave. Nraakiara mwi vaisiva vaana airi kyapata variqaro anomia kyero uaqlama viro varirarama tuqo. Mwaa entaravata uaqla hi kyaiqara uti varihua, mwihuavata uaqlama vita varivarave, tiro.

### *Iesusira nrovavata mwia qatanramwuvata mwia taqarerata nrunra*

(Maaki 3:31-35; Ruku 8:19-21)

<sup>46</sup> Jesusiva mwi quara nraakye qora timwa nyi varuvata mwia nrovavata mwia qatanramwuvata nri nteta mwia qua timwa mwinrenrata mwaatani sivita varuvaro

<sup>47</sup> mpovanto Iesusira uro timwa mwinro tiqaro, I nrohua qata i qua timwa mwinrenrata nrumu mwaataqa variavo, tiro.

<sup>48</sup> Mwiva mwitaa tuvaro Jesusiva tiqaro, Tahuave ni nrohua kata pakya variavo? tiro.

<sup>49</sup> Mwitaa timwa kyero Jesusiva nai nraaqiara mwinramwuhuaqa kyauqu tutiro tiqaro, Mwaahuama ni nrohua kata pakya variavo.

<sup>50</sup> Ni kova nyaamwuni varira mwia qua rieqata nrohi variahua, mwihuama ni kata pakya, ni nunra nakyaa, ni nrohua variavo, tiro.

## 13

*Kyara humwu isaqiro vuraqa ntumwa kyero tura  
(Maaki 4:1-9; Ruku 8:4-8)*

<sup>1</sup> Kuua mwi entara Iesusiva nraamwu mwiqitairo veva ntero uro kyaarerera tokyasataa mwatakyaa viro mwini variankye tuvata

<sup>2</sup> nraakyе qora airivanto ntuvaantuama vita mwia ututuma tovarora tiro, mwiva qaqlira kyero uro mpotuqi mwaanri ntero mwipi mwatakyaa viro nramanriqaa varuvata nraakyе qoravanto nramanri tokyasataa varuvaro

<sup>3</sup> Iesusiva mpo qua mpo quaqaa ntumwa kyeqaro timwa nyunra. Mwiva mwitaama tiro:

Vaisi mpovanto kyara humwu isarero vurave.

<sup>4</sup> Mwiva kyara humwu isaqiro vuvaro mpo huva aanra tokyani tumu ntuvaro nyaamwavanto nruru nramwa kyorave.

<sup>5</sup> Mpo huva ori mwataqaa tumu ntuvaro mwatavanto hia vevatoqama vahu mwatava vahuvarora tiro, tumu ntiro qamwanrama qupiqa vuvaro

<sup>6</sup> huarivanto nri ntero iteqaro aaharama kyovaro mwia tuqavanto hia mwataqi vevato vuvara tiro, aaharama vurave.

<sup>7</sup> Mwitaa huvaro mpo huva uakukya uvi auquqahuva qupiqoraqi tumu ntiro uakukyavatama kyero qupiqa vuvaro uakukyavanto ntumwaqu kyovaro hia tamwa riorave.

<sup>8</sup> Mwitaa huvaro kyara humwu hinivanto kyuqe hu mwataraqaa tumu ntiro kyuqema kyero qupiqeqaro uro kyuqe tamwa airi riemwa torave. Airi riemwa tovaro mpo huva mwiavata nraatara kyero mpoqiaavata riemwa tovaro qaiqaa mpo huva mwiavata nai nraatara kyero nronraqama kyero riemwa torave.

<sup>9</sup> Nkyi nyaato vahirera, mwi quara okyara ntapihi kyeta riaate, tiro.

*Mpo quaqaa ntumwa kyeqaro timwa nyunra mwia okyara tura  
(Maaki 4:10-12; Ruku 8:9-10)*

<sup>10</sup> Iesusiva mwi quaraqaa ntumwa kyero timwa nyuvata mwia nraaqiaranramwuvanto mwiva hunani nri nteta mwia ntumwahiamwa hita tiqata, E nanraqamave nraakyе qora hia qua vutu kye timwa nyinraitira, mpo quaqaa ntumwa kyeqara timwa nyi variaro? tita.

<sup>11</sup> Mwihua mwitaa tuvaro Iesusiva timwa nyinro tiqaro, Kotiva nraakyе qoraqaa ntaqikyiani quara uqetatai quara, mwi quara nkyiara mwihua qati kyairata mwi quara okyara riaate timwa kyero, qumina nraakyе qorara hia mwi quara riaate turave. Mwitaa turara tina, nte mpo quaqaa ntumwa kyeqana mwihua timwa nyi varuquo.

<sup>12</sup> Kotira qua riaariva variqiro viraro Kotiva mwia kyaahaqa hiraro mwia qua mpoqiaavata riaarive. Mwiva mwitaamaqiro viqaro Kotira qua mpoqiaavata riaananrove. Kotira qua hia riaariva variqiro viraro mwiaqaatairo pataqia tutaaninra mwia ntavihikye varairaro mwiva qumina variananrove.

<sup>13</sup> Nraakyе qoravanto taqegetavata hia ntapihi kyeta taqe variarave.

Mwihua qua rieqetavata hia ntapihi kyeta riaarave.

Mwihua mwitaa hiarara tina, nte mpo quaqaa ntumwa kyeqana mwihua timwa nyi varurave.

<sup>14</sup> Nraakyе qoravanto mwitaa hi variarara tiro, haaru vetato entaqaa Aisaiaava Kotira qua qovarama kyo quava mwaa entara mwivauma vahiro. Mwiva mwataama tiro:

Mwaa mwatanaahua su nyaatovanto qumimaqama

vihatara tita, mwihua qua riemwaqita viqatavata hia qua ntapihi riaarave.

Mwihua taqamwaqita viqatavata

hia ntapihi kyeta taqaarave.

<sup>15</sup> Mwihua su nyaato mwutukyavanto kepukaqama vihata mwihua nkyiari nyaato titateta nkyiari su qipateta variarave. Mwihua hia mwitaa hiraitita, mwihua nkyiari suqotaita taqeqlata nkyiari nyaatoqotaita rieqlata ni qua ntapihi kyeta rieqlata uaqlia hi aanranra qaqlira kyaivaqenavauma nte mwihua kyuqema kyaaninrave, turave.

(Aisaiaa 6:9-10)

Aisaiaava Kotiva mwitaama tiho, turave.

<sup>16</sup> Qio, nkyenramwu vuqotaita kyuqema kyeta taqe variqata nraatoqo kyuqema kye rie variarara tita, nkye qamwateqatama varivarave.

<sup>17</sup> Haaru vetato entaqaa poropeti vaisivantove, kyuqema kyeta nraahu kyuqe aanraqaa nrohi varu vaisihuave, mwihua nkye mate taqaa inraikyara taqaare tura hia taqorave. Mwihua nkye mate riaa quara riaare tura hia riorave, tiro.

### *Kyara humwu isaqiro vura mwia okyara tura*

(Maaki 4:13-20; Ruku 8:11-15)

<sup>18</sup> Mwitaa timwa kyero Iesusiva nai nraaqiaranramwu timwa nyinro tiqaro, Nkyenramwu rie varivaqena nte kyara humwu isaqiro vu vaisiraqaa ntumwa kyena timwa nyu quara, mwi quara okyara nkyi timwa nyiankye.

<sup>19</sup> Kotiva nraakye qoraqaa ntaqikyiani quara, vaisi mpovanto mwi quara hia ntapihi kyero riaraitiro variharo Saataaniva nri ntero mwia mwutukya vu nraatoqitairo mwi quara ntavihi kyero varairave. Mwi vaisiva kyara humwuvanto aanra tokyani tumu ntira votima kyeroma variho.

<sup>20</sup> Kyara humwu mpo huva ori mwataqaa tumu ntu okyarava vahirero mwataamama vahiro. Vaisi mpo hiahua Kotira qua rieta, mwi quarara qamwata kyeta variavaro

<sup>21</sup> quavanto hia mwihua mwutukyaqi tuqa tuta kyero vahihata mwihua hia mpua-hama variqata mwi quara rieta. Mwi quara kyaara mwihua uaqlama nyatarera uti variavata mwihua tiri rivorave timwa kyeta Kotira qua qamwanrama kyeta qaqlira kyaarave.

<sup>22</sup> Kyara humwu mponramwuvanto uakukya ubi auqu vahuraqi tumu ntua mwia okyaravanto vahirero mwataamama vahiro: Mpo hiahua Kotira qua rieta mwiaqataita mwihua mwatanyaa inraikyara nronraqama kyeta rieqlata muniman-rave mpo inraikya mpo inraikyara qamwateqata mwia varerara nraahu nronraqama kyeta riemwaqita viqata Kotira qua qaqlira kyaavaro Kotira quavanto hia mwihuaqi vahiqiro virave.

<sup>23</sup> Kyara humwu mponramwuvanto kyuqe hu mwataraqaa tumu ntura okyaravanto vahirero mwataamama vahiro: Mpo hiahua Kotira qua ntapihi kyeta rieta mwiaqataita mwihua Kotira qua riemwaqita viqata kyuqe kyaiqa Kotirani varaqita vi variavata mpohua Kotira qua riemwaqita viqata mwihuvata nraatara kyeta mpochiavata kyuqe kyaiqa varaqita vi variavata qaiqaa mpohua Kotira qua riemwaqita viqata mwihuvata nraatara kyeta Kotira kyaiqa varaarave, tiro. Iesusiva mwitaa turama.

### *Uaqia hi humwunravata uiti humwu hisatoraqi hisorara tura*

<sup>24</sup> Iesusiva variqaro mpo quaqaa ntumwa kyero nraakye qora timwa nyinro tiqaro, Kotiva nraakye qoraqaa ntaqikyiariva vahirero mwaa quara votima kyero vaiho. Vaisi mpovanto kyuqe humwu uiti humwu nai utaqi isorave.

<sup>25</sup> Isatovata ekyaahua entaqi vaita vita hia taqovaro mwia nramwutaa mpovanto nri ntero uiti isatoraqi uakukyavata isatorave. (Mwi uakukyava vahirero mwia vekyavata mwanrevata uiti voti iharo mwia tamwa nraahu hia kuua qara hirave.) Mwia nramwutaaavanto uaqlia hi humwunra isatero vuvaro

<sup>26</sup> uitivanto uakukya vatama kyero kuaaqi quipiqero qauma tamwa riarero utuvata mwia kyaiqa vaisinramwuvanto taqovaro mwi uakukyava uiti vatama kyero quipiqero vahurave.

<sup>27</sup> Taqeta mwia kyaiqa vaisinramwuvanto uro aakyo qora kyapara hita tiqata, Nronrao, e kyuqe humwu isataananrave iho? Taisairove mwi uakukyava qovarama viho? tita.

<sup>28</sup> Mwitaa tuvaro aakyo qova tiqaro, Qikye, ni nramwutaa mpovanto uakukya ni utaqi isataiho, tuvata mwia kyaiqa vaisinramwuvanto mwia kyapara hita tiqata, Qiove tire uro mwi uakukyara ntaru kyaananrave? tuvaro

<sup>29</sup> mwiva qaqao tiro, Hia uakukya mwia ntaru kyaate. Nkye uakukya ntariqata uiti vatama kyeta ntaru kyevorave.

<sup>30</sup> Qati kyaivarо uitivantovata uakukyavantovata kuaaqi quipiqarive. Uitivanto peqaqama viraqe nte ni kyara vantu vareqata nria vaisihuara mwitaama qianinrave, Nkye mwi uakukyara nraante teqa kye rupa kyeta varaqi uro qia quara tetama mwiaqaataitama uiti teqa kyeta varaqita ni kyara nraamwuqi uro mataate, qianinrave, turave, tiro. Iesusiva mwi quaraqaa ntumwa kyero timwa nyunra.

### *Maasiteti uruqaa ntumwa kyero timwa nyu quara*

(Maaki 4:30-32; Ruku 13:18-19)

<sup>31</sup> Iesusiva variqaro nraakye qora mpo quaqaa ntumwa kyero timwa nyinro tiqaro, Kotiva nraakye qoraqaa ntaqikyiani quava mwaa quara votima kyeroma vaiho. Mwiva maasiteti uru votima kyeroma vaiho. Vaisivanto maasiteti uru varaqiro uro nai utaqi vara tutorave.

<sup>32</sup> Mwia uru mwiva pata uapaaqiani vahirave. Mwia vara tutaiharo quipiqero kyatari nronraqama viro hini kyaravata nraatara kyero kyatari nronra vaiharo nyaamwavanto mwia kyaaraqi nraamwu hoqateta variarave, tura. Iesusiva mwi quaraqaa ntumwa kyero timwa nyunra.

### *Taupatairaqaa ntumwa kyero timwa nyu quara*

(Ruku 13:20-21)

<sup>33</sup> Iesusiva variqaro nraakye qora mpo quaqaa ntumwa kyero timwa nyinro tiqaro, Kotiva nraakye qoraqaa ntaqikyiani quava mwaa quara votima kyeroma vaiho. Mwiva taupataira votima hirave. Nraakyevanto mpereti utarera hiqaro uiti parauaa vara kyero mwia kyotaarive tiro taupataira vara kyero parauaa vatama kyero tuqasaa kyaiharo taupataiva utaqi vaiharo mperetivanto uqenra viro kyota virave, tiro. Iesusiva mwi quaraqaa ntumwa kyero timwa nyunra.

### *Iesusiva nraakye qora mpo quaqaa ntumwa kyeqaro timwa nyu quara okyarara tura*

(Maaki 4:33-34)

<sup>34</sup> Iesusiva nraakye qora mpo qua mpo qua timwa nyinrenro mwiva hia vutu kyero timwa nyinraitiro, mwiva mpo quaqaa ntumwa kyeqaro nraahu timwa nyiqiro vura.

<sup>35</sup> Mwiva mwitaa timwaqiro vuvaro haaru vetato entaqaa poropetivanto tu quava quataa mwivau vahura. Mwi quava mwataama tiro:

Nte nraakye qora qua timwa nyinrenra hina

hia vutu kyena timwa nyinraitina,

mpo quaqaa ntumwa kyeqana timwa nyinrenrave.

Mwaa mwataro ututo entaraqaatairo qua uqeta kyero

vataqiro vi quara hia riaara nte mwi quara okyara

nkyi timwa nyinrenrave, tura.

(Ihi 78:2)

### *Uaqia hi humwunra uiti isatoraqi hisora okyarara tura*

<sup>36</sup> Iesusiva mpo quaqaa mpo quaqaa ntumwa kyero timwa nyiqiro viro mwiaqaatairo mwiva nraakye qora mwini kyero nraamwuqi vuvata mwia

nraaqiaranramwuvanto mwiva varuraqi uro nteta Iesusirara tiqata, Vaakya qiana quara mwia nramwutaavanto uakukya mwia utaqi isato quara mwi quara okyara tiri timwa timwinraqe riaare, tita.

<sup>37</sup> Mwia nraaqiaranramwuvanto mwitaa tuvaro Iesusiva mwinramwuhua timwa nyinro tiqaro, Vaisi mpovanto kyuqe humwu isai vaisirara tura nte mwatani mwatatai nraaqiarava nte mwaa mwivave.

<sup>38</sup> Vaisi mwia aakyo okyaravanto vahirero ekyaa mwaa mwatavama vaiho. Kyuqe humwu mwia okyaravanto vahirero Kotira qua riaa nraakye qorahuama variavo. Uakukya mwia okyaravanto vahirero hia Kotira qua riaa nraakye qorhua Saataan-inra nraaqiarama variavo.

<sup>39</sup> Mwia nramwutaavanto uakukya humwu isato vaisira okyaravanto vahirero mwiva Saataanivave. Kyara vantu vareta nru entara okyaravanto vahirero nraakiara mwaa mwatava taiqaani entavama vaiho. Kyara vantu vareta nru vaisihua okyaravanto vahirero mwihua nyaamwunyaa vaisinramwuve.

<sup>40</sup> Mwia kyaiqa vaisinramwuvanto uakukya teqa kye rupa kyeta varaqi uro qiaqi quara tontema kyero, nraakiara mwaa mwatava taiqaani entaraqaa mwitaa hiananrove.

<sup>41</sup> Nte mwatani mwatatai nraaqiarava variqi vina mwaa mwatava taiqaani entaraqaa nte nyaamwunyaha sitaarita mwihua uto nte ntaqikyu mwataraqaataita hia kyuqe nraakye qora ni nraaqiaranramwu uaqlama nyate varihuavata, ekyaa uaqia hi kyaiqara uti varihuavata, rupaqita

<sup>42</sup> qia nronra itaaninraqi tuto kyaivata mwihua qiaqi variqa atura ntqata ntataqi viqata nkyiari anrai teti nreqata varivarave.

<sup>43</sup> Mwihua mwini uro tuto kyaivata avuqavuma kyeta nrohi vari nraakye qorhua huarivanto itaintema kyeta itamwaqi vivaro Kotiva mwihua sova mwihuaqaa ntaqikyiqiro virata variqi vivarave. Nkyi nyaato vahirera, mwi quara okyara ntapihi kyeta riaate, tiro. Iesusiva mwitaa turama.

### *Nronra munima vahu inraikyara mwataqi tuqetato quaraqaa ntumwa kyero tura*

<sup>44</sup> Iesusiva mpo quaqaa ntumwa kyero nraakye qora timwa nyinro tiqaro, Kotiva nraakye qoraqaa ntaqikyiariva mwaa quara votima kyeroma vaiho. Mwiva nronra munima vahi inraikyara uqeta taira votima kyeroma vaiho. Mwataqi mwi inraikyara uqeta taiva vaiharo vaisi mpovanto mwia puaama kye taqero, mwiaqaatairo mwiva qamwata kyero mwi inraikyara qaiqaa uqeta tero uro mwi mwatara kyoqaa hiankye timwa kyero mwiva ekyaa nai vatai inraikyara nyinro munima vara kyero uro mwi mwatara kyoqaa kyero varero uro nronra munima vahi inraikyara uqeta taira mwivavata varairave, tiro.

### *Kyau mwukyaari voti hiraqaa ntumwa kyero timwa nyu quara*

<sup>45</sup> Iesusiva mwitaa timwa kyero mwiva mpo quaqaa ntumwa kyero timwa nyinro tiqaro, Kotiva nraakye qoraqaa ntaqikyiariva mwaa quara votima kyeroma vaiho. Vaisi mpovanto kyau mwukyaari voti hira kyoqaa hirero mpo mwatukya mpo mwatukya puaahi vari vaisira votima kyeroma vaiho.

<sup>46</sup> Mwi vaisiva nronra munima vahira mwi inraikyara puaama kyero uro nai vatai inraikyara mpohua nyinro munima varaqiro uro mwia vatai vaisira mwirno kyau mwukyaari voti hira nronra munima vahira mwia varairave, tiro.

### *Vaheqaa ntumwa kyero timwa nyu quara*

<sup>47</sup> Iesusiva mwitaa timwa kyero mwiva mpo quaqaa ntumwa kyero timwa nyinro tiqaro, Kotiva nraakye qoraqaa ntaqikyiariva mwaa quara votima kyeroma vaiho. Vaisivanto vahe nramanri nronraqi mpiami kyaavata tavukya airi mpo qara mpo qara

hiahua mwipi viqetaa quara votima kyeroma vaiho. Vahe nramanri nronraqi mpiami kyaavata tavukya airivanto mwipi viqeteta

<sup>48</sup> piqavita variavata vaisivanto vahe mwia ntanrauqita uro nramanri tokyani kyeta mwipitai tukyama kyeta tavukya kyuqe hiahua vara kyeta mpo tuaqi ntumwa teta uaqia hiahua vara kyeta qaqira kyaarave.

<sup>49</sup> Nraakiara ekyaara entaqaa mwia votima kyero vahiananrove. Mwi entara nyaamwunyaahua tumu nteta nraakye qora tukyama kyeta ntapihi kyeta nrohi varihua qati kyeta, uaqia hi kyaiqara uti vari nraakye qorahua

<sup>50</sup> sitaqita uro qia nronra itaaninraqi tuto kyaivata mwihua mwipi variqata atura ntita ntateqata nkyiari aanrai kutiqata varivarave, tiro.

<sup>51</sup> Iesusiva mwitaa timwa kyero nai nraaqiaranramwu kyapara hiro tiqaro, Nkye mwi quara mwi quara nkyi timwa nyunra ntapihi kyetave riaavo? tuvata mwinramwuhua eo tuvaro

<sup>52</sup> mwiva mwinramwuhua timwa nyinro tiqaro, Kotira haaruua qua okyara timwa nyi vari vaisihuqitairo mpovanto Kotiva nraakye qoraqaa ntaqikyiani quarararavata quitaave timwa kyero Kotira nraaqiaraqama quariva, mwi vaisiva nraamwu mpo qova votima kyeroma variro. Mwi vaisiva nai nraamwuqi mpo inraikya mpo inraikya vatairaqitairo haaruua inraikya kyuqe inraikyavata, qaraakya inraikya kyuqe inraikyavata, vare varirave, tiro.

### *Nasaretiqinaahua Iesusira qoririma mwatora*

(Maaki 6:1-6; Ruku 4:16-30)

<sup>53</sup> Iesusiva nraakye qora mpo qua mpo quaqaa ntumwa kyeqaro timwa nyi taiqa kyero mwiva mwi mwatukyara kyero

<sup>54</sup> nai mwaatani nrumu ntantero uro mwaanra nraamwuqi variqaro mpo qua mpo qua timwa nyuvata nraakye qoravanto nrihanrama vita tiqata, Qikye, mwi vaisiva taisairove mwi quara mwi quara kyuqe qua riaaho? Tava mwia kepuuya mwihanrove mwiva nronra kyaiqa vare variho? tita.

<sup>55</sup> Mwihua mwitaa timwa kyeta qaqao tita, Mwi vaisiva nraamwu hoqe vari vaisira mwaaquvantoma variho. Mariaava mwia nrovama variho. Iemisivavata, Iosepivavata, Saimonivavata, Iutaasivavata, mwinramwuhua mwia qatanramwuma variavo.

<sup>56</sup> Mwia nrunranramwu mwaini tirivata variavo. Taisairo mwiva mwi kyaiqara mwi kyaiqara okyara taqairave? tita.

<sup>57</sup> Mwitaa timwa kyeta mwihua Iesusirara tiqata, Mwiva hia nronra vaisive. Mwiva qumina mwaa mwatanaava nraahuma variho, timwa kyeta mwia qoririma mwatora.

Mwihua mwitaa tuvaro Iesusiva mwihua timwa nyinro tiqaro, Poropeti vaisivanto mpo mwatani iro variraro mwi mwatanaava mwianra nronra vaisive tiroma mwianra qamwata mwataananrove. Mwi vaisiva nai mwaatani uro nai nramwunaahua vatama kyero varirata mwia nramwunaahua mwianra qumina vaisima tiri votima kyero nraahuma variho tivarave, tiro.

<sup>58</sup> Iesusiva mwitaa timwa kyero mwi mwatanaahua mwianra qumina vaisivanto hia tiri qio kyaahaqa hiarivave turara tiro, Iesusiva mwini variqaro nronra kyaiqa pataqiatana nraahu vara nyatora.

## 14

### *Ioninra nramanri nyi varu vaisira ru kyora*

(Maaki 6:14-29; Ruku 3:19-20, 9:7-9)

<sup>1</sup> Mwi entara Herotiva vunyaa vaisivanto Kaririqaa ntaqikyi variqaro nraakye qoravanto Iesusirara ti varu quara riora.

<sup>2</sup> Riero Herotiva nai kyaiqa vaisiara tiqaro, Qikye, mwi vaisiva Ionivave. Ioniva nramanri nyi varu vaisiva qutu vuraqitairo qaiqaa qati siviro nrohi variho. Mwiva qaiqaa qati siviro nrohiqarora tiro, mwiva nronra kyaiqa qio vare variho, tiro.

<sup>3-4</sup> Tauraagama Herotiva nai qata Piripira nraata Herotinamainra varero varuvaro Ioniva Herotira timwa mwinro tiqaro, È ena qata nraata hia varaataara vaiharama varaaro, tuvaro mwi quara kyaara Herotiva vaisi mpo titovaro Ioninra ntavaaqavu kyero mwia rupaqiro nrumu karavuqi kyora.

<sup>5</sup> Herotiva Ioninra ru kyaataa huvaro nraakye qora nraatu aatu hiqaro hia mwia ru kyora. Nraakye qora Ioninranra poropeti vaisivantove tuvarora tiro, Herotiva nte mwia rukyaarita ni inronra hivorave timwa kyero varura.

<sup>6</sup> Mwitaamaqi viro Herotiva nai mwato entava qovara huvaro mwi entaraqaa vaisi mponramwuanra aakyara ntovata nrita ntuaantuama vuvaro Herotinamainra nraamwunravanto mwihua ihi ntamwa nyatovaro Herotiva mwia taqero mpoqama kyero qamwata mwatero

<sup>7</sup> nai kyauqu nriqiqaa vatero tiqaro, Nanra inraikyarave i mwutukya vahianinra ni timwa mpiraqe i mwiankye, tiro.

<sup>8</sup> Mwitaa tuvaro mwi mwanraatava nai nronra kyapara huvaro mwia nrova mwi quara qianta tuvaro mwi mwanraatava Herotirara tiqaro, Ioniva nramanri nyi vari vaisira mwia qiata taanuqa vatero varaqira nrumu ni mpiante, tiro.

<sup>9</sup> Mwitaa tuvaro Herotiva vunyaava varuvaro mwia mwutukyavanto uaquia huvaro variqaro mwiva vaakya kyauqu nriqiqaa vateqaro kyara nranrenrata nrumu varu vaisihua suqaa timwa to quarara rieqaro mwiva vaisi mpo titero mwi mwanraatava tintema kyera mwitaa hiante tuvaro

<sup>10</sup> mwi vaisiva uro karavuqitairo Ioninra nrunta pehi kyero

<sup>11</sup> Ioninra qiata taanuqa vatero varaqiro uro mwi mwanraatara mwuvaro mwiva nai nronra uro mwunrama.

<sup>12</sup> Ioninra vataqi nrohu vaisihua nrumu Ioninra mwamwanta varaqita uto quntamwa teta mwiaqaataita mwihua uro Jesusira timwa mwunra.

### *Iesusiva kyara airiqama kyero 5,000 vaisi nyunra*

*(Maaki 6:31-44; Ruku 9:10-17; Ioni 6:1-13)*

<sup>13</sup> Ioninranra Jesusira uro timwa mwuvaro Jesusiva mwi quara riero mwini kyero mpotuqi mwaanri ntero nai nraaqiaranramwu kyapata nkyiariaraa varirerata hia vaisi varunani vuvata nraakye qora airivanto mwihua vu quara rieta mpo mwatukya mpo mwatukyaqitaita mwihua mwatantuna Jesusira vataqita vura.

<sup>14</sup> Vuvaro Jesusiva mpotuqi nramanriqaa vuva uro ntero taqovata nraakye qora airivanto ntuaantuama vita varuvaro mwiva mwihuara po kye timwa nyatero mwihuaqitairo nriqa vu nraakye qorahua kyugema nyatora.

<sup>15</sup> Jesusiva mwini varuvaro huarivanto tumi vuvata mwia nraaqiaranramwuvanto mwiva hunani uro nteta tiqata, Mwaini quminasatave. Enta hiankyorave. Nraakye qora mwaahua sitairata uro mwatukya vahianinraqitaita kyara kyoqaama kyeta nraate, tita.

<sup>16</sup> Mwia nraaqiaranramwuvanto mwitaa tuvaro Jesusiva qaqao tiro, Hia mwihua sitaivata quate. Nkyetavanto mwihua kyara nyivata nraate, tiro.

<sup>17</sup> Jesusiva mwitaa tuvata mwinramwuhua qaqao tita. Tire taqauraro mwaini mpereti kyauquruvata tavukya taaratanavata nraahuma vaiho, tita.

<sup>18</sup> Mwihua mwitaa tuvaro Jesusiva mwi kyarara mwaini vara ni mpiae timwa kyero

<sup>19</sup> nraakye qorara mwukyausata mwatakyaa vita variate timwa kyero mwiva mpereti kyauquruvata tavukya taaratanavata vara kyero nyaamwuni taqeqaro Kotirara kyugeve timwa kyero mpereti nteqa kyero mwi kyarara nai nraaqiaranramwu nyuvata mwihua nraakye qora ekya tukyama kyeta nyuvata

<sup>20</sup> mwihua ekya qio nronra. Ekyaa nraakyе qoravanto qio nrovata mwiaqaataita mwia nraaqiaranramwuvanto ntutantuto tuara tua nronra vareta mwihua nreqata viti vaati kyo kyarara utu kyeta tua 12 nramwu piqa kyora.

<sup>21</sup> Mwi entara vaisi nraahu 5,000 vanto nrovata nraakyе nraaqiara airivantovata mwi kyarara nronra.

*Iesusiva kyaarerera qyuquqo ntamwaqiro vura*

*(Maaki 6:45-52; Ioni 6:16-21)*

<sup>22</sup> Iesusiva kyara nyitero mwiaqaatairo nai nraaqiaranramwu sitero tiqaro, Nkye mpotuqi mwaanri nteta kyaarerera qama teta hini tokyani nkye nraante vi varivaqe nte nraakyе qora sitaarita nkyiari mwaatani mwaatani quate, tiro.

<sup>23</sup> Mwitaa timwa kyero mwiva nraakyе qora nkyiari mwaatani sitamwa kyero mwiaqaatairo Kotiravata qua tirero verara taaqiqaa vuvaro entama vuvaro mwiva mwini nanrianraa varura.

<sup>24</sup> Varuvaro mpotuvanto nramanri utaqaa vuvaro toqavanto mwihua virera hunasairo nruvarora tiro, nramanrivanto mpotu ventaqiro vi varura.

<sup>25</sup> Toqa ti varuvaro nramanrivanto mpotu ventaqiro vi varuvaro qaumakya qaataatarero huvaro Iesusiva kyaarerera mwutuqaa qyuquqo ntamwaqiro viro mwihua hunani vuvata

<sup>26</sup> mwia nraaqiaranramwuvanto taqovaro mwiva kyaarerera mwutuqaa qyuquqo ntamwaqiro nruvata mwihua mpogama kyero nyaatuqa tovata vaanave tiqata nronraqama kyeta aatu hi variqata qua aakyara nte varuvaro

<sup>27</sup> Iesusiva qamwanrama kyero mwihuara tiqaro, Kepukyaqama kyeta qati variate. Ntema nruqo. Hia aatu hiate, tiro.

<sup>28</sup> Iesusiva mwitaa tuvaro Pitaava tiqaro, Nronrao, qutaa e varirera, tiraqe ntevata kyaarerera mwutuqaa qyuqu ntamwaqina e hiananrani quangye, tiro.

<sup>29</sup> Pitaava mwitaa tuvaro Iesusiva tiqaro, Qio nriante, tiro. Mwitaa tuvaro Pitaava mpotuqitairo mwaamwi ntero kyaarerera mwutuqaa qyuquqo ntamwaqiro Iesusiva hunani viro.

<sup>30</sup> Mwiva mwini viqaroma qio quaninrave timwa kyero taqovaro toqavanto nronraqama kyero tuvaro mwianra rieqaro mwiva aatu hi varuvaro mwia kyuqvanto nramanriq i mwatanianra vi varuvaro mwiva Jesusirara aakyara ntero tiqaro, Nronrao, ni tu varaante, tuvaro

<sup>31</sup> Iesusiva qamwanrama nai kyauquqo viti kyero mwia tu varero tiqaro, E toqavanto tirara nraahu rieqara hiama nianra kepukyaqama kyera riaaro. Nanraqamave e taara nraato tutaaro? tiro.

<sup>32</sup> Iesusiva mwitaa timwa kyero mwikyantiri mpotuqi mwaanri ntovaro toqavanto qamwanrama taiqa vura.

<sup>33</sup> Mwitaa huvata mwia nraaqiaranramwu mpotuqi varuhua Jesusirara qamwateqata mwahuta timwa mwateta tiqata, E qutaama Kotira mwaaqvanto variaro, tura.

*Kenesaretiqinaahua nriqa vuhua Iesusiva kyuqema nyatora*

*(Maaki 6:53-56)*

<sup>34</sup> Mwinramwuhua mwitaa timwa kyeta mpotuqi nramanriqaamateta Kenesaretini uro ntora.

<sup>35</sup> Uro ntovata mwi mwatanaahua Jesusira ntapihi kyeta taqeta qua vara kyovaro ekya mwia nraaqani vahu mwataraqi viro nrinro huvata ekya mwi mwatanaahua nriqa vu nraakyе qorahua sitaqita nrumu Iesusiva varunani kyetama

<sup>36</sup> Jesusirara po titi tiqata, Kyairata mwihua i vaaqa vitiqaa kyaatu kyaivarao mwihua nyamwanta kyuqema quarive, tuvata Jesusira vaaqa vitiqaa tu varohua kyuqema nraahu vura.

## 15

*Kotiva timwa tai quava nraaquhua taatohua quavata nraatara kyairave tura  
(Maaki 7:1-13)*

<sup>1</sup> Parisi vaisinramwuvata, mwaanra okyara ti varu vaisihuavata, Iesusira taqarerata Ierusalemisaita nri nteta Iesusira kyapara hita tiqata,

<sup>2</sup> Nanraqamave i nraaqiaranramwuvanto tiri haivaquhua timwa to quara nteqa kye variavo? I nraaqiaranramwuvanto hia kyauqu hiqaraitita, kyara nre variarave, tita.

<sup>3</sup> Mwihua mwitaa tuvaro Iesusiva nkyiari timwa nyinro tiqaro, Nkye mpo, nanraqamave Kotiva vatai quara hia riaraitita, nkyeta qua nraahu riemwaqita vi variavo?

<sup>4</sup> Kotiva mwitaama tiro: Ena nrohua qohua nrutu tuaahera nyataante, timwa kyero Kotiva qaiqaa tiqaro, Nai nronra qorara uaquia hi quara ti variani vaisira ru kyaate, turave.

<sup>5</sup> Kotiva mwitaa timwa to quava vahata nkye mwi quara hia riaraitita, nkyeta riemwa kye nkye tiqata, Vaisi mpovanto nai nrohua qohuara tiqaro, Nte nkyitana kyaahaqa hiqana nyinrenra hian munimanra hia nkyitana nyinraitina, Kotira mwintrenrave, tirera,

<sup>6</sup> mwi vaisiva qiomma nai nrohua qohua qaqlira kyero hia mwitanahuqaqaa ntaqikyiqiro quananrove, qiarave. Nkye unra qua timwa kyeqatama nkyi haivaquhua timwa to quara nraakye qora timwa nyiqata nkye Kotira qua ru kyeta hiavo.

<sup>7</sup> Nkye unraqama kyeqata kyuqe kyaiqa vare variahuave. Aisaiaava haaru variqaro nkyiara ntapihi kyero qua qara ntumwa torave. Aisaiaava Kotira qua qovarama kyeqaro Kotiva mwitaama tiro, tiro:

<sup>8</sup> Mwaa mwatanaahua nroqitaita nraahu ni nutu tuaahere variavaro mwihua mwintukyavanto hia nianra vahata variarave.

<sup>9</sup> Mwihua mwaanra tiqatama nkyiari nraaquhua qua nraahu timwa nyiqatara tita, mwihua quminama ni nutu tuaahere variavo, turave. *(Aisaiaa 29:13)*  
Aisaiaava haaru nkyiara mwitaa turave, tiro.

*Nanra inraikyavantove vaisi uaqiamma kyaiharo hia kyotataqama viro varirave tura  
(Maaki 7:14-23)*

<sup>10</sup> Iesusiva mwitaa timwa kyero nraakye qora nyaanrama kyero mwihuara tiqaro, Mwaa quara rieqatama ntapihi kyeta nraato tuate.

<sup>11</sup> Vaisi nroqi viqete vari inraikyava hia mwia vara uaqiamma kyairave. Mwia nroqitairo nrinte vari inraikyava mwi inraikyava mwia vara uaqiamma kye varirave, tiro.

<sup>12</sup> Iesusiva mwi quara timwa kyero varuvata mwia nraaqiaravanto mwiva hunani uro nteta tiqata, E hiave ntapihi kyera hiaro? Parisi vaisinramwuvanto e vaakya timwa nyiana quara rieta uaquia hi quarave timwa kyeta hia mwianra qamwataavo, tita.

<sup>13</sup> Mwihua mwitaa tuvaro Iesusiva tiqaro, Ni kova nyaamwuni variva taqairaro mwiva hia vara tuani inraikyava qupiqairaro mwiva mwi inraikyara tuqa vatama kyero ntaru kyaananrove, tiro.

<sup>14</sup> Mwitaa timwa kyero mwiva Parisi vaisiara tiqaro, Hia mwihuara nronraqama kyeta riaate. Mwihua vu qipa vihata variahua hia aanra taqaraitita variqata vu qipa quahua kyaata mponramwuvata aanra nyaamwutarerata uti variahuve. Vu qipa quari vaisiva nai hena vu qipa quani vaisira aanra nraamwutankye qianinra mwitanahuqaqama ontiqi ntuqutu vivarave, tiro.

<sup>15</sup> Iesusiva mwitaa tuvaro Pitaava tiqaro, Vaakya nraakye qora mpo quaqaa ntumwa kyera timwa nyiana quara tiri timwa timwinraqe tire mwi quara okyara ntapihi kyeta riaare, tuvaro

<sup>16</sup> Iesusiva tiqaro, Qikye, nkyevata mwinramwuhua votima kyeta hiave ntapihi riaavo?

<sup>17</sup> Nkye hia ntapihiarave iho? Kyaravanto nroqima tero viva mwiaqaatairo raraqi viro mwiqitairo qatinani tumi tarairave.

<sup>18</sup> Vaisi mwutukyaqi vahi inraikyava nroqaatairo qatinani nrintaiva, mwi inraikyava vaisi vara uaqama kyairave.

<sup>19</sup> Vaisi vu nraato mwutukyaqitairo uaquia hi inraikyarara riaiva nri varirave. Vaisi rukyaarivave, mpore nraatara nrohiarivave, api qaraqiro nrohiarivave, mpuara varaarivave, unra qiarivave, mpore nrutu mwatani tumi quarive tiro unra qua qiarivave, mwiqitairo nri varirave.

<sup>20</sup> Mwi inraikyava mwi inraikyava vu nraato mwutukyaqitairo nri ntero vaisi vara uaqama kyaiharo Kotiva mwi vaisirara uaquia hi vaisirave tirave. Vaisivanto hia kyauqu hiqama kyero kyara nraanriva hia mwia vara uaqama kyairaro Kotiva mwianra uaquia hi vaisirave qiananrove, tiro.

*Iesusiva mpo mwatanaa nraakye kyaahaqama mwatora  
(Maaki 7:24-30)*

<sup>21</sup> Iesusiva mwitaa timwa kyero mwi mwatara kyero uro mpo mwataqaa mwatukya taaratana Taiaavata Saitonivata vahu mwataraqaa varura.

<sup>22</sup> Mwini uro varuvaro mwi mwataraqaaanaa nraakye mpovanto Kenaani nraakyevanto Iesusiva varunani uro ntero Iesusirara nronraqama kyero aakyara ntero tiqaro, Nronrao, Ntevitira mwaaquo, nianra po timwa mataante. Vaanavanto ni naamwunra utaqi variharo mwiva uaqama kyero variho, tiro.

<sup>23</sup> Mwi nraakyeva mwitaa tuvaro Iesusiva hia qua tiraitiro varuvata mwia nraaqiaranramwuvanto mwiva hunani uro vuavi raavira tita, tiqata, Mwi nraakyera kyaahaqama kyairaro quarive. Mwiva tiri tivataqiro nriqanro aakyara ntamwaqiro nrihanro tiri pupohama timwiho, tita.

<sup>24</sup> Mwihua mwitaa tuvaro Iesusiva qaiao tiro, Isareri vaisivanto sipisipi votima kyeta raupirima quavarso Kotiva ni titaihana nte mwi mwatanaahua nraahu kyaahaqama nyatarerana tumuvave, tiro.

<sup>25</sup> Iesusiva mwitaa tuvaro mwi nraakyeva nrumu Iesusira vuqaa tumu ntiro variro tiqaro, Nronrao, qati ni kyaahaqama mataante, tuvaro

<sup>26</sup> Iesusiva qaiao tiro, Nte nraaqiara kyara vara kyena vairivanto hinani kyaankyorave, tiro.

<sup>27</sup> Iesusiva mpo quaqaa ntumwa kyero mwitaa tuvaro mwi nraakyeva tiqaro, Nronrao, vaisivanto kyara nreqanro viti vaati kyaira qati vairivanto nrainrave, tiro.

<sup>28</sup> Nraakye mwiva mwitaa tuvaro Iesusiva tiqaro, E nraakye nianra kepuqyqama kyera riaaro. Nanra inraikyara i mwutukya vahiariva qutaa qovara hiananrove, tiro. Iesusiva mwitaa tuvaro mate mwiqiara mwia nraamwunravanto kyuqema viro varura.

*Iesusiva airi nraakye qora kyuqema nyatora*

<sup>29</sup> Iesusiva mwi mwatara kyero Karirini kyaarerera tokyasataa vuva uro taaqiqaa mwaanri ntero mwatakyaa viro varuvata

<sup>30</sup> nraakye qora airivanto mwiva hunani vita. Mwihua kyuqu uaqama vuhuave, vu qipa vuhuave, mwukyaari ntanrenra vuhuave, nro tita vuhuave, mpo qara mpo qarama kyero nriqa vuhuave, ekyaa mwihua sitaqita uro Iesusira kyuqutarasata kyovaro mwiva mwihua kyuqema nyatora.

<sup>31</sup> Iesusiva mwihua kyuqema kyovata nraakye qoravata nro tita vuhua qio qua tuvata, mwukyaari ntanrenra vuhua ntapihi varuvata, kyuqu uaqama vuhua qati varuvata, vu qipa vuhua qati taqe varuvata, nraakye qoravanto mwihua taqeta

vaimwateta kyauqu ntukikinraaqateta Kotira nrutu tuaahereta tiqata, Qikye, Kotiva kyuqema kyero Isareris vaisiqaa ntaqikyi variho, tura.

*Iesusiva 4,000 vaisi kyara nyunra  
(Maaki 8:1-10)*

<sup>32</sup> Iesusiva nai nraaqiaranramwu nyaanrama kyero tiqaro, Nte nraakye qora ntuvantuama vita variahura nronraqama kyena po tuqo. Mwihua taarampo enta ni vatama kyeta variqi viqatama mwihua nkyiari kyara nramwa taiqa kyaavo. Nte mwihua nkyiari mwaatani sitaarita vivaro kyara nraataa hirata tantu vaantuantakyaa vivorave, tiro.

<sup>33</sup> Iesusiva mwitaa tuvata mwia nraaqiaranramwuvanto tiqata, Mwaa qumina mwataqaave. Taisaita kyara vara kyetave mwihua nyiananrave? Nraakye qora airintima mwaini variavo, tita.

<sup>34</sup> Mwihua mwitaa tuvaro Iesusiva mwihua kyapara hiro tiqaro, Nataama mperetive ntumwa taavo? tuvata mwihua tiqata, Mpereti 7 nramwu vaihata tavukya pata mponramwuvata ntumwa tauro, tita.

<sup>35</sup> Mwitaa tuvaro Iesusiva nraakye qorara mwatasata mwatakyaa quate timwa kyero

<sup>36</sup> mpereti 7 nramwuvata tavukyavata vara kyero Kotirara kyugeve timwa kyero mwi kyarara nteqa kyero tukyama kyero nai nraaqiaranramwu nyuvata mwihua vara kyeta nraakye qora nyuvata

<sup>37</sup> ekya mwihua mwi kyarara qio nronra. Mwihua qio nrovata mwia nraaqiaranramwuvanto mwihua nreta viti vaati kyora utu kyeta ntutantuto tuara 7 nramwu piqa kyora.

<sup>38</sup> Mwi kyarara 4,000 vaisivanto nrovata nraakye nraaqiara airivantovata nronra.

<sup>39</sup> Mwihua kyara nramwa kyovaro Iesusiva mwihua nkyiari mwaatani sitovata vuvaro mwiva mpotuqi mwaanri ntero Makataaninianra kyaarereraqaama tero vura.

## 16

*Nronra kyaiqa mpo tiri tinraamwutaante tura  
(Maaki 8:11-13; Ruku 12:54-56)*

<sup>1</sup> Iesusiva mwini vuvata Parisi vaisinramwuvantovata, Saitiusi vaisinramwuvantovata, Iesusiva varunani uro nteta kyai mwia mwataara hiqata taqaare timwa kyeta Iesusrara tiqata, E tiri tivuqaa nronra kyaiqa mpo tinraamwutairaqaeta tire mwia taqetama tire iara tiqata qutaama Kotiva mwia titaiharo tumivave qiare, tita.

<sup>2</sup> Mwihua mwitaa tuvaro Iesusiva mwihua timwa nyinro tiqaro, Nkye taqaavarov enraihanro vuhero vehohaara utihata nkye tiqata hura vuhaananrove qiarave.

<sup>3</sup> Nkye toqaqi taqaavarov nyaamwuqi kyokira rutaihata mate vati ntuananrove qiarave. Nkye nyaamwuqi taqeplatama huari itaani okyarararave, vati ntuananrove, ntapihi taqeplatama nkye nanraqamave mwaa entara qovara hiani okyarara hia ntapihiavo?

<sup>4</sup> Uaqia hi kyaiqara nraahu uti varia vaisihua Kotirara qumimaqama kyeta api nrohi variahua nronra kyaiqa tinraamwutairaqaeta i okyarara qutaave qiare ti variavo. Hia nte ntenu okyara mwihua nyaamwutena nronra kyaiqa varaaninrave. Kotiva haaru nkyi haivaqara Ionaanra utuntema kyero nivata mwitaa hiananrove. Mwianra nraahu rieqatama nkye ni okyara taqetama nkye nianra Kotiva titai vaisivave tivarave, tiro.

Iesusiva mwitaa timwa kyero mwi vaisinramwuhua mwini kyero vurama.

*Nkye Parisi vaisinramwuanravata Saitiusi vaisinramwuanravata rauriqata variate tura  
(Maaki 8:14-21)*

<sup>5</sup> Jesusira nraaqiaranramwuvanto taunru kyeta hia mpereti vararaitita, qati kyaareraqaa qareta vura.

<sup>6</sup> Jesusiva tiqaro, (Taupavanto utaqi viro mpereti vara uqenra kyaiharo kyotairave.) Parisi vaisivata Saitiusi vaisivata mwihua taupa mwia votima kyeta variavo. Nkyenramwu mwihuara rauriqata variate, tiro.

<sup>7</sup> Jesusiva mwitaa tuvata mwinramwuhua Jesusiva mpo quaqaa ntumwa kyero timwa nyu quara hia ntapihiraitita, nai timwa mwi nai timwa mwi hita tiqata, Nanra quave tiho? Mpereti hia vareta nrunanra mwianrave mwitaa tiho? tita.

<sup>8</sup> Mwitaa ti varuvaro Jesusiva mwihua ti varu quara ntapihi kyero tiqaro, Qikye, nianra kepuqyaqama kyeta riaataara vaihata nkye nianra hia kepuqyaqama kyeta rie variavo. Nkye nanraqamave mpereti hia vare nrianra kyaara airi qua ti variavo?

<sup>9</sup> Nkye hia ntapihi kyeta riaraitita, nkye taunruve kyaavo? Nte mpereti kyauquru vara kyena vaisi airi 5,000 vaisi nteqa kyena nyiavara nkye mwihua nreta kyora viti vaati utu kyeta nataama tua piqa kyorave? Hiave nkye mwianra riaavo?

<sup>10</sup> Nte 4,000 vaisi mpereti 7 nramwu nteqa kyena nyiavara mwihua nreqata viti vaati kyo kyarara nkye utu kyeta nataama tua piqa kyorave? Nkye hiave mwianravata riaavo?

<sup>11</sup> Nte vaakya tu quara nkye nanraqamave hia ntapihi kyeta riaavo? Nte mpo quaqaa ntumwa kyena hia mperetiara tuqo. Nte nkyiara tiqana, Parisi vaisinramwuvata Saitiusi vaisinramwuvata mwihua taupa votima kyeta variarara tita, nkye mwihuara rauriqata variate tuqo, tiro.

<sup>12</sup> Jesusiva mwitaa tuvaro mwinramwuhua su nyaatovanto ntapihi vuvata riovaro Jesusiva hia mperetivatama kyeta utaara taupara tiraitiro, mwiva mpo quaqaa ntumwa kyero timwa nyiqanro Parisi vaisinramwuvata Saitiusi vaisinramwuvata timwa taa quara mwianrama rauriqata variate tiho, tita.

### *Pitaava Jesusira okyarara tura*

(Maaki 8:27-30; Ruku 9:18-21)

<sup>13</sup> Jesusiva mwatukya mpo Sisariaa Piripai nraaqani uro ntero nai nraaqiaranramwu kyapara hiro tiqaro, Ni mwatani mwatatai nraaqiarara nraakyе qoravanto ta vaisivave tiqatave variavo? tiro.

<sup>14</sup> Mwitaa tuvata mwinramwuhua tiqata, Mpo hiahua iara mwiva Ioniva nramanri ni varuvave ti variavata, mpo hiahua iara mwiva tiri haivaqava Iraisaavave ti variavata, mpo hiahua iara tiri haivaqava Ieremaiaavave, nraahumwa mpo poropetivanto qaiqaa qovarama viro variho ti variavo, tita.

<sup>15</sup> Mwinramwuhua mwitaa tuvaro Jesusiva mwihua kyapara hiro tiqaro, Qio nkyenramwu mpo? Nkyenramwu nianra ta vaisivave tiqatave variavo? tiro.

<sup>16</sup> Jesusiva mwitaa tuvaro Saimoni Pitaava Jesusira timwa mwinro tiqaro, E Kotiva titai vaisiva Mesaiaavantove. Kotiva qati variqiro vi varira e mwia mwaaquvantoma varira hiaro, tiro.

<sup>17</sup> Pitaava mwitaa tuvaro Jesusiva Pitaarara tiqaro, E Ioninra mwaaqu Saimonivave. E nianra mwitaa qiararo Kotiva iara qamwate variho. Hia qumina vaisivanto ni okyarara i vu nraato mwihanra ntapihiananrave. Ni kova nyaamwuni variva, mwivama mwi quara i timwa mwihanra e ntapihiananrave.

<sup>18</sup> Nte iara mwitaa tireranave, I nrutu Pitaavave. Orivave. Nte ori nronraqa ntena nraamwu hoqa tarerave. Mwi nraamwuva Kotira nraakyе qoravantomava varivarave. Outira inraikyavantovata hia qio mwi nraamwunra nraatara kyaananrove.

<sup>19</sup> Nte i kiqa mwianrinra e nraante qesa qatua nyatairata nraakyе qoravanto Kotiva ntaqikyianinraqi qio vivarave. E mwatani variqara mpo inraikya qora inraikyara qao timwa tairaro Kotivavata nyaamwuni variqaro i qua kuua qua mwia vataqiro viqaro qao timwa taananrove. E mwatani variqara mpo inraikyara hia qao timwa

tairaro Kotivavata nyaamwuni variqaro i qua kuaa qua mwia vataqiro viqaro hia mwi inraikyarara qao qiananrove, tiro.

<sup>20</sup> Iesusiva mwitaa timwa kyero nai nraaqiaranramwu kepukyaqama kyero timwa nyinro tiqaro, Hia mpohua timwa nyita nianra mwiva Kotiva titai vaisiva, Mesaiaavanto variho qiate, tiro.

*Iesusiva nai qutu quaninranra timwa nyunra  
(Maaki 8:31-9:1; Ruku 9:22-27)*

<sup>21</sup> Mwi entaraqaatairo Iesusiva nai qutu quaninranra nai nraaqiaranramwu vutu kyero timwa nyinro tiqaro, Nte Ierusaremini quarita mwini nronra vaisinramwuvata, Kotira kyaiqa vara mwate varia vaisihua vunyaa vaisinramwuvata, mwaanra okyara ti varia vaisinramwuhuavata, mwihua ni uaqiamaqita vi varivaqena nte nriqa quani inraikyara varaqina quarita ni ru kyaivaqena nte qutu vina taarampo enta varina qaiqaa qati siquaninrave, tiro.

<sup>22</sup> Iesusiva mwitaa tuvaro Pitaava mwia vita uhini kyero mwianra qaqao tiro, Nronrao, haunri Kotiva mwihua kyairata i mwitaama mwatevorave, tiro.

<sup>23</sup> Pitaava mwitaa tuvaro Iesusiva tuqasaa viro Pitaara inronra hiro tiqaro, Saataanio, nyianrani quante. Hia ni aanra antuaante. E hia Kotiva riaintema kyera rie variaro. E qati vaisivanto rie variantema kyerama rie variaro, tiro.

<sup>24</sup> Mwitaa timwa kyero Iesusiva nai nraaqiaranramwu timwa nyinro tiqaro, Ni pataqiro nrianri vaisiva, mwiva nai mwutukya vahianinra qaqlira kyero, nai ru kyeta hirite kyatarira vara qu varero ni naakiara nrianrive.

<sup>25</sup> Nai mwatani qati varianinranra nraahu nronraqama kyero riaariva, mwi vaisiva ekyaarama qutu quananrove. Vaisivanto nianra riemwaqiro viqaro uro qutu quariva, mwi vaisiva ekya enta qati variqiro quananrove.

<sup>26</sup> Vaisivanto mwatani variqiro viqaro ekya inraikya ntuvantuama kyero vatero mwiaqaatairo qutu viraro mwiva ntuvantuama taani inraikyava mwia qiove kyahaqa hiananro? Hia qiove. Mwiva hia kyoqaa utu kyero qaiqaa qati variqiro quananrove.

<sup>27</sup> Nte mwatani mwatatai nraaqiarava nraakiara qaiqaa nyaamwusaina kepukyavanto uro ntantena tuminrenrave. Mwi entara ni kora okyara kyuqe hiariva niqaatairo itero ntuvaahe variraqe nte nyaamwunyaahua kyapata tumu variqana ekya nraakye qoravanto kyaiqa varerara rieqanama nkyiari kyoqaa nyianinrave.

<sup>28</sup> Nte qutaa qua qianinra riaate. Vaisi mponramwuvanto mate mwaa mwaini sivita variahua, mwihua hia vaaky qutu vivarave. Mwihua qati varivaqena nte mwatani mwatatai nraaqiarava nronraqama vina nte vunyaa vaisiqama vina variarita mwihua qutu vivarave tuqo, tiro.

## 17

*Iesusira mwamwantavanto nai nraahumwa mpo mwamwanta kyuqe mwamwanta kyuqu vura*

*(Maaki 9:2-13; Ruku 9:28-36)*

<sup>1</sup> Iesusiva mwitaa tuvaro 6 enta nritarovaro mwiva Pitaaravata, Iemisiravata, Iemisira mwia qata Ioninravata, mwinramwuhua sita varero taaqiqaa nkyiariaraa varirerata vura.

<sup>2</sup> Mwini uro varuvaro Iesusira mwamwantavanto nraahumwa mpo mwamwanta kyuqu vuvaro mwia virivanto huarivanto itaintema kyero ntuvaahe varuvaro mwia tuavaaqavata mpoqama kyero takyuqiro ntuvaahe varura.

<sup>3</sup> Mwia mwamwantavanto mwitaama kyero kyuqu vuvaro varuvata mwia nraaqiara taaramponramwuvanto variqata taqovata Iraisaakya Mosesikya mwihua haivaqahuatana qovarama vita variqata Iesusiravatama kyeta qua ti varura.

<sup>4</sup> Mwitanahua Iesusiravatama kyeta qua ti varuvaro Pitaava Iesusirara tiqaro, Nronrao, kyuqemama tirenramwu i vatama kyeta mwaini varuro. E qiove tirera, tire haraara nraamwu taaramponramwu iara mpo, Mosesirara mpo, Iraisaarara mpo, hoqa nyataare, tiro.

<sup>5</sup> Pitaava mwi quara qati nraahu ti varuvaro tonamwu takyuqiro ntuvahova mwihua ntumwaqu kyovaro quavanto tonamwuqitairo tiqaro, Mwaa ni maaqu, ni mutukyavanto mwianra mpoqama kyero nti vari nraaqiaravama variho. Nte mwianra qamwateqanama varuqo. Nkyenramwu mwia qua riaate, tiro.

<sup>6</sup> Quavanto mwitaa tuvata mwia nraaqiara taaramponramwu mpoqama kyero nyaatuqa tovata virianasaita mwataqaa tumu ntita varuvaro

<sup>7</sup> Iesusiva uro ntero nai kyaquqo mwihuaqa tu varero tiqaro, Mwaahuao, siquate. Hia aatu hiqata variate, tuvata

<sup>8</sup> mwinramwuhua tuaahera kyeta taqovaro Iesusiva nanrianraa varuvaro vaisi mpo mwitanahua hia varura.

<sup>9</sup> Taaqi mwiaqataita tumi varuvaro Iesusiva mwinramwuhua timwa nyinro tiqaro, Mateqa taqaa inraikyara hia mpohuavata timwa nyiate. Nte mwatani mwatatai nraaqiarava nraakiara nte qutu quaninraqitaina qaiqaa qati sivina varianinra mwi entaraqaataitama timwa nyiqita quate, tiro.

<sup>10</sup> Iesusiva mwitaa tuvata mwinramwuhua mwia kyapara hita tiqata, Mwaanra okyara ti varia vaisihua mwitaama timwa nyita tiqata, Iraisaava tiri haivaqava nraante qovarama viro nri ntaananrove, ti variarave. Mwihua nanraqamave mwitaa ti variavo? tita.

<sup>11</sup> Mwitaa tuvaro Iesusiva tiqaro, Qio mwihua qutaa ti variarave. Iraisaava nraante nrumu ekyaa inraikya ntapihi kyero terama tarero nrianrivama variho.

<sup>12</sup> Qio nte nkyiara tiqana Iraisaava vaakya nrumu varurarama tuqo. Mwiva nrumu varuvata vaisi mpo uhua hia mwia ntapihi kyeta taqaraitita, Iraisaara nkyiari kyakya huntema kyeta mwia qoraqama mwatorave. Mwi vaisihua ni mwatani mwatatai nraaqiararavata qoraqama matevarave, tiro.

<sup>13</sup> Iesusiva mwitaa tuvaro mwihua nyaato ntutoraa vuvata riovaro Iesusiva Iraisaaraqaa ntumwa kyero Ioniva nramanri ni varu vaisirara tura.

*Iesusiva nyaako mpoqitairo vaana titamwa kyora  
(Maaki 9:14-29; Ruku 9:37-42)*

<sup>14</sup> Mwinramwuhua taaqiqatai tumu nte taqovata airi nraakyе qora ntuvantuama vita varuvaro vaisi mpovanto uro Iesusira vuqaa tori kyauru raviro tiqaro, Nronrao, ni maaquara po kye timwa mwataante.

<sup>15</sup> Mwiva ueraqama viro anomia kyero uaqiamma viro variho. Airi enta mwiva qiaqi ntumwa viro nramanriqi ntumwa viro hi variho.

<sup>16</sup> Nte mwia vitaqina nrumu i nraaqiaranramwuvanto varianani kyauqata mwihua mwia kyuqema mwataare titi taqaavar hia qioqa hirave, tiro.

<sup>17</sup> Vaisi mwiva mwitaa tuvaro Iesusiva tiqaro, Nkye mwaa entara varia nraakyе qorahua api nrohi variahuave. Nkye hia Kotirara quttaqama kyeta rie variavo. Qikye, nkye ni qio pupohira uti variavana nte nataa nataama entave nkyi kyapata variqina quaninrave? Nte nataa nataama entave variqana nkyi kyaahaqa hianinrave? Qio nraaqiara mwia viteta nte varura mwaaqaa nriate, tiro.

<sup>18</sup> Timwa kyero Iesusiva vaana titamwa kyovaro nraaqiara mwia utaqitairo nrinarero vuvaro mwiaqatairo mwia mwamwantavanto kyuqema vuvaro qio varura.

<sup>19</sup> Qio varuvata mwia nraakiara mwia nraaqiaranramwuvanto Iesusiva varunani uro nteta mwia kyapara hita tiqata, Tire vaana mwia titauraro nanraqamave hia nrinarero viho? tita.

<sup>20</sup> Mwinramwuhua mwitaa tuvaro Iesusiva tiqaro, Nkyenramwu hia Kotirara kepukyaqama kyeta rie variahura tita, vaana titavararo hia nritaraiho. Maasiteti uruve hovante pata uru qiani vahirave. Nkyenramwu Kotirara riemwaqita viva mwi urura votima kyero vahirera, nkyenramwu qioma mwaa taaqirara mwaaqaataira sivira vutuni quante tivarо taaqivanto quananrove. Nkye mwitaama kyeta Kotirara kepukyaqama kyeta riemwaqita vivera, nkye ekya kyaiqa qioma varevarave.

<sup>21</sup> [Nkye hia Kotirara aakyara nteta kyaravata aurama teqata nkye hia qio mwi vaanahua sitevarave, tiro.] Mwitaa turama.

*Iesusiva qaiqaa nai qutu viro qati siquaninranra vutu kyero timwa nyunra  
(Maaki 9:30-32; Ruku 9:43-45)*

<sup>22</sup> Iesusira nraaqiaranramwuvanto Karirini ntovaantuama vita varuvaro Iesusiva mwihua timwa nyinro tiqaro, Mpovanto ni mwatani mwatatai nraaqiarara qovarama kyairata ni ntavaaqavuqita

<sup>23</sup> uro vaisi kyauquqi kyaivata ni ru kyaivaqena qutu vina taarampo enta vari kyena qaiqaa qati siquaninrave, tiro.

Mwitaa tuvata mwia nraaqiaranramwu mwutukyavanto uaqia huvata varura.

### *Taakisi kyorara tura*

<sup>24</sup> Iesusiva nai nraaqiaranramwu kyapata Kapenaamini uro ntovata Kotira nraamwuqaa ntaqikyiqata taakisi vare varuhua nri nteta Pitaara kyapara hita tiqata, I nronra vaisivantovata mwi taakisira kye varirave iho? tita.

<sup>25</sup> Tuvaro Pitaava eo tiro, Mwivavata kye varirave, tiro.

Mwitaa timwa kyero Pitaava nraamwuqi vuvaro Iesusiva nraante Pitaara ntumwahiamwa hiro tiqaro, Saimonio, Mwatani variahua mwihua vunyahua ta mwatanaahuaqitaita taakisi vare variarave? Nkyiari mwatanaahuaqitaitave vare variavo? Mpo mwatanaahuaqitaitave vare variavo? Tiraqena riaankye, tiro.

<sup>26</sup> Iesusiva mwitaa tuvaro Pitaava tiqaro, Mwihua mpo mwatanaahuaqitaita taakisi vare variarave, tiro.

Tuvaro Iesusiva tiqaro, Tire hia mpo mwatanaahua variraitita, tire Kotira nramwu-naavanto variqataro tita, tire taakisi kyaarava hiama vahirove.

<sup>27</sup> Qio mwihua tiriara tivorave. Mwianra rieqarama uro kyaarerqa huku tuto kyairaro tauraaqama kyero tavukya nrianriva nrumu ruvirara pati kyera mwia nro ntapahu kyera mwiqitaira munima vara kyera nianravata enanravata taakisiqa hiante, tiro. Mwitaa turama.

## 18

*Tavave tirinramwuqitairo nronraqama viro vunyaa vaisivanto variananrove tura  
(Maaki 9:33-37; Ruku 9:46-48)*

<sup>1</sup> Mwi entara Iesusira nraaqiaranramwuvanto Iesusiva varunani uro nteta tiqata, Kotiva ntaqikyiraqi tavave nronraqama viro vunyaa vaisivanto variho? tita.

<sup>2</sup> Mwihua mwitaa tuvaro Iesusiva nraaqiara pataru nraanrama kyero mwihua suqaa vatero

<sup>3</sup> tiqaro, Nte qianinra riaate. Nkye hia nraaqiara mwaa votima vita varivera, nkye hiama qio Kotiva ntaqikyiani mwatukyaraqi vivarave.

<sup>4</sup> Kotiva ntaqikyianinraqi vunyaa vaisivanto varirero hirera, mwiva nai nrutu vara mwataniqama kyero nraaqiara mwaa votima kyermoma variarive. Mwi nraaqiarara voti hiarivama vunyaa vaisivanto variananrove.

<sup>5</sup> Vaisi mpovanto nraaqiara mwaa voti hianinra qamwata mwateqaro nivatama qamwata mataananrove.

*Mpohua uaqia hi aanranra nyaamwutevorave tura  
(Maaki 9:42-48; Ruku 17:1-2)*

<sup>6</sup> Nraaqiara pata mwaa voti hiariva ni qua riaariva variraro vaisi mpovanto nri ntero uaqia hi aanranra nraamwutairera, mwi vaisiraqaa qua nronraqama kyero vahiananrove. Mwi vaisiva hia nraaqiara mwia uaqia hi aanranra nraamwutaraitiro variraro mwia nruntaqi ori nronra kyaantaru kyero kyaareraqi tuto kyairaro ntaqutu viraqe huviqarave qiataarave.

<sup>7</sup> Po, mwatani vari nraakye qorahua uaqia hi kyaiqara utuate tiro, mpo inraikya mpo inraikyavanto mwihua mwataara hiananrove. Uaqia hi kyaiqara qovarama kyaani vaisirara po timwa mwatauqo. (Nraakiara mwi vaisiva taqaananrove.)

<sup>8</sup> I kyauquvantove, i kyauquvantove, uaqia hi kyaiqara uti varirera, mwia teqa kyera qaqira kyaante. Mwiaqataira kyauqu kuaiku vahiarivave, kyauqu kuaiku vahiarivave, nyaamwuni vira qoma qati variqira vinanrave. Uaqia hi kyaiqara utiqarama kyauqu taaratanave, kyauqu taaratanave, vahiariva variraro hia qipaani qiaraqi i tuto kyaankyorave.

<sup>9</sup> E vu hiniqotaira taqe variqara uaqia hi kyaiqara uti varirera, qaiqaavata mwitaamaqira quankyorave tira, ena vu hini vauru kyera qaqira kyaante. E vu kuaiku nraahu vahirara hia uaqia hi kyaiqara utiraitira, qoma nyaamwuni vinanrave. E vu taaratana vahiariva uaqia hi kyaiqara utuqira virava nraakiara qutu viraro i qia nronraqi tuto kyaananrove.

<sup>10</sup> Nkye taqe qata variate. Nraaqiara pata mwaahua varivata nkye mwihuaqitaita pata mporuara uaqua titi mwianra qumina nraaqiararuve tivorave. Nyaamwunyaahua mwihuaqaa ntaqikyi variahua hia mwihuara qumina nraaqiarave tiraitita, mwihuara rieqata ni kova nyaamwuni varira nraaqani variarave, tiro.

*Sipisipi raupirima vuraqa ntumwa kyero tura  
(Ruku 15:3-7)*

<sup>11</sup> Iesusiva mwitaa timwa kyero mwiva tiqaro, [Nte mwatani mwatatai nraaqiarava nte raupirima qua nraakye qorahua sitarera tumuvave.]

<sup>12</sup> Nte mwaa quara qianinra nkye nataamave riaavo? Vaisi mpovanto sipisipi 100 vataariva taqairaro sipisipi mpovanto raupirima virera, mwiva hiave 99 sipisipi hini mwinramwuhua qati varihua taaqiqaa kyero raupirima quani sipisipira puua hirero quananrove?

<sup>13</sup> Mwiva mwianra puaamaqiro viro uro mwia puaama kyairera, mwiva tiqaro, Raupirima kyaurama ntena puaama kyena vitaqo, timwa kyero mpoqama kyero mwianra qamwateqaro sipisipi 99 hia raupirima quahuara hia nronraqama qamwataananrove.

<sup>14</sup> Mwia votima kyero ni kova nyaamwuni variva mwaa nraaqiaranramwuhuaqitairo mpovanto raupirima quankyo timwa kyeqaro varirave, tiro.

*I qata vakyavanto i uaqama mwataaninranra tura*

<sup>15</sup> I qata vakyaa mpovanto i mpo inraikya uaqama mwatairara e mwianra tirera hiqarama uro mwia vita kyera nkyetaraatana nraahu variqata mwi quara avuqavu hiate. Mwiva i qua riairera, mwia vita varera mwiaqataitata nkye kyuqema kyeta kuaaqi qoma variqita vivarave.

<sup>16</sup> Mwiva hia i qua riairera, uro vaisi kuaikuve taaratanave sitaqira nrinrata mwitanahuavata nrumu variqata i qua rieqatama qio quutaama tira hiaroma tivarave.

<sup>17</sup> Mwitaamaqita vivaro mwi vaisiva nkyinramwu qua hia nraahu riairera, mwiaqataira ekyaa Kotira nraakye qora ntuvantuuma kyera ena qua mwia ekyaa mwihuavata timwa nyiante. Mwi vaisiva Kotira nraakye qora ntuvantuuma tehuara hia riairera, ekyara mwiaqataita nkye mwi vaisira titeqatama tiqata, E mpo

mwatanaa votima kyerama variaro. E taakisi vare varia vaisihua votima kyerama variaro, qiate.

<sup>18</sup> Nte qianinra riaate. Nkye mwatani variqata mpo inraikya mpo inraikya uaqia hiani inraikyarara qao timwa taivaro Kotivavata nyaamwuni variqaro mwianra qao timwa taananrove. Nkye mwatani variqata mpo inraikya mpo inraikyarave hia qao timwa taivaro Kotivavata nyaamwuni variqaro hia mwi inraikyarara qao timwa taananrove, tiro.

<sup>19</sup> Iesusiva mwitaa timwa kyero tiqaro, Nte qaiqaa qianinra riaate. Nkyiqitai vaisi taaratanavanto kuaa vu nraato vateta Kotirara kyapara hivar ni kova nyaamwuni variva mwitanahua tintema kyero nyiananrove.

<sup>20</sup> Taaratanave, taarampotanavantove, ni kyaiqarave titi ntuvantua hivera, qio nte mwinramwuhua utaqaa varianinrave, tiro.

*Nai hena vaisiqa qua vahura hia qaqlira kyo vaisiraqa ntumwa kyero tura*

<sup>21</sup> Iesusiva mwitaa tuvaro Pitaava uro Iesusira kyapara hiro tiqaro, Nronrao, ni kata pakyaa mpovanto ni uaqlama matairera, nte nataama nanive mwianra hia iqaa qua vatena qaqlira kyarerave qianinrave? Kyauquru hisai taara nanive mwitaa hianinrave?

<sup>22</sup> Pitaava mwitaa tuvaro Iesusiva tiqaro, Hia nte iara kyauquru hisai taaranani mwia qua qaqlira kyaante tuqo. Nte iara mwia qua 500 nani qaqlira kyaantema tuqo, tiro.

<sup>23</sup> Kotiva nraakye qoraqaa ntaqikyiariva mwaa quara votima kyeroma vaiho. Nronra vaisi mpovanto nai kyaiqa vaisinramwu nyito munimanra ntena vararerave turave.

<sup>24</sup> Timwa kyero tohara kyero vare varuvata mwia kyaiqa vaisi mpo vitaqita mwiva huraqna kyovaro mwi vaisiva nronra munima 1,000,000 kinaa vara kyero nramwa kyova vahuvaro

<sup>25</sup> mwiva mwi munimanra nai mwianriva hia qioqama kyero vahuvaro mwia nronra vaisivanto tiqaro, Mwi vaisiravata mwia nraata nraaqiaravata, mwiva ekyaa inraikya vataaninravata, mpohua nyita munima varaqita nrumbu ni mpivaqena nte mwiva vara nramwa kyai munimanra hiniqama ntena varaankeye, tiro.

<sup>26</sup> Mwiva mwitaa tuvaro mwia kyaiqa vaisivanto tumu ntiro tori kyauru raviro po kye tiro tiqaro, E variraqena nte qakyoma kye mwi munimanra puaamaqina vina uro ekyaa puaama kyena ina mwiankeye, tiro.

<sup>27</sup> Mwitaa tuvaro mwia nronra vaisivanto mwianra po kye timwa mwatero tiqaro, Qio nte iara po kye timwa mwateqanama mwi munimanra qaqlira kyauqo. Hia nina mpiante. Qaqira kyera quante, tiro.

<sup>28</sup> Mwitaa tuvaro mwi vaisiva veva ntero vuva uro taqovaro kyaiqa vaisi mpovanto nai mwia henava mwia munima 10 kinaa vara nramwa kyova nruvaro mwiva mwia uro nruntana tuto ntaquti variro mwianra tiqaro, Ni munima nramwa kyaananra qamwanrama kyera nina mpiante, tiro.

<sup>29</sup> Mwitaa tuvaro mwia henava mwiva tumu ntiro tori kyauru raviro po kye tiro tiqaro, E variraqena nte mwi munimanra qakyoma puaama kyena i mwiankeye, tuvaro

<sup>30</sup> mwi vaisiva hia mwia qua riaraitiro, nai hena vaisi mwia karavuqi kyero tiqaro, Ni munima nramwa kyaananra ekyaa nina mpiraqenama i huvantu kyaaninrave, tiro.

<sup>31</sup> Mwitaa timwa kyero nai hena vaisi mwia karavuqi kyovata kyaiqa vaisi mponramwuvanto mwia taqovaro uaqia huvata e uaqlama hira hiaro timwa kyeta uro nronra vaisi timwa mwuvavar

<sup>32</sup> mwia nronra vaisivanto nai kyaiqa vaisi nraanrama kyero timwa mwinro tiqaro, E uaqia hi kyaiqara uti variara vaisivama variaro. E nianra po kye timwa mataante qiarana nte e nramwa kyaana munimanra nronra munima ekyaa qaqlira kyena hia nina mpiante turave.

<sup>33</sup> Nte iara po tuntema kyera evata ena henanranra po timwa mwataataara vaihara hia mwitaa hiaro, tiro.

<sup>34</sup> Mwitaa timwa kyero mwia nronra vaisi mwia mpoqama kyero raraqa tovaro nai kyaiqa vaisi karavuqi kyero tiqaro, Mwiva karavuqi variqaro nai nramwa kyai munimanra ekyaa nina mpiarive, tiro.

<sup>35</sup> Iesusiva mwitaa timwa kyero nai nraaqiaranramwu timwa nyinro tiqaro, Nkye nkyeta mwutukyaqitaita nkyeta sata sakyaahua nkyi uaqiamma nyate quara hia qaqlira kyaraitita qati nraahu riemwaqita vivera, nkyi sova nyaamwuni variva nkyeta uaqia hi kyaiqara utua quaravata qati nraahu riemwaqiro quananrove, tiro. Iesusiva turama.

## 19

### *Vaisivanto nai nraata qaqlira kyaaninranra tura (Maaki 10:1-12; Ruku 16:18)*

<sup>1</sup> Iesusiva mwi quara timwa nyi taiqa kyero Karirisairo Iutia mwata Iotaani nramanri qarahini vuvata

<sup>2</sup> nraakye qora airivanto mwia vataqita vuvaro mwiva mwini variqaro mwihua nriqa vuhua kyuqema nyatora.

<sup>3</sup> Iesusiva mwini varuvata Parisi vaisinramwuvanto mwiva hunani uro nteta Iesusirara api qua qiarive titi mpo qua mwia kyapara hita tiqata, Qiove vaisivanto mpo qua mpo qua vahiraro mwi quara kyaara nai nraata qaqlira kyaanenrove? Mwiva mwitaa hirera, mwiva tiri mwaanra qua nteqave kyaanenrove? Tiraqe riaare, tita.

<sup>4</sup> Mwitaa tuvaro Iesusiva tiqaro, Nkyenramwu hiave Mosesiva qara ntumwa to quara kyaara ntumwa kyeta riaavo? Mwi quava mwataamama vahiro. Nyaamwuvata mwatavata ututova, Kotiva tauraaqama kyero vaisivata nraakyevata utu kyero tiqaro,

<sup>5</sup> Vaisivata nraakyevata ututaurara tiro, vaisivanto nai nrohua qohua kyero nai nraatantiri kuaaqi variqi vita mwitanahua kuaa mwamwanta varivarave turave.

<sup>6</sup> Mwitanahua hia mpo mwamwanta mpo mwamwanta variraitita, kuaa mwamwanta nraahu variarave. Qio Kotiva mwitanahua kuaqa taaqau tairara tiro, mpovanto mwitanahua ntainra kyaankyorave, tiro.

<sup>7</sup> Iesusiva mwitaa tuvata mwinramwuhua tiqata, Qutaa Kotiva mwitaa turave. Qio nanraqama Mosesiva mpo qua turave? Mosesiva timwa to quava mwataama tiho, Vaisivanto nai nraata qaqlira kyaariva qaravata mwinro qiomma qaqlira kyaanenrove turave, Mosesiva nanraqama mwitaama kyero qua timwa torave? tita.

<sup>8</sup> Mwihua mwitaa tuvaro Iesusiva mwihua nkyiari timwa nyinro tiqaro, Mosesiva variqaro taqovaro nkyi haivaqahua mwutukyaqvanto kepukyaqa huvata hia Kotirara riorave. Mwitaa hi varuvarora tiro, Mosesiva qihakya kyero qio mwitaa hiate, timwa kyero mwi quara timwa torave. Haaru tauraaqama kyero mwata ututo entara hia mwitaama vahurave.

<sup>9</sup> Nte nkyiara mwitaama tuqo, Nraakyevanto hia vaisi mpovatama kyero nrohiraatiro variraro mwia vaativanto mpo qua kyaara mwia qaqlira kyero mpo nraakye varairera, mwi vaisiva qaraakya nraakyentiri nrohikaroma mwiva nraata vaati ntugema kyeroma mwivavata mpuaraqama kyeroma nrohianenrove tuqo, tiro.

<sup>10</sup> Iesusiva mwitaa timwa kyero varuvata mwia nraaqiaranramwuvanto Iesusirara tiqata, Qikye, vaisivanto mwitaama kyero nraata varaariva vahirera, vaisivanto hia nraata vararaitiro qati variarive, tita.

<sup>11</sup> Mwia nraaqiaranramwuvanto mwitaa tuvaro Iesusiva tiqaro, Hia ekyaa vaisivanto nkye qianti hita hia nraata vararaitita qati varivarave. Kotiva kepukyaqama mwataari vaisiva mwiva nraahu qati varianenrove.

<sup>12</sup> Mpo qara mpo qara hi okyara qaara mpohia vaisihua hia nraata varaarave. Mpohia vaisihua mwata kyaavaro mwihua mwamwanta hia kyuqema vahatara

tita, hia nraata varaarave. Mpohia vaisihua mwamwanta uaqiamma kyaavatara tita, mwihua hia nraata varaarave. Mpohia vaisihua Kotiva nraakye qoraqaa ntaqikyirara rieqata tire Kotira kyaiqa vararerave timwa kyeta hia nraata varaarave. Mwi quara ntapihi kyero rie variariva, mwi vaisiva mwi quara riemwaqiro quananrove, tiro. Iesusiva turama.

*Iesusiva nraaqiaraqaa kyauqu vatero mwihua kyuqema nyatora  
(Maaki 10:13-16; Ruku 18:15-17)*

<sup>13</sup> Iesusiva varuvata nraakye qoravanto nkyiari nraaqiara sita vareta Iesusiva mwihuaqaa nai kyauqu vateqaro Kotirara aakyara tiraro mwihua kyuqema nyataarive timwa kyeta Iesusiva varunani sitaqita uro kyarerera utuvata Jesusira nraaqiaranramwuvanto mwihua inronra hi varura.

<sup>14</sup> Mwitaa tuvaro Iesusiva qaqao tiro, Qati kyaivata mwihua nte hunani nriate. Hia mwihua aanra antuaate. Kotiva ntaqikyari mwatukyava mwi nraaqiarahua voti hiahua mwihua mwatukyama vahiananrove, tiro.

<sup>15</sup> Iesusiva mwitaa timwa kyero nai kyauqu nraaqiara mwihuaqaa vatero mwihua kyuqema nyatero vura.

*Qaraakya vaisivanto airi inraikya vatorara tura  
(Maaki 10:17-31; Ruku 18:18-30)*

<sup>16</sup> Mpo enta vaisi mpovanto Iesusiva varunani uro ntero tiqaro, Mwaanra ti variara vaisio, nte kyuqe kyaiqa nataa hianinra Kotira vara mwataaninraqaatainave nte ekyaa enta qati variqina quaninrave? tiro.

<sup>17</sup> Mwitaa tuvaro Iesusiva tiqaro, E nanraqamave kyuqe kyaiqara ni kyapara hira hiaro? Kotiva kuaikuvanto kyuqema varivave. I ekyaa enta qati variqira quataa hirara, e Kotiva timwa to quara ekyaa mwi quara riemwaqira quante, tiro.

<sup>18</sup> Iesusiva mwitaa tuvaro mwi vaisiva kyapara hiro tiqaro, Qio nte nanra quave Kotiva timwa toraqitaina riemwaqina quaninrave? tuvaro Iesusiva timwa mwinro tiqaro, Mwaa quara timwa torave:

Hia vaisi ru kyaante. Hia mpora nraatavata nrohiante.

Hia mpuara varaante. Hia mpora unra qianta.

<sup>19</sup> Ena nrohua qohua nrutu tuaahera nyataante. *(Kyatura 20:12-16)*

E enanra i mwutukya vahintema kyera ena hena vaisiaravata i mwutukya vahirara variante, turave. *(Wok Pris 19:18)*

Mwi quara timwa tora riemwaqira quante, tiro.

<sup>20</sup> Iesusiva mwitaa tuvaro mwi vaisiva tiqaro, Nte ekyaa mwi quara qiananra riemwa ntapihi kyauvama varuqo. Nanra inraikyavantove qati vahiana nte hia qioqa huqo? tiro.

<sup>21</sup> Mwitaa tuvaro Iesusiva tiqaro, E mpoqiyavata kyuqe vaisivanto varirera, uro ekyaa ena vatena inraikyara nyinra munima vara kyera hia mpo inraikya vate nraakye qorahua nyinranro nyaamwuni i kyoqaa vahiarive. Mwiaqaataira e ni pataqira nriante, tiro.

<sup>22</sup> Iesusiva mwitaa tuvaro vaisi mwiva mwi quara riero airi inraikya vatovara tiro, mwia mwutukyavanto uaqia huvaro hia Jesusira qua riaraitiro, qaqira kyero vurama.

<sup>23</sup> Vuvaro Iesusiva nai nraaqiaranramwuanra tiqaro, Nte qianinra, riaate. Airi inraikya vatehua Kotiva ntaqikyiani mwatukyaraqi mwukyaari tukyeqatama vivarave.

<sup>24</sup> Nte qaiqaa timwa nyianinra riaate. (Kameri quara nronravanto nataama kyero vuoq uqintaq/iriraqi ntuciaraaanarove? Hia qio mwitaa hiananrove.) Qio kamerivanto vuqa uqintaq/iriraqi qio ntuciaraaaninravauma, airi inraikya vataari vaisiva Kotiva ntaqikyiani mwatukyaraqi qio quananrove, tiro.

<sup>25</sup> Iesusiva mwitaa tuvata mwia nraaqiaranramwuvanto mwi quarara airi nraato tita tiqata, Qikye, airi inraikya vatehua Kotira mwatuukyaqi hia qio vivera, nai tavave qio mwini quananrove? tita.

<sup>26</sup> Mwitaa tuvaro Iesusiva mwihua taqero tiqaro, Mwatani varihua mwihua nkyiari nraahu variqata hiama qio vivarave. Kotiva kyaahaqa hirata mwihua qioma vivarave. Kotiva ekyaa kyaiqa qio nraahu vare varivave, tiro.

<sup>27</sup> Mwitaa tuvaro Pitaava tiqaro, Taqaante, tirenramwu i vataqita virera hita, ekyaa inraikya mwini kyeta qatima nrurro. Tire mwia qiata nanra inraikyave varaananrave? tiro.

<sup>28</sup> Pitaava mwitaa tuvaro Iesusiva mwinramwuhuara tiqaro, Nte qianinra ri-  
aate. Hia nte nkye kyaiqa vare varirara taunru kyaaninrave. Ekyaa inraikya qaraakyaqama kyero vahiani entaraqaa nte mwatani mwatatai nraaqiarava, nte mwi entara takyuqi variani inraikyara peqa inraikyavatama kyena nyaamwuni nronra taintaqa mwatakyaa vina variarita nkye ni nraaqiara 12 nramwuvanto ni pataqita nrihua, nkyevata tainta 12 nramwuqaa mwatakyaa vita variqata Isareri vaisi 12 okyara mwihuqaa ntaqikyiqata mwihua qua avuqavu hivarave.

<sup>29</sup> Vaisi mpovanto nai mwaatave, nai qata vakyaave, nai nrurra nrakyaave, nai nrohua qohuave, nai nraaqiarave, nai mwatave, qaqlira kyero ni kyaiqarave tiro quariva, mwi vaisiva mwia qiata nai kyoqaa vareqaro hia kuua nani varaananrove. Mwiva mpoqiyavata vareqaro 100 nani varairaro mwia mwoqqa Kotiva mwianra e ekyaa enta ekyaa enta qati nraahu variqira quante qiananrove.

<sup>30</sup> Mate nraakye qora airivanto vuni variahua, qakyo mwihua tumitareta nraakiarani varivarave. Mate mwaa nraakiarani variahua, mwihua qakyo nritareta vunima varivarave, tiro.

## 20

### *Uaini vara tutoraqi varohuaqaa ntumwa kyero tura*

<sup>1</sup> Kotiva ntaqikyiariva vahirero mwaa quaraqaa ntumwa kyena qiani quara votima kyero vaiho. Mwata airi vahu vaisiva vaakya toqa entaqi siviro nai uaini vara tutoraqi kyaiqa varaate tiro, kyaiqa vaisiara puua hirero vurave.

<sup>2</sup> Vuva uro vaisi mponramwu puaama kyero tiqaro, Nkyenramwu mate ni kyaiqa vara mataivaqe nte mwi entarara rieqana nkyi kuaiqia kuaiqia munima kuua kinaa kuua kinaa nyiankye, tuvata eo tuvaro nai aakyoqi sitaqiro uro kyero.

<sup>3</sup> Uro kyero varuvaro huarivanto nrinro viri sataqa huvaro mwiva maaketiqi vuva uro taqovata vaisi mponramwuvanto qumina varuvaro

<sup>4</sup> mwiva mwihuara tiqaro, Nkyevata uro ni aakyoqi ni kyaiqa vara mataivaqe nte nkyita kyaiqara rieqana kyoqaa nyiankye, tiro.

<sup>5</sup> Tuvata mwihuavata mwini vuvaro mwiva varuvaro huarivanto virini qiataqa nrinro ihera mwutukyaqa huvarovata, huarivanto tuminro vititoqa huvarovata, mwiva vaisi sitarero vaakya hunte hiro.

<sup>6</sup> Aakyo qova kyaiqa vaisi qati nraahu sitaqiro vuvaro kyaiqa taiqeva qaumaqa huvaro qaiqaa maaketiqi uro taqovata vaisi mponramwuvanto qati nraahu sivita varuvaro mwihuara kyapara hiro tiqaro, Nkye nanraqamave mate qumina varita hiavo? tuvata

<sup>7</sup> mwihua mwia timwa mwita tiqata, Hia vaisi mpovanto tiriara kyaiqa varaate tihatama tire qumina varuro, tuvaro mwihuara tiqaro, Qio nkyevata uro ni uaini aakyoqi kyaiqa varaate, tiro.

<sup>8</sup> Mwitaa timwa kyero varuvaro enta hirero huvaro aakyo qova nai kyaiqaqaa ntaqikyuu vaisirara tiqaro, Kyaiqa vaisi ekyaa nyaanrama kyera mwihua nkyiari

kyoqaa nyiante. E nraakiara nria vaisihua nraante munima nyiqi vira uro vaakya vuni nria vaisihuaqaa taiqa kyaante, tiro.

<sup>9</sup> Mwitaa tuvaro mwiva kyaiqa taiqarera hunani nruhua nraante munima kuaa kinaa kuaa kinaa nyinro.

<sup>10</sup> Nyiqiro viro vaakya toqaqi nru vaisihua munima nyinrenro huvata mwihua tiqata, Tiri munima mpoqivata timwiananrove, tuvaro mwiva mwihuavata kuaa kinaa kuaa kinaa nraahu nyinro.

<sup>11</sup> Kuaa qarama kye nyuvata mwihua mwi munimanra vareta aakyo qorara nrutu nraunru/nrunru nraanru tita tiqata,

<sup>12</sup> Qaqao, kyaiqa taiqaarava qaumaqa ihata nria vaisihua kyaiqa pataqia nraahu vara kyetama kuaa kinaa kuaa kinaa varaavo. Tire vaakya toqaqi nrunrahua huari nronraqi kyaiqa varaqi vurarama e nraakiara nria vaisihua nyianrantema kyerama tirivata timwinra hiaro. Nanraqamave mwitaa hiaro? tita.

<sup>13</sup> Mwihua mwitaa tuvaro aakyo qova vaisi mpora tiqaro, Ni vaisio, hia nte i uaqiamma mwatauqo. Qio qutaa nte vaakya toqaqi iara ni kyaiqa varairaqe nte i kuaa kinaa mwiankye tuqara e eo qiananrave?

<sup>14</sup> Ena munimavata varera ena mwaatani quante. Nte ivata nraakiara sita tauhuvata kuaa qarama kyena nyiataa ihana nyunrave.

<sup>15</sup> Nte ntene munimanra tina, hiave nte ntene kyakya hianinraqa nkyi tukyama kyena nyianinrave? Nte qihakyama kyena ntene munima nyuqanra nanraqamave e kyaruntira hiaro? turave, tiro.

<sup>16</sup> Iesusiva mwi quaraqaa ntumwa kyero timwa nyinro taiqa kyarerera hiro tiqaro, Mwia votima kyeta mwoqani varihua qakyo vuni utu vivarave. Vuni utu vihua qakyo mwoqani tumi vivarave, tiro.

*Iesusiva taarampo nani nai qutu viro qati siquani quara vutu kyero timwa nyunra  
(Maaki 10:32-34; Ruku 18:31-33)*

<sup>17</sup> Iesusiva Ierusareminianra aanrani viqaro nai nraaqiara 12 mwinramwuhua nraahu sita kyero tirema timwa nyinro tiqaro,

<sup>18</sup> Taqaate, tirenramwu Ierusareminianrama vi varuro. Nte mwatani mwatatai nraaqiarava mwini uro ntaariro ni qovarama kyero uro Kotira kyaiqa vara mwate varia vaisihua vunyaa vaisinramwuvata, mwaanra okyara ti varia vaisihuavata, nyiananrove. Nyinrata mwihua nianra mwia ru kyaate timwa kyeta

<sup>19</sup> ni pitaqita mpo mwatanaahua kyauquqi uro kyaivata mwihua nianra raima mateta kyaanta vara kyeta mwiaqotaita ni moqasata ntuteqaateqama mateta mwiaqaataita uro kyatariqaa ni rutaivaqena nte qutu vinama taarampo enta vari kyena qaiqaa qati siquaninrave, tiro. Iesusiva turama.

*Iemisikya Ionikya nronra vaisi varirara mwihua nyova Iesusira kyapara hura  
(Maaki 10:35-45)*

<sup>20</sup> Mwi entara Sepetira mwaaqtana nyova mwitanahua sita varero Iesusiva hunani vuva uro mwia vuqaa variqaro kakataama viro mwataqi tumu ntiro variqaro nai kyaahaqama mwataaninranra Iesusira kyapara hura.

<sup>21</sup> Iesusira kyapara huvaro mwiva mwia nai kyapara hiro tiqaro, Nanra inraikyarave qiaro? tiro.

Mwitaa tuvaro nraakte mwiva tiqaro, Qiove mate mwaa e eo timwa tairata nraakiara e nronraqama vira vunyaa vaisivanto varinanraqa ni maaqtana nronraqama kyairata mpovanto i kyauqu kyaatutani variraro mpovanto i kyauqu kyaantaaqani variarive, tiro.

<sup>22</sup> Mwi nraakyeva mwitaa tuvaro Iesusiva mwinramwuhuara tiqaro, Nkyenramwu mwitaama kye ni kyapara hiqatama hia mwi quara okyara ntapihiraititama, mwitaa

qiavo. Nte nriqa quaninra nramanri voti hira nraaninra nkyetanavatave nrevarave? tuvata mwitanahua tiqata, Qioma nraananrave, tita.

<sup>23</sup> Mwitana mwitaa tuvaro Iesusiva tiqaro, Qutaama nkyetanavata mwi nramanrinra mwia nrevarave. Ni kyauqu kyaatutaniivata, kyaantaaqanivata, mwata kyaavi varitana hia ni kyaiqa vahirave. Ni kova vaisi taaratana terama kyero vatai vaisitanama mwini mwata kyaavi varivarave, tiro.

<sup>24</sup> Iesusiva mwitaa tuvata mwia nraaqiara hini 10 mwinramwuhua mwi quara rieta mwi qate vakyetana inronra hora.

<sup>25</sup> Mwinramwuhua mwi vaisitana inronra hi varuvaro Iesusiva ekyaa mwinro mwaanro mwinramwuhua nyaanrama kyero qio eqaate tiro, Mpo mwatanaahua ntaqikyiqi qua okyarara nkye riaarave. Mwihua vunyaa vaisivanto nritare viritoqama variqata mwi kyaiqara mwaa kyaiqara tirini varaate ti variarave. Mwihua nronra vaisinramwuvanto tiqata, Nte nronravanto varuqo. Ni qua nraahu riemwaqi quate, ti variarave.

<sup>26</sup> Nkye hia mwihua hiante hiate. Nkyiqitairo mpovanto nronraqa hirero hiqaro mwiva nkyi kyaiqa vara nyataarive.

<sup>27</sup> Nkyiqitairo mpovanto nritarero vuni varirero hiqaro mwiva karavu vaisi votima viro nkyi kyaiqa vara nyataarive.

<sup>28</sup> Nte mwatani mwatatai nraaqiaravama varuqo. Ntevata hia nraakye qorara ni kyaiqa vara mataate tina, tumuvave. Nte nraakye qora mwihuara kyaiqa varaqi vina, airi nraakye qora kyaahaqama nyatarera mwihuara rieqanama qutu virerave timwa kyena tumuvave, tiro. Iesusiva turama.

### *Vu qipa vu vaisitana Iesusiva ntapairi kyora*

*(Maaki 10:46-52; Ruku 18:35-43)*

<sup>29</sup> Iesusiva nai nraaqiaranramwuvata Ieriko kyeta vi varuvata nraakye qora airivanto Iesusira vataqita vi varuvata

<sup>30</sup> vaisi taaratanavanto vu qipa vu tanahua aanra tokyani variqata riovaro Iesusiva nritarero viqaro tuvata mwitanahua aakyara nteta tiqata, Nronrao, Ntevitira mwaaquo, qati tiritananra po kye timwa timwa taante, tita.

<sup>31</sup> Mwitanahua mwitaa tuvata nraakye qoravanto mwitanahua inronra hita tirema variate tuvatavata mwitanahua hia mwihua qua riaraitita, nronraqama kyeta aakyara nteta tiqata, Nronrao, Ntevitira mwaaquo, qati tiritananra po kye timwa timwa taante, tita.

<sup>32</sup> Mwitanahua mwitaa tuvaro Iesusiva nrumu siviro variro tiqaro, Nivanto nkyitana nataa hiarive titatanave nkyetana nianra aakyara nte variavo? tiro.

<sup>33</sup> Mwitaa tuvata mwitanahua timwa mwita tiqata, Nronrao, tiritana tivu ntapairi timwa taanterama i nraanre varuro, tita.

<sup>34</sup> Mwitaa tuvaro Iesusiva mwitanahua po timwa nyatero mwitanahua suqaa nai kyauqu viti vatovaro mwitanahua suvanto qamwanrama ntapairi vuvata qio taqeta mwiaqaataita Iesusira vataqita vura.

## 21

### *Nraakye qoravanto Iesusira qamwata mwate varuvaro Iesusiva Ierusaremiqi vura*

*(Maaki 11:1-11; Ruku 19:28-40; Ioni 12:12-19)*

<sup>1</sup> Iesusiva nai nraaqiaranramwu kyapata vuvaro Ierusaremi qaumato vahuvata mwihua Mpetapaasi Oripi taaqi mwemwaqi vahu mwatukyaraqi uro nteta Iesusiva nai nraaqiara mpotana sitero

<sup>2</sup> tiqaro, Nkyetana viti mwatukyaraqi uro ntetama ntonki nraante taqevarave. Ntonkivanto nai nraati vatama kyero kyaantaru taivaro varianinra uro mwitanahua huvantu kyeta sitaqita nrumu ni mpiate.

<sup>3</sup> Vaisi mpovanto nkyitana kyapara hirata mwitaama qiate. Tiri nronravanto ntonki mwianra tihatama nrunro qiate. Nkyetana mwitaa tivaro mwiva nkyitananra qio qamwanrama varaqita uro mwiatema qiananrove, tiro.

<sup>4</sup> Haaru vetato entaqaa poropeti vaisivanto tu quava mwivauma vahiarive tiro, Iesusiva mwitaa tura. Haaru poropeti vaisivanto Kotira qua qovarama kyero mwataama tiro:

<sup>5</sup> Nkye Ierusaremiqinaahua mwitaa timwa nyiate.

Nkyi vunyaa vaisivanto nkye hianani nri variho.

Mwiva qihaakya hivara tiro,

qihaakyama kyero ntonki mwoqaqaa nri variho.

Mwi ntonkiva qaraakya ntonkivantoma variho, tura.

(*Sekaraiaa 9:9*)

<sup>6</sup> Mwiva tu quava mwivauma vahiarive tiro, Iesusiva nai nraaqiara taaratana sitovata mwitanahua Iesusiva tuntema kyeta vuhua uro

<sup>7</sup> ntonkivata mwia nraativata vitaqita nrumu kyeta mwia nraaqiaranramwuvantoo nkyiari tuavaaqa ntonkiqa vuti mwatovaro Iesusiva mwiaqaa mwaanri ntero mwatakyaa viro varura.

<sup>8</sup> Varuvata nraakye qoravanto nkyiari tuavaaqavata aanravau vuti mwatovata nraakye qora mpo uhua kyatari mwanre teqeqita nrumu aanravau vuti mwatora.

<sup>9</sup> Vuti mwatovata Iesusira vuni vuahuavata mwoqani vi varuhuavata aakyara nteta tiqata,

Ntevitira mwaaqu nrutu tuaaheraate.

Nronravanto nai nrutuqa nri vari vaisira kyuqema mwataiho.

(*Ihi 118:26*)

Ekyaa nyaamwunyaahua mwia nrutu tuaaheraate, tita.

<sup>10</sup> Mwitaa timwaqita vi varuvaro Iesusiva Ierusaremiqi vuvata ekyaa mwi mwatanaahua hianteta vitare nritare hi varita tiqata, Qikye, Ta vaisivave nriho? tuvata

<sup>11</sup> nraakye qora mpo uhua tiqata, Mwaa vaisiva Iesusivave. Mwiva poropeti vaisivanto Nasareti Karirisairo nrivave, tita.

*Iesusiva Kotira nraamwuqitairo munima kyaiqa vare varuhua vara veva kyora  
(Maaki 11:15-19; Ruku 19:45-48; Ioni 1:13-22)*

<sup>12</sup> Iesusiva uro Kotira nraamwu nronraqi vera ntero taqovata kyoqaa uti varu vaisihua mwipi kyoqaa uti varuvaro mwiva mwihua vara veva mwaatani kyero, munima tuqasaaqi varu vaisira taintava vara rauru kyero, nyaamwa nyiqanro munima vare varu vaisira taintavata vara rauru kyora.

<sup>13</sup> Mwitaama kyero mwihuara tiqaro, Kotira mpukuqi qara ntumwa to quava tiqaro, Nraakye qoravanto ni nraamwuanra Kotirara aakyara nte varia nraamwunrave tivarave, turave. (*Aisaiaa 56:7*)

Nkye mwaaqi variavaro mpuara vaisivanto uqetaa mwatuqyara votima kyeroma mwaa nraamwuva vaiho, tiro.

<sup>14</sup> Iesusiva mwitaa timwa kyero mwipi varuvata vu qipa vu vaisihuavata, kyuqu kyauqu ntanrenra vuahuavata, mwiva hunani nruvaro Iesusiva mwihua kyuqema nyatovata qio varura.

<sup>15</sup> Iesusiva mwihua kyuqema nyatero nronra kyaiqa vare varuvata nraaqiaravanto Kotira nraamwuqi varita tiqata, Ntevitira mwaaqu mwia nrutu tuaaheraate, tita.

Mwitaa ti varuvata Kotira nraamwuqaa ntaqikyi varu vaisihuavata mwaanra okyara ti varu vaisihuavata, mwi inraikyara taqeta Iesusira inronrama mwateta Iesusirara qaqa tita,

<sup>16</sup> E hiave nraaqiaravanto qua ti variara riaaro? tita.

Mwitaa tuvaro Iesusiva tiqaro, Eo, nte nraaqiara qua riauqo. Nkyevata mpo, nkye hia Kotira mpukuqi mwaa quara kyaara ntqata taqaarave? Mwitaama tiro:

E nraaqiara nraamwa nraahuavata kyaahaqa hiarata mwihua i nrutu kyuqema kyeta tuaahere variavo, turave, tiro. *(Ihi 8:2)*

<sup>17</sup> Iesusiva mwitaa timwa kyero mwiva mwiqi kyero veva ntero mwatukya mwiavata kyero Mpetaanini enta mwiqi varirero viro.

*Iesusiva tuvaro qakyaakya voti hu kyatariva tamusa vura  
(Maaki 11:12-14, 20-24)*

<sup>18</sup> Mwia qanranraa toqaqi Iesusiva uro ntantero Ierusareminianra vuvaro kyara nraataa hura.

<sup>19</sup> Nraataa huvaro taqovaro qakyaakya voti huva fikivanto aanra tokyani vahuvaro mwiva uro mwia tamwa hiqo kyero nraankye tiro taqovaro mwanrevanto nraahu vahuvaro mwiva mwi kyatarirara tiqaro, E hia qaiqaavata tamwa rienanrave, tuvaro mwiaqaatairo mwi kyatariva tamusa viro.

<sup>20</sup> Mwi kyatariva tamusa vuvata Iesusira nraaqiaranramwu mwia taqeta qikye tita, Nataama kyerove kyatari mwituava qamwanrama tamusa viho? tita.

<sup>21</sup> Mwihua mwitaa tuvaro Iesusiva tiqaro, Nte qianinra riaate. Nkyenramwuvata hia taara vu nraato tiraitita, nianra kuaa vu nraato tuteta qioma nte mwaa kyatarirara tuntema kyeta tivarave. Nkye hia mwi kyaiqara nraahu varevarave. Nkye nronra kyaiqa mpo kyaiqa mpo kyaiqa qio varevarave. Nkye mwaa taaqiraravata tiqata, Nramanriqi kyavuhu quante, tivaro qioma mwitaa hiananrove.

<sup>22</sup> Qikye, nkye mpo inraikyara Kotirara kyapara hiqatama mwiva quutaama mwi inraikyara timwiananrove tiraqaataitama nkye qio varevarave, tiro.

*Iesusirara tava i mwi kepukyara mwihanrave e mwitaa hiaro tura  
(Maaki 11:27-33; Ruku 20:1-8)*

<sup>23</sup> Iesusiva mwitaa timwa kyero uro ntantero Kotira nraamwuqi uro variqaro nraakyne qora qua timwa nyi varuvata Kotira nraamwuqi Kotira kyaiqa vara mwate varuhua mwihua nronra vaisinramwuvata, Iutaa nronra vaisinramwuvata, mwinramwuhua mwiva hunani uro nteta mwia inronra hita tiqata, E ta vaisiva variqarave mwaa kyaiqara vare variaro? Tava i nronraqama kyaiharave e mwaa kyaiqara vare variaro? tita.

<sup>24</sup> Mwihua mwitaa tuvaro Iesusiva nkyiari timwa nyinro tiqaro, Kyai nte nraante nkyi kyapara hiarita nkye nte qiani quara qio timwa mpivera, nte ntene nronraqama vina variqana mwaa kyaiqara varaurara nkyi timwa nyiankye.

<sup>25</sup> Tava Ioninra nronraqama kyovaro Ioniva nraakye qora nramanri nyunrave? Kotivave, qumina vaisivantove, mwia nronra qama kyovaro mwi kyaiqara varorave? Nkye timwa mpivaqena riaankye, tiro.

Iesusiva mwitaa tuvata mwihua nai kyapara hita nai kyapara hita tiqata, Tire nanra quave qiananrave? Tire tiqata Kotiva mwia nronraqama kyorave qiarera, mwiva tiriara nkye nanraqamave Ioninra quara hia quataave qiaovo qiananrove.

<sup>26</sup> Tire tiqata qumina vaisivanto mwia nronraqama kyorave qiarera, tire nraakye qora ntuvaantuama vita variahuara aatu hiananrave. Ekyaa nraakye qoravanto Ioniva poropeti vaisivanto varurave ti variarave, tita.

<sup>27</sup> Mwihua mwitaa timwa kyeta Iesusirara tiqata, Nai tava Ioninra nronraqama kyorave? Hia tire ntapihuro, tita.

Mwihua mwitaa tuvaro Iesusiva tiqaro, Nkye mwitaa qiavana nte nina nronraqama kyaihana mwaa kyaiqara vare varurara hia nkyitavata timwa nyianinrave, tiro.

*Qoraisi nraaqiara taaratana vato vaisiraqaa ntumwa kyero timwa nyu quara*

<sup>28</sup> Iesusiva mwitaa timwa kyero tiqaro, Nte tirera hiani quara mwaanra nkye nataamave riaavo? Vaisi mpovanto qoraisi nraaqiara taaratana vatorave. Mwia qova nai mwaaku tauraarara tiqaro, Ni maaquo, Mate uro uaini aakyoqi kyaiqa varaante, tuvaro

<sup>29</sup> mwia mwaaku tauraava tiqaro, Qaqao, hia quataa ihana hia virerave, tiro. Mwitaa timwa kyero mwiva variqaro mpo vu nraato tu kyero nai qora uaini aakyooqi kyaiqa vararero vurave.

<sup>30</sup> Mwiva vuvaro mwia qova nai nraaqiara nraakiaraara mwianravata uro kuaa qua mwia nraahu tuvaro mwiva qumina eo timwa kyerovalta hia viraitiro qaqlira kyero varuraye, tiro.

<sup>31</sup> Iesusiva mwi quara timwa kyero mwihua kyapara hiro tiqaro, Mwia nraaqiaratanaqitairo ta nraaqiarava nai qora qua riorave? tuvata mwihua tiqata, Mwia yakyaava tauraava nai qora qua riorave, tita.

Mwihua mwitaa tuvaro Iesusiva timwa nyinro tiqaro, Qio mwi quara rieqatama nte tirera hiani quara ntapihi kye riaate. Taakisi vare variahuavata, api nrohi varia nraakyehuavata, variavata nkye mwihuara uaquia hia nraakyehuavata qiahu, mwihua nkyi nraatara kyeta Kotiva ntaqikyiraqi mwihua nraante vi variarave.

<sup>32</sup> Haaru Ioniva nri ntero ntapihi kye vahi aanranra nkyi nyaamwutaankye tuvata nkye mwia quara hia qutaa quave turave. Taakisi vare variahuavata, api nrohi varia nraakyehuavata, Ioninra quara qutaaave turave. Nkye variqata taqovata mwihua Ioninra quara qutaaave tuvata nkye hia mwihua hunte hurave. Nkye mpo vu nraato tu kyeta uaquia hi aanranra qaqlira kyeta Ioninra quara qutaa quave qiataara vahuvata nkye hia mwitaa hiraitita varurave, tiro.

*Uaini tutoraqi hia kyuqema kyeta ntaqikyi varu vaisihuaqaa ntumwa kyero tura  
(Maaki 12:1-12; Ruku 20:9-19)*

<sup>33</sup> Iesusiva mwitaa timwa kyero tiqaro, Nkye rie varivaqena nte mpo quaqaa ntumwa kyena nkyi timwa nyiankye. Mwata airi vahu vaisiva uaini vara tutero, mwia vara ututu tutukya utu tero, mwata quvu kyero uaini tamwa tatianinra ututero, haraara nraamwu mpuahaantaqi variqata mpuara vaisiara taqeravata ututorave. Mwiaqaatairo mwiva nyianra mpo mwatani virera hiro, vaisi mponramwu timwa nyinro tiqaro, Nkye ni uaini aakyooqaa ntaqikyi mate varivaqe nte quankye, timwa kyero mwiva nyianra mpo mwatani vurave.

<sup>34</sup> Mwini uro varuvaro uaini hiqi entava nri ntovaro mwiva nai kyaiqa vaisi mponramwu sitero tiqaro, Uro ni aakyooqaa ntaqikyi varihua tivata uaini ninanivata hiqu nyivata vare nriate, tuvata mwihua mwini vurave.

<sup>35</sup> Mwini uvata mwia aakyooqaa ntaqikyi varuhua mwia kyaiqa vaisinramwu ntavaaqavu kyeta mpo kyaamwuqo ntuqutu kyeta vateta, mpo ru kyeta, mpo oriqo ntuqutu kyeta yatorave.

<sup>36</sup> Mwitaa huvaro aakyo qova qaiqaa vaisi kyaata airiqama sitovata mwihua tauraamponramwu huntema kyeta mwihuavata kuaa qarama nyatoraye.

<sup>37</sup> Mwitaa huvaro aakyo qova nraakiara ekyara nai mwaaqu kuaiqia titero tiqaro, Mwihua mwia taqeta nianra mwia mwaaquve tiqatama mwia kyuqema mwatevarave, tiro.

<sup>38</sup> Mwitaa timwa kyero mwia titovaro vuvata mwia aakyooqaa ntaqikyi varuhua mwia taqeta nai timwa mwi nai timwa mwi hita tiqata, Mwaa vaisiva nai qova qutu viraro nai qora mwatavata ekyaa inraikyavata varaarivama variho. Nrivaqe mwia rukyaararo mwiva vararerera hiari inraikyava tirini nraahu vahiarive, tita.

<sup>39</sup> Mwihua mwitaa timwa kyeta mwia ntavaaqavu kye aakyoqitaita mwaqaani mwaati kyeta mwia ru kyorave, tiro.

<sup>40</sup> Jesusiva mwitaa timwa kyero mwihua kyapara hiro tiqaro, Mwitaa hurara tiro, aakyo qova nai mwaaku rukyera kyaara nataave hiananrove? tiro.

<sup>41</sup> Mwitaa tuvata mwihua Iesusirara tiqata, Aakyo qova uaquia hia vaisihua mwihua ekyaa ru taiqa kyero mwiaqaatairo mwiva ni aakyooqaa ntaqikyiqata ninavata mpiae tiro, yaisi nraahumwa mponramwuma sita yataaananroye, tita.

**42** Mwihua mwitaa tuvaro Jesusiva tiqaro, Nkye hia Kotira mpukuqi mwaa quara kyaara ntumwa kyeta riaarave? Mwataama tiro: Ori nraamwu hoqeqata ori mpora hia kyuqe orive timwa kyeta qaqira kyaa oriva puhaqama viho. Kotiva mwi orira nronraqama kyairara tita, tire mwia taqeta kyuqe kyaiqave turo, turave. *(Ihi 118:22-23)*

**43** Nte mwi quara rieqanama nkyiara mwataama tuqo. Nkye mwia mwaaqu uaqiamma mwatera kyaara Kotiva nkyiara hia ni nraakye qorave qiananrove. Mwiva nkyi qaqira kyero mpo mwatanaahuara mwihua ni nraakye qora varivaqena nte mwihuaqaa ntaqikyi variarita mwihua kyuqe kyaiqa vara mataate, qiananrove.

**44** [Mwi oriraqaa tuto ntuariva ntupepaa hiro pataqia pataqia utu quananrove. Mwi oriva vaisiqaa tumu ntirera, mwi vaisira ntuqutu kyero mwumwu ntamwa kyero kyaananrove, tiro.]

**45** Jesusiva mwitaa tuvata Kotira nraamwuqaa ntaqikyi varuhuavata, Parisi vaisinramwuvata, variqata ntapihi kyovaro Jesusiva uaini aakyoqaa ntaqikyi varuhuaqaa ntumwa kyero mwihua tuvata

**46** mwia ntavaaaqavuqita uro ko qiare timwa kyeta taqovata nraakye qora mwini ntuvaantuama vuhua Jesusirara poropeti vaisivantove tuvata mwihua nyaatu aatu hiqata hia mwia ntavaaaqavu kyora.

## 22

### *Nraakye varovata kyara nronraqaa ntumwa kyero tura (Ruku 14:15-24)*

**1** Jesusiva qaiqaa nraakye qora qua timwa nyinrenro mpo qua mpo quaqaa ntumwa kyero timwa nyunra.

**2** Mwiva mpo qua tiqaro, Kotiva nraakye qoraqaa ntaqikyiani quara vahirero vunyaa vaisi mpovanto nai mwaaqvanto nraakye varaaninranra rieqaro kyara tera taarama kye vatora votima kyero vaiho.

**3** Vunyaa vaisivanto mwihua mwihua nyaanrama tero tiqaro, Nraakiara nkye nivatama kyeta kyara nraate, tiro. Timwa kyero variro kyara nrenra terama tero nai kyaiqa vaisi sitero tiqaro, Nkye uro mwihua timwa nyivata mwihua nrumbu kyara nraate, tuvata uro timwa nyuvata mwihua hia quataa huvata hia vurave.

**4** Hia vuvaro vunyaa vaisivanto nai kyaiqa vaisi mponramwu qaiqaa sitero tiqaro, Nte nyaanrama tau nraakye qorahuara mwataama qiate. Nte kyara terama tauqo. Ntena kauvata mpo quara nraati kyuqueravata rukye toqa uta vatauqo. Ni maaqvanto nraata varaaninra nrumbu taqeta mwi kyarara nraate, qiate, tiro.

**5** Mwiva mwitaa tuvata mwiva nyaanrama to nraakye qorahua hia mwia qua riaraitita, mwihua nkyiari kyaiqa nraahu varaqita vurave. Mpovanto nai aakyoqi vuvaro mpovanto nai kyoqaa kyaiqa vararero vuvata

**6** mponramwuvanto vunyaa vaisi mwia kyaiqa vaisinramwu ntavaaaqavu kyeta ntuqutu kye vateta ru kyorave.

**7** Mwitaa huvaro vunyaa vaisi mwia nai mpoqama kyero raraqa tovaro nai ntaqu vaisihua sitovata mwihua uro nai kyaiqa vaisinramwu rukyo vaisihua nkyiari rukyeta mwihua mwatukyave nraamwuve qia quara kyorave.

**8** Mwiaqatairo vunyaa vaisi mwiva nai kyaiqa vaisi mponramwu nyaanrama kyero tiqaro, Ni maaqvanto nraata varaanri kyarara nte terama tauqo. Nte nraakye qora nyaanrama tena taqauqaro mwihua kyaiqavanto hia qioqa iharo mwihua ni kyara nrevavata hia qioqa iho.

**9** Nkye mwihua qaqla kyeta uro hisai hisai aanra ntuvaantua hiraqa ta nraakye qorahuave taqaiavata varihua mwihua sita kyeta mwihua tuqata, Vunyaa vaisivanto kyara nraaninra nkyevata uro nraate qiate, turave.

<sup>10</sup> Mwitaa tuvata mwia kyaiqa vaisinramwuvanto aanrasaita ta nraakyе qorahuave taqohua kyuqehuave, uaqia uhuave, ntuvaantuama kyeta sitaqita uro kyovata mwi-hua kyara nro nraamwunra piqa kyorave.

<sup>11</sup> (Mwi entara nraata varaani kyarara nranrenrata nru vaisihua gesana nri ntovaro gesana ntaqikyuva mwihua tavunaqotairo mwunruqama tovata uro mwatakyaa vita varura. Vunyaa vaisi mwia tavuna rupa varo vaisiva nraahu qio mwiqi mwatakyaa quarive tura.)

Mwihua nraamwuqi huval vuvaro vunyaa vaisivanto taqovaro gesanatairo hia tavuna varo vaisiva nraamwuqi varuvaro

<sup>12</sup> mwiva mwi vaisirara tiqaro, Qikye, ni vaisio, e hia gesanataira ni tavuna ruparaitira, e tanama kyerave mwaaci vera ntera hiaro? tuvaro mwi vaisiva hia qio qua turave.

<sup>13</sup> Hia qua tuvaro vunyaa vaisivanto nai kyaiqa vaisinramwu timwa nyinro tiqaro, Nkye mwaa vaisira kyuqu kyaqu rupa kyeta uto mwaatani upi hiraqi kyaate. Mwiva mwini variro ntateqaro nai aanrai kutiqaro variarive, turave, tiro.

<sup>14</sup> Iesusiva mwi quara timwa kyero mwiva tiqaro, Kotiva airi nraakyе qora nyaan-ramatairaqitairo mpoqiatana nraahu sitaanarove, tiro.

### *Taakisiqa hirara Iesusira kyapara hora*

(Maaki 12:13-17; Ruku 20:20-26)

<sup>15</sup> Iesusiva mwitaa tuvata Parisi vaisinramwuvanto mwiqitai veva nteta uro ntu-vaantuama vi varita tiqata, Nanra quave kyapara hiararo Iesusiva api qua qianan-rove? Kyai mwaa quara kyapara hiare, timwa kyeta

<sup>16</sup> mwihua nkyiari sataqi nrohu vaisihua mponramwu siteta Herotira nramwu-naahua mponramwuvata sitovata mwihua Iesusiva varunani uro nteta tiqata,

Mwaanra ti variara vaisivao, e mwaanra okyara timwa timwianrata tire taqaurara e qutaa qua ti variaravave. E hia vaisi nraatu aatu hiraitira, vaisi nronranravata, qumina vaisiaravata, kuaa qua nraahu ti variaravave.

<sup>17</sup> Tire mwaa quara qiananranra e nataamave riaaro? Tire Kotira qua rieqatama giove tire Romeni mwihua vunyaa vaisi Sisaara taakisi mwiananrave? (Mwi mwatanaahua hia Kotira qua riaarave.)

<sup>18</sup> Iesusirara api qua qiarive tu quara Iesusiva vaakya ntapihi kyero mwiva tiqaro, Nkye unraqama kyeqata kyuqe kyaiqa vare variahuave. Nkye nanraqamave nivanto api qua qiarive titi mwitaa ti variavo?

<sup>19</sup> Taakisi munima kuaiqia ni naamutaivaqe taqaankye, tiro.

Mwitaa tuvata mwi munimanra kuaaru mwuvaro

<sup>20</sup> Iesusiva mwihua kyapara hiro tiqaro, Munima mwiaqaa tara virive vaiho? Tara nrutuve vaiho? tiro.

<sup>21</sup> Mwitaa tuvata mwihua tiqata, Sisaarave, tuvaro Iesusiva mwihuara tiqaro, Mwianra rieqatama nkye Sisaava hianinra nai mwiate. Kotiva hianinra Kotira mwiate, tiro.

<sup>22</sup> Iesusiva mwitaa tuvata mwihua mwia qua rieta tiqata, Qikye, mwiva tiri qua nraatara kyero kyuqe qua tiho, timwa kyeta kyauqu ntukikinraaqata kyeta Iesusira mwini kyeta vurama.

### *Qutu vita qaiqaa qati sivi okyarara Saitiusivanto Iesusira kyapara hora*

(Maaki 12:18-27; Ruku 20:27-40)

<sup>23</sup> Mwi entara Saitiusinramwuvanto Iesusiva varunani uro ntora. Mwi vaisihua nkyiari mwaanra qua rietama tiqata, Vaisivanto qutu quariva ekyaara qutu viro hiama qaiqaavata siquananrove, ti varu vaisihua uro nteta Iesusira kyapara hita tiqata,

<sup>24</sup> Mwaanra ti variarao, tiri haivaqava Mosesiva mwaanra qua tiqaro mwitaa timwa torave. Vaisivanto hia nraaqiara mwataraitiro qutu viraro mwia qatavantove mwia

vakyaavave mwia nraata varatero nraaqiara mwata humwuanrama mwataarive, turave.

<sup>25</sup> Tire qua qiananra riaante. Haaru mwaini qate vakye 7 nramwu varurave. Sakaava nraakyе mpo varatero hia nraaqiaravata mwataraitiro qutu vuvaro mwia qata mwia nanaava mwia nraata varatero

<sup>26</sup> mwivavata qati variqiro viro uro qutu vurave. Mwiva qutu vuvaro mpo mwia nanaava mwi nraakyera varatero hia nraaqiaravata mwataraitiro, qati variqiro viro qutu vuvata qio mwitaamaqi vita ekyaa mwi qate vakyenramwuhua mwi nraakyera varateta hia nraaqiara mwataraitita, qati qutita vurave.

<sup>27</sup> Qutu vuvaro nraakyе mwivavata variro qutu vurave.

<sup>28</sup> Nraakiara nraakyе qora qutiraqitaita qaiqaa qati sivi entaraqaa mwi nraakyeva tara nraatave variananrove? Mwiva qati varu entara qoraisi 7 nramwu varatorave, tita.

<sup>29</sup> Saitiusi vaisinramwuvanto mwitaa tuvaro Iesusiva mwihua nkyiari timwa nyinro tiqaro, Nkye Kotira qua qara ntumwa tora hiave ntapihi hiavo? Nkye Kotira kepukyara hia riaarave. Nkye hia ntapihiahua tita, nkye api qua qiaovo.

<sup>30</sup> Nraakiara nraakyе qora qutu vihua qutu viraqitaita qaiqaa sivi qati variqi vi entara hiama nraakyе qora nai vare nai vare hivarave. Mwihua nyaamwunyaahua votima kyeta qati varivarave, tiro.

<sup>31</sup> Iesusiva mwitaa timwa kyero mwiva tiqaro, Nraakyе qora qaiqaa qati sivi vari okyarara nte nkyi kyapara hirerave. Nkye hia Kotira mpukuqi mwaa quara qara ntumwa tora kyaara ntumwa kyeta riaarave? Kotiva mwitaa turave:

<sup>32</sup> Nte Kotiva nte i haivaqahua mwaniqavanto varuqo. Nte i haivaqahua Evara-haamunraqaave, Aisaakiraqaave, Iaikopuraqaave, ntaqikyi varuvave, turave.  
*(Kyatura 3:6)*

Qio riaate. Qutu viro taiqavi inraikyaraqaa hia Kotiva ntaqikyi varivave. Qutu viro qaiqaa siviro qati variqiro vi inraikyaraqaa Kotiva ntaqikyi varivama variho, tiro.

<sup>33</sup> Iesusiva mwitaa tuvata nraakyе qoravanto mwini ntuaantuama vuhua mwia qua rieta tiqata, Qikye, Iesusiva okyara quama timwa timwiho, tita.

### *Nanra quave Kotiva vuni vatai quava vaiho? tura (Maaki 12:28-31; Ruku 10:25-28)*

<sup>34</sup> Parisi vaisinramwuvanto riovaro Iesusiva Saitiusi vaisinramwuvanto tu quara nraatara kyovata mwihua ntuaantuama vuraqitairo

<sup>35</sup> vaisi mpovanto mwaanra okyara timwa nyi varu vaisiva Iesusirara api qua qiarive tiro, mpo qua Iesusira kyapara hiro tiqaro,

<sup>36</sup> Mwaanra ti variarao, Kotiva qua timwa toraqitairo nanra quavantove nron-raqama kyero vuni vahi quava vaiho? tiro.

<sup>37</sup> Mwitaa tuvaro Iesusiva timwa mwino tiqaro, Iqaa ntaqikyira Kotirara ekyaa ena mwutukyaqitairave, ekyaa ena mwaniquraqitairave, ekyaa ena vu nraatoqitairave, mwianra nraahu mwutukya vahirara variante, turave. *(Lo 6:5)*

<sup>38</sup> Qio mwi quava okyara qua vuni vahi quava vahirave.

<sup>39</sup> Mwi quara nraakiara okyara qua mpo vaiho. Mwi quava vuni vahi quara votima kyeroma vaiho. Mwitaama tiro:

Inanra mwutukya vahintema kyero ina nramwunaanranravata i mwutukya vahiarive, turave. *(Wok Pris 19:18)*

<sup>40</sup> Mwi quavavata okyara qua puha rataara votima kyero vaharo ekyaa mpo qua Mosesiva timwa to quavave, poropeti vaisivanto timwa to quavave, mwi quatanaqaa hiriviro vahirave, tiro. Iesusiva turama.

### *Iesusiva Mesaiaara kyapara hora (Maaki 12:35-37; Ruku 20:41-44)*

<sup>41</sup> Parisi vaisinramwu mwini ntuvantuama vita varuvaro Iesusiva mwihua kyapara hiro tiqaro,

<sup>42</sup> Nkye Kotiva titai vaisira Mesaiaara nataamave riaavo? Mwiva tara okyaraqitairo mwatataarivave variananrove? tiro. Iesusiva mwitaa tuvata mwihua tiqata, Mwiva tiri haivaqara Ntevitira okyaraqitairo qovara hiananrove. Mwiva Ntevitira nraisima variananrove, tita.

<sup>43</sup> Mwihua mwitaa tuvaro Iesusiva tiqaro, Nataama kyerove Mesaiaavanto Ntevitira nraisi variananrove? Haaru vetato entaqaa Ntevitiva varuvaro Kotira mwanraquravanto mwia kyaahaqa huvaro Ntevitiva Mesaiaara tiqaro, Mwiva ni nronravantove turave. Ntevitiva mwataa turave:

<sup>44</sup> Kotiva ni nronra vaisiara tiqaro,

E nritarera ni kyauqu kyaatutani mwatakyaa vira variraqena nte i nramwutaahua ru taiqa kyena nraatara kyaarira e mwihuaqaa kyuqu ntamwa tera variante, turave.

(*Ihi 110:1*)

Ntevitiva mwitaa turave, tiro.

<sup>45</sup> Iesusiva mwitaa timwa kyero qaiqaa kyapara hiro tiqaro, Ntevitiva Mesaiaavanto qovara hianinranra tiqaro, Mwiva ni nronra vaisive, turave. Ntevitiva mwitaa turara tiro, nataama kyerove Mesaiaavanto Ntevitira nraisi variananrove? tiro.

<sup>46</sup> Iesusiva mwitaa tuvata mwihua nai timwa mwianre tita quara puua huvaro hia vahuvata mwihua mwi entaraqaataita aatu hiqata qaiqaavata mpo qua mwia kyapara hiarorave timwa kyeta varura.

## 23

*Parisi vaisiaravata mwaanra okyara ti varu vaisihuavaravata tura*

(*Maaki 12:38-39; Ruku 11:43, 46, 20:45-46*)

<sup>1</sup> Iesusiva mwitaa timwa kyero nraakyne qora mwini ntuvantuama vita varuhuvara-vata nai nraaqiaranramwuanravata tiqaro,

<sup>2</sup> Mwaanra okyara ti varia vaisihuavata, Parisi vaisinramwuvata, Mosesiva timwa to quara kyuqe qua nkyi timwa nyiqi vi variara

<sup>3</sup> nkye mwia riemwaqita quate. Nkye mwihua qua mwia nraahu rieqatama hia mwihua nrohiantema kyeta nrohiate. Mwihua mpohuara nkye mwitaa mwataa hiate timwa kyeqata nkyiari hia mwitaa hiraitita, mwihua uaqiamma kyeqata nrohi variarave.

<sup>4</sup> Qikye, mwihua nronraqama kyero muaanra ntai quara rupa kyeta varaqita uro nraakyne qoraqaa qu nyateta mwihuara qu varaate timwa kyeta mwihua hia nkyiari kyauqu tutu kyeta nraakyne qora kyaahaqa hi variarave.

<sup>5</sup> Nraakyne qoravanto mwihua mwahuta qiate tita, Parisivanto Kotira kyaiqa vara mwate variarave. Mwihua Mosesiva tu quara qara ntumwa kyeta qapuqama kyeta nkyiari tiriqa quteta, kyaataaqivata rupateta, tavuna mpuahaa kyuqera rupa vareta nraakyne qoravanto mwihua taqaate tita, mwatukyaqaa nrohi variarave.

<sup>6</sup> Mwihua omwata nraanraqaa uro variqata vaisi nronravanto mwatakyaa viqata varianani variare timwa kyeqata variarave. Mwihua mwaanra nraamwuqi uro variqata kyuqe taintaqua nraahu mwatakyaa vita variarave.

<sup>7</sup> Nraakyne qoravanto mwihua kyuqema kye qua mwanteqata mwaanra qua ti vari vaisivave qiate tiqata maaketiqi mwihua kyakyama kyeqata nrohi variarave.

<sup>8</sup> Nkyevata kuaa qara hivorave. Vaisi mpovanto nkyi qua mwantero nkyiari tiqaro, E vaisi nronra mwaanra qua ti variaravave, qiankyorave. Mpovanto mwitaa tirera, nkye mwianra, Hia qaiqaavata mwitaa qiente, qiate. Tire qata vakyaama varuro, qiate. Tiri mwaanra qua timwa timwi variva kuaikuvanto nraahuma variho qiate.

<sup>9</sup> Nkyi sova kuaikuvanto nyaamwuni varirara tita, hia mwatani variani vaisira mpora tiri tiqovave qiate.

<sup>10</sup> Nkye vaisi mpora tiri qiata vaisive tivorave. Nkye tiqata, Kotiva titaiva Mesaiaavanto, mwiva nraahuma tiri qiata vaisivanto variho, qiate.

<sup>11</sup> Nkyiqitairo mpovanto nronra vaisi varirera, mwi vaisiva nkyini kyaiqa vara nyataariva variarive.

<sup>12</sup> Nai nrutu tuaaheraariva variraro Kotiva mwia nrutu vara mwataniqama kyaananrove. Nai nrutu vara mwataniqama kyaariva variraro Kotiva mwia nrutu tuaahera kyaananrove, tiro.

*Mwaanra okyara ti varu vaisihuavata Parisi vaisiaravata po kye timwa nyatora (Maaki 12:40; Ruku 11:39-52, 20:47)*

<sup>13</sup> Mwaanra okyara ti variahuavata, Parisi vaisivata, nkye unraqama kyeqata kyuqe kyaiqa vare variahuave. Nkye nraakiara uaqiamma virara rieqanama nte nkyiara po kye timwa nyatauquo. Nraakye qoravanto Kotiva ntaqikyiraqi virera uti variavata nkye qesa mwihua suqaa vahira vara mwatumwi tite variavo. Mwitaa hiqata nkye nkyeta mwihua hia Kotiva ntaqikyiraqi viraitita, mpohua mwipi virerata uti variavata nkye mwihua aanra tite variavo.

<sup>14</sup> [Mwaanra okyara ti varia vaisihuavata, Parisi vaisivata, nkye unraqama kyeqata kyuqe kyaiqa vare variahuave. Nkye vita raupirima virara nte po kye tuqo. Nkye tetoka nraakye mwihua nraamwu mpuara vare varita tiqata, Mpovanto tire uaquia hi kyaiqara utuananra taqero tiriara uaquia hia vaisihuave tivorave, tita nkye nraakye qora suqaa variqata Kotirara mpuuaaqama kyeta aakyara nte variarave. Po, mwia kyaara nkyiqa qua vahiariva nronraqama kyero vahiananrove.]

<sup>15</sup> Mwaanra okyara ti varia vaisihuavata, Parisi vaisivata, nkye unraqama kyeqata kyuqe kyaiqa vare variahuave. Nte nkyiara po kye tuqo. Nkye airi vaisi vara uaqiamma kyarerata uti variarave. Vaisi mpovanto nkyi qua rieqaro nkyi vataqiro quarive tita, nkye mwia puua hirerata kyaarerera nronra teqa vareta nyianrani nrohiqata mwia puaama kyeta mwia nkyeta kyaiqa nraamwutaavaro mwiaqatairo mwi vaisiva nkyivata nraatara kyero mpoqiyavata uaquia hi vaisiva varirave. Nkye utuaraqaara mwiaqaa qua nronravantoma vahiananrove.

<sup>16</sup> Nkye mpohua aanra nyaamwutarerata uti variavaro nkyita su qipa vihua variavo. Nkye nraakiara vita raupirima virara nte po kye tuqo. Nkye nraakye qora mwaanra okyara timwa nyiqata mwitaama tita, Vaisivanto Kotira nraamwu nrutu nteqaro nai kyauqu nriqiqaa vatero tiqaro, Nte mwitaa mwitaa hirerave, tirera, mwiva qiaru quava hia mwia tutaananrove. Vaisivanto Kotira nraamwuqi vahira kori munima nrutu nteqaro nai kyauqu nriqiqaa vatero tiqaro, Nte mwitaa mwitaa hirerave, tirera, mwiva hia mwi quara nteqa kyaarive, qiarave.

<sup>17</sup> Nkye mwitaa tiqatama api quama qiaivo. Nkyi su qipa vihata variavo. Kotira nraamwuvanto vuni vahi inraikyavama vaiho. Kori munimavanto Kotira nraamwuqi vahirora tiro, Kotira nraamwuvanto mwi munimanra vara kytataqama kyairave.

<sup>18</sup> Nkye mwaanra qua apiqama kyeta nraakye qora timwa nyita tiqata, Quara rukyeta Kotira mwi varia taintara vaisivanto mwi taintara nrutu nteqaro nai kyauqu nriqiqaa vatero tiqaro, Nte mwitaa mwitaa hirerave, tirera, mwiva qiaru quava hia mwia tutaananrove. Vaisivanto mwi taintaraqaa rukyero vatai quarara nrutu nteqaro nai kyauqu nriqiqaa vatero tiqaro, Nte mwitaa mwitaa hirerave, tirera, mwiva qiaru quava mwia tutaananrove. Mwiva mwi quara hia nteqa kyaarive, qiarave.

<sup>19</sup> Nkye mwitaa tiqatama api qua ti variavo. Nkyi su qipa vihata variavo. Tainta mwiaqaa rukyeta vataa quarava hia tainta mwia nraatara kyero vuni vahi inraikyava vahirave. Kotira nraamwuqi vahira taintava vuni vahivara tiro, quara mwia vara kytataqama kyairave.

<sup>20</sup> Vaisivanto kyauqu nriqiqaa vateqaro mwiva tainta mwia nrutu nteqaro mwiva tainta mwiaqaa vahira inraikyaratama, nrutu ntaiho.

<sup>21</sup> Vaisivanto nai kyauqu nriqiqaa vatero Kotira nraamwu nrutu nteqaro mwiva hia nraamwu nrutu nraahuvauma ntero, mwiva nraamwu nrutuvata, nraamwuqi varira Kotira nrutuvatama, nterove.

<sup>22</sup> Vaisivanto nai kyauqu nriqiqaa vatero nyaamwu nrutu nteqaro mwiva hia nyaamwu nrutu nraahuvauma ntero, mwiva Kotiva mwatakyaa vi taintara nrutuvata nteqaro mwi taintaraqaa mwatakyaa viro varira Kotira nrutuvatama nterove.

<sup>23</sup> Mwaanra okyara ti varia vaisihuavata, Parisi vaisivata, nkye nraakiara raupirima virara rieqanama nte nkyiara po kye timwa nyatauqo. Nkye unraqama kyeqata kyuqe kyaiqa vare variahuave. Nkye uapaa kyara haantave, honti mperu mwia nraahu Mosesira qua riemwaqita viqata ntainra kye Kotiranive, qiaro nai mwi variarave. Nkye mwi quara nraahu riemwaqita virerata uti variqata mwaanra qua mpovanto mwi quara nraatara kyero vhira, mwi quara nkye hia rie variarave. Ntapihi kye ko ti okyararave, po kye timwa nyate okyararave, Kotirara kepukyaqama kyeta rie okyararave, nkye mwi quara mwi quarara hia nronraqama kyeta rie variarave. Nkye pata qua rieqatama mwi quaravata, nronra quavata, riemwaqita quataarave.

<sup>24</sup> Nkye mpohua aanra nyaamwutarera uti variavaro nkyita su qipa vihata variavo. Nkye nramanri nraanre titi taqaavaro upauvanto mwipi vaihata nkye mwia qatinani vara kyeta aasau nronravanto mwipi vhira mwiatama kyeta nrapitama kye variarave.

<sup>25</sup> Mwaanra okyara ti varia vaisihuavata, Parisi vaisivata, nkye raupirima virara nte nkyiara po kye timwa nyatauqo. Nkye unraqama kyeqata kyuqe kyaiqa vare variahuave. Nkye kaapuvata tanuvata mwaaqani nraahu hiqe variahuave. Nkye nkyeta pahi nraahu hiqama kyaavaro nkyi utaqi vaisi rukyevave, mpuara varevave, nkyetara nraahu rieqata vare varivave, mwi inraikyava nraahu vaiho.

<sup>26</sup> Nkye Parisi vaisi mwaahuao, nkyi su qipa vihata variahuave. Nkye kaapuvata tanuvata utaqi nraante hiqama kyaavaro mwaqqanivata kyuqema vahiarive.

<sup>27</sup> Mwaanra okyara ti varia vaisihuavata, Parisi vaisivata, nkye nraakiara vita raupiri hirara nte nkyiara po kye tuqo. Nkye unraqama kyeqata kyuqe kyaiqa vare variahuave. Vaisi quntamwa tetu simenti ntamwa kyeta mwiaqaa penti egarori qutaara nkye mwia votima kyeta variarave. Simentiqaa penti egarori qutaara taqe-qaro mpovanto kyuqema kyero vaiho tiharovata mwataqi qutu vira mwukyaarivata tapitai inraikyava nraahuma vaiho.

<sup>28</sup> Mwia votima kyeta nraakye qoravanto nkyi mwaqqani taqe-qata vaisi kyuqe hiahuave qiavarovata nkyi utaqi unra qua ti variavavata, uaqia hi kyaiqara uti variavavata, piqairave.

<sup>29</sup> Mwaanra okyara ti varia vaisihuavata, Parisi vaisivata, nkye nraakiara vita raupiri hirara nte nkyiara po kye tuqo. Nkye unraqama kyeqata kyuqe kyaiqa vare variahuave. Nkyi haivaqahua haaru variqata poropeti vaisi Kotira qua qovarama kye varu vaisihua rukyeta quntamwa torave. Mwihua quntamwa toraqaa nkye kyuqema kyeta haraara nraamwu hoqa nyate variarave. Nkyi haivaqahua variqata avuqavuma kyeta nrohu vaisihua rukyeta quntamwa toraqaa nkye ntupi kyeta kyuqe hi variarave.

<sup>30</sup> Nkye mwihua nyaisivanto tiqata, Tire haaru mwi vakya variavaratiri, hiama tire tetu haivaqahua nraantanteta poropeti vaisi mwihua ruavaratirio, qiarave.

<sup>31</sup> Nkye tiqata, Tiri haivaqahua haaru poropeti rukyohua tire mwaa mwihua nyaisima varuro, qiarave. Nkye mwitaa qiavaro nkyeta qia quavama nkyita tutaiho.

<sup>32</sup> Qio nkyeta haivaqahua uaqia hi kyaiqara tohara taara varaqita uro taiqa kyaate.

<sup>33</sup> Nkye quaihavanto variavo. Nkye quaiha nraaqiaravanto variavo. Kotiva nkyi ko timwa kyero qia nronraqi tuto kyaananrove. Hia qio nkye mwitaita ntuqema kyeta vivarave.

<sup>34</sup> Nte qianinra riaate. Nte poropeti vaisive, kyuqe vu nraato vataa vaisive, kyuqe qua timwa nyi vaisihuave, sitaarita nkye mwihua mponramwu ru kyeta

mponramwu rukyeta kyatariqaa hiriteta mponramwu nkyeta mwaanra nraamwuqi sitaqita ntuqutu kyeta vateta mponramwu mpo mwatukya mpo mwatukyaqitaita ntuqutu sataqita nrohivarave.

<sup>35</sup> Mwianravata rieqaro haaru mpo vaisinramwu ru kyo quavavata nkyiqaama vahiananrove. Tauraaqama kyero Everira qumina rukyoraqaatai tohara kye mwihua ruqi nrira nrumu ekyaara Mperekiaara mwaaqu Sekaraiaara rukyorave. Mwia rukyarerata Kotira nraamwuvanto hini vahuvaro, quara rukye qia quara mwate varu taintava hini vahuvaro, Sekaraiaava Kotira kyaiqa vareqaro utana varuvata mwia rukyorave. Ekyaa mwihua rukyo quavavata nkyiqaama vahiananrove.

<sup>36</sup> Nte qianinra riaate. Mpohua mpohua Kotira nraaqiara rukyo quava, ekya mwi quava mate mwaa entara variahuaqaama vahiananrove, tiro.

*Iesusiva Ierusaremi taqovaro mwia ua huvaro po tura  
(Ruku 13:34-35, 19:41-44)*

<sup>37</sup> Iesusiva mwitaa timwa kyero tiqaro, Po, Ierusaremiqinaa nraakye qora tuaavo, Ierusaremiqinaa nraakye qora tuaavo, nkye Kotira poropeti vaisinramwu ru kyaahuave. Kotiva sitai vaisihua variavata nkye ori pati kyeta mwihua ntuqutu kyaahuave. Kokoraaravanto nai nraatiqaa nraaokya iri kyero qutaintema kyena nte airi nani nkyiara po timwa kyena nkyiqa ntaqikyiankye tuqata nkye ni qorirma kyeta ni qaqlira kyaavo.

<sup>38</sup> Mwia kyaara Kotiva nkyi qaqlira kyairaro nkyi mwatukyaqi hia vaisivata varivaro qumina mwata nraahuma vahiananrove.

<sup>39</sup> Nte qianinra riaate. Nkye mwaa entaraqaataita hia ni taqaraitita varivaqena nte qaiqaa tumu variarita nkye mwi entara ntapihi kyeta ni taqeta nianra tiqata, Kotiva titai vaisiva tumiho. Mwia kyuqema mwataate tivarave, tiro.

## 24

*Kotira nraamwu ntukuraakurama kye taiqa kyerara tura  
(Maaki 13:1-2; Ruku 21:5-6)*

<sup>1</sup> Iesusiva mwitaa timwa kyero Kotira nraamwu mwini kyero virera utuvata mwia nraaqiaranramwuvanto tiqata, Kotira nraamwu kyuqera mwaa taqaante, tuvaro

<sup>2</sup> Iesusiva eo tiro, Nkye mate nraamwu mwaa mwiaavata kyuqe inraikya mwipi vahiravata taqaavararo vahirave. Nte qianinra riaate. Nraakiara ori taaqautaava mpoqiatantovata hia nai mwoqaqa nai mwoqaqa vahiananrove. Nraamwu mwaa ntukuraakurama kyaivararo tumu ntiro orivanto mumuni utu quananrove, tiro.

*Iesusiva nraakiara airi muaanravanto qovara hiananrove tura  
(Maaki 13:3-13; Ruku 21:7-19)*

<sup>3</sup> Iesusiva mwitaa timwa kyero uro Oripi taaqiqaa mwatakyaa viro varuvata mwia nraaqiaranramwuvanto nkyiari nraahu mwiva varunani uro nteta mwia kyapara hita tiqata, Vaakya qiarava taireve qovara hiananrove? Nanra inraikyavanto qovara hiraqeta tire mwiaqaa vitama kye taqetave tire iara mwiva qaiqaa tuminranro mwaa mwatara taiqaani entava qaumatoma vaiho qiananrave? tita.

<sup>4</sup> Mwihua mwitaa tuvaro Iesusiva tiqaro, Mpowanto nkyi unra qua timwa nyianinranra rauriqata variate.

<sup>5</sup> Nraakiara vaisi airivanto qovarama vita ni nutu nteqata Kotiva ni titaihana nruvave tivata airi nraakye qoravanto mwihua unra quara qutaa quave tivarave.

<sup>6</sup> Nkye varivata ntaqiqata qua vora ntaivata hia aatu hiate. Ntaqi quava aanrasairo nrinrata hia aatu hiate. Ntaqi variva nri ntairata nkye ekyaara enta nri ntaiho tivorave. Mwi inraikyava nraante qovara hiananrove.

<sup>7</sup> Mpo mwatanaava mpo mwatanaanravata ntaquananrove. Qiata vaisivanto qjata vaisivata ntaquananrove. Mpo mwataqi mpo mwataqi nronraqama kye aara nte entava vahiananrove. Mpoqi mpoqi mwatura tuananrove.

<sup>8</sup> Ekyaa mwi inraikyava qovarama virata hia ekyara enta nri ntaiho qjate. Nraaqiara mwatarero qakyo atura ntuariva vahiaro vuni nriqa vi inraikyara pataqia tohara taintema kyero, muaanra vahiani entava qati tohara taiho, qjate.

<sup>9</sup> Mwi entara nkyi ntavaaqavuqita uro kyaivata nkyi uaqjama nyateta nkyi ru kyevarave. Mwi entara nkye ni nraakyje qora varivatara tita, mwia kyaara ekyaa mpo mwatanaa mpo mwatanaahua hia nkyiara mwutukya vahirata varivarave.

<sup>10</sup> Mwi entara nianra qutaa mwivave thiu airivanto qaqira kyeta nramwutaavanto nrivata nkyiari henahua qovarama kyeta vitira mwivave mwaa mwivave timwa kyeta mwihua nramwutaaqa hivarave.

<sup>11</sup> Mwi entara airi vaisivanto qovarama vita variqata nte Kotira qua qovarama kye varuvave timwa kyeqata airi nraakyje qora unra aanra nyaamwutevarave.

<sup>12</sup> Mwi entara uaqia hiari kyaiqava nronraqama kyero vahirata airi nraakyje qoravanto mpohuara mwutukya vahianinra qaqira kyevarave.

<sup>13</sup> Mwi entara hia pupohairaro kepukyaqama kyero variqiro viqaro uro kyuqe aanra taiqa kyaani vaisira, mwiamma Kotiva vitairaro nyaamwuni uro variananrove.

<sup>14</sup> Kotiva nraakyje qoraqaa ntaqikyiani quara timwa nyiqi vivata ekyaa mwata mwaqaqaa varihua mwi quara riaivaro qio mwiaqatairo ekyara enta nri ntaananrove, tiro.

### *Anoma kyero qora inraikyavanto qovara hianinranra tura*

*(Maaki 13:14-23; Ruku 21:20-24)*

<sup>15</sup> Ijesusiva mwitaa timwa kyero mwiva tiqaro, Nraakiara nkye taqaivaro uaqia hiari inraikyava vaisi vehi utu kyaari inraikyava qovarama quananrove. Vetato entaqaa poropeti vaisi Ntanieriva mwi inraikyara qora inraikyara turave. Nkye taqaivaro mwi inraikyava Kotira nraamwu turuarani hia qumina vaisivanto vera nteta vari nraamwunraqi uro siviro variananrove. (Mwaa quara kyaara ntirava ntapihi kyera riaante.)

<sup>16</sup> Mwiva mwini uro varirata Iutiaani varihua sivita hiantamwa teta verara taaqiqaa quate.

<sup>17</sup> Mwi entava nri ntairaro nraamwu aatareqani variariva hiantero virera hiro hiama nraamwuqitairo vera ntero mpo inraikyavata varaarive, qatima hiantero quarive.

<sup>18</sup> Mpovanto aakyogi kyaiqa vare variariva hiama hiantero nai vaaqatua vararaitiro, qatima hiantero quarive.

<sup>19</sup> Mwi entara nraaqiara tuaqama quari nraakyevave, nraamwa mwi variari nraakyevave, po, anoma kyero mwihuara hia kyuqe enta vahiananrove.

<sup>20</sup> Hia kyuqema kyero huari itaani entaraqaave, mwaanraqaave, mwi entava nri ntairata nkye hianteta quare tira mwukyaari tukyevarave. Mwianra rieta nkye Kotirara aakyara tivaro huari kyuqema kyero itaaninraqa mwi entava nrinrata nkye qio aatu quate.

<sup>21</sup> Po, nraakiara mwi entava nri ntairata muaanra nronra vareta atura ntqjata varivarave. Nraakyje qoravanto uaqjama vita varivarave. Haaru mwata mwaa ututo entaraqaatairo hia mwitaa hi entavavata qovara hurave. Nraakiaravata hia mwi entara voti hiariva qaiqaavata qovara hiananrove.

<sup>22</sup> Mwi entava mpuahaa enta vahiratavauma, ekyaa nraakyje qora taiqa vivaro hia mpoqavantovata variananrove. Qio Kotiva nai kyaama tai nraakyje qorahuara rieqaroma mwi entara qiquqama kyaananrove.

**23** Mwi entara mpovanto nkyiara Kotiva titava Mesaiaavanto mwainima variho, mwinima variho, tirera, hia mwia qua riaate.

**24** Mwi entara airi vaisivanto qovarama vivaro mpovanto unra tiro tiqaro, Nte Mesaiaave, tiraro mpovanto, Nte Kotira qua qovarama kye varuvave, tiraro mwitaamaqita viqata airi unra ti vaisihua qovarama vivarave. Mwihua qovarama vita unra kyaiqa varaqi viqata Kotiva nai kyaama tai nraakye qorahua mwihua tiri quara quataa quave tiqata uaqia hi aanraqaa quate tita, nronra kyaiqa varaqita vivarave.

**25** Qio nkye hia mwi vaisihua quara quataa quave qiate tina, nte mwaa entara variqana nraakiara qovara hianinranra mate nkyi timwa nyi varuqo. (Nte nraakiara tumu qoqaa variarita ekyaa nraakye qora ni taqevarave.)

**26** Mwi quara riemwaqita vivaro nraakiara mpovanto nkyi timwa nyiqanro nianra mwiva qovarama viro qumina satama variho tirera, hia mwini ni taqarerata quate. Nkyi timwa nyiqanro nianra mwiva nraamwu mwipi uqeta viro variho tirera hia mwia quara quataave qiate.

**27** Aaquakyaa tiharo ekyaa nyaamwuvanto ntuvahama vintema kyenama nte mwatani mwatatai nraaqiarava qoqama tumuaninrave.

**28** Taraqaave qutu quari inraikyava vahianinra mwiaqama memonravanto ntuvantua hivarave, tiro.

*Iesusiva nai qaiqaa mwata mwaini tumuaninranra tura*

(Maaki 13:24-27; Ruku 21:25-28)

**29** Iesusiva mwitaa timwa kyero tiqaro, Nraakiara muaanra nronra vareqata atura nti entava taiqa viraro mwi entaraqaatairo

qamwanrama huari vuvanto entama viraro toravanto hia itairaro qovoravanto tumu nti tumu nti hiraro nyaamwuni kepukya inraikya vahiva ekyama qakyaa qakyaa hiananrove. (Aisaiaa 13:10, 34:4)

**30** Mwi entara nraakye qoravanto nyaamwuqi mpo inraikya qovara hianinra taqe-qatama qio mwia nianra mwiva tuminrenro tera iho tivarave. Mwihua mwitaa timwa kyeta ekyaa mwata maata vahintema varihua kyora mwata hivarave. Mwihua kyora mwata hi variqata taqe varivafe nte mwatani mwatatai nraaqiarava nyaamwusaina tonamwuqi tumi variarita ni taqevarave.

Nte mwunruqama taari inraikyava mpoqama kyero itero ntuvahero ante anta hi variraqena nte kepukyavanto tumi

**31** variqana nyaamwunyaahua sitaarita ntomavanto nronraqama kyero nruqua tirata mwihua uro mwata mpoqitai mpoqitaita Kotiva nai kyaama tai nraakye qorahua ekyaa ntuvantua kyeta sitevarave, tiro.

*Iesusiva fikiqaa vitama kye taqaate tura*

(Maaki 13:28-31; Ruku 21:29-33)

**32** Iesusiva mwitaa timwa kyero tiqaro, Nkye fiki kyatari vitama kye taqe-qatama mpo qua ntapihi kyeta riaate. Kyatari mwiva tamwa riemwa taiqa kyero vahiro mwiaqatairo qaraakya mwunri ntarero utihata nkye mwiaqaa vitama kye taqeta tiqata, Huari nronra itaari entava qaumatoma vaiho, qiarave.

**33** Mwia votima kyeta nraakiara qovara hiani inraikyarara tura, nkye mwia vitama kye taqeta nianra mwiva tumuani entava qaumatoma vaiho tivarave.

**34** Nte quataama tuqo. Mwaa entara varihua hia ekyaa qutu vivaro mwi inraikyara mwi inraikyarara tuva qovara hiananrove.

**35** Nyaamwuvantovata mwatavantovata taiqa viraro ni quavanto nraahuma qati vahiqiro quananrove.

*Hia mpovanto nte tumuani entara ntapihi kyairave tura*

(Maaki 13:32-37; Ruku 17:26-30)

<sup>36</sup> Jesusiva mwitaa timwa kyero tiqaro, Ta iherarave, huarivuvanto taraqaave, vahiraqe nte tumuaninrave? Hia vaisi mpovanto ntapihi kyairave. Hia nyaamwunyaahuvata mwianra ntapihiarave. Ntenavata mwatani mwatatai nraaqiarava variqana hia mwianra ntapihirave. Kotiva ni kova, mwiva nraahu mwi entarara ntapihirave.

<sup>37</sup> Noaava varu entara nraakye qoravanto utuntema kyero nraakiara nte mwatani mwatatai nraaqiarava tumuani entaraqaa vahiananrove.

<sup>38</sup> Mwi entara hia vati nramanrive, humwunravanto ntumwaqu kyo entara nraakye qoravanto kyara nreta, nramanri nreta, nraata vaati vareta, mwitaamaqi vi varuvaro Noaava nramanriqaanaa nraamwuqi viqetero varuvaro

<sup>39</sup> vati humwunravanto nrivi varuvaro mwihua su nyaatovanto ntapihi vuvata tiqata, Qikye, tire taiqa quara entava nri ntaiho, tuvaro nramanrivanto mwihua ntaqutu taiqa kyorave. Nte mwatani mwatatai nraaqiaravama varuqo. Nte uro ntantena tumuani entaraqaavata nraakye qoravanto kuaa qarama kyeta varivarave.

<sup>40</sup> Mwi entara vaisi taaratanavanto aakyoqi kyaiqa vare varivaqena nte kuaiku nraahu vitena mpo mwia kyaaninrave.

<sup>41</sup> Mwi entara nraakye taaratanavanto kyara taiti nti varivaqena nte mpo vitena mpo mwia kyaaninrave.

<sup>42</sup> Nkye nkyi nronravanto tumuani entara hia ntapihiahuara tita, nkye taqe variqata variate.

<sup>43</sup> Qio mwaa quara rieqata variate. Nraamwu qova variqaro mpuara vaisivanto nrianinra ntapihi kyero nai nraamwuqaa ntaqikyi varitiri, hiama mpuara vaisivanto nraamwuqi viqetero mpuara varaitiri.

<sup>44</sup> Mwi quara rieqatama nkyevata terama teta variqi viqatama ni pekya variate. Nte mwatani mwatatai nraaqiaravama varuqo. Nkye nianra hia tumuananrove ti entara, mwi entaraqaama nte tumu ntaaninrave, tiro.

*Kyuqema kyero kyaiqa varai vaisiraqaavata uaqama kyero kyaiqa varai vaisiraqaavata ntumwa kyero timwa nyunra*

(Ruku 12:41-48)

<sup>45</sup> Jesusiva mwitaa timwa kyero tiqaro, Kyaiqa vaisi kyuqeva nai nronra vaisiara rieqaro kyuqema kyero kyaiqa vare variari vaisiva, mwiva nataa hiarivave variananrove? Mwiva kyaiqa vaisi mwataa hiarivama variananrove. Mwia nronra vaisivanto nyianrani virera hiro mwi vaisira nronraqama kyero tiqaro, Ena kyaiqa vaisi hini mwihuaqaavata ntaqikyiqara mwi entara mwi entara kyara tukyama kyera nyiante, timwa kyero

<sup>46</sup> quariva nrohiro uro ntantero nrumu taqairaro mwia kyaiqa vaisivanto mwiva tintema kyero kyaiqa vare varirera, nrumu taqero mwia kyuqema mwatairaro mwiva qamwataaananrove.

<sup>47</sup> Mwiva kyuqema mwatero mwi vaisirara tiqaro, Nte qaiqaa i nronraqama kyaarira e nte vataani inraikyaraqaa ekyaama ntaqikyinanrave, qiananrove, tuqo.

<sup>48</sup> Kyaiqa vaisi mwiva qaqlira kyero hia mwitaa hiraitiro, uaqama kyero kyaiqa vareqaro nai riemwa kyero tiqaro, Qaqao, ni nronravanto qakyoma kyeroma uro ntantero nriananrove, timwa kyero

<sup>49</sup> mwiaqaatairo nai hena kyaiqa vaisi mwihua ntuqutu kyero uro mpoqama kyeta uera nramanri nre variahua kyapata kyaravata nramanrivata nramwaqiro virera,

<sup>50</sup> mpo enta, mwia nronra vaisivanto mwi entaraqaa hiama nriananrove qiani entaraqaa, nrihanrama mwatero mwia nronra vaisivanto uro ntantero nrumu mwia kyaiqa taqero

<sup>51</sup> nai kyaiqa vaisi mwia ntuqutu kyero vatero mwia titero tiqaro, Unraqama kyeqata kyuqe kyaiqa vare vaisihua uaqia hi mwatarava varenani evata quante, tiraro ntateqata vai kutinani mwiva quananrove, tiro. Jesusiva turama.

## 25

### *Mwanraata kyauqurutanaqaa ntumwa kyero tura*

<sup>1</sup> Iesusiva tiqaro, Ekyara entavanto nri ntairaro Kotiva nraakye qoraqaa ntaqikyiariva vahirero mwataamama vahiananrove. Mwanraata kyauqurutavanvanto nkyiari nraata vaati varovau viqata qaraakya nraakye varo vaisira uro entaqi vita vareta mwiavata kyara nranrenrata uti variqata mwihua nkyiari ramuvata vareta mwi vaisira vitarerata vurave.

<sup>2</sup> Mwi mwanraatahuqaqitaita kyauquruvanto hia kyuqe su nyaato vauhua vuvata hini kyauquruvanto kyuqe su nyaato vauhua vurave.

<sup>3</sup> Hia kyuqe su nyaato vauhua kuaiqia kuaiqavanto nkyiari ramu nraahu vareta hia qia ito vahamwenranra vararaitita, qati vurave.

<sup>4</sup> Qati vuvata kyuqe su nyaato vauhua kuaiqia kuaiqavanto nkyiari ramuvata vareta vahamwenra taquvata vareta vurave.

<sup>5</sup> Nraakye varo vaisira huntu kyarerata vuvaro mwi vaisiva hia vaakya nri ntovata mwinramwuhua vuruara huvata vaita vurave.

<sup>6</sup> Mwanraatanramwuvanto vaite varuvaro enta mwutukyaqi mpovanto aakyara ntero tiqaro, Nraakye varaari vaisiva nri variho. Nrivaqenramwu uro mwia huntu kyaare, tuvata

<sup>7</sup> mwanraata kyauqurutanavanto sivita nkyiari ramu kuaiqia kuaiqia terama kye vateta varuvata

<sup>8</sup> hia kyuqe su nyaato vahunramwuhua kyuqe su nyaato vauhuara tiqata, Qikye, tiri ramu ekyaa qipa viho. Nkye vahamwenra mponramwu timwivaqe tetu raru taare, tuvata

<sup>9</sup> mwihua qaqa tita, Nkyivata vahamwenra nyianranro hia qioqa hiankyorave. Nkye hianteta vahamwenra kyoqaa hianasaita uro kyoqaa hiate, tita.

<sup>10</sup> Mwitaa tuvata mwihua vahamwenra kyoqaa hirerata vuvaro nraakye varo vaisiva nri ntorave. Mwiva nri ntovata mwanraata kyauquruvanto vaakya teramato nramwuhua mwia vatama kyeta nraamwuqi vera nteta kyara nre varuvaro qesa titatora.

<sup>11</sup> Qesa tita tovata mwanraata mpo mwinramwuhua nraakiara nri nteta tiqata, Nronrao, nronrao, qesa qatua timwa taante, tuvaro

<sup>12</sup> nraakye varo vaisiva mwiva qaqa tiro, Nte hia nkyi taqauhuave. Hia qesa qatua nyataaninrave, turave, tiro.

<sup>13</sup> Iesusiva mwi quaraqaa ntumwa kyero timwa nyinro tiqaro, Nkye mwi quara rieqatama ekyara entavanto nrianinra nkye hia ntapihiarara tita, nkyevata taqe variqata teramateta variate, tiro.

### *Nai kyaiqa vaisi taaramponramwu munima nyunraqa ntuma kyero tura (Ruku 19:11-27)*

<sup>14</sup> Iesusiva mwitaa timwa kyero mpo quaqaa ntumwa kyero timwa nyinro tiqaro, Ekyara enta nri ntairaro Kotiva nraakye qoraqaa ntaqikyiariva mwaa quara votima kyeroma vahiananrove. Vaisi nronra mpovanto nyianrani virera hiro nai kyaiqa vaisinramwu nyaanrama kyero ni munimaqaave, nte vatau inraikyaraqaave, ntaqikyi mataate timwa kyero vurave.

<sup>15</sup> Virera hiro nai kyaiqa vaisi munima tukyama kye nyunrave. Mwiva nkyiari kyaiqa varora mwivau munima mwia tukyama kyero nyunrave. Mpore 5,000 kinaa mwinro, mpore 2,000 kinaa mwinro, mpore 1,000 kinaa mwunrave. Nyitero nyianrani vurave.

<sup>16</sup> Nyianrani vuvaro 5,000 kinaa varo vaisiva mwiva veva ntero vuva uro mwi munimanraqotairo kyuqema kyero kyaiqa varaqiro viro uro mpo 5,000 kinaavata varorave.

<sup>17</sup> Mwiva mwitaa huvaro 2,000 kinaa varo vaisivavata veva ntero vuva uro mwi munimanraqotairo kuaa qarama kyero kyaiqa vareqaro mpo 2,000 kinaavata varorave.

<sup>18</sup> Mwitaa huvaro 1,000 kinaa varo vaisiva veva ntero hia mwiaqotairo kyaiqa utiraitiro uro mwata quvu kyero mwi munimanra uqeta kyero mwataqi quntamwa tero qumina varurave.

<sup>19</sup> Mwitaa huvaro mwihua nronra vaisivanto mponani uro mpuahaama vari kyero uro ntantero nri ntero munima nyunra mwia ntapihirera hurave.

<sup>20</sup> Ntapihirera huvaro 5,000 kinaa varo vaisiva nri ntero mwi munimanra vatama k yero 5,000 kinaa mpovatama kyero mwinro tiqaro, Nronrao, E nianra 5,000 kinaaqaa ntaqikyi mataante qiaranama nte mwi munimanraqaa ntaqikyiqanama kyaiqa vara kyenama 5,000 mpoqiaavata varauquo, tiro.

<sup>21</sup> Mwitaa tuvaro mwia nronra vaisivanto mwia timwa mwinro tiqaro, E nianra riemwaqira viqarama kyuqema kyera varaaro. E pata inraikyaqaa kyuqema kyera ntaqikyi mataananranra tina, nte i nronraqama kyaarira e nronra inraikyaqaa ntaqikyinanrave. Qio nrinra ni vatama kyera qamwateqara variante, tiro.

<sup>22</sup> Mwitaa tuvaro 2,000 kinaa varo vaisivavata nri ntero tiqaro, E ni 2,000 kinaa mpira mwiaqaa ntaqikyiyante qiarana nte mwiaqaa ntaqikyiqana kyaiqa utu kyena 2,000 kinaa mpovata varauquo, timwa kyero mwi munimanra mwuvaro

<sup>23</sup> mwia nronra vaisivanto tiqaro, E nianra riemwaqira viqarama kyuqema kyera varaaro. E pata inraikyaqaa kyuqema kyera ntaqikyi mataananranra tina, nte i nronraqama kyaarira e nronra inraikyaqaa ntaqikyinanrave. Qio nrinra ni vatama kyera qamwateqara variante, tiro.

<sup>24</sup> Mwitaa tuvaro mwia kyaiqa vaisi 1,000 kinaa varova nri ntero tiqaro, Nronrao, nte ntapihi kyauqara e kyaiqara vuavi raavira ti variara vaisivave. E hia ena vara tutaana kyarara vanti variaravave. E hia kyara humwu isataananraqaataira uro kyara vare variaravave.

<sup>25</sup> Nte mwianrarienama i nraatu aatu hiqanama hia i munimaqo kyaiqa utiraitina, mwata quvu kyena mwipi quvu ntamwa kyena inani uqeta mwataurave. Qio mwaa taqaante. Ena munima mwaa ena varaante, tiro.

<sup>26</sup> Mwitaa tuvaro mwia nronra vaisivanto mwianra tiqaro, E kyaiqa vaisi uaqia hiaravama variaro. Qumina aanra nrohinanranra nraahu rieqara hia kyuqema kyera kyaiqa vare variaravama variaro. Qutaave nte mpohua vara tutaara vantina mpohua isataaraqaatairo qupiqaira vantuquo?

<sup>27</sup> E mpo mwitaa hiqara nanraqamave hia ni munima varaqira uro mpenki nraamwuqi mataaro? E mpenkiqo vatairaqena nte uro ntantena nrianriva mwi munimanra varena mpoqiaavata mwiqitaina varaataarave, tiro.

<sup>28</sup> Mwitaa timwa kyero mporara tiqaro, Mwi vaisiraqtaira 1,000 kinaa mwia vara kyera 10,000 kinaa vatai vaisira mwiante.

<sup>29</sup> Kyuqema kyero airi inraikyaqaa ntaqikyi mate vari vaisira nte mpoqiaavata mwianrinro mwiva mantaquma kyeroma varaananrove. Hia mpo inraikyaqaa ntaqikyi mate variani vaisiraqaataina nte mwiva nanra inraikyaqiae vataaninra ekyaama vara kyaaninrave, tiro.

<sup>30</sup> Mwia nronra vaisivanto mwitaa timwa kyero tiqaro, Qio uaqia hi kyaiqa vaisira mwia vitaqita uro mwaaqani kyaivarao kyokiraqi ntateqaro nkyiari aanrai kutiqata variraqi variarive, turave, tiro. Iesusiva mwi quaraqaa ntumwa kyero timwa nyunra.

### *Ekyara entaqaa nraakyе qora tukya hianinranra tura*

<sup>31</sup> Iesusiva mwitaa timwa kyero tiqaro, Nte mwatani mwatatai nraaqiaravave. Nraakiara nte nronraqama vina vunyaa vaisivanto variqana nyaamwusaina tumuanrita nyaamwunyaahua ni vatama kyeta tumi varivaqe tumu ntena nronra vaisi taintaqa mwatakyaa vina varianinrave.

<sup>32</sup> Variarita ekyaas mwata maata vahintema vari nraakye qorahua ni puqaa ntuvaaantuama vivaqe nte mwihua ntainra kyena taaratanaqaa variate qianinrave. Sipisipi qova nai sipisipivata memenravata ntainra kyero

<sup>33</sup> sipisipi nai kyauqu kyaatutani sita vatero memenra sita nai kyauqu kyaantaaqani vataintema kyena, nte mwatani vari nraakye qorahua taaratanaqaa ntainra kyaaninrave.

<sup>34</sup> Nte mwitaama kyena taaratanaqaa ntainra kyena vatenama nte vunyaa vaisivanto variqana nte ni kyauqu kyaatutani varihuara tiqana, Nriate. Ni kova nkyi kyuqema nyataihua variavo. Haaru mwaa mwatara ututo entaraqaatairo Kotiva nkyiara rieqaro nkyita kyaama tero terama tai mwatuqyaraqi nrira variate. Nkye ni kyuqema mataahuave.

<sup>35</sup> Ni kyara nraataa ihana varuqata nkye ni kyara mpiorave. Ni nramanri nraataa ihana varuqata nkye ni nramanri mpiorave. Nte mpo mwatanaa vaisivanto varuqata nkye nianra qamwateqata nkyeta nraamwuqi ni pitaqita uro kyaarave.

<sup>36</sup> Nte hia tuavaaqa vatauqata nkye ni tuavaaqa mpiorave. Nte nriqa vihana varuqata nkye kyuqema kyeta niqaa ntaqikyiarave. Nte karavuqi varuqata nkye nrumu ni taqaarave, qianinrave.

<sup>37</sup> Nte mwitaa qiarita ntapihi kyeta nrohi vari nraakye qorahua nianra mwitaama tivarave, Nronrao, taire tire i taqaurara kyara nraataa ihara variarata tire i kyara mwunanrave? Taire tire i taqaurara nramanri nraataa ihara variarata tire i nramanri mwunanrave?

<sup>38</sup> Taire tire taqaurara e mpo mwatanaa hiarata tire i vitaqita tetu nraamwuqi kyaunananrave? Taire tire taqauraro i tuavaaqa hia vaihara variarata tire i tuavaaqa mwunanrave?

<sup>39</sup> Taire tire taqaurara i nriqa vihara variananrave? Taire tire i taqarera karavuqi vunanrave? tivarave.

<sup>40</sup> Mwihua mwitaa tivaqe nte vunyaa vaisivanto variqana mwihua nkyiari timwa nyina tiqana, Nte qianinra riaate. Nkye ni kata pakya hia nrutu vahianinra mpo kyaahaqa hiqatama nkye nivatama kyaahaqama mataarave, qianinrave.

<sup>41</sup> Nte mwitaa timwa kyena ntene kyauqu kyaantaaqani varihuara mwitaama qianinrave, Nkye nte varunasaita quate. Kotiva nkyiara uaqiamma quate tiro, tirave. Kotiva Saataaninravata, Saataaninra tovevaana mwihuaravata, rieqaro qia nronra itaira terama kyero vataira nkye mwini quate.

<sup>42</sup> Ni kyara nraataa ihana varuqata nkye hia kyara mpiorave. Ni nramanri nraataa ihana varuqata nkye hia ni nramanri mpiorave.

<sup>43</sup> Nte mpo mwatanaa vaisivanto varuqata nkye hia nianra qamwateqata ni pitaqita nkyeta nraamwuqi kyaarave. Nte hia tuavaaqa vatauqata nkye hia ni tuavaaqa mpiorave. Nte nriqa vihanave, karavuqive, varuqata nkye hia nrumu ni taqaarave, qianinrave.

<sup>44</sup> Nte mwitaa qiarita mwihuavata tivarave, Nronrao, taireve tire taqaurara i nraataa ihara variaro? Taireve i nramanri nraataa ihara variaro? Taireve e mpo mwatanaa vaisivanto variaro? Taireve e tuavaaqa hia vaihara variaro? Taireve i nriqa vihara variaro? Taireve e karavuqi variaro? Taireve e mwitaa mwitaama variarata tire hia i kyaahaqa hunanrave? tivarave.

<sup>45</sup> Mwihua mwitaa tivaqe nte qianinrave, Nte qianinra riaate. Nkye hia nrutu vahianinra mpo hia kyaahaqa hiqatama nkye nivatama hia kyaahaqama mataarave, qianinrave.

<sup>46</sup> Nte mwitaa qiarita mwia kyaara mwihua nkyiari kyoqaa vareta ekyaas enta atura ntqata variqi vivata ntapihi kyeta nrohi vari nraakye qorahua nkyiari kyoqaa vareta ekyaas enta kyuqema kyeta qati variqita vivarave, tiro. Iesusiva turama.

## 26

*Iesusira ru kye quara ntuvantua hita tura  
(Maaki 14:1-2; Ruku 22:1-2; Ioni 11:45-53)*

<sup>1</sup> Jesusiva mwi quara mwi quara timwa nyi taiqa kyero nai nraaqiaranramwuanra tiqaro,

<sup>2</sup> Nkye ntapihi kyaarave. Taara enta nritarairaro haaru nyaamwunyaava qati vekyahu nyatorara rieqata omwata nre entava nrriananrove. Mwi entaraqaa ni ntavaaqavuqita uro kyaivata ni kyatariqaa rukyeta hiritevarave, tiro.

<sup>3</sup> Jesusiva mwi quara nai nraaqiaranramwu timwa nyitero varuvata Kotira kyaiqa vara mwate varuhua mwihua nronranramwuvata, Iutaa nronranramwuvantovata, mwihua Kaiapaasira nraamwuqi uqeta kyeta ntuvantuama vita. Kaiapaasiva Kotira nraamwuqaa ntaqikiyiqaro vunyaa vaisivanto varura

<sup>4</sup> mwia nraamwuqi ntuvantuama vita Iesusira ntavaaqavuqita uro rukyerara uqetakyne qua titi tiqata,

<sup>5</sup> Omwata nraana entaraqaa mwia ntavaaqavu kyaarata nraakye qoravanto inronramaqita ntaqivorave, tura.

*Nraakye mpovanto Iesusiraqaa vahamwenra qu mwatora  
(Maaki 14:3-9; Ioni 12:1-8)*

<sup>6</sup> Jesusiva Mpetaanini Saimoninra nraamwuqi uro varura. Saimoniva tauraa varuvaro tauma rumpuaravanto mwamwanta nre varura.

<sup>7</sup> Jesusiva mwi vaisira nraamwuqi uro varuvaro nraakye mpovanto vera ntero Iesusira kyuqema mwatarero vahamwenra kyuqe mwunta vura nronra munima kyora ori taquqi varero uro Jesusiva taintaqaa kyara nre varuvaro mwia qiataqaa rauru mwatero.

<sup>8</sup> Mwia qiataqaa rauru mwatovata mwia nraaqiaranramwuvanto taqeta nraakye mwia inronra hita tiqata, Nanraqamave mwitaama kyero vahamwenra mwia qumina taiqa kyaiho?

<sup>9</sup> Vahamwenra mwia nyita nronra munima vara kyeta vehi nraakye qora nyiataarave, titi.

<sup>10</sup> Mwihua mwitaa ti varuvaro Jesusiva mwihua qua riero tiqaro, Nkyenramwu nanraqamave nraakye mwia inronra hi variavo? Mwiva mwitaa hiqaroma ni kyuqema mate variho.

<sup>11</sup> Vehi nraakye qora mwihua ekyaa enta nkyivata variqita vivarave. Nte nraahuma hia ekyaa enta nkyivata variqina quaninrave.

<sup>12</sup> Nraakye mwaava vahamwenra qu mateqaroma ni quntamwa terara tera hi variho.

<sup>13</sup> Nte qutaa qianinra riaate. Nraakiara ni qua mwakyaakya nraakye qora timwa nyiqatama mate nraakye mwaava niqaa vahamwenra qu matairara rieqatama mpo mwatanaa mpo mwatanaahua timwa nyivata rievarave, tiro.

*Iutaasiva Iesusira nramwutaa kyauquqi kyero munima varaani aanranra qua timwa kyero taaqau tora*

*(Maaki 14:10-11; Ruku 22:3-6)*

<sup>14</sup> Jesusiva mwitaa tuvaro Iesusira nraaqiara 12 nramwuqitairo mpovanto mwia nrutu Iutaasi Isikeriotiva veva ntero Kotira kyaiqa vara mwate varu vaisihua mwihua nronra vaisinramwu varunani vuva

<sup>15</sup> uro mwihua kyapara hiro tiqaro, Nte Iesusira qovarama kye nkyi kyauquqi nrumu kyaankyera, nkye nanra kyoqaave ni mpivarave? tuvata mwihua ori munima 30 nramwu kyaara ntumwa kyeta mwuvaro Iutaasiva mwi munimanra varero

<sup>16</sup> mwi entaraqaatairo mwihua kyauquqi Iesusira kyaani aanranra puaamaqiro vura.

*Iesusiva nai nraaqiara kyapata vekyahu nyato kyarara nronra  
(Maaki 14:12-21; Ruku 22:7-14; Ioni 13:21-30)*

<sup>17</sup> Hia kyoto mperetira omwata nre iherava nri ntovata vuni nrinto entaraqaa mwia nraaqiaranramwuvanto Iesusiva hunani nri nteta kyapara hita tiqata, Taraqive tire uro terama mwataarara e vekyahu nyato entarara rieqarama mwi kyarara nrenanrave? tita.

<sup>18</sup> Mwihua mwitaa tuvaro Iesusiva tiqaro, Nkye Ierusaremini uro vaisi mpore mwitaama qiate, Mwaanra qua tiri timwa timwi vari vaisiva tiqaro, Mwaa entava ninima qovarama viho. Nte ntene nraaqiara kyapata i nraamwuqi vekyahu nyato kyarara nranrenrave tiho, qiate, tiro.

<sup>19</sup> Iesusiva mwitaa tuvata mwia nraaqiaranramwuvanto Iesusiva tuntema kyeta mwi kyarara terama kyeta vatora.

<sup>20</sup> Terama kyeta vatovaro enta huvaro Iesusiva nai nraaqiaranramwu kyapata uro kyara taintaqaas mwatakyaa variro kyara nre varura.

<sup>21</sup> Kyara nreqaro mwihua timwa nyinro tiqaro, Nte qianinra riaate. Nkyiqitairo mpovanto ni qovarama kyero nramwutaahua kyauquqi kyaananrove, tiro.

<sup>22</sup> Mwitaa tuvata mwia nraaqiaranramwu mwutukya uaquia huvata mwihua kuaiquia kuaiqivavanto Iesusira kyapara hita tiqata, Nronrao, e nianrave qiaro? Hia nte mwivave, hia nte mwivave, timwaqita vita.

<sup>23</sup> Mwitaa timwaqi vuvaro Iesusiva tiqaro, Mpereti vara kyeta tiretana kuaa vakya mwaati tanuqi ntaarava, mwi vaisivama ni qovarama kyaananrove.

<sup>24</sup> Ni mwatani mwatatai nraaqiarara mwitaama kye rukye quara haaru qara ntumwa torave. Qio mwi quava mwivauma vahiananrove. Ni mwatani mwatatai nraaqiarara qovarama kyaani vaisirara po timwa mwatauqo. Mwia nrova hia mwia mwata kyaataara mwia mwata torave, tiro.

<sup>25</sup> Iesusiva mwitaa tuvaro Iutaasiva mwia qoqama kyaariva Iesusira kyapara hiro tiqaro, Mwaanra ti variarao, e nianrave qiaro? tuvaro Iesusiva tiqaro, Eo, nte iarama tuqo, tiro.

*Mperetiaravata uainianravata timwa tora  
(Maaki 14:22-26; Ruku 22:15-20; 1 Korinti 11:23-25)*

<sup>26</sup> Iesusira nraaqiaranramwu kyara nre varuvaro Iesusiva mpereti vara kyero Kotirara kyuqeve timwa kyero nteqa kyero nai nraaqiaranramwu nyinro tiqaro, Mwaa vara kye nraate. Mwaa ni mamantama iho, tiro.

<sup>27</sup> Mwitaa timwa kyero mwiva uaini kaapu vara kyero Kotirara kyuqeve timwa kyero mwinramwuhua viti nyinro tiqaro, Nkye ekyaa mwihua mwaa nraate.

<sup>28</sup> Mwaa ni nraanrema iho. Kotiva nraakye qoravata qaraakya qua vataari quava mwi quava kepukyaqama quarive tiro, ni nraanrevanto mwia kepukyaqama kyaananrove. Ni ru kyaivaro ni nraanrevanto rauruariva airi nraakye qora kyaahaqa hiqaro mwihua uaquia hiani quara nruka nyataananrove.

<sup>29</sup> Nte qianinra riaate. Mwaa entaraqataina nte hia uaini nranraitina qati variqi quarita, nkye ni kova ntaqikyianinraqi nivata uro varivaqe nte mwi entaraqaa nkyi kyapata qaraakya uaini nraaninrave, tiro.

<sup>30</sup> Iesusiva mwitaa timwa kyero nai nraaqiaranramwu kyapata Kotirara ihi timwa kyero veva ntero Oripi taaqiqaara vurama.

*Pitaava nte hia Iesusira taqaurave qianinranra Iesusiva tura  
(Maaki 14:27-31; Ruku 22:31-34; Ioni 13:36-38)*

<sup>31</sup> Mwihua mwini vuvaro Iesusiva mwihua timwa nyinro tiqaro, Nkye mate entaqi ni kyetama aatu ntuqeqla hita vivarave. Kotira mpukuqi qara ntumwa to quava mate mwivauma vahiananrove. Mwataama tiro: Sipisipiqa ntaqikyiani vaisira Kotiva

rukylairata sipisipi mwihua aatu ntugeqaa hita nkyiariara nkyiariara api mpona mpona vivarave, turave. *(Sekaraiaa 13:7)*

<sup>32</sup> Qio nraakiara ni vara qati sivuma kyairaqe variqana nkyi vuni nte nraante Karirini quaninrave, tiro.

<sup>33</sup> Iesusiva mwitaa tuvaro Pitaava qaqaao tiro, Ekyaa mwaahua i kyeta aatu vivaqe nte nraahu ivatama kyena varianinrave, tiro.

<sup>34</sup> Pitaava mwitaa tuvaro Iesusiva tiqaro, Nte qianinra riaante. Mate entaqi kokoraaravanto hia nruqua tirara e taarampo nani nianra tiqara, Hia nte mwi vaisira taqaurave tinanrave, tiro.

<sup>35</sup> Iesusiva mwitaa tuvaro Pitaava qaqaao tiro, Nte hia iara hia hia mwia taqaurave qianinrave. Ivatama kye ni ru kyaivaqenavata hia nte mwitaa qianinrave, tiro.

Pitaava mwitaa tuvata Iesusira nraaqiara hini mwinramwuhuavata mwi quara nraahu tura.

*Iesusiva Kotirara uro aakyara ntora*

*(Maaki 14:32-42; Ruku 22:39-46)*

<sup>36</sup> Mwiaqaatairo Iesusiva nai nraaqiaranramwuvatama kyero kyaqamwa ututoraqi mwia nrutu Kesemani mwipi uro ntero nai nraaqiaranramwuanra tiqaro, Nkye mwaini mwatakyaa vi varivaqe nte uro vururaqaa Kotirara aakyara ntaankye, tiro.

<sup>37</sup> Timwa kyero Pitaaravata, Sepetira mwaaqutanavata nraahu sita varero mwini vuvaro mwia hia kyakya huvaro mwia mwutukyavanto uaquia huvaro

<sup>38</sup> mwiva taarampo mwinramwuhuara tiqaro, Ni mutukyavanto mpoqama kyero ua iharo ni ru kyaqaqara ihana varuqo. Nkyenramwu mwaaqaa nivatama kye variqata vu ntapairi kyeta taqeqatama variate, tiro.

<sup>39</sup> Mwitaa timwa kyero Iesusiva hia mpuahaqaqama viro uro virianasairo tumu ntiro Kotirara aakyara ntero tiqaro, Ko, e qiove tirera nte nriqa vi inraikyara nramanri votima kye nraaninra e qatinani vara kyaante. Qio hia ni kyakya hira vataqira quante. Ena kyakya hira vataqira quante, tiro.

<sup>40</sup> Iesusiva mwitaa timwa kyero nruru ntantero nai nraaqiara taaramponramwu kyonani tumu taqovata mwinramwuhua vuruara huvata vaite varuvaro mwiva Pitaarara tiqaro, Nanraqamave nkye nivatama kyeta pataqiaqa variqata hia vu ntapairi kyeta viti viri taqeqata variavo?

<sup>41</sup> Saataaniva nkyi mwataara hiankyo titi nkye taqe variqata Kotirara aakyara nteqata variate. Nkyi mwanraquravanto mwitaa hiataa iharo nkyi mwamwantavanto nraahu hia qio kepukyaqi ihata variavo, tiro.

<sup>42</sup> Iesusiva mwitaa timwa kyero qaiqaa uro Kotirara aakyara ntero tiqaro, Ko, nte mwaa nramanrinra nraaninra hia e qatinani vara kyaraitira qati nraante tirera, nte i kyakya hira vataqina virerave, tiro.

<sup>43</sup> Mwitaa timwa kyero qaiqaa uro ntantero tumu taqovata mwia nraaqiara taaramponramwu vuruara huvata vaite varura.

<sup>44</sup> Vaite varuvaro Iesusiva qaiqaa mwinramwuhua kyero vuva uro Kotirara taarampo nani aakyara nteqaro vaakya tuntema kyero nraahu qaiqaavata tura.

<sup>45</sup> Kotirara aakyara ntamwa kyero Iesusiva uro ntantero tumu taarampo mwinramwuhuara tiqaro, Qikye, nkyenramwu qati nraahuve ho hiqata vaite variavo? Qio taqaate. Ni mwatani mwataatai nraaqiarara ntavaaqavuqita uro uaquia hi kyaiqara uti varihua kyauquqi tutu kye iheravama nri ntaiho.

<sup>46</sup> Sivivaqenramwu quare. Ni qovarama kyero nramwutaa kyauquqi kyaari vaisivama mwaa nri variho, tiro.

*Iutaasiva Iesusira qovarama kyovata mwia ntavaaqavu kyora*

*(Maaki 14:43-50; Ruku 22:47-53; Ioni 18:3-12)*

<sup>47</sup> Iesusiva mwi quara ti varuvaro mwia nraaqiara 12 nramwuqitairo Iutaasiva uro ntero. Iutaasiva uro ntovata mwia vatama kyeta airi vaisivanto paipavata kyanta kyaamwuvata tu vareta uro ntoro. Kotira nraamwuqi Kotira kyaiqa vara mwate varu vaisihua mwihua vunyaaahuavata, Iutaa nronra vaisinramwuvata, mwihua mwi vaisihua sitovata mwihua Iutaasira vatama kyeta nrunra.

<sup>48</sup> Iutaasiva Iesusira qovarama kyaaninranra vaakya mwihua timwa nyinro tiqaro, Nte uro mwia qua mwanteqana mwia mota kyaani vaisira mwia mwivave. Nkye mwia uro ntavaaqavu kyaate, tiro.

<sup>49</sup> Iutaasiva mwitaa timwa kyero mwiva mwihua kyapata uro ntero mwiva qamwanrama kyero Iesusira nraaqani uro ntero tiqaro, Mwaanra ti variarao, varirave, timwa kyero mwia mota kyero.

<sup>50</sup> Iutaasiva mwia mota kyovaro Iesusiva tiqaro, Ni vaisio, mpo inraikyara nrinanra qamwanrama kyera utuante, tuvata Iutaasira vatama kyeta nruhua uro Iesusira ntavaaqavu kyeta tuqara tutovaro

<sup>51</sup> mwiaqaatairo Iesusira nraaqiara mpovanto paipa nai tuaqitairo veva ntanrau kyero mwiaqotairo vaisi mpo nraato teqa kyora. Kotira nraamwuqi kyaiqa vare varu vaisihua mwihua vunyaa vaisi mwia kyaiqa vaisi nraato teqa kyora.

<sup>52</sup> Teqa kyovaro Iesusiva qao tiro, Ena paipa veva nai tuaqi ntumwa taante. Paipaqtaita ntaquahua nkyiarivata paipaqtaita ru kyaarave.

<sup>53</sup> E hia ntapihiananrave iho? Ni kyaahaqa ihua ni kora kyapara hiariro mwiva qamwanrama kyero nyaamwusairo nyaamwunyaahua ntaqihua mwaanra 12 nramwu sitairata qioma tumivarave.

<sup>54</sup> Nte mwitaa qiarita mwihua tumivera, nataama kyero haaru qara ntumwa to quava quataa mwivau vahiananrove? tiro.

<sup>55</sup> Iesusiva mwitaa timwa kyero mwiaqaatairo Iutaasira vatama kyeta nru vaisihuara tiqaro, Qikye, nkye kamaninra vatama kyero ntaqirero uti vari vaisira votima kyeta ni ntavaaqavirerata paipavata kyaamwuvata vare nriavo? Nte mpo enta mpo enta Kotira nraamwuqi variqana nraakye qora qua mwakyaakya timwa nyi varuqata nkye hia mwi entara ni ntavaaqavuarave.

<sup>56</sup> Haaru poropeti vaisinramwuvanto mwaa inraikyava qovara hianinranra qara ntumwa to quava quataa mwivau vahiarive tiro, mate mwaa inraikyava qovarama viho, tiro.

Iesusiva mwitaa tuvata mwia nraaqiaranramwuvanto mwia qaqlira kyeta aatu ntuqeqla hita vurama.

### *Iutaa vaisi nronranramwu suqaa Iesusira uro kyora*

*(Maaki 14:53-65; Ruku 22:54-55, 63-71; Ioni 18:13-14, 19-24)*

<sup>57</sup> Iesusira ntavaaqavu kyeta tutohua mwia vitaqita uro Kotira nraamwuqi kyaiqa vare varuhua mwihua vunyaa vaisivanto varuraqi Kaiapaasira nraamwuqi kyovata nraamwu mwiqi mwaanra okyara ti varu vaisihuavata, Iutaa vaisi nronranramwuvata, vaakya ntuvaantuama vita varura.

<sup>58</sup> Iesusira vitaqita uro kyeta varuvaro Pitaava nyianrasata viqaro mwihua sataqiro vuva uro Kaiapaasira nraamwu vahuvaro mwatukyaqaa uro ntero tutukyaqaa mwaati ntero utaqi viro mwi inraikyava qovara hianinra taqarerero nraamwu mwiaqaa ntaqikyi varu vaisihua vatama kyero varura.

<sup>59</sup> Pitaava mwaatani varuvata nraamwuqi Kotira nraamwuqaa ntaqikyi varuhuvata, ekyaa mwiqi ntuvaantuama vita varuhuvata, Iesusira rukyarerata Iesusiraqaa unra qua vatarerata mpo quara puaa huvaro

<sup>60</sup> hia vahuvata airi vaisivanto Iesusirara unra qua ntumwa kye tura. Api qua nraahu timwaqita vuvata vaisi taaratanavanto sivita

**61** Jesusirara tiqata, Mwaa vaisiva mwitaa tihata tiretana riaunanrave. Mwiva tiqaro, Nte qiomia Kotira nraamwu nronra ntapairi kyena taarampo enta variqana qaiqaa hoqa taiqa kyaaninrave tirave, tita.

**62** Mwitanahua mwitaa tuvaro Kotira kyaiqa vara mwate varuhua mwihua vunyaa vaisivanto siviro Jesusirara tiqaro, Mwitanahua mwitaa tiqata iqaa qua vate variavo. E mpo nkyiaritananra nanra quave tinanrave? tuvaro

**63** Jesusiva hia qua tiraitiro, tirema varuvaro qaiqaa vunyaa vaisivanto Jesusirara tiqaro, Nte Kotira vuqaa variqana mwia nrutu nteqanama iara qutaa qua qiantema tuqo. Qutaave Kotiva i titaihara e tiri kyaahaqa hirera Mesaiaavanto variaro? Qutaave e Kotira mwaaquvanto variaro? Tiri timwa timwinraqe riaare, tiro.

**64** Mwiva mwitaa tuvaro Jesusiva tiqaro, E qiananra nte mwaa mwivave. Nte qianinra nkye riaate. Nkye nraakiara taqe varivaqe nte mwatani mwatatai nraaqiava nronraqama vina Kotiva kepukyavanto varianinra mwia kyauqu kyaatutani mwatakyaa vina varina tonamwuqi tumuaninrave, tiro.

**65** Jesusiva mwitaa tuvaro vunyaa vaisi mwiva nai tuavaaqa nrabitu kyero tiqaro, Qikye, mwiva Kotirara uaqia hi quara tiho. Vaisi mpovanto mwiaqaa qua vataaninra qumina nraanrevorave. Taqaate. Nkye rie variavaroma mwiva Kotirara uaqia hi quara tiho.

**66** Mwia kyaara nkye Jesusirara nanra quave tivarave? Tivaqe riaankye, tiro. Mwitaa tuvata mwihua tiqata, Mwia uaqia hi kyaiqava nritaraiho.

Mwia kyaara mwia ru kyaarava nraahuma vaiho, tita.

**67** Mwihua mwitaa timwa kyeta uro Jesusira viriqi taara vihi kyeta kyauquqo mwia ntuqutu kyeta mwia vu nraato ntumwa kyeta vateta

**68** vireraqama kyeta tiqata, Mesaiaao, e qutaa qua qovarama kyera vaisiva varirera, hia taqaraitira i ntuqutuani vaisira nrutu ntaante, tita.

### *Pitaava Jesusira hia taqaurave tura*

*(Maaki 14:66-72; Ruku 22:56-62; Ioni 18:15-18, 25-27)*

**69** Nraamwuqi mwitaamaqita vi varuvaro Pitaava mwaatani mwatuqyaqa mwatakyaa viro varuvaro kyaiqa nraakye mpovanto Pitaara nraaqani uro ntero mwianra tiqaro, Evata Jesusira Karirinya vaasi mwikyantiri variaravave, tiro.

**70** Mwiva mwitaa tuvaro Pitaava mwihua suqaa variqaro qaqao tiro, E qiana quara nte hia ntaphurave, tiro.

**71** Mwiva mwitaa timwa kyero uro nrainhana varuvaro kyaiqa nraakye mpovanto mwia taqero mwini sivita varuhuara tiqaro, Vaisi mwaava Jesusira Nasaretinyaanra vatama kyero varivave, tiro.

**72** Mwitaa tuvaro Pitaava kyauqu nriqiqaa vatero tiqaro, Hia nte mwi vaisira taqaurave, tiro.

**73** Mwitaa timwa kyero pataqia varuvata mwini sivita varu vaisihua Pitaava hunani uro nteta mwianra tiqata, Jesusira nraaqiaranramwu mwi mwatanaahua variavara qutaaqama kyera evata kuua mwatanaa mwivama variaro. Mwihua mpo qarama kyeqata mwaa quara ti variantema kyerama evata mwaa quara ti variaro. Qio e mwaa mwivave, tita.

**74** Mwihua mwitaa tuvaro Pitaava kyauqu nriqiqaa vatero tiqaro, Nte hia qutaa qua qiankyera, Kotiva qiomia ni ruananrove. Nte qutaama tuqo. Nkye ti varia vaisira hia nte taqaurave, tiro.

Pitaava mwitaa timwa kyovaro qamwanrama kyero kokoraaravanto nruqua tuvaro

**75** Jesusiva Pitaara timwa mwu quava Pitaara nraatoqi ntumwa viro. Jesusiva Pitaarara tiqaro, Kokoraaravanto hia nruqua tirara e taarampo nani nianra hia mwia taqaurave tinanrave, tura. Pitaava mwi quara riero mwiva mwaaqani mwaati ntero vuvaro mwia mwutukyavanto uaqia huvaro nronraqama kyero ntatora.

## 27

*Iesusira Paireativa hunani vitaqita uro kyora  
(Maaki 15:1; Ruku 23:1-2; Ioni 18:28-32)*

<sup>1</sup> Mwia qanranraa toqa entaqi Kotira kyaiqa vara mwate varuhua mwihua nronra vaisinramwuvantovata, Iutaa nronra vaisinramwuvantovata, qua timwa kyeta Iesusira ru kyaananrave timwa kyeta

<sup>2</sup> mwiaqqaataita mwihua Iesusira seniqotaita rupa kye vitaqita uro Paireativa huraqi kyora. Paireativa Romeni kirapava varura.

*Iutaasiva qutu vura  
(Kyaiqa Varora 1:18-19)*

<sup>3</sup> Iutaasiva Iesusira qovarama kyo vaisiva taqovata mwihua ko timwa kyeta Jesusir-aqaa qua vatetama mwia ru kyarerata uti varuvaro mwiva po hia nte mwitaa hiataara vaihana mwitaa hurave timwa kyero 30 munima mwunra varero uro ntantero Kotira kyaiqa vara mwate varu vaisihua mwihua nronranramwuvata, Iutaa vaisi nronranramwuvata, mwihua varuraqi uro ntero tiqaro,

<sup>4</sup> Nte qumina vaisi hia uaqia hi kyaiqara uti vaisirama uro nkyi kyauquqi tuta kyauqatama nkye mwia ru kyarerata uti variavo. Nte qora inraikya utu kyauqo, tiro. Timwa kyero munima mwia mwihua nyinrenro tuvata mwihua qaqao tita, Tire nataave hiananrave? Hia tiri kyaiqave. Mwi inraikyava ina kyaiqama vaiho, tita.

<sup>5</sup> Mwihua mwitaa tuvaro Iutaasiva munima mwia varaqiro uro Kotira nraamwu mpoqi hia qumina vaisivantovata vera nte varuraqi tuto kyero vuva uro vaanta hiri vura.

<sup>6</sup> Iutaasiva munima mwia tuto kyero vuvata Kotira nraamwuqaa ntaqikyu vaisihua mwi munimanra utu kye vateta tiqata, Mwaa munimanra qutaru munimave. Tire mwaa munimanra Kotira nraamwuqi vataana munimanra vatama kyeta kuaaqi vataarorave. Mwitaa hiqata tire mwaanra qua nteqa kyaarorave.

<sup>7</sup> Tave utiqata aatapai mwata vare varia mwatava qatima vaiho. Nrivaqe mwaa munimanraqo mwi mwatara kyoqaama kyaare. Tire mwi mwatara kyoqaama kyeta vataararo mpo mwatanaavanto mwaini qutu vivaqe tire mwihua mwi mwataraqaa quntamwa taare, tita.

Mwitaa timwa kyeta munima mwiaqotai

<sup>8</sup> mwi mwatara kyoqaama kyorara tita, mate mwaa entara nraakye qoravanto mwi mwatarara Qutaru Mwatave ti variara.

<sup>9</sup> Kotira nraamwuqaa ntaqikyi varuhua mwitaama kyeta mwi mwatara kyoqaa hurara tiro, haaru vetato entaqaa Ieremaiaava poropeti vaisivanto qara ntumwa to quava qutaa mwivau vhura. Ieremaiaava mwitaama tiro:

Isareri vaisi mponramwuvanto qua timwa kyeta vateta 30 munima, mwianra qutaru munima vahiananrove ti vari munimanra,

<sup>10</sup> mwi munimanra varaqita uro kyetama tave uti mwatara kyoqaa hivarave. Nron-ravanto ni qua timwa mpintema kyetama mwihua mwi mwatara varevarave, tura. (Sekaraiaa 10:11-12)

*Paireativa Iesusira ntumwahiamwama mwatora  
(Maaki 15:2-5; Ruku 23:3-5; Ioni 18:33-38)*

<sup>11</sup> Mwihua Iesusira vitaqita uro kirapava Paireativa varuraqi kyovaro Iesusiva mwia vuqaa siviro varuvaro Paireativa mwia ntumwahiamwa hiro tiqaro, Qutaave e Iutaa vunyaa vaisivanto variaro? tuvaro Iesusiva tiqaro, E qiananra nte mwaa mwivave, tiro.

<sup>12</sup> Iesusiva mwitaa tuvata Kotira kyaiqa vara mwate varu vaisihua mwihua nronra vaisinramwuvata, Iutaa vaisi nronranramwuvata, mwihua mpo qua mpo qua kyaara Iesusira inronra hi varuvaro mwiva hia mwihua qua hiniqa hiraitiro, tirema varura.

<sup>13</sup> Tirema varuvaro Paireativa qaiqaa Jesusira kyapara hiro tiqaro, Mwihua airi qua iqaa vateta mwia kyaara i inronra hi variavara e hiave mwihua ti varia quara riaaro? tuvaro

<sup>14</sup> Jesusiva hia qua mpovata mwihuara tiraitiro, tirema kyero varuvaro mwiaqaatairo nronra vaisi Paireativa mwianra airi nraato ti varura.

*Iesusira kyatariqaa rutaate tura*

(*Maaki 15:6-15; Ruku 23:13-25; Ioni 18:39-19:16*)

<sup>15</sup> Mpo ihi mpo ihi vekyahu nyato kyarara nro entaraqaa kirapava vunyaa vaisivanto nraakye qora qamwata nyatarero karavu vaisi mpo huvantu kyero titovaro mwaatani vura. Nraakye qoravanto ta vaisirave huvantu kyaante tura mwi vaisira huvantu kye varura.

<sup>16</sup> Mwi entara karavu vaisi mpo mwia nrutu Varavaasiva qora vaisivanto varuvatara tita, airi nraakye qoravanto mwi vaisira nrutu ntapihi kyora. Karavu vaisi mpo huvantu kyeta tite varu okyarava mwitaama vahuvata

<sup>17</sup> mwi entaraqaa nraakye qoravanto mwianra rieqata ntuaantua hita varuvaro Paireativa mwihua kyapara hiro tiqaro, Ta karavu vaisirave huvantu kyaariro quananrove? Nte Varavaasirave huvantu kyaaninrave? Jesusira mwianra tiqata Mesaiaavantove ti variara, nte mwiave huvantu kyaaninrave? tiro.

<sup>18</sup> Paireativa ntapihi kyovata nronra vaisinramwuvanto Jesusiva nronraqama quankyorave tita mwianra raraqa tovata mwihua mwia vitaqita uro mwia kyauquqi kyora.

<sup>19</sup> Paireativa ko nraamwuqi mwatakyaa viro varuvaro mwia nraatavanto qua vara kyero tiqaro, Po, mwi vaisiva hia mpo inraikya utu kyairaqaa qumina qua vaterorave. Mwia qati titairaro quarive. Nte entaqi mwiaqaa ruvaata taqauqaro ni uaqia ihana varuqo, tiro.

<sup>20</sup> Mwia nraatavanto mwitaa tuvata mwia qua riaankyorave timwa kyeta Kotira kyaiqa vare varu vaisihua mwihua nronra vaisinramwuvata, Iutaa mwihua nronra vaisinramwuvata, kepukyaqama kyeta qua nraakye qora timwa nyita tiqata, Varavaasira huvantu kyera timwinra Jesusira rukyaante qiate, tita.

<sup>21</sup> Mwitaama kyeta rapateqata tuvaro Paireativa kyapara hiro tiqaro, Mwi vaisitanahuqaqitaina ta vaisirave huvantu kyaaninrave? tiro. Mwitaa tuvata mwihua tiqata, Varavaasirave, tita.

<sup>22</sup> Mwihua mwitaa tuvaro Paireativa qaqao, tiro, Jesusira mwianra Mesaiaavantove qiarave. Mwia mpo nte nataave hianinrave? tiro. Mwitaa tuvata ekyaa mwihua tiqata, Mwia kyairata kyatariqaa rutaate, tita.

<sup>23</sup> Mwihua mwitaa tuvaro Paireativa mwihua kyapara hiro tiqaro, Nanra kyaarave nte mwia kyaarita kyatariqaa rutevarave? Nanra uaqia hi inraikyarave utu kyaiho? tiro. Mwitaa tuvata mwihua nronraqama kyeta aakyara nteta tiqata, Mwia kyairata kyatariqaa rutaate, tita.

<sup>24</sup> Nraakye qoravanto mwitaa ti varuvaro Paireativa taqovaro mwia quavanto hia qio vahuvaro mwiva tiqaro, Nraakye qora utaqatairo mpo inraikyavanto siquankyorave, timwa kyero nramanri tanuqi rauru kyero nraakye qora suqaa variqaro nai kyauqu hiqama kyero tiqaro, Qio taqaate. Mwia qutaru quavanto hiama niqaa vaiho. Mwi quava nkyitaqama vaiho, tiro.

<sup>25</sup> Mwitaa tuvata ekyaa nraakye qoravanto tiqata, Mwia qiove, mwi quava titaqi vahiqaro tire mwatataarahuaqaavatama vahiananrove, tita.

<sup>26</sup> Mwihua mwitaa tuvaro Paireativa mwihuara rieqaro Varavaasira huvantu kyero nai ntaqu vaisihua Jesusira kyaantaqo ntuqutuate tuvata mwia ntuqutu kyeta vato-varo mwiaqaatairo mwia kyatariqaa rutaate tiro, Paireativa mwia nai ntaqu vaisihua kyauquqi tuta kyora.

*Ntaqu vaisihua Iesusira vireraqama mwateta mwia ntuqtura  
(Maaki 15:16-20; Ioni 19:2-3)*

<sup>27</sup> Paireativa nai ntaqu vaisihua kyauquqi tuta kyovata mwihua mwia vitaqita uro kirapara nraamwuqi kyeta mwihua nkyiari hena ntaqu vaisihuavata ekyaa ntuvantuama kyeta Iesusira vara utaqi vateta mwia vara ututu variqata

<sup>28</sup> mwia tuavaaqa qatinani vara kyeta mwia vireraqa hiqata vunyaa vaisi tuavaaqa utu mwatarera nraanre tuavaaqa utu mwatora.

<sup>29</sup> Mwiaqaataita mwihua tauvera vara kyeta qiata vaisi tovaqa voti hora ququrama kyeta Iesusira qiataqaa qu mwateta mwia kyauqu kyaatutani kyaamwu tu mwateta. Mwihua mwitaa mwitaama kyeta mwia vireraarora hirerata Iesusira vuqaa tori kyauru ravita tiqata, Iutaa nraakye qora vunyaa vaisio, varirave? timwa kyeta

<sup>30</sup> mwiaqaa taara vihi kyeta vateta kyaamwu mwia kyauquqi tu mwatora mwia vara kyeta mwiaqotaita mwia qiataqa ntuqtura.

<sup>31</sup> Mwitaamaqita vita vireraarora hita raima mwateta taiqa kyeta mwihua tuavaaqa utu mwatora vara kyeta nai tuavaaqa utu mwateta mwia kyatariqaa ru tarerata viteta vura.

*Iesusira kyatariqaa ru kyeta hiritora  
(Maaki 15:21-32; Ruku 23:26-43; Ioni 19:17-27)*

<sup>32</sup> Ntaqu vaisihua Iesusira kyatariqaa rukyeta hiritarerata mwatukyaqitaita mwaqaqianra aanraqaa viqata vaisi mpovanto Sairininyaanra mwia nrutu Saimon-inra qintorama kyeta mwianra kepuqyaqama kyeta tiqata, E Iesusira rute kyatarira vara quqira uro mwianta, tura.

<sup>33</sup> Timwa kyeta Iesusira vitaqita uro quminasata Korokotaave tunani kyora. Korokotaa mwaa quaraqitai tirera Qiata Mwukyaarisatave tunani Iesusira uro kyeta

<sup>34</sup> uaini mwipi ukavu inraikyaravatama kyeta tuqasaa tora mwuvaro Iesusiva pataqia nreqaro taqero qaqlira kyero hia nronra.

<sup>35</sup> Iesusiva hia nrovata mwihua mwia kyatariqaa ninriqotaita ruteta mwia tuavaaqa vara kyeta kaati ruantema kyeta ori tuto kyeqata mwia tuavaaqa ntainra kyeta vareta

<sup>36</sup> mwiaqaataita mwihua mwatakyaa vita variqata mwia taqe varura.

<sup>37</sup> Mwia qiatani qua mpo ko timwa mwato quara qara ntumwa kyeta kyatariqaa rutovaro mwi quava mwitaama tiro:

MWAA IESUSIVA IUTAA VUNYAA VAISIVE, tiro.

Mwi qarava mwitaama kyero vahura.

<sup>38</sup> Mwihua Iesusira vatama kyeta vaisi mpotana ru tora. Mwitanahua nkyiari hena vaisi ru kyeqata mpuara vare varu vaisitanahua varuvata mpo Iesusira kyauqu kyaatutani ruteta mpo mwia kyauqu kyaantaaqani rutora.

<sup>39</sup> Mwitaama kyeta rutovata nraakye qora vitare nritare hiqata nru ntumwa kyeta mwaunru miqi mwateta Iesusirara uaqia hi quara timwa mwateta tiqata,

<sup>40</sup> Qikye, e tiqarama, Kotira nraamwu ntapairi kyenama taarampo enta varina kyaiqa varaqi viqanama qaiqaa hoqa taiqa kyaaninrave qiananrave? Qio, e Kotira mwaqaqavento varirera, ena kyaahaqa hiante. Enavanto kyatariqataira mpiami ntaante, tita.

<sup>41</sup> Mwihua mwitaa ti varuvata kuaa qarama kyeta Kotira kyaiqa vara mwate varuhua mwihua nronra vaisinramwuvata, mwaanra okyara ti varu vaisihuavata, mwianra raima mwateta tiqata,

<sup>42</sup> Mwiva mpohua nraahu kyaahaqa hi variva hiave qio nai kyaahaqa hiananrove? Mwi vaisiva Isareru vunyaa vaisivanto variho. Kyai tire variqata taqaararo mwiva nai kyatariqatairo mpiami ntero tuminraqeta tire mwianra qutaave qiare.

<sup>43</sup> Mwiva nanrianra tiqaro, Nte Kotirara kepukyaqama kyena riemwaqina vuvave. Nte Kotira mwaakuve tirave. Qio kyai variqata taqaararo Kotira kyakya hiraro mwia kyaahaqa hianinra taqaare, tita.

<sup>44</sup> Mwihua mwitaa tuvata mpuara vaisitana mwia tataaqa ru tohuavata mwihua tuntema kye kuaa qua mwia nraahu timwa mwatora.

### *Iesusiva qutu vura*

(*Maaki 15:33-41; Ruku 23:44-49; Ioni 19:28-30*)

<sup>45</sup> Mwitaa huvaro huarivanto nrinro virira qiataqaa vahuvardo ekyaa mwi mwata maatara entama vuvaro qaiqaa huari vitira tavaarana tuminro vahuvardo enta huva vivura.

<sup>46</sup> Huarivanto tuminro vitito vahuvardo Iesusiva nai quaqitairo aakyara ntero tiqaro, *Eri, eri rama sapakitani. Kotio, Kotio, nanraqamave ni qaqlira kyera hiaro?* tiro.

<sup>47</sup> Iesusiva mwitaa tuvata mpo uhua mwini sivita varuhua mwia qua rieta tiqata, Mwiva Iraisaara tiri haivaqarama nraanre variho, tuvaro

<sup>48</sup> mpovanto hiantero nramanri kyaqo inraikyara tavuna nrihi voti hora vara kyero uaini uka vuraqi mwaati ntamwa kyero herika mpontaqiaqa huairi kyero mwia nraanrive tiro mwia nroqi viri ntamwa tora.

<sup>49</sup> Mwitaa huvata mpo uhua tiqata, Kyaiqe variqata taqaararo Iraisaava mwia kyaahaqa hirero tumuaninra taqaare, tita.

<sup>50</sup> Mwihua mwitaa tuvaro Iesusiva qaiqaa paa tiro aakyara ntamwa kyero qutu vura.

<sup>51</sup> Iesusiva qutu vuvaro Ierusaremini Kotira nraamwuqi tauha votima kyeta tavuna nronra hiritova virisairo utaqaa nrabituqiro mpiani tumunra. Mwitaa huvaro mwatura tuvaro ori nronra airivanto ntuvuraavurama vuvaro

<sup>52</sup> vaisi haaru quntamwa to mwatava qatua vuvata mwiqinaahua Kotira nraakye qoravanto qutu vuhua airivanto sivita varuhua

<sup>53</sup> Iesusira qaiqaa qati vara sivuma kyo entaraqataita mwihua Ierusaremini qovarama vuvata airi nraakye qoravanto mwihua taqora.

<sup>54</sup> Ntaqu vaisihua vunyaa vaisivantovata, mwiavata nrumu ntaqu vaisihua mponramwuvata, varuvaro Iesusira kyatariqaa hiritovaro varuvata mwihua Iesusiraqaa ntaqikyi variqata mwatura turave, mpo inraikya mpo inraikya qovarahura taqeta, mwiaqataita mwihua nronraqama kyeta aatu hita tiqata, Qikye, qutaa mwaava Kotira mwaquivanto varivama qutu viho, tura.

<sup>55</sup> Iesusiva qutu vuvata nraakye mponramwuvanto nyianrasatatai variqata vutu taqe varura. Mwi nraakyehua Karirisaita Iesusira vataqi viqata mwia kyaiqa vara mwate varuhua varura.

<sup>56</sup> Mwihuaqitai mponramwu nyutu vahirero, Mariaava Makataranyaava mpo, Mariaava Iemisikya Ionikya nyova mpo, Sepetira mwaaqutana nyova mpo varura.

### *Iesusira quntamwa tora*

(*Maaki 15:42-47; Ruku 23:50-55; Ioni 19:38-42*)

<sup>57</sup> Enta huvaro Arimatianyaava airi inraikya vato vaisiva uro ntora. Mwia nrutu Iosepiva, mwiva Iesusira vataqiro vi varu vaisiva varura.

<sup>58</sup> Mwi vaisiva Paireativa varuraqi uro ntero Iesusira mwamwanta mpiraqe varaqina quntamwa taankye tuvaro Paireativa nai ntaqu vaisihua sitero tiqaro, Uro Iesusira mwamwanta vara mwia mwiate, tuvaro

<sup>59</sup> Iosepiva uro Iesusira mwamwanta kyatariqatairo itu kyero qaraakya tavuna eqarori tavuna vara kyero mwia qapuqama kyero

<sup>60</sup> varaqiro uto nai nraakiara quntamwa terara rieqaro ori haqa kyero vatoraqi vera vatero ori nronra mpo ventaqiro mwia nrona tita tero vura.

<sup>61</sup> Mariaava Makataranyaavavata, mwia qamwava mpo Mariaavavata, mwitanahua vutura hini mwatakyaa vita variqata vutu mwia quntora taqe varura.

### *Iesusira quntamwa toraqi ntaqikyura*

<sup>62</sup> Mwia qanranraa Saarareqa Kotira nraamwuqaa ntaqikyuhuavata Parisi vaisinramwuvata uro Paireatira vatama kyeta ntuvantuama vita variqata

<sup>63</sup> mwianra tiqata, Nronrao, tire riauraro unra ti vari vaisiva mwiva nai qati varu entara tiqaro, Nte taarampo enta vari kyena qaiqaa qati siquaninrave turave. Mwiva mwitaa turara tira,

<sup>64</sup> e ntaqua vaisihua sitairata mwihua mwia quntamwa taaraqaa taarampo enta variqata ntaqikyiqita quate. Mwia nraaqiaranramwuvanto uro mwia mwamwanta mwiqitaita mpuara varaqita mpona kyeta nraakye qorara unra tiqata, Mwiva qati siviho, tivorave. Mwihua mwi entara unra tiva vaakya unra qua timwa tairavata nraatara kyaananrove, tita.

<sup>65</sup> Mwihua mwitaa tuvaro Paireativa timwa nyinro tiqaro, Qio nkye ntaqua vaisihua sitaqita uro kyaivata mwihua mwia quntamwa taaraqaa kyuqema kyeta ntaqikyiate, tiro.

<sup>66</sup> Mwiva mwitaa tuvata mwihua uro tita tora ori mwiaqaa mwukya rateta ntaqu vaisihuara tiqata, Mwaini variqatama kyuqema kyetama ntaqikyiqi quate, turama.

## 28

### *Iesusiva qutu vuraqitairo sivura*

(*Maaki 16:1-10; Ruku 24:1-10; Ioni 20:1-18*)

<sup>1</sup> Saarare Iutaa mwaanra entavanto taiqovaro mwia qanranraa ntuvahama vuvata Saanteqaa Mariaava Makataranyaavavata, mwia qamwava Mariaavavata, Iesusira quntamwa toraqi taqarerata vurama.

<sup>2</sup> Vuvaro qamwanrama kyero mwaturavanto nronraqama kyero tuvaro nyaamwunyaava mpovanto nyaamwusairo tumu oriyo qesa tita tora mwia rataa qatinani kyero ori mwiaqaa mwatakyaa viro varura.

<sup>3</sup> Mwia virivanto vahirero aaquakyaa votima kyero vahuvaro mwia tuavaaqavanto vahirero tonamwu turomunra voti huva varuvata

<sup>4</sup> mwiaqaa ntaqikyi varu vaisihua mwia taqeta nronraqama kyeta aatu hi varita kyuqu kyaquu ntuvata tumu ntita qutu quahua nraantantamwa kyeta varura.

<sup>5</sup> Mwihua mwitaama vita varuvaro nyaamwunyaava nraakye mwitanahuara tiqaro, Hia aatu hiate. Nte ntapihi kyaquqata nkyetana Iesusira kyatariqaa rutaa vaisira puaa hirerata nriavo.

<sup>6</sup> Mwiva hia mwaini variho. Mwiva nai nkyi timwa nyintema kyero qatima siviho. Nrita mwia veta vataaraqi taqaate.

<sup>7</sup> Mwiqi taqetama hianteta uro mwia nraaqiaranramwu timwa nyiate. Mwiva qutu viraqitairo siviro mwiva nraantema nkyi suni Karirini vi variho. Nkyenramwu mwini uro variqata mwia taqevarave. Qio nte mwi quarama nkyi timwa nyuqo, tiro.

<sup>8</sup> Mwiva mwitaa tuvata nraakye mwitanahua mwia quntamwa to mwatara mwia mwini kyettatana hianteta vuvaro hini mwamwantavanto aatu hi varuvata hini mwamwantavanto qamwate varuvata hianteta Iesusira nraaqiaranramwu timwa nyinrenrata vurama.

<sup>9</sup> Mwitanahua hianteta vi varuvaro qamwanrama kyero Iesusiva mwitanahua qintorama kyero tiqaro, Varitatanave, tuvata mwitanahua qamwata kyeta uro tumu ntita variqata mwia kyuqu tu vareta mwianra qamwata kyeta mwia nrutu tuaahere varuvaro

<sup>10</sup> Iesusiva mwitanahuara tiqaro, Hia aatu hiate. Uro ni kata pakyaanramwu timwa nyivata mwihua Karirini vihua mwini uro ni taqaate, tiro.

### *Iesusira quntamwa toraqaa ntaqikyuhua tu quara*

<sup>11</sup> Jesusiva mwitaa tuvata nraakyе mwitanahua mwiva tunte hita aanraqaa qati vi varuvata Jesusira quntamwa toraqaa ntaqikyi varuhua ntaqu vaisihua mponramwuvanto Ierusaremini uro nteta ekyaa mwi inraikyava qovara hurara Kotira kyaiqa vara mwate varuhua mwihua nronra vaisinramwu timwa nyunra.

<sup>12</sup> Timwa nyuvata mwiaqataita nronra vaisi mwihua uro mponramwuvata sita kyeta qua timwa kyeta kuaa qua vateta ntaqu vaisihua munima nronraqama kyeta nyita

<sup>13</sup> tiqata, Nkyenramwu mwitaama qiate. Tire entaqi vaite varurata mwia nraaqiara nramwuvanto nruru mwia mwamwanta mpuara vara kyaavo, qiate.

<sup>14</sup> Paireativa mwi quara riairera, tire uro mwia qua timwa mwianrata nkye hia qua varevarave, tita.

<sup>15</sup> Mwihua mwitaa tuvata ntaqu vaisihua mwihuaqitaita munima vareta mwihua tuntema kyeta mwi quara nraahu nraakyе qora timwa nyiqi vita mate mwaa entaravata Iutaavanto Jesusirara mwi quara nraahu viti viri timwa nyiqita vi variara.

*Iesusiva nai nraaqiaranramwu suqaa qovarama vura*

*(Maaki 16:14-18; Ruku 24:36-49; Ioni 20:19-23; Kyaiqa Varora 1:6-8)*

<sup>16</sup> Jesusira nraaqiara 11 nramwuvanto Karirini taaqi mwiaqaa uro variate tunani vuhua

<sup>17</sup> uro nteta taqovaro Jesusiva varuvata mwia qamwata mwateta mwia nrutu tuaahere varura. Mwia nrutu tuaahere varuvata mwia nraaqiara hinivanto mwianra taara nraato tita tiqata, Qutaa mwivave variho? ti varura.

<sup>18</sup> Jesusiva mwihua nraaqani uro ntero tiqaro, Kotiva ni nronraqama kyaihana nte nyaamwunivata mwatanivata vahi inraikyara ekyaa mwi inraikyaraqaa ntaqikyi varuvave.

<sup>19</sup> Nkye ekyaa mwata maata varihua uro timwa nyivata mwihua ni nraaqiaraqama quate. Mwihua ni nraaqiaraqama vivata nkye nramanri nyiqata ni kora nrutu nteqata, ni mwia mwaaqu nrutu nteqata, Kotira mwanraqura nrutu nteqatama, nramanri nyiate.

<sup>20</sup> Mwitaa hiqatama ekyaa nkyi timwa nyu qua mwakyaakyara mwihuavata timwa nyitama mwi quara riemwaqita quate, qiate. Qio riaate. Nte nkyivata variqina quariro mwaa mwatava taiqaananrove, tiro. Jesusiva mwi quara turama.

## MAAKI Maakiva Iesusiva nrohurara tura

*Ioniva nramanri nyi varu vaisiva nraakyе qora timwa nyu quara  
(Matiu 3:1-12; Ruku 3:1-18; Ioni 1:19-28)*

<sup>1</sup> Iesusiva Kotira mwaaquvanto varura. Mwia qua kyuqe qua mwia okyara vahirero mwataamama vahiro.

<sup>2</sup> Haaru mpo enta Aisaiaava Kotira qua qovarama kyero qara ntumwa tero tiqaro, Taqaante, ni qua nraakyе qora timwa nyiani vaisira nte titaairo mwiva i vuni viqaro i aanra terama mwataananrove.

*(Marakai 3:1)*

<sup>3</sup> Mwi vaisiva qumina mwataqaa variqaro aakyara ntero tiqaro, Nronravanto quani aanranra terama mwateta mwia aanra avuqavuma mwataivaro mwiva mwi aanranraqaama qio quarive qiananrove, tura.

*(Aisaiaa 40:3)*

<sup>4</sup> Kotiva mwia kyaahaqa huvaro Aisaiaava tohare varu entara mwi quara qara ntumwa tovaro airi ihi vi vuvaro mpo enta Ioniva qumina mwataqaa qovarama vura. Qumina mwataqaa qovarama viro Ioniva nraakyе qora nramanri nyiqanro mwihua timwa nyinro tiqaro, Nkyeta qora kyaiqa vare varira qaqlira kyeta nramanri varaivaro Kotiva nkye qora kyaiqa vare vari quara nruka nyataarive, tiro.

<sup>5</sup> Ioniva mwitaa ti varuvata Iutiasaitave, Ierusaremisaitave, ekyaas mwi mwatanaahua hisai hisai mwiva qua tunani vita uto variqata mwihua nkyiari qora kyaiqa vare varura timwa qovarama kyovaro Ioniva nramanri mwihua nyunra.

<sup>6</sup> Ioninra tuavaaqa vahirero mpo quara kameri kyaahi vara kyero ututo tuavaaqava vahuvaro mwia nraahu ututero reti tavaarana rupatero varura. Ioniva hia kyara vara tu kyero nranraitiro, mwiva kainyaaqa nrenro voravanto kuruto nramanrinra nreqanro mwi kyarara nraahu nre varura.

<sup>7</sup> Ioniva nraakyе qora timwa nyinro tiqaro, Ni naakiara nrianri vaisiva kepukyavanto ni naatara kyero nronra vaisivantoma variananrove. Mwiva nronra vaisivanto varihana nte qumina vaisi variqananra tina, hia nte qio kakataama vina nai kyuqu nraamwuma tai kyaantara huvantu mwataaninrave.

<sup>8</sup> Nte qati nramanri nkyi nyi varuqo. Mwiva Kotira mwanraqura nkyi nyiananrove, tiro. Ioniva mwitaa turama.

*Ioniva Iesusira nramanri mwunra  
(Matiu 3:13-17; Ruku 3:21-22)*

<sup>9</sup> Mwi entara Iesusiva Nasareti mwatukya Karirisairo nri ntero Ioniva varunani utontero vuvaro Ioniva Iotaani nramanriqi variqaro Iesusira nramanri mwunra.

<sup>10</sup> Nramanri mwia mwuvaro Iesusiva nramanriqitairo qatinani mwaanri ntero taqovaro nyaamwuvanto qatua vuvaro mwqitairo Kotira mwanraquravanto nyaamwa minrunra voti huva tumu ntero Iesusiraqaa varura.

<sup>11</sup> Tumu Iesusiraqaa varuvaro quavanto nyaamwusairo mwitaama tiro:  
E ni maaquvanto variararo  
ni mutukyavanto iara mpoqiaavata vaiho.  
Nte iara qamwateqanama varuqo, tiro.

*Saataaniva Iesusira mwataara hura  
(Matiu 4:1-11; Ruku 4:1-13)*

<sup>12</sup> Quavanto nyaamwusairo mwitaa tuvaro qamwanrama kyero Kotira mwanaqravanto Iesusira vita varero qumina mwataqaa hia vaisivata varu mwataraqaa uro kyovaro varura.

<sup>13</sup> Mwini uro kyovaro Iesusiva 40 entara variqiro vuvaro Saataaniva Jesusirara qora kyaiqa varaarive tiro, mwia mwataara hiqaro taqovaro Iesusiva hia mwia qua riaraitiro, hia qora kyaiqa utura. Iesusiva mwitaamaqiro viqaro qaakyau vahikurivanto nrohi varunani varuvata nyaamwunyaa vaisinramwu tumu mwiaqaa kyuqema kyeta ntaqikyi varura.

*Iesusiva Karirini uro nai kyaiqa toharora  
(Matiu 4:12-17; Ruku 4:14-15)*

<sup>14</sup> Mwi entara mpo uhua Ioninra ntavaaqavu kyeta viteta karavuqi uro kyovaro Iesusiva Karirini uro variqaro Kotira mwakyaakya kyuqe mwakyaakya nraakte qora timwa nyinro tiqaro,

<sup>15</sup> Mwi entava nri ntaiho. Kotiva nkyiqa ntaqikyiari entava qaumaqa iho. Nkye qora kyaiqa uti varira qaqlira kyeta nte kyuqe mwakyaakya timwa nyianinra nkye mwi quarara quataave timwa kyeta riemwaqi quate, tura.

*Iesusiva Saimonikya Enturukya nyaanronra  
(Matiu 4:18-20)*

<sup>16</sup> Iesusiva mwitaa timwa kyero vuva Kariri rumpua tokya sataa viqaro taqovaro Saimoniva nai qata Enturukyantiri variqaro vahe nte varura. Mwitanahua tavukya kyaiqa vare varutanhua vahe nte varuvaro

<sup>17</sup> Iesusiva mwitanahuara tiqaro, Nkyetana ni naakiara nriate. Nkyetana vahe ntamwa kyeqata tavukya varaantema kyeta ni naakiara nriqata nraakte qora site-varave, tiro.

<sup>18</sup> Iesusiva mwitaa tuvata mwitanahua mate mwiqiara nkyiari vahe mwini kyeta Iesusira vatavare vurama.

*Iesusiva Iemisikya Ionikya nyaanronra  
(Matiu 4:21-22)*

<sup>19</sup> Mwitanahua mwia vatama kyeta vuvaro Iesusiva pataqiaqa viqaro taqovata Sepetira mwaqaqtana Iemisivavata, mwia qata Ionivavata, mpotuqi variqata vahe ntuke hi vura haqire varura.

<sup>20</sup> Mwitanahua vahe haqire varuvaro qamwanrama kyero Iesusiva mwitanahua nraanrovata mwitanahua rieta nkyiari sora Sepetiravata, mwia kyaiqa varo vaisihuvata, mpotuqi kyeta Iesusira vatama kyeta vurama.

*Iesusiva vaana titovaro nritarero vura  
(Ruku 4:31-37)*

<sup>21</sup> Mwitanahua Iesusira vatama kyeta vuvaro Iesusiva vuva Kapenaamini uro variqaro mwaanra tu entaraqaa mwaanra nraamwuqi vera ntero variqaro mwipi varuhua mwakyaakya timwa nyinro.

<sup>22</sup> Iesusiva nraakte qora timwa nyi varuvata mwihua mwia qua rieta tiqata, Qikye, mwiva nanra quave tiri timwa timwiho? Mwiva hia mwaanra okyara ti varia vaisinramwuhua qiantema kyero ti variho. Mwiva nronra vaisivanto qiantema kyero ti variho, tura.

<sup>23</sup> Mwitaa tuvaro Iesusiva mwaanra nraamwu mwipi varuvaro vaanavanto mwia utaqi varu vaisiva nraamwuqi vera ntero qua aakyara ntero tiqaro,

<sup>24</sup> Iesusio, e Nasaretinyaavave. E tiri nataa hirerarave nrianro? E tiri ntuqutu taiqa kyarerarave nrianro? Nte i okyara ntapihi kyauva e nrianro. Kotiva i titaihara e Kotira kyaiqa nraahu vare variarava variaro, tiro.

<sup>25</sup> Mwitaa tuvaro Jesusiva vaana mwia inronra hiro tiqaro, Tirema variante. Mwi vaisiraqitaira nritarera quante, tiro.

<sup>26</sup> Jesusiva mwitaa tuvaro vaana mwiva mpoqama kyero mwi vaisira tu varero qakyaa qakyama kyero qua aakyara timwa mwatero qatinani nritarero viro.

<sup>27</sup> Vaanavanto nritarero vuvata mwiqi ntuaantuama vita varuhua kyauqu ntukik-inraaqata kyeqata nai timwa mwi nai timwa mwi hita tiqata, Nanra inraikyavantove qovarama viho? Mwaa quara qaraakya quave. Mwi vaisiva kepukya qua tihatama vaanavantovata mwia qua riaavo, tura.

<sup>28</sup> Mwihua mwitaa timwaqi vita nrita huvata ekyaa Karirini varuhuavata mwi quara riora.

*Iesusiva Saimoninra nrinraatarara kyaahaqama kyovaro qati sivura*

(Matiu 8:14-15; Ruku 4:38-39)

<sup>29</sup> Jesusiva mwaanra nraamwuqitairo veva ntero Iemisikya Ionikya sita varero vuva uro Saimonikya Enturukya nraamwuqi vera ntero varura.

<sup>30</sup> Saimoninra nrinraatarara mwamwanta tutoqa huvaro taintaqa vaite varuvata mwihua mwianra Jesusira timwa mwita.

<sup>31</sup> Timwa mwuvaro Jesusiva mwia uro taqero mwia kyauquqa tu varero mwia mwaamwianrama kyero. Mwitaama kyovaro mwia mwamwantavanto kyuqema viro naitarama vahuvaro mwi nraakyeva siviro kyara uta nyinrenro tera hora.

*Iesusiva nriqa vuhua kyaahaqama kyovata qati varura*

(Matiu 8:16-17; Ruku 4:40-41)

<sup>32</sup> Jesusiva mwi mwatukyaraqi varuvaro huarivanto vikyovaro entama vuvata nraakye qora nriqa vuhuavata, vaanavanto utaqi varuhuavata, sita vareta Jesusiva varunani uro kyora.

<sup>33</sup> Mwitaa huvata ekyaa mwi mwatukyaraqinaahuavata Jesusiva varu nraamwunra qesa mwina nrumu varita huvai kyora.

<sup>34</sup> Huvai kyeta varuvaro Jesusiva nraakye qora airintikara mpo qara mpo qarama kyero nriqa vuhua kyuqema nyatovaro mwihua nriqa vuva taiqa vuvata qio varura. Qio varuvaro vaanavantovata airi vaisiqi varuhua sitamwa kyovata nritareta vura. Nritareqata vi varuvaro Jesusiva vaana mwihuara qao tiro tiqaro, Hiavata qua qiate, tiro. Vaanavanto Jesusira ntapihi kyovarora tiro, Jesusiva mwitaa tura.

*Iesusiva Karirini nrohiqaro qua mwakyaakya timwa nyunra*

(Ruku 4:42-44)

<sup>35</sup> Mwia qanranraa hia qaatatovaro Jesusiva siviro veva ntero uro hia vaisivantovata varunani Kotiravata qua tirero vura.

<sup>36</sup> Mwini vuvaro Saimoniva nai henahuavatama kyero mwia puaa hirero viro.

<sup>37</sup> Vuhua uro Jesusira puaama kyeta mwinramwuhua mwianra tiqata, Qutaara e mwaini variarata ekyaa mwaa mwatukyaraqinaahua iara puaa hi variavo, titi.

<sup>38</sup> Mwinramwuhua mwitaa tuvaro Jesusiva qaqao tiro, Varaivaqenramwu mpo mwatukya mpo mwatukyavata nrohiqata qua mwakyaakya nraakye qora timwa nyianre. Nte mwakyaakya mwihua timwa nyinrenra nruvave, tiro.

<sup>39</sup> Mwitaa timwa kyero mwinramwuhuavata sita varero Karirini nrohi variqaro mwaanra nraamwu mpoqi mpoqi vera ntero variqaro mwakyaakya nraakye qora timwa nyiqiro viqaro vaisi utaqitairo vaanavata sitamwa kyovata nritare vurama.

*Tauma rumpuara utu vaisira kyaahaqama kyora*

(Matiu 8:1-4; Ruku 5:12-16)

<sup>40</sup> Jesusiva mwakyaakya timwa nyiqiro vi varuvaro vaisi mpovanto tauma rumpuara utu vaisiva Jesusiva varunani uro ntero tori kyauru raviro Jesusirara po kye

tiqaro, E ni kyaahaqa hiataa hirera, e qiomaa ni tauma rumpuara nruka matenanrave, tiro.

<sup>41</sup> Mwitaa tuvaro Jesusiva mwi vaisirara po kye timwa mwatero, nai kyauqu mpiami mwia mwamwantaqaa vatero tiqaro, Nte mwitaa hiataa ihana i mwitaama mwatarerave. I mwamwantara kyuqema quarive tuqo, tuvaro

<sup>42</sup> mwia tauma rumpuaravanto qamwanrama tavanta vuvaro mwiva qio varura.

<sup>43</sup> Mwiva qio varuvaro Jesusiva mwi vaisirara kepukyaqama kyero tiqaro,

<sup>44</sup> Hia mpohuavata timwa nyinraitira, viraro Kotira kyaqiqa vara mwate vari vaisiva i mwamwanta taqaarive. Mwiaqataira e Mosesiva mwaanra qua timwa tora rieqarama Kotira mpo inraikya mwinrata nraakye qoravanto iara tiqata, Qutaama mwia mwamwanta kyuqema viho qiate, tiro.

<sup>45</sup> Jesusiva mwitaa tuvaro mwi vaisiva hia Jesusiva tunte hiraitiro, mwi quara viti timwa nyi viri timwa nyi huvata ekyaa vaisi riovaro mwia kyaara Jesusiva mpo mwatukya mpo mwatukya qoqaa quariva hia vahuvaro mwiva qaqlira kyero hia mwatukyani viraitiro, qumina sata variqiro vuvata nraakye qora hisai hisaita mwia taqarerata nrunrama.

## 2

### *Jesusiva hini mwamwanta qutu vu vaisira kyuqema mwatora (Matiu 9:1-8; Ruku 5:17-26)*

<sup>1</sup> Jesusiva Karirini nrohi ntero nrumu ntantero Kapenaamini uro varuvata mwi mwatanaahua Jesusiva nrumu variho tu quara rieta

<sup>2</sup> mwhihua airivanto uro Jesusiva varu nraamwunraqi ntuvantuama vita nraamwu mwiaavata ru piqa kyeta qesanavata huvaiqu kyovaro mpovanto mwiqi vera ntaariva hia qioqa hora. Mwitaa huvaro Jesusiva nraamwu mwiqi variqaro mwakyaakya timwa nyi varura.

<sup>3</sup> Jesusiva timwa nyi varuvata vaisi mponramwuvanto nkyiari hena vaisi mpo mwia mwamwanta hini qutu vura taintama vare nrunra. Erahiamuaantema vaisinramwu mwia taintama vareta nrunra.

<sup>4</sup> Mwinramwuhua nri nteta Jesusira nraaqani quananrave tita, taqovata nraakye qora airivanto varuvata mwinramwuhua nraamwu utaqi vera nteva hia qioqa hora. Hia qioqa huvata mwinramwuhua qaqlira kyeta nraamwu qita tahiporaqaa mwaanri nteta mwi vaisira vara mwaanri vateta, Jesusiva nraamwu utaqi varuvata mwinramwuhua Jesusiva varura mwina mpiami ntukuraa kyeta. Qio ntukuraa kyeta nriqa vu vaisira taintaqaa vatora qakyomakye kyaqi vuvaro mwi taintava nraakye qora utaqaa uto vahura.

<sup>5</sup> Vahuvaro Jesusiva riovata mwi vaisinramwuhua nkyiari nraahu tiqata, Qutaama mwaa vaisira Jesusiva qio kyuqema kyaananrove, tu vaisinramwuhua varuvaro Jesusiva hini mwamwanta qutu vu vaisirara tiqaro, Ni maaquo, e Kotira qua raaquta kyaananra nte mwi quara nrukama mwatauqo, tiro.

<sup>6</sup> Jesusiva mwitaa tuvata mwaanra okyara ti varu vaisinramwuhua mwiqi varuhua riemwaqi vita tiqata,

<sup>7</sup> Qaqao, mwi vaisiva nanraqamave mwitaa tiho? Mwiva mwitaa tiqaroma Kotira uaqiamaa mwate variho. Hiama qumina vaisivanto variqaro nai hena vaisiara, E Kotira qua raaquta kyaananra nruka mwatauqo, qiananrove. Kotiva mwiva nraahuma qio mwitaa qiananrove, tita.

<sup>8</sup> Mwhihua mwitaama nraato riovato Jesusivavata mwhihua su nyaato tura ntapihi kyero tiqaro, Nkye nataamaqive mwitaama riaavo?

<sup>9</sup> Nte mwaa vaisira hini mwamwanta qutu virara tiqanama, E Kotira qua nteqa kyaananra nte nrukama mwatauqo, tuqatama nkye nianra tiqata, Qaqao, i quavanto

unra quave. Hia qutaa qovara hiananrove, qiarave. Qio mwaini riaate. Nte mwi vaisirara tiqana, Sivira ena tainta tu varera quante, qiaro qiove ni quara mwiva mwitaa hiananrove? Nkye timwa mpivaqena riaankye, tiro.

**10** Iesusiva mwitaama kyero mwihua kyaparama nyatero mwiva mwihuara qaiqaa tiqaro, Nte mwatani mwatatai nraaqiarava varuqaro ni nronraqama kyaihananra tina, nte qioma mwatani variqana vaisivanto Kotira qua nteqa kyaani quara nruka kyaaninrave. Nkye ni quara qutaa quave qiate tina, nte mwate mwaa vaisirara mwitaa tirerave, tiro.

Mwitaa timwa kyero Iesusiva hini mwamwanta qutu vu vaisirara tiqaro,

**11** Sivira ena tainta tu varera ena mwaatani quantema tuqo, tiro.

**12** Mwitaa tuvata ekyaa nraakye qora mwia taqe varuvaro mwi vaisiva siviro mpiami nai tainta tu varero uvata mwihua nrihanrama vita kyauqu ntukikinraaqate varita Kotira nrutu tuaahereta tiqata, Mwaa kyaiqara nraahumwa mpo qara hi kyaiqara hia taqauna kyaiqarave, tura.

*Iesusiva Rivaira nraanronra  
(Matiu 9:9-13; Ruku 5:27-32)*

(Mwi entara taakisi vare varu vaisihua mponramwuvanto taakisi vareqata hini munima nkyiari tuteta hini munima nraahu nkyiari nronra vaisi nyunra. Mwitaa huvata qumina nraakye qoravanto taakisi varo vaisihua ekyaa mwihuara mpuara vaisi nraahuma variavo tura.)

**13** Iesusiva Kapenaamini vari kyero mwiaqatairo nrumu ntantero Kariri nramanri tokyasataa uvata nraakye qora airivanto mwiva varunani ntuvantuama vita varuvaro Iesusiva qua mwakyaakya mwihua timwa nyinro.

**14** Mwiaqatairo mwiva vuva uro variqaro taqovaro Rivaiva, Arapiaasira mwaquivanto, opisi nraamwuqi taakisi vare varuvaro Iesusiva mwianra tiqaro, Ni naakiara nriante, tiro. Mwitaa tuvaro Rivaiva siviro Jesusira vataqiro vurama.

**15** Iesusiva Rivaira nraamwuqi uro variqaro nai nraaqiaranramwuvata kyara nre varuvata airi vaisi taakisi vare varuhuavata, vaisi mponramwu mwihuara uaqiahi kyaiqara uti variahuve tuhua mwihuavata, nraamwu mwipi variqata kyara nre varuā.

**16** Iesusiva vaisi mwinramwuhua kyapata kyara nre varuvata Parisi vaisi mwaanra okyara ti varuhua taqovaro Iesusiva taakisi vare varuhuavata, uaqiahi kyaiqara uti variahuve tuhua mwihuavata, kyara nre varuvata mwihua Jesusira nraaqiaranramwu kyapara hita tiqata, Nanraqamave Iesusiva uaquia hia vaisihua kyapata kyara nre variho? tita.

**17** Parisi vaisinramwuvanto mwitaa tuvaro Iesusiva mwihua qua riero tiqaro, Qati vari vaisiva hia totaava hinani vi varirave. Nriqa vi vaisiva nraahu totaava hinani vi varirave. Ta vaisihuave tiqata, Tire avuqavuma kyeta nrohi varurahuave qiahua, nte hia mwihua nyaanranrenrana tumuvave. Nte uaqia hia nraakye qorahua nyaanranrenrana tumuvave, tiro.

*Kyara auramatera tura  
(Matiu 9:14-17; Ruku 5:33-39)*

**18** Mwi entara Ioninra nraaqiaranramwuvantovata, Parisi vaisinramwuvantovata, kyara auramate varuvata vaisi mponramwuvanto Jesusira kyapara hita tiqata, Ioninra nraaqiaranramwuvantovata, Parisi vaisinramwuvantovata, kyara auramate variavo. Qio nanraqamave i nraaqiaranramwuvanto hia kyara aurama taraitita, qati kyara nre variavo? tita.

**19** Mwihua mwitaa tuvaro Iesusiva tiqaro, Nraakye vararerera qiasi vaisiva nai vataahuavata qati varirera, qiove mpovanto mwia vataahuara kyara aurama taate qiananro? Qaqao, hiama qio mpovanto mwitaa qiananrove. Nraakye vararerera

giari vaisiva qati varirata mwia vataahua hia kyara aurama taraitita, qatima kyara nrevarave.

<sup>20</sup> Mpo enta nri ntairata mwihuaqitai nraakye vararerera qiani vaisira tu vareta qatinani vara kyaivata mwi entaraqaataita mwia vataahua ti atura ntqata kyara aurama tevarave, tiro.

<sup>21</sup> Mwitaa timwa kyero Jesusiva mpo quaqaa ntumwa kyero timwa nyinro tiqaro, Mpovanto tuavaaqa nrihi nrabitu quaninra haqira hirero hiama tavuna qaraakya toqa kyero mwiaqaa taaqautero haqiraananrove. Tavuna qaraakya mwia toqa kyaariro qiqu vahiraro tuavaaqa nrihi mwivavata nronraqama kyero nrabituankyo tiro, hia mwitaa hirave.

<sup>22</sup> Qaiqaa tirerave. Uaini qaraakya tati kyero hia mpovanto memenra pahiqa ututaira haaruua taqu vara kyero qaraakya uaini mwia mwipi raurirave. Memenra pahi mwiva nraahaqama viraqa mwiva mwitaa hiraro uainivanto kepukya uaini utu viqaro memenra pahi nrabitu kyaananrove. Mwitaa hiraro uainivantovata memenra pahivantovata uaqima quananrove. Memenra pahiqotai ututaa taqura qaraakya taqu vara kyeta mwipi nraahu qaraakya uaini rauruarave, tiro.

(Jesusiva mwi quaraqaa ntumwa kyero tu quara okyaravanto mwataamama vahiro. Mwia votima kyeta hiama haaruua okyaravata qaraakya okyaravata kuaaqi kuairama kyeta tutaate, tura.)

### *Mwaanra tu entarara tura (Matiu 12:1-8; Ruku 6:1-5)*

<sup>23</sup> Mpo enta mwaanra tu entaraqaa Jesusiva nai nraaqiaranramwu kyapata aakyo utaqi kyakuma votihura uiti vara tutoraqi vi varuvata mwia nraaqiaranramwuvanto viqatama uiti tamwa nteqa kyeqa nramwaqita vi varuvata

<sup>24</sup> Parisi vaisivanto mwihua taqeta Jesusirara tiqatama, Mwataqi mwihua taqaante. Mwaanraqaa qao timwa tai inraikyarama mwihua vareta hiavo, tita.

<sup>25</sup> Parisi vaisinramwuvanto mwitaa tuvaro Jesusiva nkyiari timwa nyinro tiqaro, Haaru nkyi haivaqava Ntevitivavata, mwivavata nruhua mwihuavata, kyara nraataa huvata varuvaro Ntevitiva kuaa qara hora mwia nkye hia mpukuqi kyaara ntumwa kyeta riaarave?

<sup>26</sup> Apaiataava Kotira kyaiqa vara mwate varuva vunyaa vaisivanto varu entaraqaa Ntevitiva Kotira nraamwuqi vera ntero mpereti Kotirani vatora vara kyero nrenro nteqa kyero nai mwia vatama kyeta nruhuavata hini nyuvata nronrave. Kotira kyaiqa vara mwate varu vaisihua nraahu mwi kyarara nraataara vahuvaro qumina vaisivanto mwi kyarara nrenro mwi quara nteqa kyorave, tiro.

<sup>27</sup> Jesusiva mwitaa timwa kyero tiqaro, Kotiva vaisiara rieqaro mwaanra enta vahiananrove turave. Kotiva hia mwaanra entara rieqaro vaisi utu tairave.

<sup>28</sup> Ni mwatani mwatatai nraaqiarara nronraqama kyaihana variqana nte mwaanra entaraqaa ntaqikyiqanama ntena kyakya hianí kyaiqara qioma varaaninrave, tiro. Jesusiva turama.

## 3

### *Mwaanra tu entaraqaa Jesusiva vaisi kyauqu kyuqema kyora (Matiu 12:9-14; Ruku 6:6-11)*

<sup>1</sup> Mpo enta Jesusiva mwaanra nraamwuqi vera ntero taqovaro vaisi mpovanto kyauqu hini kukokaqama vuva varuvata

<sup>2</sup> mwipi varuhua mponramwuvanto tiqata, Kyai variqata taqaararo Jesusiva vaisi kyauqu kukoka mwia mate mwaanra tuna entaraqaa kyuqema kyairera, mwia kyaara mwiaqaa qua vataare, tita.

<sup>3</sup> Mwihua mwitaa timwa kyeta Jesusira taqe varuvaro Jesusiva kyauqu hini kukoqama vu vaisirara tiqaro, E nrinra vaisi variara utaqaa sivira variante, tuvaro mwiva siviro varuvaro

<sup>4</sup> Jesusiva mwihua kyapara hiro tiqaro, Tirenramwu teta mwaanra qua rieqatama mwaanra qiana entaraqaa nataa hiani kyaiqarave qio varaanranrave? Tire mwi entaraqaa vaisi mpo kyaahaqamave mwataananrave? Mwia uaqiamave mwataananrave? Mwaanra qiana entaraqaa tire vaisi mpo kyaahaqa hiararo mwiva qative variananrove? Tire qaqlira kyeta mwi vaisira ruve kyaananrave? tiro.

Jesusiva mwitaa tuvata mwihua hia quavata tihua tirema varuvaro

<sup>5</sup> Jesusiva taqvata mwihua hia mwi vaisirara po kye tiraitita, kapera viri rate varuvaro mwia kyaara Jesusira mwutukyavanto uaquia huvaro mwia raraqa tovaro mwi vaisirara tiqaro, Ena kyauqu ntatutaante, tuvaro mwiva nai kyauqu ntatuta kyovaro kyuqema vura.

<sup>6</sup> Mwia kyauquvanto kyuqema vuvata Parisi vaisi mwinramwuhua mwaanra nraamwuqtai veva nteta uro Herotira vataqita nrohuhua kyapata ntuvaantuua hita variqata Jesusira nataama kyetave ru kyaananrave timwa kyeta nai timwa mwi nai timwa mwi hi varura.

### *Nraakyе qoravanto hisai hisaita uro Jesusira taqora*

<sup>7</sup> Jesusiva nai nraaqiaranramwu sita varero kyaarerera tokyasata uro varuvata nraakyе qora airivanto Karirinyaahuave, Iutianyaahuave,

<sup>8</sup> Ierusaremiqinaahuave, Itumianyaahuave, Taiaaqinaahuave, Saitoniqinaahuave, Iotaani nramanri vutura qarahi hini varuhuave, mwihua Jesusiva mpo kyaiqa mpo kyaiqa vare varurara rieta, mwihua Jesusiva varura nramanri tokyani ntuvaantuuma vita varura.

<sup>9</sup> Nraakyе qora airivanto ntuvaantuuma vita varuvarora tiro, Jesusiva nai nraaqiaranramwuanra tiqaro, Nraakyе qoravanto ni ntaqutivorave. Mpotu terama kyeta vataivaqena mwipi mwaanrintena variantye, tiro.

<sup>10</sup> Jesusiva nraakyе qora airi kyuqema kyovatara tita, nriqa vuhua mwia tu vararerata uti variqata nai ntaquti nai ntaquti hi varura.

<sup>11</sup> Mwihua mwitaa hi varuvata nraakyе qora mponramwu vaanavanto mwihua utaqi varuhua, mwihua Jesusira taqeta mwia vuni tumu ntita variqata aakyara nteta tiqata, E Kotira mwaaquvante, tita. Vaanavanto mwihua utaqi varu vaisihua mwitaa tuvaro

<sup>12</sup> Jesusiva mwihuara kepukyaqama kyero tiqaro, Hia ni okyarara qiate. Tirema variate, turama.

### *Jesusiva vaisi 12 nramwu sita vatora*

*(Matiu 10:1-4; Ruku 6:12-16)*

<sup>13</sup> Jesusiva mwini vari kyero taaqi mporuqa variqaro nai mwutukya vahu vaisihua nraahu nyaanrovata mwihua uro varuvaro

<sup>14</sup> Jesusiva vaisi 12 nramwu kyaara ntumwa kyero mwihuara nte mwihua sitaarita ni qua vareta timwa nyiqi quate timwa kyero, mwihua nronraqama kyero mwihuara tiqaro, Nkyenramwu ni airuqama mateta ni qua timwa nyiate tinama, nte nkyi sita vatauqo.

<sup>15</sup> Nkyenramwu vaana titivararo nritarero quarive tina, nte nkyi kepukya nyinrenrave, tiro.

<sup>16</sup> Jesusiva mwaa vaisinramwuhua sitora:  
Saimoninra. Jesusiva mwia mpo nrutu ntamwatero  
Pitaavave tiro.

<sup>17</sup> Iemisikya Ionikya. Mwitanahua Sepetira mwaaqutana  
varura. Jesusiva mwitanahua mpo nrutu  
Poanesisi-huatanave tura. (Poanesisi mwaa quaraqitai

tirera, Nyaanruva Nruqua Ti Varirave, tita.)

<sup>18</sup> Enturura, Piripira

Pataromiunra

Matiura

Tomaasira

Iemisira. mwiva Arapiaasira mwaaqu

Tatiaasira

Saimoninra. mwia nrutu mpo Serotira

<sup>19</sup> Iutaasira. mwi vaisiva Iesusira ntavaaqavu kyaate tiro,  
mwia qovarama kyo vaisiva.

Iesusiva 12 vaisi mwi vaisinramwuhua sitora.

*Mpo uhua Iesusirara ueraqama vi vaisivama variho tura  
(Matiu 12:24-32; Ruku 11:14-23)*

<sup>20</sup> Iesusiva nai nraaqiaranramwu sita varero nraamwunianra nkyiari mwaatani  
vuvata qaiqaa nraakye qora airivanto mwia taqarerata ntuaantuama vita varuvaro  
Iesusiva nai nraaqiaranramwu kyapata kyara nraanriva hia qioqa huvaro varuvata

<sup>21</sup> Iesusira vataahua mwi quara rieta Iesusirara tiqata, Qikye, mwiva ueraqamama  
viho. Kyai uro mwia vitaare, timwa kyeta vurama.

<sup>22</sup> Mwaanra okyara ti varu vaisihua mponramwuvanto Ierusaremisa tumunte  
mwitaama titi, Vaana vunyaava Pierisepurivama Iesusira utaqi variho. Pierisepuriva  
mwia utaqi variqaro mwia kyaahaqa hi variharoma Iesusiva vaisiqitairo vaana tite  
variho, titi.

<sup>23</sup> Mwihua mwitaa tuvaro Iesusiva mwihua nyaanrovata vaini nruvaro mpo quaqaa  
ntumwa kyero mwihuara tiqaro, Saataaniva nataama kyeroove nai henanra titairaro  
nritaraananrove.

<sup>24</sup> Kuaa mwatanaavanto ntainravi variqata nkyiaritana nai ntaqi nai ntaqi ihua hia  
qio varivarave.

<sup>25</sup> Kuaa nraamwunaavanto ntainravi variqata nkyiaritana nai ntaqi nai ntaqi ihua,  
mwihuavata hia qio varivarave.

<sup>26</sup> Saataaniva ntaqikyi vari vaanahua ntainra vita nai ntaqi nai ntaqi hi varivaro  
Saataaniva hia mwihuqaqa ntaqikyiqiro viraro mwihua kepukyavanto taiqaananrove.

<sup>27</sup> Mpuara varaiva hia kepukyu vaisi mpo nraamwuqi qumina vera ntero mpo  
inraikya varairave. Mpuara varaiva vuni kepukyu vaisi mwia nraante rupa kyero  
vatero mwiaqatairo vera ntero mpo inraikya mwiani mpuara varairave.

<sup>28</sup> Nte qutaa qua qianinra riaate. Nraakye qoravanto uaquia hiani kyaiqara mpo qara  
mpo qara hiani kyaiqara uti vari quarave, uaquia hi quara mpohuara ti vari quarave,  
Kotiva qiomaa ekyaa mwi quara mwi quara nraakye qora qati nruka kyero taunru  
nyataaanrove.

<sup>29</sup> Vaisivanto Kotira mwanraqurara uaquia hi quara ti vari quara Kotiva mwaa  
entaravata nraakiaravata mwi quara hia nruka kyero taunru nyataaanrove, tiro.

<sup>30</sup> Iesusirara vaanavanto mwia utaqi variho tuvarora tiro, mwiva mwitaa tura.

*Iesusira vataahua mwia taqarerata nrunga  
(Matiu 12:46-50; Ruku 8:19-21)*

<sup>31</sup> Iesusiva mwitaa tuvata mwia nrovavata, mwia qatanramwuvata, nri nteta  
mwaata qesaga sivi varita tiqata, Iesusira tivaro tumuanrive, tuvata

<sup>32</sup> nraakye qora airivanto Iesusira tataaqaa mwatakyaa vita varuhua Iesusira timwa  
mwita tiqata, I nrovavata, i qatanramwuvata, mwaataqa variqata iara tumuante  
qiaovo, titi.

<sup>33</sup> Mwihua mwitaa tuvaro Iesusiva mwihua kyapara hiro, Tavave ni ntova variho?  
Tahuave ni kata pakyaa variavo? tiro.

<sup>34</sup> Mwitaa timwa kyero mwia tataaqa vara ututu mwatakyaa vita varuhua taqero tiqaro, Mwaahuama ni ntohua ni kata pakyaa variavo.

<sup>35</sup> Ni kova nyaamwuni varira mwia qua rieqata nrohi variahua, mwihuama ni kata pakyaa variavata, ni nunra nakyaa variavata, ni ntohuamwanra varita hiavo, tura.

## 4

### *Uiti humwu iso quaraqaa ntumwa kyero tura (Matiu 13:1-9; Ruku 8:4-8)*

<sup>1</sup> Iesusiva kyaarerera tokyani uro variqaro nraakye qora qua mwakyaakya timwa nyiankye tuvata nraakye qora airivanto ntuvantuama vita mwia ututuma kyovarora tiro, Iesusiva qaqlira kyero mpotu mpoqi mwaanri ntero mwipi mwatakyaa viro nramanriqaa varuvata nraakye qoravanto nramanri tokya sata varura.

<sup>2</sup> Mwihua mwataqaa nramanri tokya sata varuvaro Iesusiva mpo qua mpo quaqaa ntumwa kyeqaro timwa nyunra.

<sup>3</sup> Iesusiva tiqaro, Nte qianinra riaate. Vaisi mpovanto kyara vara tirero humwu isaqiro vurave.

<sup>4</sup> Mwiva kyara humwu isaqiro vuvaro mpohuva aanra tokyani tumu ntuvvaro nyaamwavanto nrumu nramwa kyorave.

<sup>5</sup> Mwitaa huvaro humwu mponramwuvanto ori mwataqaa tumu ntuvvaro mwatavanto hia vevatoqama vahuraqaara tiro, qamwanrama qupiqa vuvaro

<sup>6</sup> mwia tuqavanto hia mwataqi vevato vuraqaara tiro, huarivanto nri ntero itovaro aaharama vurave.

<sup>7</sup> Mwitaa huvaro humwu mponramwuvanto uakukya qupiqoraqi tumu ntiro uakukya vatama kyero qupiqa vuvaro uakukyavanto ntumwaqu kyovaro hia tamwa riorave.

<sup>8</sup> Mwitaa huvaro humwu mponramwuvanto kyuqe hu mwataraqaa tumu ntiro kyuqema kyero qupiqeqaro kyuqe tamwa riorave. Mpo huva airi tamwa riemwa tovaro mpo huva uro mpoqiaavata riemwa tovaro mpo huva uro mwiaavata nraatarero mpoqiaavata riemwa torave, tiro.

<sup>9</sup> Iesusiva mwi quaraqaa ntumwa kyero timwa nyi taiqa kyero tiqaro, Nkyi nyaato vahirera, mwi quara okyara ntapihi kyeta riaate, tiro.

### *Iesusiva hia vutu kyero tiraitiro, mpo quaqaa ntumwa kyeqaro nraakye qora timwa nyu okyarara tura*

#### *(Matiu 13:10-17; Ruku 8:9-10)*

<sup>10</sup> Iesusiva qua timwa nyi taiqa kyovata nraakye qoravanto nkyiari mwaatani vita nrira huvaro Iesusiva nanrianraa varuvata mwia nraaqiara 12 nramwuvantovata, mpo uhuavata, mwiva varunani nri nteta Iesusiva mwi quaraqaa ntumwa kyero tu okyarara hia ntapihiraitita, Iesusira kyapara huvaro

<sup>11</sup> Iesusiva mwihua timwa nyinro tiqaro, Kotiva nraakye qoraqaa ntaqikyiani quara uqetatai quara, mwi quara Kotiva nkyiara qati kyairata mwi quara okyara riaate tirave. Mwitaa timwa kyero mpo nraakye qora qatinani varihua mwi quara okyara hia ntapihi kyera timwa nyante tihanana tina, nte mwi quaraqaa ntumwa kyeqana mwihua timwa nyinrenrave.

<sup>12</sup> Nte mpo quaqaa ntumwa kyena qiarita  
nraakye qoravanto taqeqatavata  
hiama ntapihi kyeta taqeverave.

Mwihua ni qua rietavata hiama ntapihi kyeta rievarave.

Mwihua ni qua rieqata  
nkyiari uaqiahi kyaiqara qaqlira kyaivarovauma  
Kotiva mwihua uaqiahi kyaiqara vare quara nruka

nyataananrove, tiro.

(*Isaiaa 6:9-10*)

*Uiti uru isaqiro vura mwia okyara ntapihi kyero Iesusiva nai nraaqiaranramwu timwa nyunra*

(*Matiu 13:18-23; Ruku 8:11-15*)

<sup>13</sup> Iesusiva mwitaa timwa kyero mwinramwuhuara tiqaro, Nkye mpo? Nte mwi quaraqaa ntumwa kyena tu okyarara hiave nkye ntapihi riaavo? Nkye hia mwi quara okyara ntapihi kye riaivera, nte nraakiara mpo quaqaavata ntumwa kyena qiani quara, nkye nataama kyetave qio mwiavata ntapihi kyeta rievarare?

<sup>14</sup> Nte vaakya mwi quaraqaa ntumwa kyena tu okyarara tirerave.

Vaisivanto humwu isatora mwi quara okyara vahirero Kotira quama vaiho.

<sup>15</sup> Humwu aanraqaa tumuntu quara mwia okyara vahirero nraakyе qora mpronramwuvanto mwi humwunra votima kyeta variarave. Mwi nraakyе qorahua Kotira qua riaavarо Saataaniva nri ntero mwihua su nyaato mwutukyaqitairo mwi quara ntavihi kyero varairave.

<sup>16</sup> Mpohia nraakyе qorahua ori mwataqaa tumu nti humwunra votima kyeta variarave. Mwinramwuhuа Kotira mwakyaakya rieta mwi quarara qamwata kyeta variavaro

<sup>17</sup> quavanto hia mwihua mwutukyaqi vihata mwi nraakyе qorahua hia mwi quara mpo enta mpo enta riaraitita variavata mwi quara kyaara mpo hiahua mwihua uaqiamma nyatarerata uti variavata mwihua tiri rivorave tiqata Kotira qua qamwanrama qaqlira kyeta varia nraakyе qorahua variarave.

<sup>18</sup> Mpohia nraakyе qorahua uakukya qupiqairaqi isato humwunra votima kyeta variarave. Mwi nraakyе qorahua Kotira qua rieta

<sup>19</sup> mwiaqataita mwihua mwatanyaa inraikyara nronraqama kyeta riemwaqi viqata munimanrave, mpo inraikyarave, qamwata kyeqata mpo inraikya mpo inraikya vararerata riemwaqi vita Kotira qua qaqlira kyaavaro Kotira quavanto hia mwi nraakyе qorahuaqi vahata variarave.

<sup>20</sup> Mwihua mwitaa hiavata mpohia nraakyе qorahua kyuqe mwataqaa isato humwunra votima kye variarave. Mwi nraakyе qorahua Kotira qua rieta mwi quarara qutaave timwa kyeta, mwi quara riemwaqi vita kyuqe kyaiqa Kotirani varaqita quarave. Mpohia nraakyе qorahua mwi quara rieqata kyuqe kyaiqa Kotirani varaqi vi variavata, qaiqaa mpohia nraakyе qorahua mwihua nraatara kyeta uro mpoqavata kyuqe kyaiqa Kotirani varaqi vi variavata, qaiqaa mpohia nraakyе qorahua mwihua kyaiqavata nraatara kyeta uro nai mpoqavata kyuqe kyaiqa Kotirani varaqita vi variarave, tiro. Iesusiva turama.

*Iesusiva omwanra mpo quaqaa ntumwa kyero tura*

(*Ruku 8:16-18*)

<sup>21</sup> Iesusiva mwitaa timwa kyero mpo quaqaa ntumwa kyero tiqaro, Omwa qupi kyero taini uro vatairave? Tave vara kyero ntumwaqu tairave iho? Tainta mwemwaqi veta vatairave iho? Qaqlira, hia mwitaa hiraitiro, omwa qupi kyero tuaahera kyero qoqaa mwaanri vatairave.

<sup>22</sup> Nraakiara ekyaa uqeta taani inraikyara qoqama qovarama kyaananrove. Ntumwaqataani inraikyara ekyaa qoqama qovarama kyaananrove.

<sup>23</sup> Nkyi nyaato vahirera, mwi quara okyara ntapihi kyeta riaate, tiro.

<sup>24</sup> Iesusiva mwitaa timwa kyero mwiva tiqaro, Nkye qua riaara mwia ntapihi kyeqata riaate. Nkye nanra tukyaqaaave mpohua nyitave mpohua vara nyatera mwi tukyaqaaama Kotiva nkyitavata nyiqanro mwiaqaa mpoqavatama nyiananrove.

<sup>25</sup> Kotira qua riaariva variqiro viraro Kotiva mwia kyaahaqa hiraro mwiva mwia qua mpoqavatama riaananrove. Kotira qua hia riaariva variqiro viraro mwiva nanra inraikyave tutaaninra mwia vara kyairaro mwiva qatima variananrove, tiro.

*Kyara humwukyanaa quipqaaninranra mpo quaqaa ntumwa kyero tura*

<sup>26</sup> Mwitaa timwa kyero Jesusiva mpo quaqaa ntumwa kyero timwa nyinro tiqaro, Kotiva ntaqikyiariva mwaa quara votima kyeroma vaiho. Vaisivanto kyara humwu isatero

<sup>27</sup> mwiaqaatairo mwiva uro vaitero siviro qaiqaa vaitero siviro mwitaamaqiro vi variharo kyara humwuvanto nai ntukohiro quipqe varirave. Vaisivanto kyara humwu mwiva quipqaani okyarara hia ntapihiharo

<sup>28</sup> nai mwataqi vahiro naiqama kyero quipqairave. Tauraaqama kyero uru mwiva ntukohiro turu vera kyero uro tamwa riemwa taiharo tamwa mwiva peqaqa hirave.

<sup>29</sup> Peqaqama viharo vaisivanto paipa varero uro tamwa mwia teqa kyeqaro varairave, tiro.

*Maasiteti uruqaa ntumwa kyero tura*

(Matiu 13:31-32; Ruku 13:18-19)

<sup>30</sup> Jesusiva mwitaa timwa kyero qua timwa nyiqiro viro mwitaama tiro: Kotiva ntaqikyiva nanra inraikya votima kyerove vaiho? Mwianra rieqana nanra quaqaave ntumwa kyena qianinrave?

<sup>31</sup> Qio mwia maasiteti kyatari mwia tamwa votima kyeroma vaiho. Uru mwiva nai pata qiani vahirarama tuqo. Vaisivanto uru mwia vara kyero mwataqi tutaiharo

<sup>32</sup> quipqero kyatari nronraqama viro hini kyara tutaaravata nraatara kyero nritarero kyatari nronra vaharo mwia kyaaravantovata nronra vaharo nyaamwabantovata mwia kyauquqaa nraamwu hoqatero mwia aamanaqi varirave, tiro.

<sup>33</sup> Mwitaa timwa kyero Jesusiva mwi quara voti hira mpo qua mpo quaqaavata ntumwa kyeqaro timwa nyiqiro viro nraakye qoravanto ntapihi kyeta rie quara nraahu mwihua timwa nyunra.

<sup>34</sup> Mwiva nraakye qora qua timwa nyinrenro hia vutu kyero tiraitiro, mpo quaqaa ntuma kyeqaro timwa nyiqiro vuvata nraakye qoravanto nkyiari mwaatani vita nrita huvaro Jesusiva nanrianraa nai nraaqiaranramwu kyapata variqaro mwi quara okyara ntapihi kyero mwinramwuhua timwa nyunra.

*Toqa vaururu utura Jesusiva inronra huvaro taiqora*

(Matiu 8:23-27; Ruku 8:22-25)

<sup>35</sup> Mwi entara entama vuvaro Jesusiva nai nraaqiaranramwuanra tiqaro, Nrivaqen-ramwu nramanri nronra mwaa qara vare vutura hini tokyani quare, tiro.

<sup>36</sup> Mwitaa tuvata mwia nraaqiaranramwuvanto nraakye qora ntuvantuama vuhua mwini kyeta Jesusiva varu mpoturaqi mwaanrinteta mwia vita vareta vuvata mpotu mponramwuvanto mwihua vatama kyeta vurama.

<sup>37</sup> Mwihua nramanri mwiaqaa vi varuvaro qamwanrama kyero toqa vaururuvanto nronraqama kyero tiqaro nramanri ventaqiro nrivi varuvaro nramanrivanto mpotuqi mwaanrintero piqa kyarerо uti varuvaro

<sup>38</sup> Jesusiva mpotu vitiqi turuma ntumwa kyero vaite varuvata mwia nraaqiaranramwuvanto mwia uro vaurama kyeta tiqata, Mwaanra ti variara vaisio, tirinramwu nramanrivanto ntaqutu kyaaninranra e hiave nronraqama kyera riaaro? tita.

<sup>39</sup> Mwihua mwitaa tuvaro Jesusiva vaitoraqitairo siviro toqa vaururu mwia inronra hiro kyaarerera mwianra tiqaro, Qati tirema vahianta, tuvaro toqavanto taiqa vuvaro nramanrivanto utomwi tirema vahura.

<sup>40</sup> Tirema vahuvare Jesusiva nai nraaqiara mwihuara tiqaro, Nanra inraikya nraatuve aatu hi variavo? Nkye hiave nianra kepukyaqama kyeta rieta hiavo? tiro.

<sup>41</sup> Jesusiva mwitaa tuvata mwia nraaqiaranramwuvanto aatu hita kyauqu ntukik-inraaqateta tiqata, Qikye, mwaa nai nataahi vaisivave? Toqa vaururuvantovata, nramanrivantovata, mwia qua riaiho, tita tura.

## 5

*Iesusiva vaisi mpoqitairo vaana titamwa kyora  
(Matiu 8:28-34; Ruku 8:26-39)*

<sup>1</sup> Mwia nraaqiaranramwu mwitaa timwa kyeta mpotuqi vuahua kyaareraqa qara vareta hini tokya Kekesaani uro ntovaro

<sup>2</sup> Iesusiva mpotuqitairo mwaamwi ntovaro vaisi mpovanto ori ataamwuqitairo veva ntero uto Iesusira huntu kyora.

<sup>3-4</sup> Mwi vaisiva vaisi qunte varura ori ataamwuqi variqiro vi varuvaro vaanavanto mwia utaqi varuvaro varuvata mpo uhua seni vara kyeta mwia rupa taare tita, rupa tovaro mwi vaisiva airi kyaanta kyuqu kyauqu rupa tora ntapihiqaro ntukekaama kyora. Qaiqaavata mwitaama kyeqata mwia rupa taare tuvaro mwiva seni ntukekaama nraahu kyorara tiro, mpovanto mwia rupaariva hia varura. Mwia nraataraariva hia varuvaro

<sup>5</sup> mwi vaisiva entaqivata, iheravata, vaisi qunte varura ori ataamwuqi viro nrinro hiqaro qua aakyara timwaqiro viro taaqiqaaavata nrohiqaro qua aakyara tiqaro oriqotairo nai mwamwanta toqaaqamaqiro vi varura.

<sup>6</sup> Mwi vaisiva variqaro nyianrasairo Iesusira taqero hiantero uro mwia kyuqutarani tumu ntiro variqaro

<sup>7</sup> mpoqama kyero aakyara ntero tiqaro, Iesusio, Kotiva nai virini variva varihara e mwia mwaaquvanto variaro. Ni nataa hirere nrianro? Kotirara rieqara hia ni ruantema tuqo, tiro.

<sup>8</sup> Iesusiva vuni mwi vaisirara tiqaro, Uaqia hiara vaanavao, mwi vaisiraqitaira nritarera quante, tuvarora tiro, mwi vaanava mwitaa tura.

<sup>9</sup> Mwitaa tuvaro Iesusiva mwi vaananranra ena nrutu qianta tuvaro vaana mwiva nai nrutu ntero tiqaro, Ni nutu Airivave. Tire airivantoma mwaa vaisiraqi varuro, tiro.

<sup>10</sup> Mwitaa timwa kyero mwi vaanava qaiqaavata airi nani Iesusirara po kye tiro tiqaro, Hia mwaa mwataraqataira tiri titaire, tiro.

<sup>11</sup> Mwitaa timwa kyeta vuru taqovaro mwi entara quara airintivanto uhiqa nre varuvata

<sup>12</sup> vaananramwuvanto Iesusirara po kye tita tiqata, Qati tiri titaire quara mwihuaqi viqetaare, tuvaro

<sup>13</sup> Iesusiva mwihua qati kyovata vaana airivanto mwi vaisiraqitai nritareta uro quara mwihuaqi viqeteta varuvata mwiaqaataita quara 2,000 nramwuvanto hianteta okai veva vahuraqi ito ntamwanra nramanriqi kyavuhu vuvaro nramanrivanto ekyaa mwihua ntaquti kyora.

<sup>14</sup> Quaravanto nramanriqi ntumwa vita qutu uvata quaraqa ntaqikyu vaisinramwuhua taqeta mwiaqaatai hiantamwa teta mwatukya nronraqi uro mwi quara timwa nyita aanranivata viqata viti viri timwa nyiqi uvata mwi mwatanaahua mwi inraikyara taqarerata nrumu

<sup>15</sup> Iesusiva varunani taqovaro vaakya vaana airivanto mwia utaqi varu vaisiva qati mwatakyaa viro tuavaaqa utu tero mwia vu nraato ntapihi vuvaro varuvata mwihua mwia taqeta aatuma kyeta varura.

<sup>16</sup> Mwihua mwi vaisira taqeta aatu hiqata varuvata vaisi mponramwu vaakya mwi inraikyara taqohua timwa nyita tiqata, Iesusiva mwitaama kyaiharoma mwi vaisiva kyuqema viho, timwa kyeta quaravata timwa nyuvata

<sup>17</sup> mwi mwatanaahua mpoqama kyeta aatu hita Iesusirara tiqata, E tiri mwataqaataira quante, ti varura.

<sup>18</sup> Mwi mwatanaahua mwitaa tuvaro Iesusiva mpotuqi qaiqaa mwaanri nte varuvaro vaakya vaanavanto utaqi varu vaisiva Iesusirara po kye tiro tiqaro, Kyai ntevata ivata quankye, tiro.

**19** Mwitaa tuvaro Jesusiva qaqao tiro, Hia mate nivatama kyera vinanrave. E ena mwaatani uro variqarama Kotiva i kyuqema kyero kyaahaqama mwatairara ena nramwunaahuavata timwa nyiante. Kotiva iara po kye timwa mwatai quara uro ena nramwunaahuavata timwa nyiante, tiro.

**20** Jesusiva mwitaa tuvaro mwi vaisiva Jesusiva tunte hiro mwi mwatara kyero uro kyauqurutana mwatukya vahunani nrohiqaro Jesusiva nai kyuqema mwatorara nraakye qora timwa nyiqiro vuvata ekyaa mwia qua riohua mwi quara rieqata mwihua nkyiari kyauqu ntukikinraaqa teqata varura.

*Iairaasiva Jesusira uro huntu kyora  
(Matiu 9:18-26; Ruku 8:40-56)*

**21** Mwi mwatanaahua Iesusirara hia tiri mwaatani variante tuvaro Jesusiva mpotuqi qaiqaa mwaanri ntero nrumbu ntantero kyaarereraqa qara varero hini tokyani vuvata mwini nraakye qora airivanto ntuvantuama vita mwiva varunani ututuma vita varura.

**22** Varuvaro vaisi mpovanto mwi mwatukyaraqi mwaanra nraamwuqaa ntaqikyi varuva, Iairaasiva nri ntero Jesusira taqero mwia kyuqutarani tumu ntiro Iesusirara

**23** po kye tiro tiqaro, Ni naamwunravanto qaumama qutu quananrove. E nrinra ena kyauqu mwiaqaa vatairaro mwia nriqa quariva taiqa viraro qati variarive, tiro.

**24** Mwi vaisiva mwitaa tuvaro Jesusiva mwikyantiri vurama.

*Nraakye mpovanto Jesusira vaaqa vitiqa kyaatu kyora*

Iesusiva Iairaasikyantiri vi varuvata nraakye qora airivanto mwia vataqita viqata hisai hisaita mwia rataaqi vi varuvaro

**25** nraakye mpovanto ekyaa enta tora taqamwaqiro vuvavata mwihuaqi varura. Mwi nraakyeva 12 ihiara tora taqamwaqiro viqaro nronraqama kyero nriqa vuvaro variqaro

**26** mpo totaa mpo totaahuara ni kyaahaqa hiate timwa kyero, munima nyuvata mwihua hia mwia kyaahaqa hiraitita, mwia munima nraahu nramwa kye varuvaro mwia mwamwanta mpoqiyata uaqiana vuvaro varura.

**27-28** Mwi nraakyeva nraakye qora utaqi variqaro Jesusiva kyaiqa varorara rieqaro Jesusira nraakiara nriqanro nai riero tiqaro, Nte mwia tuavaaqaqa kyaatu kyaariro ni nriqa viva qamwanrama taiqa quarive, tiro. Nraakye mwiva mwitaa timwa kyero Jesusira vaaqaqa kyaatu kyovaro

**29** qamwanrama kyero mwia nraanre ntova aaharama vuvaro mwiva taqovaro mwia mwamwantavanto qio vahura.

**30** Mwia mwamwantavanto kyuqema vuvaro varuvaro Jesusiva qamwanrama kyero taqovaro mwia kepukya hinivanto vivuvaro mwiva tuqasaa viro nraakye qora mwia vataqita nruhua kyapara hiro, Tavave niqa tu varaiho? tiro.

**31** Jesusiva mwitaa tuvata mwia nraaqiaranramwu tiqatama, Nai tavaye iqa tu varaiho? Ena taqaante, nraakye qora airivanto i nraaqani viqata i rataaqi vi variavo, titi.

**32** Mwitaa tuvaro Jesusiva qati nraahu vaisi viri mwia puaama kyarero aitutu hi varuvaro

**33** nraakye mwiva nai mwamwanta kyuqema vurara riero mwia nraatu hiqaro kyuqu kyauqu nti varuvaro uro Jesusira kyuqutarani tumu ntiro mwi quara ekyaa qoqaa timwa mwuvaro

**34** Jesusiva nraakye mwianra tiqaro, Ni naamwunrao, e nianra mwiva ni kyaahaqa hiananrove qiararoma i mwamwantavanto kyuqema viho. Qioma i mwutukyavanto qihakya hirara quante, tiro.

*Iairaasira nraamwunra sivuma kyora*

<sup>35</sup> Jesusiva mwi quara qati ti varuvata Iairaasira nraamwuqitaita vaisi mponramwu nri nteta Iairaasira hunta kyeta mwianra tiqata, I nraamwunravanto qutuma viho. Haunri mwaanra ti vari vaisira ntavaaqavu tero, tuvaro

<sup>36</sup> Jesusivavata mwinramwuhua qua riero mwaanra nraamwuqaa ntaqikyi varu vaisirara tiqaro, Hia aatu hiante. Nianra kepukyaqama kyera rieqara variante, tiro.

<sup>37</sup> Jesusiva mwitaa timwa kyero mwiva Pitaaravata, Iemisiravata, Iemisira qata Ioninravata, mwinramwuhua nraahu sita varero

<sup>38</sup> Iairaasira nraamwuqi uro ntero taqvata nraakye qora nronraqama kyeta ti atura ntqiqata ntate varuvaro

<sup>39</sup> Jesusiva nraamwuqi vera ntero tiqaro, Nanranre nkye ntate variavo? Mwi qiaatarava hia qutu viho. Mwiva qati vaitema variho, tiro.

<sup>40</sup> Jesusiva mwitaa tuvata mwihua Jesusira quara raima mwateta varuvaro Jesusiva ekyaa nraakye qora vara veva mwaatani kyero qiaatara mwia nrohua qohuavata, taaramponramwu nai sita tohuavata, mwinramwuhua nraahu sita varero qiaatara mwiva qutuvata vatoraqi uro

<sup>41</sup> mwia kyaquqaa tu varero nai quaqitairo tiqaro, *Tarita kumi*. mwaa qiaatararu-va, nte iara siquantema tuqo, tiro.

<sup>42</sup> Jesusiva mwitaa tuvaro mwi qiaatarava qamwanrama siviro nrohi varura. Mwiva 12 ihi vara kyo qiaatarava siviro nrohi varuvata mwinramwuhua mwia taqeta nrihanrama vita mpoqama kyeta kyaqu ntukikinraaqate varuvaro

<sup>43</sup> Jesusiva mwinramwuhuara kepukyaqama kyero tiqaro, Qio mwaa taqaarara hia mpohua timwa nyiate. Mwaa qiaatarara kyara nraahu mwiate, turama.

## 6

### *Nasaretiqinaahua Jesusira qoririma mwatora* (Matiu 13:53-58; Ruku 4:16-30)

<sup>1</sup> Jesusiva mwi mwatara kyero nai mwaatani vuvata mwia nraaqiaranramwuvanto mwia vatama kyeta vurama.

<sup>2</sup> Jesusiva nai mwaatani uro variqaro mwaanra entaqaa uro mwaanra nraamwuqi qua mwakyaakya timwa nyi varuvata nraamwu mwipi nraakye qora airivanto varuhua mwia qua rieta kyaqu ntukikinraaqateta tiqata, Qikye, mwi vaisiva taisairove mwi quara mwi quara riaiho? Mwiva kyuqe okyara mpo vu nraato mpo vu nraato taisairo vara qirove tiho? Tava mwi kyaiqara okyara mwia nraamwute variharove mwiva nronra kyaiqa vare variho.

<sup>3</sup> Mwiva taintave mwitaa inraikya uti varivama variho. Mwiva Mariaara mwaaquve. Iemisivave Iosisivave Iutaavave Saimonivave mwihuama mwia qatanramwu variarave. Mwia nrunranramwuvata mwaini variarave, tita. Mwitaa timwaqi viqata Jesusira nramwunaahua mwianra qumina vaisive timwa kyeta, mwia qoririma mwatora.

<sup>4</sup> Mwihua mwitaa huvaro Jesusiva mwihuara tiqaro, Poropeti vaisi Kotira qua timwa nyi variariva mpo mwatani uro variraro mwi mwatanaavama mwianra qamwateqaroma mwia nrutu tuaaheraananrove. Mwi vaisiva nai mwaatani variqaro nai nrunra qata kyapata variraro mwia nramwunaava mwianra qumina mwaa mwatanaava nraahuma variho timwa kyero hiama mwia nrutu tuaaheraananrove, tiro.

<sup>5</sup> Mwitaa timwa kyero nraakye qoravanto Jesusirara qumina vaisive tura kyaara Jesusiva hia qio nai mwatukyaqi nronra kyaiqa varaariva vahuvaro mwiva nriqa vuhua pataqiatanaqaa nraahu nai kyaqu vatovata kyuqema vura.

<sup>6</sup> Mwia nramwunaahua mwianra hia qio tiri kyaahaqa hiarivave turara Jesusiva airi nraato tiqaro varura.

*Iesusiva nai nraaqiara 12 nramwu mpo mwatukya mpo mwatukya sitovata vurarta*

(*Matiu 10:5-15; Ruku 9:1-6*)

Mwi mwatukyaraqitairo Iesusiva siviro vintante nrintante mpo mwatukya mpo mwatukya variqi viqaro nraakyе qora mwakyaakya timwa nyiqiro vura.

<sup>7</sup> Iesusiva nai nraaqiara nyaanrama kyero taaratana taaratana sitovata 12 mwinramwuhua mpona mpona vura. Mwiva mwihua siteqaro vaisiqitaita vaana sitaivata qatinani nritareta quate tiro, mwiva mwihua kepukyя nyiqanro qua mwitaama tiro:

<sup>8</sup> Nkyenramwu virera hiqatama hiama mpo inraikya mpo inraikya vareta viraitita, aanraqaa kyauru quru vare vira nraahuma vareta quate.

<sup>9</sup> Hiama kyarave tuave munimave vareta quate. Kyuqu nraamwu mwia nraahuma vara ututaate. Hia soti taaratana ututaate. Kuaiqia nraahu utu vareta quate, tiro.

<sup>10</sup> Iesusiva mwi quara timwa kyero mwaa quaravata tiqaro, Nkyenramwu vivaro ta mwatanaavave nkyiara qamwateqaro nkyi sitairera, nkye nraamwu kuaikuqi nraahu variqita vitama mwi mwatukyara kyeta quate.

<sup>11</sup> Nkye vivaro ta mwatanaahuave hia nkyi qamwata nyateta nkyi qua hia riarera utivera, nkyetaqaatai ntovenrauma kyeta qaqlira tuto kyetama mwihua timwa nyita tiqata, Nraakiara nkyetama taqeverave, qiate, tiro.

<sup>12</sup> Iesusiva mwitaa timwa kyero sitovata mwia nraaqiaranramwuvanto uro viti viri timwa nyita tiqata, Uaqia hi aanranra qaqlira kyeta kyuqe hi aanranraqaa quate, tita.

<sup>13</sup> Mwitaa timwaqti viqata vaisi utaqi vaana varuhua sitovata qatinani nritare vuvata airi vaisi nriqa vuhua, mwihua qiataqaa vahamwenra qu nyateqata kyuqema nyatovata qio varura.

*Nramanri nyi varu vaisira Ioninra rukyora*

(*Matiu 14:1-12; Ruku 9:7-9*)

<sup>14</sup> Mwitaa huvaro ekyaa mwi mwatanaava Iesusirara nai timwa mwi nai timwa mwi hi varuvarora tiro, Herotiva vunyaa vaisivanto mwi mwatara Kariri mwataqaa ntaqikyi varuva, mwivavata Iesusira nrutu riora. Nraakyе qora hini uhua Iesusirara mwitaama tita, Mwi vaisiva Ionivave. Ioniva nramanri nyi varu vaisiva qutu vuva qaiqaa siviro nrohi variho. Mwiva qati siviro nrohi variqarora tiroma nronra kyaiqa qio vare variho, tita.

<sup>15</sup> Hini uhua mwitaa tuvata hini uhua qaqlao tita, Mwi vaisiva tiri haivaqava Iraisaava qovarama viho, tita. Mwitaa tuvata mpo uhua Iesusirara tiqata, Haaru poropeti vaisi Kotira qua qovarama kye varuhua, Iesusiva mwihua votima kyeroma variho, tita.

<sup>16</sup> Nraakyе qora Iesusirara mwitaa ti varuvaro Herotiva mwi quara riero tiqaro, Qikye, mwi vaisiva nramanri nyi varu vaisivama variho. Nte qiaqaro mwia nruntu teqa kyova Ioniva, mwivama qutu viraqitairo qati siviro nrohi variho. Mwiva qutu viraqitairo qati siviro nrohi variqarora tiroma, mwiva nronra kyaiqa qio vare variho, tiro.

<sup>17-18</sup> Tauraa Herotiva nai qata Piripira nraata Herotinamainra varatero varuvaro Ioniva nri ntero airi nani Herotirara tiqaro, E ena qata nraata hia varaataarama varera hiaro, tuvaro mwia kyaara Herotiva nai nraata Herotinamainranra tu quara rieqaro mwiva naivanto vaisi mpo titovaro Ioninra ntavaaqavu kyero rupaqiro uro karavuqi kyora.

<sup>19</sup> Kyovaro Ioniva karavuqi varuvaro Herotira nraatavanto Herotinamaiva varuvaro Ioniva mwianra tu quava mwia raraqa tovaro Ioninra rukyarerera utuvaro hia mwia rukyaari aanrava vahura.

<sup>20</sup> Ioniva vaisi kyuqeva avuqavuma kyero nrohi varurara tiro, Herotiva mwianra rieqaro mwia nraatu aatu hiqaro hia mwia rukyaate tiro. Mwitaa timwa kyero

Herotiva Ioniva ti varu quarara qamwateqarovata mwiva mwia quara taara nraato tura.

<sup>21</sup> Mwitaamaqi vuvaro mpo enta Herotinamaiva Ioninra rukyaari aanrava qio vahura. Mwi quara okyaravanto mwataamama vahiro. Herotiva nai mwato entava qovara huvaro mwi entaraqaa nronra vaisi kyara nyinrenro mwihua nyaanronra. Mwiva ntaqu vaisihuqaas ntaqikyi varu vaisihuave, airi inraikya vato vaisihuave, mwiva mwihua nyaanrama kyero kyara nyinro.

<sup>22</sup> Kyara nyuvata mwihua nre varuvaro Herotinamainra nraamwunravanto nrumu mwihua ihi ntamwa nyatero. Mwiva ihi nte varuvata Herotivavata mwiva kyara nyuhuavata mwi mwanraatara qamwata mwateta. Herotiva nai nraata nraamwunranra qamwatero mwianra tiqaro, Nanra inraikyarave i mwutukya vaiho? Ni timwa mpiraqe i mwiankye, tiro.

<sup>23</sup> Mwitaa timwa kyero mwiva kyauqu nriqiqaa vatero tiqaro, Nte quataama tuquo. E nanra inraikyarave tiraqena nte i mwianinrave. Mwata hini nte ntaqikyianinranra tiraqena nte ntainra kyena i mwianinrave, tiro.

<sup>24</sup> Herotiva mwitaa tuvaro mwanraata mwiva veva ntero uro nai nronra ntumwahiamwa hiro tiqaro, Nto, nte nanra inraikyarave qiaro ni mpiananrove? tiro. Mwitaa tuvaro mwia nrova tiqaro, Ioniva nramanri nyi vari vaisira mwia qiata mpiante qianta, tiro.

<sup>25</sup> Mwia nrova mwitaa tuvaro mwia nraamwunravanto hiantero uro vunyaa vaisi Herotirara tiqaro, Qamwanrama kyera Ioniva nramanri nyi vari vaisira nrunta teqa kyera tanuqa varaqira nrumu mpiante, tiro.

<sup>26</sup> Mwanraata mwiva mwitaa tuvaro Herotira mwutukyavanto uaquia huvarovata mwiva vaakya kyauqu nriqiqaa vatorara rieqaro, kyara nranrenrata nru vaisihuavata rieqaro tiqaro, Nte mwanraata mwianra tu quara nteqa kyaankyorave, timwa kyero

<sup>27</sup> mwiva karavu vaisiqaa ntaqikyi varu vaisira mpo titero tiqaro, Ioninra qiata qamwanrama kyera varaqira nrumu mpiante, tuvaro mwiva uro karavuqitairo mwia nrunta teqa kyero

<sup>28</sup> mwiaqatairo mwia qiata tanuqa vatero varaqiro nrumu mwanraata mwia mwuvaro mwiva varero uro nai nronra mwunra.

<sup>29</sup> Mwitaama kyovata Ioninra nraaqiaranramwuvanto mwi quara rieta mwihua nrumu Ioninra mwamwanta varaqita uro quntamwa kyora.

### *Iesusiva pata kyara airiqama kyero 5,000 vaisi nyunra*

*(Matiu 14:13-21; Ruku 9:10-17; Ioni 6:1-13)*

<sup>30</sup> Iesusiva nronraqama kyero sitovata vu vaisihua nrohita uro ntante nrumu ntuaantuama vita Iesusira nraaqani variqata mwihua nkyiari kyaiqa varoravata, nkyiari nraakyne qora timwa nyu quaravata, Iesusira timwa mwunra.

<sup>31</sup> Mwi entara nraakyne qora airivanto Iesusira taqarerata vita nrita hi varuvarora tiro, Iesusivavata mwia nraaqiaranramwuvata hia kyuqema kye kyara nreva vahuvata varura. Mwitaa huvaro Iesusiva tiqaro, Vivaqenramwu uro qumina sata tetaraa variarata nkyenramwu ho hiate, tiro.

<sup>32</sup> Iesusiva mwitaa timwa kyero mwinramwuhua sita varero mpotuqi mwaanri ntero kyaarerqaama tero qumina sata varirerata vurama.

<sup>33</sup> Mwinramwuhua vuvata airi nraakyne qoravanto mwihua taqeta tiqata, Mwihua mate mwinima vivarave, timwa kyeta mpo mwatukya mpo mwatukyaqitaita mwihua hianteta kyaarerera tokyasataa mwataqaa vuhua uro Iesusiva mpotuqima tero virera hunani mwihua nraante uro ntora.

<sup>34</sup> Mwihua nraante uro ntovaro Iesusiva nraakiara uro ntero mpotuqitairo mwatani mwaamwi ntero nraakyne qora airivanto ntuaantuama vuhua taqero mwihuara po

kye timwa kyero tiqaro, Qikye, vaisivanto hia mwihuaqaa ntaqikyi varihata sipisipivanto nkyiariaraa nrohi varia sipisipihua votima kyeta mwaa nraakye qorahua api nrohi variavo, tiro. Mwitaa timwa kyero mwini variqaro Jesusiva qua mwakyaakya mwihua timwa nyi varura.

<sup>35</sup> Jesusiva timwaqiro vuvaro huari mpuani tumi vuvata Jesusira nraaqiaranramwuvanto mwiva varunani uro nteta tiqata, Huarivanto mpuani tumi viharo mwaini qumina satave.

<sup>36</sup> E nraakye qora mwaahua sitairata mwihua uro kyara vahiani mwatukyaraqi nrohiqata kyara kyoqaama kye nraate. Mwihua hia kyara ntumwa vareta nriahuave, tita.

<sup>37</sup> Mwia nraaqiaranramwu mwitaa tuvaro Jesusiva qaqao tiro, Nkyetama mwihua kyara nyiate, tiro. Tuvata mwihua Jesusira kyapara hita tiqata, Tire nronra munima 200 kinaa mwia kyetave kyara vara kyeta mwihua nyiananrave? tita.

<sup>38</sup> Mwitaa tuvaro Jesusiva mwinramwuhua kyapara hiro tiqaro, Mpereti nataamave ntumwa taavo? Nkye uro taqaate, tuvata mwihua uro taqeta nrumu timwa mwita tiqata, Mpereti kyauquruvata tavukya taaratanavata nraahuma ntumwa taavo, tita.

<sup>39</sup> Mwia nraaqiaranramwu mwitaa tuvaro Jesusiva nraakye qora timwa nyinro tiqaro, Nkye mwukyau mwaa mpo sata mpo sata ekyaama mwatakyaa vita variate, tiro.

<sup>40</sup> Mwitaa tuvata mwihua mpo sata 100 nramwu mwatakyaa vita varuvata mpo sata 50 nramwu mwatakyaa vita varuvata mwitaamaqi vita ekyaaa nraakye qoravanto mwatakyaa vita varura.

<sup>41</sup> Mwatakyaa vita varuvaro Jesusiva mpereti hini kyauqu mwinramwunravata, tavukya taara mwitanavata, vara kyero nyaamwuni taqebaro Kotirara kyuqemave timwa kyero, mpereti nteqa kyero nai nraaqiaranramwu nyinro tiqaro, Qio nkye varaqita uro nyivata mwihua nraate, timwa kyero tavukya taara mwitanavata tukyama kyero nraakye qora mwihua ekyaaa nyuvata

<sup>42</sup> ekyaaa mwihua vikyokyama nronra.

<sup>43</sup> Vikyokyama nrovata Jesusira nraaqiaranramwu mwiaqataita nraakye qoravanto mperetivata tavukyavata nreqata viti vaati kyora utu aatuma kyeta tua nronra ntutantuto tuara 12 nramwu piqa kyora.

<sup>44</sup> Mwi entara 5,000 vaisi airivanto mwi kyarara nronra.

*Jesusiva kyaarerera mwutuqaa kyuqu ntamwaqiro vura  
(Matiu 14:22-33; Ioni 6:15-21)*

<sup>45</sup> Jesusiva mwihua kyara nyinro mwiaqatairo qamwanrama kyero nai nraaqiaranramwu sitero tiqaro, Nkye nraante mpotuqi mwaanrinte kyaarereraqamate vutura qarahi hini Vetasaitaani vi varivagenama nte nraakye qora sitaarita nkyiari mwaatani quate, tiro.

<sup>46</sup> Mwitaa tuvata mwihua vuvaro Jesusiva verara taaqiqaa Kotirara aakyara tirero viro.

<sup>47</sup> Jesusiva Kotirara aakyara tirero vuvaro entama vuvata mpotuqi vuhua kyaarerera tavaara sata vi varuvaro Jesusiva nanrianraa qatinani variro.

<sup>48</sup> Jesusiva mwini variqaro taqovaro toqavanto mwihua virera hunasairo nriqanro mpotu vente varuvata mpotuqi varuhua mwukyaaari tiqata nramanri ntainraqita vura. Mwitaamaqita vuvaro qauma qaatarera huvaro Jesusiva mwihua huntu kyarero kyaarerera mwutuqaa nrinro.

<sup>49-50</sup> Mwiva nriqanro mwihua nraatara kye quankye tiro, utuvata mwihua taqovaro Jesusiva kyaarerera mwutuqaa nri varuvata mwihua mpoqama kyero nraatuqa tovata vaanave timwa kyeta, aatu hiqata oi aai ti varura.

Mwihua oi aai ti varuvaro Iesusiva qamwanrama kyero mwihuara tiqaro, Kepukyaqama kyeta variate. Ntema nruquo. Hia aatu hiate, tiro.

<sup>51</sup> Mwitaa timwa kyero Iesusiva mpotuqi mwaanri ntero mwihua kyapata varuvaro toqavanto taiqa viro tirema vahuvata mwihua qikye tita, kyauqu ntukikinraaqate variqata

<sup>52</sup> Iesusiva mpereti taaraqia airiqama kyero nraakye qora nyunranra hia mwihua su nyaato ntapihuvata hia Iesusira okyarara ntapihi kyeta riora.

*Iesusiva Kenesaretini uro variqaro nriqa vuhua kyuqema kyora*

(Matiu 14:34-36)

<sup>53</sup> Mwihua vutura hini vantara Kenesaretini uro nte mwaamwi nteta mpotu rupate

<sup>54</sup> mwataqaa virera huvata mwi mwatanaahua Iesusira ntapihi kyeta taqeta, Qio mwaa mwivave, tita.

<sup>55</sup> Mwitaa timwa kyeta mwihua hianteta uro vutusai vurusaita nriqa vu nraakye qorahua sitaqita tumu Iesusiva variho tunani kyora.

<sup>56</sup> Iesusiva mwi mwataraqaa variqaro mpo mwatukya mpo mwatukya pata mwatukyave, nronra mwatukyave, uta aakyogi vahu mwatukyarave, Iesusiva mwini nrohi varuvata mwi mwatanaahua nriqa vuha sitaqita mwatukyaa kyeta Iesusira po kye tita tiqata, Qiove nriqa vi nraakye qorahua i tuavaaqa vitiqaa kyaativarave? tuvaro Iesusiva qiove tuvata ekyaa mwiaqa kyaatu kyo nraakye qorahua kyuqema nraahu vura.

## 7

*Kotiva timwa tai quava vaisivanto timwa tai quaravata nraatara kyero vahira*  
(Matiu 15:1-9)

<sup>1</sup> Parisi vaisinramwuvata mwaanra okyara ti varu vaisihuavata Iesusira taqarerata Ierusalemisaita nrumu Iesusiva varunani ntuvantuama vita variqata

<sup>2</sup> taqovata Iesusira nraaqiara mponramwuvanto variqata Parisi vaisi mwihua qua mwaanra okyara qaqla kyeta hia kyauqu hiqaraitita, kyara nre varura.

<sup>3</sup> Mwi entara Parisi vaisinramwuvata ekyaa Iutia mwatanaahuavata nkyiari haivaqahua timwa to quara rieqata mwitaa mwitaama kyeqata mwihua nkyiari kyauqu hiqe varura. Mwihua hia kyauqu hiqohua hia kyara nronra.

<sup>4</sup> Mwihua uro maaketiqi nrohita uro ntanteta nrumu varita hia nkyiari kyauqu hiqama kyaraitita, hia kyara nronra. Mwihua haivaqahua kaapu hiqe okyararave, tanu hiqe okyararave, mpo okyara mpo okyara timwa nyuvata mwihua riemwaqi viqata nrohi varura.

<sup>5</sup> Mwihua mwi quara riemwaqita nrohi varuhuara tita, Parisi vaisinramwuvata, mwaanra okyara ti varu vaisihuavata, Iesusira kyapara hita tiqata, Tiri haivaqahua qua timwa tora i nraaqiaranramwuvanto nteqa kyeta hia kyauqu hiqaraitita, kyara nre variavo. Nanraqamave mwihua mwitaa hi variavo? tita.

<sup>6</sup> Mwitaa tuvaro Iesusiva mwihua nkyiari timwa nyinro tiqaro, Nkye unraqama kyeqata kyuqe kyaiqa vare variahuave. Aisaiaava haaru variqaro nkyiara avuqavuma kyero qara ntumwa torave. Kotiva mwia kyaahaqa huvaro Aisaiaava Kotiva mwitaama tiho tiro:

Mwaa mwatanaahua nroqitai nraahu ni nutu tuaahere variavaro mwihua mwutukyavanto hia nianra vaiho.

<sup>7</sup> Mwihua mwaanra tiqatama mwihua nkyiari haivaqahua qua nraahu timwa nyiqata mwihua quminama ni nutu tuaahere variavo, tura.

(Aisaiaa 29:13)

Aisaiaava mwitaama kyero qara ntumwa torave.

<sup>8</sup> Kotiva nkyiara mwitaa mwitaa hiate tu quara nkye mwi quara qaqira kyetama vaisivanto timwa taa quara nraahuma riemwaqita nrohi variarave, tiro.

<sup>9</sup> Mwitaa timwa kyero Iesusiva mwihuara qaiqaa tiqaro, Qio kyuqema hiavo. Kotiva mwitaa mwitaa hiate tu quara nkye mwi quara qoririma kyeta nkyi haivaqahua timwa to quara nraahu riemwaqita vi variahuave.

<sup>10</sup> Mosesiva Kotiva timwa to quara riero nkyiara tiqaro, Ena nrohua qohua nrutu tuaahera nyataante. Nai nrohua qohuara uaqia hiani quara ti variani vaisira rukyaate, turave.

<sup>11</sup> Kotiva mwitaa timwa to quava vahata nkye mwi quara hia riaraitita, nkyeta riemwa kye nkye tiqata, Vaisivanto nai nrohua qohuara tiqaro, Nte nkyitana kyaahaqa hirera tu munimanra hia nkyitana nyinraitina, Kotirani vatarerave, tirera,

<sup>12</sup> mwi vaisiva qioma nai nrohua qohua qaqira kyero hia mwitanahuaqaa ntaqikyiqiro quananrove, qiarave.

<sup>13</sup> Nkye unra qua mwitaa tiqatama Kotira qua nteqa kyetama nkyita haivaqahua timwa nyu quara mwia nraahuma nraakyе qora timwa nyi variavo, tiro.

*Nnra inraikyavanto vaisi uaqama mwataiharo Kotiva mwianra uaqia hi vaisirave tura*

(Matiu 15:10-20)

<sup>14</sup> Iesusiva nraakyе qora ntuvaantuama vuhua nyaanrama kyero mwihuara timwa nyinro tiqaro, Nkye ekyaa nte tirera hiani quara kyuqema kyeta rieqatama variate.

<sup>15</sup> Kyaravanto qatinasairo vaisi utaqi vi inraikyava hia vaisi uaqama mwataiharo Kotiva mwianra mwiva uaqia hi vaisirave qiananrove. Vaisi utaqitairo qovara hi inraikyava vaisi vara kyero uaqama kyairave.

<sup>16</sup> Nkyi su nyaato kyuqe su nyaato vahirera, mwi quara okyara ntapihi kyeta riaate, tiro.

<sup>17</sup> Iesusiva mwitaa timwa kyero nraakyе qora ntuvaantuama vuhua mwini kyero nraamwuqi uro varuvata mwia nraaqiaranramwuvanto Iesusiva vaakya tu quara okyarara mwia kyapara huvaro

<sup>18</sup> Iesusiva tiqaro, Qikye, nkyi su nyaatovata mpo? Nkyi su nyaatovanto hiave ntapihi riaiho? Kyaravanto qatinasairo vaisi utaqi vi inraikyava hia qio vaisi uaqama mwataiharo Kotiva mwianra mwiva uaqia hi vaisivave, qiananro.

<sup>19</sup> Vaisivanto kyara nraihanro hia mwi kyarava mwia vu nraatoqive mwutukyaqive viraitiro, qati vaisi raraqi ito vahiro qio mwiqitairo qatinani tumitarairave, tiro. Iesusiva mwi quara timwa nyiqanro mwi quaraqotairo nraakyе qoravanto ekyaa kyara qio nraivaro Kotiva hiama nkyiara uaqia hia vaisihuave qiananrove, tura.

<sup>20</sup> Iesusiva mwitaa timwa kyero qua mpo tiqaro, Vu nraatoqinaa inraikyavanto, mwutukyaqinaa inraikyavanto, mwi inraikyava mwi inraikyava vaisi uaqama kyaiharo Kotiva mwi vaisirara uaqia hi vaisirave tirave.

<sup>21</sup> Vaisi vu nraato mwutukyaqitairo uaqia hi kyaiqara utuariva nriho. Vaisivanto nraakyevata api nrohiariva vu nraatoqitairo nriho. Mpuara varaarivavata mwiqitairo nriho. Vaisi ru kyaarivavata mwiqitairo nriho. Mpora nraata vaatiara nrohiarivavata mwiqitairo nriho.

<sup>22</sup> Mpova hi inraikyarara mwutukya ntiraro varaariva vu nraatoqitairo nriho. Airi munimave mpo inraikyave vaterovata qaiqaa kyaatavata nraahu vararerave ti variariva vu nraato tuaraqitairo nriho. Unra qua qiarivave, hia nai mwamwantaqa kyuqema ntumwa quarivave, mpova hi inraikyarara vairiqa hiarivave, mpora nrutu vara mwataniqa hiqaro qiarivave, nte nronra vaisive qiarivave, api nrohianinranra nraahu riemwaqi quarivave,

<sup>23</sup> ekyaa mwi inraikyava vaisi vu nraato mwutukyaqitairo nri ntero vaisi uaqama kyaiharo Kotiva mwia kyaara mwianra uaqia hi vaisirave qiananrove, tiro.

*Mpo mwatanaa nraakyevanto Iesusira kepukyara riovoro Iesusiva mwia kyaahqama kyora  
(Matiu 15:21-28)*

<sup>24</sup> Iesusiva mwitaa timwa kyero mwi mwatara kyero uro mpo mwatani Taiaavata Saitonivata vahu mwataraqaa varurama. Mwiva uro variro hia mpovanto ni taqaarive timwa kyero, nraamwu mpoqi varuvaro nraakye mpovanto mwiva varura vaakya ntapihi kyora.

<sup>25</sup> Ntapihi kyero nraakye mwia nraamwunraqi vaanavanto varu nraakyeva Iesusiva varuraqi uro ntero Iesusira nraaqani mwia kyuqusata tumu ntiro varura.

<sup>26</sup> Mwi nraakyeva nai mpo mwatanaava hia Iutaa mwatanaava, mwiva Siria mwata Ponisiaqi mwatatova varura. Mwi nraakyeva Iesusirara po kye tiro tiqaro, Ni naamwunraqitaira vaana titairaro qatinani nritaraarive, tiro.

<sup>27</sup> Nraakye mwiva mwitaa tuvaro Iesusiva nai timwa mwinro mpo quaqaa ntumwa kyero tiqaro, Qaqao, nte nraaqiara nraante kyara mwinrenrave. Nte nraaqiara kyara vara kyena vairi nyiankyorave, tiro. (Mwi quara okyara mwataamama vahiro: Iesusiva tiqaro, Kyai nte Iutaa mwatanaahua nraante kyaahaqa hiankye. Nte mpo mwatanaahua nraante kyaahaqa hiankyorave, tiro.)

<sup>28</sup> Tuvaro nraakye mwiva tiqaro, Nronrao, e qutaa qiararovata, vairivanto tainta mwemwaqi variqaro nraaqiaravanto kyara viti vaati nreqata kyaara nrainrave, tiro.

<sup>29</sup> Nraakye mwiva mwitaa tuvaro Iesusiva tiqaro, Kyuqema tira hiaro. E mwitaa qiarananra tina, nte vaana mwia titauqaro qatinani nritaraiho. I nraamwunravanto qio variho. Qio ena mwaatani quante, tiro.

<sup>30</sup> Iesusiva mwitaa tuvaro nraakye mwiva nai mwaatani vuva uro ntero taqovaro vaanavanto mwia nraamwunraqitairo nritarero vuvaro mwi qiaatarava taintaqua kyuqema vaite varurama.

### *Nraato tita vuvaro quavata hia ntapihi kyero tu vaisira Iesusiva kyaahaqama kyora*

<sup>31</sup> Iesusiva Taiaani variro mwiaqaatairo Saitoninivata uro variro mwisairo vintantero kyauqurutana mwatukya vahunanivata vintantero mwisairo kyaarerera nramanri Karirini tumu ntora.

<sup>32</sup> Mwini tumu varuvata mpo uhua vaisi mpo vitaqita uro Iesusiva varunani kyora. Mwia nraato tita vuvaro quavata hia ntapihi kyero tu vaisira vitaqita uro Iesusiva varunani kyeta Iesusirara po kye tita tiqata, Ena kyauqu mwiaqaa vatairaro kyuqema quarive, tita.

<sup>33</sup> Mwihua mwitaa tuvaro Iesusiva nraakye qoraqitairo vaisi mwia vitero uro nkyiariaraatana variqata Iesusiva nai kyauqu vukahiqa vaisi mwia nraatoqi veta vatero quaantu vihi kyero mwia mwaaqinriqaa vatero

<sup>34</sup> nyaamwuni taqevaro mwia ua huvaro po timwa kyero nai quaqitairo tiqaro, *Epatave*. Qatua quante, tiro.

<sup>35</sup> Mwitaa tuvaro mwia nraato tita vuva qamwanrama qatua vuvaro qio riero varuvaro mwia mwaaqinrivantovata qio vahuvaro qua ntapihi kyero ti varura.

<sup>36</sup> Mwitaa huvaro Iesusiva mwia nramwunaahuara kepukyaqama kyero tiqaro, Mwaa inraikyara taqaara hia mpohua timwa nyiate, tiro. Iesusiva mwitaa tuvata mwihua Iesusira qua hia riaraitita, mwi quara viti viri timwa nyiqita vura.

<sup>37</sup> Mwihua viti viri mwi quara timwa nyiqi vuvata mwi quara riohua qikye tita, kyauqu ntukikinraaqateta tiqata, Mwiva ekyaa kyaiqa kyuqema kyero vare varivave. Mwiva nraato tita quahua kyuqema kyaihata qio riaarave. Mwiva hia qua qiahua kyuqema kyaihata qio qua ti variarave, tura.

## 8

*Iesusiva qaiqaa pata kyara airiqama kyero nyunra  
(Matiu 15:32-39)*

<sup>1</sup> Mwi entara nraakye qora airi kyaatavanto Jesusira taqarerata nrumu ntuvan-tuama vita varura. Mwihua hia kyara mpoqianivata ntumwa taraitita, qati varuvaro Jesusiva nai nraaqiaranramwu nyaanrama kyero tiqaro,

<sup>2</sup> Nte nraakye qora mwaa variahuara po tuqo. Mwihua taarampo enta ni vatama kyeta variqi viqata nkyiari kyara nramwa taiqa kyaavo.

<sup>3</sup> Nte mwihua nkyiari mwaatani sitaarita mwihua nraataa hiro vuqitairo nrivu nrivuhirata aanraqaa tumu ntivorave. Mpo hiahua nyianrasaitavata nriahuave, tiro.

<sup>4</sup> Jesusiva mwitaa tuvata mwia nraaqiara mwihua qaqao tita, Mwaa qumina mwukyauqaave. Taisaitave kyara varaananrave, tita.

<sup>5</sup> Tuvaro Jesusiva mwihua ntumwahiamwa hiro, Nkyenramwu nataama mperetive ntumwa taavo? tuvata mwihua tiqata, Mpereti 7 nramwu ntumwa tauro, tita.

<sup>6</sup> Mwihua mwitaa tuvaro Jesusiva nraakye qora ntuvantua uhuara tiqaro, Mwatasata mwatakyaa quate, timwa kyero mpereti 7 nramwu vara kyero Kotirara kyuqeve timwa kyero, mwi kyarara nteqa kyero nai nraaqiaranramwu nyinro nraakye qora nyiate, tiro. Tuvata mwihua nraakye qora ntuvantua uhua nyunra.

<sup>7</sup> Nyuvaro Jesusiva tavukyavata vatora vara kyero Kotirara kyuqeve timwa kyero tiqaro, Tavukyavata tukyama kyeta nyiate, tiro.

<sup>8</sup> Mwitaa tuvata mwihua nyuvata nraakye qoravanto qioqama kyeta nronra. Qio nreta viti vaati kyora mwia nraaqiaranramwuvanto utu kyeta ntutantuto tuara 7 nramwu piqa kyora.

<sup>9</sup> Mwi entara 4,000 nraakye qora airivanto mwi kyarara qio nronra.

<sup>10</sup> Qio mwiaqaatairo Jesusiva nraakye qora sitero mwiva nai nraaqiaranramwu kya-pata mpotuqi mwaanri ntero kyaarera nramanri qara varero Ntamanutaa mwatani viro.

*Parisivanto Iesusirara nronra kyaiqa tirivata tinraamwu taante tura  
(Matiu 16:1-4; Ruku 12:54-56)*

<sup>11</sup> Iesusiva Ntamanutaa mwatani vuva uro ntovata Parisi vaisinramwu Jesusiva hunani nri nteta Jesusira inronrama mwatarerata mwia mwataara hiqata taqaare timwa kyeta tiqata, E nronra kyaiqa tiri tivuqaa varairaqaeta tire taqe iara qutaama Kotiva i titaiho qiare, tita.

<sup>12</sup> Mwihua mwitaa tuvaro Jesusira ua huvaro po tiro tiqaro, Mate mwaa varia nraakye qorahua nanraqamave tiqata nronra kyaiqa tinraamwu tairaqe tire i ok-yarara qutaave qiare ti variavo? Nte qutaa qianinra riaate. Mate mwaa entara variahua varivaqena nte hia ntena okyara mwihua nyaamwu teqana nronra kyaiqa vararerave, tiro.

<sup>13</sup> Iesusiva mwitaa timwa kyero qaqlira mwihua mwini kyero mpotuqi mwaanrin-tero kyaareraqaama tero vutura hini tokyanianra viro.

*Parisi vaisi kyaiqa nraatu rauriqata variate tura  
(Matiu 16:5-12)*

<sup>14</sup> Kyaareraqa vi varuvata Jesusira nraaqiaranramwuvanto mpereti taunru kyeta hia vararaitita, kuaiqia nraahu mpotuqi vatovaro

<sup>15</sup> Iesusiva mpo quaqaa ntumwa kyero tiqaro, (Taupatai inraikyava mperetiqi viharo mperetivanto kytairave.) Parisivantovata Herotivavata taupataira votima kyeta variavo. Nkye mwihua nyaatu aatu hiqata variate.

<sup>16</sup> Mwitaa huvata mwia nraaqiaranramwuvanto Jesusiva mpo quaqaa ntumwa kyero tu quara hia ntapihiraitita, nai timwa mwi nai timwa mwi hita tiqata, Nanra quave tiho? Mpereti hia varauunanra mwianra rieqarove mwitaa tiho? tita.

<sup>17</sup> Mwitaa ti varuvaro Jesusiva mwihua ti varu quara riero tiqaro, Nkye nanraqamave mpereti hia varaara kyaara airi qua ti variavo? Hiave nkyi su nyaatovanto ntapihi vihata ntapihi kyeta riaavo? Nkyi nyaato tita vihatave nkye hia ntapihi kyeta riaavo?

<sup>18</sup> Nkye su nyaato vataahua nkye hiave ntapihi kyeta rieta taqaavo? Nkye nte kyaiqa varaurara taunruve kyaavo?

<sup>19</sup> Nte 5,000 nraakye qora mpereti kyauquru nteqa kyena nyiavata nreta viti vaati kyora nataama tua nkye mwi entara piqa kyorave? tiro.

Jesusiva mwitaa tuvata mwihua tiqata, Qio tire mwi entara tua 12 nramwu piqa kyaavananrave, tita.

<sup>20</sup> Mwihua mwitaa tuvaro Jesusiva qaiqaa tiqaro, Qio nte 4,000 nraakye qora mpereti 7 nramwu nyiavata nreta viti vaati kyora nataama tua nkye mwi entara piqa kyorave? tiro.

Tuvata mwihua tiqata, Qio tire tua 7 nramwu mwi entara piqa kyaavananrave, tita.

<sup>21</sup> Mwihua mwitaa tuvaro Jesusiva tiqaro, (Nkye nte mwi kyaiqara varaurara ntapihi kyeta riaataara vaihata nkye taunru kyeta mpereti kuaiqia vare nrianranra airi qua ti variavo.) Nkyi su nyaato ntapihi virata ni okyarara riaataara vaihata nkye nataamaqitave ni okyarara hia ntapihi riaavo? tiro.

### *Iesusiva vaisi mpo vu qipa vura ntapairi mwatora*

<sup>22</sup> Jesusiva nai nraaqiaranramwu kyapata vuhua Vetasaitaani uro nteta mwini varuvata mpo uhua vu qipavu vaisira vita vareta Jesusiva varunani uro kyeta Jesusirara po tita tiqata, Vaisi mwaaqaa ena kyauqu vatairaro qio taqaarive, tita.

<sup>23</sup> Mwitaa tuvaro Jesusiva vu qipavu vaisira kyauqu tu varero vitaqiro uro mwatukya mwaaqani kyero mwini variqaro mwia vuqaa taara vihi kyero nai kyauqu mwiaqaa vatero mwia kyapara hiro tiqaro, Mpo inraikya qiove taqera hiaro? tiro.

<sup>24</sup> Jesusiva mwitaa tuvaro vaisi mwia vu qauma ntapairi virera huvaro mwiva vutu taqero tiqaro, Nte vaisi taqe varuqata mwihua kyatari votima kyetama nrohi variavo, tiro.

<sup>25</sup> Mwitaa tuvaro Jesusiva qaiqaa nai kyauqu mwia vuqaa vatovaro mwia vuvanto ntapairi vuvaro mwiva kyuqema kyero ekyaa inraikya taqero.

<sup>26</sup> Vaisi mwiva ntapihi kyero taqovaro Jesusiva mwia titero tiqaro, Hia mwi mwatukyaraqi nrumu ntantera viraitira, ena mwaatani quante, tiro. Turama.

### *Pitaava Iesusira okyarara tura*

(Matiu 16:13-20; Ruku 9:18-21)

<sup>27</sup> Mwiaqaatairo Jesusiva nai nraaqiaranramwuvata uro Sisariaa Piripai qaumato vahu mwatukyaraqiera viro. Aanraqaa viqaro nai nraaqiaranramwu kyapara hiro tiqaro, Nraakye qoravanto nianra tavave timwa kyeqatave ti variavo? tiro.

<sup>28</sup> Mwitaa tuvata mwihua tiqata, Mpo hiahua iara Ioniva nramanri nyi varivave qiyata, mpo hiahua iara mwiva tiri haivaqava Iraisaavave ti variavata, mpo hiahua iara mwiva tiri haivaqava poropeti vaisi mpovanto qaiqaa qovarama viro nrohi variho ti variavo, tita.

<sup>29</sup> Mwihua mwitaa tuvaro Jesusiva mwihua ntumwahiamwa hiro tiqaro, Qio nkyenramwu mpo? Nkye nianra ta vaisiva varihove qiao? tiro. Mwitaa tuvaro Pitaava tiqaro, E Karaisiva, Mesaiaavantove. E Kotiva titai vaisiva variaro, timwa kyeqatama tire varuro, tiro.

<sup>30</sup> Mwitaa tuvaro Jesusiva mwinramwuhuara kepukyaqama kyero tiqaro, Hia-vatama mwi quara mpohua timwa nyiate, tiro.

*Iesusiva nraakiara nai qutuaninranra timwa nyunra  
(Matiu 16:21-28; Ruku 9:22-27)*

<sup>31</sup> Mwitaa timwa kyero Iesusiva qua tohara tero vutu kyero nai nraaqiaranramwu mwiva nraakiara nai qutuaninranra timwa nyinro tiqaro, Nte mwatani mwatatai nraaqiarava variqana nriqa quani inraikyara airi vararerave. Nronra vaisivantovata, Kotira kyaiqa vara mwate varia vaisihua vunyaa vaisivantovata, nianra qumina vaisive timwa kyeta, ni qoririma matevarave. Mwihua mwitaa hiqatama ni ru kyaivaqena nte qutu vina taarampo enta varina qaiqaa qati siquaninrave, tiro.

<sup>32</sup> Iesusiva mwi quara vutu kyero qoqaa timwa nyuvaro Pitaava Iesusira vita uhini kyero qaqao tiro, Qora quama tira hiaro, tuvaro

<sup>33</sup> Iesusiva tuqasaa viro nai nraaqiaranramwu taqero Pitaara inronra hiro tiqaro, Saataanio, nyianrasata quante. Hia ni puqaa variante. E hia Kotiva riaintema kyera riaaro. E qumina vaisivanto riaintema kyera rie variaro, tiro.

<sup>34</sup> Iesusiva mwitaa timwa kyero nraakye qora ntuvaantua uhuavata nai nraaqiaranramwuvata nyaanrama kyero timwa nyinro tiqaro, Ni pataqiro nrianri vaisiva mwiva nai mwutukya vahianinra qaqira kyero vaisi rukyeta hirite kyatarira vara qu varero ni naakiara nriananrove.

<sup>35</sup> Nai mwatani qati varianinranra nraahu nronraqama kyero riaariva, mwi vaisiva ekyarama qutu quananrove. Vaisivanto nianra riemwaqiro viqaro ni kyaiqa vararerero ni qua riemwaqiro viqaro uro qutu quariva, mwi vaisiva ekyaa enta qati variqiro quananrove.

<sup>36</sup> Vaisivanto mwatani variqiro viqaro ekyaa inraikya ntuvaantuama kyero mwiaqatairo qutu viraro mwiva ntuvaantuama taani inraikyava nataama kyerove mwia kyaahaqa hiananrove? Hia mwi inraikyava mwia qio kyaahaqa hiananrove.

<sup>37</sup> Vaisivanto qutu viro nanra kyoqaae mwinro qaiqaa qati variqiro quananrove? Hia mwiva mwi entara qio kyoqaa utu kyero qaiqaa qati variqiro quananrove.

<sup>38</sup> Mwaa entara mwatani varia nraakye qorahua uaqia hi kyaiqara utiqatama Kotira qaqla kyaavo. Vaisi mpovanto nianravata ni quaravata mpoqama kyero kyauruariva, mwi vaisiva variraqe nte mwatani mwatatai nraaqiarava variqana nraakiara nte tumuani entaraqaa naivata kyaurira inraikya vara mwianinrave. Mwi entara ni kora peqa okyaravanto niqaatairo itero ntuvaahhe variraqena nyaamwunyaahua vatama kyena tumuaninrave. Mwi entara nte mwi vaisira naivata kyaurira inraikya vara mwianinrave, tiro. Iesusiva turama.

## 9

<sup>1</sup> Iesusiva mwitaa timwa kyero tiqaro, Nte qutaa qianinra riaate. Vaisi mponramwu mwaini mate mwaa sivita variahua hia qumina qutu vivarave. Kotiva nraakye qoraqaa kepukyaqama kyero ntaqikyiari entava nrianinra mwihua taqeta qutu vivarave, tiro.

*Iesusira mwamwantavanto nai nraahumwa mpo mwamwanta kyuqe mwamwanta kyuqu vura*

*(Matiu 17:1-13; Ruku 9:28-36)*

<sup>2</sup> Iesusiva mwitaa tuvaro 6 enta nritarovaro mwiva Pitaaravata, Iemisiravata, Ion-inravata, mwinramwuhua nraahu sita varero taaqi nronraqa nkyiariaraa varirerata vita. Mwini uro varuvaro mwihua suqaa Iesusira mwamwantavanto kyuqu viro vahuvaro

<sup>3</sup> mwia tuavaaqavantovata mpoqama kyero itero takyuqi varura. Hiama qio vaisi mpovanto hiqama tairaro mwitaama kyero takyu quananro.

<sup>4</sup> Mwitaama kyero mwia mwamwantavanto kyuqu viro vahuvata mwia nraaqiara taaramponramwuvanto variqata taqovata Iraisaakya Mosesikya mwihua haivaqahu-atana qovarama vita variqata Iesusira vatama kyeta qua ti varura.

<sup>5</sup> Mwitanahua Iesusira vatama kyeta qua ti varuvaro Pitaava Iesusirara tiqaro, Mwaanra ti variara vaisio, kyuqemama tirenramwu i vatama kyeta mwaini nrunrahua varuro. E qiove tirera, tire haraara nraamwu taaramponramwu iara mpo, Mosesirara mpo, Iraisaarara mpoma kyeta hoqa nyataare, tiro.

<sup>6</sup> Mwihua mpoqama kyero nyaatuqa tovata varuvarora tiro, Pitaava nanra quave qianinrave tiro, mwi quara turama.

<sup>7</sup> Mwitaa tuvaro tonamwuvanto qovara hiro mwihuaqaa ntumwaqu kyovaro quavanto tonamwuqitairo tiqaro, Mwaa ni maaqu mwianra ni mutukya nti variva variho. Nkyenramwu mwia qua riaate, tiro.

<sup>8</sup> Mwitaa tuvata mwia nraaqiaranramwuvanto qamwanrama kye tuqasaaqasa hiqata taqovaro hia mpovantovata Iesusira nraaqani varuvaro Iesusiva nraahu nanrianraa varura.

<sup>9</sup> Mwitaa huvata mwihua taaqi mwiaqaataita tumi varuvaro Iesusiva mwinramwuhuara kepukyaqama kyero tiqaro, Mateqa taqaa inraikyarara hia mpohua qamwanrama kyeta timwa nyiate. Nte mwatani mwatatai nraaqiarava nte nraakiara qutu vina qaiqaa qati sivina varianinraqaataita nkye qioma timwa nyiqita vivarave, tiro.

<sup>10</sup> Mwitaa tuvata Iesusiva tuntema kyeta hia mpohuavata timwa nyinraitita, nkyiari nraahu nai timwa mwi nai timwa mwi hita tiqata, Iesusiva nai qaiqaa siquaninranra tira nataa hi quarave tiho? tita.

<sup>11</sup> Mwitaa timwa kyeta mwihua Iesusira kyapara hita tiqata, Mwaanra okyara timwa nyi varia vaisihua tiri timwa timwita qiarave. Iraisaava tiri haivaqava mwiva nraante qovarama viro nri ntaananrove, ti variarave. Nanraqama mwihua mwitaa ti variavo? tita.

<sup>12</sup> Mwihua mwitaa tuvaro Iesusiva timwa nyinro tiqaro, Qio mwihua qutaa ti variarave. Iraisaava nraante ekyaa inraikya ntapihi kyero terama tarero nrianrivama variho. Ni mwatani mwatatai nraaqiarara mpo? Nanra qua nianra qara ntumwa tova vahirave? Nianra mwiva airi nriqa quani inraikyara varaqiro virata mwiaqaataita mwihua mwia qorrima mwatetama mwianra qumina vaisive tivarave tiro, qara ntumwa torave.

<sup>13</sup> Qio nte nkyiara tiqana Iraisaava vaakya nrumu varurarama tuqo. Mwiva nrumu varuvata vaisi mponramwuvanto mwia nkyiari kyakya huntema kyeta mwia uaqama mwatorave. Kotira mpukuqi qara ntumwa tova tiqaro, Nraakiara mwia mwitaa hirave tura mwivau mwia mwitaa hurave, tiro.

### *Iesusiva nraaqiaraqitairo vaana titovaro nritarero vura*

*(Matiu 17:14-21; Ruku 9:37-43)*

<sup>14</sup> Mwitaa timwa kyero Iesusiva nai nraaqiara hininramwu kyonani tumu taqovata nraakte qora airivanto ntuvaantuama vita varuvata mwaanra okyara ti varu vaisihua mwini variqata Iesusira nraaqiaranramwu kyapata inronra hi varura.

<sup>15</sup> Mwihua tumu ntovata mwini ntuvaantuama vita varuhua qamwanrama kyeta Iesusira taqeta nrihanrama vita hiante uro mwia qua mwantovaro

<sup>16</sup> Iesusiva nai nraaqiara hini mwinramwuhua kyapara hiro tiqaro, Nanra inraikya kyaarave nkye mwihua kyapata inronra hi variavo? tiro.

<sup>17</sup> Mwitaa tuvaro nraakte qora utaqitairo vaisi mpovanto mwia timwa mwinro tiqaro, Mwaanra ti variara vaisio, vaanavanto ni maaqu utaqi variharo mwiva hia qio qua tihanana tina, nte e hiananrani vitena nruquo.

<sup>18</sup> Vaanavanto ni maaqu ntavaaqavu kyero mwia mwataqaa tuta kyaiharo mwia nroqitairo taaraparavanto nrihanro nai vai kutiharo ekyaa mwia mwamwantavanto ntapihi viro kepukyaqama vivihirave. Nte i nraaqiarara vaana titavararo nritarero quarive tuqata mwihua mwitaa hiare qiavaro vaanavanto hia nritare virave, tiro.

<sup>19</sup> Vaisi mwiva mwitaa tuvaro Jesusiva mwi quara riero tiqaro, Nkye mwaa entara varia nraakye qorahua Kotirara qumimaqama kyeta hia mwianra riaavo. Qikye, nkye ni pupohaira uti variavana nte nataama nanive nkyi kyapata varianinrave? Nte nataama entave variqana nkyi kyaahaqa hianinrave? Qio nraaqiara mwia vita vareta mwaini nriate,

<sup>20</sup> tuvata vite nruvaro vaanavanto Jesusira taqero nraaqiara mwia vara mwataqaa tuta kyovaro tuqasaaqasa hi varuvaro mwia mwamwanta ntirintiri hi varuvaro taaraparavanto mwia nroqitairo mpo uti varura.

<sup>21</sup> Mwitaa hi varuvaro Jesusiva mwia qora kyapara hiro tiqaro, Taire tohara kyeroove mwitaa iho? tiro. Mwitaa tuvaro mwiva tiqaro, Nraaqiara pataru variharo mwitaamaqiro virave.

<sup>22</sup> Vaanavanto mwia rukyaankye tiro, mwia vara qiaqive nramanriqive tuta kyairave. E tiri qio kyaahaqa hirava varirera, tiriara po tiqara tiri kyaahaqa hiante, tiro.

<sup>23</sup> Mwitaa tuvaro Jesusiva qaqao tiro, E tiqara, E qio tiri kyaahaqa hiravave variaro qiananrave. E hiave ntapihira hiaro? Kotirara kepuqyaqama kyero riaariva ekyaa kyaiqa qio varaanarrove, tiro.

<sup>24</sup> Tuvaro nraaqiara mwia qova qamwanrama kyero tiqaro, Qio nte Kotirara riemwaqina vuva hiama qioqa iho. Evata ni kyaahaqa hiraqena nte Kotirara kepuqyaqama kye riemwaqina quankye, tiro.

<sup>25</sup> Mwitaa tuvaro Jesusiva taqovata nraakye qora ntuvantuama vuhua hisai hisai vaini nruvaro Jesusiva vaana inronra hiro tiqaro, E hia qua qiara vaanavave. E nraatora hiara vaanavave. E nraaqiara mwiqitaira nritarera quante. Hia qaiqaavata nraaqiara mwiaqi viqetera variante, tiro.

<sup>26</sup> Mwitaa tuvaro vaana mwiva nronraqama kyero aakyara ntero nraaqiara mwia vara ntuqutuvaro ntirintirma eqero mwiva qutu vuhua nraantantamwa kyero ntumwa viro vahuvata nraakye qoravanto tiqatama, Mwiva qutuma viho, tita.

<sup>27</sup> Tuvaro Jesusiva mwia kyauquqaa tu varero mwia vara mwaamwianrama kyovaro qio qati siviro varura.

<sup>28</sup> Nraaqiara mwiva qio qati siviro varuvaro Jesusiva mwiaqatairo uro nraamwuqi varuvata mwia nraaqiaranramwuvanto uro mwia tirema kye nanrianraa ntumwahiamwa hita tiqata, Tire vaana mwia titauraro hia nritarero virave. Nanraqamave tire hia qio mwitaa huro? tita.

<sup>29</sup> Mwihua mwitaa tuvaro Jesusiva tiqaro, Mwitaa hiani vaananra hia qio qati titaivarо nritarero quananrove. Kotirara aakyara nteqatama titaivarо qio nritarero quananrove, tiro. Jesusiva turama.

*Jesusiva qaiqaa nai qutu viro qati siquaninranra vutu kyero timwa nyunra  
(Matiu 17:22-23; Ruku 9:43-45)*

<sup>30-31</sup> Mwiaqatairo Jesusiva nai nraaqiaranramwu kyapata mwi mwatara kyeta Karirini vura. Mwini viqaro qua ntapihi kyero nai nraaqiaranramwu timwa nyianriva vahuvorora tiro, mpovanto tire quananra puaama kyero taqaankyo tiro uqeta kye sitero vura. Jesusiva nai nraaqiaranramwu timwa nyinro tiqaro, Mpovanto ni mwatani mwatatai nraaqiarara qovarama kyairata ni ntavaaqavuqita uro vaisi kyauquqi kyaivata ni ru kyaivaqena qutu vina taarampo enta vari kyenama qaiqaa qati siquaninrave, tiro.

<sup>32</sup> Jesusiva mwitaa tuvata mwia nraaqiaranramwuvanto mwi quara okyara hia ntapihi riaraitita, mwiva qua tura nraatu aatu hiqata hia mwi quara okyarara kyapara hura.

*Tavave tirinramwuqitairo nronraqama viro vunyaa vaisivanto variananrove tura  
(Matiu 18:1-5; Ruku 9:46-48)*

<sup>33</sup> Mwinramwuhua vuhua Kapenaamini uro ntovaro Iesusiva nraamwuqi uro variqaro nai nraaqiara mwihua kyapara hiro tiqaro, Nkyenramwu aanrani nriqata nanra qua timwa kyetave inronra hiavo? tiro.

<sup>34</sup> Mwitaa tuvata mwihua hia qua tiraitita, tirema varura. Mwinramwuhua aanrani nriqata mwitaama titi, Tavave tirinramwuqitairo nronraqama viro vunyaa vaisivanto variananrove? tura. Mwitaa turara titi, mwihua kyauriqata hia Iesusira timwa mwita.

<sup>35</sup> Mwinramwuhua hia qua tuvaro Iesusiva mwatakyaa viro mwihua nyaanrama kyero timwa nyinro tiqaro, Kyai nte nronraqama quataa hiani vaisira okyara nkyi timwa nyiankye. Vaisi mpovanto nronraqama quataa hiariva hiama vuni uro variqaro nronraqama quananrove. Mwiva nronraqama quataa hiraro nraakiarani variqaro ekyaa nraakye qora kyaiqa vaisi variarivama nronraqama quananrove, tiro.

<sup>36</sup> Iesusiva mwitaa timwa kyero nraaqiara pataru vita kyero mwihua suqaa vatero mwia kyavuhu kyero tuto tiqaro,

<sup>37</sup> Vaisi mpovanto nianra rieqaro nraaqiara mwataa hianinranra qamwateqaro kyugema mwataariva mwiva nivatama mwitaama mataaananrove. Mwiva mwitaa hiqaroma Kotiva ni titairavatama qamwata mwataaananrove, tiro. Iesusiva turama.

### *Vaisi mpovanto Iesusira nrutu nteqaro kyaiqa varora*

(Ruku 9:49-50)

<sup>38</sup> Iesusiva mwi quara tuvaro Ioniva tiqaro, Mwaanra ti variara vaisio, tire taqauraro vaisi mpovanto i nrutu nteqaro vaana tite varirave. Mwi vaisiva hia tirivata i vataqiro nrohi variva mwitaa ihatara titi, tire mwianra eqaante timwa kyeta, mwia antua tauro, tiro.

<sup>39</sup> Mwitaa tuvaro Iesusiva qaqao tiro, Hia mwi vaisira antuaate. Mpovanto ni nutu nteqaro nronra kyaiqa varero mwiaqatairo mwiva hia qamwanrama kyero nianra uaqia hi quara qiananrove.

<sup>40</sup> Mpovanto hia tiri nramwutaaqa hiariva varirera, mwi vaisiva tiri nramwunaavama variananrove, tiro.

<sup>41</sup> Nte qianinra riaate. Nkyi nramanri nraataa hirata varivaro mpovanto nkyiara Iesusira nraaqiarave timwa kyero, nramanri nkyi nyianri vaisiva variraro Kotiva hia mwia taunru kyaraitiro, mwia kyoqaa kyugema kyero mwiananrove, tiro.

### *Mpora uaquia hi aanranra nraamwuterorave tura*

(Matiu 18:6-9; Ruku 17:1-2)

<sup>42</sup> Iesusiva mwitaa timwa kyero nraaqiara pataru vaakya kyavuhu kyero tutorara tiqaro, Nraaqiara mwaa voti hiariva ni qua riaariva variraro vaisi mpovanto nri ntero uaquia hi aanranra mwia nraamwutairera, mwia kyaara mwi vaisiraqaa qua nronraqama kyero vahiananrove. Vaisi mwia nruntaqi ori nronra kyaantaru kyero kyaareriqi tuto kyaivaro mwi vaisiva hia nraaqiara pata mwia uaquia hi aanranra nraamwutaataarave.

<sup>43</sup> Mwi quara rieqarama i kyauqu hinivanto uaquia hi kyaiqara uti varirera, mwia teqa kyera kyaante. Mwiaqataira kyauqu kuaiqia nraahu vahiariva qioma nyaamwuni vira qati variananrave. E kyauqu taaratana vahiariva uaquia hi kyaiqara uti variraro i qia iteqaro hia qipaaninraqi tutu kyaankyorave.

<sup>44</sup> [Mwi mwataraqi mwimwivanto  
qutu quani mwamwantara qati nraahu  
nramwaqiro vi variananrove.

Qiavanto iteqaro hiama qipa quananrove.]

<sup>45</sup> I kyauqu hinivanto uaquia hi kyaiqara uti varirera, mwia teqa kyera kyaante. Mwiaqataira kyauqu kuaiqia nraahu vahiariva qioma nyaamwuni vira qati variananrave. E kyauqu taaratana vahiariva variraro i qia nronraqama kyero itaaninraqi tutu kyaankyorave.

**46** [Mwi mwataraqi mwimwivanto  
qutu quani mwamwantara  
qati nraahu nramwaqiro vi variananrove.  
Qiavanto iteqaro hiama qipa quananrove.]

**47** I vu hinivanto uaqia hi kyaqara utirera, vauru kyaante. E vu kuaiqia nraahu vahiariva qioma Kotiva ntaqikyi mwatukyaraqi vira qati variqira vinanrave. I vu taaratana vahiariva uaqia hi kyaqara utugira viraro i qia nronraqi tuto kyaankyorave.

**48** Mwi mwataraqi mwimwivanto  
qutu quani mwamwantara  
qati nraahu nramwaqiro vi variananrove.  
Qiavanto iteqaro hiama qipa quananrove.]

(Aisaiaa 66:24)

**49** Hore aatai ntema kyero qiaqotairo ekyaa nraakye qora aataananrove.

**50** Hore kyuqe inraikyave. Horevanto uaqiamma viro hia qiakyaa hirera, hiama qio qaiqaa utu kyairaro qiakyaa hiananrove. Qio nkye hore kyuqera votima kyeta varivararo nkyi mwutukya qihakya hirata nanrianra nanrianra kyuqe hiqata variate, tiro. Iesusiva turama.

## 10

*Nraakye qaqlira kye okyarara Iesusiva timwa nyunra*

*(Matiu 19:1-12; Ruku 16:18)*

**1** Qio Iesusiva mwi mwataraqi kyero Iutiaani vuva uro Iotaani nramanri qarero vutura hini tokyani vura. Iesusiva uro varuvata qaiqaa nraakye qora airivanto mwiva varunani ntuvantuama vita varuvaro Iesusiva nauqaa hunte qaiqaa mwakyaakya mwihua timwa nyi varura.

**2** Iesusiva mwini varuvata Parisi vaisinramwu mwiva yaruqani uro nteta Iesusiva api qua qiarive tita, mwihua mpo qua Iesusira kyapara hita tiqata, Qiove vaisivanto nai nraata qaqlira kyaananrove? tita.

**3** Tuvaro Iesusiva nkyiari kyapara hiro tiqaro, Haaru nkyi haivaqava Mosesiva nanra quave nkyiara mwitaa mwitaa hiate tiqaro timwa torave? tiro.

**4** Iesusiva mwitaa tuvata mwinramwuhua tiqata, Mosesiva mwataa timwa torave: Vaisi mpovanto nai nraata qaqlira kyarero hiqaro qara mpo ntumwa kyero nai nraata mwinro tiqaro, Qio i qaqlira kyauqo, timwa kyeroma titaananrove, turave. Mosesiva qua mwitaama kyero timwa torave, tita.

**5** Mwitaa tuvaro Iesusiva tiqaro, Mosesiva variqaro taqovaro nkyi haivaqahuamwanra mwutukyavanto kepuqyaqa huvata hia mwihua Kotirara riorave. Mwitaa hi varuvarora tiro, Mosesiva mwi quara timwa torave.

**6-7** Tauraaqama kyero hia mwitaama vahurave. Taura Kotiva nyaamwuvata mwatavata utu kyero vatero tiqaro, Nte vaisivata nraakyevata utu kyena vataurara tiro, vaisivanto nai nrohua qohua kyero nai nraatantiri taaqau vita mwitana kuaa mwamwanta votima kyeta varivarave.

**8** Mwitana hia mpo mwamwanta mpo mwamwanta variraitita, mwitana kuaa mwamwanta nraahuma varivarave, turave.

**9** Kotiva naivanto vaativata nraatavata vara kuaaqaa taaqau tairara tiro, hia mpovanto mwitanahua ntainra kyaarive, tiro.

**10** Iesusiva mwitaa timwa kyero nraamwuqi uro varuvata mwia nraaqiaranramwu Iesusira mwi quara okyarara kyapara huvaro

**11** Iesusiva mwinramwuhua timwa nyinro tiqaro, Vaisi mpovanto nai nraata qaqlira kyero mpo nraakye varaariva, mwi vaisiva qaraakya nraakyentiri nrohiqaroma mpuaraqama kyeroma mwikyantiri nrohiananrove.

<sup>12</sup> Mwia votima kyero nraakyevanto nai vaati qaqlira kyero qaraakya vaisi varaariva, mwi nraakyevavata qaraakya qoraisi mwikyantiri nrohiqaroma mpuaraqama kyero nrohiananrove, tiro.

*Iesusiva nraaqiaranramwuqaa nai kyauqu vateqaro kyuqema nyatora*

(Matiu 19:13-15; Ruku 18:15-17)

<sup>13</sup> Iesusiva varuvata nraakye qora mwihua nkyiari nraaqiara sita vareta Iesusiva nai kyauqu mwihuaqaa vataarive titi, Iesusiva varunani uro kyaare tuvata Iesusira nraaqiaranramwuvanto mwihua inronra hi varura.

<sup>14</sup> Mwitaa huvaro Iesusiva taqero nai nraaqiaranramwu nkyiari inronra hiro tiqaro, Qaqao, nkye nraaqiara mwihua qati kyaivata nte hunani nriate. Hia mwihua aanra antuaate. Kotiva ntaqikyiari mwatukyava mwi nraaqiarahua voti hiahua mwihua mwatukyama vahiananrove.

<sup>15</sup> Mwaa quara riaate. Vaisivanto hia nraaqiara votima kyero Kotira qua riaariva, mwi vaisiva hiama Kotiva ntaqikyiani mwatukyaraqi quananrove, tiro.

<sup>16</sup> Iesusiva mwitaa timwa kyero nraaqiara mwihua kyavuhu kyero tutoer nai kyauqu mwihuaqaa vateqaro mwihua kyuqema nyatora.

*Airi inraikya vato vaisirara tura*

(Matiu 19:16-30; Ruku 18:18-30)

<sup>17</sup> Iesusiva aanrani virera huvaro vaisi mpovanto hiantero nrumbu Iesusira kyapara hiro tiqaro, E mwaanra ti variara vaisiva kyuqevave. Nte nataa hi kyaiqara mpo kyaiqa mpo kyaiqa kyuqe kyaiqa Kotirani vara mwataaninraqaatainave nraakiara nte ekyaa enta qati variqina quaninrave? tiro.

<sup>18</sup> Mwitaa tuvaro Iesusiva tiqaro, E nanraqamave nianra vaisi kyuqevave qiaro? Kotiva nraahuma kyuqeva variho.

<sup>19</sup> E Kotiva timwa to quarara riaante. Mwia quavanto mwataama kyero vahirave: Hia mpora rukyaante.

Hia mpora nraakyera nrohianti.

Hia mpuara varaante.

Hia unra qua qianti.

Hia unra utu kyeqara mpova hiani inraikyara varaante.

Ena nrohua qohua nyutu tuaahera nyataante,

turave.

(Kyatura 20:12-16)

Kotira quavanto mwitaama kyero vahirave, tiro.

<sup>20</sup> Iesusiva mwitaa tuvaro mwi vaisiva tiqaro, Mwaanra ti variara vaisio, nte nraaqiarakyaa variqana nte mwi quara rieqana mwitaa mwitaamaqina nrunrave, tiro.

<sup>21</sup> Mwitaa tuvaro Iesusira mwutukyavanto mwi vaisirara vahuvaro mwia taqeqaro mwia timwa mwinro tiqaro, E kuaa inraikyara nraahu aara ntaaro. Uro ena vatena inraikyara mpohua nyinra munima vara kyera vehi nraakye qora ntainra kyera nyinranro nyaamwuni i kyoqaa vahiarive. Mwitaama kyera mwiaqaataira ni pataqira nriante, tiro.

<sup>22</sup> Iesusiva mwitaa tuvaro mwi vaisiva mwi quara riero inraanra viri ratero varura. Mwiva airi inraikya vatovara tiro, hia Iesusira qua riaraitiro, qaqlira kyero mwia mwutukyavanto uaqia huvaro vurama.

<sup>23</sup> Vuvaro Iesusiva nai nraaqiaranramwu vara ututuma kyero taqero tiqaro, Airi inraikya vatehua Kotiva ntaqikyi mwatukyaraqi mwukyaari tu kyeta vivarave, tiro.

<sup>24</sup> Mwitaa tuvata mwia nraaqiaranramwuvanto mwi quara rieta, Qikye titi, Iesusiva nataa hi quarave tiho, tuvaro Iesusiva qaiqaavata nraahu mwi quara tiqaro, Ni nraaqiaranramwu tuaavo, nraakye qoravanto Kotiva ntaqikyi mwatukyaraqi virerata mwukyaari tukyeqatama vivarave.

<sup>25</sup> (Kameri quara nronravanto nataama kyerove vuqa uvintaqi/ iriraqi ntuqiaraananrove? Hia qio mwitaa hiananrove.) Qio kamerivanto vuqa uvintaqi/ iriraqi ntuqiaraariva qio vahirarove, airi inraikya vataarivavata Kotiva ntaqikyi mwatukyaraqi qio quananrove, tiro.

<sup>26</sup> Iesusiva mwitaa tuvata mwia nraaqiaranramwuvanto mwia quara airi nraato tiqata qikye tita, Airi inraikya vataariva Kotiva ntaqikyinani hia qio virera, nai tarave Kotiva vitaananrove? tita.

<sup>27</sup> Mwitaa tuvaro Iesusiva mwihua itutuma kyero taqero tiqaro, Mwatani varihua nkyiari kepukyara hiama qio vivarave. Kotiva kyaahaqa hirata qio vivarave. Kotiva ekyaa kyaiqa vare varivave, tiro.

<sup>28</sup> Mwitaa tuvaro Pitaava tiqaro, Taqaante. Tirenramwu i vataqita virera hiqata ekyaa inraikya mwini kyeta qatima nrunro, tiro.

<sup>29</sup> Pitaava mwitaa tuvaro Iesusiva mwihuara tiqaro, Nte qutaa qua qianinra riaate. Hia nte nkye kyaiqa varerara taunru kyaaninrave. Vaisi mpovanto nai nraamwu maatave, nai qata vakyaave, nai nrunra nrakyaave, nronra qorave, nai nraaqiarave, nai mwatave, mwini kyero nianra riero ni kyaiqara riero quariva,

<sup>30</sup> mwi vaisiva mwia qiata kyoqaa vareqaro hia kuua nani varaananrove. Mwiva mate mwaa mwataraqaa kyoqaa vareqaro airi nani varaananrove. Mwiva nraamwuve, qata vakyaave, nrunra nrakyaave, nrohuave, nraaqiarave, mwatave, mwi inraikyara mwi inraikyara airi inraikya varaananrove. Ni qua varaari vaisiva varirata mwia kyaara mwia uaqlama mwataivaro variananrove. Qio ni qua varaariva qutu viraro Kotiva mwianra ekyaa enta qati variqira quante qiananrove.

<sup>31</sup> Mate nraakye qora airivanto vuni variahua qakyo tumitareta nraakiaranima varivarave. Mate nraakiarani varihua qakyo nritareta vunima varivarave, tiro.

*Iesusiva taara mpo nani nai qutu viro qaiqaa siquaninranra nai nraaqiaranramwu vutu kyero timwa nyunra*

*(Matiu 20:17-19; Ruku 18:31-34)*

<sup>32</sup> Mwihua Ierusareminianra aanraqaa vi varuvaro Iesusiva nraante nanrianraa vuni vi varura. Mwiva vuni vi varuvata mwia nraaqiaranramwuvanto nraakiara nriqata airi vu nraato tuqita vi varuvata nraakye qora mponramwuvanto Jesusira vataqita nruhuavata aatu hiqata nri varura. Mwitaamaqi vi varuvaro mwiaqatairo Iesusiva nai nraaqiara 12 nramwu nyaanrama kyero nkyiariaraa sita varero viqaro nraakiara naiqaa qovara hiani inraikyara qaiqaa timwa nyinro tiqaro,

<sup>33</sup> Riaate. Tire Ierusaremini uro variarata vaisi mponramwuvanto ni mwatani mwatatai nraaqiarara ntavaaqavuqita uro kyaivata Kotira kyaiqa vara mwate vari vaisihua mwihua vunyaa vaisinramwuvantovata, mwaanra okyara ti varia vaisihuavata, mwihua nianra mwia ru kyaate timwa kyeta, ni pitaqita uro Romeni mwatanaahua kyauquqi tutu kyaivata ni ru kyevarave.

<sup>34</sup> Mwi mwatanaahua nianra raima mateta, niqaa quaantu vihiteta, kyaantaqo ni ntuqutu kye vateta, ni rukyaivaqena qutu quaninrave. Nte qutu vina taarampo enta varina qaiqaa qati siquaninrave, tiro. Iesusiva turama.

*Iemisikya Ionikya nkyiaritana nronraqa hirara Iesusira kyapara hura*

*(Matiu 20:20-28)*

<sup>35</sup> Sepetira mwaaqutana Iemisikya Ionikya Iesusiva varunani uro nteta Iesusira kyapara hita tiqata, Mwaanra ti variara vaisio, e mpo inraikya tiritana quara eo timwa kyera mwitaama timwa taanterama nrunro, tita.

<sup>36</sup> Tuvaro Iesusiva tiqaro, Nte nkyitana nataave hianinrave? tiro.

<sup>37</sup> Tuvata mwitanahua tiqata, Nraakiara e kepukyavanto nraakye qoraqaa ntaqikyiqara nronra vaisi taintaqa mwatakyaa vira variqara e tiraro tiritanaqitairo mpovanto

nronraqama viro i kyauqu kyaatutani mwatakyaa viro variraro mpovanto nronraqama viro i kyauqu kyaantaaqani mwatakyaa viro variarive. Tiretana mwianra rieqatama i kyapara huro, tita.

<sup>38</sup> Mwitaa tuvaro Jesusiva qaqao tiro, Nkyetana hia ntapihi kyeta vu nraato tiraitita, apiqama kyeta ni kyapara hiavo. Kaapuqitai nramanri nraantema kyena nte nriqa quani nramanrinra nraaninra, qiove nkyetanavata nrevarave? Nte nriqa quani inraikyara nramanri varaantema kye varaaninra, qiove nkyetanavata varevarave? tiro.

<sup>39</sup> Tuvata mwitanahua tiqata, Tiretana qioma mwitaa hiananrave, tuvaro Jesusiva mwitanahua timwa nyinro tiqaro, Qutaama nte nramanri nraaninra nkyetanavata nrevarave. Qutaama nte nramanri varaaninra nkyetanavata varevarave.

<sup>40</sup> Ni kyauqu kyaatutanivata kyaantaaqanivata mwatakyaa vita vari vaisitanahuara hiama ni kyaiqa vaiho. Ni kova vaisi taaratana teramataihua, mwitanahuama mwiaqaa mwatakyaa vita varivarave, tiro.

<sup>41</sup> Mwitaa tuvata Iesusira nraaqiara hini 10 nramwuvanto mwi quara rieta mwia kyaara Iemisikya Ionikya inronra hura.

<sup>42</sup> Mwinramwuhua mwitanahua inronra hi varuvaro Jesusiva mwinramwuhuavata mwitanahuavata nyaanrama kyero eqaate tiro, Mpo mwatanahua ntaqikyiqi vi varia okyarara nkye ntapihiarave. Mwihua qiata vaisivanto nritareta virito variqata mwi kyaiqara mwaa kyaiqara vara timwataate ti variarave. Mwihua nronra vaisivanto tiqata, Tire nronravanto varuro. Tiri qua nraahu riemwaqita quate, ti variarave.

<sup>43</sup> Nkyenramwu hia mwihua nraantantaate. Nkyiqitairo mpovanto nronra varirero mwiva nkyi kyaiqa vaisi nraante variro nraakiara nronraqama quananrove.

<sup>44</sup> Nkyiqitairo mpovanto nritarero vuni varirero qiariva, mwiva rupa tai vaisira votima kyero nkyini kyaiqa vara nyataananrove.

<sup>45</sup> Nte mwatani mwatatai nraaqiaravama varuqo. Ntevata hia nraakye qoravanto nini kyaiqa vara mataatera tumuvave. Nte nraakye qorani kyaiqa varaqina viqana airi nraakye qora kyaahaqama nyatena mwihuara qutu virerave timwa kyena tumuvave, tiro. Jesusiva turama.

### *Iesusiva Vatimiaasira vu ntapairi kyora (Matiu 20:29-34; Ruku 18:35-43)*

<sup>46</sup> Jesusiva nai nraaqiaranramwuvata vuva Ierikoni uro ntero mwi mwatukyara nraatarero virero huvata nraakye qora airivanto mwia vataqita vi varuvaro vu qipa vu vaisiva Vatimiaasiva, Timiaasira mwaaqavanto variqaro mpo inraikya mpiae timwa kyeqaro nyaanru ti varu vaisiva aanra tokyani mwatakyaa viro varura.

<sup>47</sup> Mwiva mwini variqaro riovata mpo uhua tiqata, Jesusiva Nasaretinyaava nritare vi variho, tuvaro riero mwiaqatairo mwiva paatiro Iesusirara aakyara ntero tiqaro, Iesusio, Ntevitira mwaquo, qati nianra po kye timwa mataante, tiro.

<sup>48</sup> Vu qipa vu vaisiva mwitaa tuvata airi nraakye qoravanto mwia inronra hita tiqata, Tirema variante, tuvaro mwiva hia mwihua qua riaraitiro, qaiqaa paatiro aakyara ntero tiqaro, Ntevitira mwaquo, qati nianra po kye timwa mataante, tiro.

<sup>49</sup> Mwitaa timwaqi vuvaro Jesusiva nrumbu mwiaqaa siviro variro tiqaro, Nraanraivaro nrianrive, tuvata mwihua vu qipa vura nraanrama kyeta tiqata, Qio qamwateqara variante. Siquante. Mwiva ima nraanraiho, tita.

<sup>50</sup> Mwihua mwitaa tuvaro vaisi mwiva nai vaaqa qutora vara qatinani kyero siviro Jesusiva sivi varunani vuvaro

<sup>51</sup> Jesusiva mwia kyapara hiro tiqaro, Nivanto i nataa hiarive tirave nrianro? tiro. Mwitaa tuvaro vu qipa vu vaisiva tiqaro, Mwaanra ti variara vaisio, e ni pu ntapairi kyaanterama nruqo, tiro.

<sup>52</sup> Mwitaa tuvaro Iesusiva mwia timwa mwinro tiqaro, Qio quante. E nianra mwiva qio ni kyaahaqa hiananrove qiararoma i vu ntapairi viho, tiro. Mwitaa tuvaro mwia vuvanto qamwanrama kyero ntapairi vuvaro mwiva qio taqero. Mwiva qio taqevaro Iesusira vataqiro aanraqaa vurama.

## 11

*Nraakye qoravanto Iesusira qamwata mwate varuvaro mwiva Ierusaremiqi vura  
(Matiu 21:1-11; Ruku 19:28-40; Ioni 12:12-19)*

<sup>1</sup> Iesusiva nai nraaqiaranramwu kyapata vuvaro Ierusaremi qaumato vahuvata mwihua Mpetapaasivata Mpetaani mwatukyanivata uro ntor. Mwatukya mwitanava Oripi taaqi mwemwaqi vahura.

<sup>2</sup> Uro ntero Iesusiva nai nraaqiara taaratana sitero tiqaro, Nkyetana viti mwatukyaraqi vivaro nkyi suvanto vaakyama ntonki mpo kyaantaru tera taqaananrove. Mwia qaraakya ntonki hia vaisi mpovanto mwia mwoqaqa mwatakyaa viro varirave. Nkyetana uro mwia puaama kyeta mwia ntatu kyeta vitaqita nrumu ni mpiate.

<sup>3</sup> Mpovanto nkyitananra nanrave uti variavo tirera, nkyetana mwitaama mwia timwa mwiate. Tiri nronravanto ntonki mwianra tihatama nrunro. Pataqia vari kyero qaiqaa vara kyairaro nriananrove, qiate, tiro.

<sup>4</sup> Iesusiva mwitaa tuvata mwitanahua mwatukya mwiqi uro nte taqovaro ntonkivantao aanraqaa quesana kyaantarutova varuvata mwitana mwia huvanti varuvata

<sup>5</sup> vaisi mponramwu mwini sivita varuhua tiqata, Nkyetana nanraqamave mwia huvanti variavo?

<sup>6</sup> tuvata mwitanahua vaakya Iesusiva tu quara timwa nyuvata qio vitaate tita.

<sup>7</sup> Tuvata mwitanahua qaraakya ntonki mwia vitaqita uro Iesusira mwunra. Uro mwita mwia nraaqiaranramwuvanto nkyiari vaaqa ntonki mwoqaqa vuti mwatovaro Iesusiva mwiaqaa mwaanrintero mwatakyaa viro variro aanraqaa vura.

<sup>8</sup> Aanraqaa vi varuvata nraakye qoravanto Iesusirara qamwateqata nkyiari tuavaaqa aanravau vuti mwatovata hini uhua aakyoqitaita kyatari mwanre teqaqita uro aanravau vuti mwatora.

<sup>9</sup> Mwitaamaqi viqata Iesusira vuni vi varu nraakye qorahuavata, mwia mwoqani nri varu nraakye qorahuavata, aakyara nteta tiqata,  
Kyai mwia nrutu tuaaheraare.

Nronravanto nai nrutuqa nri vari vaisira  
kyuqema mwataiho.

*(Ihi 118:26)*

<sup>10</sup> Tiri haivaqava Ntevitiva  
kepuqyaqama kyero ntaqikyintema kyero  
mwivavata ntaqikyiqiro quaninranra tiro,  
Kotiva mwia kyuqema mwataiho. Ekyaa nyaamwunyaahua mwia nrutu tuaaheraate,  
titia.

<sup>11</sup> Mwitaa timwaqita vuvaro Iesusiva Ierusaremini uro ntor. Uro ntero Kotira nraamwu nronraqi verantero ekyaa inraikya mwiqi vahura taqamwa ntero, veva ntero entama virera huvaro nai nraaqiara 12 nramwu kyapata nrumu ntantero Mpetaanini vura.

*Fiki hia tamwa riora  
(Matiu 21:18-19)*

<sup>12</sup> Mwia qanranraa mwinramwuhua Mpetaanisaita uto ntanteta nri varuvaro Iesusira nraataa huvaro

<sup>13</sup> mwiva taqovaro vutura mposata fiki, mwia tamwa nre varu kyatariva vahuvaro mwia mwanre airi vahura. Mwia tamwa vahirera hiqy kyena nraankye timwa kyero, Iesusiva taqovaro hia mwia tamwa rio entava vahuvavora tiro, mwanre nraahu ntor.

<sup>14</sup> Mwanre nraahu ntovaro Iesusiva fiki mwia inronra hiro tiqaro, Qio, nraakiara hia mpovantovata iqaatairo hiqo kyero nraanrive, tiro. Mwitaa tuvata mwia nraaqiaranramwuvata mwi quara riora.

*Iesusiva Kotira nraamwuqi vura  
(Matiu 21:12-17; Ruku 19:45-48; Ioni 2:13-22)*

<sup>15</sup> Iesusiva nai nraaqiaranramwuvata vuva Ierusaremini uro ntero Iesusiva qaiqaa Kotira nraamwuqi vera ntero taqovata kyoqaa kyaiqa varo vaisihua mwipi variqata kyoqaa kyaiqa vare varura. Mwitaa hi varuvaro Iesusiva mwihua vara veva mwaatani kyero, munima mwukyaari tuqasaaqi varu vaisihua taintavata vara rauru kyero, nyaamwa nyiqata munima vare varu vaisihua taintavata vara rauru kyero.

<sup>16</sup> Mwitaama kyero mwiva mwi nraamwunra aatareqanianra tiqaro, Mwaini hia aanravanto vaiho. Nkye kyoqaa mwitaa inraikya vareqata hia mwaini vitare nritare hiate, tiro.

<sup>17</sup> Iesusiva mwitaa timwa kyero mwiva qua timwa nyinro tiqaro, Kotira mpukuqi mwitaama qua qara ntumwa tova vahirave.

Nraakyе qora mpo mwatanaa mpo mwatanaahua

ni nraamwuanra Kotirara aakyara nte varia

nraamwunrave tivarave, turave.

*(Aisaiaa 56:7)*

Nkye variavaro mwaa nraamwuva mpuara vaisivanto tuqeta kye ntuvaantua hia nraamwunra votima kyeroma vaiho, tiro.

<sup>18</sup> Iesusiva mwitaa tuvata Kotira nraamwuqi variqata Kotira kyaiqa varo vaisihuvata, mwihua Iesusira qua rieta mwia kyaara Iesusira rukye aanranra puaa hi varura. Mwihua taqovata qati nraakyе qoravanto Iesusiva tu quarara qamwateqata kyauqu ntukikinraaqate varuvata mwinramwuhua mwianra rieqata Iesusirara aatu hiqata varura.

<sup>19</sup> Iesusiva Ierusaremini varuvaro enta hirera huvaro mwiva nai nraaqiaranramwuvata Ierusaremi kyero vurama.

*Fiki aaharama vura  
(Matiu 21:20-22)*

<sup>20</sup> Mwia qanranraa toqaqi mwinramwuhua uto ntanteta nriqatama mwia nraaqiaranramwuvanto taqovaro fiki mwia kyauqu kyaaravantovata aaharama viro vahuvaro

<sup>21</sup> Pitaava Iesusiva mwi kyatarirara tu quara riemwa tero Iesusirara tiqaro, Qikye, mwaanra ti variara vaisio, taqaante. Fiki e inronrama taarava tamusama viho, tiro.

<sup>22</sup> Mwitaa tuvaro Iesusiva mwinramwuhua timwa nyinro tiqaro, Nte qianinra riaate. Nkyenramwu Kotirara kepukyaqama kyeta riemwaqita nrohiate.

<sup>23</sup> Nkyenramwu mwitaamaqi viqata mwaa taaqirara tiqata, Tumitarera kyaareragi ntumwa quante, tivarave. Mwitaa tiqata hia taara nraato tiraitita, qutaaqama mwitaa hiananrove tivera, Kotiva nkyinramwu kyaahaqa hiraro taaqvianto tumitarero kyaareragi ntumwa quananrove.

<sup>24</sup> Nte mwianra rieqanama nkyiara mwitaa tirerave. Nkye mpo inraikya vararerata Kotirara aakyara nteqata qutaama mwi inraikyara ni mpiananrove tiqatama nkye mwi inraikyara mpo inraikya qio varevarave.

<sup>25</sup> Nkye sivi variqata Kotirara aakyara nteqatama mpovanto nkyi uaqlama nyataani quava vahirera, nkye mwi quara hia riemwaqi viraitita, mwi vaisira qua taunru kye qaqla kyeta Kotirara aakyara qiate. Nkye mwitaa hivaro nkyi sova nyaamwuni variva nkye uaqla hi kyaiqla uti quaravata qaqla kyero taunru nyataananrove.

<sup>26</sup> [Nkye hia mpohuaqa qua vahira qaqla kye taunru kyaivera, nkyi sova nyaamwuni variva hiamma nkyitaqaavata qua vahianinra qaqla kyero taunru kyaananrove], tiro.

*Iesusirara tava i nronraqama kyaiharave e mwi kyaiqara varaqira vi variaro tura  
(Matiu 21:23-27; Ruku 20:1-8)*

<sup>27</sup> Iesusiva mwitaa timwa kyero nai nraaqiaranramwuvata uto ntero Ierusaremini uro varura. Iesusiva qaiqaa Kotira nraamwu nronraqi vera ntero nrohi varuvata Kotira nraamwuqi variqata Kotira kyaiqa vara mwate varu vaisihua mwihua nronra vaisinramwuvata, mwaanra okyara ti varu vaisihuavata, Iutaa nronra vaisivata, mwihua Iesusiva hunani uro nteta

<sup>28</sup> Iesusira mwia inronra hita tiqata, E ta vaisiva variqarave mwaa kyaiqara vare variaro? Tava i nronraqama kyaiharave e mwaa kyaiqara vare variaro? tita.

<sup>29</sup> Mwihua mwitaa tuvaro Iesusiva nkyiari timwa nyinro tiqaro, Kyai nte nraante nkyi kyaparama nyataarita nkye nte qiani quara qio timwa mpivera nte ntena nronraqama vina variqana mwaa kyaiqara varaaninranra nkyi timwa nyiankye.

<sup>30</sup> Tava Ioninra nronraqama kyovarove mwiva nraakye qora nramanri nyunrave? Kotivave iho, qati vaisivantove iho? Nkye ni timwa mpivaqena riaankye, tiro.

<sup>31</sup> Iesusiva mwitaa tuvata mwihua nkyiari kyapara hita tiqata, Tire nanra quave qiananrave? Mate tire tiqata, Kotiva Ioninra nronraqama kyorave, qiarera, Iesusiva tiriera, Nkye nanraqamave Ioninra quara hia quataave qiavo? qiananrove.

<sup>32</sup> Qaiqaa mate tire tiqata, Vaisivanto nraahu Ioninra nronraqama kyorave, qiarera, mwi quavavata hia qioqa hiananrove, tura. Qati nraakye qoravanto Ioninranra Kotira qua qovarama kyo vaisivave turara tita, mwihua qati nraakye qora nyaatu aatu hiqata hia mwitaa tita.

<sup>33</sup> Mwihua mwitaa timwa kyeta mwiaqaatai Iesusirara tiqata, Nai tava Ioninra nronraqama kyorave? Hia tire ntapihunanrave, tita.

Mwihua mwitaa tuvaro Iesusiva mwihuara tiqaro, Nkye mwitaa qiavana nte nina nronraqama kyaihana mwaa kyaiqara vare varurara hia nkyitavata timwa nyianinrave, tiro. Iesusiva turama.

## 12

*Uaini vara tutoraqi hia kyuqema kyeta ntaqikyu vaisihuara tura  
(Matiu 21:33-46; Ruku 20:9-19)*

<sup>1</sup> Iesusiva mwitaa timwa kyero mpo quaqaa ntumwa kyero mwihua timwa nyinro tiqaro, Vaisi mpovanto uaini vara tutero mwia vara ututu tutukya ratero mwata quvu kyero uaini tatianinra ututero haraara nraamwu mponta vaimwanraanra nraamwu hoqa kyero vatorave. Mwiaqaatairo nyianra mpo mwatani virero hiqaro mpo uhua timwa nyinro tiqaro, Nkye ni uaini aakyoqaa ntaqikyi mate varivaqe nte quankye, timwa kyero mwiva nyianra mpo mwatani vurave.

<sup>2</sup> Mwini uro varuvaro uaini hiqo entava nri ntovaro mwiva nai kyaiqa vaisi mpo titero tiqaro, E uro ni aakyoqaa ntaqikyi mate varihua tiratama uaini ninanivata hiqo kye mataate, turave.

<sup>3</sup> Mwitaa tuvaro mwini uvata mwia aakyoqaa ntaqikyi mwate varu vaisihua mwia kyaiqa vaisi mwia ntavaaqavu kyeta kyaamwuqotaita ntuquku kyeta vateta, hia uaini hiqo kye mwia mwinraitita, qati titovaro nrumbu ntantero vurave.

<sup>4</sup> Qati nrumbu ntantero uvavar aakyo qova nai kyaiqa vaisi mpo titovaro uvata mwia aakyoqaa ntaqikyi mwate varuhua mwia qiaata raarahitima kyeta kyaaurira inraikya mwunrave.

<sup>5</sup> Mwitaa huvaro aakyo qova nai kyaiqa vaisi mpo qaiqaa titovaro uvata mwia rukyorave. Qio mwitaamaqi vita, hini nai kyaiqa vaisi titohua kyaamwuqotaita ntuquku kyeta, hini rukyorara tuquo.

<sup>6</sup> Mwia kyaiqa vaisi taiqa kyovaro vaisi kuaiqia nraahu varura. Mwi vaisiva aakyo qora mwaaquvanto varuvaro mwia qora mwutukyavanto mwianra mpoqiaavata vahu

vaisiva varuvaro mwia qova mwiavata nraakiara ekyaara titero tiqaro, Mwihua ni mwaaku taqeta nianra mwia mwaaquve tiqatama mwia kyuqema mwatevarave, tiro.

<sup>7</sup> Mwitaa timwa kyero mwia titovaro mwini vuvata mwia aakyoqaa ntaqikyi varu vaisihua mwia mwaaqu taqeta, nai timwa mwi nai timwa mwi hita tiqata, Mwia qova qutu viraro mwaa vaisiva nai qora mwatavata, mwitaa inraikyavata, varaarivama variho. Nrivaqe tire mwia rukyaararo mwiva vararero hiani inraikyava tirini nraahu vahiarive, turave.

<sup>8</sup> Mwihua mwitaa timwa kyeta mwia mwaaqu ntavaaqavu kye rukyeta mwaaqani mwaati qaqlira kyorave, tiro.

<sup>9</sup> Iesusiva mwitaa timwa kyero mwihua kyaparama nyatero tiqaro, Mwihua mwitaa hurara tiro, aakyo qova nai mwaaqu rukyera kyaara nataave hiananrove? Aakyo qova nri ntero nai aakyoqaa ntaqikyi vaisihua ru taiqa kyero kyaata mpo vaisinramwuanra tiqaro, Nkyema ni aakyoqaa ntaqikyi mataate, qiananrove, tiro.

<sup>10</sup> Iesusiva mwitaa timwa kyero mwiva mwihuara tiqaro, Nkye hiave Kotira mpukuqi mwaa quara kyaara ntumwa kyeta riaavo? Mwi quava mwataama tiro: Ori nraamwu hoqeqlata

ori mpo hia kyuquerave timwa kye qaqlira kyaava,  
mwi oriva puhaqama viho.

<sup>11</sup> Kotiva mwi orira vara kyero nronraqama kyaihata  
tire mwia kyaiqa taqeta kyuquerave tunanrave, turave.

(Ihi 118:22-23)

Kotira mpukuqi mwitaama kye qara ntumwa torave. Nkye hiave mwi quara kyaara ntumwa kyeta riaavo? tiro.

<sup>12</sup> Iesusiva mwitaa tuvata Iutaa nronra vaisinramwuvanto ntapihi riovoro Iesusiva uaini utaqaa ntaqikyi mwato vaisihuara tiqaroma mwihuaqaa ntumwa kyero tuvata mwihua Iesusira ntavaaqavu kyeta ko qiare tura. Mwitaa timwa kyeta nraakyne goravanto mwipi ntuvantuama vuhua tiri inronra hivorave tita, mwihua nraatu hiqata Iesusira kyeta vurama.

### *Taakisiqa hirara Iesusira kyapara hora*

(Matiu 22:15-22; Ruku 20:20-26)

<sup>13</sup> Iutaa vaisi nronranramwuvanto vari kyeta mwiaqatai mwihua Parisi vaisi mponramwuvata, Herotira nramwunaahua mponramwuvata, siteta tiqata, Nkye Iesusira kyapara hivaro mwiva api qua tiraqe mwiaqa qua vataare, tita.

<sup>14</sup> Tuvata mwihua Iesusiva hunani uro nteta mwia kyapara hita tiqata, Mwaanra ti variara vaisio, tire taqaurara e kyuqe qua nraahu ti variaravave. E hia vaisi nraatu aatu hiraitira, nronra vaisiaravata, qumina vaisiaravata, kuaa qua nraahu ti variaravave. E vaisivanto Kotira vataqita vi aanranra ntapihi kyera timwa nyi variaro. Qio mwaa quara timwa timwinraqe riaare. Tire Kotira qua rieqata qiove tire Romeni mwatanaahua vunyaa vaisi Sisaara taakisi mwiananrave? (Mwi mwatanaahua hia Kotira qua riaahuave.) Mwia taakisi mwiananrave hiave mwiananrave? tita.

<sup>15</sup> Mwihua mwitaa tuvaro Iesusiva taqovata mwihua nroqataita kyuqe kyuqe ti variqata mwihua su nyaatoqitaita Iesusira uaqlama mwatarerata uti varuvaro Iesusiva tiqaro, Nanraqamave nkyenramwu nivanto api qua qiarive tita mwitaa qiaovo? Qio munima mpoku vara kyaivaqe nte taqaankye, tiro.

<sup>16</sup> Mwitaa tuvata munima mwia kuaaru mwuvoro mwiva mwihua kyapara hiro tiqaro, Munima mwiaqaa tara virivata tara nrutuvatave vaiho? tiro.

<sup>17</sup> Mwitaa tuvata mwihua Sisaarave tuvaro Iesusiva mwihuara tiqaro, Mwianra rieqatama nkye Sisaava hianinra nai mwita, Kotiva hianinra nai mwiate, tiro. Iesusiva mwitaa tuvata mwihua mwi quara rieta tiqata, Qikye, mwiva tiri qua nraatara kyero kyuqe qua tiho, timwa kyeta kyauqu ntukikinraaqate varura.

*Saitiusi vaisinramwuvanto qutu vita qaiqaa qati sivirara Iesusira kyapara hora  
(Matiu 22:23-33; Ruku 20:27-40)*

<sup>18</sup> Saitiusi vaisivanto Iesusiva varunani uro ntor. Saitiusi mwihua nkyiari mwaanra qua rieqatama mwihua tiqata, Vaisivanto qutu viro qio mwiva ekyaarama qutu viro hiama qaiqaavata siquananrove, ti varu vaisihua uro nteta

<sup>19</sup> Iesusira kyapara hita tiqata, Mwaanra ti variara vaisio, tiri haivaqava Mosesiva mwaanra qua timwa timwiqanro mwitaa turave. Vaisivanto hia nraaqiara mwataraitiro, qutu viraro mwia qatavantove vakyaavave mwia nraata varatero nraaqiara mwata humwuanrama mwataananrove, turave.

<sup>20</sup> Tire qiarara e riaante. Haaru qate vakye 7 nramwu varurave. Mwihua sakyavaa toharenaava nraakye varatero hia nraaqiara mwataraitiro, qutu vuvaro

<sup>21</sup> mwia qata mwia nanaava mwia nraata varatero mwivavata hia nraaqiara mwataraitiro, qati variqiro viro qutu vurave. Mwiva qutu vuvaro mwia qata mwia nanaava nraakye mwia varatero hia nraaqiaravata mwataraitiro, qutu vuvarave.

<sup>22</sup> Qio mwitaamaqi vita ekyaa mwinramwuhua nraakye mwia varateta hia nraaqiaravata mwataraitita, ekyaa qati nraahu qutu vurave. Qutu vuvaro nraakiara nraakye mwivavata variro qutu vurave.

<sup>23</sup> Nraakiara nraakye qora qaiqaa qati sivita vari entaraqaa mwi nraakyeva tara nraatave variananrove? Mwiva qati varu entara qoraisi 7 nramwu vara torave, tita.

<sup>24</sup> Saitiusi vaisinramwuvanto mwitaa tuvaro Iesusiva nkyiari timwa nyinro tiqaro, Nkye Kotira qua qara ntumwa tora hia ntapihi kyaahuave. Nkye Kotira kepukyavata hia ntapihi kyaahuave. Qutaara hia ntapihi kyaahuara tita nkye api qua ti variavo.

<sup>25</sup> Nraakiara nraakye qora qutu vihua qutu viraqitaita qaiqaa sivita qati variqita vi entara hiama nraata vaati vare okyarava vahiananrove. Mwihua nyaamwunyaahua votima kyetama varivarave, tiro.

<sup>26</sup> Iesusiva mwitaa timwa kyero mwiva tiqaro, Nraakye qora qutu vihua qati sivirara nte nkyi kyapara hirerave. Nkye hiave Kotira mpukuqi Mosesiva mwaa quara qara ntumwa tora kyaara ntumwa kyeta ntapihi riaavo? Kotiva mwitaa turave. Nte mwanriqa Kotivave. Nte i haivaqara Evarahaamunraqaa ntaqikyina, Aisaakiraqaa ntaqikyina, Iaikopuraqaa ntaqikyuvave, turave.

<sup>27</sup> Qio riaate, Kotiva mwanriqvanto hia qutu viro taiqavi inraikyaraqaa ntaqikyi varivama variho. Nraakye qoravanto qaiqaa qati sivi okyarara nkyi su nyaatovanto hia ntapihi vihata api rieqata ti variarave, tiro.

*Nanra quave Kotiva vuni vatai quava vaiho tura  
(Matiu 22:34-40)*

<sup>28</sup> Iesusiva Saitiusi vaisi kyapata qua ti varuvaro mwaanra okyara ti varu vaisiva uro variqaro riovaro Iesusiva Saitiusi vaisi qua nraatara kyeqaro kyuqe qua nraahu ti varuvaro mwi vaisiva Iesusira kyapara tiro tiqaro, Kotiva qua timwa taiva nanra quavantove vuni vahi quava vaiho? tiro.

<sup>29</sup> Tuvaro Iesusiva mwia timwa mwinro tiqaro, Mwaa quava vuni vahi quavama vaiho. Mwataama qara ntumwa torave:

Nkye Isareri mwatanaahua riaate.

Tiriqaa ntaqikyi variva Kotiva mwanriqa kuaiqiyavanto variho.

<sup>30</sup> Ekyaa ena mwutukyaqitairave,  
ekyaa ena mwanraquraqitairave,  
ekyaa ena vu nraatoqitairave,  
ekyaa ena kepukyaqotairave,  
Kotirara nraahu mwutukya vahirara variante,  
turave.

*(Lo 6:5)*

<sup>31</sup> Mwi quava vaiharo mwia nraakiara okyara qua mpo vaiho. Mwitaama tiro:  
Enanra mwutukya vataarantema kyera  
ena henanranravata  
mwutukya vahirara variante. *(Wok Pris 19:18)* Qio mwi quatanava vuni vahi  
quatanavama vaiho. Hia mpo quavanto mwi quatana nraatara kyairave, tiro.

<sup>32</sup> Iesusiva mwitaa tuvaro mwaanra okyara ti varu vaisiva tiqaro, Mwaanra ti  
variara vaisio, e kyuqema kyera ntapihima qiaro. E quutaama tiqara, Mwanriqa Kotiva  
kuaiqiavanto nraahu variho qiaro. Hia mwanriqa mpovantovata variho, qiaro.

<sup>33</sup> E quutaama tiqara, Vaisivanto mwutukyaqitairove, kepuqyaqotairove, Kotirara  
mpoqama kyero mwutukya ntiraro variananrove. Vaisivanto nai henanranra nan-  
rianra mwutukya vahintema kyero mwianravata mwutukya vahiarive, qiananrave.  
Mwi quatanava vuni vahiqaro hini qua nraatara kyairave. Mpo qua Kotira kyaiqa vara  
mwateqata quara rukyeta qia quara mwate varia quaravata, mwi quatanava nraatara  
kyairave, tiro.

<sup>34</sup> Mwitaa tuvaro Iesusiva taqovaro vaisi mwiva kyuqema kyero tuvaro Iesusiva  
mwia timwa mwinro tiqaro, Kotiva iqaa ntaqikyiariva i qaumatomava vaiho, tiro.  
Iesusiva mwitaa tuvata vaisi kyaatavantovata Iesusiva tiri qua nraatara kyaankyo tita,  
hia Iesusira qaiqaavata nrumu mpo qua mpo qua kyapara huru.

### *Iesusiva Mesaiaara kyapara huru* *(Matiu 22:41-46; Ruku 20:41-44)*

<sup>35</sup> Iesusiva Kotira nraamwuqi variqaro qua timwa nyiqiro viro tiqaro, Mwaanra  
okyara ti varia vaisihua tiqatama, Kotiva titaariva Mesaiaavanto Ntevitira okyara kuaa  
okyara mwiqinaa vaisivantoma variananrove, qiarave. Mwihua nataama kyeta mwi  
quara ntapihi kyetave mwitaa tivarave?

<sup>36</sup> Haaru Kotira mwanraquravanto kyaahaqa huvaro Ntevitiva nai mwitaa turave:  
Kotiva ni nronra vaisiara tiqaro,  
E nritarera ni kyauqu kyaatutani  
mwatakyaa vira variraqena  
nte i nramwutaahua ru taiqa mwataarira  
mwihuaqaa kyuqu ntamwa tera variante, turave. (Sng 110:1)

Ntevitiva mwitaa turave.

<sup>37</sup> Ntevitiva Mesaiaavanto qovara hianinranra tiqaro, Mwiva ni nronra vaisive,  
turave. Ntevitiva mwitaa turara tiro, nataama kyerove Mesaiaavanto Ntevitira nraisi  
qio variananrove? tiro. Iesusiva mwitaa tuvata qumina nraakye qora airivanto  
ntuvaantuama vita varuhua mwia qua rieqatama qamwateqata varura.

### *Mwaanra okyara ti varu vaisihuara tura* *(Matiu 23:1-36; Ruku 11:37-54, 20:45-47)*

<sup>38</sup> Iesusiva qua timwa nyiqiro viro tiqaro, Vaisi mponramwu mwaanra okyara ti  
variahua, nkye mwihua rauriqata variate. Nraakye qoravanto mwihua tiri taqeta  
qua mwanteqata qamwata timwataate tita, mwihua mpuahaa tuavaaqa kyuqera utu  
vareta nraakye qora suqaa maaketiqi nrohi variarave.

<sup>39</sup> Mwihua mwaanra nraamwuqi vera nteta uaqia hi taintara qaqlira kyeta, kyuqe  
taintaqaa nraahu mwatakyaa vita variarave. Mwihua omwata nraanraqaa variqata  
mwihua nronra vaisive qiate tita, uro vaisi nronravanto mwatakyaa vita variaraqaa  
mwihuaavata mwatakyaa vita variarave.

<sup>40</sup> Mwihua tetoka varia nraakyehua nraamwuve mpo inraikyave vataara mpuara  
vareta tiqata, Mpohua tire qora inraikya utunana taqeta tiriara uaqia hia vaisihuave  
tivorave, tita mwihua nraakye qora suqaa variqata Kotirara mpuahaama kyeta  
aakyara ti variarave. Qikye, mwia kyaara mwihuaqaa qua nronraqama kyero  
vahiananrove, tiro.

*Vehi nraakyevanto munima pataqia Kotira mwunra  
(Ruku 21:1-4)*

<sup>41</sup> Kotira nraamwuqi taqu mpo vahuvata mwipi nraakye qoravanto Kotira kyaiqara rieqata munima kye varura.

Qio Iesusiva qua taiqa kyero uro taqu mwia tataaqa mwatakyaa viro variqaro nraakye qoravanto munima taqu mwipi kyeqata vi varuvaro Iesusiva taqe varura. Mwiva taqvata airi inraikya vatohua munima airi mwipi kyora.

<sup>42</sup> Kye varuvaro vehi tetoka nraakyevantovata nri ntero munima patarutana nraahu taquqi kyora.

<sup>43</sup> Munima pataqiarutana mwipi kyovaro Iesusiva nai nraaqiaranramwu nyaanrama kyero timwa nyinro tiqaro, Taqaate, Vehi nraakye tetokavanto kyai munimava airi inraikya vataahua airi munima kyaaravata nraatara kyaiho.

<sup>44</sup> Airi inraikya vataahua nkyiari munima hini nraahuma taquqi kyaavo. Nraakye mwiva vehi variqaro nai vatai munimanra ekyaama kyaiho, tiro. Iesusiva turama.

## 13

*Kotira nraamwu akukyaaraqama kyeta ntapairi kyerara tura  
(Matiu 24:1-2; Ruku 21:5-6)*

<sup>1</sup> Iesusiva Kotira nraamwuqitairo veva ntovaro mwia nraa qiara mpovanto tiqaro, Qikye, mwaanra ti variara vaisio, taqaante. Mwaa nraamwuva kyuqe hi nraamwunrave. Mpo ori mpo ori nronraqotaita vara kyeta hoqataa nraamwuva kyuqe nraamwuma vaiho, tiro.

<sup>2</sup> Mwitaa tuvaro Iesusiva mwia timwa mwinro tiqaro, Mate e nronra nraamwu taqe variaro. Nraakiara ori naiqaa naiqaa taaqautaava hia mwitaama kyero vahiananrove. Mwaa nraamwunra ntapairiqata mwia venta kyaivaro tumu ntiraro orivanto ntuvuraa vura hiro api mpona mpona vahiananrove, tiro.

*Iesusiva nraakiara airi muaanra qovara hiananrove tura  
(Matiu 24:3-14; Ruku 21:7-19)*

<sup>3</sup> Mwitaa timwa kyero Iesusiva uro Oripi taaqiqaa mwatakyaa viro varura. Oripi taaqivanto mwaa hini vahuvare Kotira nraamwuvanto vutura qarahi hini vahura. Mwitaama vahuvata Pitaavavata, Iemisivavata, Ionivavata, Enturuuvatama kyeta mwinramwuhua nraahu vuhua Iesusiva varunani uro nteta mwia kyapara hita tiqata,

<sup>4</sup> E vaakya Kotira nraamwuanra qiananra taireve qovara hiananrove? Nanra nanra inraikya qovara hiraqeve tirenramwu mwi inraikyaraqaa apeqama kyeta taqe qata mwi entava nrianriva qaumatoqa iho qiananrave? E tiri timwa timwinraqe riaare, titaa.

<sup>5</sup> Mwihua mwitaa tuvaro Iesusiva tiqaro, Mpovanto mwi quara nkyi api timwa nyankyo titaa, rauriqatama variate.

<sup>6</sup> Nraakiara airi vaisivanto nri nteta ni nutu nteta tiqata, Kotiva ni titaihana nruvave. Nte mwaa mwivave, tivata airi nraakye qoravanto mwihua unra quara qutaa quave tivarave.

<sup>7</sup> Nkye varivaro nronraqama kye ntaqi quava nraaqasairove mponasairove nrinrata hia aatu hiate. Ntaqi inraikyava qovara hiananrove. Mwitaa hirata nkye mwianra rieqata mwi entava ekyaara enta nri ntaiho tivorave.

<sup>8</sup> Mpo mwatanaavanto mpo mwatanaanravata ntaquan'anrove. Qiata vaisi mpovanto nai hena qiata vaisi mpovata ntaquan'anrove. Mpo mwata mpo mwata mwaturavanto tuananrove. Mpo mwata mpo mwata kyarara aarantevarave. Mwi inraikyava mwi inraikyava qovarama virata hia ekyaara enta nri ntaiho qiate. Qakyo atura ntumwa kyero nraaqiara mwataariva vaharo vuni pataqia toharaintema kyero, muaanra ntaani entava qati toharama taiho, qiate.

<sup>9</sup> Mwi entara aitutumaqi vita rauriqata variate. Mpo hi vaisihua nkyi ntavaaqavuqita uro nkyiari kaanasoriqaa kyeta, nkyiqa qua vatevarave. Nkye mwaanra nraamwuqi varivata nkyi kyaamwuqo ntuqutu kyeta vatevarave. Nkye ni kyaiqa vare varivata mwia kyaara nkyi ntavaaqavuqita uro kamaninra nronra vaisi suqaave, vunyaa vaisinramwu suqaave, kyaivata mwi entara nkye ni qua ntapihi kye timwa qovarama kyevarave.

<sup>10</sup> Ni qua kyuqe qua ekyaa mpo mwatanaa mpo mwatanaahua timwa nyiqi vivata ekyaama riemwa ntevarave.

<sup>11</sup> Nraakiara mwihua nkyi ntavaaqavuqita uro ko tirera hivar, hia nkyi kyuqu kyauqu ntirata nanra quave qiananrave qiate. Mwi entara hia nkyeta su nyaatoqitaita riemwa kyeta tiraitita varivaro Kotira mwanraquravanto nkyi kyaahaqa hiqaro mwi quara qiate tirata mwi quara nraahu qiate.

<sup>12</sup> Nraakiara vaisivanto nai qatave nai vakyaarave qovarama kyairata ru kyevarave. Mwia qova nai nraaqiara qovarama kyairata ru kyevarave. Nraaqiaravanto nkyiari nyohua sohua nramwutaaqa hiqata ru kyaate tivata mwihua ru kyevarave.

<sup>13</sup> Mwi entara nkye ni nraakye qoravanto varivatara tita, mwia kyaara ekyaa qati nraakye qoravanto hia nkyiara mwutukya vahirata varivarave. Mwitaama mwataivarovata hia qoriri hiraitiro, kepukyaqama kyero variqi viro uro taiqa kyaani vaisira, mwiamma Kotiva vitaananrove.

*Anoma kyero qora inraikyavanto nraakiara qovara hianinranra tura  
(Matiu 24:15-28; Ruku 21:20-24)*

<sup>14</sup> Nraakiara nkye taqaivaro anoma kyero qora inraikyavanto qovarama viro hia mwianra variante qianinra mwinima mwiva siviro variananrove. Mwaa quara kyaara ntirava ntapihi kyera nraato tuante. Nraakiara mwi entara mwi inraikyava qovarama virata nraakye qora Iutiaani varihua sivita hianteta verara taaqiqaa quate.

<sup>15</sup> Mwi entara nraamwu quesana variariva hiama nraamwuqi vera ntero mpo inraikyavata vararaitiro, mwiva mpo inraikya mpo inraikya qaqlira kyero qatima hiantero quarive.

<sup>16</sup> Mpovanto aakyoqi kyaiqa vare variariva hia nai vaqa vararero nrumu ntantero viraitiro, mwiva mwia qaqlira kyero qatima hiantere quarive.

<sup>17</sup> Mwi entara nraaqiara tuaqahi nraakyehuavata, nraamwa nyi vari nraakyehuavata, hia kyugema varivarave. Nte mwi nraakyehuara po tuqo.

<sup>18</sup> Hia huari itaani entaraqaa aatu quaro tita nkye Kotirara aakyara tivaro huari itaani entara nyianrive.

<sup>19</sup> Po, nraakiara mwi entara muaanra vahiariva nronraqama kyero vitarero vahirata nraakye qora hia kyugema kyeta varivarave. Haaru Kotiva mwaa mwatara utu toraqatairo mwitaa hi muaanrava hia qovara hurave. Nraakiaravata hia mwitaa hiani muaanrava qaiqaavata qovara hiananrove.

<sup>20</sup> Mwi entara mpuahaa enta vahiratavauma ekyaa nraakye qoravanto taiqa vivaro hia kuaiqiatovata qati variananrove. Qio Kotiva nai kyaama tai nraakye qorahuara rieqaroma mwi entara vara qiquqama kyaananrove.

<sup>21</sup> Mwi entaraqaa nkyiara Kotiva titai vaisiva Mesaiaavanto mwainima variho, mwinima variho, tivera, hia mwihua quara quitaave qiate. Mwi entaraqaa vaisi mpovanto qovarama viro unra tiqaro, Nte Mesaiaavantove, tiraro mpo vaisivanto tiqaro, Nte Kotira qua qoqama kye varu vaisivave, qiananrove. Mwihua mwitaa timwaqi viqata airi unra vaisivanto qovarama vivarave.

<sup>22</sup> Mwihua qovarama vita unra kyaiqa varaqi viqata Kotiva nai kyaama tai nraakye qorahuua mwihua tirinramwu quara quitaave tiqata api aanra quate tita, nronra kyaiqa varaqi vivarave.

<sup>23</sup> Mwi quara rieqatama mwi entaraqaa nkye rauriqata variate. Nkye hia mwi vaishhua quara qutaave qiate tina, nte mwaa entaraqaa variqana nraakiara qovarama quani inraikyarara nkyi timwa nyi varuqo, tiro.

*Iesusiva nai qaiqaa mwata mwaini tumuaninranra tura  
(Matiu 24:29-31; Ruku 21:25-28)*

<sup>24</sup> Iesusiva mwitaa timwa kyero tiqaro,  
Nraakiara muaanra vahiani entava taiqa viraro  
mwi entaraqaatairo huarivanto qipa viraro  
toravantovata hia itairaro  
<sup>25</sup> aahoquravantove,  
qovoravantove, tumu nti tumu nti hiraro  
nyaamwuni kepuuya inraikya vahiariva  
ekyaa qakyaa qakyaa hiananrove.

*(Aisaiaa 13:10, 34:4)*

<sup>26</sup> Mwi inraikyava mwitaa hirata ekyaa mwata maata varihua taqe varivaqe nte mwatani mwatatai nraaqiarava nyaamwusaina tonamwuqi tumuanrita ni taqevarave. Nte mwunruqama taari inraikyava mpoqama kyero iteru takyuqiro ante anta/ atipetipa hi variraqe nte kepukyavanto tumuaninrave.

<sup>27</sup> Nte tumiqana nyaamwunyaahua sitaarita mwihua mwatani uto hisai hisaita Kotiva nai kyaama tai nraakye qorahua ekyaa ntuvantuama kyeta sitevarave, tiro.

*Iesusiva qaampuakya voti hurara tura  
(Matiu 24:32-35; Ruku 21:29-33)*

<sup>28</sup> Iesusiva mwitaa timwa kyero tiqaro, Nkye qaampuakyara rieqatama mwaa quara okyara ntapihi kyeta riaate. Mwi kyatariva tamwa riemwa taiqa kyero vahiro mwiaqaatairo qaraakya mwunri ntarero utihata nkye mwiaqaa apeqama kye taqeta tiqata, Huar nronra itaani entava qaumaqa iho, qiarave.

<sup>29</sup> Mwia votima kyeta, nraakiara qovara hiani inraikyarara tura, nkye mwiaqaa apeqama kye taqeta nianra tiqata, Mwiva tumuani entava qaumatoqa iho, tivarave.

<sup>30</sup> Nte qutaama tuqo. Mwaa mwataraqaa vari nraakye qorahua hia taiqa vivaro mwi inraikyara mwi inraikyarara tuva qovara hiananrove.

<sup>31</sup> Nyaamwuvantovata mwatavantovata taiqa viraro ni quavanto qati nraahu vahiqiro quananrove, tiro.

*Hia mpovanto nte tumuani entara ntapihirave tura  
(Matiu 24:36-44)*

<sup>32</sup> Iesusiva mwitaa timwa kyero tiqaro, Nte taireve, nanra huari vuqaave, tumuaninra? Hia vaisi mpovanto mwi entara ntapihirave. Hia nyaamwunyaahuavata mwianra ntapihiarave. Ntenavata mwatani mwatatai nraaqiarava variqana mwi entarara hia ntapihi kyaurave. Kotiva ni kova mwiva nraahuma mwi entara ntapihirave.

<sup>33</sup> Mwi entava nrianinra nkye hia ntapihiahuara tita, nkye taqe varita rauru kyeqqa teramate variate.

<sup>34</sup> Mwi entava nrianinranra tirera nanra quaqaa ntumwa kyenave qianinrave? Mwaa quaraqaa ntumwa kyena tirerave. Vaisi nronravanto nyianrani virera hiro nai kyaiqa vaisinramwuanra tiqaro, Nte quarita nkye mwi kyaiqara mwi kyaiqara vare varivaqe nte uro ntantena nriankye, timwa kyero mpo kyaiqa mpo kyaiqa mwihua nyinro vaisi mpora tiqaro, E quesana variqara vaimwanraanra ntaqikyi variante, timwa kyero qio vurave, tiro.

<sup>35</sup> (Jesusiva mwitaa timwa kyero nai nraaqiaranramwu timwa nyinro tiqaro), Mwi quara rieqatama nkyevata taqeqata variate. Taireve mwihua nronra vaisivanto nyianrasairo uro ntantero nriananrove? Enta hirera hianinranive? Enta mwutukyaqive? Kokoraaravanto nruqua qianinranive? Qaatata viraro toqaqive nriananrove?

<sup>36</sup> Mwiva qamwanrama nri ntero taqairata nkye vaite varivorave.

<sup>37</sup> Nkye mwianra rieqatama nte nkyinramwuanravata ekyaahuaravata mwitaama tina, Nkye taqe variqata variate tuqo, tiro.

## 14

*Nronra vaisinramwuvanto Iesusira rukye quara qaiqaa turama*

(Matiu 26:1-5; Ruku 22:1-2; Ioni 11:45-53)

<sup>1</sup> Mpo ihi mpo ihi mwi mwatanaahua nyaamwunyaava vekyahu nyatoraravata, hia kyoto mperetiraravata, rieqata mwi entaraqaa mwi kyarara nronra. Mwi entara mwi kyarara nreva taara enta qati vahuvata Kotira nraamwuqi Kotira kyaiqa vara mwate varu vaisihua mwihua vunyaahuavata, mwaanra okyara ti varu vaisihuavata, mwihua ntuvantuama vita Iesusira ntavaaqavuqita uro rukyerara uqetakye qua tiqata

<sup>2</sup> mwitaama tita, Tirenramwu vekyahu nyato kyarara nraana entaraqaa Iesusira ntavaaqavu kyaararo nraakyе qoraqitairo ntaqi inraikyava qovara hiankyorave, tura.

*Nraakyе mpovanto vahamwenra Iesusira qiataqa qumwatora*

(Matiu 26:6-13; Ioni 12:1-8)

<sup>3</sup> Mwi entara Jesusiva Mpetaanini Saimoninra nraamwuqi uro varura. Tauraa mwi vaisira tauma rumpuaravanto utuvaro varu vaisira. Jesusiva mwi vaisira nraamwuqi uro kyara nre varuvaro nraakyе mpovanto vera ntero Iesusira kyuqema mwatarero vahamwenra kyuqe mwunta vura, nronra munima kyora, ori taquqi varero uro taqu hiara kinta kyero Iesusira qiataqaa rauru kyero qumwatora.

<sup>4</sup> Mwia qiataqaa rauru kyero qumwatovata hini uhua nraamwu mwiqi varuhua mwi nraakyera *nununrama mwateta/nriqi humumuse* nai timwa mwi nai timwa mwi hita tiqata, Qaqao, nanraqamave mwitaama kyero vahamwenra mwia qumina taiqa kyaiho?

<sup>5</sup> Mwiva vahamwenra mwia nyinro nronra munima 300 kinaa vara kyero vehi nraakyе qora nyiataarave, tita. Mwitaa timwa kyeta mwia kyaara mwi nraakyera inronra hi varura.

<sup>6</sup> Mwihua mwia inronra hi varuvaro Jesusiva tiqaro, Qati kyaivaro mwi nraakyeva variarive. Nanraqamave nkye mwia inronra hiavo? Mwiva mwitaa hiqaro ni kyuqema mataiho.

<sup>7</sup> Vehi nraakyе qora mwihua mpo enta mpo enta nkyi kyapata variqi vivarave. Nkye mpo enta mwihua kyaahaqa hiataa hirata qioqa kyaahaqa hivarave. Nte nraahuma hia nkyi kyapata airi enta varianinrave.

<sup>8</sup> Mwi nraakyeva taqaiharo mwi kyaiqava mwianra qioqa hirama varaiho. Nte qati variani entaraqaa mwiva nraante vahamwenra qumateqaroma ni quntamwa terara tera hi variho.

<sup>9</sup> Nte qutaa qua qianinra riaate. Nraakiara ni qua mwakyaakya ekya mpo mwatanaa mpo mwatanaahua timwa nyiqi viqata mwaa nraakyeva mate vahamwenra mwaa ni qu matai quaravatama timwa nyivata rievarave, tiro.

*Iutaasiva Iesusira qovarama kyarero veva ntero vura*

(Matiu 26:14-16; Ruku 22:3-6)

<sup>10</sup> Jesusiva mwitaa tuvaro mwia nraaqiara 12 nramwuqitairo mpovanto Iutaasi Isikeriotiva mwiqitairo veva ntero Iesusira qovarama kyaani quara timwa nyinrenro vuva

Kotira nraamwuqi Kotira kyaiqa vara mwate varuhua mwihua nronra vaisinramwu timwa nyuvata

<sup>11</sup> mwihua mwia quara qamwata kyeta tiqata, E mwitaa qiarata tire qutaaqama kyeta munima i mwinrenrave, tuvaro mwiaqatairo Iutaasiva Iesusira mwihua kyauquqi kyaani aanranra puaa hi varura.

*Iesusiva nai nraaqiaranramwuvata vekyahu nyato kyarara nronra  
(Matiu 26:17-25; Ruku 22:7-14, 21-23; Ioni 13:21-30)*

<sup>12</sup> Mpereti hia kyotorara nro entanramwuva nruvata toharo entaraqaa sipisipi nraati rukyo entaraqaa mwia nraaqiaranramwuvanto Iesusira kyapara hita tiqata, Taraqive tire uro terama mwataaarara e vekyahu nyato entarara rieqarama mwi kyarara nrenanrave? tita.

<sup>13</sup> Tuvaro Iesusiva nai nraaqiara taaratana sitero tiqaro, Nkyetana Ierusaremi mwatukya nronraqi vivaro vaisi mpovanto nramanri taqu kyaqa varero nrianriva nkyitana qintorama kyairata mwia vataqita vivaro

<sup>14</sup> mwiva nraamwuqi vera ntairata nkyetanavata mwiqi vera nteta nraamwu qorara mwitaama qiate, Mwaanra ti vari vaisiva iara tiqaro, Ta rumunraqive nte ntena nraaqiaranramwu kyapata vekyahu nyato kyarara nraaninrave tiho, qiate.

<sup>15</sup> Nkyetana mwitaa tivaro mwiva nkyitana rumu nronra verato vahi rumunra taintavata mwiqi teramataiharo vahiraqi nyaamwutairata qio rumu mwiqi kyara terama taate, tiro.

<sup>16</sup> Iesusiva mwitaa tuvata mwitanahua uro mwatukya nronraqi taqovaro ekyaa inraikyara tu quava avuqavuma kyero mwivau vahuvata mwitanahua vekyahu nyato kyarara terama kyeta mwatora.

<sup>17</sup> Terama kyeta mwatovaro entama vuvaro Iesusiva nai nraaqiara kyapata nruva nraamwu

<sup>18</sup> mwiqi kyara nre variro tiqaro, Nte qianinra riaate. Nkyiqitairo mpovanto nramwutaahua suqaa ni qovarama kyaananrove, tiro.

<sup>19</sup> Mwitaa tuvaro mwia nraaqiaranramwu mwutukyavanto uaquia huvata mwihua kuaiqia kuaiqiyavanto Iesusira kyapara hita tiqata, Nianrave tira hiaro? Nte hia mwivave. Nte hia mwivave, timwaqita vita.

<sup>20</sup> Mwitaa tuvaro Iesusiva timwa nyinro tiqaro, Nkyi 12 nramwuqitairo mpovanto nai mpereti vara kyero ni vatama kyero tanuqi mwaati ntamwa kyero nre variariva mwi vaisivama ni qovarama kyaananrove.

<sup>21</sup> Ni mwatani mwatatai nraaqiarara mwitaama kyeta rukyerara haaru qara ntumwa torave. Mwi quava qutaa mwivauma vahiananrove. Ni mwatani mwatatai nraaqiarara qovarama kyaani vaisirara nte po tuqo. Mwia nrova hia mwia mwata kyaataara mwia mwata kyairave, tiro.

*Mperetiaravata uainianravata timwa tora  
(Matiu 26:26-30; Ruku 22:15-20; 1 Korinti 11:23-25)*

<sup>22</sup> Mwitaa tuvata kyara nre varuvaro Iesusiva mpereti vara kyero Kotirara kyuqeve timwa kyero, nteqa kyero nai nraaqiaranramwu nyinro tiqaro, Mwaa kyarara varaate. Mpereti mwaa ni mamantama iho, tiro.

<sup>23</sup> Mwitaa timwa kyero mwiva uaini kaapu vara kyero Kotirara kyuqeve timwa kyero, viti nyuvata ekyaahua kaapu mwiqitaita nronra.

<sup>24</sup> Nreta varuvaro Iesusiva tiqaro, Nramanri mwaa ni nraanrema iho. Kotiva nraakye qora kyapata kuaaqi kuairama viro varirero qaraakya qua vatarerove. Mwi quava kepukyaqama quarive tiro, ni nraanrevanto mwi quara kepukyaqama kyaananrove. Ni ru kyaivarao ni nraanrevanto tuminro airi nraakye qora kyaahaqa hiananrove.

<sup>25</sup> Nte qianinra riaate. Nte mate mwaa entaraqaataina tohara kyena hia uaini nranraitina, qati variqi vina nraakiara Kotiva ntaqikyianinraqi variqana mwi entaraqaa qaraakya uaini nraaninrave, tiro.

<sup>26</sup> Iesusiva mwitaa timwa kyero nai nraaqiaranramwu kyapata Kotirara ihi timwa kyeta veva nteta Oripi taaqiqaa vurama.

*Pitaava nraakiara qiani quara Iesusiva nai timwa mwunra  
(Matiu 26:31-35; Ruku 22:31-34; Ioni 13:36-38)*

<sup>27</sup> Mwinramwuhua mwini varuvaro Iesusiva timwa nyinro tiqaro, Nkyenramwu ni kyeta ntugeqaa hita vivarave. Kotira mpukuqi qara ntumwa to quava qutaa mwivuma vahiananrove. Mwitaama tiro:

Sipisipiqa ntaqikyi vaisira Kotiva rukyairata  
sipisipi mwihua nkyiariara nkyiariara  
mpona mpona vivarave, turave.

*(Sekaraiaa 13:7)*

<sup>28</sup> Qio nraakiara ni qati vara sivuma kyairaqe variqana nkyi suni nte nraante Karirini virerave, tiro.

<sup>29</sup> Mwitaa tuvaro Pitaava qaqao tiro, Ekyaa mwinramwuhua i kyeta aatu ntugema kyeta vivaqevata nte nraahu ivatama kyena mwaini varianinrave, tiro.

<sup>30</sup> Pitaava mwitaa tuvaro Iesusiva tiqaro, Nte qianinra riaante. Mate entaqi kokoraaravanto hia taara nani nruqua tirara e taarampo nani nianra tiqara, Hia mwia ntapihurave, tinanrave, tiro.

<sup>31</sup> Iesusiva mwitaa tuvaro Pitaava kepukyaqama kyero qaqao tiro, Hia iara tiqana, Nte hia ntapihurave, qianinrave. Ivatamakyne ni rukyaivaqenavata nte hia mwitaa qianinrave, tiro. Pitaava mwitaa tuvata Jesusira nraaqiara hini mwihuavata kuua qua mwia nraahu tura.

*Kyaqamwa ututora Kesemaniqi Iesusiva vurama  
(Matiu 26:36-46; Ruku 22:39-46)*

<sup>32</sup> Mwiaqatairo Iesusiva nai nraaqiaranramwuvata vuva uro kyaqamwa ututora mwia nrutu Kesemaniqi uro ntero nai nraaqiaranramwuanra tiqaro, Nkyenramwu mwaana mwatakyaa vita varivaqe nte vuturaqi uro Kotiravata qua qiankye, timwa kyero

<sup>33</sup> Pitaaravata, Ioninravata, Iemisiravata, mwinramwuhua nraahu sita varero viro.  
Mwinramwuhua nraahu sita varero vuvaro mwia hia kyuqe huvaro

<sup>34</sup> taarampo mwinramwuhuara tiqaro, Ni mutukyavanto nronraqama kyero muaanra ntero niqa piqaro ni rukyaa qara ihanama varuqo. Nkyenramwu nivatama kyeta mwaqaqaa variqatama vu ntapairi kyeta viti viri taqe variqata variate, tiro.

<sup>35</sup> Mwitaa timwa kyero mwiva pataqia vututo viro uro mwataqaa tumu ntiro Kotira kyapara hiro tiqaro, Mpo aanra vahirera, nte hia muaanra vahi aanranraqaa quankye, tiro.

<sup>36</sup> Mwitaa timwa kyero mwiva tiqaro, Po hiave, ko, e ekyaa kyaiqa qio vare variaravave. Nte nriqa quani nramanrinra nraani kaapura e mwi kaapura vara qatinani kyaante. Nte mwitaa qiariravata hia ni mutukya vahira vataqira quante. Ena mwutukya vahira vataqira quante, tiro.

<sup>37</sup> Iesusiva mwitaa timwa kyero uro ntantero nai nraaqiara taaramponramwu kyonani nrumeru taqovata mwinramwuhua suvanto tautovata vaite varuvaro mwiva Pitaarara tiqaro, Saimonio, e vaiteve variaro? Nanraqamave nkyenramwu nivata pataqia variqata hia vu ntapairi kyeta viti viri taqe variqata variavo?

<sup>38</sup> Nkyiara mwihua uaquia hi kyaiqara utuate tiro, Saataaniva nkyi mwataara hiankyora mwianra rieqata taqe varita Kotirara aakyara nteqata variate. Nkyi mwanaraquravanto mwitaa hiataa iharo nkyi mwamwantavanto nraahu hia kepukyaqa ihata variavo, tiro.

<sup>39</sup> Mwitaa timwa kyero Iesusiva qaiqaa mwihua mwini kyero uro Kotiravata qua tirero mwiva vaakya tu quara mwi quara nraahu qaiqaa tiro timwa taiqa kyero

<sup>40</sup> uro ntantero nrumu taqovata mwia nraaqiaranramwu vu tautovata qaiqaa vaite varura. Iesusiva nri ntovata mwihua sivita kyauriqata Iesusira timwa mwi quava hia vahuvata varuvaro

<sup>41</sup> Iesusiva qaiqaavata uro Kotiravata qua timwa taiqa kyero uro ntantero nrumu taqovata mwihua qaiqaa vaite varuvaro Iesusiva tiqaro, Qikye, nkyenramwu tekya hiqatave vaite variavo? Qio taqaate. Ni tu vare entava nrima ntaiho. Ni mwatani mwatatai nraaqiarara ni ntavaaqavuqita uro uaqia hi kyaiqara uti varihua kyauquqi tuta kyevarave.

<sup>42</sup> Sivivaqenramwu quare. Ni qovarama kyaari vaisiva nrima variho, tiro.

*Iutaasiva Iesusira qovarama kyora*

(Matiu 26:47-56; Ruku 22:47-53; Ioni 18:3-12)

<sup>43</sup> Iesusiva mwi quara ti varuvaro mwia nraaqiara 12 nramwuqitairo Iutaasiva uro ntero. Iutaasiva uro ntovata mwihua vaisi airivanto paipavata, kyaamwuvata, tu vareta vura. Kotira nraamwuqi Kotira kyaiqa vara mwate varu vaisihua mwihua nronra vaisinramwuvata, mwaanra okyara ti varuhuavata, Iutaa nronra vaisinramwuvantovata, mwihua mwi vaisihua sitovata mwihua Iutaasira vatama kyeta nrurra.

<sup>44</sup> Nruvaro Iutaasiva Iesusira qovarama kyaaninranra mwihua timwa nyinro mwitaama tiro: Nte mwia qua mwanteqana mota kyaani vaisira mwia mwivave. Nkye mwia ntavaaqavu kyeta mwiaqaa kyuqema kye ntaqikyiqi vita uro kyaate, tiro.

<sup>45</sup> Iutaasiva mwitaa timwa kyero mwihua kyapata uro ntero mwiva qamwanrama kyero Iesusiva varunani uro ntero tiqaro, Mwaanra ti variara vaisio, timwa kyero mwia mota kyero.

<sup>46</sup> Iutaasiva Iesusira uro mota kyovata Iutaasiravata nruhua uro Iesusira ntavaaqavu kyovaro

<sup>47</sup> Iesusira nraaqasairo mwia nraaqiara mpovanto paipa nai tuaqitairo veva ntanrau kyero mwiaqotairo vaisi mpo nraato teqa kyovaro tumu ntura. Kotira nraamwuqi kyaiqa vare varuhua mwihua vunyaa vaisi mwia kyaiqa vaisi nraato teqa kyora.

<sup>48</sup> Mwitaama kyovaro Iesusiva Iutaasiravata nru vaisihuara tiqaro, Qikye, nkye kamaninravatama kyeta ntqua vaisihua sitarerata nriantema kyeta ni pitarerata paipavata kyaamwuvata varetave nriavo?

<sup>49</sup> Nte mpo enta mpo enta Kotira nraamwuqi variqana nraakyne qora qua mwakyaakya timwa nyi varuqata nkye mwi entara hia ni ntavaaqavuarave. Kotira mpukuqi mwitaa hirara qara ntumwa tova vaiho. Mate mwi quava mwivauma vahiananrove, tiro.

<sup>50</sup> Iesusiva mwitaa tuvata mwihua mwia ntavaaqavu kyovata ekyaa mwia nraaqiaranramwuvanto mwia kyeta aatu ntueqaa hita vivura.

<sup>51</sup> Qaraakya vaisi kuaikuvanto nraahu tavuna egaroritua rupatova Iesusira vataqiro virera utuvata mwihua mwia taqeta uro mwiavata ntavaaqavu kyaare tita,

<sup>52</sup> tavuna mwi tuara nraahu tu varovaro mwi vaisiva tokyavanto hiantero vura.

*Iutaa nronra vaisi suqaa Iesusira uro kyora*

(Matiu 26:57-68; Ruku 22:54-55, 63-71; Ioni 18:13-14, 19-24)

<sup>53</sup> Mwia nraaqiaranramwuvanto aatu vuvata mwihua Iesusira vita vareta Kotira nraamwuqi kyaiqa vare varuhua mwihua vunyaa vaisivanto varuraqi uro kyovata Kotira nraamwuqaa ntaqikyi varuhua ekyaa hininramwu nronraqama vuhuavata, Iutaa nronra vaisinramwuvata, mwaanra okyara ti varu vaisihuavata, mwihua ekyaa nraamwu mwiqi ntuaantuama vita varura.

<sup>54</sup> Jesusira vitaqita uro kyeta varuvaro Pitaava vutura nyianrasata viqaro mwihua sataqiro vuva vunyaa vaisi nraamwu maata vahunani uro ntero utaqi mwaati ntero mwatukya mwiaqaa ntaqikyi varuhua kyapata mwatakyaa viro variqaro qia taare varura.

<sup>55</sup> Pitaava mwaata mwini varuvata Kotira nraamwuqi kyaiqa varohua nronramwuvata, ekyaa nronra vaisi mwipi ntuvantuama vita varuhuavata, Jesusiraqaa qua vateta mwia rukyaare tita, mpo quara puua huvaro hia vahuvata qumina mwia rukye quarara puua hi varura.

<sup>56</sup> Hia qua vahuvata vaisi airivanto apiqama kyeta Jesusiraqaa unra qua nraahu vateta ti varuvaro mwihua quavanto mpo qua mpo qua vahiro, hia kuaa qua vhura.

<sup>57</sup> Mwitaa timwaqita vuvata mpo uhua Jesusiraqaa unra qua vateta tiqata,

<sup>58</sup> Jesusiva mwitaa tihata tire riaunanrave. Mwiva tiqaro, Nte Kotira nraamwu vaisivanto nkyiari kyauququo hoqataara ntapairi kyena nte taarampo enta variqana hia kyauququo vareqana qaiqaa nraamwu mwia hoqa kyaaninrave, tirave, tita.

<sup>59</sup> Mwi vaisihua mwi quaravata tiqata hia ntapihi kyeta kuaa qua turama.

<sup>60</sup> Mwitaa tuvaro Kotira kyaiqa vara mwate varuhua mwihua vunyaa vaisivanto mwihua suqaa siviro Jesusira kyapara hiro tiqaro, Mwihua mwitaama kyeta iqaa qua vateta ti variavo. E mpo? Mwihua mwi quara iara qiera e nanra quave nkyiari timwa nyinanrave? tiro.

<sup>61</sup> Tuvaro Jesusiva hia qua tiraitiro, tirema varuvaro qaiqaa mwiva mwia kyapara hiro tiqaro, Qutaave Kotiva i titaihara e tiri kyaahaqa hirava Mesaiaavanto variaro? Qutaave e Kotira mwaaquvanto variaro? Tiri timwa timwinraqe riaare, tiro.

<sup>62</sup> Mwiva mwitaa tuvaro Jesusiva tiqaro, Nte mwaa mwivave. Nkye nraakiara taqaivaqe nte mwatani mwatatai nraaqiarava nronraqama vina Kotiva kepukyavanto varianinra mwia kyauqu kyaatutani varina tonamwuqi tumuaninrave, tiro.

<sup>63</sup> Jesusiva mwitaa tuvaro Kotira kyaiqa vara mwate varuhua vunyaa vaisivanto nai tuavaaqa nrabitu kyero tiqaro, Qikye, qumina vaisi kyaatavanto mwiaqaa qua vatehua nyaanrevorave.

<sup>64</sup> Riaate. Nkye airivanto variavaro mwiva Kotira vuqaa variqaro uaquia hi quara tiho. Mwia kyaara nkye nanreve Jesusirara tivarave? Tivaqe riaankye, tiro. Mwitaa tuvata mwihua tiqata, Mwia qora kyaiqvanto nritaraiho. Mwia kyaara mwia rukyaarava nraahuma vaiho, tita.

<sup>65</sup> Mwitaa timwa kyeta hini uhua uro Jesusiraqaa taara vihikye mwiaqataita Jesusiva hia qio taqaarive tita, mwia vuqaa tavunaqo rupateta vireraqama kyeta mwia ntuqutu kyeta tiqata, Tavave i ntuqutih? Hia taqaraitira, i ruani vaisira nrutu tiraqe riaare, tita. Mwitaamaqi vita Jesusira uaqama mwatovata piponramwuvantovata mwia vita kyeta kyauququo ntuqutuqita vurama.

### *Pitaava Jesusirara hia taqau vaisirave tura*

*(Matiu 26:69-75; Ruku 22:56-62; Ioni 18:15-18, 25-27)*

<sup>66</sup> Nraamwuqi Jesusira uaqiamaqita vi varuvaro Pitaava mwaatani mwatukyaqaa mwatakyaa viro varuvaro vunyaa vaisi mwia kyaiqa nraakye mpovanto nritareqaro taqovaro

<sup>67</sup> Pitaava qia taare varuvaro mwia ntapihi kyero taqero tiqaro, E Jesusira Nasaretinyaa vaisintiri variaravave, tiro.

<sup>68</sup> Tuvaro Pitaava qaqa tiro, E nanra quave qiaro? E qiana quara nte hiama ntapihuquo, tiro. Pitaava mwitaa timwa kyero uro nronraanrana varuvaro kokoraaravanto nruqua tiro.

<sup>69</sup> Pitaava mwini varuvaro kyaiqa nraakye mwiva qaiqaa mwia taqero mwini sivita varuhuara tiqaro, Vaisi mwiva mwia nramwunaave, tuvaro

<sup>70</sup> Pitaava qaqa hiave nraahu tiro.

Mwitaa timwa kyero pataqia varuvata qaiqaa mwini sivita varuhua Pitarara tiqata, Jesusira nraaqiaranramwu Karirinyaahua variavara quataama evata mwinyaavama variaro, tita.

<sup>71</sup> Mwihua mwitaa tuvaro Pitaava kyaqu nriqiqaa vatero tiqaro, Nte unra qiankyera Kotiva qiomaa ni ruananrove. Nte quataama tuqo. Nkye ti varia vaisira nte hia mwia taqaurave, tiro.

<sup>72</sup> Mwitaa tuvaro qamwanrama kyero kokoraaravanto qaiqaa nruqua tuvaro Pitaava mwiaqaatairo Jesusiva timwa mwu quara mwianra riero. Jesusiva Pitaara timwa mwiqanro mwitaama tiro: Mate entaqi kokoraaravanto hia taara nani nruqua tirara e taarampo nanima nianra tiqara, Nte hia mwia taqaurave tinanrave, tu quara mwianra riovaro mwia mwutukyavanto uaquia huvaro Pitaava ntatora.

## 15

### *Jesusira Paireativa hunani vitaqita uro kyora (Matiu 27:1-2, 11-14; Ruku 23:1-5; Ioni 18:18-38)*

<sup>1</sup> Mwia qanranraa toqaqi Kotira kyaiqa vara mwate varu vaisihua mwihua nronra vaisinramwuvata, Iutaa nronra vaisinramwuvata, mwaanra okyara ti varu vaisihua-vata, ekyaa kaanasorinramwuvata, mwihua ntuaantuama vita variqata mwihua qua ti okyarara timwa avuqavuma kyeta Jesusira seniqotaita mwia rupa vareta Paireativa kamaninra nronra vaisivanto varuraqi uro kyora.

<sup>2</sup> Uro kyovaro Paireativa Jesusira kyapara hiro tiqaro, Qutaave e Iutaa vunyaa vaisivanto variaro? tuvaro Jesusiva tiqaro, E qiananra nte mwaa mwivama iho, tiro.

<sup>3</sup> Mwitaa tuvata Kotira kyaiqa vara mwate varu vaisihua mwihua nronra vaisinramwuvanto mpo qua mpo qua kyaara Jesusira inronra hi varuvaro

<sup>4</sup> Paireativa mwihua qua rieqaro qaiqaa Jesusira kyapara hiro tiqaro, E hiave mwia hiniqama nkyiariara tinanrave? Mwihua airi qua kyaara i inronra hi variavo, tiro.

<sup>5</sup> Mwitaa tuvaro Jesusiva qaiqaa hia qua tiraitiro, kepukyaqama kyero varuvaro Paireativa airi nraato ti varura.

### *Jesusira kyatariqaa rutaate tura (Matiu 27:15-26; Ruku 23:13-25; Ioni 18:39-19:16)*

<sup>6</sup> Mpo ihi mpo ihi vekyahu nyato kyarara nro entaraqaa kamaninra vunyaa vaisivanto nraakye qora qamwata nyatarero karavu vaisi mpo huvantu kyero titovaro mwaatani vura. Nraakye qoravanto mwi vaisira huvantu timwa taante tuvaro mwi vaisira huvantu nyate varura.

<sup>7</sup> Mwi entara vaisi mponramwuvanto kamaninravata ntaqura kyaara karavuqi varuvaro mwi vaisinramwuhuaqitairo mpovanto mwia nrutu Varavaasiva mwiva vaisi rukyora kyaara karavuqi varura.

<sup>8</sup> Qio mwi entaraqaa nraakye qoravanto ntuaantuama vita variqata karavu vaisi huvantu kyaaninra mwianra rieqata ntuaantuama vita varuvaro

<sup>9</sup> Paireativa mwihua kyapara hiro tiqaro, Nte karavuqitaina ta vaisirave huvantu nyataaninrave? Iutaa mwatanaa vunyaa vaisi mwiae nte huvantu nyataaninrave? Nkye timwa mpivake riaankye, tiro.

<sup>10</sup> Paireativa ntapihi kyovata nronra vaisinramwuvanto Jesusiva nronraqama quankyorave tita, Jesusira inronrama mwateta mwihua mwia vitaqita uro Paireativa kyauquqi tutu kyora.

<sup>11</sup> Paireativa karavu vaisi tarave huvantu nyataaninrave timwa kyero, nraakye qora kyapara huvata Kotira kyaiqa vara mwate varu vaisihua mwihua nronra vaisinramwuvanto uro nraakye qora utaqaa variqata kepukya qua mwihua timwa nyita tiqata, Hia Jesusira huvantu timwa taante. Varavaasira huvantu timwa taante qiate, tita.

<sup>12</sup> Mwi nraakye qorahua rapateqa tuvata mwihua Varavaasira huvantu timwa taante tuvaro Paireatativa qaiqaa nraakye qora kyapara hiro tiqaro, Nkye Iesusirara tiqatama, Iutaa vunyaa vaisivantove, qiarave. Nte mwi vaisira nataave hianinrave? tiro.

<sup>13</sup> Mwitaa tuvata mwihua aakyara nteta tiqata, Mwia kyatariqaa rutaate, tita.

<sup>14</sup> Mwitaa tuvaro Paireatativa qaiqaa mwihua kyapara hiro tiqaro, Mwiva nanra uaqia hi kyaiqara utu kyaihatave mwitaa qia? tuvata mwihua qati nraahu paatita aakyara nteta tiqata, Mwia kyatariqaa rutaate, tita.

<sup>15</sup> Mwihua mwitaa tuvaro Paireatativa nraakye qora qamwata nyatarero Varavaasira huvantu nyatero mwiaqatairo nai ntaqu vaisihuara Iesusira kyaamwuqo ntuqufuate tuvata mwihua mwia kyaamwuqo ntuqufuate kyovaro mwiaqatairo mwia kyatariqaa rutaate tiro, Paireatativa Iesusira nai ntaqu vaisihua kyauquqi tuta kyora.

### *Ntaqu vaisihua Iesusirara raivuvuma mwateta mwia ntuqufute*

(Matiu 27:27-31; Ioni 19:2-3)

<sup>16</sup> Paireatativa nai ntaqu vaisihua kyauquqi Iesusira tuta kyovata mwihua mwia vitaqita uro kamaninra nraamwuqi kyeta mwihua nkyiari hena ntaqu vaisihua ekyaa nyaanrama ntuvaantuuma kyeta

<sup>17</sup> mwia vireraqa hiqata vunyaa vaisi tavuna nraanre tavuna rupa mwateta mwiaqataita tauvera vara kyeta qiai vaisi tovaqa voti hora ququrama kyeta Iesusira qiaqaa qumwa tora.

<sup>18</sup> Mwitaama kyeta nkyiari kyauqu tiriqa vateqata kumwaanri mwitaa tita tiqata, Iutaa vunyaa vaisio, variqarave? tita.

<sup>19</sup> Mwitaa timwa kyeta mwihua kyaamwuqotaita mwia qia ntukamu kyeta, mwiaqaa taara vihi kyeta, mwia vuqaa tori kyauru ravi variqata qati vireraqama kyeta mwia qamwata mwateqata varura.

<sup>20</sup> Mwitaamaqi viqata vireraqama kye raima mwateta mwiaqataita mwihua nraanre tavuna rupa mwatora huvantu kyeta nai tuavaaqa utu mwateta mwia kyatariqaa ninri rukyeta hiritarerata Iesusira vita vareta vurama.

### *Iesusira kyatariqaa ninri ru kyeta hiritora*

(Matiu 27:32-44; Ruku 23:26-43; Ioni 19:17-27)

<sup>21</sup> Ntaqu vaisinramwuhua Iesusira kyatariqaa ninri ru kyeta hiritaare tita, mwia vita vareta mwatukya mwaaqani aanraqaa vi varuvaro vaisi mpovanto mwia nrutu Saimoniva mwatukya nronraqi virera huvata mwihua mwia antua kye kepukyaqama kyeta tiqata, Iesusira ru kyeta hirite kyatarira vara quqira uro mwataante, tuvaro Saimoniva vara quqiro uro mwatora. Saimoniva mwata Sairininyaava mwiva Arekisantaakya Rupukya sova varura.

<sup>22</sup> Mwihua Iesusira vitaqita uro qumina mwata Korokotaave tunani kyora. *Korokotaa* mwaa quaraqitai tirera, *Qiata Mwukyaariqaave*, tunani Iesusira uro kyora.

<sup>23</sup> Uro kyeta uaini mwiqi ukavu inraikyara tuqasaa kye vato nramanrinra mwia mwinrenra huvaro Iesusiva hia nrenro.

<sup>24</sup> Hia nrovata mwihua mwia kyatariqaa ninriqotai rukyeta mwia tuavaaqa vara kyeta tahuua tahuave qio varevarave timwa kyeta, kaati ruantema kyeta ori tuto kyeqata mwia tuavaaqa ntainra kyeta varora.

<sup>25</sup> Toqaqi huarivanto nrinro virisataqa huvata Iesusira kyatariqaa rutora.

<sup>26</sup> Mwia kyatariqaa ruteta Iesusira qiatani qua mpo, mwia ko timwa mwato quara qara ntumwa teta kyatariqaa rutora. Mwi quava mwitaama tiro:

IUTAA VUNYAA VAISIVE, tiro.

Mwi qarava mwitaama kyero vhahura.

<sup>27</sup> Mwihua Jesusira kyatariqaa ruteta Jesusira vatama kyeta vaisi taaratana rutora. Mwitanahua mpuara vare varutanahua varuvata mpo Jesusira kyauqu kyaatutani ninri ruteta mpo Jesusira kyauqu kyaantaaqani ninri rutora.

<sup>28</sup> [Jesusira vatama kyeta mwitaama rutorara tiro, Kotira mpukuqi qua mpo qara ntumwa tova mwivau vhura. Mwitaama tiro: Mwiva uaquia hi vaisihua vatama kyero variananrove, tura.]

<sup>29</sup> Mwitaama kye rutovata nraakye qoravanto vitare nritare hiqata viri tageta nkyiari mwaunru miqi kyeqata Jesusirara uaquia hu quara timwa mwateta tiqata, Qikye, e tiqarama, Kotira nraamwu ntapairi kyenama taarampo entaqaa kyaiqa vareqanama qaiqaa hoqa taiqa kyaaninrave, qiaravave?

<sup>30</sup> Qio ena kyaahaqa hiante. E kyatariqaataira mpiami ntaante, tita.

<sup>31</sup> Mwihua mwitaa ti varuvata mwihua tuntema kyeta Kotira kyaiqa vara mwate varuhua mwihua nronra vaisinramwuvata, mwaanra okyara ti varu vaisihuavata, mwihua Jesusirara raima mwateta tiqata, Mwiva mpohua nraahu kyaahaqa hi variva hiama qio nai kyaahaqa hirove.

<sup>32</sup> Mwiva Kotiva titai vaisiva Mesaiaavantove, Isareru vunyaa vaisivantove, qiaavata riaunanrave. Kyai tire variqata taqaararo mwiva kyatariqaatairo mpiami ntero tuminrenra, tire mwianra quataave qiare, tita.

Mwihua mwitaa tuvata mwihua nraantanteta mpuara vaisitana Jesusira vatama kyeta rutotanahua, mwitanahuavata mwia uaquia hu quara timwa mwate varura.

### *Jesusiva qutu vura*

(*Matiu 27:45-56; Ruku 23:44-49; Ioni 19:28-30*)

<sup>33</sup> Mwitaa huvaro ihera mwutukya tavaara ekyaa mwi mwataraqaa entama tero vahiqi vuvaro huarivanto vitira tavaarana tumi vuvaro qaiqaa ntuvahama vura.

<sup>34</sup> Qaiqaa ntuvahama vuvaro Jesusiva nai quaqitairo aakyara ntero tiqaro, *Eroi, Eroi, rama sapakitani*. Kotio, Kotio, nanraqamave ni qaqlira kyera hiarao? tiro.

<sup>35</sup> Jesusiva mwitaa tuvata mpo uhua mwini sivita varuhua mwia qua rieta tiqata, Mwiva Iraisaara tiri haivaqara nraanraiho, tuvaro

<sup>36</sup> mpovanto hiantero ukavu uaininra kyaqa kyero kyaamwu kati kyero mwiaqaa huairi kyero viri Jesusira nrona vatero tiqaro, Kyai variqata taqaararo Iraisaava mwia kyaahaqa hirero tumuaninra taqaare, tiro.

<sup>37</sup> Mwitaa tuvaro Jesusiva nronraqama kyero aakyara ntamwa kyero qutu vura.

<sup>38</sup> Jesusiva qutu vuvaro Ierusaremini Kotira nraamwuqi tauha voti hora tavuna nronra hiritova virisairo utaqaa nrabituqiro tuminro mpiani tumu kyora.

<sup>39</sup> Ntaqu vaisihua vunyaava Jesusira ruto kyatarira nraaqani varuva taqovaro Jesusiva nronraqama kyero aakyara ntamwa kyero qutu vuvaro mwiva tiqaro, Qikye, quataama vaisi mwaava Kotira mwaauq variva qutu viho, tiro.

<sup>40</sup> Jesusiva qutu vuvata nraakye mponramwuvanto nyianrasata variqata taqe varura. Mwinramwuhuaqitairo hininramwu nyutu vahirero. Mariaava Makataranyaava mpo, Mariaava Iemisiva nraakiaraa vaisi mwiavata Iosisiravata nyova mpo, Saromeva mpo, mwihua mwini varura.

<sup>41</sup> Nraakye mwinramwuhua Jesusiva Karirini nrohu entara mwia vataqita nro-hiqata mwia kyaiqa kyaahaqama mwato nraakyenramwuhua varuvata nraakye mponramwuvata mwini varura. Mwihua Jesusiravatama kyeta nruhua Ierusaremini varura.

### *Jesusira quintamwa tora*

(*Matiu 27:57-61; Ruku 23:50-55; Ioni 19:38-42*)

<sup>42-43</sup> Entama virera huvaro Iosepiva Arimatanyaava nri ntora. Mwi vaisiva vaisi kyuqeva kaanasorivanto variqaro Kotiva ntaqikyiani entava nrianinranra taqevaro mwia vekya varuva nri ntero, hora Iutaa mwaanra enta vahianinranra riero hia aatu

hiraitiro, uro Pairaatirara Jesusira mwamwantara kyapara hiro tiqaro, Mwia mpiraqe varaqina uro quntaakyе, tiro.

<sup>44</sup> Mwitaa tuvaro Pairaativa Jesusiva qamwanrama qutu vurara airi nraato tiro ntaqu vaisira mpo nraanrama kyero kyapara huvaro mwi vaisiva tiqaro,

<sup>45</sup> Qio qutaama qutu viho, tuvaro Pairaativa Iosepirara tiqaro, Qioma mwia mwamwanta varaqira uro quntamwa tenanrave, tiro.

<sup>46</sup> Mwitaa tuvaro Iosepiva egarori tavuna kyoqaama kyero Jesusira mwamwanta kyatariqaatairo itu kyero egarori tavuna mwiaqotairo qapuqama kyero uro vaisi quntarera ori vaurutoraqi vera vatero ori nronra mpo ventaqiro uro mwia nrona titora.

<sup>47</sup> Mariaava Makataranyaavavata, Mariaava Iosisira nrovavata, taqe varuvata Jesusira oriqi vera vatora.

## 16

### *Iesusiva qutu vuraqitairo sivura*

(Matiu 28:1-8; Ruku 24:1-12; Ioni 20:1-10)

<sup>1</sup> Saarareqa Iutaavanto mwaanra tu entava taiqovata Mariaava Makataranyaaa nraakyevantovata, mwia qamwava Iemisira nrovavata, Saromevavata, mwi nraakyenramwuhua munima kyeta kyuqema kyero mwunta vu inraikyara vareta Jesusira mwamwantaqa qumwatarerata vura.

<sup>2</sup> Saante toqaqi huarivanto mate nrintoraqi mwinramwuhua Jesusira quntamwa toraqiara vura.

<sup>3</sup> Aanrani viqata mwinramwuhua nai kyapara hi nai kyapara hi tiqata, Tire mwini uro ntaararo tavave ori nronra quesana titataara vara kyaananrove. Ori mwia nronra nrusi ntamwa taarave, tita.

<sup>4</sup> Mwitaa timwa kyeta mwinramwuhua nri nteta taqovaro ori nronra mwia nrusi venta kyovaro qatinani vahura.

<sup>5</sup> Orivanto mwitaama vahuvata taqeta mwinramwuhua oriqi vera nteta taqovaro vaisi mpo qaraakya vaisivanto egarori tuavaaqa ututo vaisiva mwipi hini kyaataaqi mwatakyaa viro varura. Mwiva mwipi varuvata mwia taqeta aatu huvaro

<sup>6</sup> mwiva mwihuara tiqaro, Hia aatu hiate. Jesusira Nasaretinyaanra kyatariqaa rutaa vaisira, nkyenramwu mwianrave puua hi variavo? Mwiva hia mwaaqi variho. Mwiva qatima siviho. Nkyenramwu mwaini taqaate. Mwaaqi mwia vataaraqi hiama variho.

<sup>7</sup> Qio mwaa quara vareta uro mwia nraaqiaranramwuvata, Pitaaravata, timwa nyiate. Mwitaama timwa nyiate. Mwiva nraante nkyi suni Karirinima viho. Nkyenramwuvata mwini vita uro mwia taqevavarave. Taura qati variqaro mwianra nkyi timwa nyunra mate mwivauma vaiho. Mwi quara timwa nyiate, tiro.

<sup>8</sup> Mwiva mwitaa tuvata aatu hiqatara tita, mwinramwuhua Jesusira quntamwa toraqitaita veva nteta hiantamwa tetu aanrani viqata hia mpohuavata timwa nyinraitita, vura.

### *Iesusiva Mariaara Makataranyaanra vuqaa qovarama vura*

(Ioni 20:11-18)

<sup>9</sup> [Iesusiva Saante toqaqi qutu vuraqitairo siviro vuni mwiva Mariaara Makataranyaanra vuqaa nraante qovarama vura. Haaru Iesusiva nraakyeh mwia utaqitairo vaana 7 nramwu sitovata nritare vu nraakyera vuqaa qovarama vuvaro

<sup>10</sup> Mariaava uro Jesusira nraaqiaranramwu timwa nyinrenro vuva uro taqovata mwihua Jesusirara ntate varura.

<sup>11</sup> Ntate varuvaro mwiva mwihuara timwa nyinro tiqaro, Iesusiva qatima siviro variho. Nte ntena puqotaina mwia taqauqo, tuvata mwihuara hia mwia quara qutaave tura.

*Iesusiva nai nraaqiara mpotana suqaa qovarama vura  
(Ruku 24:13-35)*

<sup>12</sup> Mwi entara Iesusiva nraahumwa mpo qarama kyero nai nraaqiara taaratana suqaa qovarama vura.

<sup>13</sup> Mwitanahua aanraqaa vi varuvaro Iesusiva qovarama vuvata mwihua mwia taqeta uro ntanteta nrumeru hini mwihua timwa nyuvata mwihua hia mwitanahua quara quitaave tura.

*Iesusiva nai nraaqiara 11 nramwu suqaa qovarama vura  
(Matiu 28:16-20; Ruku 24:36-49; Ioni 20:19-23)*

<sup>14</sup> Qio nraakiara ekyaara Iesusira nraaqiara 11 nramwuvanto kyara nre varuvaro Iesusiva mwihua suqaa qovarama vura. Iesusiva qati siviro varuvata mpo uhua mwia taqeta uro Iesusira nraaqiaranramwu timwa nyuvata mwihua mwi quarara unra quave timwa kyeta varuvarora tiro, Iesusiva nkyiari suqaa qovarama viro mwia kyaara mwihua inronra hiro tiqaro, Nkye mwi quarara quitaave qiataara vahatama nkye kepuqyaqama kyeta variqata hia quitaave qiaovo, tiro.

<sup>15</sup> Mwitaa timwa kyero mwihua timwa nyinro tiqaro, Nkye ekyaas mwata maata nrohiqata ekyaas nraakye qora kyuqe qua mwaa timwa nyiate.

<sup>16</sup> Timwa nyivaro ni quara quitaave timwa kyero, nramanri varaani vaisira, mwiamma Kotiva qio vitaananrove. Ni quara hia quitaave qiani vaisira Kotiva hia mwia vitaraitiro, mwiaqaa qua vataananrove.

<sup>17</sup> Ni quara quitaave tihua, mwihuama nronra kyaiqa mwataa hianinra qio varevarave. Mwihua ni nutu nteqatama vaana titaivata vivarave. Mwihua nraahumwa mpo mwatanaa quavata qio tivarave.

<sup>18</sup> Mwihua quaiha tu varaiwaro mwi inraikyava hia mwihua ruananrove. Mwihua tuhi nramanri nraivaro tuhi nramanrivanto hia mwihua ruananrove. Mwihua nriqa vihuaqa kyauqu vataivata mwihua kyugema vivarave, tiro. Turama.

*Kotiva Iesusira vitovaro nyaamwuni vura  
(Ruku 24:50-53; Kyaiqa Varora 1:9-11)*

<sup>19</sup> Nronravanto Iesusiva nai nraaqiaranramwu kyapata qua timwa nyi taiqa kyovaro Kotiva mwia nyaamwuni vitero vuvaro mwiva mwini nronraqama viro Kotira kyauqu kyaatutani mwatakyaa virero vurama.

<sup>20</sup> Iesusiva nyaamwuni vuvata mwia nraaqiaranramwuvanto mwata maata vahuntema nrohiqata Iesusirara timwa nyi varuvaro nronravanto Iesusiva mwihua kyaahaqa hi varuvaro mwihua kyaiqvanto kepuqyaqama viro nritarero vahuvatara titi, nraakye qoravanto taqovaro mwihua quavanto quataa qua nraahu vahura.]

## RUKU

### Rukuva Iesusiva nrohurara tura

<sup>1</sup> Nronra vaisi Tiopiraasio, Iesusiva tiri utaqaa variqaro mpo kyaiqa mpo kyaiqa varorara airi vaisivanto mwi quara qara ntumwa torave.

<sup>2</sup> Tauraaqama kye vaisi mponramwuvanto nkyiari suqotaita mwi inraikyara taqeta, mwiaqaatai tiri timwa timwuvata vaisi airivanto mwi quara qara ntumwa torave.

<sup>3</sup> Nronra vaisio, ntevata mwi quara okyaraqaataina ntapihi riarerave timwa kyena, airi enta kyaparamaqi vina mwi quara qio ntapihi kyena riena, evata ntapihi kyera riaante tina, mwaa quara okyaravata, tavaaravata, mwutuvata, qara ntumwa tena.

<sup>4</sup> Vaisi mponramwuvanto i timwa mwu quara ntapihi kyera riaante tina, ntevata mwaa quara ntapihi kyena i timwa mwinrenrave.

#### *Sekaraiaakya Irisavetikya*

<sup>5</sup> Herotiva vunyaa vaisivanto Iutaa mwataqaa ntaqikyi varu entara vaisi mpovanto Sekaraiaava mwaanra kyaiqa vareqaro nraakye qorara rieqaro Kotira kyaiqa vara mwate varu vaisiva varurama. Mwiva Avaisaara kuaa okyaravanto varura. Mwia nraata mwia nrutu Irisavetiva mwivavata Eroninra kuaa okyaravanto Kotira kyaiqa vare varu okyarahua varurama.

<sup>6</sup> Sekaraiaakya Irisavetikya mwitanahua Kotira vuqaa avuqavuma variqata Kotira qua ekyaa qua riemwaqi vi varurama.

<sup>7</sup> Mwitaamaqi viqata hia nraaqiaravata mwatorama. Irisavetiva ehaaraqa huva hia nraaqiara mwataraitiro, qatitana variqi vita kyonta nyaapaiqa hurama.

<sup>8-9</sup> Mpo enta Kotira kyaiqa vara mwate varu vaisihua mponramwuvanto kyaiqa vara taiqa kyeta uro mwaatani varuvaro Sekaraiaava varaari iherava nruvata mwia vataahuavata mwia kyaahaqa hiqata Kotira nraamwuqi kyaiqa vararerata nrunrama. Mwihua kyaiqa vararerera hiqata santu vera kyeqata kyaiqa *ntuqaaqama/puhama* kyeta Sekaraiaarara, E Kotira nraamwuqi variqara Kotirani kyuqe munra quarive tira, qia quara mwataante, tuvaro Sekaraiaava nronravanto hu nraamwunraqi nanrianraa vera ntero mwunta vu inraikyara vara kyero qiaqaa quararerero viro.

<sup>10</sup> Mwiva mwipi variqaro mwi kyaiqara vare varuvata qati nraakye qoravanto mwaatasata ntuvaantua hita Kotirara aakyara nte varura.

<sup>11</sup> Mwihua Kotirara aakyara nte varuvaro Sekaraiaava nraamwuqi varuvaro qamwanrama Kotiva titova nyaamwunyaa vaisivanto mwiaqaatairo qovarama viro munra quani taintara tataaqa mwia kyauqu kyaatutani siviro varuvaro

<sup>12</sup> Sekaraiaava mwia taqero nrihanrama viro aatu hiro.

<sup>13</sup> Aatu hi varuvaro Kotiva titova tiqaro, Sekaraiaao, hia aatu hiante. E Kotirara aakyara nteqara ntumwahiamwa hiananra Kotiva riaiho. I nraatavanto Irisavetiva qoraisi nraaqiara mwata taananrove. Mwi nraaqiarara nrutu nteqara Ioninrave qianta.

<sup>14</sup> Mwia mwata taaninranra evata nraakye qora airivantovata mwianra qamwate-varave.

<sup>15</sup> Mwiva Kotira vuqaa vaisi nronravanto varianinrave. Mwiva uainivata mwi nra-manrinra voti hianinravata hia nraanrive. Mwia mwata taani entaraqaatairo Kotira mwanraquravanto kepuqyaqama kyero mwiaqaa ntaqikyiraro variqiro quananrove.

<sup>16</sup> Isareri mwatanaa mwaahua airivanto mwia qua rieqata uaqia hi aanranra qaqlira kyeta uro ntante Kotirara tiri nronravantove timwa kyeta Kotira aanraqaa vivarave.

<sup>17</sup> Kotiva i nraaqiara titairaro mwiva nraante urontero nkyi haivaqava Iraisaava kepuqyaqama kyero varontema kyero mwiva airi nraakye qora kyaahaqa hianinrave.

Ioninra qua rieqatama vaisivanto antua qua qaquirakte nkyiari nyaaqumwanravata qamwateqa varivarave. Ioniva qua timwa nyinrata Kotira qua raaqu kye hua qaiqaa ntapihi kye riemwaqi viqata varivarave. Ioniva nraakyae qora terama tairata mwihua nronra vaisi vekya variate, tiro.

<sup>18</sup> Mwitaa tuvaro Sekaraiaava Kotiva titorara tiqaro, Qaqao, e tinanranra nte nataama kyenave quataave qianinrave? Nte nyaapaiqama vuqaro ni naatavantovata kyontaqama viho, tiro.

<sup>19</sup> Tuvaro Kotiva titova mwia timwa mwinro tiqaro, Nte Keviriarivave. Nte Kotira vuqaa sivi varuvave. Kotiva ni titaihana nte kyuqe mwakyaakya tumu i timwa mwuqo.

<sup>20</sup> Qio riaante. E ni quara hia quataave tinanra mwia kyaara i nrovanto tita virara hia qio qua tinanrave. Mwitaama variqira viraro i nraatavanto nraaqiara mwata tairarama qaiqaa qua tinanrave. Nte iara qianinra quataama qovara hiananrove, tiro.

<sup>21</sup> Kotiva titova nyaamwunyaa vaisivanto mwitaa ti varuvata mwaatani varu nraakyae qorahua Sekaraiaara vekya variqata taqovaro nraamwuqi mpuahaama varuvata mwihua airi nraato tita tiqata, Nataa hiqarove mwiva hia vaakya veva ntaiho? timwa kyeta taqe varuvare

<sup>22</sup> Sekaraiaava veva ntovata mwihua taqovaro qua qiankye tura hia qio qua tura.

Mwiva hia qua tuvata mwihua tiqata, Sekaraiaava mwiqi variharo mpo inraikyavanto mwia vuqaa qovara iharoma mwia nrovanto tita viharo hia qio qua tiho, tita. Tuvaro Sekaraiaava qua qiankye tura hia qua tiraitiro, kyauquqo nraahu piaateqaro varurama.

<sup>23</sup> Mwiva kyaiqa varo iherava taiqa vuvaro mwiva nruru ntantero nai mwaatani uro varurama.

<sup>24</sup> Uro varuvaro mwia nraatavanto Irisavetiva nraaqiara tuaqa hurama.

Irisavetiva nraaqiara tuaqa hiro mwiva tora hini kyauquruara nraamwuqi nraahu tuqeta kyero varurama.

<sup>25</sup> Mwiva tiqaro, Kotiva nianra po tirave. Tauraaqama hia nraaqiara mwataraitina, kyauriqa varurave. Mate mwaa entara nte nraaqiara tuaqa hina hia kyauriraitina varuqo, tiro. Mwitaa turama.

### *Keviriariva nyaamwusairo tumu Mariaara timwa mwunra*

<sup>26</sup> Irisavetiva nraaqiara tuaqa huvaro 6 tora nritarovaro Kotiva qaiqaa Keviriarira titovaro mwiva Nasareti mwatuukya Karirini tumu ntora.

<sup>27</sup> Keviriariva Iosepira tito nraakyera qaraakya nraakyae mwakyaakya timwa mwinrenro tumunrama. Iosepira okyara varirerata Ntevitira nai haivaqara kuua okyara varurama. Iosepira tito nraakyera nrutu Mariaava.

<sup>28</sup> Kotiva titova tumu ntero verante Mariaarara tiqaro, Varirave hiaro? I kyugema mwatai nraakyeva variaro. Nronravanto ivata variho, tiro.

<sup>29</sup> Mwitaa tuvaro Mariaava mwia qua riero nronra nraato riero tiqaro, Nataa iharove nianra mwitaa tiho? tiro.

<sup>30</sup> Mwitaa tuvaro Kotiva titova tiqaro, Mariaao, hia aatu hiante. Kotiva iara qamwateqaro variho.

<sup>31</sup> E riaante. E nraaqiara tuaqa hira qoraisi nraaqiara mwata tera mwia nrutu nteqara Iesusirave qiant.

<sup>32</sup> Mwiva nronra tueri nronra vaisima variananrove. Mwianrama Kotiva nai virini nyaamwuni varira mwia mwaaquve tivarave. Nronravanto Kotiva Ntevitiva nai haivaqava ntaqikyiani kyaiqara mwia mwianinrave.

<sup>33</sup> I nraaqiaravanto Iaikopura okyaraqaama ekyaa enta ekyaa enta ntaqikyianinrave. Mwiva ntaqikyiani kyaiqava hia taiqaaninrave, tiro.

<sup>34</sup> Keviriariva mwitaa tuvaro Mariaava mwia kyapara hiro tiqaro, Nataama kyeroove mwitaa hiananrove? Hia nte qoraisi varauvave, tiro.

<sup>35</sup> Mariaava mwitaa tuvaro Kotiva titova timwa mwinro tiqaro, Kotira mwanraquravanto ivata variraro Kotira peqvanto i ntumwaqu taaninrave. E mwata terava Kotira kyaiqa nraahu varaari vaisiva varirata mwianra Kotira mwaaqve tivarave, tiro.

<sup>36</sup> Mwitaa timwa kyero mwiva tiqaro, I vataava Irisavetiva kyontaqama vivavata mwiva nraaqiara mwataaninrave. Mwi nraakyerara ehaaraqa hivave qiavaro mwiva nraaqiara tuaqa iharo 6 tora nritaraiho.

<sup>37</sup> Kotiva ekyaa kyaiqa qio nraahu vare varivama variho, tiro.

<sup>38</sup> Kotiva titova mwitaa tuvaro Mariaava tiqaro, Nte Kotira kyaiqa nraahu varaavama varuqo. Qio e tinantema kyero Kotiva ni mwitaa hiarive, tiro. Mwitaa tuvaro Kotiva titova tumu ntantero vurama.

### *Mariaava Irisavetira uro timwa mwunra*

<sup>39</sup> Kotiva tito vaisiva tumu ntantero vuraro Mariaava qamwanrama kyero siviro Iutiaani mwatukya mpo taaqiqi vahuraqi Irisavetira timwa mwinrenro vurama.

<sup>40</sup> Vuva uro Sekaraiaara nraamwuqi vera ntero Irisavetira qua mwantor.

<sup>41</sup> Qua mwante varuvaro Irisavetira vikyokyaqitairo nraaqiaravanto qakyaa huvaro Kotira mwanraquravanto Irisavetira kepukyaqama kyero kyaahaqa huvaro

<sup>42</sup> Irisavetiva aakyara ntero tiqaro, Airi nraakye variavaro Kotiva i nraahuma kyuqema mwataiho. E mwata tena nraaqiararavata Kotiva kyuqema mwataarive.

<sup>43</sup> I nraaqiara vunyaa vaisi kepukyavanto variqaro niqaa ntaqikyiariva varihara e mwia nrova variqarama e ni qumina nraakye nrumu taqrera nrianro.

<sup>44</sup> E vaakya ni qua mwantaarana nte i qua rie varuqaro nraaqiaravanto ni pikyokyaqitairo qakyaa iho.

<sup>45</sup> Nronravanto mwi mwakyaakyara timwa mwihanra e mwia quara qutaa mwitaa hiananrove qiananranra tiro, Kotiva i kyuqema mwataihara qamwateqara variaro, tiro.

### *Mariaava ihi tiqaro Kotira nrutu tuaaherora*

<sup>46</sup> Irisavetiva mwitaa tuvaro Mariaava Kotira nrutu tuaaherero tiqaro,

<sup>47</sup> Nte ntena mwutukyaqitaina Kotira nrutu tuaaherauqo.

Kotiva ni kyaahaqa hiariva variharora tiro,  
ni mwanraquravanto qamwateqaro variho.

<sup>48-49</sup> Nte Kotira kyaiqa nraakye qumina nraakye varuqaro  
Kotiva ni nraahu kyuqema matairave.

Kotiva kepukyavanto variqaro  
nronra inraikya ni mwitaama matairara tita,  
mate varihuavata, nraakiara varihuavata,  
nianra Kotiva nronraqama kyero  
mwi nraakyera kyuqema mwatairave tivarave.

Kotira okyaravanto vahirero  
nai avuqavuma kyero vahirave.

<sup>50</sup> Haaruvata, matevata, qakyovata,  
ta nraakye qorahuave, Kotira qua riaahua  
mwihua Kotiva po tiro kyuqema nyatairave.

<sup>51</sup> Mwihua nkyiari nyutu tuaahera kyeta ntuaantuama vita  
uaqia hi kyaiqara vararerata uti variavaro  
Kotiva nai kyauqu kepukyaqo mwihua raaputa  
mpona mpona kyairave.

<sup>52</sup> Kotiva nronra vaisi vara mwatumwi qumina  
vaisiqama tero qumina vaisi vara nronraqama taiharo  
nronraqama virave.

<sup>53</sup> Nraataa hi vaishua Kotiva kyara nyihata  
nreta qio variarave.

Airi inraikya vataira Kotiva titaiharo  
hia mpo inraikyavata vararaitiro, qati virave.

<sup>54-55</sup> Kotiva nai kyauqu nriqiqaa vatero timwa tai quara  
vataqiro viqaro tiri Isareri nraaqiara kyaahaqa hirave.  
Mwiva haaru Evarahaamunranra tiqaro,  
Nte iaravata, i nraisi mwihuaravata,  
ekyaa enta ekyaa enta po tina kyuqemaqina virerave,  
tu quara hia taunru kyairave, tiro.

<sup>56</sup> Mariaava mwitaa timwa kyero Irisavetikya variqiro viro taarampo tora vara  
kyero nrumeru ntantero nai mwaatani vurama.

### *Irisavetiva Ioninra mwatora*

<sup>57</sup> Irisavetiva nraaqiara mwataari entava nri ntovaro mwiva mwi entara qoraisi  
nraaqiara mwata kyora.

<sup>58</sup> Mwata kyovata mwia nramwunaahuavata, mwi mwatanaahuavata, riovoro  
Kotiva Irisavetirara kyuqe huvata mwihua uro Irisavetiravata variqata nraaqiara  
mwianra qamwatarerata nrurra.

<sup>59</sup> Mwihua nri ntovaro 8 enta nritarovaro mwi nraaqiarava qoraisi nraaqiara  
varuvatara tita, mwia mwamwanta toqarerata ntuaantuama vita. Ntuuaantuama  
vita variqata mwihua mwia nrutu nteqata mwia qora nrutu Sekaraiaavave qiare  
tuvoro

<sup>60</sup> mwia nrova qaqaq tiro, Nte mwia nrutu Ionivave tirerave, tiro.

<sup>61</sup> Mwiva mwitaa tuvata mwihua tiqata, Hia i okyaraqi mwi nrutura vahirama e mwi  
nrutura ntaaro, tita.

<sup>62</sup> Mwitaa timwa kyeta mwihua Sekaraiaaraqaa kyauqu piaateqa mwia kyapara  
hita, E ena mwaaku nanra nrutuve mwinanrave? tuvaro

<sup>63</sup> Sekaraiaava kyauqu piaateqaro pepaa vara mpiae tuvata pepaa vara mwuvaro  
Sekaraiaava mwataama kyero qara ntiro, Mwia nrutu Ionivave, tiro.

Mwitaama qara ntumwa tovata mwihua nrighanrama vita.

<sup>64</sup> Nrighanrama vuvaro qamwanrama Sekaraiaara nrovanto qatua vuvaro mwiva qio  
qua tiro. Mwiva qio qua tiqaroma Kotira nrutu tuaaherero.

<sup>65</sup> Mwitaa ti varuvata mwia nramwunaahua mpoqama kyeta aatu hi varurama. Mwi  
quava ekyaa Iutiaani vuvata

<sup>66</sup> nai timwa mwi nai timwa mwi hita tiqata, Mwi nraaqiarava nataa hiari vaisivave  
variananrove? tita. Mwihua taqovaro Kotiva kyaahaqa hi varuvaro mwi nraaqiarava  
varurama.

### *Kotira mwanraquravanto mwia kyaahaqa huvaro Sekaraiaava ihi tura*

<sup>67</sup> Kotira mwanraquravanto mwia qora Sekaraiaara kepuqyaqama  
kyero kyaahaqa huvaro mwiva Kotira qua mwataama tiro:

<sup>68</sup> Kotiva nronravanto tiri Isareriqaa ntaqikyi varivave.

Nrivaqe mwia nrutu tuaaheraare.

Mwiva tiri nai nraakye qora kyaahaqa hiro  
huvantu kyarero nriho.

<sup>69</sup> Kotiva tiri haivaqara Ntevitira nraisi mpo vara  
mwaamwianrama taiharo mwi vaisiva kepuqyavanto  
variqaro tiri huvantu kyairaqe qio variare.

<sup>70</sup> Haaru Kotiva kyaahaqa huvata  
mwia kyaiqa vaisinramwu mwia qua qovarama kyeta  
nraakye qora timwa nyiqata

<sup>71</sup> Kotiva mwitaa tiho tura,  
 Nkyi nramwutaahua nkyi ru kyevorave tinama,  
 nte nkyi kyaahaqa hirerave.  
 Nkyi uaqama nyate varihua nkyiqa ntaqikyiqi vivorave  
 tinama, nte nkyi huvantu kyarerave turave.

<sup>72</sup> Kotiva tiri haivaqahuara tiqaro,  
 nte nkyiara po timwa nyatena nte nkyivata variqana  
 qua vataura hia taunru kyarerave, turave.

<sup>73-74</sup> Kotiva nai kyauqu nriqiqaa vatero  
 tiri haivaqara Evarahaamunranra tiqaro,  
 Nraakiara e mwatara terhua mwihua nramwutaahua  
 mwihua ru kyevorave tina,  
 mwihua nte vaitutuma nyataaninrave.  
 Nte mwihua vaitutuma nyataarita  
 mwihua hia nramwutaahua nraatu aatu hiraitita,  
<sup>75</sup> mwihua qati variqi viqata ni puqaa variqata  
 ni kyaiqa nraahu kyugema kyeta vareqata  
 avuqavuma kyeta nrohivarave, tiro.

<sup>76</sup> Sekaraiaava mwitaa timwa kyero mwiva nai nraaqiarara tiqaro,  
 Ni maaquo, nraakiara nraakye qoravanto iara tiqata,  
 Kotiva nyaamwuni variva vaisi mwia kyaahaqa hi variharo  
 mwiva Kotira qua ti variho tivarave.

Nronravanto nrinrenra hirara e nraante viqara mwia aanra  
 terama mwatenanrave.

<sup>77</sup> Kotiva nraakye qora uaquia hi kyaiqara uti quara nruka  
 nyatero mwihua huvantu nyataani quara,  
 e nraante timwa nyinanrave.

<sup>78</sup> Kotiva tiriara nronraqama kyero po tiqarora tiro, mwiva  
 ntuvahaani vaisira titairaro mwiva tire variananrani  
 tuminro

<sup>79</sup> tire quturahua kyokiraqi variananra  
 ntuvahama timwa taananrove.  
 Mwiva tiri tivitairaqtire mwaateraqama kyeta kyugema  
 variare, tiro.

Sekaraiaava mwitaa turama.

<sup>80</sup> Mwitaa tuvaro mwia mwaaqvanto nronra tuemwa vuvaro mwia mwanraquravantovata kepukyaqama vura. Mwiva qumina mwataqaa variqiro viro vaisiqama viro  
 mwiaqatairo mwiva Isarer mwatanaahua suqaa nri ntora.

## 2

### *Mariaaya Iesusira mwatora* *(Matiu 1:18-25)*

<sup>1</sup> Mwi entara Romeni mwatanaahua vunyaa vaisivanto Sisa Okasitaasiva taakisi  
 vararerera hiro tiqaro, Ekyaa mpo mwatanaa mpo mwatanaa nrutu vataate, tiro.

<sup>2-3</sup> Mwitaa tuvata ekyaa nraakye qora nkyiari mwaatani nrutu vatarerata nrumu  
 ntateqata vurama. Sairiniaasiva Siriaa mwataqaa ntaqikyu entara mwihua nrutu  
 vatorama. Nrutu varo okyarara mwi entara tohara kyeta varora.

<sup>4-5</sup> Nraakye qora nkyiari nyutu vatarerata vuvaro Iosepivavata Nasaretisairo siviro  
 nai tito nraakyera Mariaaravata vita varero Kariri mwata kyero uro Ntevitira  
 mwatukya Vetarahemini Iutaa mwatani nrutu vatarero vurama. Iosepiva nai  
 haivaqara Ntevitira okyaravantora tiro, mwini vurama.

Iosepiva Mariaara vita varero vuvaro Mariaava nraaqiara tuaqama vuva airi tora nraatara kyero mwiva nraaqiara mwataari entava qaumaqa huvaro

<sup>6-7</sup> mwiva Iosepikyantiri Vetarahemini uro ntora. Uro nte taqovata airi nraakye qora nrutu vatarerata nrumbu variqatama ekyaa nraamwu piqa kyovaro Mariaava purimakauvanto kyara nro nraamwunraqi variqaro qoraisi nraaqiara mwia nraamwu nraaqiara mwata kyero, mwia qapuqama kyero purimakauvanto kyara nro tanunraqi mwaati mwata tora.

### *Sipisipiqa ntaqikyu vaisihua uro nraaqiara mwia taqora*

<sup>8</sup> Mariaava nraaqiara mwata tovata entaqi vaisi mponramwu mwi mwataraqaa mwukyau vahunani variqata mwihua sipisipiqa ntaqikyi varura.

<sup>9</sup> Mwiqi varuvaro Kotiva nyaamwunyaaisi titova mpovanto qamwanrama mwihua suqaa qovarama vuvaro Kotira kepukyia inraikyavanto nronraqama kyero iteqaro ntuvaahe varuvata sipisipiqa ntaqikyi varuhua taqeta nronraqama kyeta aatu hi varura.

<sup>10</sup> Aatu hi varuvaro Kotiva tito vaisiva mwihua timwa nyinro tiqaro, Hia aatu hiate. Nte nkyi kyuqe mwakyaakyaa timwa nyinrenrana tumuqo. Mwi mwakyaakyara ekyaa nraakye qora rieta qamwateqatama varivarave.

<sup>11</sup> Mate nkyi haivaqara Ntevitira mwatukyaqi nraaqiara mpo mwata taiho. Mwiva nkyi kyaahaqa hiarivave. Mwiva nronravanto Kotiva titai nraaqiaravave.

<sup>12</sup> Ni quara quataave tirerata nkye vita uro taqaivaro mwi nraaqiarara mwata kyero qapuqama kyero purimakauvanto kyara nre vari tanunraqi mwaati mwata tairaro vaite varianinrama taqevavarave, tiro.

<sup>13</sup> Kotiva titova mwitaa tuvata qamwanrama nyaamwunyaahua ntaqi varuhua airivanto qovarama vita variqata Kotira nrutu tuaahereta tiqata,

<sup>14</sup> Kotiva nai virini varivave.

Tire mwia nrutu tuaahere varuro.

Mwatani Kotiva qamwata nyate vari vaisihua mwaateraqama variate, tita.

<sup>15</sup> Mwihua mwitaa timwa kyeta nraaqiara mpo mwata taita, Ntevitira mwatukyaqi ntaqikyu vaisihua nai timwa mwi nai timwa mwi hita tiqata, Ntevitira mwatukyaqi ntaqikyu nraaqiara mpo mwata taita, Ntevitira mwatukyaqi ntaqikyu nraaqiara mpo mwata taita.

<sup>16</sup> Mwitaa timwa kyeta mwihua hianteta vura.

Nrumu taqovaro Iosepiva Mariaakyantiri varuvaro nraaqiaravanto purimakauvanto kyara nro tanunraqi vaite varura.

<sup>17</sup> Sipisipiqa ntaqikyu vaisihua uro mwia taqeta tiqatama, Kotiva nyaamwunyaaisi titova mpovanto qamwanrama nyaamwunyaahua ntaqi varuhua nraaqiara mpo mwata taita.

<sup>18</sup> Sipisipiqa ntaqikyu vaisihua mwitaa tuvata mwi quara riohua qikye timwa kyeta airi vu nraato tiqata varura.

<sup>19</sup> Mariaava mwi quara nraatoqi vatero nrohiqarovata mwianra rie varura.

<sup>20</sup> Sipisipiqa ntaqikyu vaisihua nrumbu ntanteta mwihua nyaamwunyaaisi titova mpovanto qamwanrama nyaamwunyaahua ntaqi varuhua nraaqiara mpo mwata taita.

### *Iesusira nrutu ntamwa tora*

<sup>21</sup> Iesusira mwata tovaro 8 enta nritarovaro qoraisi nraaqiara varuvatara tita, mwia mwamwanta toqa kye entava nrintovata mwi entaraqaa mwia nrutu nteqatama, Iesusivave, turama. Haaru qumina enta, Mariaava hia nraaqiara tuaqa hu entara Kotiva nyaamwunyaaisi titova mwi nrutura mwiate tura rieqata mwi nrutura ntamwa tora.

### *Kotira nraamwuqi vura*

<sup>22</sup> Mariaava nraaqiara mwata tero Mosesiva mwaanra timwa to quara rieqaroma mpo entanramwu vari kyero mwiva kyotataqama quari entava nri ntovata mwivavata, Iosepivavata, Jesusira vita vareta Kotira mwinrenrata Ierusaremini vurama.

<sup>23</sup> Nronravanto mwaanra tu quara qara ntumwa tova mwitaama tiro:  
Ekyaa qoraisi nraaqiara nraamwuqama kyera  
mwata tenanra Kotira mwinranro mwiani variarive.  
<sup>24</sup> Mwi entara e Kotira nraamwuqi uro ntera nyaamwa  
taaratana minrunra voti hira mwinranro Kotirani  
qiaqaa kyairaro itamwa taiqa kyaarive, tura.

(Wok Pris 12:1-8)

Mariaakya Iosepikya mwi quara rieqatama Ierusaremini vura.

<sup>25</sup> Ierusaremini uro varuvaro mwini vaisi mpo Simioniva varura. Mwi vaisiva avuqavuma kyero nrohiqaro Kotira nrutu tuaahere varuva variqaro mwiva Isareri mwatanaahuaqa ntaqikyiani vaisirara taqe varura. Taqe varuvaro Kotira mwanraquravanto mwiavata variqaro

<sup>26</sup> vuni mwia timwa mwinro tiqaro, E hia qati qutu vinanrave. E nronravanto titaani vaisira, Mesaiaa mwia taqera qutu vinanrave, tura.

<sup>27</sup> Kotira mwanraquravanto mwitaa tuvaro Simioniva varuvaro mwi entara Kotira mwanraquravanto mwia vitero Kotira nraamwuqi vuvata Jesusira nrohua qohua nkyiari mwaanra qua rieqatama Jesusira vita vareta Kotira nraamwuqi vuvaro

<sup>28</sup> Simioniva nraaqiara mwia taqero mwia kyavuhu kye tutero Kotira nrutu tuaaherero tiqaro,

<sup>29</sup> Nronrao, e haaru turava mate quataama qovarama viho.

E qiomia ni ena kyaiqa vaisi titairaro  
ni mutukyaqitairo kyuqe hiraqe quankye.

<sup>30-31</sup> Ekyaa mpo mwatanaa mpo mwatanaahua taqaate tira,  
e tiri kyaahaqa hianinra mwia titaarana  
nte mate ntena puqotaina mwia taqauqo.

<sup>32</sup> Mwiva omwa votima kyero itamwaqiro vi varirata  
nkyiariara qumina mpo mwatanaa mpo mwatanaahua  
i okyara ntapihi kyeta taqevavarave.

Mwi vaisiva i nraakyte qora Isareri kyaahaqa hiraro mwihua  
nrutuvanto nronraqa hiarive, tiro.

<sup>33</sup> Simioniva mwitaa tuvata Jesusira nrohua qohua airi nraato tita tiqata, Qikye,  
nanra quave mwiva Jesusirara tiho? tuvaro

<sup>34</sup> Simioniva Kotirara aakyara ntero tiqaro, E mwitanahuavata mwihua nraaqiara  
mwiavata kyuqema nyataante, tiro. Timwa kyero mwiva mwia nronra Mariaara  
timwa mwinro tiqaro,  
Riaante. Kotiva titai nraaqiarava mwaava varirata Isareri  
vaisi mpo nramwuvanto mwiaqatai tumu ntita uaqiamma  
vi varivata mponramwuvanto mwia qamwata mwateta  
mwihua sivita kyuqema varivarave.

Kotiva nai okyara nraakyte goravanto taqaate tiro,  
nraaqiara mwia titaiva varirata  
nraakyte qora airivanto mwia qorrima mwatevarave.

<sup>35</sup> Nraakyte qora airivanto vu nraato tутера  
mwiva qovarama kyaananrove.

E variraro nraamwunruqa taari inraikyava  
paipa voti hiariva i mwutukya ruananrove, tiro.

<sup>36</sup> Simioniva Mariaarara mwitaa tuvaro poropeti nraakyte Kotira qua qovarama  
kyeqaro timwa nyi varu nraakyeva Anaavavata varura. Mwia qova Panueriva Asara  
okyaravanto varura. Anaava qoraisi varatero 7 ihi vara kyovalo

<sup>37</sup> mwia vaativanto qutu vuvaro mwiva mwiaqaatairo tetogaqama kyero variqiro viro kyontaqama viro airi ihi 84 ihi vara kyero, mwiva mpo enta mpo enta Kotira nraamwuqi uro nteqaro entaqivata, iheravata, Kotira nrutu tuaahereqaro kyara aurama tero Kotirara aakyara ntamwaqiro vi varura.

<sup>38</sup> Mwitaa huvara tiro, mwi entara Anaava Kotira nraamwuqi vera ntero Iesusira taqero nraaqiara mwianra rieqaro Kotirara kyuqeve tura. Mwitaa tuvata mpo uhua mwini varita Kotiva mwihua kaahaqa hirata Ierusaremiqi kyuqema varirara vekya varura. Mwi nraakye qorahua varuvaro Anaava Iesusira okyarara mpo qua mpo qua mwihua timwa nyunra.

### *Nasaretini tumu ntanteta vura*

<sup>39</sup> Anaava mwitaa tuvata Iosepikya Mariaakya nronravanto mwaanra qua tura rieqata ekyaa mwi kyaiqara vara taiqa kyeta, mwitanahua nraaqiara mwiavata viteta tumu ntanteta nkyiari mwaata Kariri mwata Nasaretini vurama.

<sup>40</sup> Mwini varuvaro nraaqiara mwiva nronra tuero kepukyaqama viro varuvaro mwia vu nraatovanto kyuqema vahuvaro Kotira kyuqe huva mwiavata vahura.

### *Iesusiva 12 ihi vara kyero Kotira nraamwuqi vura*

<sup>41</sup> Iesusira nrohua qohua mpo ihi mpo ihiqi Ierusaremini uro variqata vekyahu nyato entaraqaa kyara nreta tumu ntanteqata nkyiari mwaatani vivi hurama.

<sup>42</sup> Iesusiva 12 ihi vara kyovaro vekyahu nyato kyarara nre entava nri ntovata Mariaakya Iosepikya Iesusiravata viteta nauqaa hunte Ierusaremini mwi kyarara nranrenrata vurama.

<sup>43</sup> Uro mwini mpo entanramwu variqata mwi kyarara nramwa kyeta tiqata, Kyai teta mwaatani tumu ntante quare, timwa kyeta vuvaro Jesusiva nraahu Ierusaremini varuvata mwia nrohua qohua hia mwianra riaraitita vita.

<sup>44</sup> Mwitanahua tiqata, Mwiva vaakyama mpo hiahua kyapata viho, timwa kyeta aanraqaa kuua enta uro vaiteta tiqata, Kyaiqe mwia puaama kyeta taqaare, timwa kyeta nkyiari nramwunaahuaqi puaama kyeta taqovaro

<sup>45</sup> hia mwihua utaqi huvata Mariaakya Iosepikya nrumu ntanteta Ierusaremini mwianra puua hirerata vurama.

<sup>46</sup> Ierusaremini nrumu ntanteta uro taarampo enta mwianra puaamaqi vita taqovaro mwiva nraamwu nronra Kotira nraamwuqi variqaro nronra vaisi Iutaa mwaanra okyara timwa nyi varu vaisihua utaqaa mwatakyaa viro variqaro vaisi nronra mwihua qua rieqaro mwihua kyapara hi varura.

<sup>47</sup> Iesusiva nronra vaisinramwu utaqaa mwatakyaa viro varuvata nronra vaisinramwu qua tuvaro Jesusiva mwihua qua rieqaro mwiva nkyiari timwa nyuvata mwihua tiqata, Qikye, nronra tuaahua qiantema kyero mwaa nraaqiarava qua ti variho, tita.

<sup>48</sup> Mwihua mwitaa ti varuvata mwia nrohua qohua nri nteta taqovaro Iesusiva vaisi nronranramwu utaqaa mwatakyaa viro varuvata mwitanahua tiqata, Qikye, mwiva vaisi nronra utaqaa variqaroma qua ti variho, timwa kyeta mwia nrova tiqaro, Ni maaquo, nanraqamave tiritana mwitaama timwa taaro? Tiretana i nrohua qohua iara nronra vu nraato tita i puua hirerata nrunro, tiro.

<sup>49</sup> Mwia nrova mwitaa tuvaro Jesusiva qaqao tiro, Nkyetana nanraqamave nianra puua hi variavo? Nkyetana hiave ntapihiavo? Nte ntena kora kyaiqa vare variarivama varuquo, tiro.

<sup>50</sup> Iesusiva mwitaa tuvata mwitanahua hia mwi quara okyara ntapihura.

<sup>51</sup> Hia ntapihuvaro Iesusiva mwiaqaatairo siviro nai nrohua qohua vatama kyero nrumu ntantero Nasaretini uro variqaro mwitanahua qua riemwaqiro viqaro hia mwitanahua qua raaqiraitiro varura. Mwia nrova Iesusiva tu qua qianinra nai nraatoqi vatero nrohiqaro riemwaqiro vura.

<sup>52</sup> Iesusiva nronra tuemwa vuvaro mwia vu nraatovanto ntapihi vuvaro kyuqe vu nraato vahuvuvaro Kotira mwutukyavantovata nraakye qora mwutukyavantovata mwianra vahurama.

### 3

*Ioniva nraakye qora mwakyaakya timwa nyunra*

*(Matiu 3:1-12; Maaki 1:2-8; Ioni 1:19-28)*

<sup>1</sup> Romeni mwatanaahua vunyaa vaisi Taiperiaasi Sisaava ntaqikyiqi viqaroma 15 ihi vara kyovaro mwi entara Pontiaasi Pairaativa kirapava vunyaava Iutia mwataqaa ntaqikyi varuvaro Herotiva Kariri mwataqaa ntaqikyi varuvaro Herotira qatavanto Piripiva Ituriaa mwataqaavata Terekonaitisi mwataqaavata ntaqikyi varuvaro Raiseniaasiva Apirini mwataqaa ntaqikyi varura.

<sup>2</sup> Mwitaa huvaro Anaasivavata Kaiapaasivavata nronraqama vita Kotira nraamwuqi variqata Kotira kyaiqa vare varu vaisihuqaa ntaqikyi varura. Mwi entara Sekariaara mwaaqu Ioniva qumina mwata, hia vaisivanto varunani varuvaro Kotiva mwianra ni qua timwa nyiante tuvaro

<sup>3</sup> Kotiva tunteema kyero Ioniva Iotaani nramanrivanto tumunani viro nrinro hiqaro qua mwakyaakya nraakye qora timwa nyinro tiqaro, Uaqia hi aanranra qaqlira kyeta nramanri varaivaro Kotiva nkye uaqia hi inraikyara utua quara nruka nyataarive, tiro. Ioniva mwitaa ti varura.

<sup>4</sup> Haaru qumina vakya Kotiva kyaahaqa huvaro poropeti vaisi Aisaiaava mwitaama tiro:

Mpovanto qumina mwatani variqaro aakyara ntero tiqaro,  
Nronravanto quaninra aanra terama mwateta  
mwia aanra ntapihi mwataivaro  
mwiva mwivauma qio quarive.

<sup>5</sup> Nkye nrurro aakuntu vahianinraqi quvu ntahirama kye,  
taaqi nronrave, taaqi patave, nkye mwia teqa kyaivaro  
aanravanto ntapihi vahiarive.

Aanra vi nteqe nri nteqe hianinra teqa kyaivaro  
kuaavau ntapihi kyero vahiarive.

Aanra uaqia hiro ori uvi auquqa hiariva vahianinra  
teqa kyeta kyuqema taivaro vahiarive.

<sup>6</sup> Ekyaa mwata maata vahintema varihua  
Kotiva mwitaama kyero nraakye qora huvantu nyatero  
sitaaninra mwia okyara taqeverave, tura.

*(Aisaiaa 40:3-5)*

Asaiaava haaru qumina vakya mwi quara tuvaro Ioniva nri ntero qutaa mwi quara turama.

<sup>7</sup> Ioniva mwitaa ti varuvata nraakye qora airivanto nramanri vararerata nruvaro Ioniva mwihua timwa nyinro tiqaro, Nkye quaiha uaqia hira nraaqiarama variavo. Kotira raraqa taiharo nraakye qora rirero uti variho. Tava nkyiara tiqaro, Nkyivata ruarivaarave. Hiante aatu quate, tihatave nkye mwaini nte hunani nriavo?

<sup>8</sup> Nkye qutaaqama kyeta uaqia hi kyaiqara qaqlira kyaivera, nkye mpo kyuqe kyaiqa nraahu varaivaqe taqaare. Nkye nkyeta tiqata, Evarahaamuva tiri haivaqavave, tiri tiqovave, varurara tita, tire mwia nraaqiarama variqata tire qio varuro, tivorave. Kotiva mwitaa hiataa hiraro mwiva qiomma nkyi qaqlira kyero ori mwaahua tuqasaa kyairata vaisi varita Evarahaamunra nraaqiara varivarave.

<sup>9</sup> Kotiva kyatari tuqirero kyaari kyatari okyaraqi terama taiho. Hia tamwa kyuqera riaaninra teqa kyero qiaqi kyairaro itamwa kyaananrove, tiro.

<sup>10</sup> Ioniva mwitaa tuvata mwihua mwia kyapara hita tiqata, Qikye, mwi quara rieta tire nataave hiananrave?

<sup>11</sup> tuvaro mwiva mwihua timwa nyinro tiqaro, Vaisi mpovanto sioti taaratana vaterava hia vataaninravata mpoku mwiante. Kyara vaterava hia vataaninravata ntainra kyera mwiante, tiro.

<sup>12</sup> Mwitaa tuvata taakisi vare varuhua nramanri vararerera nruhua mwia kyapara hita tiqata, Mwaanra ti variarao, mpo tire? Nataave hiananrave?

<sup>13</sup> tuvaro Ioniva mwihuavata timwa nyinro tiqaro, Nkye taakisi vareqata kirapara qua rieqata ntapihi kyeta taakisi varaate. Hia nkyeta riemwa kyeta mpoqiavata varaate, tiro.

<sup>14</sup> Ioniva mwitaa tuvata qaami vaisivanto mwia kyapara hita tiqata, Mpo tire? Tire nataave hiananrave? tuvaro Ioniva mwihua timwa nyinro tiqaro, Hia uro mporara i ntuqutu kyaarorave munima timwiante qiate. Hia unra timwa kyeta mporaqaa qua vataate. Nkye qaami kyaiqa vareqata munima varera mwianra qiove qiate, tiro.

<sup>15</sup> Ioniva mwitaa tuvata nraakyne qora mwihua Kotiva titani vaisira Mesaiaa mwia vekyaqa hiqata varuhuara tita, mwihua nkyiari rieta tiqata, Mwaa vaisivave Mesaiaavanto tiri kyaahaqa hiariva variananrove? tita.

<sup>16</sup> Mwihua mwitaa ti varuvaro Ioniva riero mwihua nkyiari timwa nyinro tiqaro, Nte qumina nramanri nkyi nyi varuqo. Nronravanto ni nraataraariva ni naakiara nri variho. Nte qumina vaisivantora tina, nte mwiva kyuqu nraamwu rupa tai kyaantara hiama qio huvantu mwataaninrave. Nkye nramanri varaantema kyero mwiva Kotira mwanraquravata, qiaqata, nkyi nyiananrove.

<sup>17</sup> Mwiva nai kyavoi kyauquqi tu varero kyakuma voti hira ntitatama kyero nronra mwia vaqitaqiro uro nai kyara nraamwuqi vatero kyapivata mwanrevata vaqitaqiro uro hia qipa quani qiaraqi tuto kyairaro itamwa kyaananrove, tiro.

<sup>18</sup> Mwitaa timwa kyero nraakyne qoravanto ntapihi kyeta mwia qua riaate tiro, Ioniva mpo qua mpo qua mwihua timwa nyinro. Iesusiva nriani quara kyuqe qua mwihua timwa nyunra.

### *Herotiva Ioninra karavuqi kyora*

<sup>19</sup> Herotiva Kariri mwataqaa ntaqikyi varuvaro Ioniva Herotira inronra hiro tiqaro, Herotiva hia nai qata nraata Herotinamainra varaataarave. Mwiva mwi kyaiqaravata uaqia hi kyaiqara kyaatavata uti varivave, tiro.

<sup>20</sup> Ioniva mwitaa tuvaro Herotiva mwia kyaara Ioninra karavuqi kyora. Mwitaa hiqaro Herotiva uaqia hi kyaiqara mpoqiavata utura.

### *Ioniva Iesusira nramanri mwunra*

(Matiu 3:13-17; Maaki 1:9-11)

<sup>21</sup> Ioniva nramanri nyi varu entara mwiva Iesusiravata nramanri mwunra. Iesusiva nramanri varero Kotirara aakyara nte varuvaro nyaamwuvanto qatua vuvaro

<sup>22</sup> Kotira mwanraquravanto nyaamwusairo nyaamwa minrunra votihuva tuminro Iesusiraqaa tumu vahuvuaro quavanto nyaamwusairo mwitaama tiro:

E ni maaqvanto variaro.

Ni mutukyavanto iara vaiho.

Nte iara qamwateqana varuqo, tiro. Tura.

### *Iesusira haivaqahua nyutu*

(Matiu 1:1-17)

<sup>23</sup> Iesusiva 30 ihi vara kyero mwiaqaatairo nai kyaiqa toharama kyero varaqiro vuvata nraakyne qoravanto mwianra Iosepira mwaaquve tura.

Iosepiva Hiraira mwaaquvanto varuvaro

<sup>24</sup> Hiraiva Mataatira mwaaquvanto varuvaro

Mataativa Rivaira mwaaquvanto varuvaro

Rivaiva Merakaira mwaaquvanto varuvaro  
 Merakaiva Ianainra mwaaquvanto varuvaro  
 Ianaiva Iosepira mwaaquvanto varuvaro  
**25** Iosepiva Matataiaasira mwaaquvanto varuvaro  
 Matataiaasiva Emosira mwaaquvanto varuvaro  
 Emosiva Neaminra mwaaquvanto varuvaro  
 Neamiva Esaraira mwaaquvanto varuvaro  
 Esaraiva Nakaira mwaaquvanto varuvaro  
**26** Nakaiva Meatira mwaaquvanto varuvaro  
 Meativa Matataiaasira mwaaquvanto varuvaro  
 Matataitaasiva Semeninra mwaaquvanto varuvaro  
 Semeniva Iosekira mwaaquvanto varuvaro  
 Iosekiva Iotaara mwaaquvanto varuvaro  
**27** Iotaava Ioanaaninra mwaaquvanto varuvaro  
 Ioanaaniva Resaara mwaaquvanto varuvaro  
 Resava Serapaperira mwaaquvanto varuvaro  
 Serapaperiva Siaritierira mwaaquvanto varuvaro  
 Siaritieriva Neraira mwaaquvanto varuvaro  
**28** Neraiva Merakaira mwaaquvanto varuvaro  
 Merakaiva Etaira mwaaquvanto varuvaro  
 Etaiva Kosaaminra mwaaquvanto varuvaro  
 Kosaamiva Erametaaminra mwaaquvanto varuvaro  
 Erametaamiva Eaara mwaaquvanto varuvaro  
**29** Eaava Iosuaara mwaaquvanto varuvaro  
 Iosuaava Eriesaara mwaaquvanto varuvaro  
 Eriesaava Ioriminra mwaaquvanto varuvaro  
 Iorimiva Mataatira mwaaquvanto varuvaro  
 Mataativa Rivaira mwaaquvanto varuvaro  
**30** Rivaiva Simioninra mwaaquvanto varuvaro  
 Simioniva Iutaara mwaaquvanto varuvaro  
 Iutaava Iosepira mwaaquvanto varuvaro  
 Iosepiva Ionaaminra mwaaquvanto varuvaro  
 Ionaamiva Eraikiminra mwaaquvanto varuvaro  
**31** Eraikimiva Meriaara mwaaquvanto varuvaro  
 Meriaava Menaanra mwaaquvanto varuvaro  
 Menaava Matataara mwaaquvanto varuvaro  
 Matataava Netaaninra mwaaquvanto varuvaro  
 Netaaniva Ntevitira mwaaquvanto varuvaro  
**32** Ntevitiva Iesira mwaaquvanto varuvaro  
 Iesiva Ompetira mwaaquvanto varuvaro  
 Ompetiva Mpoaasira mwaaquvanto varuvaro  
 Mpoaasiva Saramoninra mwaaquvanto varuvaro  
 Saramoniva Nasoninra mwaaquvanto varuvaro  
**33** Nasoniva Aminantaapira mwaaquvanto varuvaro  
 Aminantaapiva Atimininra mwaaquvanto varuvaro  
 Atiminiva Anainra mwaaquvanto varuvaro  
 Anaiva Hesaroninra mwaaquvanto varuvaro  
 Hesaroniva Peresira mwaaquvanto varuvaro  
 Peresiva Iutaara mwaaquvanto varuvaro  
**34** Iutaava Iaikopura mwaaquvanto varuvaro

Iaikopuva Aisaakira mwaaquvanto varuvaro  
 Aisaakiva Evarahaamunra mwaaquvanto varuvaro  
 Evarahaamuva Teraara mwaaquvanto varuvaro  
 Teraava Nehora mwaaquvanto varuvaro  
<sup>35</sup> Nehova Seraakira mwaaquvanto varuvaro  
 Seraakiva Riura mwaaquvanto varuvaro  
 Riuba Perekira mwaaquvanto varuvaro  
 Perekiva Ipaara mwaaquvanto varuvaro  
 Ipaava Siraara mwaaquvanto varuvaro  
<sup>36</sup> Siraava Kenaaninra mwaaquvanto varuvaro  
 Kenaaniva Apaakisatira mwaaquvanto varuvaro  
 Apaakisativa Seminra mwaaquvanto varuvaro  
 Semiva Noaanra mwaaquvanto varuvaro  
 Noaava Remekira mwaaquvanto varuvaro  
<sup>37</sup> Remekiva Metusaraara mwaaquvanto varuvaro  
 Metusaraava Inokura mwaaquvanto varuvaro  
 Inokuva Ieretira mwaaquvanto varuvaro  
 Ieretiva Mahararira mwaaquvanto varuvaro  
 Maharariva Kenaaninra mwaaquvanto varuvaro  
 Kenaaniva Inosira mwaaquvanto varuvaro  
<sup>38</sup> Inosiva Setira mwaaquvanto varuvaro  
 Setiva Ataamunra mwaaquvanto varuvaro  
 Ataamuva Kotira mwaaquvanto varura.

## 4

*Saataaniva Iesusira mwataara hura*  
*(Matiu 4:1-11; Maaki 1:12-13)*

<sup>1</sup> (Ioniva Iesusira nramanri mwi kyovaro mwiaqaatairo) Kotira mwanraquravanto Iesusiraqi piqa kyovaro Iotaani nramanri kyero nrumu ntantero vuvaro Kotira mwanraquravanto mwia vitero hia vaisivata varura qumina mwataqaa uro kyora.

<sup>2</sup> Uro kyovaro Iesusiva 40 enta mwini varuvaro Saataaniva Iesusiva mwia quara eo tiro mwia vataqiro quarive tiro, Iesusira mwataara hura. Iesusiva mwi entara variqiro viqaro hia kyara nrovaro nraataa huvaro varura.

<sup>3</sup> Iesusira nraataa huvaro varuvaro Saataaniva nri ntero tiqaro, E qutaa Kotira mwaaquvanto varirera, ori mwaahuara tirata mpereti tuemwa vivara nraante, tiro.

<sup>4</sup> Tuvaro Iesusiva nai timwa mwinro tiqaro, Qaqao, Kotira mpukuqi qara ntumwa tova mwitaama tiho:

Vaisivanto hiama kyara nraahu nramwaqiro viqaro  
 qati variqiro quananrove, turave, tiro.

*(Lo 8:3)*

<sup>5</sup> Iesusiva mwitaa tuvaro Saataaniva mwia vitaqiro uro veraraqaa vatero qamwanrama kyero vaisivanto ekyaa mwata maataqa ntaqikyi varura, ekyaa mwi mwatara mwia nraamwutero tiqaro,

<sup>6</sup> Mwaa inraikyara ekyaa ni mpiharo nini nraahuma vaiho. Nte mwaa inraikyara vaisi mpo mwiataa hiraqe qioma mwianinrave. Nte qioma mwaa inraikyara i mwianrinro i nrutuvanto nronraqama virara e mwi inraikyaraqaa ntaqikyiqira vinanrave.

<sup>7</sup> E ni nutu nraahu tuaahera matairera, nte qioma ekyaa mwaa inraikyara i mwianinrave, tiro.

<sup>8</sup> Mwitaa tuvaro Iesusiva nai timwa mwinro tiqaro, Qaqao, Kotira mpukuqi qara ntumwa tova mwitaama tiho:  
 Kotiva nronravanto varirara tira,

e mwia kyaiqa nraahu vara mwatera

mwia nrutu nraahu tuaaheraante, turave, tiro.

(Lo 6:13)

<sup>9</sup> Mwitaa tuvaro Saataaniva mwia vita varero Ierusaremini vuva uro Kotira nraamwu qiataqaa nai nyaamwuni vahuraqa kyero tiqaro, E qutaa Kotira mwaaquvanto varirera, mwaaqaataira kyavuhu vira mwatasata mpuamu ntaante.

<sup>10</sup> Kotira mpukuqi qara ntumwa tova mwitaama tiho:

Kotiva tirata nyaamwunyaahua iqaa kyuqema  
ntaqikyivarave, turave.

<sup>11</sup> Qaiqaavata tiqaro,

E ena kyuqu oriqa ntuteqa kyerorave tita,  
nyaamwunyaahua nkyiari kyauququotaita i tu vareta  
vivarave, turave, tiro.

(Ihi 91:11-12)

<sup>12</sup> Saataaniva mwitaa tuvaro Jesusiva nai timwa mwinro tiqaro,

Qaqao, Kotira mpukuqi vahi quava tiqaro,

Nronra Kotiva i mwanriqavanto varirara tira, e hia mwia  
mwataara hiante, turave, tiro.

(Lo 6:16)

<sup>13</sup> Mwitaa tuvaro Saataaniva Jesusira qumina mwataara hi taqero, kyai qaiqaa mpo enta mwia mwataara hiankye timwa kyero, Jesusira qaqlira mwini kyero vurama.

### *Iesusiva Karirini nai kyaiqa toharora*

(Matiu 4:12-17; Maaki 1:14-15)

<sup>14</sup> Saataaniva vuvaro Kotira mwanraquravanto Jesusira kepukya mwuvaro mwiva nrumu ntantero Karirini uro varura. Mwini uro varu quara ekya mwi mwataraqaa varu nraakye qorahua riemwa ntora.

<sup>15</sup> Iesusiva mwihua mwaanra nraamwu mpoqi mpoqi vera ntero variqaro qua timwa nyi varuvata nraakye qoravanto mwia nrutu tuaahereta mwia qamwata mwatora.

### *Nasaretinyaahua mwia qoririma mwatora*

(Matiu 13:53-58; Maaki 6:1-6)

<sup>16</sup> Iesusiva Karirini uro nrohiqaro nai tauraa nraaqiarakyaa varu mwatukyara Nasaretini uro ntero mwaanra tu entaraqaa mwaanra nraamwuqi nauqaa huntema kyero mwiqi viro. Mwiqi variqaro mwiva Kotira mpuku kyaara ntirero sivuvaro

<sup>17</sup> Aisaiaava qara ntumwa to mpukura mwuvaro Iesusiva mpuku ququrama tora huvantu kyero mwaa quara qara ntumwa tora puaama kyero kyaara ntiro tiqaro,

<sup>18</sup> Nte kyuqe mwakyaakya vehi nraakye qora  
timwa nyinrenra huqaro nronravanto ni qiataqaa  
vahamwenra qu mateqaro ni nronraqama kyero  
mwaa mwi vaisivave timwa kyero ni mwatama taihana  
nruqanro mwia mwanraquravanto nivata variqaro  
ni kyaahaqa hi variho.

Mwiva ni titero mwitaama nraakye qora timwa nyiante  
turave.

Rupataa nraakye qorahua qiom qati vivarave, qianta.

Vu qipa vihua vu ntapairi kyeta taqaate, qianta.

Uaqiama nyataavata muaanraqi variahua  
qiom qati vivarave, qianta.

<sup>19</sup> Nronravanto nraakye qora kyaahaqa hiqaro  
qamwata nyataari entava nri ntaaninra  
mwianra nraakye qora timwa nyiante.

Mwitaama kyera timwa nyiante, turave, tiro.

(Aisaiaa 61:1-2)

**20** Aisaiaava qara ntumwa to quara Iesusiva kyaara ntumwa kyero mwiaqaatairo mpuku ququrama kyero vaisi viti mwinro uro mwatakyaa viro. Iesusiva mwatakyaa viro varuvata mwaanra nraamwuqi varuhua mwia nraahu taqe varuvaro

**21** Iesusiva mwihua timwa nyinro tiqaro, Vaakya kyaara ntugata riaa quava mate quataa mwivauma vaiho, tiro.

**22** Iesusiva mwitaa tuvata mwihua mwianra tiqata, Iesusiva vaisi kyuqevave. Qikye, mwia nroqitairo kyuqe qua nriho, tita. Mwitaa timwa kyetavata qaiqaa mwianra tita, Qaqao, mwiva Iosepira mwaaquvantoma variho, tita.

**23** Mwihua mwitaa tuvaro Iesusiva mwihuara tiqaro, Nraakyе qora mpo quaqaa ntumwa kyeqata qia quaraqitaita nkye nanra quave nianra tivarave? Mwihua mpo qua tiqata, E totaabanto hirera, enavanto ena mwamwanta kyaahaqa hiante, qia quarave nianra tivarave? Nkye qaiqaa mwaa quarave nianra tivarave? Kapenaamini variqara nronra kyaiqa varaaro qiavata riaunanza e mwaqa ena mwatukyaqvata variqara mwi kyaiqara varaanteve, tivarave. Nkye nianra mwitaave tivarave? tiro.

**24** Mwitaa timwa kyero Iesusiva mwihua timwa nyinro tiqaro, Poropeti vaisivanto nai mwaatani varirata mwia nramwunaahua hia mwia qua rievarave.

**25** Riaivaqe nte nkyi timwa nyiankye. Haaru nkyi haivaqava Iraisaava qati varu entara mwaini Isareri mwatani huari nronraqama kyero itamwaqiro vuvaro taarampo ihi 6 torara hia vati ntuvaro hia mwi mwataraqaa kyaravata vahuvata mwi entara tetoka nraakyе airinramwuvanto varurave.

**26** Mwihua varuvaro Kotiva hia Iraisaara mwi nraakyehua varunani titaraitiro, mwiva Iraisaara titovaro mwiva mpo mwatanaa nraakyе tetokavanto Sarepaati mwatukya Saitoni mwaatani varura kyaahaqa hirero vurave.

**27** Haaru nkyi haivaqava mpo, Iraisaava poropeti vaisivanto varu entara Isareri mwatani vaisi airinramwu rumpuaravanto mwamwanta nramwaqiro vuhua varuvaro Iraisaava hia mwihuqaqitairo vaisi mpo kyaahaqa hiraitiro, mwiva mpo mwatanaa vaisi, Neamaaninra nraahu Siriaa mwatanyaanza, kyaahaqa huvaro mwia rumpuaravanto tavanta vurave, tiro.

**28** Iesusiva mwitaa tuvata mwaanra nraamwuqi varuhua mwi quara riovoro mwihua raraqa tovata

**29** sivita Iesusira ntavaaqavu kyora. Nasareti mwatukya mwiva taaqiqaa vahuvatara tita, mwihua mwia ntanrauqita uro okaiqi tuto kyarera huvaro

**30** Iesusiva nraakyе qora uta mwiaqaa vitarero qati vivura.

### *Vaanavanto utaqi varu vaisira qua (Maaki 1:21-28)*

**31** Iesusiva vuva Karirini vau mwatukyara Kapenaamini uto ntero mwini variqaro mwaanraqaa nraakyе qora qua mwakyaakya timwa nyi varuvata mwihua Iesusira qua rieta

**32** qikye tita, Mwiva nronra vaisi votima kyero kepukya qua timwa timwi variho, tita.

**33** Mwitaa ti varuvaro vaana uaquia hu inraikyava mwia utaqi varu vaisiva paatiro aakyara ntamwa kyero tiqaro,

**34** Iesusio, e Nasaretinyaavave. E tiri nataa hirerarave nrianro? E tiri uaqiamma timwa tarerarave nrianro? Nte i ntapihi kyauqo. Kotiva i titaihara e Kotira kyaiqa nraahu vare variarave, tiro.

**35** Mwitaa tuvaro Iesusiva vaana mwia inronra hiro tiqaro, Tirema variante. Mwi vaisiraqitaira nrutarera quante, tiro.

Mwitaa tuvaro vaana mwiva nraakyе qora suqaa mwi vaisira vara kyero tuto kyovaro mwiva mwatasata tumu ntuvaro vaana mwiva hia vaisi mwia riraitiro, mwiaqitairo nrutarero qatinani viro.

<sup>36</sup> Vaanavanto nritarero qatinani vuvata mwipi varuhua nrihanrama vita kyauqu ntukikinraaqqa teta nai timwa mwi nai timwa mwi hita tiqata, Mwiva nataama kyero mwitaa tiharove nritaraiho? Mwiva nronra vaisi votima kyero kepuuya qua ti varihata vaanavanto mwia qua rieta mwihua nritareta vi variarave, tita.

<sup>37</sup> Mwihua mwitaa timwaqita vita nrita huvata ekyaa mwi mwatara vara ututu varuhua mwi quara riemwa ntora.

*Pitaara nrinraatarara kyaahaqama kyora*

(Matiu 8:14-15; Maaki 1:29-31)

<sup>38</sup> Iesusiva mwaanra nraamwuqitairo veva ntero Saimoninra nraamwuqi uro varuvaro Saimoninra nrinraatarara nriqa vuvaro mwia mwamwanta qiara utovaro varuvata mwihua uro Iesusirara mwia kyaahaqa hiante tuvaro

<sup>39</sup> Iesusiva uro nraakye mwia nraaqani siviro variqaro nriqa vu inraikyara mwia titovaro mwiva taiqa vuvaro nraakye mwiva siviro qamwanrama kyero kyara mwihua nyunra.

*Iesusiva nriqavu nraakye qorahua airi kyuqema nyatora*

(Matiu 8:16-17; Maaki 1:32-34)

<sup>40</sup> Mwitaa huvaro huarivanto mpuani qio vi varuvata mwi mwatanaahua nkyiari nramwunaahua mpo qara mpo qarama kyero nriqa vuhua sita vareta Iesusiva varunani uro kyovaro mwiva nai kyauqu kuaa kuaa mwihuaqaa vatovata ekyaa mwihua kyuqema vura.

<sup>41</sup> Vaanavantovata airi nraakye qora utaqitaita nritare viqata aakyara nteta tiqata, E Kotira mwaquivanto variaro, tita. Mwihua mwitaa tiqata Iesusiva Mesaiaavanto varura mwia okyara ntapihi kyovarora tiro, Iesusiva mwihua inronra hiro tiqaro, Tirema variate, tiro. Tura.

*Iesusiva Iutaa mwatanaahua qua mwakyaakya timwa nyunra*

(Maaki 1:35-39)

<sup>42</sup> Mwia qanranraa qaata tovaro Iesusiva mwi mwatukyara kyero qumina mwatani vuvata nraakye qoravanto mwia puaa hirera vuhua uro mwia puaama kyeta Iesusiva hia mponani quarive tita mwia antuovaro

<sup>43</sup> Iesusiva qaqao tiro, Nte Kotiva ntaqikyiani mwakyaakya kyuqera mpo mwatukya mpo mwatukya nrohiqana timwa nyinrenrave. Kotiva mwi kyaiqarara ni titaihana nte tumuvave, tiro.

<sup>44</sup> Mwitaa timwa kyero Iesusiva vuva uro Iutiaani nrohiqaro mwaanra nraamwu mpoqi mpoqi uro variqaro mwakyaakya timwa nyi varura.

## 5

*Iesusiva tuvaro Saimoni Pitaava tavukya airi varora*

(Matiu 4:18-22; Maaki 1:16-20)

<sup>1</sup> Mpo enta Iesusiva Kenesareti rumpua tokyasataa siviro varuvata nraakye qora airivanto Kotira qua riarerata nai rataaqi nai rataaqi hi varuvaro

<sup>2</sup> Iesusiva taqovaro mpotu taaratana nramanriqitai ventaqi nrumu tokyani vatova vahura. Tavukya kyaiqa vare varuhua mpotu mwia mwini kyeta vahe haqirarerata vuvaro mpotuvanto mwini vahuvaro

<sup>3</sup> Iesusiva vuva uro Saimoninra mpotuqi mwaanri ntero variro Saimoninranra tiqaro, Venta kyairaro pataqia nramanriqi uromwi vahiarive, tiro. Mwitaa tuvaro venta kyovaro Iesusiva mpotuqi mwatakyaa viro variqaro nraakye qora mwakyaakya timwa nyinro.

<sup>4</sup> Iesusiva mwakyaakya timwa nyi taiqa kyero mwiva Saimoninranra tiqaro, Nkyenramwu mpotu ventaqita rumpua utani uro kyetama vahe ntamwa kyetama tavukya varaate, tiro.

<sup>5</sup> Mwitaa tuvaro Saimoniva qaqa tiro, Nronrao, tirenramwu entaqi qumina kepuqyaqama kye kyaiqa utuqi vita hia tavukya mpokuvata varauunanrave. Qio e mwitaa qiarata tire vahe vara kyeta tuto kyarerave, tiro.

<sup>6</sup> Saimoniva mwitaa timwa kyero mwivavata mpo uhuavata vahe nramanriki kyovaro tavukya airivanto vaheqi vijetovaro muaanra ntovaro vahevanto ntupema virera utuvata

<sup>7</sup> mwihua nkyiari henahua mpotu mpoqi varuhuara kyauqu kyaakyamwu huvata nruru mwihua kyaahaqa hita tavukya mwia pati mwaanri mpotu taara mwitana piqa kyovaro mpotutana muaanra nteqaro nramanriki vi quaqara hi varura.

<sup>8</sup> Saimoni Pitaava taqovaro mwitaama vahuvaro mwiva uro Iesusira vuqaa tumu ntiro tiqaro, Nronrao, nte uaquia hi kyaiqara uti varuvave. E ni kyera quante, tiro.

<sup>9</sup> Mwitaa timwa kyero mwivavata mwiaavata varuhua tavukya airi varorara rieqata airi nraato ti varura.

<sup>10</sup> Sepetira mwaaqutana Iemisikya Ionikya Saimoninravata kuaa kyaiqa mwia vare varutana tavukya airi varora mwianra kyauqu ntukikinraaqa teta airi nraato ti varura. Mwitaa huvaro Iesusiva Saimoninra timwa mwinro tiqaro, Hia aatu hiante. Mate mwaa iheraraqaataira e tavukya varaarantema kyera nraakye qoravata sitenanrave, tiro.

<sup>11</sup> Iesusiva mwitaa tuvata mwihua mpotu ntanrauqita uro nramanri tokyani vateta ekyaa inraikya qaqlira kyeta Iesusira vataqita vura.

*Iesusiva tauma rumpuaravanto uaqlama kyo vaisira kyuqema kyora  
(Matiu 8:1-4; Maaki 1:40-45)*

<sup>12</sup> Mpo enta Iesusiva mwatukya mpoqi uro varuvaro tauma rumpuaravanto uaqlama kyo vaisiva mwini varuva Iesusira taqero uro mwia vuqa tumu ntiro nai viri mpiami mwataqi vatero po tiro tiqaro, Nronrao, e ni kyaahaqa hiataa hirera, e qiomaa ni mamanta kyuqema matenanrave, tiro.

<sup>13</sup> Mwitaa tuvaro Iesusiva nai kyauqu mpiami mwia mwamwantaqa vatero tiqaro, Nte mwitaa hiataa ihana mwitaama mwatarerave. Nte iara kyuqema quante tuqo, tuvaro tauma rumpuaravanto mwia mwamwanta nre varuva qamwanrama tavanta vuvaro mwiva qio varura.

<sup>14</sup> Qio varuvaro Iesusiva mwianra kepuqyaqama kyero tiqaro, Hia mpohua timwa nyinraitira, viraro Kotira kyaiqa vara mwate variari vaisiva i mwamwanta taqaarive. Mwiaqataira e Mosesira mwaanra qua rieqarama munra quani qiara qurairata nraakye qoravanto iara tiqata, Qutaama mwia mwamwantavanto kyuqema viho, qiate, tiro.

<sup>15</sup> Iesusiva qao tuvarovata mwi quava viro nrinro huvata nraakye qora airivanto mwi quara rieta tiqata, Kyai tirevata Iesusiva varinani uro mwia qua riaararo mwiva tirivata kyuqema timwataarive, timwa kyeta mwiva hunani nrumu ntuaantua hura.

<sup>16</sup> Mwitaa huvaro Iesusiva mwihua kyero Kotiravata qua tirero mpo nani hia vaisivata varunani uro varurama.

*Mwamwanta hia qakyaa hu vaisira Iesusiva kyuqema kyora  
(Matiu 9:1-8; Maaki 2:1-12)*

<sup>17</sup> Mpo enta Iesusiva mwakyaakya timwa nyi varuvata Parisinramwuvata, mwaanra okyara tuhuavata, mwia qua riarerata ntuaantua vita varura. Mwihua ekyaa Kariri mwata hini hini vahu mwatukyaraqinaahuave, Ierusareminyaahuave, hisai hisaita nrumu mwatakyaa vita varuvaro Kotiva Iesusira kepuqyaqama kyovaro mwiva nraakye qora nriqa vuhua kyuqema nyataariva varura.

<sup>18</sup> Varuvata vaisi mponramwuvanto nkyiari hena vaisi mpo mwia mwamwanta hia qakyaa hura taintamaqita nri nteta tiqata, Kyai nraamwuqi vera nteta Jesusira vuqaa kyaare, timwa kyeta taqovata

<sup>19</sup> nraakye qora airivanto varuvata mwihua nraamwu utaqi vera nteva hia qioqa hura. Hia qioqa huvata mwihua qaqlira kyeta nraamwu qiataqqa mwi vaisira vara mwaanri vateta nraamwu qiata mwia mpona ntapairi kyeta vaisi mwia taintaqaa vateta kyaantaqo rupa kyeta qakyoma kye kyaqi vuvaro Jesusira nraaqani uto vhura.

<sup>20</sup> Mwia viteta nru vaisihua kepukyaqama kye rieta tiqata, Qioma Jesusiva mwi vaisira kyuqema kyaananrove, tura Jesusiva ntapihi kyero mwiva mwamwanta hia qakyaa hu vaisira mwianra tiqaro, Ni maaquo, e Kotira qua nteqa kyaananra nte i nruckama mwatauqo, tiro.

<sup>21</sup> Mwitaa tuvata mwaanra okyara tu vaisihuavata, Parisi vaisinramwuvata, qaqlao titi nkyiari nai timwa mwi nai timwa mwi hita tiqata, Mwaa ta vaisivave? Mwiva mwitaa tiqaro mwiva Kotira uaqlama mwate variho. Hiama qumina vaisi mpovanto nai hena vaisiara tiqaro, E Kotira qua nteqa kyaananra nruckama mwatauqo, qiananrove. Kotiva nraahuma qio mwitaa qiananrove, tita.

<sup>22</sup> Mwihua mwitaa tuvaro Jesusiva mwihua su nyaatoqi mwi quava vhura taqero mwihua kyapara hiro tiqaro, Nanraqamave nkye mwitaama kyeta riaavo?

<sup>23</sup> Nkye nianra tiqata, Mwiva qumina vaisi variqarora tiro, hiama qio nai hena vaisivanto Kotira qua nteqa kyaaninra nruka mwataananrove, qiarave. Qio mpo kyaiqa mpo? Qiove nte mwaa vaisira kyuqema kyaaninrave? Nkye ni timwa mpivaqe riaankye, tiro.

<sup>24</sup> Jesusiva mwitaama kyero mwihua kyaparama nyatero mwihuara tiqaro, Nte mwatani mwatatai nraaqiarava varuqaro ni nronraqama kyaihana nte qoma mwatani variqana vaisivanto Kotira qua nteqa kyaaninra nruka mwataaninrave. Nkye ni quara qutaa quave qiate tina, nte vaisi mwaanra mwaa quara tirerave, tiro. Mwitaa timwa kyero mwamwanta hia qakyaa hu vaisirara tiqaro, Sivira ena taintavata varera ena mwaatani quantema tuqo, tiro.

<sup>25</sup> Mwitaa tuvaro mwi vaisiva mwihua su mwiaqaa siviro nai taintavata tu varero Kotira nrutu tuaaheraqiro viqaro nai mwaatani vura.

<sup>26</sup> Mwiva vuvata mwiqi varuhua nrihanrama vita kyauqu ntukikinraaqa teta mwihua aatu hita Kotira nrutu tuaahereta tiqata, Qikye, nataa hi kyaiqarave? Tire mate nraahumwa mpo qara hi kyaiqara taqauro, tita. Mwitaa turama.

### *Iesusiva Rivaira nraanronra (Matiu 9:9-13; Maaki 2:13-17)*

<sup>27</sup> Jesusiva veva ntero taqovaro taakisi vare varu vaisiva mwia nrutu Rivaiva taakisi vare varu nraamwunraqi mwatakyaa viro varuvaro Jesusiva mwia timwa mwinro tiqaro, E ni naakiara nriante, tiro.

<sup>28</sup> Mwitaa tuvaro Rivaiva siviro ekya nai kyaiqa varo inraikyara kyero Jesusira nraakiara vurama.

<sup>29</sup> Rivaiva nai nraamwuqi Jesusirani kyara uta mwatovata airi vaisi taakisi vare varuhuavata, mpo vaisinramwuvata, ntuvaantuuma vita mwia nraamwuqi mwatakyaa vi variqata kyara nre varura.

<sup>30</sup> Mwiqi varuvata Parisi vaisinramwuvata, mwaanra okyara tu vaisinramwuhua Parisi qua riohuavata, mwihua uro nteta Jesusira nraaqiaranramwuanra nrutu nraunru/nrunru nraanru tita tiqata, Qaqao, nkye nataamaqive taakisi vare varia vaisihuavata, Kotira qua raaqute varia vaisihuavata, kyara nre variavo? tita.

<sup>31</sup> Mwitaa tuvaro Jesusiva mwihua nkyiari timwa nyinro tiqaro, Qati vari vaisiva hia totaava hinani virave. Nriqa vi vaisiva nraahu totaava hinani virave.

<sup>32</sup> Tire avuqavuma kye nrohi varurahuave qia nraakye qorahua. hia nte mwihuara qora aanra qaqlira kyaate tirera tumuvavauma iho. Nte uaqia hia nraakye qorahua nyaanranrenra tumuvave, tiro.

### *Kyara aurama terara tura*

<sup>33</sup> Mwitaa tuvata mwihuua Iesusirara tiqata, Ioninra vataqi nrohi varuhuavata, Parisi vaisi qua rie variahuavata, kyara aurama teqata Kotirara aakyara nte variavo. I vataqi nrohi variahua hia mwitaa hiraitita, qatima kyaravata nramanrivata nre variavo, tuyaro

<sup>34</sup> Iesusiva mwihuua timwa nyinro tiqaro, Nraakye vararerai hiai vaisiva nai vataahuavata varirata qiove nkye mwihuara kyara auramate variate tivarave? Hiama qio mwitaa tivarave.

<sup>35</sup> Mpo enta nri ntairaro nraakye varaani vaisira nai vataahuaqaataita qatinani vara kyaivata mwi entaraqaataitama mwia vataahua ntateqata kyara aurama tevarave, tiro.

<sup>36</sup> Mwitaa timwa kyero Iesusiva mpo quaqaa ntumwa kyero mwihuua timwa nyinro tiqaro, Mpowanto tuavaaqa nrihi nrahiti quaninra haqlira hirero hiama tavuna qaraakya toqa kyero mwiaqaa taaqautero haqliraananrove. Mpowanto mwitaa hirera, mwiva qaraakya tavuna uaqiamma kyaananrove. Qaraakya tavuna toqa taarivavata haaruanaa tavunavantovata hia kuaa qarama vahiananrove.

<sup>37</sup> Nte qaiqaa tirerave. Uaini qaraakya tati kyero hia mpovanto memenra pahiqa ututaira haaruua taqu vara kyero qaraakya uaini mwia mwipi raurirave. Memenra pahi mwiva nraahaqama viraqa mwiva mwitaa hiraro uainivanto kepukya uaini utu viqaro memenra pahi nrahiti kyaananrove. Mwitaa hiraro uainivanto qumina rauru viraro memenra pahivantovata uaqiamma quananrove.

<sup>38</sup> Hia mwitaa hiraitita, qaraakya uaini qaraakya taquqi rauruarave.

<sup>39</sup> Haaruua uaini nranra hiva hiama qaraakya uainianra mwia mwutukya vahiananrove. Mwiva tiqaro, Haaruua uaini mwiva qiove, tirave, tiro. Iesusiva mwitaa turama.

## 6

### *Iesusiva mwaanra tu entara okyarara tura*

(Matiu 12:1-8; Maaki 2:23-28)

<sup>1</sup> Mpo enta mwaanraqaa Iesusiva nai nraaqiaranramwuvata aakyo utaqi kyakuma voti hira uiti tutoraqi nrohi varura. Nrohiqatama mwia nraaqiaranramwu uiti tamwa nteqa kyeta kyauquqi ntautiqama kyeta mwia uru nre varura.

<sup>2</sup> Nre varuvata Parisi vaisinramwuvanto mwihuua taqeta qaqao tita, Mwaanra entaqaa qao timwa tai inraikyarama mwinramwuhua uti variavo, tita.

<sup>3</sup> Mwihuua mwitaa tuvaro Iesusiva mwihuua timwa nyinro tiqaro, Haaru nkyi haivaqava Ntevitivavata, nai mwia vatama kye nruhuavata, kyara nraataa huvata mwihuua mwitaa hu quara nkye hiave qaraqi kyaara ntumwa kyeta riaavo?

<sup>4</sup> Mwi entara Ntevitiva Kotira nraamwuqi vera ntero mpereti Kotirani vatora vara kyero nreqanro nteqa kyero mwiaavata nruhua hini nyuvata nronrave. Kotira kyaiqa vara mwate varia vaisihua nraahu mwi kyarara nraataara vahuvaro Ntevitiva qumina vaisivanto nreqaro mwi quara nteqa kyorave, tiro.

<sup>5</sup> Iesusiva mwitaa timwa kyero mwiva mwihuua timwa nyinro tiqaro, Ni mwatani mwatatai nraaqiarara nronraqama kyaihana variqana nte mwaanra entaqaa ntaqikyiqana ntena kyakya hiani kyaiqara qiomma varaaninrave, tiro. Iesusiva mwitaa turama.

### *Mwaanra entaqaa Iesusiva vaisi mpo kyauqu kyuqema kyora*

(Matiu 12:9-14; Maaki 3:1-6)

<sup>6</sup> Mpo enta mwaanraqaa Jesusiva mwaanra nraamwuqi uro variqaro mwakyaakya timwa nyi varuvaro vaisi mpovanto mwia kyauqu kyaatuta kukokaqama vu vaisiva varura.

<sup>7</sup> Mwi vaisiva varuvata mwaanra okyara tu vaisinramwuhuavata, Parisi vaisinramwuvata, variqata Jesusiraqaa qua vatarerata uti variqata qua puua hita tiqata, Kyai variqata taqaararo Jesusiva mate mwaanra entaqaa vaisi kyauqu kukoka mwia kyuqema kyairera, mwia kyaara mwiaqaa qua vataare, timwa kyeta mwihua Jesusira apeqa hi varura.

<sup>8</sup> Apeqa hi varuvaro Jesusiva mwihua nkyiari su nyaatoqi riemwa to quara ntapihi kyero kyauqu kukoka mwianra tiqaro, Sivira mwaini vaisi utaqaa nrumu variante, tuvaro mwi vaisiva siviro vaisi utaqaa varuvaro

<sup>9</sup> Jesusiva mwihuara tiqaro, Nte nkyi kyapara hiarita nkye mwia hiniqama ni timwa mpiae. Tire teta mwaanra qua rieqatama mwaanra entaqaa nanra nanra kyaiqave qio varaanranrave? Tire mwi entaraqaa vaisi mpo kyaahaqave hiananrave, mwia uaqiamave mwataananrave? Mwaanra entaqaa tire vaisi mpo kyaahaqa hiararo mwiva qative variananrove, tire mwia ruve kyaananrave? tiro.

<sup>10</sup> Mwitaa timwa kyero Jesusiva ekyaa vaisi mwipi varuhua itutuma kyero taqero mwi vaisirara tiqaro, Ena kyauqu tutuante, tiro. Mwitaa tuvaro nai kyauqu tutu kyovaro mwia kyauquvanto qamwanrama kyero naitarama vahura.

<sup>11</sup> Mwia kyauqu naitarama vahuvata mwihua mpoqama kyero raraqa tovata mwihua nai timwa mwi nai timwa mwi hita tiqata, Tire Jesusira nataamave kyaananrave? tita. Mwitaa turama.

### *Jesusiva nai nraaqiara 12 nramwu mwatama kyero sitora*

*(Matiu 10:1-4; Maaki 3:13-19)*

<sup>12</sup> Mwi entara Jesusiva Kotiravata qua tirero taaqiqaa mwaanri ntero mwiaqaa uro variqaro entaqi Kotiravata qua timwaqiro vi varuvaro

<sup>13</sup> qaatata vuvaro mwiva mwiavata nrohu vaisihua nyaanrama kyero mwihuaci-tairo vaisi 12 nramwu sita kyero mwihua nronraqama kyero mwihuara tiqaro, Nkye aposervative. nkye ni qua uro timwa nyi vaisihuama varivarave, tiro.

<sup>14</sup> Jesusiva mwaa vaisinramwuhua sitero:  
Saimoninra. Jesusiva mwia mpo nrutu nteqaro

Pitaavave tura,  
Enturura. mwiva Saimoninra qata,

Iemisikya Ionikya,

Piripira,

Patoromiunra,

<sup>15</sup> Matiura,

Tomaasira,

Iemisira. mwia Arapiasira mwaaqu,

Saimoninra. mwia nrutu mpo Seriotira,

<sup>16</sup> Iutaasira. mwia qora nrutu Iemisira,

Iutaasi Isikeriotira. mwiva nraakiara Jesusira qovarama kyaariva varura.

### *Jesusiva airi nraakyе qora kyaahaqama nyatora*

*(Matiu 4:24-25; Maaki 3:7-12)*

<sup>17</sup> Jesusiva mwi vaisinramwuhuavata sitero taaqiqatairo uro ntantero tumu tun-renra sata siviro varura. Varuvata mwia vataqi nrohuhua airivanto mwini varuvata airi nraakyе qora Iutia mwata mpo mwatuqya mpo mwatuqyaqitaitave, Ierusaremi-saive, vevara nampisini Taiaa mwatuqyaave, Saitoni mwatuqyaave, mponatai mponatai mwihua ntuvantuama vita

<sup>18</sup> Jesusira qua rieta Jesusiva mwihua nriqa quani inraikyavaravata taiqa kyaarive tita mwihua nrumu ntuvantua hita varura. Vaanavantovata varu vaisihua mwihuavata nri ntovaro Jesusiva vaana titamwa kyero mwihua kyuqema kyora.

<sup>19</sup> Jesusiva mwihua kyaahaqa huvaro mwia kepukyavanto airi nraakye qora kyaahqama nraahu kyovatara tita, ekyaa nraakye qoravanto mwia kyaatu kyarerata uti varura.

*Jesusiva qamwateta ntateta hirara timwa nyunra*

(Matiu 5:1-12)

<sup>20</sup> Jesusiva nai vataqita nrohuhua taqero mwihuara tiqaro,

Nkye vehi nraakye qora variahua nkye qamwataate.

Kotiva nkyiqa ntaqikyi varirata

nkye mwia nraakye qora varivarave.

<sup>21</sup> Mate kyara nraataa ihata varia nraakye qorahua  
nkye qamwateqata variate.

Nkye nraakiara kyara vikyokyama nrevarave.

Mate ntate varia nraakye qorahua

nkye qamwateqata variate.

Nkye nraakiara raihiqata varivarave.

<sup>22</sup> Nkye ni mwatani mwatatai nraaqiarara ni pataqita vi varivata mwihua mwia  
kyaara nkyi nramwutaqa hivarave, nkyi qoririma nyatevarave, nkyiara uaqia hi  
quara tivarave, nkyiara uaqia hi kyaiqara vare variavo tivarave. Nkyiara mwitaa  
mwitaa tivata nkye qamwateqata nraahu variate.

<sup>23</sup> Mwihua nkyi mwitaa hiara mwianra nkyini nronraqama kyero nyaamwuni  
kyoqaa vahirara rieqatama mate nkyi mwutukyavanto kyuqe hirata nronraqama kye  
qamwataate. Haaru mwihua haivaqahuavata poropeti vaisinramwu kuua qarama  
kyeta uaqiamma nyatorave.

<sup>24</sup> Nkye airi inraikya mate mwaa vateta  
mwianra qamwataahua nkyiara po kye tuqo.

Nkye ekyarama qamwataavo.

<sup>25</sup> Nkye mate mwaa entara

kyara nraavaro vikyokya ihata variahuate.

Po, nraakiara nkyi kyara nraataa hiananrove.

Nkye raihiqata variahuate.

Po, nkye nraakiara nkyi mwutukyaqitairo uaqia hirata  
ntateqata varivarave.

<sup>26</sup> Mate mwaa entara nraakye qora  
nkyi qamwata nyateqata nkyi nyutu tuaaheraahua,  
nte nkyiara po tuqo. Nraakiara nkye taqevavarave.

Haaru mwihua haivaqahua unra qua tu poropetihua  
kuua qarama nyatorave.

*Nkyeta nramwutaahuara mwutukya vahirata variate tura*

(Matiu 5:38-48)

<sup>27</sup> Mate nkye ni qua rie variahua nte nkyi timwa nyinrenrave. Nkye nkyeta  
nramwutaahuara mwutukya vahirata variate. Nkyi uaqiamma nyaterara nraahu rie  
vaisihua varivata nkye mwihuama kyuqema nyataate.

<sup>28</sup> Nkyiara qoraqama quate tiqata nkyiara uaqia hi quara ti vaisihua, nkye mwihuara  
rieqata Kotirara aakyara nteqata, Kotio, mwihua kyuqema nyataante, qiate. Nkyi  
qoraqama nyatehuara rieqatama Kotira nraanraivaro mwiva mwihua kyaahaqa  
hiarive.

<sup>29</sup> Mpowanto nkyi nraatokyai ntuteqa kyairera, tuqasaa kyaivaro hini nraatokyai-vata ntuteqa kyaarive. Mpowanto nkyi vaaqatua varero mwiva nkyi tuapakyaaravata vararerera hirata hia qao qiate.

<sup>30</sup> Mpowanto mpo inraikyara nyaanru tirata qati nraahu mwiate. Mpowanto nkye vate inraikyara varairera, hia qaiqaa tita timwiante qiate.

<sup>31</sup> Nkye mpohuara tiri mwitaa mwitaama timwataate tiqata vu nraato tintema kyeta kuaa qarama kye nkyiarivata mwitaa mwitaama nyataate.

<sup>32</sup> Nkyiara mwutukya vahiarhua hia mwihuara nraahu nkyi mwutukya vahiarive. Nkyiara mwutukya vahiarhuara nraahu nkyi mwutukya vahirera, nanra kyuqe in-raikyave Kotiraqaatai varevara? Hiama mpo inraikya varevarave. Nkye ntapihiarave. Uaqia hi kyaiqara uti variahua mwihua variqata nkyiariara mwutukya vahi vaisihua mwihuara nraahu mwutukya vahihata variarave.

<sup>33</sup> Nkye nkyita kyuqema nyataahuara nraahu kyuqema nyataivera, nanra kyuqe in-raikyave Kotiraqaatai varevara? Hiama mpo inraikya varevarave. Nkye ntapihiarave. Uaqia hi kyaiqara uti variahuaavata mwitaa hiarave.

<sup>34</sup> Nkye tiqata, Ina mwinrenrave timwa kyero iqitai quaahaqa varero qamwanrama ina varaqi nrumu mwiani vaisira mwia nraahu mwivorave. Nkye mwitaa hivera, nanra kyuqe inraikyave Kotiraqaatai varevara? Hiama mpo inraikya varevarave. Nkye ntapihiarave. Uaqia hi kyaiqara uti variahuaavata nkyiari hena vaisi nyita tiqata, Mwihua kuaa qarama kye tita timwivarave, qiarave.

<sup>35</sup> Hia nkye mwihua hianta hiate. Nkye nkyeta nramwutaahuara mwutukya vahirata mwihua kyuqema nyataate. Mpohua nkyiara munimave, mwitaa inraikyave, timwivage nraakiara nkyita nyianre, tivera, nkye apiara votima kye nyiate. Nkye mwitaamaqi vivaro Kotiva mwia qia kyuqema kyero nkyi kyoqaa nyiananrove. Hia mpo vaisiara kyuqeve ti variahuaavata, uaqia hi kyaiqara uti variahuaavata, mwinro mwaanro mwitanahua Kotiva kyuqema nyate varirave. Kotiva kyuqe kyaiqa mwitaama kyero vare varirara tita, nkyevata mwitaa hivera, nkye qutaa Kotiva nyaamwuni varira mwia nraaqiarama varivarave.

<sup>36</sup> Nkyi sova Kotiva po kye timwa nyate varintema kyeta nkyevata po kye timwa nyateqata variate.

### *Nkye ko riaa vaisihua variantema kyeta varivorave tura*

(Matiu 7:1-5)

<sup>37</sup> Nkye hia mpohua kyaiqara pupiteqata hia kyuqe hi kyaiqarave qiate. Nkye mwitaa tivaro Kotiva nkyita kyaiqaravata hia kyuqe kyaiqavema qiananrove. Nkye hia ko riaa vaisihua votima kye variqata mporara tiqata, Iqaa qua nronra vahiananrove, qiate. Nkye mwitaa tivaro Kotiva nkyitaravata tiqaro, Nkyiqa qua nronra vahiananrove, qiananrove. Nkye mpohuara tiqata, Nkye tiri uaqjama timwataa quara qaqlira kye hia mwianra riemwaqi virerave, tivera, Kotivavata nkyitara tiqaro, Nkye ni qua nteqa kyaa quara qaqlira kyena taunru nyataaninrave, qiananrove.

<sup>38</sup> Nkye mpohua nyivaro Kotiva nkyitavata nyianrive. Mwiva rauru kyero raturu kyairaro itomwi viraro mpoqiaavata kyoku kyairaro musaaqiro qatinani rauruananrove. Nkye nataama tukya mpohua nyinra mwi tukyaraqaama Kotiva nkyitavata nyiananrove, tiro.

<sup>39</sup> Iesusiva mwitaa timwa kyero mwiva mpo quaqaa ntumwa kyero tiqaro, Vu qipa quari vaisiva hiama qio nai henanra vu qipa quaninra kyauqu tuvare viqaro aanra nraamwu taananrove. Mwiva mwitaa hirera, mwitanahuaqama ontqi tumu ntivarave.

<sup>40</sup> Qua riemwaqiro vi vaisiva hiama nai mwia qua timwa mwi vaisira nraatarero. Qua riemwaqiro vi vaisiva riemwaqiro viro ekyaa okyara taqero mwiaqaatairo mwitanahua kuaa qarama varivarave.

<sup>41</sup> E nanraqamave mwata mwumwuvanto ena qata vakyaan vuqi viqe taira taqeqara ina vuqi kyatari aka nronravanto viqe taira hia taqera hiaro?

<sup>42</sup> Kyatari aka nronravanto i vuqi viqetero vaihara nanraqamave ena qata vakyaara tiqara, Ni katao, kyai i vuqitaina mwata mwumwu venta kyaanke, ti variaro? E kyuqe kyaiqa varauqo tiqara unra uti variaravave. Ena vuqitaira kyatari aka nraante venta kyera, mwiaqaataira kyuqema kyera taqeqarama ena qata vakyaan vuqitairavata qio mwata mwumwu venta kyenanrave.

*Uaqia hi kyatariva uaquia hi tamwanra nraahu riairave tura  
(Matiu 7:16-20, 12:33-35)*

<sup>43</sup> Kyuqe kyatarivanto hia uaquia hi tamwanra riairave. Uaqia hi kyatariva hia kyuqe tamwa riairave.

<sup>44</sup> Vaisivanto kyatari tamwa taqeqaro mwi kyatarira ntapihi kyero nrutu ntairave. Vaisivanto fiki hiqirero mwiva hia auqu vataa kyatariqaatairo hiqirave. Mwiva uaini kyuqera hiqirero mwiva hia mwaahiqatairo hiqirave.

<sup>45</sup> Kyuqe vaisivanto mwia mwutukyaqi kyuqe kyaiqa varaariva piqaiharora tiro, mwi vaisiva kyuqe kyaiqa nraahu vare varirave. Uaqia hi vaisiva mwia mwutukyaqi uaquia hi kyaiqara utuariva piqaiharora tiro, mwiva uaquia hi kyaiqara nraahu uti varirave. Nrovanto mwaatira mwutukyaqi piqai inraikyara mwia nraahu timwa qoqa hirave.

*Nraamwu taaratanaqaa qua ntumwa kyero tura  
(Matiu 7:24-27)*

<sup>46</sup> Nkye nanraqamave nianra nronrao, nronrao, tiqatavata hia ni qua riaavo?

<sup>47</sup> Nte hunani nrinro ni qua riero nte tunte tunte hiani vaisira okyara nkyi timwa nyinrenrave.

<sup>48</sup> Mwi vaisiva nraamwu kepukyaqama kyero hoqa tai vaisira votima kyeroma variananrove. Mwiva nraamwu hoqarera hiro mwata quvuqiro viro uto oriqa nraamwu tura ratero nraamwu hoqa tairave. Mpo enta vati humwunravanto nraamwu vara kyarera utiharo nraamwu mwia kyuqema kyero hoqa taivara tiro, kepukyaqama kyero vahirave.

<sup>49</sup> Ni qua riero qaqlira kyero hia nte tunte tunte hiari vaisiva, mwiva nraamwu uaqlama kyero hoqa taira votima kyeroma variananrove. Mwi vaisiva mwata quvu kyero hia ori mwataqaa nraamwu tura rataraitiro, verasata rakyero hoqa taiharo vati humwunravanto nraamwu mwia vara kyaiharo ntaputama viro uaqlama virarama tuquo, tiro. Iesusiva mwi quara turama.

## 7

*Iesusiva qaami vaisi kyaahaqa hura  
(Matiu 8:5-13)*

<sup>1</sup> Iesusiva mwi qua mwakyaakyara timwa nyi taiqa kyero mwiva mwihua kyero Kapenaamini vura.

<sup>2</sup> Mwini vuvaro Romeni vaisi ntaqu vaisihua 100 nramwuqaa ntaqikyi varura mwia kyaiqa vaisi nriqa vuvaro mwiva qutuariva qaumaqa hura. Mwitaa huvaro nronra vaisi mwia mwutukyavanto nai kyaiqa vaisiara mpoqiyavata vahuvaro variqaro

<sup>3</sup> mwiva Iesusirara riero Iutaa nronra vaisinramwu sitero tiqaro, Nkye uro Iesusirara nrinra ni kyaiqa vaisi kyuqema mwataante qiate, tuvata

<sup>4</sup> mwinramwuhua Iesusiva varunani uro ntetama po kye tita tiqata, Romeni vaisi mwiva kyuqe vaisivantove. E mwia uro kyaahaqa hiante.

<sup>5</sup> Mwi vaisiva tiri Iutaa nraakye qorara mwutukya vaiharo variqaro mwiva naivanto mwaanra nraamwu mpovata hoqa timwa tairave, tita.

<sup>6</sup> Mwihua mwitaa tuvaro Jesusiva mwihuavata vuva nraamwu qaumato uro ntovaro Romeni vaisi mwiva nai vataahua sitero tiqaro, Nkye uro Jesusira timwa mwiqata mwitaa qiate, Nronra vaisio, e qumina mwaini toqaamwu tu kyera nrinronrave. Nte kyuqe vaisi variariravauma e ni nraamwuqi qio nrinanrave.

<sup>7</sup> Nte kyuqe vaisi variqanavauma e hinanrani qio quaninrave. E mwini variqara qua nraahu tiqara, E kyuqema quante, tiraro ni kyaiqa vaisivanto kyuqema quarive.

<sup>8</sup> Nte qaami vaisi variqana nte niqaa ntaqikyi varia vaisihua qua rie varurave. Ntevata ntaqua vaisihua mponramwuqaa ntaqikyi varurave. Nte mwihuaqitaina vaisi mpore quante tuqaro mwiva virave. Nte vaisi mpore nriante tuqaro mwiva nrinrave. Nte ntene kyaiqa vaisiaravata mwitaa mwitaa hiante tuqaro mwiva ni qua riero mwitaa hirave, timwa kyero mwihua sitovata vita.

<sup>9</sup> Vuhua uro Jesusira mwi quara timwa mwuvaro Jesusiva nrihanrama viro tuqasaa viro nraakye qora mwia vataqita nruhuara tiqaro, Nte nkyi timwa nyuqo. Mwi vaisiva mpo mwatanaava eqero nronraqama kyero nianra mwiva ni kyaahaqa hiananrove tihana taqauqo. Hia nte nkyi Isareriqitairovata mpovanto mwitaama kyero qua ti vari vaisira taqaurave, tiro.

<sup>10</sup> Mwitaa tuvata Romeni vaisi mwiva sitohua nrumu ntanteta uro taqovaro mwia kyaiqa vaisivanto kyuqema viro nraamwuqi varura.

### *Tetoqa nraakye mwaqaquara tura*

<sup>11</sup> Mwia nraakiara pataqia vari kyero Jesusiva mpo mwatukya mwia nrutu Nenini vuvata mwia nraaqiaranramwuvata airi nraakye qoravantovata mwia vataqita vura.

<sup>12</sup> Jesusiva uro mwi mwatukyara nronraanrana taqovata mwi mwatukyaraqitaita nraakye qoravanto qutu vu vaisira quntarerave timwa kye vareta nrunrama. Tetoqa nraakye mwaqaqu kuaiqiyavanto varuva qutu vuvata airi nraakye qoravanto mwi nraakyera vatama kyeta nruvaro

<sup>13</sup> nronravanto Jesusiva mwi nraakyera taqovaro mwia mwutukyavanto mwianra ua huvaro mwianra tiqaro, Hia ntataante, tiro.

<sup>14</sup> Mwitaa timwa kyero uro kikera/tainta tu varovata vaisi mwia varohua mwiaqaa ra kyeta varuvaro Jesusiva tiqaro, Qaraakya vaisi mwaavao, nte iara siquante tuqo, tuvaro

<sup>15</sup> qutu vu vaisiva siviro mwaamwianra viro quavata tuvaro Jesusiva mwi vaisira nai nronra mwinro.

<sup>16</sup> Mwitaa huvata mwihua ekyaa mpoqama kyero nyaatuqa tovata Kotira nrutu tuaahereta tiqata, Poropeti vaisi nronravanto tiri utaqaa qovarama viho. Kotiva hia tiri nai nraaqiaranramwuanra taunru kyaiho, tita.

<sup>17</sup> Mwihua mwitaa tuvaro Jesusira mwakyaakya mwiva ekyaa Iutaa mwatanivata, Iutaa vara ututu vahu mwatukyaranivata, mwi quava viro nrinro huvata ekyaa riemwa ntora.

*Nramanri nyi varu vaisiva Ioniva nai nraaqiara taaratana sitovata uro Jesusira kyapara hora*

(Matiu 11:2-19)

<sup>18</sup> Jesusiva mwitaamaqiro viqaro mpo kyaiqa mpo kyaiqa vare varuvata Ioninra nraaqiaranramwuvanto uro Ioninra timwa mwuvaro mwiva nai nraaqiara taaratana nyaanrama kyero tiqaro,

<sup>19</sup> Nkyetana uro nronra vaisi mwia kyapara hiqata mwitaama qiate, Nraakiara nrinrenra hiarava qutaa e mwivave hiaro? Tire qati nraahuve vaisi mpo vekya variananrave? qiate, tiro.

Mwitaa timwa kyero mwitana sitovata

<sup>20</sup> mwitanahua vuhua Jesusiva varunani uro nteta tiqata, Ioniva nramanri nyi variva tiritana titero tiqaro, Iara mwia mwitaama kye uro ntumwa hiamwa hiate, tiho,

Nraakiara nrinrenra hiarava qutaa e mwaa mwivave? Tire qati nraahuve vaisi mpo veikya variananrave? qiate, tihata nrunro, tita.

<sup>21</sup> Mwitanahua mwitaa tuvaro mwi entara Iesusiva nraakye qora airi nriqa vuhuave, vaanavanto utaqi varuhuave, mwihua kyuqema nyatero vu qipa vuhua airi mwiva ntapairi kyova varura.

<sup>22</sup> Mwiva variqaro Ioniva sito vaisitana timwa nyinro tiqaro, Nkyetana mwaini nruru variqata taqaarave, riaarave, nruru ntanteta uro Ioninra timwa mwiate. Vu qipa vihua qaiqaa taqe variavo. Kyuqu uaqjama vihua qati nrohi variavo. Tauma rumpuaravanto utihua tavanta vihata qati variavo. Nraato tita vihua qaiqaa qua qatima riaavo. Qutu quahua sivita qatima variavo. Vehi nraakye qoravanto Kotira qua mwaanra kyuqe qua mwaanra nruru riaavo. Ekyaa mwi quara uro Ioninra timwa mwiate.

<sup>23</sup> Nianra hia taara vu nraato tiraitiro, kepukyaqama kyero kuaa vu nraato nraahu tuqiro vi variariva, mwivama qamwateqaro variananrove, tiro.

<sup>24</sup> Iesusiva mwitaa tuvata Ioniva sitotanahua nruru ntanteta vuvaro Iesusiva nraakye qora ntuvantuama vita varuhua Ioninranra timwa nyinro tiqaro, Nkye haaru nanra inraikya taqarerata qumina mwataqaa vurave? Toqavanto tiharo omwa ahikyavanto hini viro hini nrinro hira taqarerata vurave iho?

<sup>25</sup> Nkye hia mwia taqarerata vurave. Nkye nanra inraikya taqarerata vurave? Tuavaaqa kyuqera ututo vaisira taqarerata vurave iho? Qaqao, tuavaaqa kyuqera uti varia vaisihua hia quminasata variarave. Mwi vaisihua nronra vaisi vuni variahua nraamwuqi nraahu variarave.

<sup>26</sup> Nkye nanra inraikya taqarerata vurave? Kotira qua qovarama kyora poropeti vaisi taqarerata vurave? Qutaave, mwia taqarerata vurave. Qio kyai nte nkyi timwa nyianrita riaate. Nkye mwi entara poropeti vaisi nraatara kyai vaisira taqorave.

<sup>27</sup> Kotira mpukuqi Kotiva Ioninranra mwitaama tiro:

Taqante, ni qua timwa nyiani vaisira nte titaairo

mwiva nraante i vuni viqaro i aanra

terama mwataananrove, turave, tiro.

(Marakai 3:1)

<sup>28</sup> Iesusiva mwitaa timwa kyero mwiva mwihuara tiqaro, Kyai nkyi timwa nyianrita riaate. Mwatani mwatataa nraakye qorahua variavaro Ioniva ekyaa mwihua nraatara kyaivama variho. Ioniva mwitaama variharo nraakiara Kotiva ntaqikyiani nraakye qorahuaqitairo pataqia variariva mwiva nraahuma Ioninra nraatara kyaananrove, tiro.

<sup>29</sup> Iesusiva mwitaa tuvata qumina nraakye qoravata, taakisi vare varuhuavata, mwihua Ioniva nramanri nyuhuara tita, mwihua Iesusira qua rieta tiqata, Qutaaqama kyero Kotiva avuqavu hi varivave, tita.

<sup>30</sup> Mwihua mwitaa tuvata Parisinramwuvata mwaanra okyara ti varuhuavata, mwihua hia Ioniva tiri nramanri timwianrive tuhuara tita, mwihua Kotiva hinani vi aanranra mwoqa mwunra.

<sup>31</sup> Mwihua mwitaama varuvaro Iesusiva tiqaro, Mate mwaa entara varia nraakye qorahua nanra inraikya votima kyetave variavo? Kyai nkyi timwa nyiankye.

<sup>32</sup> Mwihua nraaqiaranramwuvanto mwatuqyaqaa tutiqarerata mwatakyaa vita variantema kyeta variavo. Nraaqiara mwihua tutiqeqata nkyiari henahuara tiqata, Tire ntoma vaara vuare varurata nkye ihi ntaataara vaihatama nkye hia ihi ntaavo. Tire tutiqeqata nkye ntate ihira turata nkye ntataataara vaihatama nkye hia ntataavo, qiarave. Mate mwaa entara variahua mwihua votima kyeta variavo.

<sup>33</sup> Ioniva nramanri nyinrenro nri ntero mwiva kyara aurama tero uainivata hia nrovata nkye mwianra vaana kyapata varivave qiarave.

<sup>34</sup> Nte mwatani mwata taiva nri ntena, nte kyaravata nramanrivata nrena nruqatama nkye tiqata, Mwi vaisira taqaate. Mwiva inraanrama kyero kyara

nre varivave. Mwiva uaini nreqanro ueraqama vi varivave. Mwiva taakisi vare variahuavata, uaquia hia vaisihuavata, totiqa hi varivave, qiarave.

<sup>35</sup> Qio quavanto kyuqe qua vahirera, mwi quara riemwaqiro quariva taqairaro kyuqe qua nraahu vahiananrove, tiro. Mwitaa turama.

*Iesusiva Parisi vaisi nraamwuqi vuvaro nraakye mpovanto Iesusiraqaa vahamwenra qu mwatora*

<sup>36</sup> Mpo enta Parisi vaisi mpovanto Iesusirara tiqaro, Nrinra ni nraamwuqi kyara nraante, tuvaro Iesusiva mwia nraamwuqi kyara nranrenro vuva uro mwia nraamwuqi mwatakyaa viro kyara nre varura.

<sup>37</sup> Mwiqi nre varuvaro mwi mwatukyaraqi nraakye mpovanto airi vaisivata api nrohi varu nraakyeva Iesusiva Parisi vaisi mwia nraamwuqi kyara nre varurara riora. Riero mwiva ori taqu vahamwenra kyuqe mwunta vura varero uro

<sup>38</sup> Iesusiva kyuqu tututero kyara nre varura mwia kyuqu tarani variqaro ntate varuvaro mwia nruqunruvanto Iesusira kyuquqaa tumu ntuvaro nai qiata kyaahiqo nruka kyero mwia kyuqu mota kyero vatero vahamwenra kyuqe mwunta vura mwia Iesusira kyuquqaa qu mwatero.

<sup>39</sup> Qu mwate varuvaro Parisi vaisi mwiva Iesusirara nrinra ni nraamwuqi kyara nraante tuva taqero nai riero tiqaro, Iesusiva poropeti vaisivanto varitirio, mwiva mwia tu varai nraakyera okyara ntapihiro mwiva uaquia hi kyaiqara utiravata ntapihitirio, tiro.

<sup>40</sup> Parisi vaisi mwiva mwitaama riovaro Iesusiva mwianra tiqaro, Saimonio, nte qua mpo i timwa mwinrenrave, tuvaro Saimoniva tiqaro, Mwaanra ti variara vaisio, qio timwa mpiraqe riaankye, tiro.

<sup>41</sup> Tuvaro Iesusiva timwa mwinro tiqaro, Vaisi taaratanavanto kuaa vaisi mwiaqataita munima varareru huvuvaro mwiva vaisi mpo 100 kinaa mwinro vaisi mpo mwia 10 kinaa mwunrave.

<sup>42</sup> Nyuvata mwitanahua mwi munimanra nramwa kyeta nai mwiva hia qioqa huvata varuvaro mwiva mwitanahuara tiqaro, Hia nkyitana nyitau munimanra nina mpiate qianinrave. Qaqirama kyuauquo, turave, tiro.

Iesusiva mwitaa timwa kyero mwiva Saimoninra kyapara hiro tiqaro, Mwitanahuaqitairo tavave munima nyi vaisira mwianra nronraqama kyero qamwataananrove? tiro.

<sup>43</sup> Iesusiva mwitaa tuvaro Saimoniva tiqaro, Qio munima nronraqama kyero varai vaisivama nronraqama kyero mwianra qamwataananrove, tiro. Tuvaro Iesusiva tiqaro, Ntapihi kyerama tira hiaro, tiro.

<sup>44</sup> Iesusiva mwitaa timwa kyero mwiva tuqasaa viro Saimoninranra tiqaro, Mwaa nraakyera taqaante. Nte i nraamwuqi nrumu varuqara e hia nramanriqotaira ni kyuqu hiqama mataararo mwaa nraakyeva nai nruqunruqotairo ni kyuqu hiqama materoma nai qiata kyaahiqotairo ni kyuqu nruka mataiho.

<sup>45</sup> Ni qua mwanteqarama e hia ni motaararo mwaa nraakyeva nte nri ntauraqaatairo ni kyuqu motaqiro vi variho.

<sup>46</sup> E vahamwenra hia ni qiataqaa qu mataararo mwaa nraakyeva vahamwenra mwunta vira ni kyuququa qu mate variho.

<sup>47</sup> Mwianra rieqanama nte iara mwataama tina. Nraakye mwaava Kotira qua airi qua nteqa kyaihana nte ekyaa mwi quara nruka mwataurara tiro, mwiva nronraqama kyero ni qamwata mate variho. Nte vaisi mpo qora qua pataqia nruka mwataariva mwiva ni pataqia qamwata mataananrove, tiro.

<sup>48</sup> Iesusiva mwitaa timwa kyero mwiva nraakye mwia timwa mwinro tiqaro, E Kotira qua nteqa kyaananra nrukama mwatauquo, tiro.

**49** Iesusiva mwitaa tuvata nraamwu mwiqi kyara nranrenrata nrumu varuhua nkyiari nai timwa mwi nai timwa mwi hita tiqata, Mwaa ta vaisiva variqarove Kotira qua nteqa kyaananra nruka mwatauqo tiho? tita.

**50** Mwihua mwitaa ti varuvaro Iesusiva nraakye mwianra tiqaro, E nianra qutaaqama kye rieqara ni kyaahaqa hiarivave qiararoma Kotiva i vitaiho. I mwutukya qihakyama vahirara quante, tiro. Iesusiva turama.

## 8

### *Nraakye mponramwuvanto Iesusira vataqi vura*

**1** Mwia nraakiara mpo enta Iesusiva mwatukya mpoqi mpoqi nrohiqaro Kotiva nraakye qoraqaa ntaqikyiani quara kyuqe qua timwa nyiqiro vura. Mwia nraaqiara 12 nramwuvanto mwia vata vuvata

**2** nraakye mponramwuvantovata mwia vata vurama. Nraakye mwinramwuhua tauraa vaanavanto mwihuavata varuhuave, nriqa vuhuave, varuvaro Iesusiva mwihua kyuqema nyatovata mwihua Iesusira vataqita vurama. Mariaava mwianra Makataranyaavave tura tauraa Iesusiva mwiaqitairo vaana 7 nramwu titovata nritare vu nraakyeva varuvaro

**3** nraakye mpo Iohaanaanra mwia vaativanto Kusaava vaisi nronravanto variqaro Herotira opisi nraamwuqi kyaiqa vare varura. Nraakye mpo Susaanaavavata, airi nraakyevata, Iesusira vataqi viqata nkyiari munima kyeqata Iesusiravata mwia nraaqiaranramwuvata kyaahaqamaqita vurama.

### *Kyara humwu iso quaraqaa ntumwa kyero tura*

*(Matiu 13:1-9; Maaki 4:1-9)*

**4** Mwatukya mpoqi mpoqitaita nraakye qora Iesusiva hunani nrumu ntuvaantuama vita varuvaro Iesusiva mpo quaqaa ntumwa kyero timwa nyinro tiqaro,

**5** Vaisi mpovanto kyara vara tirero humwu isaqiro vurave. Mwiva isaqiro vuvaro mpohuva aanraqa tumu ntuvata vaisivanto vita nrita hiqata kyuqu nte kyovaro nyaamwavanto nrumu nramwa kyorave.

**6** Humwu mponramwuvanto ori mwataqaa tumu ntuvan qamwanrama qupiqa viro aahara mwataqaara tiro, aaharama vurave.

**7** Humwu mponramwuvanto uakukya uvi auqu vahuraqi tumu ntuvan uakukya kyapata qupiqovaro uvi auqu vahu uakukyava ntumwaqu kyovaro hia qupiqorave.

**8** Humwu mponramwuvanto mwata kyuqeraqi tumu ntuvan kyuqema kyero qapiqero uro tamwa airi riemwa torave, tiro. Iesusiva mwitaa timwa kyero mwihua timwa nyinro tiqaro, Nkyi nyaato vahirera, mwaa quara okyara ntapihi kyeta riaate, tiro.

**9** Iesusiva mwitaa timwa kyero varuvata mwia nraaqiaranramwuvanto mwia kyapara hita tiqata, Vaakya mpo quaqaa ntumwa kyera qiananra mwia okyara tiri timwa timwinraqe tire riaare, tuvaro

**10** Iesusiva mwihua timwa nyinro tiqaro, Kotiva nraakye qoraqaa ntaqikyiani quara uqeta taira, mwi quara Kotiva nkyiara mwihua qati kyaairata mwi quara okyara riaate timwa kyero, qumina nraakye qorara mwi quara okyara hia vutu kyera timwa nyiante tirara tina, nte mpo quaqaa ntumwa kyena mwihua timwa nyunrave.

Nte mpo quaqaa ntumwa kyeqana

mwihua timwa nyianrita mwihua taqeqtavata  
hia ntapihi kyeta taqevarave.

Mwihua mwi quara rieqatavata  
hia mwia okyara ntapihivarave.

*(Aisaiaa 6:9)*

<sup>11</sup> Jesusiva mwitaa timwa kyero mwiva nai nraaqiaranramwu timwa nyinro tiqaro, Vaakya mpo quaqaa ntumwa kyena timwa nyunra mwia okyara timwa nyinrenrave. Humwukyanaa mwia Kotira quama vaiho.

<sup>12</sup> Humwu aanraqaa tumu ntu quara mwia okyara vahirero vaisi mponramwuvanto Kotira qua riaavarao Saataaniva nri ntero tiqaro, Mwihua huvantu kyero sitaankyorave, timwa kyero mwihua su nyaato mwutukyaqitairo mwi quara ntavihi kyero varairave.

<sup>13</sup> Humwuvanto ori mwataqaa tumu ntiro vahura, mwia okyara vahirero nraakyeye qoravanto Kotira qua rieta mwi quarara pataqia qamwata kyeta variavaro quavanto hia mwihua utaqi tuqa tuta kyero vaihata mwihua Kotira qua riemwaqita quavaro mpovanto tiqaro, Nrivaqe uaqia hi kyaiqara utuare, tihata mwihua mwia qua rieta Kotira qua qaqlira kyaarave.

<sup>14</sup> Humwu mponramwuvanto uakukya uvi auqu vahuraqi tumu ntu quara, mwia okyara vahirero nraakyeye qoravanto Kotira qua rieta mwiaqaataita mwihua nkyiari vataa inraikyararave, kyaiqarave, nkyiari mwatani variqata qamwaterarave, mwi inraikyarara nraahu nronraqama kye rieqata, mwihua Kotira qua qaqlira kyeta hia kyuqe tamwa riaintema kyeta riaarave.

<sup>15</sup> Humwu mponramwuvanto mwata kyuqe hiraqi tumu ntiro vahura, mwia okyaravanto vahirero nraakyeye qoravanto Kotira qua rieta nkyiari su nyaato mwutukyaqitai mwi quarara riemwaqita vita kepukyaqama kyeta variqi viqata kyuqe tamwa riaintema kyeta riemwataarave, tiro.

### *Jesusiva omwaqaa qua ntumwa kyero tura*

(Maaki 4:21-25)

<sup>16</sup> Jesusiva mwitaa timwa kyero mwaa quara timwa nyinro tiqaro, Hia mpovanto omwa upi kyero tave vara kyero mwiaqaa ntumwaqu tairave. Hia mpovanto omwa upi kyero tainta mwemwaqi veta vatairave. Vaisivanto omwa upi kyero mpohuavata omwa mwia taqaate tiro, nyaamwuni viri vatairave.

<sup>17</sup> Mate mwaa entara ujeta taaninra nraakiara vara qovarama kyero qoqaa nraahuma vataananrove. Mate ntumwaqu taaninra nraakiara puaama kyero omwa itaaninraqaa uro vataananrove.

<sup>18</sup> Vaisi mpovanto mpo inraikya vataaninra Kotiva mpoqiyavata mwiananrove. Vaisi mpovanto hia mpo inraikya vataariva tiqaro, Nte pata inraikya nraahu vatauqo, qianinra mwiaavata Kotiva ekyaa vara kyaananrove. Kotiva mwitaa hirara tita, nkye raurukyeqa mpo qua mpo qua rieqata variate, tiro.

### *Iesusira vataahua mwia taqarerata nrurua*

(Matiu 12:46-50; Maaki 3:31-35)

<sup>19</sup> Jesusiva mwini varuvata mwia nrovavata mwia qatanramwuvata mwia taqarerata nruhua nrumbu taqovata nraakyeye qora airivanto Iesusira vara ututu varuvatara tita, hia qio Iesusira nraaqani vura.

<sup>20</sup> Mwihua varuvaro mpovanto Iesusira timwa mwinro tiqaro, I nrovavata i qatanramwuvata mwaataqa i taqarerata nrumbu variavo, tuvaro

<sup>21</sup> Jesusiva mwipi ntuvaantuama vita varuhua timwa nyinro tiqaro, Kotira qua rieqata nrohi variahua mwihuama ni ntovave, ni kata pakyaahuave, variavo, tiro. Mwitaa turama.

### *Jesusiva toqa vaururuara qao tuvaro tirema vahura*

(Matiu 8:23-27; Maaki 4:35-41)

<sup>22</sup> Mpo enta Jesusiva nai nraaqiaranramwuanra tiqaro, Nrivaqe kyaarera nronra mwaa qareta vutura hini quare, timwa kyero mpotuqi mwaanri ntero mwihua kyapata viro.

<sup>23</sup> Mwihua nramanriqaa vi varuvaro Iesusiva mpotuqi vaite varuvaro nronraqama kyero toqa vaururu utiqaro nramanri ventaqiro viro mpotuqi mwaanri ntero piqa kyovata mwihua nramanriqi rauru viva qaumaqa huvata

<sup>24</sup> Iesusira nraaqiaranramwuvanto mwiva vaitonani uro mwia vaurama kye tiqata, Nronrao, nronrao, tire qaumama nramanriqi ntumwa quananrave, tuvaro Iesusiva siviro toqa vaururuaravata nramanrianravata qio eqaante tuvaro toqa vaururuvanto taiqa vuvaro nramanrivanto tuminro tirema naitarama vhura.

<sup>25</sup> Tirema vahuvaro Iesusiva nai nraaqiaranramwuanra tiqaro, Tanave nkye nianra kepukyaqama kyeta riaava vaiho? tuvata mwihua aatu hiqata kyauqu ntukikinraaqa teta tiqata, Qikye, mwaa nai ta vaisivave iho? Mwiva qua tiharo toqa vaururuvantovata nramanrivantovata mwia qua rie variho, tita. Mwihua mwitaa turama.

*Iesusiva vaana kyapata variqiro nrohi varu vaisira kyuqema kyora*

*(Matiu 8:28-34; Maaki 5:1-20)*

<sup>26</sup> Mwihua mpotuqi vuhua vutura Kekesaa mwatani uro ntora. Kariri rumpua vutura qarahi hini Kekesaa mwatahahua.

<sup>27</sup> Mwihua mwini uro ntovaro Iesusiva mpotuqitairo mwaamwi ntovaro vaisi mpo mwi mwatukyaraqinaava vaana kyapata variqiro nrohi varuva uro Iesusira qintorama kyora. Vaisi mwiva hia tuavaaqavata utuva, hia nraamwuqvata vaitova, mwiva vaisi qutuvata varaqita uro ori ataamwuqi vate varuraqi vaitaqiro vi varura.

<sup>28</sup> Mwiva Iesusira taqero paa tiro kye vu tiro Iesusira vuqaa nrumu tumu ntiro aakyara ntero tiqaro, Iesusio, Kotiva nronravanto nyaamwuni varihara e mwia mwaaquvanto variaro. E ni nataa hirerarave nrianro? Po, nte iara hia ni ruantema tuqo, tiro.

<sup>29</sup> Iesusiva vaananra vaisi mwiaqitaira nritarera quante turara tiro, vaana mwiva mwitaa tura. Mwi mwatanaahua vaisi mwiva aatu quankyo tita, mwia seni vara kyeta kyauqu rupa tovaro vaanavanto airi nani mwi vaisira tuqara tutovaro mwiva seni mwia ntupe paama kyovaro vaanavanto mwia vara kyovaro vaisi mwiva qumina mwatani vi varura.

<sup>30</sup> Mwitaa huvaro Iesusiva vaana mwia kyapara hiro tiqaro, Ena nrutu qianta, tuvaro mwiva Iesusira timwa mwinro tiqaro, ni nutu Airivave, tiro. Vaana airivanto mwi vaisiraqi varuvvara tiro, mwiva mwitaa tura.

<sup>31</sup> Vaana mwihua Iesusirara po kye tita tiqata, Hia tiri mupi vaanavanto variaraqi titaaante.

<sup>32</sup> Mwitaa timwa kyeta taqovaro quara airivanto vaini taaqiqaa uhiga nre varuvata vaana mwihua tiqata, Tiri titairaqe tire quara utaqi uro variare, tuvaro Iesusiva qiove tuyata

<sup>33</sup> Vaana mwihua vaisi mwia kyeta quara mwihua utaqi vuvata ekyaa quara mwihua okaiqi hianteta vuhua utontamwanra kyaareraqi ntumwa vita nramanri nreta qutu taiqa vura.

<sup>34</sup> Quaranramwu nramanri nreta qutu vuvata mwihuaqaa ntaqikyuhua mwia taqeta hiante vuhua uro mwatukyaaq varuhua ekyaa viti viri timwa nyuvata

<sup>35</sup> Mwi mwatanaahua mwia taqarerata vuhua Iesusiva varunani uro nteta taqovaro vaanavanto mwia utaqi varuvapo titamwa kyo vaisiva tuavaaqaa ututero Iesusira nraaqani mwatakyaa viro mwia vu nraatovanto naitarama vuvaro varuvata mwihua aatu hita.

<sup>36</sup> Mwihua aatu huvata vaisi mpo uhua vaakya mwia taqohua nraakye qora mwihua timwa nyita tiqata, Iesusiva mwitaa mwitaama kyaiharo vaisi mwiva kyuqema viho tita.

<sup>37</sup> Mwitaa tuvata Kekesaa mwatanaa mwihua mpoqama kye aatu hita Iesusirara tiqata, Tiri mwaata mwaisaira quante, tuvaro Iesusiva mpotuqi mwaanri ntero vürama.

<sup>38</sup> Mwiva virera huvaro vaanavanto nritarovaro varu vaisiva Iesusirara po tiro tiqaro, Kyai nte ivatama kyena quankye, tuvaro

<sup>39</sup> Iesusiva qaqa tiro, E ena mwaatani uro variqarama Kotiva i kyuqema mwatairara nraakye qora timwa nyiante, tiro. Timwa kyero Iesusiva mwia titovaro mwiva nai mwatukyani uro ntero Iesusiva mwia kyuqema mwatorara timwa nyiqiro vurama.

### *Iairaasiva Iesusira huntu kyero vura*

(Matiu 9:18-26; Maaki 5:21-43)

<sup>40</sup> Iesusiva nrnumu ntantero kyaarerera nronra vutura hini tokyani uro ntovata mwia vekya ntuvaantuama vita varu nraakye qorahua mwia qamwata mwatora.

<sup>41</sup> Mwitaa huvaro vaisi mpovanto mwia nrutu Iairaasiva, mwiva mwaanra nraamwuqaa ntaqikyi varuva uro ntero Iesusira kyuqusata tumu ntiro po kye tiro tiqaro, Qati ni nraamwuqi nriante.

<sup>42</sup> Ni naamwunra kuaiku 12 ihi varaiva qutu quariva pataqia vaiho, tiro.

*Nraakye mpovanto Iesusira tuavaaqa kyaatu kyora Mwitaa tuvaro Iesusiva Iairaasiravata vuvata nraakye qora airivanto Iesusira vataqita viqata nai rataakye nai rataakye hi varura.*

<sup>43</sup> Mwitaa horaqinaanra nraakye mpovanto nriqa vuva 12 ihiara tora taqamwaqiro viqaro mpo totaa mpo totahua uro taqero munima nraahu taiqa kyovaro hia mpovanto mwia kyaahaqa huvaro mwia ruva qati nraahu vahuvaro

<sup>44</sup> mwi nraakyeva nraakye qora utaqi variro Iesusira mwoqani viqaro Iesusira tuavaaqa vitiqaa kyaatu kyovaro mwia nriqa vuva taiqa vura.

<sup>45</sup> Mwitaa huvaro Iesusiva kyapara hiro tiqaro, Tavave niqaa tu varaiho? tuvata mwhua tire hiave tuvaro Pitaava tiqaro, Nronrao, nraakye qora airivantoma i tataaqa nriqata nai rataakye nai rataakye hi variqata ivata qakyaa hiavo, tuvaro

<sup>46</sup> Iesusiva qaqa tiro, Mpovanto ni tu varaiho. Nte ntapihi kyauqaro ni kepuuya hinivanto niqitairo viho, tiro.

<sup>47</sup> Iesusiva mwitaa tuvaro nraakye mwiva nai riero tiqaro, Qikye, vaakyama Iesusiva ni ntapihi kyaiho, timwa kyero kyuqu kyaquo nti varuvaro uro Iesusira kyuqusata tumu ntiro nraakye qora suqaa variqaro Iesusira timwa mwinro tiqaro, Ni mamanta kyuqema quarive tinama, nte i tuavaaqa kyaatu kyauqo. Nte mwitaa huvaro ni nriqa viva qamwanrama kyero taiqa viho, tiro.

<sup>48</sup> Mwitaa tuvaro Iesusiva mwia timwa mwinro tiqaro, Qio ni naamwunrao, e nianra ni kyaahaqa hianinrave qiararoma i nriqa viva taiqa viho. Qioma i mwutukyavanto qihakya hirara quante, tiro.

### *Iairaasira nraamwunra kyuqema kyora*

<sup>49</sup> Iesusiva mwitaa ti varuvaro Iairaasira nraamwuqitairo vaisi mpo titova nri ntero Iairaasira timwa mwinro tiqaro, I nraamwunravanto qutuma viho. Mwaanra ti vari vaisira hia ntavaaqavu taante, tuvaro

<sup>50</sup> Iesusiva mwi quara riero Iairaasirara tiqaro, Hia aatu hiante. Nianra kepuuyaqama kyera riemwaqira vi variraro i nraamwunravanto qio variarive, tiro.

<sup>51</sup> Mwitaa timwa kyero Iesusiva mwia nraamwuqi uro ntero quminahua mwipi varuhua sitero uto mwaatani variate timwa kyero Pitaaravata, Ioninravata, Iemisiravata, nraaqiara mwia nrohua qohuavata, mwinramwuhua nraahu sita varero qiaatara mwia qutu vuvata vatoraqi viro.

<sup>52</sup> Ekyaa nraakye qora mwihua nraaqiara mwianra ntate varuvaro Iesusiva tiqaro, Hia mwianra ntataate. Qiaatara mwiva hiama qutu viho, qati vaitema variho, tiro.

<sup>53</sup> Tuvata qiaatara mwiva qutu vurara tita, mwihua Iesusira quara raima mwatovaro Iesusiva qiaatara mwiva qutu vuraqi vera ntero

<sup>54</sup> qiaatara mwia kyauquqaa tu varero mwianra vera kyero tiqaro, Mwaa qiaataravao, siquante, tiro.

<sup>55</sup> Mwitaa tuvaro nai mwanraqura naiqi nruvaro mwiva qamwanrama sivuvaro Iesusiva mwipi varuhuara kyara mwiate tiro.

<sup>56</sup> Mwitaa tuvata mwia nrohua qohua nrihanrama vita kyauqu ntukikinraaqate varuvaro Iesusiva mwitanahuara tiqaro, Mate mwaa taqaarara hia mpohua timwa nyiate, tiro. Mwitaa turama.

## 9

### *Iesusiva nai nraaqiara 12 nramwu sitovata vura*

(*Matiu 10:5-15; Maaki 6:7-13*)

<sup>1</sup> Iesusiva nai nraaqiara 12 nramwu nyaanrama kyero mwihua vaisiqitaita vaana siteta nriqa vihua kyuqema nyataate tiro, mwihua nronraqama kyero kepukya nyinro tiqaro,

<sup>2</sup> Nkye uro Kotiva ntaqikyi quara nraakye qora timwa nyiqatama nriqa vihuavata kyuqema nyataate, tiro.

<sup>3</sup> Mwitaa timwa kyero mwiva tiqaro, Nkye virera hita qatima quate. Hia kyauru quru terave, tuave, kyarave, munimave, tuavaaqa kyaatave, vareta quate.

<sup>4</sup> Nkye vivaro ta mwatukyaraqitairove nkyiara qamwateqaro nkyi sitairera, nkye nraamwu kuaaqi nraahu variqi vitama mwi mwatukyara kyetama quate.

<sup>5</sup> Nkye vivaro ta mwatukyaraqitairove hia nkyiara qamwatero hia nkyi sitairera, mwi mwatukyara qaqlira kyeta nkyetaqaatai ntovenrauma kyeta qaqlira tuto kyetama mwihua timwa nyita tiqata, Nraakiara nkye taqevarave, qiate, tiro.

<sup>6</sup> Iesusiva mwitaa tuvata mwia nraaqiaranramwu mpo mwatukya mpo mwatukya nrohiqata Kotira qua kyuqe qua timwa nyiqi viqata nriqa vujuavata kyuqema nyatora.

### *Herotiva Iesusira okyarara airi nraato tura*

(*Matiu 14:1-2; Maaki 6:14-16*)

<sup>7</sup> Iesusivavata, mwia nraaqiaranramwuvata, mpo kyaiqa mpo kyaiqa vare varuvaro mwi quava viro nrinro huvaro Herotiva Kariri mwataqaa ntaqikyi varuva, mwivavata mwi quara riero Iesusira okyarara airi nraato ti varuvata vaisi mponramwuvanto tiqata, Ioniva nramanri nyi varuva qutu vuva qaiqaa siviro nrohi variho, tuvata

<sup>8</sup> mpo uhua tiqata, Qaqao, tiri haivaqava Iraisaava qovarama viho, tuvata mpo uhua qaqao tita, Tiri haivaqava haaruua poropeti vaisi mpovanto qati siviro nrohi variho, tura.

<sup>9</sup> Mwihua mwitaa tuvaro Herotiva nai tiqaro, Nte Ioninra nruntu teqa kyaavarave. Mwihua mpo qua mpo qua ti varia vaisiva mwiva ta vaisivave? tiro. Mwitaa timwa kyero mwiva Iesusira taqarero uti varura.

### *Iesusiva kyara airiqama kyero 5,000 vaisi nyunra*

(*Matiu 14:13-21; Maaki 6:30-44; Ioni 6:1-13*)

<sup>10</sup> Iesusiva nai nraaqiaranramwu sitovata vuhua uro ntanteta nrumu mwihua nkyiari nrohu mwakyaakyara Iesusira timwa mwuvaro mwivavata riero, mwiaqaatairo Iesusiva hini nraakye qora mwihua mwini kyero nai nraaqiaranramwu nraahu sitero Vetasaitaani vuvata

<sup>11</sup> mwini kyo nraakye qorahua mwihua riovoro Iesusiva Vetasaitaani virera hvata mwihuavata mwia vataqita vuvaro Iesusiva mwihua qamwata nyatero Kotiva ntaqikyiani quara timwa nyinro nriqa vujuavata kyuqema nyatora.

<sup>12</sup> Iesusiva mwitaamaqiro vuvaro huari vuvanto tumi vuvata Iesusira nraaqiara 12 nramwuvanto Iesusiva hunani nri nteta tiqata, Nraakye qora titairata mpo mwatukya

mpo mwatukya vaisi varinani uro vaiteqata kyara vara nraate. Mwaini qumina satave, tita.

<sup>13</sup> Mwitaa tuvaro Iesusiva qaqao tiro, Nkyetama mwihua kyara nyiate, tiro. Tuvata mwihua Iesusira timwa mwita tiqata, Tire mpereti hini kyauquruvata, tavukya taaratanavata nraahuma vatauro. Nraakyе qora airivanto variavo. Tire munima nronraqama kyetave mwihua kyara vara nyiananrave? tita.

<sup>14</sup> Vaisi kyaara ntirerata 5,000 vaisi airivanto varuvaro Iesusiva nai nraaqiaranramwuanra tiqaro, Nkye nraakyе qorara tivata ntainra vita mposata 50 nramwu varivata mposata 50 nramwu varita mwitaamaqi vitama ekyaa mwatakyaa vita variate, tiro.

<sup>15</sup> Tuvata mwia nraaqiaranramwuvanto mwihua ntainra kyovata ekyaa mwatakyaa vita varuvaro

<sup>16</sup> Iesusiva mpereti hini kyauquruvata, tavukya taaratanavata, vara kyero nyaamwuni taqevaro Kotirara kyuqeve timwa kyero mpereti nteqa kyero tavukya tukyama kyero nai nraaqiaranramwu nyinro tiqaro, tukyama kyeta mwihua nyiate, tiro.

<sup>17</sup> Nyuvata ekyaa mwihua vikyokyama nreta viti vaati kyovaro qati vahura, Iesusira nraaqiaranramwuvanto utu kyeta ntutantuto tuara 12 nramwu piqa kyora.

### *Pitaava Iesusira okyarara tura*

(Matiu 16:13-19; Maaki 8:27-29)

<sup>18</sup> Mpo enta Iesusiva nanrianraa variqaro Kotiravata qua ti varuvata mwia nraaqiaranramwuvanto mwiva hunani nri ntovaro Iesusiva mwinramwuhua kyapara hiro tiqaro, Qati nraakyе qoravanto nianra ta vaisirave tiqatave ti variavo? tuvata

<sup>19</sup> mwinramwuhua tiqatama, Mponramwuvanto iara mwiva Ioniva nramanri nyi varu vaisivave ti variavata mponramwuvanto iara mwiva Iraisaavave ti variavata mponramwuvanto iara mwiva haaruua poropeti vaisivanto qati siviro nrohi varivave ti variarave, tita.

<sup>20</sup> Mwinramwuhua mwitaa tuvaro Iesusiva mwinramwuhara tiqaro, Mpo nkyenramwuve? Nkye nianra ta vaisivave tiqatave variavo? tuvaro Pitaava mwia timwa mwinro tiqaro, E Kotiva titava, Mesaiaavanto variaro, tiro.

<sup>21</sup> Pitaava mwitaa tuvaro Iesusiva kepukyaqama kyero qao timwa tero mwinramwuhua timwa nyinro tiqaro, Nkye mwi quara mpohuavata hia timwa nyiate, tiro.

### *Iesusiva nai qutu quaninranra tura*

(Matiu 16:20-28; Maaki 8:30-9:1)

<sup>22</sup> Jesusiva mwitaa timwa kyero nai nraaqiaranramwu qaiqaa timwa nyinro tiqaro, Nte mwatani mwatatai nraaqiaravave. Nte nriqa quani inraikyara varaqina quarita Iutaa nronra vaisinramwuvata, Kotira kyaiqa vara mwate varia vaisihuua mwihua nronra vaisinramwuvata, mwaanra okyara ti varia vaisihuavata, mwihua ni qoririma matevarave. Ni rukyaivaqe nte taarampo enta varina qaiqaa qati siquaninrave, tiro.

<sup>23</sup> Mwitaa timwa kyero Iesusiva ekyaa mwinramwuhua timwa nyinro tiqaro, Ni pataqiro nrianri vaisiva, mwiva nai mwutukya vahiani inraikyara qaqlira kyero vaisi rukyeta hiritaa kyatarira mwia mpo enta vara qu varero ni naakiara nriananrove.

<sup>24</sup> Mwaa mwataraqaa nai qati variqiro quaninranra nraahu nronraqama kyero riaariva, mwi vaisiva ekyarama qutu quananrove. Vaisivanto nianra riemwaqiro viqaro uro qutu quariva, mwi vaisiva ekyaa enta qati variqiro quananrove.

<sup>25</sup> Vaisivanto qati variqiro viqaro ekyaa mwata mwaqaanaa inraikya ntuvan-tuama kyero vatero mwiva nai qutiro viro raupirima virera, nataama kyero mwi inraikyava mwia qio kyaahaqa hiananrove? Hia qio mwia kyaahaqa hiananrove.

<sup>26</sup> Vaisi mpovanto nianravata ni quaravata kyauruariva, mwi vaisiva variraqe nte mwatani mwatatai nraaqiarava variqana nte nraakiara tumuani entaraqaa nai mwi vaisiraravata kyauruuinrave. Mwi entara ni kora peqa okyaravanto niqaatairo ntuvahahe variraqe nte nyaamwunyaahuavata tuminrenrave. Mwi entara nte nai mwi vaisiraravata kyauruuinrave.

<sup>27</sup> Nte quitaama tuqo. Vaisi mponramwuvanto mate mwaa mwaini sivita variahua, mwinramwuhua hia qumina qutu vivarave. Mwinramwuhua Kotiva ntaqikyianinra taqetama qutu vivarave, tiro.

*Iesusira mwamwanta kyuqe mwamwanta kyuqu vura  
(Matiu 17:1-13; Maaki 9:2-13)*

<sup>28</sup> Iesusiva mwi quara timwa nyi taiqa kyero kuua uiki vara kyero mwiva Pitaaravata, Ioninravata, Iemisiravata, mwinramwuhua nraahu sita varero Kotiravata qua tirero taaqiqara vura.

<sup>29</sup> Iesusiva Kotiravata qua ti varuvaro mwia virivanto kyuqu viro mpo qarama vuvaro mwia tuavaaqavanto egarori tuavaaqa itero takyuqi varuvata

<sup>30</sup> qamwanrama kye vaisi mpotanavanto qovarama vita Iesusira vatama kyeta qua ti varura. Mwitana nyutu Mosesivavata Iraisaavavata.

<sup>31</sup> Mwitanaqaatairo nyaamwuni Kotiva hu inraikyava itero takyuqi varuvata mwitanahua Iesusiravata variqata Iesusiva Kotiva tuntema kyero Ierusaremini qutu quani quara timwaqi vura.

<sup>32</sup> Mwihua ti varuvata Pitaaravata, mwia henahua mwitanahuavata, suruara huvata vaita kyeta sivita taqovaro Iesusiraqaatairo nyaamwunya inraikyavanto itero takyuqi varuvaro varuvata vaisi taaratanaavanto Iesusira vatama kyeta sivita varura.

<sup>33</sup> Iesusiravata varu vaisitanahua virera huvaro Pitaava Iesusirara tiqaro, Nronra vasio, kyuqemama tirenramwu ivatama kyeta varuro. E qiove tirera, tirenramwu haraara nraamwu taaramponramwu hoqa taare. Iara mpo, Mosesirara mpo, Iraisaarara mpoma kyeta hoqa nyataare, tiro. Pitaava hia nai tu quara ntapihiraitiro, apiqama kyero mwi quara tura.

<sup>34</sup> Pitaava mwitaa ti varuvaro tonamwuvanto qovarama viro mwihua ntumwaqu kyovata Iesusira nraaqiaranramwuvanto mwi inraikyara taqorara aatu hi varura.

<sup>35</sup> Mwitaa huvaro quavanto tonamwuqitairo tiqaro, Mwaa ni maaque. Nte mwaa mwi vaisirave timwa kyena mwia mwatama taurave. Nkye mwia qua nraahu riaate, tiro.

<sup>36</sup> Mwi quara timwa nyi taiqa kyovata mwinramwuhua taqovaro Iesusiva nanri-anraa varuvata mwihua tirema variqata mwi entara mwi inraikyara taqorara hia mpohuavata timwa nyunra.

*Iesusiva nyaako mpoqitairo vaana titovaro vura  
(Matiu 17:14-21; Maaki 9:14-29)*

<sup>37</sup> Mwia qanranraa mwinramwuhua taaqi mwiaqaatai utonte vuvata nraakyе qora airivanto nrnum Iesusira huntu kyora.

<sup>38</sup> Huntu kyovaro vaisi mpovanto nraakyе qora utaqitairo aakyara ntero tiqaro, Mwaanra ti variara vasio, po, qati e nrinra nrnum ni maaqu taqaante. Mwia ni nraaqiara kuaiqia mwata taurave.

<sup>39</sup> Vaanavanto taura ni maaqu tuqara tutaiharo mwiva qua aakyara timwa kyeqaro mwiva kyuqu kyauqu tuto tuto/ato ato hi variharo taaraparavanto nraahu mwia nroqitairo nri varirave. Mwitaamaqi viqaro vaanavanto hia qamwanrama mwia tuta kyaraitiro, qati nraahu mwia tuto variqaro mwia mpoqama kyero ntuqutu kyarero uti variho.

<sup>40</sup> Nte i nraaqiaranramwuanra tiqana, Po, qati vaana mwia titaate, tuqata mwihua mwia titaavarovata hia nritarero virave, tiro.

**41** Vaisi mwiva mwitaa tuvaro Jesusiva tiqaro, Nkye mwaa entara varia nraakye qorahua nkye kyuqe aanraqaa nraahu nrohiataara vaihata nkye hia avuqavu hi aanranraqaa nrohi variavo. Nkye Kotirara qumimaqama kyeqatama hia mwianra riaavo. Qikye, nkye ni popohaira uti variavana nte nataama entave nkyi kyapata variqi viqanave nkyi kyaahaqa hianinrave? tiro.

Iesusiva mwitaa timwa kyero mwiva vaisi mwianra tiqaro, Ena mwaqu vita varera nriante, tuvaro

**42** mwiva nai mwaqu vita varero nri varuvaro vaanavanto mwia mwaqu ntutahaa kyovaro mwiva mwatasata tumu ntuvaro kyuqu kyuqu *tuto tuto/ato ato* hi varuvaro Iesusiva vaana mwia inronrama kye titamwa kyero, nyaako mwia vara qioqama kyero mwia vitaqiro iro nai qora mwunra.

**43** Mwia mwuvata ekyaa nraakye qoravanto kyuqu ntukikinraaqata kyeta tiqata, Qikye, Kotiva kepukyavanto variho, tita tura.

*Iesusiva nai qutuaninranra qaiqaa vutu kyero timwa nyunra*

*(Matiu 17:22-23; Maaki 9:30-32)*

Nraakye qoravanto Iesusiva mpo kyaiqa mpo kyaiqa varorara kyuqu ntukikinraaqate varuvaro

**44** Iesusiva nai nraaqiaranramwuanra tiqaro, Nte nkyi timwa nyiani quara hia taunru kyaate. Mpovanto ni mwatani mwatatai nraaqiarara qovarama kyairata ni ntavaaqavuqita uro vaisi kyuquqi kyevarave, tiro.

**45** Iesusiva mwitaa tuvata mwia nraaqiaranramwu mwi quara okyara hia ntapihi kyeta riora. Iesusira nraaqiaranramwuvanto mwi quara hia ntapihi kyeta riaate tiro, mwi quara okyaravanto uqeta vahuvata mwihua aatu hiqata hia mwi quara okyarara Iesusiva kyapara hura.

*Tiriqitairo tavave vunyaa vaisivanto variananrove tura*

*(Matiu 18:1-5; Maaki 9:33-37)*

**46** Iesusira nraaqiaranramwuvanto tavave tiriqitairo vunyaa vaisivanto variananrove timwa kyeta inronra hi varuvaro

**47** Iesusiva mwihua su nyaatoqi vahu quara ntapihi kyero Iesusiva nraaqiara pata mporu vita kyero nai nraaqani vatero

**48** mwihua timwa nyinro tiqaro, Vaisi mpovanto nianra rieqaro nraaqiara pata mwataa hianinra qamwata mwateqaro mwiva nivatama qamwata mataananrove. Mwiva nianra qamwateqaro mwiva Kotiva ni titairaravatama qamwata mwataananrove. Tavave nkyiqitairo pataqiaru utu quariva, mwivama nkyi vuni variqaro nrutu nronra vataava variananrove, tiro.

*Vaisi mpovanto Iesusira nrutu nteqaro kyaiqa varora*

*(Maaki 9:38-40)*

**49** Iesusiva mwitaa tuvaro Ioniva tiqaro, Nronrao, tire taqauraro vaisi mpovanto i nrutu nteqaro vaana tite varirave. Mwiva hia tirivatama kyero i vataqiro nrohi variva mwitaa ihatara tita, tire mwianra eqaante timwa kyeta mwia antua kyauro, tiro.

**50** Mwitaa tuvaro Iesusiva Ioninravata, hini mwihuavata, timwa nyinro tiqaro, Nkye hia mwitaa hiatararave. Hia mwia antua kyaate. Mpovanto hia nkyi uaqiamma nyataariva, mwiva nkyi kyaahaqa hiarivama variho, tiro. Iesusiva turama.

*Sameriaavanto hia Iesusira qamwata mwatora*

**51** Iesusira vitero nyaamwuni quariva qaumato vahuvare Iesusiva Ierusaremini quari vu nraatova nraahu vahuvare mwiva aanraqaa viro.

**52** Aanraqaa viqaro Iesusiva nai nraaqiaranramwu sitovata mwihua nraante vuhua uro Sameriaani mwatukya mpoqi uro nteta Iesusiva vaitaaninra tera hirera huvata mwi mwatanaahua qaqao tita,

<sup>53</sup> Iesusiva Ierusareminianra nrinrenra hiama qio mwaini vaitaananrove, tura.

<sup>54</sup> Mwitaa tuvata Iesusira nraaqiaratana Iemisikya Ionikyatana mwi quara riowaro raraqa tovatatana mwhua Jesusirara tiqata, Nronrao, e qiove tiraqe tiretana nyaamwunianra aakyara qiararo qiavanto tumu mwi mwatanaahua itamwa taiqa kyaarive, tita.

<sup>55</sup> Mwitanahua mwitaa tuvaro Iesusiva tuqasaaviro mwitanahua inronra hiro tiqaro, Hia mwitaa hiate, tiro.

<sup>56</sup> Mwitaa timwa kyero Iesusiva nai nraaqiaranramwu kyapata mpo mwatukyaqiara vurama.

### *Iesusira vataqita virera uti varuhua*

(Matiu 8:19-22)

<sup>57</sup> Mwhua aanraqaa vi varuvaro vaisi mpovanto uro ntero Iesusirara tiqaro, Nte i nraaqiara varirerave. E taini tainive vinanrani nte i vataqina virerave, tiro.

<sup>58</sup> Mwitaa tuvaro Iesusiva mwianra tiqaro, Haunri e paparuqa hivorave. Qaakyau vairivanto nai nraamwu nruaunru tairaqui vaite varirave. Nyaamwavanto nai nraamwuqi vaite varirave. Nte mwatani mwatatai nraaqiarava vaitaari nraamwuva hia vaiho, tiro.

<sup>59</sup> Mwitaa timwa kyero mwiva vaisi mpora ni pataqira nriante tuvaro mwi vaisiva tiqaro, Kyai nte ntene kora nraante uro quntamwa tena nrumu i vataqina quankye, tuvaro

<sup>60</sup> Iesusiva qaqao tiro, Qutu qua vaisihua votima kye varihua mwhua qiomma qutu quaninra mwia quntevarave. E uro Kotiva ntaqikyiani quara nraakye qora timwa nyiante, tiro.

<sup>61</sup> Iesusiva mwitaa tuvaro vaisi mpovanto tiqaro, Nte i vataqina vireranave. E qiove tiraqe nte quariva uro ntene nramwunaahua kyauqu nyina vuqo timwa kyena nriangkye, tiro.

<sup>62</sup> Mwitaa tuvaro Iesusiva mwianra tiqaro, Qaqao, ni kyaiqa tohara tero mwiaqatairo mpo inraikyara rieqaro ni kyaiqa qaqlira kyero quari vaisiva hia qio Kotiva ntaqikyi mwatukyaraqi quananrove, tiro.

## 10

### *Iesusiva vaisi 72 nramwu sitovata vura*

<sup>1</sup> Nronravanto mwitaa timwa kyero mwiva vaisi 72 nramwu nronraqama kyero mwhua sitero tiqaro, Nkye taaratana taaratana viqata nte virera hiani mwatukyara mpo mwatukya mpo mwatukya nkye nraante ni puni quate, tiro.

<sup>2</sup> Iesusiva mwitaa timwa kyero mpo quaqaa ntumwa kyero timwa nyinro tiqaro, Kyara airivanto keko tihata mwia vantu vareta nrihua hia airivanto variavo. Nkye aakyo qora kyapara hivaro mwiva kyaiqa vaisi mponramwuvata sitairata uro kyara vantuate.

<sup>3</sup> Qio nkye quate. Nte nkyi sitaarita nkye sipisipi nraati votima kyeta qaakyau vairi varinani vivarave.

<sup>4</sup> Nkye viqatama hiama munimave, tuave, kyuqu nraamwumate inraikyarave, vareta quate. Aanraqaa viqatama hia nkyi antueqata qua tihua qua mwantaate.

<sup>5</sup> Nkye nraamwuqi uro nteta nraamwuqi varihua qua mwanteqata mwataama qiate, Kotiva nkyi qamwata nyatairaro nkyi mwutukyavanto qihakyma vahirata variate, qiate.

<sup>6</sup> Nkye mwitaa timwa kyeta taqaivaro vaisi mpovanto mwi quarara qamwata kyero varirera, Kotirara aakyara nteqata mwi vaisira qamwata mwataante qiate. Taqaivaro mpovanto mwi quarara hia qamwata kyero varirera, hia mwi quara mwia mwiate.

<sup>7</sup> Kyaiqa vaisivanto nai kyoqaa varairara tita, nkye mwatukya mpoqi uro variqata nraamwu kuaaqi variqi vivata mwihua nkyi kyarave nramanrive nyinra mwia nraahu nreqata variate. Hiama mpo nraamwu mpo nraamwuqi nrohiqata kyara vara nraate.

<sup>8</sup> Nkye mwatukya mpoqi uro ntaivata mwi mwatanaahua nkyi qamwata nyateta tirivata variate tivera, mwihua nkyi nyi kyarara mwia nraahu nreqata

<sup>9</sup> mwi mwatukyaraqi nriqa virata varihua kyuqema nyateta mwi mwatanaahuara tiqata, Kotiva ntaqikyiariqa qaumatomava vaho, qiate.

<sup>10</sup> Nkye mwatukya mpoqi uro ntaivata mwi mwatanaahua hia nkyi qamwata nyateta hia tirivata variate tivera, qaqira kyeta aanraqaa nrumu variqata

<sup>11</sup> nkyetaqaatai ntovenrauma kyeta mwitaama timwa nyiate, Kotiva nraakyte qoraqaa ntaqikyiari entava qaumato vahata tire mwi quara nkyi timwa nyinrenrata nrunrahuave. Nrunrata nkye tiri qoririma timwataavata, hia qaiqaavata uro ntanteta nriananrave, qiate.

<sup>12</sup> Nraakiara Kotiva ekyaara entaqaa ko qiani entara Sotomi mwatanaahua qua nronra varaivata nkye mate ni qua rieta qoririma kye varihua nkyema qua nronra mpoqiavata varevarave.

*Nraakyte qora Iesusira qoririma mwatohuara po tura  
(Matiu 11:20-24)*

<sup>13</sup> Po, nkye Korasini mwatukyani variahuave. Po, nkye Vetasaitaa mwatukyani variahuave. Nkye taqevarave. Nte nkyi suqaa nronra kyaiqa varauuntema kyero mpovanto Taiaa mwatanaahuqaqvata Sotomi mwatanaahuqaqvata vara nyatotirio, mwi mwatanaahua qamwanrama kyetama tuavaaqa nrihi kyaama vara utu vareta hora vara qu vareta qora aanra qaqirama kyotirio.

<sup>14</sup> Ekyaara entaqaa Kotiva mwi mwatanaahuqaqua qua nronra vatero nkyiqa qua nronra mpoqiavatama vataananrove.

<sup>15</sup> Po, nkye Kapenaami mwatanaahua nkye tiqata, Tire nronraqama vita nyaamwuni quananrave, qiaovo. Qaqao hiave. Nkye hia ni qua riaara kyaara Kotiva nkyi vara kyero qiaqi kyaananrove, tiro.

<sup>16</sup> Iesusiva mwitaa timwa kyero nai nraaqiaranramwu timwa nyinro tiqaro, Nkyi qua riaari vaisiva ni quavata riaananrove. Nkyi qoririma nyataariva nivata qoririma mataananrove. Ni qoririma mataari vaisiva Kotiva ni titairavatama qoririma mwataananrove, tiro.

*Iesusiva 72 vaisinramwu sitohua uro ntanteta nrunra*

<sup>17</sup> Iesusiva mwitaa timwa kyero vaisi 72 nramwu sitohua uro nrohitia qaiqaa uro ntanteta mwihua qamwata kyeta nrumu Iesusirara tiqata, Qikye, nronrao, tire i nrutu nteqata vaanavata sitaurata nritare quavo, tita.

<sup>18</sup> Mwihua mwitaa tuvaro Iesusiva nkyiari timwa nyinro tiqaro, Nte taqe varuqaro Saataaniva nyaamwusairo aaquakyaavanto tintema kyero tumu ntiho.

<sup>19</sup> Nkye riaate. Nte nkyi nronraqama kyauqata nkye varivaro quahave, vaisi ruani tovesivave, varirata nkye mwivau qatima kyuqu ntamwaqi vivarave. Nkye qiomia nkyeta nramwutaa Saataaninra nraatara kyaivaro hiama nkyi ruananrove.

<sup>20</sup> Nkye vaanavanto nkyi qua riaira, mwianra hia qamwataate. Nkyi nyutu nyaamwuni qara ntumwa taira, mwianra rieqatama nkye qamwataate, tiro.

*Iesusiva qamwatora  
(Matiu 11:25-27, 13:16-17)*

<sup>21</sup> Iesusiva mwitaa tuvaro Kotira mwanraquravanto mwia kepukyaqama kyovaro mwiva qamwata kyero variqaro Kotirara tiqaro, Ko, e nronravanto nyaamwuvata mwatavata ntaqikyi variaravave. E mwi inraikyara mwi inraikyara tuqeta tera hia nronra vaisi ekyaara okyara taqaa vaisihua nyaamwutaraitira, mwi inraikyara qumina

vaisi nyaamwute variananranra tina, nte i nrutu tuaaherauqo. Eo ko, e ena mwutukya vahira mwitaa hiataa iharara tirama, mwitaa hiaro, tiro.

<sup>22</sup> Iesusiva mwitaa timwa kyero mwiva tiqaro, Ni kova nianra ekyaa inraikyaqaa ntaqikyiantre tirave. Hia qumina vaisivanto ni mwia mwaaku okyara ntapihiarave. Ni kova nai nraahu ni okyara ntapihi kyairave. Hia qumina vaisivanto ni kora okyara ntapihiarave. Nte mwia mwaakuvantio nraahu mwia okyara ntapihi kyaurave. Nte tahuave timwa nyiataa hiraqe timwa nyianrihua, mwihuavatama ni kora okyarara ntapihi kyeta riemwaqita vivarave, tiro.

<sup>23</sup> Iesusiva mwitaa timwa kyero tuqasaa viro nai nraaqiaranramwu nkyiariaraa timwa nyinro tiqaro,

<sup>24</sup> Nkye mate mwaa entara taqaarara qamwataate. Haaru nronra vaisive, poropeti vaisive, vunyaa vaisive, mwihuavata mate nkye taqaa inraikyara taqaare tura, hia taqorave. Nkye mate mwaa entara rie varia quara, mwihuavata riaare tura hia riorave, tiro. Mwitaa turama.

### *Nai nramwutaa kyaahaqa hu vaisirara tura*

<sup>25</sup> Mwaanra okyara ti varuva mpovanto nri ntero Iesusiva api qua qiarive tiro Iesusirara tiqaro, Mwaanra ti variara vaisio, nte nataa hiani kyaiqara varaqina quaninraqatainave ekyaa enta qati variqina quaninrave? tiro.

<sup>26</sup> Tuvaro Iesusiva mwia kyapara hiro tiqaro, Kotira qua mwaanra qara ntumwa tova nanreve tiho? Mwia okyaravanto nataamave vaiho? tiro.

<sup>27</sup> Tuvaro vaisi mwiva tiqaro, Mwia qara ntumwa tova mwataama tiho:  
Iqaa ntaqikyira Kotirara ekyaa mwutukyaqitairave,  
vu nraatoqitairave, mwanraquraqotairave,  
ena kepuqyaqotairave,  
Kotirara nraahu i mwutukya vahiarive.

(Lo 6:5)

Inanra mwutukya vahintema kyero  
ina nramwunaanranravata i mwutukya vahiarive,  
turave, tiro.

(Wok Pris 19:18)

<sup>28</sup> Mwitaa tuvaro Iesusiva tiqaro, Qio e mwitaamaqira viqarama ekyaa enta qati variqira vinanrave, tiro.

<sup>29</sup> Iesusiva mwitaa tuvaro mwaanra okyara ti varuva Iesusira qua nraatara kyaankye tiro tiqaro, Qaqao, tavave ni nramwunaa mwiva variho? tiro.

<sup>30</sup> Tuvaro Iesusiva mwaa quaraqaa ntumwa kyero timwa mwinro tiqaro, Vaisi mpovanto Ierusalemisairo mwatukya mpo Ierikonianra uto ntero vurave. Mwiva aanraqaa vi varuvata mpuara vaisi mponramwuvanto mwia ntavaaqavu kyeta mwia tuavaaqaa ntupema kye vareta, mwia ntuqutu kyeta vate vuvaro aavata ntumwa viro aanraqaa vahurave.

<sup>31</sup> Mwiva aanra mwiaqaa vahuvaro Kotira kyaiqa vara mwate varu vaisiva mwia nramwunaa kuua mwatanaavanto tumiqaro aanra mwiaqaa taqovaro mwi vaisira ntuqutu kyeta kyova vahuvaro mwiva vitira aanra tokya hisataa tumitarero vurave.

<sup>32</sup> Vaisi mwiva qati tumitarero vuvaro vaisi mpovanto mwia kuua mwatanaa Rivaira okyaravanto, mwivavata Kotira kyaiqa vara mwate varuva tumu ntero mwia aitutuma kyero taqero, qaqla kyero nai henanra mwia nraantantero vitira aanra tokya hisataa tumitarero vurave.

<sup>33</sup> Vaisi mwivavata qati vuvaro Sameriaa vaisi mpovanto hia mwia nramwunaava, nanrianra mpo mwatanaa vaisivanto aanra mwiaqaa viqaro vaisi mwia taqero mwianra po kye timwa mwatero

<sup>34</sup> mwia nraaqani uro variqaro vahamwenraqovata, uainiqovata, mwia mwamwanta teqa tora hiqama kyero rupa mwatero mwia kyavuhu kyero

nai ntonkiqa mwaanri vatero, mwia vitaqiro uro munima kyeqata vaite varu nraamwunraqi kyero mwiaqaa ntaqikyi varurave.

<sup>35</sup> Mwia qanranraa mwiva virera hiro 2 kinaa nraamwu qora mwinro tiqaro, Vaisi mwiaqaa kyuqema kyera ntaqikyi variraqe nte quariva nrohina uro ntantena nrianriva nruru nataama munimave mwiaqaa kyenanra ina mwiankye, turave, tiro.

<sup>36</sup> Iesusiva mwitaa timwa kyero mwiva mwaanra okyara ti varu vaisira kyapara hiro tiqaro, Mpuara vaisivanto vaisi mwia aavata ntuqutu kyeta vate vuvaro mwiva varuvata vaisi taarampotanavanto mwia tumu taqorave. Taarampo mwitanaqitairo tavave mwia nramwunaa votima kyero variho? tuvaro

<sup>37</sup> mwaanra okyara ti varu vaisiva tiqaro, Mwianra po kye tiqaro kyaahaqa hu vaisivave, tuvaro Iesusiva mwia timwa mwinro tiqaro, Evata uro vaisi mwiva hunte hiante, tiro. Iesusiva turama.

### *Iesusiva Mataakya Mariaakya uro taqora*

<sup>38</sup> Iesusiva nai nraaqiara kyapata Ierusareminianra aanra vuraqaa vuva mwatukya mpoqi uro ntoraro nraakyе mpo, mwia nrutu Mataava Iesusira qamwata mwatero nai nraamwuqi vitaqiro uro kyora.

<sup>39</sup> Iesusiva mwiqi variqaro qua okyara timwa nyiqinro vuvaro Mataara nrunravanto mwia nrutu Mariaava Iesusira nraaqani mwatakyaa viro variqaro mwia qua rie varura.

<sup>40</sup> Mariaava rie varuvaro Mataava kyara tera hiqaro airi kyaiqa nai nraahu varovaro mwia uaquia huvaro mwiva Iesusirara tiqaro, Nronrao, ni nunravanto hia ni kyaahaqa ihana nte ntena nraahuma kyara tera hi varuqo. E hiave mwia taqaaro? E mwianra tiraro mwiva nruru ni kyaahaqa hiarive, tiro.

<sup>41</sup> Mwitaa tuvaro nronravanto nai timwa mwinro tiqaro, Mataao, Mataao, e mpo inraikya mpo inraikyara nronraqama kyera rie variaravave.

<sup>42</sup> E kuaa inraikya vuni vahi inraikyara nronraqama kyera riaataarave. Mariaava ntapihi kyeroma nruru variqaro mwi inraikyara riaihio. Hia mpo inraikyavanto mwia antua kyaarive, tiro. Iesusiva turama.

## 11

### *Mwataama kyeta Kotiravata qua qiate tura*

(Matiu 6:9-15, 7:7-11)

<sup>1</sup> Mpo enta Iesusiva mpoqi uro variqaro Kotiravata qua ti varura. Mwiva Kotiravata qua timwa taiqa kyovaro mwia nraaqiara mpovanto tiqaro, Nronrao, Ioniva nai nraaqiaranramwu timwa nyinro mwataama kyeta Kotiravata qua qiate turave. Evata tiri timwa timwinraqe tire ntapihi kyeta Kotiravata qua qiare, tiro.

<sup>2</sup> Mwitaa tuvaro Iesusiva mwihua timwa nyinro tiqaro, Mwataama kyeta Kotiravata qua qiate:

Ko,

I nrutu kyotata nrutu kyuqera tire tuaaherauro.

E tiriqaa ntaqikyiqira vina entava qamwanrama nrianrive.

<sup>3</sup> Tire ekya enta kyara nraananra tiri timwiante.

<sup>4</sup> Mpohua tiri uaqiamma timwa taavata  
tire qaqlira kyaunantema kyera evata  
tire i qua nteqaa kyaana quara nruka timwa taante.

E tiri tivita vare vi variraqe

tire hia uaquia hi kyaiqara utuare, qiate. Mwitaa timwa kyeqata Kotiravata qua qiate.

<sup>5</sup> Iesusiva mwitaa timwa kyero nai nraaqiaranramwuanra tiqaro, Nte qati qua mpo tirerave. Nkyiqitairo mpovanto enta mwutukya nai qata vakya nraamwu qesaqaa uro ntero tiqaro, Ni vaisio, qamaa taarampoqia ni mpiante.

<sup>6</sup> Ni toti mpovanto nyianrasairo nriva ni nraamwuqi nri ntaiharo kyara hia vaihanave, tiraro mwia qata vakyaa mwiva tiqaro, Qaqira kyera quante.

<sup>7</sup> Nte qesa tita tena ntene nraaqiararavata vaitema varuqo. Hia nte sivina kyara i mwinrenrave, qiananrove.

<sup>8</sup> Mwitaa tiraro mwiaqaatairo mwiva raaquta kyero nyaanru timwaqi viraro haunri mwiva mwitaa timwaqiro quankyorave tiro, kyara mwia mwiananrove. Hia mwiva mwianra mwiva ni kata pakyave timwa kyero mwianra rieqaro mwia kyara mwiananrove. Mwiva nai qata vakyaa mwiva pupohama kyero nyaanru timwaqiro quaninra, mwianra riero mwiva siviro mwia mwiananrove tuqo.

<sup>9</sup> Mwianra rieqatama nte nkyi timwa nyianinra riaate. Nkye Kotirara nyaanru tivarо mwiva mwi inraikyara nkyi nyianrive. Nkye puaamaqi vita uro puaama kyaate. Nkye qesa ntuquutivarо Kotiva qesa qatua nyataarive.

<sup>10</sup> Kotirara nyaanru qiariva qioma varaananrove. Mpo inraikyara puaamaqiro quariva qioma puaama kyaananrove. Qesa ntuquutuani vaisira qatuama mwataananrove.

<sup>11</sup> Nkye nraaqiara sohuaqitai tavave mwia mwaaqvavto tavukya mpiante tirara e mwia qarura mwianra? Hia mwitaa hinanrave.

<sup>12</sup> I nraaqiaravanto kokoraara uru mpiante tirara e uapaa tovesivanto vaisi kutuaninrave mwia mwinanrave? Hia mwitaa hinanrave.

<sup>13</sup> Nkye uaquia hia vaisihua variqatavata nkye kyuqe inraikya nraahu nkyeta nraaqiara nyi variarave. Nkyi sova Kotiva mpo? Mwiva nkyi nraatara kyero qihakyama kyero nyi varivama variho. Mwiva nkyi sova nyaamwuni variva variraro mpovanto mwia mwanraqurara nyaanru tiraro Kotiva qihakyama kyero nai mwanraqura mwiananrove, tiro. Turama.

*Pierisepuriva Iesusira kyaahaqa hi variho tura  
(Matiu 12:22-30; Maaki 3:20-27)*

<sup>14</sup> Vaana hia qua tuva vaisi utaqi varuvaro vaisi mwivavata hia qua tuvaro mpo enta Iesusiva vaana mwia titovaro nritarero vuvaro mwiaqaatairo mwi vaisiva qio qua tuvata nraakye qora ntuvaantuama vuhua qikye timwa kyeta kyauqu ntukikinraaqate varura.

<sup>15</sup> Mwitaa huvata hini uhua qaqao tita, Pierisepuriva vaana vunyaava Iesusira kyaahaqa hi variharo Iesusiva vaana site variho, tita.

<sup>16</sup> Mwihua mwitaa tuvata vaisi mponramwuvantavata Iesusira mwataara hiare tita Iesusirara tiqata, E nronra kyaiqa mpo tiri tivuqaa varairaqe tire taqeta iara qutaama Kotiva i titaiho qiare, tita.

<sup>17</sup> Mwitaa tuvaro Iesusiva mwihua nraato tuto quara ntapihi kyero, mwihua timwa nyinro tiqaro, Kuaa mwatanaavanto ntainra vita nai ri nai ri hivera, mwihua qamwanrama taiqa vivarave. Nraamwu kuaaqi varihua ntainra vita nai ntaqi nai ntaqi hivera, mwihua kyatita nkyiariara nkyiariara mpona mpona uro varivarave.

<sup>18</sup> Saataaniva ntaqikyi variarihua ntainra vita nai ntaqi nai ntaqi hi varivera, qiove mwiva kepuqyaqama kyero vahiananro? Hia qiove. Nkye nianra tiqata, Pierisepuriva mwia kepuqya mwhianro mwiva vaana site variho, qia quava

<sup>19</sup> quataa qua vahitiri, tava nkyi sataqi nriahua mwihua kyaahaqa ihatave vaana tite variavo? Nkye nianra qia quara nkyi sataqita nrohia vaisihua unra quave tivarave. Nkyi sataqita nrohi vaisihua ti quava nkyi tu varaananrove.

<sup>20</sup> Kotiva ni kepuqya mpihana nte vaana site varuqo. Mwi quava quataa qua vahirara tita, nkye mwianra rieqatama Kotiva tiriqaa ntaqikyiari entava nri ntaiho qiate.

<sup>21</sup> Vaisi kepuqyavanto huru kyaamwu terama kyero nai nraamwuqaa ntaqikyiqiro viharo mwiva vatai inraikyava qio vahirave.

<sup>22</sup> Mwiva variraro vaisi kepuqya mpovanto mwia nraataraariva nri ntero mwiavata ntaqiro mwia nraatara kyero mwiva nraamwu qova huru kyaamwu tuto qio

ntaqirerave qiani inraikyara mwiaqaatairo ntavihi kyero varero, mwiva vataani inraikyara vara kyero mpohua nkyiariara nkyiariara nyiananrove.

<sup>23</sup> Mpowanto hia ni kyaahaqa hiariva varirera, mwiva ni uaqama mataarivama variananrove. Mpowanto hia ni kyaahaqa hiqaro ni quara ntuaantua hiariva, mwi vaisiva ni quara sataqiro mpona mpona uro kyaarivama variho.

### *Vaana okyarara tura*

(Matiu 12:43-45)

<sup>24</sup> Vaanavanto vaisi utaqitairo nritarero uro aahara mwataqaa nrohiqaro kyai nte tekya hiankye timwa kyero taqairaro hia tekya hiariva vahiraro mwiva nai tiqaro, Kyai nte nrumbu ntantena vaakya qaqlira kyau nraamwunra vaisi mwia utaqi uro qaiqaa variankye, timwa kyero

<sup>25</sup> uro taqairaro nraamwu mwia ntupi kyero hiqama kye avuqavuma taiva vaharo

<sup>26</sup> vaana mwiva uro nai hena vaana 7 nramwu, mwia nraatara kyeta qora kyaiqa uti variahua, mwihua nyaanrama kyero sitero uro vaisi mwia utaqi variananrove. Vuni vaisi mwiva vaana kuaiqiavatama kyero variqaro mwiva uaqama viro varirave. Nraakiara mwiva vaana airi kyapata variqaro anoma kyero uaqama viro varirarama tuquo, tiro.

### *Qamwate okyarara tura*

<sup>27</sup> Iesusiva mwitaa tuvaro nraakye qora ntuaantuama vita varuraqitairo nraakye mpovanto vera kyero tiqaro, Qikye, i mwata kyero nraamwa mwi nraakyeva, mwiva mpogama kyero qamwateqaroma variho, tiro.

<sup>28</sup> Mwitaa tuvaro Iesusiva qaqao tiro, Kotira qua rieqata nrohiahua, mwihuama qamwateqata varivarave, tiro.

### *Nronra kyaiqa tiri tinraamwutaante tura*

(Matiu 12:38-42; Maaki 8:12)

<sup>29</sup> Iesusiva mwitaa tuvata nraakye qora airivanto mwia qua riarerata mwia vara ututu hi varuvaro Iesusiva mwihua timwa nyinro tiqaro, Mwaa entara varia nraakye qorahua anoma kye uaquia hi kyaiqara uti variqata Kotirara hia riaraiqata nrohi variarave. Mwihua nronra kyaiqa tinraamwu tairaqe taqeta tire qutaave qiae ti variarave. Hia nte mwihua suqaa ntene okyara nyaamwu tena nronra kyaiqa varaaninrave. Kotiva haaru nkyi haivaqara Ionaanra utu kyontema nivata mwitaa hiananrove. Mwianra nraahu rieqatama nkye nianra Kotiva mwia kyaahaqa hi varivave tivarave.

<sup>30</sup> Ionaava mwitaa mwitaa huvata Niniveqinaahua mwianra ntapihi kyeta tiqata, Kotiva mwia kyaahaqa hi variho, turave. Nte mwatani mwatatai nraaqiaravama varuquo. Nkye mwaa entara varia nraakye qorahua ni okyara ntapihhi riaate tina, nte Ionaava hinte hianinrave.

<sup>31</sup> Haaru nkyi haivaqava Soromoniva kyuqe vu nraato vahuvare mpo okyara mpo okyara taqe varuva varuvaro nraakye mpo vunyaava mwia qua riarerata nai vevara nyianrasairo nrumbu Soromoninra qua riorave. Mwi nraakyeva mwitaa hurara tiro, mwiva nraakiara ekyaara entaqaa variqaro nkyiqa qua vateqaro mwitaama qiananrove. Nte nyianrasaina Soromoninra qua riarerana quavarave. Nkye haaru varuvaro Soromoninra nraatara kyo vaisiva nkyi nraaqani varuvata nkye hia mwia qua riorave, qiananrove.

<sup>32</sup> Haaru Ionaava Kotira qua timwa nyuvata Niniveqinaahua uaquia hu aanranra qaqlira kyorave. Mwi mwatanaahua mwitaa hurara tita, mwihua nraakiara ekyaara entaqaa nkyiqa qua vatevarave. Mwihua mwitaama tivarave. Tire Ionaanra qua rieta uaquia hi aanranra qaqlira kyaavananrave. Nkye varuvaro Ionaanra nraatara kyo vaisiva Kotira qua nkyi timwa nyuvata nkye hia mwia qua riorave, tivarave.

*Vuvanto mwamwanta omwave tura*  
*(Matiu 5:15; 6:22-23)*

<sup>33</sup> Hia mpovanto omwa cupi kyero amaatainani vatairave. Mwiva hia tave vara kyero mwiaqaa ntumwaqu tairave. Nraakyе qoravanto vera ntehua ntapihikye taqaate tiro, mwiva omwa cupi kyero virira nyaamwuni vatairave.

<sup>34</sup> I vuvanto omwa votima kyero ite variho. I vuvanto kyuqema vahiraro i mwamwantavanto ntuvaahaananrove. I vuvanto uaqia hirera, i mwamwantavanto ekyaa enta hiraqi vahiananrove.

<sup>35</sup> Qio rauri variqara variante. I mwamwantaqi ntuvaahaani inraikyava hia vahiraro enta hiani inraikyava vahiankyorave.

<sup>36</sup> I mwamwantaqi ntuvaahaani inraikyava nraahu vahiraro hia enta hiani inraikyava mpoqivata vahirera, i mwamwanta ekyama omwa votima kyero kyuqema kyero itaananrove, tiro.

*Parisi vaisinramwuanra tura*  
*(Matiu 23:1-36; Maaki 12:38-40; Ruku 20:45-47)*

<sup>37</sup> Iesusiva mwitaa timwa kyero qua timwa nyi taiqa kyovaro Parisi vaisi mpovanto ni nraamwuqi nrinra kyara nraante tuvaro Iesusiva mwikyantiri uro mwia nraamwuqi variqaro kyara nranrenro mwatakyaa viro varura.

<sup>38</sup> Varuvaro Parisi vaisi mwiva taqovaro Iesusiva hia kyauqu hiqaraitiro, kyara nranrenra uti varuvaro mwiva nrihanrama viro airi nraato tuvaro

<sup>39</sup> Iesusiva nronravanto mwia timwa mwinro tiqaro, Nkye Parisi vaisinramwuvanto kaapuvata tanuvata mwaaqani nraahu hiqe variarave. Nkyi mwaatira utaqi mpuara varevavata, uaqia hi kyaiqara utivavata nraahuma vaiho.

<sup>40</sup> Nkye ueraqa hiahuate. Kotiva nkyi mwaaqani pahi ututaiva mwiva nkyi mwaatira utaqivata ututairave.

<sup>41</sup> Nkye mwaatira utaqi vahi inraikyara vehi vaisi kyaahaqamaqi vivaro nkyi mwamwantavanto qioma takyuqu viro vahiananrove.

<sup>42</sup> Nkye Parisi vaisinramwu nraakiara raupirima vira mwianra rieqanama nte nkyiara po tuqo. Nkye Kotira qua hini pata quaqia nraahu rieqatama nkye avuqavuma kyeta nanra inraikya aakyoqi tutara ntainra kyeta 9 nramwu nkyeta vareta kuaiqia Kotira mwi variarave. Nkye mwi quara pata quaqia nraahu rieqatama Kotira qua nronra qua vahira nkye hia rie variarave. Ntapihi kyeta ko ti okyararave, Kotirara mwutukya vahiani okyararave, nkye mwi quara qaqlira kyeta hia nronraqama kyeta riaarave. Nkye Kotira qua pata qua nraahu rieqatama mwia qua nronra quavata riaataara vahata hia riaarave.

<sup>43</sup> Nkye Parisi vaisinramwu nraakiara raupirima vira mwianra rieqanama nte nkyiara po tuqo. Nkye mwaanra nraamwuqi nronra vaisivanto varia taintaraqaara nraahu uti variarave. Nraakyе qoravanto nkyiara nronra vaisive timwa kyeta kyakyama kye qua mwantaate titi, nkye maaketiqi qumina qumina nrohi variarave.

<sup>44</sup> Nkye nraakiara raupirima vira mwianra rieqanama nte nkyiara po tuqo. Nkye nanra inraikya votima kyetave variavo? Vaisi quntamwa taaraqa hia taqaraitita, nraakyе qoravanto mwiaqaa nrohiqata qumina mwataqaave qiao. Nkye mwitaama kyeta variavata nraakyе qoravanto nkyi taqeqata hia nkyi uaqia hi kyaiqara taqaraitita, nkyiara vaisi kyuqe hiahuate ti variavo.

<sup>45</sup> Iesusiva Parisi vaisiara mwitaa tuvaro mwaanra okyara ti varu vaisiva mpovanto qaqlao tiro, Mwaanra ti variara vaisio, e Parisi vaisiara tiqarama tiriavaravata uaqia hi quara qiaro, tiro.

<sup>46</sup> Mwitaa tuvaro Iesusiva mwiaavata timwa mwinro tiqaro, Nkye mwaanra okyara ti variahua, nkyevata nraakiara raupirima vira mwianra rieqanama nte nkyiara po tuqo. Nkye qumina nraakyе qorara ekyaa mwi quara mwi quara riemwaqi quate ti variavata mwihua nkye muaanra ntai quara mwihuaqaa vataara toqaamwu tu

kyeta vara qu vare variavata nkye hia nkyeta kyauqu mpoqiaavata tutu kyeta mwihua kyaahaqa hi variarave.

<sup>47</sup> Nkye nraakiara raupiri hira mwianra rieqanama nte nkyiara po tuqo. Nkyi haivaqahua Kotira qua ti varu vaisihua poropetinramwu rukyeta quntamwa taaraqaa nkye ori ntamwa kyeta mwunruqa hi variarave.

<sup>48</sup> Nkye mwitaa hiqata nkyeta haivaqahuara kyuqe hiavo qiarave. Nkyi haivaqahua Kotira qua tu vaisihua poropetinramwu rukyorave. Mwihua mwitaa hiavata qaiqaa nkye variqatama mwihua quntamwa taaraqaa mwunruqa hi variarave.

<sup>49</sup> Nkye mwitaa hiarara tiro, Kotiva ekyaa inraikya ntapihi kyaiva tiqaro, Ni qua ti varihua poropeti vaisinramwu sitaarita vivata mwihua mwinramwuhua mponramwu rukyeta mponramwu sataqita viqata uaqama nyatevarave, tirave.

<sup>50</sup> Mwaa mwatara ututo entaraqaatai Kotira poropeti vaisi ruqi nrata mate mwaa rua quava, ekyaa mwi quava nkyi mate mwaa varihuaqaama vahiananrove.

<sup>51</sup> Tohara kyero Everira rukyovata mwiaqaataita poropeti vaisi ruqita vita uro Sekaraiaaravata rukyorave. Sekaraiaara rukyarera hita qia munra quaninra quaro taintara vahuvaro Kotira nraamwu kyotata vahuvaro mwia utana mwia rukyovaro mwia nraanre raururave. Qio nai poropeti ekyaa rukyora kyaara Kotiva mwaa entara vari nraakye qorahuaqaa qua vataananrove.

<sup>52</sup> Nkye mwaanra okyara ti varia vaisihua, nkye nraakiara raupiri hira mwianra rieqanama nte nkyiara po tuqo. Kotira okyara quavanto vahata nkye kiqa tutetama hia qesa mwia qatua kye vieteta mwi okyarara taqaavo. Nkye nkyeta qesa mwia hia qatua kyeta viraitita, nkye mpohuavata virera hiavata mwihua antue variarave, tiro.

<sup>53</sup> Iesusiva mwitaa timwa kyero nraamwuqitairo veva ntovata mwaanra okyara tuhuavata, Parisi vaisinramwuvata, raraqa tovata Iesusirara uaqia hi quarama tiho timwa kyeta nrivaqe tire qaiqaavata riaararo uaqia hi quara tirera, koqi vitaqita vataare tita.

<sup>54</sup> Mwitaa timwa kyeta mwihua Iesusiva api qua qiarive tita, mpo qua mpo qua Iesusira kyapara hora.

## 12

*Parisi vaisi unra kyaiqara rauriqata variate, tura  
(Matiu 10:26-27)*

<sup>1</sup> Mwitaa huvata airi tauseni nraakye qoravanto Iesusira taqarerata nrumu variqata nai rataakye nai rataakye hi variqata nai kyuqu nai kyuqu ntatami varuvaro Iesusiva nai nraaqiaranramwu nraante qua timwa nyinro tiqaro, Qamaa pataqia taupatairaqaatairo ekyaa viro ntera vintema kyeta Parisi vaisivanto nkyivata vara uaqama kyevorave. Mwihua kyuqe kyaika varauro timwa kyeqata vaisi suqaa kumwaanri hi variararama tuqo. Nkye mwihua nraantantevorave.

<sup>2</sup> Mpowanto taqaankyo tiro mate ntumwaqu taani inraikyara, nraakiara vara qosata kyaananrove. Mate uqeta taani inraikyara nraakiara qovarama kyairaro qoqaama vahiananrove.

<sup>3</sup> Nkye kyokiraqi variqata ti quara nraakiara qaata taaninraqaama rievarave. Nkye qesa tita teta mwaanrinra nraamwuqi variqata tirema kyeta qua tira, nraakiara mwi quara qesaqaatairo aakyara ntamwa kyero qiananrove.

*Kotirara nraahu aatu hiqata variate tura  
(Matiu 10:28-31)*

<sup>4</sup> Ni mwatanaa tuaavo, nte qianinra riaate. Nkyi nyamwanta nraahu rukyehua hia mwihua nraatu aatu hiate. Mwihua nkyi rukyeta hia nkyi mwanraquravata qio rukyevorave.

<sup>5</sup> Nkye tara nraatuve aatu hiqata varivarave? Kyai nte nkyi timwa nyiankye. Nkye Kotira nraatu aatu hiqata variate. Mwiva kepukyavanto variqaro vaisi rukyero mwiaqaatairo qioma mwia qutu vihua vinani tuto kyaarivama variho. Eo, nte nkyiarama tuqo, Nkye Kotira nraatu aatu hiqatama variate.

<sup>6</sup> Qutaa vaisivanto munima taararu kyeqaro pata nyaamwa hini kyauquru varairave? Nkye riaate. Kotiva pata nyaamwa mpoqiaru hia taunru kyaraitiro, mwiaqaavata kyuqema kyero ntaqikyi varirave.

<sup>7</sup> Kotiva nkyiqa ntaqikyiqaroma nkyi okyara, ekyaa taqe variva, mwiva nkyi qiata kyaahivata ekyaa kyaara ntumwa tairave. Nkye qumina nyaamwa nraatara kyaarave. Kotiva qumina nyaamwaqaavata ntaqikyivara tiro, nkyiqaavata nritarero kyuqema kyero ntaqikyi varirara tita, hia aatu hiqata variqita quate.

### *Iesusira nrutu timwa qovara hirara tura*

(*Matiu 10:19-20, 32-33, 12:32*)

<sup>8</sup> Nte qianinra riaante. Vaisi mpovanto nraakye qora suqaa variro timwa qovarama kyero nianra tiqaro, Nte mwia nraaqiarama varuqo, tirera, nte mwatani mwatatai nraaqiarava variqana nraakiara ntevata nyaamwunyaahua suqaa variqana timwa qovarama kyena tiqana, Nai mwi vaisivama ni nraaqiarama variho, qianinrave.

<sup>9</sup> Mpo vaisivanto nraakye qora suqaa variro tiqaro, Hia nte Iesusira nraaqiarama varuqo, tirera, nte mwatani mwatatai nraaqiarava variqanama nraakiara ntevata nyaamwunyaahua suqaa mwi vaisirara tiqana, Mwiva hia ni nraaqiarama variho, qianinrave.

<sup>10</sup> Vaisi mpovanto ni mwatani mwatatai nraaqiarara qora qua tirera, Kotiva mwi vaisira qora qua qioma nruka mwataananrove. Vaisi mpovanto Kotira mwanraqurara qora qua tirera, Kotiva hia mwia qora qua nruka mwataananrove.

<sup>11</sup> Nraakiara ni kyaara nkyi rupaqita uro mwaanra nraamwuqive, kamaninra vuqaave, vunyaa vaisi suqaave, uro kyaivata mwi entara hia aatu hiqatama nanra quave qiananrave qiate.

<sup>12</sup> Mwi entara Kotira mwanraquravanto nkyi kyaahaqa hiqaro mwitaa mwitaa qiate tirata nkye mwi quara timwa nyiate, tiro.

### *Airi inraikya vato vaisiraqaa qua ntumwa kyero tura*

<sup>13</sup> Nraakye qora ntuvantua hurqaatairo vaisi mpovanto Iesusirara tiqaro, Mwaanra ti variara vaisio, ni kova qutu virero hiro nianravata ni pakyaararavata nai hi inraikyarara ntainra kye varaate tirave. Mwitaa tiharo ni pakyaava nai nraahu varero hia nivata ntainra kyero mpiho. Evata tiraro mwiva nivata ntainra kyero mpiarive, tiro.

<sup>14</sup> Mwitaa tuvaro Iesusiva mwia timwa mwinro tiqaro, Qaqao, mwaa vaisivao, Tava ni nronraqama kyaihanave nte mwi quara mwi quara qio avuqavu hianinrave? tiro.

<sup>15</sup> Mwitaa timwa kyero Iesusiva ekyaa nraakye qora timwa nyinro tiqaro, Nkye rauriqata variate. Nkye airi inraikyave airi munimave varera mwianra nraahu nronraqama kyeta rieqata variqi vivorave. Nkye tiqata, Airi inraikya vateqata qioma variqi quananrave, tivorave. Hia airi inraikyavanto nkyi kyaahaqa hirata nkye kyuqema kyeta variqi vivarave, tiro.

<sup>16</sup> Iesusiva mwitaa timwa kyero mwiva mpo quaqaa ntumwa kyero timwa nyinro tiqaro, Vaisi mpovanto airi inraikya vatova kyara vara tu kyero vatovaro inraanrama vahuvaro vaniqiro vatero

<sup>17</sup> nai timwa kyero riero tiqaro, Nte mwaa kyarara ta nraamwunraqive vataaninrave? Ekyaa ni nraamwuqi kyaravanto piqama viho, tiro.

<sup>18</sup> Mwitaa timwa kyero mwiva tiqaro, Kyaiqe nte ekyaa nraamwu ntapairi kyena, qaiqaa nraamwu nronra airi hoqa kyena mwipi kyaravata hini mpo inraikyavata vataankye.

<sup>19</sup> Nte mwi kyaiqara vara taiqa kyena mwitaama qianinrave, Nte kyuqemama varuqo. Airi kyara airi inraikya vaihana nte airi ihi qati variqi viqana mwaa kyararavata nramanrivata nramwaqi viqana kyuqema kyena varianinrave, tiro.

<sup>20</sup> Mwi vaisiva mwitaa tuvaro Kotiva mwia timwa mwinro tiqaro, Hia i vu nraatovata vahivave. Mate entaqi e qutu vinanrave. E qutu viraro e ninive tina inraikyara mpovanto varaananrove turave, tiro.

<sup>21</sup> Iesusiva mwitaa timwa nyinro qua taiqa kyero mwiva tiqaro, Vaisivanto mpo inraikya mpo inraikya ntuvaantua hianinranra nraahu riemwaqiro vi variraro Kotiva mwi vaisirara tiqaro, E vatera inraikyava qumina inraikyave. Nte taquaqara e vehi vaisi nraahuma variaro. E qumina qutu vinanrave, qiananrove, tiro. Iesusiva mwitaa turama.

*Hia mpo inraikya mpo inraikyara ua hiate tura  
(Matiu 6:25-34)*

<sup>22</sup> Mwitaa timwa kyero Iesusiva nai nraaqiaranramwuanra tiqaro, Mwi quara rieqanama nte nkyiara mwitaama tuqo, Nkye qati variqi virarave, nkye kyara nrenranrave, nkye tuavaaqa utirarave, hia mwi inraikyara mwi inraikyarara airi nraato tuate.

<sup>23</sup> Nkye qati variqi viva vahirero tauraanaa inraikya vaharo nkye kyara nreva mwiva vahirero nraakiaraanaa inraikyama vaiho. Nkyi mwamwantavanto tauraanaa inraikya vaharo nkye tuavaaqa ututeva nraakiaraanaa inraikyama vaiho.

<sup>24</sup> Nkye nyaamwanra nraato tuate. Nyaamwavanto hia kyara vara tu kyero van-tuqiro nai nraamwuqi vate varirave. Nyaamwavanto variavaro Kotiva mwihuaqaa ntaqikyiqiro viqaro kyara nyinrave. Qio nkye nraakye qoravanto nyaamwa nraatara kyaahuara tiro, Kotiva nkyiqa kyuqema kyero ntaqikyiananrove.

<sup>25</sup> Nkyiqitairo tavave nte mwata mwaqa mpuahaama variantye timwa kyero mwianra airi nraato tiqaro mpo entanramwu tomaqa kyaananrove? Hiama qio mpovanto mwitaa hiananrove.

<sup>26</sup> Nkye pata kyaiqa mwia hia qio vare variahua tita, nkye nanraqamave mpo inraikya mpo inraikyara airi nraato ti variavo?

<sup>27</sup> Uakukyaqi qupiqai maunranra rieqata variate. Mwi maunrava hia kyaanta huvu kyero nai tuapakaara hutairave. Haaru vunyaa vaisivanto Soromoniva kyuqema kyero mwunruqama torave. Maunra pairavanto iteqaro Soromoniva mwunruqama toravata nraatara kyairarama tuqo.

<sup>28</sup> Kotiva mwivama uakukyaqi vahi maunranra mwunruqama mwatairave. Mwi maunrava mate vahirata hura qia qura kyaivaro itamwa kyaananrove. Qio Kotiva qumina uakukyaqi pataqia vahi maunranravata mwunruqama mwataivara tiro, mwiva nkyi nraakye qoraqaa ntaqikyiqaro mwiva hiave nkyivata tuavaaqa utu nyataananrove? Qikye, nkye Kotirara tiqata, Mwiva hiama qio tiri kyaahaqa hiananrove, timwa kyeqata hia mwianra kepukyaqama kye rie variavo.

<sup>29</sup> Kotiva nkyi kyaahaqama nyate varirara tita, nkye hia nronra nraato tiqata, Nanra kyarave nraananrave? Nanra nramanrive nraananrave? timwaqi quate.

<sup>30</sup> Mwatani variahua hia Kotirara riaa nraakye qorhua mwihua mwitaamaqi viqata mwi inraikyara mwi inraikyara puua hirerata uti variarave. Nkye hia mwihua hiante hiate. Nkyi sova nkye ekyaa mwi inraikyara varerara ntapihi kyeroma variho.

<sup>31</sup> Kotiva nkyiqa ntaqikyianra nkye mwianra nraante nronraqama kyeta riemwaqiqi viqata Kotira kyaiqa vare varivaro Kotiva kyara mwiavata, tuavaaqa mwiavata, nkyi nyiananrove, tiro.

*Nyaamwuni kyoqaa ntuvantua hirara tura*  
*(Matiu 6:19-21)*

<sup>32</sup> Iesusiva mwitaa timwa kyero qaiqaa tiqaro, Nkyenramwu varirerata nkye ni sipisipinramwu variavo. Hia aatu hiate. Kotiva nkyi sova nkyiara qamwateqaro varivara tiro, mwiva nraakiara nkyiqa ntaqikyi varirata nkye mwiva ntaqikyiani mwatukyaraqi varivarave.

<sup>33</sup> Nkyeta vate inraikyara mpohua munimanra nyivata mwihua vareta nkyi munima nyivata nkye uro mwi munimanra vehi nraakye qora nyiate. Hia munima pausi mwatani taiqaaninraqi nkyeta kyoqaa vataate. Nkye munima pausi nyaamwuni ekyaa enta qati vahianinraqi nkyeta kyoqaa vataate. Mwini vate inraikyara hia mpuara varairaro hia uapaa tovesivanto nraananrove.

<sup>34</sup> Nkye mwaa mwataraqaa kyoqaa ntuvantuamaqi vivera, nkye mwaa mwataraqaa vahiani inraikyarara nraahu riemwaqi vivarave. Nkyi kyoqaa nyaamwuni ntuvantuama viro vahirera, nkye nyaamwunianra nraahu nronraqama kyeta riemwaqi vivarave.

*Teramate taqe variqata variate tura*  
*(Matiu 24:42-44)*

<sup>35</sup> Nkye sivita tuavaaqa tuqara kye ututeta omwa cupi kyeta terama teqata variate.

<sup>36</sup> Nkye kyaiqa vaisi mwaanramwuhua hiante hiate. Kyaiqa vaisinramwuvanto variavaro mwihua nronra vaisivanto nraakye ntumwuanani viva urontante nrumu qesa ntukuakua hiqaro taqaihatama mwia kyaiqa vaisinramwuvanto qamwanrama qesa qatua mwataarave. Nkyevata qesa qatuararerata terama teqata variate.

<sup>37</sup> Mwihua nronra vaisivanto nri ntero taqairata mwia kyaiqa vaisinramwuvanto hia vaite variraitita, qati sivita teramate varihua mwihua qamwataate. Mwihua mwitaama varivaro mwihua nronra vaisivanto mwihua kyara nyiani tuavaaqaara vara kyuqinra kyero ututero nai kyaiqa vaisiara tiqaro, Mwatakyaa vi varivaqe nte nkyi kyara nyiankye, timwa kyero kyara nyiananrove.

<sup>38</sup> Enta mwutukyaqive, kokoraara nruqua qianinraqaave, nronravanto uro ntantero nrumu taqairata mwia kyaiqa vaisinramwuvanto hia vaite variraitita, qati sivita teramate varihua, mwihua qamwateqata variate.

<sup>39</sup> Qio nkye mwaa quara rieqata variate. Nraamwu qova variqaro mpuara vaisivanto mwi entarama nriananrove timwa kyero mwiva nai nraamwuqaa ntaqikyi varitirio, mpuara vaisivanto hiama qio mwia nraamwuqi vera ntero mpuara vararaitirio.

<sup>40</sup> Mwi quara rieqatama nkyevata teramate variqata ni pekya variqi quate. Nkye ni mwatani mwatatai nraaqiarara hiama tumuananrove ti entara, mwi entaraqaa nte tumuaninrave, tiro. Iesusiva turama.

*Kyaiqa vaisi taaratanaqaa ntumwa kyero tura*  
*(Matiu 24:45-51)*

<sup>41</sup> Iesusiva mwitaa tuvaro Pitaava tiqaro, Nronrao, tiriara nraahu rieqarave mwi quaraqaa ntumwa kyera timwa timwianro? Ekyaa huara rieqarave mwi quara tira hiaro? tiro.

<sup>42</sup> Tuvaro Iesusiva tiqaro, Kyaiqa vaisi kyuqeva nai nronra vaisiara rieqaro kyuqema kyero kyaiqa vare vari vaisiva, mwiva ta vaisira votima kyero variananrove? Mwiva kyaiqa vaisi mwataa hiarivama variananrove. Mwia nronravanto nyianrani virera hiro vaisi mwia nronraqama kyero tiqaro, Ema kyaiqa vaisi hini mwihuaqaa ntaqikyiqarama mwi entaraqaa mwi entaraqaa kyara tukyama kyera nyante, timwa kyero

<sup>43</sup> quariva uro nyianra mponani nrohiro nrumu taqairaro mwia kyaiqa vaisivanto mwiva tintema kyero kyaiqa vare varirera, mwiva mpoqama kyero qamwataananrove.

<sup>44</sup> Mwianra rieqana nte nkyi timwa nyuqo, Mwia nronra vaisivanto mwi vaisirara tiqaro, Nte qaiqaa i nronraqama kyaarira e ekyaa nte hu inraikyaraqaa ntaqinkyinrave, qiananrove.

<sup>45</sup> Mwia kyaiqa vaisivanto qaqlira kyero hia mwitaa hiraitiro, nai riemwa kyero tiqaro, Qaqao, ni nronravanto hiama qamwanrama nrarianrove, timwa kyero mwiaqaatairo nai henahua kyaiqa nraakyae qora mwihua ntuqutu kyero vatero kyara airi nramwaqiro vi varirera,

<sup>46</sup> mpo enta mwia nronravanto hiama mwi entaraqaa nrarianrove qiani entaraqaa uro ntantero nrumu mwia kyaiqa taqero nai kyaiqa vaisi mwia ntuqutu kyero vatero mwia titero tiqaro, E ni qua hia riaahua varianani quante, qiananrove.

<sup>47</sup> Kyaiqa vaisi mpovanto variraro mwia nronravanto mwi kyaiqara varaante tiraro mwi quara riero qaqlira kyero hia mwi kyaiqara vararero tera hiraitiro, qati variraro mwia kyaara mwia nronravanto mwia nronraqama kyero kyaamwuqo ntuqutu mwataananrove.

<sup>48</sup> Kyaiqa vaisi mpovanto variqaro mwiva hia nai nronra vaisi kyakya hira ntapi-hiraitiro, mwivavata uaqia hi kyaiqara uti variraro mwia kyaara mwia nronravanto mwia pataqia ntuquutananrove.

Airi inraikya varehua varivaro Kotiva mwihua airi inraikyara nina mpiate qiananrove. Airi inraikya mpochiavata varaari vaisiva variraro Kotiva mwianra airi inraikya mpochiavata nina mpiante qiananrove. Kotiva vaisi mpo pata kyaiqa nraahu mwianinra mwianra tiqaro, E mwiqiara nraahu varairaqe nte qiove qianinrave, qiananrove. Kotiva vaisi mpo nronra kyaiqa mwianinra mwianra tiqaro, E mwia nraahu varairaqe nte qiove qianinrave, qiananrove.

### *Nraakyae qora ntainra kyarerera tumuvave tura*

(Matiu 10:34-36)

<sup>49</sup> Nte qia tuta kyaariro itaarive tina, mwaa mwataraqaa tumuvave. Qikye, mwi qiaavaa kyaarira itaarive tina, mwaa mwataraqaa tumuvave.

<sup>50</sup> Nte nramanri mpo varaaninra hiama varauqo. Nte mate mwia vekya varuqaro ni anoma kyero muaanra ntaihana varuqo. Nte mwitaama kye variqi vina mwiaqaatai mwi nramanrinra varena nte qio varianinrave. (Jesusiva mwi quara mwitaa tiqaro mpo quaqaa ntumwa kyero nai qoririma kyeta ru kyaivaro qutu quaninranra tura.)

<sup>51</sup> Nkye nianra tiqatama, Nraakyae qoravanto mwaateraqama vita variate tiro, mwiva tuminrave, qiarave? Qaqao, hia nte mwitaama variate tina, tumuvave. Nraakyae qoravanto ntainra vita variate tina, nte tumuvave.

<sup>52</sup> Mwaa entaraqataita hini kyauquruvanto kuaa nraamwuqi variahua ntainra vita taarampoqavanto nramwutaaqa hiqata taara mwitanahua vatama kyeta ntaqivarave.

<sup>53</sup> Qova nai mwaaquntiriro ntaqiraro mwaaquvanto nai qokyantiri ntaquananrove. Nrova nai nraamwunrantiri ntaqiraro nraamwunravanto nai nrokyantiri ntaquananrove. Nraakyae mpovanto nai nraaqutuntiri ntaqiraro mwiva naivata ntaquananrove, tiro.

### *Mate mwaa entara okyara hia vitama kye taqaavo tura*

(Matiu 16:2-3)

<sup>54</sup> Jesusiva mwitaa timwa kyero nraakyae qora ntuvaantuama vuhsa timwa nyinro tiqaro, Nkye taqaavararo tonamwuvanto vutusairo nriqanro kyokira rutaihata nkye tiqata, Vati ntirerove, qiaavararo vati ntirave.

<sup>55</sup> Nkye taqaavararo toqa vaururuvanto nrihata nkye tiqata qio vuhaananrove qiaavararo vuhairave.

<sup>56</sup> Qikye, nkye unraqanraama kyeqata kyuqe kyaiqa vare variahuate. Nkye mwi inraikyara mwi inraikyaraqaa qio vitama kye taqeta, nanraqamave nkye mwaa entara qovara hiani okyarara hia vitama kyeta taqaavo?

*I ko tirera hirara vaakya avuqavuma kyaante  
(Matiu 5:25-26)*

<sup>57</sup> Nkye nraato tu kyeta kyuqe kyaiqa nraahu varaare qiaataara vaihata nkye nataamaqive hia mwi kyaiqara varaavo?

<sup>58</sup> Mpovanto iqaa qua vatero ko nraamwuqi i vita varero virero hirera, e mwikyan-tiri aanrani viqarama mwi quara avuqavu hiante. Mwiva i vita varero ko riaani vaisiva hinani uro kyairaro mwiva i vita porisi mwinranro porisivanto i karavuqi uro kyaankyorave.

<sup>59</sup> Nte qianinra riaante. E hia karavuqitaira qamwanrama taiqenanrave. Ekyaa munima hia nai mwinraitira, hia qio vinanrave, tiro. Iesusiva turama.

## 13

*Uaqia hi aanranra qaqlira kyaate tura*

<sup>1</sup> Mwi entara vaisi mponramwuvanto nri nteta Iesusira timwa mwita tiqata, Karirinyaa vaisinramwuvanto quara ru kyeta Kotira qamwata mwataare tuvaro kamaniva mpo, mwia nrutu Paireativa nri ntero mwi vaisinramwuhua ru kyovaro mwihua nraanrevanto quara vaakya rukyora mwia nraanre vatama kyero vhurave, titi.

<sup>2</sup> Mwitaa tuvaro Iesusiva tiqaro, Karirinyaa vaisinramwu mwitaama kye qutu vu-rara tita, nkye nataamave riaavo? Nkye tiqata, Mwihua qora kyaiqvanto Karirinyaa vaisi hini mwihua qora kyaiqa nraatara kyaihove, qiavo?

<sup>3</sup> Hiave. Nte qianinra riaate. Nkyevata hia qora aanra qaqlira kyaivera, nkyevata mwinramwuhua qutu vuntema kyetama qutu vivarave.

<sup>4</sup> Haaru Siroamini ori nraamwu mpuahaa nraamwuvanto ntuvuraa viro tumu ntiro vaisi 18 nramwu rukyorave. Mwi vaisinramwuhua mpo? Nkye mwin-ramwuhara nanra quave qiavo? Nkye tiqata mwinramwuhua qora kyaiqvanto Ierusaremyaahua qora kyaiqa nraatara kyovaro mwia kyaara nraamwu mwiva ntuvuraa viro mwihua ntuqutu taiqa kyorave. Nkye mwitaamave qiavo?

<sup>5</sup> Qaqao, hiave. Nte qianinra riaate. Nkyevata hia qora aanra qaqlira kyaivera, nkyevata mwinramwuhua votima kyetama qutu vivarave, tiro.

*Qaampuakya voti hora fikiqaa ntumwa kyero tura*

<sup>6</sup> Iesusiva mwitaa timwa kyero mwiva mpo quaqaa ntumwa kyero mwihua timwa nyinro tiqaro, Vaisi mpovanto nai utaqi fiki kyatariva tamwa riaaninra vekya varuqaro hia tamwa riairave. Mwi vaisiva vara tutero vari kyero mpo enta kyai uro mwia tamwa hiq kye nraankye timwa kyero uro taqovaro hia tamwa riorave.

<sup>7</sup> Hia riovoro nai kyaiqaqaa ntaqikyi varu vaisirara tiqaro, Taqaante. Nte taarampo ihiara vina nrina hiqana mwaa kyatariva tamwa riaaninra vekya varuqaro hia tamwa riairave. E mwaa teqa kyera qaqlira kyaante. Mwi kyatariva qati vahiqaro kyuqe mwata taiqa kyaankyorave, tuvaro

<sup>8</sup> mwia kyaiqa vaisivanto qaqao tiro. Kuaa ihiara mwia qati kyairaqe nte mwia okyaraqi onti quvu kyena tapitaani mwatara varaqina mwipi vatena quvu ntamwa taariro tamwa riaarive.

<sup>9</sup> Mpo ihiqi taqairaro mwi kyatariva tamwa riairera, e mwia qati kyaante. Hia tamwa riairera, e qiomteqa kyera qaqlira kyeninanrave turave, tiro. Iesusiva mwi quara turama.

*Iesusiva mwaanraqaa mwoqa ntavako nraakyera kyuqema kyora*

<sup>10</sup> Mpo enta mwaanraqaa Iesusiva mwaanra nraamwu mpoqi qua timwa nyi varuvaro

<sup>11</sup> nraakyae mpovanto mwipi varura. Vaanavanto nraakyae mwiavata varuva mwia nriqa vu inraikyara mwuvaro nraakyae mwiva 18 ihiara nriqa vuvaro variqiro vura.

Mwia mwoqavanto ntavaka vuvaro mwiva hia ntatuta variraitiro, kakataama viro nraahu varura.

<sup>12</sup> Iesusiva mwia taqero mwia nraanrama kyero tiqaro, Mwaa nraakyevao, i nriqa viva taiqama viho,

<sup>13</sup> timwa kyero nai kyauqu mwiaqaa viti vatovaro nraakye mwiva qamwanrama kyero mwaamwianra viro variqaro Kotira nrutu tuaahereqaro varura.

<sup>14</sup> Kotira nrutu tuaahere varuvaro Iesusiva mwaanra entaqaa mwi nraakyera kyuqema kyorara tiro, mwia kyaara mwaanra nraamwuqaa ntaqikyi varu vaisira raraqa tovaro nraakye qorara tiqaro, Kyaiqa enta 6 nramwuma vaiho. Mpowanto nkyi nyamwanta kyuqema kyaarive tita, mwi entaraqaa nraahuma nriate. Hia mwaanra entaqaa nkyi mwamwanta kyuqema kyaarive tita nriate, tiro.

<sup>15</sup> Vaisi mwiva mwitaa tuvaro nronravanto Iesusiva nai timwa mwinro tiqaro, Nkye unraqama kyeqata kyuqe kyaiqa vare variahuave. Nkye ekyaa mwihua mwaanra entaqaa nkyeta purimakauve, ntonkive, nraamwuqitai ntatu kyeta sitaqita tumu nramanri nyi variarave.

<sup>16</sup> Nraakye mwaava nkyi haivaqara Evarahaamunra nraisivanto variharo Saataaniva 18 ihiara mwi nraakyera rupa tairave. Qioma mwaanra entaqaa kyaahaqa hiqana huvantu kyaaninrave, tiro.

<sup>17</sup> Iesusiva mwitaa tuvata mwia nramwutaahua mwi quara rieta kyaurita varuvata qumina nraakye qora mwihua Iesusiva kyaiqa varorara rieqata Iesusira qamwata mwatora.

### *Maasiteti uruqaa ntumwa kyero tura*

(Matiu 13:31-32; Maaki 4:30-32)

<sup>18</sup> Iesusiva tiqaro, Kotiva ntaqikyiariva nanra inraikya votima kyero vahiro iho? Nkye mwianra ntapihi kyeta riaate tina, nte nanra inraikyaqaa ntumwa kyenave qianinrave?

<sup>19</sup> Qio nte maasiteti uruqaa ntumwa kyena tirerave. Vaisivanto maasiteti uru aakyoqi isa taiharo mwia uru mata mwipiava ntukohiro qupiqero kyatari nronra vahata nyaamwavanto kyauqu kyaara mwipi nrumu vari vaite hiarave, tiro.

### *Mpereti nrakyo tairaqaa ntumwa kyero tura*

(Matiu 13:33)

<sup>20</sup> Mwitaa timwa kyero Iesusiva qaiqaa tiro, Kotiva ntaqikyiariva nanra inraikya votima kyero vahiro iho?

<sup>21</sup> Mwiva taupataira votima kyero vahiro. Nraakyevanto mpereti utarera hiro parauua vara kyero mwiva nrakyo taarive timwa kyero, taupataira vara kyero paraua vatama kyero tuqasaa kyaiharo taupataiva ekyaa viro nrinro hiro mpereti uqenra kyaiharo nrakyo tairave, tiro.

### *Qesa patara tura*

(Matiu 7:13-14, 21-23)

<sup>22</sup> Iesusiva mwitaa timwa kyero Ierusareminianra viqaro mwatukya nronraqivata, pataqivata, kyuqe qua mwakyaakya timwa nyinro.

<sup>23</sup> Mwitaamaqiro vuvaro vaisi mpovanto tiqaro, Nronrao, nraakiara Kotiva tiriqitairo pataqiatanave tivitaananrove? tiro. Mwitaa tuvaro Iesusiva mwihua timwa nyinro tiqaro,

<sup>24</sup> Nyaamwunianra quava qesa pataqiave. Nkye mwukyaari mwata kyeta qesa mwina quate. Nte nkyi qutaa timwa nyuqo. Nraakye qora airivanto quare tiravata hia qio vivarave.

<sup>25</sup> Nraamwu qova qesa tita tairata nkye mwaatani varivorave. Nkye mwaatani varita qesa ntuqutita tiqata, Nronrao, qesa qatua timwa taante, tivarо mwiva, Qaqao nkye tainyaahuave. Nte hia nkyi taqauhuave, qiananrove.

<sup>26</sup> Mwiva mwitaa tirata nkye tiqata, Qaqao, tire ivatama kyeta kyara nraunruhuave. E tiri mwatuukyaqi variqara qua timwa timwianruhuave, tivaro mwiva qaiqaa tiqaro,

<sup>27</sup> Nkye tainyaahuave? Nkye uaquia hi kyaiqara uti variahuave. Hiante mwaisaita quatem, qiananrove, tiro.

<sup>28</sup> Iesusiva mwitaa timwa kyero tiqaro, Nkye nraakiara taqaivata nkyi haivaqahua Evarahaamuvavata, Aisaakivavata Iaikopuvavata, ekyaa poropeti vaisinramwuvata Kotira mwatuukyaqi varivata nkye mwaaqani varita ntateqata nkyeta aanrai teti nreqata varivarave.

<sup>29</sup> Nraakiara huari vu nri ntainanyaahuave, huari vu vinanyaahuave, mwaa hini tokyanyaahuave, vitira hini tokyanyaahuave, mwihua nrita ntuvantua hita Kotira mwatuukyaqi kyara nrevarave.

<sup>30</sup> Mate mwoqani varihua nritareta vunima varivarave. Mate vuni varihua tumitareta mwoqanima varivarave, tiro.

### *Iesusiva Ierusaremiqinaahuara mpo kye tura*

(Matiu 23:37-39)

<sup>31</sup> Iesusiva mwitaa tuvata Parisi vaisinramwu nri nteta Iesusirara tiqata, Sivira nritarera mpo mwatuukyani quante. Herotiva vunyaa vaisivanto i ru kyarerero uti variho. E mwaini variraro mwiva i ru kyaankyorave, tita.

<sup>32</sup> Mwihua mwitaa tuvaro Iesusiva timwa nyinro tiqaro, Nkye uro qaakyau vairi mwia timwa mwiate. Nte matevata huravata vaana siteqana nraakye qora kyuqema nyatarerave. Mwitaamaqi vina mpore taarampo enta mwiqiaraqaa ntena kyaiqa taiqa kyarerave. Nkye mwia mwitaama timwa mwiate.

<sup>33</sup> Nte matevata huravata mporavata Ierusaremini virerave. Hia qumina mwataqaa poropeti vaisi ru kyevarave. Ierusareminima ru kyevarave.

<sup>34</sup> Po, Ierusaremiqinaa nraakye qora tuaavo. Po, Ierusaremiqinaa nraakye qora tuaavo. Nkye Kotira poropeti rukyaahuave. Kotiva titai vaisihua variavata nkye ori pati kyeta mwihua ntumqu kyaahuave. Kokoraaravanto nai nraatiqaa nraaokya iri kyero ntumwaqu taintema kyena nte qaiqaavata qaiqaavata nkyiara po timwa kyena nkyiqa ntaqikyirera huqata nkye ni qoririma mataavo.

<sup>35</sup> Mwia kyaara Kotiva nkyi qaqlira kyairaro nkyi mwatuukyaqi hia vaisivata vari-varo qumina mwata nraahuma vahiananrove. Nte qianinra riaate. Nkye mwaa entaraqaataita hia ni taqaraitita, variqi vivage nte qaiqaa tumu variarita nkye mwi entara ni ntapihi kyeta taqeqlata nianra tiqata, Kotiva titai vaisiva tumiho. Mwia kyuqema mwataare tivarave, tiro. Iesusiva mwitaa turama.

## 14

### *Kyuqu kyauqu kyoto vaisira kyuqema kyora*

<sup>1</sup> Mpo enta mwaanraqaa Iesusiva Parisi mwihua nronra vaisi nraamwuqi kyara nranrenro vuvata mwipi varuhua mwiaqaa vu vate varura.

<sup>2</sup> Mwitaa huvaro Iesusira tataaqa vaisi mpo mwia kyuqu kyauqu kyota vuva varuvaro Iesusiva mwi vaisira taqero

<sup>3</sup> mwaanra okyara tuhuavata, Parisivata, kyapara hiro tiqaro, Tire mwaanraqaa vaisi kyaahaqa hiqata mwia mwamwanta kyuqema mwataarera, tire tetu mwaanra qua nteqave kyaananrave, hiave nteqave kyaananrave? Nkye tivage riaankye, tiro.

<sup>4</sup> Iesusiva mwitaa tuvata mwihua hia qua mpoqiaavata tuvaro Iesusiva vaisi mwia vita kyero mwia mwamwanta kyuqema kyero titovaro vura.

<sup>5</sup> Vuvaro Iesusiva mwipi varuhuara tiqaro, Nkyiqitairo mwia mwaaquvantove, mwia kauvantove, mwata quvu teraqi ntumwa virata nkye hiave mwi entaraqaa mwia ntanrau mwaanri kyevarave? tiro.

<sup>6</sup> Jesusiva mwitaa tuvata mwihua nai timwa mwi quava hia vahuvata tirema varura.

*Nkyiari vara mwataniqa hi quara tura*

<sup>7</sup> Jesusiva nraamwu mwipi variqaro taqovata kyara nranrenra nruhua mponramwuvanto tainta kyuqeraqaa nraahu mwata kyaavirerata uti varuvaro Jesusiva mpo quaqaa ntumwa kyero timwa nyinro tiqaro,

<sup>8</sup> Vaisi mpovanto nraakye ntumwinrenra hiro iara nrinra kyara nraante tirara hia enanasaira uro tainta nronra kyuqeraqaa mwatakyaa vira variante. E mwiaqaa variraro nraamwu qova nronra vaisi mpo nraanrama kyero

<sup>9</sup> iara tiqaro, Tumitarera e uto mpuani variraro nronra vaisi mwaava tainta mwiaqaa mwatakyaa quarive, qiankyorave. Mwiva mwitaa tirera, e mwipi nronraqama kyera kyauriqarama uro nraakye qora mwoqani mwatakyaa vira varinrave.

<sup>10</sup> Hia mwitaa hiraitira, mwataa hiante. Kyara nranrenra hiro i nraanrainranra vivava uro nraakye qora mwoqani mwatakyaa vira variante. E mwitaa hiraro nraamwu qova nri ntero iara tiqaro, Ni totio, hia mwini variante. Nrumu mwaini tainta kyuqeraqaa mwatakyaa quante, tirara e nraakye qora suqaa uro tainta nronraa mwatakyaa vira variqara e nrutu nronra varenanrave.

<sup>11</sup> Nai nrutu nraahu tuaaheraariva variraro nraakiara mwia nrutu vara mwataniqa hiananrove. Nai nrutu vara mwataniqama kye variariva variraro nraakiara mwia nrutu tuaahera kyaananrove, tiro.

<sup>12</sup> Jesusiva mwitaa timwa kyero vaisi mpovanto mwianra nrinra ni nraamwuqi kyara nraante turara tiqaro, Nraakye qora kyara nyinrenra hira hia ena toti vaative, ena qata vakyaave, ena vataahuave, i nraamwunaahua airi inraikya vatehuave, hia mwihua nyaanraante. E mwihua nyaanrama kyera nyinrenra mwihua mwia hiniqama kyeta inavata mwivarave.

<sup>13</sup> Nraakye qora kyara nyinrenra hira vehi nraakye qorave, kyuqu kyauquara ihuave, vu qipaarihuave, mwihua nyaanraante.

<sup>14</sup> E mwitaama varihua nyaanrama kyera aaqaa nraahu nyinranro Kotiva mwianra riero i qamwata mwatero i kyuqema mwataananrove. Nraakiara Kotiva kyuqe nraakye qora qati vara sivuma kyaaninraqaa Kotiva ina kyoqaa mwiananrove, tiro.

*Nronraqama kyero kyara nyiani vaisiraqaa ntumwa kyero tura*

(Matiu 22:1-10)

<sup>15</sup> Jesusiva mwitaa tuvaro vaisi mpovanto mwipi kyara nre varuva Jesusirara tiqaro, Qikye, Kotira mwatuqyaci kyara nrehua qamwateqata varivarave, tuvaro

<sup>16</sup> Jesusiva mpo quaqaa ntumwa kyero mwia timwa mwinro tiqaro, Vaisi mpovanto kyara nronraqama kyero tera taarama kyero vatero nraakye qora nyaanranrenra tuhua timwa nyitero tiqaro, Mwi entara kyara nraaninraqi nriate, tiro. Mwitaa timwa kyero varuvaro

<sup>17</sup> mwi entava nri ntovaro mwiva nai kyaiqa vaisi titero tiqaro, Uro tirata nriate. Ekyaa inraikya terama taiho, qiente, turave.

Tuvaro mwia kyaiqa vaisivanto uro timwa nyuvata

<sup>18</sup> mwihua kuaiqia kuaiqia vanto tiqata, Po, mpo inraikyavanto ni antua kyaihana nte hia quaninrave, tita. Vuniqama kyero mpovanto mwia kyaiqa vaisiara tiqaro, Nte mwata mpo kyoqama kyena varauqo. Nte mwia uro taqarerave. Po, hia qio ivatama kyena quaninrave,

<sup>19</sup> tuvaro mpovanto tiqaro, Nte kyaiqa vare varia purimakauhua kyauqurutana kyoqama tauqo. Nte kyaiqa vareqana mwihua mwataara hirerana vuqo. Po, hia qio ivatama kyena quaninrave, tuvaro

<sup>20</sup> mpovanto tiqaro, Nte mateqa nraata varauqo. Po, hia qio quaninrave, tiro.

<sup>21</sup> Ekyaa mwihua mwitaa nraahu tuvaro kyaiqa vaisi mwiva nrumu ntantero uro mwihua tu quara nai nronra vaisi timwa mwuvaro mwia raraqa tovaro nai kyaiqa vaisiara tiqaro, Hiantera mwatukyaqi virava uro aanra nronraqatairave, aanra pataqaatairave, vehi vaisivata, kyuqu kyauquara ihuavata, su qipa quarihuavata, kyuqu are aremaqita nrohihuavata, sita varera nriante, turave.

<sup>22</sup> Tuvaro mwiva tuntema kyero uro sitaqiro nrumu kyero tiqaro, E qiarantema kyena sitaqina nrumu kyauqaro tainta hini qati nraahu vaiho tuvaro

<sup>23</sup> mwia nronravanto tiqaro, Mwatukya mwiqi qaqlira kyera virava uro aanraqaatairave, aakyoqitairave, api nraakye qora taqerahua mwihua vuavi raavira tirata nrumu ni nraamwu piqa kyaate.

<sup>24</sup> Nte i timwa mwuquo. Tauraaqama kyena nyaanrama tau nraakye qorahua hiama qio ni kyara nrevarave, turave, tiro. Iesusiva mwitaa turama.

### *Iesusira vataqiro virera hu vaisirara tura*

(Matiu 10:37-38)

<sup>25</sup> Nraakye qora airivanto Iesusira vataqita vi varuvaro Iesusiva tuqasaa viro mwihua timwa nyinro tiqaro,

<sup>26</sup> Vaisi mpovanto ni nraaqiara varirero nte hunani nrinrenra hiro mwiva nai nrohua qohuave, nraata nraaqiarave, nai qata vakyaahuave, nai mwata mwaaqa qati variqiro quaninranrave, nronraqama kyero riemwaqiro viqaro nianra hia nronraqama kyero riaariva hiama qio ni nraaqiara variananrove.

<sup>27</sup> Mpovanto hia nai rukye kyatarira vara qu varero ni pataqiro nrinrenra, mwiva hiama qio ni nraaqiara variananrove.

<sup>28</sup> Nkyiqitairo vaisi mpovanto nraamwu nronra hoqarerera hiro mwiva tauraaqama kyero mwatakyaa viro nraato tuqiro viro kyatariarave, mpo inraikyarave, qiomu munima kyaaninrave timwa kyero, nraamwu hoqairave.

<sup>29</sup> Mwiva hia mwitaa hirera, mwiva nraamwu hoqeqaro nraamwu tura nraahu ratairaro munima taiqa viraro hia hoqa taiqa kyairata nraamwu mwia taqehua raima mwateta tiqata,

<sup>30</sup> Qikye, vitira taqaate. Mwi vaisiva nraamwu tohara tero hia qio taiqa kyaiho, tivarave.

<sup>31</sup> Mpo quavata tirerave. Vunyaa vaisi mpovanto nai henanra mpovata ntaqirera hiro, mwiva tauraaqama kyero mwatakyaa viro variqaro nai ntaqua vaisihua kyaara ntumwa kyero taqero tiqaro, Nte qiove mwia nraatara kyaaninrave, hiave qio mwia nraatara kyaaninrave? tirave. Mwiva taqairaro mwia ntaqi vaisihua 10,000 nraahu varivaro mwia nramwutaara ntaqi vaisihua 20,000 varivera, mwiva ni nraatara kyaankyo tiro tiqaro,

<sup>32</sup> Kyai ni nramwutaa mwiva nyianrani variraqe nte vaisi mpo titapiro mwiva uro mwianra qao tiro mwaateraqama variare qiananrove, tiro.

<sup>33</sup> Iesusiva mwitaa timwa kyero mwiva tiqaro, Mwia votima kyeta nkye hia mpo inraikya mpo inraikya tutara qaqlira kyaivera, nkye hiama qio ni nraaqiara varivarave.

### *Iesusiva horeqaa ntumwa kyero tura*

(Matiu 5:13; Maaki 9:50)

<sup>34</sup> Hore kyuqe inraikyave. Horevanto uaqlama viro hia qikyaa hirera, tire hia qio qaiqaa utu kyaararo qikyaa hiananrove. Tire mwia qaqlira kyaananrave.

<sup>35</sup> Mwitaama quani horera hia qio kyara kyaahaqa hiraro kyaravanto kyuqema kyero qupiqaananrove. Kyaravanto kyuqema kyero qupiqaarive titi hia mwi horera purimakau raha kyapata qio vatevarave. Nkyi nyaato vahiarhua hivera, nkye mwi quara ntapihi kyeta riaate, tiro.

## 15

### *Sipisipivanto raupirima vuraqaa ntumwa kyero tura (Matiu 18:12-14)*

<sup>1</sup> Mpo enta taakisi vare varuhuavata, qora kyaiqa vare varuhuavata, Iesusira qua riarerata nri nteta varuvata

<sup>2</sup> Parisi vaisinramwuvantovata, mwaanra okyara ti varu vaisihuavata, *nirutu nraunru/nrunru nraanru* tita tiqata, Qaqao, mwaa vaisiva qora kyaiqa uti varia vaisihua qamwata nyatero mwihua kyapata kyara nre variho, tita.

<sup>3</sup> Mwitaa tuvaro Iesusiva mwaa quaraqa ntumwa kyero mwihua timwa nyinro tiqaro,

<sup>4</sup> Nkyiqitairo vaisi mpovanto 100 sipisipi vataariva taqairaro sipisipi mpovanto raupirima virera, mwi vaisiva nataave hiananrove? Mwiva 99 sipisipi mwihua utaqi kyero mpo sipisipi raupirima quaninra puaa hirero quananrove. Mwiva puaamaqiro viro uro mwia puaama kyero taqaananrove.

<sup>5</sup> Mwiva mwia puaama kyero qamwata kyero vara nai qumwuqa qu varero

<sup>6</sup> uro mwaatani mwia kyero mwihavata variahua nyaanrama kyero tiqaro, Nkye nrumu nivatama kye qamwataate. Ni sipisipi raupirima vihana nte mwia puaama kyauqo, qiananrove.

<sup>7</sup> Nte qianinra nkye ntapihi kyeta riaate. Mwia votima kyeta 99 nraakyе qora hia qora aanra nrohihua varivata nyaamwuni varihua mwihuara qamwate variqata taqaivaro qora kyaiqa varaari vaisiva kuaiqiyavanto qora aanra qaqlira kyairera, mwianra rieqata nyaamwuni varihua mpogama kyeta qamwatevarave.

### *Munima raupirima vuraqaa ntumwa kyero tura*

<sup>8</sup> Nte qaiqaa mpo quaqaa ntumwa kyena tirerave. Nraakyе mpovanto ori munima kyauqurutana vataiva taqaiharo munima kuaiqia raupirima virave. Mwitaa hiraro mwiva nataave hiananrove? Mwiva omwa upi kyero nraamwuqi ntupi kyero mpoqi mpogqi puaamaqiro viro taqaananrove.

<sup>9</sup> Mwiva puaama kyero varero nai totivaativata, mwihavata variahua vata, nyaanrama kyero timwa nyinro tiqaro, Nkye ni vatama kyeta qamwataate. Nte munima raupirima kyaura puaama kyena varauqo, qiananrove.

<sup>10</sup> Nte qianinra riaate. Mwia votima kyero qora kyaiqa varaari vaisiva qora aanra qaqlira kyairera, mwianra rieqata nyaamwuni varihua qamwate varivarave, tiro.

### *Mwia mwaaquvanto raupirima vuraqaa ntumwa kyero tura*

<sup>11</sup> Iesusiva mwitaa timwa kyero mwiva tiqaro, Vaisi mpovanto qoraisi nraaqiara taaratana mwata tovaroma

<sup>12</sup> mwia mwaaqu nraakiaraava siviro nai qorara tiqaro, Ena vataana inraikyara nraakiara ntainra kyera ni mpirerave tinanra mate nraahu ni mpiante, tiro. Mwitaa tuvaro mwia qova nai vato inraikyara ntainra kyero nai mwaaqutana nyunrave.

<sup>13</sup> Nyuvaro mwia mwaaqu nraakiaraava pataqia variro nai hu inraikyara mpohua nyiqanro munima varero nyianra mpo mwatanu vuva uro mwini variqaro qora vaisi kyapata qora kyaiqaa munima vare vura taiqa tuto kyorave.

<sup>14</sup> Taiqa tuto kyovaro mwiaqatairo nronraqama kye aara nto entava nri ntovaro mwiva vehi vaisi variqaro

<sup>15</sup> uro mwi mwataraqaaanaa vaisi mpogaa kyaiqa vararero viro. Vuvaro mwi vaisiva tiqaro, Uro ni quaraqa ntaqiqyiqara mwihua kyara nyiante, turave.

<sup>16</sup> Tuvaro mwiva quara kyara nyi variro tiqaro, Qikye, quara kyara nyiqana viti vaati ntenavata nraataarave, tuvaro mwia kyara mwianri vaisiva hia varura.

<sup>17</sup> Mwia nraataa huvaro varuvaro mwia vu nraato ntutoraa vuvaro mwiva riero tiqaro, Ni kora kyaiqa vaisi airinramwuvanto variavaro airi kyara vahata mwihua nreqata variavana nte mwaini variqana kyarara huqo.

<sup>18</sup> Kyai nte sivina ntena kova hinani nrumu ntantena quangkye. Nte urontena ntena korara mwitaama qianinrave. Ko, nte Kotiravata ivata uaqia hi kyaiqara utu nyatauqo.

<sup>19</sup> Mwia kyaara nte hia qio i nraaqiara kyuqeva varianinrave. E ni vara mwataniqama kyairaqe nte i kyaiqa vaisi nraahu variankye. Nte quariva uro mwitaa tirerave, tiro.

<sup>20</sup> Mwitaa timwa kyero mwiva siviro nai qova hunani nrunra. Nai qora nraamwu qaumato nruvaro mwia qova nyianrasairo vutu mwia taqero qamwata kyero hiantero uro nai mwaaku ntavaaqavu kyero mwia kyuquqama mwatero varuvaro

<sup>21</sup> mwia mwaquivanto tiqaro, Ko, nte Kotiravata ivata uaqia hi kyaiqarama utu nyatauqo. Mwia kyaara nte hia qio i nraaqiara kyuqeva varianinrave, tiro.

<sup>22</sup> Mwitaa tuvaro mwia qova nai kyaiqa vaisi timwa nyinro tiqaro, Hianteta nkye uro tuavaaqa kyuqera varaqita nruru mwiate. Kyaatamwavata inranravata varaqi nruru humwataate.

<sup>23</sup> Purimakau nraati kyuqera rukyeta utaate. Mate tire mwia qamwata mwataananrave.

<sup>24</sup> Ni maaquivanto qutu viho tuqaroma qati nri ntaiho. Ni maaquivanto raupirima viho tuqaroma qati nrihana vitaqo, tiro. Mwitaa timwa kyero nai mwaaku qamwata mwatero kyara vara kyero mwia vaahaqama mwatorave.

<sup>25</sup> Mwia vaahaqama mwate varuvaro mwia vakyaava kyaiqa varonasairo nri ntero riovata

<sup>26</sup> ihi nte variqa tuvaro mwiva nai qora kyaiqa vaisi mpo kyapara huvaro mwiva mwia timwa mwinro tiqaro,

<sup>27</sup> I qatavanto vevasairo nri ntaiharo i qova mwianra qamwateqaro purimakau nraati kyuqera ru kyero uta mwataihoo. I qata kyuqema nai vitero qamwateqaroma mwitaa iho, tiro.

<sup>28</sup> Mwitaa tuvaro mwia vakyaara raraqa tovaro kyaru ntumwa kyero tiqaro, Hia nte nraamwuqi virerave, timwa kyero mwaatani varuvaro mwia qova veva ntero mwianra po qati nraamwuqi nriante tuvaro mwiva mwitaama tiro:

<sup>29</sup> Nte airi ihiara i kyaiqa vaisi votima kyena i kyaiqa vareqana hia nte mpo entavata i qua raaquta kyaaurave. Nte ntena toti qamwata nyataankye tuqara e hiama memenra nraati mpoku ntuqutu ni mpiaro.

<sup>30</sup> I nraaqiara mwaava api qaraqita nrohia nraakyehuavata e hiana inraikyara varaqiro mwihuqaqaa uto taiqa kyero nrihanrama e purimakau nraati kyuqera qumina ntuqutu kyera mwinra hiaro, tiro.

<sup>31</sup> Mwitaa tuvaro mwia qova qaqao tiro, Ni maaquo, e mpo enta mpo enta ni vatama kyera variaravave. Nte hu inraikyara ekyaa inraikya mwia tetatana hunanrave.

<sup>32</sup> I qatavanto qutu viho tuqaroma qati nri ntaiho. Mwiva raupirima viho tuqaroma qati nrihana vitaqo. Mwitaa ihatara tita, tire mate mwia qamwata mwatarerave, turave, tiro. Iesusiva mwi quara turama.

## 16

*Kyaiqaqaa ntaqikyi varu vaisiva uaqiamma kyero kyaiqa varoraqaa ntumwa kyero tura*

<sup>1</sup> Iesusiva nai nraaqiaranramwu timwa nyinro tiqaro, Haaru vaisi mpovanto munima airi vatova varuvaro vaisi mpovanto mwia kyaiqa vareqaro mwiva vato inraikyaraqaa ntaqikyurave. Mwiva hu inraikyaraqaa ntaqikyi varuvaro mpovanto nri ntero tiqaro, E hiana inraikyaraqaa ntaqikyi variva e hiananra hini nramwa kye variho, tuvaro

<sup>2</sup> munima vato vaisiva mwiva mwia nraanrama kyero tiqaro, E nanra varaana quarave nte riauqo? Nte hu inraikyara ntaqikyiqara varenanra qara ntumwa tairaqe taqaankye. E hia nte hu inraikyaraqaa ntaqikyinanrave. E taiqenanrave, tiro.

<sup>3</sup> Mwitaa tuvaro kyaiqa vaisi mwiva riero tiqaro, Po, ni nronravanto nte kyaiqa varauraqaatairo ni taiqama kyaananrove. Nte nataave hianinrave? Hia nte kepukyaqama kyena ont quvuaninrave. Nte mpohuara nianra po tiqata munima mpiate qianinra kyaauruaninrave, tiro.

<sup>4</sup> Mwitaa timwa kyero mwiva kyai nte mate mwitaa hiarilo nraakiara ni titairata nraakyе qora nianra qamwateqata ni pitaqita uro nkyiari nraamwuqi kyaate, tiro.

<sup>5</sup> Mwitaa timwa kyero nai nronra vaisiqitaita munima vareta qakyo mwianre tu vaisihua nyaanrama kyero vuni nru vaisira mwia kyapara hiro, Ni nronravanto iqi vataiva nataamave qati vaiho? tuvaro

<sup>6</sup> mwiva tiqaro, Mwiva niqi vataiva vahamwenra 100 taqu vaiho, tuvaro mwia munimaqaa ntaqikyuva tiketi mwinro 100 qaqlira kyera 50 nraahu tiketiqaa qara ntumwa taante, tiro.

<sup>7</sup> Mwitaa timwa kyero vaisi mpora tiqaro, Mpo e, iqi vataiva nataamave qati vaiho? tuvaro mwiva tiqaro, Uiti tua 100 tuama qati vaiho, tuvaro mwiva tiketi mwinro 100 qaqlira kyera 80 nraahu tiketiqaa qara ntumwa taante, tiro.

<sup>8</sup> Mwiva vato inraikyaraqaa ntaqikyiqaro mpuara vare varu vaisiva mwitaamaqiro vuvaro mwia nronravanto taqero tiqaro, Qikye, vaisi mwihua mwia toti variate tiro, mwiva vu nraato tuqiro viro mwiva mwitaa hi variho turave. Mwatani varia vaisihua nkyiari hena vaisi kyoqaa nai mwi nai mwi hiqata nkyiari riemwa kyeta kyoqaa kyaiqa varaqi quarave. Mwihua kyoqaa kyaiqa vareqata omwa itainani nria vaisihua nraatara kye variarave, tiro.

<sup>9</sup> Iesusiva mwitaa timwa kyero mwiva tiqaro, Nte qianinra riaate. Mwatani variahua apiqama kyeta tuto kye varia munimanra nkye mwi munimanra vara kyetama avuqavuma kyeta totiqa hiqata nyiate. Mwitaamaqita vivaro munima taiqa virata nkye ekyaa enta qati variqi vi nraamwunraqi vivaro nkye munima nyi vaisiva nkyi qamwata nyataaananrove.

<sup>10</sup> Vaisi mpovanto pata kyaiqaqia vareqaro mwiva mwi kyaiqara avuqavuma kyero varairera, mwi vaisiva nronra kyaiqavata avuqavuma kyero varaanarove. Vaisi mpovanto pata kyaiqa varero mpuara utiqaro varairera, nronra kyaiqavata mpuara utiqaro varaanarove.

<sup>11</sup> Nkye mwata mwaqa variahua apiqama kyeta kye varia munimanra hia kyuqinra kyeta ntaqikyivera, Kotiva hia nkyiara, Nkye ni kyoqaa qutaa kyoqaaqaa ntaqikyivarave, qiananrove.

<sup>12</sup> Nkye mpova hiani inraikyaraqaa hia kyuqema kyeta ntaqikyivera, Kotiva nkyiara, Nkye nkyeta vate inraikyaraqaavata hia kyuqema kyeta ntaqikyivarave, timwa kyero hiamma nyiananrove.

<sup>13</sup> Hia kyaiqa vaisi mpovanto vaisi nronra taaratanaqaa kyaiqa varaanarove. Mwiva mwitaa hiqaro nronra vaisi mpora mwia mwutukya vahiraro mporara hia mwia mwutukya vahianarove. Mwiva nronra vaisi mpora kyuquerave timwa kyero mpora uaqia hiravema qiananrove. Airi inraikya vatevave, munimavantove, nronra vaisi votima kyero nkyiqa ntaqikyi varirera, nkye munima varerara nraahu riemwaqi viqata hia Kotira kyaiqavata qio varaqi vivarave, tiro.

### *Iesusiva qua mwaanra mponramwu tura*

<sup>14</sup> Iesusiva mwitaa tuvata Parisi vaisinramwuvanto mwi quara riovaro mwihua mwutukyavanto munimanra nraahu vahuvatara tita, mwihua Iesusiva qua turara raima mwatora.

<sup>15</sup> Raima mwatovaro Iesusiva mwihua timwa nyinro tiqaro, Mwihua nkyiara avuqavu nrohi varia vaisihuave qiate tita, nkye nraakyе qora suqaa avuqavuma kyeta nrohi variarave. Nkye mwitaa hiavaro Kotiva nkyi mwutukyaqi uaqia hi kyaiqara taqe

varirave. Mwatani variahua tiqata, Kyuqe inraikyave, ti variara mwi inraikyarara Kotiva tiqaro, Uaqia hi inraikyara qumina inraikyave, ti varirave.

**16** Haaru hia Ioniva varu entara Mosesira qua mwaanravantovata poropeti vaisi qua mwaanravantovata vahurave. Mwiaqaatairo Ioniva nramanri nyi varuva nri ntero qaraakya qua kyuqe qua Kotiva nkyiqa ntaqikyiani quara timwaqiro vuvata mwiaqaataita ekyaa nraakyae qora nkyiaranasai kepukyaqama kyeta Kotira mwatuqyaqi virerata uti variarave.

**17** Qio nkye riaate, Haaruua mwaanra qua qatima vaiho. Nyaamwuvantovata mwatavantovata taiqa viraro Kotira qua nronravantovata patavantovata qatima vahiananrove.

*Nraakyae qaqira kye okyarara tura  
(Matiu 5:31-32, 19:9; Maaki 10:11-12)*

**18** Vaisivanto nai nraata qaqira kyero mpo nraakyae varaiva, mwi vaisiva Kotira qua mwaanra nteqa kyairave. Mpowanto qaqira kyai nraakyera varai vaisiva, mwivavata Kotira qua mwaanra nteqa kyairave, tiro.

*Rasarusirara tura*

**19** Iesusiva nai nraaqiaranramwu timwa nyinro tiqaro, Vaisi mpovanto airi inraikya vatova kyuqe tuavaaqa nraahu ututero mpo enta mpo enta qiakyaa hu kyarara nraahu nreqanro várurave.

**20** Mwiva mwi kyarara nraahu nreqanro varuvata vaisi mpo mwia nrutu Rasarusira vitaqita uro airi inraikya vato vaisira nraamwu quesana kyovaro varura. Mwi vaisiva hia mpo inraikyavata vatova vehi vaisivanto varuvaro rumpuaravanto nraahu ekyaa mwia mwamwantaqa vahuvaro

**21** variqaro mwiva airi inraikya vato vaisiva kyara nreqanro viti vaati qaqira kyora mwia nraahu utu kyeqaro nranrenro varura. Rasarusiva mwini varuvaro vairinramwuvanto vitare nritare hiqata mwia rumpuara pohi varurave.

**22** Hia mpo inraikyavata vato vaisiva qutu vuvata nyaamwunyaahua mwia vitaqita uro Evarahaamuva nai haivaqava varunani kyorave. Uro kyovaro airi inraikya vato vaisiva mwivavata variro qutu vuvata mwataqi quntamwa torave.

**23** Quntamwa tovaro mwiva qutu vuhua varunani variqaro atura nti varurave. Atura ntinqaro mwiva vuru taqovaro Rasarusiva Evarahaamukyantiri qamwateqaro nyianrani varurave.

**24** Mwini varuvaro mwiva Evarahaamunranra aakyara ntero tiqaro, Evarahaamu, ko, e qati nianra po kye timwa mataante. E Rasarusira titairaro mwiva nai kyauqu uro nramanriqi mwaamwi ntamwa kyero tumu ni maaqinriqaa vatairaro tututaarive. Nte qia nronraqi variqana atura ntinqana varuquo, tiro.

**25** Mwiva mwitaa tuvaro Evarahaamuva qaqao tiro, Ni maaquo, e riaante. E tauraa qati varuna entara e kyuqe inraikya vatoraro Rasarusiva qora inraikya nraahu vatorave. Mate mwiva mwaini variqaro qamwateqaro varihara e mwini atura ntinqara variaro.

**26** E qaiqaavata rie varirage nte qua mpoqivata i timwa mwiankye. Nte varuqara e variararo tiri utaqaa okai nronrama vaiho. Mwaisaita mwini vivorave, mwisaita mwaini nrivorave tiro, okai nronra utaqaa vatairave, tiro.

**27** Evarahaamuva mwitaa tuvaro mwi vaisiva tiqaro, Po, ko, nte iara qati ni qua riaante tuqo. E Rasarusira titairaro mwiva ni kora nraamwuqi uro ntero

**28** ni kata pakya kyauquru variahua timwa nyianrive. Mwihuavata mwaini nriqa vinani nrivorave, tiro.

**29** Mwitaa tuvaro Evarahaamuva qaqao tiro, Mosesivavata, poropeti vaisinramwuvata, qara ntumwa to quava vahirave. Mwihua mwi quara qiomma rievarave, tiro.

<sup>30</sup> Tuvaro qati varu entara airi inraikya vato vaisiva tiqaro, Hiave, Ko, Evarahaamuo, qutu quarive nrumu ntantero uro timwa nyinrata mwihua mwia qua rieqatama qora aanra qaqlira kyevarave, tiro.

<sup>31</sup> Mwitaa tuvaro Evarahaamuva qaqlira tiro, Mwihua Mosesira quavata poropeti vaisi quavata hia riaivera, mwihua qutu quariva nrumu ntantero uro qiani quaravata hiama qio rievarave, turave, tiro. Iesusiva mwitaa turama.

## 17

### *Uaqia hi kyaiqarara tura*

(Matiu 18:6-7, 21-22; Maaki 9:42)

<sup>1</sup> Iesusiva nai nraaqiaranramwu timwa nyinro tiqaro, Nraakyehoravanto Kotira qua nteqa kyeqata uaqlia hi kyaiqara utuate tiro, mpo inraikya mpo inraikyavanto qovara hiananrove. Uaqia hi kyaiqara qovarama kyaani vaisirara po kye timwa mwatauqo. Nraakiara mwi vaisiva taqaananrove.

<sup>2</sup> Nraaqiara mpo uaqlia hi aanranra nraamwutaani vaisiva variraro nraakiara Kotiva mwi vaisira uaqlama kyeroma ntuqutu mwataananrove. Kotiva mwi vaisira mwitaa hianinranra rieqaro mwi vaisiva mwataama qiali. Qikye, eqaataara qumina nte mwi nraaqiara uaqlia hi aanranra nraamwutaurave. Haaru hia mwitaa hiava entara ni nuntaqi ori nronra sutukye ni rumpua nronraqi tuto kyaataarave, qiananrove.

<sup>3</sup> Nkye uaqlia hi kyaiqara utuaro tita rauru kyeqata variate.

E taqairaro i qata vakyaavanto Kotira qua nteqa kyairera, mwianra hia qaiqaavata mwitaa hiante qianta. Mwiva tiqaro, Nte po tuqo. Hia qaiqaavata mwitaa hirerave, tirera, e tiqara, Mwi quara matema qaqlira kyauqo, qianta.

<sup>4</sup> E taqairaro mwiva kuaa enta 7 nani i uaqlama mwatero nrumu iara po hia mwianra riera taunru mataante tirera, e eo timwa kyera 7 nani mwianra tiqara, Nte mwi quara qaqlira kyena hia iqaa qua vataaninrave, qianta, tiro.

### *Kepukyaqama kyeta Kotirara riemwaqita virara tura*

<sup>5</sup> Iesusiva mwitaa tuvata mwia nraaqiara 12 nramwuvanto tiqatama, E tiri kyaahaqa hiraro tire Kotirara riemwaqita quarava nronraqa hiarive, tita.

<sup>6</sup> Mwitaa tuvaro nronravanto mwihua timwa nyinro tiqaro, Nkye Kotirara riemwaqi viva masiteti uru pataqla votima kyero vahirera, nkye kyatari vitirara tiqata, E tuqa rirante ntarira uro kyaarereraq i qupiqaante, tivaro kyatari mwiva nkyi qua riaananrove, tiro. Iesusiva turama.

### *Kyaiqa vaisivanto nai kyaiqa varaaninranra tura*

<sup>7</sup> Iesusiva tiqaro, Nkyiqitairo mpovanto variraro mwia kyaiqa vaisivanto kyaiqa varaaninranra qati quaqlama kyena tirerave. I kyaiqa vaisivanto i kyaiqa vareqaro uro kyatu quvu tero uro sipisipiqa ntaqikyi tero nrinranra e nanreve mwianra tinanrave?

<sup>8</sup> E hiama mwianra tiqara, Hiante ena kyara nrumu nraante, tinanrave. Mwi vaisiva qumina kyaiqa vaisivanto variharara tira, e mwianra tiqara, Nruru nini kyara nraante terama kye matera kyara utaa tavunanra rupa varera kyara varaqira nrumu mpiraqe nramwa kyaarira nraakiara ena kyara nraante, tinanrave.

<sup>9</sup> Kyaiqa vaisi mwiva i kyaiqa taiqa kyairara e mwianra kyuqeveve tinanrave? Qaqlira, e hiama mwitaa tinanrave. Mwianra tiqara, Mwia ena kyaiqlama varera hiaroma, tinanrave.

<sup>10</sup> Mwia votima kyeta nkyevata Kotira kyaiqa uro taiqa kyeta hia mwianra rieqata Kotirara qamwata timwa taante qiate. Nkye mwataama qiate. Tire qumina kyaiqa vaisi nraahuma varuro. Tire mwi kyaiqlama vareqata tire teta kyaiqa vaisi kyaiqa nraahuma varuro, qiate, tiro. Iesiva turama.

### *Rumpuara taumavanto mwamwanta nre varuhua kyuqema kyora*

<sup>11</sup> Iesusiva Ierusareminianra viqaro Sameriaa mwata hini vahuvaro Kariri mwata hini vahura mwia utaqaa vuva

<sup>12</sup> mwatukya mpoqi uro ntovata vaisi kyauqurutanavanto Jesusira uro qintorama kyeta. Rumpuara uaqia huva mwihua mwamwanta nre varuhua vutura nyianrasataita aakyara nteta tiqata,

<sup>13</sup> Iesusio, e nronravantove. Qati tirinramwuanra po kye timwa timwa taante, tita.

<sup>14</sup> Mwitaa tuvaro Iesusiva mwihua timwa nyinro tiqaro, Kotira kyaiqa vare varia vaishhua hianani vivata nkyi mwamwanta itutuma kye taqaate, tuvata mwihua Iesusiva tuntema kyeta aanraqaa viqata taqovaro mwihua rumpuaravanto tavanta vuvaro mwihua nyamwantavanto kyuqema vuvata mwihua qio varura.

<sup>15</sup> Mwihua qio varuvaro mwihuaqitairo kuaiqavanto nraahu nai rumpuara tavanta vura taqero nrumbu ntantero aakyara ntamwa kyero Kotira nrutu tuaaheraqiro vura.

<sup>16</sup> Vuva uro Jesusira kyuqusata tumu ntiro variqaro Jesusira qamwata mwate varura.

Vaisi mwiva Sameriaa nyaava varuvaro Iesusiva mwianra tiqaro,

<sup>17</sup> Nte vaisi kyauqurutana kyuqema nyataurave. Vaisi 9 nramwu tainive quavo?

<sup>18</sup> Nanraqamave mpo mwatanaa vaisi mwaava nraahu Kotira nrutu tuaaherarero nriho? tiro.

<sup>19</sup> Mwitaa timwa kyero Iesusiva vaisi mwianra tiqaro, Qioma sivira quante. E nianra ni kyaahaqa hianinrave qiararoma i mwamwanta kyuqema viho, tiro. Iesusiva turama.

### *Kotiva ntaqikyianinranra tura*

(Matiu 24:23-28, 37-41)

<sup>20</sup> Parisi vaisinramwuvanto uro Jesusira kyapara hita tiqata, Kotiva nraakye qoraqaa ntaqikyiariva taireve qovara hiananrove? tuvaro Iesusiva mwihua timwa nyinro tiqaro, Mwiva qovara hianinra nkye hia vuqotaita qio taqevarave.

<sup>21</sup> Hiama mpovanto Kotiva ntaqikyianinra taqero mwinima vaiho mwainima vaiho qiananrove. Kotiva nraakye qora mwihua utaqi variqaro mwihuaqaa ntaqikyiananrove, tiro.

<sup>22</sup> Mwitaa timwa kyero Iesusiva nai nraaqiaranramwuanra tiqaro, Mpo enta nri ntairata nkye mwi entaraqaa ni mwatani mwatatai nraaqiarara tiqata, Qikye, Iesusiva kuaa enta nraahu tirivata variraqe tire qiove qiataarave, tiqatama hia qio ni taqevarave.

<sup>23</sup> Mwi entaraqaa vaisi mponramwuvanto nkyiara tiqata, Iesusiva mwinima variho. Mwainima variho, tivata nkye hia mwihua qua rieqata mwihua vataqita quate.

<sup>24</sup> Aaquakyaa tiqaro ekyaa nyaamwu ntuvahama kyaintema kyenama nte mwatani mwatatai nraaqiarava qoqaa tumuaninrave.

<sup>25</sup> Qakyo qoqaa tuminrenra hiarita mate mwaa entara vari nraakye qorahua nronra muaanra nraante mpivaque varaarita mwihua ni qoririma matevarave.

<sup>26</sup> Noaava varu entara nraakye qoravanto mpoqia mpoqia utuntema kyeta nte mwatani mwatatai nraaqiarava tumuani entaraqaa nraakye qoravanto mpoqia mpoqia utivarave.

<sup>27</sup> Noaava varu entara nraakye qoravanto kyarave nramanrive nramwaqita vita nraata vaati varaqita vuvaro Noaava nramanriqaa quani nraamwunraqi viqetovaro humwunravanto nronraqama kyero ntero mwihua ekyaa ru taiqa kyorave.

<sup>28</sup> Nte tumuani entava Rotiva qati varu entara votima kyero vahiananrove. Rotiva qati varu entara nraakye qoravanto kyarave nramanrive nramwaqi vita, nkyiari kyoqaa kyaiqa varaqi vita, nraata vaati varaqita vita, kyara vara tuqi vita, nraamwu hoqaqi vita mwitaa mwitaamaqita vuvaro

<sup>29</sup> Rotiva Sotomi mwatukyaqitairo vuvaro nyaamwusairo qiyavanto vati votima kyero ntqaro mwi mwatanaahua ekyaa itamwa taiqa kyorave.

<sup>30</sup> Nte qovarama quani entara nraakye qoravanto mwitaamaqi viqata nkyiari kyaiqa nraahu varaqi vivarave.

<sup>31</sup> Mwi entara vaisivanto nraamwu aatareqani variariva nai vataani inraikyara vararerero nraamwuqi hiama vera ntaarive. Vaisi mpovanto kyaiqa varaariva nrumu ntantero nraamwuqi hiama quarive.

<sup>32</sup> Rotira nraatavanto apiqama viro taiqa vurara nkye riaate.

<sup>33</sup> Nte qutu quankyo tiro qati varianinranra nronraqama kye riaariva qutu quanansrove. Hia nai qutuaninranra nronraqama kye riemwaqiro quariva, (mwiva qutu viro mwiaqaatairo) ekyaa enta qati variqiro quanansrove.

<sup>34</sup> Mwi entara entaqi vaisi taaratanavanto taariqaa vaite varivaro kuaiku nraahu nyaamwuni vita varero viro mpo mwia mwinima kyairaro variananrove.

<sup>35</sup> Mwi entara nraakye taaratanavanto kyara taiti ti varivaro kuaiqia nraahu nyaamwuni vita varero viro mpo mwia mwinima kyairaro variananrove.

<sup>36</sup> [Vaisi taaratanavanto utaqi kyaiqa vare varivaro kuaiqia nraahu nyaamwuni vita varero viro mpo mwia mwini kyairaro variananrove], tiro.

<sup>37</sup> Iesusiva mwitaa tuvata mwia nraaqiaranramwuvanto mwia kyapara hita tiqata, Tainive mwi inraikyava mwi inraikyava qovara hiananrove? tuvaro Iesusiva mpo quaqaa ntumwa kyero mwihua timwa nyinro tiqaro, Qutu quani inraikyava vahian-inra mwiaqaama memonravanto ntuvaantua hivarave, tiro.

## 18

### *Hia kyuqema kyero ko rio vaisiraqaa ntumwa kyero tura*

<sup>1</sup> Iesusiva nai nraaqiaranramwuanra mwihua Kotirara aakyara ntamwaqi vivaro hia pupohairata qaqira kyaate tiro, mwaa quaraqaa ntumwa kyero timwa nyinro tiqaro,

<sup>2</sup> Haaru qua avuqavu hi varu vaisiva iaasiva mpo mwatuqyaraqaa variqaro mwiva hia Kotira nraatu aatu hu vaisiva hia nai henaihaisiavata nronraqama kyero rie varu vaisiva varurave.

<sup>3</sup> Mwiva varuvaro tetoga nraakyevantovata mwi mwatuqyaraqaa varurave. Mwi nraakyeva ekyaa enta ko rio vaisiva varunani nri ntero tiqaro, Vaisi mpovanto ni qoraqama matairara rieqara e ni qua avuqavuma mataante, turave.

<sup>4</sup> Mwitaa timwaqiro vuvaro airi enta ko rio vaisiva hia mwia kyaahaqa hiataa huvaro hia mwia kyaahaqa hurave. Mwitaamaqiro viro ekyara mwianra tiqaro, Nte Kotiraravata vaisiaravata hia nronraqama kyena riauva

<sup>5</sup> tetoga nraakye mwaavata hia kyaahaqa hiataa ihana varuqaro mwiva airi nani nte hunani nri variqaro ni antue variho. Kyai nte mwia qua riena avuqavuma mwataariro mwiva hia mpo enta qaiqaavata nte hunani nriqanro ni pupohama mataarive, turave, tiro.

<sup>6</sup> Mwitaa timwa kyero Iesusiva nronravanto tiqaro, Riaante. Hia kyuqe iaasiva hia mwi nraakyera kyaahaqa hiataa huvarovata mwia kyaahaqa hurave.

<sup>7</sup> Kotira nraakye qoravanto entaqivata, iheravata, mwianra aakyara ntamwaqi vivaro Kotiva hiave mwihua qua riero kyaahaqama nyataananrove? Kotiva qakyoma kyeroove mwihua kyaahaqa hiananrove?

<sup>8</sup> Qaqao, nte qianinra riaate. Kotiva mwihua qua riero qamwanrama kyero mwihua kyaahaqama nyataananrove. Nte mwatani mwatatai nraaqiarava qaiqaa tumuani entaraqaa Kotira qua rieqata mwianra aakyara ntamwaqi vihua mpochiani varivarave iho, hiave varivarave? tura.

### *Parisi vaisiqaavata taakisi varo vaisiraqaaavata ntumwa kyero tura*

<sup>9</sup> Iesusiva mwitaa timwa kyero tiqaro, Vaisi mponramwuvanto tiqata, Tire nraahuma kyuqe hurahua variqata avuqavumakye nrohi varurata mpohua hia kyuqe

hia huama variavo qiarave. Kyai nte mwitaa qia vaisihuara mwaa quaraqaa ntumwa kyena qiankye, timwa kyero tiqaro,

<sup>10</sup> Vaisi taaratanavanto Kotira nraamwuqi Kotirara aakyara ntarerata vurave. Mpo Parisi vaisivanto vuvaro mpo taakisi vare varu vaisiva vurave.

<sup>11</sup> Mwitanahua Kotira nraamwuqi vera ntovaro Parisi vaisi mwiva uro nanrianra mposata variqaro Kotirara aakyara nteqaro mwitaama tiro: Kotio, Hia nte mpohua votima kyena varuvara tina, nte iara kyuqema tuqo. Hia nte mpohua nraantantena munima mpuara vare varuvave. Hia nte api qora kyaiqa utuqina nrohi varuvave, Hia nte mpora nraatavata mpuaraqama kyena nrohuvave. Hia nte viti vaisiva taakisi vare vari vaisira votima kyena varuvave.

<sup>12</sup> Nte kuua uiki mwipi variqana i kyaiqara rieqana taara enta kyara aurama tegana varuvave. Nte ntenu hu inraikyaraqaatai munima vara kyena kyauqurutanaqitaina avuqavuma tukyama kyena kuaiqia ina mwi varurave, turave.

<sup>13</sup> Parisi vaisivanto mwitaa ti varuvaro taakisi vare varu vaisiva vutura nyianra sata siviro variro kyauriqaro hia tuaahera kyero nyaamwunivata taqaraitiro, nai mwetokya ntuquqaro, Kotio, po nte hia kyuqe huvama varuqo. E nianra po kye timwa mataante, turave, tiro.

<sup>14</sup> Mwitaa timwa kyero Jesusiva timwa nyinro tiqaro, Nte qianinra riaate. Kotiva Parisi vaisivanto tu quara hia riaraitiro, taakisi vare varu vaisira qua nraahu riero mwiva uaquia hi kyaiqara utura nraka mwatovaro mwi vaisiva nrumu ntanero nai nraamwuni vurave. Nai nrutu nraahu tuaaheraaninra Kotiva mwia nrutu vara mwataniqama kyaananrove. Nai nrutu vara mwataniqama hianinra Kotiva mwia nrutu tuaaherama mwataananrove, tiro. Jesusiva turama.

*Iesusiva nraaqiarara qamwateqaro kyuqema nyatora  
(Matiu 19:13-15; Maaki 10:13-16)*

<sup>15</sup> Nraakte qoravanto nkyiari nraaqiara sitaqita Jesusiva mwihuaqaa kyuauqu vatero kyuqema nyataarive titi nri ntovata Jesusira nraaqiaranramwuvanto tiqata, Siteta mwihuaavata quate, tura.

<sup>16</sup> Mwitaa tuvaro Jesusiva nraaqiara mwihua nyaanrama kyero tiqaro, Nraaqiara mwihua qati kyaivata nte hunani nriate. Hia mwihua aanra antuaate. Kotiva ntaqikyiari mwatukyava mwi nraaqiarahua voti hiahua mwihua mwatukyama vahiananrove.

<sup>17</sup> Nkye mwaa quara riaate. Vaisivanto hia nraaqiara nraantantamwa kyero variqaro Kotira qua riaariva hiama qio Kotiva ntaqikyi mwatukyaraqi quananrove, tiro.

*Airi inraikya vato vaisiva Iesusiravata qua tura  
(Matiu 19:16-30; Maaki 10:17-31)*

<sup>18</sup> Jesusiva varuvaro Iutaa vaisi nronravanto mwia ntumwahiamwa hiro tiqaro, E mwaanra ti variara vaisiva kyuqevave. Nte nataa hiani kyaiqara Kotira vara mwataaninraqaatainave nte nraakiara ekyaa enta qati variqina quaninrave? tiro.

<sup>19</sup> Mwitaa tuvaro Jesusiva tiqaro, E nanraqamave nianra vaisi kyuqevave qiaro? Kotiva nraahuma kyuqeva variho.

<sup>20</sup> E Kotiva timwa to quara riaananrave. Mwia quavanto mwataa tirave:  
E hia mpora nraatantiri api nrohiante.

E hia mpora ru kyaante.

E hia mpuara varaante.

E hia unra qua mporaqaa vataante.

E ena nrohua qohua nyutu tuaahera nyataante, turave.

E mwi quara timwa tova vahira riemwaqira quante, tiro.

*(Kyatura 20:12-16)*

<sup>21</sup> Jesusiva mwitaa tuvaro mwi vaisiva tiqaro, Nte nraaqiara patakyaa mwi quara riemwaqina nruvama mate mwaa varuqo, tiro.

<sup>22</sup> Mwitaa tuvaro Jesusiva mwia qua riero mwia timwa mwinro tiqaro, Mwitaa hirera, e kuaa inraikya nraahu hia utuaro. E ekyaa ena vataana inraikyara mpohua nyinra munima vara kyera ntainra kyera vehi nraakye qora nyinranro nyaamwuni ini mpo inraikya vahiarive. Mwitaama kyera mwiaqaataira ni pataqira nriante, tiro.

<sup>23</sup> Mwitaa tuvaro mwi vaisiva airi inraikya vatovara tiro, mwia mwutukyavanto uaquia huvaro varura.

<sup>24</sup> Mwia mwutukyavanto uaquia huvaro varuvaro Jesusiva mwia taqero tiqaro, Airi inraikya vate vari vaisihua mwukyaari tu kyeta Kotira mwatukyqa vivarave.

<sup>25</sup> (Kameri quara nronravanto nataama kyero ve vuqa uvintaqi/ iriraqi ntuqiaraananrove? Hia qiove.) Qio nte qianinra riaate. Kamerivanto vuqa uvintaqi/ iriraqi qio ntuqiarairarove, airi inraikya vataarivavata Kotira mwatukyqa qio quananrove, tiro.

<sup>26</sup> Mwitaa tuvata nraakye qoravanto mwi quara rietama Jesusira kyapara hita tiqata, Airi inraikya vataariva Kotiva ntaqikyianinraqi hia qio virera, nai ta vaisivave qio variraro Kotiva mwia vitaananrove? tita.

<sup>27</sup> Mwitaa tuvaro Jesusiva mwihua timwa nyinro tiqaro, Mwatani varihua mwihua nkyiari nraahu variqata hiama qio vivarave. Kotiva mwihua kyaahaqa hiratama mwihua qio vivarave. Kotiva ekyaa kyaiqa vare varivave, tiro.

<sup>28</sup> Mwitaa tuvaro Pitaava tiqaro, Taqaante. Tirenramwu i vataqi virera hiqata, teta hunanra ekyaa inraikya mwini kyeta qatima nrunro, tiro.

<sup>29</sup> Mwitaa tuvaro Jesusiva tiqaro, Eo, qutaama tira hiaro. Nte qianinra riaate. Vaisivanto Kotiva ntaqikyiani kyaiqarara rieqaro nai mwaatave, nai nraatave, nai qata vakyaahuave, nai nrohua qohuave, nai nraaqiarave, mwiva mwihua mwihua mwini kyero Kotira kyaiqa vararero viraro

<sup>30</sup> Kotiva hiama eqaanarove. Kotiva mwi vaisira mate mwaa entaravata mwia qjata airiqama kyero mpo inraikya mwianarove. Mwinro nraakiaravata mwinranro mwi vaisiva ekyaa enta qati variqiro quananrove, tiro.

### *Iesusiva nai qutu quaninranra qaiqaa tura*

(Matiu 20:17-19; Maaki 10:32-34)

<sup>31</sup> Jesusiva nai nraaqiara 12 nramwu nraahu sita mpo sata kyero timwa nyinro tiqaro, Riaate. Nte mwatani mwatatai nraaqiaravama varuqo. Tirenramwu Ierusaremini quararo haaru poropeti vaisinramwuvanto nianra ekyaa qua qara ntumwa to quava qutaa mwivauma vahiananrove.

<sup>32</sup> Ni ntavaaqavuqita uro mpo mwatanaahua kyaquqji kyaivata mwi mwatanaahua nianra raima mateta, nianra uaquia hi quara timwa mateta, niqaa taara vihivarave.

<sup>33</sup> Mwitaamaqi viqata mwihua ni kyaamwuqo ntuqutu mateta, ni pitaqita ru kyaivae nte taarampo enta variariro (Kotiva ni vara qati sivuma kyairae) nte qati variqi quaninrave, tiro.

<sup>34</sup> Jesusiva mwitaa tuvata mwia nraaqiaranramwuvanto hia mwia qua ntapihi kye riora. Mwi quara okyaravanto uqeta viro vahuvata mwihua tiqata, Jesusiva nanra quave tiho? Hia tirenramwu mwia qua ntapihuro, tita. Turama.

### *Iesusiva vu qipavu vaisira ntapairi kyora*

(Matiu 20:29-34; Maaki 10:46-52)

<sup>35</sup> Jesusiva Ieriko qaumato vuvaro vaisi mpovanto vu qipa vuva aanra tokyani variqaro mpo inrakya mpo inraikyara nyaanru tiqaro mpiate ti varu vaisiva variqaro riovata

<sup>36</sup> nraakye qora airivanto mwisaita nritareqata vi varuvaro mwiva mwihua kyapara hiro tiqaro, Taqaate. Nanra inraikyave uti variavo? tuvata

<sup>37</sup> mwihua mwia timwa mwita tiqata, Iesusiva Nasaretinyaava nritare vi variho, tura.

<sup>38</sup> Tuvaro mwiva aakyara ntamwa kyero tiqaro, Iesusio, Ntevitira mwaaquo, qati nianra po kye timwa mataante, tiro.

<sup>39</sup> Mwitaa tuvata nraakye qoravanto mwia vuni varuhua mwia inronra hita tiqata, Eqera tirema variante, tuvaro mwiva hia mwihua qua riaraitiro, qaiqaa nraahu aakyara ntero tiqaro, Ntevitira mwaaquo, qati e nianra po kye timwa mataante, tiro.

<sup>40</sup> Mwitaa tuvaro Iesusiva uro mwiaqaa siviro variqaro vu qipa vu vaisira mwia viteta nte hunani nriate tuvata mwia vitaqita nrumu mwiva hunani kyovaro Iesusiva mwia kyapara hiro tiqaro,

<sup>41</sup> Nivanto i nataa hiarive tirave e nianra aakyara nte variaro? tiro. Tuvaro mwiva tiqaro, Nronrao, e ni pu ntapairi kyaanterama nte iara aakyara tuqo, tiro.

<sup>42</sup> Mwitaa tuvaro Iesusiva mwia timwa mwinro tiqaro, Vu ntapairi kyera taqaante. E nianra mwiva ni kyaahaqa hianinrave qiararoma i vu ntapairi viho, tiro.

<sup>43</sup> Mwitaa tuvaro qamwanrama kyero mwia vuvanto ntapairi vuvaro qio taqebaro mwiaqatairo mwiva Kotira nrutu tuaahereqaro Iesusira vataqiro vuvata nraakye qora ntuaantuama vita varuhua mwihuavata mwia taqeta Kotira nrutu tuaahere varura.

## 19

### *Sakiasira qua*

<sup>1</sup> Iesusiva Ierikoqi urontero mwatukya mwipi vi varuvaro

<sup>2</sup> taakisi vare varuva nronra vaisi Sakiasiva airi inraikya vatova mwini varura.

<sup>3</sup> Mwi vaisiva tiqaro, Iesusiva nai nataa hi vaisivave iho? timwa kyero mwia taqaankye tuvata airi nraakye qora ututuma vita varuvaro mwiva qiqu vaisiruvantora tiro, hia qio Iesusira taqaaqara hora.

<sup>4</sup> Mwitaa huvaro mwiva hiantero Iesusiva quani aanranraqaa mwiva nraante uro ntero Iesusira taqarero kyatariqi nriviro varura.

<sup>5</sup> Mwipi varuvaro Iesusiva nri ntero tuaahera kyero viri mwia taqero Sakiasirara tiqaro, Sakiasio, qamwanrama mpiami ntaante. Mate nte i nraamwuqi uro varianinrave, tiro.

<sup>6</sup> Mwitaa tuvaro Sakiasiva qamwanrama mpiami ntero mpoqama kyero qamwata kyero Iesusira vitero uro nai nraamwuqi kyovata

<sup>7</sup> nraakye qoravanto taqetama nrutu nraunru titi tiqatama, Mwi vaisiva qora vaisi mpuara vaisi nraamwuqima viho, tura.

<sup>8</sup> Mwitaa tuvaro Sakiasiva siviro nronra vaisi Iesusira timwa mwinro tiqaro, Nronrao, riaante. Nte iara rieqanama ntena hu inraikyara utaqaa ntainra kyena hini vehi nraakye qora nyinrenrave. Nte taakisi vareqana mpora munima unra timwa kyena mpoqivata varaankyera, hia nai kuaa nani mwinrenrave. Nte erahiamuaantema nani mwinrenrave, tiro.

<sup>9</sup> Mwitaa tuvaro Iesusiva mwihua timwa nyinro tiqaro, Nte mate mwaa nraamwunraqi vera ntena taqauqata nkye uaquia hi aanranra qaqlira kyeta Kotira aanraqaa virerata uti variavo. Mwaa vaisiva Evarahaamunra kuaa okyaravantoma variho.

<sup>10</sup> Nte mwatani mwatatai nraaqiarava variqana nte raupirima vi vaisihua puaama kyaariro Kotiva sitaarive tina nruvave, tiro. Iesusiva mwitaa turama.

### *Nai kyaiqa vaisi 10 nramwu munima nyunraqa ntumwa kyero tura (Matiu 25:14-30)*

<sup>11</sup> Iesusiva qua timwa nyuvata nraakye qoravanto mwi quara rieta nkyiari rieta tiqata, Iesusiva Ierusaremi qaumatoma nrumu variho. Kotiva mwia kepukya mwinranro mwiva nronraqama viro tiriqaa ntaqikyari entava qaumato vaiho, tita.

Mwihua nkyiari riemwa kyeta mwitaa ti varuvaro

<sup>12</sup> Iesusiva mwaa quaraqaa ntumwa kyero timwa nyinro, Nronra vaisi mpovanto tiqaro, Nte nyianra mpo mwatani uro variarita ni nronraqama kyaivaqena nte vunyaa vaisiqama vina uro ntantena nrinrenrave, turave.

<sup>13</sup> Timwa kyero mwiva virera hiro nai kyaiqa vaisi kyauqurutana nyaanrama kyero mwihua munima 20 kinaa 20 kinaa nyinro tiqaro, Mwaa munimanraqotaita uro kyoqaa kyaiqa vare varivaqenama nte uro ntantena nrinkye, turave.

<sup>14</sup> Mwitaa timwa kyero vuvata mwi mwataraqi varuhua hia mwi vaisirara kyakya huvata mwihua vaisi mponramwu siteta tiqatama, Nkye mwia nraakiara viqatama mwitaama qiate. Mwi vaisiva uro nronraqama viro vunyaa vaisi vari viro uro ntantero hiama nrumu tiriqaa ntaqikyiananrove qiate, turave.

<sup>15</sup> Mwi mwatanaahua mwitaa timwa kyeta varuvaro nronra vaisi mwiva mpo mwatani uro varuvata mwia nronraqama kyovaro mwiva mwini variro uro ntantero nrumu nai kyaiqa vaisi haaru munima nyuhua nyaanrama kyero tiqaro, Nte munima nyunraqo kyaiqa utu kyeta nataamave varaavo? tiro.

<sup>16</sup> Tuvaro mwia kyaiqa vaisi mpovanto nri ntero tiqaro, Nronrao, Munima 20 kinaa mpiarana nte mwiaqo kyaiqa utu kyena 200 kinaa varauqo, turave.

<sup>17</sup> Mwitaa tuvaro nronra vaisi mwiva tiqaro, E kyugema kyera kyaika varaaro. E pata kyaiqa kyugema kyera varaananra nte mwianra rieqana nronra kyaiqa i mwinrenrave. Nte i nronraqama kyaarira e mwatukya kyauqurutanaqaama ntaqikyianrave, turave.

<sup>18</sup> Mwitaa tuvaro mwia kyaiqa vaisi mpovanto nri ntero tiqaro, Nronrao, munima 20 kinaa mpiananraqo nte kyaiqa utu kyena 100 kinaa varauqo tuvaro

<sup>19</sup> mwi vaisirara tiqaro, Nte i nronraqama kyaarira e mwatukya hini kyauquruqaa ntaqikyianrave, turave.

<sup>20</sup> Mwitaa tuvaro mwia kyaiqa vaisi mpovanto nri ntero tiqaro, Nronrao, munima 20 kinaa mpiananra mwaa ena qati varaante. Nte mwi munimanra tavunaqo qapuqama kyena uqeta taurave.

<sup>21</sup> E kyaiqara vuaviraavira ti variarava variarana nte i nraatu aatu hiqana varuqo. E mpohua hia inraikyara api varaaravave. E mpohua vara tutaara uro api vanti variaravave, turave.

<sup>22</sup> Mwitaa tuvaro nronravanto tiqaro, E kyaiqa vaisi uaquia hiaravama variaro. Nte ina qua mwianra rieqana nte iqaa qua vatarerave. E nianra tiqara, E kyaiqara vuaviraavira ti variaravave. E mpohua hia inraikyara api varaaravave. E mpohua vara tutaara api vanti variaravave, qiananrave.

<sup>23</sup> E mpo, mwitaa timwa kyera nanraqamave hia mwi munimanra mpenki nraamwuqi uro vatera hiaro? Mwitaa hiaratiri, nte vuva uro ntantena nrumu variqana mwi munimanravata, mwipi vataananranra rieqana munima pata mpoqiatanavatama varautirio, turave.

<sup>24</sup> Mwitaa timwa kyero mwiva mwini sivi varuhuara tiqaro, Mwi vaisira munima mwia ntavihi kyeta munima 200 kinaa vatai vaisira mwiate, tuvata

<sup>25</sup> mwihua qaqao tita, Mwi vaisiva munima 200 kinaa vaakya vataivave, tuvaro

<sup>26</sup> mwiva tiqaro, Nte qianinra riaate. Mpo inraikya vaakya vataari vaisiva mpoqiatava varaananrove. Hia mpo inraikya vataari vaisiva variraro mwiva hiani inraikyara pata mwipiara vara kyaananrove, turave.

<sup>27</sup> Mwitaa timwa kyero mwiva tiqaro, Vaisi mponramwuvanto nianra hia mwutukya ntihata hia tiriqaa ntaqikyiananrove qia vaisihua, mwihua sitaqita nrumu ni puqaa kyeta ru taiqa kyaate, turave, tiro. Iesusiva turama.

*Nraakye qoravanto Iesusira qamwata mwate varuvaro mwiva Ierusaremiqi vura  
(Matiu 21:1-11; Maaki 11:1-11; Ioni 12:12-19)*

**28** Iesusiva mwitaa timwa kyero Ierusareminianra mwiva nraante viro.

**29** Mwiva vuva Mpetapaasivata, Mpetaanivata, Oripi taaqi nrunroqi vahu mwatuky-atana qaumato nrintero Iesusiva nai nraaqiara taaratana sitero tiqaro,

**30** Nkyetana vutu mwatukyaraqi quate. Nkyetana vihua uro taqaivaro mwi mwatukyaraqi ntonki qaraakya kyaantaru taariva variananrove. Mwi ntonkira hia vaisivanto mwia mwoqaqa mwatakyaa viro nrohi ntonkirave. Nkyetana uro mwia puaama kyetama ntatu kyeta mwaini vitaqita nrumu mpiae.

**31** Mpovanto nkyitananra nanraqamave nkyetana mwia ntati variavo tirera, nkyetana mwitaamama timwa mwiate, Tiritana nronravanto mwianra tihata nrunro qiate, tiro.

**32** Iesusiva mwitaa timwa kyero mwitanahua sitovata vuhua uro taqovaro Iesusiva tuntema kyero vhura.

**33** Mwitanahua ntonki ntati varuvata ntonki mwia qohua mwitanahuara tiqatama, Nkyetana nanraqamave mwia ntati variavo? tuvata

**34** mwitanahua tiqata, Tiritana nronravanto mwianra tihatama nrunro, tita.

**35** Mwitanahua mwitaa timwa kyeta ntonki mwia vitaqita Iesusira uro mwita.

Uro mwita mwihua nkyiari vaaqa ntonki mwia mwoqaqa vuti mwateta Iesusira kyaahaqa huvaro Iesusiva mwiaqaa mwaanri ntero mwatakyaa viro varura.

**36** Iesusiva mwatakyaa viro aanraqaa vi varuvata nraakte qoravanto Iesusira qamwata mwatarerata nkyiari vaaqa aanravau vuti tovaro

**37** Iesusiva Ierusaremi qaumato Oripi taaqiqatairo vu aanranraqaa uro ntovata mwia vataqi nruhua airivanto ntuvantuama vita aakyara ntamwaqi viqata Iesusirara kyuqeve tiqata mwia kyaiqa taqorara rieqata Kotira nrutu tuaaheraqita vurama.

**38** Mwihua tiqata,

Nronravanto nai nrutuqa nri vari vaisira  
kyuqema mwataiho.

(Ihi 118:26)

Kotiva nyaamwusairo

tiri mwaateraqama timwa taananrove.

Kotiva nyaamwu virini varihata

tire mwia nrutu nronraqama kyauro, tita.

**39** Nraakte qoravanto mwitaa timwaqita vi varuvata Parisi vaisinramwuvanto mwini varuhua Iesusirara qaqao tita, Mwaanra ti variara vaisivao, ena nraaqiaran-ramwuanra tirema variate qianta, tuvaro

**40** Iesusiva mwihua nkyiari timwa nyinro tiqaro, Mwihua tirema varivera, aanraqaa vahi oriva, mwivama aakyara nteqaro ni nutu tuaaheraaanrove, tiro.

### *Iesusiva Ierusaremiqinaahuara ntatora*

**41** Iesusiva mwitaa timwa kyero Ierusaremini qaumato nri ntero mwatukya nronra mwia taqero mwianra ntatero tiqaro,

**42** Po, e mwaateraqama vi vari aanranra taqaataara vahara hia taqaananrave. Mwi aanrava tuqeta vaharara tira, hia taqaaro.

**43** Mpo enta nri ntairata i nramwutaahua i rirerata i vara ututuma teta vasaamwunra tokyasataa mwata quvukye ntamwa teta mwiaqatai ivata ntaqivarave. Mwitaa hiqata ena kyaahaqa hina aanranravata titaa titama kyeta i antua tevarave.

**44** Mwihua i nraatara kyeta ivata, i utaqi vari nraakte qorahuavata, ru taiqa kyeverave. Kotiva i kyaahaqa hiari entava vahara e hia mwianra riaaro. Mwia kyaara i taiqa kyeta ekyaa ori nraamwu taaqau vahianinra ekyaa ntuvuraavurama kyaivaro hiama kuaiqvantovata qati vahiananrove, tiro.

### *Iesusiva Kotira nraamwuqitairo nraakte qora vara veva kyora*

(Matiu 21:12-17; Maaki 11:15-19; Ioni 2:13-22)

<sup>45</sup> Iesusiva mwitaa timwa kyero uro Kotira nraamwuqi vera ntero taqovata kyoqaa uti varu vaisihua mwiqi variqata kyoqaa kyaiqa vare varuvaro Iesusiva mwihua sata veva mwaatani kyero tiqaro,

<sup>46</sup> Kotira mpukuqi Kotiva mwitaama turave:  
Nraakye qoravanto ni nraamwuanra Kotirara aakyara  
nte nraamwunrave tivarave, turave.

(Aisaiaa 56:7)

Nkye variavaro mwaa nraamwuva mpuara vaisivanto uqeta vita variqata mpuara vare varia nraamwunra votima kyero vaiho, tiro.

<sup>47</sup> Mwitaa timwa kyero Iesusiva mwiaqaatairo mpo enta mpo enta uro Kotira nraamwuqi variqaro nraakye qora qua mwakyaakya timwa nyiqiro viro.

Mwitaamaqiro vuvata Kotira nraamwuqi Kotira kyaiqa vare varu vaisihua mwihua nronra vaisinramwuvata, mwaanra okyara ti varu vaisihuavata, nronra vaisi mponramwuvantovata, mwihua Iesusira rukyaare titi taqovata

<sup>48</sup> nraakye qora airivanto Iesusira qua nraahu riaataa huvata rie varuvata nronra vaisinramwuvanto mwia rukye aanranra puua huvaro hia vhura.

## 20

*Iesusirara tava i nronraqama kyaiharave e mwitaamaqira vi variaro tura*  
(Matiu 21:23-27; Maaki 11:27-33)

<sup>1</sup> Mpo enta Iesusiva Kotira nraamwuqi mwakyaakya kyuqe mwakyaakya nraakye qora timwa nyiqiro vuvata Kotira nraamwuqi Kotira kyaiqa vare varuhua mwihua nronra vaisinramwuvata, mwaanra okyara ti varuhuavata, nronra vaisi mponramwuvantovata, mwihua nri nteta

<sup>2</sup> Iesusira inronra hita tiqata, E ta vaisiva variqarave e mwaa kyaiqara vare variaro? Tava i nronraqama kyaiharave e mwaa kyaiqara vare variaro? Tiraqe riaare, titi.

<sup>3</sup> Mwihua mwitaa tuvaro Iesusiva tiqaro, Kyai nte nkyi nraante kyapara hiankye.

<sup>4</sup> Tava Ioninra nronraqama kyovaro Ioniva nraakye qora nramanri nyunrave? Kotivave iho? Qumina nraakye qoravantove iho? Nkye timwa mpiavaqe riaankye, tiro.

<sup>5</sup> Iesusiva mwitaa tuvata mwihua nkyiari kyapara hita tiqata, Tire nataave qiananrave? Tire tiqata, Kotiva mwia nronraqama kyorave, qiararo mwiva tiriara nkye nanraqamave Ioninra quara hia quataave qiaovo qiankyorave.

<sup>6</sup> Tire tiqata, Qumina vaisivanto mwia nronraqama kyorave, qiarata nraakye qora mwaaqi ntuvantuama vita variahua origo tiri aavata ntuqutu kyevorave. Qumina nraakye qora mwaahua Ioninranra mwiva poropeti vaisivanto Kotira qua ti varuvave ti variarave, titi.

<sup>7</sup> Mwihua mwitaa timwa kyeta Iesusira timwa mwita tiqata, Nai tava Ioninra nronraqama kyorave? Hia tire ntapihuro, titi.

<sup>8</sup> Mwitaa tuvaro Iesusiva mwihua timwa nyinro tiqaro, Nkye hia ni timwa mpiavana ntevata ni nronraqama kyaihana mwaa kyaiqara varaura okyara hia nkyitavata timwa nyianinrave, tiro.

*Uaini aakyo vara tutoraqaa ntumwa kyero tura*  
(Matiu 21:33-46; Maaki 12:1-12)

<sup>9</sup> Mwitaa timwa kyero Iesusiva mwaa quaraqaa ntumwa kyero timwa nyinro tiqaro, Vaisi mpovanto uaini aakyoqi vara tutoero mwiaqaatairo nyianrani virera hiro vaisi mpo uhuara tiqaro, Nkye ni aakyoqaa ntaqikyi mate varivaqe nte nyianrani quangye, timwa kyero nai mwaata mwini kyero mpo mwatani mpuahaama varirero vurave.

<sup>10</sup> Mwini uro varuvaro uaini hiqo entava nri ntovaro mwiva nai kyaiqa vaisi mpo titero tiqaro, Uro ni aakyoqaa ntaqikyiahua tirata ninanivata uaini hiqukye mataate, tuvaro mwini vuvata mwia kyaiqa vaisi mwia ntuqutu kyeta vatovaro mwiva hia uainivata vararaitiro, qati uro ntantero nrunrave.

<sup>11</sup> Nruvaro mwiva nai kyaiqa vaisi mpo titovaro vuvata mwiavata ntuqutu kye vateta kyaurira inraikya mwivavata qati uro ntantero nrunrave.

<sup>12</sup> Mwitaa huvaro aakyo qova nai kyaiqa vaisi mpo titovaro vuvata aakyoqaa ntaqikyi varuhua mwiavata ntuqutu kye teqaaqama kye vateta vitaqita mwaaqani mwaati tuto kyorave.

<sup>13</sup> Mwitaa huvaro aakyo qova tiqaro, Nte nataave hianinrave? Kyai nte ntene maaqu mwianra mpoqiaavata ni mutukya vahira titaarita mwianra mwia mwaaquvantove timwa kyetama mwia kyuqema mwatevarave, turave.

<sup>14</sup> Mwitaa tuvaro mwia mwaaquvanto vuvata mwia aakyoqaa ntaqikyuhua mwia taqeta tiqata, Mwaa mwia mwaaquvanto nriho. Nrivaqe mwia ru kyaararo mwia aakyovanto tirini vahiarive, turave.

<sup>15</sup> Mwitaa timwa kyeta mwihua aakyoqitaita mwia vara mwaati mwaaqani kyeta ru kyorave, tiro. Iesusiva mwitaa timwa kyero mwihua kyapara hiro tiqaro, Mwihua mwitaa hurara tiro, aakyo qova nai mwaaqu rukyera kyaara nataave hiananrove?

<sup>16</sup> Aakyo qova nri ntero aakyoqaa ntaqikyi vaisihua ru taiqa kyero mpohuarama ni utaqaa ntaqikyi mataate qiananrove, tiro.

Iesusiva mwitaa tuvata nraakye qora mwipi ntuvaantuama vita varuhua qaqao tita, Hiama mwiva mwitaa hiananrove, tuvaro

<sup>17</sup> Iesusiva mwihua taqero mwihua kyapara hiro tiqaro, Mwaa quava Kotira mpukuqi qara ntumwa tova nanreve tiho? Mwi quara okyara ni timwa mpivaqe riaankye. Mwitaama tiho:

Ori nraamwu hoqevaro ori mpo,  
hia kyuqe hirave timwa kyero qaqlira kyaiva,  
mwi oriva puhaqama viho, turave.

(Ihi 118:22)

<sup>18</sup> Ori mwiaqaa tuto ntuaninra toqa ntupepaama pataqia pataqama kyaananrove. Mwi oriva vaisi mpoqaa tumu ntirera, vaisi mwia rukyero mumuni utu kyaananrove, tiro.

<sup>19</sup> Mwitaa tuvata mwaanra okyara ti varu vaisihuavata, Kotira kyaiqa vara mwate varuhua mwihua nronranramwuvantovata, mwihua tiqata, Mwiva mwi quara tiriqa ntumwa kyero tiho, timwa kyeta Iesusira mwipi tu varaare tuvata nraakye qora airivanto varuvata mwihuara aatu hita hia mwia tu varora.

### Taakisiga hirara Iesusira kyapara hora

(Matiu 22:15-22; Maaki 12:13-17)

<sup>20</sup> Mwihua nraakye qora nraatu aatu hiqata hia Iesusira tuvararaitita, qatinasaita mwia aitutuhi variqata vaisi mponramwu siteta tiqata, Nkye qumina vaisi nraantantamwa kyeta uro variqata mwia qua riemwaqita vivaro mwiva api qua tirata nrumu tirivata huntu kyaivaqe uro kamanira nronra vaisi timwa mwianranro mwiva nrumu Iesusira tu varaarive, tita.

<sup>21</sup> Mwitaa tuvata vaisi mwinramwuhua uro Iesusrara mwitaama tita, Mwaanra ti variarao, tire taqaurara e nraakye qora ntapihi kyeqara qua mwakyaakya timwa nyi variaravave. E nronra vaisiaravata, pata vaisiaravata, kuaa qarama kyera nraahu qua qiaravave. E vaisivanto Kotira aanraqaa virara ntapihi kyera timwa nyi variaro.

<sup>22</sup> E mwaa quara tiri timwa timwinraqe riaare. Tire Kotira qua rieqata qiove tire Romeni mwihua nronra vunyaa vaisi Sisaara taakisiga mwiananrave? tita.

<sup>23</sup> Mwitaa tuvaro mwiva api qua qiarive tita tu quara Iesusiva ntapihi kyero, mwiva mwihuara tiqaro,

<sup>24</sup> Munima mpoqia vara kyaivaqe taqaankye, tiro. Tuvata mwihua munima mporu vara kyovaro taqero tiqaro, Munima mwiaqaa tara virivata tara nrutuvatave vaiho? tiro. Tuvata mwihua tiqata, Sisaarave, tura.

<sup>25</sup> Tuvaro Iesusiva mwihua timwa nyinro tiqaro, Mwianra rieqatama nkye Sisaava hianinra nai mwiate. Nkye Kotiva hianinra nai mwiate, tiro.

<sup>26</sup> Iesusiva mwitaa tuvata mwihua Iesusiva nraakye qora suqaa api qua tiraqe mwia tuvaraare titi taqovarovata mwiva hia api qua tuvata mwihua Iesusiva qua tura rieta qikye titi, Mwiva tiri quavata nraatara kyero kyuqe quama tiho, timwa kyeta mwihua kyauqu ntukikinraaqata kyeta tirema varura.

*Saitiusi vaisinramwuvanto qutu vita qaiqaa qati sivirara Jesusira kyapara hura  
(Matiu 22:23-33; Maaki 12:18-27)*

<sup>27</sup> Vaisi mponramwu Saitiusi vaisinramwuvanto tiqata, Vaisivanto qutu viro ekyaarama taiqa viro hiama qaiqaa siquananrove, ti varuhua uro Jesusira kyapara hita tiqata,

<sup>28</sup> Mwaanra ti variara vaisio, tiri haivaqava Mosesiva mwaanra qua tiri timwa timwiqanro mwitaama qua vatorave. Vaisi mpovanto hia nraaqiara mwataraitiro, qutu viraro mwia qatavantove mwia vakyaavave mwia nraata varatero nraaqiara mwata kyero nai qora mwaatana vataarive, turave.

<sup>29</sup> Tire qiananra riaante. Haaru qate vakye 7 nramwu varurave. Mwinramwuhua sakyavaa nraakye varatero hia nraaqiara mwataraitiro, qutu vuvaro

<sup>30</sup> mwia nanaava mwia nraata varatero mwivavata hia nraaqiara mwataraitiro, qati qutu vurave.

<sup>31</sup> Mwiva qutu vuvaro mwia nanaava nraakye mwia varatero mwivavata hia nraaqiara mwataraitiro, qutu vuvaro mwiaqaataita hini mwihuavata mwitaamaqi vita uro ekyaa qutu vurave.

<sup>32</sup> Mwihua ekyaa qutu vuvaro nraakye mwivavata nraakiara variqi viro qutu vurave.

<sup>33</sup> Nraakiara nraakye qoravanto qaiqaa qati sivita vari entaraqaa mwi nraakyeva tara nraatave variananrove? Mwiva qati varu entara qoraisi 7 nramwu varatorave, titi.

<sup>34</sup> Saitiusi vaisinramwuvanto mwitaa tuvaro Iesusiva mwihua nkyiari timwa nyinro tiqaro, Mate mwaama mwatani varia nraakye qorahua nai vare nai vare hiavo.

<sup>35</sup> Nraakiara Kotiva taqairata nyaamwuni virara qioqa ihua mwihua qati vara sivuma kyairata mwihua mwini uro qati variqi viqata hiama nraata vaati varevarave.

<sup>36</sup> Mwihua nyaamwunyaahua votima kyeta variqata hia qaiqaa qutu vivarave. Kotiva mwihua nkyiari quntamwa teraqitairo qati vara qaiqaa sivuma kyaaninranra titi, mwihua Kotira nraaqiarama varivarave.

<sup>37</sup> Vaisivanto qutu viro qaiqaa qati siquainranra nkyi haivaqava Mosesiva mwi quara qara ntumwa torave. Kotiva qia ite varu kyatariraqitairo Mosesirara qua tu entara Mosesiva Kotirara mwitaama kyero qara ntumwa tero tiqaro, Kotiva Ēvara-haamunraqaavata, Aisaakiraqaaavata, Iaikopuraqaaavata, ntaqikyi varivave, turave.

<sup>38</sup> Qio riaate, ekyaa enta variva, Kotiva hia qutu viro taiqavi inraikyaraqaa ntaqikyi varivama varirave. Mwiva qati variqi vi inraikyaraqaa ntaqikyi varivama varirave. Vaisivanto qutu viharo Kotiva qati variahuaqaa ntaqikyintema kyero mwiva mwana-raquraqaa ntaqikyi varirave, tiro.

<sup>39</sup> Iesusiva mwitaa tuvata mwaanra okyara tuhua hinivanto tiqata, Mwaanra ti variara vaisio, e kyuqe quama nkyiari hiniqama kyera timwa nyianro, titi.

<sup>40</sup> Mwihua aatu hiqata hia qaiqaavata Jesusira kyapara hiare timwa kye mwitaa tura.

*Iesusiva Mesaiaara mwihua kyapara hura  
(Matiu 22:41-46; Maaki 12:35-37)*

<sup>41</sup> Iesusiva mwihua kyaparama nyateqaro mwitaama tiro: Mpo hia vaisihua tiqata, Kotiva titaariva Mesaiaavanto Ntevitiva mwatataanira mwi naaquntaraqaaanaavama variananrove, ti variarave. Nanraqamave mwihua mwitaa ti variavo?

<sup>42</sup> Ntevitiva nai qara ntumwa to mpukuraqi nai tiqaro,  
Kotiva ni nronra vaisiara tiqaro,  
E nritarera ni kyaqu kyaatutani  
mwatakyaa vira variraqe

<sup>43</sup> nte i nramwutaahua nraatara kye ru taiqa kyaarira  
e mwihuqaqaa kyuqu ntamwa taante, turave.

(Ihi 110:1)

<sup>44</sup> Ntevitiva haaru mwitaama kyero qara ntumwa torave. Ntevitiva Mesaiaavanto qovara hianianranra tiqaro, Ni nronra vaisive, turave. Ntevitiva mwitaa turara tiro, nataama kyerove Mesaiaavanto Ntevitira nraisi variananrove? tiro.

### *Mwaanra okyara tu vaisihua qora kyaiqara rauriqata variate tura*

(Matiu 23:1-36; Maaki 12:38-40; Ruku 11:37-54)

<sup>45</sup> Iesusiva mwihuqaqaa kyaaparama nyatovata nraakye qora mwiqi varuhua mwia quarie varuvaro Iesusiva nai nraaqiaranramwuanra tiqaro,

<sup>46</sup> Mwaanra okyara ti varia vaisihuara rauriqata variate. Nraakye qoravanto mwihuqaqaa kyaaparama nyatovata nraakye qora mwiqi varuhua mwia quarie varuvaro Iesusiva nai nraaqiaranramwuanra tiqaro.

<sup>47</sup> Mwihuqaqaa kyaaparama nyatovata nraakye qora mwiqi varuhua mwia quarie varuvaro Iesusiva nai nraaqiaranramwuanra tiqaro.

## 21

### *Vehi nraakyevanto munima pataqia Kotirani taquqi kyora*

(Maaki 12:41-44)

<sup>1</sup> Iesusiva Kotira nraamwuqi variqaro taqovata airi inraikya vato vaisihua nri nteta Kotira kyaiqara rieqatama munima nronraqama kye taquqi mwaati kye varura.

<sup>2</sup> Iesusiva taqe varuvaro tetoqa nraakye hia mpo inraikyavata vatova vehi nraakyevanto nri ntero mwivavata taquqi munima uapaara taararu mwaati kyora.

<sup>3</sup> Mwiqi mwaati kyovaro Iesusiva tiqaro, Taqaate. Vehi tetoqa nraakyevanto kyai munimava ekyaa inraikya vataahua kya munimanravata nraatara kyaiho.

<sup>4</sup> Airi inraikya vate variahua mwihuqaqaa kya munimanravata nraatara kyaiho. Mwi nraakyeva vehi variqaro nai vatai munimanra ekyaa kyaiharo hia kyaravata vara nraanriva vaiho, tiro. Iesusiva turama.

### *Kotira nraamwu ntuarakuraakurama kye taiqa kyerara tura*

(Matiu 24:1-2; Maaki 13:1-2)

<sup>5</sup> Vaisi mponramwuvanto Kotira nraamwuqaa kya kyaatutani, Nraamwu kyuqu kya mwiqaa kyaatutani. Nraakye qoravanto Kotirara rieqata munima kyaavata ori kyuqu kyaatutani, Nraamwu kyuqu kyaatutani.

<sup>6</sup> Mwitaa tuvaro Iesusiva tiqaro, Nkye mate nraamwu mwaat mwiqaa kyaatutani. Nraakye qoravanto Kotirara rieqata munima kyaavata ori kyuqu kyaatutani, Nraamwu mwaat mwiqaa kyaatutani.

### *Muaanra airivanto qovara hianinranra tura*

(Matiu 24:3-14; Maaki 13:3-13)

<sup>7</sup> Iesusiva mwitaa tuvata mwihua tiqata, Mwaanra ti variarao, taireve mwitaa hiananrove? Nanra inraikyavanto qovara hiraqe tire mwiaqaa vitama kye taqetave mwi entava nrianriva qaumato vaiho qiananrave? Tiri timwa timwinraqe riaare, tita.

<sup>8</sup> Mwitaa tuvaro Iesusiva tiqaro, Mpovanto mwi quara nkyi api timwa nyiankyo tita rauriqata variate. Nraakiara vaisi airivanto nrinte ni nutu nteta tiqata, Kotiva ni titaihana nruva, nte mwaa mwivama varuqo. Qio mwi entava nri ntaiho, tivarave. Mwihua mwitaa tivata hia mwihua sataqita quate.

<sup>9</sup> Nkye variqata riaivaro mpo mwatanaava mpo mwatanaanravata ntaqirata nkye hia aatu hiate. Kamaniva nai henanra mpovatama kyero ntaquqiro virata nkye hia aatu hiate. Mwi inraikyava nraante qovara hiananrove. Mwitaa mwitaa hirata hia ekyaara enta nri ntaiho qiate, tiro.

<sup>10</sup> Iesusiva mwitaa timwa kyero mwiva qaiqaavata timwa nyinro tiqaro, Mpo mwatanaava mpo mwatanaanravatama kyero ntaquananrove. Vunyaa vaisi mpov- anto vunyaa vaisi mpovatama kyero ntaquananrove.

<sup>11</sup> Nraakiara ekyaas mwata vahiarintema nronraqama kyero mwatura tuananrove. Kyaravanto hia vahirata aara nte entava mpoqi mpoqi vahiananrove. Nyiqa quari entava vahiananrove. Nyaamwuqi nraatuqa taani inraikyara mpo inraikya mpo inraikya taqeta tiqata, Qikye, mwaa nanra inraikyave taqauro, tivarave.

<sup>12</sup> Qakyo mwi inraikyava mwi inraikyava qovara hirata nkyi nraante ntavaaqavu kyeta uaqima nyatevarave. Mwihua nkyi sitaqita uro mwaanra nraamwuqi nkyi ko timwa kyeta nkyi karavuqi sitaqita uro kyevarave. Nkye ni kyaiqa vare varivatara tita, nkyi ntavaaqavuqita uro nronra vaisi vunyahua suqaa kyevarave.

<sup>13</sup> Nkyi sitaqita uro kyera mwi entara nkye ni qua mwihua timwa nyiva nkyiara kyuqe entama vahiananrove.

<sup>14</sup> Mwihua nkyi ko tirera hivata hia nkye nkyeta nraato tu kyeta mwi quara mwi quara tirerave qiate.

<sup>15</sup> Nte mwi entara nkyi kyaahaqa hiarita nkye kyuqe qua kepuuya qua tivarave. Nkye mwitaa tivata nkyi uaqima nyatehua hia nkyi qua qio nraatara kyevarave.

<sup>16</sup> Nraakiara nkyiqa qua vataate tita, nkyi nyohua sohuave, nkyi sata sakyaahuave, nkyi kuua nraanrevantove, nkyi totivantove, mwihuama nkyi qovarama kyaivata nkyi ntavaaqavu kye sitevarave. Nkyi ntavaaqavu kyeta nkyi mponramwu ru kyevarave.

<sup>17</sup> Ekyahua nkyiara Iesusira nraaqiarave tiqatama mwia kyaara mwihua hia nkyiara mwutukya vahirata varivarave.

<sup>18</sup> Mwihua mwitaa hivata nkye hia aatu hiate. Nkye qioma varivarave. Hia nkyi qia kyaahi kuaiqiavantovata raupiri hiananrove.

<sup>19</sup> Nkye kepuuyaqama kyeta varivera, nkye ekyaas enta qioma qati variqi vivarave, tiro.

*Ierusaremi ntamwa kyaivaro taiqa quani entarara tura  
(Matiu 24:15-21; Maaki 13:14-19)*

<sup>20</sup> Mwitaa timwa kyero Iesusiva tiqaro, Nkye mpo enta taqaivata ntaqi vaisihua Ierusaremi mwutukya vara ututuma taivatama nkye mwitaama qiate, Ierusaremi ntamwa kyaivaro taiqaari entava nrintaiho, qiate.

<sup>21</sup> Mwi entara Iutiaani varihua aatu ntugema kye hiantamwa teta verara ora tatari taaqini quate. Mwi entara Ierusaremiqi varihua mwiqitai sivita hiante aatu ntugema kyeta verara taaqipaara quate. Mwi entara Ierusaremi mwia tokya vaikya varihua mwatukya mwipi hia quate.

<sup>22</sup> Mwi entara Ierusaremini varihua nkyiari uaquia hi kyaiqara utira kyaara Kotiva mwihua ruananrove. Haaru Kotira mpukuqi qara ntumwa to quava qutaa mwivau vahiarive tiro, mwi entara mwi inraikyava qovara hiananrove.

<sup>23</sup> Mwi entara nraaqiara tuaqa hitave, nraamwa nyi vari nraakyehuara po tuqo. Mwi entara mwihuara hia kyuqe enta vahiananrove. Mwi entara mwaa mwataraqaa varihua tiqata, Qio matema raupirima quananrave, tivarave. Mwi entara Kotira raraqa tairaro mwaa mwatanaahua ntutuananrove.

<sup>24</sup> Mwi entara mpo mwatanaahua nri nteta paipa mpuahaqotaita mwaa mwatanaahua mponramwu rukyeta hini mwihuahntavaaqavu vareta mpo mwata mpo mwatani uro kyeverave. Mwi mwatanaahua hia Kotira qua riehua Ierusaremipi nro-hiqata mwi mwatukyara ntamwa ntatiqatama kyeverave. Mwihuahntavaaqavu variqi vivaro Kotiva qiove timwa taari entava taiqa virata vivarave.

### *Iesusiva nai qaiqaa tumuaninranra tura*

(Matiu 24:29-31; Maaki 13:24-27)

<sup>25</sup> Nraakiara nyaamwuqi huariqaave, toraqaave, qovoraqaave, vitama kye taqetama nraakye qoravanto tiqata, Qikye, po, nanra inraikyavanto qovarama virera uti variharove mwitaa iho? tivarave. Nraakiara vevara kyaareranra nronravanto nronraqama kyero nteqaro takaa hi varirata mpo mwatanaahua mpo mwatanaahua kyuqu kyuauqu ntirata aatu hiqata varivarave.

<sup>26</sup> Nraakiara nyaamwuqi vahiari inraikyava apiqama kyero vahiqaro qakyaa qakyaa hi varirata nraakye qoravanto mwia taqeta mpo inraikyavanto qovara hianinra vekya variqata nataave hiananrove timwa kyeta nraatuqa tero vuqitairo nrivu nrivu hirata tumu ntivarave.

<sup>27</sup> Mwitaa hi varirata mwihuahntaqe varivaqena nte mwatani mwatatai nraaqiarava nyaamwusaina tonamwuqi tumi variarita ni taqeverave. Nte mwunruqama taari inraikyava mpoqama kyero itero takyuqi varirage nte kepukyavanto tumuaninrave.

<sup>28</sup> Nraakiara mwi inraikyava mwi inraikyava mwitaama kye tohara tairata nkye mwaamwianrama vita qia tuaahera kyeta vateqata tiri kyaahaqa hiariva qio vainima vaiho qiate, tiro.

### *Iesusiva fikiqa ntumwa kyero tura*

(Matiu 24:32-35; Maaki 13:28-31)

<sup>29</sup> Iesusiva mwitaa timwa kyero mwiva mpo quaqaa ntumwa kyero timwa nyinro tiqaro, Kyatari qaampuakya tamwa voti hiraravata mpo kyatariaravata riaate.

<sup>30</sup> Nkye taqaivaro mwiva mwunri ntairata nkye mwiaqaa vitama kye taqeta tiqata, Huari nronraqama kyero itaari entava qaumaqa iho, tivarave.

<sup>31</sup> Mwia votima kyeta nkye taqaivaro mpo inraikyava mpo inraikyavanto qovara hirata nkye mwiaqaa vitama kye taqeta tiqata, Kotiva tiriqaa ntaqikyiari entava qaumatoma vaiho, qiate.

<sup>32</sup> Nte qutaama tuqo, Mwaa mwataraqaa varihua hia taiqa vivaro mwi inraikyara mwi inraikyarara tuva qovara hiananrove.

<sup>33</sup> Nyaamwuvantovata mwatavantovata taiqa viraro ni quavanto qati nraahu vahiqiro quananrove.

### *Nkye rauriqata variate tura*

<sup>34</sup> Nkye rauriqata variate. Nkye kyara airi nreta uera nramanri nreqata mwata mwaaqaanaa inraikyara nronraqama kyeta riemwaqita vivorave. Nkye mwitaa-maqita vivaro mwi entava nrihanrama nyatero nri ntairata nkye hia terama teta varivorave.

<sup>35</sup> Mwi entava mwaanra tita taintema kyero ekya mwata mwaaqa varihuaqa qovara hiananrove.

<sup>36</sup> Nkye rauru kyeqa variqi viqatama Kotirara aakyara ntaivaro mwiva nkyi kepukyaqama nyatairata nkye nraakiara nriani inraikyara nraatara kyetama ni mwatani mwatatai nraaqiarara vuqaa qio sivita varivarave, tiro.

<sup>37</sup> Jesusiva mwitaa timwa kyero mwiva mpo entanramwu variqaro Kotira nraamwuqi ihera nraakye qora mwakyaakya timwa nyiqanro entaqi uro Oripi taaqiqaa vaitata hura.

<sup>38</sup> Mwiva mwitaamaqiro vuvata nraakye qoravanto nai vaaota toqaqi nrumu Kotira nraamwuqi variqata Jesusira qua riora.

## 22

### *Mwihua Jesusira ru kyarerata uti varura*

(Matiu 26:1-5, 14-16; Maaki 14:1-2, 10-11; Ioni 11:45-53)

<sup>1</sup> Hia kyoto mperetirara nro entara mwia nrutu vekyahu nyato entarave tuva nri ntovata

<sup>2</sup> Kotira kyaiqa vare varuhua nronranramwuvata, mwaanra okyara ti varuhuavata, tiqata, Tire qumina Jesusira ru kyaarata nraakye qoravanto tiriara tivorave. Nataama kyetave tire mwia ru kyaananrave? tita.

<sup>3</sup> Mwitaa ti varuvaro Iutaasi Isikeriotiva, mwiva Jesusira nraaqiara 12 nramwuqi-tairo varuvaro Saataaniva mwia mwutukyaqi viqetero kyaahaqa huvaro

<sup>4</sup> Iutaasiva siviro Jesusira qovarama kyarerero uti variqaro Kotira kyaiqa vare varuhua mwihua nronra vaisivata, Kotira nraamwuqaa ntaqikyi varu pipohuavata, mwiva mwihua timwa nyinro tiqaro, Nte mwitaa mwitaa hiaritama nkye Jesusira ntavaaqavu kyaate, tiro.

<sup>5</sup> Mwitaa tuvata mwihua qamwata kyeta tiqata, Tire i munimave mwiananrave? tuvaro Iutaasiva eo timwa kyero

<sup>6</sup> mwiaqatairo variro tiqaro, Kyai nte taqaarita hia airi nraakye qoravanto mwivavata varivaqena mwi entara nte mwia uqeta kyena qovarama kyaankye, tiro.

### *Iesusiva tuvata vekyahu nyato kyarara tera hora*

(Matiu 26:17-25; Maaki 14:12-21; Ioni 13:21-30)

<sup>7</sup> Iutaasiva mwitaa timwa kyero varuvaro hia kyoto mperetira nro entava nri ntovaro (mwi entaraqaa haaru nyaamwunyaava hia mwihua haivaqahua ru kyaraitiro,) mwihua vekyahu nyatero (nritarero uro Isipi nraaqiara ru kyo) entarara rieqatama mwi mwatanaahua sipisipi nraati rukye entava nri ntora.

<sup>8</sup> Nri ntovaro Jesusiva Pitaakya Ionikya sitero tiqaro, Nkyetana uro vekyahu nyato kyarara terama taivaqe tire nraanre, tuvata

<sup>9</sup> mwitanahua mwia kyapara hita tiqata, Taraqive mwi kyarara terama taananrave? tuvaro

<sup>10</sup> Jesusiva tiqaro, Qio mwaini riaate. Nkyetana mwatukyaqi uro nteta vivaro vaisi mpovanto nramanri taqu kyaqa kyero varero aanraqaa nrianriva nrumu nkyitana qintorama kyairata nkyetana mwia vataqita vivaro mwiva nai nraamwuqi viqetairata nkyetanavata mwipi vera nteta

<sup>11</sup> nraamwu qorara mwitaama qiate, Mwaanra ti vari vaisiva iara tiqaro, Taraqive nte ntene nraaqiara kyapata vekyahu nyato kyarara nraaninrave? tiho, qiate.

<sup>12</sup> Nkyetana mwitaa tivaro mwiva nraamwu nronra mpo mwaanrini mwoqaqa vahira nkyitana nyaamwu tairata nkye mwiqima kyara terama taate, tiro.

<sup>13</sup> Jesusiva mwitaa tuvata mwitanahua vuhua uro taqovaro ekyaa inraikyavanto Jesusiva tunte tuntema kyero vahuvata mwitanahua vekyahu nyato kyarara terama tora.

### *Iesusiva nai nraaqiaranramwu kyapata kyara nronra*

(Matiu 26:26-30; Maaki 14:22-26; 1 Korinti 11:23-25)

<sup>14</sup> Mwitanahua kyara terama tovaro kyara nrenraqaa vahuvaro Jesusiva nai nronraqama kyo vaisinramwuhuavata taintaqaa mwatakyaa viro varura.

<sup>15</sup> Mwiva mwihua timwa nyinro tiqaro, Qakyo nte nriqavi inraikyara vararerha hiqanama nte mwaa vekyahu nyato kyarara nkyivata variqana nraaninranra vuni nronraqama kye rieqana varura mwia mate nkyivata nranrenrave.

<sup>16</sup> Mwaa entaraqaataina hia qaiqaa vekyahu nyato kyarara nraaninrave. Nraakiara ekyaa Kotiva ntaqikyiari inraikyava qovarama virata nkye ntapihivaqe nte mwi entaraqaa qaiqaa nraaninrave, tiro.

<sup>17</sup> Iesusiva mwitaa timwa kyero mwiva uaini kaapu vara kyero Kotirara kyuqeve timwa kyero tiqaro, Mwaa kaapura vara kyeta nkye ekyaahua mwiqitai nraate.

<sup>18</sup> Mate mwaa entaraqaataina nte hia uaini nraanriva qati variqina quariro nraakiara Kotiva ntaqikyiari entava nri ntairaqlena nranrenrave, tiro.

<sup>19</sup> Mwitaa timwa kyero mwiva mpereti vara kyero Kotirara kyuqeve timwa kyero nteqa kyero nai nraaqiaranramwu nyinro tiqaro, Mwaa ni mamantama iho. Nte nkyiara rieqanama mwia nkyi nyuqo. Nte mate mwaa utuntema kyeta nkyevata mwitaamaqi viqatama nianra rieqata variate, tiro.

<sup>20</sup> Mwihua kyara nramwa kyovaro Iesusiva nramanri kaapuvata vara kyero kuaa qarama kyero nyinro tiqaro, Nkyiara rieqanama nte mwaa nramanrinra rauru nyatauqo. Kotiva nkyivata kuaaqi taaqau vi varirero qaraakya qua vataira mwi quava kepukyaqama quarive tiro, ni nraanrevanto mwi quara kepukyaqama kyaananrove, tiro.

<sup>21</sup> Mwitaa timwa kyero Iesusiva tiqaro, Qio taqaate, ni qovarama kyaari vaisiva mwaini variqaro ni vatama kyero kyara nre variho.

<sup>22</sup> Ni mwatani mwatatai nraaqiarara ni ru kyerara qio Kotiva nianra mwi aanranraqaa quante tirave. Kotiva qiove tirata ni rukyaate tiro, ni qovarama kyaani vaisirara nte po kye tuqo. Mwiva viro raupirima quananrove, tiro.

<sup>23</sup> Iesusiva mwitaa tuvata mwia nraaqiaranramwuvanto nai kyapara hi nai kyapara hita tiqata, Qaqao, nai tavave tiriqitairo mwi kyaiqara mwitaama kyero varaanarove? tura.

### *Tavave tirinramwuqitairo nronravanto variananrove tura*

<sup>24</sup> Iesusira nraaqiaranramwuvanto varita tiqata, Tavave tirinramwuqitairo nronraqama viro nronra vaisivanto variananrove? timwa kyeqata inronra hi varuvaro

<sup>25</sup> Iesusiva tiqaro, Mwaa mwataraqaa variahua vunyahua nkyiari nraakye qoraqaa ntaqikyiqtama tiqata, Nte nronravanto varurara tita, nkye ni qua rieta nkye nianra vaisi kyuerave qiate, qiarave.

<sup>26</sup> Nkye hia mwihua nraantantaate. Nkyiqtairo mpovanto vaisi nronra varirero hiariva, mwiva uapaa vaisi nraantantamwa kyero variananrove. Nkyiqtairo mpovanto henahuaqa ntaqikyirero hiariva, mwiva nai hena vaisinramwuni kyaiqa vara nyataarive.

<sup>27</sup> Tava nronra vaisi varirave? Vaisivanto mwatakyaa viro variqaro kyara nre variva, mwivave nronra vaisi variho? Mwia kyaiqa vaisivanto kyara varaqiro nrumu mwi variva, mwivave nronra vaisi variho? Qio, vaisivanto mwatakyaa viro variqaro kyara nre variva, mwivama nronra vaisi variho. Qio nte nkyi kyapata variqana hia nte nkyiara kyaiqa vara mataate tiraitina, nte nkyi kyaiqa vara nyatauvave, tiro.

<sup>28</sup> Vaisi mpo hiahuave mpo inraikyavantove ni uaqiana matarera utuavata nkye ni vatama kyeta variqi vi variarave.

<sup>29</sup> Ni kova ni nronraqama kyaihana nte nraakye qoraqaa ntaqikyiqtina virerave. Nte ntene kora nraantantamwa kyena nkyivata nronraqama kyaarita

<sup>30</sup> nkye nraakiara ni mwatukyaqi variqata nivatama kye kyaravata nramanrivata nramwaqi viqatama taintaqaa mwatakyaa vi variqata nkye Isarer i nraakye qora 12 okyara mwihuaqaa ntaqikyivarave, tiro.

*Iesusiva Pitaarara tura  
(Matiu 26:31-35; Maaki 14:27-31; Ioni 13:36-38)*

<sup>31</sup> Iesusiva mwitaa timwa kyero Pitaarara tiqaro, Saimonio, Saimonio, riaante. Saataaniva nkyi mwataarama kye nkyi ntainra kyaankye tiharo Kotiva qio mwitaa hiante tirave.

<sup>32</sup> Nte Kotirara aakyara nteqanama iara mwia kyaahaqa hiraro mwiva iara kepukyaqama kyero riemwaqiro quarive turave. Nraakiara qaiqaa nianra riemwaqira viqarama ena qata vakyaa kepukyaqama nyataante, tiro.

<sup>33</sup> Iesusiva mwitaa tuvaro Pitaava tiqaro, Qaqao, nronrao, nte ivatama kyena karavuqi vina ivatama kyena qutu quaninranra terama varuqo, tiro.

<sup>34</sup> Mwitaa tuvaro Iesusiva timwa mwinro tiqaro, Pitao, nte i timwa mwianinra riaante. E taarampo nani nianra hia mwia taqaurave tiraro kokoraaravanto nruqua qiananrove, tiro.

<sup>35</sup> Mwitaa timwa kyero Iesusiva nai nraaqiaranramwu timwa nyinro tiqaro, Tauraqama kyena nte nkyi sitauqata nkye munimavata, tuavata, kyuqu nraamwu hiravata, hia vararaitita, qati vurave. Nkye mwi entara mpo inraikyara aara ntorave iho? tuvata mwihua, Hiave, tita.

<sup>36</sup> Hiave tuvaro Iesusiva tiqaro, Mate mwaa tavave tua vataariva qiomaa tuavata varero quananrove. Hia paipa mpuahaa vataariva nai tuavaaqaqo paipa kyoqaama kyero varaarive.

<sup>37</sup> Nte timwa nyianinra riaate. Haaru nianra qara ntumwa to quava mwivauma vahiananrove. Nianra mwitaama tiro: Nraakye qoravanto mwianra uaquia hi kyaiqara uti varivave turave. Mwi quara haaru qara ntumwa tova mwivauma vahiananrove, tiro.

<sup>38</sup> Iesusiva mwitaa tuvata mwia nraaqiaranramwuvanto tiqata, Nronrao, mwaini taqaante. Paipa mpuahaa taaratanama vatauro, tuvaro Iesusiva qiove tiro.

*Iesusiva uro Oripi taaqiqaa variqaro Kotirara aakyara ntora  
(Matiu 26:36-46; Maaki 14:32-42)*

<sup>39</sup> Iesusiva mwitaa timwa kyero mwiva nraamwuqitairo veva ntero nai nraaqiaranramwu kyapata Oripi taaqiqaa nai vi varuraqaa qaiqaa viro.

<sup>40</sup> Mwini uro ntero nai nraaqiaranramwu timwa nyinro tiqaro, Nkye Saataaninra qua rieqata uaquia hi kyaiqara utuarorave tita, Kotirara aakyara nteqata variate, tiro.

<sup>41</sup> Mwitaa timwa kyero Iesusiva mwihua mwini kyero pataqia vututo viro uro tori kyauru raviro Kotirara aakyara ntero tiqaro,

<sup>42</sup> Ko, nte nriqa quani nramanrinra nraaninra voti hira e qatinani vara kyaante. Qio hia ni kyakya hira vataqira quante. Ena kyakya hira vataqira quante, tiro.

<sup>43</sup> Mwitaa tuvaro nyaamwunyaava tumu ntero Iesusira kepukyaqama mwatovaro

<sup>44</sup> Iesusiva varuvaro mwia mwutukyavanto anomaa kyero uaquia huvaro Iesusiva kepukyaqama kyero aakyara ntamwaqiro vuvaro Iesusiraqaatairo toqaamwuvanto nraanre votima kyero mwataqi tumu ntura.

<sup>45</sup> Qio Iesusiva Kotirara aakyara ntamwa taiqa kyero siviro nrumu ntantero uro nai nraaqiaranramwu taqovata mwihua mwutukyavanto uaquia huvata vaite varura.

<sup>46</sup> Iesusiva mwihuara tiqaro, Nkye nanraqamave vaite variavo? Sivita Kotirara aakyara tivarо mwiva nkyi kyaahaqa hirata hia uaquia hi kyaiqara utuate, tiro.

*Iesusira ntavaaqaqvu kyora  
(Matiu 26:47-56; Maaki 14:43-50; Ioni 18:3-11)*

<sup>47</sup> Iesusiva mwini variqaro qati nraahu qua ti varuvata airi vaisivanto nri ntora. Iesusira nraaqiara 12 nramwuqitairo Iutaasiva airi vaisi sita varero mwiva nraante mwihua suni nruva Iesusiva varunani nri ntero Iesusira mota kyarero uti varuvaro

**48** Iesusiva tiqaro, Iutaasio, qio e mwitaama kyera ni motenanra mwiaqove ni mwatani mwatatai nraaqiarara nramwutaahua suqaa qovarama kyenanrave? tiro.

**49** Iesusiva mwitaa tuvata mwia nraaqiaranramwu mwiavata varuhua taqovata mwihua Iesusira ntavaaqavu kyarerata uti varuvata mwinramwuhua Iesusirara tiqata, Nronrao, tire qiove paipaqa mwihua teqa kyaananrave? tita.

**50** Mwitaa timwa kyeta varuvaro mwinramwuhuaqitairo mpovanto Kotira kyaiqa vara mwate varu vaisihua mwihua vunyaa vaisi kyaiqa vaisi mpo kyaatutanyaa nraato teqa kyovaro tumu ntura.

**51** Tumu ntuvaro Iesusiva qaqao hia qaiqaavata mwitaa hiate tiro. Mwitaa timwa kyero mwi vaisira nraatoqa nai kyauquqo vatovaro qaiqaa naitarama vhura.

**52** Kotira kyaiqa vara mwate varu vaisihua mwihua nronranramwuvata, Kotira nraamwuqaa ntaqikyi varu pipohuavata, nronra vaisi mponramwuvata, mwihua Iesusira ntavaaqavu kyarerera nruhuara Iesusiva tiqaro, Nkye kamaninravata ntaqi vaisira ntavaaqavu kyareratave paipavata kyaamwuvata vareta nriavo?

**53** Nte nkyivata mpo enta mpo enta Kotira nraamwuqi variqi vi varuqata nkye hia ni ntavaaqavu kyaarave. Qio mate mwaa entava nkyinima vaiho. Mate enta hi inraikyava kepukyaqama kyero ntaqikyi variho, tiro.

### *Pitaava Iesusira hia taqaurave tura*

(Matiu 26:57-58, 69-75; Maaki 14:53-54, 66-72; Ioni 18:12-18, 25-27)

**54** Iesusiva mwitaa tuvata mwihua mwia ntavaaqavu kyeta vitaqita uro Kotira kyaiqa vare varuhua mwihua vunyaa vaisi nraamwuqi kyovaro Pitaava nyianrasata viqaro mwihua sataqiro vuva uro taqovata

**55** mwatukya utasata qia quara teta varuvaro Pitaavavata mwihua kyapata qia taare varura.

**56** Mwiaqaa varuvaro kyaiqa nraakye mpovanto taqovaro Pitaava qia taare varuvaro mwiva mwia aitutuma kyero taqero tiqaro, Mwaavavata Iesusikyantiri varivave, tuvaro

**57** Pitaava qaqao tiro, Mwaa nraakyevao, nte hia mwia taqaurave, tiro.

**58** Mwitaa timwa kyero mwini variqiro vuvaro qaiqaa vaisi mpovanto Pitaara taqero tiqaro, Evata mwia nraaqiaravanto variaro, tiro. Tuvaro Pitaava tiqaro, Mwaa vaisivao, hia nte mwivave, tiro.

**59** Timwa kyero hia mpuahaama varuvaro vaisi mpovanto qaiqaa kepukyaqama kyero tiqaro, Mwi vaisiva Karirinyaa vaisivantora tiro, mwikyantiri varivave, tiro.

**60** Tuvaro Pitaava qaqao tiro, Mwaa vaisivao, e qiana quara nte hia ntapihi kyauqu, tiro. Mwitaa ti varuvaro qamwanrama kyero kokoraaravanto nruqua tura.

**61** Nruqua tuvaro nronravanto tuqasaa viro Pitaara vuqi taqovaro vaakya nronravanto Pitaarara tu quava mwia vu nraatoqi ntura. Vuni nronravanto tiqaro, E taarampo nani nianra mwia hia taqaurave tiraroma kokoraaravanto nruqua qiananrove, tura.

**62** Mwi quava Pitaara nraatoqi ntumwa vuvaro mwiva ntapihi kyero riero mwiaqatairo mwaaqani mwaati ntovaro mwia mwutukyavanto uaquia huvaro nronraqama kyero ntatero.

### *Iesusira uaqiamma mwatora*

(Matiu 26:67-68; Maaki 14:65)

**63** Mwitaa huvata Iesusira ntavaaqavu vaisihua Iesusirara raima mwateta Iesusira ntuquutiqata

**64** Iesusiva hia taqaarive tita, mwihua tavuna vara kyeta uvata qiatavata rupateta Iesusira ntuquutiqata mwia kyapara hita tiqata, Poropeti vaisi maavao, tavave i riho? Hia taqaraitira, tiraqeta riaare, timwa kyeta

**65** mwihua uaquia hu quara mpo qua mpo qua timwa mwate varura.

*Kaanasori suqaa uro kyora*

(*Matiu 26:59-66; Maaki 14:55-64; Ioni 18:19-24*)

<sup>66</sup> Mwitaamaqita vuvaro qaata tuvata Kotira kyaiqa vare varuhua mwihua nronranramwuvata, mwaanra okyara ti varuhuavata, mwihua ntuaantuama vita Jesusira vita vareta nkyiari kaanasori varunani uro kyovata

<sup>67</sup> mwihua tiqata, Qutaaqama kyerave e Mesaiaavanto Kotiva titai vaisiva variaro? Tiri timwa timwinraqe riaare, tita. Mwihua mwitaa tuvaro Jesusiva tiqaro, Nte nkyi timwa nyianrita nkye hia ni quara qutaave tivarave.

<sup>68</sup> Nte nkyi kyapara hiarita nkye hia mpo qua ni timwa mpivarave.

<sup>69</sup> Qio mwaa entaraqaataina nte mwatani mwatatai nraaqiarava variqana Kotiva kepukyavanto varinani uro mwia kyauqu kyaatutani mwatakyaa vina varirerave, tiro.

<sup>70</sup> Jesusiva mwitaa tuvata mwihua tiqata, Qio mwitaa hirera e Kotira mwaaquvan-tove variaro? tuvaro Jesusiva nkyiari timwa nyinro tiqaro, Nkye qiara nte mwaa mwivave, tiro.

<sup>71</sup> Jesusiva mwitaa tuvata mwihua tiqata, Qumina mwiaqaa qua vatehua nyaanraan-ronrave. Qaqira kyaare. Mwiama nai nroqitairo uaqia hi quara tihata riauro, tita. Tura.

## 23

*Paireativa hunani Jesusira vitaqita uro kyora*

(*Matiu 27:1-2, 11-14; Maaki 15:1-5; Ioni 18:28-38*)

<sup>1</sup> Mwitaa timwa kyeta ekyaa mwihua sivita Jesusira vita vareta Paireativa varunani uro kyeta

<sup>2</sup> Jesusiraqaa qua vateqata mwitaama tita, Tire taqauraro mwaa vaisiva nraakye qora uaqia hi aanranra nyaamwuteqaro mwihuara hia nronra vaisi vunyanra Sisaara taakisi mwiate ti varirave. Mwiva nanrianra nte nronravanto nte nraakye qoraqaa ntaqikyiariva Mesaiaavanto varuqo ti variho, tita.

<sup>3</sup> Mwihua mwitaa tuvaro Paireativa Jesusira kyapara hiro, Qutaave e Iutaa vunyaa vaisivanto variaro? tuvaro Jesusiva tiqaro, E qiananra nte mwaa mwivama iho, tuvaro

<sup>4</sup> Paireativa Kotira kyaiqa varohua mwihua nronranramwuanravata, nraakye qora ntuaantuama vuhuaravata, tiqaro, Nte taqauqaro mwaa vaisiva hia kamaninra qua nteqa kyaiho, tiro.

<sup>5</sup> Mwitaa tuvata mwihua nronraqama kyeta kepukya qua Jesusiraqaa vateta tiqata, Nraakye qoravanto kamaninravata ntaquate tiro, mwiva antua qua timwa nyi varivave. Mwiva tohara kyero vevara Karirisairo mwi quara timwa nyiqiro nrinro mwaini nri ntaiho, tita.

*Herotiva hunani uro kyora*

<sup>6</sup> Mwihua mwitaa tuvaro Paireativa mwi quara riero mwiva tiqaro, Qutaa mwaa vaisiva Karirinyaavave? tiro.

<sup>7</sup> Mwitaa timwa kyero mwiva ntapihi kyovaro Jesusiva Karirinyaava Herotiva mwi mwatanaahuaqaa ntaqikyunaava varuvaro mwiaqatairo Paireativa Jesusira titovata Herotiva varunani Jesusira vitaqita uro kyora. Mwi entara Herotiva Ierusaremimi uro varura.

<sup>8</sup> Jesusira Herotiva varunani uro kyovaro Herotiva qamwatero. Herotiva Jesusira kyaiqara rieqaro airi enta mwia taqareraro variqaro Jesusiva ni puqaa variqaro nronra kyaiqa varairaqe taqarerave timwa kyero qamwata kyero

<sup>9</sup> uro Jesusira airi qua kyapara huvaro Jesusiva hia qua mpoqiatata nai timwa mwinraitiro varura.

<sup>10</sup> Kotira kyaiqa vare varuhua nronranramwuvata, mwaanra okyara ti varuhuavata, mwihua sivita uro kepukyaqama kyeta Jesusiraqaa qua vatovata

<sup>11</sup> mwiaqaatai Herotivavata, mwia ntaqu vaisihuavata, Iesusirara raima mwateta tiqata, E nronra vaisi variarava nronra vaisi tavuna utu taante, timwa kyeta tuavaaqa kyuqera utumwate ua qua timwa mwateta titovaro Paireativa varunani nrumu ntantero vura.

<sup>12</sup> Haaru Herotivavata Paireativavata nramwutaatanavanto varurama. Mwi entaraqaataita mwitanahua totiqama vita kyuqema vi nanrianra nanrianra qamwate-qatafana varura.

*Iesusira qio ru kyaate tura*

(*Matiu 27:15-26; Maaki 15:6-15; Ioni 18:39-19:16*)

<sup>13</sup> Paireativa Kotira kyaiga vare varuhua mwihua nronranramwuvata, nronra vaisi mponramwuvata, qumina nraakye qoravata, nyaanrama ntuvaantuama kyero

<sup>14</sup> mwihua timwa nyinro tiqaro, Nkye mwaa vaisira vitaqita nte hunani nrumu kyeta tiqata, Mwaava nraakye qora uaquia hi aanranra nyaamwute variho, qiarave. Nkye mwitaa qiavana nte nkyi suqa variqana mwi quara avuqavu hiqana taqauqaro mwaa vaisiva hiama nkye uaquia hi kyaiqarara qiara utiho.

<sup>15</sup> Herotivavata mwitaa hiqaro taqero qati titaiharo nte hunani qaiqaa nriho. Riaate. Mwi vaisiva uaquia hi kyaiqara utuaninravauma tire mwia ru kyaararo qutu quananrove.

<sup>16</sup> Kyaiqe nte qiarita mwia kyaamwuqo ntuqutu kyeta vataivaro qati quarive, tiro.

<sup>17</sup> [Mpo ihi mpo ihi vekyahu nyato entaraqaa Paireativa nraakye qorara rieqaro karavu vaisi kuaiqia qati huvantu kyovaro mwaatani vura.] Paireativa Iesusirara kyaamwuqo ntuqutu kye vateta titaiharo qati quarive tuvata

<sup>18</sup> ekyaa ntuvaantuama vuhua qaqao tita, Mwia ru kyaante. Tiriara rieqarama Varavaasira huvantu kyairaro mwaatani quarive, tura.

<sup>19</sup> [Varavaasiva kamaninra vatama kyero mwi mwatukyaraqi ntaqura kyaaravata, vaisi ru kyora kyaaravata, karavu rupa kyovaro varuvaro]

<sup>20</sup> Paireativa Iesusira huvantu kyarero uti variqaro qaiqaa nraakye qora kyapara hiro.

<sup>21</sup> Kyapara huvata mwihua hia mwia qua riaraitita, nronraqama kye aakyara nteta tiqata, Mwia kyatariqaa rutaante. Mwia kyatariqaa rutaante, tita.

<sup>22</sup> Mwihua mwitaa tuvaro Paireativa taarampo nani kyapara hiro tiqaro, Mwaa vaisiva nanra quave nteqa kyaiho? Nanra uaquia hi kyaiqarave utiho? Nte mwia qua avuqavu hiqana taqauqaro hia mwiaqua qua vaiho. Hia tire qumina quaqaara vaisi mpo ru kyaananrave. Kyai nte qiarita mwia kyaamwuqo ntuqutu kye vataivaro qati quarive, tiro.

<sup>23</sup> Mwitaa tuvata mwihua kepukyaqama kyeta aakyara ntamwaqi viqata kyatariqaa rutaante nraahu tita. Mwitaa tiqatama Paireativa quavata rukyeta mwihua quavanto nraahu kepukyaqaa huvaro

<sup>24</sup> Paireativa mwihua qua nraahu riero qiove tiro.

<sup>25</sup> Mwitaa timwa kyero mwihuara rieqaro mwiva kamaninravata ntaqura kyaaravata, vaisi ru kyora kyaaravata, karavuqi kyo vaisira huvantu kyero, mwiaqaatairo nraakye qora kyakya hurara rieqaro naivanto Iesusira ntaqu vaisihua sita kyero nyinro.

*Iesusira kyatariqaa rutora*

(*Matiu 27:32-44; Maaki 15:21-32; Ioni 19:17-27*)

<sup>26</sup> Iesusira nyuvata mwihua Iesusira vite viqatama aanraqaa vaisi mpo mwia nrutu Saimoniva mwiva Sairininyaava mwiva tokyasairo mwatukya nronra mwiqiara vuvata mwia qintorama kye vuaviraavira tita mwianra tiqata, Iesusiva qu tai kyatarira vara quqira mwia nraakiara virava uro mwataante, tita.

<sup>27</sup> Mwitaa huvata nraakye qora airivanto mwia vataqita vurama. Mwihua utaqitaita nraakye mponramwuvanto Jesusirara ti atura ntqata ntataqita vuvaro

<sup>28</sup> Jesusiva mwihua hunani tuqasaa viro timwa nyinro tiqaro, Ierusaremiqinaa nraakye tuaavo, Hia nianra ntataate. Nkyetaravata nkyeta nraaqiararavata ntataate.

<sup>29-30</sup> Mpo entanramwu nri ntairata mwi entaraqaa nraakye qoravanto tiqata, Ehaara nraakye hia nraaqiara mwatehuave hia nraaqiara nraamwa nyihuave, qora tatari taaqiara tiqata, Tiriqaa nteqeta tumu ntumwaqu kyaate, tivarave. Mwihua pata taaqiara tiqata, Tiriqaa tumu ntita ntumwaqu kyaate, tivarave.

(Hosaiia 10:8)

<sup>31</sup> Nte kyatari karaaha votima kyena varuqata mwihua mwitaama kyeqata ni uaqiamate variavo. Nkye kyatari aahara votima kyeta variavata po, nraakiara mwihua nkyi nataa nataama kyetave nkyi uaqiamama nyatevarave, tiro.

<sup>32</sup> Mwitaa tuvata mwihua karavu vaisi taaratanavata Jesusiravata rirerata siteta vurama.

<sup>33</sup> Mwihua vuhua qumina mwatukya mwi mwatukyara nrutu Qiata Mwukyaarive tu mwatukyaraqaa uro nteta Jesusira kyatariqaa ninriqotai ruteta mwata quvu kyeta mwicqi mwaamwi utaqaa rateta hini hini uaquia hu vaisihua mwitana rutora.

<sup>34</sup> Rutovaro Jesusiva Kotirara aakyara ntero tiqaro, Ko, hia mwihua uaquia hi kyaiqara utuarara riaante. Mwihua mwitaa hiqata hia mwia utuara mwia okyara ntapihiavo, tiro. Mwitaa tuvata mwihua kaati ruantema kye ori tuto kyeqata Jesusira tuavaaqa ntainra kyeta varora.

<sup>35</sup> Mwia tuavaaqa ntainra kyeta varovata qumina nraakye qora mwini sivita variqa taqe varuvata Iutaa vaisi nronranramwuvanto Jesusirara raima mwateta tiqata, Mwiva airi vaisi kyaahaqa hi varivave. Kotiva mwia titaiharo mwiva Mesaiaavanto varirera, mwiva qioma nai kyaahaqa hiananrove, tita.

<sup>36</sup> Mwihua mwitaa tuvata ntaqu vaisihuavata Jesusirara raima mwateta uro uaini uka vura mwita nraante timwa kyeta mwianra tiqata,

<sup>37</sup> E qutaa Iutaaqa ntaqikyirava hirera, e ena kyaahaqa hiante, tura.

<sup>38</sup> Mwihua qua mpo Jesusira qiatani kyatariqaa qara ntumwa kyeta vatova mwitaama tiro:

MWAA VAISIVA IUTAA VUNYAA VAISIVE, tura.

<sup>39</sup> Uaqia hu vaisiva mpovanto hini rutova mwivavata Jesusirara qora qua tiro tiqaro, Quataave e Mesaiaavanto variaro? Qio mwitaa hirera, enavata tiritanavata kyaahaqa hiante, tiro.

<sup>40</sup> Mwitaa tuvaro uaquia hu vaisiva mpovanto hiniqaa rutova eqaante tiro, Hiave e Kotirara aatu hiaro? Mwihua tiritana votima kyeta mwiaavata rutaavo.

<sup>41</sup> Mwihua tiritana qio rutaavo. Titatana uaquia hi kyaiqara kyaara tiritana rutaavo. Mwi vaisiva hia uaquia hi kyaiqara utivave, tiro.

<sup>42</sup> Mwitaa timwa kyero mwiva Jesusirara tiqaro, Iesusio, i nronraqama kyaani entara nianravata riaante, tiro.

<sup>43</sup> Mwitaa tuvaro Jesusiva tiqaro, Nte i timwa mwianinra riaante. Mate e mwatukya kyuqeraqi ni vatama kyera varinanrave, tiro.

### *Iesusiva qutu vura*

(Matiu 27:45-56; Maaki 15:33-41; Ioni 19:28-30)

<sup>44</sup> Mwitaa tuvaro huari nrinro qiataga vahuvaro mwiaqaatairo upima vuvaro hia huari itovaro kyokira nraahu rutovaro huari tumiviro 3 kirokiqa huvaro qaiqaa ntuyaahama vura.

<sup>45</sup> Ierusaremini Kotira nraamwuqi tavuna tauha votima kye hiritova utaqaa nai nrahitu vuvaro

**46** Iesusiva kyatariqaa variqaro paatiro aakyara ntero tiqaro, Ko, ni manraqura tu varaante, tiro. Mwitaa timwa kyero mwiva qutu vura.

**47** Iesusiva qutu vuvaro ntaqu vaisihua qiata vaisivanto Iesusiva mwitaa hora taqero Kotira nrutu tuaaherero tiqaro, Qutaama mwaa vaisiva avuqavu nrohi vari vaisivave, tiro.

**48** Mwitaa tuvata mpo uhua mwi inraikyava qovara hora taqarerata ntuvantuama vuhua, mwihua variqata mwi inraikyara taqeta, mwiaqaataita mwihua nkyiari mwaatani nrumbu ntanteta viqata mwutukya uaqia huvata nkyiari *mwekuraata/mwetokya* ntuqutu kyeqata vurama.

**49** Mwihua vuvata Iesusira vataqi nrohu nraakye qorahuavata, nraakye mponramwu Karirisaita mwia vataqita nruhuavata, mwihua nyianra sata variqata mwi inraikyava qovara hora taqe varura.

### *Iesusira quntamwa tora*

(*Matiu 27:57-61; Maaki 15:42-47; Ioni 19:38-42*)

**50-51** Vaisi mpovanto mwia nrutu Iosepiva Arimatis mwatukya Iutianyaava, mwiva vasisi kyugeva avuqavuma kyero nrohi varu vaisiva, mwiva Kotiva ntaqikyiani entarara taqebaro mwia vekya varura. Mwiva kaanasorivanto variqaro mwiva hia mpo kaanasorivanto tu quarara eo tiraitiro, mwihua kyaiqaravata hia qamwateqaro varura.

**52** Mwi vaisiva Paireativa varunani uro ntero tiqaro, Iesusira mwamwanta mpiraqe varaqina quantaankye, tiro.

**53** Mwitaa timwa kyero mwiva uro Iesusira mwamwanta itu kyero vara mwatumwi vatero eqarori tavuna vara kyero mwia qapuqama kyero uto ori qaraakya vauru kye hia vaisi mpo quntoraqi uro quntamwa tora.

**54** Mwi entara nraakye qoravanto hora Saarareqa tiri mwaanra enta mwi entara kyaiqa varaarorave timwa kyeqata mwi entarara rieqata mpo inraikya mpo inraikya tera taarama kye vate varu entava vahura.

**55** Mwitaa huvata nraakye mponramwuvanto tauraa Karirisaita Iesusira vataqita nrohi varu nraakyehua Iosepiravata uro Iesusira quntarera horaqi vuhua uro taqvaro Iosepiva Iesusira mwamwanta vatovata mwihua taqeta

**56** mwiaqaatai nrumbu ntante nkyiari nraamwuqi uro variqata vahamwenra kyugeva kyero mwunta vuravata, mpo inraikya mwia mwamwantaqaa qumwa teravata, tera hora. Mwihua nkyiari mwaanra qua rieqata Saarareqaa qati varura.

## 24

### *Iesusiva quntamwa toraqitairo sivura*

(*Matiu 28:1-10; Maaki 16:1-8; Ioni 20:1-10*)

**1** Nraakye mwihua kyugeva kyero mwuntavi varu inraikyara terama kye vateta mwihua Saarareqa vari kyeta Saanteqa vaakya toqa entaqi sivita mwi inraikyara vareta Iesusira quntamwa toraqi vuhua uro taqvaro

**2** qesaqaa ori nronra tita tora ventaqita uro tokyani vatova vahura.

**3** Vahuvata mwihua oriqi vera nte taqvaro nronra vaisi Iesusira mwamwanta hia vahura.

**4** Hia mwipi vahuvata mwihua mwipi qati apiqama vita airi nraato ti varuvata qamwanrama vaisi taaratana qovarama vita takyuqu tuavaaqara ututeta mwihua nraaqani sivita varura.

**5** Varuvata nraakye mwinramwuhua nronraqama kye aatu hita nkyiari siri mwataqi vateta varuvata vaisi mwitanahua tiqata, Nanraqamave nkye qati vari vaisirara qutu quahua mwaataqi puaa hi variavo?

<sup>6</sup> Mwiva hia mwaini variho. Mwiva qati siviho. Tauraa mwiva Karirini variqaro nkyi timwa nyu quara nkye qative riemwa taavo?

<sup>7</sup> Mwiva mwi entara tiqaro, Nte mwatani mwatatai nraaqiarava variarita uaqia hi vaisihua ni ntavaaqavu kyaate tiro, ni qovarama kyairata mwihua ni pitaqita kyatariqaa ru taivaqena nte taarampo enta varina qaiqaa qati siquaninrave tirave, tita.

<sup>8</sup> Mwitanahua mwitaa tuvata nraakye mwinramwuhua nyaatoqi Jesusiva tu quava ntuvata

<sup>9</sup> mwia quntamwato mwatara mwini kyeta nrumu ntante uro Jesusira nraaqiara 11 nramwuvata mpo huhuavata timwa nyunra.

<sup>10</sup> Nraakye mwinramwuhua nyutu vahirero Mariaava Makataranyaava, Io-haanaava, Iemisira nrova Mariaava, mwinramwuhua mwi inraikyara taqeta uro Jesusira nraaqiaranramwu timwa nyuvata

<sup>11</sup> mwihua tiqata, Qaqao, nkye unrama qiaovo. Hia mwianra quitaave qiananrave, tita.

<sup>12</sup> Mwitaa tuvaro Pitaava siviro hiantero mwia quntamwa toraqi vuva uro kakataama viro vera taqovaro tavuna nraahu vahuvaro Jesusira mwamwanta hia vahura. Hia vahuvaro mwiva nrumu ntantero uro mwaatani variqaro nai uro taqo inraikyarara airi nraato tiqaro varura.

*Mwatukya Emiasinianra vu vaisitanahuara tura  
(Maaki 16:12-13)*

<sup>13</sup> Kuua mwi entaraqaa Jesusira nraaqiara taaratanavanto mwatukya mpo Emeasini-anra vura. (Kyuvaira vaiharo Omwunra vahira mwia votima Ierusaremi vahuvaro Emeasi mwatukya vahura.)

<sup>14</sup> Mwitanahua aanraqaa mwinianra viqata Jesusira ru kyo quara timwaqita vita.

<sup>15</sup> Mwitanahua timwaqi vuvaro Jesusiva nai nri ntero mwitanahua vatama kyero vuvata

<sup>16</sup> mwitanahua mwia taqeta hia mwia ntapihi taqaraitita, mpo vaisivantove tuvaro

<sup>17</sup> Jesusiva mwitanahuara tiqaro, Nkyetana aanrani nriqatama nanra quave timwaqita nriavo? tiro.

Mwitaa tuvata mwitana uro mwiaqa ra kyeta mwitana mwutukyavanto uaqia hvatataana

<sup>18</sup> mpovanto Kiropaa sirave tuva Jesusira kyapara hiro tiqaro, Mate airivanto Ierusaremiqi variaraqitaira e kuaikvantove enta nanau qovara hi quara hia riaaro? tiro.

<sup>19</sup> Mwitaa tuvaro Jesusiva tiqaro, Nanra quave? tuvata mwitanahua tiqata, Jesusira Nasaretinyaanra quave. Mwi vaisiva poropeti vaisivantove variqaro Kotira vuqaavata, nraakye qora suqaavata, nronra kyaiqa vareqaro kyuqe qua nraahu tirave.

<sup>20</sup> Mwiva mwitaa hi varihata Kotira kyaiqa vara mwate varia vaisihua mwihua nronra vaisinramwuvata, tiriqa ntaqikyi variahuvata, mwihua kamaninra mwia varo mwiva mwia rukyaate tihata mwia ninriqotaita kyatariqa rutaavo.

<sup>21</sup> Tire tauraa mwi vaisirara Kotiva mwia titaiharo mwiva mpo mwatanaahua nraatara kyero tiri Isareriqaa ntaqikyiariavave tunanrave. Qua mpovatama vaiho. Mwia rukyaavaro mate taarampo enta nritaraiho.

<sup>22</sup> Mate tiretana nraakyenramwuvanto qia quara rieta nrihanramama vuro. Mwinramwuhua vaakya toqaqi mwia quntamwa taaraqi uro nteta hia mwia mwamwanta taqaavo.

<sup>23</sup> Mwinramwuhua uro ntanteta nrumu tiri timwa timwita tiqata, Nyaamwun-yaahua tirinramwuanra mwiva qatima variho qiaovo, qiarave.

<sup>24</sup> Nraakyenramwuvanto mwitaa qiaavata tirinramwuqitaita mpo hiahua mwia quntamwa taaraqi quahua uro taqaavaro nraakyenramwuvanto qia quava quataa vahata mwinramwuhuavata mwia mwamwanta hia taqaarave, tita.

<sup>25</sup> Mwitana mwitaa tuvaro Iesusiva mwitanahua timwa nyinro tiqaro, Hiave nkityana su nyaato vaiho? Haaru poropeti vaisinramwuvanto timwa to quara, mwianra nkyetana qamwanrama kye quataave qiataara vahata nkyetana qakyoma kyaavo.

<sup>26</sup> Nkyetana hia ntapihiarave iho? Kotiva titaari vaisiva Mesaiaavanto nriqa vi inraikyara varaqiro viro mwiaqatairo nronraqama viro kepukya vaisivanto vari-ananrove, tiro.

<sup>27</sup> Mwitaa timwa kyero Iesusiva Mesaiaara Kotira mpukuqi qara ntumwa to quara mwitana timwa nyinrenro tohareqaro Mosesira mpukuqitairo timwa nyiqiro viro, poropetinramwu mpukuqitairovata timwa nyiqiro vura.

<sup>28</sup> Mwitaa timwaqvi vi varuvaro mwitanahua virera tu mwatukyava qaumato vahuvaro Iesusiva rieqarovata aanra mwiaqaa qati nraahu vi varuvata

<sup>29</sup> mwitanahua hiave tita, Mateqama enta hiananrove. Qaqira kyera tiritanavata vaitaante, tuvaro mwihuavata varirero nraamwuqi vura.

<sup>30</sup> Iesusiva nraamwu mwipi variqaro kyara taintaqa mwitana vatama kyero mwatakyaa viro Kotirara kyuqeve timwa kyero mpereti nteqa kyero tukyama kyero nyuvata

<sup>31</sup> mwitana su ntapairi vuvata ntapihi rieta mwitana mwia ntapihi taqeta. Mwitana mwia ntapihi kyeta taqovaro Iesusiva mwitana suqaatairo uvaarama vura.

<sup>32</sup> Iesusiva uvaarama vuvata mwitana nai timwa mwi nai timwa mwi hita tiqata, Qikye, mwiva aanraqaa nriqanro Kotira mpukuqinaara qua okyara ntapihi kyero tiritana timwa timwiharo quataa tiritana mwutukyaqitairo kyuqe hirave, tita.

<sup>33</sup> Mwitaa timwa kyeta mwitanahua qamwanrama sivitatana nrumu ntanteta Ierusaremini uro Iesusira nraaqiara 11 nramwu puaama kyeta taqovata mwinramwuhua mpo vaisinramwu kyapata ntuvaantuama vita varita tiqata,

<sup>34</sup> Nronravanto quataama qaiqaa qati siviho. Saimoniva mwivama mwia taqaiho, tuvata

<sup>35</sup> mwitanavata aanrani vita taqorara mwihua timwa nyita. Mwitana tihua, Mwiva mpereti nteqa kyaihata mwiaqataita tiretana nronra vaisi ntapihi taqauro, tita.

### *Iesusiva nai nraaqiara suqaa qovarama vura*

*(Matiu 28:16-20; Maaki 16:14-18; Ioni 20:19-23)*

<sup>36</sup> Mwitana qua mwihua timwa nyi varuvaro mate mwipi qaranto nai qovarama viro mwihua nraaqani siviro variro tiqaro, Nkyi mwutukyavanto qihakyama vahiarive, tiro.

<sup>37</sup> Mwitaa tuvata mwihua nronraqama kyeta aatu hita tiqata, Vaanavanto qovarama viho, tuvaro

<sup>38</sup> Iesusiva mwihuara tiqaro, Nkye nanraqamave aatu hiavaro taara vu nraato tuava nkyi su nyaatoqi vaiho?

<sup>39</sup> Ni kyuqu kyauqu taqaate. Nte mwivama huqo. Ni mamantaqa tiqata taqaate. Nte vaisima varuqo. Vaana mwia hia ni votima kyero mwativata mwukyaarivata vahirave, tiro.

<sup>40</sup> Mwitaa timwa kyero mwiva nai kyuquvata kyauquvata nyaamwutovata

<sup>41</sup> mwihua mpoqama kyeta qamwateta kyauqu ntukikinraaqateta hia qamwanrama quataave tuvaro Iesusiva mwihua kyapara hiro tiqaro, Kyara nraanriva vahirove? tuvata

<sup>42</sup> mwihua tavukya uta tora pataqia mwuvaro

<sup>43</sup> mwiva mwihua suqaa variqaro vara kyero nronra.

<sup>44</sup> Iesusiva tavukya nramwa kyero mwihua timwa nyinro tiqaro, Tauraa nte nkyivata variqana nte mwaa quara nkyi timwa nyiavarave. Nianra haaru Mosesiva mpukuqi qara ntumwa to quarave, poropeti vaisinramwuvanto qara ntumwa to quarave, Saami mpukuqi qara ntumwa to quarave, nte nkyi timwa nyiqana mwi quara mwivauma vahiananrove qiavarave, tiro.

<sup>45</sup> Mwitaa timwa kyero mwihua Kotira mpukuqi qara ntumwa to quara ntapihi kyeta riaate tiro, Iesusiva mwi quara mwi quara mwihua timwa nyinro tiqaro,

<sup>46</sup> Mwaa quara qara ntumwa torave. Mesaiaarara mwiva nriqa quani inraikyara varero uro qutu viro taarampo enta variro qaiqaa qati siquananrove.

<sup>47</sup> Mwiaqaataita nkye ni kyaiqara ni nutuara rieqatama nraakye qora timwa nyiqi viqata uaqia hi aanranra qaqlira kyaivaro Kotiva nkye uaqia hi kyaiqara uti quara nraka nyataarive qiate. Mwi quara timwa nyiqi viqata Ierusaremini nraante mwi quara timwa nyiqi vita mwiaqaataita mpo mwatanaa mpo mwatanaa timwa nyiqi quate.

<sup>48</sup> Nkyenramwu nkyeta suqotaita mwi kyaiqaravata mwi inraikyaravata taqaarave.

<sup>49</sup> Ni kova nai kyauqu nriqiqaa vatero ntene nkyi nyinrenrave qianinra ntima mwia titaariro tumuananrove. Nkye mwaa mwatuqyaraqi variqi vivaro nyaamwusairo mwiva tuminro nkyiqi variqaroma nkyi kepuqyaqama nyataananrove, tiro.

*Iesusira vitero nyaamwuni vura  
(Maaki 16:19-20; Kyaiqa Varora 1:9-11)*

<sup>50</sup> Iesusiva mwitaa timwa kyero mwiva mwihua sita varero Ierusaremi kyero Mpetaanini uro ntero nai kyauqutana tuaahera kyero mwihua kyuqema nyatero.

<sup>51</sup> Mwiva mwihua kyuqema nyate varuvaro Kotiva mwia nyaamwuni vitero vuvaro mwiva nai nraaqiara mwihua kyero vura.

<sup>52</sup> Iesusiva nyaamwuni vuvata mwia nraaqiaranramwuvanto mwia nrutu tuaahera kyeta nrumu ntanteta Ierusaremini vura.

<sup>53</sup> Mwini uro variqata Kotira nraamwuqi mpo enta mpo enta Kotira nrutu tuaahera qita vi varura.

## IONI

# Ioniva Jesusiva nrohurara tura

### *Iesusira okyarara tura*

<sup>1</sup> Haaru toharero quavanto varura. Mwi quava Kotikyantiri varura. Mwi quava nai Kotiva varura.

<sup>2</sup> Tauraa toharero mwi quava Kotikyantiri variqiro vura.

<sup>3</sup> Mwiva Kotikyantiri variqi viqaro mpo inraikya mpo inraikya ekyaa inraikya utu kyero vatora. Mpowantovata mpo inraikya utuariva hia varuvaro qua mwiva nraahu ekyaa inraikya utu kyero vatora.

<sup>4</sup> Mwi quava qati variqi vi variara tuqavantomma variro. Mwi quava omwa votima kyero itamwaqiro viqaroma nraakye qora kyuqema kyero ntuvahama nyatero.

<sup>5</sup> Omwavanto upi hiraqi itamwaqiro viharo hiama enta hi inraikyava mwia qipa kyaariva vahiro.

### *Nramanri nyi varuva, Ioniva Iesusirara timwa nyunra*

<sup>6</sup> Kotiva vaisi mpo titora mwia nrutu Ioniva.

<sup>7</sup> Nraakye qoravanto Iesusirara mwiva qutaa omwabantove qiate tiro, Ioniva mwianra timwa nyinrenro nri ntora.

<sup>8</sup> Ioniva nai hia mwi omwava variraitiro, mwiva omwa mwianra timwa nyinrenro nrurra.

<sup>9</sup> Mwiva nri ntovaro mwia nraakiara quavanto nri ntero omwa votima kyero itamwaqiro viqaroma ekyaa mwaa mwataraqaa nraakye qora ntuvahama nyatero.

### *Iesusira qoririma mwatora*

<sup>10</sup> Iesusiva nai mwaa mwatara utu kyero vatova mwatani tumuvata mwaa mwatanaahua hia mwia ntapihi kye taqaraitita, mwianra hia mwivave tita.

<sup>11</sup> Mwiva nai nramwunaahua hunani nri ntovata mwia nramwunaahua hia mwia kyakyama mwataraitita, mwia qoririma mwatora.

<sup>12</sup> Mwitaahuvatavata mpo uhua mwia kyakyama mwateta mwianra qutaa mwivave tura. Mwitaa tuhua mwihua mwiva nronraqama kyovata mwihua Kotira nraaqiaraqama vita varura.

<sup>13</sup> Hia nraakyevanto nraaqiara mwataintema kyero mwihua mwata taihata Kotira nraaqiaraqama vita variara. Hia qumina vaisi kyakya hiraqa Kotira nraaqiaraqama vita variara. Nai Kotira kyakya hiraqa mwihua Kotira nraaqiaraqama vita variara.

### *Iesusiva vaisi tuora*

<sup>14</sup> Kotira quavanto vaisi tuero tirivata varirero tuminro. Mwiva tuminro mwaa mwataraqaa varuvata tire mwia peqa okyara taqaavanana. Tire taqaavararo mwi vaisiva kyuqe hiro vaisiara mpoqama kyero po kye timwa nyateqaro qutaa qua nraahu ti varuva varura.

<sup>15</sup> Ioniva nraakye qora timwa nyinro tiqaro, Nte haaru nkyi timwa nyina tiqana, Vaisi mpovanto ni naakiara nrianriva ni naataraananrove, tuva qio mwaa mwi vaisivave. Nte hia qovara hiava entara mwiva haaru qati variqiro vurave. Mwitaama variqarora tiro, mwi vaisiva ni naatara kyero mwiva nronravanto variho, tiro. Ioniva mwitaa tura.

<sup>16</sup> Iesusiva mpoqama kyero tiriara nraamwunruqa taiharo mwiva tiriara po kye timwa timwatero airi nani tiri kyuqema timwate varira.

<sup>17</sup> Haaru Kotiva nai qua mwaanra nraakye qoravanto hia nteqa kyaraitita, qati nraahu riemwaqita quate tiro, Mosesira mwunra. Mate mwaa entara Iesusi Karaisiva

Kotiva hinassairo tumu Kotiva po kye timwa timwatai okyarara, qutaa okyara tiri timwinra.

<sup>18</sup> Hia qumina vaisi mpovanto Kotira taqairave. Mwia mwaqvanto nai qora nraaqani variva, mwiva nraahu nai qora okyara qovarama kyaihata tire taqeta ntapihunanra.

*Ioniva hia nte mesaiaavantove tura  
(Matiu 3:1-12; Maaki 1:1-8; Ruku 3:1-18)*

<sup>19</sup> Ioniva Iesusirara timwa nyu quava mwataamama vahiro. Ioniva nri ntovata Iutaa vaisi nronranramwuvanto Ierusaremini varuhua vaisi mponramwu sitovata Kotira nraamwuqi Kotira kyaiqa vara mwate varuhuavata, Rivaira kuaa okyara mponramwuvantovata, mwihua uro nteta Ioninra kyapara hita tiqata, E ta vaisivave? (E qutaa tiri mesaiaavantove variaro?) tita.

<sup>20</sup> Mwihua mwitaa tuvaro Ioniva hia qua tugetaraitiro, vutu kyero timwa nyinro tiqaro, Qaqao, hia nte Kotiva titai vaisiva mesaiaavanto varuqo, tiro.

<sup>21</sup> Tuvata mwihua mwia qaiqaa kyapara hita tiqata, E hia mwivave tiqara, e mpo tavave hiaro? E tiri haivaqava, Iraisaavave variaro? tita.

Tuvaro Ioniva qaqao, Nte hia mwivave, tiro. Tuvata mwihua qaiqaa mwia kyapara hita tiqata, E ta vaisivave? Tire poropeti vaisi mpo mwia vekyama varuro. E mwivave hiaro? tuvaro Ioniva qaqao nraahu tiro.

<sup>22</sup> Mwitaa tuvata mwihua tiqata, E tavave hiaro? Timwa timwinraqe tire nrumu ntanteta tiri titaa vaisihua iara uro timwa nyianre. E enanra tavaveve tira hiaro? tita.

<sup>23</sup> Mwihua mwitaa tuvaro Ioniva timwa nyinro tiqaro,

Nte qumina sata variqana aakyara ntena tiqana,

Aanra ntapihi taivaro nronravanto nrianrive,

ti varuvama varuqo, tiro.

*(Aisaiaa 40:3)*

Haaru poropeti vaisi Aisaiaava tu quara Ionivavata tura.

<sup>24</sup> Ioniva mwitaa tuvata Parisi vaisinramwuvanto sitohua tiqata,

<sup>25</sup> E tiriara nte hia mesaiaavanto varuqo qiaro. Hia nte Iraisaavave qiaro. Hia nte poropeti mwivave qiaro. Qio nanraqamave qumina vaisi varuqo qiarava nramanri nyi variaro? tita.

<sup>26</sup> Tuvaro Ioniva mwinramwuhua timwa nyinro tiqaro, Nte qumina nramanri nraahuma nraakye qora nyi varuqo. Mpovanto nkyi utaqaa varira nkye hia mwia taqaarave.

<sup>27</sup> Mwiva ni naakiara nrivave. Nte pata vaisi varuqaro mwiva nronra vaisi varihananra tina, nte hiama qio mwiva kyuqu nraamwu rupa tai kyaantara huvantu mwataaninrave, tura.

<sup>28</sup> Ioniva Mpetaani mwaata Iotaani nramanri qarahi hini variqaro nramanri nyi varu entara mwi quara tura.

*Ioniva Iesusirara Kotira sipisipi nraative tura*

<sup>29</sup> Mwia qanranraa Ioniva variqaro taqovaro Iesusiva mwisairo nri varuvaro mwiva tiqaro, Qio taqaate. Mwiva Kotira sipisipi nraative. Mwiaqama Kotiva mwatani varihua uaqia hi kyaiqara utira taiqa nyataananrove.

<sup>30</sup> Nte haaru tiqana, Vaisi mpovanto ni naakiara nrianriva ni naataraananrove. Nte hia qovara hiava entara mwiva haaru qati variqiro vuvave. Mwitaama variqarora tiro, mwiva ni naatara kyero nronravanto variananrove, tu vaisiva, mwaa mwivave.

<sup>31</sup> Tauraa hia nte mwia ntapihi taqaurave. Nkye Isarerri nraakye qoravanto mwia ntapihi kye taqaate tina, nte mwaini nrumu variqana nramanri nkyi nyi varurave, tiro.

<sup>32</sup> Mwitaa timwa kyero Ioniva Jesusirara mwihua vutukye timwa nyinro tiqaro, Nte taqauqaro Kotira mwanraquravanto minrunra voti hiva hitamwaqiro tuminro tumu mwiaqaa varirave.

<sup>33</sup> Tauraa nte hia Jesusira ntapihi taqe varuqaro Kotiva ni titaihana nte nramanri nkyi nyi varuqaro Kotiva ni timwa mpiro tiqaro, E taqairaro ni mwanraquravanto quariva uto mwiaqaa variani vaisira qio mwianra mwivave qiante. Mwiva hia qati nramanri nyiananrove. Mwiva nraakyе qora ni mwanraqura nyianrivave, tirave.

<sup>34</sup> Kotiva ni mwi quara timwa mpihana nte mwi inraikyara kyuqema kyena taqena nte mwianra mwaavama Kotira mwaaque tuqo, tiro.

### *Iesusiva vuniqama kyero erahiamuaantema vaisi sitora*

<sup>35</sup> Mwia qanranraa Ioniva nai nraaqiara taaratana mwia vataqita nrohutanavata siviro varuvaro

<sup>36</sup> Iesusiva nritarero vuvaro Ioniva mwia yutu taqero, mwitana timwa nyinro tiqaro, Taqaate. Mwiva Kotira sipisipi nraative, tiro.

<sup>37</sup> Mwitaa tuvata Ioninra vataqita nrohutana Ioniva tu quara rieta, mwiaqatai tuqasaa vita Ioninra mwini kyeta Jesusira vataqita vura.

<sup>38</sup> Vuvaro Iesusiva tuqasaa viro taqvata mwitana mwia vataqita nruvaro mwiva tiqaro, Nkyetana naanrave nriavo? tuvata mwitanahua tiqata, *Rapai*. mwaanra ti variara vaisio, e taraqi variaravave? tuvaro

<sup>39</sup> Iesusiva tiqaro, Qio nrita taqaate, tiro. Mwitaa tuvata mwitanahua mwia vatama kyeta uro mwiva varuraqi varita. Mwitanahua Jesusira vatama kyeta variqi vita enrovata nrumu ntanteta vura.

<sup>40</sup> Mwitanahua Ioniva Jesusirara tu quara rieta Jesusira vataqi vuraqitairo mpo Enturuva, Saimoni Pitaara qatavanto varura.

<sup>41</sup> Mwitana Jesusira mwini kyetatana Enturuva nai vakyaara puaama kyero mwia timwa mwinro tiqaro, Tiretana, Kotiva titai vaisira, mesaiaa mwia puaama kyauro, tiro. (*Mesaiaave, Karaisivave*, kuaa nrutuma vahiro.)

<sup>42</sup> Mwi vaisira puaama kyeta taqauro, timwa kyero Enturuva nai vakyaara vita varero Iesusiva hunani uro kyovaro Iesusiva mwia taqero tiqaro, E Ioninra mwaaku Saimonivave. Nte qaraakya nrutu nteqana iara Sipaasirave tirerave, tiro. *Sipaasirave, Pitaarave*, kuaa nrutuma vahiro. (Mwaa quaraqitai mwi nrutura tirerata *Orivave* tita.)

### *Iesusiva Piripikya Nataanierikya nyaanronra*

<sup>43</sup> Mwia qanranraa Iesusiva Karirini virerave timwa kyero, uro Piripira puaama kyero mwianra tiqaro, Ni naakiara nriante, tiro.

<sup>44</sup> Piripiva Vetasaitanyaavama variro. Enturukya Pitaakyavata kuaa mwatukya mwiqinaahua varura.

<sup>45</sup> Iesusiva Piripirara ni pataqira nriante tuvaro Piripiva Nataanierira puaama kyero mwia timwa mwinro tiqaro, Haaru tiri haivaqava Mosesiva mwaanra qua qara ntqaro mwi vaisirara timwatovata, poropeti vaisinramwuvata, mwi vaisiva nraakiara qovara hiananrove timwa kyeta qara ntumwato vaisira, qio mate mwi vaisirama taqauqo. Mwiva Iesusiva Iosepira mwaaquvanto Nasaretiqinaavave, tiro.

<sup>46</sup> Tuvaro Nataanieriva tiqaro, Qaqao, qiove kyuqe vaisivanto mwi mwatukyaraqitairo qovara hiananrove? tiro. Tuvaro Piripiva tiqaro, Enavanto nrumu taqaante, tiro.

<sup>47</sup> Mwitaa timwa kyero vuvaro Iesusiva taqvata mwitanahua nri varuvaro tiqaro, Taqaante. Quaama mwi vaisiva Isareri vaisivanto variho. Hia mwi vaisiraqi unra qua vahivave, tiro.

<sup>48</sup> Mwitaa tuvaro Nataanieriva Jesusira kyapara hiro tiqaro, Nataama kyerave e ni okyara ntapihira hiaro? tuvaro Iesusiva tiqaro, Piripiva hia i uro nraanrai vakya e fiki okyarani variarana nte i taqaurave, tiro.

<sup>49</sup> Mwitaa tuvaro Nataanieriva tiqaro, Mwaanra ti variara vaisio, e Kotira mwaaqueve. E Isareriqaa ntaqikyiravave, tiro.

<sup>50</sup> Mwitaa tuvaro Jesusiva tiqaro, E fiki okyarani variarana nte i taqaurave, turqaatairave nianra qutaa mwivave qiaro? Nraakiara nronra inraikya, mpo inraikya mpo inraikya mwia nraataraaninrama taqenanrave.

<sup>51</sup> E qutaama taqairaro nyaamwuvanto qatua viraqe nte mwatani mwatatai nraaqiarava variarita niqaanra nyaamwunyaahua vita tumita hi varivaqe varianinrave, tiro. Jesusiva mwitaa turama.

## 2

### *Mwatukya mpo Kenaaqi nraakye ntumwunra*

<sup>1</sup> Taara enta nritarovata mwatukya mpo Kena, Karirini mwi mwatanaahua nraakye ntumwinrenra hura.

<sup>2</sup> Mwitaa huvaro Jesusira nrovavata mwini varuvata mwi mwatanaahua Jesusiravata, mwia nraaqiaranramwuvata, nyaanrovata mwinramwuhuavata mwini vita.

<sup>3</sup> Mwinramwuhua uro variqata kyara nre varuvaro uainivanto taiqa vuvaro Jesusira nrova Jesusira timwa mwinro tiqaro, Uaini taiqama viho, tiro.

<sup>4</sup> Tuvaro Jesusiva qaqao tiro, Mwaa nraakyevao, i kyaiqa mpo kyaiqa vaiharo ni kyaiqa mpo kyaiqama viho. Nte kyaiqa varaani entava hiama nri ntaiho, tiro.

<sup>5</sup> Mwitaa tuvaro Jesusira nrova mwi mwatanaahua kyaiqa vaisinramwu timwa nyinro tiqaro, Mwiva nanra quave nkyiara tirata mwiva qiarinte qiarinte hiate, tiro.

<sup>6</sup> Iutaavanto nkyiari mwaanra qua rieqata mwitaa mwitaama kyeqata nkyiari mwamwanta hiqama kyora. Qio mwianra rieqaro nramanri taqu 6 nramwu nronra tave voti huva mwi nraamwunraqi vatovaro vahura. (Tave nronra kuaa mwiqi qioma nramanri taqu qataara 10 vanto quananro.)

<sup>7</sup> Vahuvaro Jesusiva kyaiqa vaisinramwu timwa nyinro tiqaro, Ekyaa mwi taqura qati nramanriqotaita piqa kyaate, tuvata qati nramanri kyaqaqita uro tave nronra mwinramwunra piqa kyovaro vaiqaara hura.

<sup>8</sup> Piqa kyovaro Jesusiva qaiqaa tiqaro, Qio mwikitai kyaqaqita uro kyaraqaa ntaqikyira mwivaro nreqanro taqaarive, tiro.

<sup>9</sup> Mwitaa tuvata mwikitai mwi nramanrinra kyaqaqita uro mwuvaro mwi vaisiva qati nramanrivanto uaini utu vura nreqanro taqovaro kyuqe huvaro mwiva hia qati nramanri kyaqora mwianra ntapihuvata kyaiqa vaisi mwinramwuhua nraahu mwianra ntapihura. Mwitaa huvaro kyaraqaa ntaqikyuvuva nreqanro taqovaro kyuqe uaini vahuvaro qamwata kyero nraakye varo vaisira nraanrama kyero

<sup>10</sup> mwia timwa mwinro tiqaro, Qikye, mpo hiahua kyuqe uaini nraante nraakye qora nyiavata nramwa taiqa kyaavata nraakiara uaqia hi uaininra nyi variarave. E hia mwitaa hiaro. Nte taqauqara e mpo uaini vuni nyinra kyuqe uaini mwia nraakiarama nyinra hiaro, tiro. Mwitaa turama.

<sup>11</sup> Jesusiva Kena mwatukya Karirini variqaro qati nramanri vara kyero uaini utu kyero nyunra. Mwiva mwi kyaiqara nraante toharama tero mwiaqaatairo mpo kyaiqa mpo kyaiqa nronra kyaiqa varaqiro vura. Jesusiva mwi kyaiqara varovata mwia nraaqiaranramwuvanto mwia kyaiqa taqetama Jesusira kepukya okyarara ntapihita mwianra qio qutaa mwivave tura.

<sup>12</sup> Mwiaqaatai mwivavata, mwia nrovavata, mwia qatanramwuvata, mwia qua riuohuavata, mwini kyeta vuhua Kapenaamini uro mpo entanramwu varura.

### *Iesusiva Kotira nraamwu nronraqi vura*

*(Matiu 21:12-13; Maaki 11:15-17; Ruku 19:45-46)*

<sup>13</sup> Vekyahu nyato kyarara nro entava qaumatoqa huvaro Jesusiva Ierusaremini vuva

<sup>14</sup> uro Kotira nraamwu nronraqi vera ntero taqovata mpo uhua kyoqaa kyaiqa vare variqata munima vareqata purimakauve sipisipive nyaamwave nyi varuvata mpo vaisinramwu tainta nraaqani variqata kamaninra munima vareqata Kotira nraamwuginaa munima nyi varura.

<sup>15</sup> Mwitaamaqita viqata kyoqaa kyaiqa vare varuvaro Iesusiva mwihua taqero kyapipi vara kyero mwiaqotairo purimakauvata, sipisipivata, sataqiro veva Kotira nraamwugitairo mwaatani kyero munima tuqasaaqi varu vaisihua tainta tu varero vara rauru kyero mwi munimanravata rauru kyero,

<sup>16</sup> nyaamwa nyiqata munima vare varu vaisihuara tiqaro, Nkye mwi inraikyara mwi inraikyara mwaajitai vare quate. Nkye hia ni kora nraamwu maaketi nraamwugama taate.

<sup>17</sup> Iesusiva mwitaa tuvaro mpo qua Kotira mpukuqi qara ntumwato quava mwia nraaqiaranramwu nyaatoqi ntumwa vuvata riora. Mwi quava mwitaama tiro:  
Nte i nraamwuanra nronraqama kyena riemwaqi quariva qia itaintema kyero niqi ite vaiho, tura. *(Ihi 69:9)*

Mwi quara mwitaama kyero qara ntumwa tora.

<sup>18</sup> Iesusiva mwitaa huvata Iutaa vaisi nronranramwuvanto tiqata, Qaqao, tava iara tiharave e mwitaa hiaro? E nanra nronra kyaiqa mpo tiri tivuqaa utiraqe tire mwia taqetave iara mwiva qio mwitaa hiananrove qiananrave? tita.

<sup>19</sup> Mwihua mwitaa tuvaro Iesusiva tiqaro, Nkye mwaa nraamwunra ntapairi kyaivaqe nte taarampo entara qaiqaa hoqa kyaaninrave, tiro.

<sup>20</sup> Mwitaa tuvata Iutaa vaisi nronranramwuvanto tiqata, Qaqao, mwaa nraamwunra hoqeqata 46 ihi airi ihi hoqaqi vita uro hoqa taiqa kyaarave. Qiove e taarampo entara nraahu mwi nraamwunra hoqa taiqa kyenanrave? tita.

<sup>21</sup> Mwitaa tuvaro Iesusiva hia vutu kyero qati nraamwuanra tiraitiro, mwiva nai mwamwantaqaa ntumwa kyero tiro. (Nkye ni rukyaivaqe nte taarampo enta vari kyena qati siquaninrave, tiro.)

<sup>22</sup> Iesusiva mwi quaraqaa ntumwa kyero tuvata nraakiara Iesusiva qati sivi varu entaraqaa mwia nraaqiaranramwuvanto variqata Iesusiva nraamwuanra tu quava mwihua nyaatoqi ntumwa vura. Kotira mpukuqi qara ntumwato quaravata rieqata, Iesusiva mwi entara tu quaravata rieqata mwihua Iesusirara qutaave tura.

### *Iesusiva ekyaa vaisi ntapihi kyaira*

<sup>23</sup> Vekyahu nyato kyarara nro entaraqaa Iesusiva Ierusaremini varuvata nraakyе qora airivanto mwia kyaiqa nronra kyaiqa taqeqlata Iesusirara qio quataa mwivave tita.

<sup>24</sup> Nraakyе qoravanto mwianra qamwateqata mwitaa ti varuvaro Iesusiva nraakyе qora okyarara ntapihi kyero rieqarora tiro, mwiva hia mwihua turara qutaave tura.

<sup>25</sup> Iesusiva nai vaakya nraakyе qora su nyaatoqi vahu inraikyara ntapihi kyorara tiro, hia qumina mpovanto mwihua okyarara mwia timwa mwianriva varura.

## 3

### *Nikotimaasiva Iesusira uro taqora*

<sup>1</sup> Parisi vaisi mpovanto mwia nrutu Nikotimaasiva varura. Mwiva Iutaa vunyaa vaisi mpovanto varura.

<sup>2</sup> Mpo enta mwiva entaqi uro Iesusira taqero tiqaro, Mwaanra ti variarao, tire taqauraro Kotiva i titaiharara tira, e mwaanra qua ti variaravama nrinra hiaro. Hia Kotiva i kyaahaqa hiankye titiri, e hiama qio nronra kyaiqa varaaratirio, tiro.

<sup>3</sup> Mwiva mwitaa tuvaro Iesusiva mwia timwa mwinro tiqaro, Nte quataa qua qianinra riaante. Vaisi nronra tuemwa quaninra hia qaiqaa mwata tairaro mwiva hiama qio Kotiva ntaqikyi mwatukyara taqaananrove, tiro.

<sup>4</sup> Tuvaro Nikotimaasiva kyapara hiro tiqaro, Nataama kyerove nronra tuemwa quani vaisira qaiqaa mwata kyaananrove? Qiove mwiva nai nronra vikyokyaqi qaiqaa viqe tairaro mwia nrova qaiqaa mwata kyaananrove? tiro.

<sup>5</sup> Mwitaa tuvaro Iesusiva nai timwa mwinro tiqaro, Nte quetaama tuqo. Nramanrivata mwata taariva variraro hia Kotira mwanraquravanto mwia qaiqaa mwata kyairaro mwiva hiama qio Kotiva ntaqikyi mwatukyaraqi quananrove.

<sup>6</sup> Mwamwanta vataava nai mwamwanta vahira nraahu mwatairave. Mwanraquravanto nai mwanraqura nraahu mwatairave.

<sup>7</sup> Nte nkyi qaiqaa qaraakyaqama kyero mwata kyaarive tu quarara hia e mwi quarara nrihanrama quante.

<sup>8</sup> Nte mpo quaqaa ntumwa kyena i timwa mwinrenrave. Toqavanto tiqaro nai quataa hiraqa virave. Toqavanto nrihanra e hia mwia taqaraitira, e mwia nruqua nraahu riaananrave. E mwiva viro nrinro hi okyarara hia ntapihiananrave. Qio Kotira mwanraquravanto mwatai okyarava kuaa qarama kyeroma vaiho, tiro.

<sup>9</sup> Iesusiva mwitaa tuvaro Nikotimaasiva mwia kyapara hiro tiqaro, Nataama kyerove mwitaa hiananrove? tuvaro

<sup>10</sup> Iesusiva tiqaro, E Isareri nraakye qora mwaanra timwa nyi variarava e hiave ntapihiaro?

<sup>11</sup> Nte quetaama tuqo. Tire ntapihi kyeta rie taqe hunanra nkyi timwa nyi varurata nkye hia tiri qua riaarave.

<sup>12</sup> Nte mwatanyaa inraikyara nkyi timwa nyuqata nkye mwianra hia ntapihita quataave qiarave. Nkye mwitaa hiavana nte nyaamwunyaa inraikyara qiarita nataama kyetave nkye mwi quara qio ntapihi rievarave?

<sup>13</sup> Hia vaisi mpovanto Kotiva varira nyaamwuni virave. Nte mwatani mwatatai nraaqiarava nte nraahu nyaamwuni variavava mwisaina tumunrave.

<sup>14</sup> Haaru nkyi haivaqava Mosesiva qumina mwataqaa variqaro ori vara kyero qarura utu kyero mwia kyatariqaa rupa kyero tuaahera kyorave. (Nraakye qoravanto mwia taqeta hia qutu quate tiro, Mosesiva mwitaa hurave. (*Namba 21:6-9*) ) Qio nte mwatani mwatatai nraaqiarava variarita haaru Mosesiva qarura utu kyero tuaahera kyontema kyeta nivata kyatariqaa vateta tuaahera kyevarave.

<sup>15</sup> Mwitaa hirata nraakye qora nianra quataa mwivave tihua hia qutu viraitita, ekyaa enta ekyaa enta qati variqi vivarave, tiro. Iesusiva turama.

<sup>16</sup> Kotiva mwatani variahura mpogama kyero mwutukya ntiharora tiro, mwiva nai mwaaku kuaiqia vataira tiri timwinra. Mwitaa hirara tita, nraakye qoravanto mwia mwaaku quataa mwivave tihua hia qutu viraitita, mwihua ekyaa enta ekyaa enta qati variqi vivara.

<sup>17</sup> Kotiva hia nai mwaaku ko riaa vaisihua votima kyero variqaro nraakye qora tukya hiarive tiro mwatani titaiharo tuminrave. Mwiva nraakye qora sitaarive tiro, Kotiva mwia titaiharo tuminrave.

<sup>18</sup> Mpovanto mwia mwaaku quataa mwivave qiariva, mwiva hiama qua varaanano. Mpovanto hia mwia mwaaku quataa mwivave qiariva, mwiva vaakyama qua varero. Mwiva Kotiva mwaaku kuaiqiara hia quataa mwivave tira kyaarama, Kotiva mwianra quataa iqaa qua vaiho timwa kyero, mwiaqaa qua vatero.

<sup>19</sup> Mwaa inraikyara kyaara qua vahianano. Omwavanto mwatani tumihata nraakye qoravanto hia mwia qamwata mwataraitita, mwihua kyokira rirara nraahu qamwateqata variara. Mwihua kyaiqvanto qora kyaiqa vaihatara tita, mwihua hia mwi omwanra qamwata mwateta.

<sup>20</sup> Qora kyaiqa uti variva nramwutaaqa hiqaroma hia omwavanto varinani viro. Omwavanto iteqaro ni uaquia hi kyaiqara qovarama kyaankyo tiro, hia omwavanto varinani viro.

<sup>21</sup> Mwiva mwitaama variharo qutaa kyaiqa vare vari vaisiva hia aatu hiraitiro, omwavanto varinani viro. Mwiva viharo omwavanto itero mwia kyaiqa qovarama kyaihata nraakye qora taqaavaro mwi vaisiva Kotira qua rieqaro Kotira kyaiqa vare varira.

### *Nramanri nyi varuva Ioniva ekyara qua Iesusirara timwa nyunra*

<sup>22</sup> Mwiaqaataita Iesusivavata mwia nraaqiaranramwuvata (Ierusaremi kyeta) Iutaa mwata mpo qumina mwatani vura. Iesusiva nai nraaqiaranramwu kyapata variqaro nraakye qora nramanri nyunra.

<sup>23</sup> Nyuvaro Ionivavata mwatukya mpo Serimi tataaqa Ainonini variqaro nramanri nyi varura. Ioniva nramanri nronra vahunani variqaro nraakye qora mwini ntuvantuama vuhua nramanri nyunra.

<sup>24</sup> Mwi entara hia Ioninra karavuqi vitaqita uro kyo entara varura.

<sup>25</sup> Mwi entara Iutaa vaisi mpovanto Ioninra qua riohua kyapata nramanri vare okyarara inronra huvata mwihua Ioniva hunani uro nteta tiqata,

<sup>26</sup> Mwaanra ti variarao, tauraa e Iotaani qarahi vutura hini vaisi mpovata variqarama e mwianra mwivave tunanrave. Qio taqaante. Mwi vaisiva mwivavata nramanri nyi varihata airivanto mwiva hinani vi variavo, tita.

<sup>27</sup> Mwitaa tuvaro Ioniva tiqaro, Qio Kotiva nyaamwuni variva vaisi mpo hia mpo inraikya mwinrenra, mwi vaisiva hiama mwi inraikyara varaananrove.

<sup>28</sup> Nkyevata vuni nte tura riaarave. Nte tiqana, Hiama nte nkyi kyaahaqa hiariva varuquo. Ni titaihana nte nraante mwia vuni nruvave, turave.

<sup>29</sup> Nraakye vararerera hi vaisiva nraakye varairave. Mwi vaisira totivanto qati sivi variqaro mwia qua rieqaro qamwata kyero varirave. Qio mwia totivanto qamwataintema kyena nte Iesusirara qamwatauquo.

<sup>30</sup> Iesusira nrutu virini nriviraro ni nutu mwatani tumi quarive. (Airivanto mwia vataqita vivarave. Hiama ni pataqita vivarave. Mwihua Iesusira vataqita virara hiama nte Iesusira kyaru ntumwa mwataaninrave. Nte mwia qamwata mwataaninrave), tiro. Ioniva turama.

### *Iesusiva nyaamwusairo tuminranra tura*

<sup>31</sup> Iesusiva virisairo tumivara tiro, ekyahua nraatara kyaivama variro. Mwatanyaava mwatasairo nrivara tiro, mwiva mwatanyaa inraikyara nraahu ti varira. Iesusiva nyaamwusairo tumivara tiro, ekyahua nraatara kyaivama variro.

<sup>32</sup> Mwiva nai taqero riero hi inraikyara qoqaa timwa nyi varihata nraakye qoravanto mwia quara hia quataave tiraitita, mwia qua qoririma mwate variara.

<sup>33</sup> Qio vaisi mpovanto hia Iesusira qua qoririma mwataraitiro, mwia quara quataave ti vari vaisiva, mwiva mwitaa tiqaroma Kotira quaravata qutaa qua vaiho tiro.

<sup>34</sup> Kotiva Iesusira titaiharo mwiva Kotira qua nraahu ti varira. Kotiva mwia titarera hiro hia nai mwanraqura pataqia pataqia mwinraitiro, mwia nronraqama kyero mwihanronra tiro, qio Kotira qua nraahu ti varira.

<sup>35</sup> Mwia qova nai mwaqaquara mpoqama kyero mwutukya ntiharo ekyaa inraikya nai mwaqaqu mwihanro mwiva mwi inraikyaraqaa ntaqikyiqiro vi variro.

<sup>36</sup> Mpovanto mwia mwaqaquara quataave qiariva hia ekyara qutu viraitiro, mwiva qati variqiro quananro. Mpovanto hia mwia quara quataave qiariva variraro Kotira raraqa tairaro mwia inronra hiraro quavanto mwiaqaa vahiananro.

### *Iesusiva Sameriaa nraakyevata qua tura*

<sup>1</sup> Mwi entara Parisi vaisinramwuvanto riovoro Iesusiva airi nraakye qora nai hunani sita kyero vateqaro mwihua nramanri nyiganroma Ioninra nraatara kyora.

<sup>2</sup> Iesusiva hia naivanto mwihua nramanri nyunra. Mwia nraaqiaranramwuvanto nraakyе qora nramanri nyunra.

<sup>3</sup> Parisi vaisinramwuvanto mwi quara riovarora tiro, Iesusiva mwiaqaatairo Iutia mwini kyero Karirini viro.

<sup>4</sup> Karirini virero mwiva Sameriaa mwata utaqaama tero quariva vahura.

<sup>5</sup> Mwiva viqaroma mwatukya pata mpo mwia nrutu Saikaa mwini uro ntora. Mwata mpo haaru Iaikopuva nai mwaaqu Iosepira mwu mwatara mwia tataaqa vahura.

<sup>6</sup> Iaikopuva haaru nramanrianra quvutova mwini vahuvaro Iesusiva nyianra aanra nri kyovaro pupohovaro mwiva nramanrianra quvutora tataaqa mwatakyaa viro varura. Varuvaro huarivanto nrinro virira qiataqaa vahuvaro

<sup>7</sup> Sameriaa nraakyе mpovanto nramanri kyaqarero nruvaro Iesusira nramanri nraataa huvaro mwi nraakyerara tiqaro, Nramanri kyaqa kyera ni mpiraqe nraankye, tiro.

<sup>8</sup> Iesusira nraaqiaranramwu vaakya kyara vararerata mwatukyani vuvaro

<sup>9</sup> Iesusiva mwiaqaa variqaro mwitaa tuvaro Sameriaa nraakyе mwiva qaqao tiro, E Iutaavanto variarana nte Sameriaavanto varuqo. Nataamaqirave nianra nramanri kyaqa mpiraqe nraankye tira hiaro? tiro. Iutaavantovata Sameriaavantovata nai nununrama mwate nai nununrama mwate hi varuhuara tiro, mwi nraakyeva mwitaa tura.

<sup>10</sup> Mwitaa tuvaro Iesusiva nai timwa mwinro tiqaro, E Kotiva qati nyiani inraik-yarara e riera ni okyararavata ntapihiataritio, e ni kyapara hiarana nte qati variqi vi nramanrinra i mwutirio, tiro. (Mwi mwatanaahua nrumwuqinaa nramanrianra tiqata, Qati variqi vi nramanrinrave), tura.

<sup>11</sup> Iesusiva nte qati variqi vi nramanrinra i mwinrenrave tuvaro mwi nraakyeva hia ntapihi kyero riaraitiro, mwiva rumwu nramanrianra tiho tiro. Mwiva tiqaro, Nron-rao, nramanrivanto vevato vahara e hiama nramanri taqu vatera hiaro. Taraqitairave qati variqi vi nramanrinra kyaqenanrave?

<sup>12</sup> Tiri haivaqava Iaikopuva nronra vaisivanto varurave. E mpo? E mwia nraatara kyaaravave iho? Mwiva nramanri varaaninra mwata quvu kyero naivata nai nraaqiaravata nai quaravatama kyero mwaa nramanrinra kyaqa kyero nronrave, tiro.

<sup>13</sup> Mwitaa tuvaro Iesusiva tiqaro, Mpovanto mwaa nramanrinra nrainranro qaiqaa nraahu nraataa hiraro nrumu nreqanro variananrove.

<sup>14</sup> Nte mwiani nramanrinra mpovanto nrainranro mwia hiama qaiqaavata nraataa hiananrove. Nte nramanri mwianrinro mwi nramanriva vaisi utaqitairo rumwuqitairo tumi nramanrinra votima kyero vi variraro mwi vaisiva hia qutu viraitiro, qati nraahu variqiro quananrove, tiro.

<sup>15</sup> Mwitaa tuvaro mwi nraakyeva tiqaro, Nronrao, qio mwi nramanrinra ni mpiraqe nte nraanrinro hia qaiqaa ni nraataa hiraqe qaiqaavata nrumu mwaqaqitaina kyaqa kyeqana nraankye, tiro.

<sup>16</sup> Mwitaa tuvaro Iesusiva tiqaro, Qio, uro ena vaativata nraanrama kye vita varera uro ntantera mwaini nriante, tiro.

<sup>17</sup> Tuvaro mwi nraakyeva tiqaro, Qaqao, hia ni paati varivave, tiro. Tuvaro Iesusiva tiqaro, E qutaama tiqara hia ni paati variho qiaro.

<sup>18</sup> E kyauquru nani vaati varaaravave. Mate e vaisi mpovata variarava, mwiva hia qutaa i vaativanto variho. E qutaama tira hiaro, tiro.

<sup>19</sup> Mwitaa tuvaro nraakyе mwiva tiqaro, Nronrao, nte taqauqara e poropeti vaisima varira hiaro. Kotiva i kyaahaqa iharama e mwitaa tira hiaro.

<sup>20</sup> Qio Sameriaa tiri haivaqahua Kotira nrutu tuaaherarerata mwaa taaqiraqaa variqata Kotirara aakyara nte varurave. Mwitaa turata nkye Iutaavanto tiriara tiqata, Qaqao nkye Ierusaremini nraahu variqata Kotira nrutu tuaaheraataarave, qiarave. Nkye tiriara mwitaa ti variarave, tiro.

<sup>21</sup> Mwitaa tuvaro Jesusiva tiqaro, Ni quara e quataave qianta. Mpo enta nri ntairata nkye mwi entaraqaa ni kora nrutu tuaaherarera hiqata, hiama mwaa taaqiraqaa variqata aakyara ntevarave. Hiama Ierusaremini variqata Kotirara aakyara ntevarave.

<sup>22</sup> Nkye Sameriaavanto hia Kotira okyarara ntapihiraitita, apiqama kyeqata aakyara nte variarave. Tiri Iuttaaqitairo nraakye qora huvantu nyataariva qovara hianinranra tita, tire ntapihi kye Kotira okyarara rieqata mwia nrutu tuaahereqata mwianra aakyara nte varunanrave.

<sup>23</sup> Mpo enta nrianriva qaumaqa iho. Mwi entava mate qovarama viho. Mwi entaraqaa Kotira mwanraquravanto nraakye qora kyaahaqa hirata mwihua ntapihi kye Kotira okyarara rieqatama mwihua quetaaqama kyeta Kotira nrutu tuaaherevarave. Mwitaama kye Kotira nrutu tuaaherehuara Kotiva puua hi variho.

<sup>24</sup> Kotiva mwanraquravanto varirave. Mwitaama varirara tita, mwia mwanraquravanto kyaahaqa hi nraakye qorahua mwihua nraahuma Kotira okyara ntapihita quetaaqama kyeta Kotira nrutu tuaaherevarave, tiro.

<sup>25</sup> Mwitaa tuvaro nraakye mwiva tiqaro, Kotiva titaaninra, mesaiaa mwianra nte ntapihi kyaupo. Nraakiara mpo enta mwi vaisiva nri ntero ekyaa inraikyara tiri timwa timwiananrove, tiro.

<sup>26</sup> Mwitaa tuvaro Jesusiva mwianra tiqaro, Qio ivata qua ti varuva nte mwaa mwivave, tiro.

<sup>27</sup> Jesusiva mwitaa ti varuqiaraqi Jesusira nraaqiaranramwuvanto uro ntanteta nrumu taqovaro Jesusiva Sameriaa nraakyevata qua ti varuvata mwihua nrihanrama vita. Mwihua nrihanrama vitavata hia mwi nraakyerara tiqata, Nanra inraikyarave mwiavata qua ti variaro? tiraitita, hia Jesusiraravata tiqata, Nanra inraikyarave nraakye mwiavata qua ti variaro? tura.

<sup>28</sup> Tirema varuvaro nraakye mwiva nai nramanri taqu mwini kyero siviro nrumu ntantero mwatukyaqi nraakye qora uro timwa nyinrenro vuva uro ntero tiqaro,

<sup>29</sup> Nkye vaisi mpo nrita taqaate. Mwiva nte utu inraikyara ekyaa ni timwa mpiho. Quataa mwiva Kotiva titarerera hiva, mwivave iho? tiro.

<sup>30</sup> Mwitaa tuvata mwihua mwatukya mwia kyeta Jesusiva varunanianra vura.

<sup>31</sup> Mwi nraakyeva vuvata Jesusira nraaqiaranramwuvanto Jesusirara tiqata, Mwaanra ti variarao, qati kyara mwaa vara kyera nraante, tuvaro

<sup>32</sup> mwiva mwihuara tiqaro, Nte kyara nraaninra vatauqo. Nkye mwi kyarara hiama ntapihi kyaavo, tuvata

<sup>33</sup> mwia nraaqiaranramwu nai timwa mwi nai timwa mwi hita tiqata, Vaakya mpovanto kyara mwihanro nrenrove mwitaa tiho? tuvaro

<sup>34</sup> Jesusiva mwinramwuhua timwa nyinro tiqaro, Ni titaira mwutukya vahi kyaiqara vareqana mwiva kyaiqa mpitairavata varaqina uro taiqa kyaariva qio mwi kyaiqava ni kyarama iho, tiro.

<sup>35</sup> Jesusiva mwitaa timwa kyero tiqaro, Nkye mpo quaqaa ntumwa kye tiqata qiarave. Tora taaratana taaratana vara kyaariro kyara peqaqama viraqe vantuaninrave, qiarave. Qio kyara vara tutaraaqi aitutu hiqata taqaate. Mate kyaravanto naitarama viho. Nkye qioma vantivarave.

<sup>36</sup> Kyara vantiva nai kyaiqa varairara kyoqaa varairave. Mwiva kyara vantu tairaro mwi kyarava ekyaa enta ekyaa enta qati vahiqiro quananrove. Mwitaa hirata kyara vara tuarivavata, kyara vantuarivavata, mwitanahuqaqama qamwateqata varivarave.

<sup>37</sup> Mpo quavata qiaava quataa quama vaiho. Vaisi mpovanto kyara vara tutaira mpovanto mwi kyarara vantirave.

<sup>38</sup> Nte nkyi sitena tiqana, Mpovanto kyaiqa vareqaro vara tutai kyarara uro vantuate, tuqo. Mpo hiahua toqaamwu tukyeta kyaiqa vara kyeta kyara vara tutara, nkye mwihua kyara vantivarave, tiro.

*Sameriaaa airivanto Jesusirara quataave tura*

<sup>39</sup> Jesusiva mwitaa ti varuvaro mwi nraakyeva uro nai nramwunaahuara tiqaro, Mwiva nte utu inraikyara ekyaa timwa mpiho, tuvata Sameriaaa nraakyevora mwi mwatukyaraqinaahua airivanto Jesusirara qio quataa mwivave, tita.

<sup>40</sup> Mwitaa timwa kyeta Sameriaaa qinaahua Jesusiva varunani nri nteta Jesusirara po tita tiqata, Qio hia qamwanrama quante. E tirivata vari kyera quante, tuvaro Jesusiva mwihuavata taara enta vaitero vurama.

<sup>41</sup> Kyaatavanto nraahu Jesusira qua rieqata qio quataa mwivave tita.

<sup>42</sup> Mwihua mwi nraakyerara tiqata, Hia vaakya e qiananraqataitavauma tire mwianra quataa mwivave, turo. Mate tetavanto nai nroqitaita rietama mwianra quataa mwivave turo. Tire taqauraro Kotiva mwia titaiharo mwiva tiri mwaa mwataraqaa varurahua kyaahaqama timwa tero huvantu timwa taarivama variho, tita. Mwitaa turama.

*Iesusiva nronra vaisi mpo nraaqiara kyaahaqama kyora*

<sup>43</sup> Jesusiva mwini taara enta vaitero mwiaqaatairo nai mwaata Karirini viro.

<sup>44</sup> Jesusiva nai tiqaro, Poropeti vaisivanto nai mwaatani variharo mwia nrutuvanto hia virito vahirave, tura.

<sup>45</sup> Jesusiva Karirini vuvata mwi mwatanaahua mwianra qamwateqata varura. Mwi mwatanaahuavata vekyahu nyato kyarara nro entara Ierusaremini uro variqata Jesusiva nronra kyaiqa varovata taqorara tita, mwihua mwianra qamwatora.

<sup>46</sup> Mwia qamwata mwatovaro Jesusiva qaiqaa Kenaani tauraa mwini variqaro qati nramanri vara kyero uaini nramanriqama kyonani nrunra. Nruvaro kamaninra kyaiqa vaisi mpovanto varuvaro mwia mwaqvavanto nronraqama kyero nriqa vuvaro Kapenaamini varura.

<sup>47</sup> Jesusiva Iutiasairo Karirini nriho tuvaro riero, mwi vaisiva Jesusiva varunani uro ntero tiqaro, Qiove e nrinra ni maaqu nriqa vira kyaahaqama kyairaro qati variananrove, tiro. Mwi vaisira nraaqiaravanto qutu quariva qaumaqa huvaro mwiva mwitaa tuvaro

<sup>48</sup> Jesusiva mwianra tiqaro, Nkye hia nronra kyaiqa kyuqe hira taqaraitita, hiama nkye quataave tivarave, tiro.

<sup>49</sup> Tuvaro nronra vaisi mwiva tiqaro, Nronrao, ni maaqvavanto qutu quankyorave. Qamwanrama nriante, tuvaro

<sup>50</sup> Jesusiva tiqaro, Qio ena mwaatani quante. I mwaqvavanto qati variananrove, tiro. Mwitaa tuvaro mwia vaisiva Jesusiva qua timwa mwunranra quataa quave timwa kyero, nai mwaatani viro.

<sup>51</sup> Mwi vaisiva aanrani vi varuvata mwia kyaiqa vaisinramwuvanto uro huntu kyeta mwia timwa mwita tiqata, I nraaqiaravanto kyuqema viho, tita.

<sup>52</sup> Tuvaro mwiva mwinramwuhua kyapara hiro tiqaro, Nanra huari vuqaave mwia nriqa viva taiqa viharo mwiva kyuqema viho? tuvata mwihua tiqata, Enta huari vu vitini tumi viro 1 kirokiqa iharo mwia nriqa viva taiqa virave, tura.

<sup>53</sup> Mwitaa tuvaro mwia qova ntapihi kyovaro huari vu mwiqiaraqaa Jesusiva mwia timwa mwinro tiqaro, I mwaqvavanto qioma variananrove, tura. Mwitaa turara tiro, mwia vaisivavata mwia nramwunaahuavata Jesusirara quataa mwivave turama.

<sup>54</sup> Jesusiva Iutiasairo nrumu Karirini variqaro mwi kyaiqara varova tauraa varova kuaiqia vahuraqa mwiva viro taaraqiaqa hora.

*Iesusiva mwaanraqaa vaisi mpo kyaahaqama kyora*

<sup>1</sup> Mwiaqaatairo Iutaavanto omwata nro entava mpo nri ntovaro Jesusiva Ierusaremini viro.

<sup>2</sup> Ierusaremini vasaamwunra qesa mpo sipisipi qesa vahura. Mwia tataaqa nramanri rumpua mwia nrutu Vetasaitaave tuva vahura. Nramanri tokyasataa haraara nraamwu kyauquru vahuvata

<sup>3</sup> haraara mwiqi nriqa vuhua airinti varura. Vu qipa vuhuave, kyuqu uaqiamu vuhuave, kyuqu kyauqu tapanra vuhuave, mwihua variqata nramanrivanto qakyaa hianinra mwia vekya varura.

<sup>4</sup> [Kuaa enta kuua enta nyaamwunyaava mpovanto tumu nramanri qakyaa huvaro mwihuaqitairo mpovanto nraante nramanriqi vuvaro mwia nanra mwamwantave nriqa vuva kyuqema vura.]

<sup>5</sup> Qio mwihua nramanri qakyaa hianinra vekya varuvaro vaisi mpovanto airi ihi 38 ihiara nriqa vuvaro varuvavata mwiqi variro.

<sup>6</sup> Varuvaro Jesusiva mwia taqero ntapihi kyovaro mwi vaisiva airi ihi nriqa vuvaro varura mwia kyapara hiro tiqaro, I nriqa quariva taiqa quarive tira, e mwianra qamwaterave hiaro? tiro.

<sup>7</sup> Mwitaa tuvaro nriqa vu vaisiva tiqaro, Nronrao, nramanrivanto qakyaa iharo mpovanto ni kyaahaqamaqiro uto nramanriqi kyaariva hia varihana nte nraante virera huqata mpohua nraante quavo. Mwitaamaqi vi variqana varuqo, tiro.

<sup>8</sup> Nriqa vu vaisiva mwitaa tuvaro Jesusiva mwia timwa mwinro tiqaro, Sivira ena taarivata tu varera nrohiante, tuvaro qamwanrama mwia mwamwantavanto kyuqema vuvaro

<sup>9</sup> mwi vaisiva siviro nai taarivata tu varero qio nrohura. Mwi entara mwaanraqaa mwitaama kyora.

<sup>10</sup> Mwaanraqaa mwitaama kyorara tita, mwia kyaara Iutaa vaisi nronranramwuvanto vaisi kyuqema vura mwia inronra hita tiqata, Mate mwaanraqaave. Ena taari tu vare vinanranra tiri mwaanra quavanto qao tirave, tita.

<sup>11</sup> Tuvaro mwi vaisiva tiqaro, Qaqao, vaisi mpovanto ni kyuqema kyaiva nianra ena taari tu varera nrohiante tihanama nte mwitaa huqo, tiro.

<sup>12</sup> Tuvata Iutaa vaisi nronranramwuvanto tiqata, Ta vaisivave iara sivira ena taari tu varera nrohiante tiho?

<sup>13</sup> tuvaro mwia mwamwantavanto kyuqema vu vaisiva hia mwia nrutu ntapihura. Mwini nraakye qora airivanto varuvaro Jesusiva qamwanrama vi vuvaro mwi vaisiva hia Jesusira nrutu ntapihura.

<sup>14</sup> Mwia nrutu hia ntapihiraitiro varuvaro Jesusiva nraakiara variqaro taqovaro mwi vaisiva nraamwu nronra Kotira nraamwuqi varuvaro Jesusiva mwia timwa mwinro tiqaro, Qio taqaante, i mwamwantavanto kyuqema viho. Mpo inraikyavanto mwia nraataraariva i ru kyaankyo tira, hiama qaiqaa uaquia hi kyaiqara utuqira quante, tiro.

<sup>15</sup> Mwitaa tuvaro mwi vaisiva mwiqitairo veva ntero uro Iutaa vaisi nronranramwu timwa nyinro tiqaro, Mwia nrutu Jesusiva mwivama ni mamanta kyuqema kyaiho, tiro.

<sup>16</sup> Tuvata mwihua riovaro Jesusiva mwaanraqaa mwia kyuqema kyorara tita, mwihua mwia kyaara mwi entaraqaataita Jesusira qoraqama mwate varura.

<sup>17</sup> Mwitaa huvaro Jesusiva mwihua timwa nyinro tiqaro, Ni kova ekyaa enta kyaiqa vare varihanama ntevata kyaiqa vare varuqo, tiro.

<sup>18</sup> Tuvata mwi quara kyaara Iutaa vaisi nronranramwuvanto mpogama kyeta Jesusira ru kyarerata uti varita tiqata, Tauraa Jesusiva tire mwaanra entara tuna quara nteqa kyaiho. Mwia nraakiara mwiva Kotirara ni korave tiho. Mwiva qumina vaisivanto variqaro mwiva Kotira votima kyero Kotikyantiri kuaaqaa varirero uti variho, tita.

*Ni kova varai kyaiqarama ntevata varauqo tura*

<sup>19</sup> Iutaa vaisinramwuvanto mwitaa tuvaro Jesusiva mwihua timwa nyinro tiqaro, Nte qutaa qua qianinra riaate. Nte mwia mwaaquvanto variqana hiama ntena nraato tukyena mwi inraikyara varaaninrave. Ni kova kyaiqa varaihana nte taqaura mwi kyaiqara nraahuma vare varuqo. Ni kova mwitaa mwitaa ihana nte mwia mwaaquvantovata mwitaa hi varuqo.

<sup>20</sup> Ni kora mwutukyavanto ni nai mwaaquara vaiharora tiro, mwiva nai vare vari kyaiqara ekyaa kyaiqa ni naamutaiho. Nraakiara ni kova naamutairaqe nte mwaa kyaiqara nraatara kyaani kyaiqarama varaaninrave. Nte mwi kyaiqara mwi kyaiqara varaarita nkye mwia taqetama mpoqama kyeta nrihanrama vivarave.

<sup>21</sup> Ni kova qutu quahua qaiqaa vara sivuma kye varivave. Ni kova mwitaa hintema kyena nte mwia mwaaquvantovata variqana ni mutukya vahiani nraakye qorahua qati vara sivuma kyaarita mwihua qati variqita vivarave.

<sup>22</sup> Ni kova nai hiama nraakye qora ko qiananrove. Mwiva mwi kyaiqara ni mpitaihana nte mwia mwaaquvanto variqana qio ko qianinrave.

<sup>23</sup> Mwiaqaataita nraakye qoravanto ni kora nrutu tuaaheraantema kyeta mwihua ni mwia mwaaqu nrutuvata tuaaherevarave. Mpowanto hia ni mwia mwaaqu nrutu tuaaheraariva hiama ni kova ni titaira nrutuvata tuaaheraananrove.

<sup>24</sup> Nte qutaa qua qianinra riaate. Mpovanto ni qua riero qutaama Kotiva mwia titaiwave qiariva, mwivama ekyaa enta ekyaa enta qati variqiro quananrove. Mwi vaisiva hiama qua varaananrove. Mwiva mwaa entara hia ekyara qutu viraitiro, mwiva ekyaa enta qati variqiro quarivama variho.

<sup>25</sup> Nte qutaa qua qianinra riaate. Mpo enta nrianriva qaumaqa iho. Mwi entaraqaa qutu virera utihua, mwihua Kotira mwaaqu ni qua rievarave. Ni qua riehua qioma qati variqita vivarave.

<sup>26</sup> Qati variqita qua okyarava ni koraqi vaharo ni kova nai mwaaqu ni nronraqama kyaiharo mwiaqi vahintema kyero qati variqita qua okyarava niqvata vaiho.

<sup>27</sup> Ni mwatani mwatatai nraaqiarara tiro, ni kova ni nronraqama kyaihana nte mwatani vari nraakye qorahua qio ko qianinrave.

<sup>28</sup> Nkye hia nte qua qianinranra nrihanrama quate. Mpo enta nri ntairaque nte mwihua nyaanraanrita mwataqi quntamwa te nraakye qorahua ni qua rieta,

<sup>29</sup> mwihua quntamwa teraqitaita sivivarave. Hini hihua kyuqe kyaiqa varehua sivita qati variqita vivarave. Hini hihua uaqia hi kyaiqara utihua sivita nronra quama varevarave.

### *Vaisi mpo uhuavata Jesusira okyarara tura*

<sup>30</sup> Nte variqana hiama ntena nraato tukyena mpo inraikya varaaninrave. Kotiva timwa mpi varihana mwia qua rieqanama nte nraakye qora qio ko qianinrave. Hiama nte ntena mwutukya nti kyaiqara vare varuqo. Nte ni kora mwutukya nti kyaiqarama vare varuqo. Mwitaamaqi vi varuvara tina, nte nraakye qora qua ntapihi kyena ko qianinrave.

<sup>31</sup> Nte ntenavanto ntena okyarara qiariro mpovanto ni quara hia qutaa quave qiankyorave.

<sup>32</sup> Qio mpovanto variqaro ni okyarara timwa nyi variho. Nte ntapihi kyauqaro mwiva nianra timwa nyi quava qutaa quama vaiho.

<sup>33</sup> Nkye tauraa vaisi mponramwu sitovata mwihua uto Ioninra kyapara huvaro Ioniva ni okyarara ntapihi mwihua timwa nyunrave.

<sup>34</sup> Vaisivanto ni okyarara qianinra hia nte mwianra nronraqama kyena riauqo. Kotiva nkyi sitaarive tina, nte mwi quara timwa nyuqo.

<sup>35</sup> Ioniva variqaro omwa votima kyero ite varuvata nkye variqata mwiva itorara hia mpuahaama kyeta qamwata mwatorave.

<sup>36</sup> Qio ni okyarara qiariva Ioninra nraataraarivama variho. Ni kyaiqavanto nianra timwa nyi variho. Ni kova kyaiqa ni mpitaira nte mwi kyaiqara vare varuva, qio mwi kyaiqava ni okyarara timwa nyi variho. Nraakyе qoravanto ni kyaiqa taqeqtama qiomа ni kova ni titairave tivarave.

<sup>37</sup> Ni kova ni titava, mwivama ni okyarara timwa nyi variho. Nkye hia mwia qua rieta, hia mwia viri taqaarave.

<sup>38</sup> Mwiva ni titahana tumuqata nkye hia nianra qutaa mwivave qiavo. Nkye hia mwitaa qiavarora tiro, Kotira quavanto hia nkyi su nyaatoqi vahata variavo.

<sup>39</sup> Nkye tiqata, Kyaiqe Kotira mpukuqi aitutuma kyeta taqeta ekyaa enta ekyaa enta qati variqita quare, ti variarave. Qio mwi mpukuraqi vahi quava ni okyarara ti varihata

<sup>40</sup> nkye hia nte varunani nriavana nte qati variqi vi inraikyara nkyi nyunrave. Nte hunani nriataara vahata nkye hia nrianrave.

<sup>41</sup> Hiama nte vaisiqataina nronra nrutu varaaninrave.

<sup>42</sup> Nte nkyi ntapihi kyauqo. Nkyi mwutukyavanto hia Kotirara vahata variavo.

<sup>43</sup> Kotiva ni kova ni titahana nte ntena kora nrutu varena nruqatavata nkye hia ni qamwata kyeta pitaarave. Mpovanto nai riemwa kyero nai nrutu tuaahererero hirata nkye qamwanrama kyeta mwia qamwata mwatevarave.

<sup>44</sup> Nkye nai nrutu nai nrutu tuaahererara nronraqama kyeta rieqata hia Kotiva nkyi nyutu tuaaheraaniranra nronraqama kyeta riaavo. Mwitaa hi variqata nkye nataama kyetave nianra qutaa mwivave tivarave?

<sup>45</sup> Nraakiara ntena kora vuqaa variqana hia ntevanto nkyiqa qua vataaninrave. Mosesiva nkyita haivaqava, mwivama nkyiqa qua vataananrove. Nkye Mosesirara mwiva tiri kyaahaqa hiananrove qiarave. Qio nraakiara mwivama nkyiqa qua vataananrove. Mosesiva qara ntumwa to quava nianra tihata nkye mwia quara hia qutaa quave qiarave.

<sup>46</sup> Nkye Mosesiva tu quarara qutaa quave qiatirio, nkye ni quaravata qutaa quavema qiatiri.

<sup>47</sup> Nkye mwia quara hia qutaa quave tiqata nataama kyetave nkye ni quaravata qutaa quave tivarave? Nkye hia qio mwitaa hivarave, tiro. (Iesusiva mwi quara Iutaa nronra vaisinramwu timwa nyunra.)

## 6

### *Iesusiva kyara airiqama kyero tukyama nyunra*

*(Matiu 14:13-21; Maaki 6:30-44; Ruku 9:10-17)*

<sup>1</sup> Mwiaqatairo Iesusiva uro Kariri kyaarerera, mwia nrutu mpo Taipiriaasi kyaarerera vara mwaini kyero mpotuqi kyaarerera mwiaqaa qarero hini tokyani uro variro.

<sup>2</sup> Uro varuvata nraakyе qora airivanto taqovaro Iesusiva nriqa vuhua kyuqema kyovatara tita, mwihua Iesusira vataqita vita.

<sup>3</sup> Mwia vataqita vuvaro Iesusiva nai nraaqiaranramwu kyapata uro taaqisataa mwatakyaa viro varura.

<sup>4</sup> Mwi entara Iutaavanto vekyahu nyato kyarara omwata nro entava qaumaqa hura.

<sup>5</sup> Iesusiva nai nraaqiaranramwu kyapata mwatakyaa viro variqaro taqovata nraakyе qora airivanto mwia vataqita nruhua nrumu ntuvantuama vita varuvaro Iesusiva Piripira kyapara hiro tiqaro, Tire taisaitave kyara kyoqaama kyeta mwi nraakyе qorahua nyianrata nrevarave? tiro.

<sup>6</sup> Iesusiva nai mwihua kyara nyiani okyarara vaakya ntapihiro mwiva Piripira qati mwataara hiqaro mwitaa tura.

<sup>7</sup> Tuvaro Piripiva tiqaro, Qaqao, kyarara 200 kinaa nronra munima kyeta vara ntainra nyianrata mwihua pataqia pataqia nraahu varevarave. Airi nraakye qoravanto variavo, tiro.

<sup>8</sup> Tuvaro Jesusira nraaqiara mpovanto Enturuva Saimoni Pitaara qatavanto tiqaro,

<sup>9</sup> Nyaako mpovanto mwaini variho. Mwiva mpereti hini kyauquruvata tavukya taaratanavata nraahu vataiva variho. Nataama kyerove mwiqiatanava airi nraakye qoraqi qio vahiananrove? tiro.

<sup>10</sup> Mwitaa tuvaro Jesusiva nai nraaqiaranramwu timwa nyinro tiqaro, Nraakye qorara tivata mwatakyaa vita variate, tiro. Jesusiva mwitaa tuvaro mwini mwukyauvanto vahuvata vaisi 5,000 nramwu airivanto mwatakyaa vita varuvata (nraakyevata airivanto mwatakyaa vita varura).

<sup>11</sup> Mwihua mwatakyaa vita varuvaro Jesusiva mpereti mwia vara kyero Kotirara kyuqeve timwa kyero, nraakye qora mwatakyaa vita varuhua tukyama kyero nyinro. Tukyama nyinro tavukyavata vara kyero kuua qarama kyero mwatakyaa vita varuhua tukyama kyero nyuvata mwihua vara kyeta qio nronra. Mwihua nkyiari nraataa huntema mwi kyarara qio nronra.

<sup>12</sup> Mwihua qio nrovaro Jesusiva nai nraaqiaranramwuanra tiqaro, Mwihua nreqata viti vaati kye kyarara utu ntuvantua hiate. Kyaravanto qumina viro raupiri hiankyorave, tuvata

<sup>13</sup> mwia nraaqiaranramwuvanto nraakye qoravanto kyauquru mpereti nreta viti vaati kyora utu kyeta ntutantuto tuara 12 nramwu piqa kyora.

<sup>14</sup> Piqa kyovata qio nraakye qora mwini varuhua taqovaro Jesusiva nronra kyaiqa vara kyovata mwihua tiqata, Poropeti vaisivanto mwatani tumuanriva qio qutaa mwaa mwi vaisivave, tita.

<sup>15</sup> Mwitaa ti varuvaro Jesusiva ntapihi kyovata nraakye qoravanto kyai mwia nronraqama kyaararo tiri vunyaa vaisi nronravanto variarive tiqata Jesusira tu vararera uti varuvaro Jesusiva mwia ntapihi kyero mwihua mwitaa hivorave timwa kyero, qaqlira kyero tumu ntantero taaqiqaa nanrianraa uro varirero vura.

### *Iesusiva kyaarerera mwutuqaa kyuqu ntamwaqiro vura*

(Matiu 14:22-33; Maaki 6:45-52)

<sup>16</sup> Iesusiva taaqiqaa uro varuvaro enta hirero huvata mwia nraaqiaranramwuvanto kyaarerera tokyasata tumu nteta

<sup>17</sup> mpotuqi mwaanri nteta nrumu ntanteta Kapenaaminianra vita. Mwihua mwini-anra vuvaro anomia entama vuvaro

<sup>18</sup> Iesusiva hia tumuvata mwihua kyaarereraqaa vi varuvaro toqa vaururuvanto nronraqama kyero tiqaroma kyaarerera nramanri ventaqiro nri varura.

<sup>19</sup> Mwitaa huvata mwia nraaqiaranramwuvanto kyaarereraqaa kyatariqo mpotu ventaqita viqata 5 kiromitave iho 6 kiromitave mwihua vara kyeta kyaarerera utaqaa nrita taqovaro Jesusiva nramanri mwutuqaa kyuqu ntamwaqiro viqaroma mpotu qaumato nruvata mwihua mwia nraatu mpoqama kyeta aatu hi varura.

<sup>20</sup> Aatu hi varuvaro Jesusiva mwihua timwa nyinro tiqaro, Hia aatu hiate. Ntema nruquo, tiro.

<sup>21</sup> Tuvata mwihua qio mpotuqi mwaanri ntaante tuvaro mwaanri ntovaro mpotuvanto qamwanrama mwihua virera hunani uro ntora.

### *Nraakye qoravanto Iesusirara puua hi varura*

<sup>22</sup> Mwia qanranraa nraakye qora kyaarerera tokya hini varuhua taqovaro mpotu kuaiqiqavanto vahuvata mwihua ntapihi kyovaro Jesusiva hia mwisairo nai nraaqiaranramwu kyapata mwaanri ntero vuvata mwihua nkyiariaraa mpotuqi mwaari nteta vura.

<sup>23</sup> Mwihua mwitaama rieta varuvata Taipiriaasisaita mpotu mponramwuvanto nrumu tauraa Iesusiva kyarara kyuqeve timwa kyero, tukyama nyuvata nraakye qoravanto nro mwatara qaumato nruvata

<sup>24</sup> mpo nraakye qora mwini varuhua taqovaro Iesusiva hia mwini varuvata mwia nraaqiaranramwuvata hia varuvata mwihua mpotuqi mwaanri nteta Kapenaamini Iesusirara puua hirerata vura.

### *Iesusiva nyaamwunyaa mperetiara tura*

<sup>25</sup> Mwihua Iesusira puua hirerata vuhua uro kyaarerera tokya hini Iesusira puaama kyeta mwianra tiqata, Mwaanra ti variara vaisio, taireve e mwaini nrinra hiaro? tuvaro

<sup>26</sup> Iesusiva tiqaro, Nte qutaa qua qianinra riaate. Nkye mpereti airiqama nraanranra rieqatama nianra puua hi variavo. Nkye hia ni kyaiqa okyara ntapihi paahima kye rieqatavauma nianra puua hi variavo.

<sup>27</sup> Qio hiama qati kyara tapitaani kyarara vararerata kyaiqa varaate. Nkye mwitaa hira qaqlira kyeta ekyaa enta qati variqi quani kyarara vararerata kyaiqa varaate. Mwi kyarara nte mwatani mwatatai nraaqiarava variqana qiomaa nte nkyi nyianinrave. Kotiva ni kova mwivama ni nronraqama kyaihana nte qio mwitaa hianinrave, tiro.

<sup>28</sup> Iesusiva mwitaa tuvata mwihua mwia kyapara hita tiqata, Tire Kotira kyaiqa vararerera hiqata, nataa nataave hiananrave? tita.

<sup>29</sup> Tuvaro Iesusiva timwa nyinro tiqaro, Kotiva nkyiara mwaa kyaiqara varaate ti variho. Mwiva titai vaisirara nkye qutaa mwivave qiate tiho, tiro.

<sup>30</sup> Mwitaa tuvata mwihua tiqata, Qio nanra kyaiqave tiri tinraamwutairaque tire mwia taqeta i okyarara qutaave qiananrave?

<sup>31</sup> E nanra kyaiqa nronra kyaiqave varenanrave? Tiri haivaqahua haaru qumina mwatani variqata nyaamwunyaa kyara nronrave. Mwihua manaa nronrave. Mwianra Kotira mpukuqi qara ntumwa tova mwitaama tiro: Mwiva nyaamwunyaa kyara nyunrave, turave, tita.

<sup>32</sup> Mwihua mwitaa tuvaro Iesusiva tiqaro, Nte qutaa qua qianinra riaate. Haaru mwi entara Mosesiva nkyi haivaqahua kyara nyiqanro hia qutaa nyaamwunyaa kyara mwihua nyunrave. Ni kova, mwivama nyaamwunyaa kyara qutaa kyara nyianrivama variho.

<sup>33</sup> Mwatani variahua mwihua qati variqi quate tiro, nyaamwusairo tumu vari vaisiva, mwi vaisivama Kotira kyaravanto variho, tiro.

<sup>34</sup> Mwitaa tuvata mwihua tiqata, Nronrao, qio e mwi kyarara tiri timwiqira quante, tita.

<sup>35</sup> Tuvaro Iesusiva timwa nyinro tiqaro, Qio nte qati variqi vi kyarava mwaa mwivama varuqo. Nte hunani nrianriva hiama kyara nraataa hiananrove. Nianra qutaa mwivave qiariva hiama mwia nramanri nraataa hiananrove.

<sup>36</sup> Nte vaakya nkyiara tiqana, Nkye ni taqetavata hia nianra qutaa mwivave qiaovo, turave.

<sup>37</sup> Ni kova ni mpiari nraakye qorahua, mwihua nte hiarinani nrivarave. Mwihua nte hiarinani nrivaqena nte hiama mwihua qorrima nyataaninrave.

<sup>38</sup> Nte nyaamwusaina hia ntena vu nraato tukyena kyaiqa vararerera tumuvave. Nte ni titaira mwutukya vahi kyaiqara vararerera tumuvave. Ni titaira Kotira mwutukya vahiva mwitaamama vahirove.

<sup>39</sup> Mwiva nraakye qora ni mpihuia nte mpoku raupirima kyaankyorave. Nte mwihuqaqa ntaqikyiqi vina ekyaara entaqaa vara sivuma kyaarita qati variqita vivarave.

<sup>40</sup> Qaiqaa ni titaira mwia mwutukya vahiva mwitaamama vahirove. Ekyaa nraakye qora ni mwia mwaaqu taqeta qutaa mwivave tihua, mwihuama qati variqita vivarave.

Nte ekyaara entaqaa variqana mwihua sivuma kyaarita qati variqi vivarave. Qio ni kora mwutukya vahiva mwitaamama vaiho, tiro.

<sup>41</sup> Iesusiva tiqaro, Nte nyaamwusaina tumu mperetivave, turara tita, Iutaa nronramwuvanto nrutu nraunru/nrunru nraanru tita tiqata,

<sup>42</sup> Qaqao, mwi vaisiva Iesusiva Iosepira mwaquivantove. Mwia nrohua qohua tire taqaunanrave. Qio nanraqamave mwiva nte nyaamwusaina tumuvave tiho? tita.

<sup>43</sup> Mwihua mwitaa ti varuvaro Iesusiva tiqaro, Eqaate. Nkye hia nrutu nraunru qiate.

<sup>44</sup> Ni kova ni titava hia vaisi mpo vitairera, mwi vaisiva hiama nte hunani qio nriananrove. Ni kova vitaarihua mwihua nraahuma nte hunani nrivarave. Qio mwihua nrivaqe nte ekyaara entaqaa mwihua vara sivuma kyaarita mwihua qati variqi vivarave.

<sup>45</sup> Haaru poropeti vaisi mpovanto mwitaama qara ntumwa tero tiqaro, Nraakiara Kotiva ekyaara nraakye qora nyaamwute varirata mwia kyaiqa ntapihivarave, turave. *(Aisaiaa 54:13)*

Ni kova kyaiqa nyaamwutairata mwihua ni kora qua riehua mwihua nraahuma nte hunani nrivarave.

<sup>46</sup> Qio hia vaisi mpovanto ni kora taqaiva varirave. Nte Kotiva hinasaina tumuva, nte nraahu mwia taqaurevare.

<sup>47</sup> Nte quataama tuqo. Nianra quataa mwivave qiariva qati variqiro quananrove.

<sup>48</sup> Nraakye qoravanto kyara nreta qati variqi viva nte mwaa mwi kyaravama varuqo.

<sup>49</sup> Nkyi haivaqahua qumina mwatani variqata nyaamwunyaa kyara, mwia nrutu manaa mwi kyarara nramwaqi viqatavata uro qutu vurave.

<sup>50</sup> Qio mpo kyaravanto nyaamwusairo tuminrave. Mwi kyarara nraanriva hiama ekyaara qutu quananrove.

<sup>51</sup> Qio nte qati variqi vi kyarava mwiva nyaamwusaina tumuvave. Mpovanto mwi kyarara nraanriva, mwiva qati variqiro quananrove. Nte kyara mwinrenra ntena mwativata ntena mwamwantavata mwianinrave. Mwatani varihua qati variqita quate tina, nte mwia nyianinrave, tiro.

<sup>52</sup> Tuvaro Iesusiva mwitaa tuvata Iutaa vaisi nronranramwuvanto nkyiari nraahu inronra hita tiqata, Mwiva nataama kyeroove nai mwamwanta tiri timwinraqe nraananrave? tita.

<sup>53</sup> Iesusiva mwihua timwa nyinro tiqaro, Quataama nte tuqo. Nte mwatani mwatatai nraaqiarava nte variarita nkye hia ni mwativata nraanrevata nraivera, nkye hiama qati variqita vivarave.

<sup>54</sup> Ni mwativata ni nraanrevata nraanriva qati variqiro viraqe nte ekyaara entaqaa mwia qati vara sivuma kyaaninrave.

<sup>55</sup> Ni mwativanto kyara tuananra vaiharo ni nraanrevantovata nramanri tuananra vaiho.

<sup>56</sup> Ni mwativata ni nraanrevata nraanriva niqi variraqena nte mwiaqima varianinrave.

<sup>57</sup> Ni kova mwiva qati variqiro viva variqaro mwiva ni titaihanama nte mwiva qati variqiro viraqaataina ntevata mwaini tumu qati variqina vuqo. Qio mwia votima kyero vaisi mpovanto ni nramwaqiro quariva niqaatairo qati variqiro quananrove.

<sup>58</sup> Qio nte mwi kyarava nyaamwusaina tumuvave. Nkyi haivaqahua haaru mpo kyara manaa nramwaqita vita uro qutu vurave. Qio hia nte mwi kyarara voti huvama varuqo. Ni kyara mwaa nraanriva ekyaara enta qati variqiro quananrove, tiro.

<sup>59</sup> Iesusiva Kapenaamini mwaanra nraamwuqi variqaro mwi quara tura.

*Iesusira vataqita vuhua mponramwuvanto mwia qaqlira kyeta vura*

**60** Iesusiva mwi quara tuvata mwia vataqita nrohuhua mponramwu variqata mwi quara rieta qaqao tita, Mwi quava muaanra ntai quarama tiho, Tavave mwi quara qio ntapihiananrove? Hia tire qio ntapihiananrave, tita.

**61** Mwihua tirema kyeta mwitaa ti varuvaro Iesusiva ntapihuvata mwia vataqita nrohu vaisihua mwianra nrutu nraunru tiqata mwia inronra hi varuvaro Iesusiva tiqaro, Mwi quara kyaarave nianra nrutu nraunru ti variavo?

**62** Qio nte mwatani mwatatai nraaqiarava varuquo. Nte nraakiara tumu ntantena ntenu variavara qoqaraanani uro variarita nkye mwia taqeta nataave hivarave?

**63** Vaisivanto mwanraqura vataava variharo mwia mwanraquravanto mwiaqi variharora tiro, mwi vaisiva qati varirave. Mwia mwanraquravanto mwi vaisiraqi hia varirera, hia mwia mwamwantavanto mwia qio kyaahaqa hiraro mwiva qati variqiro quananrove. Qio nte vaakya turara hia nte qumina mwamwantara turave. Nte qati variqi vi mwanraqura okyarara nkyi timwa nyunrave.

**64** Nte qati variqi vi okyarara nkyi timwa nyunrave. Nte mwitaa tuqata nkye hininramwuvanto hia ni quara qutaa quave qiavo, tiro.

Iesusiva haaru toharo entaraqaatairo vaisi mponramwuvanto nraakiara mwianra hia qutaa mwivave tihua ntapihi kyora. Vaisi mpovanto mwia nramwutaahua uro timwa nyinro mwia qovarama kyaaninravata ntapihi kyora.

**65** Mwihua mwitaa mwitaa hirara ntapihi kyero Iesusiva mwihua timwa nyinro tiqaro, Mwianra rieqanama nte vuni tiqana, Hia ni kova qiove tirera, hia mpovanto nte hianinrani qio nriananrove, turave, tiro.

**66** Mwitaa tuvata mwia kyaara Iesusira vataqita vuhua airivanto mwia ekyaara qaqira kyeta nrumu ntanteta vura.

**67** Mwitaa huvaro Iesusiva nai nraaqiara 12 nramwu kyapara hiro tiqaro, Nkyevata mpo? Nkye ni qaqira kyeta vireratave hiavo? tiro.

**68** Tuvaro Saimoni Pitaava mwia timwa mwinro tiqaro, Nronrao, tirenramwu ta vaisiva hinanive quananrave? Ema qati variqi qua okyarara qiaravama variaro.

**69** Tirenramwu iara qutama mwivave tiqatama ntapihi kye taqaurara e nraahuma Kotira kyotata vaisivanto Kotiva hinasaira tumuanravave, tiro.

**70** Mwitaa tuvaro Iesusiva mwihua timwa nyinro tiqaro, Qio nte nkyi 12 nramwu nyaanrama kyena sitaurave. Nte 12 nramwu nkyi nyaanrama tauraqitairovata mpokuvanto uaquia hi vaanavama variho, tiro.

**71** Iesusira nraaqiara 12 nramwuqitairo Iutaasiva Saimoni Isikeriotira mwaaqavanto nraakiara Iesusira qovarama kyaaninranra rieqaro Iesusiva mwitaa tura.

## 7

### *Iesusira qatanramwuanra tura*

**1** Mwiaqaataita Iutaa vaisi nronranramwuvanto mwia ru kyarerata uti varuvarora tiro, Iesusiva hia Iutiaani nrohiraitiro, qaqira kyero Kariri mwatani variqaro mwini nraahu nrohi varura.

**2** Mwi entara omwata nro entava mpo qaumatoqua hora. Mwia nrutu *Haraara Nraamwu* omwata. (Haaru mwihua haivaqahua qumina mwatani variqata haraara nraamwuqi varu entarara rieqatama omwata nronra.) Omwata nro entava qaumato vahuvata

**3** Iesusira qatanramwuvanto tiqata, Qio mwaini kyera vetara Iutiaani virata i vataqita vihua i kyaiqa taqaate.

**4** Nai nrutu viriniqa hiarive tiro, mpovanto hia nai kyaiqa uqeta kyakya hirave. E qutaa mwi kyaiqara mwi kyaiqara vare varirera, qio uro ntera qoqaa variqara mwi kyaiqara mwi kyaiqara varairata ekyaas mwihua i taqaate, tita.

<sup>5</sup> Mwia qatanramwuvanto Iesusirara hia qutaa mwivave tiqatara tita, mwihua mwitaa turama.

<sup>6</sup> Mwitaa tuvaro Iesusiva timwa nyinro tiqaro, Nte mwini quari entava hiama nri ntaiho. Nkye qioma api enta vivarave.

<sup>7</sup> Mwatani variahua hia nkyi nramwutaaqa hivarave. Nte mwihua kyaiqara uaqia hi kyaiqarave timwa kyeqana ntapihi timwa nyunrave. Mwitaama vutu kyeqana timwa nyuqata mwihua ni nramwutaaqa hi variavo.

<sup>8</sup> Nkyenramwu omwata nranrenra hianani quate. Nte mwini quari entava hia nri ntaihana nte mate hia quaninrave, tiro.

<sup>9-10</sup> Iesusiva mwitaa timwa kyero Karirini varuvata mwia qatanramwuvanto omwata nranrenra hunani vuvaro Iesusiva vari kyero nraakiara mwivavata mwini viro. Mwiva hia qoqaa viraitiro, uqeta kyero mwini vura.

<sup>11</sup> Vuvata Ierusaremini omwata nronraqi Iutaa vaisi nronranramwuvanto mwianra aittu hi varita tiqata, Mwiva tanave variho? ti varura.

<sup>12</sup> Mwitaa ti varuvata qati nraakye qoravanto Iesusirara tirema kyeta mpo qua mpo qua tura. Hini uhua mwianra tiqata, Mwiva kyuqe vaisivantove, tuvata hini uhua mwianra tiqata, Qaqao, mwiva nraakye qora api aanra nraahu nyaamwute vari vaisivave, tita.

<sup>13</sup> Iutaa nronra vaisinramwu nyaatu aatu hiqata mwihua hia Iesusirara vutu kyeta mwitaa tura. Mwihuaqitairo hia mpovanto vutu kyerovata tura.

<sup>14</sup> Mwitaamaqita vuvaro omwata nro entava hininramwu taiqa vuvaro Iesusiva uro ntero Kotira nraamwu nronraqi variqaro Kotira qua nraakye qora timwa nyi varura.

<sup>15</sup> Mwiva timwa nyi varuvata Iutaa vaisi nronranramwuvanto mwia qua rieta nrihanrama vita tiqata, Qikye, mwiva hia tirivata sikuru tivave. Nataama kyerove mwiva mpo qua mpo qua okyara qio ti variho? tita.

<sup>16</sup> Mwitaa tuvaro Iesusiva tiqaro, Hiama nte ntenga qua mwakyaakya nkyi timwa nyi varuqo. Kotiva ni titaihana nte mwia qua mwakyaakyama nkyi timwa nyi varuqo, tiro.

<sup>17</sup> Iesusiva mwitaa timwa kyero mwiva tiqaro, Kotira mwutukya vahirara rieqaro mwia kyaiqa varaataa hiariva, mwivama ni qua tukyama kyero tiqaro, Mwiva Kotira quama ti variho, mwiva nai quama ti variho, qiananrove.

<sup>18</sup> Mpovanto nai vu nraato tukyero qua ti vari vaisiva, mwi vaisiva nai nrutuara nraahu rieqaro varirave. Mpovanto nai titaira nrutuara nraahu riemwaqiro vi vari vaisiva, mwi vaisiva qutaa qua nraahuma tiharo hiama unra qua mwiaqi vahirove.

<sup>19</sup> Qio qutaa nkyi haivaqava Mosesiva qua mwaanra Kotiva mwitaa mwitaa hiate tu quara nkyi timwa nyunrave? Qio hia nkyiqitairo mpovanto mwi quara vataqiro vi varirave. Mwitaa hiqata nkye nanraqamave ni ru kyarerata uti variavo? tiro.

<sup>20</sup> Iesusiva mwitaa tuvata mwini ntuvantuama vita varuhua tiqata, E ueraqama quaro. Tavave i ru kyarera uti variho? tita.

<sup>21</sup> Tuvaro Iesusiva tiqaro, Nte (mwaanra entaqaa) nronra kyaiqa kuaiqia varauqata nkye mwianra nrihanrama quavaroma hia nkyi kyakya iho.

<sup>22</sup> Nkyi haivaqava Mosesiva mwaanra qua tiqaroma qoraisi nraaqiarara mwia mwamwanta toqa kyaate. (Qoraisi nraaqiara mwatataivata 8 enta nritarairata mwia mwamwanta toqa kyaate,) turave. Qio hia Mosesiva tauraaqama mwi quara turave. Mosesira haivaqahuamwanra mwi quara vuniqama kye turave. Qio nkye mwi quara rieqatama 8 enta nritarairata qati entaqaaave, mwaanra entaqaaave, nkye qoraisi nraaqiara mwamwanta toqa nyate variarave.

<sup>23</sup> Mosesira qua nteqa kyaarorave tiqatama nkye mwaanra entaqaa qoraisi nraaqiara mwamwanta toqa nyate variarave. Mwitaa hi variavana nte mwaanra entaqaa nriqa vi vaisira kyuqema kyauqata nkye nanraqamave mwia kyaara ni inronra hi variavo?

<sup>24</sup> Nkye niqaa qua vatarera hiqatama, haunri qumina nkyeta su nyaato tiraqa niqaa qua vatevorave. Nkye quataa vahiani inraikyaraqaara niqaa qua vataate, tiro.

### *Iesusiva mwiva Kotiya titai vaisivave? tura*

<sup>25</sup> Iesusiva mwitaa ti varuvata Ierusaremiqinaahua mponramwuvanto Iesusirara mpo vaisinramwu kyapara hita tiqata, Mwi vaisirave mwihua ru kyarerata uti variavo?

<sup>26</sup> Qio taqaate. Mwiva qoqaa variqaro qua ti varihata mwihua hia nrumu mwiaqaa mwianra mpo qua qiavo. Quataave mwihua Iesusirara mwiva mesaiaavantove qiavo?

<sup>27</sup> Qio tire Iesusiva mwisairo nri okyarara ntapihuro. Mwiva mwi mwatukyaraqitairo nrivave. Mesaiaavanto qovarama viraro hiama tiriqitairo mpokuvanto mwiva mwisairo nriani okyarara qio ntapihiananrove, tita.

<sup>28</sup> Mwitaa ti varuvaro Iesusiva Kotira nraamwu nronraqi mwakyaakya timwa nyi variqaro aakyara ntamwa kyero mwihua kyaparama nyatero tiqaro, Quataa nkye ni ntapihi kyaarave? Quataa nkye nte mwisaina nru okyarara ntapihi kyaarave? Qio hia nte ntene vu nraato tukyena nruvave. Ni titaiva mwiva quataa kyaiqa vare varivave. Nkye hia mwia ntapihiarave.

<sup>29</sup> Nte mwia ntapihurave. Mwivama ni titaihana nte mwiva hinasaina tumuvave, tiro.

<sup>30</sup> Iesusiva mwitaa tuvata mwi quara kyaara mwia ntavaaqavu kyaare tiqatavata hia qio mwia tu varora. Iesusira rukye entava hia nri ntovatara tita, mwihua hia qio mwia tu varora.

<sup>31</sup> Mwitaa huvata nraakye qora mwihuaqitaita airivanto Iesusirara quataa mwivave tita. Mwihua mwataama tita, Iesusiva nronra kyaiqa vare variho. Mesaiaavanto nrianriva mwiva Iesusira kyaiqa qiove nraatara kyaananrove? Hia qio mwia nraatara kyaananrove. Iesusiva mwivama mesaiaavanto variho, tita.

### *Parisi vaisinramwuvanto nkyiari porisi sitora*

<sup>32</sup> Parisi vaisinramwuvanto variqata riovata nraakye qoravanto ntuvaantuama vita Iesusirara tirema kyeta mwitaa ti varuvata Parisi vaisinramwuvata, Kotira kyaiqa vara mwate varu vaisihua mwihua nronranramwuvata, mwihua nkyiari porisi sitovata mwihua Iesusira ntavaaqavu kyeta karavuqi kyarerata vita.

<sup>33</sup> Mwihua vuvaro Iesusiva tiqaro, Nte nkyi kyapata pataqia vari kyenama mwata mwaaqaataina ni titaiva hinani virerave.

<sup>34</sup> Mwi entara nkye ni puaama kyaare tira, hiama qio ni puaama kyevarave. Nkye hia qioqamakte virera hinani nte virerave, tiro.

<sup>35</sup> Mwitaa tuvata Iutaa vaisi nronranramwuvanto nai kyapara hi nai kyapara hita tiqata, Mwiva taini viraqeve tire hia qio mwia puaama kyaananrave? Mwiva Kiriki mwatukya mponramwuqi Iutaa mponramwuvanto variananive uro qua timwa nyinrenro virerove?

<sup>36</sup> Mwiva nanrianra tiqaro, Nkye ni puaama kyaare tira hiama qio ni puaama kyevarave, tiho. Nkye hia qioqamakte virera hinani nte virerave, tiho. Mwiva mwitaa tiqaro nanra quave tiho? Hiama tire mwia qua ntapihita huro, tita.

### *Nkyi mwutukyaqitairo qati variqi quani nramanriva ntamwaqiro quananrove tura*

<sup>37</sup> Mwitaa tuvaro omwata nro entava ekyara enta nri ntora. Mwi entarara nronra entave tura. Ekyara enta nri ntovaro Iesusiva mwi entaraqaa siviro paatiyo tiqaro, Nramanri nraataa hiariva nte hunasairo qiomia nrumu nraananrove.

<sup>38</sup> Kotira mpukuqi qara ntumwa to quava nianra mwitaama tiro:  
Nianra quataa mwivave qiariva variraro mwia mwutukyaqitairo rumwu votima kyero  
qati variqi quani nramanriva ntamwaqiro quananrove, turave, tiro. (*Aisaiaa 44:3*)

<sup>39</sup> Jesusiva siviro variqaro mwi quaraqaa ntumwa kyero Kotira mwanraqura nyian-inranra tiro. Nraakyе qoravanto Jesusirara qutaa mwivave tihua Kotira mwanraqura varerara tura. Mwi entara Jesusiva hia qutu viro qaiqaa qati siviro nyaamwuni vurara tiro, hia Kotira mwanraqura nyu entava vahura.

### *Nraakyе qoravanto nkyiari tukyama vura*

<sup>40</sup> Jesusiva mwitaa tuvata nraakyе qora ntuvaantuama vuhua airivanto tiqata, Qio qutaaama Jesusiva poropetivanto variho. Kotiva mwia kyaahaqa hi variharo mwiva mwia qua ti variho, tita.

<sup>41</sup> Tuvata mponramwuvanto tiqata, Mwiva mesaiaavantove. Mwiva Kotiva titai vaisiva tiri kyaahaqa hiarivave, tita. Tuvata mponramwuvanto qaqao tita, Mesaiaavantove hiama Kaririqitairo nriananrove.

<sup>42</sup> Kotira mpukuqi mesaiaara qara ntumwa tova mwitaama tiro:  
Mesaiaavanto Ntevitira kuua okyarama variraro  
Vetarahemi Ntevitiva varu mwatukyaraqi  
mwia mwata taananrove, turave, tita.

(Maikaa 5:2)

<sup>43</sup> Mwitaa tiqata nraakyе qora ntuvaaquama vita varuhua hininramwuvanto Jesusirara qamwateqata varuvata hininramwuvanto hia mwianra qamwateqata varura.

<sup>44</sup> Hininramwuvanto Jesusira karavuqi kyarerata uti varura. Qio mwi entara hia mwihuaqitairo mpokuvanto Jesusira tu varora.

### *Porisi vaisinramwuvanto qati uro ntanteta nrunra*

<sup>45</sup> Porisi vaisinramwu vaakya sitohua nrumu ntanteta Kotira kyaiqa vara mwate varuhua mwihua nronranramwuvata, Parisi vaisinramwuvata, mwihua hunani uro ntovata mwihua tiqata, Qaqao, nkye mwia vita vareta nriataara vahata nanraqamave qati nriavo? tuvata

<sup>46</sup> porisinramwuvanto tiqata, Tire riauraro mwiva hia qumina vaisivanto qua tintema kyero qua ti variho, tita.

<sup>47</sup> Tuvata Parisi vaisinramwuvanto tiqata, Qio nkyevata mwia unra quara qutaa quaveve tita hiavo?

<sup>48</sup> Nkye ntapihitave hiavo? Tavave tiri nronra vaisinramwuqitairove, Parisi vaisinramwuqitairove, Jesusirara qutaa mwiva mesaiaavanto variho tiho? Hiama tirinramwuqitairo mpovantovata mwitaa tiho.

<sup>49</sup> Qati qumina nraakyе qora ntuvaantuama vita variahua hia Mosesira qua mwaanra qio ntapihi riaarara tiro, mwia kyaara Kotiva mwihua qoraqama nyataanarrove, tita.

<sup>50</sup> Parisi vaisinramwuvanto mwitaa tuvaro Parisi vaisi mpokuvanto Nikotimaasiva mwiva entaqi Jesusira uro taqova, mwiva qaqao tiro,

<sup>51</sup> Tire teta qua mwaanra rieqatama hia ko tiraitita, vaisiqaa qumina qua vataararave. Tire ko nraanteta qiatarave, tiro.

<sup>52</sup> Mwitaa tuvata mwihua tiqata, E mpo? E Karirisaira nrianravave? E Kotira mpukuqi taqaante. E mwipi taqairaro hiama Karirisairo poropeti vaisivanto qovara hiananrove, tita.

<sup>53</sup> [Mwitaa timwa kyeta nkyiari nraamwuni nkyiari nraamwuni vuvaro Jesusiva Oripi taaqiqaa uro varura.

### *Api nrohu nraakyerara tura*

<sup>1-2</sup> Mwia qanranraa toqa entaqi Jesusiva uro ntantero Kotira nraamwu nronraqi vuvata nraakyе qora airivanto ntuvaantuama vita varuvaro Jesusiva mwatakyaa viro variqaro qua timwa nyi varura.

<sup>3</sup> Timwa nyi varuvata mwaanra okyara ti varu vaisihuavata, Parisi vaisinramwuvata, mwihua nraakyev mpo vita vareta nrunra. Mwi nraakyeva vaati vataava mpo qoraisivata nrohi varuvata mwihua taqamwa kyeta mwia viteta Jesusiva hunani uro nraakyev qora suqaa mwia kyovaro siviro varuvata mwihua Jesusirara tiqata,

<sup>4</sup> Mwaanra ti variarao, mwaa nraakyeva vaati vataava mpo qoraisi vatama kyero nrohi varihata tire mwia taqeta tu vareta nrunro.

<sup>5</sup> Mosesira mwaanra quavanto mwitaama tiro: Nrahesisvanto mwitaa hirera, oriqtaita ntutu kyaivaro qutu quarive, turave. Qio e mpo? Nanra quave mwianra tinanrave? tita.

<sup>6</sup> Jesusirara api qua tiraqe tire mwiaqaa qua vataare tiqata mwihua mwitaa tuvaro Jesusiva hia qua tiraitiro, kakataama viro nai vukahiqo mwataqaa qara nti varura.

<sup>7</sup> Qara nti varuvata mwihua sivita variqata mpo qua mpo qua Jesusira kyapara hi varuvaro Jesusiva mwaamwianra viro mwihuara tiqaro, Nkyiqitairo mpovanto hia uaquia hi kyaiqara utuariva, mwiva nraante ori vara kyero mwia ntutuuarive, tiro.

<sup>8</sup> Jesusiva mwitaa timwa kyero mwiva qaiqaa kakataama viro mwataqaa qara nti varuvata

<sup>9</sup> mwihua mwi quara rieta kuaiqia kuaiqavanto mwigitaita qaqira kyeta veva nteqata vura. Nyaapainramwu nraante veva nteta vuni vuvata qaraakya vaisinramwu mwihua nraakiara veva nteta vita mwihua Jesusira mwini kyeta vuvaro Jesusiva nanrianraa variro.

<sup>10</sup> Jesusiva mwaamwianra viro taqovaro mwi nraakyeva vaakya siviro varunani nanrianraa varuvaro Jesusiva tiqaro, Mwihua tainive variavo? Hiave mpovanto iqaa qua vataariva variho? tuvaro nraakyev mwiva tiqaro,

<sup>11</sup> Nronrao, hia mpovanto mwitaa iho, tuvaro Jesusiva mwia timwa mwinro tiqaro, Qio ntevata hia iqaa qua vatarerave. Qio ena quante. Virava hiama nraakiara qaiqaavata uaquia hi kyaiqara utuante, tiro. Turama.]

### *Jesusiva nte mwatanyaa omwavantove tura*

<sup>12</sup> Jesusiva qaiqaa nraakyev qora timwa nyinro tiqaro, Nte mwatanyaa omwavanto varuquo. Ni pataqiro nrianriva hiama kyokiraqi nrohiananrove. Mwiva ntuvahaan-inraqa nrohiqaro qati variqiro quananrove, tiro.

<sup>13</sup> Jesusiva mwita tuvata Parisi vaisinramwuvanto tiqata, Qio e enanra variqara ena nrutu tuaahere variananranra tiro, i quavanto qumina quama vaiho, tita.

<sup>14</sup> Mwitaa tuvaro Jesusiva qaqqao tiro, Nte variqana ntene kyaiqara tiqana hiama qumina qua tuquo. Nte ntene mwisaina nru okyarara ntapihi kyaurave. Nte ntene quani okyarara ntapihi kyaurave. Mwitaa hurara tiro, ni qua qutaa quama vaiho. Nte mwisaina nru okyararave, nte quani okyararave, nkye hia ntapihivarave.

<sup>15</sup> Nkye ko tiqatama nkye vaisi su nyaato vahiraqa ko ti variarave. Mate nte hia vaisi mpo ko timwa kyena mwiaqaa qua vatauquo.

<sup>16</sup> Nte ko qiataa hiraqena qiomma nte ko avuqavuma kyena qianinrave. Nte ko tiqana hiama ntenanraa ko qianinrave. Nte ko qiariro ni kova ni titaiva variqaro ni kyaahaqa hiraqe nte avuqavuma kyena ko qianinrave.

<sup>17</sup> Nkyi mwaanra qua qara ntumwa tova mwitaama tiro: Vaisi taaratanavanto qua tiqatama kuaa qua nraahu tivera, qio mwitana quavanto qutaa quama vahiananrove, turave.

<sup>18</sup> Qio nte ntene quara qutaa quave qiariro ni titaiva ni kova, mwivavata ni quara qutaa quave nraahuma qiananrove, tiro.

<sup>19</sup> Jesusiva mwitaa tuvata mwihua tiqata, I qova tana variharave ti variaro? tuvaro Jesusiva tiqaro, Nkye hia ni ntapihi kyaahua tita, nkye ni koravata hiama ntapihiav. Nkye ni ntapihi kyaatirio, nkye qiomma ni koravata ntapihiatirio, tiro.

<sup>20</sup> Iesusiva Kotira nraamwuqi munima kye varuraqi variqaro mwi quara tiro. Tuvaro mwia rukye entava hia nri ntovarora tiro, hia mpovanto mwia ntavaaqavuqiro karavuqi kyora.

### *Iesusiva nai qorara tura*

<sup>21</sup> Iesusiva qaiqaa timwa nyinro tiqaro, Qio nte quarita nkye qumina nianra puaamaqi vita uro nkyeta qora kyaiqa rirante qati qutu vivarave. Mwitaa hiqata nte quaninrani nkye hiama qio vivarave, tiro.

<sup>22</sup> Mwitaa tuvata Iutaa vaisi nronra nramwuvanto tiqata, Mwiva nanra quave tiho? Mwiva nai tiqaro, Nte quaninrani nkye hia qio vivarave, tiho. Mwiva naivanto nai ru kyarerero uti variqarove mwitaa ti variho? tita.

<sup>23</sup> Mwitaa tuvaro Iesusiva tiqaro, Nte virisaina tumuqata nkye mpiasaita nriahuave. Nkye mwaa mwataraqaataita nriahuave. Nte hia mwaa mwataraqaataina nruvave.

<sup>24</sup> Nte vaakya nkyiara tiqana, Nkye nkyeta qora kyaiqa rirante variqi vita qutu vivarave, turave. Nte qati nraahu variqi vuvave tuqo. Nkye hia mwi quarara qutaa quave tivera, qutaa nkyeta qora kyaiqa mwia rirante qutu vivarave, tiro.

<sup>25</sup> Mwitaa tuvata mwihua mwia kyapara hita tiqata, Qio e ta vaisivave hiaro? Tuvaro Iesusiva mwihua timwa nyinro tiqaro, Nte vuni nkyi timwa nyuva nte mwivama huqo.

<sup>26</sup> Nte nkyiqa qua vataari quava, mpo qua mpo qua vaihana mate hia nte mwi quara tirerave. Ni titaiva ni timwa mpi quara, nte mwi quara nraahu mwatani varihuavata timwa nyinrenrave. Ni titaiva qutaa qua nraahu ti varivave, tiro.

<sup>27</sup> Iesusiva mwitaa tuvata mwihua hia ntapihi kyeta Iesusiva nai qorara tu quara riora.

<sup>28</sup> Mwihua hia ntapihuvaro Iesusiva qaiqaa tiqaro, Nte mwatani mwatatai nraaqiavama varuqo. Nte variarita nkye ni tuaahera kyaivaro mwiaqatairo nkyi su nyaato ntapihirata nkye ni okyarara ntapihi rietama nianra qio mwiva qati nraahu variqiro vivave tivarave. Nkye mwi entarama nte hia ntenaqama kye mpo kyaiqa varaura ntapihita ni kova timwa mpi quara mwi quara nraahu timwa nyunravata ntapihivarave.

<sup>29</sup> Ni titaiva ni vatama kyero variqaro mwiva hia ni qaqlira kyaananrove. Ni titaiva ni vatama kyero varihana nte mwia mwutukya vahi kyaiqara vare varuqaro mwiva nianra qamwateqaroma hia ni qaqlira kyaiho, tiro.

<sup>30</sup> Iesusiva mwi quara ti varuvata airivanto mwi quara riohua mwianra qutaaave tita.

### *Qutaa quavanto nkyi huvantu kyaananrove tura*

<sup>31</sup> Iutaa mponramwuvanto mwianra qutaa mwivave tuvaro Iesusiva mwihuara tiqaro, Qio nkye ni qua riemwaqita vivera, nkye qutaa ni pataqita nrihua varivarave.

<sup>32</sup> Nkye qutaa qua ntapihi kye riaivaro qutaa quavanto nkyi huvantu kyairata nkye qati varivarave, tiro.

<sup>33</sup> Mwitaa tuvata mwihua qaqlao tita, Tire tetu haivaqara Evarahaamunra nraaqiarama varuro. Hia mpovanto tiri rupa taihata tire mwia kyaiqa vare varuro. Qio nanraqamave e tiriara nkyi huvantu kyairata nkye qati varivarave qiaro? tita.

<sup>34</sup> Mwihua mwitaa tuvaro Iesusiva tiqaro, Nte qutaa quama tuqo, Nkye uaqlia hi kyaiqara uti variavaro nkyi uaqlia hi kyaiqava rupa taihatara tita, nkye mwia kyaiqa nraahu vare variavo.

<sup>35</sup> Nraamwu qova variraro rupataari vaisiva hiama ekya enta mwianra variqiro quananrove. Nai mwia mwaqvantoma mwianra variqiro quananrove.

<sup>36</sup> Nte mwia mwaqvantoma nkyi huvantu kyaarita nkye qutaaqama kyeta qati varivarave.

<sup>37</sup> Nkye Evarahaamunra nraaqiara variara mwia nte ntapihi kyaurave. Mwitaama variqatavata nkye ni quara qumina quave timwa kyeta, ni ru kyarerata uti variavo.

**38** Nte ntena kokyantiri variqana mwi inraikyara taqaurara nkyi timwa nyi varuqo. Nkye nkyeta sora vatama kyeta variqata taqaa kyaiqara nkye mwi kyaiqarama vare variavo, tiro.

**39** Iesusiva mwitaa tuvata mwihua tiqata, Tiri tiqova Evarahaamuvave, tita. Tuvaro Iesusiva tiqaro, Nkye qutaa Evarahaamunra nraaqiara variatirio, nkye mwiva varo kyaiqarama nkyevata varaatirio.

**40** Kotiva qutaa qua tihana nte mwi quara riaura nkyi timwa nyuqata nkye ni ru kyarerata uti variavo. Evarahaamuva hia nkye hiante hurave.

**41** Nkye nkyeta sova varai kyaiqara nraahuma vare variavo, tiro. Mwitaa tuvata mwihua tiqata, Hia tire kyapa nraative. Tiri tiqova mwiva Kotivave, tita.

**42** Tuvaro Iesusiva tiqaro, Kotiva nkyi sova varitirio, nte mwiva hinasaina tumu nkyivata mate mwaa varura nianra nkyi mwutukya ntihata variatirio. Hia nte ntena vu nraato tukyena ntena kyaiqa vararerana tumuvave. Kotiva ni titaihana tumuvave.

**43** Nte mwitaa tuqata nkye nanraqamave ni qua hia ntapihiavo? Kyaivaqe nte nkyi timwa nyiankye. Nkye nte tu quara hia riaahuama variavo.

**44** Saataaniva nkyi sova varihata nkye mwia mwutukya vahira nraahu utuqita vi variarave. Haaru vuniqama kyero Saataaniva variqaro vaisi rukye varuva nraahu varurave. Qutaaqama vahi inraikyavave, qutaa kyaiqvantove, hia mwiaqi vaiharora tiro, mwiva hia qutaa qua ti varirave. Mwiva unra tiqaro unra qiara mwia qova variqarora tiro, unra qua mwia nai qua tuananra tirave.

**45** Mwia kyaiqa mwitaama vahana nte qutaa qua tuqata nkye ni quara hia qutaa quave ti variavo.

**46** Nkyiqitairo tavave nianra uaqiahi kyaiqara varaiho qiananro? Nkye hiama qio niqaa qua vatevarave. Nte qutaa qua ti varuqata nanraqamave nkye ni quara hia qutaa quvave ti variavo? Kyai nte nkyi timwa nyiankye.

**47** Kotira nraaqiaravanto Kotira qua rie varirave. Nkye hia mwia qua riaahuara tita, nkye hia mwia nraaqarama variavo, tiro.

### *Evarahaamuva hia varuvana nte variavarave tura*

**48** Iesusiva mwitaa tuvata Iutaa nronranramwuvanto tiqata, Tire iara Sameriaanyaava ueraqama viho turava, mwi quava qutaa quama vaiho, tita.

**49** Tuvaro Iesusiva qaqao tiro, Hiama nte ueraqama vuqo. Nte ntena kora nrutu tuaahere varuqatama nkye ni nutu qoraqama mateta hiavo.

**50** Qio hia nte ntena nrutuara nronraqama kyena riauqo. Ni nutu tuaaheraiva variho. Mwiva ntapihi kyero ko ti varivave.

**51** Nte qutaa qua qianinra riaate. Ni qua riemwaqiro quariva hiama qutu quanarrove, tiro.

**52** Iesusiva mwitaa tuvata Iutaa nronranramwuvanto tiqata, Mwitaa qiarata tire i taqaurara e ueraqama quaro. Tiri haivaqava Evarahaamuva variqiro viro uro qutu vurave. Poropeti vaisi mpohua mpohua variqita vita ekyaa qutu vurave. Mwihua ekyaa qutu quavara e tiqara, Ni qua riemwaqiro nrohiariva hiama qutu quanarrove, qiaro.

**53** Tiri tiqova Evarahaamuva nronra vaisivanto variqiro viro uro qutu vurave. E hia qio Evarahaamunranra tiqara, Nte mwia nraatara kyaarivave, tinanrave. Poropeti vaisinramwuvata nronra vaisi variqita vita uro qutu vurave. E nataa hira vaisiva varirera hiqarave mwitaa ti variaro? tita.

**54** Mwitaa tuvaro Iesusiva tiqaro, Nte ntena nrutu tuaahere variarirovauma ni nutuvanto qumina vahianarrove. Ni nutu tuaahera kye variva, mwiva ni kovave. Nkye mwianrama Kotiva tiri mwanriqvantove variho qiarave.

<sup>55</sup> Nkye hia mwia ntapihiarave. Nte mwia ntapihurave. Nte tiqana, Nte hia mwia ntapihi kyaurave, qiarirovauma ni quavanto nkyi qua votima kyero unra qua vahiananrove. Qio nte Kotira ntapihina mwia qua riemwaqina vuvave.

<sup>56</sup> Nte mwatani tuminrenra hiava entara nkyi haivaqava Evarahaamuva ni qamwata matorave. Nte mwatani tumuavarso mwiva ni taqovaro mwia mwutukyavanto kyuqe huvaro varurave, tiro.

<sup>57</sup> Iesusiva mwitaa tuvata Iutaa nronranramwuvanto tiqata, Qaqao, e hia 50 ihi vara kyaraitira, qaraakya vaisivanto variqarama nte nkyi haivaqara Evarahaamunra taqaurave tira hiaro, tita.

<sup>58</sup> Tuvaro Iesusiva tiqaro, Haaru nkyi haivaqava Evarahaamuva hia varu entara nte qati variqina quavavave, tiro.

<sup>59</sup> Iesusiva mwitaa tuvata mwihua ori vara kyeta mwia ntuqufirerata huvaro Iesusiva tuqeta kyero Kotira nraamwuqitairo veva ntero vurama.

## 9

### *Vu qipa vu vaisira Iesusiva ntapairi mwatora*

<sup>1</sup> Iesusiva viqaro taqovaro vaisi mpovanto nai nronra vikyokyaqitairo vu qipa vuva varura.

<sup>2</sup> Mwia taqeta Iesusira nraaqiaranramwuvanto Iesusira kyapara hita tiqata, Mwaanra ti variarao, tava Kotira qua nteqa kyairaqaarave mwi vaisira vu nai nronra vikyokyaqitairo qipa viho? Naive iho, mwia nrohua qohuave iho? tita.

<sup>3</sup> Mwitaa tuvaro Iesusiva qaqao tiro, Hiama nai Kotira qua nteqa kyairaqaarave, mwia nrohua qohua Kotira qua nteqa kyaaraqaarave, mwia vu qipa viho. Nkye mwi vaisiraqaataita Kotira kepukyavanto kyaiqa varaaninra taqaate tiro, mwia vu qipa virave.

<sup>4</sup> Kotiva ni titaira kyaiqa tire qaataaninraqa varaqita virerave. Entama viraro hia mpovanto qio kyaiqa varaananrove.

<sup>5</sup> Nte mwatani variqana nte omwavanto itaintema kyena itamwaqina quarita mwatani varihua qio taqevavarave, tiro.

<sup>6</sup> Mwitaa timwa kyero Iesusiva mwataqaa taara vihi kyero horaqama kyero viti vu qipa vu vaisira vuqaa taaqau mwatero tiqaro,

<sup>7</sup> Uto Siromi Rumpuaqi. Titai Nramanrinraqi ena viri hiqaante, tiro. Mwitaa tuvaro mwi vaisiva Iesusiva tuntema kyero uro nai viri hiqama kyovaro mwia vu ntapairi vuvaro mwiva mwisairo uro ntantero qio taqamwaqiro nrinro.

<sup>8</sup> Mwiva qio taqamwaqiro nri varuvata mwia nraaqani varuhua taqovaro aanra tokyani variqaro mwitaa inraikya mpiae ti varu vaisiva qati nruvata mwihua mwia taqeta tiqata, Mwaa ta vaisivave iho? Mwiva aanra tokyani mwatakyaa viro variqaro mwitaa inraikya mpiae ti vari vaisiva, mwaa mwivave iho? tita.

<sup>9</sup> Tuvata mpo uhua tiqata, Qio mwia mwivave, tita. Tuvata mpo uhua qaqao nai mpo vaisi mwia viri voti hivama nriho tita. Tuvaro mwi vaisiva nri ntero nai tiqaro, Nte mwaa mwivama iho, tiro.

<sup>10</sup> Mwitaa tuvata mwihua mwia kyapara hita tiqata, Nataama kyaararo i vu ntapairi viharave e taqaaro? tita.

<sup>11</sup> Tuvaro mwiva mwihua timwa nyinro tiqaro, Vaisi mpo mwia nrutu Iesusiva taara vihi kyero horaqama kyero ni puqaa taaqau matero nianra tiqaro, Siromi rumpuaqi uto ena viri hiqaante, tihana nte uto hiqama kyauqaro ni pu ntapairi vihanama nte qio taqamwaqina nruquo, tiro.

<sup>12</sup> Mwitaa tuvata mwihua mwia kyapara hita tiqata, Mwiva taini viharave nrianro? tita. Tuvaro mwiva tiqaro, Nai tainive viho? Hia nte mwia taqauquo, tiro.

<sup>13</sup> Tuvata mwihua haaru vu qipa vu vaisira mwia vitaqita uro Parisi vaisinramwuvanto varunani kyora.

<sup>14</sup> Iesusiva mwaanra entaqaa hora taaqau kyero mwi vaisira vu ntapairi kyora.

<sup>15</sup> Mwihua Parisi vaisinramwu varunani mwia uro kyovata Parisi vaisinramwuvanto mwi vaisira kyapara hita tiqata, Nataama kyaiharove i vuvanto ntapairi viho? tuvaro mwiva tiqaro, Mwiva hora vara kyero ni puqaa taaqau taihana nte uto ntena piri hiqama kyauqaro ni pu ntapairi vihana nte qio taqauqo, tiro.

<sup>16</sup> Mwiva mwitaa tuvata Parisi vaisi hini uhua tiqatama, Mwi kyaiqara varaiwa mwaanraqua qua nteqebaro varaivara tiro, mwiva hia Kotiva hinasairo tumivave, tita.

Tuvata hini uhua tiqata, Qaqao, nataama kyerove uaquia hi vaisiva nronra kyaiqa mwia qio varaananrove? tita. Mwitaa timwa kyeta mwihua nkyiari utaqaa ntainra vita taara qua ti varura.

<sup>17</sup> Qaiqaa Parisi vaisinramwuvanto mwia kyapara hita tiqata, E tiqara mwiva ni pu ntapairi kyaiho qiananrave. Mwi vaisirara e nanreve tinanrave? tuvaro mwi vaisiva tiqaro, Kotiva mwia kyaahaqa hi variharo mwiva mwi kyaiqara vare variho, tiro.

<sup>18</sup> Mwitaa tuvata Iutaa vaisinramwuvanto hia mwia quara quataave tiraitita, mwi vaisirara tiqata, E unra tiqarama ni pu ntapairi viho tira hiaro. Haaru hia i vuvanto qipa vurave, tita. Mwitaa timwa kyeta mwi vaisira nrohua qohua nyaanronra.

<sup>19</sup> Nyaanrovata nruvata mwitanahua kyapara hita tiqata, Mwaa vaisiva nkyitana nyaaqueve iho? Qutaa mwia nai nronra vikyokyaqitairo vu qipa vurave? Nataama kyaiharove mwia vuvanto ntapairi viharo qio taqaiho? tita.

<sup>20</sup> Tuvata mwia nrohua qohua tiqatama, Mwaa vaisiva tiritana timwaaque. Mwia vuvanto haaru vikyokyaqitairo qipa vurave.

<sup>21</sup> Nai nataama kyaiharove mwia vu ntapairi viho? Nai tavave mwia vu ntapairi kyaiho? Mwiva nronra tuaivama iho. Nkye nkyeta mwia kyapara hiqata taqaivaro mwiva qiomma nkyita timwa nyiananrove, tita.

<sup>22</sup> Mwitanahua Iutaa vaisi nronranramwu nyaatu aatu hiqata mwitaa tura. Iutaa vaisi nronranramwuvanto vaakya qua timwa tetu tiqatama, Vaisi mpovanto Iesusirara mesaiaavanto tiri kyaahaqa hiariva nrivave tirera, mwia kyaara tire mwia inronra hiqatama mwaanra nraamwuqitaita titamwa kyaararo veva ntero ekyaara quarive, tita.

<sup>23</sup> Mwitaa timwa kyeta qua timwa torara tita, mwia nrohua qohua Iutaa vaisi nronranramwu nyaatu aatu hita tiqata, Mwiva nronra tuairave. Nkyeta mwia kyapara hiqata taqaate, tura.

<sup>24</sup> Tuvata mwihua qaiqaa haaru vu qipa vu vaisira nraanrama kyeta tiqata, E Kotira vuqaa variqara quataa qua nraahu qianta. Tire taqauraro Iesusiva Kotira qua nteqa kyai vaisivave, tita.

<sup>25</sup> Tuvaro mwi vaisiva tiqaro, Iesusiva Kotira qua nteqa kyai vaisivave iho kyuqe vaisive iho nte hia mwia okyara ntapihi kyauqo. Ni pu qipa vura ntapairi kyaira mwia nraahuma ntapihuqo, tiro. Tuvata mwihua mwia kyapara hita tiqata,

<sup>26</sup> Mwiva i nataave iho? Mwiva nataama kyerove i vu ntapairi kyaiho? tita. Tuvaro mwiva tiqaro,

<sup>27</sup> Nte mwi quara vaakya nkyi timwa nyuqata nkye hiave ntapihiavo? Nanraqamave nkye mwi quara qaiqaa kyapara hiavo? Nkyevata mpo? Nkyevata mwia nraaqiara varireratave qaiqaa mwi quara ni kyapara hiavo? tiro.

<sup>28</sup> Tuvata mwihua mwia nronraqama kyeta inronra hita tiqata, Enama mwia nraaqiara variqara mwia qua riaaravave. Tire tetu haivaqara Mosesira qua riemwaqita vurahuave.

<sup>29</sup> Kotiva Mosesirara qua timwa tora tire riemwaqita vunanrave. Iesusiva mwi vaisiva qumina vaisivantove. Tire hiama mwiva mwisairo nri okyarara ntapihuro, tita.

<sup>30</sup> Mwihua mwitaa tuvaro mwiva kyauqu ntukikinraaqata kyero tiqaro, Qikye, ni pu ntapairi matai vaisiva, mwiva mwisairo nri okyarara nkye hiave ntapihiavo?

<sup>31</sup> Tire ntapihi kyaураро Kotiva hia uaqia hi vaisira qua rie varirave. Kotiva nai qua rieqata nrohi varia vaisihua mwihua qua nraahu rie varirave. Mwia nrutu tuaahere variahua mwihua qua nraahu Kotiva rie varirave.

<sup>32</sup> Haaru mwaa mwatara toharato entaraqaatairo hia vaisi mpovanto nai nronra vikyokyaqitairo vu qipa vura ntapairi kyorave.

<sup>33</sup> Iesusiva hia Kotiva hinasairo tumiva hitirio, mwiva hiama qio ni pu ntapairi mataitirio, tiro.

<sup>34</sup> Mwi vaisiva mwitaa tuvata mwihua tiqatama, I mwatatoraqaataira e uaqia hiara vaisivama variqira nrianro. E mpo? E tirivata mwaanra qua timwa timwinrenrave hiaro? tita. Mwitaa timwa kyeta mwihua vaisi mwia ntanrauqita mwaanra nraamwuqitaita veva mwaatani tuto kyora.

### *Kotirara hia quataave qiahua vu qipa vihua votima kyetama varita*

<sup>35</sup> Mwia tuto kyo quara riero Iesusiva mwi vaisira puaama kyero mwianra tiqaro, Mwatani mwatatai nraaqiarara e quataa mwivaveve tira hiaro? tiro.

<sup>36</sup> Tuvaro mwi vaisiva kyapara hiro tiqaro, Nronrao, mwiva ta vaisivave iho? E ni timwa mpiraqena nte mwianra quataave qiankye, tiro.

<sup>37</sup> Tuvaro Iesusiva mwia timwa mwinro tiqaro, E taqe variara vaisiva, nte mwaa mwivama iara ti varuqo, tiro.

<sup>38</sup> Mwitaa tuvaro mwiva tiqaro, Nronrao, quataama e mwivave, tiro. Timwa kyero mwiva Iesusira vuqaa tori kyaураро raviro mwia qamwata mwatero varura.

<sup>39</sup> Mwitaa huvaro Iesusiva tiqaro, Nte nraakyе qora tukya hirera mwatani tumuvave. Vu qipa vihua qaiqaa taqaate tina, tumuvave. Qati taqe varihua su qipa quarive tina, tumuvave, tiro.

<sup>40</sup> Mwitaa tuvata Parisi vaisinramwuvanto mwi quara rieta Iesusira kyapara hita tiqata, Tiri tivuvatave qipa viho? tita.

<sup>41</sup> Tuvaro Iesusiva mwihua timwa nyinro tiqaro, Nkyi su qipa vihata variahua varivarovauma hia nkyiqa quavanto vahiananrove. Nkye ni okyara hia ntapihi kye taqaraitita, nkye tiqata, Tire Kotira okyara taqaunanrave, ti variarave. Mwitaa ti variarara tiro, mwia kyaara nkyiqa qua vahirove, tiro. Iesusiva mwitaa turama.

## 10

### *Iesusiva sipisipiqaan ntumwa kyero tura*

<sup>1</sup> Iesusiva mpo quaqaa ntumwa kyero timwa nyinro tiqaro, Nte quataa qua qianinra riaate. Vaisi mpovanto sipisipi vataa tutukyaraqi virero hia qesana vera ntaraitiro, tutukya mpona mwaati ntero vi vari vaisiva mwi vaisiva mpuara uti vaisivave, mpohua riqaro mwihuani mpuara vare vari vaisivama variho.

<sup>2</sup> Vaisi mpovanto sipisipi qesana vera nteqaro vi variva, mwi vaisiva quataa sipisipi qovama variho.

<sup>3</sup> Qesaqaa vaimwanraanra ntaqikyi vari vaisiva mwia taqero qio qesa qatua mwataiharo mwiva nai sipisipiara aakyara nteqaro nai sipisipi nrutu ntamwaqiro vihata mwia sipisipinramwuvanto mwia qua ntapihi riaavarо mwihua sitero mwaaqani virave.

<sup>4</sup> Mwiva mwaaqani nai sipisipi uro kyero mwiva nraante vuni vi varihata mwia sipisipinramwuvanto nkyiari sora qua ntapihi kyeta rieqatara tita, mwia vataqita vi variarave.

<sup>5</sup> Mwia sipisipinramwuvanto hia mpo vaisi vataqita vivarave. Mwihua mpo vaisi qua hia ntapihi kyeta rieqatara tita, mwihua mwia nraatu aatu hiqata aatu vivarave, tiro.

<sup>6</sup> Iesusiva mwitaa timwa kyero sipisipiqa nrumwa kyero timwa nyuvata mwihua mwi quara okyara hia ntapihiraitita varura.

*Iesusiva nte kyuqema kyena sipisipiqa ntaqikyuvave tura*

<sup>7</sup> Hia ntapihuvaro Iesusiva qaiqaa timwa nyinro tiqaro, Nte qutaama tuqo. Nte sipisipi mwihua quesavantoma varuqo.

<sup>8</sup> Ni puni nria vaisihua mwihua mpuara utuahuave, mpohua riqata mwihuani mpuara vare variahua variavata sipisipivanto hia mwihua qua riaarave.

<sup>9</sup> Utaqi qua quesava ntema mwi quesava varuqo. Niqaamatero nritaraani vaisira ni kova mwia vitaananrove. Niqaamatero tumitare nritare hiariva qioma kyara puaama kyero nraananrove.

<sup>10</sup> Mpuara varai vaisiva mpuara vareqaro sipisipi ru taiqa kyarerero nrinrave. Nte sipisipiara rieqanama sipisipi mwihua qati variqita viqatama kyuqema kyeta variate tina, nte nruvave.

<sup>11</sup> Nte sipisipi qova kyuqevave. Sipisipi qova kyuqeva variqaro nai sipisipi rukyevorave tiqaro antuaqiro viro kyai nte mwihuara rieqana qutu quankye timwa kyero qutirave.

<sup>12</sup> Mpovanto hia sipisipi qova, mwiva qati kyaiqa vaisivanto variqaro taqaiharo qaakyau vairivanto nrishanro mwiva aatu hiqaro qaqira kyero hiantero viharo qaakyau vairivanto sipisipi rukyero hini ru sata kyaihata mwihua nkyiariara nkyariara mpona mpona quarave.

<sup>13</sup> Mwia kyaiqa vaisivanto qati kyaiqa vaisivanto variqarora tiro, mwiva hia sipisipiara nronraqama kyero riaraitiro, aatu virave.

<sup>14</sup> Nte sipisipi qova kyuqeva variqana nte ntena sipisipi ntapihi kyauqata ni sipisipinramwuvanto nivata ntapihi kyeta taqaarave.

<sup>15</sup> Mwia votima kyero ni kova ni ntapihi kyaihana ntevata mwia ntapihi kyaurave. Qio ni sipisipi rukyevorave tina, nte mwihuara rieqana qutu virerave.

<sup>16</sup> Sipisipi mponramwu mwihua hia mwaa utaraqi varihua mwihuavata ni sipisipive. Mwihua ni qua riaivaqe nte mwihua sitaqina uro kyaarita ni sipisipi hini mwihuavata kuaaqi varivarave. Mwihua kuaaqi varivaqe nte mwihua sova kuaiqivanto nraahu varianinrave.

<sup>17</sup> Nte mwihuara rieqana qutu vina qaiqaa qati siquaninrave. Nte mwitaa hianinranra tiro, ni kora mwutukyavanto nianra vaiho.

<sup>18</sup> Nte hia qiove qiariro mpovanto hiama qio ni rukyaananrove. Nte ntena qutu quataa hiraqena qutu quaninrave. Nte qutu quani okyararave, nte qaiqaa qati siquani okyararave, nina kyaiqa nraahuma vaiho. Ni kova nianra mwitaa mwitaa hiante ti quara, nte mwi quara vararerave, tiro.

<sup>19</sup> Mwitaa tuvata Iutaa vaisi nronranramwuvanto mwi quara rieta utaqaa ntainra vita hininramwu mpo qua tuvata hininramwuvanto mpo qua tura.

<sup>20</sup> Airivanto tiqata, Ueravanto mwiaqi variharo mwitaa tiho, Mwiva ueraqama viho. Nanraqamave nkye mwia qua riaavo? Hia mwia qua riaate, tuvata

<sup>21</sup> mponramwuvanto tiqata, Qaqao, ueraqa hiari vaisiva hiama qio mwi quara qiananrove. Ueravanto hiama qio vu qipa quani vaisira ntapaira kyaananrove, tita. Mwitaa tura.

*Iutaa vaisi nronranramwuvanto qaiqaa Iesusira ru kyarerata uti varura*

<sup>22</sup> Ierusaremini omwata mpo nro entava nri ntora. Kotira nraamwu qamwata mwato omwatava vahuvaro huarivanto hia nronraqama kyero ite varu entaraqaa mwi omwatara nronra.

<sup>23</sup> Mwi entaraqaa Iesusiva Kotira nraamwu nronraqi variqaro mpo rumuqi mwia nrutu Soromoninra rumuqi nrohi varuvata

<sup>24</sup> Iutaa vaisi nronranramwuvanto mwiqi ntuvaantuama vita Iesusirara tiqatama, E mpo qua vaakya tiri timwa timwiataarave. Taireve tiri timwa timwinanrave? E mesaiaavanto varirera, vutu kyera timwa timwinraqe tire riaare, tita.

<sup>25</sup> Tuvaro Iesusiva tiqaro, Nte vaakya nkyi timwa nyuqata nkye hia ni quara qutaa quave qiaovo. Ni kova ni nronraqama kyaihana nte mwia kyaiqa vare varurave. Qio nte varau kyaiqava ni okyarara ntapihima ti variho. Nkye ni kyaiqa taqaarara rieqata ni okyarara ntapihiataarave.

<sup>26</sup> Nkye hia ni sipisipi variqataro tita, nkye hia ni quara qutaave tivarave.

<sup>27</sup> Nte ntene sipisipi ntapihi kyaurave. Mwihua ni qua rieqatama ni pataqita nrohi varivarave.

<sup>28</sup> Nte ekyaa enta qati variqi vira nyianrita mwihua hia qutu vivarave. Hiama mpovanto ni kyauquqitairo ni sipisipi ntavihi kyero varaananrove.

<sup>29</sup> Ni kova ni sipisipi mpitaiva, mwiva peqavanto ekyaa inraikya nraatarava variqaro ni sipisipiqa ntaqikyi variharora tiro, hia mpovanto mwia kyauquqitairo qio ntavihi kye varaananrove.

<sup>30</sup> Ntevata ni kovavata kuaikuvantoma varuro, tiro.

<sup>31</sup> Iesusiva mwitaa tuvata Iutaa vaisi nronranramwuvanto mwia ru kyaare tita, ori tu varovaro

<sup>32</sup> Iesusiva tiqaro, Nte ni kora kyuqe kyaiqa, mpo kyaiqa mpo kyaiqa nkyi nyaamwutauqata nanra kyaiqa varaura kyaarave nkye niqaa ori tuto kyarerata uti variavo? tiro.

<sup>33</sup> Tuvata Iutaa vaisi nronranramwuvanto tiqata, Tire hia i kyaiqa kyuqera kyaara i ru kyarerave. E Kotirara qora qua qiaro. E qati vaisivanto variqarama Kotikyantiri kuaaqaa varirera uti variaro. Mwia kyaarama tire ori vara kyeta i ru kyarerave, tita.

<sup>34</sup> Mwihua mwitaa tuvaro Iesusiva tiqaro, Nkye Kotira mpuku vataaraqi qua mpo qara ntumwa tova vaiho. Nkye hiave mwi quara taqaavo? Kotiva vaisi mpo uhuara mwitaama tiro: Nkye mwanriqvantove, turave.

<sup>35</sup> Tire ntapihi kyauraro Kotira qua hia unra qua vahirave. Kotiva nai qua tu vaisihua qati qumina vaisiara mwanriqvantove turave.

<sup>36</sup> Qio Kotiva ni mwatama kyero ni titaihana nte mwatani tumu variqanama nkyiara nte mwanriqa Kotira mwaqave tuqata nkye tiqata, Kotirara qora qua qiaro, qiaovo.

<sup>37</sup> Nte hia ntene kora kyaiqa varaaritavauma nkye hia nianra qutaa mwivave tivarave. Nte ntene kora kyaiqama vare varuqo.

<sup>38</sup> Nkye hia nianra nronraqama kyeta riaivera, nkye nte kyaiqa vare varianinranra nronraqama kyeta rieqatama nianra qutaa mwivave qiate. Nkye mwitaa tivar nkyi su nyaato ntapihirata nkye ni kova niqi varirara ntapihivarave. Nte mwiaqi varianinranra nkye ntapihivarave, tiro.

<sup>39</sup> Mwitaa tuvata mwihua qaiqaa mwia karavu hirera uti varuvaro Iesusiva veva ntero viro.

<sup>40</sup> Veva ntero vuva uro Iotaani nramanri hini tokyani Ioniva tauraa variqaro nramanri nyunani uro varura.

<sup>41</sup> Varuvata airi nraakye qoravanto mwiva varunani nri nteta tiqata, Ioniva hia nronra kyaiqa varova variqaro Iesusirara tiri timwa timwunrave. Qio tire taqauraro Ioniva qutaa qua mwaa vaisirara timwa timwunrave, tita.

<sup>42</sup> Mwitaa timwa kyeta mwini varuhua airivanto Iesusirara qutaa mwivave tura.

<sup>1</sup> Vaisi mpovanto mwia nrutu Rasarusiva Vetaaninyaava nronraqama kyero nriqa vuvaro varuvata mwia nruratana Mariaavavata Mataavavata mwini varura.

<sup>2</sup> Mariaava vahamwenra kyuqera Iesusiraqaa qu mwatero nai qita kyaahiqotairo mwia kyuqu nruka mwataariva varura.

Mwi nrurre nrakyetana variqata taqovaro mwihua sakyavaa nriqa vuvaro varuvata

<sup>3</sup> mwitanahua vaisi mpo titeta Iesusirara uro mwitaama qianta tita, Nronrao, i mwutukya nti vaisiva nronraqama kyero nriqa viharo variho qianta, tita.

<sup>4</sup> Mwitanahua mwitaa timwa kyeta titovaro vevani uto timwa mwuvaro Iesusiva mwi quara riero tiqaro, Rasarusiva nronraqama kyero nriqa viharo variho. Qio mwiva hiama qutu quananrove. Nkye Kotira kepuuya taqaate tiro, mwia nriqa viharo variho. Ni Kotira mwaaku ni peqa okyara taqaate tiro, mwia nriqa viho, tiro.

<sup>5</sup> Iesusiva Mataararavata mwia nrurranravata Rasarusiraravata mpoqama kyero mwutukya ntua variqaro

<sup>6</sup> mwi quara rierovata hia qamwanrama viraitiro, qaqlira kyero taara entavata mwini varura.

<sup>7</sup> Vari kyero mwiaqatairo nai nraaqiaranramwuanra tiqaro, Qio varaivaqenramwu tumu ntante Iutiaani quare, tiro.

<sup>8</sup> Tuvata mwia nraaqiaranramwuvanto qaqlaa tita, Mwaanra ti variarao, nanauma Iutaa vaisi nronranramwuvanto ori vara kyeta i ru kyarerata uturave. E qaiqaa mwini tumu ntantera virerarave hiaro? tita.

<sup>9</sup> Tuvaro Iesusiva tiqaro, Mpo enta mpo enta huarivanto ihera qio itairave. Vaisivanto qaatairaqaa nrohi variva huarivanto itairaqqaa nrohiqaro aanra qio taqebaro hia huntavaivaimaqiro kyaamwu ntirave.

<sup>10</sup> Huarivanto hia itaiharo entaqi nrohi variva huntavaivaimaqiro kyaamwu nti varirave, tiro.

<sup>11</sup> Mwitaa timwa kyero Iesusiva qaiqaa tiqaro, Tiri toti Rasarusiva vaitama viho. Nte uro mwia vaurama kyarerave, tiro.

<sup>12</sup> Mwitaa tuvata mwia nraaqiaranramwu tiqata, Nronrao, mwiva qati vaite varirera, mwiva qioqa hiananrove, tita.

<sup>13</sup> Mwitaa timwa kyeta mwihua hia ntapihuvaro Iesusiva mwi quaraqa ntumwa kyero Rasarusiva qutu vurara tura. Mwihua tiqata, Iesusiva Rasarusirara qati vaitairarama tiho, tita.

<sup>14</sup> Mwitaa rieqata varuvaro Iesusiva vutu kyero timwa nyinro tiqaro, Rasarusiva qutuma viho.

<sup>15</sup> Qio nte nkyiara rieqanama nkye nianra qutaa mwivave qiate tina, nte Rasarusira hia qamwanrama uro taqaurara qamwateqama varuqo. Qio varaivaqenramwu mwiva qutu vinani quare, tiro.

<sup>16</sup> Tuvaro mwia nraaqiara mpovanto Tomaasiva, mwia mpo nrutu Kaapiva, mwiva nai hena vaisinramwuanra tiqaro, Qio varaivaqenramwu mwaanra ti vari vaisiravata quare. Iutaa nronranramwuvanto mwia ru kyaivaqe tirenramwuvata mwia vatama kyeta qutu quare, tiro.

### *Nraakye qora qutu quahua qati vara sivuma kye varuva nte mwaa mwivave, tura*

<sup>17</sup> Tuvaro Iesusiva vuva uro ntero riovata Rasarusira quntamwa tovaro erahimuaantema enta nrutarora.

<sup>18</sup> Vetaani Ierusaremi qaumato 3 kiromitaa votima mwiaqatairo vahuvaro

<sup>19</sup> Ierusalermisaita mwi mwatanaahua airivanto Mariaaravata Mataaravata mwutukya qihakyama nyateqata Rasarusirara ntatarerata nrurra.

<sup>20</sup> Nri varuvaro Mataava riovato Iesusivavata mwisairo aanrani nri varuvaro mwiva Iesusira hunta kyarero viqaro Mariaara nraamwuqi kyero vuva uro ntero

<sup>21</sup> Iesusirara tiqaro, Nronrao, e mwaini variaratiri, ni pakyaava hiama qutu vitirio.

<sup>22</sup> Qio mate e Kotirara mpo inraikya mpo inraikyara nyaanru tiraro Kotiva mwi inraikyara qiomia i mwiananrove. Nte mwia ntapihi kyauquo, tiro.

<sup>23</sup> Tuvaro Iesusiva mwia timwa mwinro tiqaro, I vakyaava qatima siquananrove, tiro.

<sup>24</sup> Tuvaro Mataava tiqaro, Qio ekyaa entaqaa mwiva ekyaa nraakye qora kyapata siquananrove. Nte mwia ntapihi kyauquo, tiro.

<sup>25</sup> Tuvaro Iesusiva tiqaro, Nraakye qora qutu quahua qati vara sivuma kye varuva, nte mwaa mwivave. Nraakye qora qati variqi vi varia inraikyara nyi varuva nte mwaa mwivave. Nianra qutaa mwivave qiariva qutu viro mwiqitairo qati variqiro quananrove.

<sup>26</sup> Qati variqiro viqaro nianra qutaa mwivave qiariva hiama qutu quananrove. E mwianra qutaaveve tira hiaro? tiro.

<sup>27</sup> Tuvaro Mataava tiqaro, Qutaama tira hiaro. Mesaiaa Kotira maaquvanto mwatani tuminrenra hiarava, e qutaa mwivama hiaro, tiro.

### *Iesusiva Rasarusirara ntatora*

<sup>28</sup> Mwitaa timwa kyero Mataava nrumu ntantero uro nai nrunra tirema kyero timwa mwinro tiqaro, Mwaanra ti vari vaisiva nri ntaiho. Mwiva iara kyapara iho, tiro.

<sup>29</sup> Tuvaro Mariaava mwi quara riero siviro hiantero uro Iesusira huntakyarero viro.

<sup>30</sup> Iesusiva vaakya Mataava uro qua mwantonani variqaro hia mwatukyani nri ntovaro

<sup>31</sup> Mariaava mwia huntarero vuvata Iutaa nraakye qora mwia mwutukya qihaaikyama mwatarerata nruhua taqovaro Mariaava nraamwuqitairo hiantero vuvata mwihua tiqata, Qio mwia quntamwa taanani ntatareraro virerove, timwa kyeta mwihuavata sivita Mariaara vata vareta vura.

<sup>32</sup> Mwihua Mariaara vata vareta vuvaro Mariaava vuva Iesusiva hunani uro ntero Iesusira taqero uro mwia vuqaa tumu ntiro variro tiqaro, Nronrao, e variaratiri, hiama ni pakyaava qutu vitirio, tiro.

<sup>33</sup> Tuvaro Iesusiva taqovaro mwiva ntate varuvata Iutaa nraakye qora Mariaara-vata nruhua mwihuavata ntate varuvaro Iesusira mwutukyavanto qoraqama kyero nraamwunruqa tovaro mwiva po kye tiro tiqaro,

<sup>34</sup> Mwia taraqive quntamwa teta hiavo? tuvata mwihua tiqata, E nrinra uro taqaante, tuvaro

<sup>35</sup> Iesusiva ntate varura.

<sup>36</sup> Ntate varuvata Iutaa nraakye qoravanto tiqata, Qio taqaate. Mwiva mpoqama kyero Rasarusirara mwutukya ntiharo variho, tita.

<sup>37</sup> Tuvata mponramwuvanto tiqata, Mwiva vu qipa vi vaisiravata qio ntapairi kye varivave. Iesusiva mwaini varitirio, Rasarusiva qutuve vitirio, hiave qutu vitirio? tita.

### *Iesusiva Rasarusira sivuma kyora*

<sup>38</sup> Tuvaro Iesusira qaiqaa ua huvaro mwiva mwia quntamwa tonani vura. Mwihua ori vaurutoraqi Rasarusira veta vateta ori mpo vara kyeta quesana tita torara tiro, Iesusiva tiqaro,

<sup>39</sup> Ori mwia qatinani vara kyaate, tuvaro Mataava qutu vu vaisira nrunravanto qaqqao tiro, Mwia quntamwa taavarero erahiamuaantema enta nritaraiharo nteria viva mwuntama quananrove, tiro.

<sup>40</sup> Tuvaro Iesusiva Mataarara tiqaro, Nte vaakya i timwa mwu quarara riaante. E nianra qutaa mwivave tirera, e Kotira peqa taqenanrave turave. Hiave nte vaakya iara mwitaa tina huquo? tiro.

<sup>41</sup> Tuvata mwihua ori qatinani venta kyovaro Iesusiva virini taqero tiqaro, Ko, e nte tu quara rie variananra nte mwianra kyuqeve tuquo.

<sup>42</sup> E ekyaa enta ni qua rie variananra nte ntapihi kyaurave. E ni titaananranra nraakye qoravanto ntapihiate tina, nte mwihuara rieqanama iara aakyara tuquo, tiro.

<sup>43</sup> Jesusiva mwitaa timwa kyero mwiva aakyara ntero tiqaro, Rasarusio, sivira veva ntaante, tuvaro

<sup>44</sup> Rasarusiva qutu vuva qati siviro mwia kyuqu kyauqu ququtama teta mwia qiatavata tavunaqo qapuqamatova mwiqitairo veva ntero. Veva ntovaro Jesusiva mwihua timwa nyinro tiqaro, Mwia huvantu kyaivaro qati quarive, tura.

*Iutaa nronranramwuvanto Jesusira ru kye quara tura  
(Matiu 26:1-5; Maaki 14:1-2; Ruku 22:1-2)*

<sup>45</sup> Tuvata Iutaa nraakye qora airivanto Mariaara taqarerata nruhua mwi kyaiqara taqeta Jesusiva qio qutaa mwivave, tita.

<sup>46</sup> Tuvata mponramwuvanto qaqlira kyeta Jesusiva mwi kyaiqara varorara uro Parisi vaisinramwu timwa nyuvata

<sup>47</sup> Parisi vaisinramwuvata, Kotira kyaiqa vara mwate varu vaisihua mwihua nronra vaisinramwuvata, mwihua nkyiari kaanasori vaisi kyapata ntuvantuama vita tiqata, Mwi vaisiva mpo kyaiqa mpo kyaiqa nronra kyaiqa vare variho. Qikye, tire mwia nataamave kyaananrave?

<sup>48</sup> Tire mwia qati kyaarera, mwiva mwitaamaqiro virata ekyaa nraakye qora mwianra qutaa mwivave tivarave. Mwihua mwitaa tivata tiriqaa ntaqikyi variahua Romenivanto tiri ntaqiqata Kotira nraamwu ntapairi kyeta tiri nraakye qora ekyaa ru taiqa kyevavarave, tita.

<sup>49</sup> Tuvaro mwi vaisinramwuhuaqitairo mpovanto mwia nrutu Kaiapaasiva siviro. Kaiapaasira mwia nronraqama kyovaro mwi ihiraqi Kotira kyaiqa vara mwate varu vaisihuaqaa ntaqikyiqaro vunyaa vaisivanto varuva, mwiva siviro tiqaro, Hia nkye vu nraatovata vahihuave.

<sup>50</sup> Romeni mwatanaahua tiri ekyaa ru taiqa kyevorave. Tiri kyaahaqa hirero vaisi kuaiqiyavanto nraahu qutu viraro kyuqe hiananrove, tiro.

<sup>51</sup> Kaiapaasiva mwi quara tiqaro nte ntena nraato tukyena tuqo, tiro. Mwiva hia ntapihi kyovaro Kotiva mwia kyaahaqa huvaro mwiva Jesusiva Iutaa nraakye qorara rieqaro qutu quaninranra tura.

<sup>52</sup> Jesusiva hia Iutaa mwatanaahuara nraahu rieqaro qutu quariva varura. Kotira nraaqiara ekyaa mpoqi mpoqi apiqama varihua mwihuavata sita kyero uro kuaaqi ntuvantuama tarero Jesusiva qutu quariva varura.

<sup>53</sup> (Kaiapaasiva tiqaro, Vaisi kuaiqiyavanto tiri Iutaa kyaahaqa hirero qutu viraro kyuqe hiarive, tuvata) mwi entaraqaataita Iutaa nronra vaisinramwuvanto Jesusira rukyerara timwaqita vura.

<sup>54</sup> Mwitaa ti varuvarora tiro, Jesusiva Iutaa mwatani hia qoqaa nrohiraitiro, qaqlira kyero uro Eparaimi mwatukya qumina mwata tokyani uro nai nraaqiaranramwu kyapata varura.

<sup>55</sup> Mwini varuvaro Iutaavanto vekeyahu nyato kyarara omwata nro entava qaumaqa huvata hisai hisaita nraakye qora verara nronra mwatukya Ierusaremini nraahu vura. Mwini uro variqata nronra enta mwia vekeya variqata mwihua nkyiari mwaanra qua rieqata nramanri ntumwa kyeta tuapakyaara hiqama kyeta varura.

<sup>56</sup> Mwihua mwini variqata Jesusirara aitutumaqita nrohiqata uro Kotira nraamwu nronra nraamwuqi ntuvantuama vita nai kyapara hi nai kyapara hita tiqata, Jesusiva qiove nrumu omwata nraananrove? Mwiva aatu hiqaro hiave nriananrove? tita.

<sup>57</sup> Mwitaa ti varuvata Parisi vaisinramwuvantovata, Kotira kyaiqa vara mwate varu vaisihua mwihua nronranramwuvantovata, mwihua nraakye qora timwa nyita tiqata, Nkye taqaivaro Jesusiva nrinrenra nkye nrumu tiri timwa timwivaqe tire mwia rupaqi karavuqi kyaare, tura.

## 12

*Mariaava Iesusiraqaa mwunta vu vahamwenranra qu mwatora  
(Matiu 26:6-13; Maaki 14:3-9)*

<sup>1</sup> Vekyahu nyato kyarara omwata nro entava qaumaqa huvaro 6 entanramwu qati vahuvaro Iesusiva qaiqaa Vetaani mwini Rasarusiva varunani vura. Rasarusira mwia haaru qutu vura Iesusiva qaiqaa qati sivuma kyo vaisiva varura.

<sup>2</sup> Mwini vuvata mwi mwatanaahua Iesusirani kyara uta mwatovaro Mataava mwi kyarara varaqiqaro uro nyuvaro Rasarusiva Iesusikyantiri kyara tainta mwia tataaqa mwatakyaa viro varura.

<sup>3</sup> Varuvaro Mariaava taqu mpo varero nrunra. Mwi taquraqi nronra munima kyo vahamwenranra mwia nrutu *naanti* vahuvaro Mariaava mwi taqura varero mwi vahamwenranra Iesusira kyuquqaa qu mwatero mwiaqaatairo nai qiata kyaahiqotairo Iesusira kyuqu nruka mwatovaro vahamwenra kyuqe hu mwuntava nraamwu mwia piqa kyora.

<sup>4</sup> Piqa kyovaro Iesusira nraaqiaranramwuqitairo mpovanto Iutaasi Isikeriotiva Iesusira qovarama kyaariva, mwiva qaqao tiro,

<sup>5</sup> Mwi vahamwenranra mpohua nyinro munima 300 kinaa vara kyero mwi munimanra vehi nraakye qora nyiataara vaiharoma, qumina i kyuquqaa qu mwatero iho, tiro.

<sup>6</sup> Iutaasiva hia vehi nraakye qorara riaraitiro, mwiva mpuara vaisivanto variqarora tiro, mwitaa tura. Mwiva Iesusira nraaqiaranramwu munima tuaqa ntaqikyiqaro mwi tuaraqitairo tuqeta kyeqaro mwinramwuhua munima mpuara vare varura.

<sup>7</sup> Iutaasiva tiqaro, Munima mwia vehi nraakye qora nyiataara vaiharoma qumina i kyuquqaa qu mwataihio, tuvaro Iesusiva tiqaro, Hia mwi nraakyera antuaante. Mwiva vahamwenra niqaa qu mateqaro ni quntamwa te entarara ni mamanta terama mate variho.

<sup>8</sup> Vehi nraakye qora mwihua ekyaa entama nkyivata variqita vivarave. Nkye qati entaqaa mwihua qio kyaahaqa hivarave. Nte hiama nkyivata ekyaa enta variqina quaninrave, tiro.

*Nronra vainsinramwuvanto Rasarusiravata ru kyarerata uti varura*

<sup>9</sup> Iesusiva mwitaa timwa kyero varuvata Iutaa airivanto riovoro Iesusiva Vetaani mwini varuvata mwihua Iesusiravata Iesusiva qati sivuma kyo vaisira Rasarusiravata taqarerata uto Vetaanini kuaira hita varura.

<sup>10-11</sup> Iutaa airivanto Rasarusira qati sivuma kyorara rieqatama nkyiari nronra vainsinramwu qaqlira kyeta uto Iesusirara qutaa mwivave ti varuvata mwia kyaara Kotira kyaiqa vara mwate varu vaisihua mwihua nronranramwuvanto Rasarusiravata rukye quara ti varura.

*Iesusiva ntonki mwoqaqa mwaari ntero Ierusaremiqi vura  
(Matiu 21:1-11; Maaki 11:1-11; Ruku 19:28-40)*

<sup>12</sup> Mwia qanranraa nraakye qora airivanto vekyahu nyato kyarara nranrenrata nrhuua riovoro Iesusiva Ierusareminianra aanrani nri varura.

<sup>13</sup> Nri varuvata mwihua mwia qamwata mwatarerata qatokya mwanre voti hura teqa vareta Iesusira hunta kyarerata viqatama mwihua aakyara nteta tiqata, Kyai mwia nrutu tuaaheraare.

Nronravanto nai nrutuqa nri vari vaisira  
kyuqema mwataihio.

*(Ihi 118:26)*

Tiri Isareriqaa ntaqikyi vaisira  
Kotiva kyuqema mwataihio, tita.

<sup>14</sup> Mwihua mwitaa timwaqita vuvoro Iesusiva qaraakya ntonki puaama kyero Kotira mpukuqi tuntema kyero mwia mwoqaqa mwatakyaa viro variro Ierusaremiqiara viro.

Haaru Kotira mpukuqi mwianra mwitaama tiro:

<sup>15</sup> Saioniqinaahua (Ierusaremiqinaahua),  
nkye hia aatu hiate.

Taqate, nkyiqa ntaqikyiariva nriqanroma mwiva  
qaraakya ntonki mwoqaqa nri variho, tura.

(Sekaraiaa 9:9)

<sup>16</sup> Mwi quava mpukuqi vahuvata mwi entara Iesusira nraaqiaranramwuvanto hia  
mwi quara okyara ntapihura. Nraakiara Iesusiva qutu viro qaiqaa sivu entaraqaa mwi  
quava mwihua nyaatoqi ntumwa vuvata mwihua tiqata, Mwi quava Iesusiva ntonki  
mwoqaqa Ierusaremini vurara turave, tura.

<sup>17</sup> Iesusiva Rasarusira oriqi quntamwa toraqitairo nraanrama kyero mwia qati  
vara sivuma kyovata nraakye qora mwini Jesusiravata varuhua mwi kyaiqara taqeta  
mpohua mpohua timwa nyuvata

<sup>18</sup> mwiaqaataita nraakye qora airivanto Iesusiva nronra kyaiqa mwia varorara  
rieqata Iesusira uto huntu kyora.

<sup>19</sup> Mwihua Iesusira qamwata mwatarerata vuvata Parisi vaisinramwu nai timwa  
mwi nai timwa mwi hita tiqata, Qio taqate. Tire hiama qio mpo qara hiara aanrava  
vaiho. Ekyahua mwia nraahuma vataqita vi variavo, tura.

### *Kirikiqinaahua mponramwuvanto Iesusira uro taqora*

<sup>20</sup> Kiriki mponramwuvanto (mwihua Iutaa mwaanra qua riohua) mwihuavata mwi  
omwatara nreqatama Kotira nrutu tuaahererata Ierusaremini uro varura.

<sup>21</sup> Uro variqata mwihua Iesusira nraaqiara mpo Piripira Vetasaitaa mwatukya  
Karirinyaanranra tiqata, Tiri vaisio, tire Iesusira taqarerave, tuvaro

<sup>22</sup> Piripiva uro Entururavata timwa mwinro mwiva vatama kyero uro Iesusira timwa  
mwunra.

<sup>23</sup> Timwa mwuvaro Iesusiva tiqaro, Nte mwatani mwatatai nraaqiaravave. Ni nutu  
nronraqama quari entava nri ntaiho.

<sup>24</sup> Nte qua qianinra riaate. Uti uru hia mwataqi vara tutairaro uiti uru mwiqiava  
nanrianraa vahiananrove. Uti uru mwataqi vara tutairaro ntuko hiro turu vera  
kyairaro mwiaqaatairo uru mwiva taiqa quananrove. Uru mwiva taiqa viraro uiti  
mwiva quipiqeqaro airi tamwa riaananrove.

<sup>25</sup> Qio vaisi mpovanto mwaa mwataraqaa nai qati variqiro quaninranra nraahu  
nronraqama kyero riemwaqiro quariva, mwiva ekyarama qutu quananrove. Vaisi  
mpovanto hia nai mwaa mwataraqaa qati variqiro quaninranra nronraqama kyero  
riemwaqiro quariva, mwi vaisiva ekyaa enta qatima variqiro quananrove.

<sup>26</sup> Tahuave ni kyaiqa varaataa hiarihua, mwihua qati varivorave. Mwi vaisihua ni  
pataqita nriate. Mwihua mwitaa hiqata nte varianinrani mwihuavata varivarave.  
Mwihua mwitaama kyeta ni kyaiqa vara mate varivaro ni kova mwihua nyutu  
nronraqama kyaananrove.

### *Iesusiva nai qutu quaninranra tura*

<sup>27</sup> Qio mwaa entara ni mutukya uaquia ihana varuqo. Ntena korara nanra quave  
qianinrave? Ko, mwi entava nri ntaankyora mwi entara qaqira kyaante. Mwitaave  
Kotirara qianinrave? Qaqao, nte hia mwitaa tirerave. Nte mwi entarara rieqana  
tumuvave. Mwi entaraqaa nte atura ntumwaqina quankye timwa kyena tumuvave.

<sup>28</sup> Ko, e ena nrutu nronraqama kyaante, tiro. Iesusiva mwitaa tuvaro nyaamwusairo  
quavanto tiqaro, Nte ntena nutu nronraqama kyauqo. Qaiqaavata nronraqama  
kyarerave, tiro.

<sup>29</sup> Tuvata nraakye qora ntuvantuama vita mwini sivita varuhua mwi quara  
rieta tiqata, Nyaanruva nruqua tiho, tuvata hini uhua tiqata, Qaqao, nyaamwunyaa  
vaisivanto mwiaavata qua tiho, tita.

<sup>30</sup> Tuvaro Iesusiva tiqaro, Hia mwiva nianra rieqarovauma qua tiho. Mwiva nkyiara rieqaroma qua tiho.

<sup>31</sup> Qio mwa entara mwatani varihua ko qiani entarave. Mwaa entara mwatani varihuaqaa ntaqikyi varira Saataaninra peqa ntuvuraa kyaani entarave.

<sup>32</sup> Mwatasaita ni tuaahera kyaivage nte variqana ekyaa nraakye qora ntanrau kyaarita mwihua nte hianinranri nraahu nrivarave, tiro.

<sup>33</sup> Iesusiva mwi quara tiqaro nai qutu quaninranra timwa nyunra.

<sup>34</sup> Mwitaa tuvata mwini ntuvantuama vuhua qaqao tita, Kotira mpukuqi qara ntumwa tova tiqaro, Kotira kepukya vaisi mesaiaavanto ekyaa enta qati variqiro quananrove, turave. Nanraqamave e tiqara, Ni mwatani mwatatai nraaqiarara tuaahera kyevarave, qiaro? (E ena qutu vinanranra qiana quara hia ntapihuro.) E tiqara, Ni mwatani mwatatai nraaqiaravave, qiananrave. E ta vaisivave hiaro? tita.

<sup>35</sup> Tuvaro Iesusiva tiqaro, Pataqia omwavanto nkyi kyapata variqaro itamwaqiro quananrove. Kyokiraqi nrohiva hia nai vi aanranra ntapihirara tita, nkye kyokira ruquankyo tita omwavanto qati ite variani entaraqaa nrohiqata variate.

<sup>36</sup> Omwavanto qati vahiani entaraqaa nkye mwi omwanranra qutaa mwivave timwa kyeta, mwianra riemwaqi viqatama nrohiate. Mwitaa tiqatama nkye omwa nraaqiara variqatama nkyevata omwavanto itaintema kyeta itamwaqita vivarave, tiro.

Iesusiva mwi quara timwa kyero mwiaqatairo uro hia mwihua suqaa variraitiro, uqeta varura.

### *Iutaavanto Iesusirara hia quataave tura*

<sup>37</sup> Iesusiva mwihua suqaa variqaro nronra kyaiqa varovata mwihua taqetavata mwihua qaqlira kyeta hia mwianra qutaa mwivave tuvarora tiro,

<sup>38</sup> mwi entara Aisaiaava haaru tu quava qutaa vahura. Haaru Kotiva vaisi mpo Aisaiaara kyaahaqa huvaro Aisaiaava poropeti vaisivanto variqaro qumina vakya mwaa quara vutu kyero tiqaro,

Nronrao, tavave tiri quara quataave tiho?

Hia mpovantovata quataave tirave.

Nronravanto nronra kyaiqa vara kyaiharo

tavave mwia kyaiqa ntapihi taqaiho?

Hia mpovantovata ntapihi kyero taqaiho, tura.

(Aisaiaa 53:1)

<sup>39</sup> Aisaiaava mwitaa turara tita, mwihua hia Iesusirara qutaa mwivave tura. Aisaiaava qaiqaa mesaia mwianira tiqaro,

<sup>40</sup> Mwi vaisihua uaquia hi aanranra qaqlira kyeta

nianra tiri kyaahaqa hiante tivorave timwa kyero,

Kotiva mwihua su nyaato tita kyaihata

mwihua hia vuqotaita qio taqeta,

mwihua hia nraatoqotaita qio riaavo, tura.

(Aisaiaa 6:10)

<sup>41</sup> Aisaiaava haaru variqaro Iesusira peqa okyara taqebarora tiro, mwiva mwianra qua timwa nyunra.

<sup>42</sup> Mwi entara Iutaa nronra vaisinramwuqitaita mponramwuvanto tiqata, Qutaama Iesusiva mwivave, tita. Mwihua mwitaa tiqata mwihua Parisi vaisi nyaatu aatu hita qaqlira kyeta hia qoqaa variqata mwi quara tita. Mwaanra nraamwuqitaita veva nteta quate tivorave tita, hia mwihua qoqaa variqata mwi quara tura.

<sup>43</sup> Qati vaisivanto qamwata nyaterara nraahu mwihua nronraqama kyeta rieqatama hia Kotiva qamwata nyataaninranra nronraqama kyeta riora. Mwihua mwianra nraahu riohuara tita, mwihua hia qoqaa Iesusirara qutaa mwivave tura.

### *Iesusiva tu quava vaisi ko qiananrove tura*

**44** Iesusiva paatiro timwa nyinro tiqaro, Nianra qutaa mwivave qiariva hiama nianra nraahu qutaave qiananrove. Mwiva ni titairaravatama qutaave qiananrove.

**45** Vaisivanto ni taqevaro ni titairavatama taqaananrove.

**46** Nianra qutaa mwivave qiariva kyokiraqi nrohiankyo tina, nte omwa votima kyena itamwaqina virera mwatani tumuvave.

**47** Nte hia mwatani varihuaqua qua vatarerana tumuvave. Mwatani varihua kyuqema variate tina, nte tumuvave. Ni qua riero nteqa kyaariva variraqe hia ntevauma mwiaqaa qua vataaninrave.

**48** Ni qoririma mataani vaisiraqaave, ni qua nteqa kyaani vaisiraqaave, hiama nte qua vataaninrave. Nte timwa taani quava, mwivama ekyara entaqaa variqaro mwiaqaa qua vataaananrove.

**49** Nte hia ntene nraato tukyenavauma qua nkyi timwa nyuqo. Ni kova mwitaa mwitaa qiantemtimwa kyero ni titaihana nte mwiaqua nkyi timwa nyuqo.

**50** Nte ntapihi kyauqaro ni koraqua riaariva ekyaa entaqati variqiro quananrove. Qio ni kova mwitaa mwitaa qiantemti quara, nte mwi quara nkyi timwa nyuqo, tiro. Iesusiva mwitaa tura.

## 13

### *Iesusiva nai nraaqiaranramwu kyuqu hiqama nyatora*

**1** Vekyahu nyato kyarara omwata nro entava kuua enta nraahu qati vahuvare Iesusiva variqaro ntapihi kyovaro nai mwata mwaini kyero tumu ntantero nai qova varinani quari entava qaumato vahura. Mwitaa hvuvaro Iesusiva variqaro nai huhua mwatani varuhuara mpoqama kyero mwutukya vahuvare mwihuara rieqaro varura. Mwiva mwihuara mwutukya vahuvare qati nraahu vahiqiro vuvaro uro qutu vura.

**2** Entama vuvaro Iesusiva nai nraaqiaranramwu kyapata kyara nre varuvaro mwia nraaqiara mpovanto Iutaasi Isikeriotiva Saimoninra mwaaquvanto varuvaro Saataaniva Iesusira qovarama kyaante tiro, Iutaasira mwia nraatoqi qoraqua vato-varo Iutaasiva Saataaninra qua riora.

**3** Riero varuvaro Kotiva ekyaa inraikya Iesusira kyauquqi vatora Iesusira vu nraatoqi vahuvare mwianra ntapihi kyero. Iesusiva Kotiva hunasairo tumuva qaiqaa Kotiva hunani quaninra mwianravata mwiva ntapihi kyora.

**4** Mwiaqatairo mwiva kyara nro taintaraqaatairo siviro verato ututo tuavaaqara ntahuku kyero vatero tauri tavaarana rupatero uro

**5** tanuqi nramanri rauru kyero varero uro nai nraaqiaranramwu kyuqu hiqama nyatero tauri tavaarana rupatoraqotairo aahara tu nyatero.

**6** Mwitaamaqiro viro Saimoni Pitaava hunani nri ntovaro Pitaava qaqao tiro, Nronrao, e ni kyuquvatave hiqama matarera uti variaro? tuvaro

**7** Iesusiva tiqaro, Mate nte mwaa kyaiqara varaura e hia ntapihiaro. Nraakiara mwianra qio ntapihinanrave, tiro.

**8** Tuvaro Pitaava tiqaro, Qaqao, e nronra vaisivanto variqara haunri mwitaa hi kyaiqara ni vara materavaare. E hiama ni kyuqu qio hiqenanrave, tiro.

Tuvaro Iesusiva tiqaro, Hia nte i kyuqu hiqama mwataankyera, e hiama ni nraaqiara varinanrave, tiro

**9** Mwitaa tuvaro Saimoni Pitaava tiqaro, Nronrao, mwitaa hirara e hia ni kyuqu nraahu hiqama mataante. Ni kyauquvata ni qiatavata hiqama mataante, tiro.

**10** Tuvaro Iesusiva tiqaro, Nramanri ntumwa taariva hiama qumina qaiqaa ntuananrove. Mwiva nai kyuqu nraahuma hiqaananrove, tiro. Nkye ekyaa nramanri ntumwa kye kyuqema variavaro kuaikuvanto nraahu hia kyuqema variho, tiro.

<sup>11</sup> Jesusiva nai nraaqiara mpovanto mwia qovarama kyaaninra ntapihi kyerora tiro, mwiva tiqaro, Nkye ekyaa kyuqema variavaro kuaikuvanto nraahu hia kyuqema variho, tiro.

<sup>12</sup> Mwitaa timwa kyero mwihua kyuqu hiqama nyatero Jesusiva qaiqaa uro nai tuavaaqa ntahuku kye vatora vara utu varero uro nai varura qoqaraaraqaa mwatakyaa viro variro timwa nyinro tiqaro, Nte mwataa hi kyaiqara nkyi vara nyataura nkye qio mwianra ntapihitave hiavo?

<sup>13</sup> Nkye nianra nronra vaisi mwaanra ti variaravave qiarave. Nte mwitaama varurara titi, nkye qiomaa nianra mwitaa tivarave.

<sup>14</sup> Qio nte nkyi nronra vaisi mwaanra ti varuva variqanama nte nkyi mwataa kyaiqa vara nyateqanama nkyi kyuqu hiqama nyatauqo. Nkyevata variqata nte huntema kyeta nai kyuqu nai kyuqu hiqama nyateqata variate.

<sup>15</sup> Nkye nte hunte hiate tina, nte nkyi mwi kyaiqara nyaamwu tauqo.

<sup>16</sup> Nte qutaa qianinra nkye riaate. Kyaiqa vaisivanto hia nai nronra vaisi nraatara kyairave. Mpo inrakyara titaiharo vi vaisiva hia nai titaira mwia nraatara kyairave.

<sup>17</sup> Nkye mwi quara okyara ntapihi kyeta rieta mwi kyaiqara mwitaama kye varaqi vivera, nkye qamwateqatama variqi vivarave.

<sup>18</sup> Qio hia nte nkyi ekyaahuara tuqo. Nte ntene mwatama tau nraaqiarhua qio ntapihi taqaurave. Nte mwihua okyara ntapihi kyaurave. Haaru Kotira mpukuqi qua mpo qara ntumwa tova mate qutaa mwivauma vahiananrove. Mwi quava mwitaama tiro:

Vaisi mpovanto nivatama kyero variqaro  
ni kyara nrenro mwiaqatairo tuqasaa viro  
ni qoraqama mataananrove, turave.

(Ihi 41:9)

<sup>19</sup> Nkyiqitairo vaisi mpovanto ni qoraqama mataaninranra nte mate nkyi timwa nyi varuqo. Mwiva nraakiara ni qoraqama matairata nkye variqata mate nte timwa nyunranra rieqatama qio nianra mwiva qutaama qati nraahu variqi vivave tivarave.

<sup>20</sup> Nte qutaa qianinra nkye riaate. Vaisi mpovanto nte titaa ntaani vaisira qamwata mwateqaro mwiva nivata qamwata mataananrove. Mwiva ni qamwata mateqaro Kotiva ni titairavata qamwata mwataananrove, tiro.

### *Mpowanto Jesusira nramwutaa kyaauquqi kyaaninranra tura (Matiu 26:20-25; Maaki 14:17-21; Ruku 22:21-23)*

<sup>21</sup> Jesusiva mwitaa timwa kyero varuvaro mwia mwutukyavanto uaquia huvaro mwiva vutu kyero mwihua timwa nyinro tiqaro, Nte qutaa qianinra riaate. Nkyiqitairo mpovanto ni rukyaate tiro, uro timwa nyiananrove, tiro.

<sup>22</sup> Mwitaa tuvata mwia nraaqiaranramwuvanto nai taqe nai taqe hita airi nraato titiqaata, Jesusiva ta vaisirarave tiho? titi.

<sup>23</sup> Mwitaa ti varuvaro mpovanto Jesusira mwutukyavanto mwianra mpoqiaavata vahu vaisiva Jesusira nraaqani varuvaro

<sup>24</sup> Saimoni Pitaava mwianra nru nraata kyero tiqaro, E Jesusira ta vaisiva mwitaa hianinra kyapara hiqara taqaante, tuvaro

<sup>25</sup> mwi vaisiva Jesusiraqaa uromwi vuntuvi variro Jesusira kyapara hiro tiqaro, Nronrao, mwiva ta vaisivave iho? tiro.

<sup>26</sup> Tuvaro Jesusiva mwia timwa mwinro tiqaro, Nte mpereti viti nramanri tanuqi vahiraqi mwaati ntamwa kyena vaisi mpo mwianriva qio mwia mwi vaisivave, tiro. Timwa kyero mpereti viti vara kyero nramanriqi ntamwa kyero Iutaasira viti mwunra.

<sup>27</sup> Mpereti viti mwia mwuvaro Iutaasiva mwia varovaro Saataaniva Iutaasira utaqi viqetero varuvaro Jesusiva Iutaasirara tiqaro, Qio hiantera ena vararerera tina kyaiqara varaante, tiro.

<sup>28</sup> Mwitaa tuvata mwia nraaqiara kyara taintaqaa varuhuaqitairo hia mpovanto mwi quara okyara ntapihura.

<sup>29</sup> Mwihua tiqata, Iutaasiva munimaqaa ntaqikyi vari vaisiva variharo Jesusiva huru omwata nraana kyarara varaanteve tiho, mwiva vehi vaisi munima uro nyianteve tiho? tita.

<sup>30</sup> Mwihua mwitaa ti varuvaro Iutaasiva Jesusiva mpereti viti mwunra varero mwiaqaatairo veva ntero viro. Entaqi mwiva burama.

### *Iesusiva qaraakya qua mwaanra timwa nyunra*

<sup>31</sup> Iutaasiva veva ntero vuvaro Jesusiva tiqaro, Nte mwatani mwatatai nraaqiaravave. Mate ni peqa okyaravanto qovarama viho. Nte Kotira peqa okyara mate qovarama kyauquo.

<sup>32</sup> Nte Kotira peqa okyara qovarama kyaankyeru, Kotiva mwiva ni peqa okyaravata qovarama kyaananrove. Mwiva qamwanrama mwitaa hiananrove.

<sup>33</sup> Qikye, ni nraaqiaranramwu tuaavo, nte nkyivata pataqia varikyena quarita nkye nraakiara qumina nianra puua hivarave. Nte Iutaa vaisi nronranramwu timwa nyuntema kyena nkyivata timwa nyuquo. Nte virera hianinrani nkye hia qio vivarave, tuquo.

<sup>34</sup> Nte mate qaraakya qua mwaanra nkyi timwa nyianrita nkye riaate. Nkye mpogama kyeta nanrianra nanrianra mwutukya vahirata variate. Ni mutukyavanto nkyiara vahintema kyeta nkyevata nanrianra nanrianra mwutukya vahirata variate.

<sup>35</sup> Nkye nanrianra nanrianra mwutukya vahirata varivata nraakye qora nkyi taqeta mwihua nkye Jesusira nraaqiarama variavo tivarave, tiro.

### *Pitaava nte hia Jesusira taqaurave qianinranra Jesusiva tura*

*(Matiu 26:31-35; Maaki 14:27-31; Ruku 22:31-34)*

<sup>36</sup> Jesusiva mwitaa tuvaro Saimoni Pitaava mwia kyapara hiro tiqaro, Nronrao, e taini virerarave qiaro? tiro. Tuvaro Jesusiva tiqaro, Nte virera hianinrani e hiama qio ni pataqira vinanrave. E nraakiarama ni pataqira vinanrave, tuvaro Pitaava tiqaro,

<sup>37</sup> Nronrao, nanraqamave nte hia qio mate i vataqina quaninrave? Nte iara rieqana qiomia qutu quaninrave, tiro.

<sup>38</sup> Tuvaro Jesusiva tiqaro, Quataave e nianra rieqara qutu vinanrave? Nte qutaa qianinra riaante. Kokoraaravanto hia nruqua tirara e taarampo nani nianra nte hia mwia taqaurave tinanrave, tiro.

## 14

### *Kotiva hinani qua aanrava Jesusivama*

<sup>1</sup> Jesusiva nai nraaqiaranramwu timwa nyinro tiqaro, Hia nianra riaivarо nkyi mwutukyavanto uaquia hiarive. Nkye Kotirara kepuqyaqama kye riemwaqita quantema kyeta nianravata kepuqyaqama kye riemwaqita quate.

<sup>2</sup> Ni kora mwaatani airi mpo nraamwu mpo nraamwu vahana nte nkyiara rieqana uro terama nyatarerana vuquo. Hia mwitaama vahitiri, nte hiama nkyi timwa nyutiri.

<sup>3</sup> Nte uro nkyini terametena uro ntantena tumu nkyi sitaqina uro ntena varianinrani kyaarita, nkye nivata varivarave.

<sup>4</sup> Nte virera hu aanranra nkye ntapihi kyaarave, tiro.

<sup>5</sup> Tuvaro Tomaasiva qaqao tiro, Nronrao, tire e virera hiananra hia ntapihi kyauro. Nataama kyetave tire mwi aanranra ntapihi kyaananrave? tiro.

<sup>6</sup> Tomaasiva mwitaa tuvaro Jesusiva mwia timwa mwinro tiqaro, Nte Kotiva hinani qua aanrava mwaa mwivama varuquo. Nte qutaa okyara mwaa mwivama varuquo. Nte qati variqi qua okyarava mwaa mwivama varuquo. Hia mpo aanranraqaama tero ni kova hinani quariva vaiho. Qio nte mwaa aanra mwivama varuquo.

<sup>7</sup> Nkye ni ntapihi kyeta taqaahuara tita, nkye ni koravata ntapihi kyeta taqevarave. Mate mwaa entaraqaataita nkye ni kora ntapihi kyetama nkye mwiavata taqaahuama variavo, tiro.

<sup>8</sup> Mwitaa tuvaro Piripiva tiqaro, Nronrao, qio ena qora tiri tinraamwu tairaqe tire mwia taqeta qiove qiare, tuvaro

<sup>9</sup> Iesusiva mwia timwa mwinro tiqaro, Piripio, nte nkyi kyapata mpuahaama varugara e hiave ni ntapihi kyera taqaaro? Ni taqaiva ni koravatama taqaiho. E nanraqamave nianra tiqara ena qora tiri tinraamwu taante qiaro?

<sup>10</sup> Piripio, nte ntene koraqi varuqaro ni kova niqima variho. E hiave mwi quarara quutaave qiaro? Nte nkyi timwa nyu quara hia nte ntene riemwa kyeqanavauma nkyi timwa nyuqo. Ni kova niqi variva, mwiva variqaro nai kyaiqa vare variho.

<sup>11</sup> Nte ntene koraqi varuqaro ni kova niqima variho. Mwi quarara quutaave qiate. Nkye hia nianra riaivera, nkye nte kyaiqa varaurara rieqata nianra qutaa mwivave qiate.

<sup>12</sup> Nte qutaa qianinra riaate. Nianra qutaa mwivave timwa kyero riemwaqiro quariva, mwiva variqaro nte kyaiqa varauntema kyero kyaiqa varaananrove. Nte ntene kova hinani quaninranra tiro, mwia kyaiqvanto ni kyaiqa nraatara kyaananrove.

<sup>13</sup> Nkye ni kyaiqara rieqata qiomma nkye mpo inraikyararave, mpo kyaiqarave, ni kyapara hivaqe nte nkyi nyianinrave. Nkye ni kora peqa okyara taqaate tina, nte mwia mwaaqvanto mwitaa hirerave.

<sup>14</sup> Nkye ni kyaiqara rieqata qio nkye mpo inraikya mpo inraikyara ni kyapara hivera, nte nkyi nyianinrave.

### *Kotira mwanraqura vara kyaariro tumuaninrave tura*

<sup>15</sup> Nkyi mwutukyavanto nianra vahirera, nkye ni qua nraahu riemwaqita vivarave.

<sup>16</sup> Nte ntene kora kyapara hiarilo mwiva nkyi kyaahaqa hianinra Kotira mwanraqura qutaa qua nraahu ti varianinra titairaro nkyi airiqa hirero tumu ekyaa enta nkyivata variananrove.

<sup>17</sup> Qati nraakyе qora mwatani variahua hia Kotira mwanraqura taqeta mwihua hia mwia ntapihi kyaarara tita, mwihua hia mwia qio varevarave. Nkye mwia taqaavaroo mwaa entara mwiva nkyivatama variho. Nraakiara mwiva nkyiqima variananrove.

<sup>18</sup> Hia nte nkyi mwaini kyena quarita nkye nrainranra nraaqiara votima kyeta varivarave. Nte nkyi kyaarinani uro ntantena tumuaninrave.

<sup>19</sup> Pata iheraqia mwatani varihua hia ni taqaivata nkye nraahu ni taqevarave. Nte qati variqina quariva varurara tita, nkyevata qati variqita vivarave.

<sup>20</sup> Mwi entara nte ntene koraqi varurave, nkye niqi variarave, nte nkyiqi varurave, nkye ntapihi kyevare.

<sup>21</sup> Ni qua varakye tutero mwi quara vataqiro quaninra mwia mwutukyavanto nianra vahiananrove. Nianra mwutukya vahiariva variraro ni kora mwutukyavanto mwianra vahiananrove. Ni mutukyavantovata mwi vaisirara vahiananrove. Nte variqana mwi vaisira ntene okyara qoqaa nraamwu taaninrave, tiro.

<sup>22</sup> Tuvaro Iutaasiva hia Iutaasi Isikeriotiva mpo Iutaasiva tiqaro, Nanraqamave e ena okyara tiri nraahu tinraamwu teqara hia mwatani variahua nyaamwu tenanrave? tiro.

<sup>23</sup> Iutaasiva mwitaa tuvaro Iesusiva tiqaro, (Mwatani variahua hiama nianra mwutukya ntihata variavo). Vaisivanto nianra mwutukya vahiariva, mwiva ni qua riemwaqiro viraro ni kora mwutukyavanto mwianra vahiananrove. Ntevata ni kovavata mwi vaisiraqi uro variananrave.

<sup>24</sup> Vaisi mpovanto hia nianra mwutukya vahiariva, mwi vaisiva ni quavata hia vataqiro quaninrove. Nte nkyi timwa nyu quara hia ntene nraato tukyena nkyi timwa nyunrave. Nte ni koraqaataina mwi quara varena tumu nkyi timwa nyunrave.

<sup>25</sup> Nte mate nkyiyata varu entara mwaa quara nkyi timwa nyuqo.

<sup>26</sup> Nte quariro ni kova nkyi kyaahaqa hianinra nai mwanraqura titairaro mwiva ni kyaiqara rieqaro tumu variqaro ekyaa inraikya nkyi nyaamwu teqaro nkyi su nyaatovata kyaahaqa hirata nkye nte tu quara ntapihi riemwa tevarave.

<sup>27</sup> Nte virera hiqanama nkyiara mwaateraqama varivaro nkyi mwutukyavanto qihaakya hirata variate, tuqo. Mwaa mwatanaahua nkyiari nanrianra nanrianra qua mwanteta tiqata, Mwaateraqama kyera variante, ti variarave. Nkyiari mwitaa tiqata qumina qua nraahu ti variarave. Nte nkyiara mwaateraqama kyeta variate tu quava hiama qumina quave. Nkye ni qua riemwaqita vivaro nkyi mwutukyaitairo qihaakyama vahirata hia aatu hivaro nkyi mwutukyavanto hiama uaqia hiananrove.

<sup>28</sup> Nkyi kyena quariva uro ntantena tumuaninrave tu quara nkye vaakya riaarave. Ni kova ni naatara kyero nronravanto varirara tita, nkyi mwutukyavanto nianra qutaaqama vahirera, nte ntene kova hinani quaninranra nkye qamwateqata varivarave.

<sup>29</sup> Mwi inraikyava mwi inraikyava nraakiara mwitaa hianinranra nte mate nkyi timwa nyuqo. Qio nraakiara nkye taqaivaro mwi inraikyava qovaramaqiro virata nkye nianra tiqata mwiva tu quava mate qutaa mwivauma vaiho tivarave.

<sup>30</sup> Qio mwaa entara mwatani variahuaqaa ntaqikyi variva, Saataaniva, nrumu varihananra tina, mwia kyaara nte hia nkyi kyapata mpuahaa qua qianinrave. Mwia kepukyavanto hia ni qio naatara kyaananrove.

<sup>31</sup> Ni mutukyavanto ni korara vahira mwatani varihua taqaate tina, nte ni kora qua vataqina virerave. Qio varaivagenramwu mwaqaqitaita vevante quare, tiro. Iesusiva turama.

## 15

### *Iesusiva uaini kyaantaqa ntumwa kyero timwa nyunra*

<sup>1</sup> Iesusiva mpo quaqaa ntumwa kyero nai nraaqiaranramwu timwa nyinro tiqaro, Nte uaini apa kyuqeva varuqaro ni kova uainiqaa ntaqikyi varivama varihata nkye uaini mwanre kyaarama variavo.

<sup>2</sup> Ni kova taqaiharo kyaara mpovanto hia tamwa riaiharo mwiva mwia teqa qaqlira kyero uro taqaiharo mpo kyaaravanto kyuqema kyero tamwa riemwa taiharo mwiva kyuqema vahiqaro mpoqiaqata riaarive tiro, mwia rapatu kyero vatairave.

<sup>3</sup> Nte tu quava nkyi vaakya rapatu kyero vataihatara tita, nkye qiomava variavo.

<sup>4</sup> Nkye niqi varivaqe nte nkyiqi variankye. Kyaara mpovanto nanrianraqama vahiariva hiama qio tamwa riaaananrove. Kyaara mwiva apaqaa taaqauvahiariva qio tamwa riaaananrove. Mwia votima kyeta nkye hia nivatama kyeta taaqauvi varivera, nkye hiama qio tamwa rievarave.

<sup>5</sup> Nte uaini apa varuqata nkye kyauqu kyaarama variavo. Ni vatama kyero variraqe nte mwia vatama kyena variariva, mwivama tamwa airi riaaananrove. Nkye hia nivata taaqauvi variraitita nkye nkyetaraa varivera, nkye hiama qio mpo kyaiqavata varevarave.

<sup>6</sup> Kyauqu kyaara qaqlira kyairaro aaharama quarintema kyero hia nivata taaqauvi variani vaisira ni kova qaqlira kyaananrove. Qaqlira kyaani kyaarara mwia nraakiara ntupi kyero varaqiro qiaqi tuto kyairaro itamwa taiqa kyaananrove.

<sup>7</sup> Nkye ni vatama kyeta taaqau vita varivaro ni quavanto nkyiqi vahirera, nkye Kotirara nkyeta mwutukyavanto vahiani inraikyarara kyapara hivaro nkyi nyiananrove.

<sup>8</sup> Nkye ni qua riemwaqiqi viqata uaini kyaanta votima kyeta airi tamwa riaivarao ni kora nrutuvanto nronraqa hiarive. Nkye mwitaamaqi viqata nkye qutaaqama kyeta ni nraaqiara varivarave.

<sup>9</sup> Ni kora mwutukyavanto nianra vahintema kyero ni mutukyavantovata nkyiara vaiho. Ni mutukyavanto nkyiara vahira mwipi variate.

<sup>10</sup> Nte ni kora qua riemwaqina vi varuqaro mwia mwutukyavanto nianra vahirave. Mwitaa huntema kyeta nkyevata ni qua riemwaqita vivera, nkye ni mutukyavanto nkyiara vahiraqi varivarave.

<sup>11</sup> Ni mutukyaqi kyuqe hintema kyero nkyi mwutukyaqvata kyuqe hirata nronraqama kye qamwateqata variate tina, nte mwaa quara nkyi timwa nyuqo.

<sup>12</sup> Nte mpo qua qianinra nkye mwi quara riemwaqita quate. Ni mutukyavanto nkyiara vahintema kyeta nkyevata nanrianra nanrianra mwutukya vahirata variate.

<sup>13</sup> Vaisivanto nai nramwunaahuara mwutukya vaiharo mwihuara rieqaro qutu virave. Mwitaama kyero nai hena huaru mwutukya vahiariva mpohuara mwutukya vahi okyarara ekyaa nraatara kyero nritarero vahiananrove.

<sup>14</sup> Nkye ni qua riemwaqita vivera, nkye ni nramwunaahuama varivarave.

<sup>15</sup> Kyaiqa vaisivanto hia nai nronra vaisivanto mwitaa mwitaa hiani okyarara ntapihirara tina, nte hiama nkyiara ni kyaiqa vaisive timwaqina quaninrave. Nte nkyiara ni nramwunaahuave timwaqina virerave. Nte ni kora qua riaura ekyaa nkyi timwa nyunranra tina, nte mwitaa tirerave.

<sup>16</sup> Hia nkye ni naanraanrave. Nte nkyi nyaanraunrave. Nte nkyi nyaanrama kye sita kyena nkyiara uro kyatarivanto tamwa riaintema kyeta kyuqe tamwa mpuahaama vahiani tamwanra riemwataate turave. Nkye mwitaa hivera, nkye ni nutuarave, ni kyaiqarave rieqata nanra inraikyarave ni kora kyapara hivaro mwiva nkyi nyiananrove.

<sup>17</sup> Nte mwaa quara nkyiara mwitaa hiatema tuqo. Nkye nanrianra nanrianra mwutukya vahirata variqita quate.

### *Mwatani varihua nkyi nramwutaqa hivarave tura*

<sup>18</sup> Mwatani varihua nkyi nramwutaqa hivera, nkye ntapihiate, mwihua ni nraante nramwutaaqama taahuara titama, nkyivata nramwutaqa hivarave.

<sup>19</sup> Nkye mwata mwainyaahua varivatavauma mwihua nkyiara tiri nramwunaahuave tiqata nkyiara mwutukya vahirata varivarave. Nte mwatani variahuaqitaina nkyi nyaanrama kyauqata nkye hia mwihuaniqama variavo. Nkye hia mi-huaniqama variarara titama, mwihua nkyi nramwutaqa hi variavo.

<sup>20</sup> Nte vaakya timwa nyunranra riaate. Hia kyaiqa vaisivanto nai nronra vaisi nraatara kyairave. Mwatani variahua ni uaqama matehuara tita, mwihua nkyivata uaqama nyatevarave. Mwihua ni qua riehuavauma nkyi quavata rievarave.

<sup>21</sup> Nkye ni nraaqiara variavatara tita, mwihua mwia kyaara nkyivata qoraqama nyatevarave. Ni titaira hia ntapihiahua tita, mwihua mwitaa hivarave.

<sup>22</sup> Nte hia tumu mwihua timwa nyutirio, mwihua qora kyaiqa utuarara hiama qua vahitirio. Nte tumu mwihua timwa nyunranra tiro, mwiaqatairo mwihua qaqa hia mwia riaunanrave ti quava hiama vahiananrove.

<sup>23</sup> Vaisivanto ni nramwutaqa hiqaro ni koravata nramwutaqa hiananrove.

<sup>24</sup> Mpo kyaiqa mpo kyaiqa hia mwihua qio varaa kyaiqara nte mwi kyaiqara mwihua suqaa variqana vare varuvave. Hia nte mwitaa hutirio, hiama mwihuqaqua qua vahitirio. Mwihua ni kyaiqa taqeta ni qaqlira kyeta nivata ni koravata nramwutaqa hiavo.

<sup>25</sup> Mwihua mwitaama variavaro qua mpo haaru qumina vakya qara ntumwa tova mate ntapihi kyero mwivauma viho. Mwi quava mwitaama tiro:  
Hia mpo quavata vahirata quminaqama kyeta  
mwihua ni nramwutaqa hivarave, turave.

*(Ihi 35:19)*

<sup>26</sup> Qio nkyi kyaahaqa hiariva mpovanto tumuananrove. Mwiva Kotira mwanraqravanto qutaa qua nraahu ti variva, mwiva Kotiva hinasairo tumuananrove. Nte mwia ntena koraqaataina titaairo mwiva tumu variqaro nianra ntapihi kyero nkyi timwa nyiananrove.

<sup>27</sup> Nkyevata vuni nivatama kyeta variqi quahuara tita, nkye qioma ni kyaiqa okyarara mpo mwatanaa mpo mwatanaahua timwa nyivarave.

## 16

<sup>1</sup> Nkye nraakiara pupohairata ni qua qaqlira kyevo tina, nte mwi quara mwi quara nkyi timwa nyuqo.

<sup>2</sup> Nraakiara mwihua nkyi inronra hiqata mwaanra nraamwuqitaita nkyi raaqu kyeverave. Mpo enta nrintairata mwihua nkyi ru kyeta tiqata, Tire Kotira kyaiqama vare varuro, tivarave.

<sup>3</sup> Mwihua nianravata ni koraravata hia ntapihi kyeta riaahuara tita, mwihua mwitaa hivarave.

<sup>4</sup> Nte mwaa entara nraakiara nkyi uaqlama nyaterara timwa nyuqo. Nraakiara mwihua mwitaa mwitaa hivata nkye mwi entara nte mate mwaa quara turara nraato tuate. Tauraa nte nkyivata variqananra tina, hia nte mwi quara mwi quara nkyi timwa nyunrave.

### *Kotira mwanraqura kyaiqara Iesusiva tura*

<sup>5</sup> Qio nte pataqia vari kyena ni titava hinani virerave. Qio nte mwini virerana uti varuqaro hiama nkyiqitairo mpovanto tiqaro, E taini virerarave hiaro? tiho.

<sup>6</sup> Nte vaakya turara nkye rie variavaro nkyi mwutukyavanto uaqla ihata variavo.

<sup>7</sup> Qio nte qutaama tuqo. Nte hia quariro nkyi kyaahaqa hiariva hia qio tumuananrove. Nte quariva qioma uro mwia titaariro nkye hinani tumuananrove.

<sup>8</sup> Kotira mwanraquravanto tumu variqaro mwiva mwatani varihua taarampo inraikyara nyaamwutaananrove:

(1) mwihua uaqla hi kyaiqarave

(2) kyuqe kyaiqa okyararave

(3) Kotiva ko qiani okyararave

<sup>9</sup> (1) Mwihua uaqla hi kyaiqara:

Mwatani varihua hia nianra qutaa mwivave tihuara tita, mwihua uaqla hi kyaiqara utira mwiva nyaamwu taananrove.

<sup>10</sup> (2) Kyuqe kyaiqa okyara:

Nte ntene kova hinani quarita nkye hia qaiqaa ni taquerara tiro, mwiva variqaro kyuqe kyaiqa okyara nkyi nyaamwu taananrove.

<sup>11</sup> (3) Kotiva ko qiani okyarara:

Mwaa mwataraqaa ntaqikyi variva Saataaniva ko hia nraatara kyairara tiro, mwiva Kotiva ko qiani okyarara mwatani varihua nyaamwu taananrove.

(Kotira mwanraquravanto mwitaama timwa nyiananrove.)

<sup>12</sup> Nte mpo qua mpo qua nkyi timwa nyianriva vahata nkye hia ekyaa mwi quarara qioqa hiavananra tina, mate nte hia mwi quara nkyi timwa nyinrenrave.

<sup>13</sup> Qutaa qua nraahu ti variari mwanraqurava tumu ntero, mwiva variqaro nkyi sita varero nkyi kyuqe aanra nyaamwu teqaro qutaa qua okyara ekyaa mwi okyarara nkyi timwa nyiananrove. Mwiva hia nai vu nraato tuani quarara tiraitiro, mwiva riaani quara nraahuma timwa nyiananrove. Nraakiara mwi inraikyava mwitaa mwitaama qovara hiani inraikyara mwiva nkyi timwa nyiananrove.

<sup>14</sup> Mwiva nte qua qianinra mwi quara nkyi timwa nyianinranra tiro, ni nutuvanto nronraqa hiananrove.

<sup>15</sup> Ekyaa ni kova hi inraikyava nini vahirara tina, nte vaakya tiqana, Kotira mwanraqura mwiva nte hu inraikyara riero vara kyero nkyi timwa nyiananrove, turave.

<sup>16</sup> Qio pataqia nkye varita hia ni taqevarave. Mwiaqaataita pataqia nkye varita qaiqaa ni taqevarave, tiro.

*Nkyi mwutukyavanto uaqia hirata variqita vivaro mwiaqaatairo nkyi mwutukyavanto kyuqema vahirata varivarave, tura*

<sup>17</sup> Iesusiva mwitaa tuvata mwia nraaqiara mponramwuvanto nai timwa mwi nai timwa mwi hita tiqata, Mwiva nanra quave tiho? Mwiva tiqaro, Pataqia nkye varita hia ni taqevarave, timwa kyero qaiqaa tiqaro, Nkye vari kyeta ni qaiqaa taqevarave, tiho. Mwiva mwitaa timwa kyero nai qova hinani quaninranravata tiho.

<sup>18</sup> Mwiva nkye pataqia vari kyetave ti quara, hia tire mwi quara ntapihi riauro, tita.

<sup>19</sup> Mwitaa ti varuvaro Iesusiva ntapihi kyovata mwihua mwi quarara mwia kyapara hirerata uti varuvaro Iesusiva tiqaro, Nte vaakya turara nkye pataqia varita hia ni taqevarave mwiaqaataita pataqia varita qaiqaa ni taqevarave turave. Nkye mwi quararave nai kyapara hi nai kyapara hi variavo?

<sup>20</sup> Qio nte qutaa qianinra riaate. Nkye ntateqata atura ntiqa variqi vivata mwatani varihua qamwateqata varivarave. Nkyi mwutukyavanto uaqia hirata variqita vivaro mwiaqaatairo nkyi mwutukyavanto kyuqema vahirata varivarave.

<sup>21</sup> Nraakyevanto nraaqiara mwataariva qaumato vaiharora tiro, mwiva atura ntirave. Qio mwi nraakyeva nraaqiara mwata kyero mwiaqaatairo tiqaro, Nte nraaqiara mwata kyauquo, timwa kyero qamwateqaro nai atura ntirara taunru kyairave.

<sup>22</sup> Nkyevata mwitaa hivarave. Mwaa entara nkyi mwutukyavanto uaqia hirata varivarave. Qio nraakiara nte nkyi uro taqaariro nkyi mwutukyavanto kyuqe hirata qio varivarave. Varivaro mpovanto hia qio nkyi qoraqama nyatairaro nkyi mwutukyavanto uaqia hiananrove.

<sup>23</sup> Mwitaa hirata mwi entara nkye mpo inraikyara ni kyapara hiva hiama vahiananrove. Nte qutaa tuqo. Mwi entara nkye ni korara mpo inraikya mpo inraikyara mwia kyapara hivaro mwiva ni kyaiqarave, ni nutuarave, rieqaroma nkyi nyiananrove.

<sup>24</sup> Tauraa nkye variqata hia ni kyaiqarave ni nutuarave rieqata ni kora kyapara hiarave. Mwaa entaraqaataita nkye ni kora kyapara hivaro nkyi mwutukyavanto kyuqe hiarive tiro, nkyi nyiananrove.

*Iesusiva mwata mwaaqaanaa okyara nraatara kyairave tura*

<sup>25</sup> Nte mpo quaqaa ntumwa kyeqana mpo qua mpo qua nkyi timwa nyunrave. Qio mpo enta nri ntairaqe nte hia mpo quaqaa ntumwa kyena nkyi timwa nyinraitina, mwi entara nte ntena korara nkyi timwa nyinrenra nte vutu kyenama nkyi timwa nyianinrave.

<sup>26</sup> Mwi entava nri ntairata qioma nkye ni nutu nteqata ni korara kyapara hivaro nkyi nyiananrove. Hia nte nkyiara rieqana ntena kora kyapara hianinrave. (Nkyetavanto qio mwia kyapara hivarave.)

<sup>27</sup> Ni kova nkyiara mwutukya ntiharo varirara tita, nkyetavanto qioma mwia kyapara hivaro nkyi nyiananrove. Nkye nianra tiqata, E Kotiva hinasaира tumuanravave, qiavaro nkyi mwutukyavanto nianra vaihata variarara tiro, ni kora mwutukyavantovata nkyiara vaihoro variho.

<sup>28</sup> Nte ntena kova hinasaира mwatani tumuvave. Nte qaumama mwaa mwatara mwaini kyena ntena kova hira qoqaraanani quaninrave, tiro.

<sup>29</sup> Mwitaa tuvata mwia nraaqiaranramwuvanto qiove tita, Mate e hia mpo quaqaa ntumwa kyera tiraitira, e vutu kyera tiri timwa timwi variaro.

<sup>30</sup> Mate tire ntapihi kyaurara e ekyaa inraikya ntapihi kyaarava variarata tire hiama i qaiqaa kyapara hiananrave. Mate tire tiqata, Qutaama e Kotiva hinasaира tumuanravave turo, tita.

<sup>31</sup> Mwitaa tuvaro Iesusiva tiqaro, Qio mateve nkye ni okyarara ntapihiavo?

<sup>32</sup> Mpo enta nrianriva qaumatoma vaiho. Mwi entaraqa nkyi vara aanraupima kyaivata nkye mponamate nkyeta mwaatani vivu kyaavuma vivarave. Ni kova nivatama kyero varirara tina, nte mwi entaraqa ntenanraa hiama ntenanraa varianinrave.

<sup>33</sup> Nkye nivata varivaro nkyi mwutukya qihaakyama vahiarive tina, nte mwaa quara nkyi timwa nyuqo. Nkye mwatani varivata mwihua nkyi uaqama nyatevarave. Qio kepukyaqama kyeta variate. Nte mwatanyaa okyara nraatara kyaurave, tiro. Iesusiva turama.

## 17

### *Iesusiva Kotirara aakyara nteqaro tura*

<sup>1</sup> Iesusiva mwi quara timwa kyero mwiva nyaamwuni taqebaro Kotirara aakyara ntero tiqaro, Ko, mate mwaa ni iherama nri ntaiho. Qio e ni peqa okyara qovarama matairaqe nte i mwaaquvanto variqana nte ina peqa okyara nyaamwutaankye.

<sup>2</sup> E nraakye qora ni mpiarahua nte mwihua kyaahaqamaqina quarita mwihua ekyaa enta qati variqita quate tira, e ni nronraqama kyaarana nte ekyaa nraakye qoraqaa ntaqikyi variqana nte mwihua nronravanto varuqo.

<sup>3</sup> Nraakye qora ekyaa enta qati variqi vi okyarava mwataamama vahiro: Nraakye qora iara ntapihi kye rieta tiqata, Kotiva nraahuma qutaa mwanriqa kuaiqiavantu variqaro Iesusi Karaisira titairave, tihua, mwihua mwi okyarara varevara.

<sup>4</sup> Nte mwatani variqi vina i peqa okyara nraakye qora nyaamwuteqana e kyaiqa mpiananra vara taiqa kyauqo.

<sup>5</sup> Qio ko, haaru hia mwaa mwatavavata vahu entara nte ivata variqi quavaro ni peqa okyaravanto vahurave. Qio mate e ni peqa okyara mwia nyaamwutairata mwihua taqaate.

<sup>6</sup> Mwatanyaa vaisinramwu ni mpiarahua nte mwihua i okyara nyaamwutaurave. Mwi vaisihua ena hiaragua ena mwihua ni mpiarata mwihua variqata i qua riemwaqita quavo.

<sup>7-8</sup> E qua ni timwa mpiananra nte mwihua timwa nyuqata mwihua mwi quara varaarave. Mwihua ntapihi kyaavana nte qutaa e hiananrasaina tumuqata mwihua nianra qutaa Kotiva mwia titairave qiarave. Mwitaa tiqatara tita, mwihua ntapihi kyeta riaavaro e ekyaa inraikya ni mpiarava mwi inraikyava e hiananrasairo tumirave.

<sup>9</sup> Qio nte mwihuara rieqanama iara aakyara nte varuqo. Hiama nte ekyaa nraakye qora mwatani variahura aakyara nte varuqo. E nraakye qora ni mpiarata mwihua ini variarara tinama, nte mwihuara rieqanama iara aakyara nte varuqo.

<sup>10</sup> Nte uhua e hiarahuama variavo. E hiaragua nte uhuama variavo. Mwihua variqata ni peqa okyara mpo hiahua nyaamwute variavo.

<sup>11</sup> Nte hia mwaa mwataraqaa variarita mwihuama mwaa mwataraqaa varivarave. Nte e hiananrani virerave. Qio ko, e kyotataqama kyera variaravave. E ena kepukya nrutu ni mpiananra mwi kepukyaraqotaira mwihua antuaraqira virata mwihua tiretana kuaaqi varurantema kyeta mwihuavata variate.

<sup>12</sup> Nte mwihua kyapata variqana e ena kepukya nrutu ni mpiananra mwi kepukyaraqotaina mwihua antuaraqina vuqata hia mwihuagita mpoqiavantovata raupirima viho. Vaisi kuaiqiavantu nraahu raupirima viho. Mwiva raupirima quaniranra haaru qati vakya mpovanto mwianra qara ntumwa tero mwitaa hiananrove turaqaara tiro, mwate mwitaama viho.

<sup>13</sup> Qio nte ivata varirerana virera uti varuqo. Ni mutukyavanto qamwatero kyuqe hintema kyero mwihua mwutukyavantovata qamwatero kyuqe hiarive tina, nte mwata mwaini variqana mwaa quara mwitaa tuqo.

<sup>14</sup> Nte i qua mwihua timwa nyuqata mwihua mwatani variahua nrohia aanranra qaqlira kyeta mwihua nte hia mwata mwaaqaanaava varuntema kyeta mwihuavata hiama mwata mwaaqaanaahua variavo. Mwitaama variavatara tita, mwatani variahua mwihua nramwutaqa hi variavo.

<sup>15</sup> Qio nte hia mwata mwaaqaataira mwihua sitaantera i kyapara huqo. Qaqao, nte iara tiqana, E mwihuaqaa ntaqikyiqira viraro uaquia hi vaisiva hia mwihua uaqiamma nyataarive, tuquo.

<sup>16</sup> Nte hia mwata mwaaqaanaava varuntema kyeta mwihuavata hiama mwata mwaaqaanaahua variavo.

<sup>17</sup> E qutaa quaqtaira mwihua kyaahaqa hirata mwihua i aanraqaa nraahu nrohiate. I qua qutaa quama vaiho.

<sup>18</sup> E ni mwata mwaini titaarana tumuntema kyena, ntevata mwihua mpo mwata mpo mwatani sitarerave.

<sup>19</sup> Qio nte mwihuara rieqana kuaa kyaiqa nraahu vararerana varuvave. (Nte mwihuara rieqana qutu quataa hiraqe qutu virerana varuqo.) Nte mwitaa hiarita mwihua qutaaqama i nraaqiara variqata i aanraqaa nraahu vivarave.

<sup>20</sup> Hia nte mwihuara nraahu rieqana iara aakyara ntauqo. Nraakiara mpo ihua mwihua qua rieqatama nianra qutaa mwivave tihua, nte mwihuavarata rieqanama iara aakyara ntauqo.

<sup>21</sup> Mwihua kuaaqi variate tina, nte iara aakyara ntauqo. E niqi variarana nte iq'i varuqo. Ko, mwihua tiritana votima kyeta variate tira, e mwihua kyaahaqa hirata mwihuavata tiritanaqi variate. Mwatani varihua nianra qutaa Kotiva mwia titavate qiate tira, e ni nraaqiaranramwu kyaahaqa hirata mwihua kuaaqi variate.

<sup>22</sup> E ni nutu nronraqama kyaarana nte kuaaqarama kyena mwihua nyutu nronraqama kyauqo. Mwihua tiretana kuaaqi varurantem akye mwihuavata kuaaqi variate tina, nte mwihua nyutu nronraqama kyauqo.

<sup>23</sup> E niqi variraqe nte mwihuaqi variarita mwihua kuaaqi variqatama mpoqiyavata kyaakueqa hivarave. Mwihua mwitaama varivata qati nraakye qora mwatani varihua e ni titaanranra ntapihita i mwutukyavanto nianra vahintema kyero i mwutukyavanto ni nraaqiaranramwuanravata vahianinravata taqevarave.

<sup>24</sup> Ko, haaru hia mwaa mwatava vahu entara e nianra mwutukya vahuvrara tira, e ni nronraqama kyoraro e ni nronraqama kyoraro ni okyara kepukya okyaravanto vahuvana variavarave. E nraakye qora ni mpiaragua mwihuavata ni peqa okyara taqaate tina, nte tiqana, Nte varianinrani mwihuavata varivarave, tuquo.

<sup>25</sup> Ko, e avuqavuma kyera variaravave. Qati nraakye qora mwatani variahua hia i ntapihi kyaavana nte nraahu i ntapihi kyaurave. E ni titaanranra mwaa nraaqiaranramwuhua nraahu mwia ntapihi kyaarave.

<sup>26</sup> Nte iara mwihua timwa nyuqata mwihua i ntapihi kyaarave. I mwutukyavanto nianra vahintema kyeta mwihuavata mpohuara mwutukya vahirata varivaqe nte mwihuavata kuaaqi variqina quankye tina, nte mwihua iara mpoqiyavata timwa nyiqi quarita mwihua ntapihi rievarave, tiro. Iesusiva nai qorara aakyara nteqaro mwitaa tura.

## 18

*Iesusira ntavaaqavu kyora*

(Matiu 26:47-56; Maaki 14:43-50; Ruku 22:47-53)

<sup>1</sup> Iesusiva mwitaama kyero Kotirara aakyara timwa taiqa kyero mwiva nai nraaqiaranramwu vatama kyero vuva uro Kitaroni pata nramanriqiaru qarero oripi kyatari kyaqamwa tutoraqi vura.

<sup>2</sup> Iesusiva airi enta nai nraaqiaranramwu kyapata mwipi uro varurara tiro, Iutaasiva Iesusira nramwutaahua kyauquqi kyaariva mwia ntapihi kyora.

<sup>3</sup> Iutaasiva ntapihi kyero uro Kotira kyaiqa vara mwate varu vaisihua mwihua nronra vaisinramwuvata, Parisi vaisinramwuvata, timwa nyuvata mwihua kaman-inra porisinramwu Iutaasira mwita kyaiqa vaisinramwuvata mwia mwuvaro Iutaasiva mwihua sita varero vura. Mwihua omwavata ramuvata qupi kye vareta ntaqi inraikyaravata vareta vuahua uro Jesusiva hunani uro ntora.

<sup>4</sup> Mwini uro ntovaro Jesusiva vaakya mwihua uti inraikyara ntapihi kyero mwiva vutu ntero mwihua kyapara hiro tiqaro, Nkye tararave puua hi variavo? tiro.

<sup>5</sup> Mwitaa tuvata mwihua tiqata, Tire Jesusira Nasaretinyaanranra puua hi varuro, tuvaro Jesusiva mwihua timwa nyinro tiqaro, Nte mwaa mwivama varuqo, tiro. Mwitaa tuvaro Iutaasiva Jesusira nramwutaa kyauquqi kyaari vaisiva, mwiva Jesusira rukyehua kyapata siviro varura.

<sup>6</sup> Jesusiva nte mwaa mwivave tuvata mwihua nrihanrama vita uro ntanteta aatuma kyeta mwatasata tuto ntita varura.

<sup>7</sup> Mwitaa huvaro Jesusiva qaiqaa mwihua kyapara hiro tiqaro, Nkye tararave puua hi variavo? tuvata mwihua qaiqaa tiqata, Jesusira Nasaretinyaanranrave, tuvaro

<sup>8</sup> Jesusiva tiqaro, Nte vaakya nkyi timwa nyunrave. Nte mwaa mwivama varuqo. Nkye nianra puua hirerata nrivera, mwaa vaisinramwuhua qati kyaivata quate, tiro.

<sup>9</sup> Vuni Jesusiva nai qorara mwitaama tiro: Vaisi mponramwu ni mpiarahua hia nte mpoku raupirima kyauqo, tura. Mwi quava quataa mwivau vahiarive tiro, Jesusiva tiqaro, Mwi vaisinramwuhua qati kyaivata quate, tiro.

<sup>10</sup> Mwitaa tuvaro Pitaava nai paipanta varero nrunra veva ntanrau kyero mwiaqo-tairo Kotira kyaiqa vara mwate varu vaisihua mwihua vunyaa vaisi, mwia kyaiqa vaisi nraato kyaatutani vahura teqa kyora. Kyaiqa vaisi mwia nrutu Marakusira.

<sup>11</sup> Pitaava mwia nraato teqa kyovaro Jesusiva Pitaarara tiqaro, Ena paipa vara veva nai tuaqi hu taante. Ni kova nramanri ni mpianinra hia nivanto nraanrive tirave mwitaa hiaro? tiro. (Jesusiva nramanriqaa ntumwa kyero nai ntuqutivarо nriqa quani inraikyara varero uro qutu quaninranra tura.)

### *Jesusira vitaqita uro Anaasiva hunani kyora*

<sup>12</sup> Jesusiva mwitaa tuvata Romeninyaahua ntaqu vaisihua nkyiari qiata vaisi vatama kyeta nruvata Iutaa porisinramwuantovata nri nteta Jesusira ntavaaqavu kyeta mwia rupa kyeta

<sup>13</sup> mwia vitaqita Anaasiva hunani nraante kyora. Anaasiva mwiva Kaiapaasira nrin-raamwiva varuvaro Kaiapaasiva nronraqama vuva mwi ihiraqi Kotira nraamwuqi Kotira kyaiqa vara mwate varu vaisihuaqaa ntaqikyiqaro qiata vaisivanto varura.

<sup>14</sup> Tauraa Kaiapaasiva nai Iutaa kaanasori vaisi timwa nyinro tiqaro, Tiri kyaahaqa hirero vaisi kuaikuvanto qutu viraro kyue hiananrove, tu vaisiva varurama.

### *Pitaava Jesusirara hia nte mwia taqaurave tura*

*(Matiu 26:69-70; Maaki 14:66-68; Ruku 22:55-57)*

<sup>15</sup> Jesusira Anaasiva hunani vitaqita uro kyovata Saimoni Pitaavavata Jesusira nraaqiara mpovantovata Jesusira vataqita vura. Anaasiva Pitaara vatama kyero nru vaisira ntapihi kyovara tiro, mwiva Jesusira vataqiro viqaro Anaasira mwaata mwatukya utaqi viqetora.

<sup>16</sup> Pitaava mwaqaqani varuvaro Jesusira nraaqiara Anaasiva ntapihi kyo vaisiva mwatukya utaqi vuva uro ntantero nrumu quesana ntaqikyi varu nraakyera timwa mwitero uro Pitaara vitaqiro nrumu utaqi vera kyora.

<sup>17</sup> Utaqi kyovaro Pitaava varuvaro nraakyre qesaqaa ntaqikyi varuva mwiva tiqaro, Evata mwi vaisira nraaqiarave variaro? tuvaro Pitaava qaqao, Nte hiave, tiro.

<sup>18</sup> Timwa kyero varuvata porisinramwuvantovata Anaasira kyaiqa vaisinramwuvantovata varuvaro antovata mwihua qia quarateta qia taare varuvaro Pitaavavata mwini uro variqaro qia taare varura.

*Anaasiva Iesusira kyaparama mwatora*  
(Matiu 26:59-66; Maaki 14:55-64; Ruku 22:66-71)

<sup>19</sup> Mwiaqaatai Iesusira vitaqita mpoqi uro kyovaro Kotira kyaiqa vara mwate varu vaisihua mwihua vunyaa vaisivanto Iesusira nai nraaqiarara kyapara hiro Iesusiva nraakye qora timwa nyu quararavata kyapara huvaro

<sup>20</sup> Iesusiva nai timwa mwinro tiqaro, Nte qoqaa variqana nraakye qora qua timwa nyunrave. Nte ekyaa enta nraakye qora timwa nyinrenrana Iutaavanto ntuvantuama vita variaraqive, mwaanra nraamwuqive, Kotira nraamwu nronraqive, variqana nte mwihua qua timwa nyunrave. Hia nte uqeta kyena variqana mwihua qua timwa nyunrave.

<sup>21</sup> Qio nanraqamave e ni kyapara hi variaro? E ni qua riaahua kyapara hiataarave. Nte qua timwa nyuhua kyapara hiante. Mwihua nte tu quara riaahuave, tiro.

<sup>22</sup> Iesusiva mwitaa tuvaro porisi vaisi mpovanto mwiqi varuva Iesusira nraatokyai ntuteqa kyero tiqaro, E hia mwitaama kyera tiri nronra vaisiara qua qiante, tiro.

<sup>23</sup> Mwitaa tuvaro Iesusiva mwia timwa mwinro tiqaro, Ni quavanto api qua vahiravauma e ekyaa nraakye qora mwianra timwa nyinrata rievarave. Ni quavanto qio vahara e nanraqamave ni qumina ntutuqitira hiaro? tiro.

<sup>24</sup> Iesusiva mwitaa timwa kyero mwia kyaantaqotaita rupatova varuvaro Anaasiva mwia titovaro Kotira nraamwuqaa ntaqikyi varu vaisira Kaiapaasiva hunani viro.

*Pitaava qaiqaa hia Iesusira taqaurave tura*  
(Matiu 26:71-75; Maaki 14:69-72; Ruku 22:58-62)

<sup>25</sup> Iesusiva mwini vuvaro Pitaava mpoqi variqaro qia taare varuvata mwini varuhua mwia kyapara hita tiqata, Evata mwia nraaqiarave variaro? tuvaro Pitaava qaqao, Nte hiave, tiro.

<sup>26</sup> Mwitaa tuvaro vaisi mpo qiata vaisi kyaiqa vaisivanto Pitaava mwia nraato teqa kyora mwia hena vaisivanto Pitaarara tiqaro, Qutaa eve nte taqauqara mwikyantiri kyatari kyaqamwaqi variaro? tiro.

<sup>27</sup> Tuvaro Pitaava qaiqaa qaqao nraahu tiro. Mwitaa timwa kyero riovaro qamwanrama kyero kokoraaravanto nruqua tura.

*Iesusira Paireativa hunani vitaqita uro kyora*  
(Matiu 27:1-2, 11-14; Maaki 15:1-5; Ruku 23:1-5)

<sup>28</sup> Mwihua Kaiapaasira mwini kyeta Iesusira vita vare uro nronra vaisi kamaninra nraamwuqi kyora. Mwihua vaakya toqaqi mwini uro nteta mwihua Iutaavantora tita, hia mwia nraamwuqi vera ntaraitita, mwaatani varura. Mwihua nkyiari tiqata, Tire mwia mpo mwatanaanra nraamwu hia kyotataqi vera nteta uaqjama vita mwia kyaara tire hiama vekyahu nyato entaraqaa omwata qio nraananrave, tita.

<sup>29</sup> Mwitaa timwa kyeta mwihua mwaatani varuvaro Paireativa kamaninra qiata vaisivanto mwihua taqarerero veva ntero mwihuara tiqaro, Nanra qua mwaa vaisiraqaa vaihatave qiaovo? tiro.

<sup>30</sup> Paireativa mwitaa tuvata mwihua tiqata, Mwi vaisiva hia uaqia hi kyaiqara uititirio, tire hiama qio e hiananrani mwia vite nrunratirio, tita.

<sup>31</sup> Mwihua mwitaa tuvaro Paireativa qaqao tiro, Nkyeta mwaa mwi vaisira viteta nkyeta Iutaa ko quaqaa rieqatama mwia ko qiate, tiro. Paireativa mwitaa tuvata Iutaa mwihua tiqata, Qaqao, tire qumina vaisi variqata vaisi ru kyaananranra qua varaarorave. (Ena kamaniva variqara qioma tirata mwia ru kyevarave), tita.

<sup>32</sup> Mwihua mwitaa tuvaro Jesusiva mwihua mwitaama kyeta ni ru kyevavarave tu quava qutaa mwivau vhura.

<sup>33</sup> Iutaa vaisi nronranramwuvanto mwitaa tuvaro Paireatativa nai nraamwu kaman-inra nraamwuqi vera ntero Jesusira nraanrama kyovaro mwipi vuvaro mwia kyapara hiro tiqaro, Qutaa e Iutaaqaa ntaqikyi variaravave? tiro.

<sup>34</sup> Tuvaro Jesusiva tiqaro, Ena nraato tukyerave mwi quara qiaro? Vaisi mpovanto nianra i timwa mwihanrave e mwitaa qiaro? tiro.

<sup>35</sup> Jesusiva mwitaa tuvaro Paireatativa tiqaro, Nte Iutaa vaisive huqo? Nte hia Iutaa vaisive. Ina nramwunaa Iutaavantovata, Kotira kyaiqa vara mwate varia vaisihua mwihua nronra vaisinramwuvata, mwihuama i viteta mwaini nriavo. E nataama kyaaratave i viteta nriavo? tiro.

<sup>36</sup> Mwitaa tuvaro Jesusiva tiqaro, Nte ntaqikyiariva hiama mwaa mwataraqaa vaiho. Mwiva mwaa mwataraqaa vahitirio, Iutaavanto ni rupevo titi ni kyaara ni pataqi nrihua mwihuavata ntaquatirio. Qio nte ntaqikyiariva hiama mwatani vaiho, tiro.

<sup>37</sup> Jesusiva mwitaa tuvaro Paireatativa tiqaro, Qio qutaa e nraakye qoraqaa ntaqikyi variaravave? tiro. Tuvaro Jesusiva tiqaro, Qutaa nte nraakye qoraqaa ntaqikyi varuvave. Mwianra rieqaro ni mwatani mwatataihana nruvave. Qutaa qua okyara nraakye qora timwa nyinrenrana nte mwatani tumuvave. Qutaa quara riaariva ni quama riaananrove, tiro.

<sup>38</sup> Jesusiva mwitaa tuvaro Paireatativa tiqaro, Qutaa qua vahirero mwia nanra quave iho? tiro.

### *Paireatativa Jesusira kyatariqaa rutaate tura*

(Matiu 27:15-31; Maaki 15:6-20; Ruku 23:13-25)

Paireatativa mwitaa timwa kyero veva ntero Iutaa ntuvantuama vita varuhua timwa nyinro tiqaro, Nte taqauqaro hia mwia rukyaarava mpo okyara mwiaqi vaiho, tiro.

<sup>39</sup> Mwitaa timwa kyero mwiva tiqaro, Qio nkye mpo inraikya utuava mwitaamama vaiho. Nkye vekyahu nyato kyarara omwata nraa entaraqaa nte karavu vaisi kuaiku nkyiara rieqanama mwia huvantu nyataurave. Qiove nte mwianra rieqana nkyi Iutaaqaa ntaqikyi vari vaisira huvantu nyataaninrave? tiro.

<sup>40</sup> Mwitaa tuvata mwihua aakyara ntamwakye nai timwa mwita tiqata, Qaqao, hia mwi vaisira huvantu kyaante. Vaisi mpo mwia nrutu Varavaasira mwia huvantu timwataante, tura. Qio Varavaasiva vaisi ru kyeqaro mwihua munima vare varu vaisiva varura.

## 19

<sup>1</sup> Mwihua mwitaa tuvaro qaiqaa Paireatativa tiqaro, Jesusira viteta uro kyaantaqo mwia ntuteqaate, tuvata mwia kyaantaqo ntuteqaateqama kye vatora.

<sup>2</sup> Mwitaama kye vateta Paireatira ntaqu vaisihua uro tauvera vara kyeta qiaata vaisi tovaqa voti hora ququrama kyeta mwia qiaqaa qu mwateta nraanre tavuna vara utu mwateta,

<sup>3</sup> mwihua mwiva varunani uro nteta mwihua vireraqama kye Jesusirara tiqata, Iutaa vunyaa vaisi mwaavao, variqarave? timwa kyeta kyauquqo mwia viri ntuteqa kyora.

<sup>4</sup> Mwihua mwia mwitaama kyovaro Paireatativa qaiqaa veva ntero Iutaa ntuvantuama vita varuhuara tiqaro, Qio taqaate. Nte taqauqaro hia mwiva uaqia hi kyaiqara utihana nte mwiaqa qua vataariva hiama vahirove. Nkyevata mwia taqe ntapihi kyaate tina, nte mwia vara veva kyarerave, tiro.

<sup>5</sup> Mwitaa tuvaro Jesusiva qiaqaa tauvera qu mwateta nraanre tavuna utu mwatora rirante veva ntovaro Paireatativa tiqaro, Qio taqaate, mwaa mwi vaisivave, tiro.

<sup>6</sup> Mwitaa tuvata Kotira nraamwuqi Kotira kyaiqa vara mwate varu vaisihua mwihua nronra vaisinramwuvata, porisinramwuvata, Jesusira taqeta mwihua aakyara nteta tiqata, Kyatariqaa mwia hiritaate. Kyatariqaa mwia hiritaate, tita.

Mwitaa tuvaro Paireativa tiqaro, Nkyeta mwia vitaqita uro kyatariqaa hiritaate. Nte taqauqaro hia mwiva uaquia hi kyaiqara utihana nte mwiaqua qua vataariva hiama vahirove.

<sup>7</sup> Tuvata mwihua tiqata, Qaqao, mwiva tire qao timwa tauna quara mpo nteqa kyairave. Mwia kyaara mwiva qutu quarivama variho. Mwiva tiqaro, Nte Kotira mwaaqvantove tirave, tita.

<sup>8</sup> Mwitaa tuvaro Paireativa mwi quara riero mpoqavata aatu hiro

<sup>9</sup> mwiva tumu ntantero nai nraamwuqi vera ntero Jesusira kyapara hiro tiqaro, E tainyaavave? tiro. Tuvaro Jesusiva hia qua tiraitiro, tirema varura.

<sup>10</sup> Tirema varuvaro Paireativa tiqaro, E nive hia qua timwa mpirera utuaro? E riaante. Nte nronravanto nte qioma i huvantu kyena, nte qioma qiarita i kyatariqaa hiritevarave, tiro.

<sup>11</sup> Mwitaa tuvaro Jesusiva Paireativa timwa mwinro tiqaro, Kotiva nyaamwuni variva hia i kyaakue mwitirio, hiama qio e ni naatara kyaaratirio. Vaisi mpovanto ni pitaqiro nrumu i mwi vaisira kyaiqavanto i uaquia hi kyaiqaravata nraatara kyaiho. Mwia kyaara mwi vaisiraqaa nronra quama vahiananrove, tiro.

<sup>12</sup> Jesusiva mwitaa tuvaro Paireativa mwiaqatairo Jesusira huvantu kyarerera uti varuvata Iutaa vaisinramwu ntuvantuama vita varuhua aakyara nteta tiqata, E mwia huvantu kyairaro qati virera, e hiama qiatu vaisi Sisaara toti varinanrave. Mpovanto nanrianra tiqaro nte qiatu vaisima varuqo qiariva, mwiva Sisaara nramwutaama variananrove, tita.

<sup>13</sup> Tuvaro Paireativa mwi quara riero uro Jesusira vitaqiro veva ntero ko riaa vaisihua taintaqaa uro mwatakyaa viro. Mwi taintava vahu mwatara nrutu nteqata, *Ori Ntamwatairave*, tura. Iutaa mwatanaahua quaqitai mwianra *Kapatave*, tura.

<sup>14</sup> Vekyahu nyato kyarara nro entava mwia qanranraa vahuvaro huari vu nrinro virini qiatuqaa vahuvaro Paireativa uro mwi taintaraqa mwatakyaa viro Iutaa ntuvantuama vita varuhua timwa nyinro tiqaro, Qio nkye nkyeta qiatu vaisi mwaa taqaate, tiro.

<sup>15</sup> Tuvata mwihua aakyara nteta tiqata, Mwia ru kyaante. Mwia ru kyaante. Mwia kyatariqaa hiritaivarо quatu quarive, tita.

Mwitaa tuvaro Paireativa mwihua kyapara hiro tiqaro, Nte qiarita nkyi qiatu vaisi kyatariqa ninriqo ru terara nkyi mwutukya vahirove iho? Mwitaa tuvata Kotira kyaiqa vara mwate varu vaisihua mwihua nronra vaisinramwu tiqata, (Mwiva hia tiri qiatu vaisive.) I nronravanto Sisaava mwiva nraahuma tiri qiatu vaisive, tita.

<sup>16</sup> Mwitaa tuvaro Paireativa Jesusira kyatariqa hiritaate tiro, mwihua kyauquqi kyora.

### *Iesusira ninriqotaita kyatariqaa rutora*

(*Matiu 27:32-44; Maaki 15:21-32; Ruku 23:26-43*)

Paireativa Jesusira mwihua nyuvata mwihua mwia viteta vuvaro

<sup>17</sup> Jesusiva nai hirite kyatarira vara qu varero vuvata mwihua Jesusira vita vareta mwaa quaraqitai *Qiata Mwukyaari* satave tunani vita. Iutaa mwatanaahua quaqitai *Korokotaave* tunani uro ntora.

<sup>18</sup> Uro nteta Jesusira kyuqu kyauqu kyatariqaa ninriqotaita rukyeta vara mwaamwi mwataqi rutora. Mwia rateta vaisi mpotanavata kyatariqaa ru kyeta hini hini ratovaro Jesusiva mwitanahua utaqa varura.

<sup>19</sup> Jesusira kyatariqaa hiritovaro Paireativa qua qara ntumwa tora uro Jesusira qiatani kyatariqaa rutora. Mwataama kyero qara ntumwa tero:

IESUSIVA NASARETINYAAVA IUTAA VUNYAA VAISIVE, tura.

<sup>20</sup> Iesusira kyatariqaa hiritova Ierusaremi nraaqani vahuvatara tita, mwi mwatanaahua airivanto nrumu Iesusira taqeta mwi quara kyaara ntumwa kyeta taqora. Mwi quara taara mpo quaqitairo qara ntumwa tora. Iutaa quaqitaivata, Romeni quaqitaivata, Kiriki quaqitaivata, qara ntumwa tora.

<sup>21</sup> Kotira nraamwuqaa ntaqikyu vaisihua mwi quara taqeta Paireaatirara qaqao tita, E hia mwianra Iutaa qiata vaisive timwa kyera qara ntuataarave. E mwataama kyera qara ntuataarave. Mwi vaisiva nai tiqaro nte Iutaa qiata vaisive tirave. Mwitaa timwa kyera qara ntuante, tita.

<sup>22</sup> Tuvaro Paireativa qaqao tiro, Nte qara ntumwa tauva qio mwitaama vahiarive, tura.

### *Iesusira tuavaaqa ntainra kyeta varora*

<sup>23</sup> Ntaqu vaisinramwuhua Iesusira kyatariqaa hiriteta mwiaqataita mwia tuavaaqa vara kyeta erahiamuaantema ntainra kyeta ntaqu vaisihua nkyiari erahiamuaantema variqara tita, mpovanto mpoqatairo varovaro mpovanto mpoqatairo varero mwitama kyeta vareta mwia siotivata vara kyeta taqovaro mpuahaanta virisairo mpiani tumitarova vahuvata ntaqu vaisinramwuhua tiqata, Hia mwaa nrabituare.

<sup>24</sup> Nrivaqe mwianra kaati voti hira santu ruararo tiriqitairo mpovanto mwia varaarive, tita. Mwitaa turara tiro, mpo quavanto haaru qumina vakya qara ntumwa tova qutaa mwivau vahura. Mwataama tiro:

Ni tuavaaqa ntainra kyeta varevarave.

Ni sioti mpuahaanta vararerata kaati ruantema kyetama  
varevarave, tiro. Mwitaa tura.

(Ihi 22:18)

Ntaqu vaisinramwuhua mwitaama kyeta Iesusira tuavaaqa ntainra kyeta varora.

### *Iesusiva nai nronranra tura*

<sup>25</sup> Iesusira kyatariqaa hiritovata nraakyenramwuvanto nrumu mwi kyatarira tataaqa sivita varura. Iesusira nrovavata, mwia nronra nrunravantovata, Kiropaasira nraata Mariaavavata, Mariaava Makataranyaavavata, mwinramwuhua Iesusira hirito kyatarira tataaqa sivita varuvaro

<sup>26</sup> Iesusiva taqovata mwia nrovavata mwia vataqiro nrohu vaisiva mpo Iesusiva mwianra mwutukya ntu vaisivavata varura. Mwitanahua varuvaro Iesusiva nai nronranra tiqaro,

<sup>27</sup> Mwaa nraakyevao, e mwi vaisirara ni maaque qiente, tiro. Timwa kyero nai vataqiro nrohu vaisira Iesusiva mwianra mpoqama kyero mwutukya ntu vaisirara tiqaro, Mwaa nraakyerara ni ntorave qiente, tiro. Mwitaa tuvaro mwi entaraqaatairo mwia vataqiro nrohu vaisiva Iesusira nronra vitaqiro nai nraamwuqi kyero kyuqema kyero mwiaqaa ntaqikyiqiro vura.

### *Iesusiva qutu vura*

(Matiu 27:45-56; Maaki 15:33-41; Ruku 23:44-49)

<sup>28</sup> Iesusiva mwi quara timwa kyero mwiva ntapihi kyovaro qio mwia kyaiqvanto taiqa vura. Mwiaqatairo mpo qua haaru qumina vakya mpukuqi qara ntumwa tova qutaa mwivau vahiarive tiro, mwiva tiqaro, Ni nramanri nraataa iho, tiro.

<sup>29</sup> Mwitaa tuvaro uaini ukavura tanuqi vahuvaro tavuna viti vara kyero nramanriqi ntamwa kyero kyaamwu vitiqaa rupa kyero viri Iesusira nroqi ntamwa tovaro

<sup>30</sup> Iesusiva ukavu nramanrinra mwia nrenro mwiaqatairo mwiva tiqaro, Qio taiqama viho, timwa kyero nru kinta tero nai mwanraqura titovaro vuvaro mwiva qutu viro.

### *Vaataaraqotairo Iesusira nraantera sata ra varora*

<sup>31</sup> Mwiva qutu vuvaro mwia qanranraa mwaanra enta vekyahu nyato kyarara nro entava nronra enta vahianinranra tita, Iutaavanto tiqata, Hura vaisinramwu qutu

quahua mwihua mwamwanta kyatariqaa vahiankyorave timwa kyeta, uro Paireati-rara tiqata, E tirata mwinramwuhua kyuqu ntuvuraa kyaivata mwinramwuhua qamwanrama qutu vivata varaqita uro quntaate, tita.

<sup>32</sup> Tuvaro Paireativa eo tuvata mwia ntaqu vaisinramwuhua nrumu Jesusira tataaqa hirito vaisira kyuqu ntuvuraa kyeta uro vaisi mpo hini hiritora kyuqu ntuvuraa kyeta

<sup>33</sup> uro Jesusira kyuquvata ntuvuraa kyaare tita, taqovaro mwiva vaakya qutu vuvata mwihua qaqlira kyeta hia mwia kyuqu ntuvuraaqura.

<sup>34</sup> Ntaqu vaisiva mpovanto uro vaataaraqotairo Jesusira nraantera sata ra varero. Ra kyovaro qamwanrama kyero nraanrevata qati nramanrivata tumunra.

<sup>35</sup> Qio nte mwaa quara qara ntumwa tauva mwi entara variqana nte mwi inraikyara mwi inraikyara taqaavarave. Qutaaqama kyena nte mwi inraikyara mwi inraikyara taqaavarave. Nkye mwi quarara qutaave qiate tina, nte mwi inraikyara qutaaqama kyena taqaurara nkyivata timwa nyuquo.

<sup>36</sup> Ntaqu vaisiva mwitaa hurara tiro, haaru qati vakya qara ntumwa to quava quataa mwivau vhura. Qara ntumwa tova mwataama tiro:

Mwihua hia mwia mwukyaari mpo ntuvuraa kyevrare, tura.

(*Ihi 34:20*)

<sup>37</sup> Qaiqaa mpo quavata haaru qara ntumwa tova tiqaro:  
Mwihua nkyiari vaataaraqotaita rute vaisira taqevrare, tura.

(*Sekaraiaa 12:10*)

### *Iesusira quntamwa tora*

(*Matiu 27:57-61; Maaki 15:42-47; Ruku 23:50-56*)

<sup>38</sup> Mwitaa huvaro vaisi mpovanto mwia nrutu Iosepiva mwiva Arimatianyaava mwiva tauraaqama Iutaa vaisinramwu nyaatu aatu hiqaro tuqeta kyeqaro Jesusira vataqiro nrohu vaisiva, mwiva uro ntero Paireatirara tiqaro, Jesusira mwamwanta mpiraqena varaqina quntaankye, tiro. Tuvaro Paireativa tiqaro, Qio uro vara kyera quntaante, tuvaro Iosepiva uro Jesusira mwamwanta itu kyero varora.

<sup>39</sup> Varovaro Nikotimaasiva, mwiva haaru entaqi Jesusira uro taqova, mwivavata kyuqe ueri kyuqe hu kyatariva mwunta vura kuaaqi tuqasaakye vatoravata varero. Mwia muaanravanto vahirero 30 kiro vhura varero Iosepikyantiri viro.

<sup>40</sup> Mwitanahua Jesusira mwamwanta vareta egarori tavuna vara kyeta kyuqe mwunta vura vatama kyeta mwia mwamwanta qapuqama kyora. Iutaa mwatanaahua vaisi quanto okyarava mwitaama vhurara tita, mwitanahua mwitaa hora.

<sup>41</sup> Jesusira hiritonani kyaqamwa tutova vahuvaro mwipi qaraakya ori vauru tora vaisi qunte varuva mpo vhura. Mwia qaraakya vahuvaro tauraa hia vaisi mpo mwipi quntora.

<sup>42</sup> Qio mwia qanranraa Iutaa mwatanaahua mwaanra enta vahiananrove timwa kyeta, mwi oriva qaumato vahuvata mwipi mwitanahua Jesusira uro quntamwa tora.

## 20

### *Iesusiva qati sivura*

(*Matiu 28:1-8; Maaki 16:1-8; Ruku 24:1-12*)

<sup>1</sup> Qio Saanteqa toqa entaqi qakyo qaatastarera huvaro Mariaava Makataranyaava Jesusira oriqi quntamwa toraqi uro ntero taqovaro orivanto qesa titatova qatinani vara kyovaro vahiro.

<sup>2</sup> Ori qatinani vara kyova vahuvaro mwi nraakyeva uro ntante hiantero Jesusira nraaqiaratana Saimoni Pitaavavata, mpo vaisi Iesusiva mwianra mpoqama kyero mwutukya ntu vaisivavata, varunani nri ntero mwitanahua timwa nyinro tiqaro, Mwihua oriqitaita Jesusira vara kyaavata tirenramwu hia mwia varaqita vataara taqauro, tiro.

<sup>3</sup> Mwitaa tuvata Pitaavavata, vaisi mpo mwivavata, Iesusira oriqi vatora mwiniyanra vita.

<sup>4</sup> Mwitanahua hianteta vuvaro mpovanto Pitaara nraatara kyero mwiva nraante oriqi Iesusira quntamwa tonani uro ntero.

<sup>5</sup> Mwiva nraante uro ntero hiama mwiqi viqetaraitiro, qatinani variqaro kakataama viro vera taqovaro oriqi tavuna nraahu vhura.

<sup>6</sup> Tavuna nraahu mwiqi vahuvaro taqero varuvaro nraakiara Saimoni Pitaava nri ntero mwiva hia qatinani variraitiro, mwiva qamwanrama oriqi vera ntero taqovaro tavuna nraahu vahuvaro

<sup>7</sup> mpo tavunavata, Iesusira qiata nraamwuma tova mwivavata, qumina vahiro. Iesusira ququtama to tavunava, mwi tavunava hia mpo tavunavata kuaaqaa vahiraitiro, nanrianra mposata vhura.

<sup>8</sup> Mwitaama vahuvaro vaisi mpo vaakya nruva, mwivavata mwiqi verantero mwi inraikyara taqamwa kyero mwiaqaatairo mwia vu nraato ntapihi vuvaro Iesusira okyarara ntapihi kyero qio qutaa mwivave tiro.

<sup>9</sup> Tauraa mwitanahua variqata mpukuqi Iesusiva qutu viro qaiqaa qati siquaninranra qara ntumwato quara hia ntapihi riora. Hia ntapihiraitita, variqi vita qio mwi entara mwitanahua mwi quara ntapihi kyora.

<sup>10</sup> Mwi inraikyara taqeta mwitanahua nrumu ntanteta mwaatani vura.

### *Mariaava Makataranyaava Iesusira taqora*

*(Maaki 16:9-11)*

<sup>11</sup> Mwitanahua mwaatani vuvaro Mariaava Iesusira quntamwa tonani nri ntero qatinani variqaro ntate variro. Mwiva ntate variqaro kakataama kyero oriqi vera taqovata

<sup>12</sup> nyaamwunyaahua taaratana mwiqi varura. Mwitanahua egarori tuavaaqa ututotana mpovanto tauraa Iesusira mwamwantavanto vhura qiatani mwatakyaa viro varuvaro mpovanto mwia kyuqutarani mwatakyaa viro varura.

<sup>13</sup> Mwitanahua Mariaara kyapara hita tiqata, Mwaa nraakyevao, nanra inraikyarave e ntate variaro? tuvaro mwiva tiqaro, Mpohua ni nronra vaisi mwaaqitaita vara kyaavana nte mwihua uro mwia kyaanani hia taqaraitinama, mwianra ntate varuqo, tiro.

<sup>14</sup> Mariaava mwitaa timwa kyero mwiva tuqasaa viro taqovaro Iesusiva mwia mwoqani siviro varuvaro mwiva hia mwia viri ntapihi taqaraitiro, mpo vaisivantove tiqaro varuvaro

<sup>15</sup> Iesusiva mwia kyapara hiro tiqaro, Mwaa nraakyevao, nanraqamave e ntate variaro? E tararave puua hi variaro? tiro. Iesusiva mwitaa tuvaro Mariaava nai riero tiqaro, Mwi vaisiva kyaqamwa mwaaqi ntaqikyi vari vaisivave, tiro. Timwa kyero mwianra tiqaro, E mwia vitaqira uro kyerava varirera, mwiqi vatauqo tiraqe nte uro varaankye, tiro.

<sup>16</sup> Mwitaa tuvaro Iesusiva mwianra tiqaro, Mariaao, tiro. Tuvaro Mariaava tuqasaa viro Iesusira ntapihi taqero Iesusirara nai Iutaa quaqitairo tiqaro, Raponao, tiro. Mwaa quaraqitai tirera, Mwaanra ti variara vaisio, tiro.

<sup>17</sup> Mariaava mwitaa tuvaro Iesusiva tiqaro, Qio hia niqaa tu varaante. Nte hia ntena kova hinani tumu ntantena vuqo, tiro. Mwitaa timwa kyero mwiva mwia timwa mwinro tiqaro, E ni katamwanra uro timwa nyiante. Nianra mwitaa mwitaama kyera timwa nyiante. Nte virini ni kovavata nkyi sovavata hinanive, ni mwanriqvantovata nkyi mwanriqvantovata hinani tumu ntantena virerave, tiho qianta, tiro.

<sup>18</sup> Mwitaa tuvaro Mariaava Makataranyaava nrumu ntantero uro Iesusira nraaqiaranramwu timwa nyinro tiqaro, Nte tiri nronra vaisi mwia taqauqo. Mwiva nianra mwitaa mwitaama kyera nkyi timwa nyiante tiho, tiro.

***Iesusiva nai nraaqiaranramwu suqaa qovarama vura  
(Matiu 28:16-20; Maaki 16:14-18; Ruku 24:36-49)***

**19** Mwi Saanteraqaa enta huvata Iesusira nraaqiaranramwuvanto Iutaa nronra vaisinramwu nyaatu aatu hiqata nraamwu mpoqi qesanramwu vhura ruteta varura. Mwihua mwipi varuvaro mate mwipiara Iesusiva mwihua utaqaa qovarama viro sivi variro mwihua qua mwantero tiqaro, Nkyi mwutukya qihakya hirata variate, tiro.

**20** Mwitaa timwa kyero mwiva nai kyauqu ninriqotaita ru ratonta kyora mwihua nyaamwutero nai nraanterasataa ratoravata nyaamwutora. Nyaamwutovata mwia nraaqiaranramwu mwia taqovaro mwihua kyuqe huvata mwihua mwianra qamwateqata varura.

**21** Varuvaro Iesusiva qaiqaa mwihua qua mwantero tiqaro, Nkyi mwutukya qihakya hirata variate. Ni kova ni titaintema kyena nte nkyivata sitarerave, tiro.

**22** Mwitaa timwa kyero mwiva mwihuaqaa nai nraaiho vuata kyero tiqaro, Qio Kotira mwanraqura varaate.

**23** Nkye vaisi mpovanto Kotira qua nteqa kyaani quara qaqlira kyaivera, mwi quava taiqama quananrove. Nkye mwi quava qati vahiarive tivera, mwi quava qatima vahiananrove, tiro. Mwitaa tura.

***Tomaasiva Iesusira taqora***

**24** Iesusiva nai nraaqiaranramwu hunani nri ntero mwipi varuvaro mwi entara mwia nraaqiara mpovanto 12 nramwuqitairo hia mwihuavata varura. Mwia nrutu Tomaasira mwia mpo nrutu Kaapirave tura.

**25** Iesusiva vuvaro Tomaasiva mwisairo nri ntovata Iesusira nraaqiara mpo uhua Tomaasira timwa mwita tiqata, Tire nronra vaisi Iesusira taqauro, tita.

Tuvaro Tomaasiva tiqaro, Qaqao, nte hia mwia kyauquqi ninri rutaara nrumwaanra taqena, nte hia ntene kyauqu mwipi veta kyena, mwia nraanterani rutaaraqivata hia ntene kyauqu veta kyaraitina, hia nkyi quara qutaave qianinrave, tiro.

**26** Tomaasiva mwitaa timwa kyero varuvaro kuaa uiki nritarovata Iesusira nraaqiaranramwuvanto varuvaro Tomaasivavata mwihua kyapata variqata ekyaa qesa ruteta mwipi varuvaro Iesusiva qaiqaa qovarama viro mwihua utaqaa siviro variro mwihua qua mwantero tiqaro, Nkyi mwutukya qihakya hirata variate, tiro.

**27** Timwa kyero mwiva Tomaasirara tiqaro, Qio ena kyauqu tutu kyera ni kyauquqi veta kyeqara taqaante. Ena kyauqu tutu kyera ni nraanterani rutaaraqi vera kyeqara taqaante. E nianra taara nraato tinara qaqlira kyaante. E nianra kepuqyaqama kyera riemwaqira quante, tiro.

**28** Mwitaa tuvaro Tomaasiva mwia timwa mwinro tiqaro, E ni nronravantove. E Kotiva ni mwanriqavanto variaro, tiro.

**29** Mwitaa tuvaro Iesusiva mwia timwa mwinro tiqaro, Tomaasio, e ni taqera mwiaqatairama e nianra qutaave qiaro. Qio tahuave hia ni taqaraitita, nianra qutaa mwivave tihua, mwihua qamwateqata variate, tiro. Iesusiva mwitaa tura.

***Mwaa mpukura okyarara tura***

**30** Iesusiva nai nraaqiaranramwu suqaa variqaro nai okyara nyaamwutarero nronra kyaiqa, mpo kyaiqa mpo kyaiqa vare varura. Qio nte Ioniva mwi kyaiqara hini nraahu mwaa mpukuraqi qara ntumwa tena.

**31** Nkye Iesusirara qutaa mwiva tiri kyaahaqa hiariva variqaro qutaama mwiva mwanriqa Kotira mwaqvavento variho timwa kyeta mwianra kepuqyaqama kyeta riemwaqita vita ekyaa enta ekyaa enta qati variqi quate tina, nte Ioniva mwaa quara qara ntumwa taura.

## 21

### *Iesusira nraaqiara 7 nramwuvanto qaiqaa mwia taqora*

<sup>1</sup> Mpo enta Iesusira nraaqiaranramwuvanto Taipiriaasi kyaarereraqa Kariri mwatani varuvaro Jesusiva qaiqaa mwihua suqaa qovarama vuvata mwia nraaqiaranramwuvanto mwia taqora. Mwataamama mwi quava vahiro.

<sup>2</sup> Mwia nraaqiaranramwu Saimoni Pitaavave, Tomaasiva mwia mpo nrutu Kaapivave, Kenaa mwatukya Karirinyaaisi Nataanierivave, Sepetira mwaaqutanave, Jesusira nraaqiara mpo taaratanave, mwinramwuhua mwini kuaaqi varura.

<sup>3</sup> Saimoni Pitaava hini mwihuara tiqaro, Qio nte tavukyara vahe ntarera virerave, tuvata mwinramwuhua tiqata, Tirevata virerave, tita. Mwitaa timwa kyeta uto mpotuqi mwaanri nteta mwiqi variqata entaqi tavukyara vahe ntamwaqi vita hia tavukya mpokuvata varora.

<sup>4</sup> Mwitaamaqita vuvaro qaatatarera huvata mwihua taqovaro Jesusiva kyaarerera tokyaqaa siviro varuvata mwihua hia mwia ntapihi taqaraitita, mpo vaisive tuvaro

<sup>5</sup> mwiva mwihuara tiqaro, Ni vaisituaavo, hiave nkye tavukya vareta hiavo? tiro. Mwitaa tuvata mwihua tiqata, Hia varauro, tuvaro mwiva tiqaro,

<sup>6</sup> Qio nkye vahe kyaatutani kyeta tavukya varaate, tiro.

Mwitaa tuvata mwihua vahe kyaatutani kyeqata taqovaro vahevanto piqa vuvaro tavukya airinti mwiqi vahuvaro anomia kyero muaanra ntovata mwihua hia qio vahe pati mwaanri mpotuqi vataaqara hura.

<sup>7</sup> Mwihua hia vahe pati mwaanri mpotuqi vataaqara huvaro Jesusiva mpoqama kyero mwutukya ntu vaisiva Pitaara timwa mwinro tiqaro, Mwi vaisiva tiri nronravantove, tiro. Mwitaa tuvaro Saimoni Pitaava mwi quara riero nai sioti qatinani vatora vara utu varero mpotuqitairo mwaamwi ntero nramanriqi kyavuhu viro nako ru varero Jesusiva hunanianra vuvata hini mwihua mpotu mwiqi varura.

<sup>8</sup> Kyaarerera tokya mwiva hia nyianrani vahuvatara tita mwihua mpotuqi variqata tavukyavanto vahe piqa kyora ntanrauqi vita tokyani uro ntora.

<sup>9</sup> Tokyani mpotu uro vateta mwihua mwaamwi nteta taqovaro qia quaratero mwiaqaa tavukya utatova vahuvaro mperetivata vahura.

<sup>10</sup> Vahuvaro Jesusiva mwihuara tiqaro, Tavukya mateqa varataara kyaatavata vareta nriate, tiro.

<sup>11</sup> Mwitaa tuvaro Saimoni Pitaava mpotuqi mwaanri ntero vahe mwia ntanrauqiro tokyani uro kyora. Tavukya airi 153 nramwu vaheqi vahuvaro vahevanto ntupema quataara hia ntupema vura.

<sup>12</sup> Mwitaa huvaro Jesusiva tiqaro, Qio nrata kyara nraate, tuvata mwihua Jesusira vaakya ntapihi kyeta tire kyauruaro tita mwihuqaqitairo hia mpovanto Jesusirara e tavave tura.

<sup>13</sup> Qati varuvaro Jesusiva mperetivata tavukyavata mwihua nyuvata nronra.

<sup>14</sup> Jesusiva nai qutu vuraqitairo siviro nai nraaqiaranramwu suqaa qovarama vuvata mwihua mwia taqora. Mwi entara taarampo nani mwihua suqaa qovara hura.

### *Iesusiva Pitaaravata qua tura*

<sup>15</sup> Mwihua kyara nramwa kyovaro Jesusiva Saimoni Pitaara kyapara hiro tiqaro, Saimonio, Ioninra mwaaquo, quataave mwaa vaisihua mwutukyavanto nianra vahiravata nraatara kyero i mwutukyavanto nianra mpqiqavata vaiho? tiro. Mwitaa tuvaro Pitaava tiqaro, Nronrao, quataave. Ni mutukyavanto iara vahira mwia e ntapihi kyaananrave, tiro. Tuvaro Jesusiva tiqaro, Qio ni sipisipi nraati kyara nyiante, tiro.

<sup>16</sup> Mwitaa timwa kyero Jesusiva qaiqaa mwia kyapara hiro tiqaro, Saimonio, Ioninra mwaaquo, quataave i mwutukyavanto mpqiqavata nianra vaiho? tiro.

Tuvaro Pitaava tiqaro, Nronrao, quataave. Ni mutukyavanto iara vahira mwia e ntapihi kyaananrave, tiro.

Mwitaa tuvaro Iesusiva tiqaro, Qio ni sipisipiqa ntaqikyiate, tiro.

<sup>17</sup> Mwitaa timwa kyero Iesusiva qaiqaavata tiqaro, Saimonio, Ioninra mwaaquo, quataave i mwutukyavanto mpoqiavata nianra vaiho? tiro.

Iesusiva taarampo nani tiqaro, Qutaave i mwutukyavanto mpoqiavata nianra vaiho, tuvarora tiro, Pitaara mwutukyavanto uaquia huvaro mwiva tiqaro, Nronrao, e ekyaa inraikya ntapihi kyaaravave, Ni mutukyavanto iara vahira mwia e ntapihi kyaananrave, tiro.

Mwitaa tuvaro Iesusiva Pitaarara tiqaro, Qio ni sipisipi kyara nyante, tiro.

<sup>18</sup> Iesusiva mwitaa timwa kyero Pitaara timwa mwinro tiqaro, Nte quataa qua qianinra riaante. Tauraa e qaraakya vaisi variqara e tuavaaqa utu varera ena virera hiananraqaa quananrave. Nraakiara e nyaapaiqama vira ena kyauqu tututairaro mpovanto i tuavaaqa utu mwatero i vita varero hia e virera tinanraqaa quananrove.

<sup>19</sup> Iesusiva mwi quaraqaa ntumwa kyero Pitaava mwitaama kyero Kotira nrutu tuaahereqaro uro qutu quananrove, tura. Iesusiva mwi quara timwa kyero mwiva Pitaara qaiqa timwa mwinro tiqaro, E ni pataqira nriante, tiro.

### *Iesusiva nai nraaqiara mpora mpo qua tura*

<sup>20</sup> Mwitaa tuvaro Pitaava tuqasaa viro taqovaro Iesusiva mpoqama kyero mwutukya ntu vaisiva mwitanahua nraakiara nrinro. Haaru mwihua entaqi kyara nre varuvaro mwi vaisiva Iesusiraqaa uromwi vuntuvi variqaro Iesusira kyapara hiro tiqaro, Ta vaisivave i nramwutaahua iara timwa nyiananrove, tu vaisiva nri ntovaro

<sup>21</sup> Pitaava mwia taqero mwianra Iesusira kyapara hiro tiqaro, Nronrao, qio mwaa vaisiva mpo? Mwaa vaisiva nataave hiananrove? tiro.

<sup>22</sup> Pitaava mwitaa tuvaro Iesusiva mwia timwa mwinro tiqaro, Nte mwianra tiqana, E qati variqira viraqena nte qaiqaa mwatani tumuankye, qiankyera, mwia hia i kyaiqama vahiananrove. E ni pataqira nriante, tiro.

<sup>23</sup> Iesusiva mwitaa tuvata mwia nraaqiaranramwuvanto mwi quara apiqama kyeta rieta mwihua mwitaama titi, Iesusiva tiqaro mwi vaisiva hiama qutu quananrove tiho, tura. Iesusiva hia mwitaa tiraitiro, mwiva tiqaro, Nte mwaa vaisirara tiqana e variqira viraqena nte mwatani tumuankye qiankyera, nte mwianra mwitaa qiariva hiama i kyaiqa vahiananrove, tiro. Iesusiva mwitaa tura.

### *Ioniva taiqaani quara qara ntumwa tora*

<sup>24</sup> Qio mwi entara Iesusiva qua timwa mpu vaisiva nte mwaa mwivave. Nte variqanama mwi inraikyara mwi inraikyara taqamwa kyena mwiaqataina mwaa quara qara ntumwa taurave. Nte tu quava ekyaa mwi quava quataa quama iho.

<sup>25</sup> Iesusiva varo kyaiqara nte hini vitiqia nraahu qara ntumwa taurave. Ekyaa mwia kyaiqa kuaiqia kuaiqia qara ntumwa taivera, airi mpuku vahiro mwaa mwatara piqa kyaananrove. Qio nte mwicarama tuqo.

## KYAIQA VARORA

### Rukuva Iesusiva nronraqama kyo vaisinramwuhua kyaiqa varorara tura

<sup>1</sup> Tiopiraasio, Nte tauraaqama kyena ini qara ntumwa tauraqi Iesusiva kyaiqa varorave, Iesusiva qua timwa nyunrave, ekyaa mwi quara i timwa mwiavarave.

<sup>2</sup> Iesusiva kyaiqa toharama kyero varaqiro viro uro nai kyaiqa taiqa kyovaro mwiaqatairo Kotiva mwia nyaamwuni vita varorara i timwa mwiavarave.

Iesusiva nyaamwuni virera huvaro Kotira mwanraquravanto mwia kepukyaqama mwatovaro Iesusiva nai nronraqama kyo vaisinramwuhua mpo qua mpo qua timwa nyunra.

<sup>3</sup> Iesusiva qutu vuraqaatairo 40 iherara mwaa mwataraqaa variqiro viqaro airi nani nai nraaqiaranramwu suqaa qovarama viro varuvatara tita, mwihua taqovaro Iesusiva hia qutu vuvara votima kyero variraitiro, mwiva qutaaqama qati varu vaisiva varura. Mwihua mwia taqeta varuvaro Iesusiva mwihua kyapata variqaro qua timwa nyiqiro viqaro Kotiva ntaqikyianinranra mwihua timwa nyunra.

<sup>4</sup> Mwia nraaqiaranramwu ntuvaantuama vita varuvaro Iesusiva mwinramwuhua timwa nyinro tiqaro, Hia Ierusaremiqitaita quate. Ni kova mpo inraikya nkyi nyianinranra nkyi timwa nyunra mwia vekya variate.

<sup>5</sup> Ioniva nraakye qora qati nramanri nyunrave. Mpo iheraqiatana nritarairata nkye Kotira mwanraqura varevarave, tiro.

#### *Iesusiva nyaamwuni vura (Maaki 16:19-20; Ruku 24:50-53)*

<sup>6</sup> Iesusiva nai nronraqama kyo vaisinramwuhua Iesusira vatama kyeta ntuvaantuama vita variqata Iesusira kyapara hita tiqata, Nronrao, mwaa entarave e tiri kyaahaqa hiraqe tire ntaquqi viqata teta haivaqara mwata Isareri mwata qaiqaa varaanarave? tita.

<sup>7</sup> Mwihua mwitaa tuvaro Iesusiva mwihua timwa nyinro tiqaro, Qaqao, mwi inraikyara hiama nkyi kyaiqa vaiho. Ni kora kyaiqama vaiho. Nai nanra toraqaaave nanra entaqaaave mwi inraikyava mwi inraikyava mwitaa hiananrove? Ni kova mwiva nraahuma mwi kyaiqarara mwi okyarara qiananrove.

<sup>8</sup> Nkye varivaro Kotira mwanraquravanto tumu nkyi variqaro nkyi kepukyaqama nyatairata nkye kepukya vareta mwaa kyaiqara varaqita quate. Nkye ni okyarave, ni kyaiqave, taqaahuara tita, nkye tauraaqama kyeta Ierusaremiqi nraante ni qua timwa nyita, mwiaqataita uro Iutiaani timwa nyita, mwiaqataita vetara Sameriaani uro timwa nyita, mwiaqataita ekyaa mwata maata vahiarintema timwa nyiqi quate, tiro.

<sup>9</sup> Iesusiva mwihua timwa nyi taiqa kyovaro mwia vitero nyaamwuni vuvata mwihua mwia taqe varuvaro tonamwuvanto mwia ntumwaqu kyovata mwihua hia mwia qaiqaa taqora.

<sup>10</sup> Iesusiva mwihua kyero nyaamwuni vuvata mwihua nyaamwuqi aitutu hi varuvata qamwanrama kye vaisi taaratana egarori tuavaaqa ututotanahua qovarama vita mwihua nraaqani sivita varura.

<sup>11</sup> Mwitanahua tiqata, Kaririqinaa vaisi nkyenramwuve, nanraqamave nkye nyaamwuni taqe variavo? Iesusira mateqa vitaiharo nyaamwuni viho. Qio mateqa nkye taqe variavaro vintema kyero nraakiara Iesusiva mwisairo uro ntantero tumuananrove, tura.

*Mpovanto Iutaasira kyaiqa varaarive tita nrutu vatora*

<sup>12</sup> Mwitanahua mwitaa tuvata Iesusiva nronraqama kyo vaisinramwuhua Oripi taaqiqataita uro ntanteta Ierusareminianra vura. Oripi taaqi mwiva Ierusaremi nraaqani vhura.

<sup>13</sup> Iesusira nraaqiaranramwuvanto uro ntanteta tumu Ierusaremini nauqaa nkyiari varu nraamwunra nyaamwuni vahu nraamwunraqi vera nteta varura. Pitaavave, Ionivave, Iemisikya Enturukyave, Piripikya Tomaasikyave, Pataromiukya Matiukyave, Arapiaasira mwaاقu Iemisivave, Saimoni Serotivave, Iemisira mwaاقu Iutaasivave,

<sup>14</sup> mwinramwuhua nraamwu mwipi ntuvantuama vita variqata enrai qanranra huvata Kotirara aakyara ntamwaqita vi varuvata nraakyenramwuvata, Mariaava Iesusira nrovavata, Iesusira qatanramwuvata mwihua kyapata nraamwuqi variqata Kotirara aakyara nte varura.

<sup>15</sup> Mwi entara Iesusira nraaqiara vatama kyeta 120 nramwuvanto mwi nraamwunraqi ntuvantuama vita varuvaro Pitaava mwihua suqaa siviro variro tiqaro,

<sup>16</sup> Ni kata pakyaa tuaavo, Iutaasiva Iesusira uaqama mwatarero aanra nyaamwutovata mwihua Iesusira uro ntavaaqavu kyorave.

Haaru qumina vakya Kotira mwanraquravanto vaisi mpo Ntevitira, tiri haivaqara, kyaahaqa huvaro mwiva Iutaasirara qua qara ntumwatorave. Mwaa entara mwi quava qutaa mwivauma viho.

<sup>17</sup> Iutaasiva tauraa tiri Iesusira nraaqiara 12 nramwu kyapata variqaro mwivavata tiri kyaiqa varaqiro viro mwiaqatairo mwiva qaqlira kyero Iesusira rukyaate tiro, mwia qovarama nyatovata

<sup>18</sup> mwihua utaru munima utu kyeta mwia mwuvaro Iutaasiva mwi munimanra varero uro mwata kyoqama tero mwiaqatairo nanrianra nronraqama kyero riero vaanta hiriviro tumu ntuvato mwia utaqinaa inraikyavanto ntuperero ntupepaa huvaro qutu vurave.

<sup>19</sup> Ekyaa Ierusaremiqinaahua mwi quara rieta, mwiva mwata varorara *Akeritamave*. Nraanre Mwatave, ti variavo.

<sup>20</sup> Saami mpukuqi Iutaasirara haaru poropetivanto tiri haivaqava qara ntumwatova mwataama tiro:

Mwia nraamwu qumina nraamwu vahiraro  
hia mpovanto mwipi variananrove, turave.

(Ihi 69:25)

Mpo quavata qara ntumwatova mwataama tiro:

Mpowanto mwiva ntaqikyiani kyaiqara varaananrove,  
turave.

(Ihi 109:8)

<sup>21-22</sup> Nrivaqenramwu mwi quara rieqatama tire vaisi mpo mwatama kyaararo mwi vaisiva Iutaasira kyaiqa varaarive. Tavave Iutaasira kyaiqa qio varaananrove? Vaisi mpovanto mwiva tiri nraantantero Ioniva nramanri nyunraqatairo tohara kyero ekyaa Iesusira kyaiqa taqaariva, mwi vaisiva mwia kyaiqa qio varaananrove. Mwiva tiri vatama kyero variqaro nraakye qora Iesusiva qaiqaa qati sivi quara timwa nyinrata riaate, tiro.

<sup>23</sup> Pitaava mwitaa tuvata vaisi taaratana nrutu ntoro. Vaisi mpo Iosepi Iasitaasira mwia vara nrutu mpo Vasapaasiravata, vaisi mpo Mataiasiravata, nrutu vatora.

<sup>24</sup> Vateta mwihua Kotirara aakyara nteta tiqata, Nronrao, e vaisi okyarara ntapihi kyaaravave. Mwaa vaisitanaqitaira ta vaisira mwatama taananra tiri tinraamwutaante.

<sup>25</sup> E mwi vaisira tiri tinraamwutairae tire mwia nronraqama kyaararo mwiva Iutaasira kyaiqa varaarive. Iutaasiva mwi kyaiqara qaqlira kyero nai mwaata uaqia hinani viho, tita.

<sup>26</sup> Mwihua mwitaa timwa kyeta mpovanto mpora nrutu vatovaro mpovanto mpora nrutu vatovaro mwitaamaqita vita taqovaro Mataiasira nrutuvanto nraatara kyovata

mwia vara nronraqama kyovaro Mataiaasiva Jesusiva vara nronraqama kyo vaisihua kyapata kuaaqi kuairama viro variqaro mwihua kyapata kyaiqa varaqiro vura.

## 2

### *Kotira mwanraquravanto tumu nto iherara*

<sup>1</sup> Mpo enta Pentikosi omwata nro entava nri ntovata Iesusira nraaqiaranramwuvanto nraamwu kuaaqi ntuvaantuama vita varura.

<sup>2</sup> Mwiqi varuvaro qamwanrama kyero nyaamwusairo nruquavanto toqa vauruvant nruqua tintema kyero nruqua timwaqiro tuminro mwihua varu nraamwunramwia piqa kyora.

<sup>3</sup> Nraamwu mwia piqa kyovata taqovaro qia auru voti huva qovarama viro ntukohi kauhi hiro ekyaa nraakye qora mwipi varuhua qiataqaa vhura.

<sup>4</sup> Mwihua qiataqaa tumu vahuvaro Kotira mwanraquravanto ekyaa mwihua utaqi piqa kyero uro variqaro mwiva mwihua kyaahaqa huvata mwihua mpo qua mpo quaqitaita ti varura.

<sup>5</sup> Mwitaa ti varuvata Iutaa vaisi mpo mwata mpo mwatasaita Ierusaremiqi nruhua mwihua Kotira qua riohua

<sup>6</sup> mwihua variqata nruqua nronraqama kyero tura rieta nanra inraikyavantove nruqua thio timwa kyeta hisai hisaita nrumu ntuvaantuama vita variqa taqovata Iesusira nraaqiaranramwu Kotiva mwaaqinri tuqasaa kyovata mpo qua mpo quaqitaita tiqata mpo mwatanaa mpo mwatanaahua qua ti varuvata mwinramwuhua mwihua tu quarara nrihanrama vita.

<sup>7</sup> Nrihanrama vita kyauqu ntukikinraaqate varita tiqata, Qikye, ekyaa mwi quara ti variahua mwihua Kaririqinaahua nraahuve.

<sup>8</sup> Nataama kyetave mwihua tiri qua ekyaa riemwa vareta mpo qua mpo quaqitai ti variavo?

<sup>9</sup> Tire mpo mwatasai mpo mwatasai nrunrahuave. Paatiaave, Mitaave, Iraamive, Mesopotemiaave, Iutiave, Kapatosiaave, Pontaasive, Esiaave,

<sup>10</sup> Pirisiaavata Pampiriaavatave, Isipive, Ripiaa Sairini nraaqanive, Romive, tire mwisai mwisai nrunrahuave.

<sup>11</sup> Tire mponramwu Iutaa nraakye qora varuro. Tire mponramwuvanto mpo mwatanaa variqata teta mwaanra qua qaqlira kyeta Iutaa mwaanra qua riemwaqita vurahuave. Kiritive, Areppiaave, mwisai mwisaita tire mwaini nrumu varuro. Tire mwaini variqata taqe varurata mwinramwuhua tiri qua, mpo qua mpo quaqitaita tiqatama Kotira kyaiqa kyuqe kyaiqara ti variavo, tita.

<sup>12</sup> Mwitaa timwa kyeta mwihua nrihanrama vita kyauqu ntukikinraaqate variqata mwihua nai kyapara hi nai kyapara hita tiqata, Qikye, nanra inraikyavanto vara mwitaama kyaihatave mwihua mwitaa ti variavo? tita.

<sup>13</sup> Tuvata mpo uhua raima nyateta tiqata, Qaqao, mwihua qaraakya uaini nramwa kyeta uera nteqatama mwitaa ti variavo, tita.

### *Pitaava mwihua qua timwa nyunra*

<sup>14</sup> Mwihua mwitaa ti varuvaro Pitaava Iesusiva nronraqama kyo vaisihua 11 nramwu kyapata siviro variro paatiro vera kyero timwa nyinro tiqaro, Iutaa vaisituaavo, nkyevata, nkye Ierusaremini nrumu variahuvata, rie varivaqe nte mwaa inraikyava qovara hirara ntapihi kyena nkyi timwa nyiankye.

<sup>15</sup> Nkye tiqata, Mwihua uera nramanri nramwa kyeta mwitaa ti variavo, qia quava hia quataave. Mate mwaa toqaqive. Toqaqi variqaro hia vaisivanto uera nramanri nre varirave.

<sup>16</sup> Nkye mate taqe varia inraikyara haaru qumina vakya poropeti vaisivanto mwia nrutu Ioeriva Kotira qua tiqaro mwi inraikyava qovara hiananrove turave. Mwiva haaru qua tuva mate qutaa mwivauma viho. Ioeriva qara ntumwa tero tiqaro,

<sup>17</sup> Kotiva mwitaama tiho.

Nraakiara ekyara enta qaumato vahiraqe  
nte ntena mwanraqura nraakye qora nyianinrave.  
Mwiaqaataita nkyi nyaamwunra mwaaquvantovata  
ni mwakyaakya tivarave.

Nkyi qaraakya vaisivanto qati variqata  
ruvaata voti hianinra taqevarave.

Nkyi nyaapaivanto ruvaata taqeqatama  
ni okyarara tivarave.

<sup>18</sup> Ni kyaiqa vare nraakye gorahua mwihua varivaqena  
nte mwihua ntena mwanraqura nyianrita  
mwihua ni qua mwakyaakya  
nraakye qora timwa nyivarave.

<sup>19</sup> Nte variqana nyaamwuqi nronra kyaiqa varaaninrave.  
Nte mwatanivata nronra kyaiqa varaaninrave.

Ekyara enta qaumato vahiraro nraanrevantove,  
qivantove, qia munravantove, vahirata taqevarave.

<sup>20</sup> Nronravanto tumuani entava qaumato vahiraro  
huarivanto kyokira ruviraro  
toravanto nraanre nrusi utu quananrove.

<sup>21</sup> Mwi entara nronrao tiri kyaahaqa hiante tihua  
nronravanto kyaahaqa hirata qatima varivarave,  
turave.

(Ioeri 2:28-32)

Ioeriva Kotira qua tiqaro mwitaa turave.

<sup>22</sup> Qio Isarerি vaisinramwu tuaavo. Nte qianinra riaate. Iesusiva Nasaretinyaava varuvaro Kotiva mwia kyaahaqamaqiro vi varuvaro mwiva nronra kyaiqa kepuqya kyaiqa varovata nkye Kotiva mwia tito okyarara ntapihi kyorave. Mwiva mwi kyaiqara nkyita suqaa utuvatara tita, nkyetavanto mwi inraikyara taqorave.

<sup>23</sup> Qio Kotiva nai mwitaa mwitaa hiani okyarara rieqaro Iesusira nkyi nyuvata nkye mwia ntavaaqavu kyeta kyatariqaa ninriqo ru torave. Nkye Romeni mpo mwatanaahuara mwia kyatariqaa ru timwataate qivata mwihua Iesusira ru kyaarave.

<sup>24</sup> Qio qutu vi inraikyava Iesusira hia qio tutaaninranra tiro, Kotiva mwia vara qati sivuma kyorave.

<sup>25</sup> Haaru Ntevitiva tiri haivaqava mwianra mwataa turave:  
Nte taqauqaro nronravanto nivatama kyero variqaro  
mwiva ni kyaauqu kyaatutani variqaro  
mwiva ni kyaahaqa hi variho.

<sup>26-27</sup> Mwiva mwitaama variqiro vi varirara tiro,  
vanto kyuqe iharo  
ni novanto qamwateqaro qua ti variho.

E hia ni qutu quahua mwaatani ni kyenanranra tiro,  
ni mwamwantavanto hiama aatu hiqaro variananrove.  
E hiama ena kepuqya vaisi qaqlira kyairaro  
mwiva ntenraananrove.

<sup>28</sup> Qati variqina quani aanranra  
mpo aanra mpo aanra ni naamutaaro.  
E nivata variraqe nte variariro

ni mutukyavanto kyuqe hiarive, turave.

(Ihi 16:8-11)

Haaru tiri haivaqava Ntevitiva mwi quara turave.

<sup>29</sup> Qio nkye ni kata pakyaa, riaivaqe nte Ntevitirara nkyi ntapihi kyena timwa nyiankye. Mwiva qutu vuvata quntamwa torave. Mwia quntamwa to mwatapiva mwaa entara qatima vaiho.

<sup>30</sup> Kotiva Ntevitira kyaahaqa huvaro mwiva Kotira qua turave. Kotiva nai kyauqu nriqiqaa vatero Ntevitirara tiqaro, Nraakiara e vara mwataratera huaqitairo mpov- anto i nraantantero vunyaa vaisi kyaiqa varaanarove, tuvaro Ntevitiva mwi quara riemwa torave.

<sup>31</sup> Mwi quara riemwa teroma Ntevitiva mesaiaavanto qati siquani okyarara tiqaro: Kotiva hiama mwia qutu vihua vi mwataraqi kyaananarove. Mwia mwamwanta hiama ntenraananarove, turave.

(Ihi 16:10)

<sup>32</sup> Qio Jesusiva qutu vuvaro Kotiva mwia qaiqaa qati vara sivuma kyovata tiren- ramwu mwia taqaunananrave.

<sup>33</sup> Haaru Kotiva nraakye qora kyaahaqa hiqaro nai mwanraqura nyinrenrave turaqaa Jesusiva Kotiva hinani viharo Kotiva mwia nronraqama kyaiharo Jesusiva mwia kyauqu kyaatutani mwatakyaa viro variharo mwiva nai mwanraqura Jesusira mwihanro Jesusiva Kotira mwanraqura mwia rauriharo tiriqi tuminrama mateqa nkye taqeta rieta hiavo.

<sup>34</sup> Ntevitiva hia nai nyaamwuni vurave. Ntevitiva tiqaro: Nronravanto Kotiva ni nronra vaisiara tiqaro, Mwaini ni kyauqu kyaatutani mwatakyaa vira variraqena <sup>35</sup> nte i nramwutaahuavata ntaqina nraatara kyaarira e ena kyuqu mwihuaqaa ntamwa tenanrave, turave.

(Ihi 110:1)

Ntevitiva mwitaa turave.

<sup>36</sup> Qio nkye Isareri vaisivantove, nkye riaate. Nkye Jesusira mwia ninriqotaita kyatariqaa ru kyeta hiritaara, mwiamma Kotiva nronraqama kyaiharo mesaiaavanto kepukya vaisi nronravanto variho. Nkye mwia ru kyaarave, tiro.

<sup>37</sup> Pitaava mwitaa tuvata nraakye qora mwi quara riovaro mpoqama kyero mwihua mwutukya ntuvata mwihua Pitaaravata Jesusira nraaqiara hini mwinramwuhuavata kyapara hita tiqata, Qikye, tiri tiqata vakyaahuanramwuve, tire nataave hiananrave? titaa.

<sup>38</sup> Tuvaro Pitaava mwihua timwa nyinro tiqaro, Nkye ekya mwihua uaqia hi kyaiqara uti varira qaqlira kyetama Jesusira nrutu nteqata nramanri varavaroo Kotiva nkye uaqia hi kyaiqara uti vari quara nruka kyaarive. Nkye mwitaa hivaroo Kotiva nai mwanraqura nkyi nyinrata nkye varevarave.

<sup>39</sup> Kotiva nai kyauqu nriqiqaa vatero tiqaro, Ntene mwanraqura nraakye qora nyinrenrave, turave. Kotiva mwi quara tiqaroma mwiva nkyiaravata, nkyi nraaqiararavata, rieqaro turave. Nraakye qora nkye mwatani variahuaravata rieqaro turave. Kotiva nai nyaanrama taari nraakye qorahua ekya nai mwanraqura nyiananarove, tiro.

<sup>40</sup> Pitaava mwitaa timwa kyero mwiva mpo qua mpo qua timwa nyinro tiqaro, Nkye mwi quara mwi quara riaate. Nkyevata nkyeta nramwunaahua nraantanteta uaqia hiani aanranraqaa nrohiqata qua varevorave, tiro.

<sup>41</sup> Mwitaa tuvata nraakye qora airivanto mwi quarara qamwata kyeta quataave timwa kyeta nramanri varora. Mwi entara airi 3,000 vanto Jesusira nraaqiarama vita kuaaqi varura.

*Jesusira nraaqiaranramwu kuaaqi varura*

<sup>42</sup> Mwihua Iesusiva nronraqama kyo vaisihua kyapata variqi viqata mwihua qua riemwaqi vita, mwihua kuaaqi variqata nai kyaahaqa hi nai kyaahaqa hita, mwihua kuaaqi variqata kyara nreta, kuaaqi variqata Kotirara aakyara nte varura.

<sup>43</sup> Iesusiva nronraqama kyo vaisinramwuhua variqata nronra kyaiqa kepukya kyaiqa vare varuvata nraakye qora mwinramwuhua kyaiqa taqeta kyauqu ntukikin-raaqateqa varura.

<sup>44</sup> Iesusirara qutaave timwa kye kepukyaqama kye riemwaqi vi varuhua kuaaqi variqata nai kyaahaqa hi nai kyaahaqa hiqata nkyiari vato inraikyara nai mwi nai mwi hi varura.

<sup>45</sup> Mwihua nkyiari mwatave, nkyiari vato inraikyarave, mpohua nyiqata munima vara kyeta taqvata nkyiari henahua vehi varuhua mwi munimanra ntainra kyeqata nyunra.

<sup>46</sup> Mwihua mpo enta mpo enta Kotira nraamwuqi uro ntuvantua hita mwiaqataita uro mpo nraamwu mpo nraamwuqi ntuvantua vita variqata nkyiari kyara kyakyama kye nkyiari henahuavata nyiqata nronra.

<sup>47</sup> Mwitaamaqi viqata mwihua Kotira nrutu tuaahere varuvata nraakye qoravanto mwihuara qamwate varura. Mpo enta mpo enta nronravanto nraakye qora kyaata nraahu kyaahaqa huvata mwihua qutaa Iesusiva mwivave timwa kyeta Iesusira nraaqiaraqama viqata kuaaqi variqi vi varura.

### 3

#### *Vaisi kyuqu ntanrenra vura kyuqema kyora*

<sup>1</sup> Mwi mwatanaahua mpo enta mpo enta Kotirara aakyara ntarerata enronani 3 kiroki Kotira nraamwu nronraqiara vi varura. Mwitaa huraga mpo enta Pitaavavata Ionivavata Kotira nraamwuqiara vura.

<sup>2</sup> Mwitanahua Kotira nraamwuqiara viqata qesa mpo mwia nrutu *Mpoqaraa Qesave* tunani uro nteta taqovaro vaisi mpovanto kyuqu ntanrenra vuva qesa mwina varura. Mwia kyuqu nai nrova mwata kyoraqatairo ntanrenra vuva varuvata mwia nramwunaahua mpo enta mpo enta mwia vitaqiqata mwi qesaraqaa uro kyovaro mwiva mpo enta mpo enta qesana variqaro Kotira nraamwuqiara vitare nritare hi varuhuara munimanrave mwitaa inraikyarave nyaanru tiqaro varura.

<sup>3</sup> Mwiva qesana variqaro taqvata Pitaakya Ionikya vera ntarerera huvaro mwitanahuara tiqaro, Po, qati mpo inraikya ni mpiae, tiro.

<sup>4</sup> Tuvata mwitanahua mwia nraahu viti taqe kyeta mwiaqatairo Pitaava tiqaro, Qio, mwaini tiritana taqaante, tiro.

<sup>5</sup> Mwitaa tuvaro mwi vaisiva mwitanahua mpo inraikyave ni mpivarave timwa kyero mwitanahua taqe varuvaro

<sup>6</sup> Pitaava tiqaro, Hia nte munima vatauqo. Nte vatau inraikyara i mwinrenrave. Iesusi Karaisira Nasaretinyaanra mwia nrutuara rieqanama nte iara sivira nrohiante tuqo, tiro.

<sup>7</sup> Mwitaa timwa kyero Pitaava mwi vaisira kyuqu kyaatutani tu varero kyaahaqa huvaro sivuvaro qamwanrama mwia kyuqvantovata aurokyavantovata kepukyaqama vura.

<sup>8</sup> Kepukyaqama vuvaro mwiva siviro kyuqu ntamwaqiro viro nrinro hiqaro mwiaqatairo mwiva mwitanahuavata viqaro qamwatero veranta verantamaqiro Kotira nrutu tuaaheraqiro Kotira nraamwuqiara vura.

<sup>9</sup> Mwini uvata nraakye qora ntuvantua vuhua taqovaro mwiva nai nrohiqaro Kotira nrutu tuaahereqaro varuvata

<sup>10</sup> mwihua mwia ntapihi kyeta taqeta tiqata, Qikye, mwaa taqaate. Mwi vaisiva Kotira nraamwu *Mpoqaraa Qesave* tunanrana variqaro mwitaa inraikya mpiae ti vari

vaisiva qati naima nrohi variho, tita. Mwitaa timwa kyeta mwi vaisiva kyuqema vurara mpoqama kyeta nrihanrama vita kyauqu ntukikinraaqate varura.

*Pitaava Kotira nraamwuqi variqaro mwakyaakya timwa nyunra*

<sup>11</sup> Mwi vaisiva Pitaakyaa Ionikyaqaa tuqiro nrohuvata nraakye qora nrihanrama vita mwihua hianteta mwinramwuhua Kotira nraamwuqiara vera ntoraqaa Soromoninra aatareqaqaave tunani mwihua vunani vita.

<sup>12</sup> Mwiq'i vuvaro Pitaava nraakye qora taqero tiqaro, Qio nkye Isareri vaisi tuaavo, nanraqamave nkye nrihanrama vita airi nraato ti variavo? Nanraqamave nkye tirinramwu itutu hi variavo? Nkye tiqata, Tiretana teta kepukyarave, teta kyuqe kyaika qaarave, mwi vaisira kyaahaqama kyauraro mwiva nrohi varihove nkye qiaovo? Qaqao, hiave.

<sup>13</sup> Qio mwanriqa Kotiva tiri haivaqahuanramwuqaa ntaqikyi varuva mwiva Evara-haamunraqaave, Aisaakiraqaave, Iaikopuraqaave, ntaqikyi varuva, mwiva Iesusira nai kepukyaa vaisi nronraqama kyovata nkye mwi vaisira ntavaaqavu kyeta uro Pairaatira mwuvuvaro Pairaativa mwia huvantu kyarerave tuvatavata nkye tiqata, Hia mwia huvantu kyaante, turave.

<sup>14</sup> Mwiva Kotira kyuqe vaisivanto kyotataqama kyero nrohi varu vaisiva varuvata nkye hia mwia huvantu kyaante turave. Nkye vaisi mpovanto vaisi rukyo vaisira mwia huvantu timwataante turave.

<sup>15</sup> Nkye mwiaqataita qati variqi vi varia okyarara nyaamwute vari vaisira ru kyorave. Qio Kotiva mwi vaisira qutu viraqitairo qati vara sivuma kyaihata tirenramwu mwi inraikyara qutaaqama kyeta taqaunanrave.

<sup>16</sup> Mate tiretana mwia nrutuara rieqatama Iesusirara Kotira kepukyaa vaisivanto quitaama tiritana kyaahaqa hiananrove tiqatama mwaa vaisira nkye taqe varia vaisira mwia kyuqu kyuqema kyauro. Qutaama tiretana turo. Tiretana Iesusirara quitaama mwiva tiritana kyaahaqa hiananrove tiqata mwaa vaisira nkyi suqaa kyuqema kyauro.

<sup>17</sup> Ni kata pakyaahua nkyenramwuve, nte ntapihi kyaurave. Nkyevata, nkyiqa ntaqikyia vaisihuavata, hia Iesusira okyara ntapihiraitita, nkye Iesusira ru kyaarave.

<sup>18</sup> Haaru Kotiva poropeti mpo nroqitairove qaiqaa mpo poropeti nroqitairove nkyi timwa nyinro tiqaro, Nai kepukyaa vaisivanto nriqa quani inraikyara varaqiro viro uro qutu quaninranra timwa nyu quava mate mwivauma vahirove.

<sup>19</sup> Mwiaqataita Kotiva nkye uaqia hi kyaiqara uti vari quara nruka nyataarive tita, nkye uaqia hi aanranraqaataita tuqasaaqita Kotirara aakyara qiate.

<sup>20</sup> Nkye mwitaa hivaro Kotiva nkyivata variqiro viqaro nkyi mwutukya kyuqema kyaananrove. Nkye mwitaa hivarot Kotiva qaiqaa Iesusira titairaro mwiva qaiqaa tumuanrive. Kotiva Iesusiva nkyi kyaahaqa hiarive tiro, mwia nkyi kyaama tero mwia nronraqama tairave.

<sup>21</sup> Iesusiva nyaamwuni variqiro viraro ekyaa inraikya qaraakyaqama kyero qaiqaa ututaari entava nri ntaarive. Haaru nai poropeti vaisi mpohua mpohua kyaahaqa huvata mwi quara turave.

<sup>22</sup> Mosesiva nkyi haivaqava mwitaa turave:

Ni titaintema kyero nkyi nronravanto Kotiva  
poropeti vaisi mpo titaananrove.

Mwi vaisiva nkyi okyara kuaa okyara variananrove.

Mwiva nri ntairata nkye mwiva qiani quara  
ekyaa quama riaate.

<sup>23</sup> Vaisi mpovanto hia mwia qua riaariva variraro Kotiva  
nai nraakye qoraqitairo mwia teqa raaquta kyero  
kyaananrove, tiro.

(Lo 18:15, 18-19)

Mosesiva turave.

<sup>24</sup> Qio ekyaa poropeti vaisinramwu Samuerivave, mwia nraakiara varuhuave, mwihua Kotira qua tiqatama mwaa entara qovara hiani inraikyarara turave.

<sup>25</sup> Qio nkye poropeti mwihua nraisima variavo. Mwihua nkyi kyaahaqa hirerata nkyiara rieqata mwi quara turave. Haaru Kotiva nkyi haivaqahuavata variqaro kyauqu nriqqaa vatero tiqaro, Nte nkyi kyaahaqa hirera mwitaa mwitaama hian-inrave, turave. Qio Kotiva nkyi haivaqahuara tiqaro nkyivata kyaahaqa hirero mwi quara turave. Kotiva nkyi haivaqara Evarahaamunra timwa mwinro tiqaro, E mwata humwuanrama tera nraakye qorahua nraakiara variqata mwihua ni kyaiqa vareqata ekyaa mwatanani vari nraakye qorahua kyaahaqama nyatevarave, turave. *(Okyara 22:18)*

<sup>26</sup> Mwianra rieqaro Kotiva nkyiara mwihua uaquia hi aanranra qaqlira kyaate tiro, nai kepuuya vaisi nronraqama kyero nkye varianani titaiharo Jesusiva nkyi nraante kyaahaqa hirera tumunrave, tiro.

## 4

### *Pitaakya Ionikya karavuqi kyora*

<sup>1</sup> Pitaakya Ionikya nraakye qora qati nraahu qua timwa nyi varuvata Kotira nraamwuqi Kotira kyaiqa vara mwate varuhuavata, mwihua piponramwuqaa ntaqikyi varu vaisivavata, Saitiusi vaisinramwuvantovata, mwihua mwitanahua qua ti yarunani nrintora.

<sup>2</sup> Saitiusi mwaanra okyaravanto mwataamama vahiro. Mwihua tiqata, Qutu quari vaisiva hiama qio qaiqaa siquananrove, ti varura. Mwitaa ti varuhuara tita, mwihua Pitaakya Ionikya Iesusirara qutu viraqitairo qati siviho tu quarara mwihua raraqa te varura.

<sup>3</sup> Raraqa tovata mwihua uro nteta mwitanahua ntavaaqavu kyeta enrovatara tita, mwihua hora ko tirerave timwa kyeta karavuqi sitaqita uro kyora.

<sup>4</sup> Karavuqi sitaqita kyovata nraakye qora mwihua vaakya Pitaakya Ionikya qua timwa nyunranra nronraqama kyeta rieta mwi quarara qutaa quave timwa kyeta Iesusira nraaqiaranramwuqi kuairama vita Iesusira nraaqiara varura. Iesusira nraaqiara airiqamaqita vita 5,000 nraakye qora airi varura.

<sup>5</sup> Mwia qanranraa Iutaa vunyaa vaisive, nronra vaisive, mwaanra okyara ti varu vaisihuave, mwihua Ierusaremini ko tirerata ntuvaantuuma vita.

<sup>6</sup> Mwihua mpo uhua kyapata ntuvaantua hora. Mwihua nronra vaisinramwu varirerata, Anaasiva mwiva vunyaa vaisivanto varuvata, mwia nramwunaa Kaiapaasivavata, Ionivavata, Arekisantaavavata, varuvata mwihua nramwunaa mpo uhuavata varura. Mwihua ekyaa ntuvaantuuma vita variqata ko tirera hita

<sup>7</sup> mwihua Iesusiva nronraqama kyo vaisitanahua sitaqita nrumu tiri tivuqaa kyaivata sivila variate tuvata sitaqita nruvata mwitanahua kyapara hita tiqata, Qio nataama kyetave nkyetana mwi kyaiqara vare variavo? Nanra inraikyavanto nkyetana kepuuyaqama kyaihatave nkyetana mwitaa hiavo? Tara nrutu nteqatave nkyetana mwitaa hiavo? tita.

<sup>8</sup> Mwihua mwitaa tuvaro Pitaava Kotira mwanraquravanto mwia utaqi varuvaro mwiva tiqaro, Nkye nraakye qoraqaa ntaqikyi variahuve, Isarerri vaisi nronra vaisinramwuvantove,

<sup>9</sup> tiretana kyuqu uaqama vi vaisira kyuqema mwataunanra nkye mwia kyaara tiritana kyaparama timwatareratave uti variavo? Nataama kyetave tire mwia kyuqema kyaunanra, mwianrave nkye tiri kyapara hiavo?

<sup>10</sup> Nkyevata ekyaa Isarerri vaisivata riaate. Iesusi Karaisira Nasaretinyaanra nkye mwia kyatariqaa hiritaavaro qutu viharo Kotiva mwia qaiqaa vara qati sivuma kyai

vaisira, tiretana mwi vaisira nrutu ntamwa kyauraro mwivama tiritana kyaahaqa ihatama tiretana mwaa vaisira kyuqema mwatauraro mwiaqaatairo mate mwiva nkyi suqaa qio siviro variho.

<sup>11</sup> Kotira mpukuvanto mpo quaqaa ntumwa kyero Iesusirara mwataama tiho: Nkye nraamwu hoqeqlata ori mpo qaqlira kyaava, mwi oriva puhaqamama viho, turave.

(Ihi 118:22)

<sup>12</sup> Iesusiva mwi puhamama variho. Kotiva tiri tivitaarive tiro, Iesusiva mwiva nraahuma tiri qio kyaahaqa hiariva variho. Kotiva hiama vaisi mpo nrutu tinraamwutairaro mwi vaisiva tiri kyaahaqa hiariva variananrove. Iesusiva mwiva nraahuma tire mwatani variarahua kyaahaqa hiqaro huvantu timwataarivama variho, tiro.

<sup>13</sup> Pitaava mwitaa tuvata kaanasorinramwuvanto taqovata Pitaakya Ionikya mwihua suqaa variqata hia aatu hiraitita qua vutu kye tuvata mwihua ntapihi kyovata mwitanahua qumina vaisi hia sikuruqi vutanahua varuvata mwihua mwianra kyauqu ntukikinraaqate varura. Mwitanahua mwi quara tuvata mwihua ntapihi kyovata mwitanahua tauraa Iesusiravatama kyeta nrohi varutanahua varura.

<sup>14</sup> Mwihua mwitanahuqaqua qua vataare tita, taqovaro mwitanahua vaisi mwia kyuqema kyova Pitaakya Ionikya nraaqani siviro varuvata mwihua hia qio qua mwitanahuqaqua vatora.

<sup>15</sup> Hia qio mwitanahuqaqua qua vateva vahuvatara tita, mwihua mwitanahuara tiqata, Nkyetana uro mpoqi varivaqe tire mwi quara ntapihi kyaare, tuvata mwitanahua vuvata mwihua mwi quara nai timwa mwi nai timwa mwi hita tiqata,

<sup>16</sup> Mwi vaisitanahua tire nataave hiananrave? Mwitanahua nronra kyaiqa varavata ekyaa Ierusaremiginaahua mwitana kyaiqa taqaavata tire mwitanahua kyaiqa hia qio uqeta kyaananrave.

<sup>17</sup> Haunri mwaa mwi quara timwaqita vivata ekyaa mpo mwatanaa mpo mwatanaa mwitanahua kyaiqa varaarara rievorave. Nrivaqenramwu qao timwa kyeta mwitanahuara hia Iesusirara mpohua mpohua timwa nyiate qiare, tita.

<sup>18</sup> Mwitaa timwa kyeta mwihua qaiqaa mwitanahua nyaanrama kyeta tiqata, Qio nkyetana hia qaiqaavata Iesusirara nraakye qora timwa nyiate. Tire mwi quara tirara qaoqama tauro, tita.

<sup>19</sup> Mwihua mwitaa tuvata Pitaakya Ionikya tita, Tiretana nkyi qua rieta Kotira qua qaqlira kyaararo Kotiva mwianra qioqave hiananrove? Nkye nkyetavanto tukyama kye tivaqeta tire riaare.

<sup>20</sup> Tiretana variqata tetatana tivuqo taqeta nraatoqi riaunanranra hia qio uqeta taananrave. Tiretana mwi inraikyarara timwa nyiananrave, tita.

<sup>21</sup> Mwitaa tuvata kaanasori mwihua mpoqiyavata kepuqyaqama kye qaoqama teta mwitanahua huvantu kyeta sitovata vura.

Pitaakya Ionikya vaisi mwia kyuqema mwatorara nraakye qoravanto Kotira nrutu tuaahere varurara tita, qumina mwitanahuqaqua qua vataarorave tita, mwitanahua huvantu kyora.

<sup>22</sup> Mwitanahua kyuqu ntanrenra vu vaisira kyuqema kyo vaisiva hia qaraakya vaisi varura. Mwiva 40 ihi vara kyo vaisiva varura.

### *Iesusira nraaqiaranramwu Kotirara aakyara nte varura*

<sup>23</sup> Mwihua Pitaakya Ionikya huvantu kyovata mwitanahua uro ntanteta nkyiari nramwunaa varunani vuhua uro mwini variqata Kotira nraamwuqi Kotira kyaiqa vara mwate varu vaisihua mwihua nronranramwuvanto tu quaravata, mponramwuvanto tu quaravata mwihua timwa nyunra.

<sup>24</sup> Timwa nyuvata mwihua mwi quara rieta, ekyaa mwihua Kotirara aakyara nteqata mwataama tita:

Nronrao, e ekya inraikya ututaaravave, Nyaamwuve, mwatave, kyaarerera nronrave, ekya inraikya nyaamwunive, mwatanive, nramanriqive, vahi inraikyara e nraahu ututaaravave.

<sup>25</sup> Haaru tiri haivaqava Ntevitiva i kyaiqa vaisivanto varuvaro i mwanraquravanto mwia kyaahaqa huvaro mwataa turave:

Nanraqamave mpo mwatanaahua mpo mwatanaahua  
Kotirara raraqa te varihata variavo?

Nanraqamave mwaa mwatanaahua hia mpo okyaravata  
vahiraqaataita Kotiravata ntaqirerata uti variavo?

<sup>26</sup> Mwatanyaa vaisi vunyahua huru kyaamwu terama  
teta mwihua sivita kuairama vita Kotira ntaqu mwateta  
mwiva nronraqama kyai vaisiravata ntaqirerata  
uti variavo, turave.

(Ihi 2:1-2)

<sup>27</sup> Qio Kotio, mwi quara timwa toraqaa mate mwivauma vaiho. E Jesusira nyaamwsaira titoraro mwiva hia uaquia hi kyaiqara utiraitiro, i kyaiqa nraahu varaqiro vuvata nronra vaisi Herotivavata, Pontiaasi Paireativavata, mwitanahua mwaa mwatuqyara Ierusaremiqi ntuvantuuma vita mwitanahuavata, mpo mwatanaavata, Isareri vaisivantovatama kyeta, Jesusira uaqjama mwatarerata uti varurave.

<sup>28</sup> Mwihua Jesusira uaqjama mwatarerera ntuvantua hiqata, haaru e nraante ena kepukyaqove, ena vu nraato tutonanraqaave, Jesusira mwitaama mwaterara tunanranra mwihua hia ntapihurave.

<sup>29</sup> Qio nronrao. Mwihua tiri uaqjama timwatarera qia quara riaante. E ena kyaiqa vaisi tiri kyaahaqa hiraqe tire hia aatu hiraitita, kepukyaqama kye i qua timwa nyianre.

<sup>30</sup> Ena kyauqu tutu kyera tiri kyaahaqa hiraqeta tire nraakye qora nriqa vihua kyuqema nyataare. E tiri kyaahaqa hiraqeta tire Jesusira i kyaiqa vaisi kyuqera mwia nrutuara rieqatama nronra kyaiqa kepukya kyaiqa varaqita quare, tita.

<sup>31</sup> Mwihua mwitaa timwa kyeta Kotirara aakyara ntamwa kyovaro qamwanrama kyero mwihua varu nraamwuve mwiva qakyaa qakyaa huvaro Kotira mwanraquravanto mwiqi varuhua kepukyaqama kyovata mwitaataita mwihua hia vaisi nyaatu aatu hiraitita, Kotira qua vutu kye timwa nyiqi vi varura.

### Mwihua kuaaqi varura

<sup>32</sup> Qio mwi entara Jesusirara qutaa mwivave tuhua kuaaqi variqata mwihua kuaa vu nraato kuaa mwutukya vateta varura. Hia mpovanto nai vato inraikyara nai nraahu tuqara tutora. Mwihua nkyiari vato inraikyara ntainra kyeta nai mwi nai mwi hi varura.

<sup>33</sup> Mwitaa hi varuvata Jesusiva nronraqama kyo vaisinramwuhua kepukyaqama kyeta Jesusiva nronravanto qati sivu quara nraakye qora timwa nyiqita vura. Timwa nyi varuvata Kotiva mwihua kyuqema nyatovata

<sup>34</sup> mwihua variqata kyuqema kyeta nai kyaahaqa hi nai kyaahaqa hi varuvaro hia mpovanto vehi vaisi varura. Vaisivanto nraamwuve, mwatave, vato hua mwi inraikyara mpohua nyita munima vara kyeta varaqita uro Jesusiva nronraqama kyo vaisinramwuhua

<sup>35</sup> nyuvata mwinramwuhua mwi munimanra vara kyeta ntainra kyeqata nraakye qora nyunra. Nyiqata hia airi inraikya vatora vehi vaisi puaama kyeta munima mwita, airi inraikya vatora pataqia mwita mwitaamaqi vita ntainra kyeqata nkyiari nramwunaahua nyunra.

<sup>36-37</sup> Mwitaamaqita vuvaro vaisi mpovanto mwia nrutu Iosepiva, mwiva Rivaira okyaraqinaanra Saiparaasini mwataqatairo munima vara kyero varaqiro uro ekya mwi munimanra Jesusiva nronraqama kyonramwuhua

nyunra. Iesusiva nronraqama kyo vaisinramwuhua mwi vaisira mpo nrutu ntamwa teta mwianra Vanavaasirave. Mpohua Kyaahaqa Hiani Vaisirave, tura.

## 5

### *Ananaiaasikya Sapairaakya qua*

<sup>1</sup> Vaisi mpovanto mwia nrutu Ananaiaasiva nai nraata Sapairaakyantiri varura. Mwitanahua mwata mpo mpohua nyita munima varovaro Ananaiaasiva hini munima tetatana tutarerave

<sup>2</sup> tuvaro mwia nraatavantovata mwi quara riovaro Ananaiaasiva hini munima nraahu varero uro Iesusiva nronraqama kyo vaisinramwuhua kyuqutarani vatero tiqaro, Nte ntene naatantiri teta mwataqaataita munima varaunanra ekyaa mwi munimanrama nkyi nyuqo, tiro.

<sup>3</sup> Tuvaro Pitaava qaqao tiro, Ananaiaasio, nanraqamave e kyaararo Saataaniva iqaa ntaqikyi varihara e mwia qua rieqarama Kotira mwanraqura unra qiaro? E ena mwata nyinra munima vara kyera hini munima ena vatera e unra tiqarama, Nte ekyaa munima nkyi nraahu nyuqo, tira hiaro.

<sup>4</sup> Tauraa hia mwi mwataqaataira kyoqaa varaana entara mwi mwatava i mwata vahurave. Mwiaqaataira mwi mwatara mpohua nyinra munima varaararo mwi munimava i munima vahirave. Qio nanraqamave hini munima ena tутera hini munima nraahu tiri timwinra tiri unra tiqarama, Nte ekyaa mwi munimanra nkyi nraahu nyuqo, qiaro? E hia tiri qumina vaisi unra qiaro, E mwitaa tiqarama Kotirama unra tira hiaro, tiro.

<sup>5</sup> Mwitaa tuvaro Ananaiaasiva mwi quara riemwa kyero qamwanrama tumu ntiro qutu viro. Qutu vuvata ekyaa mwi quara riohua mpoqama kyeta aatu hi varura.

<sup>6</sup> Mwiva qutu vuvata qaraakya vaisinramwuvanto vera nteta mwia mwamwanta qapuqama kyeta vareta uro quntamwa tora.

<sup>7</sup> Quntamwa tovaro pataqia vari kyero (huari vuvanto 3 ua vara kyovaro) mwia nraatavanto hia mwi quara riaraitiro, mwiqi vera ntero.

<sup>8</sup> Mwiva mwiqi vera ntovaro Pitaava mwianra tiqaro, Qio nkyetana mwata nyita munima varaara qio mwia ekyaa mwinramwunrave iho? tuvaro mwiva tiqaro, Eo, qio mwia ekyaa mwinramwunrave, tiro.

<sup>9</sup> Mwitaa tuvaro Pitaava tiqaro, Qio nanraqamave nkyetana mwi quara unra qua tirerave timwa kyetatana Kotira mwanraqura unra qiavo? Qio taqaante. I vaati uro quntamwa taahua qesana variavo. Mwihua ivata uro quntevarave, tiro.

<sup>10</sup> Mwitaa tuvaro mwi nraakyeva qamwanrama tumu ntiro qutu viro. Mwitaa huvata qaraakya vaisinramwuvanto vera nteta taqovaro mwiva qutu vuvata mwiaavata varaqita uro nai vaati tataaqqa quntamwa tora.

<sup>11</sup> Quntamwa tovata ekyaa Iesusira nraakyeye qora mpoqama kyero nyaatu qatovata aatu hi varuvata ekyaa mwi quara riohuavata mpoqama kyeta aatu hi varura.

### *Nronra kyaiqa varorara tura*

<sup>12</sup> Mwitaa huvata Iesusiva nronraqama kyo vaisinramwuhua nraakyeye qora kyaa-haqa hirerata nronra kyaiqa mpo kyaiqa mpo kyaiqa vare varura. Mpo enta mpo enta Iesusira qua riohua Kotira nraamwuqi vera ntosata Soromoninra nraamwuve tunani ntuvantuuma viqata varura.

<sup>13</sup> Mwihua mwini kuairama vita varuvata qati nraakyeye qoravanto mwihuara kyuqe hiahuave timwa kyeqata aatuma kyeqata nyianrasata variqata hia mwihuavata kuairama vita varura.

<sup>14</sup> Mwi entara vaisivata nraakyevata airi kyaatavanto nraahu Iesusirara qutaave timwa kyeta Iesusira nraaqiaraqama vita kuaaqi varura.

<sup>15</sup> Iesusiva nronraqama kyo vaisinramwuhua nronra kyaiqa varaqita vuvata mwi mwatanaahua nriqa vuhua sitaqita uro aanrani taariqaave, taintaqaave, vateta tiqata, Pitaava nritareqaro mwiva hia nkyi tu varairera, mwia mamanaanruvanto nkyi mwamwanta kyugema kyaarive, timwa kyeqata aanraqaa sitaqiqata uro vatora.

<sup>16</sup> Hisai hisai mpo mwatukya mpo mwatukyaqitaita vaisi airivanto nriqa vu nraakye qorahuave, ueravanto utaqi varuhuave, sita vareta Ierusaremini uro kyovata Iesusiva nronraqama kyo vaisinramwuhua mwihua kyugema nyatora.

### *Iesusira nraaqiaranramwu uaqiamma nyatorara tura*

<sup>17</sup> Mwihua mwitaamaqita vuvata Kotira nraamwuqi Kotira kyaiqa vara mwate varu vaisihua mwihua nronra vaisivantovata, mwihua nramwunaahua Saitiusi vaisinramwuvata, mwihua variqata taqovata airi nraakye qoravanto Iesusiva nronraqama kyonramwuhua qua riovata mwihua tiri qua nraahu riaataarave tura.

<sup>18</sup> Mwitaa timwa kyeta uro Iesusiva nronraqama kyo vaisinramwuhua ntavaaqavu kyeta karavuqi sitaqita uro kyora.

<sup>19</sup> Mwiqi uro kyovaro entaqi Kotiva titova nyaamwunyaava karavu nraamwu qesa qatua kyero Iesusiva nronraqama kyo vaisinramwuhua sitaqiro tumu mwaatani kyero timwa nyinro tiqaro,

<sup>20</sup> Uro Kotira nraamwuqi sivita variqata qaraakyaqama kye qati variqi vi okyarara nraakye qora timwa nyiate, tiro.

<sup>21</sup> Mwitaa tuvata mwinramwuhua mwia qua rieta mwia qanranraa ntuvahama vuvata uro Kotira nraamwuqi variqata nraakye qora mwi quara timwa nyunra.

Mwinramwuhua mwini uro varuvata Kotira nraamwuqi Kotira kyaiqa vara mwate varuhua mwihua nronra vaisi mwivavata, mwia nramwunaahuavata, mwihua ntuvantuama vita Iutaa vaisi nronra vaisi kaanasori mpoqiani mpoqiani nyaanrama kyeta tiqata, Nrivaqenramwu mwaaqi variqata qua avuqavu hiare, timwa kyeta ntuvantuama vita variqata Iesusiva nronraqama kyo vaisinramwuhua uro sitaqita nriate tuvavata

<sup>22</sup> uro sitaare tita, taqovata mwinramwuhua hia karavuqi varuvata mwihua uro ntanteta kaanasorinramwu uro timwa nyita tiqata,

<sup>23</sup> Tire karavuqi uro taqauraro qesa rutaavararo piponramwu mwaaqani quesana ntaqikyi variavata tire qesa qatua kyeta taqauraro hia vaisi mpovanto karavu nraamwu utaqi variho. Ekyama quavo, tita.

<sup>24</sup> Mwitaa tuvata karavuqaa ntaqikyi varuhua vunyaaavavata, Kotira nraamwuqi Kotira kyaiqa vara mwate varuhua mwihua nronra vaisinramwuvata, mwihua mwi quara rieta tiqata, Nataama kyetave mwi vaisinramwuhua quavo? tita.

<sup>25</sup> Mwitaa ti varuvaro vaisi mpovanto vera ntero timwa nyinro tiqaro, Riaate, nkye karavu rupa kyaahua, mwinramwuhua Kotira nraamwuqi variqata nraakye qora qua timwa nyi variavo, tiro.

<sup>26</sup> Mwitaa tuvata karuvaqaa ntaqikyuhua nkyiari vunyaa vaisivatama kyeta uro Iesusiva nronraqama kyo vaisinramwuhua sita vareta nrunra. Nraakye qoravanto oriqotaita tiri ntquqtu kyevorave tita, mwihua qati qihakyama kyeta sita vareta nrunra.

<sup>27</sup> Mwihua mwinramwuhua sitaqita uro kaanasori suqaa kyovaro Kotira nraamwuqi Kotira kyaiqa vara mwate varu vaisihua mwihua nronra vaisivanto mwinramwuhua kyaparama nyatero tiqaro,

<sup>28</sup> Tire nkyinramwuanrama hia Iesusrara nraakye qora timwa nyiate, turo. Mwianra tire nronraqama kyeta qao timwa taunanrave. Qio taqaate. Nkyenramwu ekyaa Ierusaremiqi nrohiqata mwi quara timwa nyi variavo. Nkyenramwu Iesusira rukyaa quara tiriqaa ntumwa tarerata uti variavo, tiro.

<sup>29</sup> Mwitaa tuvaro Pitaavavata, Iesusiva nronraqama kyo vaisinramwuhua mpo uhuavata, tiqata, Kotiva mpo qua tiraro qumina vaisivanto nai riemwa kyero mpo qua tirera, tire Kotira qua nraahu riemwaqita virerave.

<sup>30</sup> Nkye Iesusira ninriqotaita kyatariqaa rukye hiritovaro mwiva qutu vuvaro mwiaqaatairo tiri haivaqahuaqaa ntaqikyi variva, Kotiva mwia qaiqaa qati vara sivuma kyorave.

<sup>31</sup> Kotiva mwia qati vara sivuma kyero mwia nronraqama kyaiharo mwiva mate Kotira kyaauqu kyaatutani kepukyavanto tiri kyaahaqa hiariva variho. Tire Isareri vaisivanto variqata uaquia hi aanranra qaqlira kyaararo mwiva tiri kyaahaqa hiananrove. Mwiva kepukyavanto variqaro qioma tire uaquia hi kyaiqara varaana quara nruka timwa taananrove.

<sup>32</sup> Tire teta tivuqotaita taqaunananra tire mwi inraikyarara timwaqi vireratave. Tirevata, Kotira mwanraquravantovata, mwi quara nraahu timwaqita vireratave. Kotiva nai qua riemwaqita nrohiahua nraahu nai mwanraqura nyi varivave, tita.

<sup>33</sup> Mwitaa tuvata kaanasori mwihua mwi quara riovoro mwihua mpoqama kyero raraqa tovata mwihua mwinramwuhua ru kyaare tita utura.

<sup>34</sup> Ru kyarera uti varuvaro kaanasori mpovanto mwia nrutu Kamerieriva, mwiva Parisi vaisi mwaanra qua okyara ti varuva, nraakye qora mwianra kyuqe vaisive ti varuva, mwiva kaanasori nraamwuqi siviro Iesusiva nronraqama kyo vaisinramwuhuara tiqaro, Mwaaqitaita mwihua vara veva kyaate, tiro.

<sup>35</sup> Mwitaa timwa kyero mwiva kaanasori mwihua timwa nyinro tiqaro, Nkye Isareri vaisinramwuvantove, hiama paparuqa hiqata mwi vaisinramwuhua ruate. Nkyeta vararera hi kyaiqara qakyoma kyeta nraato riemwaqi viqata varaate.

<sup>36</sup> Haaru vaisi mpovanto mwia nrutu Tiutaasiva qovarama vurave. Mwiva nte nronra vaisive tuvata airi vaisi 400 vanto mwia kyuquqaa vitinteta, kamaninravata ntaquare tuvaro kamaniva mwia ru kyovata mwia vataqi vuhua aatu ntuqeqla hita vivu kyaavuma vurave. Mwitaa huvaro mwi vaisira kyaiqvanto ekyaara taiqa vurave.

<sup>37</sup> Qio qaiqaa nrutu vare varu entara mpovanto mwia nrutu Iutaasiva mwiva Karirinyaava qovarama viro varuvata vaisi airivanto mwia vataqita vuvaro qio mwiavata ru kyovata aatu ntuqeqla hita vivu kyaavuma vurave.

<sup>38</sup> Mwianra rieqanama mwaa vaisinramwuhua hia mpo qara hiate. Qati kyaivata quate. Mwihua kyaiqvanto qati qumina vaisivanto nai riemwa kyero varai kyaiqava vahirera, mwihua kyaiqvanto qati quminavau quananrove.

<sup>39</sup> Mwihua kyaiqvanto Kotiraqaatairo qovarama virera, hiama qio nkye mwi vaisinramwuhua nraatara kyevarave. Nkye haunri Kotiravatama kyeta ntaquqita vivorave, tiro.

<sup>40</sup> Kamerieriva mwitaa tuvaro mwia quavanto kepukyaqa huvata mwihua mwia qua riora. Mwiaqaataita Iesusiva nronraqama kyo vaisinramwuhua nyaanrama kyeta mwinramwuhua kyaamwuqotaita ntuqutu kyeta vateta tiqata, Hia qaiqaavata Iesusira nrutu nteqata mpohua mpohua timwa nyiate, timwa kyeta mwinramwuhua huvantu kyora.

<sup>41</sup> Mwihua huvantu kyovata Iesusiva nronraqama kyo vaisinramwuhua veva nteta viqata Kotira nrutu tuaahereta tiqata, Kotiva tiriara mwihua Iesusira nrutuara rieqatama kyaaurira inraikya vareqata kepukyaqamakye varivarave titatara titama, tire mpoqama kye qamwateqata varuro, tita.

<sup>42</sup> Mwiaqaataita mwinramwuhua mpo enta mpo enta Kotira nraamwuqive, qati vaisi nraamwuqive, mwipi mwihua kyuqe qua Iesusiva tiri kyaahaqa hiarivave tu quara nraakye qora timwa nyiqi vi varura.

## 6

*Kyaahaqa hi vaisihua 7 nramwu mwatama tora*

<sup>1</sup> Mwi entara Iesusira nraaqiara airiqamaqita vi varuvata mwihuaqitai mpo uhua inronra hi varura. Iutaanramwu Kiriki qua tuhua variqata Iutaa nkyiari Hivuru qua tuhuavata inronra hita tiqata, Mpo enta mpo enta nkye munima ntainra kyeta vehi nraakyе qora nyiqata hiama tirivatama kyeta tetooq nraakyе variahua nyiavo, tita.

<sup>2</sup> Mwitaa tuvata Iesusiva nronraqama kyo vaisinramwuhua ekyaa Iesusira nraaqiara mwihua ntuvaantuama kyeta tiqata, Tire Kotira qua qiana kyaiqara qaqla kyeta munima ntainra kyeta nyiana kyaiqara nraahu varaqita quarorave.

<sup>3</sup> Tiri tiqata vakyaahua nkye riaate. Vaisi 7 nramwu kyuqe su nyaato vataahua Kotira mwanraqravanto qiani quara kyuqema kyeta riemwaqita vi vaisihua sitaqita nrivaqeta tire mwihua mwi kyaiqaraqaa ntaqikyitaarata varaate.

<sup>4</sup> Mwihua mwi kyaiqara vare varivaqeta tire Kotirara aakyara ntamwaqi viqatama Kotira qua nraakyе qora timwa nyiqi quare, tita.

<sup>5</sup> Mwitaa tuvata nraakyе qora kuairama vuhua mwihua ekyaa mwinramwuhua quara qamwata kyeta mwi kyaiqara varehua mwatama teta. Mwihua mwaa vaisinramwuhua mwatama tora:

Sitiveninra. Sitiveniva Iesusirara kepuuyaqama kyero  
riemwaqiro vuvaro Kotira mwanraqravanto mwia  
utaqi varuvaro mwiva mwia qua ekyaa qua  
riemwaqiro vura.

Piripira, Porokorasira, Naikenonra,

Taimoninra, Pamenasira,

Antiokinyaava Nikorasira. Nikorasiva mwiva

tauraaqama kyero mpo mwatanaava variqaro nai  
nraaquhua taatohua okyara qaqla kyero Iutaa kyaiqa  
varero qio mwiaqatairo Iesusira qua riero Iesusira  
nraaqiaraqama vura.

<sup>6</sup> Qio mwi vaisinramwuhua sitaqita uro Iesusiva nronraqama kyo vaisinramwuhua hunani kyovata mwihua nkyiari kyuqu mwihuaqaa vateta Kotirara aakyara ntora.

<sup>7</sup> Qio Iesusira nraaqiaranramwuvanto Kotira qua timwa nyiqi vuvaro mwi quava mpoqiaavata viro nrinro huvata airi vaisivanto mwi quara riora. Ierusaremini Iesusira nraaqiara airiqama vuvata Kotira nraamwuqi Kotira kyaiqa vara mwate varu vaisihua airivantovata Iesusirara qutaa mwivave timwa kyeta Iesusira nraaqiaraqama vura.

*Sitiveninra karavuqama kyora*

<sup>8</sup> Qio Sitiveniva Kotirara kepuuyaqama kyero riemwaqiro vuvaro Kotira kepuuyaqanto mwiaqi varu vaisiva variqaro nraakyе qora suqaa variqaro Kotira kyaiqa nronra kyaiqa, mpo kyaiqa mpo kyaiqa varaqiro vura.

<sup>9</sup> Mwitaa huvata vaisi mponramwuvanto Sitiveninravata inronra hirerata nrunra. Mwi vaisihua mpo qua riohua nkyiari mwaanra nraamwu mwia *Huvantu Kyaa Vaisira Nramwuve* tura. Mwi vaisihua Iutaa mponramwuvanto Sairininyaahuavata, Arekisantirianyaahuavata, varuvata mponramwu Sirisianyaahuavata, Esiaanyaahuavata varura.

Mwihua Sitiveninra inronra hirerata nruvaro

<sup>10</sup> Kotira mwanraqravanto Sitiveninra kyaahaqa huvaro mwia quavanto kepuuyaqa huvatara titi, mwi vaisinramwuhua hia qioqama kye mwia qua nraatara kyora.

<sup>11</sup> Mwihua hia qio mwia nraatara kyaaqara huvata mwihua vaisi mponramwu utaru munima nyita tiqata, Nkyenramwu Sitiveninraqaa unra qua ntumwa kyeta tiqata

mwitaama qiate, Sitiveniva Mosesiraravata Kotiraravata uaquia hi quarama ti varihata riaunanrave, qiate, tita.

<sup>12</sup> Qio mwihua mwitaama kyeta unra qua tuvata Iutaa nronra vaisive, mwaanra okyara ti varu vaisihuave, mwihua mwi quara riovaro mwihua raraqa tovata mwihua uro Sitiveninra ntavaaqavu kyeta vitaqita uro kaanasorivanto ntuvantuama vita varuraqi kyora.

<sup>13</sup> Kyeta mwihua vaisi mponramwu Sitiveninraqaa unra qua vataate tita, nyaanrovata mwihua nrumbu tiqata, Mwaa vaisiva ena ena iharo Kotira nraamwuanra uaquia hi quara ti variho. Mwiva Mosesiva mwaanra qua timwa torara uaquia hi quara ti variho.

<sup>14</sup> Tire airivanto varunanraqa mwiva mwataama tiho. Iesusiva Nasaretinyaava mwaa nraamwunra Kotira nraamwu ntapairi kyaananrove, tiho. Iesusiva Mosesira mwaanra qua qaqlira kyero qaraakya qua tiri timwiananrove, tiho. Sitiveniva mwi quara mwi quara tihata riaunanrave, tita.

<sup>15</sup> Mwitaa ti varuvata kaanasorinramwuvanto nraamwuqi varuhua variqata Sitiveninra taqovaro mwia viri kyuqe viri nyaamwunyaahua siri voti huva vhaura.

## 7

### *Sitiveniva nkyiari timwa nyu quara*

<sup>1</sup> Mwihua unra qua mwitaa tiqata Sitiveninraqaa qua vate varuvaro Kotira nraamwuqi Kotira kyaiqa vara mwate varu vaisihua mwihua nronra vaisivanto Sitiveninra kyapara hiro tiqaro, Qio mwihua quataave tita hiavo? tuvaro

<sup>2</sup> Sitiveniva tiqaro, Ni kata pakyaahuavata ni kohuavata nkye nte qianinra rie variate. Haaru Evarahaamuva tiri haivaqava mwiva hia Haraanini vu entara mwiva Mesopotemia mwatani varuvaro mwanriqa peqavanto Kotiva qovarama viro

<sup>3</sup> Evarahaamunra timwa mwinro tiqaro, Ena nramwunaahuavata, ena mwaatavata, qaqlira mwaini kyera nte i nraamwutaani mwatarani quante, turave.

<sup>4</sup> Mwitaa tuvaro Evarahaamuva Karatia mwatani varura mwini kyero kyatiro uro Haraanini varurave. Qio nai qova qutu vuvaro Kotiva qaiqaa tuvaro Evarahaamuva mwaa mwatarana nkye variara mwaini nrunrave.

<sup>5</sup> Mwi entara Kotiva hia Evarahaamunra mwata mwunrave. Evarahaamuva nai kyuqu ntamwa taani mwatarana mpoqiyavata hia mwunrave. Mwi entara Kotiva kyauqu nriqiqaa vatero Evarahaamunra timwa mwinro tiqaro, Qio mwaa mwatarana nraakiara nte i mwinrenrave. Mwaa mwatarana i mwatama vahiananrove. E nraaqiara mwataraterahua mwatama vahianarove, turave. Qio mwi entara Kotiva nriqiqaa kyauqu vateqaro tu entara hia Evarahaamuva nraaqiara mwato entara

<sup>6</sup> Kotiva mwaa quara timwa mwinro tiqaro, Nraakiara e mwata humwuanramatera nraaqiarahua mpo mwatani uro varivata mwi mwatanaahua e mwataraterahua qoraqamaqita vi varivata mwihua airi ihi 400 ihiara mwi mwataraqi variqi vivarave.

<sup>7</sup> Qio mwi entaraqataina nte e mwataraterahuaqaa ntaqikyihua mwihuaqaa qua vateqanama mwihua qoraqama nyataaninrave. Nte mwihua qoraqama nyataarita mwiaqataita e mwataraterahua mwi mwataraqataita kyatita nrumbu mwaa mwataraqaa variqata ni nutu tuaaheraqita vivarave, turave.

<sup>8</sup> Kotiva mwitaa timwa kyero nai kyauqu nriqiqaa vato quarara Evarahaamuvavata, mwiva mwatarataihuavata, qati nraahu riemwa taate tiro, Kotiva qoraisi nraaqiara mwamwanta toqaani okyarara Evarahaamunra mwunrave. Mwiaqatairo Evarahaamuva nai nraaqiara Aisaakira mwatatovaro 8 enta nritarovaro mwia mwamwanta toqa mwatorave. Aisaakiva Iaikopura qova varuvaro Iaikopuva tiri haivaqahua 12 nramwu sova varurave.

<sup>9</sup> Qio tiri haivaqahuanramwu variqi vita, mwinramwuhua nkyiari sata Iosepira kyaru kyaaruma mwateta mwia uaqama mwatarerata mwia ntavaaqavu kyeta mpo

mwatanaahua nyita munima varovata Iosepira rupaqita uro Isipini kyora. Mwini uro kyovaro Iosepiva mpo mwatanaahuaqaa quminaqama kyero kyaiqa vare varuvaro Kotiva mwiavata varurave.

<sup>10</sup> Kotiva mwiavata variqaro Iosepira mwia kyaahaqamaqiro vuvaro mwiva qio varurave. Perova Isipi mwataqaa ntaqikyuva Iosepira nraanrovaro mwiva mwia vuqaa uro varuvaro Kotiva mwia vu nraato kyaahaqa huvaro Perova mwianra kyuqe vaisivanto kyuqe vu nraato vataavave timwa kyero mwia nronraqama kyero tiqaro, Nte vunyava variarira e ni naakiara variqarama ni nraamwuqaavata ni mwataqaavata ntaqikyiyante, turave.

<sup>11</sup> Qio mwi entara nronraqama kye aara nto entava Isipinivata Kenaaninivata vahuvata nraakye qora uaqama kye varuvata tiri haivaqahuanramwuvata kyarara hurave.

<sup>12</sup> Mwitaa huvaro Iaikopuva riovoro kyara (raisi voti huva) Isipini vahuvo tuvaro riero mwiva tiri haivaqahuanramwu mwini sitovata vurave.

<sup>13</sup> Mwihua mwini taara nani vuvaro Iosepiva qoqaa timwa nyinro tiqaro, Nte nkyi satavantove, tuvaro Perova Iosepira vataahuara riero qamwata nyatovaro

<sup>14</sup> Iosepiva qua vara kyero nai qorara tiqaro, Evata, ena nraakye nraaqiararavata ekyama mwaini Isipini nriate, tuvata nraakye qora 74 nramwuvanto Isipini vurave.

<sup>15</sup> Iaikopuva kyatiro uro Isipini variqiro viro qutu vuvata tiri haivaqahuanramwuvata mwini variqi vita qutu vurave.

<sup>16</sup> Mwinramwuhua qutu vuvata mwihua mwamwanta mwia varaqita Sekemi mwatani uro Evarahaamuva munima nyuvata Hamonraa mwatanaavanto mwata mwunraqi quntamwa torave.

<sup>17</sup> Qio airi ihi nritarovaro Kotiva haaru nai nriqiqaa kyauqu vateqaro Evara-haamunranra e mwataraterahua kyaahaqa hirerave tu entava qaumato vahuvata nraakye qoravanto kyatita Isipini vuhua airiqama vuvaro

<sup>18</sup> vaisi mpo vunyaa vaisivanto hia Iosepira ntapihi kyova qovarama viro Isipiqa ntaqikyirero varurave.

<sup>19</sup> Mwiva hia tiri haivaqahuaqaa ntapihi kyero ntaqikyiqiro viraitiro, mwiva mwihua uaqamaqiro viro tiqaro, Nkye nraaqiara mwata kyeta qaqlira kyaivata qutu quate, turave.

<sup>20</sup> Perova mwitaa tuvaro tiri haivaqava mpovanto Mosesira mwatatoraro mwiva nraaqiara kyuqeva varuvaro mwia nrova hia mwia qaqlira kyaraitiro, tora taaram-ponramwuanra nraamwuqi mwia uqeta kye ntaqikyiqiro viro

<sup>21</sup> mwiaqaatairo vitaqiro nramanri tokyani uro uqeta tovaro Perora nraamwun-ravanto mwia puaama kyero, Nte mwia virirerave, timwa kyero mwiva nai nraaqiaraqaa ntaqikyunteema kyero mwiaqaa ntaqikyiqiro vurave.

<sup>22</sup> Ntaqikyiqiro vuvata Mosesiva ekyaa Isipi mwatanaa okyarave kyaiqave nraamwutovaro Mosesira kyaiqvantovata quavantovata anomia kyero kyuqe hurave.

<sup>23</sup> Qio Mosesiva 40 ihi vara kyero mwiva tiqaro, Kyai nte ntena nramwunaahua Isareru uro taqaankye, timwa kyero

<sup>24</sup> uro taqovaro Isipi vaisi mpovanto Mosesira nramwunaa mpo uaqama mwate varuvaro Mosesiva nai nramwunaa mwia kyaara Isipi vaisi mwia ru kyero kyorave. Mosesiva nai riero tiqaro,

<sup>25</sup> Ni nramwunaahua nianra mwitaama tivarave. Tiri kyaahaqa hiarive tiro Kotiva titaiharo nrivave. Mwihua nianra, Mwi vaisiva mwaa kyaiqara uaqla hi kyaiqaraqitairo tiri huvantu timwataarivave tivarave, tiro. Mosesiva mwihua mwitaave tivarave tuvatavata mwia nramwunaahua hia mwitaa turave.

<sup>26</sup> Varuvaro mwia qanranraa Mosesiva taqovata mwia nramwunaa Isareritanavanto nkyiaritana nraahu ntaqi varuvaro Mosesiva uro mwitanahuara tiqaro, Eqaate.

Nkyetana mwaini riaate. Nkyetana kuua nramwunaave. Nanraqamave nkyetana ntaqi variavo? tuvaro

<sup>27</sup> vaisi mpovanto nai hena vaisi ri varuva Mosesira rataa kyero tiqaro, Tava iara tiriqaa nronraqa hira ntaqikyante tiharave nrianro?

<sup>28</sup> E enta Isipi vaisi mpo ru kyaarantema kyera nivata ru kyarerarare uti variaro? tiro.

<sup>29</sup> Tuvaro Mosesiva mwi quara riero Isipisairo aatu ntugema kyero uro mwata mpo Mitiaanini varurave. Mwini variqaro mwiva qoraisi nraaqiara taaratana mwatatorave.

<sup>30</sup> Mwini variqiro vuvaro 40 ihi nritarovaro Mosesiva qumina mwatanai Sainai taaqi nraaqani nrohiqaro taqovaro kyatari mpo qia ite varuvaro mwiqitairo Kotiva titova nyaamwunyaava qovarama vurave.

<sup>31</sup> Qovarama vuvaro Mosesiva nrihanrama viro vaisairo kyatari ite varura taqarerave timwa kyero riovoro Kotira quavanto mwiqitairo mwia timwa mwinro tiqaro. Nte mwanriqvantove.

<sup>32</sup> Nte nkyi haivaqahua Evarahaamunrave, Aisaakirave, Iaikopurave, mwihuaqaa ntaqikyi varuvave, tuvaro Mosesira mpoqama kyero kyuqu kyauqu ntuvuro mwi inraikyara taqaankyorave tiro aatu hi varuvaro

<sup>33</sup> Kotiva timwa mwinro tiqaro, E variana mwatara mwia kytataqaave. Ena kyuqu nraamwuma taananra qatinani vara kyera sivira variante.

<sup>34</sup> Nte taqauqata Isipivanto ni nraakyne qora uaqima nyate variavo. Ni nraakyne qoravanto atura ntqata qiera nte riena mwihua kyaahaqa hirerarama tumuqo. Qio nrinraqena nte i Isipini titaankye, turave.

<sup>35</sup> Qio mwi vaisira Mosesira tauraa Isarerivanto mwia qorima kyeta tiqata, Tava i vara nronraqama kyero tiriqaa ntaqikyante tiharave nrianro, tu vaisira, mwi vaisira Kotiva nronraqama kyero tiri haivaqahua kyaahaqa hirero mwihuaqaa ntaqikyiarive tiro, mwia titorave. Kotiva titova nyaamwunyaava qia ito kyatariraqi variqaro Mosesira Kotira qua timwa mwuvaro

<sup>36</sup> Mosesiva vuva uro tiri haivaqahua Isipiqitairo sitarera hiro Isipiqivata kyaarera Nraanre nramanriqiaavata qumina mwatanivata nronra kyaiqa varaqiro vurave. Qumina mwata mwiaqaa 40 ihiara nronra kyaiqa varaqiro viqaro tiri haivaqahua sitaqiro nrumu mwaini kyorave.

<sup>37</sup> Qio mwi vaisiva Mosesiva Isarerri nraakyne qora timwa nyinro tiqaro, Kotiva ni titaintema kyero vaisi mpo titairaro mwi vaisiva Kotira qua qiananrove. Mwi vaisiva nkyiqitairoma qovara hiananrove, turave.

<sup>38</sup> Tiri haivaqahua mwihua hia vaisivantovata varu mwatara qumina mwataqaa variqi vuvaro Mosesiva mwihuaavata varurave. Mwiva tiri haivaqahuavata varuvaro nyaamwunyaava Sainai taaqiqaa variqaro Mosesira timwa mwuvaro mwiva Kotira qua qati vahiqiro quani quara varero tumu mwi quara tiri haivaqahua timwa nyunrave.

<sup>39</sup> Mwiva Kotira qua varero tumu tiri haivaqahua timwa nyuvata mwihua hia mwi quara riarerave timwa kyeta Mosesira qua raaquta kyeta qaiqaa Isipini quataa huvata varurave.

<sup>40</sup> Qio (Kotiva mwia nraanrovoro Mosesiva Sainai taaqiqaa mwaanri ntero vuvata) mwihua Eroninra (Mosesiva tauraa varuvaro mwiva mwia nraakiara varurara) tiqata, E tirini mwanriqa mponramwu ututairata mwihua tiri tivuni viqata tiriqaa ntaqikyiate. Mosesiva tiri Isipisairo tivitaqiro nriva nai tainive viho? turave.

<sup>41</sup> Mwitaa timwa kyeta mwihua qati inraikyaqo purimakau nraati utu kyeta mwi inraikyara mwanriqave timwa kyeta mwi inraikyara qamwata mwatarerata nkyiari quara ru kyeta qia quara mwatorave. Mwihua mwitaa hiqata nkyiari kyauquqotaita ututo inraikyara nrutu tuaaherarerata omwatavata nronrave.

<sup>42</sup> Mwitaa huvaro Kotiva mwihua taqero mwoqa nyinro nkye uaqia hi kyaiqara utuqita quate tuvata mwihua qumina nyaamwuqi vahi inraikyara huarive, torave qovorave, mwi inraikyarara mwanriqvantove timwa kyeqata qamwataqita vurave. Poropeti mpukuqi Kotiva mwitaama tiro:

Isareri nraakyе qora tuaavo,  
nkye 40 ihiara qumina mwatani nrohiqatama  
nkye hia nini sipisipive purimakauve  
ru kyeta qia quara matorave.

<sup>43</sup> Qaqao, nkye nkyeta mpo inraikya mpo inraikya ututo inraikyarara quara rukyeta qia quara mwate varurave.

Nkye qumina mwatani nrohiqata mwanriqa mpo mwia nrutu Morokura nkye mwia seri nraamwu vara qu vareqata nrohi varurave.

Mpo inraikya nkye qovora mwia nrutu Repaninra nkye mwiavata vareqata nrohurave.

Mwi inraikyarara mwanriqave timwa kyeqata qamwata mwatarerata utu torave.

Qio mwia kyaara nte nkyi nyianra  
Papironi mwia mwoqani vahi mwatarani  
sitaarita vivarave, turave.

(Emosi 5:25-27)

Kotiva mwitaa turave.

<sup>44</sup> Qio tiri haivaqahua qumina mwatani hia vaisivantovata varu mwataaraqaa variqi viqata mwihua seri nraamwu Kotira nraamwu vareqata nrohurave. Mwi nraamwunranra Kotiva Mosesirara mwataama kyera ututaante tuvaro ututorave.

<sup>45</sup> Mwia nraakiara tiri haivaqahua mwi nraamwunra nkyiari sohuamwanraqaataita vara kyeta varaqi viqata mwihua Iosuaara vatama kyeta vi varuvaro Kotiva mpo mwatanaa mpo mwatanaahua qatinani vara kyovata tiri haivaqahua mwihua nraatara kyeta mwihua mwata varorave. Qio tiri haivaqahua seri nraamwu mwiqi variqi vuvaro tiri haivaqava Ntevitiva varu entava nri ntovare.

<sup>46</sup> Nri ntovaro Kotiva Ntevitirara qamwateqaro varuvaro Ntevitiva Kotirara tiqaro, E tiri haivaqara Iaikopuraqaa ntaqikyi variaravave. Qiove nte ini nraamwu hoqa mwataaninrave? tuvaro Kotiva qaqao tiro, I mwaqvavanto hoqa mataarive, tuvaro

<sup>47</sup> mwia mwaqvavanto Soromoniva Kotira nraamwu hoqa mwatorave.

<sup>48</sup> Qio riaate. Kotiva mwiva kepukyavanto nyaamwuni variva mwiva hiama qumina vaisivanto hoqataa nraamwunraqi variananrove. Kotiva nai poropeti vaisi timwa mwinro tiqaro:

<sup>49</sup> Nyaamwuvanto nte mwata kyaavina variqana  
ekyaa inraikyaaqaa ntaqikyiari taintavama vaiho.  
Mwatavanto nte kyuqu mpiami vataarivama vaiho.  
Nkye nanra nraamwuve hoqa matevarave?  
Hiama nte variani nraamwunra nkye qio hoqa tevarave.  
Hia nte qio nraamwuqi varianinrave.

<sup>50</sup> Qutaave nte ntena kyauquqotaina ekyaa mwi  
inraikyara utu kyena vataurave? turave.

(Aisaiaa 66:1-2)

Kotiva mwitaa turave.

<sup>51</sup> Nkye Kotira qua hia riaataa ihata hia riaavo. Nkyi mwutukyave nkyi nyaatovanto unra mwanriqanra vaiho. Nkyi mwutukyavanto hiama Kotirara vaiho. Nkye nkyeta haivaqahua nraantanteta Kotira mwanraqurara hia kyakya ihatama variavo.

<sup>52</sup> Nkyi haivaqahua Kotira qua tu vaisihua ekyaa mwihua uaqama nyatorave. Kotira qua tu vaisihua takuravata hia uaqama nyatorave, ekyaa mwihua uaqama nyatorave. Kotira qua tu vaisihua haaru qumina vakya Kotira qua tiqata, Kotira kyaiqa

vaisivanto ntapihi kyero nrohi variari vaisiva mwatani tumuananrove, tuvata nkyi haivaqahua mwitaa tu vaisihua ru kyontema kyetama nkyevata ntapihi kyero nrohi vari vaisiva mwiva mwatani tumihatama nkye mwiavata uaqiamma mwatetama mwia ru kyeta hiavo.

<sup>53</sup> Nyaamwunyaahua Kotira qua mwaanra nkyi timwa nyi variavata nkye Kotira qua mwaanra riaataara vaihatama nkye hia mwi quara rieta hiavo, tiro.

### *Oriqotaita Sitiveninra ntuqutu kyora*

<sup>54</sup> Sitiveniva mwitaa tuvata kaanasori vaisinramwu mwi quara riovaro mwihua mpoqama kyero raraqa tovata nkyiari aanrai kuti varuvaro

<sup>55</sup> Kotira mwanraquravanto Sitiveninra mwiaqaa ntaqikyiqaro kepukyaqama mwatovaro Sitiveniva nyaamwuni vuru taqovaro Kotiva hu inraikyava itero takyuqi varuvaro Iesusiva Kotira kyauqu kyaatutani siviro varuvaro

<sup>56</sup> mwiva tiqaro, Qio taqaate, nyaamwuvanto qatua viharo nte taqe varuvaro Iesusiva mwatani mwatatai nraaqiarava, mwiva Kotira kyauqu kyaatutani kepukyavanto siviro variho, tiro.

<sup>57</sup> Sitiveniva mwitaa tuvata mwihua tiqata, Tire mwiva uaquia hi ququaarura tira riaarorave, timwa kyeta kyauqo nkyiari nyaato titateta qua aakyara ntamwaqi vita uro

<sup>58</sup> Sitiveninra ntavaaqavu kyeta uro Ierusaremi mwaaqani kyeta ori vara kyeta mwia ntuqutuqi vita uro mwia aavata ntuqutu kyora.

Sitiveninranra vaakya unra qua tuhua oriqtaita mwia ntuqufirera hita mwihua nkyiari vaaqa qatinani vara kyeta uro

<sup>59</sup> qaraakya vasisi mpo mwia nrutu Sorura kyuqutarani vateta uro Sitiveninraqaa ori kyarerata vuvaro Sitiveniva Kotirara aakyara ntero tiqaro, Qio nronrao, Iesusio, Ni manraqura vitaante, timwa kyero

<sup>60</sup> mwiva tori kyauru raviro paatiro aakyara ntero tiqaro, Nronrao, hia mwihua uaquia hi inraikyara utuara kyaara mwihuaqaa qua vataante, tiro. Mwitaa timwa kyero mwiva qutu vura.

## 8

<sup>1</sup> Qio Sitiveninra ntuquti varuvaro Soruva mwini variqaro mwia qiomma ru kyevarave tura.

### *Soruva Iesusira nraaqiara ru taiqa kyarero uti varura*

Qio mwihua Sitiveninra rukyeta mwi entaraqaataita mwihua Iesusira nraaqiaranramwu mpoqama kyeta uaqiamaqita vura. Uaqiamaqita vuvata Iesusira nraaqiara Ierusaremini varuhua tirivata rivorave timwa kyeta Ierusaremi mwini kyeta Iutia mwatani mpo mwatukya mpo mwatukya vura.

Mponramwuvanto Sameriaani uro varuvata Iesusiva nronraqama kyo vaisinramwuhua nraahu Ierusaremini varura.

<sup>2</sup> Vaisi mponramwu Kotira quara mwutukya ntuhua Sitiveninra mwamwanta varaqita ntataqi vita uro quntamwa kyora.

<sup>3</sup> Mwia quntamwa tovaro Soruva Iesusira kyaiqvata, Iesusira quavata, taiqa kyarero uti variqaro mwiva uro mpo nraamwu mpo nramwuqitaiqaro Iesusira nraaqiaraqahuhua vaisivata, nrahesivata, ntavaaqavuqiqaro karavuqi kyora.

### *Sameriaani Iesusira qua uro timwa yunra*

<sup>4</sup> Soruva mwitaamaqiro vuvata Iesusira nraaqiaranramwuvanto Ierusaremiqitaita mpo mwatukya mpo mwatukya nrohiqata Iesusira mwakyaakya timwa nyi varuvaro

<sup>5</sup> Piripivavata vevara Sameriaani uto mpo mwatukyaqi variqaro mwi mwatanaahua timwa nyinro tiqaro, Iesusiva mwiva Kotiva titava mesaiaavantove,

<sup>6</sup> tuvata nraakye qoravanto riovoro mwiva kyuqe qua timwa kyeqaro nronra kyaiqavata vare varuvatara tita, mwihua mwia qua nrumu tirema variqata kyuqema kyeta rie varura.

<sup>7</sup> Rie varuvata vaana mpohuavata qua aakyara nteqata mpo vaisinramwuqitaita nritarovalo Piripiva airi nriqa vuahuave, mwamwanta hia qakyaa uhuave, kyuqu uaqiamava vuahuave, kyuqema nyatero.

<sup>8</sup> Mwitaamaqiro vuvata mwi mwatukyaraqinaahua mpoqama kyeta qamwateqata varura.

<sup>9</sup> Mwi mwatukyaraqinaa vaisi mpovanto mwia nrutu Saimonivave tuva varura. Mwi vaisiva vuhaa pahaave, quaha utua kyaiqarave, varaqiro vuvata Sameriaavanto mwia kyaiqara kyauqu ntukikinraaqate varuvalo mwiva tiqaro, Nte nronravantove,

<sup>10</sup> tuvata mwi mwatanaahua nronra vaisivata, pata vaisivantovata, mwianra nronraqama kyeta riemwaqi viqata mwi vaisirara mwiva Kotira kepukya inraikya varaivave tuvaro

<sup>11</sup> mwi vaisiva airi enta quahave mpo kyaiqa nronra kyaiqa varaqiro vuvata mwi mwatanaahua kyauqu ntukikinraaqate varura.

<sup>12</sup> Mwitaa hi varuvalo Piripiva nri ntero kyuqe mwakyaakya Kotiva ntaqikyian-inranrave, Iesusiva Kotiva titava mesaiaavanto varianinranrave, timwa nyuvata mwihua mwi quarara quataave timwa kyeta mwihua nraakyevantovata vaisivantovata nramanri varora.

<sup>13</sup> Saimoniva mwivavata mwi quara riero quataave timwa kyero mwiva nramanri varero mwiaqaatairo mwiva Piripikyantiri variqaro Piripiva nronra kyaiqa varorara mwiva nai kyauqu ntukikinraaqate varura.

<sup>14</sup> Qio Iesusiva nronraqama kyo vaisinramwuhua Ierusaremimi variqata riovata Sameriaavanto Kotira quara qamwateqata variavo tuvata mwihua Pitaakya Ionikya sitovata

<sup>15</sup> mwitanahua uro nteta mwi mwatanaahuavata variqata mwihuavata Kotira mwanraqura varaate tita, Kotirara aakyara ntora.

<sup>16</sup> Mwi entara mwi mwatanaahua tire Iesusira nraaqiara varirerave tuhua nramanri nraahu nyuhua variqata hia Kotira mwanraqura varovata

<sup>17</sup> Pitaakya Ionikya Kotirara aakyara nteqata nkyiari kyauqu mwihuqaas vatovata mwihua Kotira mwanraqura varora.

<sup>18</sup> Mwitaa huvalo Saimoniva taqovata Iesusiva nronraqama kyo vaisitanahua nkyiari kyauqu vaisiqaa vatovata mwi vaisihua Kotira mwanraqura varovaro Saimoniva taqovaro mwia mwutukya ntuharo mwiva munima varaqiro mwitanahua nyinrenro hiro tiqaro,

<sup>19</sup> Munima mwaa varetama nivata nronraqama kyaivaqenama ntevata ntena kyauqu vaisiqaa vataarita mwihua Kotira mwanraqura varaate, tiro.

<sup>20</sup> Mwitaa tuvaro Pitaava mwia timwa mwinro tiqaro, I qua uaquia hi quarama vaiho. Ena qua kyaara ena munima mwia vatama kyera vira taiqa quante. Kotira mwanraqura hiama munima kyera varenanrave. Kotiva nai mwanraqura nraakye qora qatima nyi variho.

<sup>21</sup> Kotiva taqaiharo i mwutukyavantovata i vu nraatovantovata uaqiamama vaiho. Mwitaa hirara tira, e hiama qio tire varaana kyaiqara evata varenanrave.

<sup>22</sup> Qio ena uaquia hi kyaiqara utinanra qaqlira kyaante. Mwia qaqlira kyera Kotirara aakyara ntairaro mwiva qiove tirera, e uaquia hi kyaiqara utuana quava taiqa quananrove.

<sup>23</sup> Nte taqauqara e mpoqama kyera mwutukya ntihara vairiqahi variara vaisivave. Uaquia hi kyaiqava i ntavaaqavu kyaihara e uaquia hi kyaiqara uti variaro, tiro.

<sup>24</sup> Pitaava mwitaa tuvaro Saimoniva Pitaakya Ionikyara tiqaro, Qiove nkyetana nianra rieqata Kotirara aakyara ntaivaro nkyetana nianra timwataa quava hia qovara hiarive? tiro. Saimoniva mwitanahuara mwitaa tura.

<sup>25</sup> Pitaakya Ionikya nraakye qora Iesusira quave Iesusira okyararave timwa nyita mwiaqaataita mwitanahua tumu ntanteta verara Ierusareminianra vura. Mwitanahua mwinianra viqata Sameriaani vahu mwatukyara mponramwuqi viqata Iesusira qua kyuqe qua timwa nyiqita vura.

### *Piripiva uro Itiopia nronra vaisi mpo timwa mwu quara*

<sup>26</sup> Qio Piripiva Sameriaani varuvaro nyaamwunyaava Kotira kyaiqa vaisi mpovanto Piripira timwa mwinro tiqaro, E sivira vevara Ierusaremisairo Kasaanianra vi aanranraqaa quante, tura. Mwi aanranraqaa hia airi vaisivanto vita nruta hu aanrava vhura.

<sup>27-28</sup> Piripiva siviro vuva uro ntero taqovaro Itiopia vaisi mpovanto aanraqaa varura. Mwi vaisiva nronra vaisivanto variqaro mwiva nai vunyaa nraakye mwia nrutu Kantesira mwia kyaiqa varaqiro viqaro munimave taakisi kyaiqaqaa ntaqikyi varuva, mwiva uro Ierusaremini Kotira nrutu tuaahera kyero mwiaqaatairo uro ntantero vevara nai mwaatani virero aanrani viro.

Mwiva aanraqaa viqaro qosivanto ntanrau vare vuraqi mwatakyaa viro variqaro Aisaiaava poropetivanto qara ntumwa toraqi kyaara nti varura.

<sup>29</sup> Mwi mpukuraqi kyaara nti varuvaro Kotira mwanraquravanto Piripira timwa mwinro tiqaro, Uro qosivanto ntanrau varero nrinra mwia huntu kyaante, tuvaro

<sup>30</sup> Piripiva hiantero uro riovaro mwi vaisiva Aisaiaava poropetivanto qara ntumwa toraqi kyaara nti varuvaro Piripiva mwia kyapara hiro tiqaro, E kyaara ntqara mwi quara okyara ntapihirave hiaro? tiro.

<sup>31</sup> Mwitaa tuvaro mwiva tiqaro, Hia mpovanto ni kyaahaqa hiraqe nte nataama kyenave mwi quara okyara ntapihianinrave? E mwaaci mwaanri ntera nivatama kyera variqarama ni kyaahaqa hiante, tiro.

<sup>32</sup> Qio mwi vaisiva Aisaiaara mpukuqitairo mwaa quara kyaara nti variro:  
Sipisipi quara ru kyareru utiharo sipisipianto  
hia qua tintema kyero mwivavata hia qua tiho.  
Sipisipi nraati kyaahi teqe variavaro sipisipi nraativanto  
hia qua tintema kyero mwivavata  
(nai nramwutaahua suqaa variqaro) hia qua tiho.

<sup>33</sup> Mwia uaqama mwateqata  
hia mwia qua ntapihi kye riaarave.  
Mwia ru kyaavarora tiro,  
mwiva mwata humwuanrama taarihua hia varivaro  
hia mpovanto mwihuara qiarivavata variananrove,  
tura.

*(Aisaiaa 53:7-8)*

<sup>34</sup> Qio mwi vaisiva mwi quara kyaara ntumwa kyero Piripira kyapara hiro tiqaro, Mwaa quara ta vaisirara turave? Aisaiaava nanrianra turave iho? Mporara turave iho? tiro.

<sup>35</sup> Tuvaro Piripiva timwa mwinro tiqaro, Mwi quara Iesusrara timwa tairave, timwa kyero mwiaqaatairo mwiva Iesusira okyara kyuqe qua mwia timwa mwinro.

<sup>36</sup> Aanraqaa vuhua nramanri rumpua mpotua vahunani uro ntovaro Itiopia vaisi mwiva tiqaro, Qio taqaante. Mwaa nramanrima vaiho. E qiove tirera, nte nramanri varaankye, tiro.

<sup>37</sup> [Mwitaa tuvaro Piripiva tiqaro, E ena mwutukyaqitairave vu nraatoqitairave quataave tirera, qiomu e nramanri varenanrave, tuvaro mwiva tiqaro, Qio nte quataama Iesusrara mwiva Kotira mwaaquve tuqo, tiro.]

<sup>38</sup> Mwitaa timwa kyero mwiva nai kyaiqa vaisiara tiqaro, Qosi mwia ntavaaqavu taivaro mwaato variarive, timwa kyero mwiva Piripikya nramanriqi mwaamwi ntovaro Piripiva mwia nramanri mwunra.

<sup>39</sup> Nramanri mwi kyero mwitanahua nramanriqitai mwaanri ntovaro mwiaqaatairo Kotira mwanraquravanto Piripira vitero vuvaro Itiopia vaisivanto hia mwia qaiqaa taqaraitiro, mwiaqaatairo mwiva qamwataqiro qaiqaa nai mwaatanianra vurama.

<sup>40</sup> Mwiva vuvaro Kotira mwanraquravanto Piripira vitaqiro uro Asatoti mwatukyaqaa kyovaro Piripiva ntapihi kyora. Mwiaqaatairo mwiva mpo mwatukya mpo mwatukya variqiro viqaro Jesusira qua timwa nyiqiro viro Sisariaani uro ntoro.

9

*Soruva Iesusira nraaqiaraqama vu quara  
(Kyaiqa Varora 22:4-16, 26:9-18)*

<sup>1</sup> Qio Soruva Ierusaremini variqaro Iesusira nraaqiaraqama vuhua ru kyaani quara timwaqiro viro mwiaqaatairo uro Kotira nraamwuqi Kotira kyaiqa vara mwate varu vaisihua mwihua nronra vaisiara tiqaro,

<sup>2</sup> Qara ntumwa kyera ni mpiraqena nte Ntamaasikaasi mwatukya nronraqi uro mwaanra nraamwuqaa ntaqikiyihua nyianrita mwihua taqaivata Iesusira nraaqiara Iesusira aanraqaa vihua varivera, nte mwihua vaisive, nraakyeve, rupa kyena sitaqina mwaini Ierusaremini nrumu karavuqi kyaankye, tiro.

<sup>3</sup> Mwitaa timwa kyero Soruva qaravata varero Ntamaasikaasi mwinianra viro. Qio Ntamaasikaasi qaumato aanraqaa vi varuvaro qamwanrama kyero nyaamwusairo omwavanto aaquakyaa voti huva Soruva vi varunani itovaro

<sup>4</sup> Soruva mwatasata tumu ntiro variqaro riovoro qua mpovanto mwia nraanrenro tigaro, Soruo, Soruo, nanra kyaarave e ni uaqiamma mate variaro? tiro.

<sup>5</sup> Mwitaa tuvaro Soruva tiqaro, Nronrao, e tavave? tuvaro quavanto mwitaama tiro:  
Nte Iesusivave. Nte e uaqiamma mate variarava mwivama hugo, tiro.

<sup>6</sup> Mwitaa timwa kyero tiqaro, Qio sivira mwatuukyaqi viraro mpovanto e mwitaa mwitaa hinanranra i timwa mwianrive, tiro.

<sup>7</sup> Quavanto mwitaa tuvata Soruravatama kyeta nruhua qua nraahu rieta hia vaisi virivata taqaraitita, qio mwihua qati mwito varita aatu hi variqata hia quavata tura.

<sup>9</sup> Mwini uro kyovaro Soruva taarampo entara vu qipa yuvaro variqaro kyaravata mwia kyauqu tu vareta Ntamaasikaasini vitaqita uro kyora.

<sup>10</sup> Mwitaama varuvaro Iesusira nraaqiara mpovanto Ntamaasikaasini varura. Mwi vaisira nrutu Ananaiaasiva, mwiva variro ruvaata votima kye taqe varuvaro nronra-

vanto mwia nraanrovaro mwiva tiqaro, Nronrao, nte mwaa varuqo, tuvaro  
11 nronravanto mwia timwa mwirno tiqaro, Mwatukyani aanra mpo mwia nrutu  
*Ntapihikye Vahi Aanranrave* qianani viravama Iutaasira nraamwu quesana uro ntera  
vaisi mpo mwia nrutu Soruva mwiva Tasaasinyaa vaisi qio mwianra uro kyapara

<sup>12</sup> Soruva nianra aakyara nte variqaro ruvaata votima kye taqaihara e Ananaiaasiva uro ntera mwiva qio taqaarive tira ena kyauqu mwiaqaa vataararo mwiva qio taqaiho, tire.

<sup>13</sup> Mwitaa tuvaro Ananaiaasiva tiqaro, Qaqao, airi vaisivantomia mwi vaisira okyara ni timwa mpiavana riaurave. Mwi vaisiva Ierusaremini variqaro i nraaqiara ntapihi kyeta probi variabua airi uaqiama nyate variyave.

<sup>14</sup> Kotira nraamwuqi Kotira kyaiqa vara mwate varia vaisihua mwihua nronra vaisinramwuvanto mwia qara mwiavarao mwiva mwihuaqatairo kepukyu varero mwaini Ntamaasikaasini i nrutu nte variahua ruparero nrivave, tiro.

<sup>15</sup> Ananaiaasiva mwitaa tuvaro nronravanto mwia timwa mwinro tiqaro, Qio hia aatu hiraitira mwini quante. Ntenavanto mwi vaisira mwatama tauqaro mwiva nte mpo inraikyaqo kyaiqa varaanai inraikyara kyuqera voti hiarivama variananrove. Mwiva ni kyaiqa vaisi variqaroma mwiva mpo mwatanaa mpo mwatanaave, vunyaa vaisinramwuve, Isarerri nraakye qorave, mwiva mwihua ni nutu timwa nyiananrove.

<sup>16</sup> Nraakiara mwiva nianra rieqaro ni kyaiqa varaqiro viro mwia kyaara nriqa quani inraikyara, mpo inraikya mpo inraikya varaananrove. Qio nte mwi okyarara ntenavanto mwia nraamwutarerave, tiro.

<sup>17</sup> Mwitaa tuvaro Ananaiaasiva uro mwi nraamwunraqi vera ntero nai kyauqu Soruraqaa vatero mwia timwa mwinro tiqaro, Ni katao, Soruo, nronravanto Iesusiva e mwainianra nriqanra taqaarava mwivama ni titaiho. E qaiqaa qio taqairaro Kotira mwanraquravantovata i utaqi kepukyaqi hiqaro variarive tiro, mwiva ni titaihanama nruquo, tiro.

<sup>18</sup> Mwitaa tuvaro qamwanrama kyero Sorura vuqaatairo egarori inraikya tonamwu voti huva vi vuvaro mwiva qio taqeqaro siviro varuvaro Iesusira nrutuara nramanri mwunra.

<sup>19</sup> Mwuvaro mwiaqatairo mwiva kyaravata nrenro qio mwiaqatairo kepukyu varero varura.

### *Soruva Ntamaasikaasiqi Kotira qua timwa nyunra*

Mwiaqatairo Soruva Ntamaasikaasiqi mpo entanramwu Iesusira nraaqiaranramwu kyapata varura.

<sup>20</sup> Mwini variqaro qamwanrama kyero mwiva Iutaa mwaanra nraamwu mpoqi mpoqi vera ntero Iesusirara timwa nyinro tiqaro, Qutaama mwiva Kotira mwaaqu variho, tiro.

<sup>21</sup> Mwitaa tuvata mwihua mwia qua rieta nrihanrama vita nai kyapara hi nai kyapara hita tiqata, Qutaa mwi vaisivave Ierusaremini variqaro Iesusira nraaqiara uaqlama nyate varirave? Qutaa mwivave Iesusira nraaqiara rupa varero uro Kotira nraamwuqi Kotira kyaiqa vara mwate varia vaisihua mwihua nronra vaisinramwu nyinrenro mwaini nrivave? tita.

<sup>22</sup> Mwitaa ti varuvaro Sorura quavanto mpoqama kyero kepukyaqi hi varuvaro Soruva tiqaro, Iesusiva mwivama mesaiaavantove, timwa kyero mpo qua mpoquaqtairo Iesusira mesaiaa okyarara nyaamwutovata Iutaa vaisinramwu Ntamaasikaasini varuhua mwia qua nraatara kyaare tita taqovarovata Sorura quavanto nraahu mwihua qua nraatara kyora.

<sup>23-24</sup> Mwitaa ti varuvaro mpo entanramwu nritarovata Iutaa vaisinramwu ntuvanantuama vita variqata Sorura ru kyerara qua timwa kyeta vateta mwia entaqivata, qaatalatoraqaaavata, vasaamwunra quesana vaimwanraanra ntaqikyi varura. Mwitaama varuvaro Soruva nai ru kyareru hu quara vaakyu riovata

<sup>25</sup> mwia vataqita nrohu vaisihua mwia kyaahaqa hiqata mwia tua nronraqi ntumwa kyeta ori vasaamwunraqitaita kyaantqaama kye mwaati qatinani kyovaro vura.

### *Soruva Ierusaremini vura*

<sup>26</sup> Soruva Ierusaremini vuva uro Iesusira nraaqiara mponramwu kyapata kuairama quanye tuvata mwihua qaqao e hia Iesusira nraaqiara variaro timwa kyeta Sorura nraatu aatu hiqata varura.

<sup>27</sup> Mwia nraatu aatu hi varuvaro Vanavaasiva mwia kyaahaqa hirero nri ntero Sorura vita varero uro Iesusiva nronraqama kyonramwuhua varunani kyero Vanavaasiva Sorura okyarara mwihua timwa nyinro mwiva Soruva aanraqaa viqaro

Iesusira taqo quara timwa nyinro Iesusiva Sorura qua timwa mwunranravata timwa nyinro. Mwiva Soruva Ntamaasikaasiqvata variqaro Iesusira nrutu nteqaro kepukyaqama kyeqaro Iesusirara mwi mwatanaahua timwa nyunranravata mwihua timwa nyinro. Vanavaasiva Sorura okyarara mwihua ntapihi timwa nyuvata mwihua mwiaqataita qiove tita.

<sup>28</sup> Mwihua qiove tuvaro Soruva mwihua kyapata variqaro Ierusaremini nrohiqaro hia aatu hiraitiro, Iesusira nrutu ntamwa kyeqaro Iesusira qua mwi mwatanaahua timwa nyunra.

<sup>29</sup> Mwitaamaqiro viqaro mwiva uro Kiriki mwataqaa Iutaa vaisi varuhua kyapata variqaro qua timwa nyinro kepukyaqama kyero ti varuvata mwihua rieta mwia ru kyarerata uti varura.

<sup>30</sup> Sorura ru kyarerata uti varuvata Iesusira nraaqiaranramwuvanto Sorura qata vakyaqa uhua mwi quara rieta, mwihua Sorura kyaahaqa hiqatama mwia vitaqita uro Sisariaani kyeta titovaro mwiva nai mwaata Tasaasini vura.

<sup>31</sup> Soruva mwini uro varuvata Iesusira nraaqiaranramwuvanto Iutiaani varuhuave, Karirini varuhuave, Sameriaani varuhuave, mwihua qio mwaateraqama vita varuvaro mwi entara hia mpovantovata mwihua qoraqama nyate varuvata mwihua Iesusira kyaiqara kepukyaqamaqita viqata mwihua Kotirara nronraqama kyeta riemwaqita vuvaro Kotira mwanraquravanto mwihua kyaahaqa hi varuvata airivanto nrita Iesusira nraakye qoraqama vita varura.

### *Pitaava mpo mwatukya mpo mwatukya vura*

<sup>32</sup> Qio Pitaava Iesusira nraaqiara kyaahaqa hirero mpo mwatukya mpo mwatukya nrohiro. Nrohiqaroma mwiva Iesusira nraaqiara mponramwuvanto Rintaani varuhua uro taqarero vura.

<sup>33</sup> Pitaava mwini uro ntero taqovaro vaisi mpovanto mwia nrutu Iniaasiva varura. Mwi vaisiva hia mwia mwamwantavanto qakyaa huvaro variqaro mwiva 8 ihi vara kyero taintaqaa nraahu vaiteqaro varuvaro Pitaava uro ntero mwianra tiqaro,

<sup>34</sup> Iniaasio, Iesusi Karaisiva qioma i kyuqema kyaananrove. E sivira ena tainta ntapihiante, tuvaro mwi vaisiva qamwanrama kyero siviro.

<sup>35</sup> Sivuvata Rintaaqinaahuavata, Seroniqinaahuavata, taqovaro mwi vaisiva qati siviro varuvata mwiaqataita mwihua Iesusira nraaqiara varirerata Kotirara aakyara ntora.

<sup>36</sup> Mpo mwatukya Iopaani Iesusira nraaqiaraqitairo nraakye mpovanto mwia nrutu Tavitaava varura. Mwia nrutu mwia Kiriki quaqitaita tirerata *Ntokaasivave* tura. Ntokaasiva kyuqe nraakyevanto variqaro vehi nraakye qora kyaahaqa hirero kyaiqa vara nyate varu nraakyeva varura.

<sup>37</sup> Qio mwi entara mwi nraakyeva nriqa vu inraikyara varero qutu vuvata mwia nramwunaahua mwia varaqita mwia nramanri ntumwa kyeta qapuqama kyeta nraamwu mpontuna mwaanrinra mwoqqaqahuraqi uro vatora.

<sup>38</sup> Iopaani varuhua riovoro Pitaava vaini Rintaani varuvata mwihua vaisi taaratana mwini siteta tiqata, Nkyetana Pitaarara mwitaama qiate. Hiantera mwaini tire varunanrani nriante qiate, tuvata mwitanahua uro Pitaara timwa mwuvaro

<sup>39</sup> Pitaava siviro mwitanahuavata nrinro.

Pitaava nri ntovata mwihua mwia vita vareta verara nraakye vatoraqi vera ntovaro Pitaava taqovata airi nraakye tetogavanto Pitaara taqeta ntateqata Ntokaasiva qati varu entara mwihua haqirama nyu tuavaaqarave siotive, mpo inraikya mpo inraikyavata Pitaara nraamwute varura.

<sup>40</sup> Nraamwutovaro Pitaava ekyaa mwiqi varuhua sita mwaatani veva kyero mwiva mwiqi variqaro tori kyauru raviro Kotirara aakyara ntero. Kotirara aakyara ntamwa kyero mwiva tuqasaa viro qutu vurara tiqaro, Tavitaao, siquante, tuvaro mwi

nraakyeva qutu vuraqitairo vu ntapairi kyero Pitaara taqero qio mwiaqaatairo qati siviro mwaamwianrama viro varuvaro

<sup>41</sup> Pitaava nai kyauqu tutu kyero mwia kyaahaqa huvaro mwiva qio siviro. Qio sivuvaro Pitaava Iesusira nraaqiaranramwuvata, tetoqa nraakyenramwuvata, nyaanrama kyero qutu vu nraakyera nyaamwutovata mwihua taqovaro mwi nraakyeva qati siviro varura.

<sup>42</sup> Mwi nraakyeva qati siviro varuvata mwi quara timwaqita vuvata Iopaaqinaa nraakye qora airivanto mwi quara rieta qio mwiaqaataita airi vaisivanto Iesusira quara quutaave tura.

<sup>43</sup> Qio Pitaava Iopaaqi airi enta variqaro Saimoninra nraamwuqi varura. Saimoniva purimakau pahiqa kyaiqa varo vaisiva varura.

## 10

### *Pitaakya Koniriaasikya*

<sup>1</sup> Sisariaani vaisi mpovanto varura. Mwia nrutu Koniriaasiva (mwiva hia Iutaa vaisi variraitiro) mwiva Romeni ntaqu vaisihua vatova variqaro mwiva 100 ntaqi varu vaisihuqa ntaqikyi varuvata mwi vaisinramwuhua Itarisaita nruvatara tita, mwihuara Itarinyaahua ntaqua vaisihuave tura.

<sup>2</sup> Koniriaasiva Kotirara aakyara nte varu vaisiva variqaro mwivavata, mwia nraamwuqi varuhuavata, Kotira nrutu tuaahere varura. Mwiva Iutaa nraakye qora vehi varuhua kyaahaqa hiqaro variqiro viqaro Kotirara ekyaa enta aakyara nte varura.

<sup>3</sup> Qio mpo enta enrenro 3 kirokiqa huvaro Koniriaasiva qati variqaro ruvaata voti hora taqero. Taqebaroma mwiva ntapihi kyero taqovaro nyaamwunyaava Kotiva titova viqetero mwianra tiqaro, Koniriaasio, tuvaro mwiva nyaamwunyaanra mwianra aatu hiro

<sup>4</sup> mwia aitutuma kyero taqero tiqaro, Nronrao, nanrave? tuvaro nyaamwunyaava mwiva tiqaro, E Kotirara aakyara ntaana quarave, e mpohua kyaahaqa hiananrave, Kotiva mwianra qamwateqaro iara rieqaroma variho.

<sup>5</sup> Qio vaisi mponramwu sitirata mwihua Iopaaqitaita vaisi mpo mwia nrutu Saimoni Pitaara uro vitaate.

<sup>6</sup> Pitaava vaisi mpo vatama kyero variho. Mwi vaisiva Saimoniva purimakau pahiqa kyaiqa vare variva, mwiva nai nraamwuqi verara kyaarerera tokyasataa variho, tiro.

<sup>7</sup> Mwitaa timwa kyero nyaamwunyaava vuvaro Koniriaasiva mwiva tuntema kyero nai nraamwuqi kyaiqa varo vaisitanahua nyaanrama kyero ntaqu vaisira mpo, mwiva Kotirara aakyara nte varu vaisiva nai kyaahaqa hi varu vaisira mwiavata nraanrenro.

<sup>8</sup> Koniriaasiva mwi vaisinramwuhua nyaanrama kyero vaakya taqorara mwihua timwa nyinro qio mwihua Iopaani sitero.

<sup>9</sup> Sitovata mwia qanranraa aanraqaa Iopaa qaumato vi varuvaro Pitaava Iopaani variqaro huarivanto virira qiataqa vahuvaro mwiva nraamwu mwoqa tahiporaqa mwaanri ntero Kotirara aakyara ntarero viro.

<sup>10</sup> Mwini mwaanri ntero nraamwuqaa variqaro kyara nraataa huvaro kyara tera hi varuvaro mwia vekya variqaro ruvaata voti hora taqero.

<sup>11</sup> Pitaava taqovaro nyaamwuvanto qatua vuvaro mwiqitairo taari voti hora ekyaa mwia vitiqaa rupatova tumuqata tumuqata tiro tumu ntora.

<sup>12</sup> Taari mwiqi Pitaava taqovaro mpo vahi aasau, mpo vahi aasau vahura. Quarave, qarurave, nyaamwave, mwi inraikyava mwi inraikyava mwiqi vahuvaro

<sup>13</sup> quavanto Pitaarara tiqaro, Qio sivira ru kyera nraante, tiro.

<sup>14</sup> Tuvaro Pitaava qaqao tiro, Nronrao, hiave. Tire tetu mwaanra okyara rieqatama mwi inraikyarara uaquia hi inraikyavare timwa kyeta hia nraunanrave, tiro.

<sup>15</sup> Mwitaa tuvaro quavanto qaiqaa tiqaro, Kotiva kyuqe inraikyave tirara e hia uaqia hi inraikyarave qianta, tiro.

<sup>16</sup> Tuvaro Pitaava kuaa qarama kyero nraahu ruvaata mwia taarampo nani taqovaro mwiaqatairo taari mwia varero tumu ntantero nyaamwuni vura.

<sup>17</sup> Mwitaa huvaro Pitaava ruvaata voti hora mwia taqorara nraato ti varuvata Koniriaasiva sitonramwuhua mwi mwatukyaraqi nri nteta Saimoninra nraamwuanra kyaparama kyeta uro mwi nraamwunra quesana varita

<sup>18</sup> aakyara nteta tiqata, Saimoniva mwia nrutu mpo Pitaavave qiava, mwaa nraamwunraqive nrumu variho? tita.

<sup>19</sup> Tuvaro Pitaava ruvaata voti hora taqorara qati nraahu nraato ti varuvaro Kotira mwanraquravanto mwia timwa mwinro tiqaro, Taqaante, vaisi taarampotanavanto i puua hirerata nri ntaavo.

<sup>20</sup> Qio sivira uro mwihua huntu kyera hia aatu hiraitira, mwihuavata quante. Nte mwihua mwaini sitauqata i puua hirerata nriahuave, tiro.

<sup>21</sup> Mwitaa tuvaro Pitaava mwi vaisihua nrumu varunani uro ntero tiqaro, Nkye tararave puua hi variavo? Nte mwaa mwivave. Nkye nanra inraikyareve nriavo? tiro.

<sup>22</sup> Tuvata mwinramwuhua tiqata, Vaisi mpo Koniriaasiva, mwiva ntaqua vaisihua 100 nramwuqaa ntaqikyi variva, mwiva ntapihi kyero nrohi variqaro Kotira nrutu tuaahere varivave. Mwitaa ihata ekyaa Iuttaa vaisivanto mwianra kyuqe vaisivantove ti variavave. Qio mwi vaisiva tiri mwaini titaiho. Koniriaasiva variharo nyaamwunyaava Kotiva titava tumu ntero mwia timwa mwinro tiqaro, E Pitaara nraanrainranro mwiva i nraamwuqi nrumu varirara e mwia qua riaante, tiho. (Mwitaa tiharo Koniriaasiva tiri titaihata nrunro), tita.

<sup>23</sup> Mwinramwuhua mwitaa tuvaro Pitaava tiqaro, Qio mwaaqi vaitaivaqenramwu hora quare, tiro.

Timwa kyero vaitero mwia qanranraa Pitaava siviro mwinramwuhuavata vuvata Iesusira nraaqiara mponramwuvantovata Iopaaqinaahua Pitaara vatama kyeta vura.

<sup>24</sup> Pitaava mwihuavata vuva uro aanrani vaitero mwia qanranraa mwiva Sisariaani uro ntero taqovaro Koniriaasiva nai nramwunaahuavata nai totinramwuvatama kyero Pitaara vekeya varuvaro

<sup>25</sup> Pitaava uro ntero nraamwuqi vera ntovaro Koniriaasiva uro mwia taqero mwia kyuuq tarani tumu ntiro variqaro Pitaara nrutu tuaahere varuvaro

<sup>26</sup> Pitaava tiqaro, Qaqao, hia ni nutu tuaaheraante, timwa kyero mwia vara mwaamwianrama kyero timwa mwinro tiqaro, Sivira variante. Hia nte mwanriqvantove. Nte qati vaisima varuqo, tiro.

<sup>27</sup> Timwa kyero Koniriaasikya qua timwaqiro vuva uro taqovata airi nraakye qoravanto mwipi ntuvaantuama vita varuvaro

<sup>28</sup> Pitaava mwihuara tiqaro, Nkye ntapihi kyaarave. Tire Iutaavanto varuraro tiri mwaanra quavanto mpo mwatanaahua kyapata variqi quananranra qao timwa taihata varunanrave. Hia mwihua nraamwuqi vera ntaunannrave. Tire tiqata, Tire mwitaa hiararo mwihua uaqia hi okyarava tiriqaavata vahiankyo tita, tire nraahumwaqa ntuqema vita varunanrave. Qio mwitaama kyena varuqaro Kotiva mpo okyara ruvaatakyaa ni naamutaiharo ni pu naatovanto ntapihi vihana ntapihi riaurave. Kotiva hia mpo mwatanaahuara qora mwatanaave tihana nte mwihuara qora mwatanaave qiankyorave. Haunri nte tiqana, Nte mpo mwatanaahua kyapata varianinraqaatairo mpo inraikyavanto ni uaqama mataananrove, qiankyorave.

<sup>29</sup> Kotiva mwitaama kyero timwa mpihana varuqata nkye mpo mwatanaahua variqata nkye ni naanraavana nte hia qao tiraitina, nte qamwanrama kyena nkye hianani nruqo. Qio nanraqamave nkye ni naanraavo? Nkye tivaqena nte riaankye, tiro.

<sup>30</sup> Pitaava mwitaa tuvaro Koniriaasiva timwa mwinro tiqaro, Taarampo enta nritaraiharo mwaa mwia varurantema 3 kiroki enrovana nte ntene nraamwuqi variqana Kotirara aakyara nte variavaro qamwanrama kyero ni puqaa vaisi mpovanto qovarama vurave. Mwia tuavaaqavanto takyuquva

<sup>31</sup> nianra tiqaro, Koniriaasio, e Kotirara aakyara ntaana quarave, e mpohua kyaahaqa hiananrave, Kotiva mwianra qamwateqaroma iara rie variho.

<sup>32</sup> Qio vaisi mponramwu Iopaani sitairata mwihua vaisi mpo mwia nrutu Saimoni Pitaara uro viteta nriate. Pitaava vaisi mpovatama kyero variharo mwi vaisiva Saimoniva purimakau pahiqa kyaiqa vare variva mwiva nai nraamwuqi kyaareratokyasataa varirave, turave.

<sup>33</sup> Mwiva mwitaa tihana nte qamwanrama uro i vita vare nriate timwa kyena vaisi mponramwu sitaurave. Nte sitauqata mwihua uro ntaavara e nianrave tirama nrianro. Qio Kotiva taqe varihata tire mwaaqi ntuvantuama vita varuro. Qio Kotiva i qua mwianinra timwa timwinraqeta tire riaare. Tire i vekyama varuro, tiro.

### *Pitaava mwihua qua timwa nyunra*

<sup>34</sup> Koniriaasiva mwitaa tuvaro Pitaava tiqaro, (Nte tuvana ruvaata taqaavaraqaatairo) mate ni pu naato ntapihi vihana nte riauqaro Kotiva hia mpo mwatanaanra nraahu nronraqama kyero riaiho.

<sup>35</sup> Qio ta mwatanaavave mwia qua riemwaqiro viqaro ntapihi kyero nrohiariva variraro Kotiva mwianrama nronraqama kyero rieqaro mwianra qamwateqaro variananrove.

<sup>36</sup> Qutaa Kotiva Iesusi Karaisira titaiharo mwiva tiri Isareriqi kyuqe mwakyaakya nraakye qora mwaateraqama variate ti quara tiri timwa timwinrave. Tiri mwi quara timwa timwihanro Iesusi Karaisiva ekya nraakye qora vunyaa vaisivantoma variho.

<sup>37</sup> Nkye rieta ntapihi kyaarave. Tauraa Ioniva nramanri nyiqanro qua timwa nyuvaro mwiaqaatairo Jesusiva Karirini qovarama viro nraakye qora qua timwa nyiqiro viro Iutiaanivata timwa nyiqiro vuvata ekya Iutaavanto mwi quara riorave.

<sup>38</sup> Nkye rieta ntapihi kyaarave. Kotiva nronraqama kyo vaisiva Jesusiva Nasaretinyaava varuvaro Kotira mwanraquravanto mwia kepukyaqama kyovaro mwiva viro nrinro hiqaro nraakye qora kyuqema kyorave. Kotiva mwia kyaahaqa hi varuvaro mwiva Saataaniva rupato vaisihua huvantu kyovata mwihua qio varurave.

<sup>39</sup> Tire mwiavata variqi viqata mwiva Iutiaani kyaiqa varoravata, Ierusaremini kyaiqa varoravata, taqaavanranrave. Qio mwia ru kyeta kyatariqaa hiritovaro qutu vurave.

<sup>40</sup> Mwiva qutu viro taarampo enta vara kyovaro Kotiva mwia vara sivuma kyovaro mwiva qaiqaa qovarama vurave.

<sup>41</sup> Mwiva qati siviro qaiqaa qovarama vuvata hia ekya Jutaa qumina vaisivanto mwia taqorave. Tire nraakye qora timwa nyianrahua varuraro Kotiva tiri nraanrai-hata varurahua tire nraahu mwia taqaavanranrave. Jesusiva qutu vuraqitairo siviro varuvata tire mwiavata variqata kyovare nramanrive nramwaqita quavanranrave.

<sup>42</sup> Qio Jesusiva tiri titeqaro quavata tiri timwa timwihata tire mwaa mwakyaakyara kyuqe mwakyaakya nraakye qora timwa nyi varuro. Kotiva Iesuisira nronraqama kyaiharo mwiva nraahuma ekya mwatani variahua qati variahuate, qutu quahuave, mwihuaqaa ntaqikyiqaro ko qiananrove. Mwiva mwihuaqaa qua vataari vaisiva variananrove.

<sup>43</sup> Haaru poropeti vaisivanto ekya mwia okyarara tiqata mwitaama tita. Mwianra qutaa mwivave qiariva variraro Jesusiva nronravanto variqaro qioma mwiva uaquia hi kyaiqa varaani quara nruka mwataaananrove turave, tiro.

### *Mpo mwatanaahua Kotira mwanraqura varora*

<sup>44-46</sup> Pitaava mwihua timwa nyi varuvaro Kotira mwanraquravanto Pitaara qua riohuaqaa tumuvata mwiaqataita mwihua mpo qua mpo quaqitaita timwaqi viqata Kotira nrutu tuaahere varura. Mwitaa hi varuvata Iesusira nraaqiara mponramwvanto mwihua Iutaa vaisinramwu Pitaaravatama kyeta Iopaasaita nruhua mwinramwuhua mwipi variqata taqovaro Kotiva nai mwanraqura mpo mwatanaa nyuvata mwihua nraahumwa mpo qua mpo quaqitaita Kotira nrutu tuaahere varuvata Iutaa vaisinramwuvanto mwi inraikyarara nrihanrama vuvaro mwiaqatairo Pitaava tiqaro,

<sup>47</sup> Mwaa vaisinramwuhua tire varaurantema kyeta Kotira mwanraqura varaavo. Tavave mwihua nramanri varerara qao qiananrove? Qioma mwihua nramanri varevarave, tiro.

<sup>48</sup> Mwitaa timwa kyero mwiva tiqaro, Iesusi Karaisira nrutu nteqatama nramanri mwihua nyiate, tuvata nramanri mwihua nyunra.

Nramanri nyuvata mwi mwatanaahua Pitaarara mpo entanramwuvata vari kyera quante tuvaro Pitaava mpo entanramwuanra mwihua kyapata varura.

## 11

### *Pitaava uto ntantero Ierusaremini vura*

<sup>1</sup> (Pitaava Sisariaani varuvata) Iesusiva nronraqama kyonramwuhua Iesusira nraaqiara Iutiaani varuhuavata riovata mpo mwatanaa nraakyehoravanto Kotira quara qamwateqata varuvata (mwia kyaara Iesusira nraaqiara hininramwu inronra hi varura).

<sup>2</sup> Pitaava uto ntantero Ierusaremini uro ntovata mwihua hininramwuvanto mwamwanta togo okyarara riohua Pitaara inronra hita tiqata,

<sup>3</sup> Qaqao, e mwamwanta hia toqaa vaisihua nraamwuqi vera nterama mwihua kyapata kyara nrenra hiaro. E hia mwitaa hiataarave, tita.

<sup>4</sup> Mwitaa tuvaro Pitaava mwi quara okyaraqatairo timwa nyinrenra hiro tiqaro,

<sup>5</sup> Nte Iopaani Kotirara aakyara nte variqana ruvaata voti hira taqaurave. Nte taqe variavaro taari voti huva mpo inraikyavanto nyaamwusairo tumunrave. Mwi inraikyara hini hini vitiqaa rupa kyero tuqiro tumuqata tiro nte hiavaraqaa tumu ntovana

<sup>6</sup> nte mwipi taqaavaro quarave, aasauve, qarurave, nyaamwave, ekyaa mwi inraikyava mwi inraikyava mwipi vahuvaro

<sup>7</sup> quavanto nianra tiqaro, Pitaao, sivira rukyera nraante, tuvana

<sup>8</sup> nte tiqana, Qaqao nronrao, hia nte mwitaa hianinrave. Nte tetu mwaanra okyarara rieqana hia kyuqe inraikya vaihananra tina, hia nraaninrave,

<sup>9</sup> qiavaro quavanto nyaamwusairo qaiqaa nianra tiqaro, Kotiva kyuqe inraikyave tirara e hia uaqia hi inraikyarave giante, turave.

<sup>10</sup> Mwitaa tuvana nte mwini variqana kuaa inraikya mwia taarampo nani taqaavaro mwiaqatairo mwi inraikyara nyaamwusairo tu ntanrau varovaro tumu ntantero qoqaraanani vurave.

<sup>11</sup> Mwitaa huvana nte taqaavata vaisi taarampotanavanto mpo mwatanaa Sisariaasairo sitonramwuhua ni pitarerata nte variavara quesana nrintovaro

<sup>12</sup> Kotira mwanraquravanto nianra hia aatu hiraitira, mwihuavata quante tuvana nte mwihuavata quavata vaisi 6 nramwuvanto Iesusira nraaqiaraqa uhua Iopaanyaahua ni vatama kyeta vuvata tire quavarahua Koniriaasira nraamwuqi uro ntaavararo

<sup>13</sup> Koniriaasiva mwitaamama tiri timwa timwinro tiqaro, Nyaamwunyaava mpovanto ni nraamwuqi qovarama viro nianra e vaisi sitairata mwihua uro vaisi mpo mwia nrutu Saimoni Pitaara vita vare nrivaro

<sup>14</sup> mwiva nrumu ivata i nramwunaahuavata mwakyaakya timwa nyinrata nkye mwi mwakyaakyara riemwaqita vivaro Kotiva nkyi sitaarive, turave.

<sup>15</sup> Mwitaa tuvana nte mwia nraamwuqi uro variqana mwakyaakya ti variavaro Kotira mwanraquravanto tauraa tiriqaa tumu ntema kyero mwihuqaavata tumunrave.

<sup>16</sup> Mwitaa huvana nte haaru Iesusiva nronravanto qua tiri timwa timwu quarara riaavarave. Iesusiva tiqaro, Ioniva nramanri nkyi nyi variho. Qio nraakiara Kotiva nai mwanraqura nkyi nyiananrove, turave.

<sup>17</sup> Mwiaqaatai nte ntapihi kyauqaro tire Iutaavanto Jesusirara qutaa mwivave turaro Kotiva nai mwanraqura tiri timwintema kyero mwiva mpo mwatanaa mwihuavata kuua qarama kyero nyiho. Kotiva mwitaama kyero nai mwanraqura mwihuavata nyinraqe nte ta vaisiva variqanave nte mwia antuaaninrave? tiro.

<sup>18</sup> Pitaava mwi quara mwihua ntapihi kyero timwa nyuvata mwihua inronra qua qaqira kyeta Kotira nrutu tuaahereta tiqata, Qikye, Kotiva hia tiriara nraahu riaraitiro, mpo mwatanaahuaravata tiqaro, Mwihuavatama nkyiari uaqia hi aanranra qaqira kyeta ekyaa enta ekyaa enta qati variqi vivarave, tiho, tura.

### *Jesusira nraaqiaranramwuvanto mpo mwata mpo mwatani vura*

<sup>19</sup> Qio Sitiveninra ru kyeta Jesusira nraaqiara uaqama nyato entaraqaataita Jesusira nraaqiara airivanto tirivata rivorave timwa kyeta Ierusaremisa kyatita mpo nani mpo nani vura. Mponramwuvanto Ponisia nyianrani vuvata mponramwuvanto mpo mwata Saiparaasini vuvata mponramwuvanto mwatukya mpo Antiokini vura. Mwini uro variqata nkyiari nramwunaa Iutaa mwini varuhua mwihua nraahu Jesusira mwakyaakya timwa nyi varura.

<sup>20</sup> Mwihua nkyiari Iutaa nraahu timwa nyi varuvata mpo uhua Saiparaasinyaahuavata, Sairiniyahauavata, uro Antiokini variqata nronra vaisi Jesusirara mpo mwatanaahauavata timwa nyi varuvaro

<sup>21</sup> Kotiva kyaahaqa huvata airi vaisi Kirikivantovata nkyiari uaqia hi aanranra qaqira kyeta tuqasaa vita nronranra qutaa mwivave tura.

<sup>22</sup> Mwitaa huvata Jesusira nraaqiara Ierusaremimi varuhua riovata mpo mwatanaahua airivanto Jesusirara qutaa mwivave tuvata Ierusaremimi varuhua Vanavaasira titovaro mwiva mwihua kyaahaqa hirero verara Antiokini vura.

<sup>23</sup> Uro ntero taqovaro Kotiva mwi mwatanaahuara po kye timwa nyatero mwihua kyaahaqa huvaro Vanavaasiva qamwata kyero mwiva mwihua qaiqaavata timwa nyinro tiqaro, Qio nkye nronra vaisi Jesusirara nraahu riemwaqi viqata nrohiate, tiro.

<sup>24</sup> Vanavaasiva kyuqe vaisivanto varuvaro Kotira mwanraquravanto mwia utaqi kepukyaqama kyero varuvaro Vanavaasiva mpoqiyavata Jesusira qua riemwaqiro viqaro mwiva airi vaisi kyaahaqa huvata mwihua Jesusira nraaqiaraqama vita varura.

<sup>25</sup> Mwitaa huvaro Vanavaasiva Antiokisairo uro Tasaasini Sorura puua hirero vuva

<sup>26</sup> uro mwia puaama kyero vita varero Antiokini nrumu varura. Mwini kuua ihiara variqata mwi mwatanaahua Jesusira nraaqiaraqama vuhua mwakyaakya timwa nyita mwaiqiaraqama Jesusira nraaqiaraqa uhuavata kyaahaqama nyatora. Antiokini varu vaisihua nraante tohara kyeta Jesusira nraaqiaraqama vuhuara *Kirisitenive* tura.

<sup>27</sup> Qio mwi entara Ierusaremisa poropeti vaisi mponramwuvanto Antiokini uto varuvaro

<sup>28</sup> mwihuaqitairo vaisi mpovanto mwia nrutu Akapaasiva siviro Kotira mwanraquravanto mwia kyaahaqa huvaro mwiva mpo qua timwa nyinro tiqaro, Ekyaa mwatani hia kyara qio vahiraro kyarara aarante entava nriananrove, tiro. Mwi vaisiva tu quava Kirontiaasiva nronra vunyaa vaisivanto ntaqikyi varu entara kyarara aaranto entava qutaa vahura.

<sup>29</sup> Akapaasiva hia kyara qio vahiar entava nriananrove tuvata Jesusira nraaqiaranramwuvanto qua timwa kyeta tiqata, Varaivaqeta tire munima mponta mponta ntuaantuama kyeta vareta uro teta tiqata vakyaa Iutiaani variahua nyianre, tita. Mwitaa timwa kyeta munima airi vatohua airi kyovata, hia munima airi vatohua pataqia kyeta

<sup>30</sup> mwi munimanra ntuaantuama kyeta Soruravata Vanavaasiravata nyuvata mwitanahua varaqita uro Jesusira nraaqiaraqaa ntaqikyi varu vaisihua nyunra.

## 12

### *Herotiva Jesusira nraaqiara uaqiamma nyatora*

<sup>1</sup> Mwi entara nronra vaisi vunyaava Herotiva Jesusira nraaqiara hininramwu uaqiamma nyatarera utura.

<sup>2</sup> Ioninra vakyaara Iemisira ntavaaqavu kyero mwia nruntu teqa kyora.

<sup>3</sup> Iemisira nruntu teqa kyero Herotiva taqvata Iutaa vaisivanto mwianra qamwate varuvaro mwiva uro Pitaaravata ntavaaqavu kyora. Mwi entara omwata mpo hia kyoto mperetira nro entava vahuvaro

<sup>4</sup> Herotiva Pitaara ntavaaqavu kyero karavuqi vitaqiro uro kyero tiqaro, Pitaava karavuqitairo quankyo, timwa kyero, mwiva ntaqu vaisihua 16 nramwu ntainra kyero tiqaro, 4 nramwuvanto nraante mwiaqaa ntaqikyiqi vita tumitaraivata 4 nramwuvanto qaiqaa mwiaqaa ntaqikyiqita quate. Mwitaaamaqita quate, tiro. Herotiva tiqaro, Vekyahu nyato kyarara omwata nre entava taiqa viraqena nte Iutaa vaisi suqaa Pitaara qovarama kyena ko tirerave, tiro.

<sup>5</sup> Mwitaa timwa kyero Pitaara karavuqi rupa tovaro varuvata Jesusira nraaqiaranramwuvanto nraamwu mpoqi ntuaantuama vita Kotiva Pitaara kyaahaqa hiarive titi, Kotirara kepukyaqama kye aakyara ntamwaqita vi varura.

### *Pitaara huvantu kyora*

<sup>6</sup> Pitaava karavuqi variqiro vuvaro Herotiva tiqaro, Hura nte mwia vitaqina uro vaisi suqaa qovarama kyena ko tirerave, tuvaro Pitaava entaqi vaite varuvata ntaqu vaisihua mpotana mwia hini hini varuvaro Pitaara seniqo rupa tovaro varuvata ntaqu vaisihua mpotana quesana ntaqikyi varura.

<sup>7</sup> Mwitaa huvuro qamwanrama nronravanto titova nyaamwunyaava Pitaara vuqaa qovarama viro siviro varuvaro nraamwuqi ntuaahhe varuvaro nyaamwunyaava Pitaara qumwuqa tu varero mwia vaurama kyero tiqaro, Qamwanrama siquante, tuvaro senivanto Pitaara kyauquqitairo tumu ntuvaro

<sup>8</sup> nyaamwunyaava tiqaro, Ena tuavaaqaa utu varera kyuqu nraamwu utuante, tiro. Tuvaro Pitaava vara utu varovaro nyaamwunyaava tiqaro, Qio ena vaaqa utu varairaqeta tiretana quare, tuvaro

<sup>9</sup> Pitaava mwia vata varero karavuqitairo viro. Mwini viqaro nai riero tiqaro, Hia nte qutaa vuqo. Nte ruvaata taqe varuqaro ni mwanraquravanto nraahu vi variho, tiro.

<sup>10</sup> Mwitaa timwa kyero Pitaava nyaamwunyaava vaisi mwia vataqiro viro, ntaqu vaisitana nraatara kyero uro mpo ntaqu vaisitanahuavata varura mwihuavata nraatara kyero, uro qatinani quani gesara nronra qaini qesa titi tonani uro varuvaro mwi quesava nai qatua vuvata mwitanahua mwiqitai veva nteta aanraqaa vuvaro qamwanrama nyaamwunyaava Pitaara mwini kyero vura.

<sup>11</sup> Vuvaro Pitaara vu nraato ntapihi vuvaro mwiva tiqaro, Nte qutaama tumuqo. Qutaama nronravanto nai kyaiqa vaisi titaiharo mwiva ni kyaahaqa hiqaro Herotiva ni rupatairaqitairo ni huvantu kyaiho. Iutaavanto ni uaqiamma matarerata uti variavaro mwiva ni kyaahaqa ihana tumuqo, tiro.

<sup>12</sup> Pitaava nai mwitaama riemwaqiro viro uro nraamwu mpo, Ioni Maakira mwia nronra Mariaara nraamwu, mwipi airi nraakyte qora ntuaantuama vita variqata Kotirara aakyara nte varuraqi uro ntero

<sup>13</sup> qesa ntukuakua huvaro kyaiqa nraakyte mpovanto mwia nrutu Rontaava qesa vara kyarerero nri ntero

<sup>14</sup> Pitaara qua ntapihi kyero riero mwiaqatairo mwiva nronraqama kyero qamwateqaro qesa qatuaaninranravata hia riaraitiro, mwiva mwipi ntuaantuama vita varuhua uro timwa nyinro tiqaro, Pitaavama nrumu mwaatani qesaaqaa variho, tiro.

<sup>15</sup> Mwitaa tuvata mwihua tiqata, Eqaante, i vu nraatovanto apiqama viharama e mwi quara tira hiaro, tuvaro mwiva kepukyaqama kyero tiqaro, Qutaama mwiva nrumu quesana variho, tuvata mwihua qikye tita, Pitaara ru kyaavarro nyaamwunyaava mwiaqaa ntaqikyiva, mwivama quesana nrumu variho, tita.

<sup>16</sup> Mwitaa tuvaro Pitaava qaiqaa qesa ntukuakua hi varuvata mwihua qesa vara kyeta taqovaro mwiva qutaa nrumu varuvata mwihua nrihanrama vita varuvaro

<sup>17</sup> Pitaava kyauqu tuaahera kyero tiqaro, Mwaini riaate, tiro. Timwa kyero mwiva nronravanto karavuqitairo nai kyaahaqa hurara mwihua timwa nyinro. Timwa nyi kyero mwiva tiqaro, Qio Iemisiravata tiri tiqata vakyaahuanramwuvata mwi quara timwa nyiate, timwa kyero mwiva veva ntero mpo nraamwuqiara viro.

<sup>18</sup> Qio Pitaava vuvata mwia qanranraa qaata vuvata ntaqu vaisihua Pitaaraqaa ntaqikyvi varuhua taqovaro Pitaava hia karavuqi varuvata mwinramwuhua airi nraato tita tiqata, Pitaava nataama kyero veva viho? tita.

<sup>19</sup> Timwaqita vuvata Herotiva mwianra puua hiqata taqaate tuvata mwinramwuhua mwianra qumina puua hiqata taqovaro hia huvata varuvaro Herotiva ntaqu vaisihua mwihuaqaa qua vatero mwihua ko timwa kyero Pitaava ntuqema kyero vura kyaara mwinramwuhua ekyaa ru kyora.

Mwinramwuhua ru kyero Herotiva Iutia kyero uro Sisariaani varirero viro.

### *Herotiva qutu vura*

<sup>20</sup> Herotiva Sisariaani uro variqaro Taiaaqinaahuavata Saitoniqinaahuavata inronra hi varuvata mwi mwatanaahua mwi quara vara ntapihi kyaare tita Herotiva hunaniana nrunra. Vaisi mpo mwia nrutu Parasitaasiva Herotira kyaiqa vaisi nronravanto varuvata mwihua mwia totiqama teta mwia timwa mwita tiqata, Tire mwaateraqama varirerave. Tire inronra hiqata Herotira mwataqaataita hia kyara varaarorave, tuvaro Parasitaasiva Herotira mwi quara timwa mwunra.

<sup>21</sup> Timwa mwuvaro Herotiva tiqaro, Mwi entara mwi quara avuqavu hirerave, timwa kyero mwiva mwi entaraqaa nronravanto variqaro nai tuavaaqa kyuqera ututero uro nai tainta vunyahua varu taintaraqaa mwatakyaa viro variqaro mwi mwatanaahuara aakyara ntamwa kyero mwihua qua timwa nyuvata (mwihua mwiva kyuqe inraikya ututora taqeta mwia qua rieta) mpoqama kyeta mwianra qamwateta nronraqama kyeta timwaqita vita Herotirara tiqata,

<sup>22</sup> Mwiva hia qumina vaisivanto variqaro qua tiho, Mwiva mwanriqvantove, tuvaro

<sup>23</sup> Herotiva mwihua nkye qutaa qiaavo tiro mwiva hia qaqao Kotiva nraahuma mwanriqvantove variho tiraitiro varuvaro mwia kyaara qamwanrama kyero Kotiva titova mpovanto mwia ntuqutu kyovaro mwimwivanto mwia mwamwanta nramwa kyovaro mwiva qutu vura.

<sup>24</sup> Herotiva qutu vuvata Jesusira nraaqiaranramwuvanto Kotira qua timwaqita vuvata airi nraakyte qora mwi quara riemwaqi viqata Jesusira nraaqiaraqama vita kuaaqi varura.

<sup>25</sup> Vanavaasikya Sorukya munima nyunra vareta Iesusira nraaqiaranramwu Ierusalemini varuhua uro nyita mwiaqataita mwitanahua vaisi mpo Ioninra mwia nrutu mpo Maakiravata vita kyeta uro ntanteta Antiokini vura.

## 13

### *Vanavaasiravata Soruravata nyianrani sitovata vura*

<sup>1</sup> Antiokini Iesusira nraaqiara mponramwu varura. Iesusira nraaqiara mponramwuvanto poropeti vaisi varuvata mponramwuvanto Kotira okyara mpo okyara mpo okyara timwa nyi varuhua varura. Vanavaasivave, Simioniva mwia vara nrutu Upivave, Rusiaasiva Sairininyaavave, vunyaa vaisi Herotira henava Maneaanivave, Soruvave, mwihua mwi kyaiqara vareqata Iesusira nraaqiaranramwu kyaahaqamaqita vi varura.

<sup>2</sup> Mpo enta mwihua kuairama vita variqata kyara aurama teta Kotirara aakyara nte varuvaro Kotira mwanraquravanto mwihua timwa nyinro tiqaro, Vanavaasikya Sorukya mpo kyaiqa varaate tina, mwitanahua nyaarauquo. Qio mwitanahua ninive timwataate, tiro.

<sup>3</sup> Kotira mwanraquravanto mwitaa tuvata mwihua qaiqaa kyara aurama teta Kotirara aakyara ntamwa kyeta mwiaqataita mwihua mwitanahuqaqaa nkyiari kyauqu vateta mpo mwatani sitovata vura.

### *Mpo mwata Saiparaasini vura*

<sup>4</sup> Mwitanahua sitovaro Kotira mwanraquravanto aanra nyaamwutovata Vanavaasikya Sorukya mwatukya mpo Serusiani uto nteta mwiaqataita sipiqi mwaanri nteta kyaarerera nronraqa qara vareta kyaarerera utaqaa vahu mwatara Saiparaasini vura.

<sup>5</sup> Mwi mwataraqaa uro nteta mwitanahua uro mwatukya mpo Saramisini Iutaa mwaanra nraamwuqi variqata Kotira qua timwa nyunra. Ioni Maakiva mwitanahua kyaahaqa hirero mwitanahua kyapata vurama.

<sup>6</sup> Vanavaasikya Sorukya Saiparaasini mpo mwatukya mpo mwatukya nrohiqata Kotira qua timwa nyiqi vita vutura hini tokya mwatukya mpo Peposini uro nteta taqovaro quaha uti varu vaisiva mpovanto varura. Mwia nrutu Mpaa-Iesusiva mwiva Iutaa vaisivanto nai unra tiro tiqaro, Nte Kotira qua mwakyaakya qovarama kye varuquo, tiro.

<sup>7</sup> Mwitaa tiqaro mwiva kamaninra totiqama tero varura. Kamaninra mwia nrutu Sesiaasi Poraasiva mwiva kyuqe vu nraato vataava, mwiva Kotira qua riarero Vanavaasiravata Soruravata nyaanronra.

<sup>8</sup> Nyaanrovaro Mpaa-Iesusiva mwia vara nrutu Erimaasiva, mwivavata variqaro kamaninra mwianra e hia mwitanahua Iesusirara ti quara riaante tuvaro

<sup>9</sup> Soruva mwia nrutu mpo Poruva Kotira mwanraquravanto mwia utaqi kepukyaqama kyero varuvaro mwiva quaha vaisi mwia taqero mwianra tiqaro,

<sup>10</sup> E Tovesi nraaqiaravantove. Ekyaa kyuqe inraikyavanto vahara e mwia nramwuttaavama variaro. Unra quave, uaqia hi kyaiqavave, mwi inraikyava nraahuma i vu nraatoqi vaiho. E Kotira qua mpo okyara mpo okyara api ti variananrave. Api qua qaqlira kyaataarama e qati nraahu mwi quara ti variaro.

<sup>11</sup> Qio riaante. Mateqama nronravanto i ntutuqutiraro i vuvanto qipa quananrove. Mwiaqataira e huravata mporavata variqi viqara hia huari qio taqenanrave, tiro. Mwitaa tuvaro Erimaasiva taqovaro mwia vuvanto entama vuvaro mwiaqatairo mwiva aanrani viro tiqaro, Ni kyauqu tu vareta aanra naamutaate, ti varura.

<sup>12</sup> Poruva mwitaa tuvaro Erimaasira vu qipa vuvaro kamaniva vunyava mwi inraikyara taqero mwiva Porukya Vanavaasikya tu quarara quitaave tiro kyauqu ntukikinraaqa tero Iesusira quara kyuqe quave tura.

### *Mwata mpo Pisintiaani vura*

**13** Poruvavata mwia vatama kye nruhuavata Peposi kyeta mpotuqi vuhsa mwata mpo Pampiriaani uro mwatukya mpo Pekaani uro ntora. Mwini uro ntovaro mwihuaqitairo Ioni Maakiva mwihua kyero uro ntantero Ierusaremini vura.

**14** Vuvata mwinramwuhua vuhsa Pekaa kyeta Pisintiaani vuhsa mwatukya mpo Antiokini uro nteta mwini variqata mwaanraqaa mwinramwuhua uro Iutaa mwaanra nraamwuqi vera nteta mwatakyaa vita varura.

**15** Mwi mwatanaahua Mosesiva qara ntumwato quara kyaara ntita poropetivanto qara ntumwato quara kyaara ntumwa kyeta mwiaqataita mwaanra nraamwuqaa ntaqikyuhua vaisi mpo titovaro mwiva mwinramwuhua kyapara hiro tiqaro, Tiri tiqata vakyaa tuaavo, tiri kepukya timwiani quava vahirera, nkye tiri timwa timwivaqeta tire riaare, tiro.

**16** Mwitaa tuvaro Poruva siviro kyauqu tuaahera kyero mwiva mwihua timwa nyinro tiqaro, Nkye Isareri vaisinramwuvata, nkye mpo mwatanaahua Kotira nrutu tuaahere variahua nkyevata, riaate.

**17** Isareri nraakye qoraqaa ntaqikyi variva Kotiva, mwiva haaru tiri haivaqahuarave tiri tiqohuara tiqaro, Nkye ni nraakye qorama varivarave, turave. Mwiaqataitiro tiri haivaqahua Isipini varu entara Kotiva mwihua kyaahaqa hi varuvata mwihua airiqama vuvaro mwiaqataitiro Kotiva nai kepukyaqo mwi mwataraqataitiro mwihua sita varero

**18** nrumu kyovata mwihua 40 ihiara qumina mwatani variqi vuvaro Kotiva hia mwihua qaqlira kyaraitiro, mwihuaqaa ntaqikyiqi vurave.

**19** Mwitaamaqi viqaro mwihua kyaahaqa huvata mwihua Kenaanini nkyiari nramwutaa 7 mwatanaaa ru taiqa kyovaro Kotiva Kenaani mwia tiri haivaqahua nyuvata

**20** mwihua mwi mwataraqaa 450 ihi vara kyeta ntaqikyiqi vurave.

Mwiaqataitiro Kotiva tiri haivaqahuaqaa ntaqikyiqaro vaisi mpo uhua nronraqama kyero nraakye qora ni qua timwa nyiate tuvata mwihua Kotira qua timwa nyiqita vita mwitaamaqi vita qutu vuvaro mwiaqataitiro Kotiva Samuerira nronraqama kyovaro mwiva Kotira qua timwa nyi varura.

**21** (Mwiaqataita tiri haivaqahua pupohama nyuvata Samuerirara qaqlira tita, Vaisi mpo mwatama tairaro mwiva nronra vunyavaa variqaro tiriqa ntaqikyiarive, tuvaro) Kotiva mwi quarara eo timwa kyero Mpenisaminra okyara Kisira mwaaqu mwia nrutu Sorura nyuvaro Soruva 40 ihiara variqiro viqaro tiri haivaqahuaqaa ntaqikyiqiro vurave.

**22** Mwiaqataitiro Kotiva mwia qoririma mwatero Ntevitiva mwihua vunyaa vaisi variarive tiro, mwia nronraqama kyovare. Kotiva Ntevitirara qamwateqaro mwataama tiro, Ni mutukyavanto Iesira mwaaqu Ntevitirara vaiho. Mwiva nte vararera hiani kyaiqara qiomava mataananrove, turave.

**23** Qio Kotiva nai qua vatora mwivau viqaro Ntevitira okyaraqitairo Isareri huvantu kyaani vaisira Iesuisira vara kyovaro tumunrave.

**24** Tumu variqaro Iesuisiva hia nai kyaiqa toharo entara Ioniva aakyara ntamwa kyero Isareri nraakye qora timwa nyinro tiqaro, Uaqia hi aanranra qaqlira kyeta nramanri varaate, turave.

**25** Mwitaa timwaqiro viro nai kyaiqa taiqa kyaani entava qaumato vahuvaro Ioniva tiqaro, Nkye nianra ta vaisivaveve qiafo? Nkye Kotiva titaani vaisira vekya variava hia nte mwaa mwivave. Qio taqaate. Mwiva ni naakiara nri variho. Nte qati qumina vaisi variqananra tina, hiama qio mwia kyuqu nraamwu ntahuku mwataaninrave, tiro. Ioniva Iesuisirara mwitaa turave.

<sup>26</sup> Qio nkye ni kata pakyaa Evarahaamunra nraisivantove, qumina mpo mwatanaa Kotira nrutu tuaahere variahuavatave, nkye ekyaa riaate. Tire huvantu vita kyugema variananranra rieqaro Kotiva tiriara mwi quara vara kyaiharo nriho.

<sup>27</sup> Ierusaremini variahuavata, mwihuaqaa ntaqikyiahuvata, hia ntapihiavar Iesussiva Kotiva titaiva varihata mwihua mpo mwaanraqaa mpo mwaanraqaa poropetivanto qara ntumwatora kyaara ntita hia ntapihiavar mwi quava Jesusirara tihata mwihua poropeti qua hia ntapihi kye riaraitita, Jesusiraqaa qua vataavarora tiro, haaru poropeti vaisivanto qua tuva mwivauma vaiho.

<sup>28</sup> Mwihua Jesusira ru kyarerera uti variqata taqovaro hia mwiaqaa qua vahuvatavata mwihua kepukyaqama kyeta Paireatira rapateta mwia ru kyaante turave.

<sup>29</sup> Mwiaqaataita mwihua Kotira mpukuqi Jesusira mwitaa mwitaa hivarave tu quara utu taiqa kyeta Jesusira kyatariqaatai itu kyeta varaqi oriqi uto quntamwa torave.

<sup>30</sup> Quntamwa tovaro Kotiva mwia qati vara sivuma kyovaro

<sup>31</sup> Iesussiva airi enta mwatani nrohi varuvata Karirisaita Ierusareminianra Jesusira vatama kyeta vuhua mwia taqorave. Mwihua matevata nkyiari taqorara Isareri nraakye qora timwa nyi variavo.

<sup>32</sup> Tire Vanavaasikyavata nkyi kyuqe mwakyaakya timwa nyinrenra nrunrahuave. Kotiva haaru tiri haivaqahua timwa nyinro tiqaro, Nraakiara nkyiara rieqana nte mwitaa mwitaa hirerave, tu quava mate mwivauma vaiho.

<sup>33</sup> Tire teta haivaqahua nyaisinramwu varuraro Kotiva tiri kyaahaqa hirero Jesusira qati vara sivuma kyaiho. Haaru Kotiva Saami 2 mwiqi Jesusirara mwataama tiro: E ni maaquvantoma variaro.

Mate nte i qovama varuqo, turave.

(Ihi 2:7)

<sup>34</sup> Iesussiva qutu viharo Kotiva mwia qati vara sivuma kyaiharo Iesussiva hia qaiqaa qutu viro ntenra quariva variho. Haaru Kotiva Jesusirara mwaa quara timwa torave: Nte Ntevitirara i kyuqema mwatarerave qiaava inraikyara, mwi inraikyara i mwinrenrave, turave.

(Aisaiaa 55:3)

<sup>35</sup> Mpo Saami mpukuqi quavanto mwataamama vahiro:  
E hia ena nraaqiara kyuqera qaqlira kyairaro  
qumina ntenraananrove, turave.

(Ihi 16:10)

<sup>36</sup> Ntevitiva tiri haivaqava Kotira kyaiqa varaqiro viro uro qutu vuvata quntamwa tovaro ntenra vurave.

<sup>37</sup> Qio Kotiva qutu vira qati vara sivuma kyaiva, Iesussiva hia qumina ntenra virave.

<sup>38-39</sup> Ni kata pakyaa tuaavo, nkye riaate. Nkye uaqia hi kyaiqara uti quara Iesussiva nraahuma qio taiqa kyaananrove. Tiretana mwi mwakyaakyara nkyi timwa nyinrenra nrunro. Nkye Mosesira qua riemwaqita vivaro hia mwi quava nkye uaqia hi kyaiqara uti quara nruka nyataananrove. Nkyiqa qatima qua vahirata nkye rupa vita variqata hiama qio qati varivarave. Jesusirara qutaa mwivave qiariva, mwiva nraahuma qio huvantu viro qati variananrove.

<sup>40</sup> Qio nkye rauriqata variate. Haaru poropetivanto Kotira qua qara ntumwato quava nkyiqli qutaa vahiankyorave. Quavanto mwataama tiro:

<sup>41</sup> Nkye ni quara raima mate vaisihua,

nkye rauriqata variate.

Nkye nte vararerera hiani kyaiqarara  
nraato taramaqi vita uro qutu quate.

Nkye qati variqi vi entara ntena vararerera hiani kyaiqara  
varaarita nkye mwi kyaiqarara hia qutaave tivarave.

Mpowanto mwi kyaiqara okyara vutu kyero  
nkyi timwa nyinratavata nkye hia qutaave tivarave.

Nkye nte kyaiqa varaaninra taqeta  
kyauqu ntukikinraaqa teqata qutu quate, tura.

(Habakuk 1:5)

Kotiva mwitaa turave, tiro.

<sup>42</sup> Poruva mwi quara timwa nyi taiqa kyero Vanavaasikyantiri mwaanra nraamwuqitairo virera huvata nraakye qoravanto tiqata, Qio nkyetana mpo enta mwaanraqaa qaiqaa nrumu variqata mwi quara mpoqiavata timwa timwiate, tita.

<sup>43</sup> Mwitaa tuvaro mwihua qua timwaqi vuva taiqa vuvata airi vaisi Iutaa vaisive, mpo mwatanaa vaisi Iutaa mwaanra okyara riohuave, mwihua Porukya Vanavaasikya sataqi vuvata mwitanahua mwihua qua timwa nyita tiqata, Kotiva nkyiara po timwa nyataani quara kepuuyaqama kyeta riemwaqita quate, tita.

<sup>44</sup> Mwitaa tuvata mpo mwaanraqaa mwi mwatuqyaraqi varuhua airivanto Kotira qua riarerata ntuvaantuama vita varura.

<sup>45</sup> Ntuvaantuama vuvata Iutaa vaisinramwuvanto taqovata mpo mwatanaa airivanto ntuvaantuama vuvata Iutaa vaisinramwuvanto inronra hita tiqata, Mpo mwatanaavanto tirivata kuaaqi ntuvaantuama vita varivorave, timwa kyeta Porura uaqiamma mwatarerata mwia quara unra quave tiqata mwianra qora qua tura.

<sup>46</sup> Mwitaa ti varuvata Porukya Vanavaasikya hia aatu hiraitita, kepuuyaqama kyeta tiqata, Tiretana nkyi Iutaa nraante qua timwa nyunro. Tire mwia qioma mwitaa huro. Mwiaqataita tire taqaurata nkye mwi mwakyaakyarara uaqia hi quarave qiaovo. Nkye ekyaa enta ekyaa enta qati variqi vi quarara hia nkyi kyakya ihata variavo. Mwia kyaara tiretana nkyi Iutaa qaqlira kyeta mpo mwatanaahua mwi quara timwa nyinrenrave.

<sup>47</sup> Nronravanto tiritana titeqaro mwitaama tiho:

E mpo mwatanaa mpo mwatanaa kyaahaqa hirata  
mwihua kyuqe aanraqaa vivaro Kotiva mwihua sitaarive  
tina, nte i omwa votima kyena titauqo, turave.

(Aisaiaa 49:6)

Nronravanto mwitaa turave, tiro.

<sup>48</sup> Porukya Vanavaasikya mwitaa tuvata mpo mwatanaa mwihua mwi quara rieta qamwata kyeta nronravanto timwato quarara kyuqe quave tita. Nraakye qora ekyaa enta qati variqi quate tiro, Kotiva sita varohua, mwihua Porukya Vanavaasikya qua rieta Iesusirara qutaave tura.

<sup>49</sup> Qio Iesusira quavanto ekyaa mwi mwataraqi viro nrinro huvata ekyaa mwi quara riemwa ntoro.

<sup>50</sup> Mwitaa huvata Iutaavanto mwitanahua inronra hita uro mwi mwatanaahua nraakye nronranramwu Kotira nrutu tuaahere varuhuavata, nronra vaisivata, unra qua timwa nyuvata mwihua Poruravata Vanavaasiravata uaqiamma nyateta mwihua nkyiari mwataqataita mwitanahua sitamwa kyora.

<sup>51</sup> Mwitaa huvata Iesusiva nronraqama kyo vaisitanahua nkyiariqaatai ntuvendrauma kye qaqlira tuto kyeta tiqata, Nkye taqevarave, timwa kyeta mwi mwataraqama kyeta uro mpo mwatuqyara Aikoniaamini vurama.

<sup>52</sup> Qio Iesusira nraaqiaravanto qamwateqata varuvaro Kotira mwanraquravanto mwihua mwutukyave su nyaato kepuuyaqama kyovata varura.

## 14

### *Porukya Vanavaasikya Aikoniaamini varura*

<sup>1</sup> Porukya Vanavaasikya Aikoniaamini mwini uro nteta mwitanahua tauraa Antiokini huntema kyeta uro Iutaa mwaanra nraamwuqi nraante variqata qua kepuuyaqama kyeta timwa nyuvata Iutaa nraakye qora airivantovata, mpo mwatanaa nraakye qora airivantovata, Iesusirara qutaa mwivave timwa kyeta Iesusira nraaqiaraqama vita kuaaqi varura.

<sup>2</sup> Mwitaa huvata Iutaa vaisi mponramwuvanto hia Iesusirara qutaa mwivave tuhua uro unra quaquo mpo mwatanaa mwihua su nyaato vara apiqama kyovata mwihua Porukya Vanavaasikyara ua vu nraato tura.

<sup>3</sup> Mwitaa ti varuvata Porukya Vanavaasikya airi enta mwini variqata hia aatu hiraitita, Iesusira mwakyaakya timwa nyiqi vuvaro nronravanto Kotiva mwitanahua kyaahaqa huvata mwitana mwini variqata nronra kyaiqa hia taqo kyaiqara varaqita vura.

<sup>4</sup> Mwi mwatukyaraqinaahua ntainra vita hinivanto Porukya Vanavaasikyaqaa ntumwa vuvata hinivanto Iuttaaqaa ntumwa vura.

<sup>5</sup> Mwiaqaataita mpo mwatanaa mwihuavata, Iutaa mwihuavata, nkyiari nronra vaisi kyapata Porukya Vanavaasikya qorama nyateta oriqa mwitanahua ntuqutirerata uti varuvata

<sup>6</sup> mwitanahua mwi quara vaakya riemwa kyeta, mwiaqaataita mwitanahua ntuqema kyeta vetara mwata mpo Rikoniaani uro varura. Mwini variqata mwatukytaa ratanaqi Risitaraanivata, Ntepinivata, mwi mwatukyatana hini hini vahu mwatukyaraqivata,

<sup>7</sup> nrohiqata Iesusira mwakyaakya timwa nyiqita vura.

### *Risitaraanivata Ntepinivata varura*

<sup>8</sup> Risitaraani vaisi mpovanto kyuqu ntanrenra vuva mwatakyaa viro varura. Mwi vaisira mwia nrova mwata kyovaro mwia kyuqu ntanrenra vuva hia aanra nrohiraitiro varura.

<sup>9</sup> Mwiva mwatakyaa viro variqaro Poruva Iesusirara qua tura rie varuvaro Poruva mwi vaisiva Iesusiva quitaama ni kyuqu kyuqema mataananrove tura taqero Poruva mwia vuqi aitutu hiqaro

<sup>10</sup> mwianra aakyara ntamwa kyero tiqaro, Sivira ena kyuqu ntatuta kyera mwaamwianra variante, tuvaro mwiva qamwanrama kyero siviro nrohi varura.

<sup>11</sup> Nrohi varuvata nraakte qora ntuvaantuama vuhua Poruva mwi kyaiqara varora taqeta, mwihua nkyiari Rikoniaa quaqitaita aakyara nteta tiqata, Qikye, Nyaamwunyaa mwanriqatanavanto vaisi tueta mwaini tirivata varirerata tumu ntaavo, tita.

<sup>12</sup> Mwitaa timwa kyeta mwihua Vanavaasirara nkyiari vunyaa mwanriqa nrutu nteta *Suaasirave* tita. Poruva qua ti varu vaisiva varuvatara tita, mwianra mwanriqa mpo nrutu *Heminrave* tura.

<sup>13</sup> Suaasirara aakyara nte varu nraamwuva mwatukytaa nraaqani vahuvaro mwiaqaatairo Suaasira kyaiqa vara mwate varu vaisiva nronravanto purimakau qoranramwu nraahu sita varero maunra viti kye nruntaqi ntumwu nyateravata varero nri ntovata nraakte qora ntuvaantuama vuhua Porukya Vanavaasikya nrutu tuaahereqata purimakau ru kye nyinrenrata uti varura.

<sup>14</sup> Mwitaa huvata mwitanahua mwihua mwitaa hirera uti varurara ntapihi kyeta, haunri mwihua mwitaa hivorave timwa kyeta, nkyiari tuavaaqa nrahitu kyeta nraakte qoravanto ntuvaantuama vita varura utaqaa hiantamwate viqata aakyara nteta tiqata,

<sup>15</sup> Vaisituaavo, eqaate. Tiretana nkyi nraantante qumina vaisima varuro. Tiretana Iesusira mwakyaakya kyuqe mwakyaakya nkyi timwa nyinrenrata nrurro. Nkye unra mwanriqa mwia utuara mwintira qaqlira kyeta quataa mwanriqa nrutu tuaaheraate tita, tiretana mwaini nruranrave. Mwanriqa Kotiva mwiva nraahuma nyaamwuvata, mwatavata, ekyaa inraikyavanto mwataaqi vahiravata, nyaamwuni vahiravata, utu kyero vatairave.

<sup>16</sup> Haaru Kotiva ekyaa nraakte qora qati kyovata nkyiari quataa hi aanranraqaa vurave.

<sup>17</sup> Kotiva qati kyovata vuvarovata mwiva nai nronravanto varira ntapihiate tiro, mwiva nai nyaamwuteqaro kyuqe inraikya mpo inraikyaqo mwihua nyaamwutorave.

Mwiva vati vara kyaiharo kyuqema kyeqaro ntiharo kyara kyuqema kyero qupiqe-qaro keko tihatama nkye nreqatama qamwateqata variavo, tita.

<sup>18</sup> Porukya Vanavaasikya mwitaa tuvatavata nraakyе qora ntuvantuama vuha hia mwitanahua quara nronraqama kyeta riaraitita, mwitananra mwanriqavantove timwa kyeta, purimakau ru kyeta mwihua nyutu tuaahera nyatarera uti varuvata mwihua mwukyaa tu kyeta hia mwitaa hiate timwa kyeta mwihua antua kyora.

### *Oriqo Porura aavata ntuqutu kyora*

<sup>19</sup> Mwia nraakiara Iutaa mponramwuvanto Antiokisaitave, Aikoniaamisaitave, nri nteta nraakyе qora ua vu nraato nyuvata mwihua qua riemwaqi vita ori vara kyeta Porura aavata ntuqutu kyeta qutu viho timwa kyeta mwia ntanrauqita uro mwatukya mwaaqani tuto kyora.

<sup>20</sup> Porura mwaaqani tuto kyeta vuvata Iesusira nraaqiaranramwuvanto nrumbu Porura tataaqa ututuma vita varuvaro Poruva mwiaqaatairo qati siviro qaiqaa mwatukya mwiqi viro. Mwia qanranraa mwiva Vanavaasikyantiri mwatukya mpo Ntepini vura.

### *Mwitanahua uro ntanteta Antiokini nrunra*

<sup>21</sup> Mwitanahua Ntepini variqata Iesusira mwakyaakya timwa nyi varuvata airivanto Iesusira nraaqiaraqama vuvata mwitanahua mwiaqaataita uro ntanteta Risitaraani mateta Aikoniaamini vuha Antioki Positiaa mwatani vura.

<sup>22</sup> Mwini variqata Iesusira nraaqiara mwini varuhua mwihua kepukyaqama nyateta tiqata, Iesusirara nraahu riemwaqita quate, tita. Tire Kotira mwatukyaqiqi virera hiaraha airi muaanra varaqi vitama mwini qio quananrave, tiro.

<sup>23</sup> Poruva mwitaa timwa kyero mwitanahua Vanavaasikya mpo mwatukya mpo mwatukya nrohiqata vaisi vara mwatama kyeta nronraqama kyeta tiqata, Nkye Iesusira nraaqiaraqaa ntaqikyiqita quate, timwa kyeta mwihua kyapata variqata kyara aurama tetu Kotirara aakyara nteta tiqata, E mwaa Iesusirara quataave qia vaisinramwuhuaqaa kyuqema kyera ntaqikyiqira quante, tita.

<sup>24</sup> Mwitaa timwa kyeta mwitanahua Positiaa vara kyeta mpo mwata Pampiriaani nri ntora.

<sup>25</sup> Mwi mwatara mwini variqata uro Pekaani Kotira qua timwa nyita, mwiaqaataita mwitanahua vevara Ateriaani uro nteta,

<sup>26</sup> mwiaqaataita sipiqi mwaanri nteta kyaarerera nronraqama tetu Antiokini qo-qaraara mwini nrumbu ntanteta vura. Tauraa Iesusira nraakyе qoravanto Antiokini mwini variqata Kotirara aakyara nteta tiqata, Porukya Vanavaasikya po kye timwa nyatairata mwitanahua mpo mwatanaa mpo mwatanaa Iesusira kyaiqara timwa nyiate, tunani nkyiari kyaiqa taiqa kyeta vura.

<sup>27</sup> Mwitanahua mpo mwatanaa mpo mwatanaa mwatukyaqiqi nrohita Antiokini uro nteta Iesusira nraaqiara mwini varuhua ntuvantuama kyeta nkyiaritana nrohurara timwa nyita tiqata, Kotiva aanra qatua kyaihata mpo mwatanaa nraakyе qoravantovata Iesusirara quataave qiaivo, tita.

<sup>28</sup> Mwitaa timwa kyeta mwitanahua Iesusira nraaqiaranramwu kyapata mpua-haama mwini varura.

## 15

### *Porukya Vanavaasikya Ierusaremini vura*

<sup>1</sup> Porukya Vanavaasikya Antiokini varuvata Iutiasaita vaisi mponramwuvanto nri nteta Iesusira nraaqiaranramwu timwa nyita tiqata, Nkye hia Mosesiva tuntema kyeta nkyeta mwamwanta toqaivera, Kotiva hiama qio nkyi sitaanrove, tita.

<sup>2</sup> Mwitaama kye timwa nyi varuvata Porukya Vanavaasikya mwi quarara qao timwa kyeta mwihua kyapata nronraqama kyeta inronra hi varura. Mwi quara kyaara

inronra hi varuvata Antiokini varuhua kuua qua vateta Porukya Vanavaasikyavata, mpo uhuavata, siteta tiqata, Nkyenramwu uro Ierusaremini Jesusiva nronraqama kyai vaisinramwuhua kyapata variqatama mwi quara ntapihi kyaate, tita.

<sup>3</sup> Timwa kye sitovata aanravau viqata mwinramwuhua mpo mwatanaahua Jesusira ara qutaa mwivave turara mwata mpo Ponisianivata, Sameriaanivata, timwa nyiqita vura. Timwa nyuvata Jesusira nraaqiara mwini varuhua mwihuavata mwi quara rieta mpoqama kyeta qamwateqata varura.

<sup>4</sup> Mwinramwuhua timwa nyiqi vita Ierusaremini uro ntovata ekyaa Jesusira nraakye qoravantovata, Jesusira nraaqiara nronranramwuvantovata, Jesusira nraakye qoraqaa ntaqikyi varuhuavata, ekyaa mwihua mwinramwuhua qamwata nyatovata Porukya Vanavaasikya mpo mwatukya mpo mwatukya nrohiqata Kotiva kyaahaqa huvata mwitanahua nronra kyaiqa varaqita nrohi varurara timwa nyunra.

<sup>5</sup> Mwinramwuhua mwitaa ti varuvata Jesusira nraaqiara mponramwuvanto mwihua Parisi mwaanra qua riohua sivita tiqata, Qaqao, tire Iutaa vaisi variqata Mosesira mwaanra qua rieqatama teta mwamwanta toqaana okyararave, Mosesiva timwato quarave, riemwaqita vurahuave. Mpo mwatanaavanto Jesusira qua riaahua, mwihuavata hiama eqevarave. Mwihuavata nkyiari mwamwanta toqa kyeta Mosesira quavata riemwaqitama vivarave, tita.

<sup>6</sup> Mwitaa tuvata Jesusiva nronraqama kyo vaisinramwuhuavata, Jesusira nraakye qoraqaa ntaqikyi varuhuavata, mwi quara avuqavu hirerata ntuvaantuama vita.

<sup>7</sup> Ntuvaantuama vita mwihua airi qua timwaqita vuvaro Pitaava siviro mwihua timwa nyinro tiqaro, Ni kata pakya tuaavo, nkyevata haaru taqorave. Hia Iutaa nraahu Jesusira qua rieqata qutaave qiate tiro, Kotiva nkyiqitairo ni nronraqama kyero mwi quara mpo mwatanaahuavata timwa nyante tiro, ni titorave.

<sup>8</sup> Kotiva ekyaa nraakye qora mwutukyaqi taqe varivave. Mwiva nai mwanraqura tiri timwintema kyero mpo mwatanaahuavata nyi varirave. Mwitaa hirara tita, tire taqauraro Kotiva mpo mwatanaahuavaravata qamwateqaro varirave.

<sup>9</sup> Kotiva hiama tiri mpo qarama timwa tero mwihua mpo qarama nyataiho. Mwihuavata tirivata kuua qarama nraahu timwa taiho. Tiri nraantante mpo mwatanaahua Jesusirara qutaa mwivave qiarara tiro, Kotiva mwihua uaqia hi inraikyara nruka nyatairave.

<sup>10</sup> Tiri haivaqahuavata, tire tetavata, Mosesira qua vara qu vareta nrohirera taqauraro muaanra ntairave. Qio nkye nanraqama mwi quara mpo mwatanaahuqaa qu nyatarerata uti variavo? Nkye mwitaa hiqatama Kotira mwataara hirerata uti variavo. Hia nkye mwitaa hiate.

<sup>11</sup> Tire taqauraro Jesusiva nronravanto tiriavaravata po tiraqatairo Kotiva tiri tivitairave. Qio tiri tivitaintema kyero Kotiva mpo mwatanaa mwihuavata qioma siterove, tiro.

<sup>12</sup> Pitaava mwitaa tuvata mwipi ntuvaantuama vuhua tirema variqata mwihua Vanavaasikya Porukya qua rie varuvata mwitanahua sivita nkyiari nrohirara timwa nyita. Mwitanahua mpo mwatanaavanto varunani nrohuvaro Kotiva kyaahaqa huvatatana nronra kyaiqa varaqita nrohirara mwihua timwa nyunra.

<sup>13</sup> Mwitanahua timwa nyi taiqa kyovaro Iemisiva siviro tiqaro, Ni kata pakya tuaavo, ni qua riaate.

<sup>14</sup> Vuni Kotiva nraakye qora mponramwu nai nrutu tuaaheraate tiro, uro mpo mwatanaahuqatairo sito quara Saimoni Pitaava vaakya tiri timwinrave.

<sup>15</sup> Qio poropeti vaisinramwu haaru qara ntumwato quavavata, mwaa Pitaara quavantovata, ntapihi kyero kuua mwiaqama vahirove. Haaru mwataaa turave:

<sup>16</sup> Nronravanto tiqaro, Nraakiara nte nrumu ntantena  
uro nkyi haivaqara Ntevitira nraamwu ntaputama vira

qaiqaa hoqarerave.

Mwi inraikyara mwi inraikyara nraaparaqama vira  
qaraakyaqama kyena vara qaiqaa mwaamwianra tarerave.

<sup>17</sup> Nte mwitaa hiarita nraakye qora mpo mwatanaa  
mpo mwatanaahuaqitaina nte ntena nraaqiaraqama  
tena nyaanrama taarihua nronra ni puaama kyevarave,  
tura.

<sup>18</sup> Nai haaru nronravanto mwi quara qovarama kyorave,  
turave, tiro.

(Emosi 9:11-12)

<sup>19</sup> Iemisiva mwitaa timwa kyero mwiva tiqaro, Qio nte mwataamama riauqo. Mpo  
mwatanaahua qora aanra qaqlira kyeta Kotira aanraqaa quahuqa hia tire mpo  
muaanra vataare.

<sup>20</sup> Nrivaqe tire mwihuan qara nraahu ntumwa kyeta mwitaa mwitaama timwa  
nyianre:

Nkye hia qumina unra mwanriqani vate kyarara nraate.

Hia vaisivanto nraakyevata api nrohiate.

Hia nruntana tu vareta ntaqutu kye vahi aasaura nraate.

Hia nraanrevata nraate.

Mwi quara nraahu qara ntumwa taarata mwihua taqaate.

<sup>21</sup> (Mpo mwatanaavanto mwi quara riemwaqita vivera, hiama Iutaa mwini varihua  
mwihua kyapata inronra hivarave.) Iutaavanto mpo mwata mpo mwata quahua  
variqata mpo mwaanraqaa mpo mwaanraqaa Mosesira qua kyaara ntumwaqita vi  
variarave. Mpo mwatukya mpo mwatukya Mosesira qua timwa nyiahua variavo, tiro.

### *Mpo mwatanaahuani qara vara kyora*

<sup>22</sup> Iemisiva mwitaa tuvata Jesusiva nronraqama kyonramwuhuavata, Jesusira  
nraakye qoraqaa ntaqikyi varuhuavata, ekyaa mwipi ntuvaantuama vita varuhua-  
vata, kuaa qua nraahu vateta tiqata, Nrivaqe tetaqitai vaisi mpotana sitaarata  
mwitanahua Porukya Vanavaasikya kyapata vihua tire mwaaqi variqata timwa tauna  
quara vevara Antiokini varihua uro timwa nyiate, tita.

Mwitaa timwa kyeta mwihua vaisi taaratana mwatama kyora. Vaisi mpo mwia  
nrutu Iutaasira mwia vara nrutu Vasavaasira, vaisi mpo mwia nrutu Sairaasira.  
Mwitanahua Jesusira nraakye qora hini mwihuaqitai viritoqama vita varutanahua  
varura.

<sup>23</sup> Mwihua mwatama kyeta mpo mwatanaa mwihuan qara vara  
kyeta tiqata,

Tire Jesusiva nronraqama kyainramwuhuavata, Jesusira  
nraakye qoraqaa ntaqikyi variahuvata, tire nkyi qata  
vakyaahua variqatama nkye mpo mwatanaa Antiokini  
variahuvave, Siriaani variahuvave, Sirisiaani variahuvave, nkye  
tiri tiqata vakyaahua variahua tire nkyi qua mwantauro.

<sup>24</sup> Tire riaurata tiriqitaita vaisi mponramwuvanto uro api qua  
nkyi timwa nyiavata nkye mwi quara rieta qumimaqa hi  
variavo. Hia tire mwihua sitaurata mwihua nkyiari riemwa  
kyeta uro mwitaa qiavo.

<sup>25</sup> Mwiaqaataita tire ntuvaantuama vita kuaa qua vateta  
mwataama tita, Nrivaqe vaisi mponramwu sitaarata mwihua  
tiri mwutukya vahi vaisitana Porukya Vanavaasikyavata  
quate, turo.

<sup>26</sup> Porukya Vanavaasikya hia nkyiari ru kyerara nronraqama  
kye riaraitita, mwitanahua tiri nronra vaisi Iesusi Karaisira  
kyaiqa varaqita vi variatanahuave.

<sup>27</sup> Mwaisaita tire Iutaasikya Sairaasikya sitaarata mwitanahua tire kuaa qua vateta qara ntumwa tauna quara mwaa nkyiari nyogitaitavata nkyi timwa nyivarave.

<sup>28</sup> Kotira mwanraquravantovata, tirevata, mwaa quara kuaa quama vatauro. Tire hia qumina airi qua tiqata nkyiqa muaanra vatarerave.

<sup>29</sup> Mwaa quara nraahu riemwaqita quate: Unra mwanriqani kyara vatera hia nraate. Hia nraanre nraate. Hia nruntana tu vareta ntaqutu kye vahi aasaura nraate. Hia vaisivanto nraakyevata api nrohiate.

Nkye mwi quara riemwaqi viqatama nkye kyuqema kyeta nrohivarave. Qio mwiqiarama tirenramwu turo, tita.

<sup>30</sup> Mwitaa timwa kyeta mwihua sitovata mwihua vevera Antiokini uto Iesusira nraaqiaranramwu varuhua kuairama kyeta qara vare vura nyuvata

<sup>31</sup> mwihua kyaara ntumwa kyeta ntapihi rieta mwi quarara qamwata kyeta kyuqe quama qaraqi vaiho. Mwi quava tiri kepukyaqama timwa taani quarave, tita.

<sup>32</sup> Mwitaa tuvata Iutaasikya Sairaasikya Kotira qua tutanahua sivita mwihua timwa nyiqata kyuqe mwakyaakya mpuahaa qua tiqata mwihua kepukyaqama nyatora.

<sup>33</sup> Mwitaa timwa kyeta Ierusaremisaita tumu ntotana airi enta mwini Antiokini varuvata mwiaqaataita Iesusira nraaqiaranramwu mwini varuhua kyuqema kyeta kyauqu nyita sitovata mwitanahua tumu ntanteta tauraa nkyiari tumunani vura.

<sup>34</sup> [Sairaasiva nraahu Antiokini variataa huvaro mwini varura]

<sup>35</sup> Porukya Vanavaasikyavata airi enta Antiokini varura. Mwitanahuavata mpo uhuavata nronravanto quara nraakyе qora timwa nyiqata varura.

### *Porukya Vanavaasikyatana inronra hita ntainra vura*

<sup>36</sup> Porukya Vanavaasikya Antiokini variqita vuvaro mpo entanramwu nritaroval Poruva Vanavaasirara tiqaro, Varaiqetana qoqaraananianra viqatatana mpo mwatukya mpo mwatukya viqata teta tiqata vakyaahua taqaare. Haaru tiretana Kotira qua timwa nyiavana nraakyе qorhua mwihua qiove variavo hiave qio variavo? tiro.

<sup>37</sup> Poruva mwitaa tuvaro Vanavaasiva Ioninravata vitero virero uti varura. Ioninra nrutu mpo Maakiva.

<sup>38</sup> Vanavaasiva mwiavata vitero virera uti varuvaro Poruva qaqao tiro. Haaru tiretana mpo mwatukya mpo mwatukya nrohiqata mwakyaakya timwa nyiqi vi variavararo mwi vaisiva tiritana Pampiriaaqitairo qaqlira kyero pupohovaro nrumu ntantero vurave, tiro.

<sup>39</sup> Mwitaa timwa kyetatana mwitanahua nronraqama kye inronra hi kyeta ntainra vura. Ntainra vita Vanavaasiva Maakiravata vitero nkyiararatanra mpona sipiqi mwaanri nteta Saiparaasini vura.

<sup>40</sup> Vuvaro Poruva Sairaasiravata vitero virera huvata mwia qata vakyaahua Iesusira nraaqiaranramwuvanto kyauqu nyita tiqata, Kotiva nkyitananra po timwa nyate variratama nrohivarave, tita.

<sup>41</sup> Mwitaa tuvaro Poruva Siriaanivata Sirisiaanivata viqaro mwiva Iesusira nraaqiaranramwu mwini varuhua kepukyaqama nyataqiro vurama.

<sup>1</sup> Poruva vuva Ntepinivata Risitaraanivata uro ntora. Mwini Iesusira nraaqiara mpo-vanto mwia nrutu Timotiva varuvaro mwia nrovavata Iesusira nraaqiara variqaro mwiva Iutaa nraakyе varuvaro mwia qova mpo mwatanaa Kirikivanto varura.

<sup>2</sup> Iesusira nraaqiaranramwu Risitaraani varuhuavata Aikoniaamini varuhuavata Timotirara kyuqe vaisive tuvaro

<sup>3</sup> Poruva mwiavata vitero virera hiro taqovaro Timotira qova mpo mwatanaa Kirikivanto variqarora tiro, mwiva hia Timotira mwamwanta toqa mwatova varuvaro Poruva mwia mwamwanta toqa mwatero. Poruva tiqaro, Iutaa mwaini variahua Timotira qova Kiriki vaisi varira ntapihiarave. (Mwihua Timotira mwamwanta hia toqa mwatairave tivorave timwa kyero Poruva Timotira mwamwanta toqa mwatero mwiaqatairo mwiavata vitero viro.)

<sup>4</sup> Vitero vuhua mwinramwuhua mpo mwatukya mpo mwatukya nrohiqata Iesusira nraaqiaranramwu tauraa Iesusiva nronraqama kyonramwuhuavata, nronra vaisin-ramwuvata, Ierusaremini variqata (mpo mwatanaavanto Iesusira nraaqiaraqama vihua mpo hi quara mwataa mwataama kye vataqi quate) tu quara timwa nyiqi vita tiqata, Nkye mwi quara nraahu riemwaqita quate, tura.

<sup>5</sup> Mwitaa timwaqi viqata mwinramwuhua Iesusira nraaqiaranramwu kyaahaqa huvata mwihua Iesusira qua kepuqyaqama kyeta riemwaqita vita airiqama vura.

### *Poruva ruvata taqora*

<sup>6</sup> Poruvavata mwia vatama kyeta nruhuavata uro vutura Karesiaa hini vahuvaro Pirisiaa hini vahuvaro Esiaa mwata mwiva utaqaa vahuvaro Kotira mwanraquravanto mwihuara hia Esiaa mwata mwiaqaa uro qua timwa nyiate tura.

<sup>7</sup> Tuvata mwihua vuhua Misiaa mwatani vuvaro Pitiniaa mwata qaumato vahuvata mwini virera tuvaro Iesusira mwanraquravanto hia mwini quate tuvata

<sup>8</sup> mwihua Misiaa mwata utaqama teta Toroasini uro ntora.

<sup>9</sup> Mwini uro nteta varuvaro entaqi Poruva ruvata voti hora qoqaa taqero. Taqe varuvaro Masentoniaa vaisi mpovanto siviro variro Porura nraanrenro tiqaro, Po, qati kyaarerera nronra tegera nrinrava nrumu mwaini Masentonianivata variqara tiri kyaahaqa hiante, tiro.

<sup>10</sup> Mwitaa tuvaro Poruva taqero mwiva siviro mwivavata, tire mpo hiavarahuavata, (nte Rukuavata,) mwitaama tita, Kotiva Masentoniaanivata uro ni qua mwakyaakya timwa nyiatema, tiho, tita. Mwitaa timwa kyeta tire mwini virerata tera hita.

### *Piripaini vura*

<sup>11</sup> Mwiaqatai tire sipiqi mwaanri nteta Toroasi kyeta kyaarerera nronraqama teta nramanri utaqaa vahu mwatara Samoteresini uro nteta. Mwia qanranraa tire qaiqaa sipiqa teta Niaporisini quavanana.

<sup>12</sup> Mwiaqataita mwi mwatukya kyeta verara mwatukya mpo Piripainianra quavarahua mwini uro ntaavanana. Masentonia mwataqitairo mwatuka Piripaivanto vunyaa mwatukyavanto vahuvata Romenivanto mwi mwatukyara qovarama kyora. Tire Piripaini uro nteta mpo entanramwu mwini varita.

<sup>13</sup> Mwini variqata mwaanraqaa tire mwatukyaqitaita vasaamwunra qesana ntuqietu uro mwaqani nramanri tokyasataa Iutaavanto Kotirara aakyara nte variava vahiananrove timwa kyeta nramanri tokyasataa mwatakyaa vita variqata mwini nraakyenramwu ntuaantuuma vuhua qua timwa nyi variavararo

<sup>14</sup> nraakyе mpovanto mwia nrutu Ritiaava mwiva Taiatairanyaava mwiva kyoqaa kyaiqa vareqaro nraanre tavuna nyiganro munima vare varu nraakyeva varuva. Mwi nraakyeva mpo mwatanaava variqaro Iutaa qua mwaanra rieqaro Kotira nrutu tuaahere varu nraakyeva varuvaro nronravanto mwia vu nraato kyaahaqa huvaro mwiva Poruva tu quara ntapihi kyero riora.

<sup>15</sup> Riero mwivavata mwia nraamwuqi varuhuavata nramanri varora. Nramanri varero mwiva tiriara tiqaro, Nte nkyi nronra vaisiara qutaa mwivave tuqo. Nkye nianra tiqata, E qutaama Iesusira nraaqiara variaro, tivera, nkye ni nraamwuqi nrata nivata variate, tiro. Mwitaa tuvaro mwia quavanto kepukyaqha huvata tire mwia nraamwuqi uro variavanana.

### *Porukya Sairaasikya karavu rupa kyora*

<sup>16</sup> Mpo enta tire qaiqaa Iutaavanto Kotirara aakyara nte varunani virera hiavararo mwanraata mpovanto nrumu tiri qintorama kyero. Vaanavanto mwi mwanraatara utaqi variqaro mwia kyaahaqha huvaro mwiva nraakiara qovara hiani okyarara nraakye qora timwa nyi varura. Nraakye qoravanto nraakiara qovara hiani inraikyara riarerata hiqata airi munima mwi nraakyeraqaa ntaqikyu vaisihua nyuvata mwihua airi munima varora.

<sup>17</sup> Mwi nraakyeva nri ntero Poruravata, tirinramwuvata, tivataqiro viqaro aakyara ntero tiqaro, Mwaa vaisinramwuhua mwanriqa Kotiva nyaamwuni varira kyaiqa vare varia vaisihuave. Nkye hia ekyaara qutu vivaro Kotiva nkyi qati sitaaninranra mwihua timwa nyinrenrata nriavo, tiro.

<sup>18</sup> Mwi nraakyeva airi enta tiri tivataqiro viqaro mwi quara timwaqiro vuvaro Porura mpoqama kyero pupohovaro mwiaqatairo mwiva nraakye utaqi varu vaananranra tiqaro, Nte Iesusi Karaisira nrutu nteqanama iara mwi nraakyeraqitaira nritarera quante tuqo, tiro. Mwitaa tuvaro mwi nraakyeraqitairo vaana mwiva qamwanrama kyero nritarero viro.

<sup>19</sup> Vuvata mwiaqaa ntaqikyu varuhua taqovaro mwihua munima varo aanrava taiqa vuvata mwihua tiqata. Qikye, hiama qaiqaa mwi nraakyeva qianinraqataita munima varaanranrave, tita. Mwitaa timwa kyeta mwihua raraqa tovata mwihua Porukya Sairaasikya ntavaaqavu kyeta ntanraunru vareta ko tirerata nronra vaisinramwuvanto variqata qua tunani kyapaqama vahu mwatukyaraqaa vurama.

<sup>20</sup> Uro mwini kyeta Romeni vaisi qua ntapihi varu vaisihua timwa nyita tiqata, Mwaa Iutaa vaisitanave. Mwihua tiri mwatukyaqi nrumu variqata uaquia hi inraikyara nraakye qora nyaamwute variavo.

<sup>21</sup> Tire Romenivanto hia mwi quara riarerave timwa kyeta qao timwa tauna quara, mwihua timwa nyi variavo, tita.

<sup>22</sup> Mwitaa tuvata nraakye qora mwini ntuvaantuama vita varuhua Porukya Sairaasikya ntuquti varuvata mwihua vunyaahua uro Porukya Sairaasikya tuavaaqaa nraanrahituma kye qatinani vara kyeta tiqata, Mwaatanahua kyaamwuqotai ntuqutukye vataate, tita.

<sup>23</sup> Mwitaa tuvata mwitanahua ntuqutu kye ntupintirima kye vateta sitaqita uro karavuqi tuto kyeta karavuqaa ntaqikyu varu vaisirara tiqata, Mwitanahua tuqara kyera rupataante, tita.

<sup>24</sup> Mwitaa tuvaro karavuqaa ntaqikyu varuva mwihua tuntema kyero karavu nraamwu mwia nai vetara utaqi vahura mpoqi sitaqiro uro kyero mwitanahua kyuqu kyatari vauru toraqi vatero vara mwatumwi tuqara kyero rupa tero.

<sup>25</sup> Mwitaa huvata mwitanahua mwipi variqata enta mwutukya Kotirara aakyara nteta ihi timwaqi viqata Kotira nrutu tuaahere varuvata karavu hini mwihua variqata mwitana tura rie varura.

<sup>26</sup> Rie varuvaro qamwanrama kyero mwaturavanto nronraqama kyero karavu nraamwu qakyaa hi varuvaro mwiaqatairo karavu nraamwu qesanramwu ekyaa qatua vuvaro ekyaa karavu vaisiqaatairo seni kyaanta huvantu viro tumu ntura.

<sup>27</sup> Mwitaa huvaro karavu nraamwuqaa ntaqikyu varu vaisiva vaitoraqitairo siviro taqovaro ekyaa qesa qatua viro vahuvaro mwiva qikye tiro. Ekyaa karavuvanto mwaaqitaita ntuqema kyeta quavo. (Mwia kyaara niqaa ntaqikyu vari vaisiva ni

ru kyaankyorave), timwa kyero mwiva nai paipanta veva tuaqitairo ntanrau kyero mwiaqotairo naivanto nai ru kyarero uti varuvaro

<sup>28</sup> Poruva aakyara ntero tiqaro, Hia enavanto ena ru kyaante. Tire ekyaa mwihua mwaqaqti varuro. Hia mpovanto aatu ntugema kyero viho, tiro.

<sup>29</sup> Mwitaa tuvaro karavu nraamwuqaa ntaqikyi varuva tiqaro, Omwa qupiqita nriate, timwa kyero mwiva hiantero mwiqi viqetero mpoqama kyero aatu hiqaro uro Porukya Sairaasikya suqaa mwatasata ntumwa viro varuvaro kyuqu kyauqu nti varuvaro varura.

<sup>30</sup> Mwiaqaatairo mwiva siviro mwitanahua sitaqiro uro mpoqi kyero mwitanahua kyapara hiro tiqaro, Nkyetana nronraqama quatanahuave. Nte nataa hiarirove Kotiva ni pitaananrove? tiro.

<sup>31</sup> Mwitaa tuvata mwitanahua mwia timwa mwita tiqata, Iesusiva tiriqaa ntaqikyi varivave. E mwianrama qutaa mwivave qianta. Mwitaa tiraroma Kotiva ivata i nraamwuqi varuhuavata sitaanrove, tita.

<sup>32</sup> Mwitaa timwa kyeta mwitanahua nronravanto tu quara mwia timwa mwitatana mwia nraamwuqi varuhuavata timwa nyunra.

<sup>33</sup> Mwitanahua mwihua timwa nyuvaro mate mwiqiara karavuqaa ntaqikyi varuva mwitanahua sitaqiro uro vaisivanto ntuquti tora hiqama nyatero mwiaqaatairo mwivavata mwia nraamwuqi varuhuavata nramanri varora.

<sup>34</sup> Nramanri vareta mwiaqaatairo karavuqaa ntaqikyi varuva qaiqaa mwitanahua sitaqiro uro nai nraamwuqi kyero mwitanahua kyara nyinro. Kyara nyinro mwivavata, mwia nraamwuqi varuhuavata, Kotirara mwutukya ntuvata mwihua mpoqama kyeta qamwateqata varura.

<sup>35</sup> Mwia qanranraa toqaqi Romeni vunyaahua nkyiari piponramwu siteta tiqata, Mwi vaisitanahua huvantu kyaivata quate,

<sup>36</sup> tuvata mwinramwuhua uro karavuqaa ntaqikyi varura timwa mwuvaro mwiva Porura timwa mwinro tiqaro, Vunyaa vaisivanto qua vara kyeta tiqata, Ivata Sairaasiravata karavuqitaira huvantu kyairata quatema, qiaovo. Qio nkyi mwutukyavanto qihakya hirata mwaaqitaita quate, tiro.

<sup>37</sup> Mwitaa tuvaro Poruva qaqao timwa kyero mwiva pipi mwihua timwa nyinro tiqaro. Mwihua enta hia ntapihi kye ko tiraitita, mwihua nraakye qora suqaa tiritana kyaamwuqotaita ntuqutu kye vateta tiritana karavuqi kyaarave. Qio, tiretana hia qumina vaisitanavauma varuro. Tiretana Romeni nrutu varaurahuama varuro (haaru tiritana nronraqama kyaavata Romeniqama vita varurahuave). Qio mate, mwihua tiritana tirema uqeta kyeta titarerata uti variavo. Hiama tiretana qati uqeta kyeta quananrave. Romeni vunyaahua vaisi mwihua nkyiarima nrumu tiritana huvantu kyeverave, tiro.

<sup>38</sup> Poruva mwitaa tuvata piponramwuvanto uro Romeni vunyaahua timwa nyuvata mwihua Porukya Sairaasikya tire Romenivantove tu quara rieta mwihua aatu hita.

<sup>39</sup> Mwihua aatu hiqata uro mwitanahuara po kye timwa nyateta qihakyma kyeta tiqata, Qikye, tire hia mwitaa hiataara qora utunanrave, timwa kyeta mwitanahua karavuqitaita siteta, Qio mwaa mwatukyaraqitaitavata quate, tita.

<sup>40</sup> Mwitaa tuvata Porukya Sairaasikyatana karavu kyeta uro Ritiaara nraamwuqi Iesusira nraaqiaranramwu uro taqeta mwitanahua mwihua kepuqyaqama nyataare tita kyuqe qua timwa nyita mwiaqaataita mwitanahua mwi mwatukyara kyeta vurama.

<sup>1</sup> Mwitanahua Piripai kyeta vuhua uro mwatukya mpotana Ampiporisivata, Aparoniaavata, vara kyeta vutura Tesaronaikaani uro ntora. Mwi mwatukyaraqi Iutaa mwaanra nraamwu mpo vhura.

<sup>2-3</sup> Poruva nauqaa uturara rieqaro mwi nraamwunraqi vera ntero. Poruva taarampo mwaanraaqaa mwipi variqaro mwakyaakya mwipi ntuaantuama vuhua timwa nyinro. Mwiva mesaiaara mwihua hia ntapihura timwa nyinrenra hiro hia mwihua mwia quara unra quave tintema kyero Poruva mwia okyara ntapihi kyero Kotira mpukuqitairo puaama kyeqaro timwa nyinro tiqaro, Mesaiaavanto nriqa vi inraikyara varero uro utu viro qaiqaa qati siquani quava Kotira mpukuqi mwataama vahirave. Iesusiva nte mate nkyi timwa nyu vaisiva qio mwivama mesaiaa mwiva variho, tiro.

<sup>4</sup> Mwitaa tuvata Iutaa nraakyе qora mponramwuvanto quitaama qiaro timwa kyeta Porukya Sairaasikya vataqita vuvata, Kiriki vaisi airinramwuvanto Iutaa qua mwaanra riohua mwihuavata quitaave timwa kyeta Porukya Sairaasikya sataqita vuvata, nrutu nronra vataa nraakyenramwuvata, mwitanahua sataqita vura.

<sup>5</sup> Mwihua quitaave tuvata Iutaa vaisinramwuvanto taqovata mpo mwatanaa nraakyе qoravantovata Porukya Sairaasikya sataqita vuvata mwihua mwia kyaara mwihua uaquia huvata uro aanraqaataita uaquia hu vaisihua sita ntuaantuama kyeta mwihuara vuavi tuvata mwi vaisihua uro ekyaa mwi mwatanaahua rapatovata mwihua uro Iasoninra nraamwu qesa ntukuraa kyeta vijeteta nraamwuqi Porukya Sairaasikyara puaama kye sitaqita nraakyе qora suqaa kyarerera utura.

<sup>6</sup> Puaama kye taqovata hia huvata mwiaqaataita mwihua Iasoninravata Iesusira nraaqiara mponramwuvata ntavaaqavu kyeta ntanrauqita uro mwi mwatukyaraqaa ntaqikyi varu vaisihua suqaa kyeta aakyara nteta tiqata, Ekyaa mwata maata vahintema mwaa vaisinramwuhua antua utuqita nrohiahuaama mwaini tiri mwatukyanivata nrianrave.

<sup>7</sup> Nriavaro mwaa vaisiva Iasoniva mwinramwuhua qamwata nyatero nai nraamwuqi sitaqiro uro kyaiho. Tiri vunyaa vaisi Rominyaava varihata mwihua ekyaa mwia qua hia riaraitita, mwia qua nteqa kyeta tiqata, Tiri vunyaa mpolovanto Iesusivama variho qiaovo, tita.

<sup>8</sup> Mwihua mwitaa tuvata mwi mwatukyaraqaa ntaqikyi varuhuavata, nraakyе qora mwini ntuaantuama vita varuhuavata, uaquia huvata nronraqama kye qua aakyara timwaqita vura.

<sup>9</sup> Mwitaa ti varuvata mwi mwatukyaraqaa ntaqikyi varuhua tiqata, Iasoninravata mpo vaisinramwuvata qio mwitaa mwitaama munima kyetama mwaatani quate, timwa kyeta mwinramwuhuaqitaita munima vareta huvantu kyovata nkyiari mwaatani vurama.

### *Mperiaani vurama*

<sup>10</sup> Mwihua huvantu kyovata vuvuro enta huvata Iesusira nraaqiaranramwuvanto mwi mwatukyaraqi varuhua qamwanrama kyeta Porukya Sairaasikya Mperiaani sitovata mwitanahua mwini vurama. Mwitanahua Mperiaani uro nteta uro Iutaa mwaanra nraamwuqi vera nte variqata qua mwakyaakya timwa nyunra.

<sup>11</sup> Mperiaaqinaahua hia Tesaronaikaaqinaahua voti hiraitita, mwihua qaraakya qua Poruva tu quara riaataa nraahu huvata mwia qua rieqata mwihua mpo enta mpo enta Porura quavanto quataa qua vahianinra nkyiari suqovata taqarerata Kotira mpukuqi mwi quara kyaara ntiqata puua hi varura.

<sup>12</sup> Mwitaamaqita vita Iutaa airivanto Iesusirara quataa mwivave tuvata Kiriki nraakyе nrutu nronra vahuhuavata airivanto quitaave tuvata Kiriki vaisi airivantovata quitaave tura.

<sup>13</sup> Airi nraakyе qora Iesusira quara quitaave tuvata Iutaa vaisinramwu Tesaronaikaani varuhua riovoro Poruva Mperiaani Kotira qua timwa nyi varuvata mwia

kyaara mwihua nkyiari mwaata mwini kyeta Mperiaa mwini uro nteta antua qua tiqata uaquia hu vaisihua sita kyeta mwihua rapateqata tuvata Porura uaqiamma mwatarerata uti varura.

<sup>14</sup> Mwitaa huvata Iesusira nraaqiaranramwu mwini varuhua Porura rivorave timwa kyeta qamwanrama Porura vita kyeta vevani titovaro vuvata Sairaasikya Timotikya nraahu Mperiaani varuvata

<sup>15</sup> mpo vaisinramwuvanto Porura vitaqita uto mwatukya nronra Ateni mwini kyeta mwiaqaataita mwinramwuhua uto ntanteta Mperiaani nruhua nruru Sairaasikya Timotikya timwa nyita tiqata, Poruva nkyitananra tiqaro, Nkye mpo kyaiqa taiqa kyeta qamwanramama mwaini nte hunani tumuate, taho, tita tura.

### *Poruva Atenini varura*

<sup>16</sup> Mwia kyeta vuvaro Poruva Ateni mwini nanrianraa variqaro mwiva mwatukya mwiqi nrohiqaro taqovata mwi mwatanaahua airi inraikya viri kohi kyeta tiri mwanriqave timwa kyeqata vatova vahuvaro Porura mwutukyavanto uaquia huvaro varura.

<sup>17</sup> Poruva mwi inraikyara mwi inraikyara taqero mwiaqaatairo mwiva Iutaa mwaanra nraamwuqi uro variqaro Iutaavata, mpo mwatanaa nraakye qoravanto Kotirara aakyara nte varuhuavata, mwakyaakya timwa nyinro mwiaqaatairo mwiva mpo enta mpo enta maaketiqi uro variqaro mpo mwatanaa nraakye qora vitare nritare hi varuhua qua mwakyaakya timwa nyinro.

<sup>18</sup> Poruva mwihua timwa nyi varuvata mpo qua Epikuriaanira okyaravata, So-toikira okyaravata, riohua nri nteta mwihua Poruravata qua tura. Mponramwuvanto nkyiari henahua kyapara hita tiqata, Mwamwaa api mpo qua mpo qua ti vari vaisiva, mwaava nanra qua tirerove ti variho? tita.

Tuvata qaiqaa mpo uhua tiqata, Mwiva mpo mwatanaahua mwanriqanramwu okyararave ti variho? tita. Poruva Iesusiva qutu viro qaiqaa qati sivurara timwa nyi varuvatara tita, mwihua mwitaa tura.

<sup>19</sup> Mwihua mwitaa timwa kyeta Porura viteta Ariopakaasi kaanasorinramwu kuairama vita varunani uro kyeta Porurara tiqata, Qaraakya qua e nraakye qora timwa nyi variana quara tiri timwa timwiqe riaare.

<sup>20</sup> Tire i qua riauraro mwi quava nraahumwa mpo qara ihata qaiqaavata mwi quara okyara ntapihi kyeta riarerave, tita.

<sup>21</sup> Mwi mwatanaahuavata, mpo mwatanaahuavata mwiqi varuhuavata, qua nraahu ti varu vaisihua variqata mwihua qaraakya qua timwaqi viqata qaraakya qua riemwaqita virara nraahu rieqata varura.

<sup>22</sup> Mwihua mwi quara okyara riarerave tuvaro Poruva Ariopakaasi kaanasorinramwu kuairama vuhua suqaa siviro timwa nyinro tiqaro, Ateninyaa vaisi nkyenramwuve, nte taqauqata nkye mpoqama kyeta mwaanra okyara mpo okyara mpo okyara riemwaqita vi varahuave.

<sup>23</sup> Nte mwaini nkyi mwatukyaqi nrohiqana nkyeta mwanriqanramwuanra aakyara nteqata mpo inraikya mpo inraikya utu taara airi inraikyama taqauqo. Nte mpo taintavata taqauqo. Mwiaqaa mwaa quara qara ntumwa taarave: *MWAA TAITARA TIRE HIA TAQETA RIETA HUNA MWANRIQANRANRA RIEQATA TAINTA UTU MWATAU-NANRAVE*, qiarave. Nkye mwanriqa mwia hia taqeta rieta ntapihiara, mwianra qumina nkye aakyara nte variara, nte mate mwianra ntapihi kyena nkyi timwa nyinrenrave.

<sup>24</sup> Mwanriqa mwia nrutu Kotivave. Kotiva mwatavata, ekyaa mwiaqaa vahi inraikyavata, utu taivave. Mwiva nyaamwuqaavata, mwataqaavata, ntaqikyi varivara tiro, mwiva hia vaisivanto hoqataa nraamwunraqi variqiro vi varivave.

<sup>25</sup> Kotiraqaatai ekyaa nraakye qoravanto nraaihovata ekyaa inraikyavata vare variarara tiro, hiama qio vaisivanto mpo inraikya Kotira kyaahaqa hiariva vahiananrove.

<sup>26</sup> Kotiva haaru vaisi kuaiqia tiri haivaqara utu tovaro mwikuraqaatairo ekyaa nraakye qora qovarama vuvaro Kotiva ekyaa mwata maata variate tiro, mwihua sitorave. Kotiva nraakye qora utu kyero tiqaro, Mwi mwatanaava mwi entara mwi mwataraqaa variananrove, mwi entara mwi mwatanaava mwi mwataraqaa variananrove, timwa kyero kyaihata variarave.

<sup>27</sup> Mwihua Kotirara puua hirerata tupupa hiantema kyeta puua hiate tiro, Kotiva nraakye qora qovarama kyaihata variarave. Qio Kotiva hia tiri nyianrato variho.

<sup>28</sup> Mwianra mpovanto mwitaama tiro:

Kotiva qati varirara tita, tire qati variqi vita, tire qakyaa hita, tire qati nraahu variqi quarahuama varuro, tirave.

Nkyi mpukuqi qara nti varia vaisihua mwitaama tita:

Tire mwia nraaqiarama varuro, qiarave.

<sup>29</sup> Qio tire Kotira nraaqiara variqatara tita, tire Kotirara mwiva vaisivanto korive, orive, munimave, vara kyeta kohi kyeta utu taa inraakyara votima kyero varirave qiarorave.

<sup>30</sup> Haaru nraakye qora hia Kotira ntapihi kyaraitita, qora kyaiqa vare varuvaro Kotiva qati vu taqe kyorave. Mwaa entara Kotiva ekyaa nraakye qorara uaqia hi aanranra qaqla kyaate ti varirave.

<sup>31</sup> Kotiva qua vatero tiqaro, Mpo enta ko qari entavama vahiananrove, tirave. Mwi entaraqaama Kotiva nronraqama kyai vaisiva ntapihi kyero ko tiqaroma mwaa mwataraqaa vari nraakye qorhua qua riaananrove. Nkye ko qiani vaisira mwia ntapihi kyaate tiro, Kotiva mwia qutu vuraqitairo qati vara sivuma kyorave, tiro.

<sup>32</sup> Poruva Iesusiva qutu vuvaro qaiqaa qati vara sivuma kyo quara tuvata hini uhua raima mwatovata hini uhua tiqata, Mpo entavata e mwi quara qaiqaavata tiraqeta tire riaare, tita.

<sup>33</sup> Mwitaa tuvaro Poruva mwihua kyero vura.

<sup>34</sup> Vuvata vaisi mponramwuvanto mwia vataqita vita Kotira nraaqiaraqama vura. Vaisi mpovanto Taionisiaasiva mwiva Ariopakaasi kaanasori vaisivanto varuvaro nraakye mpo mwia nrutu Ntamarisiva mwitanahuavata, mponramwuvantovata, Porura vataqita vura.

## 18

### *Poruva Korintini vura*

<sup>1</sup> Mwiaqaatairo Poruva Ateni kyero Korintini vura.

<sup>2</sup> Mwini uro ntero mwiva Iutaa vaisi mwia nrutu Akuiraara Pontaasinyaanra puaama kyora. Haaru vunyaa vaisi Korontiaasiva ekyaa Iutaa mwihuara hia Romini variate timwa kyero ekyaa sitamwa kyo entara, Akuiraava nai nraata Pirisiraaravata vita varero Itari kyero mwi entara Korintini nrumbu varura. Poruva mwitanahua taqareru vuva

<sup>3</sup> uro mwitanahuavata varura. Mwivavata mwitanahuavata seri nraamwu toqa kyeqa haqiro kyaiqara varohuara tita, mwihua kuaaqi variqata mwi kyaiqara varora.

<sup>4</sup> Poruva mwi kyaiqara vareqaro mwiva mpo mwaanraqaa mpo mwaanraqaa Iutaa mwaanra nraamwuqi vera ntero variqaro Iutaavata, Kirikivata, Iesusira quara qutaa quave qiate tiro, mwiva mwihua kyapata qua ti varura.

<sup>5</sup> Poruva mwitaamaqi vi varuvata Sairaasikya Timotikya Masentoniasaita uro ntovaro mwiaqaatairo Poruva mpo kyaiqa varora qaqla kyero mpo enta mpo enta Iesusira mwakyaakya nraakye qora timwa nyiqiro viro. Mwiva Iutaa timwa nyinro tiqaro, Nkye mesaiaa vekya variara qio Iesusiva mwivave, tiro.

<sup>6</sup> Tuvata mwihua mwi quara hia riaraitita, mwi quara kyaara Porura uaqiamma mwateqata uaqia hu quara tuvaro Poruva qaqla timwa kyero ntuvrenrauma kyero

tiqaro, Kotiva nkyi qaqlira kyairata nkye raupirima vivera, hia niqaavauma qua vahiananrove, nkyitaqaama qua vahiananrove. Mate nte nkyi kyena mpo mwatanaahua hinani virerave, tiro.

<sup>7</sup> Mwitaa timwa kyero Poruva mwiaqaatairo mwihua kyero mpo mwatanaa vaisi mwia nrutu Taitaasi Iasitaasira nraamwuqi uro varura. Taitaasi Iasitaasiva Kotirara aakyara nte varu vaisiva varuvaro mwia nraamwuvanto Iutaa mwaanra nraamwu qaumato vahura.

<sup>8</sup> Vaisi mpovanto mwia nrutu Kirisipaasiva, mwiva mwaanra nraamwuqaa ntaqikyi varuva mwivavata, mwia nraamwuqi varuhuavata, nronra Iesusirara qutaa mwivave tura. Korintiqinaahua airivantovata Porura mwakyaakya rieta qutaa quave timwa kyeta nramanri varora.

<sup>9-10</sup> Mwitaamaqiro vuvaro mpo enta Poruva entaqi vaiteqaro ruvaata taqovaro nronravanto mwia timwa mwinro tiqaro, Nte i vatama kyena varurara tira, e hia aatu hiqara mwakyaakya timwa nyiante. Hia tirema variante. Mwaa mwatanaahua airi nraakye qora ni nraaqiara variavanana tina, nte iqaa ntaqikyiqi vi variariro hia mpovanto qio i ruananrove, tiro.

<sup>11</sup> Mwitaa tuvarora tiro, Poruva kuua ihi vara kyero mpo ihi hinivata mwini variqaro mwi mwatanaahua Kotira qua timwa nyiqiro vura.

<sup>12</sup> Poruva mwitaamaqiro vuvata Kariora nronraqama kyeta tiqata, E Romeni vunyaa vaisi mpo variqara Akaiqaqaa ntaqikyiyante, tuvaro Kariova nronraqama viro varura. Mwiva varuvata Iutaa mponramwuvanto ntuvantuama vita tiqata, Nrivaqe Porura uaqiamma mwataare, timwa kyeta uro Porura ntavaaqavuqita uro ko ti varu nraamwuva vahunani kyeta Kariorara tiqata,

<sup>13</sup> Mwaa vaisiva nraakye qorara mwataaa mwataama kyeqatama Kotira nrutu tuaaheraate tiqaroma tiri mwaanra qua nteqa kye variho, tita.

<sup>14</sup> Mwihua mwitaa tuvaro Poruva qua qiankye tuvaro Kariova nraante Iutaa vaisinramwuanra qaqlao tiro, Mwaa vaisiva hia ruvi kyaiqarave, uaqia hi kyaiqarave, utiqaro kamaninra qua nteqa kyaitirio, nte qioma nkyi qua riautirio.

<sup>15</sup> Nkye nkyeta quarave, nkyeta nyutuarave, nkyeta mwaanra okyararave, nronraqama kye rieqata nte hunani nriavo. Mwi quava nkyitani vahirara tina, nte hia mwi quara riarerave. Nkyeta mwini viqata qiate, tiro.

<sup>16</sup> Kariova mwitaa timwa kyero mwiva mwihua mwiqitairo sitero tiqaro, Hianteta mwaqaqitai vevante quate, tiro.

<sup>17</sup> Mwihua sitovata vaisi mponramwuvanto uro Sositenisira Iutaa mwaanra nraamwuqaa ntaqikyura mwia ntavaaqavu kyeta ko nraamwu qesaqaa variqata mwia ntutu kyeta vatovaro Kariova hia mwianra nronraqama kyero riora.

### *Poruva nrumu ntantero Antiokini vura*

<sup>18</sup> Poruva Korintini Iesusira nraaqiaranramwu kyapata airi enta vari kyero mwiaqaatairo mwiva Pirisiraaravata, Akuiraaravata, sitero Korinti kyero sipiqi mwaanri ntero Siriaanianra vura. Mwiva mwianra viqaro mwatukya mpo Senkarai-ani uro ntero Kotirara nai kyauqu nriqiqaa vateqaro mpo qua timwa torara rieqaro nai qiata ekyaa toqa kyero viro.

<sup>19</sup> Qio mwinramwuhua vuhua Epesaasini uro nteta Poruva Pirisiraakya Akuiraakya mwini kyero uro Iutaa mwaanra nraamwuqi vera ntero Iutaa kyapata qua tiro.

<sup>20</sup> Mwihuavata qua tuvata mwihua Porurara tiqata, Tirivata mpuahaama variqira quante, tuvaro Poruva qaqlao tiro, Nte mate hia nkyivata mpuahaa varirerave, tiro.

<sup>21</sup> Timwa kyero mwiva virera hiro mwihua timwa nyinro tiqaro, Nraakiara Kotiva qiove tirera, nkyivata qaiqaa nrumu varirerave, tiro. Timwa kyero mwiva sipiqi mwaanri ntero vura.

<sup>22</sup> Vuva Sisariaani uro ntero mwiaqaatairo mwiva sipiqitairo mwaamwi ntero viviro uro verara Ierusaremini Iesusira nraaqiaranramwu qua mwantero mwiaqaatairo uro ntantero Antiokini uto varura.

<sup>23</sup> Mwiva mwini mpo entanramwu vari kyero mwiaqaatairo mwiva vuva uro mwata mpotana Pirisiaanivata, Karesiaanivata, nrohiqaro mwatukya mpoqi mpoqi Iesusira nraaqiara varuhua kepuuyaqama nyataqiro vura.

### *Aporosiva Epesaasiqivata Korintiqivata kyaiqa varora*

<sup>24</sup> Poruva mwihua kepuuyaqama nyate varuvaro Iutaa vaisi mpovanto mwia nrutu Aporosiva, mwiva Arekisantaanyaava, mwiva Epesaasini vura. Mwiva kyuqema kyeqaro nraakye qora qua mwakyaakya timwa nyi varuva. Mwiva Kotira qua qara ntumwa tora kyuqema kyero rio vaisiva.

<sup>25</sup> Mpovanto nronra vataqi quani aanranra mwia nraamwutovaro mwiva ntapihiro mwiaqaatairo mwiva kepuuyaqama kyero nraakye qora Iesusirara vutu kyero timwa nyiqiro vura. Mwitaa hiqaro mwiva haaru Ioniva nramanri nyu entarara nraahu mpoqiavata ntapihura.

<sup>26</sup> Aporosiva Epesaasini uro ntero Iutaa mwaanra nraamwuqi vera ntero mwiva hia aatu hiraitiro Kotira qua timwa nyi varuvata Pirisiraakya Akuiraakya mwia qua rieta mwia vitaqita nkyiaritana nraamwuqi uro kyeta Kotiva hinani vi aanranra Iesusira qua mpoqiavata ntapihi kyeta timwa mwunra.

<sup>27</sup> Timwa mwuvaro riero mwiaqaatairo mwiva Kirikini virera huvata Iesusira nraaqiaranramwu Epesaasini varuhua mwia kyaahaqa hiqata qara ntumwa kyeta mwita Iesusira nraaqiaranramwu Kirikini varuhuara mwaa vaisira kyuqe hi vaisira qio mwia kyuqema kyeta vitaate timwa kyeta qara mwia mwia mwita. Mwuvaro Aporosiva varero uro nyinro mwini variqaro mwiva Kotiva kyuqema nyatovata Iesusira nraaqiaraqama vuhua kyaahaqa hiqaro varura.

<sup>28</sup> Mwiva nraakye qora suqaa variqaro Iutaa kyapata qua timwaqiro vuvaro mwia quavanto Iutaa qua nraatara kyero. Mwiva Kotira mpukuqinaa qua timwa nyiqanro Iesusira mesaiaa okyararavata ntapihi kyero timwa nyunra.

## 19

### *Poruva Epesaasini varura*

<sup>1</sup> Aporosiva Korintiqi varuvaro Poruva vuva mpo mwataqaama tero vuva Epesaasini uto ntero taqovata Iesusira vataqita nro uhua mwini varura.

<sup>2</sup> Varuvaro mwiva mwihua kyapara hiro tiqaro, Nkye haaru Iesusirara qutaave tu entara nkye Kotira mwanraqura varorave iho? tiro. Tuvata mwihua tiqata, Hia tire Kotira mwanraquravanto variho qia okyarara riaunanrave, tita.

<sup>3</sup> Tuvaro Porura mwihua kyapara hiro tiqaro, Mwitaa ihata nkye nanra nramanri varaarave? tuvata mwihua tiqata, Tire Ioninra nramanri varaunananrave, tita.

<sup>4</sup> Tuvaro Poruva mwihua timwa nyinro tiqaro, Nraakye qora uaqia hi aanranra qaqlira kyaate tiro, Ioniva mwihua nramanri nyunrave. Ioniva mwihua timwa nyinro tiqaro, Ni naakiara nriani vaisira mwianra qutaa mwiva mesaiaavanto variho qiate, turave, tiro.

<sup>5</sup> Poruva mwitaa tuvata mwihua mwi quara riovoro Poruva Iesusira nrutu nteqaro nramanri nyinro mwiaqaatairo

<sup>6</sup> nai kyauqu mwihuaqaa vatovaro Kotira mwanraquravanto mwihuaqi tumu varuvata mwihua mwiaqaataita mpo qua mpo quaqitai Kotira qua timwa nyi varura.

<sup>7</sup> Mwi vaisinramwuhua 12 nramwu varura.

<sup>8</sup> Poruva Iutaa mwaanra nraamwuqi variqaro taarampo torara hia aatu hiraitiro, mwi quara ntapihi kye riaate tiro, Kotiva ntaqikyiani quara mwihuavatama kyero ti varura.

<sup>9</sup> Timwa nyuvata mponramwuvanto mwihua su nyaatovanto kepukyaqha huvata hia Porura qua riaraitita, mwiaqataita mwihua nraakye qora suqaa Porurara tiqata, Nronravanto hinanianra qua aanranra e qiananra uaquia hi quarama iho, tita. Mwihua mwitaa tuvaro Poruva mwihua kyero Jesusira nraaqiaranramwu nraahu sita varero vuva uro mpo nraamwuqi Tiranaasira sikuru nraamwuqi variqaro qua mwakyaakya timwa nyi varura.

<sup>10</sup> Mwiqi variqaro taara ihi mwianra Kotira qua mwakyaakya timwa nyuvata ekyaa Esiaani varuhua Iutaave, mpo mwatanaave, nronra Jesusira qua riora.

### *Sivaara mwaaqunramwu*

<sup>11</sup> Kotiva Porura kyaahaqa huvaro mwiva nronra kyaiqa, mpo kyaiqa mpo kyaiqa vare varura.

<sup>12</sup> Mwitaa huvata Porura tuavaaqave, pata tavuna qainaamave nominra nrukorave, nrumu varaqita uro nriqa vuhuaqaave, vaanavanto utaqi varuhuave, viti mwihua nyamwantaqha vatovata nriqa vuhua kyuqema vuvata vaanavantovata vaisi utaqitairo nritarero vuvata mwihua qio varura.

<sup>13-14</sup> Mwitaa huvata Iutaa vaisi mponramwuvanto mpo mwatukya mpo mwatukya nrohiqata vaana sitarera uti varuhua varura. Mwi vaisihua Sivaara mwaaku 7 nramwu varuvaro mwihua sova Iutaa mwaanra qua rieqaro Kotira kyaiqa vara mwate varu vaisiva nronravanto varuvata mwihua Porura kyaiqa taqeta, Porura nraantanteta mwiva varo kyaiqara mwihuavata vararerata uti varita tiqata, Nrivaqe tirevata Jesusira nrutu nteqata vaana sitaarata nritareta quate, tita. Mwitaa timwa kyeta mwihua uro mwataara hita vaananra mwitaama tita, Tire Poruva ti vari vaisira nrutu, Jesusira nrutu nteqatama iara nritarera quante turo, tita.

<sup>15</sup> Mwihua mwitaa tuvaro vaanavanto mwihuara tiqaro, Nte Jesusira ntapihi kyena Poruravata ntapihi kyaurave. Nkye tahuave iho? tiro.

<sup>16</sup> Mwitaa tuvaro vaanavanto mwia utaqi varu vaisiva mwiva mwihuqaa vi nraaqu nri nraaqu hiqaro mwihua ntuquqiqaro mwihua tuavaqa nrahitu kyovata mwihua mwi vaisira nraamwuqitaita veva nteta nraanre mwamwantavata tokya mwihua hiantamwa teta vura.

<sup>17</sup> Mwitaama kyovata ekyaa Iutaave, mpo mwatanaahuave, Epesaasiqi varuhua mwi quara rieta mpoqama kyeta aatu hita Jesusira nrutu tuaahere varura.

<sup>18</sup> Jesusira nraakye qora airivanto airi suqaa variqata mwihua nkyiari uaquia hu kyaiqara varora timwa qovarama kyora.

<sup>19</sup> Mwitaa huvata airi vaisivanto tauraa mwihua tovevaanavata kyaiqa utuhuave, quahave vuhaapahaa utuhuave, mwi kyaiqara qaqlira kyeta mwihua nkyiari mpukuve, mwitaa inraikyave, vareta nraakye qora suqaa uro qia quarateta. Nronra munima 50,000 kinaa kyeqata varato mpukura qia quara taiqa kyora.

<sup>20</sup> Qio mwitaama kyeta mwi mwatanaahua uaquia hu kyaiqara qaqlira kyeta Kotira qua riemwaqita vuvaro Kotira quavanto mwi mwatanaahua kepukyaqama nyatora.

### *Epesaasiqi Porura qua kyaara nronraqama kyeta inronra hura*

<sup>21</sup> Mwiaqatairo Poruva tiqaro, Kyaiqe nte Masentoniaanivata Kirikinivata vintantena Ierusaremini quankye. Nte mwini quarivama nronra mwatukya Rominivata quankye, tiro.

<sup>22</sup> Mwitaa timwa kyero Poruva nai kyaahaqa hu vaisitana Timotikya Iraasitasikyatana sitovata mwitanahua Masentoniaani vuvaro Poruva nai Esiaani mpo entaramwu variro.

<sup>23</sup> Mwini varuvaro mwi entara Epesaasini Kotiva hinani vi aanranra kyaara inronra hu inraikyava qovara hura.

<sup>24</sup> Vaisi mpovanto mwia nrutu Ntimitiriaasiva, mwiva oriqtai kyaiqa varo vaisiva, mwiva nraakye mwanriqa mwia nrutu Atemisira nraamwu nronra vahuvaro

mwiva mwianra rieqaro nraamwu pataqiani nai kyaiqa vaisi kyapata utu kyeqaro mwiaqatairo munima airi vare varura.

<sup>25</sup> Ntimitiriaasiva nai kyaiqa vaisinramwuvata mpo uhua mwi kyaiqara varohuavata ntuvantuama kyero mwihuara tiqaro, Mwaini riaate. Tire mwaa kyaiqara vareqata mwiaqataita airi munima vare varunanrave.

<sup>26</sup> Nkye Poruva vare vari kyaiqara ntapihi kyaarave. Poruva tiqaro, Nkye nkyeta kyauquqtai mwanriqa ututaava hia qutaa mwanriqvanto variho, tiho. Mwitaa tirara tita, airi nraakye qora Epesaasiqinaahuave, ekyaa vara ututu Esiaaqinaahuave, mwia quara qutaa quave ti variarave.

<sup>27</sup> Poruva qati nraahu mwitaa timwaqi vi varirera, nraakye qoravanto tiri kyaiqara qumina kyaiqa unra kyaiqave tivarave. Hia tiri kyaiqa mwianra nraahu mwitaa tivarave. Mwihua nraakye mwanriqa Atemisira nraamwuanra qumina nraamwuve timwa kyeta Atemisira qaqlira kyevarave. Mwitaa tivera, Atemisiva hia tiri mwanriqa nronravanto variananrove. Mate ekyaa Esiaanyaahuavata, ekyaa mwata maata vahi ntema variahuavata, mwia nrutu tuaahere variarave, tiro.

<sup>28</sup> Ntimitiriaasiva mwitaa tiqaro mwihua rapatama kyovata nraakye qora airivanto inronra hiqata nkyiari mwanriqanra aakyara ntamwaqi vita tiqata, Atemisiva Epe-saasiqinaavama nronravantove, tita.

<sup>29</sup> Mwitaa timwa kyeta mwi quara timwaqi vuvata ekyaa mwi mwatanaahua antua aantua tita. Mwitaa timwaqi viqata mwihua uro Kaiaasikya Arisitakaasikya ntavaaqavu kyeta. Mwitanahua Masentonaa vaisitana Poruravatama kyeta nrutanahua nrumu varuvata mwihua mwitanahua ntavaaqavu kyeta sitaqita uro nraakye qora ntuvantua hunani kyora.

<sup>30</sup> Mwitanahua site vuvaro Poruva naivata nraakye qora ntuvantua hunani virera huvata Iesusira nraaqiara mponramwuvanto mwia ntavaaqavu teta tiqata, E hiama qio vinanrave, tuvata

<sup>31</sup> nronra vaisi mponramwu Poruva totiqama tohuavata qua vara kyeta kepukyaqama kyeta tiqata, E hiavata mwaini ntuvantua hianani nrumu ena viri nyaamwutaante, tita.

<sup>32</sup> Mwitaa tuvata nraakye qora varuhua antua aantua tita. Airi nraakye qora ntuvantuama vita varura mwia okyara hia ntapihi kyaraitita mwiaqataita nkyiariara mpohua aakyara ntamwa kyeta mpo qua tuvata mpohua aakyara ntamwa kyeta mpo qua tura.

<sup>33</sup> Mwitaamaqi vuvata Iutaavanto nkyiari nramwunaanra mpo Arekisantaara rataa kyeta tiqata, Ema nraakye qora sugaa sivira variqara ntapihi kye qua timwa nyiante, tuvaro Arekisantaava siviro kyauqu tuaahereqaro qua qiankye tuvata

<sup>34</sup> mwihua taqovaro mwiva Iutaa vaisivanto varuvata mwihua hia mwia quavata riaraitita, nkyiari mwanriqanra aakyara nteta tiqata, Atemisiva Epesaasiqinaavama nronravantove, tita. Mwi quara nraahu 2 auara timwaqi vi varura.

<sup>35</sup> Mwitaa timwaqita vi varuvaro mwiaqatairo kusikusivanto siviro nraakye qora antua kyovata tirema varuvaro mwiva tiqaro, Epesaasiqinaa vaisi tuaavo, Tire Epesaasiqinaahua teta mwanriqa Atemisira kyugema kye ntaqikyi varuna quara ekyaahua ntapihi kyaarave. Nyaamwusairo orivanto mwaaqi tumu ntiro vahira mwiavata ekyaa ntapihi kyaarave.

<sup>36</sup> Hia mpovanto mwi quarara unra quave qiananrove. Mwianra rieqatama nkye qati tirema variqatama hia paparuqa hiqata mpo inraikya mpo inraikya utuate.

<sup>37</sup> Mwi vaisitanahua hiama tiri mwanriqa nraamwujitaita mpo inraikya mpuara varavao. Hia mwihua tiri nraakye mwanriqanra qora qua qiaivo. Mwitanahua hia uaqia hi kyaiqara utu kyaavata nkye quminama siteta mwaini nriavo.

<sup>38</sup> Ntimitiriaasivavata, mwia kyaiqa vaisinramwuvantovata, vaisi mpoqaa qua vatarera hivera, nronra vaisi ko riaahua varianani ko ti entaraqaa qiomaa mwihua mwi vaisiraqaa qua vatevarave.

<sup>39</sup> Nkyiqi mpo quavata vahirera, nkye ekyaa ntuvantuama vita variraqa ntapihi kyeta mwi quara qiomaa tivarave.

<sup>40</sup> Nkye qumina qua kyaara timwaqita ntaqirerata uti variavo. Nraakiara mwi quara okyarara kamaniva tirinramwu kyapara hiraqe tire hia qio mpo qua qiananrave. Nraakiara kamaniva tirinramwuanra tiqaro, Nkye qumina mwi entara ntaquarave, timwa kyero tirinramwuqaa qua vataankyorave, tiro.

<sup>41</sup> Kusikusivanto mwitaa timwa kyero mwini ntuvantuama vita varuhua sitovata vita nrata hurama.

## 20

### *Masentoniaanivata Kirikinivata vura*

<sup>1</sup> Qio nronraqama kye inronra huva taiqa vuvaro Poruva Iesusirara quataave tuhua nyaanrovata mwiva hunani nruvaro mwiva qua tiqaro mwihua kepuqyqama nyatero kyauqu nyinro mwihua kyero Masentoniaani viro.

<sup>2</sup> Mwiva Masentoniaani vuva uro mpo mwatukya mpo mwatukya nrohiqaro Iesusirara quataave tuhua mwini varuhua mpo qua mpo qua timwa nyinro mwihua kepuqyqama nyatero mwiaqaatairo mwiva Kirikini viro.

<sup>3</sup> Mwiva taarampo torara Kirikini variro mwiaqaatairo mwiva Siriaani sipihi quankye tiro riovata Iutaa vaisinramwuvanto mwia ru kyarerata uti varuvaro Poruva qaqlira kyero tumu ntantero Masentoniaani quankye tura.

<sup>4</sup> Paireasira mwaaqu Sopataava Mperianyaava Porura vatama kyero vuvata vaisi mponramwuvantovata Poruravata vura. Tesaronaikaa qinaahuatana Arisitakaasikya Sekantaasikyave, Ntepinyaava Kaiaasivave, Timotivave, Esiaanyaahuatana Titikaasikya Toropimaasikyave, mwinramwuhua Poruravatama kyeta vurama.

<sup>5</sup> Mwihua nraante vuhua uro Toroasini tiri veqya varuvata

<sup>6</sup> tire Piripaini varita hia kyoto mperetira omwata nro entava taiqa vuvata mwiaqaataita sipi vareta vita kyauquru enta vara kyeta Toroasini uro nteta mwini 7 entara variavanana.

### *Poruva Toroasini variqaro Iutikaasira vara sivuma kyora*

<sup>7</sup> Saanteqa tire kyara nranrenrata ntuvantuama vita variavararo Poruva nraakye qora ntuvantuama vuhua qua mwakyaakya timwa nyinro. Mwiva hora quarivara tiro, mwiva qua mpuahaa timwaqiro vuvaro enta mwutukyaqa hiro.

<sup>8</sup> Mwiva qua timwa nyiqiro vi varuvata tire nraamwu verato vahusata ntuvantuama vita variavarata omwa airi upi kyeta mwipi vata tovaro

<sup>9</sup> qaraakya vaisi mpovanto Iutikaasiva uintuaqa mwatakyaa viro varuvaro Poruva qua timwaqiro vuvaro Iutikaasira vuvanto tauta varuvaro mwiva vaita aavata viro verara nraamwu nai mwoqaqa nai mwoqaqa hoqatora taarampo nraamwu mwia ekyaararaqaatairo vevara mwataqi tuto ntiro. Tuto ntuvata mwihua uto vita kye taqovaro mwiva qutu viro.

<sup>10</sup> Qutu vuvaro Poruva uto mwiaqaa nraaqua viro mwia tutero tiqaro, Nkye hia aatu hiate, mwiva qatima variho, tiro.

<sup>11</sup> (Mwitaa tuvaro qutu vuva qaraakya vaisivanto qaiqaa qati sivuvaro) Poruva tumu ntantero uro variqaro mpereti nteqa kyero mwihuavata nrenro nyinro mwiaqaatairo mwiva mpuahaa qua mwipi varuhuavata timwaqiro vuvaro qaata vuvuvaro Poruva mwihua mwini kyero vura.

<sup>12</sup> Vuvata qaraakya vaisi mwiva qati varuvata mwia viteta mwaatani vuvuvaro mwihua mwutukyavanto kyuqe huvata varura.

### *Poruva mwatukya mpo Mairitaasini vura*

<sup>13</sup> Poruva varuvata tire nraante sipi vareta Asosini uro nteta mwini Porura vekya variavananra. Poruva vuni tiqaro, Nkye mwini uro ni pekya varivaqena nte mwataqaa quariva uro nkyi huntia kyaankye, tura.

<sup>14</sup> Poruva viro tirivata huntia kyovata tire uro mwatukya mpo Mitirinini uro ntaavanana.

<sup>15</sup> Qio mwiaqaaataita tire quavarahua mwia qanranraa kyaarerera utaqaa vahu mwataria mpo Kiosi qaumato uro nteta vita mwia nraatara kyeta mwata mpo Samosivata vita nraatara kyeta mwia qanranraa mwatukya mpo Mairitaasini uro ntaavanana.

<sup>16</sup> Poruva tiqaro, Nte Esiaani mpuahaama uro variantkyo, tiro Poruva nai nraahu riero tiqaro, Nte hia Epesaasini virerave. Nte qamwanrama quankyeria nte Ierusarem-ini Pentikosi omwata nre entara uro taqarerave, tiro.

### *Poruva Epesaasiqinaa nronra vaisinramwu ekyara qua timwa nyunra*

<sup>17</sup> Poruva mwitaa tuvata tire Mairitaasini uro ntaavararo Poruva qua vara kyovaro Epesaasini viro. Poruva tiqaro, Uro timwa nyivata Jesusira nraaqiaraqaa ntaqikyi varihua nrumu ni taqaate, tiro.

<sup>18</sup> Qua vara kyovaro mwihua hunani uvata mwihua mwiva hunani nri ntovaro Poruva mwihua timwa nyinro tiqaro, Nte vuni Esiaani variqana nkyi kyapata kyaiqa varaavara okyara nkye ntapihi kyaarave.

<sup>19</sup> Hia nina nutu nronraqa hiarive tiqana nte kyaiqa varaavarave. Iutaavanto ntuvaantuama viqata ni uaqiamma matarerata uti variavana nte toqaamwu tukyena, nruqunru tuqi viqana, Jesusira kyaiqa vareqana qua mwakyaakya nkyi timwa nyunrave.

<sup>20</sup> Nkye mwianra ntapihiarave. Nkye taqaavana nte hia mpo qua ugetatena mpo qua nraahu nkyi timwa nyiavarave. Nte ekyaa qua nkyi kyaahaqa hiani quara ekyaa nraakye qora suqaavata, nkyita suqaavata, nkyi timwa nyiavarave.

<sup>21</sup> Nte Iutaa vaisiaravata, mpo mwatanaahuaravata, kepukyaqama kyena qua timwaqina viqana mwitaama qiavarave, Uaqia hi kyaiqarave uaqia hi aanranra qaqira kyeta Kotiva hinani nriqata Jesusira tiri nronra vaisiara quataave qiate, qiavarave.

<sup>22</sup> Qio mate nte Kotira mwanraquravanto nianra mwini quante tintema kyena nte Ierusaremini virerave. Ierusaremini quariro nanra inraikyavantove niqaa qovara hiananrove? Hia nte ntapihuquo.

<sup>23</sup> Mwaa inraikyara nraahuma nte ntapihuquo. Kotira mwanraquravanto nianra tiqaro, Rauriqara variante. E mpo mwatukya mpo mwatukya vinanra i karavuqa hivavata muaanra vareravavatama i vekya variho, tirave.

<sup>24</sup> Nte Jesusiva nronravanto mpi kyaiqara, mwi kyaiqara nraahu varaqina vina uro taiqa kyarerave. Mwiaqataina nte hia mwaa mwataraqaa qati variqi quaninranra nronraqama kyena riarerave. Nte Kotiva nraakye qorara po tiro kyuqema nyataani quara kyuqe mwakyaakya, mwi quara nraahu timwa nyiqi virerave.

<sup>25</sup> Nte Kotiva ntaqikyiani quara nkye varianani nrohiqana timwa nyunrave. Nte mate ntapihi kyauquo, nkye nraakiara hiama qaiqaa ni piri taqevarave.

<sup>26-27</sup> Hia nte mpo qua qati riemwa tena mpo qua nraahu nkyi timwa nyunrave. Nte ekyaa Kotira quave, kyaiqave, nkyi timwa nyunrave. Nte mate kepukya qua nkyi timwa nyianinra riaate. Nte Kotira qua ekyaa qua nkyi timwa nyunranra tiro, nraakiara nkyiqitairo mpovanto raupirima virera, hiama niqi qua vahiananrove.

<sup>28</sup> Kotira mwanraquravanto nkyi nronraqama kyaihatara tita, nkye nkyetaqaavata, Kotira nraakye qoraqaavata, kyuqema kyeta ntaqikyiqi quate. Kotiva nai mwaauq nraanreqo mwi nraakye qorahua kyoqama tairara tita, nkye sipisipi qohua kyuqehua votima kyeta variqata Kotira nraakye qoraqa ntaqikyiqita quate.

<sup>29</sup> Nte ntapihi kyauqo. Nte quarita uaquia hi quara ti vari vaisihua qaakyau vairi nraantanteta nrumu nkyi uaqiamma nyatevarave.

<sup>30</sup> Nraakiara nkyitaqitaita vaisi mponramwu qovarama vita, Iesusira nraakye qoravanto tiri vataqi quate tita, mwihua api qua unra qua mwihua timwa nyiqi vivarave.

<sup>31</sup> Mwianra rieqatama rauriqata variate. Hia taunru kyaate. Nte taarampo ihi variqana iheravata, entaqivata, nkyiara nronraqama kye riena nruqunru rauru kyeqana nkyi kuaa kuaa mwihua timwa nyiavarave.

<sup>32</sup> Nte mate virera hiqanama Kotiva nkyiqa ntaqikyiarive tinama, mwianra aakyara ntauqo. Kotiva nkyiara po tiro kyuqema nyataani quara riemwaqita quate. Mwia quavanto nkyi kyaahaqamaqiro virata nkye nraakiara ekyaa Kotira nraakye qora kyapata variqata kyuqema kyeta varivarave.

<sup>33</sup> Nte nkyivata variqana hia nte mpura munimanrave, koriarave, tuavaaqaqarave, vairiqa hiavarave.

<sup>34</sup> Nkye taqaarave. Hia nte nkyiara ni kyaahaqa hiate tiraitina, nte ntena kyauqu mwaatanaqotaina kyaiqa varaqi viqana ntena kyaravata, tuavaaqaqvata, vara kyena ni vatama kyeta varuhuavata kyaahaqamaqi quavarave.

<sup>35</sup> Nte ekyaa kyaiqa vareqanama kyuqe aanra nkyi nyaamwutaurave. Tire mwitaama kye kepukyaqama kye kyaiqa vara kyetama vehi nraakye qoravata kyuqema kyeta kyaahaqa hiananrave. Tire mwitaa hiqatama nronravanto Iesusiva tu quarara nraato tuare. Iesusiva mwataama tiro: Mpowanto mpohua mpo inraikya nyinro qamwataariva mpovanto mpo inraikya varero qamwataaninravata nraatara kyaananrove, turave, tiro.

<sup>36</sup> Poruva mwitaa timwa taiqa kyero mwiva nronra vaisi kyapata tori kyaataa ntaqantaa kyero Kotirara aakyara ntero.

<sup>37</sup> Kotirara aakyara ntamwa kyovata mwihua ntateqata mwia kyuquqama mwateta mwia mota kyeta qio quante tita.

<sup>38</sup> Poruva vaakya mwihuara tiqaro, Nte hiama nkyi siri qaiqaavata taqaaninrave, turara mwihua mwutukyavanto uaquia huvata mwihua Porura vitaqita sipiqi uro kyora.

## 21

### *Poruva Ierusaremini vura*

<sup>1</sup> Mwihua Porura uro kyovata tire vuro timwa kyeta sipiqi quavanana. Tire sipi vareta kyaarerera utaqaa vahu mwatara Kosini tumu vari kyeta mwia qanranraa mwata mpo Rotesini uro nteta mwiaqataita Pataraani vita.

<sup>2</sup> Mwini uro nteta taqaavararo sipi mpovanto Ponisiari virera huvata tire mwiqi mwaanri nteta vita.

<sup>3</sup> Viqata taqaavararo kyaarerera utaqaa vahu mwatava Saiparaasi kyauqu kyaantaqani vahuvata vitareta Siriaani uro ntaavararo mwatukya mpo Taiaani sipivanto nai varato inraikyara uro qatinani vara kyarero utuvata

<sup>4</sup> tirevata mwini mwaamwi nteta uro Iesusirara qutaave tuhua puaama kyeta mwihua kyapata mwini kuaa uikiara variavanana. Variavararo Kotira mwanraquravanto mwihua kyaahaqa huvata mwihua Porurara tiqata, Hia Ierusaremini quante, tita.

<sup>5</sup> Tuvata tire mwini variavararo tire quana entava nri ntovata vita. Virera hiavarata Iesusirara qutaave tuhua nkyiari nraakye nraaqiararavata mwatukya kyeta tiri tivitaqita uro nramanri tokyani kyovata tire ekyaa tori kyaataa ntaqantaaqita Kotirara aakyara ntaavanana.

<sup>6</sup> Mwiaqatai mwihua kyauqu tiri timwuvata tire nkyiari kyauqu nyita sipiqi quavarata mwihua tumu ntanteta nkyiari mwaatani vura.

<sup>7</sup> Mwihua vuvata tire Taiaa kyeta pipi mwiqimate mwatukya mpo Toremesini uro nteta Iesusirara quataave tuhua mwini varuhua qua mwanteta mwihua kyapata kuaa enta mwini varita

<sup>8</sup> mwia qanranraa pipi mwaanri nteta Sisariaani uronte mwini variqata Piripiva Kotira mwakyaakya tu vaisira nraamwuqi uro variawanra. Taura Ierusalemini variqata vaisi 7 nramwu vara sivuma kyeta Kotira kyaiqa varaate tu vaisinramwuhuaqitairo Piripiva mwiva mpovanto varura.

<sup>9</sup> Piripira nraamwunra erahiamuaantemanramwuvanto variqata mwihua hia vaati vararaitita, qati variqata Kotira qua qovarama kye varura.

<sup>10</sup> Tire mwihuavata Sisariaani mpo entanramwu variavararo Kotira qua qovarama kye varuva mpovanto mwia nrutu Akapaasiva Iutiasairo nri ntero.

<sup>11</sup> Mwiva uro ntero Porura reti vara kyero mwiaqotairo nai kyuqu kyauqu rupatero tiqaro, Kotira mwanraquravanto mwitaama tiho. Nraakiara Iutaavanto Ierusalemini varihua reti mwaa qora mwataama kyeta mwia kyuquvata kyauquvata rupa kyetama mpo mwatanaahua nyivarave, tiro.

<sup>12</sup> Mwitaa tuvata tirevata, mwini varuhuavata, mwi quara rieta Porurara po tita tiqata, E hia Ierusalemini quante, tita.

<sup>13</sup> Mwitaa qiavararo Poruva qaqao tiro. Nkye ntataqita vivaro ni mutukya uaqia hiankyorave. Hia nte karavuqi quaninranra nraahu nronraqama kyena riauqo. Nte Iesusirara rieqana Ierusalemipi qutu quaninranravata tera huqo, tiro.

<sup>14</sup> Mwitaa tuvata tire hia mwia qua qio nraatara kyaarava vahuvata mwitaama tita, Qio nronravanto nai kyakya hiani kyaiqara varaarive, tita.

<sup>15</sup> Mwitaa timwa kyeta tire mpo entanramwu mwini vari kyeta mwitaa inraikya tera taarama kye vareta mwiaqataita verara Ierusalemini quavanra.

<sup>16</sup> Iesusirara quataave tuhua mponramwuvantovata Sisariaasaita tiri tivitaqita nrumu tetu variana nraamwunra Nesoninra nraamwuqi kyora. Nesoniva Saiparaasinyaava mwiva haaru vakyaqama Iesusirara quataave tuva varura.

### *Poruva Iemisira uro taqora*

<sup>17</sup> Tire Ierusalemini uro ntaavarata tiri tiqata vakya Iesusira nraaqiaranramwu mwini varuhua tiriara qamwateqata tiri tivitora.

<sup>18</sup> Mwihua tiriara qamwateqata tiri vitovaro mwia qanranraa Poruva tirivata tivitero Iemisira taqarerero viro. Vuvata Iesusira nraaqiara nronra vaisinramwuvantovata mwipi varuvaro

<sup>19</sup> Poruva mwihua qua nyantero Kotiva mwia kyaahaqa hi varuvaro nai mpo mwatanaa mpo mwatanaahuani nronra kyaiqa vara nyatorara mwihua timwa nyinro.

<sup>20</sup> Poruva mwi quara ekyaa timwa nyuvata mwihua mwi quara rieqata Kotira nrutu tuaahera kyeta Porurara mwitaama tita, Qio tiri tiqatao, taqaante. Airi Iutaa vaisi tausenivanto Iesusira nraaqiaraqama vita mwihua Mosesira quavata nronraqama kyeta riemwaqita vi variavo.

<sup>21</sup> Mpo hiahua unra qua timwa nyiqata iqaa ntumwa kyeta mwitaama ti variavo. Poruva Iutaa vaisi mponani mponani variahura tiqaro, Nkye Mosesira qua qaqlira kyaate. Hia nkye nkyeta qoraisi nraaqiara mwamwanta toqaate. Hia Iutaa mwaanra okyara riemwaqita quate, tirave, qiaovo.

<sup>22</sup> Iara mwi quara mwi quara ti varia vaisihua e Ierusalemini nri ntaananra ntapihi kyaavo. Mwitaa hirara e nataave hinanrave?

<sup>23</sup> Kyai tire i timwa mwianranra e tire qiarante hiante. Vaisi erahiamuaantemanramwu Kotirara nkyiari kyuqu nriqiqaa vateta tiqata, Tire quataaqama kye mwitaa hirerave, qiarave.

<sup>24</sup> E mwinramwuhua sita varera Kotiva mwamwantave mwutukya hiqama nyataani okyarara riemwaqira viqarama uro taiqa kyera e mwiaqataira mwinramwuhua

kyaahaqa hiqarama munima kyairata mwinramwuhua qiata ekyaa toqa nyataate. E mwitaamaqira virata nraakyе qora i taqeta, mpo hiahua iara timwa taa quava unra quama vaiho tivarave. E mwitaa mwitaa hirera, nraakyе qoravanto taqaivara e Mosesira qua okyara ntapihi kyera riemwaqira vi variaravama varinanrave.

<sup>25</sup> Mpo mwatanaa mpo mwatanaa Iesusira nraaqiaraqama quahua haaru tire mwaan quara qara ntumwa kyeta timwa nyiavanranrave. Mwi entara qara ntumwa tetu tire tiqata, Hia unra mwanrigani vate kyarara nraate. Hia nraanre nraate. Hia nruntana tuvareta ntaqutu kye vahi aasaura nraate. Hia vaisivanto nraakyevata api nrohiate, qavananrave, tita.

<sup>26</sup> Mwihua mwitaa tuvaro Poruva mwi vaisinramwuhua sita varero mwia qanranraa mwihua kyapata variqaro mwamwantavata mwutukyavata hiqaani okyarara riemwaqiro viro mwiaqatairo Kotira nraamwuqi verantero Kotira kyaiqa vara mwate varu vaisihua timwa nyinro tiqaro, Tirenramwu mwi entara mwi entara mwaaqi variqata mwamwantave mwutukyave hiqaana okyarara riemwaqiqi vita uro taiqa kyarerave. Mwiaqataita tire variarata nkye tiri kyaahaqa hiqatama Kotira kyaiqa vara timwataate, tiro.

### *Kotira nraamwuqitai Porura ntavaaqavu kyora*

<sup>27</sup> Qio 7 enta mwiva qauma taiqa quariva vahuvata Iutaa vaisinramwu Esi-aanyaahua taqovaro Poruva Kotira nraamwuqi varuvata mwinramwuhua mwia taqeta antua qua tiqata nraakyе qora nyaanrama kyeta uro Porura ntavaaqavu kyeta aakyara nteta tiqata,

<sup>28</sup> Isareri nraakyе qora tuaavo, tiri kyaahaqa hiate. Mwaa vaisiva mponani mponani nrohiquaro Isareriaravata, Mosesira qua okyararavata, tiri mwaanra nraamwu mwaanravata, api qua ti vari vaisiva varihata mwia ntavaaqavu kyauro. Qio mate mwiva mpo mwatanaa vaisinramwu sitaqiro Kotira nraamwuqi nrumu kyaihata mwihua mpo mwatanaa vaisi variqataro tita, mwihua Kotira nraamwu uaqiamama kyaavarohiama kytataqama vaiho, tita.

<sup>29</sup> Tauraa mpo enta mwihua taqovaro mpo mwatanaa vaisi mpovanto Epe-saasinyaava mwia nrutu Toropimaasiva Porukyantiri mwatukyagi nrohi varuvata mwihua tiqata, Poruva vaisi mwiavata vitero uro Kotira nraamwuviho, tiqata mwitaa tura.

<sup>30</sup> Mwihua nkyiari riemwa kyeta api qua Poruraqaa vatovatara tita, Ierusarem-ini ekyaa nraakyе qora hisai hisaita hiante uro ntuvantuama vita Porura Kotira nraamwuqitaita ntavaaqavu kyeta ntanrauqita mwaatani veva kyeta. Mwaatani kyovata Kotira nraamwuqaa ntaqikyi varuhua qamwanrama kyeta qesa tita tora.

<sup>31</sup> Mwitaa huvata nraakyе qora ntuvantuama vuhua Porura ru kyarerata uti varuvaro vaisi mpovanto qua vara kyero tiqaro, Ekyaa Ierusaremmini variahua uaquia hi okyarara qovaramama tetu hiavo, tuvaro

<sup>32</sup> ntaqi varuraqaa nronraqa huva nai nronra vaisi mponramwuvata, ntaqu vaisihua mponramwuvata, sita kyero hiantero nraakyе qora kuairama vita varunani viro.

Mwini vuvata nraakyе qoravanto mwi vaisiravata ntaqu vaisihuavata taqeta qamwanrama kyeta Porura ntuquuti varura qaqira kyora.

<sup>33</sup> Qaqira kyovaro ntaquraqa nronraqa huva uro Poruva varunani variqaro Porura tutero ntaqu vaisihuara tiqaro, Seni taaratanaqotaita mwia rupataate, tiro. Mwitaa timwa kyero mwiva kyapara hiro tiqaro, Mwaa ta vaisivave iho? Mwiva nanra inraikya utu kyaihatave nkye mwia ntuquuti variavo? tiro.

<sup>34</sup> Mwitaa tuvata mwiqi ntuvantuama vuhua hia kuaa qua tiraitita, mpo qua mpo qua ti varuvaro mwiva qua okyara hia ntapihi kyero riaraitiro, Porurara tiqaro, Mwiva vita vareta ntaqua vaisihua nraamwuqi uro kyaate, tiro.

<sup>35</sup> Tuvata mwihua mwia viteta nraamwu mwiqiara iriqaa uro nteta taqovata nraakye qoravanto Porura ru kyarerata mpo uti varuvata ntaqu vaisihua mwia kyavuhu kyeta nyaamwuqaa tu vareta vuvata

<sup>36</sup> nraakye qora Porura vataqi viqata aakyara ntamwa kyeta Porura ru kyaate nraahu tura.

### *Poruva naiqaatai vaitutu hiqaro qua tura*

<sup>37</sup> Mwitaamaqita vuvata ntaqu vaisihua Porura vitaqita uro nraamwuqi kyarerera huvaro Poruva ntaqu vaisihua nronra vaisiara tiqaro, Qiove nte ivata qua qianinrave? tuvaro mwiva tiqaro, E Kiriki qua riaaravave iho?

<sup>38</sup> Nte iara tiqana, E mpo mwatanaa Isipivantove turave. Mwi vaisiva haaru kamaninra vatama kyero ntaqirero hiqaro 4,000 ntaqu vaisihuavata sitero qumina mwatani ntaqirera uti varurave, tiro.

<sup>39</sup> Mwitaa tuvaro Poruva qaqao tiro, Nte Iutaa vaisima varuqo. Nte mwatukya Tasaasi Sirisiaani ni mwata taivave. Mwi mwatukyava mwatukya nronra vahana nte mwi mwatanaavama varuqo. Qiove nte nraakye qora qua timwa nyianinrave? tiro.

<sup>40</sup> Tuvaro ntaquraqa ntaqikyi varu vaisiva qiove tuvaro Poruva nraamwu qesaqaa siviro variro kyauqu tuaahera kyero tirema variate tuvata nraakye qora tirema varuvaro Poruva mwihua nkyiari Hivuru quaqitairo timwa nyinro.

## 22

<sup>1</sup> Poruva mwitaama tiro: Ni kata pakyaavata, ni kohuavata, nkye mwaini riaate. Nkye niqaa qua vataavana nte ntenaqaatai vaitutu hiqana qua tirerave, tiro.

<sup>2</sup> Mwitaa tuvata mwihua rioraro Poruva mwihua nkyiari Iutaa qua Hivuru quaqtairo ti varuvata mwihua mpoqivata nai tirema kyeta varuvaro Poruva nai vaitutu hiani quara tiqaro mwitaama tiro:

<sup>3</sup> Nte Iutaavanto varuqo. Ni mwatukya Tasaasi Sirisiaani mwatataivave. Nte Ierusaremi mwaaqi variqana nronra tuemwa vuvave. Kamariariva nronra vaisivanto ni timwa mpihana nte ekyaa tiri haivaqahua mwaanra okyara ntapihi kyaurave. Mwitaamaqina viqana nte kepukyaqama kyena Kotira vataqi vurave. Mate nkye Kotira vataqita quantema kyena ntevata Kotira vataqina quavarave.

<sup>4</sup> Mwi entara nte hia Iesusira vataqina quava entara nte Iesusira aanraqa nrohi varuhua uaqiamma nyateqana mwihua qati nraahu ru kyaavarave. Nte vaisivata nraakyevata ntavaaqavu kyeqana uro karavuqi kye variavarave.

<sup>5</sup> Kotira nraamwuqi Kotira kyaiqa vara mwate varia vaisihua mwihua vunyaa vaisivantovata, mwia kaanasorivantovata, mwi quarara qutaave tivarave. Mwihua Ntamaasikaasini varu qata vakyaahuara qara ntumwa kyeta ni mpuvana nte mwi quarara varena nraakye qora seniqotaina uro rupaqina nrumu Ierusaremini kyaarita mwihua ruate timwa kyavarave.

### *Poruva nai Iesusira nraaqiaraqama vurara tura*

(*Kyaiqa Varora 9:1-19, 26:12-18*)

<sup>6</sup> Qio nte qara varena Ntamaasikaasi qaumato quavaro huarivanto virini qiataqa vahuvaro qamwanrama kyero nyaamwusairo omwavanto aaquakyaa voti huva niqaa tumuvana

<sup>7</sup> nte mwataqi tumu ntina mwicqitaina riaavaro quavanto nianra mwitaama tiro: Soruo, Soruo, nanraqamave e ni uaqiamma matera hiaro? turave.

<sup>8</sup> Tuvana nte tiqana, Nronrao, e tavave? qiavaro mwiva tiqaro, Nte Nasaretinyaava Iesusivave. E ni uaqiamma mate variaravama varuqo, tiro.

<sup>9</sup> Mwitaa tuvata ni vatama kyeta nruhua omwa nraahu taqeta hia mwi quara ntapihi riorave.

<sup>10</sup> Mwitaa huvana nte nronra mwia kyapara hina tiqana, Nte nataave hianinrave? qiavaro nronravanto nianra mwitaama tiro: Sivira virava uro Ntamaasikaasini variraro vaisi mpovanto e Kotira kyaiqa varenanranra i timwa mwianrive, turave.

<sup>11</sup> Mwitaa tuvaro omwa nronravanto utu varora tiro, ni pu qipa vuvana hia qio taqaavata ni vatama kyeta nruhua ni kyauqu tu vareta pitaqita Ntamaasikaasini uro kyorave.

<sup>12</sup> Mwini kyovaro vaisi mpovanto mwia nrutu Ananaiaasiva mwiva Mosesira okyara qua kyuqema kyero rio vaisiva, ekyaa Iutaavanto Ntamaasikaasini varuhua mwianra kyuqe vaisive ti varuva,

<sup>13</sup> mwiva nte variavanani nri ntero ni nraaqani siviro variro tiqaro, Ni kata Soruo, i vu qipa viharave? Qio qaiqaa taqaante, tuvaro ni puvanto qamwanrama kyero ntapairi vuvana nte qio taqeqana mwi vaisiravata ntapihi taqaavarave.

<sup>14</sup> Mwiaqaa variavaro mwiva tiqaro, Tiri haivaqahua mwanriqa Kotiva e mwia kyakya hianinra ntapihi kyaante tiro, i mwatama tairave. Ntapihi kyero nrohi vari vaisira Kotira kyaiqa vaisi Jesusira e mwia taqeqara mwia nroqitaira qua riaante tiro, Kotiva i mwatama tairave.

<sup>15</sup> E Jesusira kyaiqa taqenanra Jesusira okyara rienanra ekyaa nraakyne qora timwa nyinanrave.

<sup>16</sup> E nanra vekyave variaro? Sivira nramanri vareqara Jesusira nrutu ntairaro mwiva i uaquia hi kyaiqara nruka mwataarive, turave.

### *Kotiva Porurara mpo mwatanaahua ni qua timwa nyiante tura*

<sup>17</sup> Ananaiaasiva mwitaa tuvana nte mwiaqataina uro ntantena Ierusaremini nrumu Kotira nraamwuqi Kotirara aakyara nteqana ruvaata voti huru taqaavarave.

<sup>18</sup> Ruvaata taqe variavaro nronravanto nianra tiqaro, Qamwanrama kyera Ierusaremi kyera quante. E ni qua timwa nyinanra mwaa nraakyne qorahua hiama qio rievarave, turave.

<sup>19</sup> Mwitaa tuvana nte tiqana, Nronrao, mwihua ni kyaiqa okyara taqorave. Nte haaru mwaanra nraamwu mpoqi mpoqitaina iara rio nraakyne qorahua ntanrauqina uro karavuqi nraahu kyena mwihua ruavarave.

<sup>20</sup> Haaru iara ti varu vaisira Sitiveninra mwihua ru kyovana ntevata mwi entara mwihua tua vaaqaqaa ntaqikyi variqana qio mwia ru kyaate qiavarave.

<sup>21</sup> Mwitaa qiavaro nronravanto nianra tiqaro, Qio quante. Nte mpo mwatanaahua varira nyianra mwutukyani i titarerave, turave, tiro.

<sup>22</sup> Poruva mwitaa timwaqiro vuvata mwihua mwia qua riemwaqita vuvaro Poruva mpo mwatanaahuara qua tuvata mwiaqataita mwihua raraqa tovata mwihua aakyara nteta tiqata, Mwia vitaqita uro ru kyaate. Mwitaa qiari vaisiva hiama qio qati variananrove, tita.

<sup>23</sup> Mwitaa timwa kyeta mwihua qua aakyara ntamwaqi viqata nkyiari tuavaaqa tuto tuto hita mwumwuvata varake tuto tuto hi varuvaro

<sup>24</sup> Romeninyaava ntaquhuqa nronraqa huva Porurara ntaqu vaisihua timwa nyinro tiqaro, Nraamwuqi vitaqita uro kyetama mwia kyaantaqotaita ntuqutuate. Mwia ntuqutiqatama mwia kyapara hiate, E nanra utu kyaaratave nraakyne qoravanto qua aakyara ti variavo, tivaroma mwiva nai qua okyara qovarama kyairata riaate, tiro.

<sup>25</sup> Mwitaa tuvata mwihua Porura kyatariqaa rupateta mwia ntuqutuare tuvaro Poruva nronra vaisi mwiva mwia tataaqa siviro varura mwia kyapara hiro tiqaro, E kamaninra okyara rieqarama e qiove hia ko tiraitira, Romeni vaisi ntuqutinanrave? tiro.

<sup>26</sup> Poruva mwitaa tuvaro nronra vaisi mwiva mwi quara riero uro mwihuaqaa nronraqa hu vaisira timwa mwinro tiqaro, E nataave hinanrave? Mwi vaisiva Romeni vaisivantomava variho, tiro.

<sup>27</sup> Mwitaa tuvaro ekyaa mwihuaqaa nronraqa huva Poruva varunani nri ntero mwia kyapara hiro tiqaro, E quataave Romeni vaisivanto variaro? E tiraqe riaankye, tiro. Mwitaa tuvaro Poruva eo tiro.

<sup>28</sup> Tuvaro nronra vaisi mwiva tiqaro, Nte munima nronraqama kyena Romeni vaisiqama vurave. E mpo, nataama kyerave Romeni vaisiqama quaro? tuvaro Poruva mwia timwa mwinro tiqaro, Ni nthohua kohua Romeni vaisiqama quarara tina, ntevata Romeni vaisima varuqo, tiro.

<sup>29</sup> Poruva mwitaa tuvata vaisi mponramwuvanto Poruva qua qiarive tita mwia kyapara hirera utuhua nrihanrama vita varuvaro nronra vaisi mwiva aatu hiro, Qikye tiro, Poruva Romeni vaisivanto varihata tire mwia seniqotaita rupa tauro. Tire hia mwitaa hiataarave, tiro.

### *Porura vitaqita uro Kaanasori suqaa kyora*

<sup>30</sup> Nronra vaisi mwiva mwitaa timwa kyero mwiva Iutaa vaisinramwu Poruraqaa qua vatarera uti varu okyarara ntapihi kyero riarero variqaro mwia qanranraa Porura seniqotaita rupa tora huvantu kyero qua vara kyovata nronra vaisi Kotira nraamwuqi Kotira kyaiqa vara mwate varuhua mwihua nronra vaisinramwuvata, ekyaa kaanasorivata, nrumu ntuvaantuama vuvaro mwiva Porura vitaqiro mwihua suqaa uro kyora.

## 23

<sup>1</sup> Poruva siviro kaanasori mwihua taqero mwiva mwihua timwa nyinro tiqaro, Ni kata pakyaa tuaavo, nte Kotira vuqaa nrohiqana hia unra kyaiqa varauqarora tiro, hia ni kyaurihana varuqo, tiro.

<sup>2</sup> Mwitaa tuvaro Kotira nraamwuqaa ntaqikyuva Ananaiaasiva, mwiva vunyaava varuva Porura nraaqani varu vaisihua timwa nyinro tiqaro, Porura nro vaitua ntuteqa kyaate, tuvaro

<sup>3</sup> Poruva tiqaro, Kotiva inavata ntuquutanranrove. E uaqia hi kyatarira ecarori penti quataara mwia voti hiaravama variaro. E Kotira qua mwaanra rieqara ntapihi kyera ko qiataara vaiharama e Kotira qua nteqa kyeqarama ni ntuquutuate qiaro, tiro.

<sup>4</sup> Poruva mwitaa tuvata vaisinramwu mwia nraaqani varuhua tiqata, E Kotira kyaiqa vaisi vunyaanranrama uaqia hi quara ti variaro, tita.

<sup>5</sup> Mwitaa tuvaro Poruva qaqao tiro, Ni kata pakyaa tuaavo, hia nte mwiva vunyaava vaisi varira mwia ntapihi kyaraitina tuqo. Kotira mpukuqi mwitaama tiro:  
Hia nraakye qoraqaa ntaqikyiani vaisirara  
uaqia hi quara qiate, turave.

(Kyatura 22:28)

Nte mwi quara ntapihi kyaaurave, tiro.

<sup>6</sup> Poruva mwitaa timwa kyero mwiva taqovata vaisi mponramwuvanto Saitiusi mwaanra okyara riohua varuvata mponramwuvanto Parisi mwaanra okyara riohua varuvaro Poruva Kaanasori timwa nyinro tiqaro, Ni kata pakyaa tuaavo, nte Parisi mwaanra okyara riauvave. Ni kovavata Parisi mwaanra okyara rie varurara tina, ntevata mwia mwaaquvanto mwitaa hi varuqo. Vaisi qutu vihua qaiqaa qati sivira nte mwianrama quataa quave ti varuqo. Qio mwi quara kyaarama mate nkye niqaa ko vateta hiavo, tiro.

<sup>7</sup> Poruva mwitaa tuvata Parisivata, Saitiusivata, mwiaqataita sivita ntainra vita nai inronra hi nai inronra hi varura.

<sup>8</sup> Saitiusivanto ti varu okyarava mwataamama vahiro:  
Vaisivanto ekyara qutu viro hia qaiqaa siquananrove.  
Hiama Kotira kyaiqa vaisi nyaamwunyaahua variavo.

Hiama mwanraqura inraikyavantovata variavo, tura.  
 Saitiusivanto mwaanra ti varu okyarava mwitaama vahuvaro  
 Parisivanto mwaanra ti varu okyarava mwataamama vahiro:  
 Vaisivanto qutu viro qioma qaiqaa qati siquananrove.  
 Nyaamwunyaaya vaisi variavo.

Mwanraqura inraikyavantovata variavo, tura.  
 Mwihua ekyaa taarampo qua mwinramwunranra quataa quave  
 tura.

<sup>9</sup> Inronra hi variqata mwihua qua nronra ti varuvata vaisi mponramwuvanto  
 mwaanra okyara ti varu vaisihua Parisiqinaahua sivita kepukyaqama kye qao tita  
 tiqata, Tire taqauraro hia mwaa mwi vaisiva uaquia hi kyaiqara utu kyaiho. Qutaa  
 haaru mwi entara mwanraqura mpovantove, nyaamwunyaava mpovantove, mwiva  
 timwa mwurave iho? tita.

<sup>10</sup> Mwihua mwitaa timwa kyeta nronraqama kyeta inronra hi varuvaro Romeni vaisi  
 ntaquhuaqa nronraqa huva, mwiva aatu hiro tiqaro, Haunri mwihua hisai hisaita  
 Porura nrnumu tu vareta utaqa tu ntapema kyevorave tiro. Mwitaa timwa kyero  
 mwiva nai ntaqi varu vaisihua sitero tiqaro, Uro Porura mwihuaqitaita vitaqita nrnumu  
 ntaqua vaisihua nraamwuqi kyaate, tiro.

<sup>11</sup> Mwitaa tuvata mwia vitaqita nraamwuqi uro kyovaro entaqi Poruva varuvaro  
 nronravanto qovarama viro mwia nraaqani siviro variro mwia timwa mwinro tiqaro,  
 Hia aatu hiante. Kepukyaqama kyera variante. E mwaini Ierusaremini variqara ni  
 okyarara timwa nyiananrave. Nraakiara e nyianra Rominivata uro variqarama ni  
 okyarara mwitaama kyerama timwa nyinanrave, tiro. Nronravanto mwitaa tura.

### *Iutaavanto Porura ru kyerara tura*

<sup>12</sup> Mwia qanranraa toqaqi Iutaavanto ntuvaantuama vita kuaa qua timwa kyeta  
 taaqau kye vateta. Mwihua Kotirara kyauqu nriqiqaa vateta mwitaama tita, Mate  
 tire nramanrivata kyaravata aurama tetra Porura ru kyeta mwiaqaataita kyaravata  
 nramanrivata nranrenrave, tura.

<sup>13</sup> Mwihua 40 vaisinramwuvanto mwitaa hirerata qua timwa kyeta taaqau tetra

<sup>14</sup> mwiaqaataita uro Kotira nraamwuqaa ntaqikyi varuhua nronra vaisinramwu  
 uqeta kyeta timwa nyita tiqata, Tire qua taaqau kye vatetama kyauqu nriqiqaa vateta  
 Porura ru kyeta mwiaqaataita kyaravata nramanrivata nranrenrave, turo.

<sup>15</sup> Nkyevata, kaanasorivata, qua vara kyaivaro Romeni vaisi vunyaava varinani  
 viraro Porura vara kyairaro tumuanrive. Nkye Romeni vaisi mwianra tiqata, Tire  
 Porura kyaparama kye mwia qua okyara mpoqiyavata riemwa ntapihirerave, qiate.  
 Nkye kumwaanri mwitaa tivaqeta tire mwaanra utu taararo mwiva tuminraqeta  
 mwia aanrani ru kyaare, tita.

<sup>16</sup> Mwihua uqeta kyeta mwitaa tuvaro Porura nrausivanto mwihua tu quara riero  
 mwiva uro ntaqu vaisihua nraamwuqi Poruva varuraqi uro Porura timwa mwinro.

<sup>17</sup> Timwa mwuvaro Poruva ntaqu vaisihuqaa ntaqikyi varura mpo nraanrama  
 kyero timwa mwinro tiqaro, Nyaako mwaa vita varera iara mwiva hinani uro kyairaro  
 mwiva qua mpo mwia timwa mwianrive, tiro.

<sup>18</sup> Tuvaro mwiva mwia vita varero vunyaava varunani uro kyero tiqaro, Karavu  
 vaisi Poruva nianraa qumwanraa mwaa vita varera iara mwiva hinani uro kyairaro  
 qua mpo iara mwia timwa mwianrive, tiho, tiro.

<sup>19</sup> Mwitaa tuvaro vunyaa vaisi mwiva qumwanraa mwia kyauqu tu varero vitaqiro  
 uro nanrianraa kyero mwia kyapara hiro tiqaro, E nanra qua ni timwa mpirerarave  
 nriaro? tiro.

<sup>20</sup> Tuvaro qumwanraa mwiva mwia timwa mwinro tiqaro, Iutaa nronranramwuvanto  
 mwataaa timwa kyeta qua taaqau taavo. Mwihua hora iara Porura vitera

kaanasorivanto varinani viraqeta tire Porura qua ntapihi kyeta kyapara hiqata taqaare tivarave.

<sup>21</sup> Mwihua mwitaa tivara hia mwihua qua riaante. Vaisi 40 nramwuvanto aanrani uqeta vita Porura ru kyarerata mwaanra utute variavo. Mwihua kyauqu nriqiqaa vateta tiqata, Tire kyara auramate Porura ru kyeta mwiaqataita kyaravata nramanrivata nranrenravema, qiaovo. Mwihua mwitaa timwa kyeta i vekyama variavo, tiro.

<sup>22</sup> Qumwanraa mwiva mwitaa tuvaro vunyaa vaisi mwiva mwia timwa mwinro tiqaro, E ni timwa mpiana quara hia mpohua timwa nyiante, tiro. Timwa kyero qumwanraa mwia titovaro viro.

### *Porura Pirikisiva hunani titora*

<sup>23</sup> Qumwanraa mwia titovaro vuvaro vunyaa vaisivanto nai ntaqi varu vaisihuqaa ntaqikyi varu vaisihua taaratana nyaanrama kyero timwa nyinro tiqaro, Ntaqi vaisihua 200 nramwu sita vataate. Qosiqaa nrohiqata ntaqua vaisihua 70 nramwu sita vataate. Vaataara tutehua 200 nramwu sita vataate. Mwihua terama kyeta vatetama Sisariaani 9 kiroki entaqima quate.

<sup>24</sup> Poruranivata qosи mponramwu terama taivaro mwiva mwiaqaa mwatakyaa viro varirata vitaqita uro nronra kamaniva Pirikisiva hinani kyaivaro mwiva kyugema kyero uro ntaarive, tiro.

<sup>25</sup> Vunyaa vaisivanto mwitaa timwa kyero qaravata ntumwa tero mwitaama tiro:

<sup>26</sup> Nte Karontiaasi Risiaasiva nte mwaa quara qara ntumwa kyena vara kyaariro e nronra kamaniva variananrani quarive. Nte i qua mwantauquo.

<sup>27</sup> Iutaavanto mwaa vaisira ntavaaqavu kyeta ru kyarerata uti variavana nte taqauqaro mwiva Romeni vaisivanto varihana nte ntaqua vaisihua sitaqina uro mwi vaisira mwihua kyauquqitai vara kyaunanrave.

<sup>28</sup> Mwihua mwi vaisiraqaa qua vataara okyara ntapihi kyena riaankye tina, nte mwia vitaqina uro mwihua kaanasori varianani kyena mwini variqana

<sup>29</sup> taqauqaro  
hia mwia ru kyaani okyaravavata, karavuqama kyaani okyaravavata vahirave. Mwihua nkyiari mwaanra qua kyaara nraahu mwiaqaa qua vataarave.

<sup>30</sup> Mwiaqatairo mpovanto timwa mpiri tiqaro, Iutaavanto uqeta kyeta Porura ru kye quara ti variavo tihana nte kyai e hiananrani titaariro quarive tuqo.  
Mwitaa timwa kyena nte Poruraqaa qua vataa vaisihuara nkye iara mwiva hinani uto variqata mwi quara qiate tuqo, tiro.

<sup>31</sup> Vunyaa vaisivanto mwitaama kyero qara ntumwa tovata ntaqu vaisinramwuhua nkyiariqaa ntaqikyi varuhua tuntema kyeta Porura vita vareta entaqi uro mwatukya mpo Antipatirisini kyeta.

<sup>32</sup> Mwia qanranraa qati mwataqaa vu vaisihua uro ntanteta nkyiari mwaatani nrurvata qosiqaa vuhua nraahu

<sup>33</sup> Poruravata qaravata vareta Sisariaani kamaniva nronravanto varunani uto kyora.

<sup>34</sup> Uto kyovaro mwiva qara mwia kyaara ntumwa kyero taqero Porura kyapara hiro tiqaro, E tainyaavave? tiro. Tuvaro Poruva tiqaro, Nte Sirisiaanyaavave, tiro.

<sup>35</sup> Mwitaa tuvaro mwiva tiqaro, Iqaa qua vatarera ihua nrivaqena nte mwi quara riarerave, tiro. Mwitaa timwa kyero mwiva Herotira nraamwu nronraqi Porura vita vera kyero mwi vaisiraqaa kyugema kyeta ntaqikyiate tiro. Turama.

## 24

### *Iutaa vaisi nronranramwuvanto Poruraqaa qua vatora*

<sup>1</sup> Kyauquru enta nrinarovaro Kotira nraamwuqaa ntaqikyi varuva, Ananaiaasiva nronra vaisivata huntu kyero ekyaa ko okyara ntapihi paahima kyero rio vaisira Tetaraasiravata huntu varero Sisariaani Porura ko tirero vura.

<sup>2</sup> Vuvaro Tetaraasira nraanrovoro Tetaraasiva Poruraqaa qua vateqaro mwitaama tiro:

Nronra vaisi Pirisikisio, e tiriqaa kyuqema kyera ntaqikyi variarata tire kyuqema kyeta varuro. Haaru tire api kyaiqa vare variarara e nri nterama tiri kyaiqa kyuqema kyera ntapihi kyera vara timwa taaro.

<sup>3</sup> E mwitaa hiarata tire mpo mwatukya mpo mwatukyaqi varurahua i kyaiqara nronraqama kyeta qamwateqata iara kyuqema hiaro turo.

<sup>4</sup> Qio tire i mpuahaama mwaaqi tutaarorave. E tiriara po tiraqeta tire pata quaqia qiare.

<sup>5</sup> Tire taqauraro mwaa vaisiva airiqama kye ntaqira qua ti variara mwia okyaravantove. Mwiva mpo mwata mpo mwatani nrohiqaroma Iutaavanto ntaquate tiqaro mwihua rapate variho. Mwiva tiri mwaanra okyara mwia qaqira kyero mpo okyara Nasaretinyaava ti vari okyarara mwiaqaa ntaqikyiqaro vuniqama kyero vi varivama variho.

<sup>6</sup> Mwiva tiri mwaanra nraamwu Kotira nraamwu nronraqi nrohiqaroma tiri nraamwu mwia uaqama timwataiho. Mwiva Kotira nraamwu uaqama mwatarero uti varihata tire mwia ntavaaqavu kyauro. Tire teta mwaanra qua rieqata ko qiare turaro

<sup>7</sup> Romeni vunyaava Risiaasiva nri ntero kepukyaqama kyero tiriqitairo mwia vitaiho.

<sup>8</sup> Risiaasiva tiqaro, Mwiaqaa qua vatarera tihua iara mwiva hinani quate tiho. (Mwitaa tihata tire mwaini tumunro). E Porura nai kyapara hiraro tire mwia ko tirera hunu quara mwiva nai nroqitairo tirara e riaante, tiro.

<sup>9</sup> Tetaraasiva mwitaa tuvata Iutaa vaisi ekyaa mwihua Poruraqaa qua vateqatama Tetaraasiva quataa quama tiho, tita.

### *Poruva naiqaatairo vaitutu hiqaro qua tura*

<sup>10</sup> Mwihua mwitaa tuvaro kamaniva nronravanto Poruva qua qiarive tiro, nruvaairama kyovaro Poruva siviro mwitaama tiro:

Nte ntapihi kyaucara e airi ihi variqara mwaa mwataraqaa ntaqikyiqarama ko ti variaravave. Mwianra rieqanama nte qamwateqana ntena qua i timwa mwinrenrave.

<sup>11</sup> Hia nte Ierusaremini nri ntena airi enta varuqo. Nte 12 entanramwuanra nraahuma mwini teta mwaanra qua tirerana nrumu varuqo. E mpo vaisivata kyapara hiraro mwiva nte qiani quarara quataave nraahuma qiananrove.

<sup>12</sup> Hia Iutaavanto taqaavana nte Kotira nraamwuqi variqana mpohia vaisihua kyapata antua quavata tuvave. Hia mwihua taqaavana nte mwaanra nraamwu mpoqi mpoqive, mwatukya mwipi mponave, variqana nraakye qoravanto ntaquate tina, mwihua rapataurave.

<sup>13</sup> Mwihua niqaa quminama qua vataavo. Hia mpo aanra puaama kye mwihua nkyiari qua mwianra quataave tiva vaiho.

<sup>14</sup> Mwihua hini qua nianra timwa taa quava quataa quama vaiho. Quataama nte teta haivaqahua mwanriqa nrutu tuaahererera hiqana nte mpo qua okyara rieqanama mwia nrutu tuaahere varuqo. Mwihua mwi aanranravata mwi okyararavata unra okyarave ti variavo. Qio nte mwi okyarara rieqanama hia nte tiri haivaqahua qua okyara qaqira kyaquo. Nte Mosesira qua mwaanrave, poropeti vaisinramwuvanto qara ntumwa to quarave, mwi quarara quataa quave tuvave.

<sup>15</sup> Viti vaisihua tiqatama, Nraakiara Kotiva ekyaa nraakye qora, uaquia hi kyaiqara vareqata qutu vihuave, kyuqe kyaiqa vareqata qutu vihuave, qaiqaa qati sivuma kyaananrove, qia quarara ntevata mwihua nraantantena mwi quarara qutaa quave ti varurave.

<sup>16</sup> Nte Kotira vuqaavata, nraakye qora suqaavata, hia api nrohiraitina ntapihi kyena nrohirerave timwa kyena, taqamwaqina vi varuvave. Nte nraakye qora suqaave, Kotira vuqaave, kyauruankyorave tina, taqamwaqina viqana ntapihi kyena nrohi varuvave.

<sup>17</sup> Nte Ierusaremisaina mpo nani mpo ihinramwuanra varina mwiaqataina kyai mwini uro ntena nramwunaahua Iutaa nraakye qora taqena, mwihuani munima vatera nyina, mwiaqataina Kotira qamwata mwataankye turave.

<sup>18-19</sup> Mwitaa timwa kyena nte uro ntena tiri mwaanra quavanto mwamwantave mwutukya hiqama kyaani okyarara riemwaqi viqana Kotira nraamwuqi variqana hia airi vaisi kyapata variqana hia nte mpo hiahua kyapata inronra hiraitina, hiqama kyaani okyarara nraahu riemwaqina vi varuqata Iutaa vaisinramwu Esiaanyaahua ni puaama kyaavo. Qio qua vahirera, mwi vaisinramwuhua i vuqaa nri nteta mate qua niqaa vatera tivarave.

<sup>20</sup> Mwihua hia tivera, mwaa vaisinramwuhua qioma tivarave. Nte tauraa kaanasori suqaa sivina variqana qora kyaiqa utu kyaarita taqera qioma tivarave.

<sup>21</sup> Nte mwi entara kaanasori suqaa sivina variqana mwaa quara nraahu qiavarave. Nraakiara Kotiva nraakye qora qutu vihua qaiqaa qati vara sivuma kyaananrove tuqata nkye mwia kyaarave niqaa qua vateta hiavo? tina qiavarave, tiro.

<sup>22</sup> Poruva mwitaa tuvaro Pirikisiva Jesusira nraaqiaranramwuvanto nrohu okyarara riero ntapihi kyovara tiro, tiqaro, Qio mate qioma riauqo. Ierusaremisairo vunyava Risiaasiva nai tuminraqena nte mwi quara mpoqiaavata riarerave, tiro.

<sup>23</sup> Mwitaa timwa kyero mwiva nronra vaisi mpo timwa mwinro tiqaro, Porura ntaqikyiqira quante. Hia mwia kepukyaqama kyera rupa taante. Mwiva varirata mwia totivanto qioma mwia kyaahaqa hiqata nrumu taqeverave, tiro.

### *Pirikisiva Porura nraanronra*

<sup>24</sup> Pirikisiva mwitaa timwa kyero mpo entanramwu variro mwiaqatairo nai nraata Nturusiraakyantiri Porura taqarerero nrunra. Nturusiraava Iutaa nraakyevanto varuvaro mwikyantiri nri ntero tiqaro, Porura nraanraivaro nrianrive, tuvaro Poruva nri ntero Jesusira qua okyara mwitanahua timwa nyuvaro Pirikisiva mwi quara rie varuvaro

<sup>25</sup> Poruva Jesusira qua timwaqiro viqaro mwiva ntapihi kye nrohi okyarara timwa nyinro, hia qamwanrama raraqa taani okyarara timwa nyinro, Kotiva ko qiani entarara timwa nyuvaro Pirikisiva mwi quara riovaro nraatuqa tovaro tiqaro, Qioma riauqo. Qio ena qoqaraanani quante. Nraakiara hia kyaiqa vahiani entara i nraanraanrinra qaiqaa nrinraqe i taqaankye, tiro.

<sup>26</sup> Pirikisiva mwitaa timwa kyero mwiva Poruva munima mpiraqena nte mwia titaariro nai mwaatani quarive, tiro. Nai nraatoqi mwitaama kyero riemwa tero mwiva mpo enta mpo enta Porura nraanrama kyero mwikyantiri qua ti varura.

<sup>27</sup> Mwitaamaqiro viro taara ihi nritarovaro mpo vaisivanto Posiasi Pesitasiva Pirikisira mwaata varero mwi kyaiqara vararero nri ntoraro Pirikisiva vurama. Pirikisiva Porura qamwanrama titataara vahuvaro mwiva Iutaavanto nianra kyuqe vaisive qiate tiro, Porura qati nraahu karavuqi kyovaro varura.

<sup>2</sup> Mwini uro ntovata Kotira nraamwuqaa ntaqikyuhuavata, nronra vaisivantovata, mwiva hunani uro nteta Poruraqaa qua vateqata kepukyaqama kyeta tiqata,

<sup>3</sup> Po, e qati tiri kyaahaqa hiqarama tirata Porura vita vareta Ierusaremini nrivaqeta ko qiare, tita. Mwihua Porura ru kyarerata aanrani mwaanra utu teta mwitaa tura.

<sup>4</sup> Mwihua mwitaa tuvaro Pesitaasiva mwihua timwa nyinro tiqaro, Poruva Sisariaani karavuqima variho. Nte pataqia vari kyena nrumu ntantena Sisariaani virerave.

<sup>5</sup> Nkyeta nronra vaisiara tivata mwihua nivata vihuama mwi vaisiraqaa mpo qua vahirera, uro ko qiate, tiro.

<sup>6</sup> Pesitaasiva mwitaa timwa kyero mwiva mwihuavata 8 entave 10 entave mwini vari kyero uro ntantero Sisariaani vuva mwia qanranraa mwiva ko ti varu nraamwunraqi uro variro tiqaro, Porura viteta nriate, tiro. Tuvata Porura vita vare uro ntovata

<sup>7</sup> Iutaa vaisinramwu Ierusaremisai tumuhua Porura vara ututuma teta airi qua Poruraqaa vateta. Mwihua Poruraqaa qua vata tovaro hia mwihua quara quataa quave tiva vhaura.

<sup>8</sup> Mwihua mwitaa tuvaro Poruva naiqaatai vaitutu hira qua tiro tiqaro, Nte hia uaquia hi kyaiqaravata utuvave. Nte hia Iutaa mwaanra qua nteqa kyaurave. Nte hia Kotira nraamwu uaqjama kyaurave. Nte hia Romeni vunyaanra Sisaara uaqjama mwataurave, tiro.

<sup>9</sup> Poruva mwitaa tuvaro Pesitaasiva Iutaa vaisinramwuvanto nianra kyuqe vaisive qiate tiro, Porura kyapara hiro tiqaro, E Ierusaremini virera hirera, e mwini viraqema nte mwini uro ntenama i qua avuqavu hiangye, tiro.

<sup>10</sup> Mwitaa tuvaro Poruva qaqao tiro, Nte mate sivina varu nraamwunra mwaa kamaninra ko nraamwuqima varuqo. Nte mwaaqi variarira ko qiatarave. E ntapihi kyaananrave. Hia nte Iutaa vaisi antua utu nyatauvave.

<sup>11</sup> Nte kamaninra qua nteqa kyaaritavauma ni qio ru kyevarave. Mwihua niqaa vate quava unra qua vahirera, hia e qio ni pita kyera mwihua nyinrata mwihua ni ru kyevarave. Nte nronra vunyaava vaisi Sisaava hinani quariro mwiva ni ko riaariverave, tiro.

<sup>12</sup> Mwitaa tuvaro Pesitaasiva nai kaanasori kyapata qua timwa kyero mwiaqatairo Porurara tiqaro, E tiqara, Qioma Sisaava ni qua riaarive, qiananrave. Qio ena mwini viraro mwiva i qua riaarive, tura.

### *Pesitaasiva Akiripaaravata Porurara timwa mwunra*

<sup>13</sup> Mpo entanramwu nritarovaro Pesitaasiva qaraakyaqama kyero nrumu varuvarora tiro, vunyaava Akiripaava nai nraata Mpenaisikyantiri Sisariaani Pesitaasira qua mwantarero tumu ntora.

<sup>14</sup> Mwitanahua tumu nteta mpo entanramwu mwini varuvaro Pesitaasiva vunyaanra Porurara qua timwa mwinro tiqaro, Tauraaqama kyero Pirikisiva variqaro mwiva vaisi mpo karavuqi kyaiva qati nraahu mwipi variho.

<sup>15</sup> Nte Ierusaremini uro varuqata Iutaa vaisi mwaanra kyaiqaqaa ntaqikyiahuvata, nronra vaisinramwuvata, mwi vaisiraqaa qua vateqata mwi vaisira ru kyaante, qiarave.

<sup>16</sup> Mwihua mwitaa qavana nte mwihuara tiqana, Oaqao, Tire Romenivanto mpo qara hunanrave. Tire vaisi mpoqaa qua vatehua nrumu varivaqema mwi vaisira qio ko qiananrave. Mwi vaisiraqaa qua vataivaro mwivavata nai vaitutu hiqaro qioma qua qiananrove tunanrave.

<sup>17</sup> Nte mwitaa tuqata mwihua mwaini nte hunani ko tirerata tumuavana nte hia qakyove tiraitina, nte hora mwi quara avuqavu hirerave timwa kyena mwia qanranraa nte ko tirera hina mwi vaisira viteta nriate tuqata viteta nriavana riauqata

<sup>18</sup> hiama mwihua sivita tiqata, Mwi vaisiva mwitaa mwitaama kyero tiri antua utu timwa tairave, qiaovo.

<sup>19</sup> Mwihua qumina nkyiari mwaanra qiara mwianra inronra hiqatama qumina mwi vaisiraqaa qua vataarave. Vaisi mpo Iesusiva qutu virara mwihua mwianra qutuma viho ti variavaro Poruva qaqao mwiva qatima variho tirave.

<sup>20</sup> Mwihua mwitaa qiavana nte variqana hia mwi quara okyara ntapihi kyena riauqo timwa kyena Porurara tiqana, E uro Ierusaremini variraqena nte mwini uro i qua okyara riaankye, tuqaro

<sup>21</sup> Poruva qaqao, Romeni vunyaava Sisaava ni qua riaananrove, tihana nte Porurara tiqana, Mwia karavuqi kyaivaqena nte mpo enta Sisaava hinani titaariro quarive turave, tiro.

<sup>22</sup> Pesitaasiva mwitaa tuvaro Akiripaava tiqaro, Nte ntenavanto mwi vaisira qua riarerave, tiro. Tuvaro Pesitaasiva tiqaro, Qioma, hora mwi vaisira qua rienanrave, tiro.

<sup>23</sup> Mwitaa tuvata mwia qanranraa Akiripaasikya Mpenaisikya nruvata nraakye goravanto mwitanahuara nronra vaisitanama nriavo timwa kyeta qamwataqita vuvata mwitanahua nriqata nronra vaisi Sisariaani varuhua kyapata vuhua uro qua rie varu nraamwunraqi vera ntovata Pesitaasiva tuvata Porura vita vareta nruvaro Pesitaasiva tiqaro,

<sup>24</sup> Vunyaa vaisi Akiripaa, evata mwaaqi varihuavata riaate. Mwaa vaisira taqaate. Ekyaa Iutaa mwihua mwaini variahuate, Ierusaremini variahuate, mwaa vaisiraqaa qua vateqata nte hunani mwi quara vareta nrianrave. Mwihua nronraqama kye qua aakyara nteta tiqata, Mwi vaisiva mpuahaama qati variqiro quankyorave, qiarave.

<sup>25</sup> Mwihua mwitaa qiavana nte ko tiqana taqauqaro mwi vaisiva hia uaqia hi kyaiqara utirara tina, mwia ru kyaari aanrava hia vahirave. Qio nai mwiva tiqaro, Sisaava ni qua riaarive, tirave. Mwitaa tihana nte mwia Sisaava hinani titaankye timwa kye kyauqaro varirave.

<sup>26</sup> Nte Porura qua qara ntumwa kyena Sisaara mwiankye tina taqauqaro mwi quava hia ntapihi viho. Nronra vaisi Akiripaa, mwianra rieqanama nte mwi vaisira vitaqina iara mwiva mwia qua riaarive tina, nte mwia i vuqaavata, ekyaa mwaaqi variahua suqaavata, vitaqina nruru kyauqo. Nkyevata mwi quara tivaqena nte Sisaarani mwi quara qara ntumwa taankye.

<sup>27</sup> Hia nte mwi vaisira qua ntapihi kyena mwiva mwitaa mwitaama uaqia hi kyaiqara utiho tiraitina, qati titaankye, hiama kyuqe hiananrove, tiro.

## 26

### *Poruva Akiripaasira vuqaa nai vaitutu hiqaro qua tura*

<sup>1</sup> Pesitaasiva mwitaa tuvaro Akiripaava Porurara tiqaro, Ena qua qioma tinanrave, tiro. Mwitaa tuvaro Poruva nai kyauqu tuaahera kyero nai vaitutu hiqaro qua mwataama kyeroma tiro.

<sup>2-3</sup> Nronra vaisi Akiripaa, Iutaa vaisinramwuvanto niqaa qua vataara nte mate ntena qua tirerave. E tiri Iutaa okyarave, tire inronra hi varuna quarave, ntapihi kyaananranra tina, nte i vuqaa variqana qianinranra qamwateqana varuqo. Mwitaa ihanama nte mwi quara i timwa mwiqina quarirama e hiama pupohairara qoririma kyera riaante tuqo.

<sup>4</sup> Nte haaru nraaqiarakyaa ntena mwaatani variqi vina, mwia nraakiara Ierusaremini uro ntapihikye variqi quavata ekyaa nraakye qora ni kyaiqa taqamwa kyorave.

<sup>5</sup> Parisi vaisinramwuvanto nraahu nronraqama kyeta tiri mwaanra qua riaahuave. Qio haaru nte teta mwaanra qua riarerana nte Parisi vaisinramwu ti varia okyarara riaavavave. Nte haaru mwitaama kyena riemwaqina quavata Iutaa vaisivanto ekyaa ni okyara taqorave. Mate mwihua nkyiarivanto ntapihi kyeta tivera, qioma mwihua i timwa mwivarave.

<sup>6-7</sup> Tire Iutaavanto varirerata 12 okyara varunanrave. Qio tire ekyaa Kotiva timwa to quara mesaiaavanto tumuani quara nraahu riemwaqita viqata entaqivata, iheravata, mwi quara vekya variqata Kotira nrutu tuaaheraqi vi varuro. Nronrao, ntevata mwi quara vekya varuqata mwia kyaara Iutaavanto qumina niqaa qua vataarave.

<sup>8</sup> Nkye nanraqamave Kotirara mwiva qutu vi vaisihua hia qio qati vara sivuma kyaananrove qiao?

<sup>9</sup> Nte vuniqama kyena Iesusirara uaquia hi vaisivave timwa kyena Nasaretinyaanra Iesusira nrutu uaqama kyarerana variavarave.

<sup>10</sup> Nte Ierusaremini mwitaamaqina vi variavata mwaanra tu vaisihua nronramwuvanto ni nronraqama kyovana nte Kotira nraaqiara airinti ntavaaqavuqina karavuqi uro kyena nte mpo uhua kyapata variqana kyauqu vera kyena tiqana, Qioma mwi nraakye qorahua rukyaate, qiaravarave.

<sup>11</sup> Nte mwi entara airi nani mwaanra nraamwu mpoqi mpoqi vera nteqana mwihua ntuququqina vina tiqana, Nkye Iesusira qua qaqlira kyaate, qiaravarave. Ni mpoqama kyero raraqa tovana nte Iesusira nraaqiara mponani varuhuavata ruankye tina uti variavarave.

*Poruva nai Iesusira nraaqiaraqama vurara tura*

(*Kyaiqa Varora 9:3-19, 22:6-16*)

<sup>12</sup> Qio Iesusira nraaqiara ruankye tina uti variavata mwaanra ti varu vaisihua nronramwuvanto ni nronraqama kyeta qaravata mpuvana varena Ntamaasikaasini-anra quavarave.

<sup>13</sup> Qio nronrao, e rie variante. Nte aanrani vi variavaro huarivanto qiaqaa vahuvana taqaavaro omwavanto nyaamwusairo nronraqama kyero iteqaro huarivanto itairavata nraatara kyero iteqaro nte hiavaravata, nivata vuhua hunanivata, itorave.

<sup>14</sup> Itovata tire ekyaa mwataqi tumu ntita variqata riaavararo quavanto tita Hivuru quaqtairo nianra mwataama tiro, Soruo, Soruo, nanraqamave ni uaqama matera hiaro? (Purimakauvanto hia ntapihi kyero viraitiro uro ntantero nrihanro nai qova kyaamwu viaruaara tutaiva mwia rirave.) E mwia votima kyera enavantoma ena ri variaro, tuvana nte tiqanama,

<sup>15</sup> Nronrao, e tavave? qiaravo nronravanto tiqaro, Nte Iesusivave. E uaqama mate variaravama varuqo.

<sup>16</sup> Qio e sivira mwaamwianra vira variante. E ni kyaiqa vaisi varianterama nte i vuqaa qovarama vuqo. E mate ni tagenanranrave, nraakiara nte mpo kyaiqara i timwa mwianinranrave, e mpohua timwa nyinanrave.

<sup>17</sup> Ni nramwunaahua Iutaave, nraahumwa mpo mwatanaahuave, i ntuqutu kyevo tina, nte i kyaahaqamaqi quarira e qati vinanrave. Nte i titamwa kyaarira e mpo mwatanaaa nraakye qora varinani vinanrave.

<sup>18</sup> E mpo mwatanaaa nraakye qora su ntapairi kyairata mwihua enta hiraqi kyaiqa varera qaqlira kyeta omwavanto itaaninrani nrumu kyuqe kyaiqa vareqata Saataaniva mwihuaqaa ntaqikyianinra qaqlira kyeta Kotirara tiriqaa ntaqikyianti qiate tina, nte i titauqo. E mwitaa hirata mwihua nianra riemwaqita vivaqena nte mwihua uaquia hi kyaiqara qaqlira kyaarita mwihuavata Kotira nraaqiara mpo ihua kyapata kuaaqi variate, turave. Iesusiva nianra mwitaa turave.

*Poruva nai kyaiqa varorara Akiripaara timwa mwunra*

<sup>19</sup> Nronra vaisi Akiripao, quavanto nianra mwitaa tuvana nte nyaamwuqitairo qovara hora mwia hia qaqlira kyaraitina, nte mwi quava tuntema kyena

<sup>20</sup> vuni Ntamaasikaasini nraante uro ntena mwini variqana mwi quara timwa nyina, mwiaqaataina Ierusaremini uro ntena mwi quara timwa nyina, mwiaqaataina Iutiaani uro variqana mpo mwatukya mpo mwatukya nrohiqana ekyaa timwa nyina, mwiaqaataina mpo mwatanaaa mpo mwatanaaa timwa nyiqina vurave. Nte mwihua

mwataamama timwa nyina, Nkye qora aanra qaqlira kyeta tuqasaa vita Kotira aanraqaa quate. Kotirara aakyara ntamwaqita viqata Kotira kyaiqa nraahu varaqita quate, ti varurave.

<sup>21</sup> Nte mwi quara nraahu tuqata mwia kyaara Iutaavanto nte Kotira nraamwuqi varuqata ni ntavaaqavu kyeta ni ru kyarerata uti variarave.

<sup>22</sup> Mwihua mwitaa hiavaro Kotiva ni kyaahaqamaqiro vihana nte mate nkyi suqaa sivina variqana mwi quara nronra vaisive, pata vaisive, timwa nyi varuqo. Hia nte mpo quavauma ti varuqo. Poropetivantovata, Mosesivavata, qua timwa tora kuaa qua mwiamma ntevata timwaqina vi varuqo.

<sup>23</sup> Mwihua mwitaa turave, Nraakiara mesaiaavanto nai mwamwantaqaa nriqa quani inraikyara varero uro qutu viro mwiva nraantema vuniqama kyero qati siviro variananrove. Iutaavantove, mpo mwatanaavantove, kyokiraqi varihua omwa itaaninra taqaate tiro, mwiva nraante qaiqaa siviro variananrove, turave tiro.

<sup>24</sup> Poruva mwitaa tuvaro Pesitaasiva Porurara aakyara ntamwa kyero tiqaro, Poruo, i vu nraatovanto apiqama viho. E mpo okyara mpo okyara sikuru tira nraatara kyaararo mwia kyaara i vu nraatoqitairo apiqama vihara e airi qua timwaqira quaro, tiro.

<sup>25</sup> Mwitaa tuvaro Poruva qaqao tiro, Nronra vaisi Pesitaasio, ni pu naatovanto apiqa hivenavauma nte mwi quara tuqo. Ni pu naatovanto qio vaihana qutaa quama nte tuqo.

<sup>26</sup> Nronra vaisi Akiripao, e mwi quara okyara ntapihianranra tina, nte hia aatu hiqanavauma mwi quara i timwa mwuqo. Iesusira nraaqiaravanto hia uqeta vita variqata mwi quara qiaovo. Mwihua nraakye qora suqaa variqata mwi quara qiavara e riaananrave.

<sup>27</sup> Nronra vaisi Akiripao, qutaaeve e poropeti vaisinramwu quara qutaa quave qiaro? Nte ntapihi kyauqara e mwihua quara qutaaem qiaro, tiro.

<sup>28</sup> Poruva mwitaa tuvaro Akiripaava Porurara tiqaro, E pata qua qiananra mwicqaraqaa nivanto Iesusira nraaqiaraqama quarive tirave qiaro? tiro.

<sup>29</sup> Tuvaro Poruva tiqaro, Nte qua pataqia qianinraqaave, airi enta qianinraqaave, nte evata, ekyaa mwaaqi variahuavata, ni votima kyeta variate tinama, nte Kotirara aakyara nte varuqo. Ni votima kyeta variate tura mwia hia nte mate ni rupa taantema kye variateravauma tuqo. Nte Iesusira nraaqiara varuntema kyeta nkyevata Iesusira nraaqiara variaterama tuqo, tiro.

<sup>30</sup> Poruva mwitaa tuvata nronra vaisi vunyaava mwivavata, kamaninra vaisinramwuvantovata, Mpenaisivavata, mwiaavata mwatakyaa vita varuhuavata, sivita

<sup>31</sup> mwaatani veva nteta mwihua nai timwa mwi nai timwa mwi hita tiqata, Hia mwaa vaisiva uaqia hi kyaiqara utira tire qumina mwia karavuqi kyetave, mwia ru kyetave, mwitaa hiarorave, tita.

<sup>32</sup> Mwitaa tuvaro Akiripaava Pesitaasirara tiqaro, Hia mwi vaisiva Sisaava ni ko riaarive titirio, qiomia mwianra qati quante qiaratirio, tura.

## 27

### *Poruva Rominianra sipiqi vura*

<sup>1</sup> Mwihua qua timwa kyeta tiriara Itarini quate tita, mwihua uro Poruravata karavu vaisi mponramwuvata sitaqita uro ntaqi varu vaisiva mpovanto mwihuaqaa ntaqikyiarive tita, mwia mwunra. Ntaqi varu vaisiva mwiva nai henahua 100 nramwuqaa ntaqikyi varuva mwia nrutu Iuriaasiva, mwiva Sisaarani variqata ntaqi varu vaisihuqaqaa ntaqikyi varuva varura.

<sup>2</sup> Mwi vaisiva karavu vaisinramwu sita varero mwivavata tirevata Ataramiti-aminyaahua sipiqi mwaanri nteta variavararo sipivanto Esiaani virero varuvata tire mwiqi variavararo tiri tivita varero viro. Tiri tivitero vuvaro vaisi mpovanto

Arisitaakasiva mwiva Masentoniavanto Tesaronaikaaqinaava, mwivavata tirivata vuvata tire quavanana.

<sup>3</sup> Mwia qanranraa Saitonini uro ntaavararo Iuriaasiva Porurara qamwatero mwianra tiqaro, Mwaini variqara qioma ena nramwunaahua uro taqairata mwihua i kyaahaqa hiqata mpo inraikyave, kyarave, i mwiate, tuvaro Poruva mwitaa hura.

<sup>4</sup> Mwitaa huvata qio mwiaqaataita tire Saitoni kyeta qaiqaa sipiqi vi variavararo sipivanto mwini virera huvaro toqavanto api ventaqiro vuvaro qaqlira kyero kyaarerera utaqaa vahu mwatara Saiparaasini hia toqavanto tusataama teta vuvata tire

<sup>5</sup> Sirisiaa kyaarerera vara mwini kyeta Pampiriaa kyaareravata vara mwini kyeta Risiaani vahu mwatukyara mpo Mairani uro nteta.

<sup>6</sup> Tire Mairani uro ntaavararo karavu vaisiqaa ntaqikyi varuva sipi mpo puaama kyero. Mwi sipiva Arekisantarianya sipivanto Romini quankye tu sipiva vahuvaro mwia puaama kyero mwiaqaatairo tiri tivitaqiro uro mwi sipiraqi kyero.

<sup>7</sup> Mwi sipiraqi kyovata tire mwipi viqata qakyo qaakyoma kyeta vi variavararo mpo entanramwu nritarovata tire mwukyaari tuqita viqata Naitaasi qaumato uro nteta. Mwini uro nteta ntapihi kye quananrave qiavararo toqavanto kepukyaqa huvatara tita, vintanteta Kiriti mwata pataqia nramanri utaqaa vahunani vintanteta mwi mwatara hini viti mwia nrutu Saamoni mwata vitive qiara vara mwini kyeta

<sup>8</sup> mwiaqaataita mwukyaari tuqita vita mwata vahuvata mwia tokyasataa vita uro Kyuqema-Vahisatave qiara mwatukyara mpo Resia qaumato uro variavanana.

<sup>9</sup> Tire airi enta mwini variqi quavararo Iutaavanto kyara aurama to entava nritarovaro toqavanto nronraqama kyero tu entava nrintovarora tiro, ekyaa sipivanto qaqlira kye varura. Vi entava nri ntovaro Poruva siviro mwihua timwa nyinro tiqaro,

<sup>10</sup> Nkye vaisi mwaanramwuhua mwaini riaate. Tire mwaaqitaita quararo toqa vaururuvanto sipi ntuvuraa kyairaro mwipi mpo inraikya mpo inraikya vataaravata, tiri hini hiarahuavata, taiqa kyaananrove, tiro.

<sup>11</sup> Poruva mwitaa tuvata sipi mwia qovavata mwia nriqi tuqiro nrohuuvavata mwitanahua tiqata, Qioma tire quananrave, tuvaro ntaqu vaisihuqaa ntaqikyuva mwitanahua qua nraahu riero hia Porura qua riaraitiro tiqaro, Qioma tire quananrave, tiro.

<sup>12</sup> Mwiva mwitaa tuvata hini vaisinramwuvantovata mwi quara nraahu mwitaama tita, Toqa nronra tirera, sipivanto hiama mwaasata qio vahiananrove. Nrivaqe viqata mwataara hiqa taqeta mwatukyara mpo Pinikisiani quare. Pinikisiani uro variararo vuhairaqla quare, tita. Pinikisiani nramanrivanto kyuqema kyero vahisata hia toqavanto tunanianra tita, mwihua mwitaa tura.

### *Toqa vativanto utuvaro kyaareravanto humwunra nte varura*

<sup>13</sup> Mwihua mwitaa tuvaro mpo enta toqa kyuqema kyero tuvata mwihua qio nrivaqe quare timwa kyeta ankaavanto sipi ntavaaqavu tora vara mwaanri sipiqa vateta Kiriti tokyasataa qakyoma kyeta vita.

<sup>14</sup> Mwisataa qakyoma kyeta quare tuvaro toqa nronravanto mwi mwataraqatairo nrinro

<sup>15</sup> sipi ventaqiro viro mwata vahunasairo api ventaqiro vuvata tire sipi tuqasaa kyeta ntapihi kye quare tita utuavararovata toqavanto kepukyaqama kyero sipi venta varero api viro.

<sup>16</sup> Toqavanto apiqama kyero ventaqiro vuvaro tiri tivita varero vuvata tire mwata pata mpoqia kyaarerera utaqaa vahu mwatara Kotani uro ntaavararo mwata mwiva antua kyovaro toqa hia tunani uro vahiro. Tire toqa hia tunani variqata tire mwukyaari tiqatama mpotu pata sipi mwiva ntanrau vare nrunra

<sup>17</sup> vara mwaanri sipiqa kyeta mwiaqaataita kyaanta vara kyeta nronra sipi mwia kepukyama kyeta rupa teta. Sipivanto api viqaro Apirikaani nramanri verato

vahira nruqasata quankyorave tita, mwihua seri ntaputaa kyeta uromwi rupa tovaro sipivanto nai qakyoma kyero viro.

<sup>18</sup> Mwitaa huvaro toqavanto qati nraahu nronraqama kyero tiqaro nramanri vente varuvaro mwia qanranraa sipivanto hupeta quankyorave tita, mwihua ontave mwitaa inraikya sipiqi vatora vara kyeta nramanriqi mwaamwi qaqlira kyeta, viqata taqovaro sipivanto hia nraahu qio vahuvata

<sup>19</sup> mwia qanranraa nkyiari kyauquqotaita sipiqaa ntaqikyu inraikyara vatora vara kyeta nramanriqi qaqlira vara mwaamwi kyora.

<sup>20</sup> Mwitaa huvata tire airi enta viqata hia huarivata qovoravata taqaraitita quavararo toqa vauruvanto nraahu nronraqama kyero ti varuvata tire tiqata, Qio tire hia qati variarahuave. Tire taiqaarahuave, tita.

<sup>21</sup> Tire airi enta mwitaamaqita vita hia kyaravata nranraitita variavararo Poruva vaisi mwihua utaqaa siviro variro tiqaro, Nkye mwaa vaisihuao, nkye ni qua rieta Kiritini variataarave. Nkye ni qua rieta mwini variatirio, hiama mpo inraikya uaqla hiraro nkye vataa inraikyava sipiqi qatima vahitirio.

<sup>22</sup> Qio nte nkyiara kepuqyaqama kyeta variatema tuqo. Hia tiriqitairo vaisi mpovanto raupiri hiananrove. Sipivanto nraahuma taiqa quananrove.

<sup>23</sup> Nte Kotiva nronravanto virini varira mwia nraaqiara variqana nte mwia nrutu tuaahere varuvama varuqo. Entaqi Kotiva nyaamwunyaa vaisi mpo titaiharo ni puqaa siviro variro

<sup>24</sup> mwataamama ni timwa mpiho, Poruo, hia aatu hiante. E nronra vaisi vunyaanra Sisaara vuqaa sivira varinanrave. Qio riaante. Kotiva iarave tiro mwiva i vatama kyeta sipiqi varihua kyaahaqa hirata nkye qioma varivarave, tiho. Kotiva mwitaama kyeroma ni timwa mpiho.

<sup>25</sup> Qio vaisi tuaavo, mwianra rieqatama hia aatu hiqata variate. Kotiva ni timwa mpihana nte nkyi timwa nyuntema kyero Kotiva quttaaqama kyeroma nkyi kyaahaqa hiananrove.

<sup>26</sup> Qio tire quararo sipivanto uro mwata pata mpoqiaqaa ntiro ntuvuraa quananrove, tiro.

<sup>27</sup> Poruva mwitaa tuvaro 14 enta nritarovaro toqavanto Metitarenia kyaareragaqaa tiri qati nraahu ventaqiro vuvata enta tavaara sipiqi kyaiqa vare varu vaisihuua tiqata, Mwata qaumatomia vahiananrove, tita.

<sup>28</sup> Mwitaa timwa kyeta mwihua nramanri mwatama kyeta taqarerata kyaanta vara kyeta ori vitiqaa sutu kyeta nramanriqi mwaamwi tuta kyovaro mwataqaa uto vahuvata taqovaro mwatavanto qaumato 40 mitaa vahuvata uromwi mpoqiaavata vita qaiqaa mwateqata taqovaro mwatavanto 30 mitaa qaumato vahura.

<sup>29</sup> Mwihua mwatama kyeta taqeta aatu hita tiqata, Tire mate mpoqiaavata quararo sipivanto origaave mwataqaave uro ntiro ntukuraa quankyorave, tita. Mwiaqaataita mwihua ankaa 4 nramwu sipi vitiqata nramanriqi mwaamwi kyeta tiqata, Qamwanrama kyera huari vara kyairaro itaarive, tita.

<sup>30</sup> Sipiqi kyaiqa vare varu vaisihuua tiqata, Nrivaqenramwu tirema kyeta, teta nraahu aatu quare, timwa kyeta mpotu mwipi vatora vara mwaamwi kyeta unra tita tiqata, Tire mpotu mwaaqi variqata sipi nriqini uro ankaa vatarerave, tita.

<sup>31</sup> Mwihua mwitaa tuvaro Poruva mwihua taqero nronra vaisi mpovata, ntaqi varu vaisihuavata, timwa nyinro tiqaro, Sipiqi kyaiqa vare varia vaisihuua hia mwaaqi ntaqikyiqata varivera, tire hia qio variananrave, tiro.

<sup>32</sup> Poruva mwitaa tuvata ntaqi varu vaisinramwuhua uro mpotu mwia rupa to kyaantara teqa kyovaro mpotuvanto nramanriqi tumu ntiro.

<sup>33</sup> Mwitaa huvaro qaatatarera huvaro Poruva mwihuara vuavi tiro tiqaro, Nkye kyara nraate. Nkye mwaaqi 14 entara variqi viqatama hia kyaravata nraavo.

<sup>34</sup> Mwianra rieqanama nte nkyiara kyara nraatema tuqo. Kyara nraivaro nkyi mwamwantavanto qio vahiarive. Hia nkyi qiata kyaahi mpoqiatavanto raupiri hiananrove. Nkye ekyaa mwihua qarahini uro qatima varivarare, tiro.

<sup>35</sup> Poruva mwitaa timwa kyero mpereti vara kyero mwihua suqaa variqaro Kotirara kyuqeve timwa kyero kyara nrenro.

<sup>36</sup> Poruva mwitaa huvata mwihua taqovaro mwihua mwutukyaqitairovata kyuqe huvata mwihuavata kyara vara kyeta nronra.

<sup>37</sup> Tire sipi mwipi varirerata 276 vaisi variavanana.

<sup>38</sup> Qio tire kyara qio nreta mwiaqataita sipi muaanra ntaankyo tita ekyaa kyara qati vhaura mwia qaqlira nramanriqi vara tuto kyaavanana.

### *Sipivanto ntuvuraa vura*

<sup>39</sup> Qaatata uvata sipi kyaiqa vare varu vaisihua vutuni vutu mpo mwata taqeta mwi mwataro hia taqaunanrave tita. Mwihua taqovaro nruqa kyuqe huva tokyasataa vahuvata mwini sipi uro vataare tita,

<sup>40</sup> mwiaqataita ankaa kyaanta teqa kyeta ankaa mwinramwunra nramanriqi kyeta nriqi ti varu kyatarira mwia tuto kyaantaravata teqa kyeta togavanto ventaqiro quarive tita seri mpo vara kyeta rupa teta nruqasata quare tita

<sup>41</sup> quavararo sipivanto vuva uro nruqave orive mwemwani vahuraqa taaqau viro. Sipi nriqvianto kepukyaqama kyero taaqau vuvoro mwia viti nramanrivanto kepukyaqama kyero nteqaro mwia ntuvuraa vurama kyora.

<sup>42</sup> Mwitaa huvata ntaqi varu vaisihua tiqata, Karavu vaisi hinivanto nako ruqita vita tokyani uro nteta ntucema kyeta vivorave. Nrivaqe tire karavu vaisi mwihua ekyaa ru taiqa kyaare, tura.

<sup>43</sup> Tuvaro mwihuaqaa ntaqikyi varuva Porurara rieqaro Poruravata ru kyevorave tiro, hia karavu vaisi mwihua ru kyaate tiro. Timwa kyero mwihua tigaro, Nako riqata taqehua mwihua nraantema qio nramanriqi kyavuhu vita nako ruqita qatinani uro ntaate.

<sup>44</sup> Hia nako riqata taqehua mwihua nkye uro kyatarive, sipi qinaa inraikyavanto nteqaaninrave, mwia tu varetama nramanri turusata vita vutura tokyani uro ntaate, tiro. Mwihua nronra vaisivanto mwitaa tuvata mwihua tokyani ekyaa uro ntoraro Poruva vaakya qua timwa nyuva qutaa mwivau vahura.

## 28

### *Poruva kyaarerera utaqaa vahu mwataro Morotaaga varura*

<sup>1</sup> Tire hia vaisi mpovata nrita raupirima kyaraitita, tire ekyaa kyugema kyeta nramanri tokyani nri nteta. Tire mwini nrumu variavararo mpovanto tiri timwa timwinro tiqaro, Mwaa mwataro Morotaave, tura.

<sup>2</sup> Qio tire mwini nri ntaavarata mwi mwatanaahua tiri tivitaqita kyugema kyeta tiriqaa ntaqikyura. Vati ntuvoro antovata mwi mwatanaahua qia quara teta tiri tivitaqita qia quara tonani uro kyeta.

<sup>3</sup> Mwitaa huvaro Poruvavata qia vaqitaqiro uro quaraankye tiro utuvaro qia nronraqama kyero iteqaro tutoqa huvarora tiro, quaihavanto qiaqi varuraqitairo vutu ntero Porura kyauquqaa nrutero varura.

<sup>4</sup> Mwi mwatanaahua taqovaro quaiha mwiva Porura kyauquqaa nrutero varuvata mwihua tiqata, Qikye, mwi vaisiva vaisi ru kye vari vaisivama variananrove. Mwiva kyaarerera nronraqi hia qutu viraitiro, nri ntaiharoma tiri mwanriqavanto mwi vaisiva vaisi ru kyaiva naivata qutu quarive tiroma quaiha vara kyaiharo uro mwiaqaa nrutaiho, tita.

<sup>5</sup> Mwihua nkyiari riemwa kyeta mwitaa tuvaro Poruva nai kyauqu ntukikinraaqata kyovaro quaihavanto hia Porura uaqlama mwataraitiro, qiaqi tumu ntuvata

<sup>6</sup> mwi mwatanaahua Porurara tiqata, Mwia kyaqukyota viraro qutuma quanarrove. Kyai variqa taqaare, tita. Mwitaa timwa kyeta variqi viqata taqovaro hia Porura mwamwantavanto mpo qara huvaro Poruva qati varuvata mwihua mpo qua tita tiqata, Qaqao mwi vaisiva mwanriqa mpovantoma variho, tura.

<sup>7</sup> Tire mwini variavararo vaisi mpovanto Papiriaasiva mwata mpo qaumato vahu mwatara qova varura. Mwi vaisiva nronra vaisi variqaro mwi mwataraqaa ntaqikyi varuvvara tiro, tiri tivitaqiro uro nai nraamwuqi kyero tiriqaa kyugema kyero ntaqikyiqiro vuvaro taarampo enta nritarora.

<sup>8</sup> Variavararo Papiriaasira mwia qora nriqa vuvaro taintaqaa variro. Mwia mwamwanta qiara utovaro kanunu utiqaro varuvaro Poruva mwiva varuraqi vera ntero Kotirara aakyara nteqaro mwi vaisira kyaahaqa hiante tiqaro nai kyauqu mwiaqaa vatero mwia kyugema kyovaro mwia mwamwantavanto kyugema vura.

<sup>9</sup> Poruva mwitaa huvata mwia taqeta mwi mwataraqaa varu vaisihua nriqa vuhua ekyaa Poruva hunani nruvaro Poruva mwihua kyugema nyatora.

<sup>10</sup> Qio Poruva mwitaa huvata tire virera hiavarata mwi mwatanaahua qamwateqata airi inraikya timwita sipiqi viqata nraananravata timwuvata vareta sipi mpoqi mwaanri nteta quavanana.

### *Poruva Romini uro ntora*

<sup>11</sup> Tire mwi mwataraqaa variqi vita taarampo tora vara kyeta mwiaqataita tire mpo sipiqi mwaanri nteta vita. Mwi sипива Arekisantariaanyaahua sipi mwia nrutu *Mwanriqa Vaisi Kaapitanave* tura. Toqa nronravanto tuvaro mwi sипива mwi mwataraqaa variqaro vuhaani entara quangye tiro varuvata qio tire mwipi mwaanri nteta quavarahua

<sup>12</sup> mwatukya mpo Sairakaasini uro nteta mwini taarampo enta varita.

<sup>13</sup> Mwiaqataita qaiqaa sipiqi mwaanri nteta vintante nri ntantemaqita vita Rekiuminu uro nteta. Mwia qanranraa taqaavararo toqa kyugema kyero tuvata tire sipiqi taara enta vita mwatukya mpo Piuteorini uro nteta.

<sup>14</sup> Mwini uro nteta taqaavarata Iesusirara qutaave tuhua mwi mwatukyaraqi varuhua tiriara kuaa uiki vari kyeta quate tuvata tire mwini vari kyeta qio mwataqaa nraahu vita Romini uro nteta.

<sup>15</sup> Tire Romini uro ntaavarata tiri tiqata vakyaas Iesusira nraaqiaranramwuvanto tire uro ntaavana quara rieta mwihua tiri nrumeru huntu kyaare *tita Apiasi maaketivavata, Taarampo Nraamwu Vaito nraamwuvavata*, vahunani nri nteta tiriara puua hita. Mwihua nruvaro Poruva mwihua taqero Kotirara kyugema hiaro timwa kyero mwiva qamwateqaro varura.

### *Poruva Romini uro ntero mwini varura*

<sup>16</sup> Qio tire Romini uro ntaavararo kamaniva Porura hia mwia kepukyaqama kyero ruparaitiro, mwitaama tiro: E mpo nraamwuqi enanraa variraro ntaqi vaisiva mpovanto iqaa ntaqikyiarive, tiro tura.

<sup>17</sup> Poruva taarampo enta vari kyero mwiaqatairo mwiva Iutaa vaisi nronranramwu nyaanrovata mwihua Poruva hunani nruvaro mwiva mwihua timwa nyinro tiqaro, Ni kata pakyaa tuaavo, nkye riaate. Hia nte ntena nramwunaahua uaqiamma nyatauqo. Hia nte tiri haivaqahua tiri timwa timwito quara okyara nteqa kyauqo. Hia nte mwitaa hiraitina, Ierusaremini varuqata qumina ni karavuqama kyeta Romeni vaisi kyauquqi ni kyaavo.

<sup>18</sup> Ni nrumeru kyaavata Romeni vaisi mwihua ni kyaparamaqi viqata riaavarohia nte uaqia hi kyaiqara utu quava vaihatara tita, mwihua tiqata, uaqia hiani kyaiqara utuaninravauma mwia ru kyaananrave. Tire riauraro hia mwiva uaqia hi kyaiqara uti quara tiri timwa timwihi, tita. Romeni vaisi mwihua mwitaa timwa kyeta ni qati huvantu kyarerera uti variavata

<sup>19</sup> Iutaavanto qaqao hia mwia huvantu kyaate tuvana nte tiqana, Sisaava ni qua ntapihi kyero riariive, qiavarave. Hia nte ntena nramwunaahuaqaa qua vatarerana nte Sisaarara turave.

<sup>20</sup> Nte mwi quaqiara riemwa tenama mwiqiara nkyi timwa nyinrenrana nkyi nyaanrauqo. Tire Isarerri nraaqiara variqatama Kotira kepukyu vaisi vekyama varuro. Qio mate mwi vaisira kyaara seniqotaita ni rupa taavo, tiro.

<sup>21</sup> Poruva mwitaa tuvata Iutaa vaisi mwini ntuvaantuama vuhua tiqata, Hia tire Iutiasaita iara mpo qua qiava nrihata riauro. Hia tiri qata vakyaa mpovanto nrintero iara uaquia hi quara tihata riauro. Tire qumimaqama varuro.

<sup>22</sup> Tire mwaa quara nraahu riaunanrave. Iutaa vaisi mpo nani mpo nani variahua tiqata, Iesusira nraaqiaranramwu hia kyuqe hia vaisihua variarave, tita qiarave. E tiqarama nte Iesusira nraaqiarave qiananrave. Tire ina nroqitaita qua tinanra riarerave, tita.

<sup>23</sup> Mwitaa timwa kyeta mwihua tiqata, Kyaiqe mwi entara i qua riaare, tita. Timwa kyeta mwi entara timwa toraqaa Iutaa airivanto Porura qua riarerata Porura nraamwuqi nri nteta varuvaro Poruva toqaqi qua toharama kyero timwa nyiqiro vi varuvaro huarivanto vi kyovaro enta huvaro Poruva mwi quara nraahu timwaqiro viro. Kotiva mwihuaqaa ntaqikyiani quara mwihua timwa nyinro. Mwiva tiqaro, Mosesivave, poropeti vaisinramwuvantove, Iesusira okyarara mwi quara mwi quara timwa torave. Nkye mwi quara rieqatama Iesusira okyarara qati nraahu riemwa taataarave. Nkye mwi quarara quitaave qiate, tiro.

<sup>24</sup> Poruva mwitaa tuvata hini uhua quitaama qiaro tuvata hini uhua hia mwia quara quitaave tura.

<sup>25</sup> Mwihua mpo qua mpo qua timwa kyeqata qaqlira kyeta nkyiari mwaatani nkyiari mwaatani vura.  
Mwihua virera huvaro Poruva timwa nyinro tiqaro, Haaru

Kotira mwanraquravanto nkyi haivaqara poropeti vaisi mpo  
Aisaiaara kyaahaqa huvaro

<sup>26</sup> mwiva mwataama kyero nkyi  
okyarara ntapihi kye timwa torave:

Mwaa mwatanaahua qua mwataama kyera  
uro timwa nyiante, turave.

Nkye mwaa quara riemwaqita viqatavata  
hia ntapihi kyeta rievarave.

Nkye taqamwaqi viqatavata hia ntapihi kyeta taqevavarave.

<sup>27</sup> Mwaa mwatanaahua su nyaato tita vihata  
hia ni qua riaataa ihata variarave.

Mwihua ni qua riaaro tita, nkyiari nyaato tita taarave.

Mwihua ni okyara taqaaro tita, nkyiari su qipa taarave.

Mwihua su nyaatovanto ntapihirata ni qua kyuqema  
kyeta rieqata nianra aakyara ntaivaqena nte Kotiva  
mwihua kyaahaqa hiqana kyuqema nyaataankyo tita  
mwihua mwitaa hiarave, turave.

(Aisaiaa 6:9-10)

Aisaiaava Kotira qua mwitaa turave, tiro.

<sup>28</sup> Poruva mwitaa timwa kyero mwiva Iutaa vaisinramwu timwa nyinro tiqaro, (Kotiva nraakye qora sitaani quara nkyi timwa nyuqata nkye riaataara vaihata nkye hia riaavo). Qio riaate. Kotiva tiqaro, Mwi quara mpo mwatanaahuavata timwa nyinrata mwihua mwi quara qio rievarave turave, tiro.

<sup>29</sup> [Poruva mwitaa tuvata Iutaa vaisinramwu mwi quara kyaara nkyiari qaakyauma inronaanronrama vareta vura.]

<sup>30</sup> Poruva taara ihiara nanrianraa mwi nraamwunraqi variqaro nraamwu qora kyoqaa mwiqanro mwiqi variqaro mwiva ekyaa vaisi mwia taqarerata nruhuara qamwatora.

<sup>31</sup> Mwiqi variqaro mwiva Kotiva nraakye qoraqaa ntaqikyiani quara timwa nyinro. Poruva hia aatu hiraitiro, timwa nyiqiro vi varuvaro hia vaisi mpovantovata mwia antuovaro Poruva nronra vaisi Iesusi Karaisira qua mwihua timwa nyiqiro vurama.

## ROMENI

### Poruva Romeni mwatanaahuani qara ntumwa tora

Iesusira sivuma kyovaro nyaamwuni uro varuvaro 25 ihive 30 ihive nritarovaro Poruva mwaa quara qara ntumwa tora. Mwiva Romenivanto Romini varuhua uro taqarera hiro mwaa qarara nraante vara kyovaro vura. Romeni mponramwuvanto Iesusira nraaqiaraqama vuhua ntapihi kye Kotiva mwihua huvantu kyero sitaani okyarara riaate tiro, Poruva mwaa quara qara ntumwa tora.

**1** Nte Poruva Iesusi Karaisira kyaiqa vaisi variqanama mwaa quara nkyini qara ntumwa nyate. Kotiva ni nai kyaama tero ni naanrama kyero Karaisira mwakyaakya kyuqe mwakyaakya nraakye qora timwa nyiqira quante tiro, ni nronraqama kyaira.

**2** Haaru Kotiva nai kyauqu nriqiqaa vatero qutaa nte mwataama kyena nraakye qora kyaahaqa hirerave tuvata poropetinramwuvanto Kotira qua qovarama kye varuhua mwi quara kyuqe qua Kotira mpukuqi qara ntumwa torave.

**3** Kotiva nraakye qora kyaahaqa hiani mwakyaakyara tiqaro nai mwaaquara turama. Mwia mwaaqu mwia mwatanyaa okyaravanto vahirero mwiva vaisiqama viro nronra vaisi Ntevitira okyara kuaa okyaravanto varura.

**4** Mwia mwaaqu mwia nyaamwunya okyaravanto vahirero mwiva Kotira mwaaquvanto varura. Mwi okyarara Kotiva tiri ntapihi kyero tinraamwutarero Kotiva nai kepuuyaquo Iesusira qutu vuraqitairo qati vara sivuma kyorara tita, tire taqauraro mwiva qutaaqama kye Kotira mwaaquvanto tiri nronravanto Iesusi Karaisiva varira.

**5** Karaisiva ni kyuqema matero ni nronraqama kyaihana nte mwia nrutuara rieqanama nte ekyaa mpo mwatanaa mpo mwatanaahua timwa nyianrita mwihua Karaisira quara qutaave timwa kye riemwaqi viqata nrohiata.

**6** Nkyevata Iesusi Karaisira nraaqiara nraahu variate tiro, Kotiva nkyivata nyaanrama taira.

**7** Mwianra rieqanama nte nkye Romini variahuani mwaa quara qara ntumwa nyate. Kotira mwutukyavanto nkyiara vaiharo nkyiara ni nraakye qora variate tiro, nkyi nyaanrama taira.

Kotiva tiri tiqovavata, tiri vunyaa vaisivanto Iesusi Karaisivavata, nkyi kyuqema nyatairata nkyi mwutukyaitairo qihaakya hi varirata variata.

#### *Poruva Kotirara qamwata mwateqaro kyuqeve tu quara*

**8** Iesusi Karaisiva ni kyaahaqa hi varihana nte vuni nkyiara mwataama tina. Ekyaa mpo mwatanaa mpo mwatanaavanto nkyiara mwihua kyuqema kyeta Karaisira qua riemwaqi viqata nrohi variavo qiavanana tina, nte mwianra rieqanama Kotirara kyuqeve ti varura.

**9** Nte kyuqe mwakyaakya Kotira mwaaquara nraakye qora timwa nyiqi vi varuqaroma ni mwanraquravantovata mwi kyaiqara varaataa hi varihana vare varura. Nte Kotira kyaiqa vare variariro Kotiva naima ni quara qutaa qua vaiho qiananro. Nte qutaaqama kye nkyiara rieqana airi enta Kotirara aakyara nte varura.

**10** Nte Kotirara aakyara nteqana mwitaama tina: E qiove tirera, nini aanra utu tairae nte mpo enta Romini uro nkyi taqaankye, tura.

**11** Nte Kotira okyara mpo nkyi timwa nyianrita nkye kepuuyaqama kyeta Kotira aanraqaa quate tina, nte mpoqama kyenama uro nkyi taqaankye tina, ua hi varina.

**12** Nte uro nkyi taqaariro nkye Iesusirara kepuuyaqama kye riemwaqi quava ni kyaahaqa hiraro nte Iesusirara kepuuyaqama kye riemwaqi vuva nkyi kyaahaqa hiananro.

<sup>13</sup> Ni kata pakyaa tuaavo, nte mwini quani okyarara nkye hia ntapihivorave. Nte airi enta nkyi uro taqarerera huqaro mpo inraikyavanto ni antua kyaihana nte hia uro nkyi taqaurave. Nte mpo mwatanaa mpo mwatanaahua Kotira aanra nyaamwu tauntema kyena nte nkyi kyapata uro variqana nkyivata timwa nyianrita nkye Kotira aanraqaa quate tina, nkyi taqarerera uti varina.

<sup>14</sup> Kotiva ni titaihananra tina, nte mwatukya nronraqinaahuavata, mwatukya pataqinaahuavata, ekyaa okyara taquaahuavata, hia taquaahuavata, ekyaa mwihua nte Karaisira qua timwa nyianrivama varuqo.

<sup>15</sup> Mwitaama kyena nte qamwateqana mwi quara nkyi timwa nyiataa ihana nkyi Romiqi variahuanavata Karaisira kyuqe qua uro timwa nyinrenrave.

### *Karaisira qua kepuuya quama vaiho tura*

<sup>16</sup> Karaisira qua kyuqe mwakyaakya vaiharo Kotira kepukyavanto mwipi vaihananra tina, nte mwi quarara hiama kyauringa. Nraakye qoravanto mwi quarara qutaa quave tivarо mwi kepukyava qiomа mwihua huvantu nyataananro. Tire mwi quara Iutaa nraante timwa nyitama, nraakiara mpo mwatanaahuavata timwa nyipi virerave.

<sup>17</sup> Karaisira qua kyuqe mwakyaakya, mwi quava Kotiva tiri avuqavuma timwataani okyarara tiri timwa timwinro tiqaro, Tire Karaisirara qutaave timwa kyeta kepukyaqama kyeta riemwaqi quananra, Kotiva mwianra nraahu rieqaroma tiriara mwihua avuqavuma kye nrohi variahuate qiananro. Kotira mpukuqi qara ntumwa tova tiqaro,

Kotirara kepukyaqama kyeta riemwaqi quahua variavaro

Kotiva mwihuara avuqavuma kye

nrohi variahuate ti nraakye qorahua,

mwihuama qati variqi vivarave, tura.

(Habakuk 2:4)

### *Ekyaa mwaa mwatanaahua Kotira mwoqa mwianranra tura*

<sup>18</sup> Kotiva nyaamwusairo mwaa quara qovarama kyero: Mwatani variahua Kotira mwoqa mwipata uaqia hi kyaiqara utiqata qutaa qua riaa aanranra huvai haavai hi variarara tiro, mwia kyaara Kotira raraqa taiharo mwihuaqaa qua vatarero uti variro.

<sup>19</sup> Kotiva hia nai okyara tuqeta kyaraitiro, mwiva nai okyara qoqaa qovarama kyaihata mwatani variahua qio mwia taqaara. Kotiva naivanto mwihua nyaamwu taira.

<sup>20</sup> Tauraaqama kyero Kotiva mwaa mwatara utu kyovata mwi entaraqaataita nraakye qora Kotiva ututo inraikyara qio taqamwaqi vi variara. Ekyaa mwi inraikyara taqeqlata nraakye qoravanto mwia okyara mpo, hia qio taqe okyarara, Kotiva mwanriqavanto ekyaa enta ekyaa enta peqaqa hi vari okyarara, mwianravata qio ntapihiara. Mwitaama qio ntapihiqara tita, mwihua hia ntapihunananrave tiqata nkyiari vaitutu hira qua tiva hiama vahiro.

<sup>21</sup> Mwatani variahua Kotira okyara ntapihita, mwia qamwata mwateta mwianra mwanriqave qjataara vahata mwia qaqla kyeta qumina inraikyara nraahu vu nraatoqi vahata riemwaqi quavaro mwihua su nyaato qumimaqa ihata upi hiraqi variqi vi variara.

<sup>22</sup> Mwihua Kotira qaqla kyeta tiqata, Tire qiomа mpo okyara mpo okyara ntapihi paahi huro, qjavarovata mwihua su nyaatovanto apiqa ihata variarave.

<sup>23</sup> Mwihua mwanriqa Kotiva ekyaa enta qati variqiro vira, mwia nrutu nraahu tuaaheraataara vahata mwihua mwia mwoqa mwita vaisivanto qutuaninranra rieqata mwia mwanraqurave, aasau mwanraqurave, nyaamwa mwanraqurave, qarura mwanraqurave, mwi inraikyara nraahu utu kyeta vateta mwia nrutu nraahu tuaahere variara.

<sup>24</sup> Mwatani variahua mwitaa hiavaro Kotiva mwia kyaara mwihua qaqira kyero tiqaro, Qio nkyeta mwitaa hiate. Nkyeta varaataa hi kyaiqara uaqia hi kyaiqara mwia nraahu utuqi quate, tihata mwihua nkyiari henahuavata api nrohiqata nkyiari mwamwanta uaqiamma kyaara.

<sup>25</sup> Mwihua Kotira qutaa qua qaqlira kyeta uro unra quara qutaa quave ti variara. Mwihua Kotiva utu tai inraikyara nyutu nraahu tuaahereqata mwi inraikyarara nraahu kyaiqa vara nyateqata Kotiva ekyaa mwi inraikyara utu taira nai mwia qaqlira kyaavo.

Qio Kotiva mwiva nraahu ekyaa inraikyara ututaiva varihatara tita, tire mwia nrutu nraahu ekyaa enta tuaaheraqita quare. Qutaave.

<sup>26</sup> Mwihua Kotira qaqlira kyaavarora tiro, Kotiva mwihua nkyiarivata qaqlira kyaihata mwihua nkyiari varaataa hi kyaiqara vareqata kyaurira inraikya uti variara. Nraakyevanto qoraisi qaqlira kyeta nkyiari hena nraakyevata api nrohi variavata

<sup>27</sup> vaisivantovata nraakyne qaqlira kyeta nkyiari hena vaisivata nrohiataa ihata nkyiari hena vaisivata api nrohi variara. Mwitaamaqi viqata vaisivanto nai uaqiamma mwate nai uaqiamma mwateta kyaurira kyaiqa nraahu utuqita vi variavaro mwia kyaara Kotiva mwihua ntutuqti variqaro huviqarave ti variro.

<sup>28</sup> Mwatani variahua tiqata, Hia tire Kotirara riarerave, qiavaro Kotiva mwia kyaara mwihua qaqlira kyaihata mwihua uaqia hi kyaiqara utirara nraahu riemwaqi viqata mwihua mwi kyaiqara nraahu utuqi vi variara. Mwihua mwi kyaiqara hia varaataara vahata mwihua mwi kyaiqara vare variara.

<sup>29</sup> Qora kyaiqa mpo kyaiqa mpo kyaiqvanto mwatani variahua su nyaato mwutukyaqi piqaro vahata mwihua variqi vi variara. Mwihua mpovanto vatai inraikyarara vairiqa hiqata variara. Mwihua mpo inraikya taqeta ninivata mwitaama vahitaarave, nivata mpiataarave, ni nutuvata vahitaarave, qiavaro mwihua mwutukyavanto uaqia hirave. Mwihua nai rukye nai rukye hi variara. Mwihua ntaqi variara. Mwihua unra qua timwaqi vi variara. Mwihua mpohuara mometa tita tahiananra nraahu ti variara. Mwihua mpohuara mwoqanyaa qua ti variara.

<sup>30</sup> Mwihua mpohua nyutu uaqiamma kyarerata mwihuaqaa ntumwa kye unra qua ti variara. Mwihua Kotira nramwutaaqa hi variara. Mwihua inronra quaqitai mpohua mauqa ntamwa nyate variara. Mwihua nkyiari nyutu nraahu tuaahere variara. Mwihua tiqata, Nrivaqenramwu uaqia hi kyaiqara mpo qaraakyaqama kye puaama kye varaare ti variara. Mwihua nkyiari nyohua sohua qua raaqute variara.

<sup>31</sup> Hia mwihua su nyaato vahata variara. Mwihua kyauqu nriqiqaa vataa quara nteqa kye variara. Mwihua hia mpohuara mwutukya vahata variara. Hia mwihua mpohuara po kye timwa nyate variara.

<sup>32</sup> Kotiva qua vatero tiqaro, Mwi kyaiqara varehua qutuma vivarave, tura mwihua riemwa ntapihi kyetavata mwihua hia mwi quarara nronraqama kye riaraitita, mwihua uaqia hi kyaiqara nraahu varaqi viqata nkyiari henahua uaqia hi kyaiqara uti variahuaravata tiqata, Nkyevata kyuqe nraahuma hi variavo, ti variara.

## 2

### *Kotiva Iuttaaqaaqata qua vataaananrove tura*

<sup>1</sup> E vaisi mpovanto ena henanra kyaiqa taqera uaqia hi kyaiqara uti variaro timwa kyera mwiaqaa qua vatenanra nte inanravata tirerama. E hiama qio ena vaitutu hiqara mpo qua tinanrave. Evata mwiva kyaiqa varaintema kyera qora kyaiqa uti variananranra tiro, iqaavata kuaa qarama kyeroma qua vahiro.

<sup>2</sup> Tire ntapihi kyauraro Kotiva mwitaama kye qora kyaiqa uti variahuaqaa ntapihi kyero qua vatero.

<sup>3</sup> E ena henanranra mwiva uaqia hi kyaiqara uti varivave tiqarama evata mwia votima kyera uaqia hi kyaiqara utira. E mwitaa hiqara haunri Kotiva hia niqaa qua vataananrove tirava.

<sup>4</sup> E uaqia hi kyaiqara uti variararo Kotiva hia vaakya iqaa qua vataraitiro, mwiva iara po kye timwa mwate varira mwianra e hiave nronraqama kyera riaaro? E hiave ntapihi riaaro? Iara uaqia hi kyaiqara qaqlira kyero kyuqe aanraqaa quarive tiro, Kotiva iara po kye timwa mwate varira.

<sup>5</sup> Kotiva mwitaa ti variharo i vu nraato uaqia hi vu nraatova vaiharara tirama, e hia uaqia hi kyaiqara qaqlira kyaaro. Mate e uaqia hi kyaiqara utiqarama enavanto enaqa qua mpoqiaavata vate variaro. E mwitaa hiraro nraakiara ekyaara entaqaa Kotira raraqa tairaro qua avuqavu hiani entaraqaa iqaa qua nronrama vahiananro.

<sup>6</sup> Mwi entaraqaa Kotiva nraakye qoravanto kyaiqa varera nkyiari kyaiqa mwiaqaa tukyama kyeroma mwihua kyoqaa nyiananrove.

<sup>7</sup> Mpo hiahua kyuqe kyaiqa nraahu varaqi vita tiqata, Kotivama tiri nronraqama kyero tiri nrutu tuaahera kyero tiri kyaahaqa hirage qati variqi quananrave, tihua varivaro Kotiva mwihua qamwata nyatairata mwihua ekyaa enta ekyaa enta qati variqita vivara.

<sup>8</sup> Mpo hiahua nkyiariara nraahu rieqata Kotira qutaa qua qoririma mwateta hia mwia qua riaraitita, uaiqia hi aanranraqaa nraahu quahua varivaro mwia kyaara Kotira raraqa tairaro mwihuaqaa qua nronrama vataananro.

<sup>9</sup> Ekyaa uaqia hi kyaiqara uti varihua nriqa vira inraikyavata muaanravatama varevara. Iutaavanto nraante varaivata mwihua nraakiarama ekyaa mpo mwatanaavantovata varevara.

<sup>10</sup> Ekyaa kyuqe kyaiqa vare varihua varivaro Kotiva mwihua nronraqama kyero mwihua nyutu tuaahera kyero mwihua mwutukya qihaakyama nyatairata varivara. Kotiva Iutaa nraante mwitaama kyero kyuqema nyatero nraakiara ekyaa mpo mwatanaavata kyuqema nyataananro.

<sup>11</sup> Kotiva ko tiqaro ekyaa nraakye qora qua kuua qarama kyeroma tukya hiananro.

<sup>12</sup> Mpo mwatanaahua Kotiva Mosesirara timwa to quara hia riehua, mwihuavata nkyiari uaqia hi kyaiqara utira kyaara raupiri hivarovata hiama mwi quava mwihua tukya hiananro. Iutaavanto Kotiva Mosesirara timwa to quara rieta mwi quara nteqa kyera kyaara mwi quava mwihuaqaa qua vataananro.

<sup>13</sup> Kotiva Mosesirara timwa to quava vaharo vaisivanto mwi quara qumina riero kyairaro Kotiva mwi vaisirara hia avuqavu nrohi vari vaisivave qiananro. Vaisi mpovanto mwi quara rieqaro hia mwi quara nteqa kyaraitiro nrohi vari vaisirara, Kotiva avuqavu nrohi vaisivave qiananro.

<sup>14</sup> Kotiva Mosesirara timwa mwu quara hia mpo mwatanaahua timwa nyiavata mwihua variara. Mwitaa hiavata mpo mwatanaahua mwiaqataita nkyiari riemwa kyeta tiqata, Nrivaqenramwu kyuqe aanraqaa nraahu quare, tivera, mwihua Kotira qua rieqata nrohiantema kyetama nrohi varivara.

<sup>15</sup> Mwihua mwitaamaqi vi varivaro Kotira quavanto mwihua mwutukyaqvata vu nraatoqvata qara ntumwa taantema kyero vahiananro. Mpo mwatanaahua mpo enta kyue kyaiqa vare variavaro mwihua mwutukya su nyaatovanto tiqaro kyuqe kyaiqa nraahuma vare varuro tihata variara. Mwihua uaqia hi kyaiqara uti variavaro mwihua mwutukya su nyaatovanto uaqia hi kyaiqarama uti varuro tihata variara.

<sup>16</sup> Nraakiara ekyaara entaqaa Kotiva Jesusi Karaisirara ko qiantre tiraro mwiva ekyaa nraakye qora vu nraatoqi vahiani quara avuqavuma kyero ko nyiananro. Nte nraakye qora Karaisiva tiri kyaahaqa hiani quara timwa nyiqanama mwi quaravata timwa nyunra.

**17** E tiqara, Nte Iutaavantove, qiana vaisira nte iara tirera. E tiqara, Nte Mosesirara timwa to quara riemwaqi vi varuvvara tina, nte qioma varianinrave, tiqarama ena mwahuta timwa kyera, Kotiva ni qamwata mate variho, qiananra.

**18** Kotira kyakya hira e ntapihi kyaananrave. Kotiva Mosesirara timwa to quava kyuqe aanra i nraamwutaiharara tira, e kyuqe aanra nrohina quarave, uaqia hi aanranraqaa nrohina quarave, mwi quara mwi quara riaananrave.

**19** Mwitaama kyera riaananranra tira, hia kyuqe aanra taqai vaisirara e tiqara, Nte qioma mwia kyaahaqa hianinrave, qiananrave. Kyokiraqi vari vaisirara e tiqara, Nte omwavanto itamwaqi vintema kyena mwia kyuqe aanra nraamwutaaninrave, qiananrave.

**20** Qumimaqamaqiro vi vaisirara e tiqara, Nte qua okyara qioma timwa mwianinrave, qiananrave. Nte qioma qaraakyahua qua mwaanra timwa nyianinrave, qiananrave. E tiqara, Kotiva Mosesirara timwa to quava ekyaa mwi okyarara mwi okyarara ni naamutaihananra tina, nte qioma mwitaama kye mpo ihua kyaahaqamaqi quaninrave, qiananra.

**21** E mpohua mpohua qua okyara timwa nyiganrama ena mpo? Enavata mwi quara ntapihi riaataarave. E timwa nyinra tiqara, Hia mpuara varaate, tiqarama ena mpo? Evata mpuara vare variaravave.

**22** E tiqara, Hia mpora nraatara mpora vaatiara nrohiante, tiqara ena mpo? Ena hia mpora nraatara mpora vaatiara nrohi variananrave? E unra mwanriqanra uaqia hi inraikyarave tiqarama e quataave unra mwanriqa nraamwuqitaira mpuara vare variananrave?

**23** E quataa ena mwahuta tiqara, Kotiva Mosesirara timwa to quara tiri Iutaa nraahu timwunrave, tiqarama e mwi quara nteqa kye variarata mwia kyaara mpo mwatanaahua Kotira nrutu vara mwataniqama kyeqata uaqama mwate variarave?

**24** Kotira mpukuqi qara ntumwa tova mwitaama tiro:  
Iutaavanto utuara kyaara mpo mwatanaa  
mpo mwatanaahua Kotira nrutu vara  
uaqama mwate variarave, tiro tura.

(Aisaiaa 52:5)

**25** I mwamwanta toqa kyaava e Iutaa mwatanaava variaro. Qio e Kotiva Mosesirara timwa to quara riemwaqira virera, i mwamwanta toqa kyaariva qioma i kyaahaqa hiananrove. E Kotiva Mosesirara timwa to quara nteqaqira virera, i mwamwanta toqa kyeva hiama qio i kyaahaqa hirara e mpo mwatanaahua votima kyera variananrave.

**26** Mpo mwatanaa vaisivanto hia mwamwanta toqa kyaa vaisiva variqaro Kotiva Mosesirara timwa to quara kyugema kyero riemwaqiro virera, Kotiva mwi vaisirara Iutaa voti hivavema qiananrove. Quataama Kotiva mwi vaisirara mwitaa qiananrove.

**27** I mwamwanta toqa kyaava, e Iutaavanto variqarama Kotiva Mosesirara timwa to quara rieqarama, mwi quara kyugema kyera riaataara vaiharama mwi quara nteqakye varira. Mwia kyaarama nraakiara hia nai mwamwanta toqaariva, mpo mwatanaava Kotira qua riemwaqi quariva, iqaama qua vataaanro. Nte mwitaama kyena Iutaa vaisiara qianinra.

**28-29** Tavave quataa mwamwanta toqakyaa vaisiva Iutaa tarava variananro? Mwamwanta toqakyaa vaisiva hia mwivavauma mwi mwatanaava variananro. Mwia nraato mwutukyaqitairo qora kyaiqa toqa mwataiva, mwi vaisivama Iutaa taravave, Kotira nraaqiara tarava variananro. Hia Kotiva Mosesirara timwato quava mwivavauma mwia vu nraato mwutukya hiqama mwataaanro. Kotira mwanaraqura, mwivama mwia nraato mwutukya hiqama mwataaanro. Hia qati nraakye qoravantovauma mwia nrutu tuaaherevara. Kotiva mwiva nraahuma mwia nrutu tuaaheraaanro.

### 3

#### *Uaqia hi kyaiqava hiama qio Kotira kyaiqa kyaahaqa hiananrove tura*

<sup>1</sup> Nkye ni kyapara hita tiqata, Hiave Iutaavanto varianinraqaatairo kyuqe inraikya qovara hiananrove? Hiave mwia mwamwanta toqa kyeraqaatairo mpo inraikyavanto qovarama viro nai kyaahaqa hiananrove? tivera,

<sup>2</sup> nte nkyitara tiqana, Qaqao, qioma mpo inraikyavanto qovarama quananrove, qianinra. Tauraaqama Kotiva nai qua okyara Iutaa nraahu mwia tutaate tiro, Kotiva mwihua nraahu timwa nyunrave.

<sup>3</sup> Qutaa Kotiva nai qua mwihua timwa nyuvata mpo uhua mwia qua hia riaraitita, hia Kotirara riemwaqita vura. Mwihua mwitaamaqita vurara tita, nkye tiqata, Kotiva nai nriqiqaa kyauqu vatero qutaa tu quara qaqlira kyaananrove, tivora.

<sup>4</sup> Hiama qio nkye mwitaa tivara. Ekyaa vaisi unra qua nraahu ti variavaro Kotiva nraahu qutaa qua timwaqiro vi varivama variro. Kotira mpukuqi qara ntumwa tova Kotirara mwitaama tiro:

Ekyaa i quavanto ntapihi kyero nraahuma vaiho.

Vaisivanto iqaa qua vatarerave tirera,  
i kepuuya quavanto nraatara kyeroma vahiananrove,  
tura.

*(Ihi 51:4)*

<sup>5</sup> Tire hia ntapihi kye nrohi varura kyaiqava Kotiva ntapihi kyero nrohi vari kyaiqara qovarama kyairara tita, qiove tire mwaa quara tiqata, Tire hia ntapihi kyeta nrohi varura kyaiqava Kotira kyaahaqa hi variharo mwia kyaara Kotiva hiama tiri inronra hiananrove qiananra? Nte mwitaa tiqanama qumina vaisivanto tintema kyena ti varina.

<sup>6</sup> Qaqao, tire hiama mwitaa qiananra. (Tire uaqia hi kyaiqara uturava hiama Kotira kyaahaqa hi variro. Mwia kyaara Kotiva qioma tiri inronra hiananro.) Kotiva hia ntapihi kyero variariva varirera, mwiva nraakiara nataama kyero ekyaa nraakye qora qua ntapihi nyataananro?

<sup>7</sup> Vaisi mponramwuvanto mwitaama tita, Nrivaqe tire unra qua qiararo Kotira qutaa quavanto ntapihi kyero qoqaa vahiraro Kotira nrutuvanto nri quarive, tita. Mwihua mwitaa timwa kyeta qaiqaavata mwitaama tita, Tiri unra quavanto mwitaama kyero Kotira nrutu vara viriniqama kyairera, nanraqamave Kotiva tita uaqia hi kyaiqara kyaara tiriqaa qua vataananrove?

<sup>8</sup> Nrivaqe uaqia hi kyaiqara varaqita quararo Kotira kyuqe kyaiqa qovara hiarive, qia quava mwataamama vahiro. Mpo hiahua tirinramwuanra uaqia hi quara tirerata uti variqata unra tiqata, Nkyenramwuma mwi quara ti variavo, ti variara. Mwihua mwitaa qiaro Kotiva mwihuaqaa qua vataiqena nte huviqaravema qianinra.

#### *Ekyaa mwatani varia nraakye qorhua Kotira qua nteqa kyaara*

<sup>9</sup> Qio tire Iutaavanto kyuqe nraakye qora varurata mpo mwatanaa mwihua uaqia hi kyaiqara uti variahuave varita? Qaqao, hiama mwitaama vahiro. Nte vaakya tura, ekyaa mwatani variahua Iutaavantovata, mpo mwatanaavantovata, variavaro uaqia hi kyaiqava ekyaa mwihuama tutero.

<sup>10</sup> Kotira mpukuqi mwataama tiro:

Hia vaisi mpovanto ntapihi kyero nrohi variva varirave.

Hiavatave.

<sup>11</sup> Hia vaisi mpovanto Kotira okyara ntapihi kyero riaiva varirave.

Hia vaisi mpovanto tiqaro, Kyaiqe nte Kotira puaama kyena taqaankye, tiva varirave.

<sup>12</sup> Ekyaa mwatani variahua Kotira aanraqaa ntapihi kye quataara vaihata mwihua mwi

aanranraqaataita mpona tuqasaaqita vetantaarave.  
Hia vaisi mpovanto Kotira kyaiqa kyuqema kyero  
vare varirave. Hiavatave.

(Ihi 53:1-3)

**13** Vaisivanto quntamwa tai mwatapira  
hia ntahirama taira,  
mwia votima kyero mwatani varia nraakyе qorahua  
nyovanto qatua viro vahirave.  
Mwihua mwaaqinriqaatairo unra quavanto  
qovara hi varirave.

(Ihi 5:9)

Mwihua quavanto quaiha tuhi voti hiva  
mwihua mwaaqinriqaa vahirave.  
**14** Mpohua uaqiamama nyate quava nraahu mwatani  
varia nraakyе qorahua nyoqi vahirave.

(Ihi 140:3)

**15** Mwatani varia nraakyе qorahua qamwanrama kyeta  
uro vaisi ru kyarerata uti variahua variavo.

(Ihi 10:7)

**16** Mwatani varia nraakyе qorahua vi variavaro  
mwihua quaraqaatairo vehi utu kye inraikyavave,  
kye vu tiqata ntate varia inraikyavave,  
qora inraikya mwiva nraahu qovara hi varirave.

**17** Mwatani varia nraakyе qorahua mwutukyavanto  
qihaakyama vahiani okyarara hia ntapihiarave.

(Aisaiaa 59:7-8)

**18** Mwatani varia nraakyе qorahua Kotira nraatu aatu  
hiqata nrohiataara vahiana mwihua hia Kotira nraatu  
aatu hi variarave, tura.

(Ihi 36:1)

Kotira mpukuqi mwitaa turave.

**19** Tire riauraro Kotiva nai haaru timwa to quava, mpo qua mpo qua vaihata mwi  
quara riaa nraakyе qorahua ekyaa mwi quara nraahu riemwaqi quataara vaihata  
mwihua mwi quara nteqa kye variara. Hiama qio mpovanto tiqaro, Nte uaqia hi  
kyaiqara okyara hia riaurave, qiananro. Ekyaa mwatani variahua Kotira qua nteqakye  
variavaro mwia kyaara Kotiva mwihuaqaa qua vataananro.

**20** Mwiaqaatairo Kotiva haaru Mosesira mwu quara nraakyе qoravanto riemwaqiro  
quariva hiama qio Kotiva vuqaa ntapihi kyero nrohi variariva variananro. Kotiva  
haaru Mosesira mwu quava mwi quava iara tiqaro, E uaqia hi kyaiqara nraahu uti  
variaro, timwa kyero mwia nraahuma i nraamwutaananro.

### *Kotiva nraakyе qora avuqavuma nyataaninranra tura*

**21** Qio mate mwaa entara qaraakya quama nri ntero. Kotiva nraakyе qora qua  
taiqa kyero avuqavuma nyataani okyarava qovarama viho. Mate Kotiva hia nai  
haaru timwa to quara riaraitiro, mwiva mpo okyara nraakyе qora avuqavuma  
nyataani okyarara rieqaro mwi okyarara qovarama kyero. Mwi okyarara qovarama  
kyaaninranra haaru Mosesivavata, poropeti vaisinramwuvata, tiri timwa timwunra.

**22** Ta nraakyе qorahua Iesusi Karaisirara qutaa mwivave tivera, Kotiva mwihua qua  
taiqa kyero mwihua avuqavuma nyataananro. Hia nraakyе qoraqitairo mpovanto  
mpo qaramavata variho. Ekyaa kuua qarama nraahu variavo.

**23** Tire ekyahua Kotira qua nteqa kyeta hia qioqa hunanranra tita, tire hiama qio  
uro Kotiva kepukyavanto varinani variarahua varita.

**24** Tire mwitaama varurarovata Kotiva tiriara po kye timwa timwateqaro Karaisiva  
tiri huvantu timwa taani kyaiqarara rieqaro tiri avuqavuma timwatero.

**25** Tiriara mwihua uaqia hi kyaiqara uti varia quara taiqa quarive tiro, Kotiva Iesusi  
Karaisira tiri timwihanro Jesusira nraanre rauruvaro qutu vura. Tire tiqata, Qutaama  
Jesusiva tiri kyaahaqa hirero mwitaa iho, qiarera, Kotiva tiri uaqia hi quara nruka

timwataananro. Haaru nraakye qoravanto uaqia hi kyaiqara utuqita vuvaro Kotiva hia qamwanrama mwihua riraitiro, qati vu nraahu taqero variqiro viro mwiaqaatairo mate mwaa entara nraakye qora avuqavuma nyatai okyarara qovarama kyero.

<sup>26</sup> Kotiva hia nraakye qora uaqia hi kyaiqara varaa quara qumina nraka nyataraitiro, mwiva avuqavuma kyero Iesusira kyaiqara rieqaro nraakye qora qua nraka kyero avuqavuma nyatero. Vaisivantove nraakyevantove Iesusi Karaisirara qutaa mwivave tiraro Kotiva mwia avuqavuma mwataananro.

<sup>27</sup> Qio tire nanra qua rieqatave teta mwahuta qiananra? Hiama mpo qua vahiro. Nanra inraikyavantove tiri kyaahaqa hiananrove? Hiama tire haaru Kotiva timwa to quara riaurava tiri kyaahaqa hiananro. Tire Iesusirara qutaa mwivave turava, mwiva nraahuma tiri kyaahaqa hiananro.

<sup>28</sup> Nte mwitaama tuqo: Vaisivanto Kotiva haaru timwa to quara riemwaqiro viraro Kotiva hia mwianra rieqaro mwia uaqia hi quara nraka mwataananrove. Qaqao, vaisivanto Iesusirara qutaa mwivave timwa kyero mwianra riemwaqiro viraro Kotiva mwianra rieqaro mwia uaqia hi quara nraka mwaterno mwi vaisirara, Avuqavu nrohi variara vaisivavema, qiananro.

<sup>29</sup> Kotiva Iutaa mwanriqavanto nraahu variqaro mwiva hiave mpo mwatanaahua mwanriqvantovata variro? Qaqao, mwiva ekyaa mpo mwatanaahua mwanriqvantovatama varaho.

<sup>30</sup> Qutaa Kotiva mwanriqa kuaiqavanto nraahuma variho. Nkyiari mwamwanta toqa kyaahua Iutaavanto Iesusirara qutaa mwivave tivaro Kotiva mwihua uaqia hi kyaiqara vare quara nraka kyero mwihua avuqavuma nyataananro. Mpo mwatanaahuavata Iesusirara qutaa mwivave tivaro Kotiva mwihua uaqia hi kyaiqara vare quaravata nraka kyero mwihuavata avuqavuma nyataananro.

<sup>31</sup> Tire Iesusirara riemwaqi viqata Kotiva haaru timwa to quara qati inraikyaqamave kyaananra? Qaqao, tire Iesusirara riemwaqi viqatama mwiaqaataita tire Kotiva haaru timwa to quaravata ntapihi kyetama riemwaqita quananra.

## 4

### *Poruva Evarahaamuva uturara riaate tura*

<sup>1</sup> Evarahaamuva mwiva tiri Iutaa haivaqava variqaro mwiva uturara nte nanreve qianinra?

<sup>2</sup> Kotiva Evarahaamunra kyaiqara rieqaro mwianra, E avuqavu nrohi variara vaisivave, qiankye tutirio, Evarahaamuva qioma nai mwahuta tutiri.

<sup>3</sup> Kotira mpukuqi Evarahaamunranra mwataama tiro: Evarahaamuva Kotira quara qutaaeve tuvarora tiro, Kotiva mwianra, E avuqavu nrohi variara vaisivave, tuqo, turama.

<sup>4</sup> Kyaiqa vaisivanto mpore kyaiqa vara mwataiharo mwia kyaiqara rieqaro mwia kyoqaa mwinrave. Mwi vaisiva hiama tiqaro, Qati mpiho qiananro. Nina kyaiqa qiata mpihoma qiananro.

<sup>5</sup> Tire hia kyaiqa vaisi mwia votima kye varuro. Hiama qio tire Kotira kyaiqa vara mwataararo Kotiva mwianra rieqaro mwia qiata tiri uaqia hi quara nraka timwa taananro. Kotiva nraakye qora uaqia hi quara nraka nyate variva varihata tire hia mwitaa hiraitita, tire Iesusirara qutaa mwivave qiararo Kotiva mwianra rieqaroma tiri avuqavuma timwa taananro.

<sup>6</sup> Hia vaisi kyaiqa mwianra riaraitiro, Kotiva mwia uaqia hi kyaiqara varai quara nraka kyero avuqavuma mwatairaro mwi vaisira mwutukyavanto kyuqema kyero vahianinranra, tiri haivaqava Ntevitiva mwitaama tiro:

<sup>7</sup> Kotira qua nteqa kyaa quara Kotiva nraka kyero  
vara kyaarihua qamwateqata varivarave.

<sup>8</sup> Kotira qua nteqa kyaani vaisirara Kotiva tiqaro,

Nte mwi quara taunru kyena hiama mwianra  
riemwaqina quaninrave, qiali vaisiva  
qamwateqaro variarive, tura.

(Ihi 32:1-2)

Ntevitiva mwi quara tura.

<sup>9</sup> Kotiva vaisi mwia uaqiahi quara nruka mwatairaro qamwateqaro varianinranra Ntevitiva tuva, mwi quava Iutaavanto nkyiari mwamwanta toqakyaahuara nraahuve tiho? Qaqao, hia nkyiari mwamwanta toqaahuaravatama mwi quava vaiho. Nte vaakya Evarahaamunranra tura riaate.

Evarahaamuva Kotira quara quitaave tuvaro Kotiva  
mwianra avuqavu hiara vaisivave turave.

(Okyara 15:6)

<sup>10</sup> Kotiva taire Evarahaamunranra mwitaa turave? Evarahaamuva nai mwamwanta toqa kyo entaraqaa Kotiva mwitaa tiro? Qaqao, Evarahaamuva hia nai mwamwanta toqa kyo vakya Kotiva mwitaa tura.

<sup>11</sup> Tauraa hia nai mwamwanta toqa kyo entaraqaa Evarahaamuva Kotirara, Qutaa qua qiaro, tuvaro Kotiva mwi vakya Evarahaamunra avuqavuma mwatora. Mwia avuqavuma mwatero mwia nraakiara mpo enta nraakye qoravanto Evarahaamunra avuqavuma mwatorara qati riemwa taate tiro, Kotiva qoraisi mwamwanta toqa kye okyarara qovarama kyovaro Evarahaamuva nai mwamwanta toqa kyora. Qio hia nai mwamwanta toqa kyo entaraqaa Kotiva Evarahaamunra avuqavuma mwatora.

Mwitaa hurara tita, hia nkyiari mwamwanta toqa kyaraitita, Kotirara quitaave qiaro Kotiva avuqavuma nyatai nraakye qorahua mwihua qiomma Evarahaamunranra tiri tiqvavem tivara.

<sup>12</sup> Nkyiari mwamwanta toqa kyaahua mwihuavata variqata nkyiari mwamwanta toqa kyerara hia nronraqama kyeta riaraitita, mwihua tiri haivaqara Evarahaamunra votima kyeta Kotirara quitaave timwaqi viqatara tita, mwihuavata Evarahaamunranra mwiva tiri tiqvavem tivara. Evarahaamuva hia nai mwamwanta toqa kyo entara Kotirara riemwaqiro vurama.

### *Kotiva nai kyauqu nriqiqaa vateqaro quitaave tu quara*

<sup>13</sup> Kotiva nai kyauqu nriqiqaa vatero Evarahaamunranra tiqaro, Evata i nraaqiaravantovata varivarо ekyaa mwata mwia nkyi mwatama vahiananrove, tura. Kotiva mwi quara tiqaro hia Evarahaamunranra, Mwiva nte Mosesira mwu quara okyara qio riaho, timwa kyero mwitaa turave. Kotiva hia mwitaa tiraitiro, Evarahaamunranra, Mwiva ni quara quitaave tahananra tina, nte mwianra rieqanama mwia avuqavuma mwatarerave, timwa kyero mwitaa turama.

<sup>14</sup> Kotiva haaru Mosesira mwu quara riarera ihua hiama qio ekyaa mwata varevara. Mwihua ekyaa mwata vararerai ihua varivarovauma Jesusirara quita mwivave qia quava qumina qua vahiraro Kotiva nai kyauqu nriqiqaa vateqaro Evarahaamunranra tu quavavata quminaqama quananro.

<sup>15</sup> Kotiva haaru timwa to quava vahirora tiro, vaisivanto mwi quara nteqa kyairaro mwia kyaara Kotira raraqa tairaro mwi vaisiraqaa qua vataananro. Qua mwaanra mwiva hia vahirera, mwi quara nteqa kyaariva hiama qio qua varaananro.

<sup>16</sup> Evarahaamuva Kotira quara quitaave tuvarora tiro, Kotiva nai kyauqu nriqiqaa vatero Evarahaamunranravata mwia nraaqiararavata mwihua kyuqema nyatarero mwitaamama timwa nyinro. Mwiaqatairo ekyaa Evarahaamunra nraaqiaranima mwi quava vahiananro. Iutaavanto Kotiva haaru timwa to quara riehuavata, ekyaa mpo mwatanaahuavata, mwihua Evarahaamunra votima kyeta Kotirara riemwaqita vivaro Kotiva quita mwitaa hiankye ti quava mwihuqima vahiananro. Tire tahuave Kotirara riemwaqi quarera, tire qiomma Evarahaamunranra mwiva tiri tiqvavem qiararo Kotiva Evarahaamunra timwa mwu quava tirinima vahiananro.

<sup>17</sup> Kotira mpukuqi Kotiva Evarahaamunranra mwitaama tiro:

E mpo mwatanaa mpo mwatanaa  
mwihua haivaqavama varinanrave, tura.

(Okyara 17:5)

Evarahaamuva Kotira vuqaa variqaro mwia quara qutaa quave tiro. Evarahaamuva tiqaro, Kotiva mwanriqvanto mwiva qioma qutu vihua vara qati sivuma kyaananrove. Kotiva mwanriqvanto variqaro tiraro qioma hia vahiani inraikyava qovarama quananrove, turama.

<sup>18</sup> Evarahaamuva hia qio nraaqiara mwataariva variqaro Kotirara kepukyaqama kyero riemwaqiro viro tiqaro, Nte qioma nraaqiara mwataaninrave, timwa kyero mwiaqaatairo Evarahaamuva mpo mwatanaa mpo mwatanaa mwihua haivaqava varura. Kotiva Evarahaamunra timwa mwinro tiqaro, I nraaqiara airima varivarave, tu quava qutaa mwivau vahura.

<sup>19</sup> Mwi entara Evarahaamuva hia nraaqiara mwataraitiro, 100 ihi vara kyero anoma kyero nyaapaiqama viro mwiva hia nai nyaapaiqama vurara riaraitiro, mwiva hia mwia nraatavanto kyontaqama vurara riaraitiro, mwiva Kotirara nraahu kepukyaqama kyero riemwaqiro vura.

<sup>20</sup> Mwiva Kotiva nai kyauqu nriqiqaa vatero qutaa mwianinrave tu quarara unra quave qiankyo timwa kyero, mwiva Kotirara kepukyaqama kyero riemwaqiro viqaroma Kotira nrutu tuaaherero tiqaro,

<sup>21</sup> Kotiva nai kyauqu nriqiqaa vatero qutaave timwa tai quava qutaa mwivauma vahiananrove. Kotiva nraaqiara ni mpiananrove, tiro.

<sup>22</sup> Evarahaamuva mwitaa timwa kyero Kotirara riemwaqiro vuvaro Kotiva mwianra rieqaro Evarahaamunranra, I uaqia hi quara nruka mwatena iara avuqavuma kyera nrohi variara vaisivavema tuqo, tura.

<sup>23-24</sup> Kotiva Evarahaamunranra rieqaro mwitaa tura. Kotiva tiriavaravata rieqaro mwitaama qiananro. Tirevata Evarahaamunra votima kyeta Kotirara riemwaqi quararo Kotiva tirivata avuqavuma timwa taananro. Iesusiva tiri vunyaa vaisivanto qutu vuvaro Kotiva mwia qati vara sivuma kyorara tita, tire Kotirara riemwaqi vi varunanra.

<sup>25</sup> Kotiva Iesusira titovaro Iesusiva tiri uaqia hi kyaiqarara qutu vuvaro mwiaqaatairo tiri uaqia hi quara taiqa kyero avuqavuma timwa taaninranra rieqaro Kotiva Iesusira qaiqaa qati vara sivuma kyora.

## 5

### *Kotiva tiri avuqavuma timwa tairara tura*

<sup>1</sup> Kotiva Iesusira qati vara sivuma kyorara tita, tire Iesusirara qutaa mwivave turaro Kotiva tiri uaqia hi quara taiqa kyero tiri avuqavuma timwa taira. Tiri vunyaa vaisivanto Iesusi Karaisiva kyaiqa vara mwatorara rieqaro Kotira mwutukyaqitairo qihakya iharo tiriara mwaateraave tihata tire Kotiravatama kyeta kuaaqi varunanra.

<sup>2</sup> Tire Iesusirara qutaa mwivave turaro Kotiva tiri kyuqema timwate varihata varunanra. Mwitaamaqi viqata nraakiara Kotira peqa okyara taqaananra vekya variqatara tita, tiri mwutukyaqitairo kyuqe hi varihata varunanra.

<sup>3</sup> Muaanra vahiani entaravata tiri mwutukyaqitairo kyuqe hi variraqetama variananra. Tire Kotirara rieqatama muaanra nraatara kyeta tire mwiaqaataita kepukyaqama vita variqata

<sup>4</sup> tire hia uqenranrai tita tire kepukya nraakye qora variqata mwi inraikyara vekya varunanra.

<sup>5</sup> Tire mwitaamaqita quararo Kotiva hia tiri qaqlira kyairaqe tire kyauriqata variananrave. Kotiva nai mwanraqura tiri timwihanro mwia mwanraquravanto tiri mwutukyaqi kepukyaqa hiro vaihata tire Kotira mwutukyavanto tiriara vahira ntapihunanranra tita, tire hia kyauriqata variananra.

<sup>6</sup> Tire uaqia hora nraakye qorahua variqata hia qioqama kye teta kyaahaqa hiarahua variavararo Kotiva nai timwa to entaraqaa Karaisira vara kyovaro tiri kyaahaqa hirero qutu vura.

<sup>7</sup> Tire mwata mwaini varurahua ntapihi kyero nrohi variani vaisira kyaahaqa hirerata tire hiama qihaakyama kyeta mwianra qutu quananra. Kyuqe vaisiaravata mpovanto nanrianra mwianra qutu quataa hiraroma mwianra qutu quananro.

<sup>8</sup> Tire mwitaa hurarovata Kotiva hia mwitaa hiraitiro, mwia mwutukavanto tiriara mpoqiavata vahira tiri tinraamwuteqaro tire teta uaqiahi inraikyaraqi varuraro Karaisira timiharo tiriara qutira.

<sup>9</sup> Iesusiva tiriara rieqaro nai nraanre rauru kyero qutu viro tiri vara kyero Kotira vuqaa avuqavuma timwa taihata varunanra. Iesusiva mwitaa hivara tiro, mwiva kepukyaqama kyero mpoqiavata tiri kyaahaqamaqiro viraro Kotiva hia tiriqaa nraakiaravata qua vataananro.

<sup>10</sup> Tire Kotira nramwutaahua variavararo mwia mwaaquvanto tiriara rieqaro qutu vurara tita, tire Kotiravata kuaaqi varunana. Tire Kotira nramwutaa variavana entara Karaisiva tiri kyaahaqama timwa tora. Mwaa entara tire Kotiravata kuaaqi varurarora tiro, mwia mwaaquvanto tiriqi variqi vi variva mpoqiavata tiri kyaahaqama timwa tairaro Kotiva tiri tivitaananro.

<sup>11</sup> Hiama mwi quava nraahu vahiro. Mwaa quavavatama vahiro. Tiri vunyaa vaisivanto Iesusi Karaisiva tiri kyaahaqama timwa taihata tire Kotiravata kuaaqi variqatara tita, tire Kotirara qamwateqata varunana.

### *Poruva Ataamunra okyararavata Iesusira okyararavata tura*

<sup>12</sup> Haaru vaisi kuaikuvanto Kotira qua nteqa kyovaro mwiaqatairo uaqia hi kyaiqara vare okyarava mwatani qovarama vuvaro qutu vi okyaravavata qovarama vuvata mwiaqataita ekyaa nraakye qora uaqia hi kyaiqara uti varurara tita, mwihua ekyaa qutu vi okyararavata varora.

<sup>13</sup> Tauraaqama Kotiva nai qua okyara hia Mosesira timwa mwu entara uaqia hu kyaiqava mwatani vhura. Mwi entara Kotiva nai qua okyara hia Mosesira timwa mwunranra tita, nraakye qora uaqia hi kyaiqara utuqi vuvaro hia Kotiva tiqaro, Nkye ni qua nteqa kyaavo, tura.

<sup>14</sup> Kotiva hia mwitaa tuvarovata Ataamunraqatairo nraakye qora quti okyarava qati nraahu vahiqi vi varuvaro Mosesivavata variqiro viro uro qutu vura. Mwi entara Ataamuva Kotira qua nteqa kyero variqiro viro uro qutu vuvata, nraakye qora hia Ataamuva Kotira qua nteqa kyontema kyeta varuhua, mwihuavata mwipi nraahu variqita vita qutu vura.

Ataamuva tauraanaa vaisi varuvaro mwia nraakiara qovara hiani vaisiva Iesusivavata tauraanaa vaisi votima kyero varura.

<sup>15</sup> Mwitanahua kyaiqa hia kuaa kyaiqa vhura. Ataamuva Kotira qua nteqa kyero varo kyaiqava vahuvaro Kotiva nraakye qora kyuqema nyataari okyarava Ataamunra kyaiqa nraatara kyero vhura. Ataamuva vaisi kuaikuvanto Kotira qua nteqa kyoraqataita airi nraakye qora qutu vi variara. Kotiva nraakye qora kyuqema nyatarero vaisi mpo titovaro mwi vaisiva Iesusi Karaisiva kuaikuvanto mwihua kyaahaqama nyatoraqataita airi nraakye qora kyuqema vita variara.

<sup>16</sup> Qaiqaa tirera. Tauraanaisi kuaikuvanto uaqia hi kyaiqara utu kyova mpo qarama vahiro Kotiva nraakye qora kyuqema nyataani okyarava mpo qaramama vahiro.

Tauraanaisi kuaikuvanto Kotira qua kuaanani nteqa kyovaro Kotiva mwiaqaa qua vatero tiqaro, E qutu vinanrave, tura.

Nraakiara nraakye qoravanto airi nani Kotira qua nteqa kyaavaro Kotiva qati mwihua kyuqema nyatarero hiro tiqaro, Hia nkyiqa qua vataaninrave, tura.

<sup>17</sup> Haaru vaisi kuaikuvanto uaqia hu kyaiqara utuvaro mwiaqaatairo qutu vi inraikyava nraakye qoraqaa ntaqikyiqiro vi varuvata mwihua qutuqita vi varura. Mwitaamaqita vi varuvaro Iesusi Karaisiva kuaikuvanto qutu vi varia okyarara nraatara kyorara tita, nraakye qora mponramwu, Kotiva qati kyuqema nyateqaro nkyiqa hia qua vataaninrave ti nraakye qorahua, mwihua qati variqi viqata Karaisira vatama kyeta varivara.

<sup>18</sup> Mwi quara okyara mwitaamama vahiro: Haaru vaisi mpovanto uaqia hu kyaiqara kuaiqia utu kyovaro mwia kyaara Kotiva ekyaa nraakye qoraqaa qua vateqaro qutu vivarave tuvata nraakye qora qutuqita vi varura. Mwia votima kyero vaisi mpovanto kyaiqa kuaiqia kyuqe kyaiqa vara kyovaro mwiaqaatairo Kotiva nraakye qorara tiqaro, Nkyi uaqia hi quara taiqa kyena avuqavuma nyatauqo. Nkye qati variqita vivarave, tura.

<sup>19</sup> Haaru vaisi kuaikuvanto Kotira qua nteqa kyoraqaataita airi nraakye qora hia kyuqema vita variqata uaqia hu kyaiqara varaqita vi varura. Mwia votima kyero vaisi mpo mwiva kuaiqivanto Kotira qua vataqiro vuraqaatairo Kotiva airi nraakye qorara tiqaro, Nkyi qua taiqa kyena nkyi avuqavuma nyataaninrave, ti varira.

<sup>20</sup> Nraakye qoravanto uaqia hi kyaiqara utuqita vuvaro mwiaqaatairo Kotiva qao tu quara Mosesira mwuvatavata nraakye qoravanto uaqia hi kyaiqara mpoqivata nraahu utuqita vura. Mwitaamaqi vi varuvaro qora kyaiqavanto nronraqama kyero vahuvaro mwiaqaatairo Kotiva kyuqema nyataari okyarava mwivavata nraatara kyero mpoqivata vahura.

<sup>21</sup> Haaru uaqia hu kyaiqava nraahu nraakye qora ntavaaqavu kyovaro qutu vi inraikyava mwihuaqaa ntaqikyiqiro vuvata mwihua qutuqita nraahu vi varura. Mwaa entara Kotiva tiri kyuqema timwa teqaro tiriqaa ntaqikyiqiroma viro. Tiri nronravanto Iesusi Karaisiva tiri kyaahaqama timwa torara tiro, Kotiva tiri avuqavuma timwa taihata tire ekyaa enta qati variqi quarahuama varita.

## 6

### *Tire Iesusira vatama kye qutu vurahua*

<sup>1</sup> Mwi quara rieqatama tire nanra quave qiananra? Tire mwaa quarave qiananra, Nrivaqe uaqia hi kyaiqara utuqita quararo Kotiva mpoqivata tiri kyuqema timwa taarive. Mwitaave tire qiananra?

<sup>2</sup> Qaqao, hia tire mwitaa qiera. Tire qutu vuraro uaqia hi kyaiqava hia qaiqaa tiriqaa ntaqikyi variho. Mwitaa hirara tita, tire qaiqaa uaqia hi kyaiqara utuqita quarora.

<sup>3</sup> Nkye hia mwaa quara ntapihiarave? Tire Iesusira nraaqiaraqama vita nramanri vareta tire mwi entara Iesusi Karaisira vatama kyeta kuaaqi variqata tire mwiva qutu vuntema kyeta qutu vunanra.

<sup>4</sup> Tire nramanri vareta Iesusi Karaisira quntamwa tontema kyeta tirivata quntamwa taavata varunana. Mwiaqaatairo Iesusira qova peqaqama kyero Iesusira qati vara sivuma kyontema kyero mwiva tirivata vara sivuma kyairae tire qaraakyaqama kyetama variqita quananra.

<sup>5</sup> Tire Iesusira vatama kyeta qutu quarahua variqata qioma tire Iesusira vatama kyeta qati sivita variananra.

<sup>6</sup> Tire ntapihi kyaunananrave. Tiri vu nraatoqi uaqia hi kyaiqara utuarava tiri hia ntavaaqavu tairaro tiriqi uaqia hi kyaiqara varaanana mwia kepukyavantovata taiqa quarive tiro, tiri haaruua vu nraato Karaisira vatama kyero kyatariqaa rutora.

<sup>7</sup> Qutu viva qutu virara tiro, uaqia hi kyaiqava hiama qio qaiqaa mwiaqaa ntaqikyiananro.

<sup>8</sup> Karaisiva qutu vuvata tire mwiavatama kye qutu vurahua tita, tire qioma Karaisira vatama kyeta qati sivi variqita quananra.

<sup>9</sup> Tire ntapihi kyauraro Karaisiva qutu vuvaro Kotiva mwia qati vara sivuma kyorara tiro, mwiva hia qaiqaavata qutu quananro. Hia qutira inraikyavanto mwiaqaa qaiqaa ntaqikyiananro.

<sup>10</sup> Iesusiva qutu virera hiqaro mwiva tiri uaqia hi kyaiqarara rieqaro kuua nani qutu vura. Iesusiva hiama qio qaiqaavata mwianra rieqaro qutu quananro. Iesusiva mwaa entara qati variqiro viqaro Kotiravata variqiro vi variro.

<sup>11</sup> Mwia votima kyeta nkyevata vu nraatoqitaita mwitaama kye rieta qiata. Tire qutu quarahua votima kyeta variararo uaqia hi kyaiqava hia tiriqaa qio ntaqikyiananrove. Tire Iesusi Karaisira vatama kyeta qati variqi vita Kotira vatama kyeta kuaaqi variqi virerave, qiata.

<sup>12</sup> Nkye varivarо nkyi mwamwantavanto mpo enta qutu quananro. Qio nkye qutu vi mwamwantara vatama kyeta variqata nkye nkyeta mwamwantavanto api varaataa hi kyaiqara utivora. Uaqia hi kyaiqava nkyi mwamwantaqaa ntaqikyiqiro quankyora.

<sup>13</sup> Nkye nkyeta kyauquve, kyuquve, nanra mwamwantave qati kyaivaro mwi mwamwantava uaqia hi kyaiqara utuankyora. Nkye ekyaara qutu quataara vaihata nkye qati variqita vi variara. Nkye mwianra rieqatama Kotira kyaiqa nraahu vararerata uti variqatama nkyeta kyauquve, kyuquve, mpo mwamwantave, mwiaqotaita avuqavuma kyeta kyuqe kyaiqa nraahu varaqita quata.

<sup>14</sup> Kotiva Mosesira mwu quava mwaa entara hiama qio nkyiqa ntaqikyiananro. Kotiva nraakyе qora kyuqema nyatai okyarava nkyiqa ntaqikyiqiro variro. Mwitaa hirara tiro, uaqia hi kyaiqava nkyiqa ntaqikyiqiro quankyora.

### *Ntapihi kye nrohia okyarara kyaiqa vaisi variate tura*

<sup>15</sup> Mwiaqataita tire nanra quave qiananra? Mosesira qua okyaravanto hia tiriqaa ntaqikyiananrove. Kotiva nraakyе qora kyuqema nyatai okyarava tiriqaa ntaqikyiqi variho. Mwitaa hirara tita, uaqia hi kyaiqara qati nraahu utuqi quare. Mwitaae tire qiananra? Qaqao, tire mwitaa qiarora.

<sup>16</sup> Nkye hiave ntapihiavo? Nkye vaisi mporara i kyaiqa vararerave tivaro mwi vaisiva nkyiqa ntaqikyirata nkye mwia kyaiqa vaisima varivara. Nkye uaqia hi kyaiqara utivera, uaqia hi kyaiqava nkyiqa ntaqikyiqi virata nkye mwia kyaiqa vaisima variqata mwia kyaiqa nraahu varaqita vita uro qutu vivara. Nkye Kotira qua riemwaqita vivera, Kotiva nkyiqa ntaqikyiqiro virata nkye mwia kyaiqa vaisi varivaro Kotiva nkyi avuqavuma nyataananro.

<sup>17</sup> Nkye haaru varuvaro uaqia hu kyaiqava nkyiqa ntaqikyiqiro vi varuvata nkye varura. Nkye mwitaamaqita vi varuvata mwiaqataita mpo uhua qutaa qua nkyi timwa nyuvata hia nkye mwia qua mpoqia qaqira kyaraitita, ekyaa mwi quara riemwaqita vi variara. Nte mwianra rieqanama Kotirara qamwateqanama varina.

<sup>18</sup> Kotiva nkyi huvantu kyaiharo uaqia hi kyaiqava nkyi tuta kyaihata nkye variara. Mate kyuqe kyaiqvanto nkyiqa ntaqikyiqi varihata nkye kyuqe kyaiqa nraahu vararerata uti variara.

<sup>19</sup> Ni qua hia rievorave tina, mwiaqataina nte vaisivanto qua qiantema kyena nkyiara tuquo.

Haaru uaqia hu kyaiqava nkyiqa ntaqikyiqi varu entara nkye uaqia hu kyaiqara varaataa huvata nkye uaqia hu kyaiqara utita tiqata, Tiri mwamwantavanto qiomia mwi kyaiqara varaanrove timwa kyeqata uaqia hu kyaiqara mpo kyaiqa mpo kyaiqa uti varura.

Mwia votima kyeta mwaa entara nkye tiqata, Kyuqe kyaiqvanto tiriqaa ntaqikyiqi variraqe tire qutaa Kotira nraaqiara variare, timwa kyeqata nkyeta nyamwantaqotaita kyuqe kyaiqa nraahu varaqita quata.

<sup>20</sup> Haaru uaqia hu kyaiqava nkyiqa ntaqikyiqi varuvata nkye mwia kyaiqa vaisi varuvaro kyuqe kyaiqvanto hia nkyiqa ntaqikyurave.

<sup>21</sup> Nkye haaru uaquia hu kyaiqara uturara mate riaavar nkyi kyaurihata variarave. Nkye mwi kyaiqara uturaqaataita nanra kyuqe inraikya varorave? Mwi kyaiqara utuariva variqiro viro uro ekyarama qutu quananro.

<sup>22</sup> Qio mate mwaa entara nkye huvantu quavaro uaquia hi kyaiqava hia nkyiqa ntaqikyi varihata nkye Kotira kyaiqa vaisi variarama. Mwiaqaataita nkye nanra inraikyave varevara? Nkye mwitaamaqi viqatama nkye quitaama Kotira nraaqiaraqama vita nkye mwiaqaataita ekyaa enta qati variqita virama varevara.

<sup>23</sup> Uaqia hi kyaiqava nai kyaiqa vaisi qutu quani kyoqaara mwihanro Kotiva Iesusi Karaisira tiri vunyaa vaisi kyaiqara rieqaro tiri qatiqama kyero ekyaa enta qati variqita quananra timwinrama.

## 7

### *Poruva nraakyevanto vaati varaaninraqaa ntumwa kyero tura*

<sup>1</sup> Ni kata pakyaa tuaavo, nkye qua vataira okyara ntapihi riaahuara tita, nkye ntapihi riaavar qua okyaravanto vaisivanto qati variqiro quani entara nraahu mwiaqaa ntaqikyiro. Vaisivanto qutu quani entara mwi quava hiama qio mwiaqaa ntaqikyiananrove.

<sup>2</sup> Qio nraakye ntumwua okyarara nraato tuata. Nraakye ntumwu mwataiharo tiri qua okyaravanto mwi nraakyerara tiqaro mwi vaisiva i vaativanto variho tiharo mwi nraakyeva nai vaatintiri variro. Mwia vaativanto qati variqiro vi entara mwiva mwia nraatavanto variro. Mwia vaativanto qutu quani entara tiri qua okyaravanto hia mwi nraakyera tutaananro.

<sup>3</sup> Mwia vaativanto qati variani entara mwi nraakyeva mpo vaisintiri nrohi varirera, mwi nraakyerara nraata vaati ntuge hi vari nraakyerave tivara. Mwia vaativanto qutu viraro tiri qua okyaravanto hia mwi nraakyera tutairaro mwi nraakyeva qati variqaro vaisi mpo vareqaro mwiva hiama nraata vaati ntuge hiananrove.

<sup>4</sup> Ni kata pakyaa tuaavo, nkyevata mwia votima kyeta variavo. Iesusi Karaisira kyatariqaa hiritovaro qutu uvata nkyevata mwi entara qutu vurara tiro, mate Mosesira qua okyaravanto hiama qio nkyi tutaananrove. Kotiva Karaisira qati vara sivuma kyovata tiro, Karaisiva qati varihata nkye mwianivanto variavo. Nkye Karaisira nraaqiara variqatar tita, nkye Kotira kyaiqa varehuama varita.

<sup>5</sup> Haaru uaquia hi kyaiqava tiriqaa ntaqikyi varu entara Mosesira mwu quava tiri vara sivuma kyovata tire qao timwa tai kyaiqara nraahu varaqi virera utuavanana. Mwi kyaiqaraqaatairo qutu quana inraikyava nraahu qovarama vura.

<sup>6</sup> Haaru Mosesira mwu quava tiri rupa tovata tire qutu quavanana tiro, mwi quava hia tiriqaa ntaqikyi varihata tire qati varunanra. Tire qatinani variqata hia tire haaruana qua okyara qara ntumwa tora rieqata Kotirani kyuqe kyaiqa vararaitita, tire qaraakya qua okyara rieqata varuraro Kotira mwanraquravanto tiri kyaahaqa ihata Kotira kyaiqa vare varunanra.

### *Kotiva Mosesira mwu quaravata qora kyaiqaravata tura*

<sup>7</sup> Kotiva haaru Mosesira mwu quava hia tiri kyaahaqa hurara tita, tire mwianra uaquia hi quaraveve qiananra? Tire mwitaave qiananra? Qaqao, hiave. Mwi quava hia vahitiri, tire hiama uaquia hi kyaiqara okyara ntapihuratiri. Mwi quava tiqaro, Hia mpova hi inraikyara vairiqa hiante, tirave. Mwi quava hia mwitaa titiri, nte vairiqa hia okyarara hiama ntapihutiri.

<sup>8</sup> Nte mwi quara riemwaqina quataara vahuvana nte variavaro uaquia hi kyaiqara utuariva nraahu ni pu naatoqi vahuvananra tina, nte mwi quara nteqa kyaankye timwa kyena mwiaqaatai mpo inraikya mpo inraikyara ni mutukya ntuvana variavara. Kotiva qaoqa hiqaro qua vatova hia vahitiri, mpovanto qua nteqa

kyairaqaatairo hiama uaqia hi kyaiqara utu kyaiho tivaro uaqia hi kyaiqara kepukya hiama vahitiri.

<sup>9</sup> Ntevata haaru variqana hia Kotira qua okyara riaava entara qati variqina quvara. Nte mwitaama variqina vi variavaro Kotiva hia mwitaa hiante tu quava nri ntovana nte mwi quara riaavar ni pu naatoqitairo uaqia hi kyaiqara utuariva qovarama vuvana nte mwi quara nteqa kyena

<sup>10</sup> mwia kyaara qutu quahua votima kyena variqina quvara. Kotiva hia mwitaa hiante tu quava ni kyaahaqa huvana nte qati variqina quataara vahuvana ntenavanto mwi quara nteqa kyena mwia kyaara nte qutu quahua votima kyena variqi quvara.

<sup>11</sup> Nte Kotiva hia mwitaa hiante tu quara riaavar ni pu naatoqitairo uaqia hi inraikyava ni kumwaanri tiqaro, Qioma mwi quara nteqa kyenanrave, tuvana nte mwi quara nteqa kyaavar uaqia hi kyaiqara utuavava ni naatara kyovana mwia kyaara nte qutu quariva variavara.

<sup>12</sup> Mosesira mwu quava kytata quama vahiro. Kotiva qao timwa kyero hia mwitaa hiate tu quavavata Kotira qua kytata quama vahiro. Mwi quava nai avuqavuma kyero vahiva kyuqe quama vahiro.

<sup>13</sup> Mwi quava kyuqe qua vaihananra tina, nte kyuqe qua kyaarave quti inraikyara varena? Qaqao, hiama. Nte mwi quara nteqa kyena uaqia hi kyaiqara utuaninra kyaarama nte qutuani inraikyara varena. Ni pu naatoqitairo uaqia hi kyaiqara utuariva kyuqe qua nteqa kyaante tura kyaara nte qutu quani inraikyara varena mwiaqaataina nte ntapihi kyena taqauqaro uaqia hi kyaiqara okyaravanto uaqia hiva vahirama. Kotiva qao timwa tero hia mwitaa hiante tu quara naamutovana nte uaqia hi kyaiqara okyara taqauqaro nai anomia kyero uaqia hivama vahiro.

### *Uaqia hi kyaiqava tiri vu nraato ntumwa qu kyai okyarara tura*

<sup>14</sup> Tire ntapihi kyaunana. Kotiva haaru vato quava aanra kyuqeraqaa nrohiana okyarara ti varira. Mwi quava mwitaa ti varihana nte uaqia hi aanranraqaa nrohiarivama varina. Uaqia hi kyaiqava ni rupa taihana nte mwia kyaiqa vaisivama varina.

<sup>15</sup> Nte ntene vare varu kyaiqara hia anomia kyena ntapihura. Mwi kyaiqara kyuqe kyaiqa ni varaataa iho timwa kyena mwiaqaataina nte hia mwi kyaiqara varena. Qaiqaa mpo kyaiqa uaqia hi kyaiqara hia ni kyakya hira hia varaaninrave timwa kyena mwiaqaataina nte mwi kyaiqara uti varura.

<sup>16</sup> Nte uaqia hi kyaiqara hia varaataa hira mwia nraahu vareqana nte taqauqaro Kotiva qao timwa to quava kyuqe qua nraahuma vahiro.

<sup>17</sup> Nte uaqia hi kyaiqara utiqana hia ntenavauma mwi kyaiqara uti varina. Ni pu naatoqi uaqia hi kyaiqara utuariva vahiva, mwivama mwi kyaiqara uti variro.

<sup>18</sup> Nte taqauqaro kyuqe kyaiqa varaariva hia ni utaqi vahira. Nte ntene pu naato mutukyaqiara tuqo. Ni mutukyaqitairo kyuqe kyaiqa varaataa ihanavata hia mwia varaura.

<sup>19</sup> Nte tiqana, Kyai nte kyuqe kyaiqa varaankye, timwa kyenavata mwi kyaiqara hia varaura. Nte tiqana, Qaqao, hia uaqia hi kyaiqara utirerave, timwa kyenavata uaqia hi kyaiqara mwia qati nraahu uti varura.

<sup>20</sup> Hia ni kyakya hi kyaiqara nraahu vare varura mwia hia ntenavantovauma varena. Uaqia hi kyaiqava ni utaqi vahiva, mwivama mwi kyaiqara vararerera uti varihana nte mwi kyaiqara varena.

<sup>21</sup> Mwiaqaataina nte taqauqaro vaisivanto kyaiqa varaari okyarava mwitaamama vahiro. Nte kyuqe kyaiqa vararerera huqaro uaqia hi kyaiqavama aanra antue variro.

<sup>22</sup> Ni mutukyavanto Kotira qua okyarara qamwataihana kyai mwi quara vataqina quanye tuqaro

<sup>23</sup> ni pu naato utaqitairo mpo kyaiqa uaquia hi kyaiqara varaariva nramwutaaqa hiqaro nte kyuqe kyaiqa vararerera hura nraatara kyero ni ntavaaqavu kyero rupate varihana varura.

<sup>24-25</sup> Ni mutukyaqitairo Kotira kyaiqa vaisi variataa iharo ni mamantavanto uaquia hi kyaiqara vararerera uti varira. Po, nte anomia kyena uaquia hiraqi uaqlama kyena varuqo. Ni mamantavanto uaquia hi kyaiqara varaari mwamwantava ni ntavaaqavu kyaihana nte mwia kyaara qutu quankyorave. Tavave ni huvantu kyairae nte qati varianinrave? Qio Iesusi Karaisiva tiri vunyaava, mwivama tiri huvantu kyaariva variho. Nte mwianra rieqanama Kotirara kyuqeve tina mwia nrutu tuaaherauqo.

## 8

### *Kotira mwanraquravanto nraakye qora kyaahaqa hirata nrohirara tura*

<sup>1</sup> Mwi quara okyara mwitaamama vahiro: Nraakye qoravanto Jesusiraqaa taaqau vita varihua hiama mwihuaqaa qua vahiananro.

<sup>2</sup> Kotira mwanraquravanto tiriqaa ntaqikyi varirae tire Karaisiravata kuaaqi variararo hiama uaquia hi kyaiqavavata, qutuari inraikyavavata, tiri tutairaue variananra. Tire huvantu vita nritareta qatinanima varita.

<sup>3</sup> Tauraa tiri vu nraatovanto uaqlama kyero vahuvarora tiro, Kotiva qaoqa hiqaro Mosesira mwu quava hia kepuqyaqama kyeqaro tiri kyaahaqa hura. Mwi quava hia tiri kyaahaqa hiariva vahuvarora tiro, Kotiva naivanto tiri kyaahaqa hura. Nraakye qorara rieqaro mwihua uaquia hi kyaiqaraqaara qutu quarive tiro, Kotiva nai mwaaqu titovaro Karaisiva tiri uaquia hura nraakye qorahua votima kyero tiri kuaa mwamwanta varero varuvaro Kotiva tiri uaquia hi quara mwiaqaa vatovaro Karaisiva qutu vura.

<sup>4</sup> Haaru Kotiva avuqavuma kyero nraakye qorara mwitaa mwitaamaqi viqata nrohiate timwa to quava vahuvaro Kotiva tiriara mwi quava mwihuaqi vahirata mwihua nkyiari mwamwantavanto uaquia hi kyaiqara varaataa hianinra hia vararaitita, nina mwanraquravanto qiani quara nraahu riemwaqita quate tiro, Kotiva tiri qua Karaisiraqaa vatovaro qutu vura.

<sup>5</sup> Mwia vu nraatoqitairo uaquia hi kyaiqara nraahu varaataa hiari vaisiva variraro uaquia hi kyaiqava mwi vaisiraqaa ntaqikyiqiro quananro. Mwia vu nraatoqitairo Kotira kyaiqara nraahu riemwaqiro quari vaisiva variraro Kotira mwanraquravanto mwi vaisiraqaa ntaqikyiqiro quananro.

<sup>6</sup> Mwia vu nraatoqitairo uaquia hi kyaiqara nraahu utuataa hiari vaisiva variqiro viro uro ekyaara qutu quananro. Mwia vu nraatoqitairo Kotira kyaiqara Kotira mwanraquravanto kyaahaqa hiraro mwia nraahu varaataa hiariva variqiro viraro mwutukyaqitairo qihaakya hiraro ekya enta qati variqiro quananro.

<sup>7</sup> Uaqia hi kyaiqara nraahu varaataa hiariva vaisiqa ntaqikyiqi vi variraro mwi vaisiva Kotira nramwutama variananro. Mwi vaisiva hia Kotira qua riaraitiro, Kotira qua nteqakye variananro. Mwiva Kotira qua riemwaqiro quariva hiama mwiaqi vahiro.

<sup>8</sup> Uaqia hi kyaiqara nraahu varaataa hirata vari nraakye qorahua Kotira kyakya hiani inraikyara hiama qio varevara.

<sup>9</sup> Qio Kotira mwanraquravanto nkyiqi varirera, Kotira mwanraquravanto nkyiqa ntaqikyi variraro nkyi vu nraatovanto uaquia hi kyaiqara nraahu varaataa hiva hiama qio nkyiqa ntaqikyiananro. Karaisira mwanraquravanto vaisi mpoqi hia varirera, mwi vaisiva hiama Karaisiranivanto variananro.

<sup>10</sup> Karaisiva nkyiqi variqi virera, nkyi mwamwantavanto uaquia hi kyaiqara kyaara qutu quariva variraro Karaisiva nkyi avuqavuma nyatairara tiro, nkyi mwanraquravanto qati variqiro quarivama variananro.

<sup>11</sup> Iesusiva qutu vuvaro Kotiva mwia vara qati sivu kyora. Qio Kotira mwanraquravanto nkyiqi varirera, Kotiva Iesusira qati vara sivuma kyontema kyero mwiva nkyi qutu vi mwamwantara vara sivuma kyairata qati variqi vivara. Kotira mwanraquravanto nkyiqi variqiro vi varirara tiro, Kotiva mwitaa hirata nkye qati variqi vivara.

<sup>12</sup> Ni kata pakyaa tuaavo, mwi quara rieqatama tita vu nraatovanto uaquia hi kyaiqara varaataa hira tire varaqita quarora.

<sup>13</sup> Nkye nkyeta vu nraatovanto uaquia hi kyaiqara varaataa hira varaivera, nkye ekyara qutu vivara. Kotira mwanraquravanto nkyi kyaahaqa hirata nkye uaquia hi kyaiqara ekyaa ru taiqa kyaivera, nkye ekyaa enta qatima variqi vivara.

<sup>14</sup> Kotira mwanraquravanto ti quara rieqata nrohiahua, mwihuama Kotira nraaqiarama varita.

<sup>15</sup> Kotiva hia nkyiara qaiqaa aatu hiqata nrohivaro vaana uaquia hiva nkyi rupa kyero nkyiqa ntaqikyiarive timwa kyero mpo mwanraqura nkyi nyinrave. Kotiva nai nraaqiaraqama kyero tiri virirero nai mwanraqura tiriqi vataihata tire Kotirara aakyara nteqata, Ko, ko, ti varunanra.

<sup>16</sup> Kotira mwanraquravanto tiri mwanraqura kyaahaqa hi variharo tiri mwanraquravanto tiqaro, Tire Kotira nraaqiarama varuro, ti varira.

<sup>17</sup> Tire Kotira nraaqiara varurahuara tita, tire Kotiva nai nraaqiaranive timwa tai inraikyara varaarahuama varita. Tire Karaisiravatama kye varurahuara tita, tire Kotiva Karaisiranive timwa tai inraikyara varaarahuama varita. Tire mate mwaa entara Karaisira nraantanteta nriqa vi inraikyara varaqi quarahua nraakiara Karaisiva varintema kye tire nronraqama vita Karaisiravata kepukyaqama kye qati variqi quananra.

#### *Tire nraakiara kyuqema kyeta qati variqi quananranra tura*

<sup>18</sup> Nte mwitaamama riena. Nraakiara Kotiva tiri nronraqama kyero kyuqema timwa taani entava qovarama quaninra vekya variqanama nte mate mwaa entara nriqa vi inraikyara varaqi quaninrave, muaanra varaqi quaninrave, mwi inraikyarara hia nronraqama kyena riaaninra.

<sup>19</sup> Kotiva tiri nai nraaqiara nronraqama kyaani entava qovarama quaninranra, ekyaa Kotiva ututai inraikyava mwi entara qamwanrama qovara hiarive timwa kyero mwia vekya variro.

<sup>20</sup> Mwaa entara ekyaa Kotiva ututai inraikyava vahiqiro viro uro uaqiamma viro taiqa vi varira. Hia naiqama kyeqaro mwitaa hira, Kotiva taiqaante tiharo mwitaa hira. Qio Kotiva ututai inraikyava hiama mpo enta mpo enta mwitaamaqiro nraahu quananro.

<sup>21</sup> Nraakiara Kotiva huvantu kyairaro mwi inraikyava hia tapitaraitiro, qatima vahiqiro quananro. Nraakiara ekyaa Kotiva ututai inraikyava tire mwia nraaqiarama variarantema kyeroma qati vahiqiro quananro.

<sup>22</sup> Tire ntapihi kyaunranra. Nraakyevanto nraaqiara mwatarero atura ntintema kyero ekyaa Kotiva ututai inraikyava nai huvantu kyaani entarara rieqaro atura ntumwaqiro nrivama mate mwaa entaravata qati nraahu atura nti variro.

<sup>23</sup> Hia mwi inraikyava nraahu atura nti variro. Kotiva nai mwanraqura nraante tiri timwhata varurahuama, tirevata mwitaamaqita vi varunanra. Tire Kotiva tiri vara virikyero tiri kyuqema kyaani entara vekya variqatama, tirevata atura ntiqata varunanra.

<sup>24</sup> Haaru tire uaquia hi aanranra qaqlira kyauraro Iesusiva tiri aanra kyuqeraqaa vita kyero vatairara tita, tire tiqata, Nraakiara Kotiva tiri mwamwanta qati vara sivuma kyero tiri viriananrove, timwa kyeta tire mwi entara vekyama varita. Mate hia taqaana inraikyava nraakiara nrianinra mwia vekyama varita. Tire mwi inraikyara taqetavauma hia mwi inraikyara vekya variananra.

<sup>25</sup> Tire hia taqaraitita tiqata, Qutaama mwi entava nri ntaananrove, timwa kyeta mwiaqaatai tiri mwutukya qihakya hi varihata mwi entara vekya variqata taqe varunanra.

<sup>26</sup> Tire hia kepukya vahi nraakye qorahua variqata mwukyaari tu kyeta aanra kyuqera mwiaqaa nrohi varurarora tiro, Kotira mwanraquravanto tiri kyaahaqa hiro. Tire Kotirara aakyara nteqata mwutukyaqitai mwi inraikyara riauraro nrovanto hia kyuqema kyeqaro qua ti varira. Tire mwitaa huraro Kotira mwanraquravanto tiriara rieqaro Kotirara aakyara ntaira.

<sup>27</sup> Mwiva mwitaa ti variharo Kotiva tiri mwutukyaqi taqaiva qioma nai mwanraquravanto qiani quara riemwaqiro quananro. Mwia mwanraquravanto Kotira mwutukya vahi inraikyara ntapihi kyaivara tiro, mwiva Kotira nraaqiara tiri kyaahaqa hiarive tiro, Kotirara ntapihi kyero aakyara nte variro.

<sup>28</sup> Tire ntapihi kyaunana. Kotirara mwutukya vahua nai kyakya hiraqa nyaanrama kyero vataihua varivaro mpo inraikya mpo inraikyavanto mwihuqaa qovara hirera, mwi inraikyava hiama mwihu uaqama nyataananro. Ekyaa mpo inraikya mpo inraikyavanto mwihuqaa qovara hiraro Kotiva mwi inraikyaraqo mwihu kyuqemama nyataananro.

<sup>29</sup> Haaru nraakye qora hia varu entara qumina vakya Kotiva tiqaro, Nte mwi nraakye qorahua nyaanraanrita ni nraaqiarama varivarave, timwa kyero mwihuara nai mwaaqu votima kyeta variate tiro, mwihu nai kyaama tero. Kotiva mwihu nai kyaama tero tiqaro, Ni maaqvanto mwihu sakaava varirata mwihu mwia nrunra qatama varivarave, tura.

<sup>30</sup> Kotiva haaru mwitaa turara tiro, mwiva tiri nai kyaama tai nraakye qorahua nyaanrama taira. Mwiva tiri nyaanrama tero tiriqaa qua vahira taiqa kyero avuqavuma timwa tero tiriara mwihu nivata kuaqaa variate tiro, tiri nyaanrama taira.

### *Kotira mwutukyavanto tiriara vahira hiama mpo inraikyavanto antua kyaananro*

<sup>31</sup> Kotiva tiri mwitaa hirara tita, tire nanra quave qiananra? Kotiva tiri kyaahaqa hirara tiro, tavave tiri nramwutaa variqaro Kotira nraatara kyero tiri uaqama timwa taananro? Hiama qio mpovanto mwitaa hiananro.

<sup>32</sup> Kotiva nai mwaaquara hia ntena tutarerave tiraitiro, qihakyma kyero tiri timwinra. Kotiva mwitaa hivara tiro, mwiva tiri kyaahaqa hirero hiave ekyaa hini inraikya mwivavata apiara votima kyero timwiananro?

<sup>33</sup> Tavave tiri Kotiva nai kyaama taihuaqaa qua vataananro? Hiama mpovanto qio mwitaa hiananro. Kotiva naivanto tiriqaa qua vahira nruka kyero tiri ntapihi kyero vataira.

<sup>34</sup> Tavave ko tiqaro tiriara nkye qutu vivarave qiananro? Hiama qio mpovanto mwitaa qiananro. Iesusi Karaisiva tiriara rieqaro qutu vura. Iesusiva hia ekyaara qutu viraitiro, mwiva qutu vuraqitairo qati siviro kepukyaqama viro mate mwiva Kotira kyauqu kyaatutani variqaro tiriara aakyara nte variro.

<sup>35</sup> Karaisiva mwitaa hirara tiro, tavave tiri Karaisiraqaatairo antua qatiraqaa kyairaro Karaisiva tiri qaqla kyairaro mwia mwutukyavanto hia tiriara vahiananro? Hiama qio mpovanto mwitaa hiananro. Ntaqivave, inronra hivave, mwukyaari tu kyeqata nrohiara entavave, mpovanto tiri uaqama timwa taari entavave, kyara hia vahiraqae qati variara entavave, tuavaaqa hia vahiaro entavave, tiri nraatuqataani entavave, qutuara entavave, mwi inraikyava mwi inraikyava qovara hiro hiama qio tiri antua qatiraqaa kyairaro Karaisira mwutukyavanto hia tiriara vahiraro tiri qaqla kyaananro.

<sup>36</sup> Nte tuntema kyero Kotira mpukuqivata mwitaama kyero qara ntumwa torave.

Mwitaama tiro:

Tire i nraaqiara varuratara tita,

tiri ekyaa enta ru kyevama vahirove.  
 Mwihua sipisipi ru kyaantema kyeta  
 tirivata ru kyarerata uti variarave, tura.

(Ihi 44:22)

<sup>37</sup> Mwihua mwitaa hiqata tiri uaqlama timwa taivaqe tire hia mwianra nronraqama kyeta riaara. Iesusira mwutukyavanto tiriara mpoqiavata vahirara tita, tire qiomma mwi inraikyara nraatara kyeta kepukyaqama kyeta variananra.

<sup>38-39</sup> Mwaa quava qutaa qua vaihana nte ntapihi kyaura. Kotira mwutukyavanto tiriara vaiharora tiro, mwiva Karaisira tiri timwihanro Karaisiva tiriqaa ntaqikyiqiro vi varirara tiro, hia mpo inraikyavanto Kotiva tiriara mwutukya vataira antua kyaananro. Tire qutuaravave, qati variaravave, hiama tiri antua kyaananro. Hiama qio nyaamwunyaahuave, vaanavantove, tiri antua kyevara. Mate vahiari inraikyavata, nraakiara vahiari inraikyavavata, hiama qio tiri antua kyaananro. Nyaamwuni varihuave, mwatani varihuave, Kotiva utu tai inraikyava mpovantove, mwihua mwihua Kotira mwutukyavanto tiriara vahianinraqataita hiama qio antua kyevara.

## 9

### *Poruva nai mwatanaa Iutaara tura*

<sup>1</sup> Nte Iesusira nraaqiara variqananra tina, nte qutaa qua nraahu ti varuvama. Kotira mwanraquravanto ni mutukyaqi ntaqikyi varihananra tina, nte hia unra qua nkyi timwa nyinrenrave.

<sup>2-3</sup> Nte ntene nramwunaa Iutaa ni kuaa nraanrenra riauqaro ni mpoqama kyero ua iharo ni mutukyavanto uaquia ihana variqina vi varurama. Po, aanra qio vahirarovuma Iutaavanto Karaisira qua ntapihi kyeta riaate tiro, Kotiva ni inronra hiro Karaisiraqaatairo ni teqa kyero qatinani tuto kyaarive qianinra.

<sup>4</sup> Kotiva Iutaa mwihuara nraahu tiqaro, Nte nkyi nyaanraanrita nkye ni nraaqiarama varivarave, timwa kyero nai peqa okyara nyaamwutovata taqora. Kuaa mwihuara nraahu tiqaro, Nte mwitaama kyena nkyiqa ntaqikyiqina virerave, timwa kyero Kotiva mwihuara timwa to quara mwihua timwa nyunra. Kotiva kuaa mwihuara nraahu mwataama kyeta mwaanra tiqatama nkye ni nutu tuaaheraqi quate timwa kyero, qaiqaavata kuaa mwihuara nraahu nai kyauqu nriqiqaa vatero tiqaro, Nte nkyi mwitaa mwitaa hirerave, tura.

<sup>5</sup> Kotiva mwitaa tuvata haaru nronra vaisinramwuvata Iutaa mwihua haivaqahua nraahu varura. Karaisivavata kuaa okyara Iutaa okyara mwiqitai nraahu qovarama vura.

Karaisiva vunyaava ekyaa inraikyaa ntaqikyi variva, mwiva ekyaa enta qati nraahu variariva variraqe tire ekyaa enta mwia nrutu tuaaheraqi quara. Nte qutaama tuquo.

### *Kotiva nraakte qora nai kyaama taani okyarara tura*

<sup>6</sup> Qio Iutaavanto hia Kotira qua rie variavata mwia kyaara qiove tire Kotira quavanto raupirima viho qiananra? Hiama mwitaa qiananra. Isarerivanto variavaro hia ekyaa mwihua Kotiva nai kyaama taihua variara.

<sup>7</sup> Hia ekyaa Evarahaamunra nraaqiara mwihua Kotira nraaqiara variara. Kotiva Evarahaamunranra mwitaama tiro, I mwaaku Aisaakira nraaqiara mwihua nraahuma i nraisi varivarave, tura.

<sup>8</sup> Mwi quara okyara mwitaamama vahiro: Hia Evarahaamuva nai kyakya hiraqa mwata taihua Kotira nraaqiara variara. Evarahaamuva tintema kyeta Kotirara qutaama qiaro tihua, mwihuama Kotira nraaqiara varivara.

<sup>9</sup> Kotiva kyauqu nriqiqaa vatero Evarahaamunranra mwitaama tiro, Mwi entara nte uro ntantena tumuanrinro i nraata Seraava qoraisi nraaqiara mwata taananrove, tura.

<sup>10</sup> Hia mwi quava nraahu vahiro. Mpo quavatama vahiro. Revekaara mwaaqutana varuvaro mwitanahua sova kuaikuvanto tiri haivaqava Aisaakiva varura.

<sup>11-12</sup> Revekaava nraaqiara tuaqama virovata hia nraaqiara kaapitana mwata tovata mwitanahua hia kyuqe kyaiqave uaqia hi kyaiqarave varo entara, Kotiva naivanto vu nraato tu kyero qua vatero tiqaro, Vakyaava qata kyaiqa vaisi variananrove, tura. Kotiva nai kyakya hiraqa vaisi nyaanraivara tiro, Kotiva hia mwitanahua kyaiqara riaraitiro, mwia qata nraahu nai kyaama tora.

<sup>13</sup> Kotira qua qara ntumwa toraqi Kotiva mwitaama tiro:  
Iaikopurara ni mutukya vaiharo Isorara hiama ni mutukya  
vaiho, tura.

<sup>14</sup> Kotiva mwitaa tura mwianra tire nanreve qiananra? Kotiva hia ntapihi kyero qua ti varivama varihove qiananra? Qaqao, tire hiama qio mwitaa qiananra.

<sup>15</sup> Haaru Kotiva Mosesira timwa mwinro tiqaro,  
Nte vaisi mpo hia ruataa hiraqe nte mwia hiama ruaninrave.  
Nte vaisi mpore po kye timwa mwataataa hiraqe  
nte mwianra po kye timwa mwataaninrave, tura. *(Kyatura 33:19)*

<sup>16</sup> Mwianra rieqaro hiama qumina vaisi mpovanto tiraro Kotiva mwianra po kye timwa mwataananro. Hiama vaisivanto Kotira kyuqe kyaiqa vara mwatairaro mwianra rieqaro po kye timwa mwataananro. Kotiva nai nraato tu kyero nai mwi vaisirara kyakya hiraro mwianra po kye timwa mwataananro.

<sup>17</sup> Mosesiva qara ntumwa toraqi Kotiva Perorara mwitaama tiro:  
E variqara ni peqa okyara taqenannerave.  
E ni peqa okyara taqairata ekyaa mpo mwatanaa  
mpo mwatanaa ni nutu ntapihi kyevarave.  
Nte mwianra rieqanama nte i nronraqama kyauqara  
e vunyaa vaisivanto variaro, tura. *(Kyatura 9:16)*

<sup>18</sup> Kotira okyaravanto mwitaamama vahiro. Kotiva ta vaisirara po kye timwa mwataataa hiraro Kotiva mwianra po kye timwa mwataananro. Kotiva hia vaisi mpore po qiataa hiraro mwiva vaisi mwiva ni qua riaankyo tiro, mwia vikyokya kepukyaqama kyeroma titaa taananro.

### *Kotiva po qiani okyararavata Kotira raraqa taani okyararavata tura*

<sup>19</sup> Kotira okyaravanto mwitaama vahirera mpovanto nkyiqitairo qaqao tiro tiqaro, Nanraqamave Kotiva tiriqaa qua vataih? Tiriqitairo tavave Kotira kyakya hira raaquta kyaananrove? qiananrove.

<sup>20</sup> Nkyiqitairo mpovanto mwitaa tirera, nte nai timwa mwinrenra. E qumina vaisivanto variqarara tira, e hia Kotirara mwitaa tinanrave. Vaisivanto aatapai vara kyero tave utu taiharo tave mwiva hiama qio tiqaro, Qaqao nanraqamave e ni mwataama kyera utu taaro? qiananro.

<sup>21</sup> Tave utuari vaisiva qioma nai kyakya hianinraqaa tave utuananro. Mwiva aatapai kuaa mwiaqotairo qioma tave mpo kyuqema kyero utu tero tave mpo qumina tave uaqiamma kyerovata utu taananrove. (Mwia votima kyero Kotiva nai varaataa hian kyaiqara varairaqe hiama tire Kotirara e hia mwitaa hiante qiananra.)

<sup>22</sup> Kuaa qarama kyero mpo hia nraakye qorahua mwihua nkyiari uaqia hi kyaiqara utuara kyaara Kotiva mwihua taiqa kyaataara vaiharovata Kotiva qati kyaihata variahura hiave Kotira raraqa tairaro mwihua rirata mwihua mwia peqa okyara taqevara?

<sup>23</sup> Nraakiara Kotiva mpo hi nraakye qorahua ru taiqa kyero mwiaqatairo mwiva qioma tiri mpo hiara nraakye qorahuar po tiro tiqaro, Nte mwihua kepukyaqama kyaarita mwihua nivata kuaaqi variqi vivarave, qiananro.

<sup>24</sup> Kotira kyakya hiva mwitaama vaiharora tiro, mwiva tiri Iutaa mpo hurahuavata, mpo mwatanaa mpo hiahuavata, nai kyaama taira.

<sup>25</sup> Haaru poropeti vaisi Hosainaava qara ntumwa tero Kotiva mwitaama tiho tiro:  
Mpo mwatanaavanto hia niniqama kye variahua, mwihua  
varivaqe nte mwihuarama ni nraakyе qorave qianinrave.  
Ni mutukyavanto hia mwi mwatanaahuara vahuhua,  
mwihuarama ni mutukyavanto vahiananrove.

(Hosaina 2:23)

<sup>26</sup> Nkye hia Kotiranivanto variavo tu mwatara  
mwi mwataraqaaanaa nraakyе qora  
mwihuara mwitaama qiananro,  
Kotiva mwanriqavanto qati variqiro vi variva varirata  
nkye mwia nraakyе qorama varivarave qiananrove,  
tura.

(Hosaina 1:10)

Mwi quara qara ntumwa tova vaiharo mpo quavata vahiro.

<sup>27</sup> Mpo poropeti Asaiaava haaru aakyara ntamwa kyero Isareriera  
mwitaama tiro:  
Nraakiara Isarerivanto nramanri tokyasataa  
nruqa airi vahintema kyeta mwihua airinti  
variraqitairovata Kotiva hia airi sitaraitiro,  
mwiva pataqiatana nraahuma sitaananrove.

<sup>28</sup> Kotiva hia qakyoma kyero ko tiraitiro,  
mwiva qamwanrama kyero ko timwa kyero  
mwihua quaqa vataananrove, tura.

(Aisaia 10:22-23)

<sup>29</sup> Mwitaa timwa kyero Asaiaava haaru mpo quavata tiqaro:  
Kotiva nyaamwuni variahuaqaa ntaqikyi variva  
hia tiri nraakyе qora pata mponramwu  
vekyahu nyataarita nraaqiara mwata humwuanrama  
taivata airi variate titirio,  
Kotiva Sotomivata Komoravata ntuqutu taiqa  
kyontema kyeroma tirivata ntuqutu taiqa kyaihata  
tire taiqama vuratirio, tura.

(Aisaia 1:9)

### *Isarerivanto hia Iesusirara quataave tu quara*

<sup>30</sup> Mwi quara okyara mwitaamama vahiro: Mpo mwatanaavanto varita hia mwihua  
tiqata, Kyai Kotira aanra kyuqera mwiaqaa quare, qiahua variqi vita mwiaqaatai  
mwihua Iesusirara quataa mwivave qiavaro Kotiva mwihua avuqavuma nyataira.

<sup>31</sup> Isareri nraakyе qora Iutaavanto tiqata, Kyai Kotiva Mosesira mwi quara  
riemwaqita quare, timwa kyeta variqi viqata mwihua hia qua okyara mwia ntapihi  
kyeta riaraitita variavaro mwia kyaara Kotiva hia mwihua avuqavuma nyataira.

<sup>32</sup> Nataa ihatave Iutaavanto apiqama quavo? Mwihua tiqata, Tire mwi kyaiqara  
mwi kyaiqara varaqi quararo qiomaa Kotiva qamwata timwa taananrove, timwa  
kyeta mwiaqaatai hia Karaisirara nronraqama kye riaara. Vaisivanto oriqaatairo  
aantapo hiro ntuqutu vintema kyeta mwihua Karaisiraqaatai aantapomaqita ntuqutu  
vi variara. Mwihua Karaisirara api vu nraato rie variara.

<sup>33</sup> Kotira mpukuqi mwitaama tiro:

Taqate, nte Saioniqi (Ierusalemqi) ori mpo  
ntamwa taarita nraakyе qoravanto mwiaqaatai  
ntamwa aantapoma vareta ntuqutu vivarave.  
Ori mwiaqaataita airivanto ntuqutu vivarave.  
Ori mwianra quataave qiariva hiama kyauruananrove,  
tura.

(Aisaia 8:14)

## 10

<sup>1</sup> Po, ni nramwunaahuao, Kotiva ni nramwunaa Iutaa huvantu nyataarive tina, nte Kotirara aakyara nteqana varura. Kotiva mwihua huvantu nyataaninranra nronraqama kyero ni mutukyavanto vahira.

<sup>2</sup> Nte taqauqata Iutaavanto mpoqama kyeta Kotira qua rieta mwia kyaiqa varareru uti variqatavata hia Kotira okyara ntapihiara.

<sup>3</sup> Kotiva avuqavuma nyataani okyarara qaqlira kyeta nkyiari riemwa kyeta mwataama kye avuqavuma nrohiare timwa kyeta, Kotiva nyaamwutai aanranra qaqlira kyaara.

<sup>4</sup> Kotiva Mosesira mwu quava vahuvaro Karaisiva nri ntero mwi okyarara nraatara kyorara tiro, Karaisirara qutaa mwivave qiariva variraro Kotiva mwia avuqavuma mwataananro.

*Kotiva ekyaa nraakye qora huvantu nyatarero uti variho tura*

<sup>5</sup> Haaru Kotiva timwa to quara rieqaro avuqavuma kyero nrohianinranra Mosesiva mwitaama tiro: Mwi quara hia mpoqavata nteqa kyaraitiro, ekyaa mwi quara vataqiro quariva qiomu qati variqiro quananrove, tura.

<sup>6</sup> Mosesira qua riaariva mwitaama vaiharo Karaisira qua riaariva mpo okyarama vahiro. Vaisivanto Karaisirara qutaa mwivave qiariva variraro Kotiva mwia avuqavuma mwataananro. Kotiva mwitaa hianinranra tita, nkye qumina tiqata, Tavave Karaisira vita varero tuminrenro nyaamwuni quananrove, tivora.

<sup>7</sup> Nkye qumina tiqata, Tavave qutu vihua variraqitairo Karaisira vitarero quananrove, tivora. Nkye qumina mwitaa tivora. (Karaivisa nyaamwusairo tuminro uro qutu viro mwitaitiro siviro qati variva, mwiva nkyi nraaqanima variro.)

<sup>8</sup> Karaisira quavanto nkyi nraaqani nkyi nroqaavata nkyi mwutukyaqvatama vahiro. Tire mwi quara Karaisirara kepukyaqama kyeta rieqata nrohiate tuna quara nkyi timwa nyi varunanra. Tire mwitaama tita:

<sup>9</sup> Nkye nkyeta nroqitai tiqata, Qutaama Iesusiva vunyaa vaisivanto variho, tita nkye nkyeta vu nraato mwutukyaqitai tiqata, Qutaama Iesusira qutu vuraqitairo Kotiva mwia qati vara sivuma kyaiharo qati variho, tivera, Kotiva mwianra rieqaroma nkyi huvantu kyero sitaananrove.

<sup>10</sup> Tire vu nraato mwutukyaqitai qutaae qiararo Kotiva tiri avuqavuma timwa taananro. Tire mwi quara nroqitaita qiararo Kotiva tiri huvantu kyero tivi taananro.

<sup>11</sup> Kotira mpukuqi mwitaama tiro:

Karaivisa qutaa mwivave qiariva  
hiama kyaurira inraikya varaananrove, tura.

*(Aisaiia 28:16)*

<sup>12</sup> Ekyaa mpo mwatanaa mpo mwatanaahua mwi quara qiomu tivara. Iutaavantove, mpo mwatanaavantove, hia mpo qarama kyeta variara. Karaivisa ekyaa mwihuaqaa ntaqikyi varira. Karaivisa nraanrama kyero ni kyaahaqa hiante qiani vaisira, Karaivisa kyaahaqama kyero mwia mpoqavata kyuqema mwataananro.

<sup>13</sup> Kotira mpukuqi mwitaama tiro:

Tahuave tiri vunyaa vaisiara aakyara nteqata  
mwia nrutu ntehua mwihua mwiva huvantu kyero  
sitaananrove, tura.

*(Ioeri 2:32)*

<sup>14</sup> Hia Karaivisa qutaa mwivave tihua nataama kyetave mwihua Karaivisa aakyara ntevara? Karaivisa qua hia riaraiqata nataama kyetave mwihua Karaivisa qutaae tivara? Hia mpovanto mwi quara timwa nyinrenra, nataama kyetave mwi quara rievara?

<sup>15</sup> Hia vaisi mpo titairaro mwiva nataama kyero uro mwihua timwa nyiananrove?  
Kotira mpukuqi mwitaama qara ntumwa tova tiqaro,  
Kyuqe mwakyaakya varero uro timwa nyi vari vaisira

nte mwia qamwata mwatarerave, tura.

(Aisaiaa 52:7)

<sup>16</sup> Tire kyuqe mwakyaakya Karaisira qua timwa nyunrata hia Iutaa ekyaa mwihua mwi quarara quataa quave qiara. Haaru tiri haivaqava Aisaiaava tiqaro, Nronrao, tire i qua kyuqe qua mwihua timwa nyunrata mwihua hia tiri quara quataave qiavo, tura.

(Aisaiaa 53:1)

<sup>17</sup> Tire ntapihi kyaunana. Mpowanto Karaisira mwakyaakya mpora timwa mwinranro mwiva mwi quara riaananro. Mwiva mwi quara rieqaroma mwiva Karaisirara quataave qiananro.

<sup>18</sup> Nte nkyi kyapara hirera, Iutaavanto Karaisira qua hia riaarave iho? Qaqao, nte mwihua mwi quara riaaravema, qianinra. Kotira mpukuqi mwitaama tiro:  
Mwihua ekyaa mwatani nrohiqata timwa nyiavaro  
mwihua quavanto viro nrinro ihata  
ekyaa mwatanaa mwihua qua riaarave, tura.

(Ihi 19:4)

<sup>19</sup> Nte qaiqaavata nkyi kyapara hirera. Haaru Karaisirara tu quara hia Iutaa Isareri nraakye qoravanto mwi quara okyara riaarave? Qio mwihua riaarave. Mwihua haivaqava Mosesiva naivanto timwa nyinro tiqaro, Kotiva mwitaama tiho:  
Nkye mpo mwatanaahuara qumina mwatanaave qiahua,  
mwihuara nte ni mwatanaahuave qiarita  
nkye mwianra kyaru ntivarave.

Nte utuariva nkyi qumina hia vu nraatovata  
vahi mwatanaahuara raraqa tairata  
mwihua inronra hivarave, tura.

(Lo 32:21)

<sup>20</sup> Mosesiva mwitaa tuvaro mwia nraakiara Aisaiaava hia aatu hiraitiro, mwitaama tiro:  
Kotiva mwitaama tiho:

Hia nianra puua hi varihua,  
mwihuama ni puaama kyevarave.

Hia nianra ntumwa hiamwa ihua varivaqe nte mwihua suqaama qovara hianinrave tiho, tura.

(Aisaiaa 65:1)

<sup>21</sup> Kotiva Isareriera mwitaama tiho:  
Nte mpo enta mpo enta nkyi kyaahaqa hirera  
ntena kyaauqu tutuqatavata nkye qaqlira kyeta  
ni qua nteqa kyeta ni mwoqa mpi variavo, tura.

(Aisaiaa 65:2)

## 11

### Kotiva Isareriera po kye timwa nyataaninranra tura

<sup>1</sup> Nte vaakya tu quarara rieqana mwataama kyena nkyi kyapara hirerama. Quataave Kotiva nai nramwunaa Iutaa mwihua qoririma nyatero? Qaqao, hia mwiva mwihua qoririma nyatairave. Mwaa ntena mwiva Iutaa Isareri vaisima varuqo. Evarahaamuva ni haivaqavama variho. Nte Iosepira mwaaku Mpenisamininra mwia okyarama varuqo.

<sup>2</sup> Kotiva tauraaqama kyero Iutaa nai kyaama taihua hia mwihua qoririma nyataira. Kotira mpukuqi Iraisaarara qara ntumwa to quara nkye hiave ntapihiavo? Mwi entara Iraisaava hia Isareriera qamwataraitiro, Kotirara mwitaama tiro:

<sup>3</sup> Nronrao, Isarerivanto poropeti vaisi airima ru kyaavo.

Quara ru kyeta i qia quara mwate varia taintara  
mwihua ekyaa ntakuraa kyaavo.

Nte i poropeti kuaiqiyanto nraahu varuqata  
mwihua nivata ru kyarerata uti variavo,  
tura.

(1 King 19:10)

<sup>4</sup> Iraisaava mwitaa tuvaro Kotiva mwia nai nanra qua timwa mwunrave? Kotiva qaqao tiro,  
 Ni nraaqiara variate tina,  
 nte 7,000 vaisi nyaanrama kyena vatauquo.  
 Mwi vaisihua hia unra mwanriqa Mpaarirara  
 tori kyauru ravita variqata qamwata mwataahua  
 variarave, tura.

(1 King 19:18)

<sup>5</sup> Haaru mwitaa huntema kyero mate mwaa entaravata Kotiva nraakyе qorara po  
 timwa nyataivara tiro, mwiva hia ekyaa Isareri mwihua qorirma nyataraitiro, mwiva  
 pata mponramwuanra po timwa nyatero mwihua nai kyaama tero.

<sup>6</sup> Kotiva hia nraakyе qora mwihua kyuqe kyaiqa vara mwataarara riaraitiro, mwiva  
 qati po kye timwa nyateqaro mwihua nai kyaama taira. Kotiva mwihua kyaiqara  
 rieqaro mwihua nai kyaama taitiri, mwiva po tiva hiama qutaaqama vahitiri.

<sup>7</sup> Mwiaqaatai tire nanra quave qiananra? Mwitaama qiananra. Kotiva qamwata  
 nyataani aanranra Isareri nraakyе qora Iutaavanto puaama kyaare timwa kyeta  
 toqaamwu tu kyeta puaamaqi quahuavata hia puaama kyaara. Kotiva nai kyaama  
 taihua, mwihua mwia puaama kye taqaara. Mwihua puaama kye taqaavata Iutaa hini  
 mwihua su nyaato titi vihata mwihua hia Kotira qua rieta.

<sup>8</sup> Kotira mpukuqi qara ntumwa tova tiqaro,  
 Kotiva Isareri nraakyе qorara tiqaro, Nte qio mwihuara  
 ni pupohama mataihana kyauqata  
 mwihua su nyaato qumimaqa ihata variarave.  
 Mwi mwatanaahua haaru hunte, matevata  
 su nyaato qumimaqa ihata variarave, tura.

(Lo 29:4)

<sup>9</sup> Mwitaa tuvaro Ntevitivavata mwitaama tiro:  
 Mwihua omwata nramwaqi vivaro  
 mwi kyarava vaara vuvu taava nraantantamwa kyero  
 mwihua tu varairaqe nte huviqarave qianinrave.  
 Mwihua Kotira qua nteqa kyera kyaara mwihua nyutu  
 vara mwataniqama kyero mwihua qoraqama kyero  
 ntuququtiraqe nte huviqarave nraahu qianinrave.

<sup>10</sup> Kotiva mwihua su qipa kyairata hia qio taqaivaqe  
 nte mwianravata huviqarave qianinrave.  
 Mpo enta mpo enta muaanra ntaani kyaiqara nyinrata  
 mwihua kakataama vita tantuvaantu hita  
 mwukyaari tiqata varaqi vivaqe nte mwianravata  
 huviqarave nraahu qianinrave, tura.

(Ihi 69:22-23)

### Nraakiara Iutaa su nyaato qatua quaninrave tura

<sup>11</sup> Nte qaiqaa nkyi kyapara hirera. Iutaavanto Karaisira qaqlira kyeta huntavaivai  
 hiahua, mwihua ekyaarave kyaamwu ntuavo? Qaqao, hiave. Mwihua Karaisira  
 mwoqa mwianraqaataita mpo mwatanaa mpo mwatanaahua Kotiva nraakyе qora  
 huvantu nyataani quara rie variara. Mpo mwatanaahua mwi quara riemwaqi  
 vivata Iutaavanto mwihua taqeta taara nreqata tiqata, Mwihua variantema tirevata  
 variataarave, tivara.

<sup>12</sup> Mate mwaa entara Iutaavanto Karaisira mwoqa mwianraqaataita mpo mwatanaa  
 mpo mwatanaahua Karaisira qua rieta kyugema variara. Iutaavanto uaqia hi  
 aanranraqaa vi variaraqatairo Kotiva mpo mwatanaa mpo mwatanaahua kyugema  
 nyataira. Qio nraakiara Iutaavanto uaqia hi aanranra qaqlira kyeta Karaisira qua  
 riaivar, qikye, mwi entara Kotiva nraakyе qora kyugema nyataariva nritarero  
 vahiananrove.

<sup>13</sup> Nkye hia Iutaa variavana nte nkyi mpo mwatanaa mwaa quara timwa nyuqo. Nte mpo mwatanaa mpo mwatanaahua timwa nyinrenra huqaro ni titaihana nte mwi kyaiqarara nronraqama kyena riemwaqi vura.

<sup>14</sup> Nte nkyi mpo mwatanaahua timwa nyiqi quarita nina nramwunaa Iutaa hininramwuvanto mwianra ua hita tiqata, Po, tirevata mwi quara riaataarave. Kyai qio riemwaqita quare, tivaro Kotiva mwihua huvantu nyataarive tinama, nte nkyi mpo mwatanaahua timwa nyi varina.

<sup>15</sup> Kotiva Iutaa qoririma nyatairaqaatairo ekyaa mpo mwatanaahua kuaaqi taaqauvi variva qovarama viro. Qio nraakiara Kotiva Iutaa qaiqaa sitaani entaraqaatairo kyuqe inraikyavanto qaiqaa qovara hiananro. Mwihua qutu vihua qati sivita nrohintema kyetama varivara.

<sup>16</sup> Kyara viti mpoqivavanto Kotirani vahianinra mwia hini kyara nronra mwivavata Kotiranima vahiananro. Kyatari mpo tuqavavanto Kotirani vahirera, kyauqu kyaara mwivavata Kotiranima vahiananro.

<sup>17</sup> (Evarahaamunra nraisi mwihua oripi kyatari votima kye variara. Evarahaamuva kyatari tuqa votima kyero varihata mwia nraisi mwihua okyaravata apavata kyaaravata votima kyeta variara.) Kotiva mwi kyatarira kyaara hininramwu qatinani teqa kyero oripi kyatari qaakyauqama vahiraqaatairo nkyi mpo mwatanaa vara kyero nkyiara kyuqema kyeta qupiqaate tiro, nkyi kyatari kyaara teqa kyairaqui vara tomaqa taihata nkyevata kyatari tuqa mwia nronra nramwanri nreqata qio variara.

<sup>18</sup> Nkyi mwitaama kyero tomaqa tai kyaarahua variqatama hia nkyeta mwahuta tita mpo kyaara mwihuara, Nkye qumina kyaarave, qiata. Nkye nkyeta mwahuta tivera, nkye mwaa quara riaata. Nkye hia tuqa mwia kyuqema mwataavo. Tuqavavanto nkyi kyauqu kyaara kyuqema nyate variho.

<sup>19</sup> Mwitaa hirata nkye tiqata, Kotiva naitaraara kyaara mwia teqa kyero tirini mwaata utu tairave, tivera, nte nkyiara mwitaama qianinra.

<sup>20</sup> Nkye mwiaavata quitaama qiaovo. Iutaavanto hia Kotirara quitaave qiavaro mwia kyaara mwihua teqa kyero kyairave. Nkye Kotirara quitaave qiavaro Kotiva nkyi tomaqa tairave. Mwianra rieqata hia nkyeta mwahuta tiqata variata. Nkye aatu hiqata variata.

<sup>21</sup> Iutaa kyatari kyaara taruhua variqata mwihua hia quitaave qiarara tiro, Kotiva mwia kyaara mwihua hia vekyahu nyataraitiro, mwihua teqa kyero kyaira. Nkye hia kyatari kyaara taruhua variqata nkyevata hia quitaave tivera, Kotiva nkyivata hia vekyahu nyataraitiro, qihakayama kyeroma nronraqaatairo nkyi teqa kyaananrove.

<sup>22</sup> Nkye Kotiva po tiravata, raraqa tairavata, ntapihi kye rieta taqeqlata variata. Mpo hiahua Kotira qaqlira kyaavaro Kotiva mwihuara raraqa taiharo varira. Nkye mpo hiahua mwia qua riaavaro Kotiva mwianra rieqaro nkyi kyuqema nyate varira. Nkye mwia qua qati nraahu riemwaqi vivera, Kotiva nkyi kyuqemaqiro quananro. Nkye mwia qua qaqlira kyaivera, Kotiva qihakayama kyero kyatari kyaara teqaintema kyero nkyivata teqa kyaananrove.

<sup>23</sup> Iutaa mwihua uaquia hi aanranra qaqlira kyeta Karaisirara quitaave tivera, Kotiva mwihua qio vara kyero qaiqaa tomaqaanrivara tiro, qiomaa mwihua qaiqaa tomaqa kyero naitarama taananro.

<sup>24</sup> Kotiva nkyi mpo mwatanaahua oripi kyatari qaakyauqama viro vahira votima kye variaraqaatairo nkyi teqa kyero varaqiro uro nraahumwa mpo kyatari kyuqeraqaa nkyi tomaqa taira. Kotiva Iutaa mwihua kyatari kyuqeraqaatairo teqa qatinani kyairara tiro, mwiva mpo enta qihakayama kyeroma qaiqaa mwihua vara naiqaa tomaqa taananro.

<sup>25</sup> Ni kata pakyaa tuaavo, Kotiva mpo qua uqeta taira nkye hia ntapihivo tina, nte nkyi vutu kye timwa nyinrenra. Nkye mwi quara rieqatama nkye hia nkyeta mwahuta tivara. Mwi quara mwitaamama vahiro. Iutaa Isareri nraakye qoravanto hiama Iesusira qoririma mwateta ekyaara mwia qaqlira kyevvara. Nraakiara mpo mwatanaa nraakye qoravanto Kotira qua rieta nrita mwia nraaqiaraqama vita qioqama vivaro, mwiaqatairoma Kotiva Isareri nraakye qora mwihua qaiqaa sitaanano.

<sup>26</sup> Mwataama kyero Kotiva mwihua sitaanano. Kotira mpukuqi mwitaama tiro:  
Nraakye qora huvantu nyataariva  
Saioniqitairo qovara hiananrove.

Mwiva Iaikopura nraisimwanra kyaahaqa hirata  
mwihua hia qaiqaa Kotira qua qoririma kyevvarave.

<sup>27</sup> Nte mwihuaqaa qua vahira nruka taiqa kyaani entarara  
haaru nte kyauqu nriqiqaa vateqana qiava quava  
qutaa mwivauma vahiananrove, tura.

(Aisaiaa 59:20-21)

<sup>28</sup> Iutaavanto Karaisira quara hia qutaa quave timwa kyeta Kotira nramwutaaqa hi variarara tita, nkye mpo mwatanaahua Karaisira quara qutaave qiera. Qio haaru Kotiva Iutaa mwihua nai kyaama tora. Kotiva mwihua haivaqahuara raiharo mwihuaravata mwia mwutukya vahira.

<sup>29</sup> Kotiva nte mwi mwatanaahua ntena kyaama tena mwihua kyuqema nyatarerave tuvara tiro, mwiva hiama mwihua qaqlira kyero nraakiara mwihuara mpo vu nraato tuananro.

<sup>30</sup> Nkye mpo mwatanaahua nkye haaru Kotira qua nteqa kyohua variavaro nraakiara Iutaavanto Kotira qua nteqa kyaaraqatairo Kotiva tuqasaa viro nkyiara po kye timwa nyate varira.

<sup>31</sup> Kuua qarama kyero Kotiva nkyiara po kye timwa nyatairaqaataita Iutaavanto Kotira qua nteqaqita vi variara. Qio mwihua Kotira qua nteqaqita vivaro Kotiva nraakiara mwihuaravata po kye timwa nyataananrove.

<sup>32</sup> Ekyaa mwatani variahua Kotira qua nteqa kyaavaro mwia kyaara Kotiva ekyaa mwihua rupa taira. Mwihua rupa vita varivaqe nte mwihuara po kye timwa nyataankye timwa kyero mwitaa hiro.

### *Kotira nrutu tuaaheraare*

<sup>33</sup> Qikye, Kotira kyuqe okyaravantove, Kotira vu nraatovantove, Kotiva ntapihi paahi hi inraikyavave, piqero veva veva mwutukyara virave. Tavave mwiva tukya hiani inraikyara ntapihiananrove? Tavave mwiva kyaiqa varaani okyarara ntapihiananrove?

<sup>34</sup> Kotira mpukuqi mwitaama tiro:

Tavave Kotira vu nraatoqi vahi quara qio ntapihiananro?

Hiama qio mpovanto ntapihiananro.

Tavave Kotira qua mwaanra mwinro

aanra nraamwutaananro?

Hiama qio mpovanto mwitaa qiananro.

<sup>35</sup> Tavave Kotira mpo inraikya mwitairara rieqaro

Kotiva nai mwiananro?

Hia mpovanto mwia mpo inraikya mwinrave, tura.

(Aisaiaa 40:13)

<sup>36</sup> Kotiva nai ekyaa inraikya utu taivama variro. Kotiva variharora tiro, ekyaa inraikyavanto vahiqiro viro. Mwi inraikyava vahiqiro viqaro mwianima vahiro. Mwitaa hiraqe tire Kotira nrutu nraahu tuaaheraqi ekyaa enta ekyaa enta quara. Quataave.

<sup>1</sup> Ni kata pakyaa tuaavo, Kotiva tiriara nronraqama kyero po kye timwa timwatairara tina, nte kepukyaqama kyenama nkyiara mwitaama tina, Nkye Kotira kyaiqa nraahu vareqata nkye Kotira nraahu qamwata mwatarera utiqata, quara rukye mwintema kye, nkye qati variqata nkyeta vu nraato mwutukya mwamwantave Kotira mwiata. Nkye mwitaa hiqatama quttaaqama nkye Kotira nrutu tuaaherevara.

<sup>2</sup> Hia mwataqaa variahua api nrohiantema kye nrohiata. Nkye api vu nraato tira qaqlira kyaivaro Kotiva nkyi su nyaato kyuqema nyataarive. Kotiva nkyi kyuqema nyatero nkyi qaraakya su nyaato kyuqera nyinrata mwiaqatai qioma Kotira kyakya hiani inraikyara varevara. Nkye mwitaama kye varaqi viqata kyuqe kyaiqa Kotira qamwataani kyaiqara nraahu varaqi viqata nkye hia uqenraani kyaiqara vararaitita, nkye kepukyaqa hiani kyaiqara nraahu varevara.

<sup>3</sup> Kotiva ni kyuqema mataihana nte nkyi kyaahaqa hiariva variqananra tina, nte nkyi kuaiqia kuaiqara mwitaama tina, Hia nkyetara tiqata, Nte kepukyavanto nronra vaisima varuqo qiata. Nkye mwitaama qiata, Kotiva ni kyaahaqa hi varihananra tina, nte Kotirara riemwaqi viqana nte mpo kyaiqa mpo kyaiqa vararerave qiata.

<sup>4</sup> Tire ntapihi kyaunanra. Vaisi mwamwanta vahirero kyuquve, kyuquve, mpo mwamwanta mpo mwamwantave, vaiharo mwi mwamwantava kuaiqia kuaiqavanto mpo kyaiqa mpo kyaiqa vare varira.

<sup>5</sup> Mwia votima kye tire nraakyе qora airi variqata tire Karaisiravata kuaaqi taaqauvi variqata kuaa mwamwanta votima kye varunanra.

<sup>6</sup> Kotiva tiri kyuqema timwa teqaro nai kepukya mpo tiri timwihata tire mponramwuvanto mpo kyaiqa vararahua varurata nkye mponramwuvanto mpo kyaiqa varehuama varita.

Kotiva vaisi mpo, mpo kepukya mwiqanro ni qua nraakyе qora timwa nyante qiariva, mwi vaisiva Kotirara kepukyaqama kye riemwaqiro quaninra mwivauma nraakyе qora Kotira qua timwa nyianri.

<sup>7</sup> Kotiva vaisi mpo, mpo kepukya mwinranro mwi vaisiva nraakyе qora kyaahaqa hiariva quttaaqama kyero kyaahaqa hiari. Kotiva vaisi mpo, mpo kepukya mwinro mpo qua mpo qua okyara timwa nyiqira quante qiariva, mwi vaisiva mwi kyaiqara quttaaqama kyero varaqiro quari.

<sup>8</sup> Kotiva vaisi mpo, mpo kepukya mwinro nraakyе qora kepukyaqama nyatairata mwihua aanra kyuqe hiraqa quate qiariva, mwi vaisiva mwi kyaiqara quttaaqama kye varaari. Kotiva vaisi mpora ena vatena inraikyara tukyama kyera mpohuavata nyante qiariva, mwi vaisiva qihakyama kyero mwitaamaqiro quari. Nrutu vataa vaisivanto hia pupohairaro kyuqema kyero nai kyaiqa varaqiro quari. Mpora kyaahaqa hiari vaisiva hia ua viri ratero mpora kyaahaqa hiari. Mwiva kyuqe viri vatero qamwateqaro mpora kyaahaqa hiari.

<sup>9</sup> Hia unraqama kye nkyeta henahuara tiri mwutukya nkyiara vaiho qiata. Nkyi nramwunaahuara nkyi mwutukya quttaaqama kye vahirata variata. Nkye uaqia hi kyaiqara mwoqa mwita kyuqe kyaiqa tuqara kye tutaata.

<sup>10</sup> Nkye Karaisira nraaqiaraqama vita nkye qata vakya variqata nanrianra nanrianra mwutukya vahirata variata. Nkyeta sata sakyaa nyunra nyakyaa nyutu tuaaheraqita quata.

<sup>11</sup> Hia qoririhiro pupohairata kepukyaqama kye kyaiqa varaata. Nkye Kotira kyaiqa vareqata tiri mwi kyaiqara quttaaqama kye varaataa iho timwa kyeta mwi kyaiqara varaata.

<sup>12</sup> Nkye Karaisira vekya varivaro nkyi mwutukyaqitai kyuqe hi varirata variata. Uaqia hiani entarave, muaanra vahiani entarave, nkye kepukyaqama kye varivaro nkyi mwutukya qihakyama qihakyama kyeqata nrohita variata. Nkye ekyaa enta Kotirara aakyara nteqata variata.

<sup>13</sup> Nkyi henahua hia mpo inraikya vataivata nkyeta vatera ntainra kye mwihuavata nyiata. Mponanyaahua nrivata kyugema kye mwihuqaa ntaqikiyata.

<sup>14</sup> Mpohua nkyi uaqlama nyataivata hia Kotirara aakyara nteqata nkyiarivata uaqlama nyataante qiata. Nkye Kotirara aakyara nteqata mwihua kyugema nyataante qiata.

<sup>15</sup> Qamwateqa vari nraakye qorahua varivata nkye mwihua kyapata qamwateqata variata. Ntateqata vari nraakye qorahua varivata nkye mwihua kyapata ntateqata variata.

<sup>16</sup> Hia mpo qua mpo qua antua qua tiraitita, kuua qua nraahu tiqata nanrianra nanrianra qamwateqata variata. Hia nkye tiqata, Tire nronra vaisi variqata hia qumina vaisivata variananrave tira qaqlira kyeta, nkye qamwateqata qumina nraakye qora kyapata variqi quata. Nkye nkyeta nyutu tuaahereqata ekyaa kyaiqa taqaurahuave tivora.

<sup>17</sup> Mpovanto nkyi uaqlama nyatairata nkye hia nai uaqlama mwataata. Nraakye qoravanto mpo kyaiqa mpo kyaiqa kyuge hirave tira, mwi kyaiqara nraahu nkyi varaataa hirata varaqi quata.

<sup>18</sup> Hia ntaquata. Mwaateraqama vari aanrava vahirera, nkye mwi aanranraqaa nraahu nrohiqata variata.

<sup>19</sup> Ni nramwunaa tuaavo. Nkyi uaqlama nyataivata hia nkyiari uaqlama nyataata. Nkye qaqlira kyaivaro Kotira raraqa taariva mwihuqaa kyaiqa utuari. Kotira mpukuqi mwitaama tiro:

Ntenavanto uaqia hi kyaiqara utihua hiniqa hianinrave.

Ntenavanto mwihua nkyiari kyoqaa nyianinrave,  
tura.

(Lo 32:35)

<sup>20</sup> Nkye mwi quara rieqatama taqaivaro nkyi nramwutaavanto kyara nraataa hiraro varirata nkye mwia kyara mwiata. Mwia nramanri nraataa hirata mwia nramanri mwivarao nraanri.

Quttaaqama kye nkye mwitaa hivaro mwiva nai uaqia hi  
kyaiqarara rieqaroma nkyi suqaa kyauruananro.

(Sindaun 25:21-22)

<sup>21</sup> Uaqia hi kyaiqava nkyi nraatara kyaankylora. Nkye kyuge kyaiqa varaqi viqatama uaqia hi kyaiqara nraatara kyaata.

## 13

### *Tire kamaninra qua riemwaqi quananranra tura*

<sup>1</sup> Nkye ekyaa mwihua kamaninra qua riemwaqi viqata nrohiata. Kotiva hia qiove tiraro hiama qio kamaniva variananro. Kotiva qiove timwa kyero Kotiva kamaninra vataiharoma kamaniva variro.

<sup>2</sup> Mpovanto kamaninra qua nteqa kyaariva, mwiva Kotiva nronraqama taira quama nteqa kyaananro. Mwi quara nteqa kyairaro Kotivavata mwi vaisiraqaa qua vataananro.

<sup>3</sup> Kyugema kyero nrohi vari vari vaisiva hiama kamaninra nraatu aatu hiananro. Uaqia hi kyaiqara utuani vaisivama kamaninra nraatu aatu hiananro. Nkye hia kamaninra nraatu aatu hiraitita, aanra kyugeraqaa nrohirerave tivaro kamaniva nkyi qamwata nyataari.

<sup>4</sup> Kamaniva nkyi kyaahaqa hirata nkye kyugema variate tiro, Kotiva mwia nronraqama kyaiharoma variro. Nkye uaqia hi kyaiqara utiqata mwia kyaarama nkye kamaninra nraatu aatu hivara. Mwiva kepukyavanto variqaro nkyita uaqia hi kyaiqara kyaara qoima nkyita ntuqutuananro. Uaqia hi kyaiqara uti vaisihua ntuqutuarive tiro, Kotiva kamaninra nronraqama kyaira.

<sup>5</sup> Mwianra rieqatama kamaninra qua riemwaqi viqatama nrohiata. Hia nkye kamaniva tiri ntuqutuankyo tita mwianra rieqata mwia qua riemwaqita quata. Nkye

tiqata, Tire Kotira qua rieqata mwia aanraqaa nrohirerave, timwa kyeta kamaninra quavata riemwaqita quata.

<sup>6</sup> Mwi quara rieqatama nkye ntapihi kyeta taakisiqa hiata. Kotiva mwi kyaiqara varaante tiharo kamaniva taakisi vare varira.

<sup>7</sup> Kamaniva nkyiara vaisi taakisive, mwata taakisive, mpo taakisive, kyaate tirata mwi taakisira ntapihi kyeta kyaata. Kamaniva tiqaro, Nkye ni qua riemwaqita nrohiate, tirera, nkye mwi quara riemwaqita quata. Kamaninra kyaiqa vaisi mpovanto nronra vaisi varirera, nkye mwianra nronra vaisive qiata.

### *Nkye mpo huara mwutukya vahirata variqi quate tura*

<sup>8</sup> Nkye mpo inraikya mpohuaqitai vareva qati nkyiqi vahiarivaarave. Nkyeta qata vakyaahuara mwutukya vateva, mwiva nraahu mpo inraikya mpohuaqitai varaavaro qati nkyiqi vahintema kyero vahiarive. Nai hena vaisiara mwutukya vataiva, mwiva Kotiva vato quara qio riemwaqiro vi varivama variro.

<sup>9</sup> Kotiva timwa to quava vahirero hia mpora nraata vaati ntuge hiante, hia mpora ru kyaante, hia mpuara varaante, hia mpova hi inraikyarara i mwutukya ntuarive, ekyaa mwi quavavata mpo quavantovata mwaa quara utaqima vahiro: Inanra i mwutukya vahintema kyero i nramwunaanranravata i mwutukya vahiri.

<sup>10</sup> Nai nramwunaanranra mwutukya vahiri vaisiva hiama mwia uaqama mwataaanano. Nai nramwunaanranra mwutukya vahiri vaisiva ntapihi kyeroma Kotiva timwa to quara ekyaa quama riemwaqiro vi variananro.

### *Tire ntapihi kyeqata nrohiara*

<sup>11</sup> Nkye mwaa entarara rieqatama nanrianra nanrianra mwutukya vahirata nrohilita. Nkye vaiteraqitai sivi entavama nri ntero. Kotiva tiri huvantu kyero tivitaaniranra haaru tire qaraakyaqama kye Iesusirara quataave tiqata riemwaqi quavarava mwi entava mate mwaa qio mpinqiavata vainima vahiro.

<sup>12</sup> Enta hiva taiqarerera iharo qio qaata virera utiho. Mwianra rieqatama tire entaqi variqata varaqi quana kyaiqara qaqlira kyaara. Kyai tire ntuvahairaqanaanra huru kyaamwu voti hira vara kyeta tutara.

<sup>13</sup> Nrivaqe tire aanra kyuqeraqaa nrohiqata ntuvahairaqaa nrohurantema kye kyuqema kye nrohiara.

Tire uera ntaare timwa kyeta ntuvantuama vita variqata uera nramanri nramwaqi quarora. Tire mpo nraakyeve mpo qoravata api nrohiqata mwi inraikyarara rieqata api uaqama kye nte tutiqe hiarora. Tire inronra hiqata ntaquarora. Tire mpova hiani inraikyarara vairiqa hita kyaruntuarora.

<sup>14</sup> Nkye tiri vunyaa vaisi Iesusi Karaisirara nronraqama kye riemwaqi vivaro mwiva nkyi huru kaike votima kyero variari. Nkyi su nyaatovanto uaqlia hi kyaiqara utuaninranra riaaninra qaqlira kyeta hia mwianra riemwaqi nrohiata.

## 14

### *Hia ena qata vakyaa kyaiqa pupitaante*

<sup>1</sup> Nkye taqaivarao nkyi sata sakyaa mpovanto hia kepukyaqama kyero Iesusira vataqiro vi varirera, nkye mwi vaisira hia qaqlira kyaata. Nkye mwi vaisirara tirivata nrumbu variante qiata. Mwitaa timwa kyeta hia qumina mwiva vu nraato tutaani quara kyaara inronra hiata.

<sup>2</sup> Iesusira nraaqiara mpovanto tiqaro, Nte qoma ekyaa kyara nraaninrave, tiharo mpovanto Iesusirara hia kepukyaqa hiva tiqaro, Nte haquruaninra nraahu nrena kepukya kyara hia nranrenrave, tiro.

<sup>3</sup> Ekyaa kyara nraanri vaisiva hiama mpova hia ekyaa kyara nraani vaisirara uaqlia hi vaisivave qari. Qaiqaa hia ekyaa kyara nraani vaisiva ekyaa kyara nraani

vaisira mwianra hia uaqia hi vaisivave qiaro. Kotiva mwitanahuaqama huvantu kyero sitairara tita, mwitanahua hia mwitaa qiatu.

<sup>4</sup> E ta vaisiva variqarave e mpore kyaiqa vaisiara e uaqiamma kyera kyaiqa varaaravave qiaro? Mwia hia i kyaiqave. Mwiaqaa ntaqikyi vaisira nai mwia kyaiqave. Mwivama tiqaro ni kyaiqa vaisivanto kepukyaqama kyero siviro variho hia kepukyaqama kyero siviro variho timwa kyero Iesusiva mwia kyaahaqaiharora tiro, mwiva quataa siviro variananro.

<sup>5</sup> Iesusira nraaqiara mpovanto tiqaro, Mwi entara nronra enta mwaanra entave mwi entara qumina entave, timwaqiro viharo Iesusira nraaqiara mpovanto tiqaro, Qaqao, ekyaa enta mwiva kuaa qarama vaiho, timwaqiro viro. Qio nkye ekyaa mwi quara rieqatama nkyeta su nyaato mwutukyaqitai tukyama kye nanra quave quataa qua vahianinra mwi quara riemwaqi quata.

<sup>6</sup> Vaisi mpovanto mwi entarara nronra entave tiva, mwiva Iesusira nrutu tuaahereqaroma mwitaa tiro. Mpovanto mpo kyara nreqanro mwiva Iesusira nrutuma tuaaherero. Mwiva kyara mwianra Iesusirara kyuqeve timwa kyero nre varira. Mpovanto mwi kyarara nraanrinro Kotiva qiankyorave timwa kyero hia nraiva, mwivavata Iesusira nrutuma tuaaherero. Mwivavata Iesusirara kyuqeve nraahu tira.

<sup>7</sup> Hia tiriqitairo mpovanto nai qati varianinranra nina kyaiqave tira. Mwiva hia nai cutuaninranra nina kyaiqave tira.

<sup>8</sup> Tire qati variqi quarera, mwia Karaisira kyaiqama vahiro. Tire qutu quarera, mwivavata nai Karaisira kyaiqa nraahuma vahiro. Mwianra rieqata tire qati varitave, qutitave, mwia tire Karaisiranivato nraahuma varita.

<sup>9</sup> Karaisiva nte nronravanto qati varihuaqaavata, qutu vihuaqaavata, ntaqikyiqina quankye timwa kyero, mwianra rieqaro mwiva uro qutu viro mwicqitairo qati siviro varira.

<sup>10</sup> Mwianra rieqarama e nanraqamave ena qata kyaiqa tukya hiaro? Nanraqamave e mwia uaqiamma mwataaro? Nraakiara Kotiva ko qiani entara tire ekyaa mwihua mwia vuqaa sivita variararo mwiva tiri tukya hiananrove.

<sup>11</sup> Kotira mpukuqi mwitaama tiro:

Nte qati variqi vuvara tina, nte mwaa quarama tugo.

Nraakiara ekyaa nraakye qora ni puqaa variqata  
tori kyaataa ntaqanta qivarave.

Mwihua tori kyaataa ntaqantaate varita tiqata,

Quataama e Kotiva ekyaa enta variaravave tivarave, tura.

(Aisaiaa 45:23)

<sup>12</sup> Tire ekyaa mwihua kuaiqia kuaiqiyavante Kotira vuqaa variqata ekyaa teta kyaiqa varaanranra timwa qovara hiananrave.

### *Hia mpo inraikya utu kyairaro i qatavanto qora kyaiqaq tumu ntiasi*

<sup>13</sup> Mwi quara rieqatama tire mpohua kyaiqa taqeta tukyama kye uaqia hi kyaiqarave qiarora. Mwi quara qaqira kye mwataama qiatu. Ni katavanto nte utuaninra taqero mwivavata uaqia hi kyaiqara utuankyorave, kyai nte kyuqe kyaiqa nraahu varaankye, qiatu.

<sup>14</sup> Nte Iesusiravata variqana mwaa quara quataaqama kye riaura. Ekyaa kyara vaharo hia mpo kyaravante Kotira vuqaa uaqia hirave. (Tire ekyaa kyara nraanranro Kotiva hiama tiriara qiananro.) Mwi quava vahana nte mpo quavata tirera. Vaisi mpovanto nai riemwa kyero tiqaro, Mwi kyarara nrena Kotira qua nteqa kyaankyorave qiariva, mwia vaisiva mwitaama kyero riero mwi kyarara nrainrenra, mwiva mwi kyarara nreqaro Kotira qua nteqa kyaananrove.

<sup>15</sup> Nkye mpo kyara nre varivaro nkyi sata mpovanto nkyiara tiqaro, Kotiva qao ti kyarara hia nraate, tirata nkye qati nraahu mwi kyarara nre varivaro mwiva nkyi sata mwia vara uaqiamma kyaaninra nkye hia kyuqema kyeta varivaro nkyi

mwutukyavanto hiama nkyi satara vahiananro. Karaisiva nkyi sata mwianravata rieqaro qutu vurara tita, nkye apiqama kye variqata nkyeta kyara mwiaqo mwia vara uaqiamma kyevora.

<sup>16</sup> Mwianra rieqatama nkye ekyaa kyara nrehua variqatavata nkyeta qatara rieqata hia ekyaa kyara nraata. Nkye mwitaa hivaro mwiva nkyiara uaqia hi kyaiqara utuavo qiankyora.

<sup>17</sup> Kotiva tiri ntaqikyi variva, mwiva tire nramanrive kyarave nraananra, mwianra mwiva hia nronraqama kyero riero. Tire avuqavuma kye nrohi varuraro Kotira mwanraquravanto tiri kyaahaqa ihata tiri mwutukya qihaakyama vaihata qamwateqa varunana, mwianrama Kotiva nronraqama kyero riero.

<sup>18</sup> Vaisivanto mwitaama kyero nrohiqaro Karaisira kyaiqa varaqiro viraro Kotiva mwia qamwata mwatairata nraakye qoravantovata mwianra kyuqe vaisive tivara.

<sup>19</sup> Mwinra rieqatama mpo inraikya mpo inraikyavanto tiri mwutukya qihaakyama hianinra timwianinra, mwi kyaiqara nraahu varaqi viqata nai kyaahaqa hi nai kyaahaqa hiqata variara.

<sup>20</sup> Tire kyara nraananranra nraahu riemwaqita quararo Kotira kyaiqvavanto uaqiamma quankyyora. Tire ekyaa kyara qiomma nraananra. Tire ekyaa kyara nreqatavata tire mwitaama nraanrava tiri qata vakya mpo uaqiamma mwataankyo tita, tire hia mpo kyara nraanra.

<sup>21</sup> Nkyi sata mpovanto tumu ntuanqyo tita nkye quarave, uainive, mpo kyarave, hia nraata. Nkye mwitaa hiqata kyuqe aanraqaama vivara.

<sup>22</sup> Nkye mwi kyarara qiomma nraanranro hiama tiriqaa qua vahiananrove tivera, mwia nkye hia mpohuavata timwa nyinraitita, qati kyaivarao mwi inraikyava Kotikya nkyitani vahiari. Vaisivanto nte mwi kyaiqara varararo hiama ni kyauruananrove timwa kyeqaro varaqiro quariva qamwateqaro variananrove.

<sup>23</sup> Vaisi mpovanto mpo kyara nranrenra hiro tiqaro, Nte mwaa kyarara nraanrinro Kotira nianra qiananrove iho, hiave qiananrove? timwa kyero nraanriva, mwiva Kotira vuqaa uaqia hiraro mwiaqaa qua vahiananrove. Tire mpo kyaiqa vararerera hitave, mpo kyara nranrenra hitave tire tiqata, Tire mwaa kyaiqara vareta mwaa kyarara nreta hiararo Kotira tiriqaa qua vataananrove, hiave qua vataananrove, timwa kyeta mwitaa hiqata Kotira qua nteqa kyaararo tiriqaa quama vahiananro.

## 15

### *Mwataama kye mpohua kepuuyaqama nyataate tura*

<sup>1</sup> Tire Kotira aanraqaa kepuuyaqama kye nrohi variarahu mpohua Kotira aanraqaa hia kyuqema kye nrohi varihua kyaahaqa hiara. Tire teta kyuqema kye variqi quananranra nraahu riemwaqi quarora.

<sup>2</sup> Tire kuaiqia kuaiqvavanto teta qata vakyaara rieqata mwihua kyuqemaqita quarata mwihua kepuuyaqama vita Kotira aanraqaa kyuqema kye nrohiata.

<sup>3</sup> Karaisivavata hia nai kyakya hi kyaiqara varora. Karaisiva Kotira kyakya hi kyaiqara nraahu varora. Kotira mpukuqi Karaisiva Kotirara mwitaama tiro: Mwihua iara uaqia hi quara qiaava niqaa tumu ntihana ntema mwia varauqo, tura.

(Ihi 69:9)

<sup>4</sup> Haaru Kotira mpukuqi qara ntumwa to quava ekyaa mwi quava tiri kyaahaqa hiarive tita, qara ntumwa tora. Tire mwi quara rieqatama hia tiri pupohairaqe kepuuyaqama kye Kotira aanraqaa nrohiqatama nyaamwusairo tumu tiri tivitaaninra veqya variananra.

<sup>5</sup> Nkye hia qoriri hiraitita kepuuyaqama kye nrohiate tiro, Kotiva nkyi kyaahaqa hi variro. Qio nte mwia nraanranrinro mwiva nkyi kyaahaqa hirata nkye Iesusi Karaisiva nrohinetema kye nrohiqata nkyevata kuaa qua nraahu timwaqi quate.

<sup>6</sup> Nkye kuaa qua titaa kuaa vu nraato vateta Kotira nrutu tuaaheraqi quata. Nkye Iesusi Karaisira tiri vunyaa vaisi mwia qora Kotira nrutu tuaaheraqi quata.

### *Karaisira quavanto mpo mwatanaahuaravata vahirama*

<sup>7</sup> Karaisiva nkyiara qamwateqaro nkyi sitaintema kyeta nkyevata nkyeta henahua sita kye vateta qamwateqata kuaaqi varivaro Kotira nrutuvanto virito vahiari.

<sup>8</sup> Nte nkyi timwa nyinrenra. Kotiva kyauqu nriqiqaa vatero Iutaa haivaqahuara tu quava qutaa mwivau vahiarive tiro, Karaisiva Iutaa kyaahaqa hirero mwatani tuminro.

<sup>9</sup> Mpo mwatanaa mpo mwatanaahuavata Kotiva mwihuara po kye tira rieqata mwia nrutu tuaaheraate tiro, Iesusiva mwatani tumunra. Kotira mpukuqi mwitaama tiro: Nte mpo mwatanaa mpo mwatanaahua utaqaa variqana i nrutu tuaaherarerave.

Nte ihi tiqana i nrutu tuaaherarerave, tura.

(2 Samueri 22:50)

<sup>10</sup> Kotira mpukuqi qaiqaavata tiqaro,

Nkye mpo mwatanaa mpo mwatanaahua Kotiva  
Iutaa nraakyne qorara nainive tihua, mwihuara kyapata  
kuaaqi varita qamwateqata variate, tura.

(Lo 32:43)

<sup>11</sup> Kotira mpukuqi qaiqaa mpoqiaavata tiqaro:

Nkye ekyaa mpo mwatanaa mpo mwatanaahua  
nkyeta nronra vaisi mwia nrutu tuaaheraate.

Mwata maata vahintema varihua  
mwia nrutu nraahu tuaaheraate, tura.

(Ihi 117:1)

<sup>12</sup> Aisaiaava qaiqaa mpoqiaavata nraahu tiqaro,

Ntevitira qora Iesira okyaraqitairo  
vaisi mpo qovara hiananrove.

Mwi vaisiva nronraqama viro ekyaa mpo mwatanaa  
mpo mwatanaahuqa qtaqikyi varirata

mwihuara mwiaqaa vuntuvi varita tiqata,

Mwiva tiri kyaahaqa hiraqe mwiavata uro variaravama  
variho, tiqatama mwia vekya varivarave, tura.

(Aisaiaa 11:10)

<sup>13</sup> Qio Kotiva Karaisira nronraqama kyairara tita, nkye mwi vaisirara tiqata, Karaisiva tiri kyaahaqa hiraqe mwiavata uro variaravama variho, ti variara. Nkye Karaisirara riemwaqi vivaro Kotiva nkyi kyaahaqa hi variraro nkyi mwutukya qihakya hi varirata kyuqema kye variqata nrohiata. Kotira mwanraquravanto nkyi kepuqya nyinrata nkye Karaisiravata kuaaqi vari entara vekya variata.

### *Poruva mpo mwatanaahuaqi kyaiqa varorara tura*

<sup>14</sup> Ni kata pakyaa tuaavo, nte nkye variara mwianra ntene riemwa kyena nte nkyiara kyuqe hiahuvema tuqo. Nkye aanra kyuqe hiraqa nrohia okyarara mwia ntapihima kyaavo. Nkye qioma nai kyaahaqa hi nai kyaahaqa hivarave tuqo.

<sup>15</sup> Nte mwaa qara ntumwa tauraqi kepuqyaqama kyenama nkyiara tuqo. Hia nte aatu hiqana mwi quara qara ntumwa tauqo. Kotiva ni kyuqema mateqaro

<sup>16</sup> nianra e Iesusi Karaisira kyaiqa vaisi variqara mpo mwatanaahua kyaahaqa hiante tihanana tina, nte hia aatu hiraitina mwitaa tina. Kotiva qamwateqaro variarive tiro, Kotira nraamwuqi kyaiqa varai vaisiva quara ru kyero mwintema kye ntevata Kotiva nkyiara qamwateqaro variarive tina, nte nkyi Kotira qua kyuqe mwakyaakya timwa nyi varura. Nte mwi quara nkyi timwa nyuqanro Kotira mwanraquravanto nkyi kyuqema kyaiharo Kotiva nkyiara qamwateqaro variro.

<sup>17</sup> Nte Karaisiravata taaqauvi variqana nte Kotirani vara mwatau kyaiqarara rieqanama nte ntene mwahuta tuqo.

<sup>18</sup> Hia mwi kyaiqara ntenanraa varaurara rieqana ntena mwahuta tuqo. Karaisiva ni kyaahaqa ihana varaurara rieqanama ntena mwahuta ti varuqo. Karaisiva ni kyaahaqa hi varihana nte Karaisira qua timwaqi viqana Karaisira kyaiqavata varaqi vuqata mwiaqaatai mpo mwatanaa mpo mwatanaa Kotira qua vataqi vi variara.

<sup>19</sup> Kotira mwanraquravanto ni kepuqyaqama kyaihana nte nronra kyaiqa, hia taqaa kyaiqara varaqi viqanama mwi quara timwa nyiqi vi varura. Nte Ierusaremisaina toharama kye mpo mwatukya mpo mwatukya ekyaa Karaisira qua nraakye qora timwa nyiqina vuva mwatukya mpo Iririkaamini nri ntaurave.

<sup>20</sup> Nte tiqana kyai nte Karaisira qua hia rie mwatanaahua vari mwatukyaraqi nrohiqana timwa nyiankye turave. Vaisi mpovanto nraante Karaisira qua timwa nyiani mwatukyaraqi nte qumina qaiqaa timwa nyiankyorave timwa kyena, qaraakya nraakye qora hia Karaisira qua riaahua uro timwa nyinrenra uti varurave.

<sup>21</sup> Nte Kotira mpukuqi tintema kye tirera.  
 Kotira mpukuqi mwitaama tiro:  
 Hia timwa nyihua, mwihua qioma  
 Kotira kyaiqa taqevarave.  
 Kotira qua hia riehua, mwihua mwi quara  
 ntapihi kye rievarave, tura.

(Aisaiia 52:15)

### *Poruva Romini quaninranra vu nraato tu kye vatora*

<sup>22</sup> Nte qaraakya mwatanaahua mwi quara timwa nyiqana mpo enta mpo enta nkyi uro taqaankye tuqaro mwi kyaiqava ni ntavaaqavu taihana nte hia nkyi uro taqena.

<sup>23</sup> Airi ihiara nte nkyi taqarera uti varura. Mate ekyaa mwi mwatukyaraqi kyaiqa taiqa kyenanra tina, nte qioma uro nkyi taqaaninra.

<sup>24</sup> Nte mwata mpo Sipeninianra viqanama uro nkyivata vari kyenama quaninra. Nte nkyi kyapata uro variariro ni mutukyavanto kyuqe hiraqe variarita nkye ni kyaahaqa hiqata ni pitaqita Sipeninianra qua aanranra ni naamutaivaqe nte quaninra.

<sup>25</sup> Mate nte hiama nkyi taqarera quaninra. Mate nte Ierusaremini Kotira nraakye qora mwini variahua kyaahaqa hirera virera.

<sup>26</sup> Iesusira nraaqiara Masentoniaani variahuvata Akaiaani variahuvata munima ntuvaantuama kye tiqata kyai tire Iesusira nraakye qora vehiqa hiahua Ierusaremini variahua kyaahaqa hiare timwa kye mwihua ntuvaantuama taa munimanra nte varaqina uro mwihua nyinrenrave.

<sup>27</sup> Mwihua qamwateqata mwi munimanra ntuvaantua hiataa ihata ntuvaantuama taarave. Iutaavanto mpo mwatanaahua nyitorara rieqata mwihua nkyiari nyita. Haaru Iutaavanto Ierusaremisaita Iesusira qua mwanraqura kyaahaqa hianinra nyunranra tita, mate qioma mpo mwatanaa mwihua mwianra rieqata nkyiarivata mwamwanta kyaahaqa hiani inraikyara nyivara.

<sup>28</sup> Qio nte mwihua ntuvaantuama taa munimanra varaqina uro nyina ekyaa mwi kyaiqara taiqa kyena nte mwiaqaatai Sipenini virera. Mwinianra viqana uro nkyivata vari kyena virera.

<sup>29</sup> Nte ntapihi kyauqo. Nte uro nkyi kyapata variariro Karaisiva mpoqiyavata nkyi kyuqema nyatairata nkye kyuqema varivarave.

<sup>30</sup> Ni kata pakya tuaavo, nte tiri vunyaa vaisi Iesusi Karaisira nrutuara rieqanama, nte Kotira mwanraquravanto tiriara mwutukya vatairara rieqanama, nte nkyiara kepuqyaqama kyena mwitaama tina, Nte Kotirara aakyara nte variarita nkyevata nianra rieqatama Kotirara aakyara nteqata variate, tuqo.

<sup>31</sup> Nkye Kotirara aakyara nte varivage nte Ierusaremini quarita Iutaavanto Iesusira qua hia riaahua, mwihua hia ni uaqjama mataivage nte Iesusira nraaqiara mwini variahua qio kyaahaqa hiarita mwihua ni kyaiqara qamwataata.

<sup>32</sup> Nte mwitaa hiariro Kotiva nkye hinani qio quante tirera, ni mutukyaqitairo kyuqe hiraqe nte nkyi kyapata uro varianinra.

<sup>33</sup> Kotiva mwutukya qihakya hi varira mwia okyaravanto varivara tiro, mwiva nkyivata variqiro viraro nkyi mwutukyavanto qihakya hi varirata variata. Qutaave.

## 16

### *Poruva Romini varuhua qua mwantora*

<sup>1</sup> Nte nraakyeva mpo Pipira titaariro mwiva nkye hinani uro variari. Mwi nraakyeva tiri tinrakyaavama variro. Mwiva mwatukya mpo Senkiriqa variqaro Iesusira nraaqiaranramwu kyaahaqa hi vari nraakyevama variro.

<sup>2</sup> Mwi nraakyeva nkye varinani uro ntairata nkye Iesusira nraaqiara variahuara tita, kyuqema kyema mwi nraakyera qamwata mwateta kyuqema kye vita vataata. Mwi nraakyeva airi nraakyevata nivata kyaahaqa hi varirara tita, nkye mwia kyaahaqa hivaro mwiva qio variari.

<sup>3</sup> Nte Pirisiraaravata, mwia vaati Akuiraaravata, qua mwantauqo. Nte mwitanahua-vata Iesusi Karaisira kyaiqa kuua mwia varaqita vunanrama.

<sup>4</sup> Haaru mwitanahua ni kyaahaqa hiqata mwitanahua hia nkyiari mwamwantara nronraqama kyeta riora. Hia nte nraahuuma mwihuara qamwatena. Ekyaa mpo mwatanahua Iesusira nraaqiara mpo mwatani mpo mwatani variahuara, mwihuavata mwitanahua qamwate variara.

<sup>5</sup> Iesusira nraaqiara mponramwuvanto mwitanahua nraamwuqi ntuvaantua hi-hua, mwihuavatama nte qua nyantauqo.

Nkye ni toti kyuqera Epinitasira qua mwantaura timwa mwiata. Esiaaqitairo mwi vaisiva nraante vuniqama kyero Iesusira nraaqiaraqama vura.

<sup>6</sup> Mariaara qua mwantauravata timwa mwiata. Mwi nraakyeva nkyiarave tiro, toqaamwu tu kyero kyaiqa varaira.

<sup>7</sup> Nte Antaronikaasikya Iuniasikya qua nyantaura timwa nyiate. Mwitanahua ni votima kye Iutaatana variara. Mwitanahua karavuqi nivatama kye variqi vurama. Iesusiva nronraqama kyai vaisihua mwitananra vaisi kyuqe hiatanahuave ti variara. Mwitanahua nraante Iesusira nraaqiaraqama quavana nte mwihua nyaakiara Iesusira nraaqiaraqama vura.

<sup>8</sup> Nkye Ampirietaasira qua mwantaura timwa mwiata. Mwi vaisiva Karaisikyantiri varirara tiro, ni mutukyavanto mwianra vahana varura.

<sup>9</sup> Nkye Epaaninra qua mwantaura timwa mwiata. Mwiva tiri nraantantamwa kyero Karaisira kyaiqa vare varira. Sitekisiravata qua mwantaura timwa mwiata. Mwiva ni toti kyuqevama variro.

<sup>10</sup> Nkye Aperisira qua mwantaura timwa mwiata. Tire taqauraro mwiva Karaisirara riemwaqiro viharo hia pupohai vaisivama variro. Nkye Arisitopiuraasira nraamwuqi variahuavata qua nyantaura timwa nyiata.

<sup>11</sup> Nkye Herotioninra qua mwantaura timwa mwiata. Mwivavata ni mwatanahua variro.

Nasisaasira nraamwuqi Iesusira nraaqiara variahuavata qua nyantaura timwa nyiata.

<sup>12</sup> Nraakyevata Taraipinaanravata Taraiposaaravata qua mwantaura timwa nyiata. Mwitanahua Karaisira kyaiqa kyuqema kye vare variara. Pesisiravata qua mwantaura timwa mwiata. Mwi nraakyevavata kyuqema kyero Karaisira kyaiqa vare varira.

<sup>13</sup> Rupaasiravata qua mwantaura timwa mwiata. Mwiva kyuqema kyero Karaisira vataqiro vi varira. Mwia nronravata qua mwantaura timwa mwiata. Mwiva ni ntova votima kyero niqaa ntaqikyiqiro vira.

<sup>14</sup> Nkye Asinkiritasirave, Pirikoninrave, Hemaasirave, Pataropaasirave, Hemisirave, mwihua qua nyantaura timwa nyiata. Mwinramwuhua kyapata variahuavata qua nyantaura timwa nyiata.

<sup>15</sup> Nkye Pirorokaasiravata, Iuriaaravata, Neriaasiravata mwia nrunravata, Orimpaasiravata, ekyaa mwihua kyapata variqata Kotira qua rie variahuavata, nte qua mwantaura timwa nyiata.

<sup>16</sup> Nkye qua mwanteqata kyugema kye kyauquvata nyiqi quata. Mwaisaita ekyaa Iesusira nraaqiaravanto nkyiara rieqata nkyi qua mwantaavo.

### *Poruva ekyara qua tura*

<sup>17</sup> Ni kata pakya tuaavo, nte nkyiara rauriqata variate qiani quara ntapihi kye riaate. Vaisi mponramwuvanto api qua tivata nkye ntainra vita mpo qua mpo qua rieta mpo aanraqaa quarorave tita, mwihuara rauriqata variata. Mwi vaisihua tire nkyi timwa nyuna quara qaqlira kyeta mpo qua nkyi timwa nyi variarave. Nkye mwihua nyaatu nyianrato variata.

<sup>18</sup> Mwitaama kye qua ti varia vaisihua hia tiri vunyaa vaisi Iesusira kyaiqa vare variara. Mwihua nkyiari kyakya hi kyaiqara vare variara. Mwihua vaisiara qamwata kye vateta qiakyaa hi quara kyugema kye ti variavata qumina vaisivanto mwihua unra quara quataa quave ti variara.

<sup>19</sup> Ekyahua riavata nkye kepuqyaqama kye Iesusira qua riemwaqita vi variara nte mwianra rieqana nte nkyiara qamwate varura. Nkye mpo kyaiqa mpo kyaiqa kyuqe hianinranra nraahu riemwaqi viqata hia uaqia hi kyaiqarara riaivaqe nte nkyiara kyugema hita hiavo qianinra.

<sup>20</sup> Kotiva mwutukya qihaakya hi varira mwia okyaravanto varirara tiro, tiri mwutukyavanto qihaakya hi varihata varita. Pataqia vari kyero Kotiva nkyi kyaahaqa hirata nkye qiomma Saataaninra nraatara kyeta varivara. Tiri vunyaa vaisi Iesusiva nkyi kyugemaqiro virata nkye qio variata.

<sup>21</sup> Timotiva nivatama kyero variqaro kyaiqa varaqiro vi variva, mwiva nkyi qua mwantero. Ni mwatanaa Iutaa vaisinramwu Rusiaasivavata, Iesonivavata, Sosipataavavata, nkyi qua nyanteta.

<sup>22</sup> Nte Tetiaasiva Porurani mwaa quara qara ntumwa mwataura. Nte Iesusira qua riauvama, ntevata nkyi qua mwantena.

<sup>23</sup> Kaiasivavata nkyi qua mwantero. Nte Poruva mwia nraamwuqi varuvama. Mwia nraamwuqi Iesusira nraaqiaranramwu ntuvantua hiara. Erasitasivavata nkyi qua mwantero. Mwiva mwatukya nronra mwaaqi variqaro mwaaqinaa munimaqaa ntaqikyi vari vaisivama variro. Tiri qatavanto Kuotasivavata nkyi qua mwantero.

<sup>24</sup> Tiri vunyaa vaisi Iesusiva nkyi ekyaa mwihua kyugema nyataari. Qutaave.

### *Poruva Kotira nrutu tuaahereqaro tura*

<sup>25</sup> Nrivaqe Kotira nrutu tuaaheraara. Nte Iesusira Karaisira qua nkyi timwa nyuqata nkye mwianra kepuqyaqama kye riemwaqi vi variara qiomma Kotiva nkyi kepuqyaqama nyataananro. Mwi quava haaru mpuahaama kyero uqeta viro vaharama.

<sup>26</sup> Mwaa entara mwi quava qoqaa qovarama viro vahiro. Poropeti vaisinramwuvanto mwi quara qovarama kyaavaro Kotiva ekyaa enta variqiro vi variva tiqaro, Mwi quara ekyaa mpo mwatanaa mpo mwatanaa timwa nyivata mwihua mwi quarara quataave timwa kye riemwaqita quate, tira.

<sup>27</sup> Iesusi Karaisiva tiri vunyaa vaisivanto varihata tire mwia nraaqiara varurahuara tita, nrivaqe Kotira nrutu tuaaheraara. Kotiva kuaikuvanto ekyaa okyara ntapihivama variro. Qutaaqama kyenama tuqo.

## 1 KORINTI

### Poruva Korintiqinaahuani hoqarenaa qara vara kyora

Iesusira vara sivuma kyovaro nyaamwuni uro varuvaro 25 ihive 30 ihive nritarovaro Poruva mwaa quara qara ntumwa tora. Mwi entara Korinti mwatukya nronra vahuvaro Poruva nraante mwi mwatukyaraqinaahua Karaisira qua timwa nyuvata mwihuaqitai mponramwuvanto Iesusira nraaqiaraqama vita varura. Mwihua Iesusira nraaqiaraqama vita variqi viqa inronra hita nkyiariara nkyiariara ntainra vita variqata hia kyuqema kyeta Karaisira qua riemwaqi vi varuvarora tiro, Poruva mwaa quara qara ntumwa tora.

<sup>1-2</sup> Nte Poruva, Kotiva nai kyakya hiraqa ni naanrama kyero ni nronraqama kyaihana nte Iesusi Karaisira qua nraakyе qora timwa nyi varuvama varina. Nkye Kotira nraakyе qora Korintiqinaahua variavata tiretana tiri tiqata vakyaa Sositenisikyantirma mwaa quara qara ntumwa teta.

Nkye hia uaquia hi kyaiqara utiraitita Kotira nraakyе qora kyuqehua variate tiro, Kotiva nkyi nyaanrama taiharo Iesusi Karaisiva nkyi kyuqema nyataihata nkye Kotiranivanto variara. Ekyaa Kotira nraakyе qora Iesusi Karaisira nrutu nte variahua mpoqi mpoqi variavaro Iesusi Karaisiva mwihuaqaaavata nkyiqaavata ntaqikyiqiro vi varira.

<sup>3</sup> Tiri tiqova Kotivavata, tiri vunyaa vaisi Iesusi Karaisivavata, nkyi kyuqema nyatairaro nkyi mwutukyaqitairo qihaakya hirata variata.

#### *Poruva Kotirara kyuqeve tu quara*

<sup>4</sup> Kotiva Iesusi Karaisira kyaiqara rieqaro nkyiara po tiro nkyi kyuqema nyataira mwianra rieqanama nte Kotirara kyuqeve tina.

<sup>5-6</sup> Tire Karaisira qua nkyi timwa nyunrata nkye kepuqyaqama kyeqata mwi quara riemwaqi viqata Karaisiravata variarara tiro, Kotiva nkyi kyaahaqa ihata nkye kyuqe qua, mpo qua mpo qua okyara qio ntapihita nkye Karaisira qua vutukye timwa nyihua variara.

<sup>7</sup> Nkye mwitaa hia nraakyе qorahua variahuara tita, nkye tiri vunyaa vaisi Iesusi Karaisira vekya variqata nkye qamwateqa mwiva qovara hianinranra taqeqlata variara. Nkye mwia vekya variavaro Kotiva nkyiara kyuqe kyaiqa nraahu varaate tiro, Kotiva nai kepuqya mpo kepuqya hia mpoqia eqaraitiro, ekyaa kepuqya nkyi nyinra.

<sup>8</sup> Tiri vunyaa vaisivanto Iesusi Karaisiva qovara hiani entaraqaa hia nkyiqa qua vahirata nkye mwi entaraqaa kyuqema kye variate tiro, Karaisiva nkyi kyaahaqa hi varirata nkyi hia pupohairata aanra kyuqeraqaa variqi vita uro taiqa kyevara.

<sup>9</sup> Tiriara mwihua Kotira mwaaqu Iesusi Karaisira tiri vunyaa vaisivata kuaaqi taaqauvi variate tiro, Kotiva tiri tinraanrainrama. Kotiva tiri tinraanrama taihata tire qiomaa Kotirara mwutukya qihaakya hiraqe variqi quananra.

#### *Nkye ntainra vita variqata mpo qua mpo qua tivorave tura*

<sup>10</sup> Ni kata pakyaa tuaavo, tiri vunyaa vaisi Iesusi Karaisiva ni nronraqama kyaivara tina, nte nkyiara poma tuqo. Nkye ntainra vivorave nkye kuaa qua nraahu timwaqi viqata kuaa qua mwianra nraahu eo qiata. Nkye kuaaqi variqata kuaa qua riemwaqi viqata Kotira kyaiqa kuaana variqata varaqi quata.

<sup>11</sup> Ni kata pakyaa tuaavo, nraakyе mpovanto mwia nrutu Koroiva varihata mwia nraamwuqi variahua ni timwa mpiqata nkyiara inronra hiqata variavo qiavana riaura.

<sup>12</sup> Mwihua nkyiara mwitaama tita. Nkye mpo hiahua tiqata, Tire Porura vataqita vurahuave, qavata mpo hiahua tiqata, Tire Aporosira vataqi vurahuave, qavata mpo hiahua, Pitaara vataqi vurahuave, qavata mpo hiahua, Karaisira vataqita vurahuave, ti variavo qavana riaurave.

<sup>13</sup> Qikye, nkye mwitaa tiqata qiove Karaisira utaqaa tukyama kye hini hini varevara? Qaqao, nkye hiama qio mwitaa hivara. Nkyiara rieqata ni Porura kyatariqaa ru kye hiritorave iho? Nkye nramanri vareqata ni Porura nrutuara rieqata nramanri varaarave iho? Qaqao, hia nkye mwitaa hiarave.

<sup>14</sup> Nte nkyiqitaina vaisi taaratana nraahu nramanri nyunrave. Nte Kirisipaasiravata Kaiasiravata nraahu nramanri nyunrave. Nte hia airi vaisi nramanri nyinraitina, vaisi taaratana nraahu nramanri nyunranra rieqana Kotirara kyuqeve tuqo.

<sup>15</sup> Nte vaisi taaratana nraahu nramanri nyunranra tita, nkye hiama qio tiqata, Tire Porura nraaqiara nraahuma varuro, tivara.

<sup>16</sup> Nte mpoqiaavata nramanri mwunranra taunru kyaquo. Mwia Sitepanaasiravata, mwia nraamwuqi variahuavata, nramanri nyunrave. Nkyi utaqitaina mpoqianivata nramanri nyianinra mwia hia ni pu nyaatoqi ntaho.

<sup>17</sup> Karaisiva hia nraakye qora nramanri nyianrive tiro ni titairave. Karaisiva nai mwakyaakya kyuqera nraakye qora timwa nyianrive tiro ni titaira. Mwataqaanaa qua okyaravanto vahata qumina nraakye qoravanto mwi quarara kyuqe quave ti variavana qio nte hia mwi quara nkyi timwa nyinraitina, nte Karaisira qua nkyi timwa nyi varura. Nte mwataqaanaa qua okyara nkyi timwa nyianrita nkye Karaisira kyatariqaa hirito quarara qumina quave tivara. Mwianra rieqanama nte Karaisira qua ntapihi kyena nkyi timwa nyunra.

### *Karaisiva Kotira kepukyavantove tura*

<sup>18</sup> Mpo hia nraakye qorahua vita ekyaara raupiri ihua variqataro tita, mwihua Karaisira kyatariqaa rutovaro qutu vu quarara qumina qua hia quaqa hirave ti variara. Tire hia mwitaa tiraitita, tiri Kotiva huvantu kyero tivitaarihua variqataro tita, tire Karaisira kyatariqaa ru tovaro qutu vu quarara Kotira kepukyavantove tura.

<sup>19</sup> Kotira mpukuqi haaru Kotiva mwitaama tiro:

Nraakiara mpo okyara mpo okyara rie taqe ihua  
varivaqe nte mwihua qua nraatara kyaariro  
mwihua quavanto qumina qua nraahu vahiananrove.

Airi inraikya okyara mpoqiaavata ntapihi paahi hiahua  
su nyaatoqi vahiani quara vara raupirima kyaaninrave,  
tura.

*(Aisaiaa 29:14)*

<sup>20</sup> Airi okyara rie varia vaisihuave, mpo sikuru mpo sikuruqi vita mpo kyaiqa mpo kyaiqa taqaa vaisihuave, mpohua qua nraatara kyeqa ti varia vaisihuave, mwihua mpo? Mwi vaisihuave varivaqe nte mwihua nanra quave qianinra? Ekyaa mwihua variqata mwatanyaa okyara qua nraahu ti variarara tiro, Kotira quavanto mwihua qua nraatara kyaiharo mwihua quavanto qumina qua hia quaqa hiva nraahuma vahiro.

<sup>21</sup> Kotiva ekyaara okyara ntapihi kyaiva, mwiva qua okyara mwaa qovarama kyaiharo mwi quava mwitaamama vahiro: Vaisivanto hia mwatanyaa okyara mpo okyara mpo okyarara riairaqaatairo Kotira okyara qio ntapihiananrove. Tire Karaisirara nkyi timwa nyunrata qumina quave qia, mwi quarara nraakye qoravanto quetaave tivera, Kotiva mwihua sitairata mwihua hia ekyaara qutu vivara.

<sup>22</sup> Iutaavanto tiqata, Vaisivanto nronra kyaiqa varairaqe tire mwia kyaiqa taqe mwi vaisirara Kotiva titai vaisirave tiqata mwia vataqi quare, ti variavata, Kirikivanto tiqata, Vaisivanto mpo kyaiqa mpo kyaiqa okyara tinraamwutairaqe mwia taqeta mwiaqatai mwi vaisira vataqi quare, ti variara.

<sup>23</sup> Tire mpo? Tire variqata Karaisira kyatariqaa rukye hiritaa quara, mwi quara nraahu timwaqi virera. Tire mwi quara Iutaa timwa nyinrenra hurata mwihua mwi quarara tiqata, Uaqia hia vaisihu a nraahu kyatariqaa ruarave. Nkyi qua mwia uaqia hi quarave, ti variara. Mwihua mwitaa qiavata tire mwi quara Kiriki timwa nyinrenra hurata mwihua mwi quarara, Qumina qua hia quaqa hirave, ti variara.

<sup>24</sup> Mwitaa qiavatavata tiri mpo hurahua Iutaave, Kirikive, mpo mwatanaave, Kotiva nraanrama taihata tire variqata ntapihi kyauraro Karaisiva Kotira kepukyavanto tiri kyaahaqa hiarivama variro. Karaisiva ekyaa Kotira okyara qua, kepukya qua tiri timwa timwianrivama variro.

<sup>25</sup> Nraakye qora mpo hiahua Karaisira quara qumina quave ti variavaro mwi quava Kotira quavanto vahiqaro ekyaa mwatanyaa okyara vaisivanto ti varia quara nraatara kyaira. Kotira quara uqenrai quarave qiava, mwi quava vaisi kepukya qua nraatara kyaira.

<sup>26</sup> Eo, ni kata pakya tuaavo, nkye haaru nataa nataa hu nraakye qorahua varuvaro Kotiva nkyi nyaanronra mwianra nraato tuate. Mwi entara nkyi utaqi hia mpo okyara mpo okyara ntapihi riohua varurave. Mwi entara hia nkyi utaqi nrutu nronra vataahua airivanto varurave. (Mwi entara Kotiva hia nkyi nyutu nronraqama vhura mwianra rieqaro nkyi nyaanronra.)

<sup>27</sup> Mwatanyaa qua okyarara ti varia vaisihu a kyaurira inraikya varaate tiro, Kotiva qumina quave ti varia quara, Karaisira rukyaa quara vara kyero qumina nraakye qoravanto mwi quara riaate tiro. Kepukya nraakye qoravanto kyauruate tiro, Kotiva qumina nraakye qora nyaanrama kyero mwihua ni nraakye qorama varivarave tiro.

<sup>28</sup> Mwatani variahua mpo hia nraakye qorahua, mwihua hia tiri mwutukya vaiho qiahuave, hia kyuqe nraakye qora qumina nraakye qorave ti variahua, Kotiva mwi nraakye qorahua vara kyero mwihuaqotairo tire nronravantove ti varia nraakye qorahua vara qumina inraikyaqama kyairave.

<sup>29</sup> Kotiva nai mwitaa hirara tiro, hiama qio mpovanto nai mwahuta qiananro.

<sup>30</sup> Nkye Karaisiravata variate tiro, Kotiva naivanto nkyi sitaqiro uro kyaihata nkye Karaisiravata variara. Kotiva Karaisira titovaro Karaisiva Kotira tiri kyaahaqa hiani okyarara qovarama kyero. Karaisiva tiri kyaahaqa iharora tiro, Kotiva tiri uaqia hi quara nruka kyero tiri vara avuqavuma kyero. Karaisiva tiri kyaahaqa hirara tita, tire qjoma Kotira kyaiqa vareqata aanra kyuqeraqaa quananra. Karaisiva tiri kyaahaqa ihata tire huvantu vita qatinani varunanra.

<sup>31</sup> Teta kyaahaqa hiarava hia vahuaro Karaisiva mwitaama kyero tiri kyaahaqa hurara tita, tire Kotira mpukuqi qara ntumwa to quara ntapihunana. Mwi quava mwitaama tiro:

Vaisivanto nai kyaiqara rieqaro hia nai mwahuta qiarive.

Tiri vunyaa vaisivanto tiri kyaahaqa hirara rieqaro

mwi vaisiva mwia mwahuta qiarive, tura.

(Aisaiaa 40:13)

## 2

### *Karaisira kyatariqaa ruto quara*

<sup>1</sup> Haaru nte nkye hunani nrintena nte Kotiva uqeta tai quara nkyi qoqaa timwa nyinrenrana nte hia qiaqaa hu quara nkyi timwa nyiavarave. Hia nte mwatanyaa qua okyara rieqana nkyi timwa nyiavarave.

<sup>2</sup> Mwi entara nte nkyi utaqaa variqana kuaa qua nraahu timwaqi virerave timwa kyena hia mpo qua mpo qua nkyi timwa nyiavarama. Nte Iesusi Karaisira qua nraahu nkyi timwa nyiavarama. Nte mwi entara Iesusi Karaisira kyatariqaa ruto quara nraahu nkyi timwa nyiavarama.

<sup>3</sup> Haaru nte nkyi utaqaa nrumu variavaro ni kepuuya hia vahuvaro ni kyuqu kyauqu ntuvana nte aatu hiqana variavara.

<sup>4</sup> Nte mwakyaakya nkyi timwa nyiqana hia qiakyaa hi quara nkyi timwa nyinraitina, nte qua nkyi timwa nyiavata nkye taqovaro Kotira mwanraquravanto ni kyaahaqa huvana nte kepuuyaqama kyena qiavara.

<sup>5</sup> Nkye hia mwatanyaa okyara riemwaqi viraitita, Kotiva kepuuya kyaiqa varaira mwia okyarara riemwaqi viqata Karaisirara qutaa mwivave qiate tina, nte Karaisira kyatariqaa ruto quara nraahu nkyi timwa nyiavara.

*Qua nronra kyuqeva Kotiraqaatairo qovara hi varirara tura*

<sup>6</sup> Kotira aanraqaa kepuuyaqama vari nraakye qorahua varivaqe tire qiomma mwihua nronraqama vahiani quara timwa nyiananra. Tire nronraqama vahi quara tiqata hia qumina mwatanyaa qua okyara tunanrave. Mwaa mwataraqaa ntaqikyi varia vaisihua mwatanyaa qua okyara ti variahua, mwihua variqi vita taiqa vivaro mwihua quavata taiqa quananrove.

<sup>7</sup> Hia tire mwihua qia quara tiraitita, tire nronra qua Kotiva uqeta tai quara kyuqe qua, mwi quara nkyi timwa nyunanra. Haaru hia mwaa mwataraqaa utu entara Kotiva mwi quara riemwa tero uqeta tero tiriara mwihua nraakiara mwi quara qovarama kyaivaro mwi quava nraakye qora kyaahaqa hirata mwihua nivata nyaamwuni kyuqema kye varivarave tura.

<sup>8</sup> Mwaa mwataraqaa ntaqikyi varia vaisihuaqitairo hia mpinqavantovata mwi quara okyara ntapihi kyero. Mwihua Kotira qua nronraqama vahi quara riaatirio, mwihua hiama Kotiva kyuqe inraikya vatairaqaa ntaqikyi vaisira kyatariqaa ru kyaatiri.

<sup>9</sup> Kotira mpukuqi mwitaama tiro:

Hia vaisivanto vuqotairo taqai inraikyara,  
hia vaisivanto nraatoqitairo riai inraikyara,  
hia vaisivanto nai nraatoqitairo riemwa kyero tiqaro,  
Mwi inraikyava qio vahiananrove, ti inraikyara  
vara kyero Kotiva mwianra mwutukya vataa nraakye  
qorahuani terama kyero vatairave, tura.

(Aisaiaa 64:4)

<sup>10</sup> Kotiva nai mwanraqura titaiharo mwia mwanraquravanto Kotiva nai uqeta tai quara hia mwaa mwataraqaa ntaqikyi variahua timwa nyinraitiro, mwiva tiri nraahu timwa timwi varira. Kotira mwanraquravanto ekyaa inraikya ntapihi kyero ekyaa okyara inraikya Kotiva uqeta tai okyararavata taqaivama variro.

<sup>11</sup> Ta vaisivave mpora vu nraatoqi vahiani inraikyara ntapihi kyaananro? Hiama vaisi mpovanto mpora vu nraatoqi vahianinra ntapihiananro. Nai mwia mwanraquravanto mwia utaqi vahiva mwivama mwia vu nraato ntapihi. Mwia votima kyero Kotira mwanraquravanto nraahu Kotira okyara ntapihi kyero riaira.

<sup>12</sup> Tire hia mwata mwaaqaatai qovara hi mwanraqurara mwia varaunananrave. Kotiva tiriara mwihua nte kyuqema nyatau okyarara ntapihi kyeta riaate tiro, mwiva nai mwanraqura timwihata varaunananra.

<sup>13</sup> Tire Kotira mwanraqura varaurahuara tita, tire hia vaisivanto mwatanyaa okyara timwa timwianravauma nkyi timwa nyi varita. Tire Kotira mwanraquravanto timwa timwi vari quarama nkye Kotira mwanraqura varahua nkyi timwa nyi varita.

<sup>14</sup> Vaisi mpinqi hia Kotira mwanraqura variariva hiama qio Kotira mwanraquravanto qiani quara ntapihiananro. Mwiva mwi quarara qumina qua hia quaqa hiravema qiananro. Kotira mwanraqura mwiaqi variari vaisiva, mwiva nraahuma Kotira mwanraquravanto qiani quara qio ntapihi kyero riaananro.

<sup>15</sup> Kotira mwanraquravanto mwiaqi variari vaisiva variqaro mwiva ekyaa okyara taqero tukyama kyero kyuqe okyarare, uaquia hi okyararave, qiananro. Mwiva qio

mwitaa tiraro qumina vaisi mpovanto hiama qio nai mwi vaisira okyara tukyama kyero taqaananro.

<sup>16</sup> Kuua qarama kyero Kotira mpukuqi mwitaama tiro:

Vaisivanto Kotira vu nraatoqi vahi inraikyara

hia ntapihirara tiro,

mwiva hiama qio Kotirara e mwitaa mwitaa hiante

qiananrove, tura.

(Aisaiaa 40:13)

Mwitaa iharovata Kotira mwanraquravanto tiriqi variharora tiro, Karaisira vu nraatovantovata tiriqi vhira.

### 3

#### *Korintivanto ntainra vita varura kyaara Poruva mwihua inronra hura*

<sup>1</sup> Ni kata pakyaa tuaavo, nte Kotira mwanraqura vataa vaisivata qua tuntema kye nkyivata qua qiankye qiavata nkye hia qioqa hura. Nte mwatanyaa inraikyara nraahu riaa vaisihua qihakya hi quara timwa nyuntema kyena nkyivata qihakya hi quara nraahu timwa nyiqana taqaavata nkye mwi entara Iesusirara quitaave turaqi nraaqiara votima kyeta varurave.

<sup>2-3</sup> Nronra tuai vaisira kepukya kyara mwintema kye nte nronra qua nkyi timwa nyiankye tina, taqaavata nkye nraaqiara votima kyeta varuvananra tina, nte nkyi nraamwa nraahu nyiavara. Qumina nraakye qora mwata mwaaqa variahua hia kyuqema kye nrohi variantema kye nkyevata nrohi variarara tita, mate mwaa entaravata nkye nraamwa nraahuma nrevara. Nkye qumina nraakye qora votima kyeta variqata nkye mpohuara ua qua tiqata inronra hi variara. Nkye mwitaamaqi viqata nkye qumina nraakye qoravanto mwatanyaa okyara nraahu riaahua votima kye nrohi variara.

<sup>4</sup> Qikye, nkye inronra hiqata ntainra quavaro nkyiqitairo mpovanto tiqaro, Nte Porura vataqina vuvave, tiharo mpovanto tiqaro, Nte Aporosira vataqi vi varuvave, ti variro. Nkye mwitaamaqi viqata nkye mwatanyaa okyara riaahua votima kyeta uaqiamma kyetama nrohi variavo.

<sup>5</sup> Aporosiva mwiva tavave variho? Nte Poruva mwiva nte tavave varuqo? Tiretana Kotira kyaiqa vare varuratanahua nraahuma varita. Nkye tiritanaqaataita Iesusirara quitaave qiara. Aporosivavata ntevata Kotiva tiri timwi kyaiqarama vareta.

<sup>6</sup> Nte Poruva kyara humwu vara tutauqaro Aporosiva nramanri mwihanro Kotiva mwi kyarara qupiqaante tiharoma qupiqero.

<sup>7</sup> Kyara humwu vara tivavata, nramanri nyivavata, qumina vaisitanama varita. Kotiva tiharo kyara mwiva qupiqairara tiro, Kotivama nronravanto variro.

<sup>8</sup> Kyara humwu vara tivavata, nramanri nyivavata, kuua kyaiqa mwianra rieqatama vareta. Nraakiara Kotiva mwihua nkyiari kyaiqa varerara rieqaro kyoqaa nyianroma.

<sup>9</sup> Tiretana kuaana variqata Kotira kyaiqa vare varurata nkye aakyo votima kyeta variqata, Kotira nraamwu votima kyetavatama varita.

<sup>10</sup> Kotiva ni kyuqema mataihana nte nraamwu hoqaahua qiata vaisi votima kyena variqana nte nraante nraamwu tura ratauntema kye nte nraante Karaisirara nkyi timwa nyi varura. Nkye Kotira nraakye qora kyuqehua Kotira nraamwu kyuqera votima kyeta variate tina, nte nraante puha ratauqata mwiaqatai mpohua mpohua mwi nraamwunra hoqe varita. Mwi nraamwunra hoqehua taqeqata hoqata.

<sup>11</sup> Nte puha rataura mpovanto ntaku kyero mpo kyatari rataankyora. Nte puha rataurara tura mwia Iesusi Karaisivama.

<sup>12</sup> Nte puha rataura mwiaqaa vaisi mpovanto Kotira nraamwu hoqarera hiro kyuqe inraikyaqo mwi nraamwunra hoqaananro. Mwiva kori orive, munima orive,

mpo ori kyuquerave, vara kyero kyuqema kyero mwi nraamwunra hoqa taananrove. Mwiva mwitaama kyero hoqairaro mpovanto kyatarive, nramwuhive, taquve, mwi inraikyara vara kyero hoqaananrove.

<sup>13</sup> Vaisi mpohua mpohua mwitaamaqi vivaro nraakiara ekyara entaqaa Kotiva mwihua hoqa tera qovarama kyairaro qoqama vahiananro. Mwi entara qavanto itaintema kyero Kotiva mpohua mpohua kyaiqa varatera qovarama kyero mwataara hiqaro taqaananrove.

<sup>14</sup> Qiavanto vaisi mwiva nraamwu hoqa taaninra mwataara hiqaro taqairaro hia itamwa kyairera, mwi vaisiva nai kyoqaa qioma varaananro.

<sup>15</sup> Qiavanto vaisi mwiva nraamwu hoqa taaninra mwataara hiraro itamwa kyairera, mwi vaisira nraamwu ekyaa itamwa kyaananro. Mwiva nraamwu hoqa taaninra ekyaa itamwa kyairaro vaisi mwiva nraahu qati variraro mwiva qiaqitairo qatinani nritarero varintema kyero variqaro hia kyoqaa varaananro.

<sup>16</sup> Nkye hiave ntapihiavo? Nkye Kotira nraakye qora variqata Kotira nraamwu kyotata nraamwu votima kyeta variavaro Kotira mwanraquravanto nkyi utaqi varihata variara.

<sup>17</sup> Nkye Kotira nraamwu kyuqehua variarara tiro, mpovanto nkyiqitairo mwi nraamwunra vara uaqama kyairera, Kotiva nai mwi vaisiravata vara uaqiamama mwataananro. Nkye Kotira nraamwu mwihua variqatara tita, nkye ntainra vita varivorave.

<sup>18</sup> Nkye nkyeta riemwa kyeta api qua riemwaqita vivora. Nkyiqitairo vaisi mpovanto nanrianra tiqaro, Nte mwatanyaa okyara mpo okyara mpo okyara ntapihi kyauvave, tirera, nte mwi vaisirara tiqana, E mwi quara qaqlira kyera Kotira qua nraahu riemwaqira quante. E mwitaa hirata qumina nraakye qoravanto iara hia vu nraato vataavave tivaro Kotiva iara qua okyara ntapihiva vu nraato vataavave qiarive, qianinra.

<sup>19</sup> Mwi quara okyara mwataamama vahiro. Mwatanyaa okyarara Kotiva tiqaro, Mwi okyarava qumina qua hia quaqa hirave, tiro. Kotira mpukuqi mwianra mwataama tiro:

Mwatanyaa okyara ntapihiahua  
ntaqaaverura kyaiqa vare variavaro  
Kotiva nkyiari utua kyaiqara mwiaqotairo  
tuqasaa kyeqaro nkyiari tu vare varira.

(Iopu 5:13)

<sup>20</sup> Mwi quava vahiro mpo quavata vahiva mwitaama tiro:

Nronravanto Kotiva mwatanyaa okyara ntapihiahua  
su nyaatoqi vahi quara taqaiharo ekyaa mwi quava  
qumina vehi quama vahirove, tura.

(Ihi 94:11)

<sup>21</sup> Nkye mwi quara rieqatama hia vaisivanto varaani kyaiqarara nronraqama kye rieqata vaisi nrutu tuaaheraata. Hiavata mwitaa hiata. (Hia mwatanyaa inraikyavanto nkyiqa ntaqikyi varirave. Nkye mwiaqaa ntaqikyi variarave.) Ekyaa mwi inraikyava nkye hia inraikyava nraahuma vahiro.

<sup>22</sup> Nte Poruvave, Aporosivave, Pitaavave, mwaa mwatavave, qati variqi vi okyaravave, qutuvi okyaravave, mate vahi inraikyavave, nraakiara vahiani inraikyavave, ekyaa mwi inraikyava nkyi kyaahaqa hiari inraikyava nraahu vahirara tiro, ekyaa mwi inraikyava nkye hia inraikyava nraahuma vahiro.

<sup>23</sup> Mwitaa ihata nkyeta mwihua Karaisiranivanto variavaro Karaisiva mwiva Kotiranivantomava variro.

<sup>1</sup> Nkye tiri kyaiqara rieqata mwataama qiata. Tiriara nkyenramwu Karaisira kyaiqa vaisinramwu Kotiva uqeta tai quara timwa qovara hi varia vaisihua variavo qiata. Kotiva mwi kyaiqaraqaa ntaqikyiate tiro, tiri nronraqama kyaira.

<sup>2</sup> Mpora kyaiqaqaa ntaqikyiaro vaisiva nataama kyerove kyaiqa varaananro? Mwi vaisiva hia qoriri hiraitiro, ntapihi kyero nai nronra vaisi kyaiqaqaa ntaqikyiqiro quananro. Mwi quara rieqanama nte ntapihi kyena Karaisira kyaiqa vareqana nkyiqa ntaqikyiyi varura.

<sup>3</sup> Nte Kotira kyaiqa vaisi variqana nkyi Kotira nraakye qoraqaa ntaqikyiyi variarita nkyeve, vaisi mpovantove, ni tukya hiqata ni kyaiqara uaqia hi kyaiqarave, kyuqe kyaiqave, tivaqe nte hia mwianra nronraqama kyena riaaninra. Ntevata hia ntena kyaiqara rieqana tukyama kye mwi kyaiqara kyuquerave, mwi kyaiqara uaqia hirave, qianinra.

<sup>4</sup> Nte ntena kyaiqara rieqana ni kyaiqvanto qio vaihoma tina. Nte mwitaa qiariro quataave ni kyaiqvanto qio vahiananro? Niqaa ntaqikyiyi variva, mwiva nraahuma ni kyaiqa tukyama kye taqero kyuqe hirave hia kyuqe hirave qiananro.

<sup>5</sup> Mwianra rieqatama haunri nkye paparuqa hiqata mpora kyaiqara kyuqe kyaiqave, uaqia hi kyaiqarave, tivora. Nkye qaqlira kyeta tiri vunyaa vaisivanto qaiqaa tumuani entara vekya variata. Mwiva mwi entaraqaa vaisivanto entaqaro uqeta taani kyaiqara qovarama kyaananro. Mwiva vaisivanto nai vu nraatoqi riemwa taani inraikyara qovarama kyaananro. Mwiva mwitaamaqiro viraro mwiaqatairo Kotiva nraakye qoravanto kyaiqa varera taqeqaro kyuqe kyaiqave, uaqia hi kyaiqarave, qiananro.

### *Korintivanto nkyiari nyutu tuaaherora kyaara Poruva mwihuara tura*

<sup>6</sup> Ni kata pakyaa tuaavo, nte nkyiara rieqana nte tetu Aporosikyaqaa ntumwa kye turave. Nkye mwi quara rieqatama Kotira mpukuqi qara ntumwa to quara mwia hia nraatara kyeta ntainra vita variqata hia vaisi mpo nrutu tuaahereta mpo nrutu vara mwataniqa hiata.

<sup>7</sup> Ni kata, Tavave iara e vaisi nronravanto variaro tiho? Hia mpovanto iara mwitaa tiho. Qio quataave ekyaa e vataana inraikyara Kotiva i mwihi? Nanraqamave ekyaa e vataana inraikyara Kotiva i mwihanra e ntena kyauquqo vara taurave timwa kyera e ena mwahuta tira hiaro?

<sup>8</sup> Qikye, nkye Korintiqinaahua mwamwaahuave, quataave nkye Kotiva hi inraikyara ekyaa vataahua variavo? Quataave nkye airi inraikya vataahua variavo? Tire hia nkyi kyaahaqa hurata nkye nkyetaraa variqata quataave nkye nritare vunyaa nraakye qora variavo? Nkye quataaqama kye nronraqama vivaqe nte nkyiara qamwateqana tire nkyi kyapata nronraqama vita ntaqikyiqata variataarave.

<sup>9</sup> Nte ntena riemwa kye mwitaama tina, Tire Karaisira qua nkyi timwa nyunrahua varuraro Kotiva tiri vara ekyara tokyaqama vatero. Nramwutaa sitaqi ru kyarerera utuavata ekyahua mwihua nraahu taqaantema kyetama mwata mwaaqaanaa nraakye qoravantovata nyaamwunyaahuavata tiri taqeta.

<sup>10</sup> Tire Karaisirara rieqata Karaisira qua nkyi timwa nyi varurata qumina nraakye qoravanto tiriara nkye hia vu nraato vaihua variavo ti variara. Mwihua tiriara mwitaa ti variavata nkye ekyaa qua riaahua votima kyeta Karaisira qua rie variara. Tire Karaisirara rieqata tire uqenraunra vaisihua varurata nkye kepukya vaisi votima kyeta variara. Tire Karaisirara rieqata tire varuraro tiri nrutuvanto mpiato vahintema nkyi nyutuvanto virito vahintema kyeta nkye variara.

<sup>11</sup> Tire Karaisirara rieqata haaruvata, mate mwaa entaravata, hia kyara vahintema tiri mpoqama kye nraataa ihata varunanra. Tiri tuavaaqa nrahitiro uaqia aaqia ihata varunanra. Tiri ntuqutu kyeqa vataavata varunanra. Tire hia kyuqema kye mwatukya kuaaqi variraitita, tire mpoqi mpoqi nrohi varunanra.

<sup>12</sup> Tire munima kyeqa kyara varaare tita, teta kyauquqo toqaamwu tukyeqa kyaiqa vare varunanra. Mpowanto tiriara mwaaquqa hi quara tihata tire hia nanrianra mwaaquqa hi quara tiraitita, tire Kotirara mwi vaisira kyuqema mwataante tunanra. Tiri uaqiamma timwa taavata tire hia Kotira kyaiqa qaqira kyaraitita, tire kepukyaqama kye mwia kyaiqa varaqita vunanza.

<sup>13</sup> Mpowanto tiri nrutu vara mwataniga hiqaro unra tihata tire hia nanrianra mwitaa tiraitita, tire mwianra kyuqe qua nraahu tunanra. Tire mwitaamaqi viqata Karaisirara rieqata varurata kyara viti qaqira kyaantema kye qumina nraakye qoravanto tiri qaqira kyaarave. Mwaa entaravata mwihua tiriara vehi vaisi qumina inraikyavantove ti variara.

<sup>14</sup> Hia nte nkyi kyauruariveravauma mwaa quara qara ntina. Nkye ni nraaqiara kyuqehua votima kye varivaro nkyi su nyaatovanto ntapihirata variate tinama, mwaa quara qara ntina.

<sup>15</sup> Vaisi 10,000 vanto nkyiara tiqata, Tire nkyiqa ntaqikyi varurahuave. Nkye mwitaama kye Karaisira qua riemwaqita quate, tivera, nkye mwaa quara riaata. Mwihua mwitaama varivaqevata nte nkyi sova kuaikuvanto nraahuma varianinra. Nte nraante Karaisira qua kyuqe mwakyaakya nkyi timwa nyiavata nkye Karaisira aanraqaa vurara tina, nte nkyi sovaqama vurama.

<sup>16</sup> Nte nkyi sova varuvara tina, nte nkyi su nyaato nyianrita nkye nte nrohuntema kye nrohiata.

<sup>17</sup> Nkye mwitaama kye nrohiate tina, nte Timotira titaairo nkye hinani quananro. Nte Timotirara ni maaque tuqaro ni mutukyavanto mwianra mpoqiyavata vahira. Mwiva tiri vunyaa vaisi mwianra nraahu rieqaro mwia kyaiqa vare vari vaisivama variro. Nte Timotira titaairo mwiva uro nte mpoqi mpoqi nrohiqana Karaisirara nraakye qora timwa nyuntema kyena ntenavata mwi quara riemwaqi viqana Karaisira aanraqaa nrohurara ntapihi kyero nkyi timwa nyianri.

<sup>18</sup> Nkye mpo hiahua tiqata, Nianra mwiva hiama qio mwaini tiri taqarerero nriananrove, timwa kye qamwateqata nkyeta nrutu tuaahere variara.

<sup>19</sup> Tiri vunyaa vaisivanto qiove tiraqe nte qiomma nkyi taqarerera qamwanrama uro ntaaninra. Nte quariva uro variqana nkyiari nyutu tuaahere variahua taqarerera. Hia nte mwihua qua nraahu riarera. Nte mwihua kepukyavata taqarerera.

<sup>20</sup> Kotiva ntaqikyi vaisiva, mwiva hia qua nraahu timwaqiro quananro. Mwiva Kotira kepukyara variqaro Kotira aanraqaa quananro.

<sup>21</sup> Nkye hia ntapihi kye nrohi varira kyaara nte kyapipivata vare quaninranrave nkyi mwutukya vahiro? Nkye ntapihi kye nrohiarara rieqana nte uro nkyiara po tina nkyi kyuqema nyataaninranrave nkyi mutukya vahiro? Nkyetavanto tivaqe riaari.

## 5

### *Quara vairiqa hirikye nkyiqitairo vaisi mpovanto api nrohi variho tura*

<sup>1</sup> Quavanto viro nrinro ihana nte riauqaro nkyi utaqitairo quara vairivanto nrohia okyarava qovarama viho. Qikye, Kotira qua hia riaa nraakye qorahua mwitaa hiarara uaquia hi kyaiqarave timwa kye hia mwitaa hiarave. Mpowanto qua ni timwa mpihana nte riauqaro vaisi mpovanto nai qora nraata varatero nrohi variho, qiera.

<sup>2</sup> Mwiva nkyi utaqi variqaro mwitaamaqiro nrohi varihata nkye nanra inraikyara rieqatave nkyeta mwahuta ti variavo? Nkye hia nkyeta mwahuta tiraitita, nkye ntataataarave. Nkye ntateqata mwi vaisira titaaivo nkyiqitairo quataaarave.

<sup>3</sup> Mate nte nyianrani variqana hiama qio mwi quara nkyi kyapata variqana avuqavu hiarava aanra vahiro. Nte nyianrani varura, mwianra nte hiama nronraqama kye riena. Tiri vunyaa vaisivanto ni nronraqama kyaihananra tina, nte qiomma nyianrani variqanavata mwi quara avuqavu hianinra. Nte nkyi kyapata variqana mwi quara

avuqavu huntema kyena vaakyama mwi vaisira ko timwa kyena mwiaqaa qua vatauqo.

<sup>4</sup> Mwianra rieqanama nte nkyiara mwitaama tina. Nianra mwiva tirivata variho timwa kyetama nkye mwi vaisira qua riarerata ntuvantua hiata. Nkye ntuvantua vita varivaro tiri vunyaa vaisivanto nkyi nronraqama kyairata nkye ntuvantua vita variqatama

<sup>5</sup> mwi vaisira nkyetaqitai titaivaro mwiva nanrinraa variqaroma Saataaninra kyaiqa varaqiro quananro. Nkye mwitaa hivar mwi vaisiva nai mwamwantaqo Saataaninra kyaiqa varaqiro viraro vu nraato ntapihi viraro uaqia hi kyaiqara qaqira kyairaro ekyara entaqaa mwia mwanraquravanto qio variraro Kotiva mwia nyaamwuni vitaari.

<sup>6</sup> Nkye qumina nkyeta mwahuta tivora. Nkye mwaa quara ti variara riaarave. Qamaa pataqia taupa tairaro ntenraanriva ekyaa hini qamaa mwiaavata ntenra kyaananrove.

<sup>7</sup> Vaisi mwiva taupataira votima kyero varira nkye qamwanrama kye mwia titaivaro mwiva uaqia hi kyaiqara varaiva hia nkyi utaqi varirata nkye qio variqi quata. Nkye qio varivaro mwia uaqia hi kyaiqava nkyivata uaqjama nyataankyora. Vekyahu nyato kyarara omwata nraani entaraqaa sipisipi nraati ru kyaintema kyero tiriara rieqaro Karaisira ru kyora.

<sup>8</sup> Karaisira tiriara ru kyorara tita, nrivaqe vekyahu nyato kyarara votima kye nreqata taupataira vatama kye mpereti uta taira qaqlira kye, mpo mpereti hia taupataira vata uta taira nramwaqi quara. (Mwi quara okyara tirera nrivaqe Kotira aanraqaa nrohiqatama uaqia hi kyaiqara qaqlira kye kyuqe kyaiqa qutaa kyaiqa nraahu varaqi quara.)

<sup>9</sup> Tauraa nte nkyini qara mpo vara kye nkyi timwa nyiavaraqi mwitaama tina, Nraakye qora api qaraqita nrohihuavata hia kuaaqi variate, qiavarave.

<sup>10</sup> Nte mwi quara tiqana hia nte quminahua hia Jesusira nraaqiaraqa hiahuara turave. Hia nte qumina nraakye qora airi inraikyara mwutukya ntihata variahuarave, mpuara vare variahuarave, unra mwanriqa nrutu tuaahere variahuate, hia nte mwihuara turave. Nkye mwi nraakye qorhua qaqlira kye nkyetaraa varirera hivera, mwia nkye mwaa mwatara qaqlira kyetama nkyetaraa varivarave.

<sup>11</sup> Nte tohare hia nte qumina nraakye qora mwihuara turave. Nte vaisi mpovanto tiqaro nte Jesusira nraaqiarama varuqo timwa kyero uaqia hi kyaiqara varaaninra mwianrama tuqo. Ni qua okyaravanto mwitaamama vahiro. Vaisi mpovanto tiqaro, Nte Jesusira nraaqiara nkyi sata sakyaama varuqo, timwa kyero mwiaqatairo mwiva mpo nraakyevata nrohiarivave, airi inraikyara mwutukya vahiarivave, airi inraikya vare variarivave, unra mwanriqa nrutu tuaahere variarivave, mwiva mpora nrutu vara mwataniqa hiqaro unra qua qiarivave, mwiva uera nramanri nreqaro uera ntaarivave, mwiva mpuara uti variarivave, mwiva mwitaa hi variariva nkyiara nte nkyi sata sakyaave tirata nkye mwia qaqlira kye mwia nraatu aatu hita hia mwiaavata variqata kyara nraatema tuqo. Ni qua okyara vaakya tuva mwitaamama vahiro.

<sup>12-13</sup> Hia Kotira nraakye qora qumina nraakye qora mwaaqani variahua hia nte mwihuara qua avuqavu hirerave. Mwihuara kyaiqa tukya hianinra mwia hia ni kyaiqavauma, mwia nai Kotivama mwia avuqavu hiananro. Qio nkye hia qumina nraakye qora variavo. Nkye Jesusira nraakye qoravantoma varita. Haunri nkyiqitairo mpovanto uaqia hi kyaiqara utu kyairata nkye tiqata, Kyai qaqlira kye hia avuqavu hiare, tivora. Nkye qamwanrama kye mwi quara avuqavu hiata. Kotira mpukuqi qara ntumwa to quara rieqanama nte nkyiara mwitaama tina. Mwi quava mwataama tiro:

Vaisi mpovanto nkyi utaqi variqaro uaqia hi kyaiqara  
varaaninra nkye titiavaro quarive, tuqo.

(Lo 13:5)

## 6

*Qua vahirera, nkyetavanto mwi quara avuqavu hiate tura*

<sup>1</sup> Nkyiqitairo mpovanto nai qata vakyaqa qua vatarera hiqaro haunri mwiva uro hia Kotira qua riehua mwi quara avuqavu hiate qiankyora. Mwiva nkye Kotira qua riehuara ni qua avuqavu hiate qari.

<sup>2</sup> Nkye hia ntapihiarave? Nraakiara Kotira nraakye qoravanto variqata mwihua mwaa mwataraqaa varihua qua avuqavuma hivara. Nkye nraakiara mwaa mwataraqaa varihua qua avuqavu ihua variahuara tita, nkye nanraqamave mate mwaa entara pata qua mwiqianinra hia avuqavu hita?

<sup>3</sup> Nkye hia ntapihiarave? Nraakiara tire nyaamwunyaahua mwihua quavatama avuqavu hiananra. Tire nyaamwunyaahua quavata avuqavu hiarahuara tita, tire qioma mwata mwaaqanaa quavata avuqavu hiananra.

<sup>4</sup> Nkyiqitairo ko ti quava qovara hirata nkye mwi quara avuqavu hirerata nkye qumina mwaaqanyaa vaisi, hia Iesusira nrutu tuaahere huara mwi quara avuqavu hiate tivora.

<sup>5</sup> Nkye mwitaa hiqata kyauruataarave. Nkyi sata sakyaa taaratanavanto inronra hivera, hiave nkyi utaqa vaisi mpo kyuqe vu nraato vahiva, mwi quara avuqavu hiariva variro?

<sup>6</sup> Nkyiqitairo kyuqe vu nraato vahiva mpovanto mwi quara avuqavu hiataara hia mwitaa hiavatama nkyi qata vakya mwihua mwi quara vareqata qumina vaisi hia Kotira qua riaahua hianani vi varita.

<sup>7</sup> Nkye nai ko ti nai ko ti hiqatama nte taqauqata nkye Kotira qua qaqlira kyeta mwia aanraqaavata hia kyuqema kye nrohi variara. Nkyi qata vakya mpovanto nkyi uaqlama nyatairata nkye qaqlira kye qiove qjataara. Nkyi qata vakya mpovanto nkyini mpo inraikya mpuara varairata nkye hia mwiaqaa qua vataraitita, qiove qjataara.

<sup>8</sup> Mwitaa hiataara nkye uro nai uaqlama mwate nai uaqlama mwate hiqata naini naini mpuara vare variavo. Qikye, mwihua nkyi sata sakyaa variavata nkye mwitaa hiqata mwihua uaqlama nyate variavo.

<sup>9</sup> Nkye hia mwaa quara riaarave iho? Qora kyaiqa vare varihua hia Kotiva ntaqikyi mwatuqyaraqi qio vivarave. Vaisi mpovanto nkyiara mpo qua unra qua qiankyora. Api qaraqita nrohihuave, unra mwanriqa nrutu tuaaherehuave, nraata vaati ntugeqama kye api nrohihuave, nkyiari hena vaisive nkyiari hena nraakyevata api nrohihuave,

<sup>10</sup> mpuara uti varihuave, airi inraikyara mwutukya ntirata vare varihuave, uera nramanri nreqata uera nte varihuave, mpora nrutu vara mwataniga hiqata unra qua ti varihuave, mpova hi inraikyara unraqanraama kyeqa vare varihuave, ekyaa mwi kyaiqara mwi kyaiqara vare varihua hiama qio Kotiva ntaqikyi mwatuqyaraqi vivara.

<sup>11</sup> Nkye hini uhua haaru mwi kyaiqara mwi kyaiqara vare varura. Nkye mwitaama varuvaro nkyiara Kotira kyaiqa nraahu varaqita quate tiro, Kotiva nkyi mwutukya vu nraato hiqama nyatero. Kotiva tiri vunyaa vaisi Iesusi Karaisira kyaiqara riero nai mwanraquraravata rieqaro Kotiva nkyi avuqavuma nyataira.

*Karaisiva tiri huvantu kyairaqaatai tire uaqia hi kyaiqara varaqi quarorave tura*

<sup>12</sup> Mpovanto tiqaro, Karaisiva ni huvantu kyaihana nte qati varuvara tina, nte ekyaa mpo kyaiqa mpo kyaiqa qioma vare variariro Kotiva hiama nianra qao qiananrove, qianinra nte nai mwia mwataama kye timwa mwinrenra. E ekyaa kyaiqa qio varairarovata hia ekyaa mwi kyaiqava i qio kyaahaqa hiananrove, qianinra. Nte ekyaa kyaiqa qio varaariva variqanavata nte hia ekyaa kyaiqa varaqina virerave. Nte ekyaa kyaiqa vare variariro kyaiqa mpovanto niqaa ntavaaqavu kyero ni ntaqikyiqiro quankyorave.

<sup>13</sup> Mpowanto tiqaro, Kyaravanto vaisi vikyokyaqi quariva vaiharo vikyokyavanto kyara nraanriva vahirave qiananro. Qio mwi inraikyava quaahaqa vahi inraikyarara tiro, nraakiara Kotiva kyaravata vikyokya mwaviata taiqama kyaananro. Mwi inraikyava quaahaqa vaiharo vaisivanto quaahaqa variara. Mwitaa hirara tiro, vaisivanto api mpo nraakyne mpo vaisivata nrohiqaro nai mwamwanta Kotira vuqaa vara uaqama kyaananro. Vaisivanto nai mwamwantaqo Karaisira kyaiqa varaqiro viraro Karaisiva mwia mwamwantaqaa ntaqikyianro.

<sup>14</sup> Kotiva tiri vunyaa vaisi qati vara sivuma kyovara tiro, mwiva nai kepuuya mwiaqo tirivata qioma qati vara sivuma kyaananro.

<sup>15</sup> Nkye hia ntapihiarave? Nkyi mwamwanta mpoqiani mpoqianivanto Karaisira mwamwantama vahiro. Qiove Karaisira mwamwantaqatairo mpo mwamwanta vara kyero api qaraqiro nrohi variani nraakyera mwamwantaqaa taaqau tairaro vahiananro? Hia qio mwitaa hiananrove.

<sup>16</sup> Nkye hia ntapihiarave? Vaisivanto api qaraqiro nrohiani nraakyeravata nrohi variraro mwitanahua nyamwantavanto kuaa mwamwantama vahiananrove. Kotira mpukuqi mwianra mwataama tiro:

Mwitanahua nyamwantavanto

kuaa mwamwantama vahiananrove, tura.

(Okyara 2:24)

<sup>17</sup> Iesusira nraaqiaravanto hia mwitaama kyero variananro. Tiri vunyaa vaisivata taaqau viro variariva variraro mwitanahua mwanraquravanto kuaa mwanraqurama vahiananro.

<sup>18</sup> Api qaraqi nrohiraqaatai nkye ntuvaihaaqita qatiraqaa variata. Mpowanto uaqia hi kyaiqara hini hira utiva hia mwia mwamwanta uaqama kyaira. Mwiva api qaraqiro nrohiqaroma nai mwamwantavata vara uaqama kyaira.

<sup>19</sup> Nkye hia ntapihiarave? Nkyi mwamwanta mwiva Kotira mwanraquravanto variqiro vi vari nraamwuvama vahiro. Kotiva nai mwanraqura nkyi nyihanro mwia mwanraquravanto nkyi mwutukyaqi variqiro vira. Nkye hia nkyetavanto nkyetaqaa ntaqikyiahavauma. Nkye Kotiranivantom varita.

<sup>20</sup> Kotiva nai mwaaqu nkyi nyinro nkyi kyoqaa utu tairara tita, nkye Kotiranivanto variqata nkyeta mwamwantaqo Kotira nrutu tuaaheraata.

## 7

### *Poruva nraata vaati vare okyarara tura*

<sup>1</sup> Nkye ni kyapara hiqata qara ntumwa taa quara nte nkyita timwa nyinrenra. Qioma vaisivanto hia nraakyne vararaitiro, qati variqiro quananro.

<sup>2</sup> Nte mwi quara tiqanama taqauqata vaisivanto nraakyevanto mpo nraakyevata mpo vaisivatama kye api nrohi variava tuqara vihana nkyevata mwi kyaiqara utivo tina, mpo qua mwitaama tina: Kyaivata ekyaa nraakyne qoravanto nraata vaati vareta variate, tuqo.

<sup>3</sup> Vaisivanto nai nraata kuaa mwamwantavanto variqaro mwiva nraakyne kyakya hianinranra hia qao tiraitiro, mwia kyugema mwataari. Nraatavantovata kuaa qara hiari. Mwitanahua mpovanto mpora kyugema mwatairaro mpovanto mpora kyugema mwateqatata variata.

<sup>4</sup> Nraakyevanto hia nai mwamwantaqaa ntaqikyi variharo mwia vaativanto mwia mwamwantaqaa ntaqikyi varira. Kuaa qarama kyero vaativanto hia nai mwamwantaqaa ntaqikyiharo mwia nraatavanto mwia mwamwantaqaa ntaqikyira.

<sup>5</sup> Vaatiaravata nraataravata nte mwaa quara tirera. Nkyetana mwamwanta ntuvantua hi okyarara hia mpovanto qao qari. Nkyetana qua taaqaute tiqata, Nriqetana Kotiravata mwi iherara qua qiare ti, qioma nkyetana qati variqi vivara. Nkyetana mwitaamaqi viqata Kotiravata qua tira taiqa kyeta mwiaqataita qaiqaa mwamwanta

ntuvaantua hiata. Haunri nkyetana nraahumwa nraahumwa varivaro Saataaniva nkyitana mwataara hirata nkye mpo nraakyeve mpo vaisivata nrohi kyevora.

<sup>6</sup> Nkye mwi quara ni kyapara hiqata qara ntumwa taarara tinama, nte nkyita timwa nyina. Nte hia mwi quara kepukyaqama kye vateqana nkye mwi quara nraahu vataqita quatevauma tina. Nte qati mwi quava nkyita kyaahaqa hiarive tinama mwitaa tina.

<sup>7</sup> Nte nkyiara mwataavatama tina, Ekyaa nraakyе qora ni votima kye varivage nte mwianra qiove qianinra. Qio nte ntapihi kyauqaro Kotiva mpo vu nraato vaisi mpo mwihanro mwi vaisiva nraakyе varatero variharo, Kotiva vaisi mpove nraakyе mpove mpo vu nraato mwihanro mwiva ehaara variqi vi varira.

<sup>8</sup> Mwanraataravata, qumwanraanravata, saati qutu quavata, tetoqa varia nraakyе-huaravata, nte tirera. Nkye ni votima kye nkye qati varivage nte nkyiara qiove qianinra.

<sup>9</sup> Vaisivantove nraakyevantove hia qio qati variaqara hirata qioma nraata vaati varevara. Haunri qati varivaro vaisiarave, nraakyerave, mpoqama kyero mwutukya ntirata mwia rirante qati variqi vivora.

<sup>10</sup> Nraata vaati varaahua nte mwaa quara timwa nyinrenra. Mwaa mwi quara hia ntina riemwa kye tuqo. Tiri vunyaa vaisivanto timwa tairama. Mwiva nraakyera mwitaama tiro: Nraakyevanto hiama qio nai vaati ekyara kyero quananrove.

<sup>11</sup> Mwiva nai vaati qaqlira kyairera, mwiva hiama uro mpo qoraisi vararaitiro, qatima variarive. Mwiva nai vaati qaqlira kyero uro nanrianraa vari taqero kyai nte ntina paativanto hinani nrumu ntante quankye timwa kyero mwiva qioma nai vaatintiriro uro variananrove, tiro. Mwitaa timwa kyero tiri vunyaa vaisivanto mwia vaatiaravata mwitaama tiro:

Vaisivantovata hia nai nraata qaqlira kyaananrove, tiro.

<sup>12</sup> Nte hini mwihuara mwaa quara tirera. Mwaa mwi quara hia tiri vunyaa vaisivanto timwa tairavauma. Nte ntina mwi quara tirera. Iesusira nraaqiara mpovanto variraro mwia nraatavanto hia Iesusirara quitaave qiariva nraakyeva variqaro nai vaatiara tiqaro, Hia i qaqlira kyaraiti, nte i vatama kye variqi virerave, tirera, hia mwia vaativanto mwia qaqlira kyaari.

<sup>13</sup> Iesusira nraaqiaraqa hiariva nraakyе mpovanto variraro mwia vaativanto hia Iesusirara quitaave qiariva variqaro nai nraatara tiqaro, Hia i qaqlira kyaraiti, i vatama kye variqi virerave, tirera, hia mwia nraatavanto mwia qaqlira kyaari.

<sup>14</sup> Vaativanto hia Iesusirara quitaave qiariva nai nraatantiri variqi viraro Kotiva mwia nraatara rieqaroma mwi vaisirara quitaama mwiva vaativanto variho qiananro. Nraakyе mpovanto hia Iesusirara quitaave qiariva nai vaati Iesusirara quitaave qianira vaisiravata variqi viraro Kotiva mwia vaatiara rieqaroma mwi nraakyerara quitaama mwiva mwia nraatavanto variho qiananro. Kotiva hia mwitaa qianinravauma mwitanahua nraaqiara mwata tehua qumina nraakyе qoravanto apiqama kye mwata taa nraaqiaraahua votima kyeta varivara. Mwitana nraaqiaraqvanto Iesusirara quitaave qia nraakyе qorahua nraaqiara votima kyetama varivara.

<sup>15</sup> Hia Iesusirara quitaave qiariva nai nraatave, nai vaative, qaqlira kyarera hirera, kyairaro mwitaa hiari. Mwiva qaqlira kyero virera hiraro qioma vaativantove, nraatavantove, Iesusirara quitaave qiariva mwia tuta kyairaro quananro. (Mwia hia tuta kyairaro virera, mwitanahua inronra hiqatama varivara.) Mpora qihakyama mwatairaro mwiva ina qihakyama mwatero mwitaamaqita quate tiro, Kotiva tiri nraanrama taira.

<sup>16</sup> Mwianra rieqanama nte mpo hiahua mwihu nraatavantove saativantove hia Iesusira qua riaahuara mwitaa tirera. Nkyi saativantove, nkyi nraatavantove, nkyiara rieqata Iesusira nraaqiaraqama vivarave iho, hiave Iesusira nraaqiaraqama vivarave iho? Nkye mwihu kyaahaqa hi okyarara hia ntapihiavo.

*Iesusira nraaqiaraqama quavaro nkyi mpo kyaiqa mpo kyaiqa nyinra qaqira kyevortura*

<sup>17</sup> Haaru nkye varuvaro Kotiva nkyi nyaanro entara mwi entaraqaa tiri vunyaa vaisivanto kyaiqa tukyama kyero nkyi kuaiqia kuaiqia nyunranra rieqanama nte nkyiara tiqana, Nkye variqata nkyeta nanra kyaiqave tутera mwianra nraahu riemwaqita quate, tuqo. Nte mpo mwatukya mpo mwatukya nrohiqana Iesusira nraaqiara variahua mwi quara nraahu timwa nyiqina nrohurave.

<sup>18</sup> Iutaa vaisivanto Kotira qua riero Iesusira nraaqiaraqama viva, mwiva haaru nai mwamwanta toqakyaarara hia kyauruari. Mpo mwatanaa vaisivanto Kotira qua riero Iesusira nraaqiaraqama viva, mwiva hia nai mwamanta toqa kyaari.

<sup>19</sup> Mwamwanta toqe okyaravave, hia toqe okyaravave, hiama mwi okyarava vaisikyaahaqa hiananro. Nkye mwi okyarara hia nronraqama kye riaata. Kotira qua kyugema kye riemwaqi vira, mwianra nronraqama kye riemwaqi quata.

<sup>20</sup> Nkye mpo kyaiqa vare varivaro Kotiva nkyi nyaanraanrihua nkye mwi kyaiqara vareqata variata.

<sup>21</sup> Mwi entara vaisi mpovanto nai kyaiqara rieqaro i rupa tovara e mwia kyaiqave vare varurarove Kotiva i nraanronra? Qio mate i rupa taira hia mwianra nronraqama kyera riaana. I huvantu kyaari aanrava qio vahirera, e qioma qati vinanra.

<sup>22</sup> Tiri vunyaa vaisi Karaisiva vaisi mpo rupa taaninra nraanrainranro mwi vaisiva nai rupa taaninranra hiama nronraqama kyero riaananro.

Nte mwi vaisirara mwitaa qiantre tirera: E tiqara, Karaisiva Saataaninraqatairo ni huvantu kyaihana nte qatinani varuqo, tiqara variqira quana. Mwia votima kyero hia rupa taari vaisiva qumina vaisivanto variraro Karaisiva mwia nraanrainranro mwi vaisiva Karaisiva rupa tai vaisivama variananro.

<sup>23</sup> Kotiva nronra kyoqaa Karaisiraqo nkyi huvantu kyairara tita, nkye qumina vaisivanto nkyi rupa tairata mwia kyaiqa vareqata Kotira kyaiqa hia varevora.

<sup>24</sup> Ni kata pakyaa tuaavo, Kotiva nkyi nyaanro entara mwi entaraqaa nkye mpo kyaiqa vare varura, mwi kyaiqara nraahu matevata varaqi viqata Kotiravata variqata kyugema kyeta nrohiate.

*Poruva qaraahahua hia nraata vaati varaahuaravata tetoqaravata tura*

<sup>25</sup> Nte nkyi qaraakya nraakye qora hia nraata vaati varaahuaravata tetoqaravata tura. Nkyiara hia ni vunyaa vaisivanto qua mpo timwa mpihana riaura. Ni vunyaa vaisivanto nianra po timwa matero ni nronraqama kyaihana nte mwia kyaiqa vaisi varuvara tina, nte nkyiara ntene riemwa kye qua timwa nyianinranra nkyi mwutukyavanto qihakya hirata quataave qiatu.

<sup>26</sup> Mwaa entara uaquia hi entara muaanra vahi entarara tina, nte mwianra rieqana nkyi vaisiara mwitaama tina, Nkye mate nataama kye varira qio mwivau variqita quate, tuqo.

<sup>27</sup> E nraakye vaakya varaterava hia mwia qaqlira kyenanranra riaante. E ehaara varirava hia uro nraakye varenanranra riaante.

<sup>28</sup> E uro nraakye varenanra mwia hiama e Kotira qua nteqa kyenanra. Qioma mwitaa hinanra. Mwanraatavantovata uro qoraisi varairera, mwiva mwitaa hiqaro hiama Kotira qua nteqa kyaananro. Qioma mwitaa hinanro. Mwaa entara nraata vaati varehua nronraqama kye muaanra ntaani inraikyara varaqi vivara. Nkyevata mwi muaanranra varevo tina, mwianra rieqanama nkye hia nraata vaati varaaate, tuqo.

<sup>29</sup> Ni kata pakyaa tuaavo, nte nkyiara qua tuva mwia okyara mwataamama vahiro. Tire mwata mwaaqaa variara entava pataqiamma vahiro. Mwianra rieqatama nkyiqitai nraakye varehua hia nraakye varehua nraantantamwa kye variqi viqata Kotira kyaiqara nronraqama kye riemwaqi quata.

**30** Nkye hia mwatani airi enta qati variqi virara rieqatama nkyiqitai ntatehua mwihua hia ntatehuara nraantantamwa kye variqi viqata Kotirara nronraqama kye riemwaqita quata. Kuua qarama kye nkyiqitai raihi varihua, mwihua hia raiihuara nraantantamwa kye variqi viqatama Kotira kyaiqara nronraqama kye riemwaqi vivata nkyiqitai mpo inraikya mpo inraikya kyoqaa hi varihua hia mpo inraikya vatehua nraantantamwa kye varaqi quata.

**31** Nkye munima kyaiqave, kyoqaa kyaiqave, varehua hia mwi kyaiqarara nronraqama kye riemwaqita quata. Mwaa mwataro mwia kyaiqa okyaravata taiqe variharo mwiva taiqaani entava qaumato vahirara tita, nkye mwianra rieqatama Kotira kyaiqara nraahu nronraqama kye riemwaqi viqata variqi quata.

**32** Ni kyakya hiva mwitaamama vahiro: Hia nkyi mwutukyavanto mwata mwaqaanaa inraikyara mpoqama kyero vahiaro. Hia nraakyne varaari vaisiva variqaro mwiva tiri vunyaa vaisi qamwata mwatarero mwianra nronraqama kyero rieqaro mwia kyaiqa nraahu varaqiro quananro.

**33** Nraakyne varate variari vaisiva nai nraata qamwata mwatarera uti variqarora tiro, mwiva mwata mwaqaanaa inraikyara nronraqama kyero riemwaqiro quananro.

**34** Mwiva mwitaa hiqaro hia Kotira kyaiqara nraahu riemwaqiro quananro. Mwiva Kotira kyaiqaravata, nai nraata kyaiqaravata, riemwaqiro quananro.

Mwanraatavantove, hia vaati varaari nraakyevave, variqaro mwiva tiri vunyaa vaisi kyaiqara nraahu riemwaqiro quananro. Mwiva nai mwanraquraqtairovata nai mwamwantaqotairovata mwia kyaiqa nraahu varaqiro quananro. Vaati vataa nraakyevanto variqaro mwiva nai vaati qamwata mwatarera uti variqarora tiro, mwiva mwaa mwataraqaa vahi inraikyara nronraqama kyero riemwaqiro quananro.

**35** Nte mwaa quara tiqana nte hia nkyi antuareqanavauma tina, nte nkyi kyaahaqa hiqanama tina. Nkye aanra kyuqe hiraqaa nrohiqata Kotira kyaiqara nraahu riemwaqi viqata hia mpo kyaiqa mpo kyaiqara riemwaqita quate tinama, mwitaa tura.

**36** Vaisi mpovanto tiqaro, Nte hia nraata vararaitina variariva mpo nraakyevata nrohiankyorave, qiariva mwi vaisiva qioma nraata varaananrove. Mwiva mwitaa hiqaro hiama Kotira qua nteqa kyaananrove.

**37** Vaisi mpovanto tiqaro, Nte hia nraakyne vararerave. Nte qioma ehaara variqana qati variqina quaninrave, timwa kyero mwitaamaqiro viqaro kepukyaqama kyero variqiro quariva, qioma mwi vaisiva mwitaa hiqaro ehaara variqiro quananro.

**38** Nraakyne varaariva, mwiva qio kyuqema hiananro. Hia nraakyne vararaitiro ehaara variariva, mwiva mpoqiatama kyuqe hiananro.

**39** Vaativanto qati varirera, mwia nraatavantow mwikyantiri nraahuma variqiro quananro. Vaativanto qutu viraro mwi nraakyeva qioma nai kyakya hiani vaisira varaananro. Mwiva mpo qoraisi vararera hiro Iesusirara quataave qianinra nraahuma qio varaananro.

**40** Nte ntene riemwa kye mwi nraakyerara tiqana, Mwi nraakyeva hia qaiqaa qoraisi varairera, mwiva qamwateqaroma variqiro quananrovema, tina. Nte mwitaa tiqanama Kotira mwanraquravantow nte tu quara kuua qua mwia nraahu qiananrovema tina.

## 8

*Unra mwanriqani vate kyarara qiove nraananrave hiave qio nraananrave? tura*

**1** Nkye ni kyapara hiqata qiove tire maaketiqitai unra mwanriqani vate kyarara munima kye vara kye nraananrave qia quara nkyita timwa nyinrenra. Haunri nkye paparuqa hita tiqata, Tire mwi quara okyara ntapihi kyaurahua qioma mwitaa mwitaa hiananrave, tivora. Nkye mwi okyarara ntapihi kyaurahuave tiqata nkyeta nrutu

nraahu tuaaherevora. Hia mwitaa ti quara mwiaqo mwi quara avuqavu hiata. Nkye nanrianra nanrianra mwutukya vateqatama mwi quara avuqavu hiata.

<sup>2</sup> Vaisivanto hini qua okyara nraahu ntapihi kyero haunri mwiva tiqaro, Nte ekyaa qua okyara ntapihi kyauquo, qiankyorave.

<sup>3</sup> Kotirara mwutukya vahiarai vaisiva variraro Kotiva mwi vaisira ntapihi kyero taqero ni nraaqiarave timwa kyeroma mwia kyaahaqa hiananro.

<sup>4</sup> Mwi quara rieqana nte unra mwanriqani vate kyarara tirera. Tire ekyahua ntapihi kyauraro unra mwanriqvanto qumina inraikya nraahuma vahiro. Tire ntapihi kyauraro quataa mwanriqa kuaikuvanto Kotiva nraahuma variro.

<sup>5</sup> Mpo hiahua tiqata, Nyaamwunivata mwata mwaaqaavata mwanriqa airivanto variqata tiriqaa ntaqikyi variavata tiri vunyaa vaisi airivantovata variqata tiriqaa ntaqikyi variarave, qiarave.

<sup>6</sup> Mwihua mwitaa qiavata tire tiqata, Mwanriqa kuaikuvanto Kotiva nraahuma variho, ti varunanra. Kotiva tiri tiqovama variro. Mwiva ekyaa inraikya utu taiva varihata tire mwia nraaqiaravanto qati variqi quarahuama varita. Tiri vunyaa vaisi kuaikuvanto Iesusiva nraahuma variro. Kotiva Karaisira nronraqama kyaiharo mwiva ekyaa inraikya utu taira. Karaisiva varihatara titama, tirevata varita. Tire mwi quara rieqatama unra mwanriqanra qumina inraikyave tunanra.

<sup>7</sup> Tire mwi quara ntapihi kyaurahua varurata hia ekyaa nraakyne qora mwi quara ntapihiara. Mpo hiahua taura unra mwanriqanra riohua, mwihua Iesusira nraaqiaraqama vita mwihua mwaa entaravata unra mwanriqani vataa kyarara nreta tiqata, Qae, mwaa unra mwanriqani vataa kyarava tiri uaqama timwa taarivaare, ti variarave. Mwihua mwutukya vu nraatovanto hia ntapihihata mwihua airi nraato tiqata mwi kyarara nramwa kyeta mwihua tiqata, Qae, ni kyauriroma iho. Hia mwi kyarara nraataara vahana nramwa kyaurave, ti variara.

<sup>8</sup> Mwihua mwitaa ti variavata tire ntapihi kyauraro Kotiva tire kyara nraananra mwianra mwiva hia nronraqama kyero riero. Hia Kotiva tire kyara nraananra mwianra rieqaro tiri qamwata timwa taananro. Tire mpo kyara aurama te mpo kyara qati nre hiarava hiama tiri vara mpo qarama kyairaqe tire kyuqema kye Kotira nraaqiara variananra.

<sup>9</sup> Mwi quava mwitaama vahirara tita, nkye hia kyauriraitita, qiomma mpo kyara mpo kyara nrevara. Nkye mpo kyara mpo kyara nrehuavata rauriqata variata. Nkye mpo kyara mpo kyara qio nraahu nrehua variavata nkyi henahua Iesusira nraaqiara hini mwihua nronraqama kye nraato tita tiqata, Tire mpo kyara nraanranro tiri kyauruankyorave, ti varihua suqaa nkye ekyaa kyara nraivata mwihua mwia taqeta mwihua uaquia hi kyaiqaraqi tumu ntivorave.

<sup>10</sup> Ni qua okyara mwitaamama vahiro. E mpovanto tiqara, Nte qiomma ekyaa kyara nraanrinro hia ni toqaamwu ruananrove, tirava uro unra mwanriqa mwaanra nraamwuqi kyara nre variraro i qata mpovanto Iesusira nraaqiara hia kepukyaqa hiariva i taqero mwiaqatairo mwivavata hia nraani kyarara mwia nraanranro mwia kyauriraro hia nraataara nrauqoma qiananro. Nramwa kyero mwia kyaara mwi vaisiva Kotira qua nteqa kyaananro.

<sup>11</sup> Mwi vaisiva mwitaa ihara mwia e tiqara, Nte ekyaa kyara qiomma nraaninrave, qiananra, mwia okyaraqaarama mwi vaisiva tumu ntiro. Karaisiva hia iara nraahu qutu vurave, Karaisiva i qata vakyaa mwianravata qutu vurave.

<sup>12</sup> E mwi kyarara nraanranro i qata mpovanto hia kepukyaqa hiariva apiqama rieqaro kyara vara kyero nraenrenra, e hia mwia nraahu uaqiamamwatenanra. E Karaisiravata uaqama mwatera mwia quavatama nteqa kyenanra.

<sup>13</sup> Mwianra rieqanama nte mwi kyarara nreqana taqaariro mwi kyararaqaara ni kata pakyaa mpovanto tumu ntirera, nte mwiva tumu ntuankyo tina, nte hiama mwi kyarara qaiqaavata nramwaqina quaninra.

## 9

### *Poruva Iesusira kyaiqa vareqaro hia kyoqaa varora mwianra qamwatora*

<sup>1</sup> Qio qutaa hia mpovanto ni rupataihana nte qatima varuqo. Qutaa nianra Karaisiva qua timwa nyianrive tiro, ni nronraqama kyaihana varuvama varina. Iesusiva nronraqama kyai vaisihua nraantante quitaama nte tiri vunyaa vaisi Iesusira taquavama varina. Qutaa nte tiri vunyaa vaisi mwia kyaiqa vare varuqata nkye ni kyaiqa mwiaqatai Iesusira nraaqiaraqama vita variara.

<sup>2</sup> Mpo ihua nianra hia Iesusiva nronraqama kyai vaisiva variaro tivata nkye hia mwitaa tiraiti, nkye quitaama nianra Iesusiva i nronraqama kyai vaisiva variaro tivara. Nkye mwi quara nraahuma tivara. Nkye Kotira vataqita aanra kyuqeraqaa vivaro mpovanto mwia taqero nianra quitaama Iesusiva mwia nronraqama kyairave qiananro.

<sup>3</sup> Vaisi mpo ihua niqaa qua vataivera, nte nkyiari mwitaama kyena timwa nyianinra,

<sup>4</sup> Nte Kotira kyaiqa vare variariro tavave nianra qao tiraqe nte kyaravata nramanrivata hia nraaninra? Hiama mpovanto nianra qao qiariva variro.

<sup>5</sup> Iesusiva nronraqama kyaihua mponramwuvata, Iesusira qatanramwuvata, Pitaavavata, mwihua nraakye varate variqi vi variarara tiro, tavave nianra qao tiraqe nte hia mwihua hiante ntevata Iesusira vataqi quani nraakyera mpo varena mpo mwatuukya mpo mwatuukyaqni nrohianinra?

<sup>6</sup> Tire Vanavaasikya Kotira kyaiqa vareqata hiama nraakye qorara kyara timwiate tiraitita, tetatana kyauquqo kyaiqa vara kyeqa tetatana ntaqikyi varunanra. Iesusiva nronraqama kyo vaisinramwuhuaqitaita tiretana nraahu mwitaa hi varunanra.

<sup>7</sup> Qikye, qaami vaisivanto qaami kyaiqa vareqaro nai munima kyeqarove mwi kyaiqara vare variro? Qaqao, hia mwiva nai munima kyaira. Mwiaqaa ntaqikyiva mwia munima mwinra. Vaisivanto uaini vara tutairaro tamwa riemwa tairaro mwiva hiave nai tutaaninraqaatairo tamwa hiqo kyero nraananro? Qaqao, mwia qioma mwitaa hiananro. Sipisipiqa ntaqikyi variva, mwiva hiave qio nai sipisipi nraamwa nraananro? Hiama mpovanto mwianra qao qiananro. Mwiva qioma naivata nraananro.

<sup>8</sup> Mwaa quara tiqana nte hia vaisivanto ti varia quara nraahu rieqana tirera. Kotira mpukuqvata mwi quara okyara vahiro.

<sup>9</sup> Kotiva Mosesira mwu quava mwitaama tiro:

Uiti uru ntakakaru hiarive tiro, purimakauvanto kyuquqo  
mwivau ntamwaqiro viro nrinro hianinra  
hia mwia nro rupa taante. Mwia qati kyairaro  
mwivavata uiti uru mpo hira nraarive, tura.

(Lo 25:4) Kotiva mwi quara

purimakaura nraahu rieqaro turave iho?

<sup>10</sup> Kotiva mwi quaraqaa ntumwa kyero tirivata kyaahaqa hirero turave iho? Eo, mwiva tirivata kyaahaqa hirero mwi quara timwa torave. Mwi quara okyara mwataamama vahiro: Kyara vara tirero mwata quvuarivavata, kyara vantu varero nrianrivavata, mwitanahua nraakiara mwaa kyarara qioma tetatanavata nraananrave tivara. Qua mwia okyaravanto mwitaama vahirara tita, mwitanahua qioma nrevara.

<sup>11</sup> Vaisivanto kyara humwu mwataqi vara tintema kye tire nraante Kotira qua nkyi vu nraato mwutuukyaqni vataunanra. Vaisivanto kyara vara tutaira vantintema kye hiave tire uro nkyiqitai kyarave tuavaaqave varaananra?

<sup>12</sup> Vaisi mpo ihua nkyiqitai mwitaa inraikya vareva vahirera, tire nkyiqitai varaarava mpoqiatama vahianaro. Tire mwi inraikyara mwi inraikyara nkyiqitai varaataama vahivevata hia uro nyaanru timwa kye varaunananra. Tire qaqira kye nkyi mpo inraikyavanto antua kyaairata nkyi Karaisira qua hia riemwaqi vivorave timwa kye mwiaqaatai tire hia nkyiara mwi inraikya timwiate tiraiti, tire tetavanto tetaqa ntaqikyiqi viqata muaanra nto inraikyara varaqi viqa Karaisira qua nkyi timwa nyiavanana.

<sup>13</sup> Nkye hia ntapihiarave? Ierusaremini Kotira nraamwuqi Kotira kyaiqa vare variahua, mwihua mwi nraamwunraqitai nkyiari kyara vara kyeqata nre variara. Mwini Kotirani quara vahi aasau rukyeta qia quara mwate variahua quara vahi aasau hini nkyiarivata nraanra. Mwihua mwi kyarara hini nkyiarivata nraavar Kotiva hia mwihuara tirave.

<sup>14</sup> Kuua qarama kyero tiri vunyaa vaisivanto qua vatero tiqaro, Ni qua timwa nyiqi vi varihua varivata mwia hiniqama mwihua qua rie nraakye qorahua, mwihuama mwihuama kyuqema kye ntaqikyiqi vivata qio variqi quate, tura.

<sup>15</sup> Mwi quava vahana nte hia mwitaa hurave. Nte haaru nkyivata variqana Karaisira qua nkyi timwa nyiavara mwia hiniqama hia nte nkyiara kyarave mpo inraikyave mpivage nte qio varianye qiavara. Nte nkyiqitai mwi inraikyara mwi inraikyara qio varaariva vahuvanavata qaqira kyaavara. Nte qara mwaa ntqana nte hia nkye niqaa kyuqema kye ntaqikyateravauma qara ntina. Hia nte nkyiara mwitaa tirera. Nte qutu vina hia nkyi kyapata variani entara mwi quara qiataarave. Nkyiqitai mpo inraikyave kyarave munimave hia nyaanruma kye varaurara riena nte qamwateqana ntina mwahuta ti varuqo. Nkyiqitairo hiama mpovanto tiqaro, Nte mwia mpo inraikya mwunraqa mwiva mwitaa tiharo mwia quavanto unra quama vahiananrove, qiananro.

<sup>16</sup> Nte nraakye qora Karaisira qua timwa nyiqi viqana nte hia ntina mwahuta tirera. Nianra mwi quara timwa nyiante tirara tina, nte mwi quara nraakye qora timwa nyianriva nraahuma vahiro. Qikye, nte mwi quara hia qiaro Kotiva niqaa qua vatairaqe nte uaqama kyena varianinra. Mwianra rieqana nte hia ntina mwahuta tirera.

<sup>17</sup> Hia nte ntina riemwa kye tiqana, Kyai nte Karaisira qua timwa nyiqi quankye, turave. Nte mwitaa timwa kye ntina kyakya hiraqa varaaninra mwia nte qiomia mwia qiaa kyoqaavata varaaninra. Hia nte mwitaa hirerama. Kotiva ni kyauquqi mwi kyaiqara vatero nianra mwi quara timwa nyiante tirara tina, nte mwi quara timwa nyiqi vura.

<sup>18</sup> Nte mwitaamaqi viqana nte mwia qiaa nanra kyoqaa varaurave? Hia nte kyoqaa varaura. Ni kyoqaa nraahumwa mpo qara hi kyoqava mwataama kyeroma vahiro: Nte Karaisira qua nraakye qora timwa nyiqanama hia munimave mpo inraikyave mpiate timwaqina vuva, mwivama ni kyoqaa vahiro. Nte Karaisira qua nkyi timwa nyiqana qio nkyiqitaina munimave mpo inraikya varaariva vahuvanavata nte qaqira kye hia nkyiqitai vare varuva, mwiva mwia ni kyoqama vahiro.

<sup>19</sup> Hia vaisi mpovanto ni rupa taihana nte mwia kyaiqa vaisi varurave. Nte qati varuvama varuqo. Nte qati vaisi varura mwianra nte hia nronraqama kye riaraitina, kyai ekyaa nraakye qora Jesusira aanraqaa sita vare quankye tina, nte rupa taahua nraantantamwa kye variqana mwihua kyaiqa vaisi nraahu varirerana varura.

<sup>20</sup> Nte Iutaa nraakye qoravata variqana mwihua Jesusira aanraqaa quate tina, Iutaa nraakye qora Mosesira qua okyarara rieqata variqi quantema kye ntevata variqi vura. Nte hia Mosesira qua mwemwaniqa huva variqanavata mwihua Karaisira qua riaate tina, nte Mosesira qua okyara mwemwaniqa hina nrohi varina.

<sup>21</sup> Kuua qarama kye nte mpo mwatanaahuavata variqana mwihua hia Mosesira qua okyarara riemwaqi quantema kye ntevata mwihua Jesusira aanraqaa quate tina,

mwihua nraantantamwa kye variqi vura. Nte mwitaama kye variqi viqana hia nte Kotiva timwa tai quara qaqlira kyaraitina, nte Karaisira qua mwemwanima varina.

<sup>22</sup> Hia kepukyaqa hia nraakye qorahua variavana nte mwihuavata variqana mwihuavata Iesusira aanraqaa quate tina, ntevata vina mwihua nraantante hia kepukya vahivara votima kyena varura. Ekyaa mpo qara mpo qarama kye vari nraakye qorahua Iesusira aanraqaa quate tina, nte ekyaa mwihua variantema kyena ntevata variqina viqana mwihuqa kyaiqa utura.

<sup>23</sup> Nte Karaisira qua kyuqe qua rieqana nte mwitaamaqina vura. Nte mwitaamaqvi variariro Kotiva nivata mpo ihuavata kyuqema timwa taarive tina, nte mwitaamaqvi viqana Karaisira qua timwa nyiqi vi varura.

### *Kyoqaa vararerera tire kepukyaqama kye hiantaara*

<sup>24</sup> Nkye hia ntapihiarave? Mpo inraikya vataara vararerata nai ntutaa kye nai ntutaa kye hiante varia nraakye qorahua airivanto hiantaavaroo kuaiqiaavanto mwihuaqitairo nraatara kyero kyoqaa varairave. Nkyevata Iesusira aanraqaa viqata kyoqaa varehua hianteta quata.

<sup>25</sup> Nai ntutaa kye nai ntutaa kye hianteqata kyoqaa vararerera hiahua tauraaqama kye kyuqu kyaauquvanto huvantu vaantu hiro mwamwantavanto qio vahiarive tita, ekyaa nkylari mwamwanta kyakya hira qaqlira kyeta uro mwataara hiara.

Mwihua mwitaa hiqata kyoqaa vararerera kyatari mwaniqre qiataqaa qu nyataara mwia nraahu varaara. Mwihua mwaniqvanto tamusa quaninranra tera hiqata kepukyaqama kye hiantaara. Tire hia mwihua nraantante qumina kyoqaa taiqa quaninranra riaraitita, tire teta ekyaa enta qati variqi quana kyoqaarara rieqata tire teramate kyuqema kye Kotira aanraqaa vi varunanra.

<sup>26</sup> Mwianra rieqana nte hia tuqasaaqasa hina viti viri hiqana Kotira aanraqaa virera. Nte nriqi vataaninraqaa viqana avuqavuma kye virera. Hia nte vaisi mpovanto ntaqiqaro quminanraqi kyauqu tuto kyaintema kye ntevata kyauqu tutokyaqi virera.

<sup>27</sup> Nte Karaisira qua mpohua timwa nyiqi vina mwiaqatai ntena raupiri hiankyorave tina, nte ntenaqa kyuqema kye ntaqikyiqi vi varura. Nraaqiaravanto nai qora qua vataqiro quarive tiro, mwia qova mwia ntuqtira. Mwia nraantantamwa kye nte ntena mwamwantavanto tumusa quarive tina, nte ntena mwamwanta ntuqutuqi vi varura.

## 10

### *Nkyevata Iutaa haivaqahua hia Kotira aanraqaa nrohuntema kye nrohivorave tura*

<sup>1</sup> Ni kata pakyaa tuaavo, tiri Iutaa haivaqahua qumina mwataqaa nrohita uro taiqa vu quarara nkyevata nraato tuata. Mwi entara Kotiva mwihua kyaahaqama nyatovaro tonamwuvanto ekyaa mwihuaqaa ntaqikyiqiro viqaro aanra nyaamwute varuvata ekyaa mwihua nramanri nronra qio qareta vura.

<sup>2</sup> Mwihua ekyaa tonamwuqivata nramanriqvata Mosesira vataqita vurara tita, mwihua ekyaa mwi entara Mosesira nramanri varohua votima kye varura.

<sup>3</sup> Mwihua ekyaa qumina mwataqaa hia kyaravata nramanrivata vahuraqa Kotiva nyu kyarara nraahumwa mpo qara hu kyarara nramwaqi vi varura.

<sup>4</sup> Ekyaa mwihua Kotiva nai nyu nramanrinra nramwaqi vi varura. Mwihua mwi mwataraqaa nrohikata Kotiva nyu nramanrinra oriqtai nre varuvaro Karaisiva mwi nramanrinra nyinro mwi orira votima kyero mwiva mwihua kyapata variqiro vura.

<sup>5</sup> Kotiva tiri haivaqahuaqaa kyuqema kyero ntaqikyuvata ekyaa mwihua mwia qua riaataara vahuvata airivanto qaqlira kyeta mwia qua nteqa kyovaro mwia kyaara Kotiva hia mwihua qamwata nyatovata mwihua qutu vuvaro mwihua nyamwantavanto qumina mwata mwiaqaa mpona mpona vahura.

<sup>6</sup> Haaru Iutaa haivaqahua hia Kotira qua rieqata variqi vura, tire mwi quara rieta tirevata mwitaama kye variqi quarora. Mwihua mwutukyavanto qora kyaiqara vahuntema kyero tiri mwutukyavantovata mwitaa hiankyora.

<sup>7</sup> Mwihua hinivanto unra mwanriqa nrutu tuaaherontema kye tirevata mwitaa hiarora. Kotira mpukuqi qara ntumwa tova mwihuara mwitaama tiro:  
Nraakyе qoravanto mwatakyaa vi variqata  
kyaravata nramanrivata nreta  
mwiaqaataita api ntetutiqeqata varurave, tura. (Kyatura 32:6)

<sup>8</sup> Mwi entara mwihuaqitaita mponramwuvanto api qaraqita vura kyaara Kotiva mwihua saihovata kuua enta airi 23,000 nraakyе qoravanto qutu vura. Tirevata mwihua nrohuntema kyeta nrohiarora.

<sup>9</sup> Tire mwihuaqitai mpo uhua Kotira mwataara huntema kye tirevata Kotira mwataara hiarora. Mwihuaqitaita mponramwuvanto Kotirara hia tiriqaa kyugema kyero ntaqikyiho timwa kye Kotira mwataara huvaro mwia kyaara Kotiva quaiha vara kyovata mwihua airinramwu kutu taiqa kyora.

<sup>10</sup> Mwihuaqitaita mponramwuvanto Kotirara nrutu nraunru/ nrunru nraanru timwaqi vuvaro mwia kyaara nyaamwusairo Kotiva titova vaisi ru kye varuva mpovanto tumu mwihua ru taiqa kyora. Mwianra rieqatama tire mwihua hunte hiarora.

<sup>11</sup> Mate mwaa vari nraakyе qorahua Kotira okyara ntapihi kyeta taqaate tiro, tiri haivaqahua mwitaama kye api nrohi varuvaro Kotiva mwihua ntutuqiro vura. Tiriara mwihua mwi quara taunru kyeta mwihuavata mwitaa hivorave tiro, mwi quara Kotira mpukuqi qara ntumwa tora. Ekyara enta nri ntaariva qaumato vahata tire varurahuara tita, tiri haivaqahua qua qara ntumwa tora tire taunru kye mwihua votima kye api nrohiarora.

<sup>12</sup> Mwi quara rieqatama tahuave tire Kotira aanraqaa kepukyaqama kye varuro tihua rauriqata variata. Nkyevata uaqia hi kyaiqaraqi tumu ntita qora aanraqaa vivora.

<sup>13</sup> Nkyiara uaqia hi aanranraqaa quate tiro, airi inraikyavanto nkyi mwataara hirero uti varira. Mwi inraikyava hia nkyi nraahu mwataara hirero uti varira. Mwi inraikyava ekyaa nraakyе qora mwataara hirero uti varira. Mwitaa hi variharo Kotiva nkyiara nronraqama kyero riemwaqiro vi variva uaqia hi kyaiqava nkyi nraatara kyaankyorave tiro, Kotiva nkyi kepukyaqama nyatairata nkye uaqia hi aanranraqataita ntutuqema kye kyuqe aanraqaa viva qioma vahiananro.

### *Kotira vataqi viqata kuua vakya uaqia hi tove vaananravata vataqi quarora*

<sup>14</sup> Ni nramwunaa tuaavo, mwi quara rieqatama unra mwanriqa nrutu tuaahere okyarara nkye mwoqa mwia.

<sup>15</sup> Nkye kyuqe vu nraato vataahua variqara tita, nkye nkyetavanto ni qua tukyama kye kyuqe quave, uaqia hi quarave, qiata.

<sup>16</sup> Tire Karaisira nraanrevanto tumunra mwianra rieqata ntuvantuama vi variqata uaini vara kye Kotirara kyuqeve timwa kye kaapu kuaqitai mwi nramanrinra vara kye nreqata tire hiave Karaisiva tiriara rieqaro nai nraanre raurura mwianra rieta? Mperetivata nteqakye nreqata hiave tire Karaisiva nai mwamwanta tiri timwunranra rieta?

<sup>17</sup> Mpereti kuaiku vahata tire airivanto mpereti kuua mwikuraqatai nteqa kyeqa nre varunanranra tita, tire nraakyе qora airi mwihua kuua mwamwantama varuro.

<sup>18</sup> Nkye Isarerি vaisiara riaata. Mwihua Kotirani quara aasau rukyeta vateqata mwihua nkyiarivata mwi kyarara nreta mwihua Kotiravata kuaaqi varirerata mwitaa hura.

<sup>19</sup> Ni qua okyaravanto nataamave vahiro? Mwataamave vahiro? Unra mwanriqa qutaa varirani vaisivanto kyara mwia mwinranro qiove mwia kyaahaqa hiananro? Qaqao, hia ni qua okyaravanto mwitaama vahiro.

<sup>20</sup> Hia Kotira qua riaahua unra mwanriqani quara rukye variara mwia mwihua vaananima quara rita. Mwihua hia Kotiranivauma mwi quarara rita. Nkye hia Kotira qua riaahua mwihuavata variqata mwihua nkyiari vaanani vate kyarara nreqata nkyevata vaana mwihua kyapata kuaaqi varivorave.

<sup>21</sup> Nkye tiri vunyaa vaisi mwia kaapuqitai mwia nramanri nramwa kyeta mwiaqaatai uro vaanavanto hiani kaapuraqi nrevora. Nkye hiama qio tiri vunyaa vaisi kyapata taintagaatai kyara nramwa kye mwiaqaatai uro vaanavanto hiani taintaraqaatai nrevora.

<sup>22</sup> Tiri vunyaa vaisi raraqa taankyo tita, tire hiama uro vaana kyapata kuaaqi variara. Hia tire teta vunyaa vaisi nraatara kyaurahuave. Haunri tire teta vunyaa vaisi nraatara kye kepukyavanto varuro qiarora.

### *Vaisivanto hia nai nraahu kyuqema kyero variqiro quaninranra riaari*

<sup>23</sup> Hia tiriara qao tihata tire ekyaa inraikya qio nraahu utuarahuama varita. Mwitaa hiararovata hiama ekyaa inraikya mwiva tiri kyuqema timwataananro. Hia tiriara qao tihata tire ekyaa inraikya qio nraahu utuarahuama varita. Mwitaa hiararovata hia ekyaa inraikyavanto tiri kyaahaqa hiananro.

<sup>24</sup> Vaisivanto hia nai nraahu kyuqema kyero variqiro quaninranra riaari. Mwiva variqaro nai hena vaisi kyaahaqa hianinranravata riaari.

<sup>25-26</sup> Kotira mpukuqi mwitaama tiro:

Mwatavata, mwatanyaa kyaravata,

Kotiva hi inraikyava nraahu vahirave, tura.

(*Ihi 24:1*) Ekyaa kyara

Kotiva hi inraikyava vahirara tita, nkye ekyaa kyaara nreva nraahuma vahiro. Mwianra rieqatama nkye quara kyara maaketiqi vatera qioma kyoqama kye nrevora. Nkye mwia kyoqaa hiqata hiama kyapanapaara hita taisairo varaqiro vatairave tiraitita, qati mwia nraahu kyoqamaqita uro nraata.

<sup>27</sup> Mpovanto hia Kotira qua riaari vaisiva nrita nivata kyara nraate tirata nkye mwini uro mwiavata kyara nraivera, hia uro kyapanapaara hita taisairo mwi kyarara varaqiro vatairave tiraitita, qati nraata.

<sup>28</sup> Nkye nranrenra hivaro mpovavanto nkyiara tiqaro, Qaqao mwi kyarara unra mwanriqani vataarama iho, tirera, nkye hia mwi kyarara nraata. Toqaamwu ruankyo tita, hia mwi kyarara nraata.

<sup>29</sup> Hia nte nkyi toqaamwu ruaninra mwianravauma tuqo. Nte nkyi timwa nyi vaisira mwia toqaamwu ruankyo tinama tuqo. Mwiva nkyiara mwi kyarara unra mwanriqani vataa kyaravama vaiho tirata nkye mwi kyarara nraivaro mwi vaisiva tiqaro, Mwihua mwi kyarara hia nraataara nraavarro ni toqaamwu riho, qiankyorave. Nte nkyiara mwitaa qiariro mpovanto qao tiqaro mwitaama qiananro,

<sup>30</sup> Nte ekyaa kyarara Kotirara kyuqeve timwa kye nraanrinro tavave nianra e uaqia hiaro timwa kyero niqaa qua vataananro?

Nte Kotirara kyuqeve qiani kyarara mpovanto hia qao qiarivema, qiananro.

<sup>31</sup> Mpovanto mwitaa tiraqe nte nai mwitaama timwa mwianinra. E kyarave nramanrive nrenra mpo kyaiqa mpo kyaiqa vareqarama Kotira nrutu nraahu tuahererera hiqara mwitaamaqira quante, qianinrave. Nkye mwianra rieqatama nkyi hena vaisi toqaamwu ruankyo tita, rauriqata variata.

<sup>32</sup> Iutaave, Kirikive, mpo mwatanaave, Iesusira nraaqiara hini ihuave, nkye mwihuara rieqata variqi viqa mwi mwatanaahua tire utuananraqaatai mwihua uaqiahiraqi tumu ntivorave timwa kye rauriqata variqi quata.

<sup>33</sup> Nkyevata nte hunte hiata. Nte mpo kyaiqa mpo kyaiqa vareqana nraakyе qora qamwata nyataankye tina, vare varura. Kotiva ekyaa mwihua sitaarive tina, nte hia ntenga kyuqema mataaninranra riaraitina, nte mwihua kyuqema varirara nronraqama kye rieqana variqi vi varura.

## 11

<sup>1</sup> Nte Karaisiva nrohuntema kye nrohurara tita, nkyevata nte hunte hiata.

### *Nraakyevanto nkyiari qiata nraamwu hirara tura*

<sup>2</sup> Nkye nianra rieqata nte qua okyara nkyi timwa nyunranra riemwaqi vi variarara tina, nte nkyiara qamwateqana varuqo.

<sup>3</sup> Nkye mwaa quara ntapihi kye riaate tina, nte nkyi timwa nyinrenra. Ekyaa vaisiqaa ntaqikyi variva Karaisivama variro. Nraakyevanto variharo mwia vaativanto mwiaqaa ntaqikyi varivama variro. Karaisiva variharo Kotiva mwiaqaa ntaqikyi varivama variro.

<sup>4</sup> Karaisiva vaisiqaa ntaqikyi varira, mwianra rieqaroma nkye ntuvantuama vita varivaro nkyiqitairo vaisivanto Kotirara aakyara tirera hirove, Kotira qua tirera hirove, mwiva sivirera, mwi vaisiva hia nai qiata ntumwaquari. Mwi vaisiva nkyi suqaa siviro variqaro nai qiata ntumwaqu tairera, mwiva Karaisira kyauru mwataananro.

<sup>5</sup> Qaiqaa tirera. Vaativanto nraataqaa ntaqikyi varirara tiro, nkye ntuvantuamavi varivaro nkyiqitairo nraakyevanto Kotirara aakyara tirera hirove, Kotira qua nkyi timwa nyinrenra hirove, mwiva siviro mwitaa hirera, mwiva nai qiataqaa ntumwaqu taarive. Nraakyevanto hia nai qiataqaa ntumwaqiraitiro, nkyi suqaa siviro qua tirera, mwi nraakyeva nai vaati kyauru mwataananro. Mwitaa hiari nraakyeva qora hi nraakyeva nai qiata kyaahi ekyaa toqa kyaivara votima kyeroma variananro.

<sup>6</sup> Qikye, nraakyevanto nai qiata hia nraamwuma tairera, mwiva nai qiata toqa kyaarive. Mwiva tiqaro, Qiata toqa kyenave, ekyaa humutu kyenave, mwitaa hiariro ni kyaauruarivaare, tirera, mwiva nai qiata nraamwuma taarive.

<sup>7</sup> Kotiva vaisi utirero nai nraantantamwa kyero ututovaro Kotira kepukyavanto vaisiqatairo vara rairara tiro, vaisivanto siviro nraakyе qora suqaa qua tirera hiro hiama nai qiata ntumwaqu taananro. Nraakyevanto qati vaisi kepukyavanto mwiaqatairo vara rairara tiro, mwiva nai qiata ntumwaqu taananro.

<sup>8</sup> Kotiva vaisi utirero hia nraakyeqatairo vaisi utu tora. Kotiva vaisiqatairo nraakyе utu tora.

<sup>9</sup> Kotiva hia nraakyera rieqaro vaisi utu tora. Kotiva vaisiara rieqaro nraakyе utu tora.

<sup>10</sup> Kotiva vaisiara rieqaro nraakyе utu torara tiro, mwianra rieqaro nraakyevanto ni paativanto niqaa ntaqikyi varivave tiqaro nai qiataqaa ntumwaqu taananro. Mwiva nai qiataqaa ntumwaqu tairata nyaamwunyaahuavata mwia taqeta mwianra nai vaati qua riemwaqiro vi vari nraakyevave tivara.

<sup>11</sup> Nraakyevanto hia vaisi kyaahaqa hiraro hiama qio vaisivanto variqiro quananro. Vaisivanto hia nraakyе kyaahaqa hiraro hiama qio nraakyevanto variqiro quananro. Vaisivanto nraakyе kyaahaqa hiraro nraakyevanto vaisi kyaahaqa hiarive tiro, Kotiva vaisivata nraakyevata utu tora.

<sup>12</sup> Haaru Kotiva vaisiqatairo nraakyе utu tovaro nraakyevanto qovarama vura. Mate mwaa entara nraakyevanto qoraisi nraaqiara mwataqiro viharo mwiaqatairo vaisivanto qovara hi varira. Mwitaa iharovata qio ekyaa inraikyavanto Kotiraqaatairo qovara hi varira.

<sup>13</sup> Kyai nte mwaa quara qiarita nkyetavanto tukyama kye qiove hiave qiove qiata. Nraakyevanto hia nai qiata ntumwaqu tero qiove mwiva nraakyе qora suqaa siviro Kotirara aakyara qiananro? Qaqao, nraakyevanto hiama qio mwitaa hiananro.

<sup>14</sup> Nkyevata nraakyе qora okyarara rieta tiqata, Vaisi qiata mpuahaa vahirera, mwiva kyauruananrove, ti variara.

<sup>15</sup> Nraakyе qiata mpuahaa vahianinra mwia qiove. Nai qiata kyaahi mpuahaa mwiva mwia qiata ntumwaqu kyaiharoma nraakyevanto qio variro.

<sup>16</sup> Mwi quarara airi qua tiqaro ni qua nraatara kyarera utuani vaisirara nte mwitaama qianinra. Nraakyevanto nraakyе qora suqaa Kotira qua timwa nyinrenra hiro nai qiata ntumwaqu taarive, tura. Nte mwi quara nraahu timwa nyuqata Jesusira nraaqiara mpoqi mpoqi variahua ntapihi kyaara. Hia tire mwi quara qaqlira kye mpo qua riarera. Mwi quara nraahu riemwaqi virera.

*Tiri vunyaa vaisi kyara mperetivata uainivata apiqama kye nre varurara tura*

<sup>17</sup> Nte nkyiara mwi kyaiqara mwi kyaiqara mwataama kye varaate tiqana nkye mpo inraikyaqia utuarara rieqana nte hiama nkyiara qamwatauqo. Nte riauqata nkye mwaanra tirera ntuvantuama vita kyuqema kye variataara uaqama kyeta variara.

<sup>18</sup> Tohare nte mwaa quara nraante nkyi timwa nyinrenra. Mwitaa tihana riaura: Nkye mwaanra tirera ntuvantuama vita variqata nkye inronra hiqata ntainra vita variara. Nkyiara mwi quara tihana nte mwi quara rieqanama mwi quava hini qua quataa qua vahiananrove tura.

<sup>19</sup> Nkye mponramwuvanto tiqata, Tiri quavanto nraahuma avuqavu iho, timwa kyeqata mwia kyaara ntainra viqata variara. Mwia qio quataama nkye ntainra vita varivata mwiaqaatai avuqavuma vari nraakyе qorahua qovarama vivara.

<sup>20</sup> Nkye ntuvantuama vi variqata tiri vunyaa vaisi kyara naitarama kye nraataara vahata nkye apiqama kye nre variara.

<sup>21</sup> Nkye ntuvantuama vita variqata nkyeta kyakya hiraqa kyara vara kye nramwaquavata mpo hiahua nraataa ihata variavata mpo hiahua nronraqama kye uera nramanri nreta uera ntaara.

<sup>22</sup> Qikye, nkye hia nraamwuqi variahuate? Nkye nkyeta nraamwuqi variqata mwini kyaravata nramanrivata nramwa vareta, mwiaqaatai uro mwaanra tirerata ntuvantua hiataara vahata nkye hia mwitaa hi variara. Nkye variavata vehi nraakyе qoravata mwipi variavata nkye nkyeta nraahu kyara nraavata mwihua kyaurihata variara. Qikye mwihuavata Kotira nraakyе qora variavata nkye mwihua kyaurira inraikya vara nyinrenrata uti variara. Nte nkyi kyaiqa mwianra riena nte nkyiara nanreve qianinra? Nte nkyi qamwatave nyataaninra? Qaqao, nte hiama nkyi qamwata nyataaninra.

*Iesusiva mperetiavaravata uainianravata tu quara*

*(Matiu 26:26-29; Maaki 14:22-25; Ruku 22:14-20)*

<sup>23</sup> (Kyai nte qaiqaa tiri vunyaa vaisivanto tu quara nkyi timwa nyianri.) Tiri vunyaa vaisivanto mwi quara ni timwa mpuvana nte mwi quara nkyivata timwa nyiavara. Mwi quava mwataamama vahiro: Iutaasiva mwia qovarama kyarero veva ntero vu entara enta mwipi tiri vunyaa vaisivanto Iesusi Karaisiva nai nraaqiaranramwuvata kyara nreqanro mpereti vara kyero

<sup>24</sup> Kotirara kyugeve timwa kyero nteqa kyero nai nraaqiaranramwu nyinro tiqaro, Mwaa ni mamantave. Nkyiara rieqanama nkyi nyuqo. Nkye nianra rieqatama mwi kyarara nramwaqita quate, tiro.

<sup>25</sup> Mwitaa tuvata mwia nraaqiaranramwuvanto mwi kyarara nramwa kyovaro kuaa qarama kyero mwiva uaini kaapu vara kyero tiqaro, Mwaa nramanriva ni nraanreve. Kotiva nraakyе qora kyapata kuaaqi taaqau viro varirero qaraakya qua vataariva, mwi quava kyaakueqama quarive tiro, ni nraanrevanto mwi quara kyaakueqama kyaananrove. Nianra rieqama mwi nramanrinra nramwaqi quate, tura.

<sup>26</sup> Iesusiva mwitaa turara tita, nkye ntuvantuama vi variqata mpereti mwiavata, nramanri mwiavata, nramwaqi viqata nkye tiri vunyaa vaisivanto tiriara rieqaro qutu

vurara nkye nraakyе qora timwa nyi variara. Nkye mwitaamaqi vivaro tiri vunyaa vaisivanto uro ntantero tumuanri.

### *Hia paparuqama kyeqata mwaa kyarara nraata*

<sup>27</sup> Mwi quava mwitaama vahirara tiro, mpovanto uaquia hi kyaiqara utuqi viqaro tiri vunyaa vaisi mwia mperetivata mwia nramanrivata nrainrenra, mwiva tiri vunyaa vaisi mwia mwamwantavata mwia nraanrevata uaqiamma mwatairaro mwia kyaara mwiaqaa quama vahiananro.

<sup>28</sup> Mwitaa hiankyorave tiro, vaisivantove nraakyevantove nai mwutukya vu nraatoqi uaquia hi kyaiqava vahiankyo tiro, nai tukyama kye taqero mwiaqatairo mpereti mwiavata, nramanri mwiavata, qio nraananro.

<sup>29</sup> Mpovanto paparuqama kyero nreqanro hia Karaisira mwamwantara ntapihi kyero riaraitiro, qumina mperetivata nramanrivata nraanriva, naivantoma naiqaa qua vataananro.

<sup>30</sup> Nkye ntuvaantuama vita apiqama kyeta mwi kyarara nre variara mwiaqaa nrama nkye mponramwuvanto hia kepukya nraakyе qora variavata mponramwuvanto nriqa vi inraikyara vare variavata mponramwuvanto qutu quavo.

<sup>31</sup> Tire mwi kyarara nranrenra hita vuni teta uaquia hi inraikyara utuarava qati vahiankyo titi, teta mwutukya vu nraato tukyama kye taqeta, mwiaqatai qiomma mwi kyarara mwi nramwanrinra nraanranro hia tiriqaa qua vahiananro.

<sup>32</sup> Tiriara mwaa mwataraqaa varihuavata variqata nronraqama kye qua varevorave tiro, tiri vunyaa vaisivanto tiri kyaiqa mwataarama kyero taqamwaqiro viqaroma tiriara avuqavuma vahi aanranraqaa quate tiro, tiri ntuquti varira.

<sup>33</sup> Ni kata pakyaa tuaavo, mwi quara rieqatama tiri vunyaa vaisi kyara nranrenrata ntuvaantuama vita variqa nkye qakyoma kye mpohua sekya variqata kuaa vakya kuaaqi mwi kyarara nraata.

<sup>34</sup> Mpovanto kyara nraataa hiraro nai nraamwuqi nrenro ntuvaantua hiraqi nri-anri. Nkye mwitaama kye uro ntuvaantuama vita varivaro Kotiva hia nkyiqa qua vataananro.

Qio nte nraakiara nkye hinani uro ntena mpo quavata nkyi ntapihi kye timwa nyinrenra.

## 12

### *Kotira mwanraquravanto mpo qara mpo qarama kyero nraakyе qoraqi kyaiqa utuaninranra tura.*

<sup>1</sup> Ni kata pakyaa tuaavo, Kotira mwanraquravanto mpo kepukya mpo kepukya nkyi tukyama nyiani okyarara nkye api riemwaqita vivora.

<sup>2</sup> Nkye nkyeta haaru nrohi varu okyarara nkye ntapihiara. Haaru nkye hia Kotirara rio entara qora kyaiqvanto nkyi vara apiqama kyovata nkye uro unra mwanriqa hia qua tu inraikyara qamwata mwate varura.

<sup>3</sup> Nkye mwi entara hia Kotira mwanraqurara riaraitita, api nrohurara rieqana nte mwaa quara nkyi timwa nyinrenra. Kotira mwanraquravanto vaisi kyaahaqa hi varirera, mwi vaisiva hiama qio tiqaro, Kyai Iesusiva uaqiamma quarive, qiananro. Hiama qio mwitaa qiananro. Kotira mwanraquravanto hia vaisi mpo kyaahaqa hirera, mwi vaisiva hiama qio tiqaro, Iesusiva vunyaa vaisivanto variho, qiananro. Kotira mwanraquravanto kyaahaqa hiari vaisiva, mwiva nraahuma qio mwitaa qiananro.

<sup>4</sup> Nraakyе qoravanto Kotira kyaiqa mpo kyaiqa mpo kyaiqa varaate tiro, Kotira mwanraqura kuaa mwiva nraahu mwi kepukyara ntainra kyero nyi varira.

<sup>5</sup> Nraakyе qoravanto Kotira kyaiqa mpo kyaiqa mpo kyaiqa vare variavaro tiri vunyaa vaisi kuaa mwikuva nraahu mwihuaqaa ntaqikyi varira.

**6** Nraakye qoravanto mpo kyaiqa mpo kyaiqa mpohua vara nyate variavaro Kotiva kuaikuvanto mwihua su nyaato kyuqema nyataihata mwihua mwitaa hi variara.

**7** Ekyaa Kotira nraakye qoravanto kyuqema kye variqi quate tiro, Kotira mwanraquravanto mpo qara mpo qara hi kyaiqara nraakye qora nyaamwute varira.

**8** Kotira mwanraquravanto mpo kepukya vaisi mpo mwihanro mwi vaisira kyuqe vu nraato vaiharo mwiva kyuqe qua timwa nyiqiro vi varira. Kotira mwanraqura kuua mwiva nraahu vaisi mpo nraahumwa mpo kepukya mwihanro mwiva Kotira qua okyara timwa nyiqiro vi varira.

**9** Kotira mwanraqura kuua mwiva mpo kepukya vaisi mpo mwihanro mwiva mpoqama kyero Kotirara riemwaqiro viqaro quitaama Kotiva mwi kyaiqara mwi kyaiqara qio varaanarove ti varira. Kuua mwanraqura mwiva mpo kepukya mwihanro mwi vaisivave, mwi nraakyevave, nriqa qua nraakye qorhua kyuqema nyate varira.

**10** Mpo kepukya mwihanro mpovanto nronra kyaiqa nraahumwa mpo qara hi kyaiqara vare varira. Kotira mwanraquravanto mpo kepukya mpore mwihanro mwiva Kotira qua qovarama kyeqaro vutu kyero timwa nyi varira. Mpore mpo kepukya mwihanro mwiva variqaro mpovanto timwa tai quara riemwaqiro viqaro tukyama kyero taqero tiqaro, Mwaa quara Kotiva timwa tai quarave, mwi quara tovevaanavanto timwa tai quarave, ti varira. Kuua mwiva mpore mpo kepukya mwihanro mwi nraakyevave mwi vaisivave nraahumwa mpo quaqitairo ti varira. Kuua mwiva mpore mpo kepukya mwihanro mwiva nraahumwa mpo qua ti vari vaisira qua qio tuqasaa kyero riero mwiaqatairo nraakye qora ntapihi kyero timwa nyi varira.

**11** Mwitaamaqiro viqaro kuua mwanraqura mwiva nraahu mpo kepukya mpo kepukya ntainra kyero nyi variro. Mwiva nai kyakya hiraqa kepukya ntainra kyero nyiqiro vi varira.

### *Tire Karaisira mwamwanta kuua mwamwanta varurahuave tura*

**12** Vaisi mwamwantavanto kuaiku vaiharo mwamwanta mwiaqaa mpo mwamwanta mpo mwamwanta airiqianima vahiro. Mwitaama kyero airi mwamwanta vaiharovata mwamwanta kuaikuma vahiro. Mwia votima kyero Karaisira mwamwanta kuaiqia nraahu vahata tire mwia mwamwanta hini mpoqia mpoqia airivantoma varuro.

**13** Kuua qarama kye tire Iutaavantove, mpo mwatanaavantove, rupa tai nraakye qorahuave, qati nraakye qoravantove, variqata tire nramanri varaintema kyeta Kotira mwanraqura varauunanrave. Kotiva nai mwanraqura titaihata tire mwia mwanraquravata variqata Karaisira kuua mwamwantavantom varita.

**14** Vaisi mwamwanta vahirero hia mwamwanta kuaiqia nraahuvauma vahiro. Mwamwanta mwiaqaa nai mpo mwamwanta mpo mwamwanta airiqianivantoma vahiro.

**15** Vaisi kyuqvanto tiqaro, Nte hia kyuauqu vahuvara tina, nte hia vaisi mwamwantave, tirera, mwia quavanto hia quaqa hiananro. Kyuqu mwiva mwamwantaqaanaavama vahiro.

**16** Vaisi nraatovanto tiqaro, Nte hia vu vahuvara tina, nte hia vaisi mwamwantave, tirera, mwia quavantovata hia quaqa hiananrave. Nraatovantovata mwamwantaqaanaavama vahiro.

**17** Ekyaa vaisi mwamwanta mwiva vuku nraahu vahirera, nataama kyero ve vaisi tira riaananro? Vaisi mwamwanta mwiva nraatoku nraahu vahirera, nataama kyero ve mwunta huaananro?

<sup>18</sup> Tiri mwamwantavanto hia mwitaama kyero vaihata varunanra. Kotiva tiri vaisi mwamwanta utiqaro mwi mwamwantava mwi kyaiqara varaarive, mwi mwamwantava mwi kyaiqara varaarive, timwa kyeqaro utu tora.

<sup>19</sup> Mwamwanta pata kuaiqiaru nraahu vahirera, ekyaa hini mwamwanta mwiva tanave vahiananro?

<sup>20</sup> Qio vaisi mwamwantavanto vahirero mwamwanta mpoqia mpoqia vahira tomaqa kyaiharo mwamwanta kuaiku vahira.

<sup>21</sup> Vaisi mwamwantavanto mwitaama vahirara tiro, vuvanto hiama qio kyauquara tiqaro, E hia varirage nte qioma varianinrave, qiananro. Qiavantovata hiama qio kyauquara, E hia varirage nte qioma varianinrave, qiananro. Hiama qio mwita qiananro.

<sup>22</sup> Tiri vaisi mwamwantavanto hia mwitaama vaihata varunanra. Teta mwamwanta mpoqiara uqenrai mwamwantarave turava, mwiqiava hia vahirera, tire hiama kyuqema variananra.

<sup>23</sup> Tire mwamwanta mpoqiara qumina mwamwanta hia kyue hirave tunanra mwiaqa kyuqema kyeta ntaqikyi varunanra. Mpo mwamwanta qoqaa vahiankyo tunanra, mwia kyuqema kye tuavaaqao ntumwaqu mwataunana.

<sup>24</sup> Mpo mwamwantara tire kyue hi mwamwantarave timwa kye qati kyauanra. Kotiva vaisi mwamwanta kyuqema kyero taaqau tairara tiro, vaisivanto nai mwamwantaqaa ntaqikyiqaro nai mwamwanta mpoqiara qumina mwamwanta hia kyue hivave tira, mwiqiaraqaa kyuqema kyero ntaqikyiqiro vira.

<sup>25</sup> Vaisi mwamwantavanto mwitaama vahirara tiro, vaisi mwamwanta mpoqia mpoqia vahiva hia tukyama viro nanrianraa variqaro nai kyaiqa vare varira. Ekyaa mwamwanta mwiva ntuvaaqua hiro nai kyaahaqa nai kyaahaqa hi varira.

<sup>26</sup> Mwia mwamwantaqatairo mwamwanta kuaiqavanto nriqa viraro ekyaa mwia mwamwantavanto nriqa quananro. Mwia mwamwantaqatairo mwamwanta mpoqavanto kyakya hiraro ekyaa mwamwanta mwiva kyakya hiro qamwataananro.

<sup>27</sup> Vaisi mwamwantaqaa ntumwa kyena tuva mwia okyaravanto mwitaamama vahiro. Nkye Karaisira mwamwanta kuaa mwamwantama variavo. Nkye mwia hini mwamwanta mpoqia mpoqia vahira mwihuama variavo.

<sup>28</sup> Kotiva nai nraakyе qora nyaanrama kyero kyaiqa tukyama kyero mpo kepukya mpo kepukya nyinro.

Toharero mwiva vaisi mponramwu nronraqama kyero, Nkyenramwu vuni variqata Karaisira qua mwakyaakya nraakyе qora timwa nyiqi quate, tiro.

Mwia nraakiara mponramwu nronraqama kyero tiqaro, Nkye vuni varia vaisihua nraakiara variqata nte qovarama kyaani quara nraakyе qora timwa nyiqi quate, tiro.

Mwitaa timwa kyero mwiva vaisi mponramwu nronraqama kyero tiqaro, Nkye mwihu nraakiara variqata ni nraakyе qora ni kyaiqa okyara nyaamwutaivata mwihu kyuqema kye ni aanraqaa quate, tiro.

Mwitaa timwa kyero mwiva mponramwu nronraqama kyero mwihuara tiqaro, Nkye nronra kyaiqa hia nraakyе qora taqe kyaiqara varaqi quate, tiro.

Mwitaa timwa kyero mwiva mponramwu nronraqama kyero mwihu, Nkye nriqa vi nraakyе qorahua qioqama kyeqata vara mwaamwianrama kyaate, tiro.

Mwitaa timwa kyero mwiva mponramwu nronraqama kyero, Nkye nraakyе qora kyaahaqamaqita quate, tiro.

Mwitaa timwa kyero mwiva mponramwu nronraqama kyero, Nkye mpo kyaiqaqaa mpo kyaiqaqaa ntaqikyiqi quate, tiro. Mwitaa timwa kyero mponramwu nronraqama kyero, Nkye nraahumwa mpo quaqitaita timwaqi quate, tiro.

<sup>29</sup> Kotiva hia nai nraakyе qora ekyaa mwihu kuaa qarama kyero kuaa kepukya mwia nraahu nyinrave. Hia nkye ekyaa mwihu Kotiva nronraqama kyaari vaisihua vuni variqata Kotira nraakyе qoraqaa ntaqikyitave, Kotira qua qovarama kyehua

varitave, ni kyaiqa okyara nyaamwutehua varitave, nronra kyaiqa hia nraakye qora taqe kyaiqara qovarama kyetave,

<sup>30</sup> nriqa vihua vara mwaamwianra kyetave, nraahumwa mpo quaqitai titave, mwi quara vara ntapihi kye timwa nyitave, mwitaa hiate tirave. Qaqao, Kotiva tukyama kyero mpo qara mpo qara hi kyaiqara mpohua mpohua nyinrave.

<sup>31</sup> Nkye Kotira kyaiqa vararerata nkye vuni nronraqama kyero vahiani kepukyara mwianra nraante nkyi mwutukya vahiar.

## 13

*Mpohuara mwutukya vahiani okyarara tura Qio kyai nte mpoqivata aanra kyuver-aqaa nrohi okyarara mpo nkyi timwa nyianri.*

<sup>1</sup> Nte mpohuara mwutukya vahiani okyarara nkyi timwa nyinrenra. Mwi okyarava vuni vahi okyaravama vahiro.

Nte mwaa mwataraqaa varihua qua mpo qua mpo qua qio tiqana nyaamwunyaahua quavata qio qiariro ni mutukyavanto hia mpohuara vahirera, nte mpo qua mpo qua qiariva, mwiva qumina vahi nyaamwa nruquave, taaqa nruqua votima kyeroma vahiananro.

<sup>2</sup> Nte Kotiva qovarama kyaani quara mpo qua mpo qua timwa nyi variqanave, nte ekyaa qua okyara rieqana ekyaa uqeta taani quara rienave, nte tiqana, nte Kotira kepukyara kepukyaqama kyena riemwaqina quariva qioma taaqi mpo rataa kyaananrove, qiarivavata variariro mpohuara mwutukya vahiariva hia niqi vahirera, nte qumina inraikyavanto varianinrave.

<sup>3</sup> Nte Kotirara rieqana ekyaa ntena vataani inraikyara vehi nraakye qora nyinave, nte kyaariro ni mamanta qiavanto itamwa kyairarovata mpohuara mwutukya vahiariva hia niqi vahirera, mwi inraikyava hiama ni kyaahaqa hiraqe nte quminama mwitaa hianinra.

<sup>4</sup> Mpohuara mwutukya vate okyarava mwataamama vahiro. Mwia mwutukyavanto mpohuara vahiar vasisiva hia qamwanrama kyero nkyiari uaqiam nyataraitiro, mwiva kyuqema kyeqaro mpohuavata kyaahaqa hiananro.

Mwia mwutukyavanto mporara vahiariva hiama vaisi mpovanto airi inraikya vataaninranra ua hiananro.

Mwiva hiama nai mwahuta qiananro. Mwiva hiama nai nrutu tuaheraaanano.

<sup>5</sup> Mpohuara mwutukya vahiariva hiama mpohua mwutukya uaqia hiarintema kyero qua tirove, nanrianra nraahu rierove, mwia utaqitairo qamwanrama kyero raraqa taariva nriananro.

Mpohuara mwutukya vahiariva mpohua mwia uaqiam mwaterrara hiama qati nraahu riemwatero kyaara ntumwaqiro quananro.

<sup>6</sup> Mpohuara mwutukya vahiariva hiama uaqia hi kyaiqara varaaninranra qamwateqaro variananro. Mwiva Kotira kyaiqa qutaa kyaiqara qamwateqaro variananro.

<sup>7</sup> Mpohuara mwutukya vahiariva hia qoriri hiraro mpohua kyaahaqamaqiro quananro. Mwiva Kotirara kepuqyaqama kyero riemwaqiro quananro. Mwiva Kotira vekya variqaro Kotira aanraqaa kepuqyaqamaqiro viqaro muaanra vahiani entara hiama Kotira qaqlira kyaananro.

<sup>8</sup> Mpohuara mwutukya vahiani okyarava hiama taiqa quananro. Mwi okyarava qati nraahu vahiqiro quananro. Vaisivanto Kotira qua timwa nyiqiro quari okyarava, mwiva taiqa quananro. Vaisivanto Kotira qua nraahumwa mpo qua qiari okyarava, mwivavata taiqa quananro. Vaisivanto mpo okyara mpo okyarara timwa nyiqiro quariva, mwi okyaravavata taiqa quananro.

<sup>9</sup> Tire mwaa entara Kotira okyara hia ekyaa mwia ntapihiraitita, pata mpoqiatana nraahuma ntapihitita. Mate mwaa entara Kotiva nai qua mpoqiatana nraahu timwa timwhata tire mwiqiatana nraahu nraakye qora timwa nyi varunanra.

<sup>10</sup> Nraakiara tire ekyaa inraikyaqi qioqa hiana entava nri ntairaqe tire hia hini vitiqia nraahu ntapihiarava vahiananrove. Tire ekyaa inraikya ntapihiananrave.

<sup>11</sup> Nte nraaqiara variqana nte nraaqiara taaqa qua timwaqina quavaro ni pu naatovanto nraaqiara taaqa vu nraato vahuvana variqina quavara. Nte mate nronra tuemwa vina nraaqiara taaqa okyara qaqlira kyena varura.

<sup>12</sup> Tire mate Kotira nraakye qoravanto nraaqiara taaqa votima kye variqata Kotira okyara hia anomia kye taqe varunanra. Vaisivanto kyinumiqi hia kyuqema kyero nai mwanraqura taqaintema kye tire Kotira okyara taqeqlatavata hia ntapihi kye taqaunana. Nraakiara tire nai viri nai viri taqeqlata ntapihi kye taqaanana. Nte mate mwaa entara hini qua nraahu riaariva nraakiara ekyaa qua ntapihi kyena riaaninra. Kotiva ni okyara ekyaa ntapihi kyero taqaintema kyena nte ntena okyara ntapihi kyena taqaaninra.

<sup>13</sup> Taarampo okyaranramwuvantoma qati nraahu vahiqiro quananro. Kotirara riemwaqiro quari okyarava vaharo, Kotira vekya variqata qamwate okyarava vaharo, mpohuara mwutukya vahiarivi okyarava vahiro.

Mwinramwuhuaqitairo mpohuara mwutukya vahiani okyarava vunyaa okyarama vahiro.

<sup>1</sup> Mwianra rieqatama nkye mpohuara mwutukya vahianinra mwia nraante vara vuniqama taata. Nkye mwia vara vuni vateta Kotira mwanraquravanto mpo kepukya mpo kepukya nyianinranra nronraqama kye rieqata qati nraahu varaataa hirata variata. Kotira qua mwakyaakya nraakyne qora timwa nyi kepukyara, mwi kepukyara nkyi varaataa hirata variata. (Hia nraahumwa mpo qara hiani quaraqitai ti kepukyara nkyi varaataa hirata variata.)

<sup>2</sup> Kotira mwanraquravanto mpo kepukya vaisi mpo mwihanro mwiva mwiaqaatairo nraahumwa mpo qua timwaqiro quariva, mwi vaisiva mwi quara tirata nraakyne qoravanto mwia qua hia riaivarot Kotira nraahuma mwia qua riaananro. Kotira mwanraquravanto mwia kyaahaqa hiraro mwiva uqeta taani quara nraahu timwaqiro quananro.

<sup>3</sup> Vaisi mpovanto hia mpo quaqitairo tiraitiro, vutu kyero Kotira qua mwakyaakya timwa nyianri vaisiva, mwiva timwa nyinrata nraakyne qoravanto mwia qua kyuqema kyeta rierara tiro, mwi vaisiva qioma mwihua kyaahaqama nyatero, mwihua kepukyaqama nyatero, mwiva qioma mwihua mwutukya qihaakyama nyataananro.

<sup>4</sup> Nkye ntuvantuama vita varivaro vaisi mpovanto Kotira qua nraahumwa mpo quaqitairo tirera, mwi quava nai mwi vaisira nraahuma kyaahaqa hiananro. Hia mpo quaqitairo tiraitiro, vutu kyero Kotira qua timwa nyianriva ekyaa Kotira nraakyne qorana kyaahaqama nyataananro.

<sup>5</sup> Kotira mwanraquravanto mpo kepukya nkyi nyinrata nkye nraahumwa mpo qua mpo quaqitai tivera, nte pataqima nkyiara qamwataaninra. Kotira mwanraquravanto mpo kepukya nkyi nyinrata nkye Kotira qua qio tivera, nte mpogama kyena nkyiara qamwataaninra. Nkye ntuvantuama vita varivaro Kotira qua mpo quaqitairo qiariva timwaqiro viraro hia mpovanto mwia qua qio tuqasa kyero nraakyne qora timwa nyinrenra, mwia quavanto hiama qio nkyi kyaahaqa hiananro. Mwitaa hiraro Kotira qua vutu kyero tirata ekyahua mwia qua rie vaisiva, mwiva mwia quavata nraatarama kyaananro.

<sup>6</sup> Ni kata pakya tuaavo, nte nkye hinani uro ntena nte nkyivata nraahumwa mpo quaqitaina qiarita nkye hiama qio ni qua riaivarot hiama qio ni quavanto nkyi kyaahaqa hiananro. Nte nkye hinani uro ntena vutu kyena Kotira qua qoqaa nkyi timwa nyinrenrave, Kotira okyara uqeta tai quara nkyi timwa nyinrenrave, nkye mwitaa mwataama kyeta Kotira aanraqaa nrohiate tina, nkyi timwa nyinrenrave, nte mwitaama kye vutu kyeqaa nkyi timwa nyianrita nkye ni qua ntapihi kyeta riaivarot mwi quava qioma nkyi kyaahaqa hiananro.

<sup>7</sup> Nkye riaivaqe nte hia qakyaa hira qumina inraikya ntomavaarave, kitaarave, mwiaqa ntumwakye tirera. Ntomavaara api vuatairaro hiama kyuqema kyero nruqua qiananro. Kitaavata api ntiraro hiama kyuqema kyero nruqua qiananro.

<sup>8</sup> Ntaqi ntomanra apiqama kyero rirata hiama qio ntaqi vaisihua veva huru kyaamwu tera taara hivara.

<sup>9</sup> Mwia votima kyeta nkye nraahumwa mpo quaqitai tiqata hia vutu kye tivera, tavave nkyi qua qio riaananro? Nkye hia qua vutu kye tivaro nkyi quavanto qumina inraikyaqama hiananro.

<sup>10</sup> Mwaa mwataraqaa mpo mwatanaa mpo mwatanaa qua airi vaiharo hia mpo qua qumina quavata vahira. Ekyaa mwia okyara vahi quava nraahu vahira.

<sup>11</sup> Vaisivanta nianra mpo quaqitairo tiraqe nte hia mwia qua riaankyerot, nte mwi vaisirara mpo mwatanaa vaisivema qianinra. Mwivavata nianra mpo mwatanaa vaisivema qiananro.

<sup>12</sup> Nkyevata ntuvantuama vita variqata nraahumwa mpo quaqitai timwaqi vivera, nkyi quavanto mpo mwatanaahua qua votima kyero nraahuma vahiananro. Kotira

mwanraquravanto nyiani kepukyara nkyi mpoqama kyero mwutukya ntihata vari-ahuara tita, nkye Kotira mwanraqurara tiqata, Mpo kepukyra timwinraqe vutu kyeqata ntapihi kye tiqata nai kyaahaqa hi nai kyaahaqa hi hiare, qiata. Mwi kepukyara varerara nkyi mwutukya vahirata variata.

<sup>13</sup> Kotira mwanraquravanto vaisi mpo kepukyra mwinranro nraahumwa mpo quaqitairo qiariva mwi quara okyara hia ntapihiraitiro, nkye ntuvaaquama vita variraqi mwi quara qiankyora. Mwi vaisiva Kotira kyapara hiraro Kotiva mwia kyaahaqa hiraro mwi quara okyara tuqasaa kyero ntapihi kye nraakye qora timwa nyianri.

<sup>14</sup> Kotira mwanraquravanto ni kyaahaqa hiraqe nte nraahumwa mpo quaqitaina Kotirara aakyara ntaariro ni mutukya manraquravanto qio rie varivaro ni pu naatovantoma hia qio riaananro.

<sup>15</sup> Mwitaa hiraqe nte nataave hianinra? Nte mwutukya mwanraquraqtai nraahumwa mpo quaqitai Kotirara aakyara nteqana nte vu nraatoqitainavata riemwa kyena Kotirara vutu kye aakyara ntarera. Nte mwutukya mwanraquraqtai Kotirara ihi tiqana nte vu nraatoqitainavata riemwa kye vutu kye ihi tirera.

<sup>16</sup> Nkye Kotira qamwata mwatarera uti variqata mwianra nraahumwa mpo quaqitai kyuqeve ti varivaro nkyi mwutukya mwanraquravanto nraahu mwi quara qio riaananro. Nkye mwitaa timwaqita vivaro mpovanto nkyivata nrumu variariva nkyi qua hia riaraitiro, nataama kyerove nkyi quara quutaave qiananro?

<sup>17</sup> Nkye nraahumwa mpo quaqitai timwaqi vigata Kotirara kyuqeve tivar nkyi quavanto kyuqe qua vahiqaro nkyita nraahu kyaahaqa hiqaro hiama qio nkyi henanra mwia kyaahaqa hiananro.

<sup>18</sup> Nte nkyi nraatara kyena nraahumwa mpo quaqitaina airiqama kyena ti varu-rama. Nte mwianra rieqana Kotirara kyuqeve ti varura.

<sup>19</sup> Kotira nraakye qora ntuvaaantuama vita varivaqena nte mwihua utaqaa variqana nraahumwa mpo quaqitaina qumina airi quantikara qiarita hia rievo tina, nte mwihua rie quaraqitaina pataqia toqa kyena qiariro mwihua qio kyaahaqa hiananro.

<sup>20</sup> Ni kata pakyaa tuaavo, nraaqiara akirivanto hia uaqia hi kyaiqara utiraitiro kyuqema kyero varintema kye, nkyevata variate. Mwitaama variqatavata hia nraaqiaravanto vu nraato tintema kye vu nraato tuate. Nkye nronra tuaahua vu nraatoqa hirata variata.

<sup>21</sup> Kotira mpukuqi Kotiva mwitaama tiro:

Mpo qua ti vaisihua nroqitai

nte mwaa mwatanaahua ntene qua timwa nyinrenrave.

Nte mpo mwatanaa mwihua nyqitaina qiaritavata hia

mwaa mwatanaahua ni qua rievarave, tura.

(Aisaiaa 28:11-12)

<sup>22</sup> Hia qumina nraakye qorara riaraitiro, Kotira nraakye qoravanto Kotira kepukyra taqaate tiro, Kotira mwanraquravanto mpo hiahua kyaahaqa hiqaro mwihua kepukyra mpo nyihata mwihua nraahumwa mpo quaqitai ti variara.

(Mwi quava vahiro mpo quavatama vahiro. Mwataamama vahiro): Hia Kotira nraakye qorara riaraitiro, qumina nraakye qoravanto Kotira kepukyra taqaate tiro, Kotira mwanraquravanto vaisi mponramwu kyaahaqa hiqaro mpo kepukyra nyihata mwihua qumina nraakye qora Kotira qua timwa nyi variara.

<sup>23</sup> Nkye ntuvaaantuama vita variqata nkye ekyaa mwihua nraahumwa mpo quaqitaita timwaqi vivata mpo ihua qumina nraakye qorave, hia Kotira qua riehuave, mwihuavata nrumu variqata mwihua nkyi qua rietama nkyiara vu nraato apiqama vihata ueraqama quavoma tivara.

<sup>24</sup> Nkye ntuvaaantuama vita variqata Kotira qua ntapihi kye timwa nyiqi vivaro mpovanto qumina vaisivantove, hia Kotira qua anomia kyero riaari vaisivave, nkyi qua riero tiqaro, Qutaa nte uaqia hi kyaiqara uti varuvama varuqo, qiananro. Mwiva

mwitaa tiraro nkyi quavanto mwia kyaahaqa hiraro mwia vu nraato ntapihi viraro mwiva tiqaro, Qikye, nte uaquia hi aanranraqaa nrohi varuvama varuqo, qiananro.

**25** Mwitaa timwa kyero mwiva nai uqeta taani quara timwa qovarama kyero mwiva tumu ntiro variqaro Kotira nrutu tuaaherero tiqaro, Qutaaqama kyeroma Kotiva nkyi utaqaa variho, qiananro.

### *Poruva mwataama kye variqi viqata Kotira qua mwaanra qiate tura*

**26** Ni kata pakyaa tuaavo, ni qua okyaravanto mwataamama vahiro. Nkye mwaanra tirerata ntuvaantua hita variqata nai kyaahaqa hi nai kyaahaqa hirara rieqata variata. Nkyiqitairo mpovanto tiqaro, Nrivaqe mwi ihira qiare, tirata nkye mwia qua rieta mwi ihira tivaro mwiaqatairo mpovanto tiqaro, Tire mwataama kye Kotira aanraqaa nrohirerave, tirata nkye mwia qua rieta varivaro mwiaqatairo mpovanto tiqaro, Kotiva mwitaa tihana riaurave, tirata nkye mwia qua rie varivaro mwiaqatairo nraahumwa mpo quaqitairo nkyi timwa nyi variraro mpovanto mwi quara tuqasaa kyero nkyita quaqitairo timwa nyi varirata mwia qua riaata. Mwitaama kyeqata mwaanra timwaqi quata. Nkye nai kyaahaqa hi nai kyaahaqa hirara rieqata variata.

**27** Nkyiqitai airivanto nraahumwa mpo quaqitai nkyetara nkyetara timwaqita vivora. Kuaikuvantove, taarakuvantove, taaramponramwuvantove, qioma nraahumwa mpo quaqitaita tivara. Mwinramwuhua nraahumwa mpo quaqitai tirerata kuaiqia kuaiqiavantoo timwaqi vivaro mpovanto mwihua qua tuqasaa kyero nkyi timwa nyinrata nkye ntapihi kye rievara.

**28** Mwihua qua tuqasaa quariva hia varirata nraahumwa mpo qua tihua mwihua tirema variata. Mwihua variqata nkyiariaraqama kye Kotiravata qua tiqata variata.

**29** Vaisi taaratanave taarampotanavantove Kotira qua tirera hivera, nkye qati kyaivata mwinramwuhua qiata. Mwinramwuhua qua nkyi timwa nyivata nkye mwihua qua tukyama kye rieqata variata.

**30** Mpovanto siviro Kotira qua timwa nyi variraro mwiaqatairo mpovanto mwatakyaa quariva tiqaro, Kyai ntevata Kotiva ni mpi quara timwa nyiankye, tirera, vaakya siviro qua qiariva eo timwa kyero mwatakyaa viraro mwivavata nkyi qua timwa nyianri.

**31** Nkye mwitaama kye kuaiqia kuaiqiavantoo siviqata Kotira qua timwaqi viqatama ekyaa nai kyaahaqa hi nai kyaahaqa hiqata ekyahua kepukyaqama nyatevara.

**32** Vaisi mpo Kotiva nai qua qiarive tiro nai kepukya mwianriva, mwi vaisiva nai quaqaa ntaqikyiqaro nai tukyaqama qiananro.

**33** Kotiva hia kyirikyairi hi kyaiqara vararaitiro, Kotiva kyuqema kyero kyaiqa vare varirara tita, nkyevata hia kyirikyairima kyeqa mwaanra tiraitita, vivinrama kyeta qiata.

Kotira nraakye qoravanto mwatukya mpoqi mpoqi ntuvaantua hiantema kye

**34** nkyevata mwaanra tirera ntuvaantua hita variqata nraakyera nkye hia uro sivita Kotira qua qiate, nkye tirema variate qiata. Kotira mpukuqi nraakyevanto hiama vuni variananrove tura.

**35** Nraakyevanto mpo qua okyara kyaparama kyero ntapihirero nai nraamwuqi variqaro nai vaati ntumwahiamwa hiari. Nkye ntuvaantua hiraqi nraakye mpovanto siviro qua tirera, kyaantaaqaqa hiro hiama kyuqe hiananro.

**36** Qikye, Kotira quavanto nkyi Korintiqitairove qovara hiro? Mwi quava nkyi nraahu kyaahaqa hirero qovarama virave iho? Hiave.

**37** Mpovanto nanrianra tiqaro, Nte Kotira qua ti varuvave. Kotira mwanraquravanto mpo kepukya mpihana varuvave, tirera, mwi vaisiva ni quara quataavema qiananro. Mwiva nte tu quara mwianra, Tiri vunyaa vaisivanto vatai quaravema, qiananro.

**38** Mwi vaisiva ni quara hia nronraqama kyero riairera, nkye mwi vaisira qua hia riaata.

<sup>39</sup> Qio ni kata pakyaa tuaavo, Kotira qua mwakyaakya nraakye qora timwa nyi kepukyara mwi kepukyara nkyi varaataa hirata variata. Nkyiqitairo mpovanto nraahumwa mpo quaqitairo nkyi timwa nyinrenro utirata hia mwianra qao tiraitita, qiomia tinanrave qiata.

<sup>40</sup> Nkye ntuvantuama vita variqata hia apiqama kye Kotira qua mwaanra tiraitita, ntapihi kyeqata Kotira qua mwaanra tira mwivau timwaqi quata.

## 15

### *Karaisiva qutu vuraqitairo qaiqaa qati sivurara Poruva tura*

<sup>1</sup> Ni kata pakyaa tuaavo, nte Karaisira mwakyaakya nkyi timwa nyiava quara qaiqaa nkyi timwa nyianrita nkye mwi quara rieqata variata. Nte tauraa mwi quara nkyi timwa nyiavata nkye mwi quarara qutaa quave timwa kyeta mwiaqaatai nkye mwi quara kepukyaqama kye riemwaqita vura.

<sup>2</sup> Karaisira qua nkyi timwa nyiavara nkye hia mwi quara qaqlira kyaraitita, kyuqema kye tutaver, mwi quava nkyi kyaahaqa hiraro Kotiva hia nkyi qaqlira kyaraitiro nkyi sitaanano. Nkye mwi quara hia kyuqema kye tutavaro mwi quava hia nkyi kyaahaqa hiankyora.

<sup>3</sup> Mwi quara ni timwa mpuvana nte mwi quarara vunyaa quama vaiho timwa kye mwi quara nkyi timwa nyiavara. Nte nkyiara mwitaama tina. Tire uaqia hi kyaqlira uturava nraka quarive tiro, Karaisiva tiriara rieqaro qutu vura. Kotira mpukuqi mwitaama kyero qutu quananrove turaqa mwiva qutu vura. *(Aisaiaa 53:5-12)*

<sup>4</sup> Karaisiva qutu vuvata mwataqi quntamwa tovaro taarampo enta vaitero mwiaqaatairo qaiqaa qati sivura. Kotira mpukuqi mwitaama siquananrove turaqa mwiva sivura.

<sup>5</sup> Karaisiva qutu vuraqitairo qati siviro uro Pitaara vuqaa qovarama viro mwiaqaatairo mwiva nai nronraqama kyo vaisihua 12 nramwu suqaa qovarama viro

<sup>6</sup> mwiaqaatairo nai nraaqiara airi 500 nramwu suqaavata qovarama vuvata mwihua mwia taqora. Mate mwi nraakye qorahua hininramwu qutu quavata hini airivanto qati variara.

<sup>7</sup> Iesusiva nai nraaqiara mwihua suqaa qovarama viro, mwiaqaatairo Iesusiva Iemisira vuqaavata qovarama viro, mwiaqaatairo ekyaa nai nronraqama kyo vais-inramwuhua suqaa qovarama vuvata mwia taqora.

<sup>8</sup> Karaisiva mwitaamaqiro viro ekyara ni puqaavata qovarama vuvana taqaavara. Nraaqiara mpo mwatai iherava nritaraiharo nraakiara mwataintema kyena nte nraakiarani Karaisira nraaqiaraqama vura.

<sup>9</sup> Nte Iesusiva nronraqama kyai vaisihuaqitaina uapaa vaisi hia kyuqe huva varuva. Tauraa Karaisira vataqi nrohi varu nraakye qorahua nte anoma kye uaqiamaqina quavarara tiro, Karaisiva hia nianra nronra vaisive qiataara.

<sup>10</sup> Kotiva mwiva nraahu nianra po kye tiqaro kyuqema matahananra tina, nte mwataama kye vaisi nronra varura. Kotiva ni kyuqema mataihana hia nte qaqlira kyena qati varura. Nte kepukyaqama kye mpooqavata mwia kyaiqa varaqi viqana mwiva nronraqama kyai vaisinramwuhua kyaiqavata nraatara kyaura. Qio hia nte ntena kepukyara mwi kyaiqa varaura. Kotiva ni kyuqema matero kepukyaqama mpihana nte mwia kyaiqa varaqi vi varura.

<sup>11</sup> Nteve mwihuave Karaisira qua nkyi timwa nyunanaa mwianra nte hiama nronraqama kye riena. Tire mwinro mwaanro mwihua nkyi timwa nyunrata nkye mwi quarara qutaae timwa kye variara, mwianrama nte nronraqama kye riena.

### *Poruva tire qutu quananraqitai qati siquananranra tura*

<sup>12</sup> Tire mwakyaakya nkyi timwa nyiqata Karaisiva qutu vuraqitairo qati sivurave tunanra. Tire mwitaa turata nanraqamave nkye mponramwuvanto qutu vihua hiama sivivarave ti varita?

<sup>13</sup> Qutaa qutu vihua hia sivira hitiri, Kotiva hiama Karaisira sivuma kyon.

<sup>14</sup> Kotiva hia Karaisira sivuma kyon, tire qua turava qumina qua vaiharo nkyi timwa nyunrata nkye quataave qiava, mwivavata qumina inraikyaqama hitiri.

<sup>15</sup> Qikye, tire nkyi timwa nyiqata quataaqama kyero Kotiva Karaisira qati vara sivuma kyorave tuna quava, mwi quava unra qua vahitiri, mpovanto tiriara tiqaro, Kotiva hia Karaisira qati vara sivuma kyorave. Nkye mwitaama kye Kotirara qia quava unra quama vaiho, titiri.

<sup>16</sup> Kotiva hia qutu quahua qati vara sivuma kyaiva varitiri, mwiva hiama qio Karaisiravata qati vara sivuma kyon.

<sup>17</sup> Kotiva hia Karaisira qati vara sivuma kyaitiri, nkye quminama Karaisirara quataave qilavoro nkyiqa qua vahiva hia taiqaraitiro, qatima vahitiri.

<sup>18</sup> Kotiva hia Karaisira qati vara sivuma kyaitiri, Karaisirara quataave timwa kye qutu quahuavata hia qaiqaa qati siviraiti, uro quminama raupirima quatiri.

<sup>19</sup> Tire Karaisira vekya variqata mwaa mwataraqaa mwianra riemwaqi vita uro qutu vita hia qati siquarahua variaratavauma mwaa mwataraqaa varihua tiriara raima timwa teta po kye tivara.

<sup>20</sup> Mwihua hiama qio mwia kyaara tiriara raima timwa tevara. Karaisiva qutu vuvaro quataaqama kyero Kotiva mwia qati vara sivuma kyora. Kyara vara tutaiharo tohare riemwa taiva, mwiva nraante keko tintema kyero Karaisiva nraante qutu vuraqitairo qati sivurara tita, Karaisirara quataave timwa kye qutu quahua qatima sivvara.

<sup>21</sup> Haaru vaisi mpoqaatairo qutu vi okyarava qovarama vurama. Qaiqaa kuaa qarama kye vaisi mpoqaatairo qati sivi okyarava qovarama vira.

<sup>22</sup> Tire Ataamunraqatai qovara hurahua ekyaa qutu vi varunanra. Kuaa qarama kye tire Karaisira nraaqiaraqamavi variarahua nraakiara tire ekyaa mwihua sivita qati variqi quananra.

<sup>23</sup> Nraakiara hia tire apiqama kyeta siquananra. Tire naitarama kyeta kuaiqia kuaiqiyavanto siquananra. Karaisiva nraante quturaqitairo qati sivurara tita, Karaisiva qaiqaa mwatani tumuani entaraqaa Karaisiva hiari nraakyne qorahua qaiqaa qati sivvara.

<sup>24</sup> Mwihua sivivarso mwiaqatairo taliqaa entava nriananro. Mwi entaraqaa Karaisiva kepukyaqa hiqaro mpo mwatanaa mpo mwatanaahua kamaninra nraatara kyero, vaisi kepukyave ekyaa mpo inraikya mpo inraikya kepukyavata nraatara kyero, uro nai qora Kotira kyauquqi kyero tiqaro, Nte ekyaa inraikya nraatarama kyauqo. E ekyaa inraikyaqaa ntaqikyiqira quante, qiananro.

<sup>25-26</sup> Karaisiva kepukyaqa hiqaro nai nramwutaahua nraataraqvi viro uro ekyaararaqama qutuvi vari okyarara nraatara kyairaro mwi okyarava ekyarama taliqaaanro.

<sup>27</sup> Kotira mpukuqi mwitaama tiro:  
Kotiva Karaisira nronraqama kyaiharo  
Karaisiva ekyaa inraikya nraatara kyero  
mwiaqaa ntaqikyiqiro quananrove, tura. (*Ihi 8:6*) [Karaisiva ekyaa mwi inraikyaraqaa ntaqikyiqaro hiama Kotiragaavata ntaqikyiananro.]

<sup>28</sup> Nraakiara Karaisiva ekyaa inraikya nraatara kyero mwiaqaa ntaqikyiqiro viro mwiva nai qora mwemwani variro tiqaro, E niqaa ntaqikyiqira vi variaravama e niqaa ntaqikyiqira quante, qiananro. Karaisiva mwitaa tiraro mwiaqatairo Kotiva Karaisiragaavata ekyaa inraikyaqaaavata ntaqikyiqiro quananro.

<sup>29</sup> Karaisiva hia qutu viraqitairo qaiqaa qati sivira hitiri, nanraqamave mpo hiahua qutu quahuara rieqata nramanri vare varita? Qutu quahua ekyaara qutu quavo qiatiri, hiama qumina mpo hiahua mwihua kyaahaqa hiqata nramanri vare variatiri. Mwihua tiqata, Qutaama qutu quari vaisiva qaiqaa siquananrove, timwa kyetama nramanri vare varita.

<sup>30</sup> Karaisira qua kyaara tiri ekya enta ru kyarerera uti variara. Tire hia qutu quananraqitai qaiqaa siquarahuavauma, tiri qumina mwitaa hivara.

<sup>31</sup> Ni kata pakyaa tuaavo, Iesusi Karaisiva nkyiqaavata niqaavata ntaqikyi varihananra tina, nte nkyiara qamwate variqana ntene kyauqu nriqiqa vatena qutaaqama kyena tirera. Ekyaa enta ni ru kyaivaqe qutu quariva nte variqina vi varurave, tuqo.

<sup>32</sup> Nte Karaisirara rieqana Epesaasiqi uro variavata mwi mwatanaahua qaakyau vairi votima kye variqata ni naatara kyarerera uti varuvana variavarave. Nte qumina vaisi taiqa quariva hutiri, nte quminama mwini varutiri. Kotiva hia qutu vihua sivuma kyaari quava qutaa vahiraqevauma nte mate mwaa entarara rieqana mwataa qianinra: Nrivaqe kyuqe aanra qaqlira kye hora qutuananranra hia nronraqama kye riaraiti, mate kyaravata nramanrivata nramwaqi quare, qianinra.

<sup>33</sup> Haunri mpo ihua unra qua tivata nkye mwihua sataqita vivora. Quavanto mwitaama tiro.

Vaisivanto uaqia hi vaisihuavata variqi viro  
mwi vaisivavata uaqlama quananrove, tura.

(Aisaiaa 22:13)

<sup>34</sup> Mwianra rieqatama nkyi su nyaatovanto ntapihi virata uaqia hi kyaiqara qaqlira kyaata. Qikye, nkyi utaqitai nraakye qora mpo hiahua hia Kotirara riaraitita, api qua ti variara. Mwitaa qiahua mwihua kyauruate tinama, nte mwitaa tina.

### *Mwamwantavanto qati siquani okyarara tura*

<sup>35</sup> Mpowanto mwitaama qianro. Nataama kyeroove Kotiva qutu vihua qati vara sivuma kyaananrove? Nataama vahiani mwamwantara varetave sivivarave? qianro. Mpowanto mwitaa tirera, nte nai timwa mwinrenra:

<sup>36</sup> I vu nraato apiqamave viho? E hiave ntapihiaro? E kyara humwu mwataqi vara tutairaro uru mwiva ntuko hiraro nruhi mwiva hia tapitairera, kyaravanto hiama cupiqaananrove.

<sup>37</sup> E kyara humwu vara tirera hira, e humwu nraahu kyakuma humwuve, mpo humwuve, vara tuananrave. E hia uro nronra mwia rirante ntaruqira tuananrave, qianinra.

<sup>38</sup> Kotiva tiharo uru mwiaqaatairo mwi kyarava cupiqaiharo mpo humwuqaatairo mpo kyaravanto cupiqaiharo hia kuaa mwamwanta vahirave. (Mwia votima kyero tire qutu quananraqitai qaiqaa siquararo tiri mwamwanta nraahumwa mpo mwamwantama vahiananro.)

<sup>39</sup> Vaisi mwamwantavata, vahi aasau mwamwantavata, hia kuaa qarama kyero vahirave. Vaisi mwamwanta mpo mwamwanta vaiharo, vahi aasau mpo mwamwanta vaiharo, nyaamwa mpo mwamwanta vaiharo, tavukya vaanti mpo mwamwanta vahiram.

<sup>40</sup> Nyaamwuni nraahumwa mpo inraikya vaiharo mwatani mpo inraikya vahirama. Nyaamwuni itai inraikyava mwitaama kyero iteqaro ntuvaahaiharo mwatani vahi inraikyava nraahumwa mpo qarama kyero ntuvaahaiharo.

<sup>41</sup> Huarivanto iteqaro mpo qarama kyero ntuvaahaiharo, toravanto iteqaro mpo qarama kyero ntuvaahaiharo, qovora kuaiqia kuaiqiavantoo mpo qara mpo qarama kyero ntuvaahaiharo.

<sup>42</sup> Mwi inraikyara mwi inraikyara mwunruqa hi okyarava nraahumwa vahira. Mwia votima kyero nraakiara tiri mwamwantavanto qutu quaninraqitairo qaiqaa qati

siviraro nraahumwa mpo mwamwantama vahiananro. Tiri mwamwanta mwataqi quntamwa taavaro ntenrai mwamwantavama vahiro. Nraakiara sivuma kyaani mwamwantara qaraakya mwamwanta hia ntenraani mwamwantavama vahiananro.

**43** Tiri mwamwanta mwataqi quntamwa taava uqenrenro hia kyuqe mwamwanta vahira. Nraakiara tiri sivuma kyaani mwamwantava kepukya mwamwantavanto kyuqe mwamwantama vahiananro.

**44** Tiri mwamwantavanto mwaa mwataraqaa nrohiarive tiro utu tairara tita, mwaa mwataraqaa qunte variara. Nraakiara tiriara nyaamwuni nrohiate tiro, nyaamwuni nrohiana mwamwantara vara sivuma kyaananro. Mwaa mwataraqaa nrohiara mwamwantava vaiharo nyaamwuni nrohiara mwamwantavavata vahira.

**45** Mwi quara Kotira mpukuqi mwitaama tiro:

Kotiva utu kyovaro toharenaa vaisi Ataamuva siviro

qati variqiro vi varurave, tura.

(*Okyara 2:7*) Mwi vaisiva

mwitaama varuvaro mwia nraakiara vaisi mpo Karaisiva qovarama viro ekyaa nraakye qora qati variqi quate tiro, qati nraahu varura.

**46** Hia nraakye qoravanto nyaamwuni nrohira nraante qovarama kyora. Nraakye qoravanto mwatani nrohira nraante qovarama kyero mwiaqaatairo nraakiara nyaamwuni nrohira qovarama kyora.

**47** Hoqarenaa vaisi Ataamunra mwataqotairo utu tovaro mwaa mwataraqaa qovarama viro varura. Nraakiara vaisi mpovanto Karaisiva nyaamwusairo mwatani tumu qovarama viro varura.

**48** Mwaa mwataraqaa variahua mwihua mwataqotairo utu to vaisira votima kyeta variara. Nyaamwuni varirera hiahua mwihua nyaamwusairo tumu vaisira votima kyeta varivara.

**49** Mwaa entara tire mwataqotairo utu tai vaisira Ataamunra votima kyeta nrohi varunanra. Nraakiara tire nyaamwunyaa vaisi Karaisira nraantantamwa kyeta variananra.

**50** Ni kata pakyaa tuaavo, nte nkyi timwa nyinrenra. Nraakye qora mwaa mwamwantara vataahua hiama qio Kotira mwatuqyaqi vivara. Ntenra quari vaisiva hia ntenraani mwatuqyaraqi hiama qio quananro.

**51** Kyai nte Kotiva uqeta tai quara nkyi timwa nyianri. Hiama tire ekyaa qutu quananra. Tire Jesusira nraaqiara mpo hiarahua hia qutu viraitita, qati variqi vita qamwanrama kye kyuqu quananra.

**52** Tire mponramwuvanto variararo nraakiara ekyara entaqaa ntoma riraro Kotiva qutu vihua qaiqaa qati sivuma kyairata mwihua mwiaqaatai hia qaiqaavata tapitraitita, qati variqi vivara. Tire ekyaa mwi entaraqaa kyuqu vita variananra.

**53** Tire ntenrai mwamwantara vataahua mwi entara kyuqu vita hia ntenraani mwamwantara vareta qati variqi quananra. Tire quti mwamwantara vataahua mwi entara kyuqu vita hia qutuani mwamwantara vareta qati variqi quararo mwi entara haaru qara ntumwa to quava qutaa mwivauma vahiananro. Mwi entara mwi quara tuntema kye tire mwitaama qiananra:

Qutu vi inraikyara vara mwatanqama kyero  
Kotiva mwia ekyara nraatara kyairave.

**55** Quti okyarava e riaante. E vaisi ru kyera nraatara kyera kepukyava tanave vaiho?

I aanraivanto vaisi kutu kyaariva tanave vaiho?

(*Hosaiia 13:14*)

<sup>56</sup> Qutira inraikya mwia qora kyaiqavanto ru vatero nai qora kyaiqa mwiva Kotiva timwa to quaraqaatairo kepukyu varaira.

<sup>57</sup> Qio tiri vunyaa vaisivanto Iesusi Karaisiva cuti okyarara nraatara kyero qati sivirara tiro, Kotiva tirivata kepukyu timwihata tire qiomu qutuani okyarara nraatara kye qaiqaa qati sivi variananra. Mwianra rieqatama tire Kotira nrutu tuaahereta mwianra kyuqeve ti varita.

<sup>58</sup> Ni kata pakyaa tuaavo, mwi quara rieqatama kepukyaqama kye sivita variata. Tiri vunyaa vaisi kyaiqa kepukyaqama kye varaqi quata. Nkye ntapihiarave. Nkye kyaiqa vareva hia quminavau quaninranra tita, nkye kepukyaqama kye mwia kyaiqa varaqita quata.

## 16

### *Iutiaani munima vara kyaivaro quaninranra tura*

<sup>1</sup> Kotira nraakye qora Iutiaani hia kyuqema kye variahua rieqata nkye mwihua kyaahaqa hirerata munima ntuvaantua hirara tirera. Nte Karesiaani variqana Kotira nraakye qora mwini variahua timwa nyuntema kyena nkyivata timwa nyianrita nkyevata mwitaa hiata.

<sup>2</sup> Mpo Saante mpo Saante nkye kuaiqia kuaiqavanto nkyeta munima vareraqitai munima mpoqiani qati vataqi vivaro qio vahiar. Nkye mwitaamaqi vi varivaqe nte nkye hinani iro ntaarita nkye hia nanra munimave mwunro tita uro munimanra puua hiata.

<sup>3</sup> Nraakiara nte nkye hinani uro variarita nkyetavanto vaisi mponramwu mwatama kyaivaqe nte mwinramwuhua qara nyina sitaarita mwihua mwi munimanra vare-tama Ierusaremini uro nyiata.

<sup>4</sup> Mwi entara nte Ierusaremini mpo kyaiqa varaariva vahiraqe ntevata quankyeria mwihua nivata qiomu vivara.

### *Poruva nai nrohianinranra vu nraato tutora tura*

<sup>5</sup> Nte Masentoniaani mpo mwatukya mpo mwatukya nrohiarivara tina, mwini nrohivaraama uro nkyi taqaaninra.

<sup>6</sup> Nkyivata uro variqana nte mpuahaamave, toqa vaururu tuani entara vari kyena qaiqaa taini tainive virera hiarita nkye ni kyaahaqa hivaqe nte quari.

<sup>7</sup> Hia nte aanraqaa viqana nkyivata pataqia totiqama kye varirerave. Tiri vunyaa vaisi Karaisiva qiove tirera, nte nkyivata mpuahaama varirerave.

<sup>8</sup> Qio nte mwate Epesaasini variqi quariro Pentikosi omwata nre entava nrianrive.

<sup>9</sup> Mwaini nte airi mwataaqi nraakye qora Kotira aanra nyaamwutaariva vaihananra tina, nte mwaini variqina virera. Nte mwaini mwi kyaiqara vare varuqata airivanto ni nramwutaaqa hiavanavata nte Karaisira nraakye qorara rieqana mwaini varirera.

<sup>10</sup> Timotiva nte varauantema kyero tiri vunyaa vaisi kyaiqa vare varivara tiro, mwiva nkye hinani uro ntairera, nkye mwia qamwata mwateta mwia vitaata.

<sup>11</sup> Mwianra rieqatama nkyiqitairo mpovanto Timotirara qumina vaisive timwa kyero mwoqa mwiankyora. Nkye Timotirara mwiva Karaisira kyaiqa vaisi variho timwa kyetama mwia kyaahaqa hiqata huntaqita aanraqaa uro kyaivaro mwiva kyuqema kyero variro qaiqaa nte hunani nrianri. Nte mwiavata tiri tiqata vakyaa mponramwuvata mwihua sekyama varuqo.

<sup>12</sup> Nte tiri tiqata vakyaa Aporosirara tirera. Nte mpo enta mpo enta nkyiara rieqana mwianra mwitaama tina, Qata vakyaa mponramwuvanto Korintini virera hiahuavata e quante timwa kyena vuaviraavira tuqaro hia quataa iharoma mate hia viro. Nraakiara aanra qio vahirera, mwiva nkye hinani quananro.

### *Poruva ekyaara qua tura*

<sup>13</sup> Nkye rauriqa taqe variata. Nkye Karaisirara quitaave tiraqa kepukyaqama kye variata. Vaisima variata. Kepukyaqamavi variata.

<sup>14</sup> Nanrianra nanrianra mwutukya vahianinraqitai ekyaa kyaiqa varaqi quata.

<sup>15</sup> Nkye Sitipanasiravata mwia nraamwuqi variahuvata ntapihi kyaarave. Nte haaru Akaiaani variqana Karaisira qua mwi mwatanaahua timwa nyiavata mwihua nraante quitaave tura. Mwihua mwitaa timwa kyeta mwiaqatai mpoqama kye Kotira nraakye qora kyaahaqa hirera uti variara. Ni kata pakyaa tuaavo, nte nkyiara qati mwataa hiatema tuqo,

<sup>16</sup> Nkye mwi vaisinramwuhua mwemwani variqata mwihua hiante hiate, tuqo. Mwihua kyapata kyaiqa varahua mwihuavata mwemwani variqata mwihua hiante hiata.

<sup>17</sup> Nkyiqitai Sitipanaasivavata, Potunataasivavata, Akaikaasivavata, nte hunani nriavana nte qamwateqanama varuqo. Nte hia nkyi taqaaninranra ni mutukyavanto uaquia ihana varuqata mwihua nte hunani nri nteta nkyiara qiavana riena, nte qamwateqana varuqo.

<sup>18</sup> Mwihua nkyi mwutukya kyuqema nyataavar o qihakyama vahintema kyeta nruru mwaini ni mutukyavata kyuqema kye qihakyama mataavana varuqo. Nkye mwitaa hi vaisihua nyutu tuaaheraata.

<sup>19</sup> Kotira nraakye qora Esiaani mpoqi mpoqi variahua nkyiara rieqata nkyi qua mwantaavo. Akuiraava mwia nraata Pirisiraavavata, mwitanahua nraamwuqi ntuvantua hiahuavata, tiri vunyaa vaisi nrutuara rieqatama nkyi qua mwantaavo.

<sup>20</sup> Tiri tiqata vakyaa mwaini variahua, mwihuavata nkyi qua mwantaavo. Nkye nai qua mwante nai qua mwante nai kyauqu mwi nai kyauqu mwi hiqata variate.

<sup>21</sup> Qio nte ntene kyauquqo mwaa quara qara ntina:

NTE PORUVA NKYI QUA MWANTAUQO.

<sup>22</sup> Tiri vunyaa vaisi Karaisirara hia mwutukya vahiani vaisira kyaivaro viro ekyaara vehiqama quarive. Marana ta. Po, nronrao, qamwanrama uro ntantera tumuana.

<sup>23</sup> Tiri vunyaa vaisivanto Iesusiva nkyi kyuqema nyataari.

<sup>24</sup> Nkyevata ntevata Iesusi Karaisiraniqamavi varunanranra tina, nte nkyiara mwutukya ntihana varura.

## 2 KORINTI

### Poruva Korintiqinaahuani nraakiaraa qara vara kyora

Poruva kuaa ihi vara kyero Masentoniani variqaro qaiqaa Korintiqinaahuani qara vara kyora. Poruva qara mwaaqi Kotiva mwia nronraqama kyovaro Iesusi Karaisira kyaiqa varo okyarara mwi mwatanaahua timwa nyunra.

<sup>1</sup> Nte Poruva. Kotiva tihana nte nronraqama vina Iesusi Karaisira mwakyaakya timwa nyi varuvama varina. Tiretana tiri tiqata Timotikya nkyiara Kotira nraakye qora Korintiqi variahuavata ekyaa Kotira nraakye qora Akaiaani variahuanivatama qara mwaa vara kye.

<sup>2</sup> Tiri tiqova Kotivavata tiri vunyaa vaisivanto Iesusi Karaisivavata nkyi kyuqema nyatairaro nkyi mwutukyaqitairo kyuqe hiro qihaakya hirata variata.

#### *Poruva Kotirara kyuqeve timwa kyero qamwata mwatora*

<sup>3</sup> Nrivaqe Kotirara kyuqeve timwa kye qamwata mwataara. Mwiva mwanriqavanto variqaro tiri vunyaa vaisi Iesusi Karaisira mwia qovama variro. Kotiva tiri tiqova variharo ekyaa tiriara po kye ti okyaravavata, mwutukya qihaakya hi okyararavata, mwiaqaatairo qovara hi varira.

<sup>4</sup> Tire mpo muaanra mpo muaanra vare variqata atura ntí varuraro Kotiva tiri mwutukya qihaakyama timwa te varira. Kotiva tiri mwutukya qihaakyama timwa te varirara titá, tire taqaarata nraakye qoravanto mpo muaanra mpo muaanra vare varivaqe tire Kotiva tiri mwutukya qihaakyama timwa taintema kye tirevata mwi nraakye qorahua mwutukya qihaakyama nyataara.

<sup>5</sup> Karaisiva nriqa vi inraikyara varaqiro vihata tire mwiavata taaqau vi variqata nriqa vi inraikyara varaqi vunanra. Mwia mwutukya qihaakyama mwataintema kyero Kotiva tiri mwutukyavata qihaakyama timwa taananro.

<sup>6</sup> Hia tire quminavauma nriqa vi inraikyara vare varita. Kotiva nkyi mwutukya qihaakyama nyatero nkyi sitaarive titama, tire nriqa vi inraikyara vare varita. Tire nriqa vi inraikyara vare varuraro Kotiva tiri mwutukya qihaakyama timwa tairara titá, mwiaqaatai tire qiomá nkyi mwutukyavata qihaakyama nyateta tiqata, Tirevata nkyi nraantante nriqa vi inraikyara varauto. Nkye kepuqyaqama kyeta variate, qiananra.

<sup>7</sup> Nkye tiri nraantante nriqa vi inraikyara varaqi vivera, Kotiva tiri mwutukya qihaakyama timwa taintema kyero nkyi mwutukyavata qihaakyama nyataananro. Tire mwianra rieqatama nkyiara tiqata, Nkye hia qoriri hiraitita, kepuqyaqama kye variqi quate, titá.

<sup>8</sup> Tiri tiqata vakyaa tuaavo, tire haaru Esiaani nrohiqata muaanra varaanvanra, mwi quara nkye hia ntapihi kyevora. Mwi muaanrava nronraqama kye tiriqa vahuvata tire tiqata, Po hia qio muaanra mwia vare qati quananrave. Tire qutu quananrave, qavananra.

<sup>9</sup> Mwi entara tire tiqata, Po, tire qati variara entava taiqa viharo qutu quara entavama nri ntaiho, qavananra. Tire mwitaa timwa kye tire tetavanto teta kyaahaqa hiara aanrava hia vahuvata mwiaqaatai tire Kotiva qutu qua nraakye qorahua qati vara sivuma kye variva, mwiva nraahu tiri kyaahaqa hiananrove timwa kye, mwianra nraahu nronraqama kye riemwaqi quavanra.

<sup>10</sup> Tire mwi entara qutu virera uti variavararo Kotiva tiri vaitutuma kyovata tire qati variavanra. Kotiva mwi entara tiri vaitutu huntema kyero nraakiaravata Kotiva tiri vaitutuma timwa taananro. Tire mwiaqaa kepuqya vu nraato vateta tiqata, Kotiva tiri qaiqaavata qaiqaavata vaitutumaqiro quananrove, turo.

**11** Nkyevata tiriara rieqata Kotirara aakyara tivarotiri kyaahaqa hiari. Nraakye qora airivanto tiriara rieqata Kotirara aakyara tivera, Kotiva tiri kyuqema timwa tero kyaahaqa hirata mwiaqatai nraakye qora airivanto Kotirara kyuqeve tivara.

*Poruva hia Korintini vurara ntapihi kyero timwa nyunra*

**12** Tire nraakye qora utaqaa nrohi varuraro hia tiri toqaamwu rihata tire kyuqema kye mwihua utaqaa nrohi varunanranra tita, tire mwianra qamwateqa kyuqe huroma tita. Tire nraakye qora suqaa nrohirera hia tire mwatanyaa qua okyara riaraiti, tire Kotiva tiri kyuqema timwa taaninranra rieqata Kotira kyaiqa nraahu varaqi viqata avuqavuma kye nrohi varunanra. Tire mpo nraakye qora suqaavata, nkyi suqaavata, nrohiqata mwitaamaqi vita mpoqiaavata mwitaamaqi vunanza.

**13-14** Tire nkyini qara ntqata hia mpo quaqaa ntumwa kye mwi quara okyara uqeta taunanra. Nkye ntapihi kye rie quara nraahu tire nkyini qara ntumwa taunanra. Nkye mwa entara hiama tiri ntapihi kye taqe variavo. Nraakiara nkye tiri okyara ntapihi kye taqaivera, nte qiove qianinra. Nkye tiri okyara ntapihi kye taqeta variqi vita nraakiara tiri vunyaa vaisivanto Iesusiva tumuani entaraqaa nkye tiri qamwata timwa taivaqe tire nkyita qamwata nyataananra.

**15-16** Tauraa nte nkyiara qiomani qamwata matevarave timwa kyeqana nte nkyi taqarerera uti variqana mwataa qiavarama: Kyai nte Masentoniani viqana nkyi taqena qaiqaa mwisaina uro ntante nriqana qaiqaavata nkyi uro taqaarita nkye taara nani ni taqaivaqena nte nkyi kyuqema nyataarita nkye uro ni nikyaivaqe Iutiaani quankye, qiavara.

**17** Mwitaa timwa kye nkyi uro taqaankye timwa kyenavata hia uro nkyi taqaavara. Tauraa nte nkyi taqaankye qiavara nte mwi quara unra qiavarave iho? Mwatanyaa vaisivanto mwatanyaa qua okyara rieqaro taara qua tintema kyenave nte eo mwitaa hirerave, hia mwitaa hirerave, tiqana varuvave iho? Nkye mwitaamave nianra riaavo?

**18** Nte Kotira qutaa okyarara rieqanama ntena kyauqu nriqiqaa vatena tiqana, Hia tire nkyi unra tiqata taara qua tiqata, Eo mwitaa hirerave. Hia mwitaa hirerave, turahua nkyi timwa nyi varunanra.

**19** Sairaasivavata, Timotivavata, ntevata, tirenramwu nkyi utaqaa variqata Iesusi Karaisira qua nkyi timwa nyiavananra. Iesusi Karaisira okyaravanto vahirero mwiva Kotira mwaaquvantoma variro. Mwiva hia unra qua taara qua tiraitiro, mwiva qutaa qua nraahu ti variva. Mwiva nte mwitaa hirerave timwa kyeqaro qutaa mwitaa hi varira.

**20** Kotiva nai kyauqu nriqiqaa vatero mpo qua mpo qua tiqaro nte mwitaa hirerave tu quara, mwi quava mwivau vahiarive tiro, Karaisiva qovarama vura. Kotiva timwa to quava mwivau vahiarive tiro, Karaisiva qovarama viro Kotira kyaiqa varaqiro vurara tita, tire Karaisira kyaiqara rieqatama Kotirara i qua qutaa quama vaiho timwa kyeqatama mwia nrutu tuaahereqa varunanra.

**21** Kotiva nai nkyivata tirivata kepukyaqama timwa taihata tire Karaisiravata kuaaqi variqi vi varunanra. Tiriara mwihua nai kyaiqa vara mataate tiro, Kotiva naivanto tiri nronraqama kyaira.

**22** Kotiva tiri nai kyaama tero mwiaqatairo nai kyaama tai quava kepukyaqama vahiarive tiro, mwiva nai mwanraqura tiri mwutukyaqi vataira. Mwia mwanraquravanto tiri mwutukyaqi varihatara tita, tire tiqata, Qutaama Kotiva nraakiara tiri tivitaananrove, ti varunanra.

**23** Nte nkyi unra qianinravauma Kotiva ni qua qovarama kyaananro. Nte qutaa qua nraahu tireranama. Nte uro Korintini variqana mpo qua kyaara nkyiara qiariro nkyi mwutukyavanto uaquia hiankyo tina, qaqlira kyena hia quavara.

<sup>24</sup> Hia nte nronra vaisi nraantantamwa kye variqana nkyiara kepukyaqama kye mwi quara mwi quara vataqi quate tireranavauma. Tire taqaurata nkye qioqama kye Karaisira qua riemwaqi vi variara. Nkye Karaisira qua rieqata qamwateqa variate tita, tire nkyi hena vaisi variqata nkyivata kyaiqa varaqi virera uti varunanra.

## 2

<sup>1</sup> Mwi quara rieqanama mpo qua kyaara nkyi uro timwa nyataariro nkyi mwutukya uaquia hiankyorave tina, qaqlira kyena hia uro nkyi taqarera quavara.

<sup>2</sup> Nte uro nkyi timwa nyataariro nkyi mwutukyavanto uaquia hiraro mwiaqatairo tavave ni mutukya kyuqema matairaqe qamwateqa varianinrave? Hiama mpovanto ni mutukya kyuqema mataariva variananro. Nkye ni mutukya kyuqema mataahua varivaqe nte nkyi timwa nyataariro nkyi mwutukyavanto uaquia hirata variqata nkye hia ni mutukya kyuqema matevara.

<sup>3</sup> Nte mwianra rieqana haaru nkyini qara vara kyaavaro vura. Nte tiqana, Nkyi uro timwa nyataarita nkye ni mutukya kyuqema mataahua variqata mwiaqatai nkye ni mutukya uaqlama matevorave, timwa kyena nte nkyini qara ntumwa taavara. Ni mutukyaqitai kyuqe ihana varuqata nkyevata nkyi mwutukyaqitai kyuqe ihata variara. Mwi quarara quataave tura.

<sup>4</sup> Mwi quara qara ntigana ni mutukya uaquia huvana ntateqana qara ntumwa taavara. Nte qara ntigana hia nkyi mwutukya uaquia hiarive tina, qara ntuavara. Ni mutukyavanto nkyiara mpoqiaavata vahira nkye anomia kye ntapihiate tina, nte nkyini qara vara kyaavara.

### *Vaisi mpovanto uaquia hi kyaiqara utu kyora mwi quara taiqa kye taunru kyaate tura*

<sup>5</sup> Nkyi utaqitairo vaisi mpovanto uaquia hi kyaiqara utu kyovaro mwia kyaara hia ni mutukyaqitairo nraahu uaquia huvana variavarave. Ekyaa nkyi mwutukyaqitaivata uaquia huvata varurave. Qio hia nte qaiqaavata mwi vaisirara kepukyu qua tirerave.

<sup>6</sup> Nte taqauqata nkye mwi vaisira nai uaquia hi kyaiqara kyaara airi vaisivanto mwia nai kyoqaa mwunranra tina, nte tiqana, Qio hia qaiqaavata mwitaama mwataate. Qiovema, tuqo.

<sup>7</sup> Mate mwaa nkye mwia qua taiqa kye taunru kyauro timwa kyeta mwia mwutukya qihakyama mwataata. Nkye hia mwitaa hivaro mwia mwutukyavanto uaquia hiraro mwi vaisiva tiqaro, Hiama qio nte aanra kyuqeraqaa qaiqaavata quaninrave. Ekyarama qaqlira kyauqo, qiankyorave.

<sup>8</sup> Nte nkyiara po tiqana qiarita nkye mwi vaisirara quataama tiri mwutukyavanto iara vaiho qiaita.

<sup>9</sup> Nkye ekyaa ni qua kyuqema kyetave, hia kyuqema kyeta riera, nte mwia taqarera nkyini qara mwia vara kyaavara.

<sup>10</sup> Nkye vaisi mpovanto qora kyaiqa utuaninra taiqa kye qaqlira kyauro tivera, ntevata taiqa kyauqoma qianinra. Nkyi utaqatairo mpovanto uaquia hi kyaiqara utirera, nte Karaisira vuqaa variqana nte nkyiara rieqana mwi vaisiva uaquia hi kyaiqara uti quara taiqa kyauqo qianinra.

<sup>11</sup> Tire Saataaniva unra kyaiqa vare vari okyarara taqaunranra tita, mwiva tiri nraatara kyaankyo tiqata hia mpova uaqlama kyai quara qati nraahu riemwaqi viraitita, tire qamwanrama kye mwia qua taiqa kyeta taunru kye varunanra.

### *Poruva hia Taitasira puaama kyorara airi nraato tura*

<sup>12</sup> Nte Karaisira qua timwa nyinrenrana Toroasini uro ntena taqaavaro nronravanto Kotiva mwi mwatanaahua su nyaato terama kyero vatovana nte qua timwa nyianriva vahuvana nte mwini mpuahaama variantye timwa kyena

<sup>13</sup> taqaavaro ti tiqata vakyaa Taitaasiva hia huvaro ni pu naatovanto hia kyuqema vahuvana mwi mwatanaahuara varivaqe nte vuqo timwa kyena Masentoniaani quavara.

### *Iesusiva nraatarairara tita, tirevata qiomia nraataraananrave tura*

<sup>14</sup> Qikye, Kotiva mwitaa mwitaa hirara rieqana nte Kotirara kyuqeve timwa kyena mwiaqamwata mwatarera. Tire Karaisiravata nrohi varunanranra tiro, Kotiva tiri tivita vareqaro nrohi varihata tire mpo mwata mpo mwataqi nrohiqata teta nramwutaahua nraataraqi vi varunanrave. Tire Karaisira qua timwa nyiqi vi varuraro tiriqaatairo mwia quavanto kyuqe mwunta vira votima kyero ekyaa viro nrinro hi variro.

<sup>15</sup> Tire Karaisira mwakyaakya nraakye qora timwa nyi varuraro Kotiva tiriara tiqaro, Karaisiraqaa kyuqe mwunta viva nkyiqaatairovata kyuqe mwunta vi varihata variavo, tihata nkye Kotira mwatuukyaqi virera hiahuavata, Saataaninra mwatuukyaqi virera hiahuavata, mwi mwuntara hue variara.

<sup>16</sup> Nraakye qora mpo hiahua Karaisira mwakyaakya rieqata uaqia hi mwuntara voti hirave timwa kyeta mwi quara qoririma kye variarara tita, mwihua Saataaninra mwatuukyaqi vihua variara. Nraakye qora mpo hiahua Karaisira mwakyaakya rieta mwi quarara kyuqe mwunta voti hirave timwa kyeta mwihua mwi quarara nronraqama kye riaarara tita, mwihua Kotira mwatuukyaqi vihuama varita.

Qikye, mwaa mwi kyaiqara nronraqama vahi kyaiqarave. Tavave qio varaananro? Avuqavu nrohiari vaisiva, mwiva nraahuma mwi kyaiqara qio varaananro.

<sup>17</sup> Tirenramwu Kotira kyaiqa vareqata hia vaisi mpo hiahua nraantantamwa kyetama vare varita. Mwihua mpo inraikya nyiqata munima vare variantema kyeta Kotira qua tiqata munima vare variara. Hia tire munimanra rieqata nraakye qora Karaisira qua timwa nyi varunanra. Tire Karaisira mwakyaakyara qutaa mwakyaakyave timwa kye Kotiva tiri titihata tire Karaisira kyaiqa vaisima varuro timwa kyeqata Kotira vuqaa variqata nraakye qora Karaisira qua timwa nyi varunanra.

## 3

### *Tire Kotiva qaraakya qua timwa taira nraakye qora timwa nyi varurahuave tura*

<sup>1</sup> Tire qaiqaa mwi quara tiqata hia eta nrutu tuaahere varuro. Vaisi mpo hiahua kyaiqa vararerera hita nkyiari nronra vaisiara tiqata, Qara timwivae vare quararo vaisi mpovanto tiri kyaiqa okyara taqaarive, ti variara. Tire hia mwitaa hirera. Nkye tiri okyara ntapihiarara tita, tire qumina mwitaa hiarora.

<sup>2</sup> Nkye tiri qara nraantantamwa kyetama variavo. Nraakye qoravanto nkyi taqetama tiri kyaiqa okyara ntapihi kye taqevara. Nkyi qara votima kyero tiri mwutukyaqaa qara ntumwa taihata nraakye qoravanto nkyiara rieqatama tiri okyara ntapihi kyevara.

<sup>3</sup> Tire Karaisira mwakyaakya nkyi timwa nyiavarata nkye mwi quara riorara tita, nkye tiri qara votima kyeta variara. Karaisiva nkyi qua qara ntirera hiro hia vakoraqotairo qara ntumwa taira. Kotiva qati variva variharo Karaisiva mwia mwanraquraqotairo nkyi qua qara ntumwa taira. Mwiva hia qumina oriqa mwi quara qara ntiraitiro, mwiva nkyi nraakye qora mwutukyaqaa mwi quara qara ntumwa taira.

<sup>4</sup> Karaisiva tiri kepukya timwihatara tita, tire Kotira vuqaa variqata mwutukya qihakyama kye mwi quara mwi quara ti varunanra.

<sup>5</sup> Hiama tire tetaqama kye Kotira kyaiqa qio vare varuro qiananra. Tire taqauraro teta kepukyara Kotira kyaiqa varaarava hiama qioqa hiro. Kotiva tiri kyaahaqa ihatara tita, tire qiomia mwia kyaiqa varaananra.

<sup>6</sup> Kotiva tiri kyaahaqa hiqaro tiri nronraqama kyaihata tire Kotiva nraakye qora kyapata kuaaqi varirero qaraakya qua vataira nraakye qora timwa nyi varurahuama. Tire nraakye qora timwa nyiqata hia haaru qara ntumwa to quara riemwaqi quate tiraitita, tire Kotira mwanraqurara mwihua timwa nyi varunanra.

Kotiva Mosesirara timwa to quara nraakye qoravanto hia riemwaqi vuraqaatairo qutu vi inraikyava qovarama vura. Kotiva qaraakya qua timwa tairaqaatai nraakye qoravanto Kotira mwanraqura vareta mwihua ekyaa enta qati variqi vihuama varita.

<sup>7</sup> Tauraa Kotiva qua vatero nraakye qorara mwi quara riemwaqita quate tiro, mwi quara oriqa qara ntumwa kyero Mosesira mwu quara nraakye qoravanto mwi quara vataqi quare tura mwi quara nteqaqi viqata mwia kyaara qutu vi varura. Mwi quava nronra qua vahuvorora tiro, Kotiva Mosesira mwi quara timwa mwi varuvaro Kotira peqa okyaravanto iteqaro Mosesira viri ntuvahama mwatora. Mwitaa huvaro Mosesiva mwi quara oriqa qara ntumwa tora varero nraakye qora kyonani vuvaro mwia virivanto nronraqama kyero ntuvahero takyuqi varuvata nraakye qoravanto mwia viriqi taqaare tura hia kyuqema taqovaro vahiqiro viro uro taiqa vura.

<sup>8</sup> Mwi entara Kotiva nai mwaanra qua qovarama kyovaro mwia peqa okyaravanto takyuqi varura. Mwaa entara Kotiva nai mwanraqura nyiani quara qovarama kye variharo mwi quava nraakiara vahi quava tauraa vahi quara nraatara kyero vahiqarora tiro, mpoqiyavata nronra inraikyama vahiro.

<sup>9</sup> Kotiva Mosesirara timwa to quara, nraakye qoravanto hia ntapihi kye riemwaqi viqata quti varu quara, Kotiva qovarama nyatovaro mwi entara Kotira peqa okyaravanto takyuqi varura. Mwaa entara Kotiva mwi quara nruka kyero qaraakya qua qovarama nyataira. Kotiva nai qaraakya quaqotairo nraakye qora avuqavuma nyate varirara tiro, qaraakya quavanto haarua qua nraatara kyero vuni vahi quavama vahiro.

<sup>10</sup> Tauraa Kotiva Mosesira mwu quava vahuvata tire mwi quarara kepukya quave, Kotiva nai peqa okyara qovarama kyeqaro tu quarave, ti variavanana. Mwaa entara tire Kotiva qaraakya qua vatairara kepukya quave tiqata haaruua quara hia kepukya quave ti varita. Kotira haaruua quavanto tumitarero vaiharo Kotira qaraakya quavanto nritarero vahiro.

<sup>11</sup> Kotiva Mosesira mwu quara pataqia vahianinra qovarama kyorara tiro, mwi entara Kotira peqa okyaravanto pataqia takyuquqiro viro uro taiqa vura. Kotira qaraakya quavanto hia taiqaraitiro, qati vahiqiro quaninranra tiro, Kotira peqa okyaravanto qati nraahu takyuquqiro vi variananro.

<sup>12</sup> Tire tiqata, Kotira qaraakya qua rieqatama hia ekyaara qutu viraitita, qati variqi virerave, ti varunanranra titi, tire hia aatu hiraitita, tire mwutukya qihaakyama kye varunanra.

<sup>13</sup> Hia tire Mosesira nraantantarerave. Mosesira virivanto takyuqi varuvaro mwiva nai nramwunaa Isareriera tiqaro, Mwihua taqaivarao ni virivanto takyuquqiro viro uro taiqa quaninra taqevorave, timwa kyero tavuna vara kyero nai viri ntumwaqu torave.

<sup>14</sup> Qio Isarerivanto varuvaro hia mwihua su nyaatovanto ntapihuvata varura. Mwaa entaravata mwi mwatanaahua Kotiva haaru vato quara kyaara ntqiata hia mwi quara okyara ntapihiara. Mosesiva nai viriqaat ntumwaqu to tavunana votima kyeta Kotira qua amaata nyate varihatara titi, mwihua mwi quara kyaara ntqiata hia ntapihi kye riaara. Mwihua nkyiarivanto hiama qio mwi tavunana vara qatinani kyeta ntapihi kyeta taqevara. Karaisiva mwiva nraahuma mwi tavunana vara qatinani kyaananro.

<sup>15</sup> Haaruvata mwaa entaravata Isarerivanto Mosesira mwu quara kyaara nti variavarao tavuna votima kyero mwihua su nyaato ntumwaqu kyaihata mwihua hia Iesusira ntapihiara.

<sup>16</sup> Qio vaisivanto nai mwaaqu kyaiqaatairo tuqasaa viro tiri vunyaa vaisi Iesusi Karaisirara aakyara ntairera, mwiva mwi tavunanra mwia vu nraatoqitairo qatinani vara kyaananro.

<sup>17</sup> Nte tiri vunyaa vaisi Iesusi Karaisirara tiqana nte mwia mwanraqurara ti varura. Tiri vunyaa vaisi mwanraquravanto vaisi mwutukyaqi varirera, mwi vaisiva variraro qora inraikyavanto hiama mwia rupa tairaro mwiva qatinani huvantu viro variananro.

<sup>18</sup> Tire Iesusi Karaisira nraaqiara varuraro hia tiri viriqa tavunavanto ntumwaqu taihata tire kyinumi votima kye varuraro tiri vunyaa vaisivanto tiriqaatairo itero vara re varira.

Tire mwitaamaqi quaraqata quaraqata tita, tire teta vunyaa vaisi mwia votima kyeta variananra. Qio mwi kyaiqara Kotira mwanraquravanto uro taiqa kyaananro.

## 4

*Poruva nkyiariara tire ntapihi kye Karaisira mwakyaaky aqye qora timwa nyi varurahuave tura*

<sup>1</sup> Kotiva tiriara po tiro kyuqema timwa teqaro tiri nronraqama kyero tiriara mwaa quara nraakye qora timwa nyiate tihatara tita, tire mwihua timwa nyiqata hia qoriri hunanra.

<sup>2</sup> Tire nraakye qora timwa nyiqata vaisivanto uqeta variqaro kyauri kyaiqara utira, mwi okyarara mwoqa mwita hia kumwaanri tiraitita, hia Kotira qua api tuqasaaqasama kye tiraitita, tire Kotira vuqaa variqata vutu kye timwa nyi varurata nraakye qoravanto tiri qua rie variavaro mwihua su nyaato mwutukyavanto tiri quara qutaa quave ti varihata variara.

<sup>3</sup> Tire Karaisira qua ntapihi kye nraakye qora timwa nyiqi vi varunanra. Vaisi mpo ihua hia mwi quara riaivera, mwihua vita raupiri hi vaisihuama hia rievara.

<sup>4</sup> Mwihua variavaro unra mwanriqa Saataaniva mwaa mwataraqaa ntaqikyi variva mwihua su nyaato tita kyaihatara tita, mwihua Karaisira quara hia qutaa quave ti variara. Karaisira mwakyaakyavanto omwa votima kyero iteqaro mwihua su nyaato ntuvahama nyataankyo tiro, Saataaniva mwihua su nyaato vara qumimaqama kyero. Karaisira peqa okyara vahirero mwia vu nraatovata Kotira vu nraatovata kuaa qarama kyero vahira.

<sup>5</sup> Hia tire nkyiqa ntaqikyirera teta quavauma nkyi timwa nyita. Tire nkyi timwa nyiqata Iesusi Karaisiva mwiva nraahuma tiri vunyava variho ti varunanra. Tire Iesusirara rieqata nkyi kyaiqa vaisiqama variqata kyaiqa varaurahuama.

<sup>6</sup> Haaru kyokira riro vahuvaro ntuvahama quante tuva, Kotiva, mwivama mwaa entara tiri mwutukya vu nraatoqi ntuvahama timwa taihata tire vu nraato mwutukyaqitai Kotira peqa okyaravanto Karaisira viriqi ntuvaahe varihata taqaunana.

*Tire tave votima kyeta varuraro tiriqaatairo Kotiva nai qua qovarama kye varira*

<sup>7</sup> Tire tave aatapaiquo vara kyero utu taira votima kyeta varuraro Kotira quavanto tiriqima vahiro. Tire tave votima kyeta uqenraunrahua varuratara tita, nraakye qoravanto taqaavaro tire ti varura quava hiama tiri titaqitairo qovara hiro. Mwi quava nritarero vahi quava kepukya qua vaihatara tita, nraakye qoravanto taqaavaro mwi quava Kotiraqaatairo qovarama viro tiriqi vahiro.

<sup>8</sup> Hisai hisairo nramwutaavanto mwaanra tita, taintema kyero mpo muaanra mpo muaanravanto tiri titatarero utihatavata tire qatinani quara aanrava qatima vahiro. Mpo enta mpo enta tire tiqata, Po, mate nataama kyetave variqi quananrave, timwa kyeta tire qaqlira kyaarava vaini vaihatavata hia tire ekyaara qaqlira kyaunananrave.

<sup>9</sup> Nraakye qoravanto tiri nramwutaaqa hiqata tiri vataqi quavar Kotiva hia tiri qaqlira kyero nkyetaraa variqi quate tiraitiro, Kotiva tiri kyaahaqa hi varihata variqi vunanra. Nraakye qoravanto tiri riqatavata hia ekyaara tiri taiqa kyakya hiara.

<sup>10</sup> Tire varurata Jesusira ru kyontema kyeta ekyaa enta tiri mwamwantavata ruavata tire qiove tunanra. Tire mwitaama kye variarata Jesusiva siviro qati variqiro vi vari kepukyaravata nraakye qoravanto tiri mwamwantaqa qio taqevara.

<sup>11</sup> Tire Jesusirara rieqata qati variqi vurata mwia kyaara mpo enta mpo enta tiri ru kyarera uti variavata varunana. Mwitaamaqi vi varurata nkye tiri taqaavaro tire taiqa quana mwamwantaraqi Jesusiva qati variqiro quariva varihata varunana.

<sup>12</sup> Tire variqata tiri ru kyebla varurata nkye variqata tiri qua riaahuara tita, qati variqi vihuama varita.

<sup>13</sup> Kotira qua mpukuqi vahiva mwataama tiro:

Nte Kotira quara qutaave timwa kyenama nte mwi quara  
nkyivata timwa nyi varurave, tura.

(Ihi 116:10)

Tirevata mwi vaisira nraantanteta Kotirara qutaa quama tiho timwa kyeqatama mwia qua nkyi timwa nyi varunana.

<sup>14</sup> Tire ntapihi kyaурaro tiri vunyaa vaisi Jesusi Karaisira qati vara sivuma kyaiva, mwiva nraakiara tiri qati vara sivuma kyero tirivata nkyivata tivitaqiro uro kyairaqe tire ekyaa Jesusi Karaisira vuqaama varianana.

<sup>15</sup> Tire nkyiara rieqata nkyi kyaahaqa hirera nriqa vi inraikyara varaqi vi varunana. Tire mwitaamaqita quarata nkye Kotiva nkyi kyugema nyatai quara riemwaqi viqata airiqama vita, nkye nraakye qora airivanto variqata Kotira qamwata mwataivarot Kotira nrutuvanto virito vahiari.

<sup>16</sup> Mwianra rieqatama hia tire qorrima kye mwaa kyaiqara varaqi virerave. Tire mwamwantavanto taiqavi variharo mpo enta mpo enta tiri mwutukya mwanaquravavanto qaraakyqaq ihata varunana.

<sup>17</sup> Mwaa entara muaanra varaananra mwianra hia tire nronraqama kyeta riaara. Tire mwi inraikyara hia mpuahaama vahi inraikyarave tunanrama. Mwi inraikyara mwi inraikyara nraataraqi vita, nraakiara tire kyugema kye nyaamwuni ekyaa enta ekyaa enta qati variqi quarava muaanra varaunana mwiavata anomia kyero nraatara kyaananro.

<sup>18</sup> Tire vuqotai taqe varunana mwatani vahi inraikyara hia nronraqama kye rieta. Ekyaa mwi inraikyava quaahaqa vahiari inraikyavama vahiro. Tire hia vuqotai taqe varunana nyaamwuni vahi inraikyara nronraqama kye riemwaqi vi varunana. Hia vuqotai inraikyava, mwi inraikyava ekyaa enta ekyaa enta qati nraahu vahiqiro quananro.

## 5

### *Tiri mwamwantara tiqaro haraara nraamwu quaahaqa vahirave tura*

<sup>1</sup> Tiri mwamwanta vahirero haraara nraamwu votima kyero vahihata tire mwi mwamwantaraqi variqata mwatani variqi vi varunana. Tiri haraara nraamwu ntapairi kyairera, tire ntapihi kyaурaro nyaamwuni tiri mwamwanta nraamwu voti hiva mpo vahiananrove. Mwi nraamwuva hia vaisivanto nai kyauquqo hoqa tai nraamwunra votima kyeroma vahiananro. Kotiva mwi mwamwantara utu timwa tairara tiro, mwi mwamwantava ekyaa enta qatima vahiqiro quananro.

<sup>2</sup> Mwaa entara tire nyaamwuni vahi mwamwantarara rieqatama mwi mwamwantaraqi uro varirerata mwaa mwamwantaraqi variqata atura ntiqata varunana.

<sup>3</sup> Tire nruhivanto variaro tita, mwi mwamwantara utute variananrave.

<sup>4</sup> Tire mwaa mwamwantara haraara voti hiraqi variqi viqata atura ntiqata muaanra vare varuro tunanra. Hia tire teta mwamwanta qaqira kyarera utunananrave.

Vaisivanto haaruua tuavaaqaqaa qaraakya tuavaaqa ututaintema kye, tire teta haaruua mwamwantaqaa qaraakya mwamwanta utirerave. Mwitaa hiraro tire qutu quara mwamwantava variqiro viro mwiaqaatairo kyuqu viro qati variqiro quari mwamwantavama vahiananro.

<sup>5</sup> Tiriara mwihua mwitaama kye qati variqi quate tiro, Kotiva tiri mwamwanta terama kyero vataira. Kotiva mwitaa timwa kyero tiri nai kyaama tero nyaamwuni vahi inraikyara timwinrenro timwa tai quava kepukyaqama quarive tiro, mwiva nai mwanraqura nraante vuni tiri timwihata varauanra.

<sup>6</sup> Tire mwaa mwamwantara vataahua variqata hia aatu hiraitita, mwutukyavanto qihaakya ihata varunana. Tire mwaini mwaa mwamwantaraqi variarera, tire hiama qio nyaamwuni tiri vunyaa vaisivanto varinani quanana.

<sup>7</sup> Mwaa entara tire hia mwia virivata taqaraitita, mwia quara nraahu quataa quave tiqata variqi vi varunana.

<sup>8</sup> Tire mwutukya qihaakya ihata varurahuama varita. Tire teta mwamwanta mwaini kye uro nyaamwuni teta mwaata tuananrani teta vunyaa vaisivata variataama hiro.

<sup>9</sup> Qio tire mwaini teta mwamwantavata variarerave, nyaamwuni uro variarerave, tire Iesusira kyakya hiani inraikyara nraahu utiqa varirera.

<sup>10</sup> Nraakiara Karaisiva ko riaahua taintaqaa mwatakyaa viro variqaro ko tirera hiraqe tire ekyaa mwihuama mwia vuqaa sivita varianana. Mwi entara tire kuaiquia kuaiquia vanto mwaa entara mwamwantavata variqata varaana quara avuqavu hiananro. Kyuqe kyaiqa varaani vaisira nai kyoqaa kyuqema kyero mwiananro. Uaqia hi kyaiqara utuani vaisira nai kyoqaa uaqia hianinrama mwiananro.

### *Nraakyе qoravanto Kotiravata kuaaqi variate tu quara*

<sup>11</sup> Tiri vunyaa vaisivanto ko qiani entarara rieqata tire aatu hiqama teta hena nraakyе qorara mwia qua riemwaqita quate ti varunana. Kotiva tire ntapihi kye varaana okyarara taqema variro. Nkyevata tire varaana okyarara qio ntapihivera, qiovema qianinra.

<sup>12</sup> Tirenramwu teta okyarara rieqata hia teta nrutu tuaahererera uturahuave. Tire mwi quara nkyi timwa nyianrata nkye tiri okyarara qamwate variqata nraakyе qora mpo ihua api qua tihua nkyiarivata qua timwa nyihua variate. Mwi vaisihua vaisi mwataara hirerata, vaisi viri mwamwantara nraahu nronraqama kye rieqata hia vaisi mwutukya vu nraatora nronraqama kye rie variara.

<sup>13</sup> Mpo hiahua tiriara ueraqama quavo qiahua, mwihua qiomma nkyiari mwitaa tivara. Tire Kotirara rieqata mwitaamaqi vi varunana. Mpo hiahua tiriara kyuqe vu nraato vataahuave qiahua, mwihuavata qiomma mwitaa tivara. Tire nkyiara rieqata mwitaamaqi vuro.

<sup>14</sup> Karaisira mwutukyavanto tiriara vaihatara tita, tire mwia kyaiqa nraahu vare varunana. Mwaa quara okyara vahirero mwataamama vahiro. Tire ekyahua qutu quataara kuaikuvanto tiri ekyahua rieqaro tiri mwaata varero qutu virara tita, tire ekyahua mwiavatama kye qutu vurahuama varita.

<sup>15</sup> Mwiva tiri ekyahua rieqaro qutu virara tita, tire hia teta variananranra nraahu riemwaqi viraitita, Karaisira kyaiqa varaananranra riemwaqi viqata qati variqi quaravama vahiro. Mwiva tiriara rieqaro qutu viro qaiqaa qati siviro varirara tita, tire mwitaa hiara.

<sup>16</sup> Mwaa entara hia tire qaiqaa mwatanyaa qua okyara rieqata vaisi mpo tukyama kye mwi vaisiva kyuqe vaisive, mwi vaisiva uaqia hi vaisivave, tunanrave. Tauraa tire mwatanyaa okyara rieqata Karaisira tukya hiqata Karaisirara qumina vaisive qiananra. Mwaa entara hia qaiqaa mwitaa ti varunana.

<sup>17</sup> Vaisivanto Karaisiravata varirera mwi vaisiva qaraakyaqama viro qaraakya vaisima variro. Mwi vaisiva haaru api nrohu okyarara qaqira kyero, qaraakya okyara varaivama variro.

<sup>18</sup> Kotiva mwi vaisira qaraakyaqama kyaiharoma variro. Tire Kotira nramwutaa variavararo Kotiva tiriara nivata kuaaqi variate tiro Karaisira titorara tita, tire mwia nraaqiaraqama vitama varita. Tire mwia nraaqiaraqama vi varuraro Kotiva tiri titero nte nraakye qoravata kuaaqi varirera tu quara uro timwa nyiate tiro.

<sup>19</sup> Mwi quara okyara mwataamama vahiro: Kotiva mwatani variahua uaquia hi kyaiqara utuara kyaara hia mwihuaqaa qua vataraitiro, mwiva Karaisiva nraakye qorara qutu vura mwianra rieqaro nraakye qorara nivata kuaaqi taaqau vi variate ti varira. Mwi quara nraakye qora timwa nyiate tiro, Kotiva tirinramwu nronraqama kyero titaihata tire uro nraakye qora timwa nyi varunanra.

<sup>20</sup> Tire Karaisira kyaahaqa hiqata mwia qua vareta nrunranro Kotiva tiri nroqitairo nkyi timwa nyi variro. Tire Karaisira kyaahaqa hiqata nrumu nkyiara po kye tiqata Kotiravata kuaaqi variate ti varunanra.

<sup>21</sup> Karaisiva hia uaquia hi kyaiqara utiraitiro varuvaro Kotiva tiriara rieqaro tire uaquia hi kyaiqara utuna quara Karaisiraqaa vatero. Mwiaqaa qua vatovaro Karaisiva tiri uaquia hi quara varero uro qutu vurara tita, tire Karaisiravata kuaaqi varuraro Kotiva hia tiriqaa qua vataraitiro, tiri avuqavuma timwa taihata varunanra.

## 6

### *Tire nkyi kyaahaqa hirera airi muaanra varaqi vi varunanrave tura*

<sup>1</sup> Tire Kotiravata kyaiqa vare varurahua variqata tire nkyiara po kye tita tiqata, Kotiva nkyi kyuqema nyataira mwianra haunri nkye qumina inraikyave tivorave, turo.

<sup>2</sup> Kotiva mwitaama tiro:

Nte nkyi kyuqema nyataani entaraqaa nkye qua tivaqe nkyi qua riaaninrave.

Nte nkyi huvantu kye sitaani entaraqaa nkyi kyaahaqa hianinrave, tura.

(Aisaiaa 49:8)

Riaate, mate Kotiva nkyi kyuqema nyataari entavama vahirove. Mate Kotiva nkyi huvantu kyero sitaari entavama vaiho, tuqo.

<sup>3</sup> Nkye tiri kyaiqaqua qua vatevo tiqatama tire hia apiqama kye kyaiqa vare varita.

<sup>4</sup> Hia mwitaahiraitita, mpo enta mpo enta tire variqata nkye tiriara mwihua Kotira kyaiqa vaisima variavo qiate tita, tire qihakya kye variqi vi varunanra. Mwitaama variqi viqata nriqa vi inraikyara vare varuna entarave, muaanra vare varuna entarave, tiri uaqiamma timwa taa entarave, tire hia qoriri hiraitita, kepukyaqama kye variqi vi varunanra.

<sup>5</sup> Tiri nramwutaahua tiri kyaamwuqo ntuqutu kye vateta, tiri karavuqi uro kyeta, tiri tuqara tuteqata tiri ntuqutu kye vateta, mwitaamaqi quavata tire variqi viqata toqaamwu tiqa kyaiqa varaqi vita, entaqi hia kyuqema kye vaiteta, kyara nraataa ihata variqi vita, mwitaamaqi viqatavata tire hia qoriri hiraitita, kepukyaqama kye variqi vi varunanra.

<sup>6</sup> Nkye tiriara Kotira kyaiqa vaisima variavo qiate tita, tire kyuqe kyaiqa nraahu varaqi vita, kyuqe vu nraato vataqi vita, tiri mwutukyavanto qihakya hi varihata varita, mpohuara kyuqemqaqita vi varunanra. Kotira mwanraquravanto tiriqi varihata tire nraakye qorara qutaaqama kye mwutukya vateqata varunanra.

<sup>7</sup> Qutaa qua nraahu tire ti varunanra. Kotira kepukyaqo tire mwi kyaiqara vare varunanra. Vaisivanto huru veva tutaintema kyeta tire kyauqu tuananranivata, kyaantaaqanivata, Kotiva avuqavuma nrohiani okyarara tuqi vi varunanra.

<sup>8</sup> Vaisi mpo hiahua tiri nrutu tuaahere variavata mpo hiahua tiri nrutu vara mwataniqa hi variara. Mpo hiahua tiri nrutu tuaahereqa kyuqe vaisive ti variavata mpo hiahua tiriqaa uaquia hi quara vate variara. Mwihua tiriara unra qua ti variahuave qiaavata tire quataa qua nraahu ti varurahuama varita.

<sup>9</sup> Mpo hiahua tiriara hia nkyi ntapihi kyaurahuave qiaavata mpo hiahua tiri ntapihi kyaarave. Mpo hiahua tiriara qutuavo qiaavata mpo hiahua tiri ntapihi kyaarave. Mwihua tiri ntuquetuqi viqatavata hia ekyara tiri ntuquetu kyaarave.

<sup>10</sup> Mpo inraikya mpo inraikyavanto tiri mwutukya uaqiam timwa te varihatavata tire qamwateqa nraahu variqi vi varunana. Tire vehi vaisi varuratavata tiri quaqaatai airi nraakye qoravanto kyuqe inraikya vare variara. Tire hia mpo inraikya vataurahua variqatavata tire nyaamwuni airi inraikya vataurahuama varita.

<sup>11</sup> Po, nkye Korintiqi variahua tiri tiqata vakyaa tuaavo, tire hia mpo qua uqeta taraitita, ekyaa qua qoqaa nkyi timwa nyi varunana. Tiri mwutukya ekyaa mwiva nkyiarama vahiro.

<sup>12</sup> Tiri mwutukya ekyaa mwiva nkyiara vaihata hia tire nkyi uama nyatauro. Nkye nraahuma tiri qoririma timwa taavo.

<sup>13</sup> Nte ntene nraaqiara timwa nyi varuntema kyenama nkyivata timwa nyi varina. Tiri mwutukyavanto nkyiara vahintema kyero nkyi mwutukyavantovata tiriara vahiar.

*Iesusirara hia quataave tihua varivata nkye hia mwihua kyapata kuaaqi taaqau vi variqi quate tura*

<sup>14</sup> Purimakau taaratana rupa taariro kuaaqi viqaro kyaiqa varaarive tiro, hia vitare tumitare hitana rupa tairave. Mwia nraantantamwa kye nkye Iesusira qua riehua variqata nkye uro hia Iesusira qua riehua kyapata kuaaqi kyaiqa varevovare. Nataama kyero kyuqe inraikyavantovata uaquia hiari inraikyavavata kuaaqi variqiro quananro? Hiama qio mwitaa hiananro. Nataama kyero omwavantovata, enta hiarivavata, kuaaqi variqiro quananro? Hiama qio mwitaa hiananro.

<sup>15</sup> Nataama kyeve Karaisivavata Saataanivavata kuaa qua vatevara? Hiama qio mwitaa hivara. Karaisirara quataave qiarivavata, hia Karaisirara quataave qiarivavata, qiove ekyaa inraikyaqi kuaa qaramaqita vivara? Hiama qio mwitaa hivara.

<sup>16</sup> Kotira nraamwuvanto nraahumwa vahiro unra mwanriqa nraamwuvanto nraahumwama vahiro. Kotiva qati variqiro vi variva varihata tire mwia nraamwuma varuro. Kotiva nai mwitaama tiro:

Nte ntene nraakye qoravata varirerave.

Mwihua utaqaa nte variqina viqana

nte mwihua mwanriqavanto variarita

mwihua ni nraakye qorama varivarave, tura.

(Wok Pris 26:12)

<sup>17</sup> Mwiva mwitaa timwa kyero qaiqaavata mwitaama tiro:

Nkye qumina nraakye qora kyeta nruru nkyetaraa variata.

Nkye uaquia hi inraikyara hia tu vararaitita,

variqi vi varivave nte qiomma nkyi sitaaninrave.

(Aisaiia 52:11)

<sup>18</sup> Nte nkyi sova variarita nkye ni naamwunra maaqu varivarave. Nte nronravanto ekyaa kepukya vahiva mwitaa turave, tura.

(2 Samueri 7:14)

Kotiva mwi quara turama.

## 7

<sup>1</sup> Qio ni kata pakya tuaavo, Kotiva nai kyauqu nriqiaavata vateqaro tiriara ekyaa mwi quara turara tita, nrivaqe tetu mwamwantaqaave mwutukyavive uaquia hi inraikyava vahianinra nruka kyeta Kotirara nraahu nronraqama kye rieqata Kotira kyaiqa kyuqera varaqita quara.

### *Nkyiara ni mwutukyaqitairo kyakya ihana varurave tura*

<sup>2</sup> Hia tiri qoririma timwa taraitita, tiriara mwutukya vahirata variata. Hia tire vaisi mpo uaqlama mwataunanra. Hia tire vaisi mpo apiqama kyauraro mwiva qora aanraqaa vira. Hia tire vaisi mpovanto hi inraikyara kumwaanri timwa kye varaunanza.

<sup>3</sup> Hia nte mwitaa tiqana nkyiqa qua vatarera. Nte vaakya mwianra nkyi timwa nyunra. Tiri mwutukyavanto nkyiara nronraqama kyero vahirara tita, nkye qati vari entarave, quti entarave, tire nkyivata nraahu variananra.

<sup>4</sup> Nkyiara tiri mwutukyavanto qihaakya ihata varunanza. Nte nkyi nyutu tuaahere varura. Muaanravanto qovara ihana nte hia mwianra nronraqama kye riaraitina, nkyiara rieqanama mwutukyaqitairo kyuqe ihana mpoqivata qamwateqana varura.

<sup>5</sup> Tire Masentoniani uro nteta qative variananrave qiavananza hisai hisairo qora inraikyavanto qovara huvata tire aatu hiqata variavananza.

<sup>6</sup> Qio Kotiva mwutukya qora iharo vari vaisira kyuqema mwate variva, mwiva mwi entara tiri mwutukya qihaakyama timwa teqaro Taitaasira titovaro tire hiavananza uro ntora.

<sup>7</sup> Hia tire Taitaasiva uro ntora mwianra nraahu qamwateqata variavananza. Mwiva nkyiara kyuqe mwakyaakya timwa timwunra, mwianravata qamwateqata variavananza. Taitaasiva nkye tiri taqaataa ihata variarara timwa timwinro. Nkye po, hia mwitaa hiataara mwitaa huro, qia quaravata Taitaasiva tiri timwa timwinro. Nkye nronraqama kye tiriara rie variararavata Taitaasiva timwa timwihata rieta. Taitaasiva mwitaa mwitaa tihana nte nronraqama kyena qamwateqana varura.

<sup>8</sup> Nte qaraqitaina nkyi timwa nyataavata mwia kyaara nkyi mwutukya uaqia huvata varura. Mate hia nte mwianra eqaataara mwitaa qiavarave qianinra. Haaru nte taqaavata nkye nte qara kyaavarara pataqia variqata mwutukya uaqia huvata varuvana nte mwi entara tiqana mwi qarara hia nkyi nyiataara nyuqo qiavara.

<sup>9</sup> Mate mwi qarara nkyi nyiavarara qamwateqanama varuqo. Qara mwiva nkyi mwutukya uaqlama nyatora mwianra hia nte qamwateqa varuqo. Nkye qara mwia kyaara ntuvaro nkyi mwutukyavanto uaqia huvata mwiaqatai nkye uaqia hi aanranra qaqla kyaara, nte mwianrama qamwateqana varuqo. Nkyeta uaqia hi kyaiqara kyaara nkyi mwutukyavanto uaqia ihata variavaro Kotivavata nkyi mwutukyavanto qio mwitaa hiarive tirave. Tire nkyi timwa nyateqa qiavarava hia nkyi uaqlama nyatorave.

<sup>10</sup> Vaisivanto mwutukya uaqia hiraro tiqaro, Po, Kotira qua hia nteqa kyaataara nteqa kyauqo, qiariva uaqia hi aanranra qaqla kyairaro Kotiva mwi vaisira qiomu huvantu mwataananro. Vaisi mwia mwutukyavanto uaqia hiariva, mwiva mwia kyaahaqa hiananro. Vaisi mpovanto qumina mwatanyaa qua okyarara rieqaro mwia mwutukyavanto uaqia hiraro hia uaqia hi aanranra qaqla kyairaitiro, mwitaamaqiro viro uro ekyaarama qutu quananro.

<sup>11</sup> Nkye nkyeta kyaiqa varorara rieqata variata. Nkyi utaqitairo vaisi mpovanto qora kyaiqa utuvata nkye mwianra qiaataara vahuvata nkye hia mwianra tiraitita variqata mwiaqatai ni qaraqinaa quara rieqata nkye tiqata, Hia tire kyuqema kye Kotira kyaiqa vare varuro, tuvaro nkyi mwutukyavanto uaqia huvata varurave. Mwi entara nkyi mwutukyavanto uaqia huvata varurara tita, nkye mwiaqatai aanra kyuqeraqaa nraahu nrohiataa huvata mwiaqaa nrohura.

Mwi entara nkyi mwutukyavanto uaqia huvata varurara tita, nkye mwi vaisira qua ntapihi kyarera uti varura. Mwi entara nkyi mwutukyavanto uaqia huvatara tita, mwi vaisira nai uaqia hu kyaiqara kyaara mwia inronra hora. Mwi entara nkyi mwutukyavanto uaqia huvata varurara tita, nkye Kotirara aatu hiqata mwi vaisira uaqia hi kyaiqaraqaa Kotiva tiriqaa qua vataankyorave tura.

Mwi entara nkyi mwutukyavanto uaqia huvata nkye nianra tiqata mwiva mwaini tirivata variqaro mwaa quara avuqavuma timwa tairaqe qiove qiare tura. Mwi entara nkyi mwutukyavanto uaqia huvata nkye Kotira kyaiqa nraahu vararerata mwi vaisira qua kepuqyaqama kye avuqavuma mwatarera uti varura. Nkye mwitaa mwitaamaqi vuvananra tina, nte taqaavata nkye mwi vaisira qua avuqavuma mwatarera uti varura.

<sup>12</sup> Nte haaru mwi quara qara ntigana hia nte uaqia hi kyaiqara utu vaisira mwianra rieqana qara ntumwa taavara. Hia nte mwi vaisiva uaqiamma mwato vaisirara rieqana qara ntumwa taavara. Nkye Kotira vuqaa variqata su nyaatovanto ntapihirata nkye tiriara nronraqama kye riaava vahirara ntapihiate tita, qara mwia nkyini vara kyaavanana.

<sup>13</sup> Nkye ni qaraqinaa qua rieta mwitaa hiarara tiro, tiri mwutukyavanto kyuqe ihata varunanra.

Tire Taitaasira titavararo nkye hunani vuvata nkye mwia mwutukya qihakyama mwatovaro mwia mwutukyaqitairo kyuqe huvaro varura mwianravata rieqata tire qamwateqata varuro.

<sup>14</sup> Nte Taitaasira timwa mwiqana nkyiara kyuqe hia nraakye qorahuave qiavaro mwiva nkyivata variqaro ni quara qutaa quave turara tina, nte hiama kyauringa. Tire nkyiara qutaa qua nraahu timwaqi vi varunanra. Tire Taitaasira timwa mwiqata nkyiara kyuqe hia nraakye qorahuave tuna quara, mwi quaravata Taitaasiva taqaiharo qutaa quama vahiro.

<sup>15</sup> Taitaasiva nkye hunani vuvata nkye mwia qamwata mwateqa mwia mwemwani variqata mwia qua kyuqema kye riorara tiro, Taitaasiva mwianra riaiharo mwia mwutukyavanto nkyiara mpoqiaavata vahira.

<sup>16</sup> Mwianra rieqanama ni mutukyavanto nkyiara qihakyama vahana nkyiara qamwateqana varura.

## 8

*Nkyeta sata sakyaa kyaahaqa hirera hivaro nkyi mwutukyaqitairo qihakyaa hirata kyaahaqa hiata*

<sup>1</sup> Ni kata pakya tuaavo, Kotira nraakye qora Masentoniani mpo mwatukya mpo mwatukyaqai varihua variavaro Kotiva mwihua kyuqema nyataihata variara mwi mwakyaakyara nkyi timwa nyianrita riaata.

<sup>2</sup> Mwinyaa nraakye qoravanto variqi quavaro nronra muaanravanto mwihua mwataara hirero qovarama viro vahata mwi mwatanaahua vehiqama vita hia munimave, kyau kyoqaave, vataahua variqata Kotirara qamwateqa nraahu variqi vita mwiaqatai mwihua mpohua kyaahaqa hirerata nkyiari hu inraikyara hia tuqara tutaraitita, qihakyama kye tiriqaavata tire varaqita uto nyunanra.

<sup>3</sup> Nte qutama tuqo. Mwihua mpohua kyaahaqa hirerata nataama munimave, kyau kyoqaave, nyianre qiera mwia nyita qaiqaa mpoqiaavata tiriqaavata tire varaqita uto nyunanra. Hia nte kepuqyaqama mwihuara tuqata mwihua mwitaa hiara. Mwihua nkyiarivanto mwitaa hiataa ihata mwitaama kyeqa nyianra.

<sup>4</sup> Mwihua nkyiarivanto tiriara po kye tita tiqata, Kyai tirevata Kotira nraakye qora mpo hiahua Iutiaani varihua kyaahaqama nyataare, qiera.

<sup>5</sup> Tire tiqata, Mwihua munimave, kyau kyoqaave, pataqia timwivaqe vaqita uto nyianranave, turata nraakiara mwihua munimavata kyau kyoqaavata airi timwiavata vaqita uto nyunanra. Mwi mwatanaahua nraante tiqata, Tire Kotira kyaiqa nraahu vararerave, timwa kyeta nkyiari ekyaa Kotira mwita tiriara tiqata, Kotira kyaiqa tinraamwutaivaqe varaqi quare, tura.

<sup>6</sup> Masentonaaqinaahua mwitaama kyeqa nkyiari munimave, kyau kyoqaave, Iutiaani varihua nyianranra tita, tire Taitaasirara tiqata, E Korintiqa tohara kyera

munimavata kyau kyoqaavata vararera quananrave. E mwini qaiqaa nrumu ntantera vira, mwi kyaiqarara po timwa nyateqara munima varena kyaiqara taiqa kyaante, tita. Mwitaa timwa kyetama nkye hianani Taitaasira titaararo quarive tita, vuaviraavira ti varuro.

<sup>7</sup> Nkye mpo kyaiqa mpo kyaiqa kyuqema kyeqa vare variahua. Nkye Karaisirara kepukyaqama kye rie variahua. Nkye mwia qua kyuqema kye rie variahua. Nkye mwia qua okyara ntapihi paahima kye rie variahua. Nkye mpohua kyaahaqa hirerata uti variahua. Nkye tiriara mwutukya vaihata variahua. Nkye mwitaa mwitaama kye variarara tina, nte nkyiara tiqana, Nkye Iutiaani variahuara po tirerata qihaakyama kyeta nkyeta munimavata kyau kyoqaavata nyiate, tuqo.

<sup>8</sup> Mwitaa tiqana hia nte nkyiara kepukyaqama kyena munima kyaate tuqo. Masentoniaavanto kyuqema kye nkyiari munimave, kyau kyoqaave, nyia okyararama nkyi timwa nyina. Nte mwitaa tiqana nkyi mwutukyavanto mpo inraikyara vhira mwataara hiqana taqarera.

<sup>9</sup> Tiri vunyaa vaisi Iesusi Karaisiva tiri kyuqema timwa taira nkyevata riaara. Mwiva ekyaa inraikya vataiva eqero nkyiara rieqaroma mwiva vehiqama viro. Mwiva vehiqama viraqaataitama nkye ekyaa nyaamwuni vahi inraikyara varehuama varita.

<sup>10</sup> Hia nte nkyiara kepukyaqama kye tiraitina, nte ntena riemwa kye nkyiara mwitaama tina: Tuvana ihiqi nkye nraante munimavata kyau kyoqaavata ntuvaantua hirerata tohara tora. Nkye nraante mwitaa hiataa huvata mwitaa hurara tita, nkye mwi kyaiqara varaqita uro taiqa kyaata.

<sup>11</sup> Qio mate nte nkyiara tiqana mwi kyaiqara varaqita uro taiqa kyaate tuqo. Nkye tohara kye mwi kyaiqara vaavaa varontema kyeta matevata mwi kyaiqara vaavaa taiqa kyaate, tuqo. Munima airi vateta kyaahaqa hiataa hirata munima airi nyiata. Munima pataqia vataivera, mwia pataqia nyiata.

<sup>12</sup> Nkye munima pataqia vatehua mwipiqa riqemba kyaahaqa kye nyivera, Kotiva hiama nanraqamave pataqia nyiavo tiraitiro, qiovema qiananro.

<sup>13-14</sup> Hia tire nkyiqa nronraqamakye muaanra vateqa nkye nronraqama munima nyivata mpo mwatanaahua pataqia nyiate turo. Nkye mate mwaa entara airi vateraqaa qiomma tukyama kye mpohua hia airi inraikya vataahua kyaahaqa hivara. Nraakiara mpo enta nkye hia airi inraikya vateraqaa qiomma mwihua airi vateqata tukyama kye nkyitavata nyivara. Nkye mwitaama kye nai kyaahaqa hi nai kyaahaqa hiqata nkyevata mwihuavata kuua qaramama varivara.

<sup>15</sup> Nkye munima tukyama kye nyi okyarara rieqata Kotira mpukuqi haaru qara ntumwa to quarara rieqata variata. Kotira mpukuqi mwitaama tiro:

Manaa kyara airi ntuvaantuama tai vaisiva hia kyuqinra

kye nrainhanro qamwanrama taiqa viharo hia vahirave.

Manaa pataqiatana uti vaisiva kyuqinra kye nrainhanro

vikyokya hirave, tura.

(Kyatura 16:18)

### Korintianra vaisi mponramwu sitovata vura

<sup>16</sup> Kotiva Taitaasira kyaahaqama mwataiharo mwiva tire nkyi kyaahaqa hirera hurantema kyero nkyi kyaahaqa hirero nronraqama kye rie variro. Taitaasiva mwitaa hirara rieqata tire Kotirara kyuqeve tiqata varunanra.

<sup>17</sup> Nte Taitaasirara nkyi uro kyaahaqa hiarive tuqaro mwiva mwi quarara qamwata kyero nai mwiva nkyi kyaahaqa hiataa iharo mwiva nkyi uro taqarerave tiro.

<sup>18</sup> Tire vaisi mpo titaararoma Taitaasira vatama kyero quananro. Mwi vaisiva kyuqema kyero Karaisira qua timwa nyi varihata Kotira nraakte qora mpoqi mpoqi variahua mwianra kyuqe vaisive ti variara.

<sup>19</sup> Mwihua mwi vaisirara kyuqe hi vaisirave timwa kyeta tirivata variqaro kyaiqa varaarive tita, mwianra qiove timwa taavaro mwiva tiri kyaahaqa hi varihata tire

munima vara kyeqata ntainre varunanra. Kotira nrutu tuaahereqata tire mwi munimanra vara kyeqata ntainraunana. Mwitaamaqi viqata tire vehi nraakyе qorara nronraqama kye riaunanra nkyivata nyaamwute varunanra.

<sup>20</sup> Nraakiara mpovanto munima vara kyeqata apiqama kye tukya hiavo qiankyo tita, tire mwi vaisira Taitaasiravatama kye titarera.

<sup>21</sup> Tire ntapihi kyeqata mwi kyaiqara mwi kyaiqara vararerera. Hia tire Kotira vuqaa nraahu variqa mwitaa hirerave. Ekyaa nraakyе qora suqaavata variqa mwitaa hirera.

<sup>22</sup> Tire mwitanahua siteqata vaisi mpovata titarera. Tire airi nani mwi vaisira mwataarama kye taqauraro mpohua kyaahaqa hiarivama variro. Mwia mwutukyavanto nkyiara qihakayama kyero vaiharora tiro, mwiva qamwata kyero nkyi kyaahaqa hirero uti variro.

<sup>23</sup> Nte Taitaasirara tirera. Mwiva nivatama kyero kyaiqa vare vari vaisivama variro. Mwiva nivata variqaro ni kyaahaqa hiataa iharo variqaro kyaiqa vare variro. Nte vaisi mpotananra vaakya tuhuara tirera. Iesusira nraaqiara mwatukya mpoqi mpoqi variahua mwitanahuara tiri kyaahaqa hiqata nkyi uro kyaahaqa hiate timwa taatanahua. Mwitana kyaiqvanto Karaisira nrutu tuaaheraananro.

<sup>24</sup> Mwihua nkye hinani vivata nkye mwihua kyuqema nyataivaro nte nkyiara qua tuva qutaa mwivau vahiari. Nkye mwihua kyuqema nyataivata Iesusira nraakyе qora mponani mponani varihua nkyiara tiqata, Qutaama nkyi mwutukyavanto tiriara vaiho, tivara.

## 9

### *Mwutukya qihakayama kye munima nyi okyarara tura*

<sup>1</sup> Nkye Kotira nraakyе qora kyaahaqa hi okyarara vaakya ntapihi kyaarara tina, nte hia qumina qaiqaa mwi quara nkyi timwa nyiqana qara ntirera.

<sup>2</sup> Nte taqauqaro nkyi mwutukyaqitairo mpoqama kye mwihua kyaahaqa hiataa ihata nkye Iutiaani variahua kyaahaqa hi variara. Nte nkyiara Masentonia nraakyе qora timwa nyiqana nkyi nyutu tuaahereni tiqana, Akaiaani variahua tuyana ihiqi variqata munimavata mpo inraikyavata terama kyeta mpo mwatanaahua nyinrenrata uti variarave, tina. Nte mwitaama kyena nkyi nyutu tuaahereqana qiyata Masentoniaaqinaahua mwihuavata qamwateqata munimavata mpo inraikyavata terama kye vataare tita uti varura.

<sup>3</sup> Nte mwi mwatanaahua timwa nyiqana nkyi nyutu tuaaherau quava qumina qua vahiankyo tina, nte tuntema kye terama kye vate variate tina, nte vaisi mponramwu nkye hianani sitauquo.

<sup>4</sup> Nte hia mwihua nraante sitaraitina, nte Masentoniaa vaisinramwu kyapata nkye hinani uro nte taqaarita nkye hia mwi inraikyara ntuvaantuama kye terama vataivera, nte nkyiara mwihua qio munima teramakyе vatevarave tu quava qumina qua vahirata nte mwia kyaara kyaurira inraikya varaarita nkyevata kyaurira inraikya varevarave.

<sup>5</sup> Mwianra rieqanama nte mwaa vaisihua sitaarita mwihua nraante tiri tivuni vihua uro nkye munima mwihua qio munima teramakyе vatevarave tu quava qumina qua vahirata nte mwia kyaara kyaurira inraikya varaarita nkyevata kyaurira inraikya varevarave.

<sup>6</sup> Mwaa quara ntapihi kye riemwa taata. Mpovanto kyara pataqiatana vara tutaariva pataqiatanama vantuananro. Mpovanto kyara airi vara tutaariva kyara airintima vantuananro.

<sup>7</sup> Kyara vara tira mwianra rieqatama nkye qihakayama kyeqaa Kotira kyaiqara rieqata munima nyiata. Nkye kuaiqia kuaiqivanto kyuqema kye vu nraato tu kyeta

mwitaa mwitaama qioma nyiananrave timwa kyeta nyiate. Nkye hia nyiataa hirata nyivora. Nkye tiriara mwihua kepuqyaqama kye nyiate qiavatama nyunro tivora. Vaisi mpovanto qamwata kyeqaro qihakayama kyero nyi vari vaisirarama Kotira mwutukya vahiro.

<sup>8</sup> Nkye qihakayama kyeqata Kotira mwivaro Kotiva nai mpoqiatama nkyi kyuqema nyatairata nkye hia aarantaraaiti, qioqama kye variqi vivara. Nkye mwitaama kye variqi viqata nkye ekyaa enta mpohuavata kyaahaqa hiva qioma vahianano.

<sup>9</sup> Kotira mpukuqi mwitaama tiro:

Vehi nraakyе qora qihakayama kyeqaro mpo inraikya  
mpo inraikya nyiqiro quariva variraro  
mwia kyuqe kyaiqvanto ekyaa enta  
qati nraahuma vahiqiro quananrove, tura.

(Ihi 112:9)

<sup>10</sup> Vaisivanto kyara vara tukye nraate tiro, Kotiva kyara humwu kyanaa nyi variva, mwiva nkyi kyaahaqa hirata nkye kyuqe kyaiqa mpoqavata varevarave.

<sup>11</sup> Nkye airi inraikya vateta mpo kyaiqa mpo kyaiqa kyuqe kyaiqa vareqata mwiaqatai nkye qioma mpo enta mpo enta qihakayama kyeqata nraakyе qora kyaahaqamaqi vivara. Nkye nraakyе qora qihakayama kyeqata kyaahaqamaqi vivata nraakyе qora airivantoma Kotirara kyuqeve tiqata qamwata mwatevara.

<sup>12</sup> Nkye Kotira nraakyе qorani kyuqe kyaiqa vara nyateqata nkye hia mwihua nraahuvauma kyuqe kyaiqa vara nyatevara. Nkyi kyaiqatai airi nraakyе qoravanto Kotirara kyuqeve tiva mpoqiatama vahianano.

<sup>13</sup> Nkye nraakyе qorani kyuqe kyaiqa varaqi vivata mpohua nkyi okyara ntapihi kyetama taqevara. Mwihua nkyi okyara taqeqata Kotira nrutu tuaahera kyeta mwihua nkyiara tiqata, Qikye, mwihua Karaisira quara qutaave timwa kyeta mwi quara kyuqema kye riemwaqi vi variarave, tivara. Mwihua nkyiara tiqata, Mwihua tirivata mpohuavata qihakayama kyeqata nkyiari hia inraikyara tukyama kyeqata timwi variarave, tivara.

<sup>14</sup> Mwihua nkyiara Kotiva mpoqiatama mwihua kyuqema nyate variho timwa kye nkyiara mwutukya vahirata nkyiara rieqata Kotirara aakyara ntamwaqi vivara.

<sup>15</sup> Kotiva nai mwaaqu nritarero vari vaisira tiri timwinranra tita, nrivaqenramwu Kotirara kyuqeve tita mpoqiatama qamwata mwataara.

## 10

### *Api qua ti varu vaishua Poruva nkyiari timwa nyu quara*

<sup>1</sup> Nkye hini hiahua nianra tiqata, Poruva tiri tivuqaa variqaro aatu hiqaro qua qihakayama kyero ti varirave. Mwiva uro mponani variqaro kepuqyaqama kyero ti varirave, qiaro. Nkye mwitaa qiavana nte nkyita timwa nyinrenra. Karaisiva hia raraqa taiharo qihakayama kyero nrohirara tina, nte mwianra rieqana mwia nraantantamwa kye variqana nkyi timwa nyinrenrave.

<sup>2</sup> Nte nkyi mwitaa timwa nyiqana taqauqata nkyiqitai mponramwuvanto tiriara tiqata, Mwihua mwatanyaa qua okyara rieqatama kyaiqa vare variavo, qiarave. Qio nkye rauruate. Mwihua mwitaama kye api qua tira kyaara nte qioma nkye hinani urontena nkyivata kepuqyaqama kyena qua qiataama vaihanavata nte hia mwitaa hirerave.

<sup>3</sup> Qutaa tire mwaa mwataraqaa variqi vi varunanrave. Tire hia mwaa mwataraqaa variqata veva huru kyaamwu vara kye ntaquqi vi varunanrave.

<sup>4</sup> Tire uaqia hi inraikyaravata ntaquqi viqata nraahumwa mpo veva huru kyaamwuqo ntaquqi vi varunanra. Kotiva mwiva tiri kepuqya timwihata tire ntaquqi viqata uaqia hi kyaiqara kepuqya mpo kepuqya mpo kepuqya nraataraqi vi varunanra.

Vaisi mpovanto tiriara mwihua qua nraatara kyaankye tiqaro unra qua tirera, tire qioma Kotira kepukyaqo mwia qua nraatara kyaananra.

**5** Mpovanto nraakye qoravanto Kotira qua okyara rievorave tiro mpo inraikya mpo inraikyaqo huvaitairera, tire mwi kepukyaraqo qioma mwi inraikyara qatinani vara kyaananra. Mpo qua mpo qua api quavanto tiri vu nraatoqi vahata tire mwi kepukyaraqo nraahu mwi quara raaquta kyeta Karaisira qua nraahu riemwaqi vi varunanra.

**6** Tire nkyi vecky variqata taqaarata nkye tiri qua ekyaa qua qio riemwaqita virerata utivera, mwiaqaatai tire qioma hia qua rie variani vaisiraqaa qua vataananra.

**7** Nkyi suqaa vahiani inraikyara ntapihi kye taqaata. Nkyiqitairo mpovanto nanri-anra tiqaro, Nte Karaisira nraaqiarama varuqo, tirera, mwi vaisiva qaiqaa riemwa kyero tiriavata mwitaama qari. Mwihuavata Karaisira nraaqiarama variavo, qari. Mwi vaisiva varintema kye tirevata Karaisira nraaqiarama varita.

**8** Tiri nronravanto tirinramwu nronraqama kyaihatara tita, tire nkyiqa ntaqikyi varurahuama. Nte nkyiqa ntaqikyiani quara timwa nyina qaiqaavata qaiqaavata nraahu timwa nyiqana hia kyaururave. Nte nkyiqa ntaqikyiqana nkyi kyaahaqa hirera uti varurave. Hia nkyi uaqlama nyatareravauma varina.

**9** Nte hia nkyi nraatuqa taariveravauma mpo qua mpo qua nkyini qara ntumwa tena.

**10** Mpo hiahua ni vara mwataniqa hita nianra tiqata, Poruva qaraqitairo nraahu kepukyu qua ti variho. Mwiva tiri utaqaa variqaro mwiva uqenrai vaisi variqaro uqenranra qua qumina qua nraahuma qiananrove, ti variara.

**11** Mwi quara ti variahua ntapihi kyeta riaata. Tire nyianrani variqata qaraqitai turantema kye uro nkyivata variqata kuua qua mwia nraahu tirera.

**12** Mwi quara ti variahua nkyiari nyutu tuaahereta tire vaisi nronrama varuro ti variavata tire aatu hita hia mwihua qiantema kyeta qio qiananra. Mwihua nkyiari qua nraahu rieqata, nkyiari nraahu taqeqlata kyuqe vaisivanto varunranrave tita. Mwitaa qia vaisihua hia su nyaatovata vahata variara.

**13** Hia tire mwihua vu nraato tuantema kye tirera. Kotiva hia timwiani kyaiqara mwianra hia teta nrutu tuaahererera. Kotiva tiri timwi kyaira mwianra nraahu timwaqi virera. Kotiva nkyivata variqata kyaiqa varaate tihata tire nkyi utaqaa variqata kyaiqa varaunranra tirera.

**14** Hia tire Kotiva mwukya rataira voti hira nraatara kye nkye hunani quavanana. Kotiva tiri titovatara tita, tire kyuqe mwakyaakya Karaisira mwakyaakya uro nkyi timwa nyiavanana.

**15** Kotiva tiri timwi kyaiqara hia tire mwia nraatara kye vaisi mpovanto vara tairara tire vara taunanrave timwa kyeqata teta nrutu tuaahererare. Tire Kotiva tiri timwi kyaiqara nraahu vareqata nkyiara tiqata, Mwihua variqi viqata kyuqema kye Karaisira qua riemwaqita vi varivaqe tire mwiaqaatai mwihuaqi nronra kyaiqa mpo kyaiqa mpo kyaiqa qio varaunanrave, tita.

**16** Nkye kepukyaqama kye Karaisira qua riemwaqi vivaqe qioma tire nkyi mwini kyeta Karaisira qua timwa nyinrenra mpo mwatani quananra. Tire mwitaa hiqata mpovanto nraante Karaisira kyaiqa varaaninranra hia tire teta mwahuta tiqata mwi kyaiqara tirema varauro qiananra. Hiama mwitaa tiqata unra qiananra.

**17** Kotira mpukuqi mwitaama tiro:

Vaisivanto nai kyaiqara rieqaro  
nai mwahuta qiankyorave.

Mwi vaisiva Kotiva mpo kyaiqa mpo kyaiqa  
varaaninranra rieqaro Kotira nraahu  
mwahuta timwa mwataarive, tura.

(Ieremaiaa 9:24)

<sup>18</sup> Vaisivanto nanrianra tiqaro, Ni kyaiqavanto kyuqe kyaiqave, tiraro mwia quavanto qumina quama vahiananro. Kotiva vaisi mpiora tiqaro, I kyaiqavanto kyugema iho, tirera, mwia kyaiqavanto kyuqe kyaiqama vahiananro.

## 11

### *Unra qua mwaanra tihua qua riemwaqi vivorave tura*

<sup>1</sup> Nkye ni qati kyaivaqe nte pataqia ntene mwahuta qiari. Nkye qati kyaivaqe nte mwaa quara qiari.

<sup>2</sup> Kotiva vaisi mpiora uaquia hi aanranraqaa quankyo tiro, mwiaqaa ntaqikyintema kye ntevata nkyiqa ntaqikyiqina vi varura. Mwanraata kyugema kye varira qoraisi ntumwu mwintema kye nte nkyi qoraisi kuaiku nyitaura. Nte nkyi sitaqina uro Karaisiva hinani kyaaninra.

<sup>3</sup> Nte nkyi Karaisiraqaa ntumwu tarera hiarilo mpovanto nkyi uaqama nyataankhora. Haaru qaruravanto qutaa qua votima kyero unra tuvaro Ipiva mwia quara qutaa quave tuntema kyeta, nkyevata vaisi mpo quara qutaa quave timwa kyeta tuqasaa vita hia Karaisira qua riemwaqita vivora. Nte mwianrama aatu hina.

<sup>4</sup> Tire nkyi timwa nyiqata Karaisira okyarara ntapihi kye timwa nyunrata nkye variavaro vaisi mpovanto nri ntero api qua tiqaro, Karaisira okyara mwitaamama vaiho, tihata nkye mwia qua rie variara. Tire Karaisira mwakyaakya nkyi timwa nyunrata nkye Kotira mwanraqura varaavaro mwiaqatairo vaisi mpovanto nri ntero api mwakyaakya tiqaro Kotira mwanraqrara api qua nkyi timwa nyihata nkye mwia qua rie variara. Nkye mwi vaisirara tiqata, Mwia qati kyaivaro qiarive, timwa kyeta mwia qua rie variara.

<sup>5</sup> Nkye vaisi mwinramwuhuara tiqata, Kotiva nronraqama kyaihata vuni variahuave, ti variara. Mwi vaisihua hia nritare tiri vuni variahuama.

<sup>6</sup> Qutaa ni novanto muaanra ntaihana hia kyugema kyena qua nkyi timwa nyi varura. Mwianra nte hiama nronraqama kye riaaninra. Nte Kotira qua okyara ntapihi paahima kye riauvvara tina, nte nkyi mwakyaakya timwa nyi varura. Mwiaqataina mpo enta mpo enta ntapihi kyena qutaa qua nkyi timwa nyi varura.

<sup>7</sup> Nte Kotira qua kyuqe mwakyaakya nkyi timwa nyiqana hia nkyiara kyoqaa mpivaqe nkyi timwa nyiankye qiavara. Mwi entara nkyi nyutuvanto virito vahiarive tina, ntene nutu vara mwataniqa hiavara. Nte mwitaa hiavara mwianra nkye tiqata, Nivanto uaquia hi kyaiqara utihove, tivara? Hiama qio mwitaa tivara.

<sup>8</sup> Mwi entara nkyiqi kyaiqa vareqana hia nte nkyiara munima mpiate tiraitina variavata Kotira nraakyae qora mpo mwatani varuhua ni kyaahaqa hiqata kyoqaa ni mpi varuvana nte mpuara vaisi nraantantamwa kye mwihua munima varena nte nkyiqi Kotira kyaiqa varaqina quavara.

<sup>9</sup> Mwi entara nkyivata variqi quavaro ni munima taiqa vuvana hia nte nkyiara ni kyaahaqa hiate tiraitina variavata ni nramwunaahua Masentoniaasai nrumu mwi inraikyara mwi inraikyara hia vataava inraikyara kyaahaqama matovana variavara. Haaru mwitaa hiavantema kye nraakiaravata nkyi muaanra nyiankyo tina hia nte nkyiara ni kyaahaqa hiate qianinra.

<sup>10</sup> Nte Karaisira qutaa qua ti varuva kyauqu nriqiqaa vateqana qutaa quama tina, Nte ntene mwahuta tiqana nte hia nkyiqitaina munima varauvavema, tuqo. Hiama qio mpovanto nkyi mwata Akaiaani variva ni quara unra quave qiananrove, tuqo.

<sup>11</sup> Nte nanraqamave mwitaa tina? Nkyiara hia ni mutukya vaihanave nte mwitaa tina? Qaqao, Kotiva ntapihi kyaiharo ni mutukyavanto nkyiara vaihana varura.

<sup>12</sup> Mpo vaisinramwuvanto unra tita tiqata, Kotiva tiri nronraqama kyaihata mwia kyaiqa vare varuro, qiahua, mwihua nraakyae qora suqaa variqata nkyiari nyutu tuaaherarerata mwihua tire vuna aanranra kuaa mwiaqaa quare titama puaahi

varita. Mwi aanrava vahiankyo tina, nte nkyiqitaina hia munima vararaitina, qati variqi virera. Nte mwitaa hiarita mwihua hia qio tiqata, Tire Porura nraantantamwa kye nkyiqitai munima vareqata Kotira kyaiqa vare varuro, tivara.

<sup>13</sup> Hia Karaisiva mwi vaisihua nronraqama kyero ni kyaiqa varaate tihua variqata mwihua nkyiariara unra qua tiqata, Karaisiva tiri nronraqama kyaihuave, tiqata kumwaanriqama kyeqata mwia kyaiqa varaqi vi variara.

<sup>14</sup> Hia nte mwihua kyaiqara nrihanrama vina nronraqama kye riaaninra. Saataanivavata mwaaquvanto variqaro kumwaanriqama kyeqaro nyaamwunyaava kyuqema kyero iteru ntuvaahe varira virininiqama kyero nrohi varira.

<sup>15</sup> Mwi vaisihua mwia kyaiqa vaisi variahura tita, mwihua Saataaninra nraantanteta kumwaanriqama kyeqata avuqavu nrohi varia vaisihua nraantantamwa kyeta nrohi variara. Mwihua nkyiari api kyaiqaqaara nkyiari kyoqaa varaivaqe huviqaravema qianinra.

*Poruva nronraqama viro Kotira kyaiqa vare varuvata mwia qoraqamaqita vuratura*

<sup>16</sup> Nte nkyi timwa nyu quara qaiqaavata nkyi timwa nyinrenra. Hia mpovanto nianra mwanrunrunraqa hivave qari. Nianra mwanrunrunraqa hivave tivera, kyaivaqe nte mwitaa hiarivavata variqana ntena nrutu pataqia tuaaheraari.

<sup>17</sup> Nte ntena nutu tuaahereqana hia Karaisiva tintema kyenavauma tina. Nte hia vu nraato vataava variqana mwitaa qianinra.

<sup>18</sup> Airi vaisivanto mwatanyaa qua okyara rieqata nkyiari kyaiqara nkyiari mwahuta ti variarara tina, ntevata mwihua nrantantarera.

<sup>19</sup> Qio quataama nkyi su nyaato kyuqe su nyaato vahirara tita, qiomma nkye kyaivata hia kyuqe su nyaato vahiarhua nkyi qua timwa nyivara.

<sup>20</sup> Qikye, nte taqauqata vaisi mponramwuvanto qovarama vita nkyi api ntavaaqavu kyeta, nkyi munimavata kyoqaavata vara kye nramwa kyeta, nkyi vireraarorama nyateta, nkyi pupohaira utu nyateta, nkyi siri ntuteqa kyeta, mwihua qovarama vita mwitaa hi variavata nkye mwihua tiqata, Qati kyaivata variate, qiarave. Nkye mwi vaisihuara, Hia mwitaa hiate, qiatara vahata nkye mwihua, Qati kyaivata variate, qiarave.

<sup>21</sup> Qikye, tire uqenraunra vaisihua variqatave mwi vaisihua nkyi qoroma nyataantema kye tirevata hia nkyi qoroma nyatauro?

Vaisi mponramwuvanto nkyiari mwahuta tiqata nkyiari nyutu tuaahere variara. Kyai ntevata hia aatu hiraitina, mwihua qiantema kye qiankye. Nte mwitaa tiqana hia vu nraato vahi vaisiva tintema kye tirera.

<sup>22</sup> Mwi vaisihua nkyiari mwahuta tiqata, Tire teta haivaqahua qua Hivuru qua ti varurahuave, ti variarave. Qio ntevata Hivuru qua ti varuvave.

Mwihua tiqata tire Isarerivantove, ti variarave. Qio ntevata mwaa kuua mwi okyaravama varuqo. Mwihua tiqata, Tire Evarahaamunraqaatai qovara hurahuave, ti variarave. Qio ntevata mwaa mwiaqataina qovara huvave.

<sup>23</sup> Mwihua tiqata, Tire Karaisira kyaiqa vaisima varuro, ti variara. Nte mwitaa tiqana ueraqa hi vaisiva qua tintema kyenama ti varina.

Mwihua tire Karaisira kyaiqa vaisima varuro, ti variara. Qio nte mwihua vahavata nraatara kyenama Karaisira kyaiqa vaisi varuqo. Nte mwihua mpooqavata nraatara kyena Karaisira kyaiqa vare varura.

Nte mwihua nraatara kye qaiqaavata qaiqaavata Karaisira kyaiqa vare varuqata mwia kyaara ni karavuqi kyaavana variqi vura.

Nte mwihua nraatara kye qaiqaavata qaiqaavata ni kyaamwuqo ntuqutu kye vataara. Airi enta nte qutu quari entava qaumato vahana varura.

<sup>24</sup> Nte Karaisira kyaiqa vare varuqata mwia kyaara reti kyaantaqo 39 nani ni moqaga uaqjama kye ntuqufuara. Iutaa vaisivanto kyauquru nani ni mwitaama kyeqa ntuqufuara.

<sup>25</sup> Nte Karaisira kyaiqa vare varuqata mwia kyaara Romenivanto ni retiqo ntuqufuara kye vataara.

Mpo enta mpo mwatanaahua ni oriqa ntuqufuara kye kyovana ntumwa quavara.

Nte taarampo nani nramanriqaa sipiqa quavaro sipivanto nramanriqi vijetora.

Mpo enta sipivanto nramanriqaa ntuvuraa vuvana nramanri mwutu sata kuaa ihera kuaa enta variavara.

<sup>26</sup> Nte Karaisira kyaiqa vareqana nyianrani vi variavaro humwunra nramanrivanto ni vara kyeqaro ntuhiqau kyakya hura. Mpuara vaisivanto ni rirerata uti varura. Nina mwatanaa Iutaavanto ni rirerata uti varura.

Mpo mwatanaavanto ni rirera uti varura. Nte mwatukya nronraqi nrohi variavata ni rirera uti varura.

Nte qumina mwata sata aanraqaa vi variavaro ni taiqa kyarera uti varura.

Nte kyaareraga vi variavaro ni taiqa kyarera uti varura.

Vaisi mponramwuvanto unra tiqata, Tire i qata vakyaahuave, tuhua ni rirerata uti varura. Nte mwitaa mwitaamaqi viqana Karaisira kyaiqa vare varura.

<sup>27</sup> Nte Karaisira kyaiqa toqaamwu tu kyena varaqi viqana entaqivata airi enta hia vaitaraitina, Karaisira kyaiqa varaqina quavara. Airi enta hia kyaravata nramanrivata nraavaro ni nraataa huvana variavara. Nte airi enta hia tuavaaqa vahuvana qati variavaro ni toqa tu kyeqaro vatora.

<sup>28</sup> Hia mwi inraikyava mwi inraikyava nraahu ni muaanra mpi varira. Mpo enta mpo enta Karaisira nraakyae qora mpoqi mpoqi variahua nte mwihuaqaa ntaqikyianinranra nronraqama kye riemwaqi vi varuqaro mwi muaanravavata niqaa vahana varura.

<sup>29</sup> Mwihuaqitairo vaisi mpovanto tiqaro, Nte hiama kepukyaqama kyena Kotira aanraqaa quaninrave, tirera, nte mwianra po qiariro ni mutukyavanto uaqia hiraqena varianinra. Mpovanto Kotira aanraqaatairo tumu ntiro qora kyaiqa varairera, mwianravata riaariro ni mutukyavanto uaqia hiraqe varianinra.

<sup>30</sup> Nte ntene mwahuta qari aanrava nraahu vahirera, nte ntene hia kepukya vahana varura mwianra nraahu rieqana nte ntene mwahuta qianinra.

<sup>31</sup> Kotiva tiri vunyaa vaisi Iesusi Karaisira qova varirama. Nte Kotira nrutu nraahu ekyaa enta tuaaheraqi virerama. Kotiva rie varihana hia nte nkyi unravauma tina.

<sup>32</sup> (Nte uqenrau vaisira ni okyara riaate tina, nte mwaa quara nkyi timwa nyinrenra.) Haaru nte Ntamasikaasini mwatukya nronraqi variavaro Aretaasiva vunyaa vaisivanto varuvaro mwia kyaiqa vaisi nronra mpovanto mwatukya mwiaqaa ntaqikyi variqaro nianra mwia ntavaaqavuqita uro karavuqi kyaate timwa kyero vaisi mponramwu sitovata uro vasaamwunra qesaqaa variqata nianra taqe varura.

<sup>33</sup> Taqe varuvata vaisi mponramwuvanto ni kyaahaqa hiqata tua nronra ntutantu toraqi ntumwa kye vateta vasaamwunra ntukoraatonataita kyaantaqa sutu kyeta mwaaqani mwaati kyovana mwiaqataina ntuqema kyena quavara.

## 12

### *Kotiva Porura nraamwuto inraikyarara tura*

<sup>1</sup> Nte ntene mwahuta qiariva hiama ni kyaahaqa hiananro. Vaisi mponramwuvanto unra qua mwaanra nkyi timwa nyiqatama nkyiari mwahuta ti variarara rieqana, nte ntene mwahuta qari aanrava nraahuma vahiro. Qio kyai nte ntene mwahuta timwaqiqi viqana nronravavento ruvaatakyaa qua mpo qovarama kyaihana taqaurara nkyi timwa nyianri.

<sup>2</sup> Haaru nte Karaisira nraaqiara variavaro Kotiva ni pitaqiro verara nyaamwuni uro kyora. Ni manraquha nraahu pitaqi uro kyorave iho, ni mamanta rirante pitaqiro uro kyorave iho, hia nte mwia ntapihuquo. Kotiva nraahuma mwia ntapihiro. Mwi entaraqaatai variqi vuqaro 14 ihima nritarero.

<sup>3</sup> Kotiva ni pitaqiro uro nai mwatukya kyuqeraqi kyovana taqaavara. Mwi entara ni manraquravanto nraahuve, ni mamantavantovatave, vura nte hia mwia ntapihuquo. Kotiva nraahuma mwia ntapihiro.

<sup>4</sup> Ni pitaqiro uro nai mwatukya kyuqeraqi kyovana mwipi variqana hia qio nkyi timwa nyiani quara riaavara. Hiama qio teta vaisi quaqitai mwi quara nkyi timwa nyianinra.

<sup>5</sup> Nte mwini variqana mwi inraikyara mwi inraikyara taqaurara rieqana qio ntena mwahuta qiataa ihanavata hia nte mwitaa hirera. Nte ugenrau vaisiva varura mwianra rieqana ntena nutu tuaherarerera.

<sup>6</sup> Nte nyaamwuni variqana taqau inraikyara rieqana ntena mwahuta qiankyera, hia nte vu nraato apiqa hi vaisihua qianta qianinra. Nte qutaa qianinra. Qio hia nte nyaamwuni variqana taqau inraikyara rieqana ntena mwahuta timwaqi virera. Nte mwitaa qiariro vaisi mpovanto nianra qikye mwiva nronra vaisivanto variho qiankyora. Nkye ni kyaiqa taqeta nte qua ti varura rieta qiomma ni okyara ntapihi kye taqevara.

### *Viaruaava rintema kyero Porura ri varurara tura*

<sup>7</sup> Kotiva ni pitaqiro uro nyaamwuni kyovana nte kyuqe inraikya mpo inraikya mpo inraikya taqaavarora tiro, Kotiva nianra tiqaro, Poruva nai tiqaro, Nte nronra vaisi varuqo qiankyorave, tiro. Mwitaa timwa kyero Kotiva ni mamantaqa nriqa vu inraikyara vatora. Mwi inraikyava viaruaava rintema kyero ni mamanta ri varihana varura. Saataaniva mwi inraikyaraqo ni uaqiamma mate varihana varuvvara tina, nte nyaamwuni taqau inraikyara ntena mwahuta timwaqina quankyora.

<sup>8</sup> Nte tiri vunyaa vaisiara taarampo nani po tiqana mwi inraikyara qatinani vara kyairae qio variankye tuqaro

<sup>9</sup> mwiva qaqao tiro, E mwi muaanranra varaqi vi variraqe nte qiomma i kyuqemaqina quaninrave. E ugenrenra vaisiva variqira viraqe nte qiomma i kepuqya mwiqina quaninrave, tiro. Mwiva mwitaa tihana nte nriqa vi inraikyara varaqi viqana ugenrau vaisiva variqi quaninra mwianra rieqana qamwateqana variqi virera. Nte mwitaamaqi vi varuqaro Karaisiva ni kepuqyaqama mate varihana variqi vi varura.

<sup>10</sup> Nte Karaisirara rieqana nte ugenrau vaisiva varianinranra hiama nronraqama kye riena. Mpohua nianra qora qua tirave, nte mwukyaari tuqina quaninrave, ni uaqiamma mataivae variqi quaninrave, muaanra varaqi quaninrave, nte Karaisirara rieqana hia mwi inraikyara mwi inraikyara nronraqama kye riemwaqina virera. Nte ugenraanri vaisiva variariro Karaisiva ni kepuqyaqamaqiro vi variraqe variqina quaninra.

### *Poruva Korintiqinaahuara nronraqama kyero riora*

<sup>11</sup> Nte ntene mwahuta tiqanama nte hia vu nraato vahi vaisiva tintema kyenama ti varina. Nte nkyiara rieqanama ntene mwahuta ti varina. Nkye ni kyaiqara kyuqe kyaiqave qiataara hia mwitaa qiaovo. Nkye nianra qumina vaisivantoma variho tivera, mwaa quara riaata. Nkye vaisi mponramwuanra tiqata, Karaisiva nronraqama kyai vaisihuave, qiahua nte mwihua kyaiqa nraatara kye varuvave.

<sup>12</sup> Karaisiva quttaaqama kyero ni nronraqama kyaihana nte quttaaqama kyena mwia kyaiqa vaisima varuqo. Nte nkyi utaqaa variqana hia qoriri hiraitina, mpo kyaiqa mpo kyaiqa nronra kyaiqave, hia taqaa kyaiqarave, vare variavata nkye ni kyaiqa

taqeta mwiaqaa nianra qutaama Kotiva mwia nronraqama kyero titaiho timwa kyeta ni okyara ntapihi kye taqaataara.

<sup>13</sup> Nte Karaisira nraakye qora mpo nani variahuaqaa kyuqema kye ntaqikyiqana nkyiqaa nraahuve hia kyuqema kye ntaqikyi varuqo? Qaqao, nte mwihuaqaavata nkyiqaaavata kuaa qarama kyena ntaqikyi varuqo. Nte mwitaa hiqanavata kuaa inraikyaqo mpohua ntaqikyuravata nraatara kye nkyiqa ntaqikyura. Nkyi muaanra nyiankyo tina, nte nkyiara hiama kyarave, mpo inraikyave, mpiae tina. Hia nte mwitaa tiraitina, nkyiqa qati ntaqikyiqina vi varura. Po, nkyivata muaanra nyiataara hia nkyi muaanra nyunrave.

<sup>14</sup> Nte nkyi taara nani uro taqaura. Nte terataarama kye qaiqaa nkyi uro taqarerera utuqo. Hia nte nkyi muaanra nyinrenrana uro nkyi taqarereravauma iho. Hia ni nkyi munimanrave, ontarave, mwutukya ntihana nte nkyi vaisiara mwutukya ntihana uro nkyi taqarerera. Hia nraaqiara patavanto nkyiari nyohua sohuqaa ntaqikyi variara. Nyohua sohua nkyiari nraaqiaraqaa ntaqakyi variara. Nkye ni nraaqiara votima kyetama variavo.

<sup>15</sup> Nte nkyi kyaahaqa hirerana qamwateqana ntena kepukya taiqa kye ntena mwamwantaqaa nriqa vi inraikyara varaqina virera. Ni mutukyavanto nkyiara uromwi mpoqiyavatama vahiro. Nkyi mwutukyavanto nianra nataamave vahiro? Nkyi mwutukyavanto nianra mwatumwi pataqiave vahiro?

<sup>16</sup> Nte hia nkyi muaanra nyianinranra tura mwianra nkye qutaave nraahuma tivara. Nkye mpo hiahua nianra tiqata, Poruva kumwaanri utu kyeqaro tire huna inraikyara vare variho, qiara.

<sup>17</sup> Nanraqamave nte mwitaa hianinrave? Nte vaisi mponramwu sitauqata nkye hianani quahua nkyiqitai mpo inraikya varetave hiavo? Qaqao, mwihua hia mwitaa hiara.

<sup>18</sup> Nte Taitaasirara po tiqana nkyiara mwihua hianani quante timwa kyena mwivata Karaisira nraaqiara mponramwu sitauqata mwihua Taitaasiravatama kyeta quaroma. Taitaasiva uro nkyi unra utu kyero mpo inraikya varairave iho? Hia mwiva mwitaa hirave. Ntevata Taitaasivavata kuaa kyaiqa mwia nraahu vare varurahua. Tiretana hia unra utu kyeqata mpohuani vare varunanra.

<sup>19</sup> Hia tire mwaa quara tiqata nkyi suqaa variqata teta qua ntapihi kye taiqa kyaare titavauma tita. Ni nramwunaa tuaavo, tire Karaisira nraaqiara variqata Kotira vuqaa variqatama ti varita. Tire nkyi kyaahaqa hiare tita, mpo kyaiqa mpo kyaiqa vare varurahuama varita.

<sup>20</sup> Nte mpo inraikyara aatu hiqanama varina. Nkye mwitaama varia nraakye qorahua varivaravema ti varina. Nte nkye hinani uro ntena taqaarita hia mwitaama vari nraakye qorahua varivora. Nkyevata nianra mwitaama vari vaisiva variananrove tihua variavana nte nkye hinani uro ntaarita nkye nianra hia mwitaama vari vaisiva variho tivorave. Mwianra aatu hiqanama varuqo.

Nte nkye hinani uro ntena api okyara, mpo okyara mpo okyara taqaankkyora. Inronra hi okyararave, kyarunti vari okyararave, raraqa tai okyararave, tukyama vita hia kuaaqi vari okyararave, uaquia hi quara ti vari okyararave, mpohuara mwoqanyaa qua ti okyararave, nte nronravanto varuqo ti vari okyararave, nanrianra nanrianra mpo qua tiqata hia kuaa qua ti vari okyararave, nte ekyaa mwi okyarara mwi okyarara nkye hinani uro ntena taqaankkyora. Mwi inraikyara taqaaninranra aatu hiqana varura.

<sup>21</sup> Nte uro ntena taqaarita nkye api qaraqita nrohi variqata uaquia hi kyaiqara mpo kyaiqa mpo kyaiqa utuqi vira hia qaqlira kyaraitita varivera, mwia kyaara Kotiva kyaurira inraikya ni mpiraqe nkyiara nronraqama kyena ntataaninra. Nte mwi okyarara taqaankkyora.

## 13

*Poruva qua taiqa kyarerera hiro tiqaro, Rauriqata variate, tura*

<sup>1</sup> Nte taara nani nkyi uro taqauva qaiqaa uro nkyi taqarerera. Kotira mpukuqi mwaa quava mwitaama tiro:

Vaisi taaratanave, taarampotanavantove,  
nkyiari suqo taqaivaro  
vaising mpovanto qora kyaiqa utu kyairera,  
nkye mwi vaisinramwuhua quara qutaave tiqatama  
mwi vaisiraqaa qua vatevarave, tura.

*(Lo 19:15)*

<sup>2</sup> Nte taara nani nkyi taqarerera quava entaraqaa nkyi kyapata variqana qora kyaiqa uti nraakye qorahuaravata, ekyaa hini mwihuaravata, kepukyaqama kyena qao tiqana qua timwa nyiavara. Nte mate nyianrani variqana qaiqaa mwi quara tirera. Nte qaiqaa nkye hinani quariva haaru qora kyaiqa vare varia nraakye qorahuavata, kyaatavantovata, qora kyaiqa vare variahua hia nte mwihua ntauhaaninra.

<sup>3</sup> Nkye nianra tiqata, Qutaave Karaisiva mwia nroqitairo ti variho, hiave mwia nroqitairo ti variho? tiqata ni mwataarama kye taqarerera uti variarara tina, nte uro ntene qora kyaiqa uti variahua hiama ntauhaaninra. Nte uro ntene mwitaa hiarita ni okyara ntapihi kyeta taqevara. Karaisiva hia uqenrai vaisiva variqaro nai okyara nkyi nyaamwute variho. Karaisiva kepukyua vaisivanto variqaro nkyi nyaamwute variho.

<sup>4</sup> Haaru mwiva uqenro vaisiva varuvata mwia kyatariqaa rukye hiritovaro Kotiva mwia kepukyaqama kyovaro mwaa entara mwiva qaiqaa qati siviro kepukyavanto qati variqiro vi varira. Karaisiva haaru uqenro vaisiva varuntema kye mate tirevata uqenraunra vaisihua varita. Kotiva tirivata kepukyua timwiqi vi variraqe tire Karaisiravata kuaaqi variqi viqata nkyini kyaiqa varaqi virera.

<sup>5</sup> Qutaa nkye Karaisira qua riemwaqi quarave? Nkye nkyeta tukyama kye taqaate. Nkye qiove tiqata, Iesusi Karaisiva tiri utaqi variho, tivara? Nkye hia qio mwitaa tivera, nkye hia Karaisira qua riaahuama varivara.

<sup>6</sup> Nkye tiri tukyama kye tiriara nanra quave tivara? Nkye tiriara tiqata, Tire mwihua tukyama kye taqaurata mwihua ntapihi kye variavo, tivera, tire nkyi quara qiovema qiananra.

<sup>7</sup> Nte Kotirara aakyara nteqana mwitaama tina, Kotio, mwihua kyaahaqa hirata mwihua hia mpo inraikya apiqa hiraitita, ntapihi kyeta variate, tuqo. Nte ntene kyaiqa qioqama kye varaaninra mwianra hia nte nronraqama kye riauqo. Nte nkye Kotira vuqaa ntapihi kye varira mwianra nte nronraqama kye riauqo.

<sup>8</sup> Tire hiama qio qutaa qua vara mwatumwiqa hiananra. Tire mwi quara kyaahaqamaqita virera.

<sup>9</sup> Nkye kepukyua nraakye qora variqi quate tita, tire qioma hia kepukyaqama hiara vaisihua variqi quananra. Tire nkyiara kepukyaqama vita qutaaqama kye Kotira nraakye qora variate tita, Kotirara aakyara nte varunanra.

<sup>10</sup> Nte vaini quariva nkyi uro inronra hiankyo tinama, nyianrani variqana qara nraahu vara kyena. Kotiva ni nronraqama kyaihana nte nkyiqa ntaqikyi varuvama varina. Kotiva hia nianra nkyi uaqiamma nyataarive tiravauma. Mwiva nianra nkyi kepukyaqama nyataarive tiro, ni nronraqama kyaihana nte nkyiqa ntaqikyiqina vi varura.

*Qua mwanteqaro tura*

<sup>11</sup> Ni kata pakya tuaavo, ni qua qio taiqero. Nkye Kotira vuqaa ntapihi kye variqi virara kepukyaqamaqita quata. Nte tu quara riemwaqi quata. Kuua qua nraahu timwaqi quata. Nkyi mwutukyaqitairo qihakya hi varirata variqi quata. Nkye mwitaamaqi vivaro Kotiva nkyiara mwutukya mpoqivata vaiharo nkyi mwutukya qihakya nyate variva, mwivama nkyivata variqiro quananro.

<sup>12</sup> Nkye Kotira nraakye qora variqatara tita, nkye kyuqema kye nai qua mwante nai qua mwante hiqata variata.

<sup>13</sup> Kotira nraakye qora mwaini variahua nkyiara rieqata nkyi qua mwantauroma tita.

<sup>14</sup> Qio varivaro tiri vunyaa vaisivanto Iesusi Karaisiva nkyi kyuqemaqiro viraro Kotiva nkyiara mwutukya vahiariva vahiqiro viraro mwia mwanraquravanto nkyivata variqiro quari.

## KARESIA

### Poruva Karesiaqinaahuani qara vara kyora

Iesusira qati vara sivuma kyovaro nyaamwuni uro varuvaro 25 ihive nritarovata Karesia mponramwuvanto Karaisira quara quutaave timwa kye varuvata vaisi mponramwuvanto uronte mwihuara tiqata, Nkye Karaisira qua nraahu riemwaqita vivorave. Nkye Karaisira qua rieqata Iutaa mwaanra qua Kotiva Mosesira mwu quara mwi quaravata riemwaqita quate, ti varura. Mwihua api mwitaa ti varuvaro Poruva mwia kyaara mwaa quara qara ntumwa teqaro Karesiaqinaahua ntapihi kyero timwa nyinro kepukyaqama kyero tiqaro, Karaisira qua nraahu riemwaqita quate, tura.

**1** Nte Poruva qara mwaa nkyini vara kyauquo. Hia qumina vaisivanto ni nronraqama kyero ni titaihana nte variqana Karaisira qua nkyi timwa nyiqi vi varura. Qaqao, Iesusi Karaisivavata, tiri tiqova Kotiva Karaisira qutu vuraqitairo qati vara sivuma kyova mwivavata, mwitanahua ni nronraqama kyeta ni titaavana nte Karaisira qua nraakye qora timwa nyiqi vi varuvama varina.

**2** Ntevata, Kotira nraaqiara mponramwu mwaini nivatamakyе variahuavata, tire nkyiara Kotira nraakye qora Karesiani variahua nkyi qua mwanteqa mwitaama tita,

**3** Kotiva tiri tiqovavata, tiri vunyaa vaisivanto Iesusi Karaisivavata, mwitanahua nkyi kyuqema nyataivaro nkyi mwutukyaqitairo qihakya hi varirata variate, turo.

**4** Tire mwata mwaaqa variqata qora kyaiqa nraahu utuqita vi variavararo Karaisiva tiri kyaahaqa hirero tiri qora kyaiqvanto mwihuua ntumwaqu kyaankyo tiro, mwiva tiriara rieqaro tire qora kyaiqa utuna quava nruka quarive tiro qutu vura. Tiri tiqova Kotiva Karaisira titovaro Karaisiva Kotira qua riemwaqi viro qutu vura.

**5** Qio Kotiva Karaisirara tiri kyaahaqa hiarive tiro Karaisira titairara tita, nrivaqe tire ekyaa enta Kotira nrutu tuaaheraqi vi variare. Qutaave.

*Hia mpo qua mwaanra riaraitita, Karaisira qua nraahu riemwaqita quate, tura*

**6** Kotiva Karaisira kyaiqara rieqaro nkyi kyuqema nyatarero nkyi nyaanrama taihata nkye Karaisira qua riemwaqi vita mwiaqatai nkye qamwanrama kye Karaisira qua qaqla kyeta tiqata, Kyai mpo qua Kotiva varinanianra vi quara riemwaqi quare, timwa kyeqata variara. Nkye mwitaa hiavana nte mwianra nronraqama kye rieqana aatu hina tiqana, Qikye, mwihuua quutaave mwitaa ti variavo? tura.

**7** Hia nraahumwa mpo qua kyuqe qua vahira mwi quara rieqata nkye Kotira aanraqaa vivarave. Hiave. Vaisi mpo hiahua Karaisira qua hia ntapihi kyeta tiraitita, apiqama kyeqata mpo qua nkyi timwa nyinrenra uti variavaro nkyi su nyaato apiqaa ihata taara su nyaato vahata variarara tina, nte nkyiara tiqana, Karaisira qua nraahu vaharo hia nraahumwa mpo qua vahirave. Nkye Karaisira qua mwia nraahu rieqata Kotira aanraqaa vivarave, tuqo.

**8** Tireve iho, nyaamwunyaahuave iho, tauraa tire nkyi timwa nyuna quaraqaatai nraahumwa mpo qua nkyi timwa nyianrenra, Kotiva mwiaqaa qua vatairaro mwiva uaqiahia nraakye qorhua uaqiahia mwataraqi rupavita varinani viraqe nte huviqarave qianinrave.

**9** Mwi quara tire haaru nkyi timwa nyiavana quara nte qaiqaavata nkyi timwa nyinrenrama. Tire Karaisira qua nkyi timwa nyunrata nkye mwi quarara qutaa quave qiara. Nkye mwitaa qiarara tiro, vaisi mpovanto nkyiara mwi quara qaqla kyeta mpo qua riemwaqita quate tirera, Kotiva mwiaqaa qua vatairaro mwiva uaqiahia mwataraqi uaqiahia nraakye qorhua rupavita varianani viraqe nte mwianra huviqaravema qianinra.

<sup>10</sup> Hia qumina vaisivanto ni qamwata mataate tinavauma, mwi quara tina. Qaqao, Kotiva ni qamwata mataarive tina nte variqina vura. Hia nte nraakyе qoravanto ni qamwata mataate tina, Karaisira kyaiqa vare varura. Nte mwitaama rieqana kyaiqa varautiri, nte hiama Karaisira kyaiqa vaisi varutiri.

*Iesusi Karaisiva Porura nraanrama kyero nronraqama kyorara tura*

<sup>11-12</sup> Ni kata pakyaas tuaavo, nte kyuqe mwakyaakya Karaisira qua nkyi timwa nyunra mwi quara hia vaisi mpovanto nai riemwa kyero timwa mpi quaravauma nkyi timwa nyina. Hia vaisi mpovanto nai riemwa kyero mwi quara okyara ni naamutaihana nte nkyi timwa nyunra. Qaqao, Iesusi Karaisiva naivanto mwi quara qovarama kyaihana nte mwia qua rieqana nkyi timwa nyunra.

<sup>13</sup> Nte Iutaa vaisivanto variqana nte haaru Iutaa mwaanra okyara Kotiva Mosesira timwa mwu quara, mwi quara nraahu kepukyaqama kyena riemwaqi viqana nrohi-avarua nkye mwia ntapihi kyaara. Nte mwia entara Jesusira qua rio nraakyе qorahuara api qua riaahuave timwa kyena hia mwihuara po tiraitina, mwihua ntuqutu kyena raupirima kyarerera uti variavara.

<sup>14</sup> Nte Iutaavanto variqana mwi entara nte Iutaa mwaanra okyara riemwaqi viqana nte ntene henahuavata nyaatara kyena vuni variavara. Nte mwihua vuni variqana nte mpoqama kye teta haivaqahua tu quara, mwi quara nraahu pu naatoqi vatena riemwaqina vi variavara.

<sup>15</sup> Qio haaru hia ni mwato entara Kotiva kyuqema mateqaro ni nai kyaama tero nianra Poruva ni kyaiqa vaisima variananrove timwa kyero ni naanrama kyero ni pita vatora.

<sup>16</sup> Mwiaqatairo mpo enta nai mwatamato entaraqaa nianra Poruva ni maaqu mwakyaakya mpo mwatanaa mpo mwatanaa, hia Iutaa mwatanaahua mwi quara timwa nyianrive tiro, Kotiva nai mwaaqu qovarama kyovana nte mwia taqaavara.

Nte Kotira mwaaqu taqena mwiaqatai hia mpohua mpohua Jesusira okyarara kyapara hirerana quvara.

<sup>17</sup> Hia nte Ierusaremini nraante vaisi mponramwu nronraqama kyohua taqarerana quvara. Nte hia mwini viraitina, mwi entara toharena nyianra Arebiaani uro varina mwisai uro ntantena Ntamaasikaasini nrumu variavara.

<sup>18</sup> Nte mwini variavaro taarampo ihi nritarovana nte Pitaara taqarerera Ierusaremini quavava uro mwivata taarampo uiki variavara.

<sup>19</sup> Mwi entara hia nte Iesuiva nronraqama kyo vaisihuaqitai vaisi mpovata taqaraitina, nte Jesusira qata Iemisira nraahu taqaavarave.

<sup>20</sup> Nte Kotira vuqaa variqana kyuqu nriqiqaa vateqanama nkyiara tina, Qara mwaa ntumwa tau quava hia unra quavauma vaiho. Qutaa quama vaiho, tuquo.

<sup>21</sup> Nte Ierusaremini vari kyena mwiaqatai nte Siriaanivata Sirisiaanivata uro variavara.

<sup>22</sup> Mwi entara Jesusira nraaqiara Iutiaani varuhua hia ni ntapihi kyohua varura.

<sup>23</sup> Mwihua mpo uhua nianra tu quara mwia nraahu riora. Mpo uhua nianra tiqata, Mwi vaisiva haaru Jesusirara quitaave tivorave timwa kyero tiri Jesusira nraaqiaranramwu uaqama timwa tarero uti varurave. Mwiva mate mwaa entara Jesusirara quitaave qiate tiqaro nraakyе qora timwa nyi varirave, tura.

<sup>24</sup> Mwihua mwitaa timwa kye nianra rieqata Kotiva kepukyavanto variho timwa kyeta Kotira nrutu tuaahere varura.

<sup>1</sup> Ihi 14 nramwu nritarovana nte Vanavaasikyantiri nrumu ntante qaiqaa Ierusaremini quavara. Nte mwini virera hina Taitaasira, hia Iutaa mwatanaa mpo mwatanaa vaisivata vitena quavara.

<sup>2</sup> Kotiva qovarama kyero nianra Ierusaremini quante tu quara nte ntapihi kyena nte mwi quara vataqi vina nte mwini quavara. Nte mwini uro variqana nronra vaisinramwuve qiahuavata nraahu variqana nte Karaisira qua mwitaa mwitaa timwa kyeqana mpo mwatanaahua timwa nyu okyarara mwihuavata timwa nyiavara. Nronra vaisi mwinramwuhua nianra api qua qumina quama mpo mwatanaahua timwa nyiho timwa kyeta ni ntavaaqavivo tina, nte mwinramwuhua mwi quara ntapihi kye timwa nyiavara.

<sup>3</sup> Mwi entara nivatama kyero nru vaisira Taitaasiva Kiriki mpo mwatanaavanto varuvata mwihua hia Iutaa mwaanra okyarara rieqata mwia mwamwanta toqa mwataate turave.

<sup>4</sup> Vaisi mponramwuvanto nraahu unra qua tiqata, Tirevata Iesusira nraaqiarave, tuhua, mwihua nraahu nianra tiqata, Qaqao, e Taitaasira mwamwanta toqa kyaataarave, tura. Mwi vaisihua tiri kyaiqa okyara apeqama kye taqarerata nru vaisihua varura. Iutaa mwaanra quavanto tiri rupa taihata varuraro Iesusi Karaisiva tiri huvantu kyaihata tire qatinani nritare varurata mwihua taqeta qaqao tita, Nkye Iutaa mwaanra qua nraahu riemwaqi quataarave, tiqata mwihua qaiqaa mwi quaraqotai tiri ruparera uti varura.

<sup>5</sup> Mwihua mwitaa hirerata uti varuvata tire hia mwihua qua pataqiaavata riaraitita, mwihua quara qoririma kyeta Karaisira qua mwi quava nraahu qutaa qua vaihata nkye mwi quara nraahu riemwaqi quate tita, tire hia mwihua api qua riaavanana.

<sup>6</sup> Mwi entara nte Ierusaremini uro variavata nronra vaisinramwuve tuhua nanra quave ni timwa mpita? Hia nte nronra vaisi nronraqama quaninranra riena. Kotiva hia vaisi nrutuara rieqaro mwi vaisiva kyuqe vaisive mwi vaisiva qora vaisive tira. Qio mwi entara nronra vaisi mwihua nianra nanra quave tita? Mwihua hia nianra e mpo quavata qiataarave tiraitita, mwihua ni quara qio vaiho, tura.

<sup>7</sup> Mwihua mwitaa timwa kyeta taqovaro Pitaava nronraqama viro Iutaa mwihua Karaisira qua timwa nyi varuntema kyero Kotiva ni nronraqama kyovana nte mpo mwatanaa Karaisira qua timwa nyi variavara.

<sup>8</sup> Iutaa timwa nyianrive tiro Pitaara nronraqama kyaiva Kotiva, mwivama nivata nronraqama kyero mpo mwatanaahua timwa nyiante, tiro. Kotiva kuaa mwiva nivata Pitaaravata nronraqama kyaivama variro.

<sup>9</sup> Nronra vaisinramwuve ti variahua Iemisivavata, Pitaavavata, Ionivavata, mwinramwuhua nianra tiqata, Qutaaqama kyero Kotiva i nronraqama kyaihara e mwi kyaiqara varaqira vi variaro, timwa kyeta mwihua ni kyauqu mpita Vanavaasiravata kyauqu mwunrama. Mwihua tiritana kyauqu timwiqata Vanavaasikya tiritananra tiqata, Nkyetana mpo mwatanaahuaqi kyaiqa varaqi vivaqe tire teta nramwunaa Iutaaqi kyaiqa varaqi quare, tura.

<sup>10</sup> Mwihua qua kuaiqia nraahu tiritana timwa timwita tiqata, Nkyetana vehi nraaky'e qorara taunru kyevorave. Nkyetana mwihuama kyaahaqama nyataate, tuvana nte tiqana, Eo, nte mwihuara mwutukya vaihana vaakya mwitaa hi varuvara tina, nte mwitaa hianinrave, qavara.

### *Poruva Pitaara inronra hiqaro mwia avuqavu huru*

<sup>11</sup> Mwitaa timwa kye nte variqi quavaro mpo enta Pitaava nte hiavara Antiokini nrintero mwini variqaro mpo inraikya apiqama kyovana mwia kyaara nte ekyahua suqaa variqana Pitaara inronra hiavara. (Mwi quara okyaraqaataina nkyi timwa nyinrenra.)

<sup>12</sup> Mwi entara vuni Pitaava Iesusira nraaqiara mpo mwatanaavatama kyero kyara nre varuvata mwiaqaatai Iemisiva Ierusaremisairo sito vaisihua nri ntora. Mwihua Iutaavanto nruvaro Pitaava mpo mwatanaaa mwihua kyero tiqaro, Mpo mwatanaahua hia Iutaa mwaanra qua riaraitita, hia nkyiari nyamwanta toqaahuave. Mwia kyaara nte mwihua kyapata kyara nre variarita Iutaa mwaanra qua rieqata nriahua nianra tivorave, tiro. Pitaava mwitaa timwa kyero mwiva hia mpo mwatanaaa kyapata variraitiro, mwihua kyero nanrianraa variqaro kyara nre varura.

<sup>13</sup> Pitaava mwitaa huvata Iutaa mponramwuvanto Iesusira nraaqiaraqama vita varuhua, mwihuavata Pitaava tunteema kye tiriara tivorave timwa kyeta hia mpo mwatanaavata kyara nronra. Mwihua mwitaama kyeta kumwaanriqama kyeqata kyuqe kyaiqa varovaro Vanavaasivavata mwihua hunte kuua qarama kyero hia mpo mwatanaaa mwihuavata kyara nronra.

<sup>14</sup> Mwinramwuhua mwitaa huvana nte taqaavata mwihua hia ntapihi kyeqa Karaisira qua riemwaqi viqata nrohi varuvana nte ekyaa mwihua suqaa sivina Pitaarara mwitaama tina, Qaqao, e Iutaavanto Iesusira qua riaarava variararovata Iutaa mwaanra okyaravanto hia i tutaihara variaro. È ena mwitaama variqara nanraqamave mpo mwatanaaa mwihuara nkye Iutaa mwaanra okyara riemwaqita quate ti variaro? E hia mwitaa qiataarave, tina. (Nte Pitaarara mwitaa timwa kye mwiaqaatai tetu Iutaa mwatanaavanto varuna okyarara mwihua ntapihi kye timwa nyiavara.)

### *Iesusirara qutaa mwivave tihua mwihua nraahuma Kotiva avuqavuma nyataananro*

<sup>15</sup> Tiri tinrohua qohua tiri mwatataavata tire Iutaavanto variqata tire tauraaqama kye mpo mwatanaahuara tiqata, Mwihua mpo mwatanaavanto variarara tiro, Kotiva tiri haivaqara Mosesira mwu quava, Iutaa mwaanra okyaravanto hiama qio mwihua kyaahaqa hiraro uaqia hi kyaiqara vare quava qatima mwihuqaqaa vahiananrove, ti variavanana.

<sup>16</sup> Tire mwitaa ti variavarahua variqata mwiaqaatai tiri tivu nraato ntapihi vuvata riaavararo tiriqitairovata vaisivanto Kotiva Mosesira haaru mwu quara riemwaqiro viraro Kotiva hiama mwianra rieqaro mwi vaisira qua taiqa kyairaro mwi vaisiva uaqia hi kyaiqara utuani quava mwiaqaa qatima vahiananro. Vaisivanto Iesusi Karaisirara qutaave timwa kyero mwianra riemwaqiro viraro Kotiva mwi vaisira qua nraahuma taiqa kyaananro.

Tire Kotirara mwiva tiri qua taiqa kyaarive tita, tire Iesusi Karaisirara qutaave tunanra. Tire haaru Mosesiva Iutaa mwaanra qua timwa tora riemwaqi quavararo Kotiva hia mwianra rieqaro tiri qua taiqa kyora. Tire Karaisirara mwiva tiri kyaahaqa hiarivama variho turaro Kotiva mwianra rieqaro tiri qua taiqa kyero tiri avuqavuma timwa taira. Vaisi mpovanto Iutaa mwaanra okyara riemwaqiro viraro Kotiva hiama mwi vaisirara qamwateqaro e ntapihi kyera nrohi variaravave qiananro.

<sup>17</sup> Kotiva tiri avuqavuma timwa taarive tita, tire Karaisirara qutaave tunanra. Tire Karaisirara qutaave turaro mwiaqaatairo tiri tivu nraato ntapihi vihata tire taqauraro mpo mwatanaavanto uaqia hi kyaiqara utuqita quantema kyetama tire Iutaavantovata uaqia hi kyaiqara utuqi vurahuama varita. Iesusiva tirini kyaiqa vara tairaqaatairove tiriqi uaqia hi kyaiqava qovarama viro? Qaqao, mpovanto mwitaa tirera, mwiva api quama qiananro.

<sup>18</sup> Haaru nte Iutaa mwaanra okyara riemwaqi quankye timwa kyena, qora aanraqaa nraahu quavara. Nte Iutaa mwaanra okyara qaqlira kyaura, mwi quara qaiqaa riemwaqi quankye qiankyera, nte qaiqaa nraahuma uaqia hi aanranraqaa viqana uaqia hi kyaiqara varaqi quaninra.

<sup>19</sup> Mate Iutaa mwaanra okyaravanto hiama niqaa ntaqikyi variro. Karaisiravata ni ru kyorave. Nte qutu vi vaisira votima kye varuqarora tiro, mwi quava hia qio niqaa ntaqikyiariva vahana nte Karaisirara nraahu riemwaqi viqana variqi virera.

<sup>20</sup> Mate hia nte ntene variqi vi varuvave, Karaisiva ni utaqi variqiro vi varihana nte variqi vuqo. Mwaa entara nte Karaisirara qutaa mwiva Kotira mwaaquve timwa kye mwianra riemwaqi viqananra tinama, nte variqi vina.

Karaisiva nianra mwutukya vahuvoro nianra rieqaro qutu vura.

<sup>21</sup> Karaisiva mwitaama kyero kyuqema matairara tina, hia nte mwiva mwitaama mataira mwia qaqlira kyarerave. Kotiva Mosesira mwu quava Iutaa mwaanra okyaravanto tiri kyaahaqama timwa taitiri, Kotiva mwianra rieqaro tiri avuqavumama timwa taitiri. Mwitaa hiangye titiri, Karaisiva hia tiri kyaahaqa hiraitiro, quminama qutu vitiri.

### 3

#### *Nkye Karaisirara qutaave timwa kyeqata Kotira mwanraqura varaarave tura*

<sup>1</sup> Qaqao, Karesia tuaavo, hia nkyi su nyaato vahata variarave. Tava nkyi su nyaato vara apiqama kyaihatave nkye api qua rieqata nrohi variavo? Nte ntapihi kye Karaisira kyatariqaa ruto quara nkyi timwa nyuqata nkye hiave ntapihi riaavo?

<sup>2</sup> Nkye kuaa qua mwaiqiara ni timwa mpivaqe riaari. Nkye Iutaa mwaanra qua riemwaqi viqatave Kotira mwanraqura varaavo? Nkye Iesusi Karaisirara qutaave timwa kyeqatave Kotira mwanraqura varaavo? Timwa mpivaqe riaari. Nte mwianrama nkyi kyapara huqo.

<sup>3</sup> Nkyi su nyaatovanto apiqamave viro? Nkye Iesusi Karaisirara qutaave timwa kyeqata Kotira mwanraqura varaarave. Tohare nkye nkyetavanto hia nkyeta kyaahaqa hiraitita varuvaro Kotira mwanraquravanto nkyi kyaahaqa huvata nkye Iesusira nraaqiaraqama vita variqi vurave. Mwiaqaatai nkye nanraqamave api vu nraato rieqata Kotira mwanraqura qaqlira kyeta nkyetavanto nkyeta qaiqaa kyaahaqa hirerata uti varita?

<sup>4</sup> Haaru nkye Iesusira nraaqiara variqi vuvata mwia kyaara nkyi uaqiamaqita vuvata nkye mwi entara hia qoriri hiraitita, kepukyaqama kye variqi vura. Haaru mwi entara nkye kepukyaqama kye variqi vurara mate mwaa entara taunru kyeta haunri api mpo qua riemwaqi vivora.

<sup>5</sup> Nkye hia Iutaa mwaanra okyara riemwaqi viraitita, nkye Karaisira quara qutaa quave qiavarora tiro, Kotiva nai mwanraqura nkyi nyihanro mwiva nkyi utaqi varihata nkye nronra kyaiqa nraahumwa kyaiqa vare variara.

<sup>6</sup> Evarahaamunranra tu quara rieqata variata. Kotira mpukuqi Evarahaamunranra mwitaama tiro, Evarahaamuva Kotirara e qutaa mwitaa hinanrave tuvaro Kotiva mwianra rieqaro mwia qua taiqa kyero iara avuqavuma nrohi variara vaisivavema qianinrave, tura.

<sup>7</sup> Evarahaamuva tuntema kye Kotirara qutaave ti varia nraakye qorhua, mwihua qutaama Evarahaamunra nraaqiara variarama. (Evarahaamuva mwatatai vaisihua mpo hiahua Kotirara hia qutaave tiraitita variahua, mwi nraakye qorhua hia Evarahaamunra nraaqiara variarama.)

<sup>8</sup> Karaisiva nraakiara nraakye qora kyaahaqa hianinranra rieqaro Kotiva haaru Evarahaamunranra qua turama. Mwi quara Kotira mpukuqi qara ntumwa tova mwitaama tiro:

E mwatatera huaqitairo vaisi mpovanto ekyaa  
mpo mwatanaa mpo mwatanaa kyaahaqa hi varirata  
mwihua kyuqema kye varivarave, tura.

*(Okyara 12:3)*

Mpo mwatanaa mpo mwatanaa Karaisirara qutaa mwivave tivaqe nte mwihua avuqavuma nyataankye qianinranra rieqaro Kotiva Evarahaamunranra mwitaa tura.

<sup>9</sup> Evarahaamuva Kotirara qutaave timwa kyero mwianra kepukyaqama kyero riemwaqiro vurara tiro, Kotiva mwianra rieqaro mwia kyuqema mwatora. Mwia votima kyeta ekyaa nraakye qora Kotirara kepukyaqama kye riemwaqita quahua, mwihua variavaro Kotiva Evarahaamunra kyuqema mwataintema kyero mwihuavata kyuqema nyate varira.

<sup>10</sup> Kotira mpukuqi mwitaama tiro:

Mosesiva ekyaa mwaanra okyara qara ntumwa to quava  
vaiharo vaisivanto hia ekyaa mwi quara nraisairo  
riemwaqiro viraitiro, hini qua qaqlira kyairera,  
Kotiva mwia uaqlama mwataananrove, tura.

(Lo 27:26)

Kotira mpukuqi mwitaa tirara tiro, mpovanto tiqaro, Kyai nte Mosesira qua riemwaqi quankye, qiariva uro uaqiamama quananro.

<sup>11</sup> Vaisivanto Mosesira mwaanra okyara riemwaqiro virera, Kotiva hiama mwianra rieqaro mwia qua nruka mwataananro. Kotira mpukuqi mwitaama tiro:  
Kotirara kepukyaqama kyero riemwaqiro vi variari  
vaisiva variraro Kotiva mwia qua taiqa kyairaro  
mwi vaisiva qatima variqiro quananrove, tura.

(Habakuk 2:4)

<sup>12</sup> Mosesira mwaanra okyara riemwaqiro quari aanrava mpo aanra vaiharo Karaisirara riemwaqiro quari aanrava mpo aanra vahirama. Hia aanra mwitanava kuaa qarama kyero vahira. Kotira mpukuqi mwitaama tiro:  
Mosesira mwaanra okyara hia mpoqia qaqlira kyaraitiro,  
ekyaa mwi quara vataqiro quariva,  
mwi vaisivama qati variqiro quananrove, tura.

(Wok Pris 18:5)

<sup>13</sup> Tire Mosesira mwaanra okyara hia ekyaa mwi quara vataqi vunanra mwia kyaara uaqlama quataara vahuvaro Karaisiva qovara hiro tiri mwaata varovaro Kotiva mwia uaqlama mwatora. Kotira mpukuqi mwitaama tiro:

Kyatariqaa rutaari vaisiva variraro

Kotiva mwia uaqlama mwataananrove, tura.

(Lo 21:23)

<sup>14</sup> Kotiva haaru nai kyauqu nriqiqaa vateqaro Evarahaamunranra kyuqema kyero tu quara ekyaa mpo mwatanaa mpo mwatanaahuqa mwi quava vahiarive tiro, Iesusi Karaisiva mwianra rieqaro uaqlama vura. Karaisiva uaqlama vurara tita, tire Karaisirara qutaa mwiva tiri kyaahaqa hiarivama variho turaro Kotiva nai mwanraqura tiriara mwihua nyinrenrave timwa kyero mwiva mate tiri nai mwanraqura timwihata vareta.

### *Kotiva nriqiqaa kyauqu vato quara tura*

<sup>15</sup> Ni kata pakyaa tuaavo, nkye nte tu quara ntapihi kye riaate tina, nte qumina quaqaa ntumwa kyena nkyi timwa nyinrenra. Vaisivanto nai qutuaninranra rieqaro qara vara kyero qara ntiqaro, Nte qutu quariro ni onta mwi vaisirarama tiraro varaarive, timwa kyero nai nrutuvata qara mwipi vatero variro qutu viharo mwia quavanto qio mwitaama vahiraro hiama qio mpovanto mwi quara hini qua qaqlira vara kyero kyaananro. Hiama mpovanto mpo quavata mwia quaqa mwaati tomaqa taananro.

<sup>16</sup> Mwia votima kyero Kotiva nai kyauqu nriqiqaa vatero Evarahaamunranra tiqaro, Nte iaravata e mwataterahuavarata rieqanama mwaa quara tuoq, tura. Kotiva hia tiqaro e mwataterahuave turave. Kotiva e mwatateravave tiqaro vaisi kuaiqiarama tiro. Karaisiva hia mwatani tumu entara Kotiva Evarahaamunranra e mwatateravave tiqaro Karaisirara tura.

<sup>17</sup> Nte tu quara mwia okyaravanto mwataamama vahiro: Kotiva Evarahaamunranra qua timwa tero kyauqu nriqiqaa vateqaro nte qutaa mwitaa hirerave tura. Kotiva mwi

quara tuvaro 430 ihi airi ihi nritarovaro mwiaqaatairo Kotiva nai mwaanra okyara Mosesira timwa mwunra. Nraakiara Mosesirara mwaanra okyara timwa to quava hiama qio hoqarero Evarahaamunranra tu quara nruka kyaananrove. Hoqarero Kotiva Evarahaamunranra tu quava qatima vahiananro.

<sup>18</sup> Kotiva hia nai Mosesira timwa mwiganro mwaanra okyara timwa to quarara rieqaro nraakye qora kyugema nyatarero uti varirave. Mwiva mwitaa hiankye titiri, haaru Evarahaamunranra tu quava qumina quama vahitiri. Kotiva hoqarero Evarahaamunranra tu quara mwi quarara rieqarora tiroma, nraakye qora kyugema nyatarero uti variro.

<sup>19-20</sup> Kotiva Mosesira timwa mwiganro mwaanra okyara timwa to quara mpo? Nanraqama Kotiva nai mwaanra okyara Mosesira timwa mwunrave? Nraakye qoravanto nkyiari qora kyaiqa okyara ntapihi kye taqaate tiro, Kotiva nai mwaanra okyaravata tomaqa kyero vatora. Nraakye qoravanto mwi okyarara riemwaqi vi varivaro nte tu vaisiva Evarahaamuva mwatarataariva qovarama quarive tiro, Kotiva ni mwaanra okyara nraahu riemwaqita quate tiro, tura.

Kotiva nraakye qora nai mwaanra okyara timwa nyinrenro mwataama kyero timwa nyinro. Kotiva mwi quara nyaamwunyaahua nraante timwa nyuvata mwiaqaatai mwihua Mosesira tumu timwa mwuvaro mwiaqaatairo Mosesiva mwi quara uto timwa nyunra. Kotiva Evarahaamunra qua timwa mwinrenra hiro hia vaisi mpo timwa mwinro tiqaro e uto Evarahaamunra timwa mwiante tiraitiro, Kotiva nai Evarahaamunra timwa mwunra.

*Kotiva mwitaa mwitaama rieqaro Mosesira timwa mwiganro nai mwaanra okyara timwa tora*

<sup>21</sup> Qutaa Kotiva nai vuni Evarahaamunranra tu quara nruka kyarerero Mosesira nai mwaanra okyara timwa mwunrave? Qaqao, hia mwitaa hurave. Kotiva Mosesira mwaanra okyara timwa mwunra hiama qio vaisi mpovanto mwi quara kyugema kyero riemwaqiro quananro. Vaisi mpovanto Kotiva Mosesirara mwaanra okyara tu quara qio riemwaqiro quanye titiri, Kotiva mwi vaisirara, E avuqavu nrohi variara vaisivave. E hia ekyaara qutu viraitira, e ekyaas enta qatima variqira vinanravema, titiri.

<sup>22</sup> Kotira mpukuqi hia mwitaa tiraitiro, mwataama tiro:

Qora kyaiqvanto ekyaas mpo mwatanaa  
mpo mwatanaahua ntumwaqu kyaihatara tita,  
mwihua ekyaas qora kyaiqa varaqi vi variarave, tura.

Nraakye qora ekyaas mwihua qora kyaiqa utuqi vi variarara tita, Iesusi Karaisirara qutaa mwivave qiariva, mwiva nraahuma qio variananro. Vaisivanto Karaisirara riemwaqiro quariva variraro Kotiva Evarahaamunranra nai nriqiqaa kyauqu kyo quava, mwi quava mwianima vahiananro. Kotiva mwi vaisirama kyugema mwafaanano.

<sup>23</sup> Vuni hia Karaisiva qovarama vu entara Mosesira mwaanra okyaravanto tiri rupa tovata variavananarama. Tire mwi quara nraahu riemwaqi viqata variavararo mwiaqaatairo Karaisiva qovarama vurama.

<sup>24</sup> Tire Karaisirara qutaa mwivave tiqata mwianra riemwaqi quararo Kotiva tiriqaa qua vahira taiqa kyero avuqavuma timwa taarive tiro, Kotiva Mosesira mwu quava tiriqaa ntaqikyiqiro vi varura.

<sup>25</sup> Karaisiva qovarama vihata tire mwianra kepukyaqama kye riemwaqi vi varunaranra tiro, mate Kotiva Mosesira mwu quava hiama tiriqaa ntaqikyi variro.

<sup>26</sup> Nkye Iesusi Karaisirara qutaa mwivave timwa kyeta mwianra riemwaqi vi variarara tita, nkye Iesusi Karaisiravata kuaaqi variqata Kotira nraaqiaraqama vita variavo.

<sup>27</sup> Nkye nramanri vareta mwiaqaatai Karaisiravata kuaaqi variavo. Nkye mwitaa hi variarara tiro, nkyi su nyaatovanto Karaisira vu nraato votima kyero vahira.

<sup>28</sup> Nkye Karaisirara qutaave qiahua hiama mpo qarama mpo qarama varita. Iutaavantove mpo mwatanaavantove, kyaiqa vaisivantove qumina vaisivantove, nraakyevantove vaisivantove, nkye Karaisiravata variqatara tita, nkye kuaa qarama nraahuma varita.

<sup>29</sup> Nkye Karaisiraniqama quarara tita, nkye Evarahaamunra nraaqiara variara. Kotiva nai kyauqu nriqiqaa vateqaro Evarahaamunranra e mwataterahua kyuqema nyataaninrave tu quara nkyiqi mwi quava vahirata nkye kyuqema kye varivara.

## 4

### *Kotira mwaaqu varunanranra tura*

<sup>1</sup> Mwi quara okyaravanto mwataamama vahiro. Nraaqiaravanto nraakiara ekyaa nai qova hiani inraikyara varaarivama variro. Qakyo mwi inraikyara vararero mwiva mate nraaqiararu variqaro nai qora kyaiqa vaisi nraantantamwa kyero qumina vaisima variro.

<sup>2</sup> Mwiva nraaqiara varirata mpo vaisinramwuvanto mwiaqaa ntaqikyiqi viqatama mwataama kyera kyaiqa varaante timwaqi viqatama nraamwutamaqita vivaro nai qova qio mwiva varaanarove qari entava nrintairaro mwi inraikyara varaanano.

<sup>3</sup> Mwia votima kyeta tirevata variavararo mwatanyaa qua okyaravanto tiri rupa tero tiriqaa ntaqikyiqiro vura.

<sup>4</sup> Mwitaamaqiro vuvaro Kotiva timwa to entava nri ntovaro Kotiva nai mwaaqu titovaro nraakyevanto mwia mwata tovaro mwivavata Mosesira mwaanra okyara riemwaqiro vura.

<sup>5</sup> Tiriara Mosesira mwaanra okyaravanto hia mwihua tutairata mwihua Kotira nraaqiara tuananra variate tiro, Jesusiva tiriara rieqaro qutu viro tiri huvantu kyora.

<sup>6</sup> Tire qutaaqama kye Kotira nraaqiara varurarora tiro, Kotiva nai mwaaqu mwanraqura tiri timwihanro mwiva tiri mwutukyaqi varihata varunanrama. Mwi mwanraqurava nai qorara, Ko, ni ko, qio ti varira.

<sup>7</sup> Kotira mwanraquravanto i mwutukyaqi variharara tira, e mwaa entara hia rupa tai vaisira votima kyera variaro. E Kotira mwaaqvanto variaro. E Kotira mwaaqu variananranra tiro, Kotiva nai mwaaqu mwi inraikyara ivatama mwiananro.

### *Poruva Karesiani varuhuara nronraqama kyero riora*

<sup>8</sup> Haaru nkye Kotirara hia rio entara unra mwanriqavanto nkyi rupa tero nkyiqi ntaqikyiqi varuvata nkye mwia kyaiqa vare varura.

<sup>9</sup> Mwaa entara nkye Kotirara ntapihi kye rieta. Qio kyai nte mwi quara ntapihikye qari: Mwaa entara Kotiva nkyiara ntapihi kyero rie variro. Mwaa entara Kotiva nkyiara kyuqema kyero rie varihata nanraqamave nkye mwia qaqlira kyeta haaruua okyara uqenrenro hia nkyi kyaahaqa hiani okyarara riemwaqi viqata mwi okyarava qaiqaa tiriqaa ntaqikyiqi vi variraqe mwia kyaiqa varaare ti variavo?

<sup>10</sup> Kotiva nkyi qamwata nyataarive tita nkye tiqata, Mwi entaraqaa nronra enta vahiraqe mwitaa mwitaa hirerave. Mwi toraraqaa mwitaa mwitaa hirerave. Mwi ihiraqi mwitaa mwitaa hirerave, ti variavo. (Nkye mwi quara mwi quara riarera hivarо mwi quava nkyi ntavaaqavu kyero nkyi rupama taananro.)

<sup>11</sup> Nkye mwitaa mwitaa hiare tita uti variara mwianra rieqana nte aatu huqo. Nte tauraa nkyiqi kyaiqa utu tauva quminave quananro?

<sup>12</sup> Ni kata pakyaa tuaavo, nte nkyiara nronraqama kye riena po tiqana nkye nte hunte hiatema tina. Nte Iutaa vaisivanto variqana Iutaa mwaanra okyara qaqlira kyena nkyi mpo mwatanaa votima kyena varura. Nkyevata ni nraantantamwa kyeta Iutaa mwaanra okyara hia riaata. Nkye hia haaru ni uaqlama matarera uti varura.

<sup>13</sup> Haaru ni nronraqama kyero niqapuvana nkyivata variqananra tina, nte Karaisira qua timwa nyiavata nkye rieta variara.

<sup>14</sup> Mwi entara ni nronraqama kyero niqavuvana variavata nkye hia mwianra nronraqama kye riaraitita, niqaa kepukyaqama kye ntaqikyiqi vi varurama. Nkye mwi entara nyaamwunyaa vaisi vitontema kyeta ni pitora. Nkye Iesusi Karaisira vitontema kyeta ni pitora.

<sup>15</sup> Mwi entara nkye nronraqama kye qamwateqata varura. Nataama kyaihatave nkye mwaa entara hia mwitaa hi varita? Qikye, nkye mwi entara ni kyaahaqa hirerata nkyeta vu vauru kye ni mpirerata utunte hi varura. Nte qutaaqama kyena qioma mwi quara nkyiara qianinra.

<sup>16</sup> Mate nte qutaa qua nkyi timwa nyuqata nkye mwia rieta nkye ni nramwutaaqamave vita?

<sup>17</sup> Mpo hia vaisihua nrumu nkyiara mwaanra quara rieqata nkyiara mwi quarara eo qiate tita, nkyiara nronraqama kye riemwaqi quahua nraantantamwa kye variqata mwihua unraqama kye mwitaa hiqata hia nkyi kyuqema nyatarera uti variara. Nkye ni qua qaqlira kyeta mwihua quara nraahu nronraqama kye riemwaqi quate tita, mwihua nkyi timwa nyi variara.

<sup>18</sup> Vaisi mpo ihua qutaaqama kye nkyi kyaahaqa hi varivera, mwihua qioma nkyiara nronraqama kye rievvara. Nte nkyivata variani entarave, hia nkyivata variani entarave, mwihua qioma mwitaa hivara.

<sup>19</sup> Ni nraaqiaranramwu tuaavo, nkye nte mwatatauhua votima kyetama variavo. Nkye kepukyaqama vita Karaisira nraaqiara variate tina, nte qaiqaa nkyi mwata kyarera atura ntuarintema kyenama niqapihana varina.

<sup>20</sup> Po, mate nte nkyivata variqana mwianra qiove qiataara. Nte nkyivata variqanavauma mpo qua qio qianinra. Nte mwaini variqana nkyiara nte mwihua nataamakyenave kyaahaqa hianinrave timwa kyeqana nronraqama kyena rie varura.

### *Poruva Evarahaamunra nraatatanaqaa ntumwa kyero tura*

<sup>21</sup> Nkye Mosesira qua okyara riemwaqita viqata mwia mwemwani varirera uti varihua nte nkyi kyapara hirera. Nkye mwi quara okyara qio ntapihi kyeta riaarave?

<sup>22</sup> Mwitaama tiro, Evarahaamunra mwaaku taaratana varura. Mwia nraata mpov-ant rupa to nraakyeva mwia mwaaku mpo mwata mwuvaro mwia nraata mpo qati varu nraakyeva mwaaku mpo mwata mwunra.

<sup>23</sup> Rupato nraakyeva nraakyeva qora nraaqiara mwataa okyarara mwiaqaa mwata tovaro qati varu nraakyeva mpo qarama mwatora. Kotiva Evarahaamunranra kyauqu nriqiqaa vatero tiqaro, E qoraisi nraaqiara mwata tenanrave, turqaatairo mwi nraakyeva qoraisi nraaqiara mwata tora.

<sup>24</sup> Nte mwi nraakyerara rieqana mpo quaqaa ntumwa kyena tirerave. Haaru Kotiva qua taaratana timwa torama. Rupato nraakyera mwia nrutu Hekaarira mwiaqaa ntumwa kyena qua tirera. Mwi nraakyeva varirero Kotiva qua mpo Sainai taaqiqaa variqaro Mosesira mwu quavama vahiro. Mwi nraakyeva mwi quavama variro. Hekaariva rupa to nraakyeva varurara tita, ekya mwia nraisi mwihuavata rupa tohua varura.

<sup>25</sup> Nte Sainai taaqi Arebia mwatani vahiraqaa qaiqaa mpo qua ntumwa kyena tirera. Taaqi mwia Hekaarivama. Ierusaremi mwatuqyaaqua qua ntumwa kyena tirera. Ierusaremi mwatuqyavanto Hekaarira nraisima variro. Ierusaremi mwatuqyani varihua variavaro Mosesira qua okyaravanto mwihua rupa taihata variarama. Mwihua Hekaarira nraisi votima kyeta rupa taihua variara.

<sup>26</sup> Ierusaremi mwatuqyavanto nyaamwunima vahiro. Mwi mwatuqyaraqaa ntumwa kyena qua tirerama. Mwi mwatuqyava vahirero mwiva qati vari nraakyeva Seraavama variro. Mwi mwatuqyava tiri tinrovama variro.

<sup>27</sup> Kotira mpukuqi mwianra mwitaama tiro:  
 Hia qioqama kyera nraaqiara mwataara nraakyeva  
 eraataqa variara nraakyeva qamwateqara variante.  
 E hia atura ntqiara nraaqiara mwataarava  
 qamwateqara ihi timwaqira quante.  
 Vaati vataa nraakyevanto hia airi mwatairara  
 e mwia nraatara kyera i qaqira kyai nraakyeva  
 variqara airi nraaqiara mwatenanrave, tura.

(Aisaiaa 54:1)

<sup>28</sup> Ni kata pakyaa tuaavo, Kotiva kyauqu nriqiqaa vatero Evarahaamunranra e  
 nraaqiara mwatenanrave turaqaatairo Aisaakira mwata tora. Nkyevata Kotiva nai  
 kyauqu nriqiqaa vatero turaqaatai Evarahaamunra nraaqiara variara.

<sup>29</sup> Mwi entara mwaaqu mpo qati mwata tova, Isamairiva variqaro Kotira mwan-  
 raquravanto kyaahaqa huvaro mwata tora Aisaakira uaqiamma mwate varura. Mwaa  
 entaravata tire Kotira mwanraqura varaurahua varurata Mosesira mwaanra okyara  
 riaahua tiri uaqiamma timwa tarerata uti variara.

<sup>30</sup> Qio Kotira mpukuqi nanra quave mwianra tiro? Mwitaama tiro:  
 Rupatai nraakyera titairaro nai nraaqiarantiri quarive.  
 Mwia nraaqiara mwiva hia nai qova hi inraikyara  
 varaariva variho.  
 Qati vari nraakyera mwia mwaaqvantoma  
 nai qova hi inraikyara varaananrove, tura.

(Okyara 21:10)

<sup>31</sup> Ni kata pakyaa tuaavo, mwia nraantantamwa kye hia tire rupa tai nraakyera  
 nraaqiara varunanrave. Tire qati vari nraakyera nraaqiara nraahu varurahuama  
 varuro. (Mosesira mwaanra okyaravanto hia tiri rupa taiho. Karaisira quavanto  
 tiriqaa ntaqikyi variho.)

## 5

### *Nkye qaiqaavata rupa vivorave tura*

<sup>1</sup> Tiriara hia rupavita variraitita, qati variqata nrohiate tiro, Karaisiva tiri huvantu  
 timwa taira. Nkye qatinani varia nraakyе qorahua variqatama hiama kyaivaro  
 mpovanto nkyi qaiqaa rupa taarive.

<sup>2</sup> Nte Poruva nkyi timwa nyianinra riaata. Nkye tiqata, Iutaa mwaanra okyara  
 rie variarata tiri mwamwanta toqa kyaivae tire qio variare tivorave. Nkye mwitaam  
 tivera, Karaisiva hiama qio nkyi kyaahaqa hiariva variananro.

<sup>3</sup> Nte qaiqaa kepuqyaqama kye nkyi timwa nyinrenrave. Vaisivanto tiqaro, Kyai  
 nte Iutaa mwaanra okyara hini nraahu tutena ni mamanta toqa kyaani okyarara  
 tuqina quankye, tirera mwi vaisiva hia hini mwi quara nraahu tutairaro ekyaa  
 Mosesira mwaanra okyaravantovata mwia ntumwaqu kyairaro mwiva ekyaa mwi  
 quara tutaariva nraahuma variananro.

<sup>4</sup> Nkye tiqata, Kotiva avuqavuma timwa taarive tiqata Mosesira mwaanra okyarave  
 Iutaa mwaanra okyarave riemwaqi virerave, tivera, nkye Karaisiraqaatai ntuvaihaa  
 vita nkyetaraama varivara. Nkye mwitaama varivaro hiama Kotiva nkyiara po timwa  
 nyatero nkyi kyuqema nyataananro.

<sup>5</sup> Kotira mwanraquravanto tiri kyaahaqa ihata tire Karaisirara riemwaqi vi varu-  
 rahuama. Tire mwitaamaqi viqata Kotiva tiri avuqavuma timwa taani entara  
 vekyama varita.

<sup>6</sup> Tire Iesusi Karaisiravata varunanranra ti, tiri mwamwanta toqa kyaarivave,  
 hia toqa kyaarivave, mwi okyarava hiama tiri mpo qarama timwa taananro. Tire  
 Karaisirara riemwaqi viqata mpohua mpohuara mwutukya vahiraqe variarava, mwi  
 okyaravama tiri kyaahaqa hiananro.

<sup>7</sup> Tauraa nkye kyuqema kye nrohi variavaro tava nkyi antua kyaihatave nkye uaqama vita qutaa qua qaqlira kyeta nrohi variavo?

<sup>8</sup> Kotiva nkyi nyaanramataiva hia mwitaa tihata nkyetavanto api nrohi variara.

<sup>9</sup> Qua mpovanto mwitaama tiro: Taupataariva uapaiqavanto qamaa vitiqaa vahirera, qamwanramama qamaa ekyaa mwiva ntenra quananrove, tura.

<sup>10</sup> Qio nkyevata ntevata Karaisiraqi kuaa mwihua varurahuama. Mwianra rieqanama nte nkyiara mwutukya qihakyama kye mwitaama kye nkyiara riaaninra. Nkye nte qiani quarara qutaa quave timwa kyeta mpo qua hiama qio riemwaqi vivaravema, qianinra. Nai ta vaisivave nkyi api qua timwa nyi vari vaisira, mwia Kotiva nai quaqaara mwiaqaa qua vataananrove.

<sup>11</sup> Ni kata pakya tuaavo, nte Karaisira qua mpohua mpohua timwa nyiqana nte hia vaisi mwamwanta toqa kyaatera turavauma iho. Nte mwi quara qiankye tutiri, hiama vaisi mpo hiahua ni uaqama mataatiri. Hia nte mwi quara tura kyaaravauma Iutaa vaisivanto ni uaqama mateta. Nte mwamwanta toqe okyararavata nraakye qora timwa nyianritavauma Iutaavanto nianra qamwateqata hia ni uaqama matevara.

<sup>12</sup> Qikye, nkyiara api qua tqata nkyeta mwamwanta toqa kyaate ti variahua, mwi vaisihua nkyiari tamwa ekyaara iti kye qaqlira kyaivaqe nte huviarave qiataara.

<sup>13</sup> Ni kata pakya tuaavo, nkye hia rupa viraitita, qatinani nrohiate tiro, Kotiva nkyi nyaanrama taira. Nkye hia rupa vi variraitita, qatinani nrohiqa varia nraakye qorahua nkye haunri tqata, Kyai tire haaru qora kyaiqa varaataa hi mwutukyaraqo uaqia hi kyaiqara utuqita quare, tivora. Nkye qatinani nrohiqata varia nraakye qorahua variqata nkye nanrianra nanrianra mwutukya vahirata naini naini kyuqe kyaiqa nraahu varaqita quata.

<sup>14</sup> Nte Kotiva Mosesira mwu quara, ekyaa mwi quara varakye kuaiqiaqa vataariro mwia okyaravanto mwitaama qiananro:

Nkye nkyetara mwutukya vahirata variantema kyeta

nkye nkyeta henahuaravata

mwutukya vahirata variatema, qiananro.

(Wok Pris 19:18)

<sup>15</sup> Nkye hia mwitaa hiraitita, nkye quara vairi votima kyeta variqata inronra hita ntiqua ntari hiqata varivora. Nkye mwitaamaqi viqata nkyeta taiqa vivora.

### Aanra kyuqeraqaa nrohirara tura

<sup>16</sup> Nte nkyiara mwitaama tina: Nkye aanra kyuqeraqaa nrohiqata nkye Kotira mwanraqurara aanra tinraamwutairaque nrohiare qiate. Nkye mwitaamaqi vivera, hia nkyeta haaru qora kyaiqa varaataa hi mwutukyava qora kyaiqa vare varira varevarave, tuqo.

<sup>17</sup> Tita haaru qora kyaiqa varaataa hi mwutukyava vare vari kyaiqava mpo kyaiqa vaharo Kotira mwanraquravanto vare vari kyaiqava nai nraahumwa mpo kyaiqama vahiro. Mwitanahua nramwutaa variarara tita, tire hiama qio teta kyuqe kyaiqa varaataa hianinra varaanana.

<sup>18</sup> Kotira mwanraquravanto nkyi sitaqiro nkyi aanra nyaamwutairera, nkye qiomia Kotira kyaiqa varaqi vi varivaro hiama Mosesira qua okyaravanto nkyiqa ntaqikyiqiro quananro.

<sup>19</sup> Nkye haaru qora kyaiqa varaataa hi mwutukyava vare vari kyaiqara mwia ntapihi kyaara. Mwataamama vahiro. Api qaraqita nrohirave, nraakye qora nanrianra nanrianra ua vu nraato tqata api nte tutiqe hirave, nkyiari mwamwanta hia kyotataqama kye vate okyararave,

<sup>20</sup> unra mwanriqa nrutu tuaahererave, haaqa quaakyaravata tuhi quaativata utirave, nramwutaaqa hirave, ntaqirave, mpohua nunu naanunrama nyateta kyaruntumwa nyaterave, raraqa taaninrave, nkyiari nyutu nraahu tuaahererave, inronra hita tukyama vita nkyiariara nkyiariara varivave,

<sup>21</sup> mpova hi inrakyarara mwutukya ntirave, uera nramanri nramwa kyeta ueraqa hirave, ntuaantua hiaraqaatai ueraqama vita qua aakyara nteta api qua api qua ti variarave, ekyaa mwi kyaiqara haaru qora kyaiqa varaataa hi mwutukyava uti vari kyaiqarama vahiro. Nte tauraa nkyi timwa nyunteema kyena qaiqaavata nkyi timwa nyinrenra: Mwi kyaiqara mwi kyaiqara utihua hiama Kotira mwatukyaqi vivarave, tuquo.

<sup>22</sup> Qio Kotira mwanraquravanto hia mwitaama kyero kyaiqa varaqiro virave. Kotira mwanraquravanto nraakye qoraqaa ntaqikyiqiro vi variraro mwaa kyaiqava mwaa kyaiqavama qovara hiananro. Mpohuara mwutukya vahiarivave, mwutukyaqitairo qamwataarivave, mwutukyaqitairo qihaakya hiarivave, hia qamwanrama kyero raraqa tairaro qihaakyamaqiro quarivave, mpora kyaahaqa hiarivave, ntapihi kyero nrohiarivave, nai vaative nai nraatarave mwianra nraahu riemwaqiro quarivave,

<sup>23</sup> hia nai nrutu tuaaheraarivave, uaquia hi kyaiqara utuankyo tiro nai mwamwantqa kyuqema kyero ntaqikyiarivave, ekyaa mwi kyaiqava Kotira mwanraquraqatairo qovara hirama. Vaisivanto mwi kyaiqara nraahu varaqiro virera, hiama mpo quavanto mwia antuataanano.

<sup>24</sup> Tire Karaisiraniqama vurahuama. Haaru tiri qora kyaiqa varaataa hi mwutukyava kepukyaqama kyero qora kyaiqa vararero uti varuvaro qora kyaiqa mwianra nraahu mwia mwutukya vahura. Tire mwi mwutukyara vara kyeta Iesusira ruto kyatariraqaa ekyara ru taiqa kyaunanrama.

<sup>25</sup> Tire ekyara qutu vurahua votima kyeta varuraro Kotira mwanraquravanto tiri qaiqaa qati vara sivima kyaihata qati variqi vunanranra tiro, Kotira mwanraqura mwiva nraahu tiriqaa ntaqikyiqi vi variqe tire mwia kyaiqa nraahu varaqi quananra.

<sup>26</sup> Tire tetara vaisi nronra varuro qiarora. Nkyeta nanrianra nanrianra raraqa taani quara tivora. Tire mpovanto kyuqema kyero kyaiqa varaaninrave, mpo inraikya vataaninranra rieqata hia mwia kyaruntumwa mwataara.

## 6

### *Tire nai kyaahaqa hi nai kyaahaqa hiqata muaanra varaqi quare tura*

<sup>1</sup> Ni kata pakyaa tuaavo, nkyiqitairo vaisi mpovanto aanra kyuqeraqaa quariva uaquia hi kyaiqara utu kyairata hia mwi vaisira qaqlira kyaata. Nkye kyuqema kyeta Kotira kyaiqa vare vaisihua variqata nkye qihaakyama kye mwi vaisira kyaahaqa hivarо mwiva uro ntantero Kotira aanraqaa ntapihi kyero quari. Saataaniva nkyiara qora kyaiqa utuate tiro nkyi kuaiqia kuaiqia sataqiro quankyora, nkyevata rauriqata variata.

<sup>2</sup> Muaanravanto vahirera, nkye nai kyaahaqa hi nai kyaahaqa hiqata mwi muaanranra varaqi quata. Nkye mwitaamaqi vivera, nkye Karaisiva vatai quara quetaaqama kyetama riemwaqivi vivara.

<sup>3</sup> Vaisi mpovanto nanrianra tiqaro, Nte nronra vaisima varuqo, tirera, mwi vaisiva nai unrama qiananro.

<sup>4</sup> Nkye kuaiqia kuaiqavanto nkyeta kyaiqa kyuqe kyaiqave qora kyaiqa vahianinra tukyama kye taqaata. Vaisivanto nai kyaiqa tukyama kye taqairaro kyuqe kyaiqa vahirera, qiomia mwiva nanrianra tiqaro, Nte kyuqe kyaiqa vare varuqo, qiananro. Mwiva haunri mpora kyaiqa tukyama kye taqero mwia kyaiqavanto uaquia iharo ni kyaiqavanto kyuqe iho qiankyora.

<sup>5</sup> Hia mpora kyaiqara nronraqama kye riaata. Nkyeta kyaiqa vareqata mwia muaanra nkyeta varaqi quata.

<sup>6</sup> Nkye Kotira qua ntapihi kyeta riaate tiro, vaisi mpovanto mwi quara nkyi timwa nyiani vaisira nkye mwia kyaahaqa hiqata nkyeta kyuqe inraikya vatera mwi vaisiravata ntainra kye mwiata.

<sup>7</sup> Nkye Kotirara api qua tivora. Nkye unra qua tivera, Kotiva hiama nkyi unra quara qutaa quave qiananro. Vaisivanto nanra kyarave vara tutaaninra nraakiara nai mwi kyararama vantu kyero nraananro.

<sup>8</sup> Mwia votima kyero vaisivanto nai mwutukyavanto api varaani kyaiqara varaqiro virera, mwiva nraakiara qutuani inraikyarama varaananro. Vaisivanto Kotira mwanraquravanto varaani kyaiqara nraahu varaqiro virera, nraakiara Kotira mwanraquravanto mwia kyaahaqa hiraro ekyaa enta qati variqiro quananro.

<sup>9</sup> Nkye mwi quara rieqatama haunri nkye kyuqe kyaiqa varaqi vivaro nkyi pupohaarivaara. Hiama vaisivanto kyara vara tutero mateqa mwia vantuqiro nraananro. Mwiva kyara vara tutero variqiro viraro kyaravanto keko tiraroma varaqiro nraananro. Mwia votima kye tire mate hia qoriri hiraitita kyuqe kyaiqa varaqi vivita nraakiara mpo enta tire kyuqema kye Kotiravata variqi quananra.

<sup>10</sup> Mwianra rieqatama tire taqaararo vaisi mpo kyaahaqa hiara aanrava vahirera, varaiqa mwi vaisira kyaahaqa hiara. Tire ekyaa nraakye qora mwihua kyaahaqa hiaragua variqatavata Iesusira nraaqiara variahua, mwihua mpoqivata kyaahaqa hiara.

### *Poruva ekyara qua tura*

<sup>11</sup> Nkye mwaa taqaata. Nte nkyiara rieqana ntena kyauquqo nronraqama kyenama qara ntumwa tena.

<sup>12</sup> Nanraqamave vaisi mponramwuvanto nkyi mwamwanta toqarerata kepukyaga hi varita? Mwihua tiqata, Mpo hihua tiri qamwata timwa taate, tiqata nkyi mwamwanta toqarerera uti variara. Mwihua tiqata, Tire kyatariqaa rutova Karaisiva, tiri kyaahaqa hiarivave qiarata Iutaavanto mwi quara kyaara tiri uaqiamma timwa tevorave, ti variara.

<sup>13</sup> Mwitaa ti variqata mwihua mwamwanta toqa kye okyarara nraahu nronraqama kye riemwaqi viqata Mosesira mwaanra okyara mpo qua qaqira kyeta hia mwi quaravata riemwaqi vi variara. Mwihua nkyiari mwahuta tiqata nkyiara mwitaama tivara. Tiri qua rietama nkye nkyeta mwamwanta toqa kyaahuave, tivara.

<sup>14</sup> Mwihua nkyiari nyutu tuaahererera utuavanavata nte hiama ntena nutu tuaahere varina. Nte kyatariqaa ruto vaisira Iesusi Karaisira tiriqaa ntaqikyi vari vaisira nrutu nraahuma tuaahereqana varina. Karaisira kyatariqaa rutovaro qutu vurara tina, nte mwia vatama kye qutu vuvama varina. Nte qutu vuva votima kyena varuqarora tiro, mwatani vahi inraikyava hiama qio ni tu varaananro. Hia nte mwatani vahi inraikyarara ni mutukya ntihana varuqo.

<sup>15</sup> Mwamwanta toqa kye okyaravave, hia mwamwanta toqa kye okyaravave, mwi inraikyava qumina inraikyama vahiro. Tiri vu nraato mwutukyavanto qaraakyaqama quani okyarava, mwi inraikyavama qutaa inraikya vahiro.

<sup>16</sup> Vu nraato mwutukyavanto qaraakyaqama quarihua varivaro Kotiva ekyaa mwihuara po tiro kyuqema nyatairata mwihua mwutukyaitaro qihakya hi varirata varivara. Mwi nraakye qorahua qutaa Kotira nraakye qora Isareris nraakye qoravantom varivara.

<sup>17</sup> Nte ntena qua taiqa kyarera hina mwitaama tina. Nte Iesusira kyaiqa vare varuqata mwia kyaara ni ntutuqata teqataava nrumwaanravanto ni mamantaqa qati vahirara tita, nkye nivata inronra hivora.

<sup>18</sup> Ni kata pakyaa tuaavo, tiri vunyaa vaisi Iesusi Karaisiva nkyi ekyaa mwihua kyuqema nyataarive. Qutaave.

## EPESAASI

### Poruva Epesaasiqinaahuani qara vara kyora

Iesusira ru kyovaro qaiqaa qati siviro nyaamwuni uro varuvaro 30 ihive nritarovaro Poruva karavuqi variqaro mwaa quara qara ntumwa tora. Poruva Epesaasiqi varuhuavata mpoqi mpoqi varuhuavata Iesusira peqa okyara ntapihi kyeta riaate tiro, Poruva mwaa quara qara ntumwa tora. Karaisiva mwihua kyuqema nyatorara tita, mwihua mwianra rieqata Karaisira qua riemwaqi viqata aanra kyuqeraqaa nraahu nrohivama vaiho timwa kyero Poruva qara ntumwa tora.

<sup>1</sup> Nte Poruvama. Kotiva nai kyakya hiraqa ni nronraqama kyaihana nte Iesusi Karaisira qua nraakyе qora timwa nyi varuvama varina. Nte nkye Kotira nraakyе qoravanto Epesaasini variahua Iesusi Karaisirara nraahu riemwaqi quahua nte nkyinima mwaa quara qara ntumwa tena.

<sup>2</sup> Tiri tiqova Kotivavata, tiri vunyaa vaisi Iesusi Karaisivavata, nkyi kyuqema nyatairaro nkyi mwutukyavanto qilhaakya hirata variata.

#### *Kotiva tiri kyuqema timwa taaninranra tura*

<sup>3</sup> Nrivaqe Kotira tiri vunyaa vaisi Iesusi Karaisira qora nrutu tuaaheraqi quara. Tire Karaisiravata kuaaqi varunanranra tiro, Kotiva tiri kyuqema timwa teqaro tiriara Kotira aanraqaa viqata mwia kyaiqa varaate tiro, mwiva ekyaa nyaamwunyaay kepuqya tiri timwinra.

<sup>4</sup> Haaru hia mwata mwaavata ututo entara Kotiya tiriara mwihua Karaisiravata variqata hia mwihuaqa qua vahirata kyotataqama kye ni puqaa variate tiro, tiri nai kyaama tora. Kotira mwutukyavanto tiriara vahirora tiro,

<sup>5</sup> mwiva haaru tiri nai kyaama tero tiriara tiqaro, Nte Karaisira kyaiqara rieqana mwihua sita kye vataarita mwihua ni nraaqiara variate, tura. Kotiva nai kyakya horaqa qio nte mwitaa hiangkye timwa kyero mwitaa hura.

<sup>6</sup> Kotiva hia tiri kyoqaara nyaanru hiraitiro, nai mwaauq nai mwutukya nti nraaqiarara tiri timwunranra tita, varavaqe mwia nrutu tuaahereqa Kotirara e tiri kyuqema timwa taaravave timwaqi quara.

<sup>7</sup> Qikye, Kotira mwutukyavanto tiriara mpoqiyavata vahiraro tiri kyuqema timwa taiharo Karaisira nraanre rauruvaro qutu vurara tiro, Kotiva tiri uaqia hi quara nruka timwa taihata tire qatinani huvantu vita varunanra.

<sup>8</sup> Kotira mwutukyavanto mwitaama kyero tiriara mpoqiyavata vahirora tiro, mwiva tiri kyuqe vu nraato timwhihata tire mpo okyara mpo okyara qio ntapihunana.

<sup>9</sup> Haaru Kotiva variqaro Karaisiva nraahuma ni mutukya vahi kyaiqara vara mataananrove timwa kyero nai vararerera hi okyarara tuqeta taira, mwi quara mwiva qovarama kyaihata tire riaunana.

<sup>10</sup> Qua mwia qovarama kyaiva mwi quava mwitaamama vahiro: Nraakiara mpo enta Kotiva nte mwitaa hirerave qiai entava nri ntairaro Kotiva nyaamwuni varihuavata, mwatani varihuavata, hisai hisairo ntuvaantuama tero Karaisira nronraqama kyairaro Karaisiva ekyaa mwihuaqaavata, ekyaa inraikyaqaavata, ntaqikyiqaro vunima varianano.

<sup>11</sup> Nraakiara Karaisiva vuni variqaro ekyaa inraikyaqa ntaqikyi variraqe tire Iutaavanto Karaisiravata variararo Karaisiva nai hiani inraikyara tirivata tukyama kyero timwianano. Tire Iutaavanto Karaisiravata variate tiro, Kotiva haaru tiri nraante nai kyaama tora. Kotiva kepuqyavanto varivara tiro, mwiva qiai quava mwivauma vahianano.

**12** Kotiva tiriara mwitaama kyero timwa taihatara tita, tire Iutaavanto nraante Karaisirara tiri kyaahaqa hiarivama variho timwa kyeta Kotira nrutu tuaahere varunanra.

**13** Nkye mpo mwatanaa mpo mwatanaahua nkyevata qutaa qua Karaisira qua rieta qutaave tiqata nkyevata Karaisivavata kuaaqi variara. Kotiva nai nriqiqaa kyauqu vato quarara rieqaro nai mwanraqura nkyi nyinra. Nkyi ntenga kyaama tauqo timwa kyero mwi quava kepuuyaqama quarive tiro, nai mwanraqura nkyi nyinra.

**14** Kotiva nai mwanraqura tiri timwinranra tita, tire ntapihi kyauraro mwiva nraakiara ekyaarama tiri huvantu timwa tairaqe variananra. Mwianra rieqatama varaivae Kotira nrutu tuaaheraara.

### *Poruva Kotirara aakyara nteqaro tu quara*

**15** Nte riauqata nkye tiri vunyaa vaisi Iesusi Karaisirara kepuuyaqama kye rieqata Kotira nraakye qorara mwutukya vaihata variarara tina,

**16** nte nkyiara rieqana Kotirara mpo enta mpo enta kyuqeve tiqana nkyiara rieqana Kotirara aakyara ntaura.

**17** Kotiva tiri vunyaa vaisi Iesusi Karaisira qova variharo mwia okyaravanto kepuuya okyara vahirama. Kotiva mwitaama varirara tina, nkyiara mwihua Kotira okyara anoma kye taqamwaqita quate tina, nte Kotirara aakyara nteqanama mwihua su nyaato kyuqema nyateqara ena qua okyara qovarama nyataante ti varura.

**18** Nkye nraakiara kyuqema kye variqi quate tiro, Kotiva nkyi nyaanrama taira. Nkyi su nyaatovanto ntapihi virata mwi quara ntapihi kye rieqata mwi entara vekya variate tina, nte Kotirara aakyara nteqana varura. Kotiva nai nraakye qorara rieqaro mwihua kyaama tai inraikyava, mwi inraikyava nritarero nai mpoqaraa inraikyama vahiro. Kotiva qihakyma nyataani okyara nkye mwianra riaate tina, nte Kotirara aakyara nteqana varura.

**19-20** Kotira kepukyavanto nritarero mpovatama vahiro. Tire Karaisirara qutaave timwa kye mwianra kepuuyaqama kye riemwaqi quananranra tiro, Kotiva nai kepuuya tiri timwianrivama variro. Nkye mwi quaravata ntapihi kye riaate tina, nte Kotirara aakyara nteqana varura. Kotiva kepuuyaqama kyero Karaisiva qutu vuraqitairo qati vara sivuma kyero nyaamwuni nai kyauqu kyaatutani vitaqiro uro kyora. Kotiva kepuuyaqama kyero Karaisira kyaahaqa hintema kyero tirivata kyaahaqa hiarivama variro.

**21** Karaisiva Kotira nraaqani mwia kyauqu kyaatutani mwatakyaa viro variqaro mwiva nritarero ekyaa inraikyaa ntaqikyiqaro, mwiva ekyaa nyaamwuni vunqama vita variahuaqaa ntaqikyiqaro, mwiva ekyaa nronraqama quahuaqaave, ekyaa nronra vaisiqaave, ekyaa nrutu nronra vataahuaqaave, ntaqikyiqi varivama variro. Mate mwaa entaravata nraakiaravata mpo nrutu mpo nrutu nronra nrutu vataahua varivaro Karaisira nrutuvanto mwihua nyutuvata nraatara kyero vahiananro.

**22** Kotiva Karaisira nronraqama kyero ekyaa inraikya vara kyero Karaisira mwemwani vataiharo mwiva vunyavaa nronravanto variqaroma tiri Kotiva nraanrama tai nraakye qorahuaqaa ntaqikyiqi variro.

**23** Karaisiva tiri qiata votima kyero varihata tire mwia mwamwanta varunanra. Tire Karaisira mwamwanta varuraro Karaisiva ekyaa tiriqi kyuqinra viro variharo ekyaa inraikya piqe variva Kotiva mwiva Karaisiraqi piqa kyero variro.

<sup>1</sup> Nkye hia Iutaa mpo mwatanaahua nkye haaru Kotira qua nteqa kyeta qora kyaiqa nraahu uti varuvarora tiro, nkyi su nyaato mwutukyavanto hia Kotirara riaraitiro qutu vuvata varura.

<sup>2</sup> Mwi entara nkye mwatanyaa qua okyara riemwaqi vi varuvaro vaana nyaamwu mwaa sata variahua vunyaava nkyiqa ntaqikyi varura. Mwi vaanava Kotira qua nteqa kye variahuaqaa ntaqikyi varivama variro.

<sup>3</sup> Tire Iutaavantovata qora kyaiqa vareqata Kotira qua nteqa kye variavanana. Mwi entara nkyevata tirevata quara vairi votima kye nrohiqata teta tivu nraatoqi api inraikya varaananra mwianra nraahu riemwaqi nrohiavanana. Mwi entara tita mwutukya vahu kyaiqara nraahu varaqita quavanana. Mwi entara tire ekyaa hini mpo mwatanaahua mwihua nraantanteta variavararo tiri tivu nraatovanto uaqia hi kyaiqara utuarava nraahu vahuvaro mwia kyaara Kotira raraqa tovaro tiri ruataara hia tiri rura.

<sup>4</sup> Kotira mwutukyavanto tiriara mpoqiyavata vahuvaro hia tiri ntuqutiraitiro, tiriara po timwa timwatora.

<sup>5</sup> Tire qora kyaiqa utiqata Kotira qua, mpo qua mpo qua nteqa kyaavararo mwia kyaara tiri tivu nraato mwutukyavanto hia Kotirara riaraitiro, qutu vuvata variavararo, Kotiva Karaisira qaiqaa qati vara sivuma kyero tiriara mwihua Karaisiravata variate tiro, tirivata qati vara sivuma kyora. Riaate, Kotiva hia nkyi qaqlira kyaraitiro, Kotiva nkyi kyaahaqa hiqaro nkyi kyuqema nyatairara tita, nkye Kotiva nkyi huvantu nyataarihuama varita.

<sup>6</sup> Kotiva tiri Karaisiravata makye qati vara sivuma kyovara tiro, mwiva tiri nronraqama kyaihata tire nyaamwuni Iesusi Karaisiravata kuaaqi taaqauvi variqata ntaqikyiqi quarahuama varita.

<sup>7</sup> Nraakiara qovara ihua, mwihuavata Kotiva quttaaqama kyero kyuqema nyataani okyarara taqaate tiro, Kotiva Karaisiraqtairo tiri mwatani varurahua kyuqema timwa taira.

<sup>8</sup> Nkye Karaisirara quttaave qiavaro Kotiva hia nkyi qaqlira kyaraitiro, qatiqama kyero nkyi kyuqema nyatairara tita, nkye Kotiva nkyi huvantu kyero sita taihuama varita. Hia nkyita kyaiqaqaara mwitaama nyataraitiro, Kotiva nkyiara kyuqe hiqaro qatiqama kyero nkyi huvantu nyatairama.

<sup>9</sup> Tire hia Kotirani kyaiqa varauraro Kotiva qati tiri kyuqema timwa tero huvantu timwa tairara tita, hiama tire mpo inraikyara rieqata tire teta mwahuta qiarava vahiro.

<sup>10</sup> Tire Kotiva ututai nraakye qorahuama varita. Kotiva tiriara mwihua Iesusi Karaisiravata variqata kyuqe kyaiqa nraahu varaqi quate tiro, tiri utu tairama. Haaru Kotiva variqaro tire kyaiqa varaananra terama tairama.

### *Nkyevata tirevata Karaisiravata kuaaqi varunanranra tura*

<sup>11</sup> Nkye nkyeta okyarara taunru kyevora. Nkye hia Iutaa mwatanaa variraitita, nkye mpo mwatanaa variavo. Iutaa mwihua nkyiari nyamwanta toqa kyaahua variqata nkyiara hia mwamwanta toqa kyaahuave ti variarave. Nkye haaru varurara nraato tuata.

<sup>12</sup> Mwi entara nkye hia Karaisirara riaraitita, nkye nyianrasata varura. Mwi entara Kotiva Iutaave Isarerive mwihuara nraahu ni nraakye qorave tiqaro nkyiara mpo mwatanaave ti varura. Kotiva nai kyauqu nriqiqaa vatero Iutaara tiqaro, Nkyi ntena kyaama tau nraakye qorahua nte nkyiara mwitaa mwitaa hirerave, timwa kyero nkyiara hia mwi quara tura. Mwi entara nkye hia Kotirara tiqata, Mwiva mpo enta tiri kyuqema timwa taananrove, tiraitita nkye api variqi viqata hia Kotira kyuqe inraikya vekya varurave.

<sup>13</sup> Mwi entara nkye Kotira nyianrani varuhua mate mwaa entara Karaisiva nkyiara rieqaro nai nraanre rauru kyero qutu vihata nkye Karaisiravata kuaaqi variavaro Karaisiva nkyi sitaqiro nrumu Kotira nraaqani kyaihata variara.

<sup>14</sup> Haaru Iutaavanto mpo mwatanaahuavata nramwutaatana varuvaro mwihua utaqaa vasaamwunra votihuva antua kyovata nyianrasata varurave. Mwitaama varuvaro Karaisiva mwitanahua mwaateraqama variate timwa kyero, nrumu vasaamwunra ratora mwia ntukuraaqu kyaihata mwitanahua kuaaqi variara. Mwi quara okyara mwitaamama vahiro: Karaisiva nkyi mpo mwatanaahuaravata tiri Iutaaravata rieqaroma qutu vura. Karaisiva qutu viro nramwutaqa huna vasaamwunranra ntukuraa kyora.

<sup>15</sup> Karaisiva qutu viro Mosesira mwaanra okyara hia mwitaa mwataa hiate tu quara ekyaa taiqa kyora. Karaisiva vaisi qaraakya kuaiku ututarero mwiva ekyaa mpo mwatanaavata Iutaavata kuairama kyero mwitanahua vaisi kuaiku votima kye variqata nivata mwaateraqama kye variate tiro, qutu vura.

<sup>16</sup> Karaisiva qutu viro nraakyе qoravanto nramwutaqa hi varia okyarara taiqa kyora. Ekyaa mwi mwatanaahua kuaaqi kuairamavi varivaro Kotira hia raraqa tairaro kyuqema nyataarive tiro, Karaisiva kyatariqaa nraakyе qorara rieqaro qutu viro.

<sup>17</sup> Ekyaa nraakyе qora mwutukyaqitai qihaakya hi varirata mwaateraqamavi variqi quate tiro, Karaisiva nrumu mwakyaakya timwa nyiqiro viro. Nkye ekyaa Kotira nyianrani variahuvata, tire Kotira nraaqani varurahuavata, Karaisiva mwi mwakyaakya timwa timwinro.

<sup>18</sup> Karaisiva nkyi mpo mwatanaahuaravata, tiri Iutaaravata, rieqaro qutu vurara tita, nkyevata tirevata Kotira mwanraqura kuaa mwanraqura mwia nraahu vareta qioma tiri tiqova Kotiva varinani quananra.

<sup>19</sup> Mwi quava vaiharora tiro, mwaa entara Kotiva hia nkyiara mpo mwatanaave tiraitiro, Kotiva nkyiara ni nraakyе qorave ti varira. Nkyevata tire Iutaavata Kotira nraakyе qora kuaa nraakyе qorama varita.

<sup>20</sup> Nkyevata tirevata Kotira nraamwu voti hurahuama varita. Karaisiva nronraqama kyai vaisihuavata, poropeti vaisi Kotira qua qovarama kyaa vaisihuavata, mwihua nraante nraamwu tura rataara votima kyeta variarama. Mwihua mwitaama variavaro Iesusi Karaisiva puha utaqaa rataara votima kyeroma variro.

<sup>21</sup> Iesusi Karaisiva puha mwiva variharora tiro, nraamwu mwiva kyuqema kyero taaqau kyero hoqa taiva hia uaqama kyero vahiraitiro Kotira nraamwu kyotata nraamwuma vahiro.

<sup>22</sup> Nkyevata Karaisiravata kuaaqi variarara tita, nkye nraamwu mwia hiriraarave, umove, votima kyeta variara. Kotiva nai mwanraquravatama kyero nraamwu mwiqi variqiro vi varira.

### 3

#### *Poruva mpo mwatanaahuaci kyaiqa varorara tura*

<sup>1</sup> Mwianra rieqanama nte Poruva Iesusi Karaisiva ni rupa taihana varuva, nte nkyi mpo mwatanaahuara rieqana variqi vura.

<sup>2</sup> Kotiva ni kyuqema mateqaro nkyiara ni timwa mpiro, E mwihuaqi kyaiqa utuante, ti quara, nkye qutaa mwi quara riaarave iho?

<sup>3</sup> Kotiva nai uqeta tai quara qoqaa ni timwa mpohana nte haaru mwi quara pataqia timwa nyiqana nkyini qara ntumwa taavara.

<sup>4</sup> Nkye mwi quara kyaara ntqata nte Karaisirara uqeta taira qua okyara ntapihi kyaura nkyevata qioma ntapihivara.

<sup>5</sup> Haaru Kotiva hia mwi quara timwa nyuvatara tita, haaru varu nraakyе qorahua hia mwi quara okyara riora. Mwaa entara Kotira mwanraquravanto Kotira kyaiqa nraahu vare varia vaisihua Iesusira vaisi nronranramwuve, poropeti vaisive, mwi quara qoqaa timwa nyinra.

<sup>6</sup> Mwi quara uqeta taiva mwitaamama vahiro: Hia Kotiva Iutaa nraahu kyuqema nyatarerove. Mpo mwatanaa mpo mwatanaahuavata Karaisira quara quataave qiate tiro, Kotiva mwihuavata kyuqema nyatarero uti variro. Ekyaa mpo mwatanaahuavata Iutaavata kuaa vaisi varita kuaara mwamwanta nraahuma variyara. Kotiva nai kyauqu nriqiqaa vatero Karaisirara Iutaa timwa nyi quava, mwi quava mpo mwatanaahuqvatama vahiananrove, tiro. Mwi quara uqeta tai quava mwitaamama vahiro.

<sup>7</sup> Kotiva nai kepuuya ni mpiro ni kyuqema matero ni nronraqama kyaihana nte Karaisira qua nraakyе qora timwa nyiqi vi varura.

<sup>8</sup> Ekyaa Kotira nraakyе qoravanto virito variavana nte mwihua mwemwani varura. Nte mwitaa hu vaisiva varuqaro Kotiva hia mwianra nronraqama kyero riaraitiro, Kotiva nianra qamwata kyero kyuqema matero ni nronraqama kyero mpo mwatanaa mpo mwatanaahua Karaisira qua uro timwa nyiqanra Karaisiva mpo inraikya mpo inraikya kyuqe inraikya vataiva nkyi kyuqema nyataananrove quante, tiro.

<sup>9</sup> Kotiva ekyaa inraikya ututaiva haaru variqaro nai utuani okyarara uqeta tero variqiro viro mwiaqatairo nte mwi quara mwataama kyena qovarama kyarerave timwa kyero nianra mwi quara nraakyе qora timwa nyiqira quante tiro.

<sup>10</sup> Mwaa entara vuni variahua nyaamwunyaahua taqaavaro Kotiva nyaanrama tai nraakyе qorahua varirerata mwihua Iutaavata mpo mwatanaavata variarara tita, nyaamwunyaahua tiqata, Qikye Kotira vu nraatoqi kyuqe okyara mpo okyara mpo okyara vaiharo rie varivave, ti variara. Mwihua mwitaa qiate tiro, Kotiva nai uqeta tai quara qovarama kyero.

<sup>11</sup> Haaru Kotiva tiqaro, Nraakiara ekyaa mpo mwatanaa mpo mwatanaa nyaanrama kyena ntuvaantuuma taarita ni nraakyе qora varivarave, timwa kyero variqiro viro nai quavanto quataa mwivauma vahiarive tiro, Iesusi Karaisira titovaro Karaisiva tiri vunyaa vaisivanto Kotira kyaiqa varora.

<sup>12</sup> Mwitaa hurara tita, tire Karaisirara quataa mwivave timwa kyeta Karaisiravata variqata tire hia aatu hiraita, mwutukya qihakyama kyeqata Kotiva hinani qioma quanana.

<sup>13</sup> Nte mwi quara rieqanama nkyiara po kye tina nkyiara rieqana mwitaama tina, Nte nriqavi inraikyara vare varura mwianra hia nkyi mwutukyavanto uaquia hirata variate, tuqo. Nkyi nyutu tuaahereqanama nte nriqavi inraikyara varaqi vi varurave.

### *Poruva mwihuara rieqaro Kotirara aakyara ntora*

<sup>14</sup> Mwianra rieqana nte tori kyaata ntaqantaa kyena Kotira tiri tiqora nraanreqana varura.

<sup>15</sup> Kotiva tiri tiqova varihatara tita, ekyaa mwia nraaqiara nyaamwuni variahuaavata, mwatani variahuaavata, mwianra tiri tiqorave qiara.

<sup>16</sup> Kotira peqa okyaravanto mpo okyara mpo okyara vahirara tina, nte Kotirara aakyara nteqana nkyiara mwitaama tina, Kotio, ena mwanraquraqtaira mwihua mwutukya kepuuyaqama nyataante, ti varura.

<sup>17</sup> Nkye Karaisirara kepuuyaqama kyeta riemwaqi vivaro Karaisiva nkyi mwutukyaqi variqi quarive tina, nte Kotirara aakyara nte varura. Karaisiva nkyi mwutukyaqi varirata nkye mpohuara mwutukya vahirata variqata nkye kyatari kyuqeva nai tuqa paama tiharo mwataqi ratero vahintema kye nkye kepuuyaqama vita variate tina, nte Kotirara aakyara nte varura.

<sup>18-19</sup> Nkye mwitaama kye kepukya nraakye qora variqata mwiaqaatai nkye ekyaa Kotira nraakye qoravata variqata nkye qioma Karaisiva nkyiara mwutukya vataani okyarara taqevara.

Karaisiva nkyiara mwutukya vataiva mpoqiyavata vitarero, tumitarero, nronraqama kyero vahirara tiro, hiama qio qumina vaisi mpo vu nraatovanto mwi okyarara ntapihi kyaananro. Nkye mwi okyarara taqaate tinama, nte Kotirara aakyara nte varina. Nkye Karaisira mwutukyavanto nkyiara vahi okyarara ntapihi kye taqeta variqi vivaro Kotiva ekyaa kyaiqa vare variva nkyi su nyaato mwutukyaqi kepukyavanto variananro.

<sup>20</sup> Tire haunri Kotirara tiqata, Mwia peqavanto mwi kyaiqara mwi kyaiqara nraahuma qio varaananrove. Kotiva hiama qio mpo kyaiqa mpo kyaiqara varaananrove, qiarora. Kotira kepukyavanto tiriqi vahirara tita, tire mpo kyaiqa mpo kyaiqara riemwa kyeta Kotira kyapara hiararo Kotiva qioma mwi kyaiqara mwi kyaiqara vara timwa tero nai mpoqiyavata nritareroma mpo kyaiqa mpo kyaiqa vara timwa taananro. Kotira kepukyavanto tiriqi variharo Kotiva nronraqama kyero tiri kyuqema timwa taaninranra tita, mwia nrutu mpoqiyavata tuaaheraara.

<sup>21</sup> Kotira nraakye qora mwaa entara varihuavata, nraakiara varihuavata, mwihua Karaisiravata variqata Kotira nrutu tuaaheraqi ekyaa entara quate. Qutaave.

## 4

### *Tire Karaisira mwamwanta kuua mwamwanta varurahuave tura*

<sup>1</sup> Nte teta vunyaa vaisi kyaiqa vare varuqata mwia kyaara ni rupa kyaavana varura. Nte mwitaama variqana nte nkyiara vuavima kyena mwitaama tina, Qaraakya aanra kyuqeraqaa quate tiro, Kotiva nkyi nyaanrama tairara tita, nkye mwi aanranraqaa nraahu quate, tuqo.

<sup>2</sup> Nkye variqata tire qumina vaisi varurahuave timwa kyeta nkyeta vara mwataniqamaqita quata. Mpohuara qihakkyamaqita quata. Hia qamwanrama kye qoriri qaariri tiraitita, mpohua kyuqema kye kyaahaqa hiqata nkyi mwutukyavanto mwihuara vahianinra mwihua nyaamwutaata.

<sup>3</sup> Nkyiara kuaikuvanto variate tiro, Kotira mwanraquravanto nkyi vara taaqau tairave. Mwianra rieqatama haunri ntainra vita variarorave tita kepukyaqama kye kuaaqi kyuqema varirara riemwaqi quata.

<sup>4</sup> Tire Iesusi Karaisira mwamwanta kuaiqia nraahu varurahuama varita. Kotira mwanraqura kuaiqiyavanto nraahuma tiriqi variro. Kotiva nkyi nyaanrama taihata nkye Kotiva nkyi kyuqema nyataaninra mwia vekyaa nraahu varita.

<sup>5</sup> Karaisiva kuaiqiyantoma tiri vunyaa vaisivanto variro. Tire mwianra nraahu quataave timwa kyeta kepukyaqama kyeta riemwaqi vunanra. Tire mwia nramanri nraahu varauanra.

<sup>6</sup> Mwanriqa kuaiqiyantoma variro mwiva Kotiva ekyaa nraakye qora sova variqaro mwiva vunyavaa variqaroma mwihuqaqaa ntaqikyi variro. Mwiva ekyaa nraakye qora mwutukyaqi kyaiqa vare variqaro mwiva ekyaa nraakye qoraqi variqi vi varira.

<sup>7</sup> Tire kuaara nraaqiara variqata hia kuua kyaiqa mwia nraahu vare varunanra. Karaisiva tiri kuaiqia kuaiqiara mwi kyaiqara varaate mwaa kyaiqara varaate timwaqiro viqaro tiri kyuqema timwa taihata tire mpo kyaiqa mpo kyaiqa vare varunanra.

<sup>8</sup> Haaru Kotira mpukuqi Karaisiva varaani kyaiqarara mwitaama tiro:

Mwiva nyaamwuni tumu ntante viqaro  
rupa tehua airinti sitaqiro uro kyaananrove.

Karaisiva nraakye qora kyuqe inraikya  
mpo inraikya mpo inraikya tukyama kye nyiananrove,  
tura.

(Ihi 68:18)

<sup>9</sup> Karaisiva nyaamwuni tumu ntantero vurara tu quara mwia okyaravanto nataameve vahiro? Mwia okyara mwataamama vahiro. Karaisiva toharero nyaamwusairo tumuva tumitarero nai mwata vevani uto varura.

<sup>10</sup> Mwata mwaqaq tumu varuva nai kuaava mwiva nraahuma uro nyaamwuni variqaro ekyaa inraikyara rieqaro ekyaa inraikyaqaa ntaqikyi variro.

<sup>11</sup> Hini vaisivanto nronraqama vita vunyaa vaisivanto variate tiro, Karaisiva nai kepuuya mpo mwihua nyinra. Hini vaisiara nai qua timwa qovarama kyehua variate timwa kyero, nai kepuuya mpo mwihua nyinra. Hini vaisiara ni qua qaraakya mwatanaahua timwa nyiate tiro, nai kepuuya mpo mwihua nyinra. Hini vaisiara ni nraakye qoraqaa ntaqikyiqi viqata ni qua okyara timwa nyiqi quate tiro, Karaisiva nai kepuuya mpo mwihua nyinra.

<sup>12</sup> Mwihua Kotira nraakye qora terama taivata mwihua kyuqema kye Kotira kyaiqa varaqi viqata Karaisira mwamwanta variqata kepuuyaqamavi variate tiro, Karaisiva mwihua nai kepuuya mpo kepuuya mpo kepuuya nyi varirave.

<sup>13</sup> Tire Kotira kyaiqa varaqi viqata tire ekyaa kuaikuvanto variqata Karaisirara kepuuyaqama kye riemwaqi vivita uro tire Kotira mwaaqu okyara ntapihi kye taqaananra. Mwi entara hia tire mwanrunrunraqa hiara nraakye qorahua variraitita, mwi entara tire Karaisiva varintema kye kepuuya nraakye qorama variananra.

<sup>14</sup> Mwi entara hia tire nraaqiara pata votima kye variananra. Nraaqiara patavanto qamwanrama kyero mpo qua riero quataave timwa kyero mwiaqatairo qaiqaa uro mpo qua riero mwi quarara quataa quave tirave. Mwiva mwitaamaqiro vi varihata unra ti varia vaisihua unraqama kyeqata mpo qua mpo qua ti variavaro mwiva mwi quarara quataa quave ti varira.

<sup>15</sup> Hia tire mwitaa hiara nraakye qorahua variraitita, tire quataa qua nraahu timwaqi viqata tire nanrianra nanrianra mwutukya vahiraqe tire kyuqema kye nronra tuemwa vita tire teta qiata Karaisiravata taaqauvi kyuqema kye variara.

<sup>16</sup> Karaisiva tiri qiatavanto variqaro tiri nai mwamwantaqaa ntaqikyi variro. Karaisiva tiriqaa ntaqikyi variraqe tire mwia mwamwanta variqata tire kyuqema kye taaqau vita variara. Vaisi mwamwanta mpoqia mpoqia vahiva qio vaihoro vaisivanto nronra tuairave. Mwia votima kye tire Karaisira kuaaranivanto variqata tire teta kyaiqa mpo kyaiqa mpo kyaiqa varaqi viqata nanrianra nanrianra mwutukya vahiraqe variqi vita qiomma kepuuyaqama kyeta variananra.

### *Haarua aanra qaqlira kyeta qaraakya aanraqaa nrohiate tura*

<sup>17</sup> Mwi quara rieqanama nte Karaisira nrutu nteqana nkyiara kepuuyaqama kye mwataama tina. Kotira qua hia riaa nraakye qorahua qumina inraikyaraara nraahu nraatoqi vaihata riemwaqita vi variarave. Nkye hia mwihua variantema kye variqi quate.

<sup>18</sup> Enta hiraqi variva mwiva nraahu mwihua su nyaatoqi vaihata variara. Mwihua enta hiraqi kepuuyaqama kye variqata Kotira qua hia riarera uti variarara tita, Kotiva nraakye qorara qati variqi quate ti vari okyarara mwihua hia qio riarera uti variara.

<sup>19</sup> Mwihua uaqia hi kyaiqara utiqata kyauruataara vaihata mwihua hia kyauraitita, uaqia hi kyaiqara qati nraahu utuqi vi variara. Vaisi mpuara, nraakye mpuara, mwianra nraahu nronraqama kye rieta mwihua mpo kyaiqa mpo kyaiqa uaqia hi kyaiqara mwia nraahu utuqi vi variara.

<sup>20</sup> Mpovanto Karaisira okyara nkyi timwa nyuvata nkye taqovaro Karaisira okyaravanto vahirero hia mwitaama vahi okyarava vahirama. Karaisira okyaravanto hia uaqia hi okyarava vahirama.

<sup>21</sup> Karaisira qua quataa qua nkyi timwa nyiqi quarara tina, nte nkyiara ntapihi kye Karaisira okyara riaahuavema tuqo. Qio quataave nte tuqo?

<sup>22</sup> Nkye Karaisira nraaqiara variqata haaruaa vu nraato, uaqia hi kyaiqarara nraahu riemwaqi vi vari vu nraatora qaqla kyaata. Nkye haaru variqata nkyeta su nyaatoqi unraqama kyeqata mwaaqu kyaiqa nraahu vare varu okyarava nkyi taiqa kyarera uti varuvata varura.

<sup>23</sup> Nkye Karaisira nraaqiara variahuara tita, nkye haaruaa vu nraato qaqla kyeta qaraakya vu nraato vareta variqi quata.

<sup>24</sup> Nkye haaruaa vaisi qaqla kyeta qaraakya vaisima varuro timwa kyeqatama variata. Kotiva nkyiara mwihua avuqavuma kye nrohiqata ni kyaiqa nraahu varaqi viqata ni votima kyeta variate tiro, nkyi qaraakyaqama kyero utu taira.

<sup>25</sup> Nkye mwi quara rieqatama mpohua unra ti okyarara qaqla kyaata. Tire Karaisira kuaa mwia nraaqiara varita mwia mwamwanta kuaa mwamwanta varurahuara tita, nkye outaa qua nraahu nai timwa mwi nai timwa mwi hiata.

<sup>26</sup> Mpo qua kyaara nkyi raraqa tairata, hia nkye tiri raraqa taiho timwa kye mwaaqu kyaiqa varaata. Nkyi raraqa tairata mpuahaama variqi vivaro huari vu vikyaarivaarave.

<sup>27</sup> Qamwanrama nkyi sikuokyavanto qihaakya hirata variata. Haunri nkyi raraqa tairata mpuahaama variqi vivaro Saataaniva nkyiqi uaqia hi kyaiqara vara vataari-vaarave.

<sup>28</sup> Nkye mpuara uti variani vaisirara mwitaama qiata: E Karaisira nraaqiara vari-nanranra rieqara mpuara varenanra qaqla kyaante. E qaqla kyera ena kyauquqo kyaiqa varaqira quante. E mwitaamaqa viraro qiomma ini mpo inraikya vahirara e vehi nraakyne qora kyaahaqa hinanrave, qiata.

<sup>29</sup> Uaqia hi quava nkyi nyogitairo qovara hiankyora. Nkye kyuqe qua nraahu timwaqi vivaro nkyi quavanto mpohua kyaahaqa hirata mwihua kyuqema kye variata.

<sup>30</sup> Kotira mwanraquravanto nkyi utaqi varira mwia muaanra inraikya mwivore. Kotiva nkyi nai kyaama teqaro nai mwanraqura nkyi nyinra. Kotiva nai mwanraqura nkyi nyinranra tita, nkye ntapihi kyaavarao Kotiva ekyaara entaqaa nkyi qatinani huvantu kyaarivama variro.

<sup>31</sup> Kyarunti okyaravave, raraqa te vari okyaravave, mauqa ntamwa kye inronra hita quaaru ti vari okyararave, mwi okyararavata ekya mpo okyara uaqia hi okyararavata nkye qaqla taiqa kyaata.

<sup>32</sup> Nkye mwaaqu okyara qaqla kyeta mpohua qihaakyama nyateqata variqi quata. Nanrianra nanrianra po kye tiqata variata. Kotiva Karaisira kyaiqara rieqaro nkyi uaqia hi quara nraka nyataintema kyeta nkyevata mwi quara rieqata nkyeta nanrianra nanrianra uaqia hi quara tira taunru kyeqata qaqla kyakya hiata.

## 5

### *Tire ntuvaaahaaninraqaa variqi quananranra tura*

<sup>1</sup> Kotiva nkyiara mwutukya ntiharo varihata nkye mwia nraaqiara variahuara tita, nkye mwia votima kye variqita quata.

<sup>2</sup> Karaisira mwutukyavanto nkyiara vahintema kye nkye nanrianra nanrianra mwutukya vahirata variqi quata. Vaisivanto Kotira qamwata mwatarero kaahe mwuntha vira qia quara mwataintema kyero Karaisiva tiriara mwutukya vahuvaro putu vuvaro Kotiva mwianra rieqaro qamwata mwatora.

<sup>3</sup> Nkye Kotira nraakyne qora variarara tiro, nraakyne mpuuarave vaisi mpuara nre okyaravave nkyi utaqi vahiankyora. Nraakyne qoravanto uaqiamma kye nte tutiqe hi okyaravave, nkyiari mwamwanta hia kyuqe hivata taqe ua hi okyararave, mwi inraikyava nkyi utaqaa vahiankyora. Mpova hi inraikyarara mwutukya ntirata vare vari okyaravavata nkyi utaqaa vahiankyora. Nkye hia mwi inraikyarara qua pata mpoqivata qiata.

<sup>4</sup> Nkye Kotira nraakye qora variqata hia quaaruve, vehi quave, qainaamaqama kye virera qua tirave, ekyaa mwi quara hia qiata. Nkye mwi quara qaqlira kyeta Kotirara kyuqeve tita mwia qamwata mwate quara nraahu timwaqi quata.

<sup>5</sup> Mwaa quava qutaa quama vahiro. Nraakye mpuaarave vaisi mpuaarave nre varihuave, uaqama kye ntetutiqe ihuave, mpova hi inraikyarara mwutukya ntirata vararerera uti varihuave, mwihua hiama qio Karaisivavata Kotivavata ntaqikyi mwatukyaraqi vivara. Mpova hi inraikyarara mwutukya nti variva, mwiva hia Kotirara nronraqama kye riaraitiro, mwiva mwitaa inraikya varaaninranra nraahuma nronraqama kyero rieqaro mwianra nraahu qamwateqaro hia Kotira qamwata mwate varirave.

<sup>6</sup> Vaisi mponramwuvanto nrinte nkyi kumwaanri tiqata, Nraakye qoravanto uaqia hi kyaiqara utivaro hiama mwia kyaara Kotiva mwihua ruananrove, mwihua mwitaa tivera, nkye hiama mwihua unra qua mwia riaata. Nraakye qoravanto Kotira qua nteqa kyeqata uaqia hi kyaiqara uti variarara tiro, mwia kyaara Kotira raraqa tairaro mwihua ruananrove.

<sup>7</sup> Nraakye qora uaqia hi kyaiqara utivata nkye mwihua kyapata variqata uaqia hi kyaiqara utuqi vivora. Nkye mwi nraakye qorahua nyaatu qatinani ntuvaihaavita uro variata.

<sup>8</sup> Haaru nkyevata enta huraqi variqi vura. Mwaa entara nkye Karaisira nraakye qora variqatara tita, nkye ntuvahaahiraqaa variqi vi variara. Mwianra rieqata nraakye qoravanto ntuvahaahiraqaa nrohiantema kye nkyevata nrohiata.

<sup>9</sup> Nraakye qoravanto ntuvahaahaaaninraqaa variqi vivera, mwihua kyuqema kye nrohivara. Mwihua avuqavuma kyetama nrohivara. Mwihua qutaa qua nraahuma timwaqi vivara.

<sup>10</sup> Nkye Kotiva nkyi qamwata nyataani kyaiqara puaama kyeta mwi kyaiqara nraahu varaqi quata.

<sup>11</sup> Nraakye qora enta hiraqi variqata qora kyaiqa uti variraqaatai nkye mwihua nyaatu nyianrasata uro variata. Nkye mwihua mwaaqu kyaiqa mwia okyara uro ntuvahaahaaaninraqaa qovarama kyaivata mwihua taqaata.

<sup>12</sup> Qikye, uqeta kyeqata mpo kyaiqa mpo kyaiqa uaqia hi kyaiqara uti variara mwianra nte nkyi timwa nyiqana kyaurira inraikya varaankyora.

<sup>13</sup> Kyokiraqi vahiani inraikyara varaqiro uro ntuvahaahaaaninraqaa kyairaro omwavanto mwi inraikyara okyara ntuvahaahama mwatairaro qoqaama vahiananro.

<sup>14</sup> Vaisivanto enta hianinraqitairo uro ntuvahaahaaaninraqaa urontero mwivavata ntuvahaahaaaninraqaa variqiro quananro. Mwianra haaru quavanto mwataama tiro: E vaite variarava siquante.

E putu quarava siquante.

E mwitaa hiraro omwavanto Karaisiva i ntuvahaahama mwatananrove, tura.

<sup>15</sup> Mwi quara rieqatama nkye rauriqata variqi quata. Haunri hia su nyaato vahua nraantantamwa kye variqi vivorave. Vu nraato vataahua variantema kye variqi quata.

<sup>16</sup> Mwaa entara uaqia hi kyaiqara varaahua airivanto variavata tire varuro. Mwianra rieqatama hia qumina variraitita, Kotira kyaiqa nraahu varaqita quata.

<sup>17</sup> Hia nkye su nyaato hia vahihu votima kyeta variqi quata. Qaqao, nkye su nyaato ntapihirata rieqata Kotira mwutukya vahi kyaiqara varaqita quata.

<sup>18</sup> Hia uera nramanri nreqata uera ntaata. Nkye mwitaa hivera, nkye qoranama varivara. Nkye mwia qaqlira kyeta kyaivaro Kotira mwanraqura mwiva nkyiqli variqaro nkyiqli ntaqikyiari.

<sup>19</sup> Nkye ntuvaaantuamavi variqata Kotirara qua vahiani ihira timwaqi quata. Mwaanra ihi timwaqi quata. Kotira nrutu tuaahere variani ihira timwaqi quata. Nkyeta mwutukyaqitai ihi timwaqi viqata tiri vunyaa vaisi nrutu tuaaheraqi quata.

<sup>20</sup> Tiri vunyaa vaisi Iesusi Karaisira nrutu nteqata nkye ekyaa inraikyara Kotirara kyuqeve timwa kyeqata variqi quata.

*Poruva nraata vaati varaahuara tura*

<sup>21</sup> Nkye Karaisira nrutu tuaahere variahua variqatara tita, nkyeta qua tirara nraahu kyuquerave tivora. Nkye nai qua rie nai qua rie hiqata variata.

<sup>22</sup> Nte nraakye nkyiara tirera. Nkye tiri vunyaa vaisi qua riemwaqi vintema kyeta nkyeta saatimwanra quavata riemwaqi quata.

<sup>23</sup> Karaisiva tiri nai nraakye qoraqaa ntaqikyi varintema kyero nraakye vaativantovata nai nraataqaa ntaqikyi variananro. Karaisiva tiri Kotira nraakye qorara nkye ni mamantama variavo timwa kyero tiri huvantu timwa taira.

<sup>24</sup> Tire Kotira nraakye qora variqata Karaisira qua nraahu riemwaqi vi varurantema kye nkye nraakyevanto variqata nkyeta saativanto ekyaa qua tira riemwaqi quata.

<sup>25</sup> Nte nkyi saatimwanranra tirera. Karaisiva Kotiva tiri nraanrama tai nraakye qorahuara mwutukya vahuvaro tiriara rieqaro qutu vura. Nkyevata mwitaama kyeta nkyeta nyaatamwanranra po tivaro nkyi mwutukyavanto mwihuara vahiari.

<sup>26</sup> Karaisira nramanrivantovata quavantovata tiri Kotira nraakye qora hiqama timwa taihata Kotira kyaiga nraahu vararera varuraro Karaisiva Kotiva tiri nraanrama tai nraakye qorahuara rieqaro qutu vura.

<sup>27</sup> Karaisiva mwitaa hurara tiro, vaisivanto nai ntumwu mwataa nraakyera varaintema kyero Karaisiva nraakiara tiri Kotiva nraanrama tai nraakye qorhua sitaanano. Vaisivanto hia uaqia aaqia hiro tauma vaakuahaa uti nraakyera varaintema kyero Karaisiva nraakiara tiri Kotiva nraanrama tai nraakye qorhua varaanano. Tiriara mwihua hia uaqia hi kyaiqara varaqi viraitita, kyuqe kyaiqaa nraahu varaqi vi varivarohia mwihuaqaa qua vahiarive tiro, Karaisiva tiri hiqama taiva mwiva tiri vararero.

<sup>28</sup> Vaisivanto nai mwamwantaqaa kyuqema kyero ntaqikyintema kyero mwiva nai nraataqaavata kyuqema kyero ntaqikyianano. Mwia nraatavanto mwia mwamwanta kuua mwiva varirara tiro, vaisivanto nai nraataqaa kyuqema kyero ntaqikyiqaro mwiva nai mwamwantaqaa kyuqema kyero ntaqikyi variro.

<sup>29</sup> Vaisivanto hia nai mwamwanta uaqama mwatairave. Mwiva hia mwitaa hiraitiro, nai mwamwanta kyara mwinro mwiaqaa kyuqema kyero ntaqikyi varira. Kuua qarama kyero Karaisiva tiri nai nraakye qoraqaa ntaqikyi varihata

<sup>30</sup> tire Karaisira mwamwanta varunanra.

<sup>31</sup> Kotira mpukuqi mwitaama tiro:

Kotiva vaisiara rieqaro nraakye utu tairara tiro,  
vaisivanto nai nrohua qohua kyero  
nai nraatantiriro taaqauvi variho.

Mwitanahua kuua mwamwanta varivarave, tura.

*(Okyara 2:24)*

<sup>32</sup> Nte ntena riemwa kyena mwi quara okyaravanto mwitaama vahoma tina. Nraakye qora nraata vaati vare quava nronra quama vahiro. Vaisivanto nraakye varaintema kyero Karaisiva tiri Kotiva nraanrama tai nraakye qorhua vararerero.

<sup>33</sup> Qio nkye mwihua saati kuaiqia kuaiqavanto nkyeta mwamwantaqaa kyuqema kye ntaqikyintema kyeta nkyeta nyaatamwanraqaa kyuqema kye ntaqikyiqata mwihuara mwutukya vahirata variata. Nkye mwihua nyaatamwanravantovata nkye nkyeta saatiara vaisi kyuquerave timwa kyeqata mwihua qua riemwaqi quata.

## 6

*Nraaqiararavata nyohua sohuavaravata tura*

<sup>1</sup> Nte nkyi nraaqiarara tirerave. Tiri vunyaa vaisivanto nkyi nyohua sohuara nkyiqaa ntaqikyiqi quate tirara tita, nkye nkyeta nyohua sohuara qua riemwaqi quata. Nkye mwitaamaqi viqatama nkye avuqavuma kye nrohivara.

<sup>2</sup> Haaru Kotiva qao timwa kyero qua vatero mwaa quaravata mwitaama tiro:  
Ena nronra qora nrutu tuaaheraqira quante, tiro.

Kotiva mwi quara tiqaro nai kyauqu nriqiqaa vatero mpo quavata taaqau kyero  
<sup>3</sup> mwitaama tiro:

Kyuqema kye mwatanai variqi viqana mpuahaama mwaa  
mwataraqaa varirerave tirava ena nrohua qohua nyutu  
tuaaheraqira quante, tura.

(Kyatura 20:12)

<sup>4</sup> Nte nkyi nraaqiara sohuara tirera. Nkyi nraaqiara raraqa taankyorave tita hia  
nkye mwihua uaqiamma nyataivata variata. Nkye nraaqiara hia uaqiamma nyataraitita,  
kyuqema kye nkyeta nraaqiaraqaa ntaqikyiqi viqata tiri vunyaa vaisi qua mwia  
nraahu mwihuavata timwa nyiqi vivata mwihua aanra kyuqeraqaa nraahu quata.

### *Kyaiqa vaisiaravata nkyiari mwihuaqaa ntaqikyi vaisihuaravata tura*

<sup>5</sup> Nte nkyi kyaiqa vaisiara tirerave. Nkye nkyeta nronra vaisi nyaatu aatu hiqata  
mwihuara vaisi kyuqe huave timwa kyeta mwihuani kyaiqa varaata. Nkye Karaisira  
kyaiqa varaantema kye mwihua kyaiqavata varaqi quata.

<sup>6</sup> Nkye nkyeta nronra vaisini kyaiqa vareqata mwihua tiri qamwata timwa taate tita,  
hia mwihua suqaa nraahu variqata kyuqema kye kyaiqa varaata. Mwihua hia nkyi  
taqera mwiaqaavata kyuqema kye kyaiqa varaata. Nkye mwihua kyaiqa vareqata  
tire Karaisira kyaiqa vaisi varurahua Kotira qua riemwaqi vurahuave timwa kyeqata  
kyuqema kye mwihua kyaiqa varaqi quata.

<sup>7</sup> Nkye mpohua kyaiqa varaqi vivaro nkyi mwutukyavanto qamwate variratama  
mwihua kyaiqa varaqi quata. Hia qumina vaisiara rieqata mwihua kyaiqa varaata.  
Nkye Karaisirara rieqata mwihua kyaiqa varaata.

<sup>8</sup> Mwaa quara riaara hia taunru kyaata: Kyaiqa vaisi rupa taahuave, qati vari-  
ahuave, mwihua mpo kyaiqa mpo kyaiqa kyuqe kyaiqa varerara rieqaro nronravanto  
Karaisiva mwihua kyoqaa nyiananroma.

<sup>9</sup> Nkye vaisi nronra variqata kyaiqaqaa ntaqikyi variahura tirerave. Nkyevata  
kyuqema kye nkyeta kyaiqa vaisiqa ntaqikyiqi quata. Hia qumina qumina mwihua  
ntuqutuare tita, ntauqi nyataivata aatu hiata. Nkye mwaa quara riaara hia taunru  
kyaata: Nkyiqaavata nkyi kyaiqa vaisiqaavata ntaqikyi variva kuaikuvanto nyaamwu-  
nima variro. Mwiva hiama nraakiara nkyi nyutuarave, vaisi viriarave, rieqaro qua  
avuqavu hiananro.

### *Kotira aanraqaa viqata Saataaninravata ntaqi huru kyaamwunra tu vare quate tura*

<sup>10</sup> Qio nte ntene qua taiqa kyarera hina mwitaa tirerave: Kepukyaqama kye variqi  
quata. Nkyeta kepuqya mwia qaqlira kyeta tiri vunyaa vaisi mwia kepuqya nraahu  
vareqata kepuqyaqamavi variqi quata.

<sup>11</sup> Saataaniva kumwaanri utu kyero nkyi nraatara kyaankyo tita, ekyaa huru  
kyaamwu Kotira nyinra vara tuteta kepuqyaqama kyeta variata.

<sup>12</sup> Hia tire qumina vaisivata ntaquqi vurahuavauma. Tire vaana nyaamwu  
mwaasata kyokiraqi variahua airivata ntaqiqata tire nyaamwuni uaqiamma quahua  
Saataaninra kyaiqa vaisivata ntaquqi vi varurahuama varita.

<sup>13</sup> Mwianra rieqatama nkye Kotira huru kyaamwu vara kyeta terama kye tuteta  
varivaro qora kyaiqavanto qovara hirata nkye Saataaninravata kepuqyaqama kye  
ntaquqi viqata hia aatu viraitita, mwiaqaa kaike rateta kepuqyaqama kye variata.

<sup>14</sup> Qio huru kyaamwu vaqa ntumwa kye vateta variata. Hoqukyo tavaarana  
rupataantema kye Kotira qutaa qua okyara tuqara tutata. Avuqavu nrohi vari  
okyarara vara kyeta mwetokyaqaa tuavaaqa votima kyeta utu taata.

<sup>15</sup> Kyuqu nraamwu utu taantema kye Karaisira qua kyuqe qua mwutukya qihakya  
hi vari quara utu taata.

**16** Kepukyaqama kye Karaisirara riemwaqi viva, mwiva nkyi kaike votima kyero vahirata nkye mpo enta mpo enta mwia hiri vare vivaro Saataaninra veva qia itaiva hia nkyi ruari.

**17** Nkye qaini tovaqa qjataqa quataantema kyeta Kotiva nkyi uaqia hi kyaiqaraqitairo huvantu kyaira vara quataata. Paipa mpuahaa tutaantema kyeta Kotira mwanraquravanto nyi quara, Kotira qua, mwia tuqara kye tutaata.

**18** Ekyaa enta Kotirara aakyara nteqata variata. Kotira mwanraquravanto mwi inraikyara mwi inraikyarara Kotira kyapara hiate tirata nkye mwia qua rieqata Kotira kyapara hiata. Nkyi hia pupohairata su ntapairi kye viti viri taqeqa variqi viqata ekyaa Kotira nraakye qorara rieqata Kotirara aakyara ntaata.

**19** Nianravata rieqata Kotirara aakyara qjata. Nkye Kotirara aakyara tivarotiva ni kyaahaqa hiraqe nte mwaini mwaaqi variqana hia aatu hiraitina, mwutukya qihakya hiraqe Kotiva uqeta tai quara Karaisira qua ntapihi kye timwa nyianri.

**20** Kotira qua nraakye qora timwa nyiqinra quante tiro, Karaisiva ni nronraqama kyaihana varura. Kotira qua nraakye qora timwa nyunra kyaara ni rupa kyaavana nte karavu mwaaqi varura. Nkye mwianra rieqata Kotirara aakyara ntaivaro ni kyaahaqa hiraqe hia aatu hiraitina, ni mutukya qihakya hiraqe Karaisira qua kepukyaqama kyena timwa nyianri.

### *Ekyara qua mwi mwatanaahuara tura*

**21** Tiri tiqata vakyaas Tikikaasiva Karaisirara riemwaqi viqaro mwia kyaiqa vare variva, mwiva ni mwakyaakya nkyi timwa nyinrata nkye nte variqi vurara riaata.

**22** Mwiva mwi quara nkyi timwa nyianrive tina, nte mwia titaairo mwiva uro nkyi timwa nyinrata nkye tire variananranra rieta hia aatu hiraitita, nkyi mwutukya qihakya hirata variata.

**23** Tiri tiqova Kotivavata, tiri vunyaa vaisi Iesusi Karaisivavata, nkyi kyaahaqa hirata variata. Mwitanahua nkyi kyaahaqa hivata nkye nanrianra nanrianra mwutukya vahirata variata. Mwitanahua nkyi kyaahaqa hivata nkye mwitananra kepukyaqama kye riemwaqi quata.

**24** Ekyaa nraakye qora mwihua tiri vunyaa vaisi Iesusi Karaisirara hia pupohairata, mwianra mwutukya ntirata variqi vi variahua mwihua Kotiva kyuqema nyataarivema tuqo.

## PIRIPAI

### Poruva Piripaiqinaahuani qara vara kyora

Iesusira qati vara sivuma kyovaro nyaamwuni uro varuvaro 30 ihive nritarovaro Poruva Iesusira qua timwa nyiqiro nrohura kyaara karavuqi kyovaro variqaro qara mwaa ntumwa tora. Iesusira nraakye qora Piripaiqi varuhua Porura kyaahaqa hirerata munima vara kyovaro Poruva mwi munimanra varero mwihuara kyuqeve tiqaro mwaa qarara ntumwa nyatora. Poruva mwihua kepuqyama kyero timwa nyiqanro kuaaqi variqi viqata Karaisira qua nraahu riemwaqi viqata hia unra vaisi qua mwaanra riemwaqi quate tiro, mwaa qarara ntumwa nyatora.

<sup>1</sup> Nte Poruvama. Tiretana Timotikya Iesusi Karaisira kyaika vaisitanavanto variqata nkye Kotira nraakye qora Piripaiqi variahuaravata, vaisi nronranramwu nkyiqa ntaqikyi variahuaravata, mpo hiahua nkyiqa kyaika vare variahuaravata, tiretana nkyiara nkye Karaisiravata kuaaqi variahuanive timwa kyetama qara mwaa ntumwa teta.

<sup>2</sup> Kotiva tiri tiqovavata, tiri vunyaa vaisivanto Iesusi Karaisivavata, mwitanahua nkyi kyuqema nyataivaro nkyi mwutukyaqitairo qihaaky hi varirata variata.

#### *Poruva Kotirara kyuqeve tu quara*

<sup>3</sup> Nkyiara ni pu naatoqi nti entara nte Kotirara aakyara nteqana kyuqeve timwaqina vurave.

<sup>4</sup> Kotiva nkyi kyaahaqama nyataarive tina, nte mwianra airi nani aakyara nteqana ni mutukyaqitairo kyuqe ihana Kotirara qamwateqana aakyara nte varura.

<sup>5</sup> Nkye haaru Karaisira qua rioraqatai Karaisira kyaika nivatama kye kuaa kyaika mwia varaqi vi, mate mwaa iheraraqaa nrintaarara tina, nte nkyiara rieqana Kotirara qamwate varura.

<sup>6</sup> Nte mwaa quara ntapihura. Kotiva nkyiara kyuqe nraakye qora variate tiro, mwiva nkyi mwutukyaqi kyaika tohara taira. Kotiva nkyi mwutukyaqi kyaika kyuqera tohara taivara tiro, mwiva nkyiqa variqaro mwi kyaiqara varaqiro viviro uro Iesusiva tumuani entaraqaa taiqa kyairata nkye mwi entaraqaa kyuqe nraakye qorama varivara.

<sup>7</sup> Nte nkyiara riemwaqi viqananra tina, nte qiomma nkyiara mwi quara mwitaq qianinra. Nte mate karavuqi varu entarave, nte qatinani variqa Karaisira qua timwa nyiqana hia qumina quave kepuqya quave timwa nyu entarave, nkye mwi entara mwi entara nivata variqi vi variavaro Kotiva nkyivata nivata nronraqama kyero kyuqema timwa te varihata tire mwia kyaika vare varunanra.

<sup>8</sup> Karaisira mwutukyavanto nkyiara mpoqiyavata vahintema kyero ni mutukyavanto nkyiara mpoqiyavata vahana nte nkyi uro taqaataa ihanama varina. Kotivavata ni quara quitaavema qiananro.

<sup>9</sup> Nte mwitaama kye nkyiara rieqana nte Kotirara aakyara nte varurama. Nte Kotirara aakyara nteqana nte nkyiara mwataama tina, Kotio, e mwihuara kyaahaqa hirata mwihuara mpohuara mwutukya vahirata variqi vivaro mwihuara su nyaatovanto ntapihirata mpo kyaiqa mpo kyaiqa okyara ntapihita mwi kyaiqara qio mwataara ihua variqata

<sup>10</sup> uaquia hi kyaiqara qaqlira kyeta kyuqe kyaiqa nraahu tuteqata mwi kyaiqara nraahu varaqi viqata nraakiara mwihuara Karaisiva tumuani entaraqaa kyuqema kye variavaro hia mwihuqaa qua vahiarive, tina.

<sup>11</sup> Kotiva mwitaama kyeqaro nkyi kyaahaqamaqiro virata nkye Iesusi Karaisiravata variqi vivaro nkyi kyaiqavanto kyuqema nraahu vahirata nraakye qoravanto nkyi

kyaiqara rieqata Kotirara kepukyavantove timwa kyeqata mwia nrutu tuaaheraqi vivara.

*Poruva nai karavuqi varurara tura*

<sup>12</sup> Ni kata pakya tuaavo, nte mwaaqi varurara nkyi timwa nyinrenrama. Ni karavuqi kyaavana varuva, mwiva hia Karaisira quavatavauma aanra titatero. Karaisira qua qiariva aanra nronraqama kyeroma qatua viro vahiro. Haaru nte qatinani variava entara nte Karaisira qua mwaa vaisihua timwa nyianriva hia vhura. Mate karavuqi variqana qioma mwaa vaisihua Karaisira qua timwa nyinanira.

<sup>13</sup> Ni rupa kye Sisaara karavu nraamwu mwaaqi kyaavana varuqata ntaqua vaisihua nraamwu mwaaqi ntaqikyiahuvata, ekyaa mpo vaisinramwuvata, nte Iesusi Karaisira kyaiqa vaisi varura kyaara ni rupa kyaavana varura mwia ntapihi kyaara.

<sup>14</sup> Ni rupa kyaavana mwaaqi varuqata mwiaqaatai Karaisira nraakye qora airivanto mwianra rieqata kepukya vareta hia aatu hiraitita, mwutukya qihakyama kyeta Karaisira qua nraakye qora timwa nyiqi vi variara.

<sup>15</sup> Qutaa vaisi mponramwuvanto nianra ua vu nraato vateta ni naatara kyaare tita, Karaisira qua nkyi timwa nyi variara. Mwihua mwitaa hiavata vaisi mponramwuvanto hia mwitaa hiraitita, mwihua kyuqema kyeta Karaisira qua nkyi timwa nyi variara.

<sup>16</sup> Mwi vaisihua nianra mwutukya vahata variqata taqaavana nte Karaisira quaqaa ntaqikyiqana mpohua mwi quarara qumina quave tivo tina timwaqi vuqata mwia kyaara ni rupa taavana mwaaqi varura.

<sup>17</sup> Hini hia vaisihua nte vaakya tu vaisihua, mwihua hia Karaisirara riaraitita, mwihua nkyiariara nraahu rieqata Karaisira qua nraakye qora timwa nyiqi vi variara. Mwihua tiqata, Kyai mwi quara timwa nyianranro Poruraqaa qua mpoqiatava vahiarive, timwa kyeqata Karaisira qua timwa nyi variara.

<sup>18</sup> Mwihua mwitaa ti variavana nte qamwateqana hiama mwianra nronraqama kye riena. Vaisivanto nai nrutuara rieqaro Karaisira qua timwa nyinratave, Karaisirara rieqaro mwia qua timwa nyinrata, nraakye qoravanto Karaisira ntapihira, nte mwianra rieqana qamwateqana varianinra.

<sup>19</sup> Nte qamwateqana nraahu variqina virerave. Nkye nianra rieqata Kotirara aakyara nte variavaro Iesusi Karaisira mwanraquravantovata ni kyaahaqama mate varihananra tina, nte tiqana, Qutaa mwihua ni mwaaqitai huvantu kyaivae nte qatinani quaninrave, tura.

<sup>20</sup> Ni mutukyavanto mpoqama kyero mwataama vahana varura. Nte hia mpo inraikya kyaara kyauriraitina, nte matevata ekyaa entavata Karaisira kyaiqa kepukyaqama kyena varaqi viqana nte qati variqi quankyerave, nte qutu quankyerave, nraakye qora ni kyaiqara rieqata Karaisira nrutu nraahu tuaaherevara.

<sup>21</sup> Nte ntena mwatani qati variqi quaninranra mwataama tina, Nte ekyaa inraikya qaqira kyena Karaisirara nraahu riemwaqi viqana mwatani variqi virerave, tuqo. Nte qutu quankyerave, nte qioma Karaisiravata varianinranra mpoqama kye qamwataaninrave.

<sup>22</sup> Qio nte nkyi kyaahaqa hiariva qio vahirera, nte mwaini mwamwantavatama kye qati variqina quaninra. Qikye, ni mutukyavanto nanra inraikyavare vahiro? Nte mwatani qati variqana mwaini varianinranrave, nte qutu vina nyaamwuni quaninranrave?

<sup>23</sup> Nte mwianra taara vu nraato tiqanama varina. Nte mwaini kyena uro Karaisiravata varianinranrama nronraqama kyero ni mutukya vahiro. Nte mwianra kyuqe hiravema tuqo.

<sup>24</sup> Nte mwitaa tiqanavata qio nte nkyi kyaahaqa hiariva qati vaihananra tina, nte qaqira kyena nkyiara rieqana mwatani qati variqi virerave, tuqo.

<sup>25</sup> Nte nkyi kyaahaqa hiariva qati vaihananra tina, hia nte qamwanrama qutuaninanranra ntapihi kyena. Nkye kyuqema kye variqi viqata mwutukyaqitai kyuqe hi varirata qamwateqata Karaisirara riemwaqi quate tina, nte nkyi kyapata qati variqi virerave.

<sup>26</sup> Nraakiara nte nkyivata qaiqaa uro variarita nkye nianra mpoqama kye qamwateqatama Iesusi Karaisira nrutu tuaaherevara.

<sup>27</sup> Nkye Karaisira qua riaahuara tita, nkye Karaisira nraakye qora variqata avuqavuma kyeqata nraahu nrohiata. Nkye mwitaamaqi vi varivaque nte nkyi uro taqaankyer, hia uro nkyi taqaankyer, nte qioma nkyiara tiqana, Mwihua kuaa su nyaato vateta kuaaqi variqata kuaara nraaqiara votima kye variqata Karaisira qua tuteta variqi viqata kepukyaqama kye mwi quara timwa nyiqata

<sup>28</sup> hia mwihua nkyiari nramwunaahua nyaatu aatu hiraitita variqita vi variarave, qianinra.

Nkye mwitaama kye variqi vivatama nkyi nramwunaahua su nyaato ntapihirata rieta Kotiva mwihua nkyiari taiqa kyairata raupiri hirara ntapihivara. Nkye mwitaama kye variqi viqata taqaivaro Kotiva, mwivama nkyi kyaahaqa hiariva varirata nkye qioma nkyeta nramwutaahua nraatara kyevara.

<sup>29</sup> Karaisirara qutaa mwivave qiate tiro, Kotiva nkyi nyaanrama taihata nkye Karaisirara riemwaqi vi variara. Kotiva nkyi nyaanrama tero nkyiara, Mwihua Karaisirara rieqata nriqavi inraikyara varaqi quate, tihata nkye mwiaqatai nriqavi inraikyara varaqi vi variara.

<sup>30</sup> Nkye mwitaamaqi vi variarara tita, nkye qioma ni votima kyeta nramwutaahua kyapata ntaquqi viqata mwihua nraatara kyevara. Nkye taqovana nte haaru variqana nramwutaahua ni naatara kyevorave timwa kyeqana, mwukyaari mwataqina vi variavara. Nkye ntapihi kyaavana nte mwaa entaravata mwukyaari mwataqina viqana variqina vi varura.

## 2

### *Kuaana variqata mwaateraqama kye qua timwaqita quate tura*

<sup>1</sup> Nte mwaa quara nkyi kyapara hirera. Nkye Karaisiravata variqi viqata nkye qutaaqama kye kepukyaqama kyetave variqi vita? Karaisiva nkyiara mwutukya vaiharo qutaave Karaisiva nkyi mwutukya qihakyama nyate varihata varita? Qutaave Kotira mwanraquravanto nkyi mwutukyaqai variqaro nkyi kyaahaqa hiro? Qutaave nkye nanrianra nanrianra po kye tiqata kyuqema nyateqata varita?

<sup>2</sup> Nte mwi quara mwi quara nkyi kyaparama nyataurara nkye qio eo timwa kyeta mwaa mpo qua qianinravata riemwaqita vivera, ni mutukyaqitai mpoqama kye kyuqe hi variraqe qamwateqana varianinrave. Mwaa quara riaata: Nte nkyi timwa nyianrita nkyi quavanto kuaana vahirata mwaateraqama kye qua timwaqita quata. Kuaaqi variqata nanrianra nanrianra mwutukya vahirata variata. Nkyi su nyaato mwutukya kuaa vahirata aanra kuaaqaa nrohinhua variata. Nkye mwitaamaqi vivaque nte nronraqama kyena qamwateqanama varianinra.

<sup>3</sup> Nkye mpo kyaiqa mpo kyaiqa vararerita hita hia nkyeta nyutuara nronraqama kye riaraitita, hia nkyeta mwahuta tirara rieqata mwi kyaiqara varaqi quata. Nkye mwitaamaqi viqata nkyeta nyutu vara mwataniqa hita mpohua nyutu vara viriniqamaqita quata.

<sup>4</sup> Hia nkyeta kyaiqa vareqata nkyeta hi inraikyaraqa ntaqikyirara nraahu riemwaqita quata. Mpohua kyaiqa vareqata mwihua kyaahaqa hiraravata riaata.

<sup>5</sup> Iesusi Karaisiva vu nraato tintema kye nkyevata vu nraato tuqita quata.

<sup>6</sup> Iesusi Karaisira vu nraatovantovata  
Kotira vu nraatovantovata kuaa qarama vahuvaro

mwiaqaatairo mwiva Kotikyantiri kuaaqaa  
 varianinranra hia nronraqama kye riaraitiro,  
<sup>7</sup> nai nrutu nronra mwia qati vatero  
 kyaiqa vaisi nraantantero  
 Kotira kyaiqa vararero vaisi tuero vaisi varura.  
<sup>8</sup> Mwiva vaisi tuero variqaro nai nrutu vara  
 mwataniqama kyero Kotira qua nraahu  
 riemwaqiro viro uro qutu vura.  
 Mwihua uaqia hu vaisihua ru kyontema kyeta  
 mwia kyatariqaa ru tovaro qutu vura.  
<sup>9</sup> Mwiva nai nrutu qati vatero  
 Kotira qua nraahu riemwaqiro viro  
 uro qutu vurara tiro,  
 Kotiva mwia qaiqaa qati vara sivuma kyero  
 mwia tuaahera kyero vara virito vatero  
 ekyaa mpohua nyutu vara mwataniqama kyero  
 mwia nrutu nronra mwhianro Iesusira nrutuvanto  
 nraahu nronraqama viro virito vahira.  
<sup>10</sup> Mwia nrutu nronra vahirara tiro, nraakiara Iesusira  
 nrutu ntamwa tairata ekyaa nyaamwuni varihuave,  
 mwatani varihuave, mwata mwemwani varihuave,  
 mwihua mwia nrutu rieqata tori kyaata  
 ntaqantaaqita  
<sup>11</sup> Iesusi Karaisirara mwivama  
 tiriqaa ntaqikyi varirave tivara.  
 Mwihua mwitaa tiqata  
 Kotira tiri tiqora nrutu tuaaherevara.

*Omwa votima kye variqata kyuqema kye Kotira kyaiqa varaate, tura*

<sup>12</sup> Ni nramwunaa tuaavo, mwi quara rieqatama Karaisirara timwa nyu quara  
 riemwaqita quata. Nte nkyivata varu entara nkye mwi quara riemwaqita quarama.  
 Nte mwaa entara mwaini nyianrani varuqata nkye nkyetaraa variqata nkye mpo-  
 qiaavata mwi quara riemwaqita quata. Nkye Kotiva nkyi nyaamwuni sita varero  
 quaninranra rieta aatu hita kyuqu kyauqu ntirata Kotira kyaiqa nraahu varaqi vivaro  
 nkyi sitaari.

<sup>13</sup> Kotiva nkyiara mwihua ntena varaani kyaiqara varaate tiro, mwiva nkyi mwu-  
 tulkyaqi variqaro nkyi kyaahaqa hi varihata nkye mwia kyaiqa vare variarama.

<sup>14</sup> Nkye mpo kyaiqa mpo kyaiqa varaqi viqata hia *nrutu nraunru/nrunru nraanru*  
 tiraqitaive, inronra hiraqitaive, mwi kyaiqara varaqi quata.

<sup>15</sup> Nkye mwitaama kye variqi vi varivaro hia quavanto nkyiqa vahirata nkye kyuqe  
 nraakye qora varivara. Nkye kyuqe nraakye qora varivaro nkyi mwutukyaqi hia mpo  
 nramwanaamwavata vahirata nkye Kotira nraakye qora mwaa mwataraqaa variqi  
 viqata api nraakye qora hia avuqavuma kyeqa nrohi vari nraakye qorahua utaqi  
 variqi vivara. Enta hiraqi qovoravanto itaintema kye nkye mwi nraakye qorahua utaqi  
 variqata itamwaqi viqata

<sup>16</sup> qati variqi vi quara mwihua timwa nyiqi vivara. Nkye mwitaamaqi vivera,  
 ekyara enta Karaisiva qovara hianinraqa nte nkyi qamwata nyateqana nte nkyi  
 nyaamwuteqana timwa nyu kyaiqava hiama qumina viho qianinra.

<sup>17</sup> Nkye kyuqema kye Karaisirara riemwaqita quate tina, nkyi kyaahaqa hianinranra  
 ni nraanre rauriraqe qutu quankyera, nte nkyiara rieqana qamwateqanama qutu  
 quaninra.

<sup>18</sup> Nte nkyi kyaahaqa hiqana qutu quankyera, nkye nte qutu quaninranra hia mwutukya uaqia hirata variraitita, nkye nte hijaintema kye qamwateqata variata.

### *Poruva Timotira titaani quara tura*

<sup>19</sup> Tiri vunyaa vaisivanto Iesusiva qiove tirera, nte Timotira titaariro nkye hinani quananrove. Mwiva mwini uro variqaro nkyi mwakyaakya riero mwaini nrumu ni timwa mpiraro ni mutukyaqitairo kyuqe hiraqe varianinra.

<sup>20</sup> Hia Timotira nraantantaiva mpovanto nivata variho. Mwiva nivata kuaana variqaro nkyiara nronraqama kyero rie vari vaisivave.

<sup>21</sup> Ekyaa hini vaisi mwihua nkyiari kyaiqara nraahu rieqata hia Iesusi Karaisira kyaiqaravata riaara.

<sup>22</sup> Nkyevata taqaavaro Timotira kyaiqvanto kyuqema kyeroma vahiro. Vaisivanto nai qokyantiri kyuqema kyero kyaiqa varaintema kyero mwiva nivatama kyero kyaiqa vareqaro Karaisira qua timwa nyiqiro vi varirave.

<sup>23</sup> Nte mwaini variqi quani okyarara ntapihi kyena mwiaqataai aanra qio vahiraqe nte Timotira titaariro nkye hinani quananro.

<sup>24</sup> Qutaa tiri vunyaa vaisi Iesusi Karaisiva nini aanra ututairaqe nte uro nkyivata varianinra mwianra ni mutukyaqitairo qihakya ihanama varina.

### *Poruva Epaporotaitaasira titaani quara tura*

<sup>25</sup> Nte tiri tiqata vakya Epaporotaitaasirara mwitaama tina. Mwiva nkye hinani nrumu ntante quarive turave. Nkye haaru mwiva ni airuqa hijarive tita, titovaro nruva mwaini variqaro ni airuqa hiro ni vatama kyero kuaa kyaiqama varaqiro viro.

<sup>26</sup> Mwiva mwaini variqaro nkyiara po nkyi qaiqaa taqaataaravema ti variro. Mwiva nriqa viharo varirara nkyevata riaarara mwia mwutukyavanto uaqia iharo variro.

<sup>27</sup> Qutaa haaru mwiva nriqa vuvaro qutiro ntuhiqauruvoro Kotiva mwianra po tiro mwia qati vara sivuma kyora. Mwiva qutu vutiri, nte nronra muaanrama varautiri. Kotiva nianra po tihana nte hia mwi muaanranra varaurarave.

<sup>28</sup> Mwiva quari aanravavata qio vahiraqe nte qamwanrama mwia titaariro mwiva nkye hinani virata nkye mwia taqeta qamwata mwataate. Mwiva viraro ni muaanrvantovata qihakya hiraro nina mamanta vahiari.

<sup>29-30</sup> Nkye hia mwaini nriaganra huvaro mwiva nkyi kyaahaqa hirero mwaini nruva nruru Karaisira kyaiqara rieqaro qutu viro ntuhiqaururara tita, nkye mwianra rieqata mwitaa hi vaisihua mwihua kyuqe vaisive timwa kyeta qamwata nyataata.

## 3

### *Mpo hi vaisihua nkyi uaqia hi aanranra nyaamwutevorave tura*

<sup>1</sup> Ni kata pakyaa tuaavo, mwaa quara taiqa kyarerera hina nkyiara mwataama tina. Nkye Karaisiravata variqataro tita, nkyi mwutukyaqitai kyuqe hi varirata qamwateqata variqi quata. Hia nte qoriri hiraitinama qaiqaa mwaa quara nkyini qara ntina. Mwi quava nkyi kyaahaqama nyatairata nkye qio variata.

<sup>2</sup> Uaqia hi kyaiqara uti variahua, mwihua qaakyau vairi votima kye variqata vaisi mwamwanta toqa nrupepaama kyarerera uti variahua variavata nkye mwi vaisihuara rauriqata variata.

<sup>3</sup> Mwihua nkyiari mwamwanta toqa kyaahua variavata tire hia mwihua votima kyeta varunanra. Kotiva tiri mwutukyaqitairo uaqia hi kyaiqara toqa kyaihata tire mwiva qutaa toqa kyaihuama varuro. Kotira mwanraquravanto tiri kyaahaqa hi varihata tire Kotira nrutu tuaahere varuro. Tire Iesusi Karaisiravata variananranra nronraqama kye rieta hia qumina vaisivanto nkyiari mwamwanta toqe okyarara nronraqama kye rieta.

<sup>4</sup> Vaisi mwamwanta toqe okyarava qio ni kyaahaqa hiraqevauma, nte mwi inraikyava kyuqema ni kyaahaqa iho qianinra. Mwi vaisihuaqitairo mpovanto tiqaro, Mwi okyarava ni kyaahaqama mataihana varuqo, tirera, nte haaru ekyaa mwi okyarara riemwaqina vi varurara tina, nte mwi vaisira nraatarama kyaaninra.

<sup>5</sup> Ni mwata kyoraqaataina nte Isarerivantoma varuqo. Nte ntene okyarara tirera nte Mpenisamininra okyarama varuqo. Ni nthohua kohua Hivuruve Iutaave variavana ntevata Hivuruvantoma varuqo. Ni mwata tovaro 8 enta nritarovaro ni mamanta toqa kyora. Nte Mosesira qua mwaanra riemwaqi vina Parisi vaisi variqana kepuqyaqama kyena mwi quara riemwaqina vi variavara.

<sup>6</sup> Nte mwi quarara nronraqama kye riemwaqi viqananra tina, nte Jesusira nraakye qora ruqina viqana uaqiamaqina quavara. Nte Mosesira qua mwaanra avuqavuma kyena riemwaqi vi variavaro hia mpovanto e nianra mwi quara mpo nteqa kyaaro qiariva varuvana nte ekyaa mwi quara riemwaqina vi variavara.

<sup>7</sup> Mwi entara nte tiqana, Mwi inraikyava mwi inraikyava ni kyaahaqa hi varihana nte nronra vaisima varuqo, qiavara. Mwaa entara Karaisirara rieqana nte mwi inraikyarara qumina inraikya hia ni kyaahaqa hiani inraikyarave ti varura.

<sup>8-9</sup> Hia nte Iutaa mwaanra okyara mwianra nraahu ti varuqo. Nte Karaisirara rieqana ekyaa mpo inraikya mpo inraikya mwianra qumina inraikyavema tuqo. Nte ntapihi kyauqaro Iesusi Karaisiva ni nronravanto variqaro niqaa ntaqikyi varivama variro. Mwiva mwitaa hirara tina, nte mwianra nraahu nronraqama kye riemwaqi viqana ekyaa mpo inraikya mpo inraikya qaqlira kyena qumina inraikyave ti varura. Nte Karaisira nraahu varena mwikyantiri kuaaqi varirerave timwa kyena, ekyaa mwi inraikyarara qumina inraikya kukomwave ti varurave.

Tauraa nte tiqana, Kyai nte Iutaa mwaanra okyara riemwaqina quariro Kotiva ni avuqavuma mataarive, timwa kyena taqauqaro Kotiva mwianra rieqaro ni avuqavuma mataariva hia vahuvana mwiaqaatai nte qaqlira kyena Karaisirara qutaa mwivave tuqaro Kotiva nte Karaisirara tu quara riero ni qora inraikya nruka matero ni avuqavuma mataihana varura.

<sup>10</sup> Nte Karaisirara nraahu riemwaqina virera. Karaisiva qutu vuraqitairo kepuqyaqama kyero qati siviro variqi vintema kyena, ntevata kepuqyaqama kyena variqi virera. Karaisiva nriqavi inraikyara varaqiro vintema kyena, ntevata mwikyantiri kuaaqi variqana nriqavi inraikyara varaqi virera. Mwiva qutu vintema kyena, ntevata variqi vina uro qutu virerave.

<sup>11</sup> Kotiva Karaisira qati vara sivuma kyaintema kyero nivata qati vara sivuma kyaarive tina, nte mwitaamaqina virerave.

### *Poruva mwatama tairaqaara hiantero quaninranra tura*

<sup>12</sup> Mwaa entara hiama nte ntenanra ekyara kepuqya vaisima varuqo qianinra. Karaisiva nianra e mwitaama varira vaisivama varinanrave timwa kyero ni pitairara tina, nte mwitaa hu vaisiva varirerave timwa kyena kyuqema kye variqina virera.

<sup>13</sup> Ni kata pakya tuaavo, Mwaa entara hia nte mwi vaisira votima kyena varuqo. Nte mwi vaisira votima kye variqanye tina, kyuqema kyena variqi virera. Nte haaru nrohurara hia riaraitina, qaqlira kyena qaraakya inraikya nraakiara qovara hiani inraikyarara rieqana varaariva variqi virera.

<sup>14</sup> Vaisivanto nai nraatara kye nai nraatara kye hiante quantema kye, nte hiante avuqavu hi aanranraqaa viqana Kotiva ni mpirera hi inraikyara vararerera utiqana variqi virerave. Kotiva Iesusi Karaisira kyaiqara rieqaro nianra nyaamwuni variqiro quarive tiro, ni naanrama taira.

<sup>15</sup> Tire Kotira kyaiqa okyara riaurahua tire ekyaa mwihua mwi quara nraahu riemwaqi quara. Nkye mpo ihua mpo qua riemwaqita virera hivera, Kotiva nkyi qua avuqavuma nyatairata nkyi su nyaato ntapihirata riemwaqi vivara.

<sup>16</sup> Varaivaqe tire kyuqema kye nrohuna aanranra mwiaqaa nraahu tuqarakye nrohiara.

<sup>17</sup> Ni kata pakyaa tuaavo, nte nrohiarintema kyeta nkyevata mwi aanranraqaa nraahu nrohiata. Tire nyaamwutaurata nrohiahua, nkye mwihua nraahu sataqita quata.

<sup>18</sup> Airi enta nkyi timwa nyi varu quara nte qaiqaavata ntateqana nkyi timwa nyinrenra. Nraakye qora airivanto tiqata, Kotira vataqi viqata mwia aanraqaa qioma vuro, timwa kyeqata qora aanraqaa nraahu vi variavo. Mwihua api aanra nrohi varita unra tiqata, Kotira aanraqaama vi varuro, qiarara tita, mwihua Kotira nramwutaahuama variavo. Mwihua mwitaamaqi viqata Karaisira ruto kyatarira nramwutaqa hi variavo.

<sup>19</sup> Mwihua mwitaamaqi vi variarara tita, mwihua uro raupirimama vivara. Mwihua Kotirara nraahu riemwaqi quataara vaihata mwihua nkyiari mwamwanta kyakya hirara nraahu riemwaqi vi variara. Mwihua nkyiari kyaiqara rieqata kyauruataara vaihata mwihua nkyiari mwahuta ti variara. Mwihua mwata mwaqa vahi inraikyarara nraahu nronraqama kyeta rie variara. Mwihua mwitaamaqi vi variarara tita, uro raupirima vivara.

<sup>20</sup> Tire hiama mwihua nraantantamwa kye varita. Tire nyaamwunianra tiri mwaakyota mwata vaiho timwa kyeqata variqi vunanra. Mwata mwaqaatairo tumu tiri tivitaariva nyaamwusairo tumuananro. Tire mwia vekya variqata mwianra nronraqama kye rie varunanra.

<sup>21</sup> Mwi entara mwiva ekyaa inraikyaqaa ntaqikyirero kepuuyaqama kyero variqaro tiri mwamwanta uqenrenro qutuani mwamwantara kyuqu kyairaro nai mwamwanta takyuquani mwamwantara votima kyeroma vahiananro.

## 4

<sup>1</sup> Ni kata pakyaa tuaavo, mwianra rieqatama nkye tiri vunyaa vaisi Karaisiravata kuaaqi variqata kepuuyaqama kye variqi quata. Nte nkyiara ua ihana varuqo. Ni mutukyavanto nkyivata variataa ihana varura. Nkye variavaro ni mutukyavanto kyuqe ihana varuqo. Ni kyaiqvanto nkyiqi kepuuyaqa ihata nkye ni nronra nrutu kyuqera votima kyetama variavo.

### *Ekyara qua tura*

<sup>2</sup> Nte nraakyetana Iuotiaravata Sintikiravata qua timwa nyinrenrave. Nte nkyitananra po tiqana nkyetana Karaisiravata kuaaqi variqata hia haaru tunte mpo qua mpo qua tiraitita, kuaa qua nraahu timwaqi quate, tuqo.

<sup>3</sup> Qio Kyaahaqao, ena nrutuara rieqarama e nraakye mwitanahua kyaahaqa hiante. Haaru nte Karaisira qua timwa nyi variavata nraakye mwitanahua ni kyaahaqa hiqata kuaa kyaiqa mwia vare varura. Mwi entara Keremenivavata, ni kuaa kyaiqa vare varuhuavata, mwi nraakyetanahua kyapata kyaiqa vare varura. Kotiva mwinramwuhua nai kyaama tero mwihua nyutu nai mpukuqi qara ntumwa taihatara tita, mwihua ekyaa enta qati variqi vihuama varita.

<sup>4</sup> Nkye tiri vunyaa vaisi Karaisiravata variqatara tita, qamwateqata variate. Nte qaiqaa nkyiara tirera: Qamwateqata variate, tuqo.

<sup>5</sup> Nkye ekyaa nraakye qorara qihakymaqita vivata nkyi kyuqe okyara taqaata. Tiri vunyaa vaisivanto tumuanriva qaumaqama hiro.

<sup>6</sup> Hia mpo inraikya mpo inraikyara nronraqama kye riaata. Nkye hia mpo inraikya vataivera, Kotira kyapara hiata. Nkye Kotirara kyuqeve tiraqitai mwia kyaparamaqita quata.

<sup>7</sup> Nkye mwitaamaqi vivaro Kotiva mwutukya qihakya hiani inraikyara nkyi nyiananro. Tire qati qumina vaisi varurahuara tita, hiama qio Kotiva mwutukya

qihaakyama nyate vari okyarara ntapihi kye taqaananra. Nkye Iesusi Karaisiravata variqi vivaro Kotiva nkyi mwutukya qihaakyama nyate vari okyarava mwiva nkyi su nyaato mwutukyaqi ntaqikyiqiro quananro.

<sup>8</sup> Nte mwaa quara taiqa kyarera hina nkyiara mwitaama tina. Mpo okyara mpo okyara kyuqema kyero vahianinra, mwianra nraahu riemwaqita quata. Qutaaqama kye vahiani okyararave, kyuqema kyero vahiani okyararave, ntapihi kyero vahiani okyararave, hia mpo nramwanaamwavata mwiaqaa vahiani okyararave, kyotataqama kye vahiani okyararave, nrutu kyuqema kyero vahiani okyararave, ekyaa mwi okyarara nraahu riemwaqita quata.

<sup>9</sup> Nte nkyi timwa nyu quara nkye riaarave, nte kyaiqa vare varuqata nkye ni taqaarave, mwianra rieqatama nkye sivita mwi kyaiqara mwi kyaiqara varaqi quata. Nkye mwitaamaqi vivaro Kotiva nkyi mwutukya qihaakyama nyate variva nkyivata variratama nkye variqi vivara.

### *Piripaiqinaahua Porura kyaahaqa hurara qamwateqaro tura*

<sup>10</sup> Airi enta vivihata nkye qaiqaa ni kyaahaqa hiarara tina, nte Karaisiravata variqana nronraqama kyena qamwateqana varuqo. Qutaaqama nkye haaruvata ni kyaahaqa hirera uti varuvaro hia ni kyaahaqa hi aanrava vahuvata hia qio ni kyaahaqa hurave.

<sup>11</sup> Hia nte munimave mpo inraikya hia vahuvana variavara mwianra tuqo. Qaqao, mpo inraikya mpo inraikya vahirove hia vahirove hira, nte hia mwianra nronraqama kyena riemwaqina vurave.

<sup>12</sup> Nte mwitaa mwitaama variani okyarara ntapihi kyaura. Nte vehiqama vina vehi vaisi variqi quani okyarara ntapihi kyaurave. Nte airi inraikya vataani okyarara ntapihi kyaurave. Ni pu naatovanto ntapihi vihana nte uqeta tai quara mpo ntapihi kyaura. Nte mwi quara rieqanama kyara vahi entarave hia vahi entarave, tuavaaqaa vahi entarave hia vahi entarave, nte hia mwianra nronraqama kye riemwaqi viraitina, nte qiomaa varuqo ti varura.

<sup>13</sup> Mwinra rieqana nte taqaariro Karaisiva ni kepukyaqama kyairaqena nte ekyaa inraikya qiomaa varaqina quanirna.

<sup>14</sup> Nte mwitaa tiqanavata nkye ni kyaahaqama matorara qamwateqanama varuqo. Ni uaqima matovana variavata nkye ni kyuqema kye kyaahaqama matora.

<sup>15</sup> Nkye Piripaiqinaahua nkye ntapihiarave. Nkye Karaisira qua vuni rieta varu entara nte Masentonaa kyaavata mwi entara hia Iesusira nraakye qora hinivanto ni kyaahaqa ihuavata varuvata nkye nraahu munima ni mpuvana variavarave.

<sup>16</sup> Nte mpo mwatukya Tesaronaikaaqivata uro variavata nkye airi nani ni kyaahaqama matorave.

<sup>17</sup> Nkye ni mpia inraikyara mwianra hiama nte nronraqama kyena riauqo. Nte nkyitarama nronraqama kyena riauqo. Nkye ni kyaahaqa hiqata mwi inraikyara ni mpiarara tiro, Kotiva mwianra rieqaro mwia hiniqama nkyita nyianinra, mwianra nte nronraqama kyena riauqo.

<sup>18</sup> Mate nte ekyaa mwi inraikyara airiqama kyena vatauqo. Epaporotaitaasira titovaro mwiva nkye nini vato inraikyara varaqiro nrumu mpihana ekyaa inraikya qio vatauqo. Nkye ni mpia inraikyava kyuqe mwuntavi vari inraikyara, Kotira mwia inraikyara votima kyeroma vahiro. Nkye ni mwi inraikyara mpiavaro Kotiva nkyi qamwata nyate varira.

<sup>19</sup> Tire Karaisiravata varunanranra tiro, Kotiva ni mwanriqvavento variqaro mwiva ekyaa kyuqe inraikya vataiva ekyaa inraikya nkyi nyinrata nkye kyuqema kye mwia kyaiqa varaqi quata.

<sup>20</sup> Nrivaqe Kotira tiri tiqora mwia nrutu ekyaa enta tuaaheraqi quararo mwia peqa okyaravavento takyuquqiro quarive. Nte qutaama tuqo.

*Qua mwanteqaro tura*

<sup>21</sup> Ekyaa Kotira nraakye qora Karaisiravata variahua nte nkyi qua mwantauquo. Tiri tiqata vakyaa mponramwuvanto nivata variahua, mwihuavata nkyiara rieqata nkyi qua mwantaavo.

<sup>22</sup> Ekyaa Kotira nraakye qora mwaini variahuvata nkyi qua mwanteta. Mwaini Kotira nraakye qora vunyaa vaisi Sisaara nraamwuqi kyaiqa vare variahua, mwihua nkyiara nronraqama kye rieqata mpoqiatavata nkyi qua mwanteta.

<sup>23</sup> Tiri vunyaa vaisi Iesusi Karaisiva nkyi kyuqema nyatairaro nkyi mwutukyaqitairo kyuqe hi varirata variate, tuquo.

## KOROSI

### Poruva Korosiqinaahuani qara vara kyora

Iesusira sivuma kyovaro nyaamwuni uro varuvaro 30 ihive nritarovaro Poruva karavuqi variqaro mwaa quara qara ntumwa tora. Korosiqinaahua mponramwuvanto Karaisira quara quataave timwa kyeta varuvata vaisi mponramwuvanto uronte mwihua unra qua mwaanra timwa nyi varuvaro mwia kyaara Poruva qara mwaaqi Karaisira peqa okyara mwihua ntapihi kyero timwa nyunra.

**1-2** Nte Poruvama. Kotiva nai kyakya hiraqa ni nronraqama kyaihana nte nronraqamavi variqana Iesusi Karaisira qua nraakye qora timwa nyiqi vi varuvama varina.

Tire Timotikya nkye Kotira nraakye qora Korosiqi variahuanima mwaa quara qara ntumwa teta. Nkye Karaisiravata variqata mwianra nraahu riemwaqi vi variahuanrita, nkye tiri tiqata vakyaama varita.

Kotiva tiri tiqova nkyi kyuqema nyatairaro nkyi mwutukya qihakya hi varirata variate.

#### *Poruva mwihuara rieqaro Kotirara kyuqeve tura*

**3-4** Nkye Iesusi Karaisirara kepukyaqama kye riemwaqi quavaro nkyi mwutukyavantovata ekyaa Kotira nraakye qorara vahira mwia tire riemwa ntapihi kyaunanrave. Nkye mwitaa hiara mwianra rieqatama tire teta nronra vaisi Iesusi Karaisira qora Kotirara aakyara nteqata kyuqeve timwaqi vunanra.

**5** Haaru qutaa mwakyaakya Karaisira qua nkyi timwa nyuvata nkye mwi quara riovaro mwutukyaqitai kyuqe huvata tiqata, Mwi quara rieta hia raupiri hiraitita, nraakiara qioma nyaamwuni qati variqi quananrave, tura. Nkye mwitaa timwa kye nraakiara nkye nyaamwuni uro kyuqema kye varira, mwi entara vekya variqataratita, nkye Karaisirara kepukyaqama kye riemwaqi viqata nanrianra nanrianra mwutukya vahata variara.

**6** Haaru nkye Karaisira qua kyuqe qua riovaro nkyi su nyaatovanto ntapihuwata nkye Kotiva nkyi kyuqema nyataaninranra anomia kye rieta, mwiaqaatai nkye kyatarivanto tamwa kyuqe hira riaintema kyeta nkye kyuqe kyaiqa varaqi vi variara. Mpo mwatanaa mpo mwatanaahua variavaro Karaisira quavanto viro nrinro ihata mwihuavata mwi quara rieta mwiaqaatai mwihua nkyi nraantanteta kyuqe kyaiqa nraahu varaqi vi variara.

**7** Vaisi mpo Epaparaasiva Karaisira qua okyara nkyi timwa nyuvata nkye kyuqema kye mwi quara riora. Mwi vaisiva tiritana henava kuaa kyaiqa mwia varava variqaro mwiva tiri kyaahaqa hiqaro nraakye qora timwa nyi varira.

**8** Kotira mwanraquravanto nkyi kyaahaqa huvata nkye nanrianra nanrianra mwutukya vahuvata variqi vi varu quara Epaparaasiva nrumu tiri timwa timwuvata riaavanana.

**9** Nkyiara tiri timwa timwuvata mwi entaraqaatai hia mpo enta nkyiara taunru kyaraitita, mpo enta mpo enta nkyiara rieqa Kotirara aakyara ntamwaqi vi varunana. Kotiva nkyi su nyaato kyuqema kyairata nkye Kotira kyaiqa okyara qio riemwaqi viqata Kotira nai mwia kyakya hira nkye ntapihi kye taqeqata qio vari nraakye qorahua variate titi, tire Kotirara aakyara nte varunana.

**10** Kotiva mwitaama kyero nkyi kyaahaqa hirata nkye mwiaqaatai qioma mwia kyaiqa nraahu kyuqema kye varaqi vivara. Mwitaamaqi viqata nkye mpo kyaiqa mpo kyaiqa kyuqe kyaiqa vare varivarot Kotiva nkyiara qamwateqaro variananro. Mwitaamaqi viqata nkye kyatarivanto tamwa kyuqera riemwa taintema kyeta kyuqe

kyaiqa, mpo kyaiqa mpo kyaiqa vareqata Kotira okyarara riemwaqi viqata uro kyaata nraahu mpoqivata rievvara.

<sup>11</sup> Kotiva anoma kepukyavanto varirara tita, tire mwianra aakyara nteqata nkyiara mwihua kepukyaqama nyataante tita. Kotiva nkyi kepukyaqama nyatairaro nkyi hia qamwanrama kyero pupohairata kepukyaqama kye variqi vivaro nkyi mwutukyaqitai kyuqe hi varirata variqi vivara.

<sup>12</sup> Kotiva ntuvaahaaninraqaa variqaro ntaqikyi variani mwatukyara Kotiva nai nraakye qorara rieqaro mwi mwatukyara mwihua kyaama tero. Mwiva nkyivata qioqama kyairara tita, nkyevata nraakiara qioma Kotira nraakye qora mpo ihua kyapata mwi mwatukyaraqi variqi vivara. Nkye mwianra rieqata tiri tiqora Kotirara kyuqeve timwaqita quata.

<sup>13</sup> Haaru tire variavararo enta hu inraikyava tiri ntumwaqu kyovata tire enta huraqi variavararo Kotiva mwiqitairo tiri huvantu kyero tivitaqiro uro nai mwaaqu mwianra mwutukya nti vaisiva ntaqikyi varinani kyaira.

<sup>14</sup> Mwia mwaaquvanto Kotirani kyaiqa utu toraqatai tire qatinani huvantu vita varuraro Kotiva tire uaqia hi kyaiqara varauna quara taiqa kyero nruka timwa taira.

### *Karaaisiravata mwia peqa okyararavata tura*

<sup>15</sup> Tire hia qio taqaarava mwanriqa Kotivavata,  
tire qio taqaarava Karaaisivavata,  
mwitanahua kuaa qarama kyeta variara.  
Karaisiva Kotira mwaaqu vunyaava variharo  
ekyaa utu tai inraikyava mwia mwemwanima vahiro.

<sup>16</sup> Kotiva Karaaisira nronraqama kyovaro  
mwiva nyaamwuvata mwatavata  
ekyaa inraikya utu kyero vatora.  
Vaisivanto hia qio taqaani inraikyarave,  
qio taqaani inraikyarave, mwatani qoqaa variqatave  
uqeta kye variqata ntaqikyiahuate,  
nyaamwuni ntaqikyiahuate,  
mwiva mwihua mwihua utu kyero vatero.

Ekyaa inraikyavanto Karaaisirani nraahu vahiarive tiro,  
Kotiva Karaaisira nronraqama kyovaro  
mwiva ekyaa inraikya utu kyero vatora.

<sup>17</sup> Vuni ekyaa inraikyavanto hia vahu entara  
Karaisiva qati variqiro vura.  
Mwaa entara Karaisiva variharora tiro,  
ekyaa inraikyavanto naitarama kyero  
qio vahiqiro vi varira.

<sup>18</sup> Karaaisiva vuni variqaro qiatu votima kyero varihata  
tire mwia nraakye qoravanto mwia nraakiarani  
mwia mwamwanta votima kyeta varunanra.  
Mwiva vuni qati variqiro vihatara tita,  
tire mwia nraakye qoravanto  
qio qati variqi vi varunanra.

Karaisiva nraahu ekyaa inraikya nraatara kyero  
uro vuni variarive tiro,  
Kotiva mwia nraante qutu vuraqitairo  
qati vara sivuma kyora.

<sup>19</sup> Kotiva naivanto tiqaro,  
Kyai nte Karaaisiraqi variqi viqana

ekyaa ntene kepukyavatama kye mwiaqi variqi  
virerave, tuvaro Kotira kepukyu okyaravanto  
ekyaa Karaisiraqi vahura.

<sup>20</sup> Kotiva nyaamwunive mwatanive vahi inraikyara  
nte mwi inraikyara kyapata mwaateraqama variqana  
kuaaqi varirerave timwa kyero nai mwaauqu titovaro  
mwiva kyatariqaa nraanre rauru kyero qutu vuvaro  
mwia nraanrevanto ekyaa mwatanaa  
vara mwaateraqama kyaihata  
mwihua Kotiravata kuaaqi variqi vi variara.

<sup>21</sup> Nkye haaru Kotiraqaatai nyianrasata variqata nkye uaqia hi kyaiqara utiva  
nraahu nkyi su nyaatoqi vahuvata nkye uaqia hi kyaiqara mwia nraahu utuqi viqata  
nkye mwia kyaara Kotira nramwutaahua varura.

<sup>22</sup> Nkye Kotira nramwutaahua varuvaro Karaisiva vaisi mwamwanta varero nkyiara  
rieqaro qutu vura. Mwitaa hurqaatairo Kotiva nkyivata mwaateraqama varirara  
tita, nkye qioma uro Kotira vuqaa varivaro mwiva nkyiara ni nraakyе qora kyuqe  
hiahuate, uaqia hi kyaiqava hia nkyiqi vahata variahuate, hia nkyiqaa qua vahata  
variahuate, qiananro.

<sup>23</sup> Haaru Karaisira qua nkyi timwa nyuvata nkye mwi quara rieta tiqata, Tire  
Karaisira nraaqiaraqama vita variqi vita nraakiara kyuqema kye nyaamwuni uro  
variananrave, tura. Nkye hia mwi quara qaqlira kyeta mpo qua riaraitita, Karaisira qua  
nraahu kepukyaqama kye riemwaqi viqata hia pupohairata variqi vivera, nkye qioma  
tiqata, Kotiva tirivata taaqau viro kuaaqi variho, tivara. Nte Poruva Karaisira qua  
kyuqe qua nraakyе qora timwa nyinrenra nronraqama vuvama varina. Tire ekyaa  
mwaa mwataraqaa varia nraakyе qorahua mwi quara timwa nyiqita vi varunanza.

### *Poruva Kotira nraakyе qoraci kyaiqa varorara tura*

<sup>24</sup> Nte nkyiara rieqana nriqa vi inraikyara varaqi vura nte mwianra qamwateqana  
varuqo. Karaisiva Kotira nraakyе qorara mwihua ni mamanta votima kyetama  
variavo timwa kyero mwihuara rieqaro nriqa vu inraikyara varaqiro vura. Mwihuara  
rieqaro nriqa quani inraikyara varaqiro quariva hini qati vahananra tina, nte  
Karaisira nraakyе qorara rieqana nte Karaisira kyaahaqama kye nriqa vi inraikyara  
ntena mwamwantaqaavata varaqi quariro qioqama viro taiqa quari.

<sup>25</sup> Nkyi Kotira nraakyе qoraci kyaiqa varaarive tiro, Kotiva ni nronraqama kyaihana  
nte Karaisira qua okyaravata, tavaaravata, mwutuvata, ekyaa mwi quara nkyi timwa  
nyi varura.

<sup>26</sup> Haaru mpo vakya mpo vakya varu nraakyе qorahua hia mwi quara riovaro mwi  
quava uqeta viro vahura. Mwaa entara Kotira nraakyе qoravanto nraahu mwi quara  
riaate tiro, mwi quara qovarama kyaira.

<sup>27</sup> Mpo mwatanaa mpo mwatanaa mwia peqa okyara kyuqe okyara taqaate tiro,  
Kotiva nai uqeta tai quara nai nraakyе qorara rieqaro qovarama nyataira. Kotiva  
uqeta tai quara mwia okyara mwataamama vahiro: Karaisiva nkyi mwutukyaqi  
variqiro vi varivama variro. Mwiva nkyi mwutukyaqi variqiro vi varirara tita, nkye  
nraakiara Kotiravata variqata mwia votima kye kepukyu nraakyе qorama variqi  
vivara.

<sup>28</sup> Kotiva uqeta tai quava mwitaama vahirara tita, tire Karaisira qua mpo mwatanaa  
mpo mwatanaahua timwa nyiqi vi varunanza. Mwihua mwaa quarara nronraqama  
kye riaate tita, tire mwihua Kotira okyara qua, mpo qua mpo qua timwa nyiqi  
vi varunanza. Mwihua Karaisiravata kuaaqi variqata hia nraaqiara taaqa votima  
kye variraitita, mwihua kuaiqia kuaiqavanto kepukyu nraakyе qora variqata Kotira  
vuqaa qio uro variate tita, tire Karaisira qua mwihua timwa nyiqi vunanza.

<sup>29</sup> Nraakyе qoravanto mwitaama variate tina, Karaisiva kepukya ni mpira mwiaqotai nte kepukyaqama kye mwi kyaiqara vare varura.

## 2

### *Karaisira qua nraahu riemwaqi viqata unra qua hia riaate tura*

<sup>1</sup> Nte nkyi timwa nyinrenra. Nkyivata, Reotisiaaqi variahuavata, mpo hiahua hia ni piri taqaahuavata, nte toqaamwu tu kyena kyaahaqamaqina vi varura.

<sup>2</sup> Nkyi mwutukyaqitairo qihaakya hirata nanrianra nanrianra mwutukya vahirata kuaaqi variqi quate tina, nte nkyi kyaahaqamaqina vura. Nte nkyi kyaahaqamaqina quarita nkye Kotira qua ntapihi kye rieqata mwi quara qutaa quama vaiho tiqata Kotiva uqeta tai quara, Karaisirara timwa tai quara, anoma kye riemwaqi quata.

<sup>3</sup> Kotiva nai kyuqe okyara, mpo okyara mpo okyara Karaisiraqi uqeta taiharo ekyaa mwi inraikyara Karaisiva qovarama kyaihata tire Karaisiraqitaima Kotira okyara, mpo okyara mpo okyara qio taqe varita.

<sup>4</sup> Vaisi mpovanto unra qua nkyi timwa nyinrenro kyuqe kyuqe timwaqiro nrianinra mwia qua hia riaate tinama, nte mwi quara nkyi timwa nyina.

<sup>5</sup> Mate nte nyianrani variqana hiama nte nkyivata varina. Qio nte nyianrani variqanavata nte nkyivata varuva votima kyena variqana nte nkyi kyaiqara rieqana qamwateqanama varina. Nkye kuaa qua nraahu timwaqi viqata Karaisirara kepukyaqama kye riemwaqi vi variarara tina, nte mwianra rieqanama mwutukyaqitai kyuqe ihana nkyiara qamwateqanama varina.

### *Karaisira qua rieqata mwiavata kuaaqi taaqauvi variqi quata*

<sup>6</sup> Nkye Iesusi Karaisirara mwiva tiri vunyaa vaisivantove qia quarara rieqata nkye Karaisiravata kuaaqi taaqauvi variqi quata.

<sup>7</sup> Kyatarivanto mwata kyuqeraqi tuqa tuta kyero kyuqema kyero qupiqaintema kyeta nkyevata nronra tuemwaqi viqata Karaisiravata kuaaqi variqi quata. Karaisirara timwa nyu quara, mwi quara nkye riemwaqi viqata kepukyaqamaqita quata. Mwitaamaqi viqata Kotirara kyuqeve timwaqi quata.

<sup>8</sup> Mpovanto mwatanyaa qua okyara timwa nyiqanro mwi quaraqo nkyi ntumwaqu kyaankyo tita, nkye rauriqata variata. Mwi quava qumina unra quama vahiro. Qumina vaisivanto mwatanyaa okyarara nraahu rieqaro nai timwa mwi nai timwa mwi hia quava nraahuma mwi quava vahiro. Hia mwi quava Karaisiraqatairo qovara hira.

<sup>9</sup> Karaisiva vaisi mwamwanta vataava variharo mwanriqvanto Kotiva qati variqi vi okyarava, ekyaa mwi okyarava Karaisiraqi vahirara tita,

<sup>10</sup> nkye Karaisiravata kuaaqi variqi viqata nkye qio varia nraakyе qorahuama variqi vita. Nyaamwunivata mwatanivata variqata mpo inraikya mpo inraikyaqaa ntaqikyi varihua variavaro Karaisiva mwihua nraatara kyero vuni varivama variro.

<sup>11</sup> Nkye taaqau vita Karaisiravata kuaaqi variavaro mwiva nkyiqitairo qora kyaiqa teqa kyero kyaira. Mwiva hia Iutaa vaisivanto nai mwaanra qua rieqaro qoraisi nraaqiara mwamwanta toqa kyaintema kyero nkyi mwamwanta toqa kyaira. Mwiva nkyiara hia api vu nraato tiqata uaqia hi kyaiqara utuate tiro, nkyi mwutukyaqitairo uaqia hi kyaiqara toqa kyaira.

<sup>12</sup> Nkye haaru nramanri vareqa Karaisiravata varuvaro mwi entara nkyi Karaisiravatama kyeta quntamwa tora. Nkyi quntamwa tovata nkye Kotiva Karaisira qutu vuraqitairo qati vara sivuma kyorara kepukyaqama kye riemwaqi quavarora tiro, mwiva Karaisira vatama kyero nkyivata quntamwa toraqitai qati vara sivuma kyora.

<sup>13</sup> Haaru nkye qora kyaiqa nraahu utuqi vurara tita, nkye qutu vuhua votima kyeta varura. Mwi entara nkyi mwutukyaqitairo hia nkyi qora kyaiqa toqa nyatovatara tita,

nkye hia qioqama kye varura. Qio mwaa entara Karaisira vatama kyero Kotiva tiri qati vara sivuma kyero ekyaa tiri qora kyaiqa mwi quara nruka timwa taira.

<sup>14</sup> Tire Kotira qua, mpo qua mpo qua nteqa kye variavararo mwia kyaara tiriqa qua nronra vahuvare Kotiva mwi quara vara kyero Karaisira ruto kyatariraqaa mwi quaravata rutovaro Karaisiva tiriara rieqaro qutu viro tiriqaqua vahura taiqa kyora.

<sup>15</sup> Karaisira kyatariqaa hiritovaro mwiva mwiaqaa variqaro tiriqaqua vahura taiqa timwa torara tiro, Saataanivavata, mwia henahua vaana vunyahuavata, tiriqaqua vateva hia vahura. Hia vahuvare Karaisira kyatariqaa hiritovaro variqaro nraakye qora suqaa mwihua kepukya nteqa kyero mwihua nraatara kyora.

<sup>16</sup> Karaisiva mwitaa hurara tiro, haunri mpovanto nkyi ntavaaqaviqaro nkyiara haaruua mwaanra qua rieqata nkye mwi kyararave mwi nramanrinrave nrevorave, mwi entara mwi entara nronra entaqaa mwitaa mwitaa hiate, qaraakya tora nri ntaaninraqaa mwitaa mwitaa hiate, Iutaa mwaanra entaqaa nkye mwitaa mwitaa hiate, qiankyorave. Mpovanto qovarama viro mwitaa mwitaa hiate tiqaro nkyi ntavaaqavu kyaarivaarave.

<sup>17</sup> Ekyaa mwi okyarava quaahaqa vahi okyaravama vahiro. Karaisiva qovarama viro ekyaa mwi okyarara taiqa kyairama. Ekyaa mwi okyarava mamanaanru votima kyero vaharo Karaisiva qutaa inraikya mwivama variro.

<sup>18</sup> Mpo ihua nkyiara tiqata, Nrivaqe tetu nrutu vara mwataniqamaqi viqata nyaamwunyaahua nyutu tuaaheraqi quare, ti variara. Nkye mwi vaisihua qua riemwaqi viqata apiqama vivora. Mwi vaisihua tire ruvaata taqaurahuave tiqata qumina mwatanyaa okyara riemwaqita mwihua nkyiari nyutu nraahu tuaaheraqi vi variara.

<sup>19</sup> Mwi vaisihua Karaisira qaqlira kyeta hia mwihua kuaaqi variara. Karaisiva tiri qita votima kyero varihata tire mwia mwamwanta votima kyeta varunanne. Mwamwantave, kyuqu kyauquve, nrunrunruve, ekyaa mwi inraikyava qiatavata taaqau viro vahiraro qoma vaisivanto kepukyaqa hiro nronra tuemwa quananro. Mwia votima kyeta tire Karaisiravata taaqauvi kuaaqi variarera, tire mwia mwamwanta variqata qoma nronra tuaananra. Tiriara mwihua mwitaamaqi viqata nronra tuemwa quate tiro, Kotira mwutukya vahira.

<sup>20</sup> Nkye Karaisivavata qutu vurara tiro, mwatanyaa okyara mpo okyara mpo okyaravanto hia nkyiqa ntaqikyihata nkye qatinani huvantu vita variara. Nkye qatinani huvantu vi variahuara titi, nkye nanraqamave mwatanyaa okyarara nronraqama kye riemwaqi vi varita?

<sup>21</sup> Mpo hiahua nkyiari riemwa kye tiqata, Hia mwi inraikyara tu varaante. Hia mwi kyarara nraante. Hia mwi inraikyara tu vareqara taqaante, ti variara. Mwihua mwitaa qiavata nkye nanraqamave mwihua qua riaavo?

<sup>22</sup> Mwihua mwitaa ti varia inraikyava, mwi inraikyava pataqia vahi inraikyava vaharo vaisivanto mwi inraikyara vara kyaiharo taiqa vi inraikyava nraahuma vahiro. Qumina vaisivanto nkyiari riemwa kyeta mpohua timwa nyiqata tiri qua vataqi quate ti varia quava nraahuma vahiro.

<sup>23</sup> Airi nraakye qoravanto qao timwa tai quara rieqata kyuqe quave qiavarovata mwi quava hia kyuqe quama vahiro. Vaisivanto mwi quara riemwaqiro viqaro nai nrutu vara mwataniqamaqiro viro kyara aurero nai mwamwanta ntuqutuqiro viro mwitaamaqiro quari okyarava hiama qio mwia kyaahaqa hiananro. Mwi quara riemwaqiro quariva qati nraahuma uaquia hi kyaiqara utuqiro quananro.

<sup>1</sup> Kotiva Karaisiravatama kyero nkyi qati vara sivuma kyaihata variarara tita, nkye nyaamwuni vahi inraikyarara nronraqama kye riemwaqita quata. Nyaamwuni Karaisiva kepukyavanto Kotira kyauqu kyaatutani mwatakyaa viro varira.

<sup>2</sup> Nkye nyaamwuni vahi inraikyarara nronraqama kye riemwaqi viqata hia mwatani vahi inraikyarara riemwaqi quata.

<sup>3</sup> Nkye Karaisiravata qutu quarara tita, nkye Karaisiraqi variqatama nkye Kotiravata kuaaqi varita.

<sup>4</sup> Karaisiva qati variqiro vi varirara tita, nkyevata qati variqi vivara. Mwiva nraakiara qovara hirata nkye mwi entara mwiavata qoqaa variqata mwiva kepukyaqama kyero kyuqema kyero variqi vintema kyeta nkyevata kyuqema kye variqi vivara.

<sup>5</sup> Mwi quara rieqatama nkyi su nyaato mwutukyaqitairo mwata mwaaqaanaa kyaiqa api kyaiqa varera ru taiqa kyaivarao ekyara taiqa quari. Nraakye qora api qaraqita nrohi okyalararave, nraakye qoravanto nkyiari mwamwantaqa hia kyuqema ntumwaqi okyalararave, mpohua nraata vaatiqama kye uaqlama kye vu taqe okyalarave, qora kyaiqa vararerera uti varirave, mpo inraikya mpo inraikya vara ntuvaantua hirarave, mpo inraikya mpo inraikya vara ntuvaantua ihua, mwihua unra mwanriqa nrutu tuaahere variahua votima kye variqata Kotira qaqlira kye variara.

<sup>6</sup> Nraakye qoravanto ekyaa mwi kyaiqara uti varivaro Kotira mpoqama kyero raraqa tairaro mwihuaqaa nronraqama kyeroma qua vataananro.

<sup>7</sup> Nkyevata haaru variqata mwi aanranraqaa nraahu variqi vi varurave.

<sup>8</sup> Mate mwaa entara nkye ekyaa api okyara mwitaa hiani okyalarara qaqlira kyeta nrohiata. Raraqa taani okyalararave, inronra hiqata ntaqirera uti okyalararave, mpohua nramwutaaqa hi okyalararave, ekyaa mwi okyalarara qaqlira kyeta nrohiata. Uaqia hi quavave, quaaru tivave, nkyi nyooqitairo nriankyora.

<sup>9</sup> Haaru nkyi su nyaato mwutukyavanto uaqlama kyero vahuvata nkye api aanraqaa nraahu nrohura. Mwiaqaatai nkye api nrohu aanranra qaqlira kyeta variarara tita, hia nanrianra nanrianra unra qua qiata.

<sup>10</sup> Mwaa entara Kotiva nkyi su nyaato mwutukya vara kyero qaraakya utu tairara tita, nkye kyuqema kye variqi vivaro Kotiva nkyi vara kye qaraakya utuqiro virata nkye Kotira nraantantamwa kye variqata Kotira okyara kyuqema kye taqaata.

<sup>11</sup> Kotiva nkyi qaraakya utu kyero vataivara tiro, mwiva hiama nkyiara tiqaro, E mpo mwatanaave, e Iutaave; e mwamwanta toqa kyai vaisivave, e hia mwamwanta toqa kyai vaisivave; e nronra mwatanaave, e pata mwatanaave; e rupa taihara variara vaisivave, qati variara vaisivave; qiananro. Kotiva hia nkyi tukyama kyero mwitaa tiraitiro, nkyiara nkye Karaisiravata kuaaqi variahuvema qiananro. Karaisiva ekyaa Kotira nraakye qoravata kuaaqi variqiro vi varira.

<sup>12</sup> Kotira mwutukyavanto nkyiara vaharo nkyiara mwihua ni nraakye qora variqata mwihua ni kyaiqa nraahu varaqi quate tiro, Kotiva nkyi nai kyaama taihata nkye variara. Nkye mwitaa hi variarara tita, nkye nanrianra nanrianra po kye tiqata kyuqemaqita quata. Hia nkyeta nyutu tuaaheraqi viraitita, mpohuara qihakymaqaq vivaro hia pupohairata variata.

<sup>13</sup> Nkye hia inronra hiraitita, nai kyaahaqa hi nai kyaahaqa hiqata variqi quata. Nkyiqitairo mpovanto nai qata vakyaara mpo qua timwa kyairera, mwi vaisirara qamwanrama kyera ena qata vakyaara qiove i qua qaqlira kyauqo hia qua vaiho qianta qata. Nkye mwitaa timwaqita quata. Tiri nronravanto Karaisiva nkyi qua qaqlira kyero nruka nyataintema kyeta nkyevata mpohua qua qaqlira kyeta taunru kyaata.

<sup>14</sup> Nkye ekyaa kyuqe kyaiqa mwia varaqi viqata nanrianra nanrianra mwutukya vahirata variata. Nkye mwitaama variqi vivera, nkye kuaara nraatima variqi vivara.

<sup>15</sup> Karaisiva nkyi mwutukya qihaakyama nyataihata nkye variarara tita, nkyi mwutukyaqitai qihaakya hi varirata variata. Mwitaama variqata kuaara nraati Karaisira mwamwanta votima kyeta variqita quate tiro, Kotiva nkyi nyaanrama taira. Mwianra rieqata Kotirara kyuqeve timwaqi quata.

<sup>16</sup> Kyaivaro Karaisira quavanto anomia kyero nkyi kyaahaqa hiari quava nkyi su nyaato mwutukyaqi vahirata nkye mwi quarara nraahu riemwaqi viqata nrohiata. Kyuqe vu nraato tu kyeta Kotira qua okyara nai timwa mwi nai timwa mwi hiqata kyuqe aanra nai nraamwute nai nraamwute hiqata variata. Kotirara qamwateqata ihi qiata. Kotira qua ihiqama kye timwaqi quata. Kotira nrutu tuaahereqa mpoqiaavata ihi timwaqi quata.

<sup>17</sup> Nkye mpo kyaiqa mpo kyaiqa varaqi viqatave, nkye mpo qua mpo qua timwaqi viqatave, Karaisira nrutuara riemwaqi viqatama mwitaa hiata. Karaisira nrutu nteqatama Kotirara kyuqeve qiata.

### *Nkye Kotirara rieqata mwataama kye qua riemwaqi viqata variqi quata*

<sup>18</sup> Nte nkyi nraakye vaati vataahuara qiarita riaata. Nkye nkyeta saatimwanra qua riemwaqita quata. Nkye Karaisira nraaqiara variahuara tita, nkye mwitaamaqita quata.

<sup>19</sup> Nte nkyi mwihua saatiara qiarita riaata. Hia nkyeta nyaatamwanra uaqiamia nyataraitita, mwihuara mwutukya vahirata variqita quata.

<sup>20</sup> Nte nkyi nraaqiarara qiarita riaata. Nkye mpo enta mpo enta nkyeta nyohua sohua qua rieqata variqi quata. Nkye mwitaamaqi vivaro Kotiva nkyiara qamwateqaro variananro.

<sup>21</sup> Nte nkyi nraaqiara sohuara qiarita riaata. Nkyi nraaqiaravanto hia qaiqaavata kyuqe kyaiqa varaanranrave tivo tita, hia mwihua inronramaqita quate.

<sup>22</sup> Nte nkyi kyaiqa vaisiara qiarita riaata. Nkye nkyitaqaa ntaqikyi vaisihua qua rieqata kyaiqa varaata. Hia vaisivanto qamwata nyataate tita, mwihua suqaa nraahu variqata kyaiqa varaata. Nkye tiri vunyaa vaisi Karaisirara nronraqama kye riemwaqi viqata mwihua kyaiqa ntapihi kye varaataa hirata varaata.

<sup>23</sup> Nkye vaisi mponi mpo kyaiqa vareqata nkye Karaisira kyaiqama varauro timwa kyeqata kyuqema kyeta varaata.

<sup>24</sup> Mwaa quara riaata. Nkye vaisi mponi kyuqema kye kyaiqa vare varivaro nraakiara tiri vunyaa vaisivanto nkyi kyaiqara rieqaro mwia qia nkyita kyoqaa nyinrata nkye mwiva nai nraakye qorara rieqaro nkyiari kyaama taani inraikyara varevara. Nkye Karaisira kyaiqa vaisi variarara tiro, Karaisiva nkyi kyaiqara rieqaro mwia qia kyoqaa nkyita nyiananro.

<sup>25</sup> Mwaa entara vaisivanto uaquia hi kyaiqara utuqiro quaninra nraakiara Kotiva mwianra rieqaro nai kyoqaa ntapihi kyeroma nai mwiananro. Kotiva hia mwi vaisira nrutuara rieqaro qamwata mwataraitiro, ntapihi kyeroma mwia qua tukya hiananro.

## 4

<sup>1</sup> Nte nkyi kyaiqa vaisiqa ntaqikyi variahuara qiarita riaata. Nkye ntapihi kyeqata nkyeta kyaiqa vaisiqa ntaqikyiqi quata. Nkyitaqaavata nyaamwuni variva ntaqikyi varirara tita, nkyeta kyaiqa vaisiqa kyuqema kye ntaqikyiqi quata.

### *Mwaa quaravata riemwaqita quate tura*

<sup>2</sup> Hia qoriri hiraitita, mpo enta mpo enta Kotirara aakyara ntamwaqita quata. Hia vaite variqata Kotirara aakyara tiraitita, su nyaato tu kyeta aakyara nteqata Kotirara kyuqeve timwaqita quata.

<sup>3</sup> Nkye Kotirara aakyara nteqata tiriara mwihua kyaahaqa hirata Karaisira qua timwa nyiqi viva aanra vahiarive qia. Nte Karaisirara uqeta tai quara nraakye qora

timwa nyiqina vuvama varina. Mwi quara nraakyе qora timwa nyunra kyaara ni rupa kyaavananma mwaaqi varina.

<sup>4</sup> Qio nianra rieqata Kotirara aakyara ntaivaqena nte ntapihi kye Karaisira qua nraakyе qora timwa nyianrita ntapihi kye riaata. Haunri nte api qua timwa nyiankyora.

<sup>5</sup> Karaisira qua hia rie nraakyе qorahua varivata nkye mwihua suqaa ntapihi kye nrohiata. Hia nkye mwihuavata qumina variraitita, nkye taqaivaro Karaisira qua timwa nyi aanrava vahirata nkye Karaisira qua mwihua timwa nyiata.

<sup>6</sup> Nkye mwihuavata qua tiqata hia mwihua qoriri hiani quara tiraitita, mwihua kyakya hiani quara tivata mwiaqaatai mwihua mpo quara nkyi kyapara hivata nkye qio nkyiari timwa nyintema kyeta variata.

#### *Qua mwanteqaro ekyara qua tura*

<sup>7</sup> Tikikaasiva ni mwakyaakya nkyi timwama nyiananro. Tikikaasiva tiri tiqata vakyaa kyuqeva variqaro ntapihi kyeqaro tirivata kuaa kyaiqa Karaisira kyaiqa vare varira.

<sup>8</sup> Nte mwia titaariro mwiva nkye varinani uro tiri mwakyaakya nkyi timwa nyinrata nkyi mwutukyavanto kyuqe hirata qamwateqata variata.

<sup>9</sup> Nte mwiaavata Onisimaasiravata titarita vivara. Onisimaasiva tiri tiqata vakyaa kyuqevama. Mwiva quaaqama kyero ekyaa kyaiqa vare varivama variro. Mwiva nkyiqinaavama variro. Mwitanahua vihua uro mwaini vahi mwakyaakyara nkyi timwa nyivara.

<sup>10</sup> Arisitakaasiva mwiva nivatama kyero rupa taava, mwiva nkyi qua mwantero. Vanavaasira qata Maakivavata nkyi qua mwantero. Nte vaakya nkyiara tiqana, Maakiva nkye hinani virera nkye mwia qamwata mwateta mwia vitaate, tura.

<sup>11</sup> Iosuaava mwia mpo nrutu Iasitaasivave qia vaisiva, mwivavata nkyi qua mwantero. Kotira nraaqiara Iuttaaqitai qio taarampo mwinramwuhua nraahu nivata variqata Kotiva ntaqikyiani quarara nronraqama kye rieqata ni kyuqema kye kyaahaqa hi variara.

<sup>12</sup> Epaparaasivavata nkyi qua mwantero. Mwivavata nkyiqinaava Iesusi Karaisira kyaiqa vaisima variro. Mwiva nkyiara rieqaro kepuqyaqama kyero Kotirara aakyara nte varira. Mwiva nkyiara Kotirara aakyara ntero tiqaro, Kotio, e mwihua kyaahaqa hirata mwihua hia pupohairata kepuqyaqama kye variqata hia nraaqiara taaqa variraitita, kepuqya nraakyе qora variqata i qua kyuqema kye riemwaqita quate, tira.

<sup>13</sup> Nte taqaqaro mwi vaisiva kepuqyaqama kyero kyaiqa vareqaro nkyivata Reotisiaani variahuvata, Hiraporisini variahuvata, kyaahaqa hi variro.

<sup>14</sup> Rukuva tiri totaa kyuqevavata, Ntimaasivavata, nkyi qua mwanteta.

<sup>15</sup> Tiri tiqata vakya Reotisianni variahuvata mwihuara rieqana mwihua qua mwanta taura timwa nyiata. Nraakyе mpo Nimpaaaravata mwia nraamwuqi ntuvaantua hiahua, mwihuaravata nte rieqana qua mwanta taura timwa nyiata.

<sup>16</sup> Nkye qara mwaa kyaara ntumwa kyeta Kotira nraakyе qora Reotisiaqinaahuavata nyivata mwihuavata kyaara ntuata. Mwiaqaataita nte qara mpo, Reotisiaqinaahuani vara kyaura, mwia nkyevata vara kyeta kyaara ntuata.

<sup>17</sup> Nkye Akipaasira mwitaama kye timwa mwiata. Tiri nronra Karaisiva i kyaiqa mwinra quaaqama kyera varaqira vira uro taiqa kyaante, qiata.

<sup>18</sup> NTE PORUVAMA, ntena kyauquqo qara ntiganaama nkyi qua mwante varuqo. Ni rupa taavana mwaqqi varuraravata hia taunru kyaata.

Kotiva nkyi kyuqema nyataarive tuqo.

## 1 TESARONAIKA

### **Poruva Tesaronaikaaqinaahuani vunyaa qara vara kyora**

Iesusira qati vara sivuma kyovaro nyaamwuni uro varuvaro 20 ihive nritarovaro Poruva mwaa quara qara ntumwa tora. Poruva Tesaronaikaaqi varuhua Karaisira qua timwa nyuvata mwihua mponramwuvanto Karaisira quara qutaave timwa kyeta varura. Mwihua Iesusira nraakye qora variqi vuvata mwia kyaara mpo uhua mwihua uaqiamaqita vuvaro Poruva mwihuara hia pupohairata kepukyaqama kye variqi quate tiro, mwaa quara qara ntumwa nyatora. Poruva Karaisiva tumuani quaravata mwihua ntapihi kye timwa nyunra.

<sup>1</sup> Nte Poruvama. Ntevata Sairaasivavata Timotivavata tirenramwu nkye Kotira nraakye qora Tesaronaikaaqi variahua nkyinima qara ntumwa teta. Nkye tiri tiqora Kotiranivantovata Iesusi Karaisiranivantovatama varita. Kotiva nkyi kyuqema nyatairaro nkyi mwutukyaqitaira qihakya hirata variata.

#### *Tesaronaikaaqinaahua Iesusirara riemwaqita vurara tura*

<sup>2</sup> Tire mpo enta mpo enta Kotirara aakyara nteqata nkyiara kyuqeve timwa kyeta nkyi nyutu nteqata Kotirara aakyara nte varunanra.

<sup>3</sup> Tire Kotira vuqaa variqata nkye vare varia kyaiqara hia taunru kyaraitita, tire ntapihi kyaurata nkye Karaisirara quttaa mwivave timwa kyeta mwiaqaatai nkye mwia kyaiqa varaqi quara. Nkyi mwutukyavanto Karaisirara vahata nkye kyuqema kye mwia kyaiqa vare variara. Iesusi Karaisiva tiri vunyaa vaisivanto tumuaninra, nkye mwia vekya hia pupohaihata variqi vi variara.

<sup>4</sup> Tiri tiqata vakyaa tuaavo, tire ntapihi kyauraro Kotira mwutukyavanto nkyiara vaharo nkyiara ni nraakye qora variate tiro, mwiva nkyi nai kyaama taira.

<sup>5</sup> Haaru tire Karaisira qua nkyi timwa nyiavarata nkye hia mwi quarara qumina quave tiraitita, mwi quarara kepukya quave tuvaro Kotira mwanraquravanto nkyi kyaahaqama kyovata nkye mwi quarara qutaave timwa kyeta kepukyaqama kye mwi quara riemwaqita vura. Mwi entara tire nkyiara rieqata nkyi utaqa nrohi variqata kyuqema kye ntapihi kye nrohiavanana mwia nkye ntapihi kyaarama.

<sup>6</sup> Mpo uhua nkyi uaqiamma nyateqa nkyiara hia mwi quara riaate tuvata nkye hia mwihua qua riaraitita, Karaisira quara qutaave tuvaro mwiaqaatairo Kotira mwanraquravanto nkyi mwutukya kyuqema nyatovata nkye qamwateqa variqata tire hurantema kyeta Karaisira tiri vunyaa vaisi vataqita vi varura.

<sup>7</sup> Nkye mwitaamaqi vuvata Karaisirara qutaave tuhua Masentoniaanivata Akaiaanivata varuhua nkyi taqeta, Kyai tirevata mwitaa hiare, timwa kyeta mwitaamaqi vurama.

<sup>8</sup> Nkye Karaisira qua rieta mwiaqaatai mpohua mpohua timwa nyiqi quavar mwi quava nkyiqitairo viro nrinro Masentoniaani viharo Akaiaani viharo mwiaqaatairo ekyaa mwatani viro nrinroma virara tita, ekyaa mwi mwatanaahua nkyiara tiqata, Mwihua kyuqema kye Kotira qua riemwaqi vi variarave, ti variara. Nkyiqitairo mwi quava viro nrinroma virara tita, tire qumina mwi quara nkyita timwa nyianronra.

<sup>9</sup> Haaru nkyivata variqata mwitaa mwitaa hiavana quara, mwi quara Akaiaqinaahuavata, Masentoniaqinaahuavata timwa nyianre tita taqaurata mwi mwatanaahua nkyiari vaakya mwi quara ntapihi kyeta nkyiarivanto tiri timwa timwunra. Mwi entara tire nkyivata uto variavarata nkye unra mwanriqanra rieqata utu kye vato inraikyara qaqlira kyeta tuqasaa vita quttaa mwanriqavanto qati variqi vi variara, Kotira mwia kyaiqa nraahu vararera uti varura.

<sup>10</sup> Mwitaa hiqata nkye mwia mwaaquvanto nyaamwusairo qaiqaa tumuaninra vekya variara mwi quara mwi quara mwihua nkyiarivanto tiri timwa timwiavata riaunanra.

Mwia mwaaquvanto qutu vuvaro Kotiva mwia qaiqaa qati vara sivuma kyova, Iesusiva, mwivama tiri vaitutuma kyaarivama variro. Nraakiara Kotira raraqa tairaro ko qiani entaraqaa Kotiva tiriqaavata qua vataankyo tiro, Iesusiva tiri vaitutuma timwa taananro.

## 2

### *Poruva nai toharero Tesaronikaaqi kyaiqa varorara tura*

<sup>1</sup> Ni kata pakyaa tuaavo, haaru tire nkyivata uro variqata nkyi kyaahaqa hura kyaiqava hia qumina vivira. Nkye mwia ntapihiara.

<sup>2</sup> Haaru hia nkye hunani quavana entara tire Piripaini variavarata mwi mwatanaahua tiri uaqima timwa tetu kyaurira inraikya vara timwuvata tire nriqa vu inraikyara varavananra nkye mwi quara ntapihi kyaara. Tire Piripai kyeta nkye hunani utontaavarata vaisi airivanto tiri qoraqama timwa tetu hia mwi quara qiate ti varuvaro Kotiva tiri kepukya timwuvata tire hia aatu hiraitita, Kotira qua Iesusira mwakyaakya nkyi timwa nyiavananra.

<sup>3</sup> Tire nraakye qora qua timwa nyinrenra hia api qua rieqata mwi quara timwa nyiavananra. Hia tire mpohuavata api nrohiqata uaquia hi inraikyara utuana quara timwa nyiavananra. Hia tire nraakye qora unra utu nyatarera qua timwa nyiavananra.

<sup>4</sup> Qaqao, Kotiva tiri mwataarama kyero taqero qioma nkye ni qua kyuqera nraakye qora timwa nyivarave tihata tire mwi quara nraakye qora timwa nyi varunanza. Tire hia nraakye qoravanto qamwata timwa taate tita, qua timwa nyunanza. Kotiva tiri qamwata timwa taarive tita, tire mwia qua nraakye qora timwa nyi varunanza. Tire vu nraato tunanravata Kotiva tukyama kyero taqaivama variro.

<sup>5</sup> Nkye tiri okyara taqamwa kyaara. Tire haaru nkyivata nkyi mwaatani uro variqata hia tire kyuqe kyuqe timwaqi viqata qiavananra. Kotivavata taqe varuvata hia tire tiqata, Kyai tire kyuqe kyuqe timwaqita quarata mpo inraikya timwiate, timwa kyeta qua nkyi timwa nyiavananra.

<sup>6</sup> Hia tire nkyiarave, mpohuave, tire nrutu tuaaheraate qiavananra.

<sup>7</sup> Tire Karaisiva nronraqama kyaihua variqata nkyiara kepukyaqama kye tiqata, Nkye tiri mwitaa mwataama timwa taate, qiara aanrava vahuvatavata, tire hia mwitaa hiraitita, tire qihaakyama kye nkyiqi kyaiqa varavananra. Mwia nrova nai nraaqiaraqaa kyuqema kyero ntaqikyintema kye tire nkyiqa qihaakyama kye ntaqikyiavananra.

<sup>8</sup> Mwi entara nkyiara tiri mwutukya vahuvata tire Kotira qua Karaisira mwakyaakya nkyi timwa nyita nai mpoqivata nkyiara tiri mwutukya vahuvata tire nkyivata variqata nkyi nraahu kyaahaqa hiarahua variavananra.

<sup>9</sup> Tire mwi entara toqaamwu tu kyeta kyaiqa varavananra mwia nkye ntapihi kyaara. Tire Kotira qua Karaisira mwakyaakya nkyi timwa nyiqi viqata haunri nkyi muaanra nyianro tita, entaqivata iheravata toqaamwu tu kyeta qati nraahu kyaiqa varaqi vi variavananra.

<sup>10</sup> Nkye Karaisira quara quataave tuvata tire nkyivata variqi quavarata nkyevata Kotivavata taqovata tire kyuqema kye hia apiqama kyeqata nkyivata variavananra.

<sup>11</sup> Mwia qova nai nraaqiaraqaa kyuqema kyero ntaqikyintema kye tire nkyi kuaiqia kuaiqiaqaa ntaqikyiqi quavananra.

<sup>12</sup> Nkyi pupohaankyo tita, tire kepukya quaquo nkyi su nyato nyita, nkyi mwutukya qihaakyama nyateta, nkyiara po tiqata aanra kyuqeraqaa nraahu vivaro Kotiva nkyiara qamwateqaro variarive qiavananra. Nkye Kotiva nai ntaqikyi mwatukyaraqi

uro variqata mwia peqa okyara taqaate tiro, Kotiva nkyi nyaanrama tairara titama, tire mwi quara mwi quara nkyi timwa nyita.

<sup>13</sup> Tire Kotira qua nkyi timwa nyiavarata nkye mwi quarara hia qumina vaisivanto timwa tai quarave tiraitita, mwi quara Kotiva timwa tairave tura. Nkye mwitaa hiavata tire Kotirara kyuqeve timwaqi vunanra. Qio quataaqama kye mwi quava Kotira quama vahiro. Nkye qua mwianra quataave qiavaro mwi quava nkyiqi vahiqaro nkyi kyaahaqama nyate varira.

<sup>14</sup> Ni kata pakya tuaavo, Iutiani Kotiva nyaanrama tai nraakye qorahua, mwihua Iesusi Karaisirara quataave tuvata mwia kyaara nkyiari nramwunaahua mwihua uaqiamaqita vuvata mwihua nriqa vu inraikyara varaqi vi varura. Mwihua nraantamwa kye nkyevata Karaisirara quataave qiavata mwia kyaara nkyita nramwunaahua nkyi uaqiamaqita quavata nkye nriqa vi inraikyara varaqi vi variara.

<sup>15</sup> Iutaavanto Iesusira ru kyora. Haaruvata kuua mwihua nraahu poropeti vaisi mponramwu ru kyora. Mwaa entaravata mwi mwatanaahua nraahu Karaisira qua kyaara tirivata uaqima timwate variara. Iutaavanto mwitaamaqi viqata mwihua Kotiva hia qamwataani kyaiqara nraahu varaqi viqata ekyaa mpo mwatanaahua nramwutaaqa hi variara.

<sup>16</sup> Tire Kotiva nraakye qora huvantu nyataani quara mpo mwatanaa mpo mwatanaa timwa nyianre turata Iutaavanto tiriara hia mwi quara qiate tita, tiri aanra huvaitara uti variara. Mwihua mwitaamaqi quavaro mwihua qora kyaiqvanto nritarero vaiharo Kotira raraqa taiharo qiove timwa kyero mwiaqaatairoma mate mwihua ntuquuti variro.

### *Poruva qaiqaa mwihua uro taqaaninranra tura*

<sup>17</sup> Ni kata pakya tuaavo, Iutaa vaisivanto tiri uaqima timwa tetu nkyiqitai tiri titovata mwia kyaara tire mpo entanramwu variqata tiri mwutukyavanto uaquia huvata nrainranra nraaqiara votima kye variqata hia nkyi siri taqaraitita, nkyiara nronraqama kye nraato tiqata varunanra. Tiri mwutukyavanto anomia kyero uaquia huvata tire mwi entara, Kyai nrumu ntanteta uro nkyi siri taqaare, timwa kyeta

<sup>18</sup> nkye hunani quananra aanra puua hiavararo hia vahuvata variavanana. Nte Poruva qaiqaavata qaiqaavata nrumu ntantena uro nkyi taqrera hiavararo nte quari aanrava hia qioqa hora. Saataaniva tire quana aanranra tita tovata hia nkyi uro taqaavanana.

<sup>19</sup> Qio nraakiara tiri vunyaa vaisivanto Iesusi Karaisiva qaiqaa tuminraqe tire mwi entara mwia vuqaa sivita variqata tire tahu taqaananra vekyave mate tire varita? Mwia nkyeve. Mwi entara tire tahu taqeqe mpoqama kye qamwataananra? Mwiavata nkye nraahuma. Tire tahu taqetave tiri kyaiqvanto hia qumina viviho qiananra? Tire mwi entara nkyi Tesaronaikaa nraakye qora taqeqatama mwi quara mwi quara mwitaa qiananra.

<sup>20</sup> Nkye Kotira nraaqiara kyuqema kye variarara rieqatama tire Kotira nrutu tuaahereqa qamwateqata varita.

## 3

### *Poruva Tesaronaikaani Timotira titorara tura*

<sup>1</sup> Tire nrumu ntanteta uro nkyi Tesaronaikaaqinaahua taqaare tita, aanranra puaamaqi viqa taqaavararo hia vahuvata haunri tire mpuahaama varita hia nkyi mwakyaakya riaarorave timwa kyeta kyai tire tetaraa mwaini Atenini variqata

<sup>2</sup> Timotira titaararo mwiva uro nkyi taqaarive qiavanana. Timotiva tirivatama kyero Kotira kyaiqa vareqaro Karaisira qua kyuqe mwakyaakya nraakye qora timwa nyi variva. Timotiva mwiva uro nkyi su nyaato nyinrata nkye kepukyaqama kye

variqata Kotira qua kyuqema kyeta riemwaqi quate tita, mwia titaavararo mwiva nkye hunani vurama.

<sup>3</sup> Vaisi mponramwuvanto nkyi uaqiamma nyataivata nkyiqitai mpo ihua pupohairata Kotira qaqlira kye vivo tita, Timotira titaavararo mwiva nkye hunani vurama. Nkyevata tirevata Iesusira nraaqiara varunanranra tita, tiri uaqiamma timwa teva vahiananro. Mwia nkye ntapihi kyaara.

<sup>4</sup> Haaru tire nkyivata variqata nraakiara mwinro mwaanro tiri uaqiamma timwate quara nkyi timwa nyiavarata nkye mwi quara riora. Qio mate nkye taqaavaro quutaama mwi inraikyava qovara hiro.

<sup>5</sup> Nkyi uaqiamma nyataivaqe nte mwaini mpuahaama qumina variankyo tina, kyai nte Timotira titaariro mwini quarive qiavara. Nkye Kotira qua rieve variavo, hiave rie variavo, tina, Timotira titaavaro nkye hunani vura. Nte nkyiara tiqana, Saataaniva mwihuara uaqia hi kyaiqara utuate tirata mwihua mwia qua rieta tiri quavata tire mwihuaci kyaiqa vara taunanravata qaqlira kyevorave tina, Timotira titaavara.

#### *Timotiva nkyi mwakyaakya kyuqe mwakyaakyama nrumu timwa mpiho, tura*

<sup>6</sup> Mate Timotiva nkye hianasairo uro ntantero nrumu nkyi mwakyaakya kyuqe mwakyaakya timwa mpihanama riaura. Mwiva nkyiara tiqaro, Mwihua Kotira qua riemwaqita vima variavo. Nanrianra nanrianra mwutukya vaihatama variavo. Mwihua tiriara riemwaqi viqata tiriara qamwateqatama variavo, tiro. Tire nkyi siri taqaataa ihata varurantema kye nkyevata tiri tiviri taqaataa ihata variavoma, tiro. Timotiva nkyiara mwitaa mwitaa tihatama riaunanra.

<sup>7</sup> Ni kata pakyaa tuaavo, tire mwaini variqata ekyaa mwi muaanranra varaqi vi varuraro Timotiva nkye Iesusirara kepukyaqama kye riemwaqi quara, nkyi mwakyaakya kyuqe mwakyaakya tihata tire mwi quara riauraro tiri kepukyu timwiho.

<sup>8</sup> Nkyi hia pupohaihata kepukyaqama kye nronravanto ti quara riemwaqi quaraqaatai tire qioma kyuqema kye qati variqi quananra.

<sup>9</sup> Timotiva nkyi mwakyaakya tiri timwa timwihanro tiri mwutukyaqitairo anomayero kyuqe ihata tire Kotira vuqaa variqata nronraqama kyema qamwateqa varita. Qikye, nkyiara qamwateqata nai Kotirara nataamave qamwataananra?

<sup>10</sup> Qio tire qaiqaa nkyi uro taqeta nkyi kyaahaqa hiqata nkye Kotira qua hini qua hia riaara, mwi quaravata nkyi timwa nyianrata nkye Kotira qua ekyaa qua riemwaqita quate, titama tire entaqi ihera nkye hinani quana aanranra tinraamwutaante timwa kyeqata Kotirara aakyara nte varunana.

<sup>11</sup> Kotiva tiri tiqova naivata Iesusi Karaisiva tiri vunyaa vaisivantovata aanra tinraamwutairae qiove qiananra.

<sup>12</sup> Kyaivaro tiri vunyaa vaisivanto nkyi kyaahaqa hirata nkye nanrianra nanrianra mwutukya vahirata variqi viqata uro ekyaa nraakye qoraravata mwutukya vahirata variata. Nkye mwitaamaqi vivera, tiri mwutukyavanto nkyiara mpoqivata vahintema kyeroma nkyi mwutukyavanto mpohuara vahiananro.

<sup>13</sup> Mwiva nkyi kyaahaqa hiraro nkyi mwutukyavanto kepukyaqe hirata varivaro nraakiara Iesusiva tiri vunyaa vaisivanto nai nraakye qora kyuqehua kyapata tuminrata nkyevata mwi entara hia apiqa hi nraakye qorahua variraitita, kyuqe nraakye qoravanto nraahu variqataro tita, hia kyauriraitita, qioma tiri tiqora Kotira vuqaa sivita varivara.

## 4

#### *Mwataa hi aanranraqaa nrohi vaisirara Kotiva qamwateqaro varirave, tura*

<sup>1</sup> Qio ni kata pakyaa tuaavo, haaru tire nkyivata variqata nkyi timwa nyita mwataama kye aanra kyuqeraqaa nrohivar Kotiva nkyiara qamwateqaro variarive

qiavarata nkye mwi quara riora. Nkye matevata mwi quara rieqata nrohi variara. Tire teta vunyaa vaisi Iesusi Karaisirara rieqatama nkyiara po kye tita kepuuyaqama kye tiqata, Kotira aanraqaa mwitaa mwitaama kye nrohiate tunanra mwi quara nraahu riemwaqi viqatama anomakye mpoqiyavata mwi quara riemwaqi viqatama mwi aanranraqaa quaterama, turo.

<sup>2</sup> Tiri vunyaa vaisi Iesusi Karaisiva tiri nronraqama kyovata tire mwaanra qua, mpo qua mpo qua nkyi timwa nyiavana quara, nkye ntapihi kyaara.

<sup>3</sup> Qio Kotira mwutukyavanto mwataamama vahiro, Kotiva nkyiara hia uaqia hi kyaiqara utiraitita, aanra kyuqeraqaa nraahu nrohiquata api qaraqita nrohi okyarara qaqlira kyaatema tiro.

<sup>4</sup> Mwianra rieqatama nkyeta mwamwantara kyuqe mwamwantave timwa kyeta mwiaqotai uaqia hi kyaiqara utuarorave tiqata kyuqema kye nkyeta mwamwantaca ntaqikyiqi quata.

<sup>5</sup> Nkye variqata mpo mwatanaahua, hia Kotira qua riahua api nrohiantema kyeta nrohivora. Mwihua qora kyaiqara mwutukya ntihata mwi kyaiqara uti variara.

<sup>6</sup> Jesusira nraaqiara mpovanto mwi kyaiqara utirera, mwiva nai henanra uaqiam mwataananro. Mwiva hiavata mwitaa hiari. Mpovanto mwitaa hirera, Kotiva naivantomia mwi vaisira ruananro. Tire haaru kepuuyaqama kye nkye mwitaa hivorave tita, nkyi mwi quara timwa nyiavanana.

<sup>7</sup> Kotiva hia tiri nraakyne qorara nanrianra nanrianra api nrohiate tiro, tiri nraanrama tairavauma. Tiriara mwihua kyuqe kyaiqa nraahu varaqi quate tiro, Kotiva tiri tinraanrama taira.

<sup>8</sup> Tire mwaa mwi quara nkyi timwa nyuna quara mpovanto mwoqa mwianriva hia vaisivauma mwoqa mwiananro. Mwi vaisiva Kotiva nai mwanraqura nkyi nyi varira, mwiamma mwoqa mwiananro.

<sup>9</sup> Nkye nanrianra nanrianra mwutukya vaihata variara Kotiva vaakya nkyi nyaamwutairara tita, tire hia qaiqaa mwi quara nkyi timwa nyita mwitaa hiate qiananra.

<sup>10</sup> Nkye nanrianra nanrianra mwutukya vaihata variqata mwiaqatai ekyaa Jesusira nraakyne qora Masentonianaani variahuaravata mwutukya vaihata variara. Nkye mwitaamaqi vi variavata tire nkyiara mpoqiyavata mwitaamaqi quatemata turo.

<sup>11</sup> Nkye qihakyma kye varirara kepuuyaqama kye riemwaqita quata. Hia qumina aanraqaa nrohiquata mpore kyaiqa uro mwaati taqe nrumbu mwaati taqe hiata. Nkye nkyeta kyaiqa nraahu varaqita quata. Nkyeta kyauquqo kyaiqa vara kye kyara nreqata variata. Mwi quara haaru nkyi timwa nyiavanana mwivauma quata.

<sup>12</sup> Nkye mwitaamaqita viqata nkye qiomu nkyetavanto nkyetaqa ntaqikyiqata hia qumina uro mpohuara kyararave, mpo inrakyarave, nyaanru tiraitita, variqi vivata mpo nraakyne qoravanto hia Jesusira qua riehua, mwihua nkyi kyaiqa taqeta nkyiara kyuqe nraakyne qoravema tivara.

### *Tiri vunyaa vaisivanto qaiqaa tumuaninranra tura*

<sup>13</sup> Ni kata pakya tuaavo, hia Kotira qua riaa nraakyne qorahua ekyaara qutu vita hia qaiqaa siquananrave ti variavaro mwihua mwutukyavanto uaqia ihata variara. Nkyevata mwihua nraantantevo tita, tire ntapihi kyeta qutu vihua okyarara nkyi timwa nyinrenra.

<sup>14</sup> Jesusiva qutu viro mwiqitairo qaiqaa sivura mwi quarara tire quitaave tunanra. Tire mwi quarara quitaave tiqatarata tita, tire tiqata, Nraakyne qora Jesusirara quitaaw mwivave tihua, mwihua qutu vivaro Kotivama mwihuavata qati vara sivuma kyairata mwihua Jesusiravatama kye uro ntante tumivaravema, turo.

<sup>15</sup> Tiri vunyaa vaisivanto tirivata timwa timwi quarama nkyivata timwa nyita. Tiri vunyaa vaisivanto tumuani entaraqaa Jesusirara qutaave tiqata qati varihua, hiama mwihua nraante vivata qutu vihua nraakiara vivara.

<sup>16</sup> Qaqao, mwi entara Kotiva qua tiraro mwiaqaatairo nyaamwunyaava nronravanto aakyara tiraro Kotira ntomaqotairo vuatairaro tiri vunyaa vaisi nai mwivama nyaamwusairo tumuananro. Mwitaa hiraro Karaisirara qutaa mwivave timwa kye qutu vihua, Kotiva mwihua nraante qati vara sivuma kyairata

<sup>17</sup> mwiaqaatai tiriqitai qati vari nraakye qorahua, mwihua vita qutu vihua kyapata ntuvaantua hita tiri vunyaa vaisivanto tonamwuqi tumuaninra mwia huntu kyarera virini vivara. Tire uro teta vunyaa vaisi huntu kyeta mwiaqaatai ekyaa enta mwia vatama kyeta qati variqi quananra.

<sup>18</sup> Nkyi mwutukyaqtai kyuqe hi varirata variate tita, nkye mwi quara nai timwa mwi nai timwa mwi hiqata variata.

## 5

### *Iesusiva tumuani entarara terama teta variate, tura*

<sup>1</sup> Ni kata pakyaa tuaavo, ekyaa mwi inraikyava qovara hianinra okyara nkyeta ntapihi kyaarara tita, tire qumina nkyi qara ntumwa kye timwa nyiqata mwi entara mwaa entarave qiarora.

<sup>2</sup> Nkye ntapihi kyaarama. Mpuara vaisivanto entaqi tirema kye nriantema kyero Iesusivavata nkye hia mwianra rie entara tumuananro.

<sup>3</sup> Nraakiara nraakye qoravanto tiqata, Mate kyuqe entave. Kyuqema kye variqi virerave, timwa kye varivaro nrihanrama nyatero mwihua ntuqutu raupirima kyaari entava nrintairata mwihua anomia kyeta uaqlama kyeta varivara. Nraakyevanto kyuqe variqi viharo qamwanrama kyero nraaqiara mwataari entava qovara iharo atura ntintema kyero qamwanrama kyero mwi entava qovara hiananro. Mwi entaraqaa hiama mpovanto ntuqema kyero aatu quari aanrava vahiananro.

<sup>4</sup> Ni kata pakyaa tuaavo, nkye hia enta hiraqi variqata uaquia hi kyaiqara uti variahua tita, nkye mwi entava mpuara vaisivanto tirema nrintema kyero nriankyo tita, teramateta variate.

<sup>5</sup> Nkye omwavanto itainani varia nraakye qorahua nraahu variara. Nkye huari iteqaro ntuvaahainani nraahu variara. Nkyevata tirevata hia enta hiro kyokira riraqi varurahuavauma.

<sup>6</sup> Tire mwianra rieqatama haunri mpo nraakye qora nraantante vaite variarora. Nrivaqe sivi variqata vu ntapairi kye viti viri taqeqlata variqi quara.

<sup>7</sup> Vaitaahua entaqi vaite variavata uera nramanri nraahuavata entaqi nraahu nreqata apiqama kyeqa uera nte variara.

<sup>8</sup> Tire hia mwihua nraantantamwa kyeta varurahua. Tire ntuvaahiraqaa nrohura nraakye qorahuara tita, varavaqe vu ntapairi kye viti viri taqeqlata variqi quara.

Ntaqi vaisiva vevavanto ni mutukya ruankyo tiro, nai mwetokyaqa qainiqotairo nyaamwuma taira. Mwia nraantantamwa kyeta varavaqe Jesusirara kepukyaqama kye riemwaqi viqata nanrianra nanrianra mwutukya vataana okyarara riemwaqi quararo mwi okyarava tiri mwetokya ntumwaqu tairaqe variara.

Ntaqi vaisiva qitataki ruankyo tiro, qaini tovaqa nai qitataqaa qutaira. Mwia votima kyero Kotiva tiri huvantu kyero tivita vatairaqe tire mwivavata qio variana quara riemwaqi quararo mwi quava tiri qitataqaa tovaqa votima kyero vahiari.

<sup>9</sup> Hia Kotira raraqa tairaro tiri ntuqutirero nai kyaama tairavauma. Tire Iesusi Karaisira tiri vunyaa vaisiara rieqata hia ekyaara qutu viraitita, Kotiravata qati variqi quananranra rieqaro Kotiva tiri nai kyaama tairama.

<sup>10</sup> Karaisiva tiriara rieqaro qutu vurara tita, qutu quararove, qati variararove, mwiva tuminraqe tire mwi entaraqaatai mwiavata ekyaa enta qati variqi quananra.

<sup>11</sup> Nkye mwianra rieqatama nkye mate hiantema kyeta nkye nai kyaahaqa hi nai kyaahaqa hiqata nai kepuuyaqama mwate nai kepuuyaqama mwate hiqata variata.

### *Vitini ekyara qua tura*

<sup>12</sup> Tire nkyiara mwataa hiatema tita, Vaisi mponramwuvanto nkyivata variqata Kotira kyaiga nkyiqi vare varihua nkye mwihuara nronraqama rieqata mwihuara kyuqema nyataata. Tiri vunyaa vaisivanto mwihuara nkyi aanra kyuqera nyaamwutamaqi quate tiro, mwihuara nronraqama kyaira.

<sup>13</sup> Mwihuara nkyiqi kyaiga varerara tita, nkye mwianra rieqata mwihuara kyuqe vaisive tiqata nkye mwihuara mwutukya vahirata variata. Nkye kuaara nraati variqi viqata nanrianra nanrianra qihaakyamaqita quata.

<sup>14</sup> Tiri qata vakya tuaavo, tire nkyiara mwataa hiatema tita, Hia kyaiga vararaitita qumina nrohi varihua su nyaato nraivata mwihuara kepuuyaqama kyeta kyaiga varaata. Aatu hi varihua kyaahaqa hivata kepuuyaqama kyeta Kotira kyaiga varaata. Hia Iesusira qua kepuuyaqama kyeta riemwaqi vihua, kyaahaqa hivata kepuuyaqama kye Iesusira qua riemwaqi quata. Hia paparuqa hita vuavi raavira tiraqitai mpohua kyaahaqamaqita quata.

<sup>15</sup> Nkyi uaqima nyataivata nkyiari uaqima nyataaro tita, rauriqata variata. Nkye nanrianra nanrianra kyuqe hita kyaahaqa hiqata ekyahua kyaahaqa hiata.

<sup>16</sup> Nkye ekyaa enta qamwateqata variata.

<sup>17</sup> Nkye ekyaa enta Kotirara aakyara nteqata variata.

<sup>18</sup> Hia kyuqe enta nraahu Kotirara qamwateqata variata. Uaqia hi entaravata Kotirara qamwateqata nraahu variqi quata. Kotira kyakya hiva nkyiara mwitaamaqita quatema tiro.

<sup>19</sup> Kotira mwanraquravanto nkyiqi variva nkyiqi kyaiga utirera hirata nkye mwia kyaiga antua kyeta mwia qua hia rievora.

<sup>20</sup> Kotira mwanraquravanto vaisi mpo kyaahaqa hiraro mwi vaisiva Kotira qua tirata nkye mwia quara qumina quave tivora.

<sup>21</sup> Nkye ekyaa kyaiqave, ekyaa inraikyave, tukyama kye taqaivaro kyuqema vahian-inra mwia nraahu tuqara tutaata.

<sup>22</sup> Ekyaa uaqia hi kyaiqvave, uaqia hi inraikyavave, vahianinra mwia qaqla kyaata.

<sup>23</sup> Nraakye qorara hia aatu hiraitita, mwutukyaqitai qihaakya hi varirata variate ti variva, Kotiva nkyivata kyaahaqa hirata nkye hia uaqia hi kyaiqara utiraitita, kyuqe kyaiga nraahu varaqi quata. Kotiva nkyiqa ntaqikyi variraro nkyi mwutukyavantovata, su nyaatovantovata, mwamwantavantovata, qio vahiasi. Mwitaa hiraro Iesusi Karaisiva tiri vunyaa vaisivanto tumuani entaraqaa nkye kyuqema kyeta varivaro hiama nkyiqa qua vahiananro.

<sup>24</sup> Kotiva nkyi nyaanrama taiva quttaaqama kyeroma nkyi kyaahaqamaqiro quanano.

<sup>25</sup> Ni kata pakya tuaavo, nkye tiriaravata rieqata Kotirara aakyara ntaata.

<sup>26</sup> Nkye Iesusira nraaqiara varihua tita, Iesusira nraaqiara mpo ihua kyuqema kye qua mwanteqata nai kyauqu mwi nai kyauqu mwi hiqata variata.

<sup>27</sup> Nronravanto ni nronraqama kyaiva nte nkyiara kepuuyaqama kyena tiqana, Qara mwaa kyaara ntumwa kyeta ekyaa tiri tiqata vakyaavata mwaa quara timwa nyiata.

<sup>28</sup> Tiri vunyaa vaisivanto Iesusi Karaisiva nkyivata variqaro nkyi kyuqema nyatairata nkye kyuqema kye variqi quatema tuqo.

## 2 TESARONAIKA

### Poruva Tesaronaikaaqinaahuani nraakiaraa qara vara kyora

Iesusira qati vara sivuma kyovaro nyaamwuni uro varuvaro 21 ihive nritarovaro Poruva mwaa quara qara ntumwa tora. Tesaronaikaaqi varuhua mpo uhua Karaisiva qaiqaa tumuani entara vekya variqata kyaiqa qaqlira kyeta qumina varuvaro mwia kyaara Poruva mwihuara kepukyaqama kyero tiqaro, Kyaiqa varaqi viqata Iesusira vekya variate, tura. Mwihuara kyaiqa varaaate timwa kyero mwaa quara qara ntumwa tora.

<sup>1</sup> Nte Poruvama. Ntevata, Sairaasivavata, Timotivavata, tire nramwu nkye Kotiravata, Iesusi Karaisiranivata, Tesaronaikaaqi varia nraakye qorahua nkyinima qara mwaa vara kyeta.

<sup>2</sup> Tiri tiqova Kotivavata, tiri vunyaa vaisi Karaisivavata, nkyi kyuqema nyataivaro nkyi mwutukyaqitairo qihaakya hi varirata variata.

#### *Karaisiva uro ntantero tumu variqaro ko qianinranra tura*

<sup>3</sup> Ni kata pakyaa tuaavo, tire nkyiara rieqata mpo enta mpo enta Kotirara kyuqeve qiarava nraahu vaihata varunanra. Nkye Karaisirara quitaave timwa kyeta mwiaqatai mwianra riemwaqi viqata kepukyaqamaqi vi variarara tita, tire qioma Kotirara kyuqeve qiananra. Nanrianra nanrianra mwutukya vahiva nkyiqi mpoqiaavata vahirara tita, tire qioma Kotirara kyuqeve qiananra.

<sup>4</sup> Nkye mwitaamaqita vi variarara tita, tire Kotira nraakye qora mpo hiahua utaqaa variqata nkyi nyutu tuaahere varunanra. Nkye Iesusira nraakye qora variavata mwia kyaara mpohua nkyi qoraqama nyate variavata nkye nronra muaanra vareqata hia qoriri hiraitita, kepukyaqama kye Karaisirara riemwaqi vi variarara tita, tire nkyi nyutu tuaahere varuro.

<sup>5</sup> Nkye Karaisira kyaara muaanra varaqi quara Kotiva hia taunru kyaananro. Kotiva nraakye qora qua avuqavu hi variva varihatara tita, nkye Karaisirara riemwaqi viqata nronraqama kye muaanra varaqi vivaro Kotiva nkyiara, Nkye ni nraakye qorave. Nkye ni mwatuqyaqi qioma nrivarave, qiananro. Nkye Kotira mwatuqyaqi vihuara titama, nkye mwaa entara muaanrave, nriqa vi inraikyarave, vareta.

<sup>6</sup> Kotiva avuqavuma kyero qua rie variva. Nkyi uaqiamma nyateta muaanra nkyiqa vatehua varivaro Kotiva mwihuara nkyiarivata uaqiamma nyatero muaanra mwihuara vataananro.

<sup>7-8</sup> Nkye muaanra varaqi vi varivaro ekyaara entaqaa nkyiqaataivata, tiriqaataivata, muaanra vara kyairaro vuvuatama viraqe variananra. Ekyaara entaqaa tiri vunyaa vaisi Iesusiva nyaamwusairo nai nyaamwunyaahua kepukyanramwuvata sita varero mwihu kyapata qovarama viro qia nronraqama kyero itaaninravata tumuananro. Mwi entara mwiva Kotirara hia rie nraakye qorahuave, Iesusi Karaisira quara qumina quave ti nraakye qorahuave, mwihu rirero qovara hiananro.

<sup>9</sup> Mwiva qovarama viro mwi nraakye qorahua ri ntuquiti hiqaro titairata nyianrani nkyiariaraa uro variqata ekyaara enta uaqiamma vita variqata hiama tiri vunyaa vaisi Iesusira kepukya okyara taqevara.

<sup>10</sup> Mwi entara Iesusiva tuminranro mwia peqa okyaravanto qoqaa vahirata Iesusirara quitaave ti nraakye qorahua mwia nrutu tuaahera kyeta mwia mwahuta timwa mwatevara. Tire Iesusirara nkyi timwa nyunrata nkye quitaave qiarara tita, nkyevata mwi entara mwi nraakye qorahua kyapata varivara.

<sup>11</sup> Tire mwianra rieqatama Kotirara nkyi kyaahaqama nyataarive titama, mpo enta mpo enta mwianra aakyara nte varunanra. Aanra kyuqeraqaa quate tiro, Kotiva nkyi nyaanrama taira. Aanra mwiaqaa kyuqema kye quate tita, tire Kotirara aakyara nte varunanra. Nkye Karaisirara kepuuyaqama kye riemwaqi viqata kyuqe kyaiqa nraahu vararerera uti varivaro Kotiva nkyi kepuuya nyinrata nkye qio mwi kyaiqara mwi kyaiqara vareqa variate.

<sup>12</sup> Nkye mwitaamaqi vivaro tiri vunyaa vaisi Iesusi Karaisira nrutuvanto viriraqaa nri viraro mwiva nkyita nrutuvata tuaaheraari. Kotivavata, tiri vunyaa vaisi Iesusi Karaisivavata, nkyi kyuqema nyatairata nkye qioma mwitaamaqi vivara.

## 2

### *Anoma kyero Kotira qua nteqa kyero qora kyaiqa uti varianikurara tura*

<sup>1</sup> Iesusi Karaisiva tiri vunyaa vaisivanto tiri ntuaantua hirero tumuani entarara nkyi timwa nyinrenra. Nte nkyiara po,

<sup>2</sup> qati hia mpohua api qua tira riaate tuqo. Vaisi mponramwuvanto unra tiqata, Tiri vunyaa vaisivanto uro ntante tumuanri entava vaakya qovaramama viho, ti variara. Nkye aatu hiqata mwihua quara nronraqama kyeta rievora. Hia mwi entava nrintaiho. Taisairo mwi quava qovarama vihatave mwihua api qua ti variavo? Mpowanto unra tiqaro, Kotiva tihana riaurave, tihatave mwitaa ti variavo? Mpovanto tiriara, Mwihua mwi quara mwitaa qiarave. Mwihua mwi quara qara ntumwa taarave, tihatave mwitaa ti variavo?

<sup>3</sup> Hiama kyaivarao vaisi mpovanto mpo qua mpo quaqtairo ekyaara entara nkyi kumwaanri qiai. Nraakiara mpo enta nraakye qora airivanto Kotira qoririma mwate varivaro mpovanto Kotira qua nteqa kyaari vaisikuva qovarama viro variqiro viraro mwiaqaatairo Karaisiva tumuani entava qio nriananro. Ekyaa mwi inraikyava nraante qovarama viro variqiro viraro mwi entava nriananro. Mwi entava hia nri ntaaninraaqaa Kotira qua nteqa kyaari vaisiva nraante qovarama viro qora inraikyavanto variqiro viro Saataaninra mwatukyaqi viro raupiri hiarivama variananro.

<sup>4</sup> Kyai nte mwi vaisira qora kyaiqara nkyi timwa nyianri. Mwi vaisiva nraakiara qovarama viro nraakye qoravanto mwanriqave ti inraikyarara qumina inraikyave tiro nraakye qoravanto mpo inraikya nrutu tuaahere inraikyarara qumina inraikyave timwa kyero mwiva tiqaro, Nte mwi inraikyara mwi inraikyara nraatara kyauvave, timwa kyero uro Kotira nraamwuqi mwatakyaa viro variqaro nanrianra nte Kotivave qiananro.

<sup>5</sup> Nkye hiave mwi quara nraatoqi vateta? Nte haaru nkyi kyapata variqana mwi quara mwi quara nkyi timwa nyiavarama.

<sup>6</sup> Qora vaisi Kotira qua nteqa kyaari vaisiva qamwanrama qovara hiankyorave tiro, mpo inraikyavanto mwia antua taira. Nte mwi inraikyarara nkyi timwa nyuqata nkye mwi quara ntapihi kyaara. Kotiva mwi vaisirara qovara hiante qiani entarama Kotira qua nteqa kyaari vaisiva qovara hiananro.

<sup>7</sup> Mwaa entara Kotira qua nteqa kye variahua hia qoqaa variqata uaqia hi kyaiqara uti variavo. Mwihua uqeta vi variqata uaqia hi kyaiqara uti variavaro nraakiara mwihua kyaiqa antua taariva ekyaara viro mwia mwaanrainranro

<sup>8</sup> mwiaqaatairo qamwanrama kyero Kotira qua nteqaari vaisiva qovara hiananro. Mwi vaisiva qovarama viro qoqaa variqaro mwaaqu kyaiqa utuqiro quananro. Mwiva mwaaqu vehi kyaiqa mwia utuqiro viraro mwiaqaatairo tiri vunyava, Iesusiva qovarama viro mwia peqa okyaravanto takyuqi vairaro mwiva tumu nai nroqitairo vuata kyairaro mwi vaisiva taiqa quananro.

<sup>9</sup> Kyai nte mwi vaisira qora kyaiqara mpoqiyata nkyi timwa nyianri. Kotira qua nteqa kyaari vaisiva nri ntero qovarama viro variraro Saataaniva mwia kepuuya

mwinranro mwiva nraakyе qora unra qua timwa nyiqiro viqaro mwihuara api aanraqaa viqata nai mwianra quataa vaisive qiate tiro, mwiva mpo kyaiqa mpo kyaiqa nronra kyaiqa hia taqe kyaiqara varaqiro quananro.

<sup>10</sup> Mwiva mwitaamaqiro virata Saataaninra mwutukyaqi virera hi nraakyе qorahua varivaro mwiva mpo qua mpo qua unra qua mwihua timwa nyiqiro virata mwihua mwia quara quataavema tivara. Mwi nraakyе qorahua Karaisira quataa quara hia mwutukya vaihata variarara tita, mwia kyaara mwihua Saataaninra mwutukyaqi vihua varivaro Kotiva hiama qio mwihua huvantu nyataananro.

<sup>11</sup> Mwia kyaara Kotiva mwihua su nyaato vara qumimaqama kyairata mwihua mwitaama variqata unra quara quataa quave tivara.

<sup>12</sup> Ekyaa nraakyе qoravanto Kotira quataa quara unra quave timwa kyeta uaqia hi kyaiqarara qamwate varihua varivaro Kotiva mwihua ko timwa nyatairata mwihua Saataaninra mwutukyaqi vivara.

### *Kotiva nkyi nai kyaama torara tura*

<sup>13</sup> Ni kata pakyaa tuaavo, tire mpo enta mpo enta nkyiara rieqata Kotirara kyuqeve timwaqi virera. Tiri vunyaa vaisi Karaisira mwutukyavanto nkyiara vaihata nkye variavo. Haaru nkye hia varu entara Kotiva nkyiara nte mwihua huvantu nyatarerave timwa kyero nkyi nai kyaama torara tiro, Kotira mwanraquravanto nkyi kepukya nyihata nkye Kotira nraakyе qora variara. Karaisira quataa quara nkye quataave tiqata variarara tita, nkye Kotira nraakyе qora variarama.

<sup>14</sup> Tiri vunyaa vaisivanto Iesusi Karaisiva nyaamwuni uro kepukyavanto variharo Kotiva nkyiaravata nronraqama vita Karaisiravata variqi quate tiro, nkyi nyaanrama taira. Nkye Kotiva nkyi nyaanrama tai quara riaate tita, tire Karaisira mwakyaakya nkyi timwa nyunanra.

<sup>15</sup> Ni kata pakyaa tuaavo, mwi quara rieqatama nkyevata kepukyaqama kyeta variata. Tire nkyi timwa nyuna quara mwia nraahu tuqara kyeta tutaata. Nroqitaive, qaraqitaive, nkyi timwa nyuna quara tuqara kyeta tutaata.

<sup>16-17</sup> Tiri vunyaa vaisivanto Iesusi Karaisivavata, Kotiva tiri tiqvavata, tiriara mwutukya vaihata varunanra. Tiriara mpo enta mpo enta kepukyaqama kye variqata mwiaavata uro vari entara vekya variate tiro, Kotiva tiri kyuqema timwa taira. Kyaivaro mwiva nkyi mwutukya kepukyaqama nyatairata nkye kepukyaqama vi variqata kyuqe kyaiqa nraahu varaqi viqata kyuqe qua nraahu timwaqi viqata variata.

## 3

### *Poruva nkye tiriavaravata rieqata Kotirara aakyara ntaate tura*

<sup>1</sup> Ni kata pakyaa tuaavo, nte ekyaara mpo qua nkyi timwa nyinrenra. Nkye Kotirara aakyara nte varivaro tiri vunyaa vaisi quavanto qamwanrama kyero viro nrinro hirata mpo mwatanaavanto mpo mwatanaavanto nkye qiantema kyeta mwihuavata mwi quarara quataa qua nritare vahi quarave qia.

<sup>2</sup> Hia ekyaa nraakyе qoravanto Karaisirara quataave ti variarara tita, nkye qaiqaavata Kotirara aakyara nte varivaro mwaaku kyaiqave, uaqia hi kyaiqarave, vare varihuaqitairo tiri vaitutuma kyaari.

<sup>3</sup> Tiri vunyaa vaisivanto nkyiara ekyaa enta rie varivama variro. Saataaniva nkyi tu varaankyo tiro, mwiva nkyi kepukyaqama nyatero nkyi vaitutuma kyaananro.

<sup>4</sup> Tire teta vunyaa vaisiara rieqatama nkyiara mwutukya qihakya ihata mwitaama tita, Qioma nkye tire nkyi timwa nyuna quaravata, qaiqaa timwa nyiana quaravata, riemwaqita vivarave, turo.

<sup>5</sup> Tiri vunyaa vaisivanto Karaisiva nkyi kyaahaqa hirata nkye Kotiva nkyiara mwutukya vataani okyarara ntapihiata. Karaisiva nkyi kyaahaqa hirata nkyevata mwiva nai kepukyaqama kyero variqi vintema kyeta kepukyaqama kye variqi quata.

*Haunri nkyiqitai mpo ihua qumina variqata hia kyaiqa varevorave, tura*

<sup>6</sup> Ni kata pakya tuaavo, tiri vunyaa vaisi Iesusi Karaisira nrutu nteqatama tire mwaa quara kepukyaqama kye nkyiara mwitaama tita, Nkye taqaivaro nkyi sata sakyaa mpovanto hia kyaiqa vararaitiro, mwiva tire nkyiara mwataama kye kyaiqa varaate tiqata nkyi timwa nyuna quara hia riaraitiro, qumina variqiro virera, nkye mwi vaisira vitiqama taqaata.

<sup>7</sup> Nkye ntapihi kyaara. Tire hurante hiataara vahata nkye hininramwuvanto uaquia hi variavo. Tire nkyivata variqata hia qumina variavananra.

<sup>8</sup> Tire nkyivata variqata hia nkyi kyara qumina vararaitita, munima kyeqata varavananra. Tire nkyi muaanra nyianro tita, entaqivata iheravata toqaamwu tu kyeta kyaiqa varaqi viqata munima vara kyeta mwiaqo kyara nramwaqita quavanana.

<sup>9</sup> Mwi entara tire nkyiqitai kyara nyaanruma kye nraanrava qio vahuvatavata tire hia mwitaa hiavananra. Nkye tiri kyaiqa taqeqlata tiri vataqi viqata tire hurante hiate tita, hia nkyiara kyararave, mwitaa inraikyaratve, nyaanru qiavananra.

<sup>10</sup> Tire nkyivata variqata nkyi qua mwaanra timwa nyiqata mwitaa qiavananrama. Hia kyaiqa varaataa hiari vaisiva hia kyara nraanrive, qiavananra.

<sup>11</sup> Tire riaurata nkyiqitai vaisi mpo hiahua hia kyaiqa vararaitita, mwihua qumina variqata mpohua kyaiqara nraahu airi qua tiqata qumina variara.

<sup>12</sup> Tiri vunyaa vaisi Iesusi Karaisira nrutuqaa tire qua vateqama mwi vaisihuara kepukyaqama kye tiqata, Hia qumina aanra nrohiraitita, mwata sata tirema kye variqata kyaiqa vara kyeqata kyara nramwaqi quate, turo.

<sup>13</sup> Qio ni kata pakya tuaavo, hia qoririma kyeqa kyuqe kyaiqa varaqi quata.

<sup>14</sup> Tire mwaaqi qara ntumwa tauna quarara mpovanto qumina quave qiankyora. Mpovanto mwaa quara hia riarerave tirata nkye mwi vaisira ntapihi kye taqeta mwia vitiqama taqeta nraahumwa sata varivaro mwi vaisiva kyauruari.

<sup>15</sup> Hia mwi vaisira nramwutaaqa hiraitita, nkye mwianra qata vakyaave tiqatama mwaateraqama kye mwianra ena quana aanranra mwia qaqlira kyaante qiata.

*Ekyara qua tura*

<sup>16</sup> Tiri vunyaa vaisivanto mwutukya qihakya nyate varivama variro. Mwiva nkyi kyaahaqa hirata nkye mpo kyaiqa mpo kyaiqa varaqi vivaro nkyi mwutukyavanto qihakya hi varirata variqi quata. Tiri vunyaa vaisivanto nkyivata variqiro virata nkye variqi quata.

<sup>17</sup> Qio nkyi qua mwantarera nte ntena kyauquqo ntena nutu qara ntumwa tauqo: NTE PORUVAVE. Nte ntena nutu qara ntumwa taura taqeqlata nkye qutaama Poruva tirini qara ntumwa tairave tivara.

<sup>18</sup> Tiri vunyaa vaisivanto Iesusi Karaisiva nkyi kyuqemaqiro virata variqi quatema, tuqo.

## 1 TIMOTI

### Poruva Timotirani toharenaa qara vara kyora

Iesusira qati vara sivuma kyovaro nyaamwuni uro varuvaro 35 ihive nritarovaro Poruva qaiqaa karavuqi variqaro mwaa quara qara ntumwa tora. Timotira qova Kirikinyaava varuvaro mwia nrova Jutaa nraakyevanto varuvaro Timotiva Porura mwakyaakya riero Karaisira quara quataave timwa kyero Porura vataqiro viqaro mwia kyaahaqamaqiro vi varura. Timotirara mwiva kyuqema kyero Karaisira qua nraakye qora timwa nyiqiro viqaro unra qua mwaanra hia riaraitiro variqiro quarive tiro, Poruva Timotirani mwaa quara qara ntumwa tora.

<sup>1</sup> Nte Poruvama. Kotiva nyaamwuni tiri huvantu timwa taarivavata, Iesusi Karaisiva tire mwia vekya varuravavata, mwitanhua qiavana nte nronraqama vina Karaisira qua nraakye qora timwa nyi varuvama varina.

<sup>2</sup> Nte i Timotiranima mwaa quara qara ntumwa tena. E Iesusi Karaisirara quataave qiananranra tina, nte iara ni maaquve titi hurama. Tiri tiqova Kotivavata, tiri vunyaa vaisi Iesusi Karaisivavata, i kyuqema mwateta iara po timwa mwate varivaro i mwutukyavanto qihakya hi varirara variante.

#### *Unra qua mwaanra timwa nyi varu vaisihuara tura*

<sup>3</sup> Timotio, nte Masentoniaani virera hiqanama nte kepuqyaqama kyena iara tiqana, Epesaasini variante, tura. Qaiqaavata qio iara mwini nraahu variantema, tuqo. Vaisi mponramwuvanto mwini variahua unra qua mwaanra nraahu nraakye qora timwa nyi variahua e mwihuara qao tira hia mwitaa qiate qianta.

<sup>4</sup> Mwihua uri qua nraahu timwaqi viqata nkyiari haivaqahua nyaaquhua okyarara nraahu riemwaqi viqata mwiaqatai inronra qua nraahu qovara hi variara. E uro mwihuara hia mwitaa qiate qianta. Mwi quava hiama qio vaisi mpo kyaahaqa hiraro mwiva Kotira kyaiqa taqaananro. Vaisivanto Iesusi Karaisirara kepuqyaqama kyero riemwaqiro viqaroma Karaisira kyaiqa qio taqaananro.

<sup>5</sup> Nraakye qora su nyaato mwutukyavanto kyuqema viro vahirata variqata hia taara nraato tiraitita, Karaisirara quataaqama kye riemwaqi viqata nanrianra nanrianra mwutukya vahirata variate tita, tire Karaisira qua nraahu timwa nyi varunanza.

<sup>6</sup> Mpo hia vaisihua mwi aanranraqaa nraahu quataara vaihata mwihua apiqama kye nrohi variqata api qua nraahu ti variara.

<sup>7</sup> Mwihua tiqata, Kyai tire Mosesira mwaanra qua nraakye qora timwa nyianre, timwa kyeta mwihua mwaanra qua okyara ntapihiahua votima kye variqata mwi quara okyararavata, mwihua nkyiari qiararavata, hia ntapihi kyaahua variara.

<sup>8</sup> Tire ntapihi kyauraro Kotiva Mosesira mwu quava vaiharo vaisivanto mwi quara ntapihi kyero riero vataqiro quariva hiama Kotira qua nteqa kyaananro.

<sup>9</sup> Tire ntapihi kyauraro Kotiva hia mwia qua rie varia nraakye qorahuara rieqaro mwi quara vatairavauma. Mwia qua nteqa kyeqata uaquia hi kyaiqara uti varia vaisihuani mwi quara Mosesira mwunrama.

Nraakye qoravanto hia Kotirara rie variahuave, mwaanqu kyaiqa vare variahuave, Kotira qua qaqlira kyeta mwatanyaa okyarara rie variahuave, nkyiari nyohua sohua ru kye variahuave, mpohua ru kye variahuave,

<sup>10</sup> nraakye qora api qareqata uaquia hi kyaiqara uti variahuave, hena vaisive hena nraakyevata qora kyaiqa utuahuave, vaisive nraaqiarave mpuara utihuave, unra qua ti varihuave, unra quaravata nkyiari kyauqu nriqiqaa vate varihuave, quataa qua mwoqa mwita mpo kyaiqa mpo kyaiqa api kyaiqa varaqi vi variahuave, mwihuara rieqaro Kotiva nai qua mwaanra qovarama kyero Mosesira mwunra.

<sup>11</sup> Qutaa qua vahirero Karaisira quama vahiro. Kotiva nraakye qora kyuqema nyate variva, mwiva ni nronraqama kyero mwi quara kyuqe hi quara nraakye qora timwa nyiante tihana ti varurama.

### *Kotiva Porurara po tiro kyuqema mwatorara tura*

<sup>12</sup> Iesusi Karaisiva tiri vunyaa vaisivanto ni kepukya mipro nianra mwiva qioma ni qua timwa nyiqiro quananrove timwa kyero ni nronraqama kyaihana nte mwia kyiqa varaurara tina, nte mwianra kyuqemave ti varuqo.

<sup>13</sup> Qutaa nte haaru Karaisirara uaquia hi quara timwa kyeqana mwia nraaqiara mwihua uaqiamaqi viqana mwihua ntutuavara. Nte mwitaamaqi viqana mwi entara Karaisira okyara hia ntapihiraitina mwitaa hiavarara tiro, Kotiva nianra po tiro kyuqema mataihana nte Karaisirara qutaa mwivave tura.

<sup>14</sup> Tiri vunyaa vaisi Iesusi Karaisiva quttaaqama kyero kyuqema mataihana mwiaqatai nte mwiaavata kuaaqi variqana mwianra kepukyaqama kye riemwaqi viqana nte mwianra mwutukya vahana varura.

<sup>15</sup> Mwaa quarara nraakye qoravanto qutaa quave timwa kyeqata qioma riemwaqi vivara. Mwaa quava mwitaamama vahiro:

Mwiva uaquia hi kyaiqara uti varia nraakye qorahua  
kyahaqa hiraro Kotiva mwihua sitaarive tiro,

Iesusi Karaisiva mwatani tumunra. Qikye, uaquia hia nraakye qorahua variavana mwihua utaqitaina nte anoma kye uaquia hiava vaisiva variavara.

<sup>16</sup> Nte uaquia hia nraakye qorahua mwihua suni uaquia hu vaisiva varuqaro Iesusi Karaisiva nraakye qorara nte mwihua qihakyama nyataani okyarara ntapihi kye taqaate tiro, mwiva nianra nraante po timwa mataira. Iesusi Karaisiva nte qora hu vaisira nianra nraante po timwa matairara riaivarao nraakye qora su nyaatovanto ntapihirata tiqata, Qikye, Karaisiva Porurara po timwa mwataintema kyero mwiva tiriaravata po timwa tairaqe ekyaa enta qati variqi quare. Kyai Karaisirara qutaave qia, tivara.

<sup>17</sup> Kotiva ekyaa enta qati variqiro vi variva, mwiva hia qutuariva variva, mwia hia vuqo taqaava variva, mwiva kuaava nraahu mwanriqvanto varira. Mwiva mwitaama varirara tita, nrivage ekyaa enta variqata mwia qamwata mwateqata mwia nrutu nraahu tuaaheraqi quara. Qutaave.

<sup>18</sup> Ni maaqu Timotio, haaru vaisi mponramwuvanto i timwa mwiqata Kotiva iara mwitaama tiho tu quarara rieqanama nte mwaa quaravata i timwa mwina. E Kotira aanraaqaa viqarama uaquia hi kyaiqara uti varihua i nraatara kyevorave tiqara kyuqema kyero ntaqi vari vaisira nraantantamwa kyera variqira viqara uaquia hi kyaiqara nraataraqira quantema tina.

<sup>19</sup> Aanra mwiaqaa viqara Karaisirara kepukyaqama kyera riemwaqira viqara kyuqe kyaiqa nraahu vare variraro hia i toqaamwu ruari. Mpo hia vaisihua kyuqe aanra qaqlira kyeta uaquia hi kyaiqara utiqata kyaurirara hia nronraqama kyeta rieta, mwia kyaara mwihua Karaisirara riemwaqi quava uaqiamma viro.

<sup>20</sup> Haimeniaasivavata Arekisantaavavata mwitanahua mwitaama kye kyuqe aanra qaqlira kyeta qora aanraaqaa quara. Nte mwitanahuara qao timwa tena hia Kotirara qora qua qiate timwa kyena mwitanahuara Saataaniva nkyitanaqaa ntaqikyiqiro quananrove tura.

## 2

### *Poruva Timotirara nkye ntuvantuama vita variqata mwataama kye Kotira nrutu tuaaheraate tura*

<sup>1</sup> Nte iara kepukyaqama kye tiqana vuni i mwitaama kye timwa mwinrenra. Nkye ntuvantuama vita variqata mwataama kye Kotirara aakyara qia: Mwiva nkyi

kyaahaqa hiarive titama mwianra aakyara qiata. Mwiva mpohuavata kyaahaqa hiarive tita aakyara qiata. Mwianra aakyara tiqata kyuqeve timwaqi quata. Nkye Kotirara aakyara nteqata ekyaa nraakye qorara rieqata Kotirara aakyara qiata.

<sup>2</sup> Vunyaa vaisive, kamaninranrave, ekyaa nronraqama vita vari vaisihuave, mwi-huaravata rieqata nkye Kotirara aakyara tivaro Kotiva mwihua kyaahaqa hiari. Nkye mwitaamaqi viqata Kotirara aakyara nte varivaro Kotiva mwihua kyaahaqa hirata mwihua tirigaa kyuqema kye ntaqikyi varivae mwiaqaatai tire qio variararo tiri mwutukyavanto qihakya hiraqe tire tirema variqi viqata Kotira kyaiqa vareqata aanra kyuqeraqaa quananra.

<sup>3</sup> Nkye mwitaama kyeta Kotirara aakyara nteqata kyuqe kyaiqa vare varivaro Kotiva tiri huvantu timwa taariva nkyi qamwata nyataananro.

<sup>4</sup> Kotiva ekyaa nraakye qorara uaqia hi aanranra qaqlira kyeta qutaa qua okyara ntapihi kye riemwaqi quate tiro, mwiva mwihua huvantu nyataarivama variro.

<sup>5</sup> Kotiva mwanriqa kuaiqavanto nraahuma variro. Kotiva variharo vaisi kuaiqavanto tavaaraqaanaa vaisivanto variqaro Kotiravata mwatani variahuavata vara kuaaqi vataarivama variro. Mwiva Iesusi Karaisiva vaisivantoma variro.

<sup>6</sup> Mwiva ekyaa nraakye qora mwihua huvantu vita qatinani variate tiro, qutu vurama. Mwiva Kotiva timwa to entaraqaa qutu viro Kotiva nraakye qora huvantu nyataani okyarara qovarama kyora.

<sup>7</sup> Mwi mwakyaakyara nraakye qora timwa nyiante tiro, ni nronraqama kyero titahana nte ekyaa mpo mwatanaahua hia Iutaa mwatanaahuara mwi mwakyaakyarara qutaae timwa kyeta riemwaqi quate tina, mwihua timwa nyiqina vi varura. Hia nte unra quavauma ti varuqo. Nte qutaa quama ti varuqo.

<sup>8</sup> Mwianra rieqanama ni kyakya hiva mwitaamama vahiro: Mpo mwatukya mpo mwatukyaqi vari nraakye qorahua Kotirara aakyara nteqata variate tura. Mwihua hia raraqa tairata variqata hia inronra hiraitita, Kotira kyaiqa nraahu vararerata nkyiari kyauqu tuaahereqa Kotirara aakyara ntamwaqi vivaravema tina.

### *Poruva nraakye mwunruqa qutaa mwunruqanra tura*

<sup>9</sup> Nte nraakyera tirerama. Nraakyevanto nai mwamwantaqaa kyuqema kyero ntumwaqu tero naitarama kyero tuavaaqa utuari. Hia mpo qara mpo qarama kyero qiata mwunruqa hiari. Hia ori inraikyaqo inranra kyaatamwa ututaara nronra munima vahira vara kyero ututaari. Hia nronra munima vahiani tuavaaqara utuari.

<sup>10</sup> Nraakyevanto nte Kotira aanraqaa vi varuvave tirera, mwiva hia nai kyuqe kyaaqema kyero mwunruqa hianinranra nronraqama kyero riari. Mwiva Kotira aanraqaa viqaro kyuqe kyaiqa varaqiro quariva, mwi inraikyava mwia mwunruqa qutaa mwunruqa vahiali.

<sup>11</sup> Nkye ntuvaantuama vita varivaro vaisivanto Kotira qua mwaanra tiraro nraakyevanto hia qua tiraitiro, qati variqaro vaisi qua nraahuma riemwaqiro quari.

<sup>12</sup> Nraakye qoravanto varivaro hiama nraakyevanto vintantero Kotira qua mwaanra timwa nyiari. Hia nraakyevanto nronraqama viro vaisiqaa ntaqikyiari. Nte mwianra qaoma tina. Nraakyevanto tirema variari.

<sup>13</sup> Kotiva Ataamunra nraante ututero mwia nraakiara Ipira utu tora.

<sup>14</sup> Hia Atamuva Saataaninra quara qutaa quave tuvaro nraakye mwiva Saataaninra qua riero qutaae timwa kyero Kotira qua nteqa kyora. Mwitaa hurara tinama, nte nraakyera mwitaa tina.

<sup>15</sup> Qio nraakyevanto Jesusirara riemwaqiro viqaro mpohuara mwutukya vahiraro Kotira kyaiqa varaqiro viro hia nai nrutu tuaaheraraitiro, variro nraaqiara mwataqiro vi variraro Kotiva mwia huvantu mwataananro.

### 3

#### *Kotira nraakye qoraqaa ntaqikyi vaisihuara tura*

<sup>1</sup> Mwaa quarara nraakye qora qutaa quave tiqata qioma riemwaqi vivara. Mwitaa-mama mwaa quava vahiro:

Iesusira nraakye qoraqaa ntaqikyirera hiari vaisiva  
kyuqe kyaiqa vararera hiarivama variananro.

<sup>2</sup> E mwi quara rieqara mwaa quara vataqi viqara vaisi mpo nronraqama kyaante. Iesusira nraakye qoraqaa ntaqikyi variari vaisiva avuqavuma kyero nrohiari vaisiva variari. Nraakye kuaiqia varataariva variari. Hia nramanri nrenro uera ntaari vaisiva variari. Mwiva naiqaa kyuqema kyero ntaqikyiariva variari. Nraakye qoravanto mwi vaisirara kyuqe vaisive tiva variari. Mwiva kyuqema kyero nyianranyaahua sita kyero nraamwuqi vateqaro kyara nyi variariva variari. Mwi vaisiva Kotira kyaiqa okyara nraakye qora qioqama kye nyaamwute variari vaisiva variari.

<sup>3</sup> Mwi vaisiva hiama uaini nrenro uera ntaari vaisiva variari. Mwiva hia qamwan-rama kyero raraqa tairaro nraakye qora ntutuariva variari. Mwi vaisira vikyokyavanto qihakya hiraro nraakye qora qihakyma kyero kyaahaqa hiari vaisiva variari. Mwi vaisiva hia munimanra nronraqama kyero mwutukya ntuari vaisiva variari.

<sup>4</sup> Mwiva nai nrahesi nraaqiaraqavata kyuqema kyero ntaqikyiariva variari. Mwia nraamwunra mwaqvavanto mwi vaisira qua kyuqema kye rie vari vaisiva variari.

<sup>5</sup> Vaisivanto nai nrahesi nraaqiaraqaa hia kyuqema kyero ntaqikyiariva nataama kyero Iesusira nraakye qoraqavata ntaqikyiananro?

<sup>6</sup> Hia mateqa nrumu Iesusira nraaqiaraqama quariva Iesusira nraakye qoraqaa ntaqikyiqiro quari. Haunri mwiva nronraqama viro nte nronravanto varuqo qiankyora. Mwiva mwitaamaqiro viraro Kotiva Saataaninraqaa qua vatontema kyero mwiaqavata qua vataankyora.

<sup>7</sup> Mwi vaisiva kyuqe vaisi varirata ekyaa qumina nraakye qoravata mwianra kyuqe vaisive tivara. Mwiva hia mwitaama variari vaisiva varirata, qumina nraakye qoravanto mwianra uaquia hi vaisirave tivaro mwia kyaara Saataaniva mwi vaisira raaquta kyairaro uaquia hi aanranraqaa quananro.

#### *Iesusira nraakye qoraqi kyaiqa vare vaisihuara tura*

<sup>8</sup> Iesusira nraakye qoraqaa ntaqikyiariva kyuqe vaisivanto varirata mwia votima kyeta mwia nraakiara nronraqama vita mwia kyaahaqa hi varihua kyuqe vaisi nraahu varivara. E mwi vaisihua nronraqama kyarera hiqara mwaa quara vataqira quante: Mwihua avuqavu nrohiqata nkyiari qua vataqi viqata qutaa qua nraahu tihua variata. Mwihua hia uaini airi nre vaisihua variata. Hia munimanra mpoqama kyero mwutukya ntuarihua variata.

<sup>9</sup> Mwihua Karaisira qua tirera hivaro hia mpo qua apiqama kye quava mwihua nyo muaanra ntairata mwihua vutu kye Kotiva qovara hiani quara timwa nyiqita quata.

<sup>10</sup> E qakyo mwihua nronraqama kyarera hira mwihua nraante mwataarama kyera taqaante. E mwihua kyaiqa mwataara hiqara taqairata mwihua mwi kyaiqara kyuqema kye varaver, e mwihua nronraqama kyairata mwihua Iesusira nraakye qoraqi kyaiqa varaqi quata.

<sup>11</sup> Mwihua nyaatamwanravata kyuqe nraakye nraahuma varivara. Mwihua nyaatamwanravanto hia mpohua mwaanra tiraitita, mwihua su nyaato kyuqema vahirata variqi viqata ekyaa kyaiqa qutaaqama kye varaqita quata.

<sup>12</sup> Vunyaa vaisi mwia mwemwani nronraqama viro variariva, mwivavata nraakye kuaiqia vataavama variari. Mwi vaisiva kyuqema kyero nai nraaqiaraqavata mwia nraamwuqi varihuaqavata ntaqikyiarivama variari.

<sup>13</sup> Nronraqama vita Iesusira nraakye qoraqi kyuqema kye kyaiqa varaqi vivera, mwihuara kyuqe vaisive tivata mwihua qua rientemwa kye variqata qiomia nkyiari Karaisira aanraqaa virara timwa nyiqi vivara.

### *Kotira qua nronraqama kyero vahi quarama*

<sup>14-15</sup> Nte pataqia vari kyena uro i taqaaninranra rieqanama varuqo. Mpo inraikyavanto antua kyairaqe hia vaakya uro i taqaaninrave tinama qara mwaa ini vara kyena. Nataama kyetave Kotira nraakye qora variqita vivarave? E mwi quara okyara ntapihiante tinama, nte ini qara mwaa ntumwa tena.

Kotira nraakye qora varirerata mwihua mwia nraamwuqi variahua votima kyetama varita. Kotiva qati variqiro vi variva varihata mwihua Kotiva nyaanrama taihuama varita. Mwihua Kotiva nyaanrama taihua variqata kyatari kepukyaqama kye rataara votima kye kepukyaqama kyeqata Kotira qutaa quaqaa ntaqikyiqi vi variara.

<sup>16</sup> Qikye, Kotiva nai qua qovarama kyai quava nronraqama kyero vahi quavama vahiro. Mwataamama vahiro:

Karaisiva vaisi mwamwanta varero  
mwatani qovarama vuvaro

Kotira mwanraquravanto mwia qutaa okyara  
qovarama kyovata nyaamwunyaahua mwia taqora.

Karaisira qua mpo mwatanaa mpo mwatanaa  
timwa nyiqi uvata mwihua mwianra qutaave tura.

Mwihua qutaave tuvaro  
nraakiara Kotiva mwia vitovaro nyaamwuni vura.

Kotiva nronra qua qovarama kyaiva mwitaamama vahiro.

## 4

### *Poruva unra qua mwaanra tu vaisihuara tura*

<sup>1</sup> Kotira mwanraquravanto mwaa quara ntapihi kyero mwitaama tiro, Nraakiara mpo hi vaisihua Karaissirara ti quara qaqlira kyeta tovevaanavanto unra qiani quara nraahu riemwaqi viqata Saataaniva timwa taani quara nraahu riemwaqita vivarave, tira.

<sup>2</sup> Mwi vaisihua mwaa entara qovarama vita mwihua qutaa qua ti variahua nraantamwa kyeta unra qua timwaqi vi variqata kyauruataara vaihata hia kyauraitita, Saataaniva uti vari kyaiqara nraahu uti variara.

<sup>3</sup> Mwihua mwaanra qua timwaqi viqata nraakye qorara hia nraata vaati varaate tita, mwi kyarara mwi kyarara hia nranraitita qati variqi quate, ti variarave. Mwihua mwitaa qiararo Kotira quavanto hia mwitaa tira.

Tiriara mwihua ekyaa mwi kyarara mwi kyarara nraate tiro, Kotiva mpo kyara mpo kyara utu taira. Mwianra rieqatama tire Karaissirara qutaave timwa kye Kotira qutaa qua riemwaqi viqata tire qiomia mpo kyara mpo kyarara Kotirara kyuqeve timwa kyeta nramwaqi quananra.

<sup>4</sup> Ekyaa Kotiva ututai inraikyava kyuqe inraikyama vahiro. Tire hia mpo kyarara qao tiraitita, ekyaa kyarara kyuqeve timwa kyeqata qiomia nramwaqi quananra.

<sup>5</sup> Kotiva tiharo kyaravanto qovarama virara tita, tire Kotirara kyuqeve timwa kyeta tire ekyaa kyarara kyuquerave nraahu timwa kyeqata nraananra.

### *Timotirara e kyuqema kyera Iesusi Karaissira kyaiqa varaqira quante tura*

<sup>6</sup> E mwi quara mwi quara Iesusira nraakye qora timwa nyiqira viqarama e kyuqema kyera Iesusi Karaissira kyaiqa varaqira vinanra. E mwitaamaqira viqara e qutaa mwaanra qua riemwaqira vi variravara tiro, mwi quava i kyara votima kyero vahirara e kyuqema kyera Kotira aanraqaa vinanra.

<sup>7</sup> Mpo qua uri qua apiqama kyeqa mwanriqanra ti varia quara kyontavanto mwi quara ti variara. E ekyaa mwi quara mwoqa mwianta. E variqara Kotira aanra kyuqeraqaa nraahu quataa hirara variqira quante.

<sup>8</sup> Vaisivanto nai mwamwanta huvantu vaantu hiarive tiro, kyuqu kyauqu ntatute-qaro mpo qara mpo qara hiariva, mwiva mwaa entara nraahuma mwia kyaahaqa hiananro. Vaisi mwanraquravanto huvantu vaantu hiro kepukyaqama quarive tira, e Kotira aanraqaa mpo enta mpo enta kepukyaqama kyera viraro i vu nraato mwutukyaqitairo qio vahirara e mwaa entaravata nraakiara nyaamwuni varina entaravata qioma variqira vinanra.

<sup>9</sup> Mwi quarara nraakye qoravanto qutaa quave timwa kyeta qioma riemwaqita vivara.

<sup>10</sup> Tire tiqata, Mwanriqavanto qati variqiro viva, Kotiva, mwiva tiri kyaahaqa hiariva variho, ti varunanranra tita, tire kyuqema kye Kotira aanraqaa virera uti variqata tire toqaamwu tiqata Kotira kyaiqa varaqi vi varunanra. Kotiva ekyaa nraakye qora huvantu nyataariva variva, mwiva Iesusirara qutaa mwivave ti nraakye qorahua huvantu nyate variro.

<sup>11</sup> Mwaa quara timwa mwunra e nraakye qora timwa nyiqanra mwi quara riemwaqita quate qiante.

<sup>12</sup> Mpo ihua iara tiqata, Taqaate, mwiva qaraakya vaisima variho. Hia mwia qua riarerave, tihua, haunri mwihua iara mwitaa tivora. Iesusira nraakye qoravanto iara kyuqe vaisive qiate tira, e kyuqe qua nraahu timwaqira viqara kyuqema kyera nrohiante. Mpohuara mwutukya vahirara variqira quante. Kotirara kepukyaqama kyera riemwaqira quante. Api nrohina okyarara mwoqa tu kyera variqira quante. E mwitaamaqira virata nraakye qora e nrohinanra taqeqata mwihuavata qioma mwitaama kye nrohivara.

<sup>13</sup> E ni pekya variqarama mwaa kyaiqara varaqira quante. Nraakye qora ntuvan-tuama kyera mwihua suqaa sivira Kotira mpukuqitaira qua kyaara ntumwa kyera timwa nyiqinra quante. Mwitaamaqira viqara mwihuara mwi quara riemwaqita quate tira, mwi quara okyara ntapihi kyera mwihua timwa nyiqanra variante.

<sup>14</sup> Haaru Kotira vaisi nronranramwuvanto nkyiari kyauqu iqaa vateqata Kotira qua mpo i qovarama kye mwuvvara e mwiaqaataira Kotira kepukya mpo kepukya varonanra. Kotiva mwi kepukyara mwinra e hia mwianra taunru kyaraitira, mwianra riemwaqira quante.

<sup>15</sup> Ekyaa mwi inraikyarara tura mwi kyaiqaraqaa variqara qutaaqama kyera varaqira virata ekyaa nraakye qora i kyaiqa taqeqatama kyuqe kyaiqave qiata.

<sup>16</sup> E aanra kyuqeraqaa viqarama kyuqe qua nraahu timwa nyiqi virerave timwa kyera kyuqema kyera enaqa ntaqikyiqira quante. E mwitaamaqira viraro Kotiva inavata, i qua riehuavata, huvantu nyataananro.

## 5

### *Mwataama kyera Iesusira nraakye qoraqaa ntaqikyiqira quante tura*

<sup>1</sup> E taqairaro Iesusira nraaqiara nronra tuaari vaisiva mpovanto hia aanra kyuqeraqaa virera, hia mwia mpoqama kyera inronra hiante. Ena qorara qihaakyama kyera qiarantema kyera tiraro aanra kyuqeraqaa quari. Qaraakya vaisiara ena qata vakyaara tinantema kyera mwihuavata qiante.

<sup>2</sup> Kyontara ena nronranra tinantema kyera mwihuavata qiante. Qaraakya nraakye era ena nrunra nrakyaara tinantema kyerama mwihuavata tiqarama kyotataqama kyeqara variqira quante.

<sup>3</sup> Taqairaro tetoqa nraakyevanto nanrianraa varirata qio qutaa hia mpohua mwiaqaa ntaqikyivera, mwiaqaa kyuqema kyera ntaqikyiente.

<sup>4</sup> Tetoqa nraakyevanto varirata mwia nraaqiaravantove, mwia nraisivantove varivera, mwihua qiomaa mwiaqaa ntaqikyivara. Mwihua nyohua sohua, nyaaquhua saatohua, haaru mwihuaqaa ntaqikyurara rieqata mwihuaqaa ntaqikyiqita quata. Mwihua mwitaa hiqatama Kotira kyaiqa vare varivaro Kotiva mwihuara qamwataananro.

<sup>5</sup> Tetoqa nraakyevanto nanrianraa variqaro Kotirara nronraqama kyero riemwaqiro viqaro mpo enta mpo enta Kotirara aakyara nteqaro mwianra ni kyaahaqa hiarive qiani nraakyera, mwiaqaa kyuqema kye ntaqikyiqi quate qianta.

<sup>6</sup> Tetoqa nraakye mpovanto nanrianra nraahu qamwataani nraakyera hia kyaahaqa hiate qianta. Mwi nraakyeva qutu quahua nraantantamwa kyeroma variro.

<sup>7</sup> E mwaa quara Kotira nraakye qora timwa nyinrata mwihuaqaa hia qua vahirata kyuqema kye variqi quata.

<sup>8</sup> Vaisi mpovanto hia nai nrahesi nraaqiaraqaave mwivata varihuaqaa kyuqema kye ntaqikyirera, mwi vaisiva Karaisira quara qumina quave timwa kyero nteqama kyero. Mwi vaisiva hia Kotira qua riaa vaisihuavata nraatara kyero qora vaisivantoma variananro.

<sup>9</sup> E tetoqa nraakye kyaahaqa hiqara mwia nrutu vatarera hira taqairaro nraakye mpovanto qoraisi kuaiqia nraahu varataariva variqaro kyontaqama viro 60 ihi varaariva varirera, mwia nrutu nraahu vataate qianta.

<sup>10</sup> Mwi nraakyerara kyuqe kyaiqa vare vari nraakyerave ti vari nraakyeva nraahuma variari. Mwi nraakyeva kyuqema kyero nai nraaqiaraqaa ntaqikyiqi vihata mwihua nronra tueta varia nraakyevama variari. Mwi nraakyeva kyuqema kyero nyianranyaahua sitaqiro nai nraamwuqi kyero kyara nyi variari nraakyevama variari. Mwi nraakyeva Kotira nraakye qorani hia mpohua varaataa hi kyaiqara vara nyataarivama variari. Mwiva uaqima vita vari nraakye qorhua kyaahaqa hiar nraakyevama variari. Mwiva kyuqe kyaiqa, mpo kyaiqa mpo kyaiqa vare variari nraakyeva nraahuma variari. Mwitaa hian nraakyera nrutu nraahu vataate qianta.

<sup>11</sup> Tetoqa nraakyevanto kyontaqama viro 60 ihi vara kyaaninra mwia nrutu nraahu vateta tetoqa nraakye qaraakyara nrutu hia vataate qianta. Mwi nraakyeva Karaisira kyaiqa vareqa taqero vaati varaataa hiraro qaqlira kyaaninranravata hia mwia nrutu vataate qianta.

<sup>12</sup> Mwi nraakyeva tauraa nai kyauqu nriqiqaa vateqaro qiani quara qaqlira kyero Karaisira kyaiqavata qaqlira kyero mwia kyaara qua varaankyoora.

<sup>13</sup> Tetoqa nraakye qaraakyavanto hia qumina variqaro mpo nraamwu mpo nraamwuqi vera nteqaro airi qua timwaqiro nrohiari. Mwitaa hia nraakyehua nrohiqata mpohua mwaanra tita, hia qiataa qua viti timwa nyi viri timwa nyita, qua raapu vareqata mpo nraamwu mpo nraamwu nrohi variara.

<sup>14</sup> Tetoqa nraakye qaraakyava mwitaa hiankyorave tina, nte mwianra tiqana, E qaiqaa vaati varera nraaqiara mwata kyera mwiaqaa ntaqikyiqira quantema, tina. Mwi nraakyeva mwitaa hirera, tiri nramwutaaqa hi varihua hiam qio mwi nraakyerara rieqata tiriqaa qua vatevara.

<sup>15</sup> Nte taqauqata tetoqa nraakye mpo hiahua kyuqe aanra qaqlira kyeta Saataaninra kyaiqa nraahu vare variara.

<sup>16</sup> Nraakye mpovanto Iesusira nraaqiaravanto variqaro taqairaro mwia kuaa nraanre mpovanto tetoqa nraakye varirera, mwivama mwiaqaa ntaqikyiqiro quari. Mwiva mwiaqaa ntaqikyiqiro virata Iesusira nraaqiara hini mwihua tetoqa nraakye mpociani nkyiariaraa varihuaqaa ntaqikyiyata.

### *Nronra vaisinramwu Kotira kyaiqa varaahuqa kyuqema kye ntaqikyiate tura*

<sup>17</sup> Nronra vaisinramwu kyuqema kye Iesusira nraakye qoraaqaa ntaqikyihuara tirera. Mwihua kyaiqavanto kyuqema kyero vahirara tira, e Iesusira nraakye qora

timwa nyinrata mwihua kyuqema nyateqata uqinra kye kyoqaa nyiate. Vaisinramwu kyuqema kyeqa nraakyе qora timwa nyiqi viqata mwaanra qua okyara timwa nyiqi vi varia vaisihua, nte mwi vaisihuarama tuqo. E mwihua uqinra kye kyoqaa nyiate qiantema tina.

**18** Kotira mpukuqi mwitaama tiro:

Uiti uru ntatatumwu hiarive tira, purimakau vita vatairaro uiti mwivau ntamwaqiro nrohianinra nrona hia rupaante.

Mwia nrona hia rupairaro purimakauvanto mwi kyaiqara vareqaro qioma mwi kyarara mpoqiani nraananrove, turama. (Lo 25:4)

Kotira mpukuqi mpo quavata vahiva mwitaama tiro:

Mporani kyaiqa varaariva hia eqaanarove, mwiva nai kyoqaa varaanarove, tura. (Matiu 10:10) Mwi quara rieqarama e Iesusira nraakyе qora timwa nyinrata mwihua nkyiari nronra vaisi uqinra kyeqa kyoqaa nyiata.

**19** Nronra vaisivanto Iesusira nraakyе qoraqaa ntaqikyi variariva variraro vaisi kuaiqiyavanto mwiaqaa qua vatarera uti varirara hia mwi vaisira qua riaante. Vaisi taaratanave, taarampotanavantove, mwiaqaa qua vataivera, mwi quara rieqara avuqavu hiante.

**20** E taqairata nronra vaisinramwu qutaaqama kye qora kyaiqa utu kyaivera, e mwihua sita varera uro nraakyе qora suqaa variqara mwihuara tiqara avuqavu hiante. E mwitaa hirata hini nraakyе qora mwihua taqeta tirevata mwitaa hiarorave tiqatama aatu hiate.

**21** Timotio, nte Kotira vuqaavata, Iesusira vuqaavata nyaamwunyaahua suqaavata, variqanama nte iara kepuqyaqama kyena tiqanama: Nte i timwa mwu quara mwaa nraakyе qora timwa nyiqi viqara hia vaisi mpora ntena nramwunaave timwa kyera mwiavata qihakyama kye qua tira, mpo mwatanaahuavata kepuqyaqama kyera qua qianta. E ena nramwunaahuaravata mpo nramwunaahuaravata kuaa qarama kyera qua qianta.

**22** Hia paparuqama kyera ena kyauqu vaisiqaa vateqara mwia nronraqama kyairaro Kotira kyaiqa varaari. E mwitaa hiraro mwi vaisiva hia kyuqema kyero Kotira kyaiqa varairaro iqaavata qua vahiankyora. Mpohua qora kyaiqavanto ivata tu varaankyo tira, e kyuqe kyaiqa nraahu varaqira quante.

**23** Hia qumina nramanri nraahu nramwaqira quante. Airi enta i nriqa virara tira, e uaini pataqiani nranra hiraro i vikyokyavanto qio vahiari.

**24** Mpo hia vaisihua qoqaa variqata qora kyaiqa uti variavaro qamwanrama kyero mwihuaqaa ko vahira. Mpo hia vaisihua uqeta variqata qora kyaiqa uti variavaro mwihua qora kyaiqa mwiva nraakiarama qovara hiananro.

**25** Mwia votima kyero nraakyе qoravanto kyuqe kyaiqa vare variava qoqaama vahiro. Uqeta variqaro kyuqe kyaiqa vare variariva variraro mwia kyuqe kyaiqavanto nraakiara qoqaama vahiananro.

## 6

*Rupatovata variqata mpohuaqaa qumina kyaiqa varo nraakyе qorahuara tura*

**1** Nte nkyi rupa taavata mpohuani kyaiqa vareqata hia kyoqaa varaa nraakyе qorahuara tirera. Nkye variqata nkyitaqaa ntaqikyiani vaisirara kyuqe qua nraahu timwaqi viqata mwia qua nraahu riemwaqi quata. Nkye mwitaamaqi vivaro mpovanto hiama qio Kotirara uaquia hi quara qiananro. Mpovanto hiama qio tiri mwaanra quara uaquia hi quarave qiananro.

<sup>2</sup> Nkyi rupa taari nraakye qorahua varivaro nkyiqaa ntaqikyiari vaisiva, mwivavata Iesusira nraaqiara varirera, nkye mwi vaisirara tiri tiqata vakyaama variho qiata. Nkye mwia qua raaqutevora. Mwi vaisiva nkyi sata sakyaa varirata nkye kyuqema kye mwia qua rieqata mwia kyaiqa vara mwataata. Mwi vaisivavata Iesusirara quataave timwa kyero Kotirara mwutukya vahirara tita, nkye kyuqema kye mwia kyaiqa vareqata mwia kyaahaqamaqita quata. Timotio, e mwi quara nraakye qora timwa nyiqira quante.

### *Unra qua mwaanra ti vaisihuara tura*

<sup>3</sup> Vaisi mpovanto nri ntero tiri vunyaa vaisi Iesusi Karaisiva quataa qua tura qaqira kyero, mwiva tire riemwaqi vi varuna quara qaqira kyero mpo qua mwaanra tirera,

<sup>4</sup> mwi vaisiva nai nrutuara nraahu rie vari vaisiva variqarora tiro, mwiva hia mwaanra okyara ntapihiari vaisivama variananro. Mwitaa hi vaisihua varivaro inronra quave antua quave tiva nraahuma mwihua su nyaatoqi vahiananro. Mwihua mwi quara ti variavata mwia kyaara nraakye qoravanto mpohuara vikyokya uaqia hirata variqata inronra hiqata varivara. Mwi quara kyaara mwihua nanrianra nanrianra qora qua tivara. Nraakye qora nanrianra nanrianra qora su nyaato rieqata varivara.

<sup>5</sup> Nraakye qoravanto uaqia hi qua mwaanranra nraahu rieqata hia su nyaatoqi ntapihirata mwihua Kotira quataa qua qaqira kyeta munimave, mpo inraikya vararera nraahuma uti varivara. Mwihua tiqata, Kyai Kotira vataqi quana aanranraqaatai munimave mpo inraikya mpo inraikya varaare, ti varivara.

<sup>6</sup> Vaisivanto Kotiva mwiani inraikyarara qiove timwa kyero qamwatairera, quataama mwiva airi inraikya mwia vatero kyuqema kyero variariva variananro.

<sup>7</sup> Tiri mwatani mwatatai entaraqaa tire qovarama vita hia mpo inraikyavata vare nrunanra. Tire qutu vita nanra inraikyavatave vare quananra? Hiama qio tire mpo inraikyavata vare quananra.

<sup>8</sup> Mwianra rieqama tire taqaararo kyarave tuavaaqave qio vahiraqe tire kyuqemave timwa kye tire qio varuro qiera.

<sup>9</sup> Munimave, airi inraikyave, vararera uti variahua variavaro mwi inraikyava mwihua vara qora kyaiqaqi kyaihata nkyiari kyakya hira mpo kyaiqa mpo kyaiqa varaqi vita uro uaqiamma kye variqi vita raupirima quara.

<sup>10</sup> Nraakye qora munimanra nraahu mwutukya ntihata mwianra nraahu riemwaqi vi variara mwia kyaarama ekyaa mpo kyaiqa mpo kyaiqa uaqia hi kyaiqava qovara hi variro. Nte taqauqata vaisi mponramwuvanto munimanra mpogama kye mwutukya ntihata mwihua Iesusira qua qaqira kyeta variqi vita mwiaqatai mwihua mwutukya-vanto uaqia ihata variara.

### *Poruva Timotirara mwitaa mwitaama kyera variqira quante tura*

<sup>11</sup> Qio Timotio, e Kotiranivanto variananranra tira, ekyaa qora kyaiqa mwia nraatu ntuvaihaa vira uro nyianrato variante. E avuqavu vahiani okyarara riemwaqira quante. Kotira aanraqaa nraahu nrohiante. Iesusirara kepukyaqama kyera riemwaqira quante. Mpohuara mwutukya vahirara variqira quante. Hia qamwanrama kyero pupohairara kepukyaqama kyera variqira quante. Nraakye qorara qihakyaqamaqira quante.

<sup>12</sup> Vaisivanto mpo inraikya vararerata nai ntutaa kye nai ntutaa kyemaqi viqata hiantaantema kyera evata hianteqara uaqia hi kyaiqara qaqira kyera nte ekyaa enta qati variqi virerave timwa kyeqara Iesusirara rieqarama variqira quante. E mwitaama kyera variqira quante tiro, Kotiva i nraanrama taira. Kotiva i nraanrama taihara e airi nraakye qora suqaa variqara nte Kotira aanraqaa nraahu virerave qiananra.

<sup>13</sup> Kotiva variharora tiroma, ekyaa inraikyavanto qati vahiqiro viro. Qio nte Kotira mwia vuqaa variqanama iara mwaa quara riemwaqira quantema tuqo. Iesusi Karaisiva Pontiaasi Paireatativa huraga variqaro kyuqema kyero mwia timwa mwunra. Qio nte Iesusi Karaisira nai mwia vuqaavata variqanama mwaa quara riemwaqira quantema tuqo:

<sup>14</sup> Nte Kotira qua i mwu quaraqaa kyuqema kyera ntaqikyiqira viraro hia api qua inaqaavata mwiaqaavata vataivaro kyuqema kyero vahirara ntaqikyiqira viraro ekyaara entaqaa tiri vunyaa vaisi Iesusi Karaisiva qovara hiari.

<sup>15</sup> Nraakiara Kotiva timwa taani entaraqaa Iesusi Karaisiva qovara hirata ekyaama mwia taqevara. Kyuqema varia okyarava Kotiraqima vahiro. Mwiva nraahu ekyaa inraikya ntaqikyi varivama variro. Mpohua mpohua vunyahuave, nronravantove, variavaro Kotiva ekyaa mwihua nraatara kyero mwihua vuni varivama variro.

<sup>16</sup> Mwiva nraahu ekyaa enta qati variqiro vi variva. Mwiva omwa nronravanto ite variraqi variharo hiama vaisi mpovanto Kotiva hinani quariva vahiro. Hiama vaisi mpokuvanto Kotira taqaiva variro. Hiama mpovanto mwia taqaarivavata variananro. Mwiva ekyaa enta kepukyavanto variqiro quaninranra tita, varaivaqe mwia nrutu nraahu tuaaheraqi quara. Qutaama tuqo.

### *Airi inraikya vataahua tukyama mpohuavata nyiate tura*

<sup>17</sup> Mwaa mwataraqaa airi inraikya vataahua e timwa nyinrata mwihua hia nkyiari nyutu tuaahereqata tire nronra nraakye qorave qiate. Mwihuara hia nkyetani quaahaqa vahiani inraikyarara nronraqama kye riaraitita, Kotirara nraahu nronraqama kye riemwaqita quate qianta. Tiriara kyuqema kye variqi quate tiro, Kotiva qihakyama kyeqaro ekyaa inraikya naini vahi inraikyara tiri timwi varira.

<sup>18</sup> E airi inraikya vataahua kyuqe kyaiqa, mpo kyaiqa mpo kyaiqa varaqi quate qianta. E mwihuara nkyeta hi inraikyara qihakyama kye tukyama kyeqqa mpohuavata nyiate qianta.

<sup>19</sup> Mwihua mwitaamaqi vivaro nraakiara nyaamwuni mwihua kyoqaa kyuqema kyero kepukyaqama kyero vahiananro. Mwihua mwiaqaatai qutaaqama kye qati variqi vi okyarara vareta qati variqi vivara.

### *Kotiva i mwiani kyaiqaraqaa kyuqema kyera ntaqikyianta tura*

<sup>20</sup> Timotio, Kotiva i mwiani kyaiqaraqaa kyuqema kyera ntaqikyiqi viqara mwi kyaiqara varaqira quante.

Mpohia vaisihua hia Kotira qua ntapihi kye riaraitita, mwihua nkyiari riemwa kyeta tire mwaanra qua okyara ntapihura huave timwa kyeta api qua ti variara. E mwi quara ti varihua mwoqa nyiante.

<sup>21</sup> Mpo hia nraakye qorahua, mwihua quara qutaa qua okyarave timwa kyeta mwihua Kotira aanra qaqlira kyeta apiqama kye uaqlia hi aanranraqaa nrohi variara.

Kotiva nkyi kyuqema nyatairata variatema, tuqo.

## 2 TIMOTI

### Poruva Timotirani nraakiaraa qara vara kyora

Iesusira qati vara sivuma kyovaro nyaamwuni uro varuvaro 36 ihive nritarovaro Poruva karavuqi variqaro qaiqaa qara mwaa ntumwa tora. Mwi entara Porura ru kyeva qaumaqa huvaro Poruva mwianra rieqaro Timotira qua mwaanra mwinro tiqaro, Kyuqema kyera Karaisira qua riemwaqira quante, tiqaro qara mwaa ntumwa tora.

<sup>1</sup> Nte Poruvama. Kotiva nai kyakya hiraqa tihana nte nronraqama vina Iesusi Karaisira qua timwa nyi varuvama varina. Tire Iesusi Karaisiravata variqi quananranra Kotiva kyauqu nriqiqaa vateqaro timwa tai quara, nte mwi quara nraakyе qora timwa nyi varuva.

<sup>2</sup> Nte i Timotirara ni maaqu kyuqevavema tuqo. Kotiva tiri tiqovavata, Iesusi Karaisiva tiri vunyaa vaisivantovata, i kyuqema mwateta iara po kye timwa mwataivaro i mwutukyaqitairo qihakya hi varirara variante.

#### *Tire hia Karaisira quara kyauruare tura*

<sup>3</sup> Nte Kotirara kyuqeve timwaqi viqana ntena haivaqahua huntema kyena Kotira kyaiqa varaqi vi varura. Nte Kotira kyaiqa vareqana ntapihi kyena varaurara tina, nte qua tuqaro hia ni no muaanra ntaihana vutu kyena tura. Nte mwitaamaqi viqana nte entaqivata iheravata Kotiva i kyaahaqa hiarive tina, mwianra aakyara ntamwaqina vura.

<sup>4</sup> I vuqitairo nruqunru tumunranra nte qati nraahu rie varuqo. Ni mutukyavanto kyuqe hiarive tina, i taqaataa ihana varuqo.

<sup>5</sup> E hia unraqama kyera Kotirara rieqara mwia aanraqaa quananra nte mwia ntapihima kyena. I taatova Roisivavata, i nrova Iunisivavata, Kotira aanraqaa vuntema kyera evata vi variananra nte ntapihi kyauqo.

<sup>6</sup> Mwianra rieqanama haaru nte iqaa kyauqu vataavaroo Kotiva mwi entara nai kepukya mpo i mwunra, e mwia taunru kyerorave tuqo. Vaisivanto qia vuata kyaiharo auru vintema kyera e Kotiva nai kepukya mpo i mwinra hia qumina tutaraitira, tuqara kyera mwia kepukyaqama kye tutera Kotira kyaiqa varaqira quante.

<sup>7</sup> Hia tiriara mwihua aatu hiate tiro, Kotiva nai mwanraqura timwinra. Qaqao, Kotiva nai mwanraqura tiri timwihanro mwia mwanraquravanto tiri kyaahaqa hi varihata mwiaqaatai tire kepukyaqama kye variqi viqata tire nanrianra nanrianra mwutukya vahata tire kyuqema kye tetu mwamwantaqaa ntaqikyiqi vunanra.

<sup>8</sup> Mwianra rieqarama hia kyauriqara tiri vunyaa vaisiara nraakyе qora timwa nyiqira quante. Nte Karaisira qua timwa nyunra mwia kyaara ni rupa kyaavana karavuqi varura, hia mwianravata riairaro i kyaurirara variante. E hia kyauriraitira, ni nraantantera tiri vunyaa vaisi quarave tira i uaqlama mwate varivara e muaanra varenanranra hia nronraqama kyera riemwaqira quante. E mwitaamaqira viraro Kotiva i kyaahaqa hiqaro i kepukyaqama mwatairara e qiomma variqira vinanra.

<sup>9</sup> Kotiva tiri huvantu timwa tero tiriara ni nraakyе qora variate tiro, tiri tinraanrama taira. Hia tire kyuqe kyaiqa vara mwataunranra riero tiri tinraanrama taira. Mwiva nai nte mwitaa hirerave timwa kyero qati tiri kyuqema timwa taira. Hia mwaa mwataru ututo entara Kotiva tiqaro, Nraakiara nte Iesusi Karaisira kyaiqara rieqana nraakyе qora kyuqema nyatarerave, timwa kyero terama tero varura.

<sup>10</sup> Kotiva mwitaa timwa kyero variharo mwaa entara Iesusi Karaisiva tiri huvantu timwa taariva mwatani qovarama virara tita, tire Kotiva tiri kyuqema timwa taaninranra ntapihi kye riaunranra. Karaisiva qovarama viro ekyaara qutu vi okyarara mwia

kepukya nteqa kyairara tita, tire Karaisira mwakyaakya kyuqera riemwaqi viqata tirevata qiomaa ekyaa enta qati variqi quananra.

<sup>11</sup> Kyuqe mwakyaakya mwia timwa nyianrive tiro, Kotiva ni nronraqama kyaihana nte mwi quara nraakye qora timwa nyiqi viqana qua okyaravata mwihua timwa nyi varura.

<sup>12</sup> Nte mwi quara timwa nyiqi vi varuqata mwia kyaara mpo hiahua ni uaqiamma mate variavana nte muaanra vare variqana nte hia nronraqama kye mwianra riena kyauriraitina, nte mwiaqaa vuntu vina varu vaisira Iesusira okyara ntapihi kyauvara tina, nte mwutukya qihakyama kyena tiqana, Mwiva qiomaa ni kyaiqa mpitairaqqaa ntaqikyiqiro viraro ekyaa enta qovara hiananrove, ti varura.

<sup>13</sup> Nte qutaa qua i timwa mwunra rieqarama mwi quara nraahu tuqara tutera nraakye qora timwa nyiqinra quante. Mwi quara rieqarama Karaisirara kepukyaqama kyera riemwaqi viqarama mpohuara mwutukya vahirara variqira quante.

<sup>14</sup> Vaisivanto kyuqe inraikyaqaa ntaqikyintema kyera e Karaisira qua nte i timwa mwunraqaa kyuqema kyera ntaqikyiqira quante. Kotira mwanraquravanto tiriq variva i kyaahaqa hi varirara e mwi quaraqaa ntaqikyiqira quante.

<sup>15</sup> Nte Esiaani nrohi varuqata ekyaa vaisivata, Pikeraasivavata, Hemokenaasivavata, ni qaqlira kyeta quara e mwia ntapihi kyaananra.

<sup>16</sup> Ni karavuqi kyeta seniqo rupa taavana varuqaro Onesiporaasiva hia mwianra kyauriraitiro, mpo hira mwipi nrumu ni kyuqema matairara tina, nte Kotirara aakyara nteqana mwi vaisiravata, mwia nraamwuqi variahuavata, kyuqema kyera po kye timwa nyataantema tuqo.

<sup>17</sup> Mwi vaisiva hia ni rupa taarara nronraqama kyero riaraitiro, Romiqi uro ntero ni piriara puaamaqiro viro uro ni puaama kyaira.

<sup>18</sup> Qio tiri vunyaa vaisivanto ekyaa entaqaa mwianra po kye timwa mwataananro. Nte Epesaasiqi variavaro mwi vaisiva kyuqema kyero ni kyaahaqa hora, mwiavata e ntapihiananra.

## 2

### *Ntaqi vari vaisira kyuqera votima kyera variqira quante tura*

<sup>1</sup> Timotio, ni maaquo, Iesusi Karaisiva tiri kyuqema timwa te varirara tira, e kepukyaqamaqira quante.

<sup>2</sup> Nte nraakye qora airi suqaa variqana timwa nyu quara e riaananra, mwi quara Kotira aanraqaa kyuqema kyeta nrohi vaisihua timwa nyinrata mwihua mwi quaraqaa kyuqema kye ntaqikyiqi viqata mpohuavata timwa nyiqi quata.

<sup>3</sup> E Iesusi Karaisira nraaqiara variqara ntaqi vaisira kyuqera votima kyera variqarama hia tiri uaqiamma timwa terara nronraqama kyera riaraitira, tiri nraantantamwa kyera muaanra vareqarama kepukyaqama kyera variqira quante.

<sup>4</sup> Ntaqi vaisiva variqaro naiqaa ntaqikyi vaisira qamwata mwatarero uti variqaro mwiva hia mpo kyaiqa mpo kyaiqa varaqiro viraitiro, mwiva ntaqi kyaiqara nraahu varaqiro vi varira.

<sup>5</sup> Mpo inraikya vararerata hiante huaqitairo mpovanto hiante okyarara timwa taani quara hia riaraitiro, nai riemwa kyero mpo aanraqaa quariva hiama qio kyoqaa varaananro.

<sup>6</sup> Vaisivanto toqaamwu tu kyero kyaiqa varaqi viro kyara vara tutaariva, mwiva nraantemaa kyara nraananro.

<sup>7</sup> Tiri vunyaa vaisivanto i kyaahaqa hirara e ekyaa qua okyara qio ntapihi kyera rienanranra tira, e nte tu quarara nraato tuqira quante.

<sup>8</sup> Nte Karaisira mwakyaakya kyuqe mwakyaakya nraakye qora timwa nyiqina vu quara nraahu riemwaqira quante. Iesusi Karaisiva Ntevitira okyara kuaa okyara

varuva qutu vuraqitairo qaiqaa qati sivurama. Nte mwi vaisira qua timwa nyiqi vi varurama.

<sup>9</sup> Nte timwa nyiqi vuqata mwi quara kyaara ni uaqama mateta antua utuhua rupa taantema kyeta ni seniqo rupa taara. Mwihua ni nraahu qio rupa teta Kotira qua hia qio rupa tevara.

<sup>10</sup> Mpo hiahua ni uaqama mate variavana nte hia mwianra nronraqama kyena riauqo. Nte Kotiva nai kyaama tai nraakye qorahuara rieqana qioma nte muaanra mwia varaaninra. Mwihuavata Karaisira qua riaivarot Kotiva mwihua sitairata ekyaa enta Kotiravata qati variqi quate tinama, nte ekyaa muaanra mwianra hia nronraqama kye riaraitina, variqi vura.

<sup>11</sup> Mwaa quarara qutaa quave qiarara tira, evata riemwaqira quante:  
Tire Karaisiravata qutu quarahua variarera,  
tire qioma nraakiara mwivavata qati variqi quananrave.

<sup>12</sup> Tire hia qoriri hiraitita, kepukyaqama kye variqi  
quarerera, tire Karaisira vatama kye  
variqata ntaqikyiqita quananrave.  
Tire Karaisira mwoqa mwianrenra,  
mwivavata tiri mwoqa timwiananrove.

<sup>13</sup> Tire mwia qua riemwaqita virerave timwa kyeta  
qaqira kyaarerera, mwiva nai timwa taani quara  
hia qaqlira kyaraitiro, qati nraahuma  
mwi quara riemwaqiro quananrove.  
Mwiva hia nai timwa taani quara qaqlira kyero  
mpo qua mwia mwoqaqaa qiananrove.

### *Kotira kyaiqa kepukyaqama kyera varaqira quante tura*

<sup>14</sup> Ekyaa mwi quara tura qaiqaavata qaiqaavata nraakye qora timwa nyiqira quante. E Kotira vuqaa variqara nraakye qora timwa nyiqanrama hia qumina mpo qua mpo qua kyaara inronra hiqata variate qianta. Inronra hi quava hia nraakye qora kyaahaqa hiananro. Mwi quava mwihua vara raupirimama kyaananro.

<sup>15</sup> Kotiva iara kyaiqa vaisi kyuqevave qiarive tira, mwia kyaiqa nraahu kyuqema kyera varaqira quante. E tiqara, Mwiva ni kyaiqa tukyama kye taqairaqe hia kyaurirerave, timwa kyeqarama mwia kyaiqa varaqira quante. Kotira qua qutaa qua ntapihi kyera nraakye qora timwa nyiqira quante.

<sup>16</sup> Vaisivanto hia Kotirara riaraitiro, qumina qua nraahu riemwaqi viqaro inronra qua qiani vaisira mwoqa mwiante. Mwi quava vaisi vara kyairaro Kotira aanra qaqlira kyero mpo aanra uaqia hianinraqama quananro.

<sup>17</sup> Mwi quava tauma rumpuara uaqia hiva vaisi mwamwanta nre varira voti hira. Haimeniaasivavata Pairitaasivavata mwi quara timwa nyiahua variara.

<sup>18</sup> Mwitanahua qutaa aanra qaqlira kyeta tuqasaavi api qua tiqata, Ekyaa nraakye qora qutu viraqitai qaiqaa qati sivi entarara vaakya qovarama viro taiqama viho, ti variavata Iesusira nraaqiara mpo hiahua mwitanahua quara qutaaave timwaqi vita mwia kyaara mwihua uaqama quara.

<sup>19</sup> Qio paatiharo mwataqi kyatari rataintema kyero Kotiva nai qua paatiharo rataira. Mwiaqaa qara ntumwa taiva mwitaama tiro:  
Nronravanto nainive ti nraakye qorahua  
ntapihi kyairavema, tiro.

Qara mpovanto tiqaro:  
Nronravanto niqaa ntaqikyi varivave qiariva,  
mwi vaisiva uaqia hi kyaiqara qaqlira kyero  
kyuqema kyero variqi quarive, tira.

**20** Nraamwu nronraqi taanu mpo qara mpo qara hiva vhira. Mpo hiva nronra munima kyeqata utu taava korive, munimave, mwi inraikyaraqo utu taava vaiharo mpo hiva kyatarive, aatapaive, mwiaqo utu taava vhira. Mpo hi taanunraqaa nronra entaqaa nraavata mpo hiraqaa qumina entaqaa nraanra.

**21** Vaisivanto uaqia hi kyaiqara qaqlira kyero variva, mwi vaisiva taanu kyuqeraqaa nronra ihera nraahu vara kyeqaro nrai taanunra votima kyero variananro. Tiri nronravanto mwi vaisira vita kyero qioma mwiva ni kyaiqa nronra kyaiqa varaanarove qiananro. Tiri nronravanto mwi vaisirara hia qumina kyaiqa vararaitiro, ni kyaiqa nraahu varaqiro quananrovema qiananro.

**22** Qumwanraa vaisive, qaraakya vaisive, variqata api nkyiari mwamwanta kyakya hira qora kyaiqa varaataa hira qaqlira mwoqa tukyera ntapihi kyera variqira quante. E Karaisirara kepuqyaqama kyera riemwaqira quante. Mpohuara mwutukya vahirara variqira quante. Mwaateraqama kyera variqira quante. Mwitaamaqira viqarama mpo ihua quttaaqama kyero Karaisiva tiriqaa ntaqikyi varivave tihuavata variqira quante.

**23** Qua uaqia hianinra tiqata inronra hivara e hia mwihua kyapata variqira quante. Mwihua mwitaa timwaqi viraqatairo ntaqira inraikyavanto nraahuma qovara hinanro.

**24** Karaisira kyaiqa vaisivanto hiama mpohuavata ntaqiro inronramaqiro quananro. Mwiva mwihua mwutukya vara qihakyama kyero kyuqeraqama vataqiro quananro. Mwiva kyuqema kyero raraqa taaninra vara mwataniqama kyero ntapihi kyero qua okyara timwa nyiqiro quananro.

**25** Mwia quara qumina quave timwa kye hia riehua qihakyama kye timwa nyiqi viro avuqavu hiari. Mwiva mwitaamaqiro viraro Kotiva mwia qua hia riehua kyaahaqa hirera, mwihua mwi vaisira quara qutaave timwa kyeta unra qua qaqira kyeta Karaisira quara qutaavema tivara.

**26** Vaaravanto aasau tutaintema kyero Saataaniva mwi vaisihua tutaihata mwihua mwia qua nraahu riemwaqi vi variara. Mwihua su nyaato ntapihi virata ntapihi riaivera, mwihua Kotira qua riemwaqi vivara.

### 3

#### *Poruva ekyaara entanramwuanra tura*

**1** E mwaa quara riaante. Ekyara enta qaumaqa hianinraqa nraakye qora uaqiamka kye variqata nronraqama kye muaanra vahianinraqi varivara.

**2** Mwi entara vaisivanto nkyiariara nraahu riemwaqita vivara. Mwihua munimanra nraahu nronraqama kye rieqata mwia varehua nraahu kyaiqa utuqita vivara. Mwihua nkyiari mwahuta titi nkyiari nyutu nraahu tuaaheraqi vivara. Mwihua mpohuara uaqia hi quara nraahu timwaqi vivara. Mwihua nkyiari nyohua sohua qua raaqu tevara. Mpohua mpo inraikya nyivatave, kyaahaqa hivatave, hiama kyuqevevata tivara. Mwihua hia Kotira kyaiqarave Kotiva hi inraikydarara riaraitita, apiqama kye variqivi vivara.

**3** Mwihua hia mpohuara mwutukya vahirata variqi vivara. Mwihua hia mpohuara po titi mpohuara kyuqe hivara. Mpohua nyutu vara mwataniqia hiqata unra qua tiqata varivara. Mwihua hiama qio nkyiari nyamwantaqaa kyuqema kye ntaqikyivara. Mwihua qamwanrama kyeta hena vaisi rukye toqa ntupepaa hirera nraahu utivara. Mwihua kyuqe okydarara hia mwutukya vahirata varivara.

**4** Utaruara rieqata nramwutaa kyauquqi mwihua nkyiari nramwunaahua sitaqa uro kyevara. Mwihua paparuqama kyeqa api kyaiqa varevara. Mwihua nkyiari mwahuta tiqata tire nronra vaisi varuroma tivara. Mwihua nkyiari qamwaterara nraahu rieqata hiama Kotirara nronraqama kye rievara.

<sup>5</sup> Mwihua nraakye qora suqaa nrohiqata nkyiari nroqitai tiqata, Tire Kotira vataqi vi varuro, timwa kyeta mwihua nkyiari su nyaatoqitai tiqata, Hiama Kotiva tiri qio kyaahaqa hiananrove, tivara. Nraakiara mwitaa hi vaisihua qovarama vivara e mwihua nyaatu aatu hiqara hia mwihua nraaqani quante.

<sup>6</sup> Mwitaa hia vaisihua hia kyuqe vu nraato vahi nraakyehuara tiri qua riemwaqi quate titi, mwihua mpo nraamwu mpo nraamwuqi vi variara. Mwi nraakyehuua nkyiari qora kyaiqqaara nronra muaanra vareta nkyiari mwamwanta kyakya hira vataqi viqata mwi aanranraqaave mpo aanraqaave quananrave ti varia nraakyehuua variara.

<sup>7</sup> Mwihua mpo qua mpo qua ntapihiare tiqatavata hia Kotira qua qutaa qua okyara ntapihi kye riaara.

<sup>8</sup> Haaru Mosesiva varu entara vaisitana Ianisikya Iampirisikya Mosesira nramwuttaaqha huntema kyeta mwaa entara mwi vaisihua Kotira qua qutaa qua okyarara nramwuttaaqha hiqata varivara. Mwi vaisihua variavaro mwihua su nyaatovanto apiqama vihata mwihua unra tiqata, Tire qiomma Kotira aanraqaa vi varuro, ti variara.

<sup>9</sup> Qio mwihua mwitaamaqi viqata hia qioqama kye variqi vivara. Haaru nraakye goravanto Ianisikya Iampirisikya api okyara qovarama kye taqontema kyetama nraakye goravanto mwi vaisihua okyara qumina unra okyara qovarama kye taqevara.

### *Poruva Timotirara Kotira qua kepuqyaqama kye tutante tura*

<sup>10</sup> E nivatama kyera variqara nte nraakye qora timwa nyu quara ntapihi kyera riaananra. Nte nrohina varura ekyaa ni okyara ntapihi kyaananra. Nte Karaisirara kepuqyaqama kye riemwaqi vurarave, ni pikyokyaqitairo hia raraqa taihana nte tirema variqana kyuqema kye vaisi kyaahaqa hi varurarave, nte mpohuara mwutukya vahana varurarave, e ekyaa mwi inraikyara ntapihi kyaananra. Hia nte qoriri hiraitina kepuqyaqama kye variqi vurarave,

<sup>11</sup> mpo hiahua ni uaqiana mataavana toqaamwu tu kyeqana variqi vurarave, nte atura ntiqana variqina vurarave, mwiavata ntapihi kyaananra. Nte Antiokinive, Aikoniaaminive, Risitaraanive, mwi mwatanaahua anomia kye ni uaqiana mate varuvana nte nriqa vu inraikyara varavara e mwiavata ntapihi kyaananra. Mwi mwatanaahua anomia kye ni uaqiana mate varuvaro tiri vunyaa vaisivanto mwihuaqitairo ni vaitutuma kyero ni vara qatinani kyora.

<sup>12</sup> Ekyaa nraakye qora Iesusi Karaisiravata variqata Kotira aanraqaa virera ihua varivata mwata mwaqaanaa nraakye goravanto hiama mwihua egevara. Mwihua ri ntuquuti hivata nriqa vira inraikya vareqatama varivara.

<sup>13</sup> Uaqia hi kyaiqara uti varihuave, Kotira kyaiqa unraqama kyeqa vare varihuave, mwihua uaqia hi kyaiqara utiva mpoqiaavata nritarero nronraqama kyero vahiananro. Mwihua mpohua unra utu nyataivata mwihua nkyiari unra utu nyatevara.

<sup>14</sup> Qio e hia mwitaa tiraitira, mwaanra qua rieqara mwi quarara qutaaave qiananra mwianra nraahu riemwaqira quante. Tire mwi quara i timwa mwunanranra tira, e tiri okyaravata ntapihi kyaananra.

<sup>15</sup> E pataru variqara Kotira mpukuqi qara ntumwa tai quara riemwaqira quananra. Mwi quava i kyaahaqa iharo i vu nraatovanto ntapihi paahima vihara e Iesusi Karaisirara qutaaave qiananranra tiro, Kotiva i huvantu kyero qiomma i vitaananro.

<sup>16</sup> Ekyaa Kotira mpukuqi vahi quara Kotira mwanraquravanto vaisi kyaahaqa hi varihata qara ntumwa taara. Mwi quava nraakye qora kyaahaqa hiari quavama vahiro. Mwi quaraqaatairoma vaisivanto qutaa qua okyara qio ntapihiananro. Mwi quaraqaatairoma vaisivanto nai uaqia hi kyaiqara utuaninra vu nraato ntapihiraro ntapihi kyero riaananro. Mwi quaraqaatairoma kyuqe aanraqaa nrohiani okyarara

qio ntapihiananro. Mwi quava nraakye qora kyaahaqa hi variratama mwihua ntapihi kye variqi vivara.

<sup>17</sup> Mwi quava mwitaama vahirara tiro, Kotira kyaiqa vaisivanto Kotira mpukuqi vahi quara riemwaqiro viro mwiaqatairo tera taarama kye variqaro qioma kyuqe kyaiqa varaqiro quananro.

## 4

### *Kepukyaqama kyera Karaisira qua timwaqira quante tura*

<sup>1</sup> Nte Kotira vuqaavata, Karaisira vuqaavata, variqana qua i timwa mwinrenra. Iesusi Karaisiva nraakiara qutu vihuavata, qati varihuavata, tukya hiananro. Mwiva nraakiara vunyaa vaisivanto variqaro ekyaa nraakye qoraqaa ntaqikyiariiva tumuananro. Mwianra rieqanama nte i qua mwiqana mwitaama tina:

<sup>2</sup> Karaisira mwakyaakya nraakye qora timwa nyiqira quante. Nraakye qoravanto tera hita qamwate entarave, hia qamwate entarave, qati nraahu mwi quara timwa nyiqira quante. Kepukyaqama kyera qua timwa nyiqira virata mwihua mwi quarara qutaave qiata. Mwihua qora aanra nrohira mwi inraikyara qoqaa timwa nyiqira virata mwihua mwi aanranra qaqlira kyeta Kotira aanraqaa quate. Mwi quara hia paparuqama kyera timwa nyinraitira, qakyoma kyera ntapihi paahima kyera timwa nyiqira quante.

<sup>3</sup> Mpo enta nri ntairata mwi entaraqaa nraakye qoravanto hia qutaa qua riarera utivara. Mwihua nkyiari riaataa hiani quara, mwia nraahu riarera uti variqata api okyarara nraahu ti vaisihua sita kye vateta tiqata, Tiri rie nraahu variataa hiraqe rieqata qamwate variana quara nraahu timwa timwiqi quatema, tivara.

<sup>4</sup> Mwihua qutaa qua mwoqa mwita uri quave, haaru varuhua qua nraahu riaataa hiratama rieqata varivara.

<sup>5</sup> Mwihua mwitaamaqi vi varivara e hia mwitaa hiraitira, i vu nraatovanto kyuqema vahirara variqira quante. I uaqama mwataivara e nriqa vi inraikyara vareqara kepukyaqama kyera variqira quante. Karaisira qua timwaqira quante. Kotiva i mwitai kyaiqara varaqira quante.

### *Nte qutuani entava qaumatomata vaiho tura*

<sup>6</sup> Kotira kyaiqa vareqaro uaini ekyaa rauru kyaintema kyero qaumama ni nraanrevata rauriraqe taiqaaninra. Pataqia vari kyena mwaa mwataraqatai taiqena quaninra.

<sup>7</sup> Nte mwatani variqana mpo inraikya vararerera hiantantema kye hiantamwaqi vina uro aanra mwia taiqa kyaquo. Nte Karaisira qua kepukyaqama kye tuqina vi varura.

<sup>8</sup> Nte kyuqema kye hianteqana aanra mwia taiqa kyaurara tina, nte mwia qiata kyoqaa varaaninra mwia vekya nraahuma varuqo. Nronravanto ekyaa nraakye qora ntapihi kyeqaro tukya hi variva, mwiva ekyara entaqaa variqaro ni kyoqaa mpiqaroma nianra e ntapihi kyera nrohi variaravavema qiananro. Mwiva hia nianra nraahu mwi quara qiananro. Ekyaa nraakye qoravanto mwiva qaiqaa qovara hiani entara mwia vekya varihuavata varivaro mwiva mwihuaravatama mwi quara qiananro.

### *Poruva ekyara qua tura*

<sup>9</sup> E ni taqera aanrava vahirara qamwanrama nrumu ni taqaante.

<sup>10</sup> Ntimaasiva mwaa mwataraqaa vahi inraikyarara mpoqama kyero mwutukya nti variharo ni qaqlira kyero Tesaronaikaani vura. Kereseniva Karesiaani viharo Taitaasiva Ntarimesiaani viharo

<sup>11</sup> Rukuva kuaikuvantoma nivata variro. E mwaini nrinrenra hira Maakiravata vitera nriante. Mwiva kyuqema kyero ni kyaahaqa hi varihana kyaiqa varaura.

<sup>12</sup> Nte Tikikaasira titauqaro Epesaasini virama.

<sup>13</sup> E mwaini nrinrenra hira ni vaaqatua Toroasini Kapaasira nraamwuqi kyaura mwiavata varaqira nrumu mpiante. Mpukuvata varaqira nrumu mpiante. Mpuku mponramwu aasau pahiqo utu taira mwianra nronraqama kye riemwaqi virama varaqira nrumu mpiante.

<sup>14</sup> Arekisantaava qainiqotairo mpo inraikya mpo inraikya uti variva nronraqama kyero ni uaqama mataira. Mwianra rieqaro tiri vunyaa vaisivanto nai kyoqaa mwiananro.

<sup>15</sup> Evata mwi vaisirara rauriqara variante. Tire nraakyе qora timwa nyuna quara mwiva quataaqama kyero mwi quara nramwutaaqa hi varira.

<sup>16</sup> Vuni niqaa qua vatovana ko ti variavaro hia mpovanto nivata variro ni kyaahaqa hura. Ekyaa ni qaqla kyeta vuvana nte ntenanraa variqana ntene vaitutu hiavara. Qio nte Kotirara aakyara nteqanama mwitaa hia vaisihua hia mpo qara hiante tura.

<sup>17</sup> Nte ntenanraa ko ti variavaro tiri vunyaa vaisi mwiva nraahu nivatama kye variqaro ni kepuqyaqama matovana nte Karaisira qua ekyaa mpo mwatanaa mwihua timwa nyiavata mwihua ni qua riora. Tiri vunyaa vaisivanto qaakyau vairi raioni nroqitairo ni vaitutuma kyora.

<sup>18</sup> Uaqia hi kyaiqava ni nraatara kyaankyo tiro, tiri vunyaa vaisivanto ni vaitutumaqiro viviro ni pitaqiro uro nyaamwuni nai mwatukyaqi naivatama kye variarive tiro, ni uro kyaananro. Mwiva kepuqyavanto varirara tita, mwia nrutu nraahu ekyaa enta tuaaheraqi quata. Qutaave.

### *Qua mwanteqaro ekyara qua tura*

<sup>19</sup> Nte Pirisiraaravata Akuiaraaravata qua mwantauqo. Onesiporaasiravata mwia nraamwuqi variahuvata nte qua mwantauqo.

<sup>20</sup> Irasitasiva Korintiqi nraahu variharo Toropimasira nriqa vihananra tina, nte Mairitaasini mwia kyaura.

<sup>21</sup> Ni taqarerara toqa vaururu tuani entara nrinronra. E nrinra aanrava qio vahirara, vuhaaninraqaa qamwanrama kyera nrumu ni taqaante.

Iuvuraasivavata, Piutenisivavata, Rainasivavata, Kirotiavavata, ekyaa tiri tiqata vakyaa hini mwihuavata, nkyi qua mwantaavo.

<sup>22</sup> Tiri vunyaa vaisivanto Karaisiva i mwutukyaqi variari. Kotiva nkyi ekyaa kyuqema nyatairata variatema, tuqo.

## TAITAASI

### Poruva Taitaasirani qara vara kyora

Iesusira qati vara sivuma kyovaro nyaamwuni uro varuvaro 36 ihive nritarovaro Poruva qaiqaa karavuqi variqaro mwaa quara qara ntumwa tora.

Taitaasiva hia Iutaa vaisi nai mpo mwatanaavanto Iesusira nraaqiaraqama viro varuvaro Poruva mwianra mwataama kyera nraakye qora Kotira aanra nyaamwutaante tiqaro Taitaasirani qara ntumwa tora.

<sup>1</sup> Nte Poruva Kotira kyaiqa vaisi varuvama. Kotiva ni nronraqama kyaihana nte Iesusi Karaisira qua timwa nyiqi vi varuvama varina.

Kotiva nai kyaama tai nraakye qorahua Karaisirara kepukyaqama kye variqi viqata quataa qua okyara riemwaqi quate tiro, Kotiva ni titairave.

<sup>2</sup> Kotiva hia unra qua ti variva haaru hia mwaa mwatara ututo entaraqaa nai kyauqu nriqiqaa vatero tiqaro, Ntena kyaama taani nraakye qorahua ekyaa enta qati variqi vivarave, tura. Mwianra rieqanama nte nraakye qora timwa nyiqanama, Nkye Kotirara kepukyaqama kye riemwaqi viqatama mwi entara vekya variqi quate, ti varurave.

<sup>3</sup> Kotiva nai kyaama tai nraakye qorahua ekyaa enta qati variqi vivarave timwa kyero variqi vuvaro nai timwa to entaraqaa Iesusi Karaisiva tumu ntero Kotira qua qaraakya qua qovarama kyora. Mwi quara nraakye qora timwa nyiqira quante tiro, Kotiva tiri huvantu timwa taariva, mwiva ni nronraqama kyaihana nte mwi quara nraakye qora timwa nyiqi vi varuvama varina.

<sup>4</sup> Taitaasio, nte mwaa quara inima qara ntumwa tena. Tiretana Karaisira qua kuaa qua nraahu riemwaqi vi varunanranra tina, nte iara ni mwaaquve turave. Kotiva tiri tiqovavata Iesusi Karaisiva tiri kyaahaqa hiarivavata i kyuqema mwataivaro i mwutukyaqitairo qihaakya hi varirara variana.

*Mwaa quara rieqara vaisi nronraqama kyairata Iesusira nraakye qoraqaa ntaqikyi-  
ate tura*

<sup>5</sup> Iara nte hia taiqa kyaani kyaiqara ntapihi kyera taiqa kyera mpo mwatukya mpo mwatukyaqitaira vaisi nronraqama kyairata Iesusira nraakye qoraqaa ntaqikyiqi quate tina, nte Kiritini i kyena nrunrave. Qio nte mwini variqana i timwa mwiava quara riemwa taante.

<sup>6</sup> E vaisi nronraqama kyarera hira mwataama variani vaisira nronraqama kyaante: Mwi vaisiva varirata nraakye qoravanto hia mwianra uaqia hi kyaiqara utiho timwa kye mwiaqaa qua vatevama variari. Mwi vaisiva nraakye kuaa varataarivama variari.

Mwi vaisira nraaqiaravantovata Karaisira qua riemwaqi viqata mwihuavata hia api aanra nrohiraitita, nkyiari nyohua sohua qua nraahuma riemwaqi quata.

<sup>7</sup> Mwi vaisiva Kotira kyaiqaqaa ntaqikyiqiro quaninranra tiro, qora kyaiqa varaani quava hia mwiaqaa vahiari.

Mwi vaisiva hia nai quara nraahu kyuquerave timwaqiro quari.

Mwi vaisiva hia qamwanrama kyeqaro raraqa taariva variari.

Mwi vaisiva hia nramanri nrenro uera ntaari vaisiva variari.

Hia mwi vaisira raraqa tairaro qamwanrama kyeqaro mpohua ntuquutariva variari.

Hia munimanra mpoqiyavata mwutukya ntuaari vaisiva variari.

<sup>8</sup> Mwi vaisiva nyianrasai nrihua kyarave qiatomwave nyianrivama variari. Mwiva kyuqe okyarara mwutukya vahiarivama

variari.

Mwi vaisiva naiqa kyuqema kye ntaqikyiarivama variari.

Mwiva avuqavuma kyero nrohiari vaisivama variari.

Mwiva kyotataqama kye variari.

Mwiva nai kyaiqa vutu nteqaro varaari vaisivama variari.

<sup>9</sup> Qutaa qua mwia timwa mwia quara mwi vaisiva tuqara kyero tutaari vaisivama variari.

Mwiva mwitaa hiari vaisiva variqaro qioma mpohuavata kyaahaqama nyataari.

Mwiva mwitaamaqiro viqaro api qua ti vaisihua quavata nraatara kyairata mwihua nkyiari api qua ntapihi kyaata.

### *Mwaanra apiqama kye ti vaisihuara rauriqara variante tura*

<sup>10</sup> Vaisi airivanto mwihua kepukyaqama kye Iutaa mwaanra okyarara rie variahua, mwihua tiri quara qoririma kyeqata mwihua qumina qua unra qua nraahu timwa nyiqi vi variarave.

<sup>11</sup> Mwihua munimanra nraahu rieqata api qua ti variavata mwihua quaqaara mpo nraamwu mpo nraamwuqi variahua apiqama vivi hiarave. Mwihua uaqia hi quara ti variarara tira, e mwihuara qaqlira kyeta tirema variate qianta.

<sup>12</sup> Kiriti vaisi mpovanto nraakiara qovara hianinranra timwa nyi varu vaisiva haaru variqaro nai nramwunaahuara mwitaama tiro:

Kiritiqinaahua unra qua nraahu ti variahuate.

Mwihua qaakyau quara vairi nraantantamwa kye

variarave. Mwihua hia kyaiqa vararaitita,

qumina aanra nrohiqata kyara nraahu

kyovi kyaavirama kye nre variarave, tura.

<sup>13</sup> Haaru mwi vaisiva tuva qutaama vahiro. Mwianra rieqarama mwi mwatanaahuara kepukyaqama kyera tiqara, Qora qua qaqlira kyeta kyuqe qua nraahu riemwaqi quate, qianta.

<sup>14</sup> Iutaavanto uri qua tira hia riaate, qianta. Vaisi mpovantamwuvanto nkyiari riemwa kyeta hia mwitaa mwataa hiate ti quaravata hia riaate, qianta.

<sup>15</sup> Kyuqe vu nraato vahiarai vaisiva variqaro mwiva ekyaa inraikyara kyuqe inraikyavema qiananro. Vaisi mpovanto hia Iesusirara qutaave qiariva ua vu nraato vahiariva hiama qio mpo inraikyavata kyuqe inraikyave qiananro. Mwia vu nraato mwutukyaqitairo apiqama quaninranra tiro, mwiva ekyaa inraikyara qora inraikyavema qiananro.

<sup>16</sup> Mwitaa hia vaisihua nkyiari nyooqitai tiqata, Tire Kotirara rieqata nrohi varuhuave, timwa kyeqata variavaro mwihua kyaiqavanto mpovau vahata Kotira qoriri hi kyaiqara varaqi vi variarave. Mwihua mwitaama kye nrohi variavaro Kotiva mwihuara qua raaqute varia vaisihuave tirave. Mwihua Kotira qua raaqute variarara tiro, kyuqe kyaiqavanto hiama qio mwihuaqi vahiananrove.

## 2

### *Qua mwaanra kyuquerara tura*

<sup>1</sup> Mwihua api qua timwa nyivara e kyuqe qua nraahu timwa nyiqinra quante. E nraakye qora mwaanra qua kyuqera timwa nyiqanra mwataama kyeta nkye mwi quara rieqata nrohiate qianta.

<sup>2</sup> Nyaapai mwihua mwataama kyera timwa nyiana: Nkye hia nramanri nreta uera ntaraitita, nkye kyuqe vu nraato vahirata nkyeta mwamwanta mwutukyaqaa kyuqema kye ntaqikyiqi nrohiate. Karaisira qua anomia kye rieqata variqi quate.

Mpohuara mwutukya vahirata variqi viqata hia pupohairata kepukyaqama kye Kotira aanraqaa variqi quate, qianta.

<sup>3</sup> Kyontavata mwataama kyera timwa nyante: Nkye Kotiranivanto variarara tita, kyotataqama kye variqi quate. Hia mpora nrutu vara mwataniqa hiqata qora qua qiata. Uainivanto nkyi kyonta ntavaaqavu kyaankyorave, qianta. Kyonta nronra tuaari nraakyeva qaraakya nraakyeva aanra kyuqera nraamwutairaro

<sup>4</sup> mwiva kyuqema kyero nai vaatiaravata, nai nraaqiararavata, mwutukya vahiraro variari.

<sup>5</sup> Nronra tuaari nraakyeva qaraakya nraakyeva nraamwutairaro kyuqema kyero nrohiqaro hia mpo vaisiara riaraitiro, nraamwu maataqaa kyuqema kyero ntaqikyiqaro nai vaati qua nraahu riemwaqiro viraro mpovanto mwia kyaiqa taqero hiama Kotira quara uaquia hi quarave qiananro.

<sup>6</sup> Qaraakya vaisiaravata mwataa qianta: Uaqia hi kyaiqara utuaro tita kyuqema kye nkyeta mwamwantaqaa ntaqikyiqi quate, qianta.

<sup>7</sup> Taitaasio, e ena mwiva mpo kyaiqa mpo kyaiqa vareqara kyuqe kyaiqa nraahu varaqira virata qaraakya vaisivanto i kyaiqa taqeta mwihuavata kyuqe kyaiqa varaqita quate. E nraakyeva qora Kotira aanra nyaamwuteqara hia nroqitaira nraahu qianta. Qua timwa nyiqanra qua mwia vataqi vira mwitaa mwitaa hiante. Hia uqenraaqenrama kye tiraitira, mwi quarara nronra qua qutaa vahirave qiate tira, kepukyaqama kyera qianta.

<sup>8</sup> E ntapihi vahiani quara nraahu timwa nyiqira virata hia iara api qua tiho qiata. Mwitaa timwaqira virata tiri nramwutaahua tiriqaa qora qua vateva hia vahirata mwihua nkyiari kyauruata.

<sup>9</sup> Rupataavata quminaqama kye kyaiqa vare varia vaisihuara mwataa qianta: Nkyiqa ntaqikyiani vaisira qamwata mwateqata mwia qua riemwaqi quate. Hia mwianra qora qua qiate.

<sup>10</sup> Mwiva vataani inraikyara hia mpuara varaaate. Nkye mwia kyaiqa kyuqema kye varaqi vivaro mwi vaisiva nkyiara kyuqe vaisi nraahuve timwa kyero Kotiva tiri huvantu kyaiva timwa tai quarara kyuqe quave qiare, qianta.

<sup>11</sup> Tire ntapihi kyaunanrave. Ekyaa nraakyeva qora huvantu vita qio variate tiro, Kotiva nai kyuqema nyataani okyarara qovarama kyairave.

<sup>12</sup> Tire mwi okyarara rieqatama hia Kotira qoririma mwataraitita, mwatanyaa inraikyara hia mwutukya ntiraqeta tetqa kyuqema kye ntaqikyiqata ntapihi kye nrohiqata mwaa entara Kotira kyaiqa nraahu varaqi quaravama vahiro.

<sup>13</sup> Tire mwitaamaqi viqata tiri kyuqema timwa taani entara vekya varunanra. Mwi entara tiri mwanriqa nronravanto tiri huvantu timwa taariva Iesusi Karaisiva, mwia peqa okyaravanto omwa votima kyero itero takyuqi variraro qoqaa tumu ntaananrove.

<sup>14</sup> Uaqia hi kyaiqava tiri rupa taankyo tiro, mwiva tiriara rieqaro tiri huvantu timwa tarero qutu vurave. Mwiva tiriara kyai mwihua hiqama nyataarita mwihua ni nraakyeva qora variqata kyuqe kyaiqa nraahu varaqi quate tiro, mwianra rieqaro qutu vurave.

<sup>15</sup> Qio e mwi quara nraakyeva qora timwa nyiqira quante. E nronra vaisivanto variqarara tira, kepukyaqama kyera nraakyeva qora mwi kyaiqara mwitaa mwataama kye vareqata mwi kyaiqara hia varaaate qianta. Haunri vaisi mpovanto iara qumina vaisive qiankyorave.

### 3

#### *Mwataama kyeqata Kotira aanraqaa nrohiate qianta tura*

<sup>1</sup> Nraakyeva qora timwa nyiqanrama kamaninra nronra vaisive, kamaniva nronraqama kyai vaisihuave, mwihua qua hia raaqutaraitita, mwihua qua riemwaqi quate

quante. Mpo kyaiqa mpo kyaiqa kyuqe kyaiqa vahianinra qamwanrama varehua terama viqata variate qiante.

<sup>2</sup> Mpohua nyutu mwataniqa hiarive tita mwihuaqaa unra qua vatevorave qiante. Tirema variqata nanrianra nanrianra qamwateqata variate qiante. Henahuara qibaakyamaqi viqata variqi quate qiante.

<sup>3</sup> E ntapihiananrave. Haaru tire qumimaqa hiqata qua nteqa kyeta apiqa hiqata nrohi variavanranrave. Mwi entara api nrohiaravave, apiqa qamwataaravave, mwi inraikyava nraahu tiri rupa tovata variavanranrave. Tire mwi entara mpohua uaqama nyateqata kyaru kyaaruma nyate variavanranrave. Tire mpohua nramwutaaqama nyate variavarata mwihua tita mwitaama timwa te varurave.

<sup>4</sup> Tire mwitaamaqi vi variavararo Kotiva tiri huvantu timwa taariva, mwiva nai kyuqema timwa taaninra mwia mwutukyavanto tiriara vahianinra qovarama kyero

<sup>5</sup> tiriara apiqama kye variqi vivorave timwa kyero mwiva tiri huvantu timwa torave. Mwiva hia tire kyuqe kyaiqa mpo kyaiqa mpo kyaiqa varaavanranra rieqaro tiri huvantu timwa toravauma. Mwiva nai tiriara po kye timwa timwa taaninranra rieqaro tiri huvantu timwa torave. Mwiva tiri hiqama timwa taihata tire qaraakya vaisi utuvita varuraro mwia mwanraquravanto tiri qaraakyaqama kyaihata variqi vi varunanrave.

<sup>6</sup> Iesusi Karaisiva tiri huvantu timwa taariva tiriara rieqaro kyaiqa varorara tiro, Kotiva qibaakyama kyero nai mwanraqura tiri timwi varirave.

<sup>7</sup> Kotiva kyuqema timwa tairaqaatairo tiriqaa qua vahiva taiqa vihata tire mwia nraaqiaraqama vita variqata mwiaavata ekyaa enta qati variqi quananra mwia vekyama varuro.

<sup>8</sup> Mwi quava qutaa quama vahiro. E mwi quara kepukyaqama kyeqara timwa nyiqira virata Kotirara qutaave ti nraakye qorahua mpoqama kye kyuqe kyaiqa varerara nraato tuqita quata. Mwihua mwitaamaqi viqata qiomaa mpohuavata kyaahaqa hivara.

<sup>9</sup> Qumina inronra hi quarave, nkyiari haivaqahua okyarara nraahu nronraqama kye rie vari quarave, antua quave, Mosesira mwaanra qua kyaara inronra hi quarave, ekyaa mwi quara mwi quara tihua nraaqani hia uro variante. Mwi quava hiama qio vaisi kyaahaqa hiananro. Hiama mwi quaraqaatairo kyuqe inraikyavanto qovara hiananro.

<sup>10</sup> Vaisi mpovanto inronra hiqaro Iesusira nraakye qora ntainra kyarerera uti varirera, e mwi vaisirara hia mwitaa hiante tiraro hia riairara qaiqaa mponanivata qiante. Mwitaa tiraro qio hia riairara mwi vaisira qorrima kyera mwoqa mwiantre.

<sup>11</sup> E ntapihi kyaananrave. Mwitaa hia vaisihua apiqama quavaro nkyiari qora kyaiqvavento vara uaqama kyaihata nronra qua varavo.

### *Ekyara qua tura*

<sup>12</sup> Nte Atemaasikya Tikikaasikya titaarita mwini uro ntaivara e Nikoporisini nte uro varianinrani quante. Huari hia kyuqema kyero itaani entara nte uro mwinima varianinra.

<sup>13</sup> Sinasiva ko okyara ntapihi paahima kyero rie vari vaisivavata, Aporosivavata, mwitanahua nyianra aanraqaa virera hiatanahua kyuqema kyera kyaahaqama nyatairata aanraqaa viqata hia mpo inraikyara aaranteta puua hiata.

<sup>14</sup> Tiri nraakye qoravanto hia kyaiqa vararaitita, qumina varivaro kyarave mpo inraikya hia vahirata aara ntevorave tira, mwihuara kyuqema kye kyaiqa varaqi vi varivaro ekyaa mwi inraikyava nkyini qio vahiarive qiante.

<sup>15</sup> Nivatama kye variahua i qua mwantaavo. Karaisira qua riaahua tiriara mwutukya vahata variahua, qua mwantaunranra timwa nyiantre.

Kotiva nkyi kyuqema nyatairata variate, tuqo.

## PIRIMONI

### Poruva Pirimoninrani qara vara kyora

Iesusira qati vara sivuma kyovaro nyaamwuni uro varuvaro 30 ihive nritarovaro Poruva karavuqi variqaro mwaa quara qara ntumwa tora. Pirimoniva nronra vaisivanto Iesusira nraaqiaravanto varuvaro mwia kyaiqa vaisi rupatova Onisimaasiva nai kyaiqa qaqla kyero ntuqema kyero uro Romini variqaro Porura nroqitairo Karaisira qua riero mwi quarara qutaave timwa kyero Poruravata varuvaro Poruva Onisimaasira Pirimoniva hunani titarera hiro Pirimoninrani qara mwaavatama kyero titovaro vura.

<sup>1</sup> Nte Poruva. Iesusi Karaisiva ni rupa taihana varuva. Nte tiri tiqata vakyaas Timotikyama mwaa quara i Pirimoninrani qara ntumwa teta. E tiritana vaisivanto variqara tiri nraantantera Kotira kyaiqa vaisima variaro.

<sup>2</sup> Iesusira nraakye qora i nraamwuqi variahuanivatama mwaa quara qara ntumwa tena. Tiri nrunra nrakyaa Apiaaranivata, Akipaasiranivatama, nte qara ntumwa tena. Akipaasiva tiri nraantantamwa kyero ntaquqi viqaro Kotira aanraqaa kepuqyaqama kyero vi varirama.

<sup>3</sup> Kotiva tiri tiqovavata, tiri vunyaa vaisi Iesusi Karaisivavata, nkyi kyuqema nyatairata nkyi mwutukyaqitai qihakya hi varirata variata.

#### *Poruva Pirimoniva Karaisira qua riorara tura*

<sup>4</sup> Pirimonio, nte Kotirara aakyara nteqana mpo enta mpo enta iara rieqana Kotirara kyuqeve tura.

<sup>5</sup> Nte riauqara e Kotira nraakye qora ekyaas mwihuara i mwutukya vahara e kepuqyaqama kyera tiri vunyaa vaisi Iesusi Karaisirara riemwaqira vi variananrave.

<sup>6</sup> E Karaisira qua mpohua mpohua timwa nyiqira quante tina, nte Kotirara aakyara nte varura. E mwitaamaqira viqarama Karaisiva tiri kyuqema timwa taani okyarara mpo okyara mpo okyara ntapihi kyera taqenanra.

<sup>7</sup> E mpohuara mwutukya vahara variarava mwiva nivatama kyuqema mataiharo ni mutukyavanto kyuqe ihana varura. E mwitaa hiarava mwi okyarava ekyaas Kotira nraakye qora mwutukya kyuqema nyataihata variara.

#### *Nte iara Onisimaasirara po kye timwa mwataantema tuqo tura*

<sup>8</sup> Pirimonio, e mwitaama variarana nte Karaisiravatama kye variqana nte i vakyaava variqananra tina, nte qiomma kepuqyaqama kyena iara ni qua nraahu riaante qianinra. Nte qio mwitaa qiariva vaihanavata hia nte mwitaa tirera.

<sup>9</sup> Ni mutukyavanto iara vaihananra tina, nte ivata qua qihakya kyena tirera. Nte Poruva nte nyaapaiqama vina variqana nte Iesusi Karaisiva rupa taihana varuva,

<sup>10</sup> nte iara qihakya kyena mwitaama tina, Onisimaasira ni maaquara po kye timwa mwataante, tuqo. Ni seniqo rupa taavana mwaini varuqaro mwiva i qaqla kyero ntuqema kyero mwaini nrumu variro mwiva Karaisirara qutaave timwa kyero mwiaqatairo mwiva ni nraaqiaraqama vira.

<sup>11</sup> Mwi vaisiva haaru hia kyuqema kyero i kyaahaqa hu vaisiva varura. Mwaa entara mwiva Karaisirara qutaa mwivave tivara tiro, mwiva nivata ivata kyuqema kyero kyaahaqa hiari vaisivama variro.

<sup>12</sup> Nte mate e hiananrani Onisimaasira titaairo mwiva nrumu ntantero quananro. Mwiva ni mutukya nti vaisiva varihana nte mwia titeqana ntena mwamwanta votima kyena titaairo quananro.

<sup>13</sup> Nte Karaisira qua timwa nyiqi vi varuqata mwia kyaara seniqotai ni rupa taavana varuva. Nte mwaini mwaaqi variqana iara tiqana, E hia qioqama kyera nrumu ni kyaahaqa hiananrave timwa kyena Onisimaasirara mwiva i mwaata varero mwaini variqaro ni kyaahaqa hiananrove, timwa kyena mwianra mwaini variarive qiataa ihanavatama

<sup>14</sup> Onisimaasiva hia i kyapara hirara rieqanama qaqlira kyena mwianra hia mwaini variante tuqo. Hia nte mwia mwaini tutaaninra mwianra iara kepuqyaaqama kye eo qiantre tirera. Ina kyakya hiro eo qiataa hirara eo tinanra.

<sup>15</sup> Qutaa Onisimaasiva i qaqlira kyero ntuge hiro hia mwaini nrumu mpuahaama variarive. Qio mwiva i kyero ntugema kyero viraqitairo Iesusira nraaqiaraqama virora tiro, mwiva ekyaa enta ivata qoma qati variqiro quananro.

<sup>16</sup> E mate mwaa entaraqaataira hiama mwi vaisirara nte rupa tau vaisiva mwitaama nraahu variarive tiraitira, e mwitaama qiantre: Onisimaasiva qutaaqama kyero Kotira nraaqiaraqama virara tina, nte mwianra ni kata pakyaave qianinrave, qiantre. Nte mwi vaisirara ni mutukya vaihana nte mwianra ni katave tura. E qoma mwi vaisirara tiqara, Mwiva ni kyaiqa vaisi kyuqeva variqaro mwiva Karaisira nraaqiara varivara tiro, mwiva ni kata pakyaama variho, tinanra.

<sup>17</sup> E nianra qutaaqama kyera ni hena vaisive tirera, e ni qamwata materantema kyera Onisimaasiravata qamwata mwataante.

<sup>18</sup> Onisimaasiva haaru i apiqama mwatovavata ini mpo inraikya varero hia mwianriva qati vahirera, e mwia nrutu nruka kyera ni nutu vatairage nte mwianra rieqana i kyoqaa mwiankye.

<sup>19</sup> Qio taqaante, nte ntene kyauquqotaina mwaa quara qara ntireranama,  
NTE PORUVA MWI MUNIMANRA INÀ MWINRENRAVE, tuqo.

E ni qua riera Kotira nraaqiaraqama vira variananra mwia hiniqama hia nina mpiante turave. Nte mwianra qiataa ihanavata hia mwianra tirera.

<sup>20</sup> Po, Pirimonio, ni katao, tiri vunyaa vaisiara rieqara nte qiani quara riera mwitaa hiante. E Karaisiravata variqara e ni katavanto variananranra tira, ni mutukya kyuqema matairage qamwateqana variari.

<sup>21</sup> Nte mwaa quara qara ntiquanama iara ni qua riero mwitaa hiananrovema tina. Nte iara tiqana, Mwiva nianra qamwateqaro ni quaravata, mpo qua hia nte timwa mwianinravata, nai riemwa kyero mwitaa hiananrovema, tina.

<sup>22</sup> Nte pata qua mpinqa tirera. Nte mwini quaninranra rieqara e nini nraamwu mpinqaqi terama taante. Kotiva ni kyaahaqa hiarive tita, nkye mwianra aakyara nte variara. Nte Kotiva nkyi qua qoma riaananrove timwa kyena nkyi uro taqaaninranra nronraqama kyena rieqana varura.

### *Ekyara qua tura*

<sup>23</sup> Epaparaasiva nivatama kyero variva i qua mwantaiho. Mwiavata Iesusi Karaisira kyaara rupa taavaroo nivatama kyero varivo.

<sup>24</sup> Maakivavata, Arisitakaasivavata, Timaaasivavata, Rukuvavatama kyeta i qua mwantaavo. Mwinramwuhua nte varau kyaiqara kuaa kyaiqa mwia vare variahuave.

<sup>25</sup> Tiri vunyaa vaisivanto Iesusi Karaisiva nkyi kyuqema nyatairata variate, tuqo.

## HIVURU

### Hivuruqinaahuani qara vara kyora

Iesusira qati vara sivuma kyovaro nyaamwuni uro varuvaro 40 ihive nritarovaro vaisi mpovanto mwaa quara qara ntumwa tora. Mwaa quara qara ntumwa to vaisira nrutu tire hia ntapihi kyaunana. Mwi vaisiva Poruvave, Rukuvave, Aporosivave, Sairaasivave, nraahumwa mpovantove, mwaa quara qara ntumwa teta? Hia ntapihuro. Iutaavanto Iesusira nraaqiaraqama vuhua Iesusi Karaisiva nritarero uro virini kepukyavanto vari okyarara ntapihi kye rieta taqaate tiro, mwi vaisiva mwaa quara Iutaani qara ntumwa tora. Iutaave Hivuruve mwia kuaa mwatanaa mwihua nyutuma.

#### *Karaisiva nronravanto vitarero vuni vari okyarara tura*

<sup>1</sup> Haaru Kotiva tiri haivaqahua Hivuru nraakye qora qua timwa nyinrenro mwiva vaisi mponramwu poropetive tuhua ekyaa mpo qua mpo qua timwa nyuvata mwihua mwi quara qovarama kyeqata tiri haivaqahua timwa nyiqi vi varurave. Mpo enta Kotiva ruvaatakyaa poropeti vaisi mpo timwa mwinro mpo enta nraahumwa mpo qarama kyero poropeti mpo timwa mwinro mwitaamaqi vivihura.

<sup>2</sup> Kotiva mwitaa timwa nyiqiro viro mwaa entara ekyara enta vahiraqaa mwiva nai mwaaqu titaiharo mwia mwaaquvanto mwia qua qovarama kyaihata tire riaunanra. Kotiva nai mwaaqu nronraqama kyovaro mwia mwaaquvanto mwatavata nyaamwuvata utu tora. Kotiva ekyaa inraikya mwia nai mwaaqu kyaama taiva nraahuma vahiro.

<sup>3</sup> Kotira peqa okyaravanto nai mwia mwaaquqvata ntuvaahe varirama. Mwia mwaaqu okyaravantovata, mwia qora okyaravantovata, kuaa okyara nraahuma vahiro. Mwia mwaaquvanto timwa tai quaraqaatairo ekyaa nyaamwunivata, mwatanivata, vahi inraikyava qati nraahu vahiqiro vi varira. Mwaa entara mwia mwaaquvanto nraakye qora uaquia hi kyaiqara utua quara nruka nyatero uro nyaamwuni Kotira kepukyavanto vahinani mwia kyauqu kyaatutani mwatakyaa viro variro.

<sup>4</sup> Kotiva mwianra ni maaquve tirara tiro, mwia mwaaquvanto ekyaa nyaamwunyaahuavata nraatara kyero nritarero variharo mwia nrutuvantovata mwihua nyutu nraatara kyero nritarero virinima vahiro.

<sup>5</sup> Kotiva nai mwaaqu mwianra nraahu tiqaro,

E ni maaquvanto variaro.

E ni maaquvanto variarana

nte mate i nronraqama kyauqo.

*(Ihi 2:7)*

Kotiva hia nyaamwunyaahuara mwi quara tiraitiro, nai mwaaquara mwi quara turave. Kotiva qaiqaa nai mwaaquara tiqaro,

Nte mwia qova variariro mwiva ni maaquvanto variarive,

turave.

*(2 Samueri 7:14)*

Mwitaa tiqaro Kotiva hia nyaamwunyaahuara mwi quara tiraitiro, nai mwaaquara nraahu mwi quara turave.

<sup>6</sup> Kotiva nai nraaqiara tauraanaanra mwata mwaini titarera hiro tiqaro, Ekyaa nyaamwunyaahua mwia nrutu nraahu tuaaheraqi quate, turave.

*(Lo 32:42)*

<sup>7</sup> Kotiva nyaamwunyaahua okyarara mwitaama tiro:  
Nte tuqata nyaamwunyaahua toqavanto tintema kyeta  
hianteqa nrohi variarave.

Nte qua ti varuqata mwihua qia auruvanto itaintema

kyeta ni kyaiqa vare variarave, turave.

(Ihi 104:4)

<sup>8</sup> Nyaamwunyaahuara mwitaa timwa kyero Kotiva nai mwaaquara mwaa quara tiqaro,

Kotio, e kepukyavanto varira ntaqikyiqi viqara  
ekyaa enta qati nraahu variqira vinanrave.

E ntapihi kyera nraahu ntaqikyiqira vinanrave.

<sup>9</sup> Ntapihi kyera nrohina okyararama

i mwutukyavanto vaiharo

qora okyarara hia i mwutukya vahirave.

E mwitaa hi variarana nte Kotiva iqaa ntaqikyi varuva

i hena vaisi qaqlira mwini kyena,

i nraahu vita kye vate i mwutukyaqitai

kyuqe hi varirara variante tina,

nte i nronraqama kyaurave, tura.

(Ihi 45:6-7)

<sup>10</sup> Kotiva mwitaa timwa kyero qaiqaa nraahu nai mwaaquara tiqaro,

Nronrao, e haaru toharera mwaa mwatara utu tonanrave.

E ena kyauquqotaira nyaamwuvata utu tonanrave.

<sup>11</sup> Nyaamwuvantovata mwatavantovata

hia ekyaa enta vahirara

e nraahuma ekyaa enta variqira vinanrave.

Tuavaaqavanto nrihiqama vintema kyero

nyaamwuvantovata mwatavantovata

nrihiqama quananrove.

<sup>12</sup> Tuavaaqa qaraakya utirera hiro

haaruaara ntahuku kyero kyaintema kyera

e nyaamwuvata mwatavata taiqa kyenarave.

Mwia taiqa virara e nraahu hia nyaapaiqama viraitira,

ekyaa enta qati nraahu variqira vinanrave,

turave.

(Ihi 102:25-27)

<sup>13</sup> Kotiva hia nyaamwunyaahuara tiraitiro, nai mwaaquara

nraahu mwaa quara tiqaro,

E nritarera nina kyauqu kyaatutani variraqe

nte i nramwutaahua ru taiqa kyaarira

mwihaqaa kyuqu ntamwa tera variante, turave.

(Ihi 110:1)

<sup>14</sup> Nyaamwunyaahua mwiha okyara vahirero mwitaamama vahiro. Mwiha Kotira kyaiqa vaisivanto hia mwamwantavata vahata mwanraqura nraahu vahua varita. Kotiva mwiha airi enta sitihata uro Kotiva huvantu nyataani vaisihua kyaahaqa hi variara.

## 2

### *Kotira quara qumina quave tivorave tura*

<sup>1</sup> Mwia mwaaquvanto Jesusiva nyaamwunyaahua nraatara kyero vuni varirara tita, tire mwia qua riaunanra mwi quara hia qoriri hiraitita, kepukyaqama kye riemwaqi quara aanrava nraahuma vahiro.

<sup>2</sup> Haaru Kotiva nyaamwunyaahua sitovata mwiha Kotira qua Mosesira timwa mwitovaro mwi quava qutaa qua vahurara tiro, mpovanto mwi quara nteqa kyovaro Kotiva mwia hiniqama nai kyoqaa mwunrama.

<sup>3</sup> Kotiva mwi quara qovarama kyero variqiro viro nraakiara qua mpo nai nraakye qorara po timwa nyatero huvantu nyataani quara qovarama kyero. Tire mwi quarara qumina quave timwa kyeta mwi quara qaqlira kyaarera, Kotiva tiri ruari entava

nrinraqe po tire nataama kyetave ntuqema kye aatu hianteta quananrave? Mwi quara qovarama kyarero nai mwaaqu tiri nronra vaisi titovaro mwiva nraante mwi quara timwa nyuvata mwia qua riohua tirivata timwa timwiavata riaunanrave. Mwi quava haaru Kotiva Mosesira timwa mwu quaravata nraatara kyero nronraqama kyero vahirarama tina.

<sup>4</sup> Nraakye qoravanto Kotira quara qutaa quave qiate tiro, Kotiva nai qua timwa nyiahua kepukyaqama nyataihata mwihua nronra kyaiqa, hia taqaa kyaiqara varaqi vi variara. Kotiva nai mwanraquravata nai kyakya hiraqaa nraakye qora nyi varihata mwihua mpo kepukyu mpo kepukyu vareqata variara.

*Iesusiva nraahu tiri huvantu timwa taariva variho tura*

<sup>5</sup> Tire qaraakya mwata nraakiara qovara hianinranrama ti varita. Kotiva hiama nyaamwunyaahuara mwi mwataraqaa ntaqikyiqita quate qiananro.

<sup>6</sup> Kotira qua mpovanto mwitaama tiro:

Kotio, e nronravanto variqarara tira,  
nanraqamave e qumina nraakye qora mwatani  
varurahuara nronraqama kyera riemwaqira vi variaro?  
Mwihua nraaqiaraqaavata nanraqamave  
e ntaqikyiqira vi variaro?

<sup>7</sup> E nraakye qora utu kyera mwihuara pataqiaqaa  
tumitare nkye nyaamwunyaahua mwemwani  
kumwaanri pataqiara variqi quate qiananrave.  
Nraakiara e mwihua vara vuniqama kyera  
mwihua nyutuvata vara viriniqama kyera  
<sup>8</sup> mwihua nronraqama kyera mwihuara tiqara,  
Ekyaa inraikyaqaa ntaqikyiqita quate tinanrave,  
tura.

(*Ihi 8:4-6*)

Mwi quara okyaravanto mwitaamama vahiro. Kotiva nraakye qora nronraqama kyairata mwihua ekyaa inraikyaqaa ntaqikyiqi vivara. Mwihua hiama mpo inraikyaqaa hia ntaqikyivara. Mwihua ekyaa inraikyaqaama ntaqikyiqi vivara. Nraakiara mwi quava qutaaqama kyero mwivauma vahiananro. Mate mwaa entara nraakye qoravanto hiama ekyaa inraikyaqaa ntaqikyiyi varita.

<sup>9</sup> Mwihua hia mwitaa hiavarovata mwaa entara tire Iesusira okyara ntapihi kyau-nanra. Kotiva nraakye qora kyuqema nyatarera hiro Iesusirara pataqia tumitarera nyaamwuni variahua mwihua kyuqutarani variqara nraakye qorara rieqara qutu quante tuvaro mwiva nriqa vu inraikyara varero qutu vura. Mwiva ekyaa nraakye qorara rieqaro qutu vurara tiro, Kotiva mwia vuni vita kyero vatero mwia kepukyaqama kyero mwia nrutu vara viriniqama kyaiharo variqiro vi varira.

<sup>10</sup> Kotiva variharo Kotiraqaatairo ekyaa inraikya qovarama viro ekyaa enta qati nraahu vahiqiro vi variro. Kotiva airi nraakye qorara mwihua ni nraaqiara varivaqe nte mwihua sitaqina ntena varianinrani ntuvahainani uro kyaankye timwa kyero, Iesusira qati kyovaro nriqa vu inraikyara varaqiro viro uro qutu vurama. Kotiva ntapihi kyero Iesusira qati kyovaro qutu vurama. Iesusiva nriqa vu inraikyara varaqiro viro qutu vurara tiro, mwiva viriniqama viro kepukyavanto variqaro qioma tiri huvantu kyero Kotiva varinani tivitaqiro uro kyaarivama variro.

<sup>11</sup> Iesusiva tiri uaquia hi kyaiqara qua vahira nruka timwa taiva varihata tire mwiva tiri uaquia hi kyaiqara qua nruka timwa taihua varunanranra tiro, Kotiva mwia qovavata tiri tiqovavatama variro. Mwitaama varunanranra tiro, Iesusiva tiriara nkye ni nunra katave qianinranra hia kyaurira.

<sup>12</sup> Iesusiva mwitaama tiro:  
Kotio, ntena nunra kata i okyara timwa nyiqi virerave.  
Mwihua ntuvantuama vita varivaqe nte i nrutu

tuaahereqa ihi timwaqi virerave, turama.

(*Ihi 22:22*)

<sup>13</sup> Qaiqaa mwiva tiqaro,

Nte Kotirara qutaave timwa kyena  
mwiaqaa vuntuvina varirerave, turama.

(*Aisaiaa 8:17*)

Qaiqaavata mwiva tiqaro,

Kotiva nraaqiara ni mpihata  
mwihua nivata variavana varuvave, turama.

(*Aisaiaa 8:18*)

<sup>14</sup> Tire Kotira nraaqiara variqata mwamwanta vataahua varunanrama. Tire mwamwanta vataahua varurarora tiro, Iesusivavata vaisi tuero tiri nraakye qora nraantanero mwamwanta vataava variqiro vurave. Saataaninra kepukyavanto ekyaa nraakye qora rupa tovata mwihua ekyaara qutu vita varuvarora tiro, Iesusiva vaisi tuero Saataaninra kepukyavanto qumina inraikyaqama quarive tiro, qutu vurave.

<sup>15</sup> Nraakye qoravanto mwatani qati variqi viqata mwihua nkyiari qutirara aatu huva mwi inraikyava mwihua rupa tovata varuvaro Iesusiva mwi nraakye qorahua mwicqitairo huvantu kyarero vaisi tuero qutu vurave.

<sup>16</sup> Iesusiva hia nyaamwunyaahuara rieqaro mwatani qovarama vuravauma. Mwiva mwatanyaa nraakye qora Evarahaamunra okyarara rieqaro vaisi tuorama.

<sup>17</sup> Mwiva tiri nai nrunra qata votima kyero vaisi tuero, mwamwanta vataava variqiro vurara tiro, mwiva tiri kyaahaqa hiarivama variro. Mwiva hia mwitaa hiankye titiri, hiama tiri kyaahaqa hiariva mpovanto varitiri. Tire mwatani variavarahua tetavanto teta uaqia hi kyaiqara qua nruka kyaara aanrava hia vahuvaro Iesusiva mwi quara Kotiva nruka timwa taarive tiro, mwatani tuminro nraaqiara tuemwa vura. Iesusiva tiri nraakye qorara po kye timwaqiro viqaro mwiva Kotira kyaiqa vara mwataariva nronravanto variqaro Kotirara kepukyaqama kyero riemwaqiro viqaro Kotiva tiriara mwihua uaqia hi quara nruka nyataarive tiro, tiriara rieqaro qutu vurave.

<sup>18</sup> Iesusiva vaisi tuero variqi vi varuvaro uaqia hi kyaiqava mwia mwataaramaqi viqaro taqovaro mwiva hia uaqia hi kyaiqara utiraitiro, kepukyaqama kyero variqiro vi varurara tiro, uaqia hi kyaiqava tirivata mwataara hiraro Iesusiva tiri qiona kyaahaqa hiraqe hia uaqia hi kyaiqara utuananra.

### 3

*Mosesiva nronravanto variharo Iesusiva mwiavata nraatara kyero anoma nronrantoma variro*

<sup>1</sup> Ni kata pakyaa, nkye rauriqata variata. Kotiva nkyi uaqia hi kyaiqara qua nruka nyataihata variara. Kotiva nkyivata nyaanrama taihata variara. Nte vaakya tu quarara rieqanama nkyiara nkye Iesusirara nronraqama kyeta riemwaqitama quatema tuqo. Iesusiva Kotiva nronraqama kyero titai vaisivama variro. Kotiva tiriqaa qua vahira nruka timwa taarive tiro, Iesusiva tiriara rieqaro Kotirani kyaiqa vara mwato vaisiva varihata tire mwia qua riemwaqi vi varunananrave.

<sup>2</sup> Kotiva Iesusira nai kyaiqaqaa vita vatovaro Iesusiva kepukyaqama kyero mwi kyaiqara varaqiro viqaro Kotira qua nraahu riemwaqiro vurama. Haaru Mosesiva ekyaa Kotira nraakye qoraqaa ntaqikyiqiro viqaro mwia qua nraahu riemwaqiro viqaro kyaiqa varontema kyero, Iesusivavata Kotira kyaiqa varaqiro vurama.

<sup>3</sup> Kotiva Iesusira nrutu vuni vara vatero Mosesira nrutu nraakiaranima vatero. Nraamwu hoqa tai vaisiva vuni variharo nraamwu mwiva mwatumwi vahintema kyero, Iesusiva vuni variharo Mosesiva nraakiaranima variro.

<sup>4</sup> Ekyaa nraamwu hia naiqama kye qovarama viro vahira. Vaisivanto hoqa taiva nraahu vahira. Qio kuaa qarama kyero Kotiva nyaamwuvata mwatavata utu taivama variro.

<sup>5</sup> Mosesiva Kotira kyaiqa vaisivanto variqaro Kotira qua nraahu riemwaqiro viqaro ekyaa Kotira nraakyе qoraqaa ntaqikyiqiro vurama. Mwiva mwi kyaiqara vareqaro nraakiara qovara hiani vaisirara timwa nyiqi vurama.

<sup>6</sup> Mosesiva qati kyaiqa vaisivanto varuvaro Karaisiva Kotira mwaaqu taruvama variro. Karaisiva Kotira mwaaqu taruva variqaro Kotira qua nraahu riemwaqiro viqaro mwia nraakyе qoraqaa ntaqikyiqiro vi varirama. Tire kepukyaqama kyeqata Karaisirara riemwaqi viqata, Kotiva tiri kyuqema timwa taani entara mwia vekya variqi quarera, tire qiomata tiqata, Tire Kotira nraakyе qoroma varuro, qiananra.

*Nkye Kotira quara pupohairata qaqlira kyevorave tura*

<sup>7</sup> Kotira mpukuqi Kotira mwanraquravanto timwa tai quara riaata. Mwi quava mwitaama tiro:

Mate Kotira qua riarera hita

<sup>8-9</sup> nkye nkyi haivaqahua Kotira qua rieta qaqlira kyeta  
nkyiari vu aanranraqaa qua raaquta kyeqata  
vuntema kyeta nkyevata vivorave.

Kotiva nkyi haivaqahua mwitaama tiro,  
Nte nkyi haivaqahuaqi 40 ihiara kyaiqa varaqina  
quavata nkyi haivaqahua qumina mwatani variqi  
viqata nte mwihuani kyaiqa varataavarara  
hia nronraqama kye riaraitita, mwihua qua  
raaquta kyeqata nianra mwia mwoqaqa  
mpo kyaiqa nraahu varaarive tiqata nina nraahu  
mwataarama kye taqarerera uti varuhua varurave.

<sup>10</sup> Mwihua mwitaamaqi vuvaro  
ni raraqa tovana mwihuara tiqana,  
Mwihua ekyaa enta api aanra mwiaqaa nraahu  
virera uti variahuate.  
Mwihua qua raaquta kyeqata  
hia ni aanraqaa virera uti variahuate, qiavarave.

<sup>11</sup> Mwihuara ni raraqa tovana  
nte ntene kyauqu nriqiqaa vatena tiqana,  
Mwia kyaara mwihua hia uro nivatama kye tekya  
hivarave, turama.

(Ihi 95:7-11)

<sup>12</sup> Ni kata pakya tuaavo, nkye rauriqata variata. Nkyi su nyaato mwutukyavanto uaqiplina virata nkye Kotira quara hia qutaa quave timwa kyeta tuqasaa vita qati variqi vi vari mwanriqara, Kotira mwoqa mwivorave.

<sup>13</sup> Mate mwaa entara nkye Kotiva hinani nrita mwia aanraqaa nrohi entavama vahiro. Uaqia hi kyaiqava nkyi vara apiqama kyairata nkye hia Kotira aanraqaa vivorave tita, mwaa entara nkye nai kepukyaqama mwate nai kepukyaqama mwatemaqi viqata Kotira aanraqaa quata.

<sup>14</sup> Haaru enta tire Karaisirara quataave timwa kyeta mwianra kepukyaqama kye variqi quavanarave. Mwi entaraqatai tire kepukyaqama kye Karaisirara riemwaqi viqata matevata variqi vita uro qutu quarera, tire qiomata tiqata, Tire Karaisiravata variqi vurahuate, qiananra.

<sup>15</sup> Nte qaiqaa Kotira mpukuqi tu quara tirerama. Mwitaama tiro:  
Mate Kotira qua riarera hita,  
nkye nkyi haivaqahua Kotira qua rieta qaqlira kyeta  
mwihua nkyiari vu aanranraqaa nraahu  
qua raaquta kyeqata virerata uti varuntema kyeta  
vivorave, tura.

(Ihi 95:7-8)

<sup>16</sup> Ta vaisihua Kotira qua rieta qaqira kyeta nkyiari vu aanranraqaa nraahu nrohirera uti varurave? Mwihua tiri haivaqahuave. Mosesiva mwihua sita varero Isipisairo uro kyohua, mwihua Kotira qua rieta raaqutorama.

<sup>17</sup> Kotiva tahuara raraqa tovara 40 ihiara variqi vurave? Mwiva tiri haivaqahuara raraqa tovaro varurave. Tiri haivaqahua qumina mwatani variqata uaquia hu kyaiqara utura kyaara mwini qutu taiqa vurama.

<sup>18</sup> Kotiva nai kyauqu nriqiqaa vatero tiqaro, Mwihua hia ni mwata tekya hi mwataraqi uro tekya hivarave, tu quara, tahuara turave? Mwiva tiri haivaqahuara turave. Mwihua Kotira qua rieta qaqira kyeta nkyiari nrohu aanranraqaa nraahu virera uti varurara tiro, Kotiva mwitaam tura.

<sup>19</sup> Tire ntapihi kyaaurata mwihua hia Kotira quara qutaa quave turara tita, mwihua hia qioqama kye Kotira mwata tekya hi mwataraqi tekya hirera vura.

## 4

### *Kotira nraakye qoravanto tekya hirara tura*

<sup>1</sup> Haaru Kotiva nai kyauqu nriqiqaa vatero tiqaro, Ni nraakye qoravanto nivatama kyeta uro tekya hiqata varivarave, turama. Mwianra rieqata nrivaqe tire aatu hiqata variara. Haunri nkyiqitairo mpovanto mpo aanraqaa ntuquia viro hia tekya hi mwataraqi quankyyora.

<sup>2</sup> Tire mate riaurantema kyeta tiri haivaqahuavata Kotira qua riora. Mwihua Kotira qua riovaro mwi quava hia mwihua kyaahaqa hora. mwihua mwi quara rieta mwianra hia qutaa quave timwa kyeta qaqira kyorara tiro, mwi quava hia mwihua kyaahaqa hora.

<sup>3</sup> Tire Kotira qua rieta qutaaave qiarahua nraahuma uro Kotiravata tekya hiananra. Kotira mpukuqi nraakye qora Kotira qua nteqa kyaahuara Kotiva mwitaama tiro: Ni ntaraqa taihana nte ntene kyauqu nriqiqaa vatena tiqana, Mwihua hia uro ni vatama kye tekya hivarave, turama.

Kotiva nai kyaiqa haaru taiqa kyero tekya huva viviro taiqa vuvarovata mwi quara turama.

<sup>4</sup> Kotira mpukuqi Kotiva tekya hu entarara mwitaama tiro:

Kotiva 6 entara kyaiqa varaqi viro uro taiqa kyero

7 entaqaa mwiva tekya hurave, turama.

*(Okyara 2:2)*

<sup>5</sup> Kotiva mwi entaraqaa tekya hurara tita, Kotira nraakye qoravata tekya hita qati variqi vivara. Kotira qua rieta qoririma kyeqa nrohia nraakye qorahuara Kotiva mwitaama tiro:

Mwihua hia qio nte tekya hianinrani vivarave, tura.

<sup>6</sup> Haaru tiri haivaqahua Kotira qua kyuqe qua rieta qaqira kyeta hia qutaa quave turara tita, mwihua hia Kotiravata tekya hirerata vura. Kotira quara qutaa quave ti nraakye qorahua mwihuama Kotiva qati kyairata Kotiravatama kye tekya hivara.

<sup>7</sup> Haaru tiri haivaqahua Kotira qua qaqira kyeta mwia kyaara hia Kotiravata tekya hirera vuvaro airi ihi nritarovaro Kotiva qaiqaa mpo entara mwatama tero tiqaro, Mate mwaa entaraqaa ni qua riaate, tiro. Mwiva tiri haivaqara Ntevitira nroqitairo tiri haivaqahua mponramwuanra vaakya timwa nyu quarara tiqaro mwitaama tiro: Mate Kotira qua rieta hia qoririma kye

mwia qua qaqira kyaate, tura.

*(Ihi 95:7-8)*

<sup>8</sup> Haaru tiri haivaqahua qumina mwatani variqi vita qutu vuvaro Iosuaava mwihua nraaqiara sita varero uro Isareru mwatani kyorave. Kotiva ni mwatani tekya hiate tiqaro hia Isareru mwata mwianra turavauma. Mwiva Isareru mwatanianra tutiri, mwiva hiama nraakiara Ntevitira nroqitairo tiqaro, Mwaa entara ni qua riehua ni

mwatani tekya hivarave, tutiri. Kotiva ni mwaatave tiqaro mwiva nai varinanianra ti varira.

<sup>9</sup> Kotiva 6 entara kyaiqa utuqi viro uro mwaa mwatara taiqa kyero 7 entaqaa tekya hurave. Kuua qarama kye tire Kotira nraakye qoravanto kyaiqa taiqa kyeta mwiaqatai tekya hiananrave.

<sup>10</sup> Kotiva nai kyaiqa taiqa kyero tekya huntema kye Kotira nraakye qoravanto nkyiari kyaiqa taiqa kyeta uro Kotiravata tekya hiqata variqi vivarave.

<sup>11</sup> Mwianra rieqatama nrivaqe Kotiravata variananranra hia qoriri hiraqe kepukyaqamaqi vita mwini quara. Tiri haivaqahua Kotira qua nteqa kyeta mwia kyaara mwihua hia Kotira mwaatani tekya hirera vurave. Tiriqitairo mpovanto mwihua nraantantaankyorave.

<sup>12</sup> Kotira quavanto qati nraahu vahiqi viqaro kepukya quama vahiro. Paipa hini hini vai vahira votima kyero mwia quavanto mpogama kyero vaihaira. Paipavanto mwamwanta toqaqiro viro uro mwukyaarivata mwativata teqa kyero ntainra kyaintema kyero Kotira quavanto vaisi vu nraato mwutukyaqi vahira qovarama kyero mwi vaisira mwataarama kye taqero tiqaro, I vu nraato mwutukyaqi vahira quara qora quave, kyuqe quave, ti varira.

<sup>13</sup> Kotiva ututai inraikyaraqitairo hia mpo inraikyavanto Kotira vuqaa uqeta viro vaiho. Mpo inraikya mpo inraikya nyaamwuni vahi inraikyavave, mwatani vahi inraikyavave, ekyaa inraikyavanto qo tuananraqaa vaiharo Kotiva mwi inraikyara taqe variho. Nraakiara tire ekyaa mwitaama varira mwia vuqaa variqatama teta utuana inraikyara ekyaa timwa qovarama kyeqata timwa mwiananra.

### *Iesusiva tavaaraqaanaa vaisi vunyaava tiriara rieqaro Kotirani kyaiqa varaivama variro*

<sup>14</sup> Iesusiva Kotira mwaqvanto variqaro tiri kyaahaqamaqiro viro Kotiva tiri qua nruka timwa taarive tiro, tiriara rieqaro Kotirani kyaiqa vara mwatero uro nyaamwuni Kotiva varinania variro. Mwiva tavaaraqaanaa vaisi vunyaava mwitaama varirara tita, nrivaqe mwia qua kepukyaqama kye riemwaqita quara.

<sup>15</sup> Tire uqenraunra nraakye qorahua variqata hia qio qora kyaiqa nraatara kyaarahuama varita. Tire mwitaa hora nraakye qorahua variqata haunri tiri tavaaraqaanaa vaisi vunyanranra mwiva hia tiriara po kye ti variho qiaravaara. Ekyaa qora kyaiqavanto tiri mwataara hirero uti vari kyaiqava, kuua mwi kyaiqava Iesusiravata mwataara hiqaro taqovarovata Iesusiva hia qora kyaiqa mpogavata varora.

<sup>16</sup> Iesusiva tiri kyaahaqama timwa taiva nronravanto variqaro nyaamwuni uro varirara tita, nrivaqe hia aatu hiraitita, Kotiva varira mwia nraaqani uro variara. Kotiva tiri kyuqema timwa te varivama variro. Tire mwianra aakyara qiararo mwiva po timwa timwa taananro. Muaanra vahiani entara tire mwianra aakyara qiararo mwiva tiri kyaahaqa hiqaro tiri kyuqema timwa taananro.

## 5

### *Qumina nraakye qorara rieqaro tavaaraqaanaa vaisivanto Kotirani kyaiqa varaan-inranra tura*

<sup>1</sup> Mwi vaisiva qati vaisivanto nraahu varuvata mwia hena vaisivanto mwia nronraqama kyeta tavaaraqaanaa vaisi variqara Kotirani mwi kyaiqara varaante tura. Mwi vaisiva nraakye qora uaquia hi kyaiqarara rieqaro quara vahira aasau ru kyeqaro qia quara mwateqaro mwi kyaiqara vare varura.

<sup>2</sup> Mwi vaisiva qati vaisi hia kepukya vahiva variqarora tiro, mwiva taqairaro mwia hena vaisi mpovanto hia kyuqe vu nraato vahiariva qora kyaiqa utu kyairera, mwiva

nte mwi vaisira votima kyena hia kepukyaqa huvama varuqo timwa kyero mwia qihakyama mwataananro.

<sup>3</sup> Kotira nraamwuqi vuniqama viro Kotira kyaiqa vara mwate vari vaisiva mwivavata vaisivanto variqarora tiro, mwiva hia hini nraakye qora uaqia hi kyaiqarara nraahu riaraitiro, mwiva nai uaqia hi kyaiqararavata rieqaro quara ru kyero Kotira qia quara mwate varira.

<sup>4</sup> Mwi vaisiva hia nai nronraqama viro mwi kyaiqara vare varira. Kotiva mwia haivaqara Eroninra nraanrama kyero nronraqama kyontema kyero, Kotiva mwi vaisira nraanrama kyero nronraqama kye varira.

<sup>5</sup> Mwia votima kyero Karaisiva hia nai nronraqama viro tiqaro, Kyai nte nraakye qorara rieqana Kotira kyaiqa vara mwitaankye, tura. Kotiva mwia nronraqama kyero mwianra mwitaama tiro:  
E ni maaquvanto variaro.

Mate nte i qovama varuqo.

(Nte mate i nronraqama kyauqo.)

<sup>6</sup> Qaiqaa Kotira mpukuqi Kotiva Karaisirara mwitaama tiro:

Vaisi mpo Merikisetekiva nraakye qora uaqia  
hi kyaiqarara rieqaro ni kyaiqa vara mate varurave.  
Evata mwia nraantantamwa kyera vareqarama ekyaa  
enta mwi kyaiqara varaqira vinanrave, tura.

*(Ihi 110:4)*

<sup>7</sup> Iesusiva mwatani varu entaraqaa mwiva ti atura ntiro vera kyero ntataqi viqaro Kotirara aakyara ntora. Mwiva Kotirara nte qutu quarira e qiomaa ni kyaahaqa hinanrave timwa kyero hia nai kyakya hurara riaraitiro, Kotira qua nraahu riemwaqiro vurara tiro, Kotiva mwia qua riorave.

<sup>8</sup> Iesusiva Kotira mwaaquvanto variqaro mwiva hia nte mwia mwaaquve tiraitiro, tirema variqaro nriqa vu inraikyara varaqiro viqarora tiro, mwiva kyuqema kyero Kotira qua riemwaqiro vura.

<sup>9</sup> Mwiva Kotira qua nraahu riemwaqiro viqaro nriqa vu inraikyara varaqiro viro uro qio varu vaisiva varura. Iesusiva qio vari vaisiva varirara tiro, nraakye qoravanto mwia qua riemwaqi vihua varivaro Kotiva mwihua huvantu nyatairata mwihua ekyaa entama qati variqi vivara.

<sup>10</sup> Kotiva Iesusira nronraqama kyero tiqaro, Merikisetekiva nraakye qora uaqia hu kyaiqarara rieqaro nini kyaiqa vara matontema kyero Iesuvavata nraakye qora uaqia hi kyaiqarara rieqaro nini kyaiqa vara mwataananrove, tura.

### *Tire nronra tuaahua nraaqiara taaqa nraantantamwa kye variarorave tura*

<sup>11</sup> Tire mwaa quara airi qua nkyi timwa nyianre tita, taqauraro nkyi su nyaatovanto hia qioqama kye vahiro qua okyara hia ntapihiaqara ihata tire mwukyaari tu kyeta mwaa quara nkyi timwa nyi varunanra.

<sup>12</sup> Nkye airi enta mwaa quara riemwaqi viqata ntapihi kye rieta mpohuavata timwa nyiataara vaihata nkye hia Kotira qua ntapihi kye rie variavo. Mwia kyaara tire mwi quara okyaraqaatai nkyi timwa nyianrava qati vaiho. Nkye mwaa entara kepukya kyara nraataarama nraamwa nraahu nre variavo.

<sup>13</sup> Nraamwa nraahu nre variva, mwiva nraaqiara taaqa nraahuma variro. Mwiva nraaqiara taaqa variqaro hiama qio kyuqe hi aanranrave, uaqia hi aanranrave, anomaa kyero ntapihiananro.

<sup>14</sup> Kepukya kyara nronra tuaahua nranra hiarave. Nronra tuaahua kepukya kyara nre variantema kye Kotira nraakye qoravanto kepukya qua qio rie varivaro mwihua su nyaatovanto qio ntapihi vihatara tita, mwihua qiomaa kyuqe hi aanranrave, uaqia hi aanranrave, anomaa kye ntapihivara.

**6**

<sup>1</sup> Mwi quara rieqatama nrivaqe Karaisira qua rieqata okyaraqinaa qua mwiaqaa vateta, tavaaranavata mwutunivata vahi quara riarerata quara. Vuni nkye uaqia hu kyaiqara uti varuvaro nkye ekyara qutu viva vahuvata nkye mwi aanranraqaatai tuqasaavi Kotirara riemwaqi vura.

<sup>2</sup> Nkye nramanri varovaro vaisi mpovanto nkyiqa nai kyauqu vatovata nkye Kotira mwanraqura vare, nkye Kotiva nraakyae qora vara sivuma kyaani quara rieta, ekyara entaqaa Kotiva ko qianinravata nkye riaarave. Hia tire okyarani toharai quara mwia nraahu riemwaqita quare.

<sup>3</sup> Kotiva qati kyairera, tire uromwi mpoqiaavata viqata tavaaranavata mwutunivata vahi quara riemwaqita quare.

<sup>4</sup> Kotira aanraqaa vita mwiaqaaatai qaqlira kye quahua, nataama kyeve mwihua qaiqaa Kotira aanraqaa vivara? Mwihua kyokiraqi variavaro su nyaatovanto qatua vihata mwihua Kotiva kyuqema nyataaninra nyaamwunyaay inraikya vareta, mwihua Kotira mwanraqura vareta,

<sup>5</sup> mwihua mwataarama kye taqaavaro Kotira qua kyuqe qua nraahu vaihata mwihua Kotiva nraakiara qovarama kyaani inraikyara hini okyara taqaara.

<sup>6</sup> Ekyaa mwi inraikyara taqaahua, mwihua Kotira aanra qaqlira kyaivera, mwihua uaqia hi aanranraqaatai qaqlira kye nrumu ntante viva hiama qio vahiananrove. Mwitaa hiahua mwihua Kotira mwaaqu qaiqaa kyaatariqaa ru teqata ekyahua suqaa mwia kyaurira inraikya vara mwita. Mwitaa hi variarara tiro, mwihua qaiqaa nrumu ntante Kotira aanraqaa viva hiama qio vahiananro.

<sup>7</sup> Kotira qua riemwaqi vi varia nraakyae qorahua mwata kyuqera votima kyeta variara. Vativanto ntiro mwi mwataraqi viharo kyara tutaiharo mwata mwiqitairo upiqa variharo Kotiva mwata mwianra kyuqe mwatavema tiro.

<sup>8</sup> Mwata mpoqaatairo kyaantamwanra ubi auquqa hiva uakukya kyapata nraahu upiqa variharo Kotiva mwi mwatarara uaqia hi mwataravema tiro. Mwi mwataraqi upiqaaninra qia tutu kyairaro itamwama kyaananro.

<sup>9</sup> Ni nramwunaa tuaavo, nte uaqia hi mwatararavata kyuqe mwataravata tiqana hia nkyiara uaqia hia mwatahuave tiqanavauma tina. Tire nkyiara tiqata, Mwihua kepukyaqama kyeta aanra kyuqeraqaa vi varivaro Kotiva mwihua sitaarihuama variavo, tunanra.

<sup>10</sup> Kotiva hia nkyi apiqama nyataananrove. Mwiva nkyi ntapihi nyataananrove. Nkye mwiani kyaiqa varaarara hia taunru kyaananrove. Nkye Kotirara mwutukya vaihata nkyeta hena nraakyae qora Kotira nraakyae qora kyaahaqama nyataararave, mate mwaa entaravata kyaahaqama nyaterarave, Kotiva hiama taunru kyaananro.

<sup>11</sup> Nkye mwia vekya variva qutaa mwivau vahiarive tita, nkye mwatani variqata Kotira aanraqaa kepukyaqama kye variqi vita uro taiqa kyaata. Nkye mwitaama varira mwianra tiri mwutukya vaihata varunanra.

<sup>12</sup> Tire nkyiara Kotira aanraqaa viqata pupohevorave turo. Kotiva nai kyauqu nriqiqaa vatero kyuqema nyatarerave tuvata mpo uhua mwi quarara qutaa quave, timwa kyeta hia pupohovata variqi vuvarora tiro, Kotira quavanto mwihuaqi qutaa mwivau vhura. Nkyevata mwihua votima kye varivage tire qiovema qiananra.

*Kotiva nai kyauqu nriqiqaa vateqaro tu quarara tire qio qutaavema qiananrave tura*

<sup>13</sup> Kotiva tiri haivaqara Evarahaamunranra nte mwitaa mwitaa hirerave tiqaroma Kotira nraatara kye variva hia mpovanto varuvarora tiro, mwiva nai nrutu nteqaro nai kyauqu nriqiqaa vatero mwitaa turama.

<sup>14</sup> Mwiva tiqaro, Nte ntena kyauqu nriqiqaa vateqanama nte i kyuqemaqina vireravema, tuqo. E mwatara terhua airinti varivarave, tura.

<sup>15</sup> Kotiva mwitaa tuvaro Evarahaamuva hia qoriri hiraitiro, qakyoma kyero Kotira vekya variqiro vuvaro Kotiva kyauqu nriqiqaa vateqaro tu quava qutaa mwivau vahuvaro mwiva qoraishi nraaqiara mwata tora.

<sup>16</sup> Vaisivanto nte mwitaa hirerave tirera hiro, nai kyauqu nriqiqaa vateqaro mpo-vantoo mwivavata nraatara kyero nronraqama varira nrutu timwa kyero nai kyauqu nriqiqaa vatairave. Mpo-vantoo mwivaa quara unra quave timwa kye airi qua qiankyo tiro, mwiva nronra vaisi nrutu nteqaro nai qua kepuuyaqama kye varirave. Iuttaa mwatanaa okyara mwitaamama vahiro.

<sup>17</sup> Kotiva Evarahaamunranravata mwiva mwatara tohuavaravata rieqaro mwivavata nai kyauqu nriqiqaa vateqaro timwa to quara kepuuyaqama quarive tiro, nai nrutuvata nteqaro timwa torave. Kotiva mwitaa turara tiro, mwiva timwa to quava hia tumitare vaiharo mpo quavanto nritarero vahiananro. Mwiva timwa to quava nraahuma vahiananro.

<sup>18</sup> Kotiva nai kyauqu nriqiqaa kyoraravata, nai nrutu ntoraravata, mwitaa hurara tiro, mwivaa quavanto hiama qio unra qua vahiananro. Kotiva timwa to quava qutaa qua vahirara tita, tire Kotirara tiriqa ntaqikyante turahua hia aatu hiraitita, Kotira qua rieqatama kepuuyaqama kye mwivaa quavanto qutaa qovara hiani entara vekya varita.

<sup>19</sup> Kotiva timwa to quava qutaa qovara hiani entarara rieqatama tire hia ntuqutu vaisivi hiraitita, kepuuyaqama kyeta variara. Kotira quavanto qutaa qovara hiani entarara rieqatama tire qioma tauha voti hira pati kyeta Kotiva varira turuarani uro variananra. Tire qioma mate mwaa entara Kotira nraaqani uro variananra.

<sup>20</sup> Iesusiva tiri kyaahaqama timwa teqaro mwiva nraante Kotiva varira turuarani vurama. Haaru Merikisetekiva nraakye qora uaquia hu kyaiqarara rieqaro Kotirani kyaiqa vara mwatontema kyero Iesusivavata Kotiva nraakye qora qua nruka nyataarive tiro, Kotirani kyaiqa vara mwatero ekyaa enta qati variqiro vivama variro.

## 7

### *Merikisetekira okyarara tura*

<sup>1</sup> Merikisetekiva vunyaa vaisivanto mwatukya mpo Saremiqaa ntaqikyiqiro viqaro mwiva nraakye qorara rieqaro mwiva virini varira mwanriqa, Kotira kyaiqa vare varu vaisiva varurama.

Mpo enta mwiva varuvaro Evarahaamuva ntaquqi viro nronra vaisi vunyaa vaisinramwu nraatara kyero nrumu ntantero aanrani vi varuvaro Merikisetekiva Evarahaamunra uro huntu kyero nai kyauqu mwiaqaa vatero mwianra tiqaro, Kotiva i kyuqema kyero ntaqikyi mwataarive, tiro.

<sup>2</sup> Timwa kyovaro Evarahaamuva ntaqiqaro varato inraikyara ntainra kyero kyauqurutana vato inraikyaraqitairo kuaa inraikya Merikisetekira mwunrama. Merikisetekira nrutu okyara mwaa quaraqitai tirera, *Vunyaa Vaisivanto Ntapihi Kyero Nrohi Varivavema* qiananra. Mwiva Saremiqaa ntaqikyi varurara tiro, mwivaa nrutu mpo mwaa quaraqitai tirera, *Mwaateraqama Kyero Ntaqikyi Varivavema* qiananra.

<sup>3</sup> Merikisetekira nrohua qohuave, mwivaa okyarave, hia mpukuqi vahurara tita, hia tire mwivaa ntapihunanra. Mwivaa mwatato entarave, mwiva qutu vu entarave, hia mpukuqi qara ntumwa torara tita, hia tire mwivaa ntapihunanra. (Kotiva mwi vaisira nronraqama kyorara tiro, mwivaa ekyaa entama Kotirani kyaiqa varaqiro quananro.) Mwi vaisira nraantantamwa kyero Kotira mwaaquvanto nraakye qorara rieqaro ekyaa enta Kotirani kyaiqa varaqiro quananro.

<sup>4</sup> Merikisetekiva nronra vaisivanto varurara rieqata variata. Evarahaamuva tiri haivaqahua vunyaa vaisivanto ntaquqiro viro nramwutaa nraatara kyero, mwihua hu inraikyara varatora kyauqurutana vatoraqitairo Merikisetekira kuaiqia mwunrave. Merikisetekiva nronra vaisi varurara tiro, Evarahaamuva mwitaama kyero mwunra.

<sup>5</sup> Rivaira okyaraqitaita Mosesira qua okyara vataqi viqatama nraakye qorara rieqata Kotira kyaiqa varaqi vihua, mwihua qumina nraakye qorara nkyeta kyauqurutana vate inraikyaraqitai kuaiqia tiri timwiate timwa kyeqata mpo inraikya mpo inraikya vare variarave. Mwihua nkyiari nramwunaa Evarahaamuva mwataratai huaqitai vare variarave.

<sup>6</sup> Merikisetekiva hia Rivaira kuaa okyaravanto variqaro Evarahaamuva nai hu inraikyara tukyama kyero vatoraqitairo kuaa inraikya varero Evarahaamunranra tiqaro, Kotiva iqaa kyuqema ntaqikyi mwataarive, tura. Kotiva nai kyauqu nriqiqaa vateqaro timwa to vaisiva, Evarahaamuva varuvaro Merikisetekiva nai kyauqu mwiaqaa qutero mwi vaisirara tiqaro, Kotiva iqaa kyuqema ntaqikyi mwataarive, turave.

<sup>7</sup> Hiama vaisi mwatumwi variariva nronra vaisiqa kyauqu vatero mwianra tiqaro, Kotiva iqaa kyuqema ntaqikyi mwataarive, qiananrove. Nronra vaisivanto nai kyauqu mwatumwi variani vaisiraqaa vateroma mwianra tiqaro, Kotiva iqaa kyuqema ntaqikyi mwataarive, qiananro. Merikisetekiva nronra vaisivanto variqarora tiro, mwiva nai kyauqu Evarahaamunraqaa vatero tiqaro, Kotiva i kyuqema mwataarive, turave.

<sup>8</sup> Rivaira okyaravanto nronraqama vita Kotira nraamwuqi Kotira kyaiqa varaqita vi variahua, mwihua nraakye qora vataa inraikyara kyauqurutanaqa tukyama kyeqa vataaraqitai kuaiqia vare variara. Rivaira okyara mwihua variqi vita ekyaa qutu vi variahua variara. Merikisetekiva Evarahaamuva ntainra kyero vatorqaatairo kuaiqia varora. Kotira mpukuqi Merikisetekira okyarara mwiva qati variqiro quari vaisivave turara tiro, Merikisetekira okyaravanto Rivaira okyara mwihua nraatara kyora.

<sup>9-10</sup> Nte Merikisetekira okyarara rieqana mpo quavata tirera. Rivaiva Kotira kyaiqa vare varuva varuvatara tita, nraakye qoravanto nkyiari vato inraikyara kyauqurutanaqitai kuaiqia vara kyeqata Rivaira mwi varura. Evarahaamuva mpo inraikya ntainra kyero kyauqurutanaqitairo Merikisetekira mwu entara Rivaira hia mwata-tovaro Evarahaamunra nai haivaqara mwamwantaqi varura. Mwi entara Rivaiva nai haivaqara Evarahaamunra mwamwantaqi variqarora tiro, mwivavata Evara-haamunravatama kyero variqaro Merikisetekira mwi inraikyara mwuntema kyero mwunra. Rivaiva Merikisetekira mwi inraikyara mwunranra tiro, Merikisetekira okyaravanto Rivaira okyara nraatara kyora.

<sup>11</sup> Kotiva nai qua okyara Mosesira timwa mwu entara mwiva Rivaira okyara vara nronraqama kyero mwihuara tiqaro, Mwi okyararaqinaa vaisivanto nraahuma qio nini kyaiqa varaanarove, timwa kyero Rivaira kuaa okyara varu vaisira Eroninra nronraqama kyovaro Eroniva vuni variqaro mwi kyaiqara varorave. Rivaira okyara mwihua variqata nraakye qorara rieqatama Kotira kyaiqa varaqi viqata quara vahi aasau ru kyeta Kotirani qia quaraqita vuvaro mwihua kyaiqvanto hia anoma kyero kyuqe kyaiqa vahura. Mwihua kyaiqvanto qio vahutiri, vaisi mpovanto Kotirani kyaiqa varaariva Iesusiva hiama qovara hutiri. Iesusiva qovara hiro Merikisetekiva Kotira kyaiqa vara mwatontema kyero Kotira kyaiqa vara mwatora. Mwiva hia Eroniva Kotira kyaiqa varontema kyero Kotira kyaiqa vara mwatora.

<sup>12</sup> Haaru Kotiva Rivaira okyaraara mwihua nraahuma ni kyaiqa varaqi quate tura. Nraakiara Kotiva mwi quara qatinani vara kyero Iesusira titovaro mwiva Kotira kyaiqa vararero tumunranra tiro, Mosesira qua okyaravantovata qatinaniqama hiananro.

<sup>13</sup> Tiri vunyaa vaisivanto Iesusiva hia Rivaira okyara kuaa okyaravanto varura. Hia Iesusira okyaraqitairo mpovanto Kotira nraamwuqi Kotira kyaiqa vara mwataariva varura.

<sup>14</sup> Tire ntapihi kyauraro Jesusira okyaravanto Iutaa okyarama vahiro. Hia Mosesiva Iutaa okyaraqinaanra vaisi mpora Kotira nraamwuqi Kotira kyaiqa varaqiro quarive tura.

<sup>15</sup> Jesusiva hia Rivaira okyaravanto kyaiqa varontema kyero Kotira kyaiqa vararaitiro, mwiva Merikisetekiva Kotira kyaiqa varontema kyero Kotira kyaiqa vararerero tumunranra tita, tire ntapihi kye taqauraro Kotiva Rivaira okyara mwihua nraahu ni kyaiqa varaqi quate tu quara qaqlira kyora.

<sup>16</sup> Vaisi mpovanto Rivaira okyaravanto varuvara tiro, mwiva Kotira nraamwuqi Kotira kyaiqa vara mwate varura. Jesusiva hia mwihua nraantantamwa kyero nai okyarara riemwaqiro viraitiro, mwiva kepukyavanto ekyaa enta qati nraahu variqiro vi varivara tiro, mwiva Kotira kyaiqa varaqiro vura.

<sup>17</sup> Kotira mpukuqi Jesusira okyarara mwitaama tiro:  
Merikisetekiva Kotira kyaiqa vara mwantontema kyera  
evata Kotira kyaiqa varaqi viqara  
ekyaa enta qati variqi vinanrave, turama.

(Ihi 110:4)

<sup>18-19</sup> Rivaira okyaraqinaa vaisinramwuvanto Kotira kyaiqa varaqi viqata hia qio nraakye qora uaqia hu kyaiqara qua nruga nyatovaro mwihua kyaiqvanto hia kepukyu vahuvaro Kotiva nai Mosesira mwu quara vara kyero qatinani nruga kyero qaraakya qua qovarama kyora. Haaruua qua Mosesira qua okyara rieqaro nrohu vaisiva, hia kyuqema varu vaisiva varura. Qaraakya quavanto nritarero vahirara tita, tire qaraakya qua rieqatama tire qioa mwaa entara Kotira nraaqani uro variananra.

<sup>20</sup> Kotiva Jesusira vara sivuma kyarerera hiro nai kyauqu nriqiqaa vateqaro qua tura. Rivaira okyaravanto Kotira kyaiqa vararerera utuvaro Kotiva hia kyauqu nriqiqaa vateqaro qua tura.

<sup>21</sup> Kotiva nai kyauqu nriqiqaa vatovaro Jesusiva nraakye qorara rieqaro Kotira kyaiqa varaqiro vura. Kotiva Jesusirara mwitaama tiro:

Nte i nronravanto variqana  
ntena kyauqu nriqiqaa vatena tiqana,  
E ekyaa enta qati variqira viqara  
ni kyaiqa varaqira vinanrave.  
Hia nte mate timwa taani quara vara kyena  
qaqlira kyaaninrave, tura.

(Ihi 110:4)

<sup>22</sup> Kotiva nai kyauqu nriqiqaa vateqaro Jesusirara mwitaa turara tita, tire ntapihi kyauraro qaraakya quavanto haaruua qua nraatara kyero nritareroma vahiro.

<sup>23</sup> Rivaira okyaravanto haaruua qua rieqatama Kotira kyaiqa varaqi viqata qutuqi vura. Mwi kyaiqara airi vaisivanto varaqi vura.

<sup>24</sup> Qaraakya quavanto qovarama viharo Jesusiva ekyaa enta qati variqi vi varivara tiro, mwiva Kotira kyaiqa varaqiro viqaro ekyaa entama variqiro quananrove.

<sup>25</sup> Jesusiva ekyaa enta qati variqiro vi varirara tita, nraakye qoravanto tiri kyaahaqama timwa taante ti variavaro mwiva ekyaa enta mwihuara rieqaro Kotirara aakyara ntamwaqiro quananro. Jesusiva mwitaama varivara tiro, mwiva nraakye qora kyaahaqama nyataariva qio variharo Kotiva mwihua qioa huvantu nyataananro.

<sup>26</sup> Jesusiva vuni variqaro tiriara rieqaro Kotira kyaiqa vara mwate varivama variro. Mwiva Kotira kyaiqa nraahu vare varivama. Mwiva hia uaqia hi kyaiqaravata utiraitiro, kyuqe kyaiqa nraahu vare varivama variro. Uaqia hi kyaiqara uti variahua variavaro mwiva nanrianraama kyotatavanto variro. Kotiva mwia tuaahera kyaiharo mwiva nyaamwuni viro nraatara kyero veratoma variro. Jesusiva mwitaama vari vaisiva varivara tiro, mwiva qioqama kyero tiri kyaahaqqa hiarivama variro.

<sup>27</sup> Rivaira okyaravanto mpo enta mpo enta Kotira kyaiqa varaqi viqata mwihua nkyiari uaqia hu kyaiqarara nraante rieqata quara Kotirani qiaqaa kyovaro itamwa kyovata mwia nraakiara nraakye qora uaqia hu kyaiqarara rieqata mwitaa hura.

Iesusiva hia mwihua hunte huru. Hia Iesusiraqaa uaquia hi kyaiqava vahuvvara tiro, hia nai vara ntapihiani kyaiqara nraante mwiva varora. Hia mwiva mpo enta mpo enta quara qiaqaa kyovaro itamwa kyovaro Kotirani mwi kyaiqara varaqiro vura. Mwiva hia airi nani mwitaa hiraitiro, mwiva kuaa nani nraakye qora uaquia hi kyaiqarara rieqaro nai mwamwanta Kotira mwinro qutu viqaro Kotira kyaiqa vara mwatora.

<sup>28</sup> Mosesira qua okyarara rieqatama nraakye qoravanto Rivaira okyaraqi vaisi nronraqama kyeta tiqata, Nkyenramwuma tiri uaquia hi kyaiqarara rieqata tiri kyaahaqa hiqata Kotira kyaiqa varaqi quate, tura. Mwitaa tuvata mwi vaisinramwuhua nronraqama vita hia kepukya vahuhuavata variqata mwi kyaiqara vare varura.

Kotiva Mosesirara qua timwa to entara mwia nraakiara Kotiva nai kyauqu nriqiqaa vatero nai nrutu ntero tiqaro, Ni maaqvanto ni kyaiqa varaqiro quananrove, timwa kyero mwia nronraqama kyora. Mwia mwaqvanto nronraqama viro Kotira kyaiqa varaqiro viqaro qioqama kyero vari vaisiva variqarora tiro, mwiva nronraqama viro ekyaa entama mwia kyaiqa varaqiro quananro.

## 8

*Iesusiva tavaaraqaanaa vaisi nronravanto nyaamwuni variqaro tiri kyaahaqa hiqaro Kotira kyaiqa vara mwate varivama variro*

<sup>1</sup> Nte qua ti varura mwia okyara vahirero mwataamama vahiro. Iesusiva tavaaraqaanaa vaisi nronravanto nyaamwuni variqaro tiri kyaahaqa hiqaro Kotira kyaiqa vara mwate varivama variro. Nyaamwuni nronravanto Kotiva variharo mwi vaisiva mwia kyauqu kyaatutania mwatakyaa viro variro.

<sup>2</sup> Rivaira okyaravanto Kotira kyaiqa varaqi viqata vaisivanto kyauquqo hoqa to nraamwunraqi kyaiqa vare variqata mwi nraamwunranra Kotira nraamwuve ti varura. Iesusiva nyaamwuni variqaro Kotiva hoqa taira nraamwu tuananraqi variqaro Kotira kyaiqa varaqiro vi varira. (Mwi quara ntapihi kye tirera Iesusiva nyaamwuni qutaa Kotiva varinani uro variqaro Kotira kyaiqa varaqiro vi varirave.)

<sup>3</sup> Nraakye qoravanto Rivaira okyaraqinaanra vaisi mpo nronraqama kyarerita hita mwianra tiqata, E tiri kyaahaqamaqi viqara vunyaa vaisivanto variqara quara rukyeqara Kotirani kyairaro qiaqaa itaarive, qiara. Mwihua mwitaa qiavaro mwi vaisiva quara rukyeqaro Kotirani kyaiharo qiavanto itamwa kyaiharo mwi kyaiqara varaqiro vira. Qio tiri kyaahaqama timwa teqaro Kotira kyaiqa varaqiro vi vari vaisiva, Iesusiva, mwivavata Kotira kyaiqa vareqaro mpo inraikya Kotira mwinrama. (Mwiva nai nraanre Kotira mwinrama.)

<sup>4</sup> Iutaa qua mwaanra rieqata Rivaira okyaravanto Kotira kyaiqa varaqita quarara tiro, Iesusiva mwatani varitiri, mwiva hiama mwi kyaiqara varaitiri.

<sup>5</sup> Rivaira okyaravanto Kotirani varaa kyaiqava hia qutaa kyaiqa vaharo qati mamaanruqama kyero vaharo nyaamwunima kyaiqa tuananravanto vahiro. Iesusiva nyaamwuni variqaro Kotirani qutaaqama kyero vahilo kyaiqarama vare variro. Kuaa qarama kyero haaru Mosesiva Kotira nraamwu hoqarera uti varuvaro Kotiva tiqaro, E taaqiqaa nivatama kyera variarana nte i nraamwuteqana e mwitaama kyera nraamwu hoqaante tura mwianra rieqarama mwitaama kyera hoqaante, tura.

<sup>6</sup> Kotiva Iesusira nronraqama kyaiharo mwiva Kotira kyaiqa varaqiro viqaro Rivaira okyara mwihua kyaiqa nraatara kyaiharo mwia kyaiqvanto vunima vahiro. Rivaira okyaravanto Kotiva Mosesira timwa mwu quara nraahu rieqata Kotira kyaiqa varaqi vi variavaro Iesusiva Kotiva nai kyauqu nriqiqaa vateqaro timwa to quara rieqaro Kotira kyaiqa varaqiro vi varira. Kotiva nai kyauqu nriqiqaa vateqaro tu quava, mwi quava vuni vaharo Iesusiva mwi quara riemwaqiro vi variharora tiro, mwia kyaiqvantovata nritareroma vahiro.

<sup>7</sup> Kotiva Mosesira mwu quava qio vahitiri, Kotiva hiama mwi quara nruka kyero qaraakya qua mpo nraakiara vataitiri.

<sup>8</sup> Kotiva taqovata nraakyе qoravanto nai Mosesirara timwa to quara hia kyuqema kye riovarora tiro, mwiva mwataama tiro:  
Nraakiara mpo enta nrianinra mwi entaraqaa  
nte Isareri nraaqiara Iutaa okyaravata variqana  
qaraakya qua vataaninrave.

<sup>9</sup> Ni qua qaraakya mwiva vahirero  
hia mwihua haivaqahuara qiava quara  
nraantantamwa kyero vahiananrove.  
Haaru nte mwi entara mwihua haivaqahua kyauquqaa  
tu vare Isipiqitai sitaqina nrumu kyena  
nte mwihuavata variqana qua timwa taavata  
mwihua ni qua riemwaqi quataara vahuvata  
mwihua qaqlira kyeta hia ni qua riemwaqi vi varurara  
tina, mwia kyaara nte mwihua qaqlira kyaavarave.

<sup>10</sup> Nte nraakiara mpo enta nrianinraqaa  
Isareri nraaqiaravata variqana  
qaraakya qua timwa kyena vataaninrave.  
Hia nte mwi entara oriqaa mwi quara qara ntuaninrave.

Nte mwi entara mwihua su nyaatoqi  
mwi quara qara ntumwa taaninrave.  
Nte ntene qua mwihua mwutukyaqi  
qara ntumwa taaninrave.  
Nte mwihua mwanriqvanto variqana  
mwihuqaqa ntaqikyiqi vi variarita  
mwihua ni nraakyе qora varivarave.

<sup>11</sup> Nraakiara mwi entara nronra vaisivata  
qumina vaisivantovata mwihua ekyaa ni okyarara  
ntapihita hia qumina ni okyarara  
uro hena nraakyе qora timwa nyivarave.  
Mwi entara ekyahua ni okyara ntapihi kyetara tita,  
hia mpovanto uro nai nrunra nrakyaa qata vakyaa  
timwa nyianriva vahiananrove.

<sup>12</sup> Mwi entara mwihua uaqia hi kyaiqara uti varirara  
rieqana nte mwihuara po timwa nyataaninrave.  
Nte mwihua uaqia hi kyaiqara uti quara nruka nyatena  
hia mwianra riemwaqina quaninrave, tura.

(Ieremaiaa 31:31-34)

<sup>13</sup> Kotiva mwi quara mwitaa tiqaro qaraakya qua vataaninranra tura. Mwiva mwitaa tiqaro haaru qua vatova mwiva hia vahiananrove tiqaro turama. Haaruua inraikyavanto nraahaqamaqiro viro uro qamwanramama taiqa quananro.

## 9

### *Haaruua qua rieqata Kotira nraamwuqi kyaiqa varaqi vurara tura*

<sup>1</sup> Nte Kotiva vuni timwa to quara haaruua qua okyarara tirerama. Kotiva Mosesira qua timwa mwuvaro Mosesiva nraakyе qorara mwitaa mwitaama kye Kotira nrutu tuaaheraqi quate tuvata mwi quara rieqata nraamwu mpo Kotirani hoqa mwatorama. Mwi nraamwuva nai mwata mwaqa vahu nraamwuva vahura.

<sup>2</sup> Mwi nraamwunra vahirero tavunaqo hoqato nraamwuva vahura. Nraamwu mwia hoqa kye utaqaa vaata/antuataara tavunaqo utu teta vuni vahura mwisatara kyuqe

inraikya nraahu vahiarive tura. Mwiqi omwa cupi kyeqata vato taquva vahuvaro tainta mpo vahuvaro Kotirani utato mperetivavata vhura.

<sup>3</sup> Tavunaqotairo tavaarana tita tora mwia mwaatira uta mwiqiara Kotira turuaranive turama. Kotira turuarani vahurara tiro, vaisivanto mwiqi qati vigetaariiva hia vahuvaro qao timwa tora.

<sup>4</sup> Kotira turuara mwiqi tainta mpo koriqotairo ututo taintara mwiaqaa kyuqema kyero mwunta vu inraikyara qia quarate varu taintava vahuvaro vokuhe mpo koriqotai taaqau kye ntumwaqu tova vahuvaro mwiqi Kotiva Mosesira mwu quara qara ntumwa to ori tanava vahuvaro, manaa kyara huto taquvavata mwiqi vahuvaro, Eroninra kyaamwu, mwia haaru aaharaqa mwanre cupiqavu kyaamwuvavata vhura.

<sup>5</sup> Mwi inraikyava mwi inraikyava mwiqi vahuvaro vokuhe viti hiniqaa hiniqaa nyaamwunyaahua ututova taaratana vhura. Mwitanahua nkyiari nraaokya iri kye aaraa vatetatana Kotiva mwaini mwaaqima variho tiqata varura. Mwitanahua hini vitiqa hini vitiqa varuvaro vokuhe uta mwiaqaanrama Kotiva nraakye qorara po kye timwa nyateqaro mwihua qora kyaiqa nruka nyate vari satave tura. Kotiva nraakye qoravanto uaqia hi kyaiqara uti quara nruka nyataarive tiro, mpo ihi mpo ihiqi kuaa nani nraahu Kotira nraamwuqi kyaiqa varo vaisiva vunyaava nraanre kyaqa kye varero vera ntero vokuhe mwia utaqaa uro ntukikiata kyora. Hiama qio tire mwaa qararaqi ekyaa mwi quara mpoqiaavata qiarava vahiro.

<sup>6</sup> Kotira kyaiqa vara mwate varu vaisihua mwaanra qua rieqatama mpo enta mpo enta nraamwu mwiqi tavunaqo vaata utu tova vuruto vahuvata vera ntora, mwisata vera nteta kyaiqa vareqata hia turuara Kotirani vahunani vura.

<sup>7</sup> Mwihua vunyaa vaisivanto qio nai mwiva nraahuma mpo ihi mpo ihiqi kuaa nani nraahu vera ntanta hura. Mwi entaraqaa mwi vaisiva hia qati mwiqi vera ntaraitiro, mwiva nraanre kyaqaqiro mwiqi uro ntukikiatora. Mwiva nai uaqia hi kyaiqararavata qumina nraakye qora uaqia hi kyaiqararavata rieqaro Kotiva tiriqaa qua vahira nruka timwa taarive tiro, mwiva turuara Kotiva horaqi vera ntero nraanre ntukikiata tero vura.

<sup>8</sup> Mwi vaisi mwitaama kyeqaro Kotira kyaiqa varaqiro vura mwianra Kotira mwanraqravanto tiri tinraamwutaihata tire ntapihi kyauraro qumina nraakye qoravanto Kotiva hinani vi aanrava hia vahurama. Kotira nraamwuvanto mwatani vahuvaro haaruua okyaravanto qati vahuvarora tiro, qumina nraakye qoravanto Kotiva hinani vi aanrava hia vhura.

<sup>9</sup> Mwaa entaravata haaruua qua rieqaro quara Kotirani rukyero qiaqaa kyaiharo itaiva mwi kyaiqava hia nraakye qora kyaahaqa ihata mwihua mwutukya su nyaatovanto qati nraahu uaqama kyero vahata variara.

<sup>10</sup> Nraakye qoravanto haaruua qua rieqatama kyarave nramanrive nrenranra rieqata mpo qara mpo qarama kye nkyiari mwamwanta hiqama kye kyotataqama kye variare ti variavaro mwi inraikyava hia mwutukya vu nraato kyaahaqa hira. Kotiva nai haaruua qua Mosesirara timwa torara tiqaro, Mwi quava quaahaqa pataqiamava hahiananrove. Mwi quava vahiraro ni qua qaraakya quavanto qovara hiarive, tura.

### *Qaraakya quara tura*

<sup>11</sup> Kotira qaraakya quavanto nritarero vahi quara Karaisiva hia mwi quara nteqaraitiro riemwaqi virero qovarama vura. Mwiva Kotira kyaiqa vare variva vunyaa vaisivantoma variro. Mwiva hia vaisivanto mwata mwaini hoqa tai nraamwunraqi Kotira kyaiqa vare varivavauma. Mwiva nai nritarero vahinani Kotiva varinani nyaamwuni variqaro Kotira kyaiqa vare variro.

<sup>12</sup> Karaisiva nyaamwuni vuva uro turuara, Kotiva hinani hia quaahaqa variariva variraitiro, mwiva ekyara variarivama variro. Kotiva nraakye qora uaqia hi kyaiqara qua nruka nyataarive tiro, Karaisiva kuaa nani hia memenra nraanreve, hia

purimakau nraanreve, kyaqa varero mwipi viraitiro, mwiva nai nraanre varaqiro uro vataiharora tiro, Kotiva tiri uaqia hi kyaiqara qua nruka timwa taariva qio vaharo tiri huvantu timwa taariva ekyaa enta qio vahiananro.

<sup>13</sup> Haaruua qua okyara rieqaro Kotira nraamwuqi kyaiqa vare varu vaisiva memenra nraanrevata purimakau nraanrevata nraakyе qoraqaa ntukikiata kyero purimakau nraati qia quara tova itero qaupaqama vura, mwiva qaupa mwia vaqita kyero nraakyе qoraqaa qu nyatero mwihuara tiqaro, Kotiva mwianra rieqaroma nkyi hiqama nyataihо, tiro. Mwiva mwitaa tiqaro mwihuua pahi nraahu hiqama nyatero, hia mwihuua mwutukya su nyaato hiqama nyatora.

<sup>14</sup> Haaruua qua okyara rieqaro mwitaama kyovaro Karaisiva mwi okyarara nraatara kyero nai nraanreqotairo tiro hiqama timwa tero. Kotira mwanraquravanto ekyaa enta qati variqi vi variva Karaisiraqi varuvaro Karaisiva hia uaqia hi kyaiqara utuva Kotira kyaiqa vareqaro qutu vurara tiro, mwia nraanrevanto qioma tiri tivu nraato mwutukya hiqama timwa tairaro tire uaqia hi kyaiqara utuqi viqata uro ekyaara qutu quarava hia vahiraqe tire Kotiva mwiva qati variqi vi vari mwanriqara mwia kyaiqa nraahu varaqi quananra.

<sup>15</sup> Karaisiva Kotira qaraakya qua qovarama kyai vaisivama variro. Kotiva nai kyauqu nriqiqaa vatero tiqaro, Nte nyaanrama taari nraakyе qorahua kyugema nyataarita ekyaa enta kyuqema kye qati variqi vivarave, turara tiro, Karaisiva mwi quava qutaa mwivau vahiarive tiro, qovarama vura. Nraakyе qoravanto haaruua qua Mosesira mwu quara rieta hia mwi quara ntapihi kye riaraitita, uaqia hu kyaiqara utuqi vi varuvaro Kotiva mwiaqatairo mwihuua uaqia hi quara nruka nyatarero qaraakya qua timwa tovaro Karaisiva nraakyе qorara rieqaro qutu vura.

<sup>16-17</sup> Vaisi mpovanto qati variro tiqaro, Nte qutu quariro mwi vaisiva mwaa vaisivama nte hu inraikyara varaananrove, timwa kyero mwi quara qara ntumwa taananro. Qara ntumwa tero mwiva qati variani entaraqaa hiama vaisi mpovanto mwiva hi inraikyara varaananro. Mwiva qutu viraroma qio mwia quavanto qutaa mwivau vahiananro.

<sup>18</sup> Mwia votima kyero Kotiva haaruua qua timwa tova, mwi quava kepukyaqama quarive titi, mwihuua quara ru kyovaro mwia nraanrevanto raurura.

<sup>19</sup> Mwi entara vuni Kotiva timwa to quara ekyaa mwi quara Mosesiva nraakyе qora timwa nyi taiqa kyero mwiaqatairo purimakau nraati rutoravata, memenra nraati rutoravata, mwia nraanre kyaqa kye varero mwia qati nramanrivatama kyero tuqasaa kyero sipisipi kyaahi ventakya voti huraqi ntamwa to kyaantara vara kyero quaukyuvera mwanre voti hora vitiqa rupa tero nraanreqi ntamwa kyero varero uro Kotira qua qara ntumwa to mpukuraqaavata nraakyе qoraqaavata nraanre ntukikiatero.

<sup>20</sup> Mwiva nraanre Kotira mpukuqaavata, nraakyе qoraqaavata, ntukikiata kyero tiqaro, Kotiva qua timwa kyero vatero nkyiara, Mwi quara riemwaqi quate, tihata nkye tiqata, Tire mwi quara riemwaqi virerave, qiera. Kotiva timwa tai quavavata nkye qia quavavata kepukyaqama quarive tinama, nte nraanre mwaa ntukikiata kye nkyi qu nyatauqo, tura.

<sup>21</sup> Mosesiva mwitaa timwa kyero mwitaamaqiro viqaro nraanre kyaqaqiro uro Kotira nraamwuqaa ntukikiata kyero nraamwu mwipi vahu inraikyaraqaavata ntukikiatora.

<sup>22</sup> Haarua qua okyarara rieqaro mpo inraikyavanto uaqia huvaro nraanrevanto hiqama nyate varura. Hia mpo inraikya ru kyairaro nraanre rauru viraro qutu virera, Kotiva nraakyе qora uaqia hi kyaiqara qua nruka nyataari aanrava hia vahura.

*Kotiva nraakyе qora uaqia hi kyaiqara qua nruka nyataarive tiro, Karaisira nraanre rauruvaro qutu vura*

<sup>23</sup> Kotira nraamwu mwatani hoqato nraamwunravata, nraamwu mwipi vahu inraikyaravata, qumina vaisivanto hoqa kyero ututo inraikyava nraahu vahurama. Mwitaa hi inraikyava Kotirani quttaaqama kyero vahi inraikyava nyaamwunima vahiro. Vaisivanto Kotira nraamwu mwatani vahuravata, mwipi vahu inraikyaravata, hiqama mwatarero mwiva quara nraanreqo nraahu ntukikiata kyeqaro hiqama mwate varurama. Kotiva hi inraikyara nyaamwuni vahi inraikyara hiama qio quara vahi aasau nraanreqo hiqaananro. Nritarero variari vaisira nraanrevanto nraahu mwi inraikyara hiqaarivama vahiro.

<sup>24</sup> Karaisiva hia vaisivanto nyaamwuni vahi nraamwunranra rieqaro hoqa to nraamwuva mwata mwaaqa vahura turuaraqi viqe toravauma. Karaisiva Kotira nraamwu tuananra nyaamwuni vahira mwiqima viqetero. Mwi quara vutu kye tirera, Karaisiva Kotiva varinani nyaamwuni viva uro variqaro tiri kyaahaqa hiarivama variro.

<sup>25</sup> Kotira nraamwuqi kyaiqa varai vaisiva vunyaava mpo ihi mpo ihiqi kuaa nani nraahu quara vahi aasau nraanre kyaqa kye varero Kotira nraamwu turuarani vi varira. Karaisiva hia mwitaa hira. Kotiva nraakye qora uaqia hi kyaiqara qua nraka nyataarive tiro, mwiva hia qaiqaa qutiro qaiqaa qutiro hiariva varira.

<sup>26</sup> Mwiva mwitaa hiankye titiri, mwiva mwata mwaa ututo entaraqaatairo airi nani nriqavi inraikyara varaqiro vitiri. Karaisiva hia mwitaa hirero qovara hiravauma. Mwaa entara taiqaari entava qaumaqa huvaro Karaisiva Kotiva nraakye qora uaqia hi kyaiqara qua nraka nyataarive tiro, kuaa nani nraahu mwihuara rieqaro qutu virero qovara hora.

<sup>27</sup> Mwata mwaaqa vari nraakye qorahua variqi vita kuaa nani nraahu qutu vita mwiaqatai mwihuara varivaro Kotiva mwihuara quaqaa vateroma ko qiananro.

<sup>28</sup> Karaisiva Kotiva nraakye qora uaqia hi kyaiqara qua nraka nyataarive tiro, mwivavata kuaa nani nraahu qutu vura. Karaisiva mwitaama kyero qutu vurara tiro, Kotiva mwia kyaiqara rieqaro qioqama kyero nraakye qora uaqia hi kyaiqara qua nraka nyataarivama vahiro. Nraakiara Karaisiva qaiqaa mwatani tumuani entara mwi entara mwiva hia nraakye qora uaqia hi kyaiqarara rieqarovauma tumuananro. Mwiva mwi entaraqaa mwia vekya vari nraakye qorahua sitareroma tumuananro.

## 10

*Rivaira okyaravanto Kotira kyaiqa varaqi vuraqaatairo Kotiva nraakye qora uaqia hi kyaiqara qua nraka nyataariva hia qioqa hora*

<sup>1</sup> Kotiva Mosesira mwu quava mwi quava vahirero hia qutaa inraikya vahura. Qati mamanaanruqama kyero vahura. Mwitama vahirara tita, nraakye qoravanto mwi quara riemwaqi viqata hia ntapihi kye Kotiva kyuqema nyatarera hu okyarara taqora. Nraakye qoravanto Mosesira mwu quara rieqata mpo ihi mpo ihiqi quara vahi aasau nraahu Kotirani qia quaraqita vuvaro quara vahi aasau qia quara mwato inraikyava su nyaato mwutukya hia qioqama kye hiqama nyataariva vahuvaro nraakye qora uaqia hu kyaiqava qati vahuvata mwihuara hia qioqama kye varu nraakye qorahua varura.

<sup>2</sup> Kotirani qia quara mwatova quara vahi aasau mwiva nraakye qora su nyaato mwutukya qioqama kye hiqama nyataankye titiri, nraakye qoravanto tiqata, Tiri uaqia hi kyaiqara qua nraka timwa taiho, timwa kyeta hiama qaiqaavata mpo ihi mpo ihiqi quara vahi aasau Kotirani qio quara mwataatiri.

<sup>3-4</sup> Purimakau qora ru kyaira mwia nraanrevantovata, memenra nraanrevantovata, rauriraro hiama Kotiva mwianra rieqaro nraakye qoravanto uaqia hi kyaiqara uti quara nraka nyataaanro. Mwitaa hurara tita, nraakye qoravanto mpo ihi mpo ihiqi quara vahi aasau ru kyeta Kotirani qia quaraqita vuvaro su nyaato ntapihi vuvata tiqata, Qikye, tire uaqia hi kyaiqara nraahu uti varurahuave, tura.

<sup>5</sup> Kotirani quara vahi aasau qia quara mwate varuva hia nraakyе qora kyaahaqama nyatorara tiro, Karaisiva mwaa mwataraqaa tuminrenra hiro Kotirara mwitaama tiro: Quara vahi aasau ini qia quarataavave, ini vataa kyaravave, ekyaa mwi inraikyava hia i mwutukya ntihara variaro.

Mwitaa ihara e nianra mwiva ni mutukya vahira varaqiro quananrove timwa kyera ni mamanta mwatanianra rieqara terama mataaro.

<sup>6</sup> Quara vahi aasau ru kyeqata kyaitu qia quara mwataara mwianra hia e qamwateqara variaro. Nraakyе qoravanto tiri uaqia hi kyaiqara qua nruka timwa taarive timwa kyeta quara vahi aasau varaqi ini ru kye vataararavata hia qamwateqara variaro.

<sup>7</sup> Mwitaa hi variarana nte iara tiqana, Kotio, nte mwaa varuqo.

Nte i kyakya hi inraikyara vararerana varuvave. Haaru nianra qara ntumwa to quava tuntema kyena nte mwitaa hiqana i kyakya hira vataqina virerave, tura.

(Ihi 40:6-8)

<sup>8</sup> Kyai nte hini qua tura qaiqaa qari. Haaru Kotiva Mosesira qua timwa mwinro tiqaro, Nkye quara vahi aasau nini qia quaraqita quate, timwa kyero varuvaro Iesusiva Kotirara mwitaama tiro: Ini quara vahi aasau qia quara mwataava ekyaa mwi inraikyava hia i mwutukya ntihara variaro. E hia ekyaa mwi inraikyara qamwateqara variaro, tura.

<sup>9</sup> Iesusiva mwitaa timwa kyero mwiva nte vaakya turara tiqaro, Kotio, nte mwaa varuqo. Nte i mwutukya vahira vararerana varuvave, tura. Iesusiva mwitaa tuvaro Kotiva nai Mosesira mwu quara haaruaa qua qaqlira kyero mwia mwaatana mpo qua nai mwutukya vahu quara qovarama kyora.

<sup>10</sup> (Mwi quara okyara mwitaamama vahiro): Karaisiva Kotira mwutukya vahi inraikyara varaqiro viqaro uro kuaa nani nai mwamwanta mwinro qutu vurara tiro, Kotiva tiri uaqia hi kyaiqara qua nruka timwa taariva qiomaa vahiro.

<sup>11</sup> Mwaa entara Rivaira okyaraqitaita mpo hia vaisihua ekyaa enta haaruaa okyarara rieqata sivi variqata Kotirani kyaiqa varaqi viqata airi nani Kotirani quara vahi aasau qia quara mwate variara. Mwihua mwitaama kye Kotirani varaa kyaiqava hiama qio uaqia hi kyaiqara qua nruka timwa taanano.

<sup>12</sup> Kotiva tiriara mwihua uaqia hi kyaiqara qua nruka timwa taarive tiro, Karaisiva tiriara rieqaro kuaa nani qutu vura. Mwiva mwitaa hurara tiro, mwiva tiri kyaa-haqama timwa taariva ekyaa enta qati nraahuma variqiro quananro. Karaisiva tiriara rieqaro qutu viro mwiaqatairo mwiva nritarero uro Kotira kyauqu kyaatutani mwatakyaa viro varira.

<sup>13</sup> Mwiva mwaa entara mwini variqiro viraro Kotiva mwia nramwutaahua nraatara mwatairaro nai kyuqu mwihuaqaa vataaninra.

<sup>14</sup> Iesusiva Kotirani kyaiqa vareqaro nraakyе qorara rieqaro kuaa nani qutu vurara tiro, mwiva Kotira nraakyе qora su nyaato mwutukya hiqama nyataihata mwihua ekyaa enta qio vari nraakyе qorahua variqi vivara.

<sup>15</sup> Kotira mwanraquravantovata Kotira okyara ntapihi kyeroma tiri timwa timwinro. Mwiva haaru poropeti kyaahaqa huvaro mwi vaisiva tiqaro,

<sup>16</sup> Kotiva mwitaama tiho,  
Nte nraakyе qora kyapata variqana qaraakya qua vatarera.

Nraakiara nriani entaraqaa  
 hia nte oriqaa ntena qua qara ntumwa tarerave.  
 Mwi entaraqaa nte nraakye qora su nyaatoqi  
 ntena qua vatarerave.  
 Nte ntena qua mwihua mwutukyaqi qara ntumwa  
 tarerave, tiho, tura.

(Ieremaiaa 31:33)

<sup>17</sup> Qaiqaavata mwitaama tiro:  
 Kotiva mwitaama tiho,  
 Nraakye qoravanto uaquia hi kyaiqara uti varirave,  
 ni qua raaqute varirave, nte ekyaa mwi quara  
 taunru kyena hia mwi quarara riemwaqina virerave,  
 tiho, tura.

(Ieremaiaa 31:34)

<sup>18</sup> Kotiva nraakye qorara nkye uaquia hi kyaiqara utuara ekyaa mwi quara nruka  
 nyataurave tirara tita, nraakye qoravanto qumina qaiqaa tiqata, Tiriqaa qua vahira  
 nruka timwa taarive tiqata Kotirani kyaiqa varaqi virerave, tivora.

### Kyai Kotira nraaqani quare, tura

<sup>19</sup> Iesusiva tiriara rieqaro mwia nraanre rauruvaro qutu vurara tiro, Kotiva tiriqaa  
 qua vahira nruka timwa taihata tire mwia qua rie varurahua qioma Kotira nraamwu  
 turuarani qati quananra. Tire qioma Kotiva hinani qati quananra.

<sup>20</sup> Haaru Kotiva hinani vi vari aanranra tauhaqo antua tovata tire Kotiva hinani  
 quara aanrava hia vahuvaro Iesusiva mwamwanta vataava variqiro viro tiriara  
 rieqaro qutu viro mwiva mwi tauhara qatinani vara kyero mwiva Kotiva hinanianra  
 tirini qaraakya aanra utu timwa tora.

<sup>21</sup> Mate Iesusiva tiriara rieqaro vuniqama viro variqaro Kotira kyaiqa vareqaro  
 Kotira nraamwuqaa ntaqikyi varira.

<sup>22</sup> Iesusiva mwitaamaqiro vi varihatara tita, nrivaqe Kotiva varira mwia qaumato  
 quara. Kyai mwiva hinani tiri mwutukyaqitairo quataa hiraqe quara. Iesusiva quataa  
 mwi aanranra utu timwa taiho timwa kyeta quara. Tire ntapihi kyauraro tiri tivu  
 nraato mwutukyavanto uaqama kyero vahuvaro Iesusiva nai nraanre rauru kyero  
 tiriara rieqaro qutu vurara tiro, tiri tivu nraato mwutukya hiqama timwa taihata  
 varunanra.

<sup>23</sup> Kotiva quataa qua nraahu ti variva hiama mpo qua nruka kyero mpo qua qiananro.  
 Mwianra rieqatama nrivaqe hia ntuqutu vaisivi hiraitita, kepukyaqama kye Kotiva  
 kyuqema timwa taani entara vekya variqi quara.

<sup>24</sup> Varaivaqe eta hena nraakye qorara nronraqama kye riemwaqi viqata nanrianra  
 nanrianra mwutukya vahiraqeta kyuqe kyaiqa nraahu varaqita quara.

<sup>25</sup> Nrivaqe ntuvantua hiqata Kotira qua riaananra hia qaqlira kyaraitita, tuqara  
 kyeta tutara. Mpo hiahua hia ntuvantua hirara nronraqama kye riaara. Haunri  
 tirevata mwitaa hiarora. Karaisiva tumuanri entava qauma qauma hi varira mwianra  
 rieqata nrivaqe tire eta henahua kepukyaqama nyateqata Kotira aanraqaa vi variara.

<sup>26</sup> Tire Kotira qua quataa qua rieta mwiaqatai Kotira mwoqa mwita teta uaquia hi  
 aanranraqaa nraahu virerave qiarera, qaiqaa tiriara rieqaro Kotirani tiri kyaahaqa  
 hiani kyaiqara varaariva hiama vahiananro. Kotiva qaiqaa tiri uaquia hi kyaiqara qua  
 nruka timwa taariya hiama vahiananro.

<sup>27</sup> Tire mwitaa hiarera, tire mpoqama kye aatu hiqata Kotiva ko qiani entara  
 vekya variarava nraahuma vahiananro. Qiavanto mpoqama kyero iteqaro Kotira  
 nramwutaahua itamwa tatoqa kyaani qiera tire mwia vekya nraahu variaravama  
 vahiananro.

<sup>28</sup> Haaruua qua Kotiva Mosesira mwu quara nteqa kyo okyarava mwitaama vahura.  
 Vaisi mpovanto mwi quara nteqa kyovata vaisi taaratanave, taarampotanavantove,  
 tiqata, Qutaa tire taqe varuraro mwi vaisiva mwi quara nteqa kyairave, tuvaro

mwiaqaatairo hia mwi vaisirara po timwa mwataraitiro, qamwanrama kyero mwia ru kyora. Haaruaa qua nteqa kyo okyarava mwitaama vhahura.

<sup>29</sup> Haaruaa qua nteqa kyo vaisira rukyo okyarava mwitaama vahirara tiro, qikye, qaraakya qua rierovata mwoqa mwiani vaisira ru kyaari okyarava nataamave vahiananro? Mwi quara mwoqa mwiani vaisiva mwitaa hiqaroma Kotira mwaaquara qumina inraikyavema tiro. Karaisira nraanrevanto Kotiva qaraakya qua timwa tora kepukyaqama kyero mwi vaisira uaquia hi quara nraka mwataariva vaiharo mwi vaisiva tiqaro, Hiama qio nraka mataananrove. Qumina nraanreve, tiro. Kotira mwanaqravavanto nraakye qora kyuqema nyataaninranra mwi vaisiva qaquirave tiro, qoririma mwate variro. Qikye, mwi vaisira rukyaani okyarava nataamave vahiananro?

<sup>30</sup> Tire ntapihi kyauraro mwaa quara nte qiani quara Kotivama timwa tero. Mwiva mwitaama tiro:

Ntenavanto mwihua ru vuntuaninrave. Ntevanto mwihua nkyiari kyoqaa nyianinrave, tura. *(Lo 32:35)* Kotiva mwitaa tuvaro mpo quavata vhahura mwitaama tiro:

Kotiva naivanto nai nraakye qoraqaa qua vatero mwihua ko qiananrove tura.

*(Lo 32:36)*

<sup>31</sup> Qikye, Kotiva qati variqiro vi varira kyauquqi mwia qua nteqa kyaani vaisiva ntumwa quaninranra nronraqama kyena po kye tuqo. Kotiva mwi vaisira nataamave mwataananro?

### *Mwianra rieqatama nkye Karaisirara kepukyaqama kyeta riemwaqita quate tura*

<sup>32</sup> Haaru Kotira quavanto nkyi mwutukya su nyaatoqi viro ntuvahama nyatovata varu entarara nraato tuata. Mwi entara nkye Kotira qua riemwaqi vi varuvata nkyi muaanra nyita nkyi uaqiamaqita vuvata nkye nriqa vu inraikyara varaqi viqata nkye kepukyaqama kyeta nraahu variqi vura.

<sup>33</sup> Mwi entara mpo hora nkye varuvata mpo uhua nraakye qora suqaa nkyi uaquia hu quara timwa nyateta nkyi uaqiamma nyatora. Mpo hora mwihua nkyi hena nraakye qora uaquia hu quara timwa nyateta uaqiamma nyate varuvata nkye nkyeta hena nraakye qora kyaahaqamaqi vura.

<sup>34</sup> Mwi entara Karaisira vataqi vura kyaara nkyi henahua karavuqi kyovata nkye hia aatu hiraitita, uro mwihua kyapata variqata mwihuara po kye timwa nyatora. Mwi entara nkyi mwatave, nkye hu inraikyavare, varovata nkye hia mwianra nronraqama kyeta riora. Nkye tiqata, Tire hora inraikyava nyaamwuni nritarero vahi inraikyava ekyaa enta qati nraahu vahiqiro quananrove, timwa kyeta qamwateqata nraahu varura.

<sup>35</sup> Mwi entara nkye kepukyaqama kyeqa variqi vurara rieqatama nkye mwaa entaravata kepukyaqama kyeqata nraahu variqi vivaro Kotiva mwianra rieqaro nkyi kyoqaa nyianri.

<sup>36</sup> Nkye hia pupohairata kepukyaqama kyeta variqi vivera, nkye qiomma Kotira mwutukya vahianinra varaqi vivaro Kotiva nai kyauqu nriqiqaa vateqaro timwa to quava quataa nkyiqi vahiananro.

<sup>37</sup> Kotira mpukuqi qara ntumwa to quava mwitaama tiro:

Pataqia vari kyero  
nraakiara tuminrenra hiari vaisiva tumuananro.

Mwiva hia vari kyero qakyoma kyero tumuananro.

<sup>38</sup> Ntapihi kyero nrohiani vaisirara Kotiva mwitaama tiro:

Mwi vaisiva ni quara quataave timwa kyero  
ni qua rieqaro qati variqiro quananrove.

Mwi vaisiva ni aanraqaatairo tuqasaaviro  
qaqira kyero virera, hia nte mwianra

qamwata mwataaninrave, tura.

(*Habakuk 2:3-4*)

<sup>39</sup> Tire Kotira aanraqaa viqata hia mwiaqaatai tuqasaaqita raupirima quaraahuama varita. Tire Kotira quara quutaave timwa kyeta mwi quara nraahu riemwaqi quararo Kotiva tiri tivitaarihuama varita.

## 11

### *Tire Kotira quara quutaave timwa kyeta riemwaqi quana okyarara tura*

<sup>1</sup> Tire Kotira quara quutaave timwa kyeta riemwaqi quara okyarava mwataamama vahiro, Tire Kotira quara quutaave tiqata hia taara vu nraato tiraitita, Kotiva kyuqema timwa tarera hiari inraikyava quutaama qovarama quananrove timwa kyeta mwia vekeyama variananra. Mwaa entara mpo inraikya mpo inraikya hia vuqotai taqaura inraikyava vaihata tire Kotira quara quutaave tiqatama quutaaqama kyero ekyaa mwi inraikyava vaiho ti varunanra.

<sup>2</sup> Haaru vetato varu entara Kotira nraakyne qoravanto Kotira quara quutaave tiqata kepukyaqama kye variqi vurara tiro, Kotiva mwihuara qamwateqaro varura.

<sup>3</sup> Haaru Kotiva tuvaro mwia quavanto nyaamwuvata mwatavata utu kyero vatora mwi quarara tire tiqata, Qutaa Kotiva mwitaa hurave, timwa kyeqata varunanra. Mwiva mwi entara hia qio vaisivanto taqaani inraikyara vara kyero mwiaqotairo qio vaisivanto taqaani inraikyara utu kyero vatora.

### *Everira, Inokura, Noaanra, mwinramwuhuara tura*

<sup>4</sup> Haaru Everiva Kotira quara quutaave timwa kyero sipisipi nraati ru kyero Kotirani qia quara mwatovaro mwiva Kotira mwu inraikyava Keniva Kotira mwu inraikyaravata nraatara kyora. Everiva Kotira quara quutaave tuvaro Kotiva mwianra, E ntapihi kyera variara vaisiva variaro, timwa kyero Everiva mwu inraikyarara qamwata mwatoria. Everiva haaru qutu vuvaro mwiva Kotirara quutaave tu quara nraakyne qoravanto nai timwa mwi nai timwa mwimaqita vi variavarora tiro, mwia quavanto hia taiqaraitiro, qati nraahu vahiqiro vi variro.

<sup>5</sup> Haaru Inokuva Kotira quara quutaave timwa kyero Kotirara kepukyaqama kyero riemwaqi vuvara tiro, mwiva hia qutu vura. Mwiva hia qutu vura qati varura Kotiva nyaamwuni vita varovata hia vaisivanto mwia puaama kye vitora. Kotira mpukuqi qara ntumwa to vaisiva Inokurara mwitaama tiro: Inokuva mwatani kyuqema kyero variqiro vuvarora tiro, Kotiva mwia qamwata mwateqaro mwia qati nyaamwuni vitero vurave, tura.

<sup>6</sup> Vaisivanto hia Kotira quara quutaave tiraitiro variraro Kotiva hiama mwi vaisira qamwata mwataananro. Vaisivanto tiqaro, Qutaama Kotiva variho. Qutaama nte mwianra puaamaqina quariro mwiva ni kyuqema mataananrove, qiariva mwi vaisiva nraahuma Kotira nraaqani qio quananro.

<sup>7</sup> Kotiva Noaanranra tiqaro, Mpo inraikya mpo inraikya nraakiara qora inraikyavanto mpo enta qovara hiananrove, tuvaro Noaava hia mwi inraikyara taqaraitiro, Kotira quara quutaave timwa kyero nramanriqaa quani nraamwunra hoqa kyero nai nraakyne nraaqiararavata mwi nraamwunraqi kyuqema varurave. Noaava Kotira quara quutaave tuvata mwia hena nraakyne qora mwatani varuhua hia Kotira quara quutaave tuvaro mwia kyaara Kotiva mwihua ntuqutu taiqa kyero Noaanranra ntapihi kyero nrohi vari vaisivave tura.

### *Evarahaamunranra tura*

<sup>8</sup> Haaru Kotiva Evarahaamunra nraanrama kyero tiqaro, Sivira ena mwaata mwaini kyera mpo nani uro variraqe nraakiara mwi mwataro i mwianrinro ini vahiarive, tuvaro Evarahaamuva mwi mwataro hia taqaraitiro, Kotira quara quutaave quave timwa kyero nai mwaata qaqlira kyero vurama.

<sup>9</sup> Evarahaamuva Kotira quara quataave timwa kyero Kotiva nai mwia kyaama to mwataraqaa uro variqi viro mwiva mpo mwatanaava votima kyero variqaro mwiva hia mwaakyota variani nraamwunra hoqa taraitiro, seri nraamwu nraahu hoqa kyero mwipi mpoqi mpoqi variqiro vura. Mwitaa huvata mwia mwaaqau Aisaakivavata mwia nraisi Iaikopuvavata tiqata, Kotiva mwata mwaanra tu quava tiritanani vaiharo mwaa mwatara tiri kyaama taivama vaiho, timwa kyeqata mwi mwataraqaa seri nraamwuqi nraahu variqi vorama.

<sup>10</sup> Mwi entara Evarahaamuva seri nraamwuqi variqiro viqaro mwiva nyaamwuni vahiani mwatukyara Kotiva riemwa kyero mwaakyota variani nraamwunra hoqa tora mwia vekya varurama.

<sup>11</sup> Evarahaamunra nraatavanto Seraava kyontaqama viro nraaqiara mwataariva hia qioqa huvaro Seraava hia mwianra nronraqama kye riaraitiro, mwiva tiqaro, Kotiva nianra nraaqiara mwataananrove tiva mwiva quataa qua nraahu ti varivave, timwa kyero variro nraakiara Seraava quataa nraaqiara tuaqama viro nraaqiara mwata tora.

<sup>12</sup> Mwitaa huvaro Evarahaamuva nyaapaiqama viro qutuariva qaumaqa hu vaisira kuaiqiaqatairo mwia nraaqiara airintivanto qovarama vura. Mwiaqatai qovara hia nraaqiarahua qovora aahoqura votima kyeta airinti variara. Mwihua nramanri tokyasataa nruqa vahira votima kyeta airinti variara.

<sup>13</sup> Nte vaakya tu nraakye qorahua Kotira quara quataave timwa kyeta Kotiva nkyiari kyaama to inraikyara mpo inraikya mpo inraikya hia vararaitita, qutu vura. Mwihua quataa mwi inraikyava nraakiara qovara hiananrove timwa kyeta qamwateqata varura. Mwihua mwata mwaanra vutu kye tiqata, Qutaaqama kye tire mpo mwatanaavanto mwata mwaqaquaqua qamwateqata varuro, tura.

<sup>14</sup> Mwihua nkyiari mwaata tuananra puaama kye mwini viqatara tita, mwitaa tura.

<sup>15</sup> Mwihua haaru Evarahaamuva qaqlira kyero nru mwatara hia mwini nrumu ntanteta virara nraato turave. Mwihua mwini nrumu ntanteta virara nraato tutiri, qiomia mwihua mwini vutiri.

<sup>16</sup> Mwihua nritarero vahi mwatara mwianra mwutukya vahuvata mwia vekya varura. Mwihua Kotirara kepuqyaqama kyeta riemwaqi viqata nyaamwuni vahu mwatara mwia vekya varurara tiro, Kotiva mwihua mwata terama nyatero tiqaro, Nte hia kyauriraitina, nte mwihua mwanriqavanto variqana mwihuaqaa ntaqiqiyiqina virerave, tura.

<sup>17-18</sup> Evarahaamuva Kotiva timwa to quarara quataa quave timwa kyero nai mwaqqau ru kyero Kotira mwinrenra uti varura. Kotiva nai kyauqu nriqiqaa vatero Evarahaamunranra tiqaro, I mwaqqau Aisaakiraqatairo i nrutuvanto qati nraahu vahiqiro quan Grove, timwa kyero variro mpo enta Evarahaamunra mwataara hirero mwianra tiqaro, Ena mwaqqau ni ntuqutu mpiante, tuvaro Evarahaamuva Kotira qua riero nai mwaqqau ru kyarera hiro tiqaro, Kotiva nianra nai kyauqu nriqiqaa vateqaro timwa to quava quataa qua nraahuma vahiananrove.

<sup>19</sup> Nte ntenu maaqqau ru kyaariro Kotiva qiomia mwia qati vara sivuma kyaananrove, timwa kyero mwia Kotira ru kyero mwinrenra uti varuvaro Kotiva hia mwia ru kyaante tuvaro Evarahaamuva nai mwaqqau qutu vuraqitairo qati sivuvaro vitontema kyero vitora.

### *Aisaakira mpo, Iaikopura mpo, Iosepira mpo, mwinramwuhuara tura*

<sup>20</sup> Aisaakiva Kotiva timwa to quarara quataave tiqaro nyaapaiqama viro qutuari entava qaumaqa huvaro mwiva nai kyauqu Iaikopuraqaaavata Isoraqaaavata vatero kyuqema nyateqaro mwitanahuara tiqaro, Qutaama Kotiva nraakiara nkyitana mwitaa mwitaama kyero kyuqema nyataariva variho, tura.

<sup>21</sup> Iaikopuvavata Kotiva timwa to quarara quataa quave tiqaro nyaapaiqama viro qutuari entava qaumaqa huvaro nai kyauqu Iosepira mwaqqutanaqaa vatero

kyuqema nyatero mwitanahuara tiqaro, Qutaama Kotiva mwitaa mwitaama kyero nkyitana kyuqema nyataariva variho, timwa kyero nai kyauruqaa vuntuvi variqaro Kotira nrutu tuaaherora.

<sup>22</sup> Iosepivavata Kotiva timwa to quarara qutaa quave tiqaro nyaapaiqama viro nai qutuari entava qaumaqa huvaro Kotira qua mpo qovarama kyero tiqaro, Qutaama nraakiara Isareri nraakyne qora Isipiqi varita nraakiara nkyiari mwaatani nrumbu ntanteta vivarave. Mwi entara virera hita ni mwukyaari mwaa mwataraqitai pati kye varaqi uro tita mwatani quantaate, tura.

### *Mosesirara tura*

<sup>23</sup> Mosesira nrohua qohua Kotira qua riemwaqita vi varura. Mosesira nrohua qohua mwia mwata kyeta taqovaro nraaqiara kyuqeva varuvata mwitanahua Perova qoraisi nraaqiara mwata tera rukyaate tu quara nteqa kyeta hia mwianra aatu hiraitita, Kotirara qutaa mwiva tiri kyaahaqa hiariva variho timwa kyeta Mosesira taarampo torara uqetaqita vura.

<sup>24</sup> Mosesivavata Kotira qua riemwaqiro vi varura. Mwiva nronra tuemwa viro Kotira quara qutaa quave timwa kyero mwiva qaqaq tiro, Hia nianra Perora nraamwunravanto viritai vaisirave qilaterave.

<sup>25</sup> Nte Isipiqinaahuavata pataqia variqana qora kyaiqa utuqi vina qamwateqana variankyorave. Nte qaqlira kyena ntena nramwunaahua Kotira nraakyne qora kyapata kuaaqi variqana muaanra varaqina virerave, tura.

<sup>26</sup> Isipini mpo inraikya mpo inraikya kyuqe hu inraikyava nraahu vahuvaro Mosesiva hia mwianra nronraqama kyero riaraitiro, Kotiva mwia nronraqama kyero titora mwianra nronraqama kyero riemwaqiro viro tiqaro, Ntena nraakyne qora kyapata kuaaqi variarita Isipiqinaahua qiomaa ni uaqiamaqita vivaqe varianinrave, timwa kyero Kotiva nraakiara nyaamwuni mwia kyoqaa mwianinra mwianra riemwaqiro vura.

<sup>27</sup> Mosesiva kepukyaqama kyero Kotirara riemwaqiro viqarora tiro, mwiva nai nraakyne qora sita varero Perora raraqa taaninranra hia nronraqama kyero riaraitiro, Isipi kyero vura. Vaisivanto qutaa nai vuqo Kotira taqontema kyero Mosesiva qutaae tura mwiaqo Kotira taqamwaqi viqaro Isipi kyero vurama.

<sup>28</sup> Mosesiva kepukyaqama kyero Kotirara riemwaqi viqarora tiro, mwiva Kotiva tu quara riero nyaamwunyaava Isarerivanto vunyaa nraaqiara mwata tohua ekyaa mwihua hia ru taiqa kyaraitiro, vekyahu nyataarive tiro, sipisipi nraati ru kyero nrenro mwia nraanre qesa mpoqa mpoqa qutora.

### *Isareri nraakyne qora airivanto Kotira quara kepukyaqama kye riemwaqi vurara tura*

<sup>29</sup> Isarerivanto kepukyaqama kyeta Kotirara riemwaqi viqatara tita, mwihua aahara mwataqaa ntamwaqi vuntema kyeta nramanri *Nraanre Nramanrive* tura mwia qareta vurama. Mwihua qio qareta vuvata Isipivanto mwihua rirera mwihua sataqi vuhua mwihuavata nramanri nronra mwiaqaa Isarerivanto vuntema kyeta qare quare tuvaro nramanrivanto mwihua ntumwaqu kyora.

<sup>30</sup> Isarerivanto Kotirara kepukyaqama kye riemwaqi vurara tiro, Kotiva mwihua tiro, Nkye Ieriko mwia uro 7 entara vara ututu nrohi varivarso mwia mwatuqyara ori vasaamwunra ututaava ntavesau quarive, tuvata mwihua Kotira quara qutaa quave timwa kyeta mwitaamaqi vuvaro ori vasaamwunravanto ntavesau vura.

<sup>31</sup> Nraakyne mpovanto api nrohi varu nraakyeva Rehepiva Kotirara kepukyaqama kyero riemwaqiro viqarora tiro, mwiva nai nramwutaa Isareri vaisitana kyaahaqama nyatora. (Isareri vaisi mwitanahua uqeta kyeta uro Ieriko mwia apeqa hirerata nruvaro Rehepiva ni nramwunaahua mwia vaisitana puaama kye rukyevorave timwa kyero uqeta tovata mwia nraakiara Isarerivanto mwia mwatuqyara nraatara kyeta mwipi varuhua hia Kotira quara qutaae tuhua ruqi viqata mwia nraakyeva Isareri

vaisitana kyaahaqama kyorara rieqata mwi nraakyera qati kyora.) Mwi nraakyeva Kotirara qutaave turara tiro, Kotiva mwia kyaahaqama mwatovata Isarerivanto hia mwiavata rukyora.

<sup>32</sup> Kotirara kepukyaqama kye riemwaqi vu nraakye qorahua variavana nte mpoqiatave mwihuara timwaqina quaninra? Kitioninrave, Paraakirave, Samusoninrave, Iepitaarave, Ntevitirave, Samuerirave, nte hiama qio qara mwaaqi ekyaa mwihuara qiariva qioqa hiro.

<sup>33</sup> Mwihua Kotira quara qutaa quave tiqata mwianra kepukyaqama kyeta riemwaqi viqatara tita, ntaqiqata nronraqama varu mwatanaahua nraatara kyorave. Mwihua avuqavuma kye nrohi varuvarora tiro, Kotiva nai kyauqu nriqiqaa vateqaro timwa to quara riero mwihua nkyiari kyoqaa nyunra. Mwihua Kotirara kepukyaqama kye riemwaqi viqatara tita, mwihua mpo uhua variqata qaakyau vairi mwia nrutu raioni nro tita tovaro hia kutura.

<sup>34</sup> Mpo uhua Kotirara kepukyaqama kyeta riemwaqi vuvaro qiavanto nronraqama kyero iteqaro mwihua tatoqa kyarera huvata mwihua qia mwia qipa kyora. Mpo uhua Kotirara kepukyaqama kyeta riemwaqi vuvatara tita, mwihua nramwunaavanto mwihua rirera utuvata mwihua qio ntugema kyeqa aatu vivi hurave. Mwihua uqenro nraakye qorahua variqata mwiaqatai Kotirara kepukyaqama kyeta riemwaqi viqatara tita, mwihua kepukya nraakye qoraqama vita varurave. Mwihua Kotirara kepukyaqama kye riemwaqi vita ntaquqi viqata mpo mwatanaa mpo mwatanaahua ntaqu vaisihua nraatara kyora.

<sup>35</sup> Haaru Kotira nraakyenramwuvanto kepukyaqama kyeta Kotirara riemwaqita vuvarora tiro, Kotiva mwihua nraaqiaranramwu qutu vuhua sivuma kyero nyunra.

Haaru Kotira nraakye qoravanto Kotirara kepukyaqama kye riemwaqi vuvata mwihua nramwutaahua mwihua ntavaaqavu kyeta tiqata, Kotira mwoqa mwita mwia qaqlira kyaivaqe tire nkyi qati kyaarata variate. Nkye hia mwitaa hivaqe tire nkyi ntuqutuqi vita nkyi taiqa kyaananrave, tuvata mwihua hia nramwutaavanto tu quara riaraitita, mwihua nraakiara qutu vita mwiaqatai Kotiravata kyuqema kye variqi virara nraahu rieqata hia Kotira mwoqa mwita hia mwia qaqlira kyovata mwia kyaara nramwutaahua mwihua ntuqutuqi vita uro ru kyora.

<sup>36</sup> Kotira nraakye qora Kotirara kepukyaqama kye riemwaqi vuvata mwia kyaara mwihua mpo uhua raima nyateta mpo uhua kyaamwuqo ntuqutu nyatora. Mpo uhua rupa kyeta karavuqi uro kyora.

<sup>37</sup> Mpo uhua ori tuto kyeqa mwihua ntuqutuqi vita uro ntuqutu kyora. Mpo uhua so vara kyeta mwiaqo mwihua mwamwanta tavaaraqa teqa kyeqa kyora. Mpo uhua paipa viti mpuahaa vahuntaininraqo rakuraa kyeqata ru kyeqata kyora. Mpo uhua sataqi viqata uaqlama nyatovata hia kyuqe tuavaaqa utiraitita, sipisipi pahiqvata memenra pahiqvata tuavaaqa utu kye utu vareta uaqlama kye nrohiqata varura.

<sup>38</sup> Mwihua hia vaisivata varura qumina mwatasata nkyiariaraa variqita vurave. Mpo uhua qumina taaqiqaa varivaraa nrohurave. Mwihua ori ontamwuqive, ori mwata hakaraukaqive, vaitaqita nrohura. Qikye, mwi nraakye qorahua Kotirara kepukyaqama kyeta riemwaqi vi variqata kyuqe nraakye qora nraahu varuvata mwatani varuhua uaqla hu kyaiqara nraahu varaqi vi varuhua mwihua uaqlamaqita vurama.

<sup>39</sup> Mwi nraakye qorahua haaru Kotira quara qutaave tiqata Kotirara kepukyaqama kyeta riemwaqi vi varurara tiro, Kotiva mwihua kyuqema nyateqaro mwihuara kyuqe nraakye qorave tura. Kotiva mwitaa tiqaro mwihua qamwata nyatovatavata nai kyauqu nriqiqaa vateqaro nyinrenrave tu inraikyara hia varora.

<sup>40</sup> Haaru Kotiva tiriaravata rieqaro qua mpo vatero tiqaro, Hia haaru varu nraakye qorahua nraante kyuqema nyatarerave. Haaru varu nraakye qorahuaavata nraakiara

vari nraakye qorahuavata kuaaqi varivaqe nte mwinro mwaanro mwihua kyuqema nyataarita qio vari nraakye qorahua varivarave, tura.

## 12

### *Karaisiva qioqama kyero vari vaisivama variro*

<sup>1</sup> Qio haaru nraakye qora airivanto Kotira quara quataave tiqata kepukyaqama kye mwianra variqi vi varurave. Mwaa entara mwi nraakye qorahua airivanto tiri vara ututu variqata tiri taqe variahua nraantantamwa kye variarara tita, nrivafe mwihua suqaa variqata hia qoriri hiraitita, kyuqema kye Kotira aanraqaa viqata mpo inraikya vararerera hiantaantema kye hiantaara.

Mwihua suqaa variqata mpo inraikya mpo inraikyavanto tiri ntavaaqavu kyarera uti variani inraikyara qaqa kye uaqia hi kyaiqava tiri tuqara kyero tutaaninra ntavaqaa kye qaqa kyeeta hia qoriri hiraitita, kepukyaqama kye hiantamwaqi quara.

<sup>2</sup> Nrivafe hiante viqata Iesusira nraahu taqamwaqita quara. Mwiva nraante vuni viqaro Kotirara kepukyaqama kyero riemwaqiro vivara tiro, mwiva qiomma tirivata kyaahaqama timwa tairaqe tire mwia votima kyeta Kotirara kepukyaqama kyeta riemwaqi viqata uro taiqa kyaananra. Iesusiva kyatariqaa qutu virera hiro, Nianra raima mateta kyaaurira inraikya mpira nte hia mwianra nronraqama kyena riarerave, timwa kyero mwiva nraakiara qamwateqaro variani entarara riero tiriaravata rieqaro qutu vura. Mate mwaa entara mwiva nritarero Kotira kyauqu kyaatutanima variro.

<sup>3</sup> Karaivisa mwatanu varuvata uaqia hi kyaiqara uti varu vaisihua anomma kyeta mwianra ua vu nraato vateta qoririma mwatovaro varurave. Karaivisara ua nraato vateta qoririma mwatora nkye mwianra rieqata varivata nkyivata uaqiamma nyatarera utivata hia pupohairata qoriri hirata variqi viraitita, kepukyaqama kyetama variqi quata.

<sup>4</sup> Nkye variavata uaqia hi kyaiqara utuahua nkyivata ntaquqi vi hiama nkyi ru kyaavata nkye qutu quavo.

<sup>5</sup> Mpo qua qara ntumwa tora nkye taunru kyevora. Mwi quaraqi Kotiva nkyiara ni naamwunra maaque tura. Mwitaama tiro:

Ni maaquo, ina kyaiqa kyaara Kotiva i avuqavu hiqaro  
i mpo qarama mwatairara  
e mwianra nronraqama kyera riaante.  
I inronra hirera hia e kyaru ntuanne.

<sup>6</sup> Kotiva nai mwutukya nti vaisiva qaiqaa  
uaqia hi aanranraqaa quankyo tiro,  
mwiva nai nraaqiara ntuqutuqiro viro  
mwia ntapihiqiro virave.

Mwiva ni maaque qiani vaisira  
kyamwu mwiqiro quananrove, tura.

(Sindaun 3:11-12)

<sup>7</sup> Kotiva nkyi qati ntuqutuqiro virera, nkye kepukyaqama kye variqata Kotiva ni nai mwaaquma ntuqutiho qiata. Ta nraaqiarara mwia qova mwia avuqavu hiqaro hia ntuqutirave? Mwia qova nai mwaquara avuqavuma kyero nrohiarive tiro, mwia qati nraahu ntuqutuqiro virave.

<sup>8</sup> Kotivavata nai nraaqiara mwihua ntuqutuqiro vi varirave. Mwiva hia nkyivata ntuqutirera, nkye hia mwia nraaqiara tuananravanto variraitita, nkye kyapa nraatima varita.

<sup>9</sup> Mwata mwaini tiri tiqohuamwanra tiriara avuqavuma kye nrohiate tiqata tiri ntuqutuqi quavata tire hia mwihua kyaru ntumwa nyataraitita, tire mwihuara vaisi kyuqehuave nraahu tunanra. Mwia votima kyeta tire tiri tiqova Kotiva nyaamwuni varira mwia qua mpoqiyavata riemwaqi viqata ekya enta qati variqi quara.

<sup>10</sup> Tiri tiqohua mwatani variahua quaahaqa variqata mwihua nkyiari riemwa kyeqata mwi aanranra nrohiate timwa kyeqata tiri ntuquti variara. Kotiva tiriara mwihua nivata variqata hia uaqia hi kyaiqara utiraitita, kyuqe kyaiqa nraahu varaqi quate tiro, tiri kyuqema timwa teqaro tiri ntuqutuqiro vi varira.

<sup>11</sup> Mwia qova nai nraaqiarara avuqavuma kyero nrohiarive tiro, mwia ntuqutuqiro vi variharo mwi nraaqiarava tiqaro, Qikye ni mamanta mpinqama kyero niqa viho, timwaqiro viro nraakiara mwiva nronra tuero vaisi kyuqevama variananro.

<sup>12</sup> Kotiva nkyiara avuqavuma kye variqi quate tiro, nkyi ntuquti varihatara tita, nkye hia qoriri hiraitita, nkyi kyauquve, nkyi kyuquve, ugenraaqenra hianinra tuaahera kye kepukyaqama kye kyuqe hi aanranraqaa variqi quata.

<sup>13</sup> Nkye ntapihi kye Kotira aanraqaa quata. Nkye mwitaa hivaro hia kyuqe hiari kyuquva kyuqema virata kepukyaqama kye vivara.

### *Uaqia hi kyaiqara utuaro tita rauriqata variate tura*

<sup>14</sup> Nkye variqi viqata hia antua qua tiraitita, ekyaa nraakye qora mwutukya qihakyama nyate kyaiqara varaqita quata. Nkye hia uaqia hi kyaiqara utiraitita, Kotira kyaiqa nraahu varaqita viqata variata. Hia Kotira kyaiqa vararaitiro variqiro quariva, mwi vaisiva hiama qio Kotira taqaananro.

<sup>15</sup> Kotiva nkyi kyuqema nyataihata nkye variarara tiro, haunri mpovanto nkyigitairo Kotira qaqira kyero mwia nununrama mwataankyora. Mwitaa hirara rauriqata variata. Kyanaa mwanre uka viravata uta taira nraavar uka vintema kyero mpore unra quavanto nkyi vara uaqama kyaankyo tita, nkye rauriqata variata.

<sup>16</sup> Api qaraqi nrohi okyarava nkyiqi vahiankyo tita rauriqata variata. Nkyigitairo mpovanto mwata mwaaqaanaa inraikyara nronraqama kyero riero Kotirara hia riaankyo tita, rauriqata variata. Tiri haivaqava Isova mwitaa hi varu vaisiva varurama. Mwia nraante vuni mwatato nraaqiarava variro mpo enta qoraqama kye kyara nraataa huvaro nai qatara tiqaro, Kyara mpiraqe nte iara vuni mwatatai nraaqiarava variho, iara ni kova nianra qamwatero kyuqema mataani quara ema varenanrave qiankye, timwa kyero nai qata kyara nronra.

<sup>17</sup> Nramwa kyero variro mpo enta mwiva qaqao tiro, Nte hia mwitaa qitaaarave, timwa kyero nai qorara tiqaro, Ni nraante vuni mwatataaravave. E qutu virera hira kyauqu niqaa vateqara ni kyuqema matena quara tiraqena ntevata ni nraaqiaravantavatama kye kyuqema variqita quare, tuvaro mwia qova hia kyauqu mwiaqaa vateqaro mwia kyuqema mwatorave. Mwita huvaro Isova ntateqaro, Kyai haaru nai qatara tu quara nruka kyena vara kyaankye timwa kyerovata taqovaro hia qioqa hurave. (*Okyara 27:30-40*)

### *Haaruua quaravata qaraakya quaravata tura*

<sup>18</sup> Nkye Kotiva qaraakya qua vataira riaahua variarave. Hia nkye Kotiva haaruua qua vataira riaahuavauma. Haaru Kotiva qua timwa kyero qovarama kyero nyinrenro utuvata nkyi haivaqahua Sainai taaqi mwemwa tunrenrasata uro ntuvaantuuma vita variqata taqovaro qivanto nronraqama kyero itamwaqiro vuvaro kyokira ru tovaro nrotaara aaquakyaavanto mpo uti varura.

<sup>19-20</sup> Mwitaa hi varuvata nraakye qoravanto kuaiqiaqa vita variqata riovoro ntomavantoo nronraqama kyero nruqua tuvaro mwiaqatairo quavanto nyaamwuqitairo mwitaama tiro: Vaisivantove quaravantove hiavata taaqi mwaaqaa nriate. Mpovanto mwaaqaa nrianinra mwia oriqa ntuqutu kyaate, tiro. Quavanto mwitaa tuvata nraakye qoravanto nraatuqa tovata hia qaiqaavata qua qiante tura.

<sup>21</sup> Mosesivavata ekyaa mwi inraikyara taqero tiqaro, Qikye, nivata mpinqama kyero kyuqu kyauqu ntihana aatu hiqana varuqo, tura.

<sup>22</sup> Nkyi haivaqahua ekyaa mwi inraikyara taqeqlata haaruua qua riorave. Nkye Kotira qaraakya qua riaahuara tita, nkye hiama mwi inraikyara taqevara. Nkye Kotira qaraakya qua riaahuara tita, nkye hia vuqotai taqe varia taaqira voti hiraqaa uro nteta. Taaqi mwia nrutu Saionive. (Mwi taaqira vutu kye tirera nyaamwuni Kotiva varinanive tina.)

Nkye Kotira mwatukya Ierusaremi nyaamwunianra uro nteqa vi variara. Mwi mwatukyaraqima Kotiva qati variqi vi variva variro. Nyaamwunyaahua airivanto variavata qaiqaa kyaatavantovata airivanto ntuvantuama vita variqata Kotira qamwata mwate variara, nkye mwinianra uro nte vi variara.

<sup>23</sup> Kotiva vuni nraakye qora mpo hiahua nai nraaqiaraqama taihua nyaamwuni variananianra nkye vi variara. Mwi nraakye qorahua nyutu nyaamwuni qara ntumwa taiharoma vahiro. Kotiva ekyaa nraakye qora qua avuqavu hiariva varira nkye mwiva hinani uro nteqa vi variara. Mwatani ntapihi kye nrohi varia nraakye qorahua mwihua mwanraquravanto varianani nkye mwinianra vi variara. Kotiva mwihua kyaahaqama nyataihata mwihua qio varia nraakye qorahua variara.

<sup>24</sup> Iesusiva Kotiva qaraakya qua timwa taira qovarama kyai vaisiva varira nkye mwiva variananianra vi variara. Iesusira nraanre rauruvaro tiriara rieqaro qutu vurara tiro, Kotira qaraakya quavanto kepukyaqama viro vahiro. Keniva Everira ru kyovaro Everira nraanrevanto rauriqaro naivata ru kyera vuntu taante tura. Iesusira nraanre rauriqaro hia mwia qitataqaa nkyiarivata rukyera vuntu taante tiraitiro, nraakye qora uaqia hi kyaiqara qua nruka nyataante tirara tiro, Iesusira nraanrevanto Everira nraanre nraatara kyora.

<sup>25</sup> Mwi quara rieta rauriqata variata. Mwaa entara Kotira qaraakya qua nkyi timwa nyi vari vaisira qoririma mwatevora. Haaru Mosesiva qumina vaisivanto variqaro Kotira haaruua qua nraakye qora timwa nyuvata mwihua hia mwi quara riovoro mwia kyaara Kotiva mwihua ruvata mwihua ntugema kye aatu vi aanrava hia vahurama. Mwaa entara Iesusiva nyaamwunyaahua vaisivanto Kotira qua tiri timwa timwi varihata tire mwia qua hia riaarera, Kotiva qoraqama kyero tiri ntugemtu timwa tairaqe tire aatu quara aanrava hiama vahiananro.

<sup>26</sup> Kotiva nai haaruua qua qovarama kyero timwa nyu entara qua tuvaro mwatavanto qakyaa hurama. Mwaa entara Kotiva nai kyauqu nriqiqaa vatero tiqaro, Nraakiara nte qaiqaa qiariro hiama mwatavantovata nraahu qakyaa hiananrove. Mwi entara nyaamwuvantovatama qakyaa hiananrove, tura.

<sup>27</sup> Kotiva qaiqaave tu quara okyaravanto mwataamama vahiro: Kotiva haaru tuvaro nyaamwuvantovata mwatavantovata qovarama vura. Nraakiara mwiva qaiqaa tiraro mwatavata nyaamwuvata taiqa quananro. Taiqa viraro Kotira mwatukya hia qio qakyaa hiarivama qati vahiananro.

<sup>28-29</sup> Tire hia qakya hiani mwatukyaraqi quarahuara tita, nrivaqe Kotirara kyuqeve tiqata variara. Kotiva tiri mwaniqavanto qiaavanto tatoqa kyaintema kyero vaisi rirara tita, nrivaqe mwia nraatu aatu hiqata kyuqema kyeqa mwia nrutu tuaahereqa variara. Mwiva nronravanto varirara tita, nrivaqe mwianra nronraqama kye riemwaqi quara.

## 13

### *Mwataama kye nrohivaro Kotira kyakya hiarive tura*

<sup>1</sup> Nkye Iesusira nraaqiaraqama vi variqata nkye qata vakyaan nrunra nrakyaan variqata nanrianra nanrianra mwutukya vahirata variqi quata.

<sup>2</sup> Mponasairo nriani vaisira kyuqema kyeta vitaqi nraamwuqi kye kyara mwivaro nrenro quari. Mwi okyarara hia qaqla kyaraitita, kyuqema kye rieqata variata. Haaru nyaamwunyaahua mponramwu mwatani qovarama vita varuvata mpo uhua

mwinramwuhuara qumina vaisima variavo tiqata mwihua sitaqita vateta kyara nyunra. Mwi quara rieqatama kyuqema kye mponasai nrihua kyaahaqa hiata.

<sup>3</sup> Nkye nkyeta hena nraakye qora karavuqama taahua taunru kyevora. Nkyevata karavuqi variqatara votima kyeta mwihua po tiqata kyaahaqama nyataata. Nkyi uaqiamma nyataavata variarara votima kyeta nkyi hena nraakye qora uaqiamma nyataavata variahua po timwa nyataata.

<sup>4</sup> Nraata vaati varaa okyarava kyuqe okyara vahoma qiata. Vaativanto nraatara rieqaro variraro nraatavanto vaatiara rieqaro variari. Api qaraqita nrohihuave, mphua nraata vaativata api nrohihuave, varivaro Kotiva mwihuaqaa qua vataananro.

<sup>5</sup> Nkye variqata hia munima vararera nraahu nronraqama kye riemwaqita quata. Nataama inraikya vatera mwianra qioma vatauro qiata. Kotiva tiriara mwitaama tiro, Nte nkyivata variqina quaninrave. Nte hia nkyi qaqlira kyaaninrave, tura.

<sup>6</sup> Kotiva mwitaa turara tita, nrivaqe hia aatu hiraitita, mwutukya qihakyama kye vahiraqe Kotirara mwataama qiara:

Kotiva ni kyaahaqama mate varihananra tina,  
nte hia vaisivanto uaqiamma materara  
aatu hirerave.

(Ihi 118:6-7)

<sup>7</sup> Haaru nkyi vunyaa vaisi mponramwuvanto Kotira qua nkyi timwa nyunra nkye mwi quara taunru kyevora. Mwihua Kotira quara qutaa quave timwa kyeta kepukyaqama kye Kotirara riemwaqi vita qutu vurara rieqatama nkyevata mwihua hunte hiata.

<sup>8</sup> Iesusiva haaru kuaa qarama kyero varuva, matevata kuaa qarama kyero variva, qakyovata kuaa qarama kyero nraahuma variananro.

<sup>9</sup> Nkye ntapihi kye vahi aanranraqaa viqata hia nraahumwa mpo qua mpo qua riarerata mpo aanraqaa quata. Nkye variqata kyai tire mwi kyarara nreta mwi kyarara aurama teqata kyuqema kye variqi quare tivora. Kotivama nkyi mwanraqura kyuqema nyatairata variqi vivara. Kyai mwi kyarara nre mwi kyarara hia nraanre ti vari okyarava hiama qio vaisi kyaahaqa hiraro aanra kyuqeraqaa quanano.

<sup>10</sup> Kotira nraamwuqi kyaiqa vare variahua mwihua mpo taintaqaa variqata Kotira kyaiqa vare variara. Tire mpo taintaqaa variqata Kotira kyaiqa vare varunana. Tiri tainta vahirero Karaisira ruto kyatarivama vahiro. Mwitaa hirara tita, mwihuaavata tirevata hiama qio kuaaqi variananra.

<sup>11</sup> Rivaira okyaraqinaava vunyaa vaisivanto Kotiva nraakye qora uaqia hi kyaiqara qua nruka nyataarive tiro, quara rukyero mwia nraanre Kotira nraamwuqi turuarani uro ntukikiata kyaihata quara nronra mwia varaqita uro mwatukya mwaqqani kyeta qia quara te variarave.

<sup>12</sup> Iesusiva Kotiva nraakye qora uaqia hi kyaiqara utira nruka nyataarive tiro, mwivavata uro mwatukya mwaqqani qutu viro nai nraanreqotairo nraakye qora mwutukya su nyaato hiqama nyatora.

<sup>13</sup> Mwiva mwatukya mwaqqani uro qutu vurara tita, nrivaqe tirevata Kotira haaruua qua okyara qaqlira kyeta uro mwatukya mwaqqani quarata mwia kyaurira inraikya mwuntema kyeta tirivata kyaurira inraikya vara timwivaqe mwi inraikyara varaqita quara.

<sup>14</sup> Hiama mwata mwaqqani uro qutu vurara tita, nrivaqe tirevata Kotira haaruua qua okyara qaqlira kyeta uro mwatukya mwaqqani quarata mwia kyaurira inraikya mwuntema kyeta tirivata kyaurira inraikya vara timwivaqe mwi inraikyara varaqita quara.

<sup>15</sup> Karaisiva tiriara rieqaro qutu vurara tita, nrivaqe hia quara vahiaasau Kotira rukye mwinraitita, Karaisira kyaiqara rieqata Kotira nrutu tuaaheraqi quara. Nrivaqe tire Karaisira nraaqiarama varuro timwaqi quara.

<sup>16</sup> Mwitaa maqqi viqata nkye kyuqe kyaiqa varaqi viqata nai kyaahaqa hi nai kyaahaqa hiqata variata. Mwitaa hi kyaiqara mwianra Kotira kyakya hirama.

<sup>17</sup> Nkyiqa ntaqikyi vari vaisihua qua kyuqema kye riemwaqita quata. Nkye mwitaa hivata mwihua hiama qoririma kyeqata nkyiqa ntaqikyiqita vivara. Nraakiara mwihua Kotira vuqaa uro variqata nkyiqa ntaqikyirara timwa mwivara. Nkye mwihua qua riemwaqi vivera, mwihua qamwateqata nkyiqa ntaqikyi kyaiqara varaqi vivara. Nkye mwihua qua hia riemwaqi vivera, mwihua mwutukya uaquia hianinraqitai nkyiqa ntaqikyiva hiama nkyi kyaahaqa hiananro.

<sup>18</sup> Tiriara rieqata Kotirara aakyara ntaata. Tire teta tivu nraato vikyokyaqi vahi inraikyara ntapihi kyeta tiqata, Tiri kyaiqvanto kyuqe kyaiqama vaiho, tunanra. Tire ekyaa inraikyaqi ntapihi kyeta kyaiqa varaqita virera.

<sup>19</sup> Mwi quara rieqanama nte nkyiara tiqana, Nkye Kotirara aakyara tivaro mwiva qamwanrama ni titairaqe nte nkye hinani quankye, tuqo.

<sup>20-21</sup> Kotira qaraakya quavanto ekyaa enta qati nraahu vahiqiro quarive tiro, Iesusiva tiri nai sipisipiqa ntaqikyiva vunyaava qutu vuvaro mwia nraanrevanto mwi quara kepukyaqama kyovaro Kotiva mwia qati vara sivuma kyorara tiro, Iesusiva nronraqama viro nkye Kotira kyakya hira vataqi quate tiro, mpo inraikya mpo inraikya kyuqe inraikya nkyi nyinra. Karaisiva nkyi kepukyaqama nyatairata nkye Kotira mwutukya vahiari nraakye qorahua variata. Nrivaqe Karaisira nrutu ekyaa enta tuaaheraqi quara. Qutaave.

### *Ekyara qua tura*

<sup>22</sup> Nte nkyi mwutukya qihaakyama nyatarera mwaa quara turama. Nte nkyiara po tiqana mwaa quara riemwaqita quate tuqo. Nte mwaa quara qara ntqana hia mpuahaa qua qara ntumwa taurave.

<sup>23</sup> Nte mwakyaakya mpo nkyi timwa nyianrita riaata. Tiri tiqata vakya Timotiva karavuqitai taiqeroma. Mwiva qamwanrama mwaini nrinrenra, nte mwikyantirima uro nkyi taqaaninra.

<sup>24</sup> Nte nkyiqa ntaqikyi varia vaisihua qua mwantaura timwa nyiata. Ekyaa Kotira nraakye qoravata qua mwantaura timwa nyiata. Nkyi qata vakya Itarinyaahua nkyi qua mwantaavo.

<sup>25</sup> Kotiva nkyi ekyaa mwihua kyuqemaqi virata variqi quate, tuqo.

## IEMISI Iemisiva qara vara kyora

Iesusira ru kyovaro qati siviro nyaamwuni uro varuvaro 10 ihive 15 ihive nritarovaro Iemisiva mwaa quara qara ntumwa tora. Iemisiva Iesusira qatavanto variqaro Iesusira qua rie varu nraakye qorahua Ierusaremini varuhuaqaa ntaqikyi varura. (Kyaiqa Varora 12:17, 15:13)

Ierusaremisaita mpo nani mpo nani kyatita uro varu nraakye qorahua aanra kyuqeraqaa kepukyaqama kye variqita quate tiro, Iemisiva mwaa quara qara ntumwa tora.

Iesusiva sita vato vaisihua 12 nramwuqitairo mpo vaisivanto mwia nrutu Iemisiva mwia qamwava varura. Nkye mwi vaisirara kuaa vaisi mwivave tivora.

<sup>1</sup> Nte Iemisiva. Kotivavata, tiri vunyaa vaisi Iesusi Karaisivavata, variavana nte mwitanahua kyaiqa vaisima varina. Isarerivanto 12 okyara kuaa naaquntaqaanaahuaqitaita Kotira nraaqiaraqama vita nkye mpo nani mpo nani uro variahua nte nkyi qua mwantauquo.

<sup>2-3</sup> Ni kata pakyaa tuaavo, nkyiara uaquia hi aanranraqa quate tiro, mpo kyaiqa mpo kyaiqvavanto nkyi mwataara hirera, hia nkyi mwutukyavanto uaquia hirata variate. Nkye mwi entara tire qamwateqata nraahu varirerave qiata. Nkye Iesusira qua riemwaqita viqatama uaquia hi kyaiqara nraatara kyeta tire kepukyua vaisive, kepukyua nrahesive, qiata.

<sup>4</sup> Nkye mwitaamaqi viqata mpo enta mpo enta nkyi mwataara hiani inraikyara nraataraqi viqata mwiaqataita nkye kepukyaqama vita hia Kotira okyara, mpo okyara mpo okyarara aara ntaraitita, nkye qioqama vita varivara.

<sup>5</sup> Kotiva hia kepukyaqama kyeqaro tute variva, mwiva nraakye qorara po kye timwa nyateqaro mwiva qihakyama kyeqaro nyi varirara tiro, nkyiqitairo vaisi mpovanto kyuqe vu nraato hia vahiraro mwiva kyuqe vu nraatora aara ntairera, mwi vaisiva Kotirara aakyara ntairaro Kotira qiomia mwia kyuqe vu nraato mwiananro.

<sup>6</sup> Haunri nkye Kotirara aakyara nteqata mwiva tiri kyaahaqa hiananrove, hiave tiri kyaahaqa hiananrove, tivora. Kotiva qutaaqama kyero tiri kyaahaqa hiananrove tiqatama Kotirara aakyara ntaata. Kotirara taara vu nraato ti variva, mwi vaisiva nanra inraikya votima kyerove variro? Mwi vaisiva nramanriqaa kurupupora/nramanri taara toqavanto tiqaro ventaqiro viro nrinro hintema kyero varira.

<sup>7</sup> Haunri mwitaa hiari vaisiva tiqaro, Kotirara mwiva ni kyaahaqa hiananrove, qiankyora.

<sup>8</sup> Mwi vaisiva mwi aanranraqaa quataara vaiharo mwiva mpo aanraqaa viqa taqero qaqlira kyero qaiqaa mpo aanraqaa viqa taqero mwiavata qaqlira kye vari vaisivama variro.

### *Vehi vaisiaravata airi inraikya vatai vaisiraravata tura*

<sup>9</sup> Tiri tiqata vakya mpoavanto vehi vaisi variraro Kotiva mwia nronraqama kyairera, mwiva qamwataari.

<sup>10</sup> Tiri tiqata vakya mpoavanto airi inraikya vataariva mwia vu nraato ntapihiraro mwiva tiqaro, Nte vatau inraikyava qumina inraikyave. Nte vehi vaisi nraahuma varuquo, tirera, qamwataari.

Airi inraikya vatehua maunra pairavanto tapupu hiro taiqa vintema kye taiqa vivarave.

<sup>11</sup> Maunra paira kyugema kyero riemwa taiharo huari nronra iteqaro aaharama kyaiharo tapupu hiro tumu ntiharo mwiaqatairo haa hiro mpoqaraa hiva mwivavata

taiqa vira. Mwia votima kyero airi inraikya vataari vaisiva nai kyaiqara nraahu riemwaqiro quaninra mwiqitairo qamwanramama qutu quananro.

*Uaqia hi kyaiqava vaisi mwataara hianinranra tura*

<sup>12</sup> Vaisivanto Kotira aanraqaa viqaro taqairaro mwataara hiari inraikyava nrinranro hia pupohairaro kepukyaqama kyero nraatara kyero variqi virera, Kotiva mwia kyuqema mwataananro. Kotiva mwianra tiqaro, E mwia kyoqaa vararerera ekyaa enta qati variqira vinanrave, qiananro. Kotiva nai kyauqu nriqiqaa vatero tiqaro, Nianra mwutukya vahiari nraakye qorahua ekyaa enta qati variqita vivarave, tiro, tura.

<sup>13</sup> Uaqia hi kyaiqava vaisi mpo mwataara hirera, haunri mwi vaisiva tiqaro, Kotiva ni mwataara iho, qiariva. Uaqia hi kyaiqava hiama qio Kotira mwataara hiraro Kotivavata hiama qio vaisi mpore uaqia hi kyaiqara utuarive tiro, mwia mwataara hiananro.

<sup>14</sup> Mwataama kyero vaisivanto apiqama kyeqaro uaqia hi kyaiqara uti varira. Vaisivanto nai vu nraato tiraqitairo uaqia hi kyaiqara utuaninranra riemwa kyero mwi kyaiqarara nraahu riemwaqiro viharo mwi quava mwia tuqara kye tutero

<sup>15</sup> mwi kyaiqara utuante tiharo vaisivanto uaqia hi kyaiqara uti varira. Mwiva uaqia hi kyaiqara utuqiro viro mwia kyaara uro qutu quani inraikyara varero qutu vira.

<sup>16-17</sup> Ni kata pakyaa tuaavo, Kotiva hiama vaisiara uaqia hi kyaiqara utuarive tiro, mwia mwataara hiananro. Mpovanto Kotiva mwitaama kyero mwataara hiananrove tirata nkye mwia unra quara qutaa quave tivora. Qati nyi varia inraikyavave, ekyaa kyuqe inraikyavantove, Kotiva hinasaqo nraahu tumi varira. Kotiva ekyaa nyaamwuni itero ntuvaahe vari inraikyara utu taiva, mwiva kyuqe inraikyara tiri timwi varivama variro. Mwiva kuaa kyaiqa nraahu varaqiro vi varivama variro. Nyaamwuni itamwaqiro vi vari inraikyava itero qiperomaoqiro vi variharo Kotiva nraahuma qati itamwaqiro vi varivama variro.

<sup>18</sup> Kotiva nai kyakya hiraqa nai qutaa quaqo tiri utu kyero vataihata varunanra. Mwitaa ihata ekyaa mwiva utu kye vatai inraikyaraqitai tire vuniquama kye varuruahuama varita.

*Nkye Kotira qua qumina riemwaqita viqata mwia kyaiqavata hia varevorave tura*

<sup>19</sup> Po, ni kata pakyaa tuaavo, nkye mwaa quara riaata. Nkye qamwanrama kyeta mpore qua rieta qakyoma kyeta mwia qua hiniqa hiata. Mpore qua riaivarao hia qamwanrama kyero raraqa tairata inronra hiata.

<sup>20</sup> Vaisivanto raraqa taaninraqaatairo hiama Kotira kyaiqa kyuqe okyaravanto qovara hiananro.

<sup>21</sup> Mwi quara rieqatama nkye api nrohi okyararave, ekyaa qora kyaiqave, qaqira kyaata. Nkye Kotira qua riarerata uti variqata nkyeta nyutu vara mwatumwi mwataniqama kyeta Kotiva nkyi su nyaatoqi vataani quara riemwaqita vivaro Kotiva nkyi huvantu nyataari.

<sup>22</sup> Nkye hia Kotira qua quminaqama kye riemwaqita quata. Nkye mwitaa hiqata nkyeta unrama utita. Nkye mwi quara rieqata mwi quava tintema kye nrohi variqata kyaiqa varaata.

<sup>23</sup> Vaisivanto Kotira qua riero hia mwia kyaiqa vararaitiro qumina variva, mwi vaisiva vaisi mpovanto nai viri kyinumiqi taqai vaisira votima kyeroma variro.

<sup>24</sup> Mwi vaisiva kyinumiqi nai viri taqero nte mwataama varuvave timwa kyero vututo viro uro nai viri taqairara taunru kyairave.

<sup>25</sup> Kotiva kepukya qua vataiva, mwi quava tiri huvantu kye varira. Vaisivanto mwi quara ntapihi kyero riemwaqiro viqaro hia qaqira kyaraitiro, mwi quarara nraahu riemwaqiro quariva, mwi vaisiva mwitaamaqiro viraro Kotiva mwia qamwata mwataananro.

<sup>26</sup> Vaisi mpovanto nte Kotira qua riemwaqina vi varu vaisivama varuqo timwa kyeqarovata hia nai nroqa kyuqema ntaqikyi variva, mwiva nte Kotira qua rie varuva varuqo ti quava, qumina qua nraahu vaiharo mwi vaisiva naima unra utu mwate variro.

<sup>27</sup> Mwataama kyero vaisivanto Kotira tiri tiqora mwia aanraqaa nrohiqaro ntapihi kyero mwia nrutu tuaaheraananro. Mwi vaisiva uro nrainranra nraaqiaravata, tetoqa nraakye muaanra vare varihuavata, uro kyaahaqa hiari vaisivama variananro. Mwiva mwitaamaqiro viqaro nte Kotira qua nteqa kyena qora kyaiqa varaankyorave tiqaro ntapihi kyero nrohi variari vaisivama variananro. Mwitaa hiani vaisirara Kotiva tiqaro, Qutaaqama kyero mwi vaisiva ni aanraqaa nrohi vari vaisivama variho, qiananro.

## 2

### *Ekyahua kuua qarama nyataate tura*

<sup>1</sup> Ni kata pakyaa tuaavo, Iesusi Karaisira mpo mwatanaa mpo mwatanaahua vara kyeta puhaqama taa vaisiva varihata nkye mwia qua riemwaqita viqata nkye mpo vaisi nrutuara rieqata mwi vaisira nraahu qamwata mwateta mpo vaisi hia qamwata mwatevorave.

<sup>2</sup> Nkye taqaivar nkye ntuvantua hiraqi mpovanto nai kyauquqi vataani inraikyara nronra munima kyero vara taaninra utu tero kyuqe tuavaaqa utu taariva nrinranro mpovanto vehi vaisivanto mwia tuavaaqa uaqia hiro nrahitu quaninravata nrinrata

<sup>3</sup> nkye kyuqe tuavaaqa ututaaninranra nraahu tiqata, Tainta kyuqera mwaaqaa mwatakyaa quante, mwianra mwitaa timwa kyeta vehi vaisiara, Mwini qati sivira variante. Mwini qati mwatasata mwatakyaa vira variante, tivora.

<sup>4</sup> Nkye mwitaa hivera, nkye apiqama kyeta nai tukya hi nai tukya hi varivara. Nkye ko rie vari vaisira votima kyeta mwi vaisirara uaqia hi vaisivave, mwi vaisirara kyuqe hi vaisivave, tita. Mwitaa hiqata nkye uaqia hi okyarara nraahu rieqatama mwitaa hivara.

<sup>5</sup> Ni kata pakyaa tuaavo, nte qianinra riaata. Hia mpo inraikyavata vataa nraakye gorahua variavata mwatani variahua mwihuara nkye vehi nraakye qorave ti varia nraakye gorahua, mwihuara Kotiva qamwateqaro nyaanrama kyero site varira. Mwihua Iesusirara kepukyaqama kyeta riemwaqita vivaro Kotiva mwihua nronraqama kyairata mwihua Kotira mwutukya taqevvara. Kotiva nai kyauqu nriqiqaa vatero tiqaro, Nianra mwutukya vahiali nraakye gorahua ni mwutukya varevarave, tura.

<sup>6</sup> Vehi nraakye qora mwitaa hiahua variavata nkye mwihua nyutu vara mwataniqa hi variavo. Tahuave nkyi airi muaanra nyita nkyi ntanrau vareqata ko riaahua suqaa vi variavo? Mwia airi inraikya vataahua, mwihuave.

<sup>7</sup> Nkye Iesusira nraaqiara variavata airi inraikya vataahua variqata mwihuama Iesusira nrutuara uaqia hi nruturave ti varita.

<sup>8</sup> Kotiva vunyaava mwaa quara vataiva mwitaama tiro:

Inanra i mwutukya vahintema kyero

mporaravata i mwutukya vahiarive, tura. (Wkp 2:8)

Nkye mwitaamaqita vivera, nkye ntapihi kye vahi kyaiqarama varevara.

<sup>9</sup> Nkye hini vaisiara nraahu kyuqe vaisive tita, hini vaisiara uaqia hia vaisihuave tivera, nkye qua raaquta kyeta uaqia hivaro Kotiva nkyiara nkye ni qua nteqa kyaavoma qiananro.

<sup>10</sup> Vaisivanto Kotira qua ekyaa hini qua riemwaqiro viqarovata kuaiqia nteqa kyairera, Kotiva mwi vaisirara tiqaro, E ni qua ekyaa mwi quarama nteqa kyaaroma, qiananro.

<sup>11</sup> Kotiva tiqaro, Hia mpore nraata vaatiara nrohiante, tira. Mwi quara tiva, kuua mwiva nraahu mpo quavata tiqaro, Hia mpore ru kyaante, tira. Nkye hia mpore

nraatave, mpora vaativata nrohiraitita uro vaisi ru kyaivera, nkye Kotira qua nteqama kyevara.

<sup>12</sup> Iesusiva nkyi huvantu kyaihata nkye Jesusira qua riaahua variara. Nkye mwia qua nraahu rieqatama kyuqe kyaiqa nraahu vare varivaro Kotiva hia nkyiqaa qua vataari.

<sup>13</sup> Nkye mwaa entara hia mporara po tita kyuqema mwataivera, nraakiara Kotiva ko tiqaroma hiama nkyitaravata po timwa nyataananro. Nkye mpohuara po tita kyuqema nyataivera, nkye qioma ko nraatara kyevara.

*Iesusira qua riauvave timwa kyera haunri hia mwi quara vataqira viravaarave tura*

<sup>14</sup> Ni kata pakyaa tuaavo, nkye taqaivaro vaisi mpovanto tiqaro, Nte Jesusirara kepukyaqama kyena riemwaqina vuvave, tiqarovata hia kyuqe kyaiqa varaqiro virera, mwia quavanto qumina qua nraahuma vahiraro Kotiva hiama mwi vaisira huvantu kyaananro.

<sup>15</sup> Nkye taqaivaro nkyiqitairo nkyi qata vakyaave, nrunra nrakyaa mpovanto hia tuavaaqa vaterove nraataa hirarove varirera,

<sup>16</sup> nkye mwia hia kyaahaqaraitita, nkye mwianra qumina tiqata, Uro kyara nrenra tuavaaqa utu tera kyuqema variante, tiva, mwi quava nataama kyerove mwia kyaahaqa hiananro? Hiama mwi quava mwia kyaahaqa hiananro.

<sup>17</sup> Mwia votima kyeta nkye hia mpohua kyaahaqa hivera, nkyi kyaiqvanto hia kyuqe kyaiqa vahirata nkye Jesusirara qutaa mwivave ti quava qumina unra qua nraahuma vahiananro.

<sup>18</sup> Mpovanto ni qua nraatara kyarero uti variqaro mwitaama qiananro. Qioma vaisi mpovanto Jesusirara kepukyaqama kyero riemwaqiro viraro qioma vaisi mpovanto kyuqe kyaiqa nraahu varaqiro quananrove, tirera, nte nai mwi vaisira mwataama kyenama timwa mwianinra. E nataama kyerave hia mpora kyaahaqaraitira, Jesusirara nraahu kepukyaqama kyera riemwaqira vinanrave? Nte mpohua kyaahaqamaqima viqana Jesusirara kepukyaqama kyena riemwaqina quariro ni quavanto qutaa qua vahirara evata qioma taqenanrave, qianinra.

<sup>19</sup> E tiqara, Qutaama mwanriqa Kotiva kuaikuvanto variho, qiananra. Mwia kyuqemama mwitaa tira. Tove vaanavantovata qutaama mwanriqa Kotiva kuaikuvanto nraahu variho ti variara. Mwihua mwitaa timwa kyeqata variavaro mpoqama kyero kyuqu kyaauqu ntihata aatu hi variara.

<sup>20</sup> I vu nraato apiqama vihara variarao. I vu nraatovanto qutaa viro ntapihirara e riaante. E hia mpohua kyaahaqa hiraitira variraro e Jesusirara qutaa mwivave tirava qumina unra qua nraahuma vahiananro.

<sup>21</sup> Tiri haivaqava Evarahaamuva Kotiva tu quara riero nai mwaqqi Aisaakira vita kyero Kotirani qia quara mwatarero uti varuvaro Kotiva mwia kyaiqa taqero tiqaro, Nte iara avuqavuma kyera nrohi variara vaisivave tuqo, tura. Kotiva Evarahaamunra kyaiqara rieqaro mwitaa tura.

<sup>22</sup> E hiave taqera? Evarahaamuva Kotira quara qutaa quave timwa kyero mwiaqatairo mwiva tuntema kyero Kotira kyaiqa varaqiro vura. Evarahaamuva Kotira quara qutaa tu quavavata, mwiva Kotira kyaiqa varovavata, mwitanahua nai kyaahaqa hi nai kyaahaqa hi varuvaro qio varura. Mwiva Kotira kyaiqa varova kyaahaqa hi varuvaro mwiva Kotirara qutaa tu quava qio vhura.

<sup>23</sup> Evarahaamuva mwitaamaqiro vurara tiro, Kotira mpukuqi qara ntumwa to quava mwivau vhura. Mwitaama tiro:

Evarahaamuva Kotira quara qutaa tuvaro

Kotiva mwianra tiqaro,

E ni quara qutaa quave qiaranama nte e qiana quara rieqanama iara ntapihi kyera nrohi variara vaisivave

tuqo, tura. (Okyara 15:6)

Mwianra rieqaro Kotiva Evarahaamunranra e ni vaisima variaro tura.

<sup>24</sup> Nkye mwi quara rieqatama mwaa quara okyara anom a kyeta ntapihiata. Vaisivanto hia Kotira kyaiqa vararaitiro tiqaro, Nte mwia qua nraahu riaugo qiani vaisirara, Kotiva mwi vaisirara hia ntapihi kyera nrohi variara vaisivavema, qiananro. Vaisivanto Kotira qua riero mwiaqatairo mwia kyaiqavata varaani vaisirara, Kotiva mwi vaisirara ntapihi kyero nrohi vari vaisiravema qiananro.

<sup>25</sup> Haaru nraakyeye mpo Rehepiva mwiva api qaraqiro nrohi varu nraakyeva mwivavata Evarahaamuva hunte huru. Iosuaava nai ntaqu vaisitanahua nramwutaahua varunani uqeta kyero titovata mwitanahua uro ntovaro Rehepiva mwitanahua nai nraamwuqi uqeta tero ni nramwunaahua mwitana ntavaaqavu kyevorave tiro, mwitanahua kyaahaqa huru. Kyaahaqa huvata qio mwitanahua uqeta kyeta mpo aanraqaamateta vurara tiro, Kotiva Rehepira kyaiqara rieqaro mwi nraakyerara tiqaro, E ntapihi kyera nrohi variara nraakyevave, tura. (Jos 2)

<sup>26</sup> Vaisivanto hia nai mwanraqura vatama kyero varirera, mwi vaisiva qutu quari vaisiva variananro. Mwia votima kyero vaisivanto Jesusirara qutaa mwivave qari quava nraahu vahiraro mwi vaisiva Jesusira kyaiqa varaqiro quariva hia vahirera, mwiva Jesusirara qutaaave tivavata qumina inraikyaqama hiananro.

### 3

#### *Nkyeta mwaaqinriqaa kyuqema kyeta ntaqikyiqita quate tura*

<sup>1</sup> Ni kata pakyaa tuaavo, nkyiqtaita airi vaisivanto tiqata, Tire mwaanra okyara nraakyeye qora timwa nyinrenrave, tivora. Tirenramwu mwaanra okyara timwa nyi variara vaisihua variararo Kotiva tiri kyaiqa mpoqavata tukya hiro mpohua kyaiqa viraaqamama tukya hiananro.

<sup>2</sup> Airi enta ekyaa tire variqata ntapihi kyeqata kyaiqa varaare tunanra tire apiqama kyeqata vare varunanra. Vaisivanto hia api qua tiraitiro, ntapihi kyero nraahu ti variari vaisiva varirera, mwi vaisiva hia uqenraanri vaisiva variraitiro, mwiva kepukyu vaisima variananro. Mwiva ekyaa nai mwamwantaqaa kyuqema kyero ntaqikyi variari vaisivama variananro.

<sup>3</sup> Tire qosiqaa nrohiqata teta virera hiananrani qosivanto quarive tita, tire qaini pataqia mwia nroqi vateta kyaantaqa tu varauraro qosi nronra mwiva tire virera tuna aanranra mwiaqaa nraahu vi varira.

<sup>4</sup> Nkye sipiaravata riaata. Sipi nronravanto vaharo toqavanto nronraqama kyero ti variharo vaisivanto mwi aanranraqaa quankye timwa kyero mwia nriqi ti varira pataqiaqotairo sipi mwia tuqasaa kyaiharo sipivanto mwiva virera ti aanranraqaa vi varira.

<sup>5</sup> Mwia votima kyero vaisi mwaaqinrivanto pataru vahiqarovata mwiva nronra kyaiqa vare varira. Qio taqaata. Qia pataqivanto itamwaqiro viro uro antave, mwukyauve, qiomia itamwa kyaananro.

<sup>6</sup> Vaisi mwaaqinrivanto qora qua tiqaro qia auru votima kyero iteqaro mpo inraikya mpo inraikya qoraqama kye varira. Mpo qua mpo qua uaquia hi quavave, uaquia hi kyaiqavave, mwaaqinriqatairo qovara hiro. Vaisi mwaaqinrivanto ekyaa vaisi mwamwanta uaqiamma kye varira. Saataaninra mwatukyaqitairo qivavante nri ntero vaisi mwaaqinriqatairo iteqaro qora kyaiqa mpo kyaiqa mpo kyaiqa vare varira.

<sup>7</sup> Vaisivanto ekyaa vahi aasauve, qarurave, tavukyave, ekyaa qaakyau vahi aasau vara tumusa kyeqaro vataariva qiomia vahiro.

<sup>8</sup> Mwi inraikyara mwi inraikyara qio tumusa kyaariva vaharo vaisivanto nai mwaaqinri nraahu tumusa kyaariva hiama qio vahiro. Mwaaqinrivanto qoraqa hi

inraikyava nai kyakya hira nraahu vataqiro vivarivama vahiro. Vaisi ru kye varia tuhira, haqaquaakyara voti hi inraikyava mwaaqinriqaa piqaroma vahiro.

<sup>9</sup> Tire mwaaqinriqotaita Kotiva tiriqaa ntaqikyi varira teta tiqorara qamwateqata varihana quara timwa kyeta qoqaraara mwiaqotaita tire vaisi mpo Kotiva nai votima kyero utu tai vaisirara uaqia hi quaarura ti varunanra.

<sup>10</sup> Qikye, kuaa nro mwiqitairo qamwate varina quava nri ntaiharo qora quavanto mpore timwa mwate varina quavavata nrinte varira. Ni kata pakyaa tuaavo, tiri nroqitairo hia mwitaa qiarive.

<sup>11</sup> Rumwu kuaa mwiqitairo hiama kyuqe hiani nramanrivavata uka quani nramanrivavata nriananro.

<sup>12</sup> Kyaimwuvanto hia vatekya tamwa riairave. Tauveravanto hia kyaimwu riairave. Puaataqitaira hiama kyuqe hiani nramanrinra kyaqenananrave.

### *Kyuqe quaravata kyuqe vu nraatoravata tura*

<sup>13</sup> Nkyiqitairo kyuqe qua rie vari vaisiva, kyuqe vu nraato vataava varirove? Mwi vaisiva hia nai nrutuara riaraitiro, kyuqe qua nraahu riemwa kyeqaro kyuqe kyaiqa nraahu vare varirata nraakye qora mwia kyaiqa taqeqlata mwianra kyuqe vaisive qiata.

<sup>14</sup> Vaisi mpo kyuqema mwataaninra kyaara nkye mwia kyaru ntumwa mwate variqata nkye nkyetara nraahu rieqatama tire nronra vaisi varirerave tiqata nkye nai nraatara kye nai nraatara kyemaqita vivera, nkye mwianra rieqata hia nkyeta mwahuta tiqata, Tire kyuqe nraakye qora varuro, tivara. Nkye nkyeta uaqia hi kyaiqara utirara unra qua tivora.

<sup>15</sup> Hia nyaamwusairo Kotiva kyaahaqa iharo mwi vaisiva mwitaama kyero uaqia hi kyaiqara utirave. Mwi kyaiqara utuari okyarava mwatasairo qovarama vi variho. Saataaniva kyaahaqa hi variharo vaisivanto mwi kyaiqara uti varira.

<sup>16</sup> Nraakye qoravanto vaisi mpo kyuqema mwataaninra kyaara mwia kyaru ntumwa mwate variqata mwihua nkyiariara nraahu rieqatama tire nronra vaisi varirerave tiqatama nai nraatara kye nai nraatara kye hi variraqi inronra hi quavave, uaqia hi kyaiqavave, mwiva nraahuma vahiananro.

<sup>17</sup> Mwatasairo qua okyaravanto mwitaama vaiharo nyaamwusairo Kotira vu nraatovanto vahirero mpo qaramama vahiro. Vaisivanto Kotira vu nraato vahirara rieqaro mwiva vunyaa inraikya mwia, mwiva kyuqema kyero nraahu variqiro quananro. Kotira vu nraato vahirara riaari vaisiva hia antua qua tiraitiro, qihakyamaqiro quananro. Mwi vaisiva hia nai qua nraahu riaraitiro, mpore quavatama riemwaqiro quananro. Mwiva mpohuara po timwaqiro viqaro mwiva mwihuara kyuqemaqiro quananro. Mwiva mwianravata mporaravata kuaa qua nraahuma timwaqiro quananro. Mwiva hia unraqama kyeqaro Kotira kyaiqa varaananro.

<sup>18</sup> Tire mpohuara qihakyamaqita viqata kuaara nraati variananraqaatairo qiomia ntapihi kye nrohi variana okyarava qovara hiananro.

## 4

### *Mwata mwaaqanaa inraikyara nraahu mwutukya ntiraro variari vaisiva Kotira nramwutaama variananrove tura*

<sup>1</sup> Nkye variavaro taisairove inronra hia quavave, ntaqua quava nrinro? Kyai nte nkyi timwa nyianri. Nkyi su nyaatoqitairovata nkyi mwutukyaqitairovata qora kyaiqa, mpo kyaiqa mpo kyaiqa vareva nri ntero nkyiqa ntaqikyirero uti variqaroma nkyivata ntaqi variro.

<sup>2</sup> Nkye mpo inraikya mpo inraikya varaataa ihata hia mwi inraikyara vararaitita, mwiaqataita nkye tiqata, Kyai tire vaisi ru kyeta mwi inraikyara varaare, ti variara.

Nkyi mwutukyavanto mpo inraikyara vahata nkye mwi inraikyara varaare qiar hia vararaitita, mwiaqaataita nkye inronra qua tiqatama ntaqi variara.

Nkyi mwutukyavanto vahi inraikyara nkye hia vare variara. Nkye mwi inraikyarara Kotirara aakyara tiqata kyapara hiataara vahata nkye hia mwitaa hiara.

<sup>3</sup> Nkye Kotirara aakyara qia entara nkye apiqama kyeqata nkyeta kyakya hiraqa vara kye api tuto kyarera aakyara nte variavarora tiro, Kotiva hia mwi inraikyara nkyi nyi varira.

<sup>4</sup> Nai vaati qaqlira kyero mpo vaisintiri api nrohi vari nraakyera votima kyeta nkye variara. Nkye hiave ntapihita? Nkye mwatani vahi inraikyara totiqa hiqata mwia nkye Kotira nramwutaaqama hita. Tavave mwata mwaqaanaa inraikyara nraahu riemwaqi viro mwi inraikyara totiqa hiariva, mwiva Kotira nramwutaama variro.

<sup>5</sup> Mwi quara Kotira mpukuqi qara ntumwa torara nkye qumina quave tivora. Mwitaama tiro:

Tiriara nkyi mwutukyavanto nianra nraahu vahiarive tiro,  
Kotiva nai mwanraqura tiri timwinrave, tura.

<sup>6</sup> Kotiva po timwa timwateqaro tiriara uaquia hi kyaiqara  
nraatara kyaate tiro, Kotiva tiri kyaahaqa hi varira.

Kotira mpukuqi mwitaama tiro:

Nai nrutu nraahu tuaaheraani vaisira  
Kotiva raaquta kyaananrove.

Hia nai nrutu tuaaheraani vaisira Kotiva po timwa  
mwatero mwia kyuqema mwataananrove, tura. (Snd 3:34)

<sup>7</sup> Kotiva nkyiqa ntaqikyiarive tita, nkyeta nyutu vara mwataniqama kyeta mwia mwemwani variate. Nkye Saataaninravatama kyeta kepuqyaqama kyeta ntaquqita vita mwia nraatara kyaivaro mwiva aatu quarive.

<sup>8</sup> Nkye Kotira nraaqani uro varivaro Kotiva nkyi nraaqani variari. Vaisivanto qainaama kyauquqaa vahiankyorave tiro nai kyauqu hiqama kyaintema kyeta, nkye uaquia hi kyaiqara uti varihua nkyeta mwutukya hiqama kyaivaro uaquia hi kyaiqava hia vahiarive. Nkye Kotira vataqi vuro timwa kyeqata kumwaanri hi variahua nkyeta mwutukya hiqama kyaata.

<sup>9</sup> Nkye nkyeta uaquia hi kyaiqara uti varirara hia raihita qamwateqata variata. Mwi inraikyarara riaivaro nkyi mwutukyavanto uaquia hirata variqata ntataata.

<sup>10</sup> Nkye Kotira vuqaa nkyeta vara mwataniqa hivaro Kotiva nkyi tuaahera kyaari.

### *Hia mpohua mwaanra qiate tura*

<sup>11</sup> Ni kata pakyaa tuaavo, nkye hia mpohua nyaanra tiqata uaquia hi quara qia. Nai qatave nai vakyaarave pupitaapitama kyero e mwitaa mwataama variaravave qiariva, mwiva ko riaa vaisihua votima kyero variqaro Kotiva vatai quara hini hi quara mwinanra kyuqe quave tiro mpo hi quara uaqiahi quarave ti varira.

(Nkyiqitairo mpovanto mwitaa tirera, nte mwianra mwitaa qianinra.) E mwitaa-maqira viqarama Kotira qua hia tutera hiama vataqira vira hiaro. E ko iaa vaisihua votima kyera variqarama Kotira qua mwataara hiqarama ntainra kyera hiaro.

<sup>12</sup> Kotiva mwiva nai nraahu nai qua vata tairave. Mwiva nraahuma nraakye qorara kyuqe vaisive qora vaisive qiananrove. Mwiva nraahuma ko tiqaro vaisi ru kyero vaise sitianganrove. E ta vaisiva variqarave e ena hena nraakye qora tukya hiaro? qianinra.

### *Haunri nkye qakyo vare inraikyarara nronraqama kye riemwaqita vivorave tura*

<sup>13</sup> Nkye mpo hiahua tiqata, Kyai tire mateve hurave mwi mwatukyara nronra mwatukyaqi uro variqata munima airi ntanrau kyeta varaana kyaiqara kuaa ihiara varaci viqata munima airi varaare, qiahua, nkye rie varivaqena nte nkyi qua timwa nyianri.

<sup>14</sup> Nkye hora qovara hiani inraikyarara mate hiama ntapihita. Nkye variqita viva nanra inraikya votima kyerove vahiro? Kyai nte nkyi timwa nyianri. Toqaqinaa tonamwuvanto rupa qutero pataqia vahiro ntupepaama viro hia qaiqaavata vahin tema kyeroma, nkye variqi viva vahiro.

<sup>15</sup> Mwianra rieqatama nkye hia nte mwitaa mwitaa hirerave qiata. Nkye mwataama qiata, Nai Kotira kyakya hirave. Mwiva nianra qiove tirera, nte mwitaa mwitaa hianinrave, qiata.

<sup>16</sup> Mate nkye nkyeta nyutu nraahu tuaaheraqi viqata nkye nkyeta mwahuta nraahu ti variavo. Mwitaa ti varia quava uaquia hi quava nraahuma vahiro.

<sup>17</sup> Vaisivanto tiqaro, Mwi kyaiqara kyuqe kyaiqa varaataara vaihanavata nte qaqlira mwia kyena hia vararerave, qiariva, mwi vaisiva Kotira qua nteqa kye variananro.

## 5

### *Airi inraikya vataahuara tura*

<sup>1</sup> Nkye airi inraikya vatehua ni qua riaata. Qikye, nkye nraakiara anomia kyero uaquia hiani entarara rieqatama mwaa entara ntataqi viqatama po kye timwaqita quata.

<sup>2</sup> Nkyi kyau kyoqaavanto ntenra quarivama vahiro. Tovesivanto nkyi tuavaaqaa nramwa kyaarivama vahiro.

<sup>3</sup> Nkyi kori munimavantovata, ori munimavantovata, puaataqa taarivama vahiro. Nraakiara puaataqa taaninra taqeqaroma nkye qora kyaiqa varera ntapihi kyero taqaananro. Qia auruvanto itaintema kyero puaataqa taariva, nkyi mwamwanta itamwaqiro viro uro taiqa kyaananro. Nkye mwaa ekyara enta variqata nkye mwaa mwatarai taiqa kyaani entarara hia riaraitita, nkye mwitaa inraikya ntuvantua hirara nraahu riemwaqita vi variara.

<sup>4</sup> Taqaata. Nkyi kyaiqa vaisivanto nkyi aakyoqi kyaiqa varaahua kyoqaa nyiqata nkye ntape rape hi variarave. Nkye mwitaa hiavata nkyi kyaiqa vaisivanto mwia kyaara inronra hi variavaro Kotiva nyaamwuni ntaqi varia vaisihuaqaa ntaqikyi variva, mwiva mwihua qua mwia rie varira.

<sup>5</sup> Nkye mwatani variqata nkye kyuqe inraikya, mpo inraikya mpo inraikya vateqata nkye nkyetara nraahu rieqata nkyeta qamwaterara nraahu rieqata variavo. Nkye airi kyara nramwaqita quavaro nkyi mwamwantavanto nrakyote varihata nkyetavanto nkyita ru kyaani iherara tera hi variavo.

<sup>6</sup> Hia uaquia hi kyaiqara uti varia vaisihua variavata nkye mwihuaqaa qua vateta mwihua ru kyaara. Mwihua hia nkyi hiniqama kyeta uaqiamma nyataavata nkye mwihua ru kyaara.

### *Mwutukya qihakya hirata Kotirara aakyara nteqata Iesusira vekya variate tura*

<sup>7</sup> Ni kata pakya tuaavo, nkye tiri vunyaa vaisivanto qaiqaa tumuaninranra rieqatama mwia vekya variqata mwutukya qihakyma kyeta varivaro tumuanri. Nkye kyara vara ti vari vaisirara nraato tiqata variata. Mwi vaisiva kyara vara tutoero hia vaakya vara kyero nranraitiro, mwiva qakyoma kyero variqaro huarivata vativata vekya variharo mwitanava kyaiqa utiharo kyaravanto qupiqero peqaqama viharo mwiva uro vantuqiro nrumu nraintarave.

<sup>8</sup> Nkyevata mwiva hintema kyeta Iesusira vekya variqatama mwutukya qihakyma kyeqata variata. Tiri vunyaa vaisivanto tumuanriva qaumato vahihatara tita, nkye kepuqyama kye variqita quata.

<sup>9</sup> Ni kata pakya tuaavo, Kotiva nkyiqa qua vataankyo tita, nkye hia nanrianra nanrianra uaqua tiqata e hia ni mwitaa mwataa hiaro tiqata airi quanti qiata. Ko rie variva nronravanto Kotiva nrumu quesana variqaro vera ntareroma uti variro.

<sup>10</sup> Ni kata pakyaa tuaavo, haaru poropeti vaisivanto Kotira nrutuara rieqata hia aatu hiraitita, Kotira qua timwa nyiqi vuhua, nkye mwi vaisihuara riemwaqita viqata variata. Mwihua nriqa vu inraikya varaqita viqata mwutukya qihaakyama kyeqata nraahu varurara rieqata nkyevata mwitaa hiata.

<sup>11</sup> Haaru uaqiamma nyatovata poropeti vaisivanto hia Kotira kyaiqa qaqlira kyaraitita, Kotira kyaiqa kepuqyaqama kyeta vare varura. Mwihua mwitaa hurara tita, tire mwihua tiqata, Mwihua qamwateqata varu vaisihuave, tunanra.

Iopuva tiri haivaqava mwivavata mwutukya qihaakyama kyero vahu vaisiva varura. Nkye mwi vaisira ntapihi kyaara. Iopuva haaru nronra vaisivanto varuva, mwiva anomma kyero uaqiamma variqiro viro mwiva mwi entara hia Kotira qaqlira kyaraitiro, Kotirara rieqaro mwutukya qihaakyama kyero varuvaro mwiaqatairo nronravanto Kotiva mwia kyuqema mwatero mwia qaiqaa nronraqama kyora. Nronravanto Kotiva, mwiva tiriara po kye tiro kyuqema timwa te varivama variro.

### *Kyauqu nriqiqaa vaterara tura*

<sup>12</sup> Ni kata pakyaa tuaavo, kyai nte Kotiva nronraqama kyero qao timwa tai quara nkyi timwa nyianri. Nkye kyauqu hia nriqiqaa vateqata nyaamwunyaa nrutuve, mwatanyaa nrutuve, mpo inraikya nrutuve, nteqata quataama turo qia. Nkye qua tiqatama qati eo nraahu tita hiave nraahu qia. Nkye mwitaa tivarot Kotiva hiama nkyiqa qua vataananro.

### *Ntapihi kyeqaro nrohi vari vaisiva Kotirara aakyara ntai quava kepuuya vaiho tura*

<sup>13</sup> Nkyiqitairo vaisi mpovanto variraro mwi inraikyara mwi inraikyara kyaara mwia mwamwantavanto muaanra ntairaro varirera, mwi vaisiva Kotirara aakyara ntaari. Mpovanto mwutukyaqitairo qamwateqaro varirera, mwi vaisiva Kotirara ihi tiqaro Kotira nrutu tuaaheraari.

<sup>14</sup> Nkyiqitairo vaisivantove nraakyevantove nriqa virera, mwiva Iesusira nraaqiara nronranramwu nyaanrainrata mwihua nrumbu tiri vunyaa vaisi nrutu nteqatama vahamwenra mwia qiaqaa qu mwateta Kotirara aakyara nteqatama mwia kyuqema kyaante qia.

<sup>15</sup> Nkye mwitaama kyeta Kotirara aakyara nteqatama Kotiva quataama mwia kyuqema kyaananrove tivarot Kotiva mwia kyuqema kyaari. Nronravanto mwia nriqa quaninra vara kyero mwiva uaqia hi kyaiqara utuani quaravata nruka mwataananro.

<sup>16</sup> Nkye mwi quara rieqatama hia nkyeta uaqia hi kyaiqara utira uqeta taraitita, mwi quara qovarama kyeta nai timwa mwi nai timwa mwi hiata. Nkye mwitaamaqita viqata nanrianra nanrianra rieqatama Kotirara aakyara ntaivaroma mwiva nriqa quaninra taiqa kyaari. Avuqavuma kyeqaro nrohi vari vaisiva Kotirara aakyara nteqaro ti vari quava, kepuuya qua vaharo Kotiva mwi quara rie varira.

<sup>17</sup> Tiri haivaqava Iraisaava mwivavata tiri nraantantova vaisivanto varura. Mwiva hia vati ntuarive tiro, Kotirara kepuqyaqama kyero aakyara ntovaro Kotiva mwia qua riovoro vativanto taarampo ihi vara kyero mpo ihi mwia hinivata vara kyero hia vati ntura.

<sup>18</sup> Hia vati ntuvarto Iraisaava variqiro viro mwiaqatairo vati ntuarive tiro, Kotirara aakyara ntovaro nyaamwusairo nronraqama kyero vati ntuvarto mwiaqatairo kyaravanto kyuqema kyero quipqora.

### *Vaisivanto kyuqe aanra qaqlira kyero quaninra uro qaiqaa viteta nrinranra tura*

<sup>19</sup> Ni kata pakyaa tuaavo, nkyiqitairo mpovanto quataa qua qaqlira kyero uaqia hi aanranraqaa viraro mwiaqatairo mpovanto mwia vitero kyuqe aanraqaa nrumbu kyaani vaisirara tirera.

<sup>20</sup> Mwia kyaahaqa hiraro uaqia hi aanranra qaqlira kyero uro ntantero nriani vaisiva hiama ekyara qutu quananro. Kotiva mwi vaisiva uaqia hi kyaiqara utuani quara, mpo qua mpo qua nrukama mwataananro.

## 1 PITAA

### Pitaava tauraanaa qara vara kyora

Iesusira ru kyovaro qutu viro qati siviro nyaamwuni uro varuvaro 30 ihive 35 ihive nritarovaro Pitaava mwaa quara qara ntumwa tora. Mwi entara Iutaavanto Iutaa mwaanra qua riohua Iesusira nraakye qora qoraqama nyate varuvata Iesusira nraakye qora airivanto tiqata, Iesusira vataqi vunanra kyaara tirivata rivorave, timwa kyeta Ierusaremisaitavata, Iutaa mwatasaitavata, kyatu kyaatu hita uro mpo nani mpo nani varirerata vurama.

Mwihua mwini uto varuvata Iutaa vaisivanto mwini varuhuavata, mpo vaisinramwuvantovata, Iesusira vataqi vura kyaara mwihua qoraqama nyate varura. Mwihua qoraqama nyate varuvata Iesusira nraakye qoravanto Iesusira vataqi vura kyaara muaanra vareqata pupohevorave tiro, Pitaava mwihua kepukyaqama nyatarero mwaa quara qara ntumwa tora.

Iesusiva sita vato nraaqiarahua 12 nramwuqitairo Pitaavavata varura.

**1** Nte Pitaava. Iesusi Karaisiva ni nronraqama kyaihana nte mwia kyaiqa vare varuvama varina. Nkye nraakye qora nkyeta mwaata qaqlira kye kyatu kyaatu hita uto Pontiaasinive, Karesiaanive, Kapatosiaanive, Esiaanive, Pitiniaanive, variahuara rieqanama nte nkyini qara ntumwa tena.

**2** Haaru Kotiva tiri tiqova nkye hia varu entara nkyiara ni nraaqiara variate tiro, nkyi nai kyaama tora. Nkyiara kyuqema kyotata nraakye qora nraahu variate tiro, nai mwanraqura nkyi nyinro. Nkyiara Karaisira qua riemwaqita quate tiro, Karaisira nraanrevanto nkyi hiqama nyataira. Kotiva nkyi kyuqema nyatairaro nkyi mwutukyavanto qihakyama vahirata variata.

#### *Kyuqema kye variva nyaamwuni nkyi sekä vaiho tura*

**3** Nrivaqe Kotira nrutu tuaaheraare. Kotiva mwanriqavanto variqaro mwiva tiri vunyaa vaisi Iesusi Karaisira qova varirama. Kotiva tiriara po kye timwa timwa teqaro tiriara qaraakya nraakye qora variqata ekyaa enta qati variqita quate tiro, mwiva Iesusi Karaisiva qutu vuraqitairo qati vara sivuma kyora. Kotiva Iesusi Karaisira qati vara sivuma kyorara tita, tire nraakiara Kotiva tiri tivitairaque mwiavata uro nyaamwuni variananra vekyama varuro.

**4** Kotiva mpo inraikya mpo inraikya kyuqe inraikya nraahu tiri kyaama tai inraikyavama nyaamwuni vahiro. Mwini vahirara tiro, mwi inraikyava hiama qio ntenra viro taiqa quananro.

**5** Nkye Kotirara kepukyaqama kyeta riemwaqita vi variavaro Kotira peqavanto nkyiqa vaimwanraanra ntaqikyi varihata variara. Kotiva nkyiqa ntaqikyiqiro viviro ekyara entaqaa nraakye qora huvantu nyatero sitaani okyarara terama taariva qovara hiananro.

**6** Nkye mwi quara rieqatama mpoqama kyeta qamwateqata variata. Nkye mwi quara riemwaqita vivaro mwaa entara nanra nanra inraikyavantove qovarama viro nkyi qoraqama nyatairera, nkye hia mwi inraikyava nkyi antua kyairata mpo qua taunru kyaraitita, qati riemwa teta qamwateqata variqita quata.

**7** Mwi inraikyava mwi inraikyava nkyi qoraqamaqiro viraro nkye Kotirara kepukyaqama kye riemwaqita vi okyarara Kotiva qio mwia mwataara hiqaro taqaananro. Korivanto hia ekyaa enta vahiani inraikyava vaharo vaisivanto mwi orira mwataara hirero qiaqotairo mwia mwataara hiqaro taqe varira. Korivanto qumina orivanto nraahu vaharo nkye Kotirara kepukyaqama kye riemwaqita viva mwiva nritarero vaharo Kotiva mwianrama nronraqama kyero riero. Vaisivanto kori

mwataara hintema kyero Kotiva nkye mwianra kepukyaqama kyeta riemwaqita vira mwataara hi variro. Mpo inraikya mpo inraikyavanto nkyi qoraqamaqiro virata nkye Kotirara nraahu kepukyaqama kyeta riemwaqita vivera, nraakiara Iesusi Karaisira qovarama kyaani entaraqaa Kotiva nkyi nyutu tuaahera kyero nkyi nronraqama kyero nkyi qamwata nyataananro.

<sup>8</sup> Nkye Iesusi Karaisira hia taqaahua variavaro nkyi mwutukyavanto mwianra vhira. Nkye matevata hia mwia taqaahua variqata nkye mwianra kepukyaqama kye riemwaqita vi variara. Nkye Jesusirara mpoqiaavata qamwateqata variarara tiro, nkye nkyeta nroqitaita mwianra mpo qua vutu kye tiva hiama qio vahiananro.

<sup>9</sup> Nkye Jesusirara kepukyaqama kye riemwaqita viraqaatairo nkyi mwanraqura huvantu kyaari inraikyava qovara hiananro.

<sup>10</sup> Haaru poropetinramwuvanto variqata Kotiva nraakyе qora huvantu kyero sitaani okyarara ntapihi kyeta riarerata uti variqata Kotira qua, mpo qua mpo quara nraato tara hiqata varura. Kotiva mwihua kyaahaqa huvata mwihua Kotiva nkyi kyuqema nyatarera hianinranra qoqama kyeqata tura.

<sup>11</sup> Karaisira mwanraquravanto mwihuaqi variqaro timwa nyinro tiqaro, Karaisiva nriqa vi inraikyara varaqiro viro mwiaqatairo mwiva nronraqama viraro mwia nrutuvanto virito vahiananrove, tuvata mwihua mwi quara qara ntiqata nraato tara hita tiqata, Taireve mwitaa hiananrove? Ta vaisivave mwitaa mwitaa hiananrove? tura.

<sup>12</sup> Mwihua ntapihi kyovaro mwihua qati varu entaraqaa mwi inraikyava qovara hiariva hia vhura. Mate nkye varia entaraqama mwi inraikyava qovarama viro. Kotiva nai mwanraqura nyaamwusairo titovaro mwiva vaisi mponramwu kyaahaqa huvata mwinramwuhua mwi quara kyuqe mwakyaakya nkyi timwa nyuvata nkye riora. Qikye, nyaamwunyaahuavata mwi quara okyara ntapihi kyeta riataa ihata variara.

### *Kyotataqama kye variqata kyuqe kyaiqa nraahu varaqita quate tura*

<sup>13</sup> Mwi quara rieqatama vutunte vurunte qakyaa hirara terama teta variata. Nkye vu nraato kyuqema vahirata variata. Iesusi Karaisiva nai qovarama viro nkyi kyuqema nyataani entara mwi entara vekya variqata mwianra nraahu riemwaqita quata.

<sup>14</sup> Nkye Kotira nraaqiara variqata nkye mwia qua riemwaqita quata. Haaru nkye Kotira qua hia riaraitita varu entara, nkye nkyita mwutukyavanto vahu inraikyara qora inraikya nraahu vararerata uti varura. Nkye mwaa entara mwitaamaqita vivora.

<sup>15</sup> Kotiva nkyi nyaanrama kyero sita varaiva, mwiva kyotataqama kyero variqaro kyuqe kyaiqa nraahu vare varirara tita, nkyevata kyotataqama kye variqata Kotira nraantantamwa kyeta kyuqe kyaiqa nraahu varaqita quata.

<sup>16</sup> Kotira mpukuqi Kotiva mwitaama tiro:

Nte kyotataqama kye variqana  
kyuqe kyaiqa nraahu vare varurara tita,  
nkyevata kyotataqama kye variqata  
kyuqe kyaiqa nraahu varaqita quate, tura. (Wkp 11:44-45)

<sup>17</sup> Kotiva hia vaisi nrutuara rieqaro mwi vaisiva nronra vaisive mwi vaisiva pata vaisive tiraitiro, mwiva vaisi kyuqe kyaiqarave qora kyaiqarave rieqaro qua avuqavuqama kye varira. Nkye mwianra rieqatama Kotirara aakyara nteta tiri tiqovave tiqatama mwatani variqi viqata Kotirara aatumma kyeqata variqi quata.

<sup>18</sup> Haaru nkye nkyi haivaqahua timwa nyu quara nraahu rieqatama nkye qumina aanra nrohi varuvaro Kotiva nkyiara nte mwihua huvantu kyaarita qatinani nritareta quate tiro, mwiva nkyi kyoqaa hirero hia qumina taiqaani inraikyara ori munimaqove, kori munimaqove, kyoqaa hiraitiro,

<sup>19</sup> Kotiva nkyi Karaisira nraanreqotairo kyoqaa utu taira. Karaisira nraanrevanto ekyaas kyoqaa nraatara kyaira. Sipisipi hia mwia mwamwantaqaa mpo nramwanaamwavata vahura kyuqe mwamwanta vataara ru kyontema kyeta Karaisira ru kyora.

<sup>20</sup> Haaru hia mwaa mwatara ututo entara Kotiva tiqaro, Karaisiva mwi kyaiqara varaananrove, timwa kyero mwia mwatama tero variqiro viro mwaa entara nkyiara rieqaro Kotiva Karaisira qovarama kyaira.

<sup>21</sup> Karaisiva nkyi kyaahaqa hianinranra tita, nkye Kotirara kepukyaqama kyeta riemwaqita vi variara. Kotiva Karaisiva qutu vuraqitairo qati vara sivuma kyero mwia nrutu tuaaheraate tiro, mwia nronraqama kyora. Kotiva Karaisira mwitaa hurara tita, nkye tiqata, Qutaama Kotiva tirivata mwitaa hiqaro tivitaananrove, ti variara.

### *Nkyeta qata vakyaahuara mwutukya vahirata variate tura*

<sup>22</sup> Nkye Kotira qua qutaa qua riemwaqita quavaro Kotira quavanto nkyi mwutukya hiqama nyataiharo nkyi mwutukyavanto nkyita sata sakyahuara vaihata variara. Mwiaqataita nkye nkyita sata sakyahuara qutaaqama kye mwutukya vahirata variata.

<sup>23</sup> Nkye varirerata qaiqaa qaraakyaqama kyero mwatatai nraaqiarahua variara. Hiama qutu quari inraikyava nkyi qaiqaa mwata tairata nkye qaiqaa qutu vivarave. Kotira quavanto qati vahiqiro vi vari quava, mwiva nkyi qaiqaa mwata tairama. Mwi quava ekyaas enta qati vahiqiro quananro.

<sup>24</sup> Kotira mpukuqi mwitaama tiro:

Mwukyauvanto vahiqiro viro uro aaharama vintema  
kyero vaisivantovata variqiro viro  
uro ekyaama taiqa quananrove.  
Ntontora riemwa tero iteqaro  
kyuqema kyero ntuvahero uro tapupu hintema kyero  
vaisi peqvantovata taiqa quananrove.

<sup>25</sup> Kotiva qiani quava nraahuma ekyaas enta  
qati vahiqiro quananrove, tura. (Ais 40:6-8)

Qio Kotira qua kyuqe mwakyaakya nkyi timwa nyiavata nkye mwi quara riaara.

## 2

### *Kotira quavanto nkyi kyarama vaiho tura*

<sup>1</sup> Nkye Kotira qua rie variahua variqataro tita, nkye uaquia hi kyaiqara ekyaas qaqlira kyaata. Hia unra qiata. Hia unraqama kyeqata kyuqe kyaiqa varaata. Vaisi mpovanto kyuqema quaninranra hia mwia nronri nriqi kyamwu ntumwa mwataata. Hia mpora nrutu vara mwataniqa hiqata uaquia hi quara qiata.

<sup>2</sup> Nraaqiara akirivanto nraamwanra mpo utintema kyeta nkyevata Kotira nraaqiara qaraakya variahua tita, Kotira quara nraataa hirata variata. Kotira quavanto nkyini kyuqe nraamwa voti hivama vahiro. Mwi nraamwanra kyuqe hi nraamwanra nreqatama nkye kyuqema kyeta nronra tuemwa vivaro Kotiva nkyi huvantu kyero sitaari.

<sup>3</sup> Kotira mpukuqi mwitaama tiro:

Nkye Kotira kyaiqa vareqata taqaavaro  
Kotiva nkyi kyuqema nyate varivama variho, tura. (Sng 34:8)

<sup>4</sup> Nkye nronravanto Karaisiva varinani nriata. Karaisiva qati variqiro quari puhavama variro. Qumina vaisinramwuvanto mwianra hia kyuqe puhave tiqata mwia qoririma kyaavaro Kotiva mwia nai kyaama tero ni puha kyuqera vahiananrove tiro.

<sup>5</sup> Nraamwu kyaara qati vahiqi vira votima kyeta nkyevata variavaro Kotiva nkyiqotairoma nai nraamwu hoqarero uti variro. Nkye mwi nraamwunraqi variqata Kotira kyaiqa vara mwate vari vaisihua variqata Kotirani kyuqe kyaiqa varaqita quata. Nkye mwitaa hivarotara rieqaro nkyi kyaiqara qamwataananro.

<sup>6</sup> Kotira mpukuqi Kotiva mwitaama tiro:

Taqaate, nte puha kyuqera ntene mwatama taura

Saioni mwatukya utaqaa rataurave.

Mwiaqaa vuntu viro variariva hiama kyauruuanrove,  
tura. (Ais 28:16)

<sup>7</sup> Nkye Karaisirara qutaa mwivave timwa kyeta mwiaqaa vuntuvi variahua, nkye tiqata, Karaisiva tiri puha kyuquerave, ti variara. Mpo hiahua hia Karaisirara qutaa mwivave qiahua, mwihua mwiaqatai huntavaivaimaqita kyaamwu ntuara. Kotira mpukuqitairo mwitaama tiro:

Mwihua nraamwu hoqeqa tiqata,

Mwaa ori uaquia hirave, timwa kyeta qoririma mwataava,  
mwi orivama puhaqama viho, tura. (Sng 118:22)

<sup>8</sup> Kotira mpukuqitairo mpo quavata tiqaro mwitaama tiro:

Ori mwaaqaataita vaisivanto

huntavaivaimaqita ntuqutu vivarave.

Qoqaraa ori mwiaqataita nraahu vaisivanto tantu  
vaantumaqita kyaamwu ntivarave, tura. (Ais 8:14)

Mwihua hia Kotira quara qutaa quave tiqatara tita, mwihua huntavaivaimaqita ntuqutu quara mwianra haaru Kotiva qio mwihua mwitaa hivarave tura.

### *Nkye Kotiva nai kyaama tai nraakye qorahuama variavo tura*

<sup>9</sup> Nkye hia mwihua hiante hiavo. Kotiva nkyiara ni nraakye qora variate tiro, nkyi nai kyaama taihata variavo. Nronravanto Kotiva varihata nkye mwia kyaiqa vara mwate vaisihuama variavo. Nkye kyonataqama kye varia nraakye qorahuama variavo. Nkye Kotira nramwunaahuama variavo. Mwiva nkyiara nte nkyi kyuqema nyataaninranra mpo nraakye qora timwa nyiate tiro, Kotiva nkyi kyokiraqitairo nyaanrama varero uro omwavanto itaira kyuqe hinani kyaihatama variavo.

<sup>10</sup> Nkye vuni qumina nraakye qora varura. Mate mwaa entara nkye Kotira nraakye qorama varita. Haaru Kotiva hia nkyiara po kye timwa nyatovata nkye varura. Mate mwaa entara Kotiva nkyiara po kye timwa nyataihata variara.

### *Tire Kotira kyaiqa vaisima varuro tura*

<sup>11</sup> Po, ni nramwuna tuaavo, nkyi mwaata tananra hia mwaa mwataraqaa vahira. Nkye mwaini variqata nkye mpo mwatanaahua votima kyeta variara. Nkye mwianra rieqatama nkyi mwamwantavanto uaquia hi kyaiqara varaataa hira hia varaata. Nkyi mwamwantavanto nkyi mwanraqura nraatara kyero mwiaqaa ntaqikyirero uti varihata variara.

<sup>12</sup> Hia Kotira qua riehua varivata nkye mwihua suqaa ntapihi kyeta nrohiata. Nkye mwitaamaqi vivata mwihua nkyiqa qua vatarerata mpo inraikyaqaa ntumwa kyeta tuqasaaqasama kyeta unra qua tivera, mwihua quavanto hia qio vahianinra. Mwihua quavanto hia qio vahirata mwihua nkyi kyuqe kyaiqa taqeta nronravanto tumuani entaraqaa mwihua Kotira nrutu tuaaherevara.

<sup>13</sup> Nkye tiri vunyaa vaisi Karaisirara rieqata ekyaa kamaninra kyaiqa vaisi qua riaata. Kamaninra kyaiqa vaisi vunyaa vaisi mwia qua riemwaqita quata.

<sup>14</sup> Kamaniva nronraqama kyaihua nkye mwihua quavata riemwaqita quata. Mwia qua nteqa kyehua ntuqutita, mwia qua riehua qamwata nyataate tiro, kamaniva vunyava nai nraakiaraanaa vaisi mpovata nronraqama kyaira.

**15** Kotira kyakyahiva nkyiara mwitaamama vahiro: Nkye kyuqe kyaiqa nraahu vare varivaro hia vu nraato vahiarihua nkyiara api qua tiva hia qio vahirata mwihua tirema varivara.

**16** Uaqia hi kyaiqava nkyi ntavaaqavu kyaankyo tiro, nkyi huvantu kyaihata nkye qatinani nritareta variara. Nkye qatinani nritare varita tiqata, Tire qatinani varurahuave, tiqata nkye uaqia hi kyaiqara utivora. Nkye Kotiva rupa tai vaisihua votima kyeta variqita nrohiata.

**17** Nkye variqata ekyaa nraakye qorara kyuqe hiahuave nraahu qiata. Nkye Iesusira nraaqiara variqata nanrianra nanrianra mwutukya vahirata variata. Nkye Kotirara aatuma kyeqata variqi quata. Kamaninra vunyaa vaisiara nronra vaisive qiata.

### *Karaisiva nriqa vi inraikyara varaintema kyeta nkyevata varaqita quate tura*

**18** Nte nkyi kyaiqa vaisiara tirera. Nkye kyuqema kyeta kyaiqa vareqata nkyeta nronra vaisi qua riemwaqita quata. Nkyi nronravanto nkyi kyuqema nyateqaro nkyiara mwi kyaiqara varaate tirera, mwia qua riemwaqita quata. Nkyi nronravanto hia nkyi kyuqema nyateqaro nkyiara mwi kyaiqara varaate tirera, mwia quavata qati nraahuma riemwaqita quata.

**19** Nkye mwitaama variqita vivaro Kotivama nkyi kyuqema nyataananro. Nkye Kotira qua riemwaqita vi varivaro vaisi mpovanto qumina inraikya kyaara nkyi qoraqama nyatairera, nkye nriqa quani inraikyara vareqata kepukyaqamaqita vi varivaro Kotiva mwianra rieqaroma nkyi kyuqema nyataananro.

**20** Nkye uaqia hi kyaiqara utivata mwia kyaara nkyi rivata nkye kyaakueqama varivera, Kotiva hiama mwianra rieqaro nkyi kyuqema nyataananro. Nkye kyuqe kyaiqa nraahu vare varivata mwia kyaara nkyi rivata nkye kyaakueqama varivera, Kotiva mwianra rieqaro nkyi kyuqema nyataananro.

**21** Nkye mwitaamaqita quate tiro, Kotiva nkyi nyaanrama taira. Karaisiva nkyiarave tiro, nriqa vu inraikyara vareqaro Karaisiva nkyiara nte hiarintema kyeta nkyevata mwitaa hiate tiro, mwiva nriqa vu inraikyara varaqiro vura.

**22** Karaisiva hia qora kyaiqavata varovaro mwia nroqitairo hia unra quavantovata qovara hora.

**23** Mwihua Karaisirara uaqia hu quara tuvaro Karaisiva hia nkyiariaravata uaqia hu quara tura. Karaisiva nriqa vu inraikyara vareqaro hia mporara tiqaro, Nraakiara ina qoraqama mwataaninrave, tiraitiro, Karaisiva Kotirara nraahu nronraqama kyero riero tiqaro, Kotiva ni qua avuqavu hiqaro qua avuqavu ti varivave. Mwiva nraahuma ni kyaahaqa hiananrove, tiro tura.

**24** Tiriara mwihua hia qora kyaiqa utiraitita, kyuqe aanraqaa nraahu quate tiro, Karaisiva tiriara rieqaro tiri uaqia hu inraikyara varero uro kyatariqaa qutu vura. Karaisira mwamwanta toqa ntupepaama kyaaraqaataita nkye kyuqema vita variavo.

**25** Sipisipivanto api nrohintema kyeta nkyevata kyuqe aanraqaataita apiqama kyeta nrohi varura. Mate mwaa entara nkyi sita varaihata nkye nrumu ntanteta nkyi mwanraquraqaa ntaqikyi nyate vari vaisira mwia vataqita vi variara.

## 3

### *Nraata vaati varaa nraakye qorahuara tura*

**1-2** Nte nkye vaati varahuara tirera. Nkye nkyeta saatimwanra qua nraahu riemwaqita quata. Nkye mwitaamaqi vi varivata nkyi saatimwanra hia Kotira qua riehua nkyi kyuqe kyaiqa taqeta tiqata, Kyai tirevata mwihua nraantante Kotira qua riemwaqita quare, tivara. Nkye nkyeta saatimwanranra hia mpo qua tiraitita, kyuqe kyaiqa nraahu vareqata nkyeta qoraisiara nraahu riemwaqita vivata mwihua nkyiara mwitaama qiata.

<sup>3</sup> Nkye kyuqe nraakyе varirera hiqata nkyeta nyamwanta mwunruqa hi inraikyarara hia qamwataata. Hia qiata mwunruqa hirara nronraqama kyeta riaata. Hia nkyeta nyamwantaaqa ntuwaqute inraikyarara nronraqama kyeta riaata.

<sup>4</sup> Nkye kyuqe nraakyе varirerata nkyeta utaqive mwutukyaqive mwunruqa hirara nronraqama kyeta riaata. Nkyi mwutukyaqitairo kyuqema kye mwunruqa hi inraikyava qovara hiananro. Mwia mwutukyaqitairo qihakya hi variati nraakyera, mwi nraakyerara Kotiva qamwata mwatero kyuqe nraakyeve qiananro.

<sup>5</sup> Haaru Kotira nrutu tuaahereqa varu nraakyehua variqata Kotiva nriqiqaa kyauqu vatero tu quarara riemwa teta nkyiari saatimwanra qua riemwaqita vuva, mwi quava mwinramwuhua mwunruqama to inraikyava vhura.

<sup>6</sup> Tiri haivaqava Seraava mwitaa hi varu nraakyeva varura. Mwiva nai vaati Evarahaamunra qua riemwaqiro vi variqaro mwianra tiqaro, E niqaa ntaqikyi variaravave, turama. Nkye nraakyе kyuqe kyaiqa nraahu vareqata hia mpo inraikya nraatu aatu hivera, nkye Seraara nraamwunramwanrama varivara.

<sup>7</sup> Mwia votima kyeta nkye nraakyе mwihua saatimwanravantovata kyuqema kyeqata nkyeta nyaatamwanraqa ntaqikyiqi quata. Nraakyе nyamwantavanto hia kepukya nyamwanta vahirara tita, nkye nkyeta nyaatamwanraqa kyuqema kyeta ntaqikyiqi quata. Kotiva nkyi kyuqema nyataintema kyero Kotiva nkyi nyaatamwanravata kyuqema nyatairata mwihuavata ekyaa enta qati variqi virara tita, nkye mwianra rieqatama kyuqema kyeta mwihuqaa ntaqikyiqi quata. Nkye mwitaa hivera, hia mpo inraikyavanto nkyi antua kyairata nkye qiomma Kotirara aakyara ntamwaqita vivara.

### *Nkye kuaara nraati nraahu variate tura*

<sup>8</sup> Nte mwaa quara taiqa kyarerera hiqana mwitaama tina, Nkye variqata kuaara nraati nraahu variata. Nkye nanrianra nanrianra po kye tiqata variata. Nkye Kotira nraaqiara variqatarra tita, nanrianra nanrianra mwutukya vahirata variata. Hia nkyeta nrutu tuaheraraitita, nanrianra nanrianra kyuqe hiqata variata.

<sup>9</sup> Mpowanto nkyi qoraqama nyatairera, hiama nkye naivata qoraqama mwataata. Mpowanto nkyiara mwaaquqama quate tirera, hia nkye nanrianra, Enavata mwaaquqama vinanrave, qiat. Nkye mwi vaisirara tiqata, Kyairaro Kotiva i kyuqema mwataarive, qiat. Kotivavata nkyiara kyuqema vita variate tiro, nkyi nyaanrama tairara tita, nkye mwitaama qiat.

<sup>10</sup> Kotira mpukuqi mwitaama tiro:

Kyuqema kyero variqaro

airi enta qati variqiro quari vaisiva,  
mwi vaisiva qora kyaiqa qaqlira kyero hia unra tirera,  
mwiva qiomma kyuqema kyero variqaro  
qati variqiro quananrove.

<sup>11</sup> Mwi vaisiva qora kyaiqa mwoqa mwinro

kyuqe kyaiqa nraahu varaqiro quarive.

Mwi vaisiva antua qua qaqlira kyero

mwia mwutukyavanto qihakya viraro  
kyuqe qua nraahu timwaqiro quarive.

<sup>12</sup> Nronravanto nai vuqotairo kyuqema kyero

nrohi vari vaisira taqamwaqiro viro nai nraatoqotairo

mwianra aakyara nte variahua qua rie varirave.

Qora kyaiqa vare nraakyе qorahua variavaro

nronravanto mwihua mwoqa nyinrave, tura. (Sng 34:12-16)

<sup>13</sup> Nkye kepukyaqama kyeta kyuqe kyaiqa nraahu varaqi vivera, tavave qio nkyi qoraqama nyataananro?

<sup>14</sup> Nkye kyuqe kyaiqa vare varivaro mpovanto mwia kyaara nkyi qoraqama nyatairata nkye nriqa vi inraikyara varaivera, qamwateqa variata. Nkyi qoraqama nyate vari vaisihua nyaatu hia aatu hita hia ua hiata.

<sup>15</sup> Nkye Karaisirara kyuqevave tiqatama mwianra nraahu tiriqaa ntaqikyiqira quante qiata. Nkye terama te varivaro mpovanto nkyiara nkye nanra quave riemwaqi quavo tirera, nkye Karaisirara riemwaqi vi quara mwia timwa mwiata.

<sup>16</sup> Nkye mwi quara mwia timwa mwinrenra hiqata mwi vaisira kyuqema mwatereqatama qihakyama kyeta timwa mwiata. Nkyi toqaamwu ruankyorave tiqata vivinrama kyeqata variqi quata. Nkye mwitaama vivinrama kyeta variqi vivata mpo vaisinramwuvanto nkyi kyaiqara qora kyaiqave tivera, mwiaqaataita mwihua nkye Karaisira qua rieqata nrohira taqeta kyaurira inraikya varevara.

<sup>17</sup> Kotira kyakya hiariva nkyiara mwihua kyuqe kyaiqa vareqatama nriqa vira inraikya varevarave tirera, nkye mwianra kyuquerave tivara. Nkye qora kyaiqa vare varira kyaara nriqa vira inraikya varaivera, nkye mwianra hia kyuquerave tivara.

### *Karaisiva tiriara rieqaro nriqa vu inraikyara varaqiro vura*

<sup>18</sup> Karaivisa tire qora kyaiqa uti varuna quara ekyara taiqa kyarero mwivavata nriqa vu inraikyara varero uro kuua nani qutu vura. Tire qora kyaiqa uti varurahua mwia kyaara teta qutu quataara vaiharo Karaivisa ntapihi kyero variva tiriara rieqaro uro qutu vura. Tiri tivita varero Kotiva hinani uro kyaankye tiro, Karaivisa tirara rieqaro qutu vura. Karaivisa ru kyovaro mwiva qutu vuvaro Kotiva mwia qati vara sivuma kyovaro mwiva mwanraquravatama kyero qati siviro varura.

<sup>19</sup> Karaivisa mwanraquravanto qati siviro uro rupa to mwanraqurahua mwakyaakya timwa nyunra.

<sup>20</sup> Haaru Noaava varu entara mwihua Kotira qua nteqa kye varuvaro Kotiva hia mwihua qamwanrama ntuqutu kyaraitiro, variqiro vuvaro Noaava nramanriqaa quani nraamwunra hoqa taiqa kyovaro humwunravanto utuvaro Kotiva nraakye qora 8 nramwu nraahu kyaahaqama nyatovata mwinramwuhua qio varura.

<sup>21</sup> Mwinramwuhua qora kyaiqa vare varu nraakye qorahua qaqlira mwini kyeta mwinramwuhua nraahu nraamwuqi nramanriqaa variqata qio varura. Mwia votima kyeta tire qora aanra qaqlira kyeta nramanri vare kyuqe aanraqaa vi varunanra. Tire nramanri vare varuraro hia nramanrivanto tiri mwamwanta hiqama timwate varirave. Tire nramanri vare tiqata, Kyai qora aanra qaqlira kyeta Kotira aanraqaa nraahu quare, tiqata nramanri varaunana. Tiriara Kotira aanraqaa quate tiro, Iesusiva qutu vuraqitairo qaiqaa qati sivura.

<sup>22</sup> Iesusiva qutu vuraqitairo qaiqaa qati siviro mwiaqaatairo nyaamwuni viro mwaa entara mwiva Kotira kyauqu kyaatutani uro variqiro viqaro ekyaa nyaamwuni vahi inraikyaraqaave, ekyaa nyaamwuni nronraqama quaninraqaave, ntaqikyiqiro vi varira.

## 4

### *Nkyevata nriqa vi inraikyara vare aanrava vahiananrove tura*

<sup>1</sup> Karaivisa vaisiqama viro variqaro nriqa vu inraikyara varaqiro vurara tita, nkyevata tiqata, Tirevata qiomma nriqa quani inraikyara varaqi quananrave, qiata. Nkye qora kyaiqa varaarorave tita, nriqa vi inraikyara varaqi viqata qiomma qora kyaiqa nraatara kyevara.

<sup>2</sup> Nkye mwianra rieqata mwatani qati variqi viqata nkyeta qora kyaiqa utuataa hianinra qaqlira kyeta Kotira kyakya hiani kyaiqara nraahu varaqita quata.

<sup>3</sup> Kotira qua hia ria nraakye qorahua votima kyeta nkyevata haaru api nrohiqata nkyeta varataa hi kyaiqara varaqita vura. Qio mwiaqaa taiqairae hia qaiqaavata mwi kyaiqara utirerave qiata. Mwi entara nkye api qaraqita nrohi varurave, api

inraikyara mwutukya vahuvata varurave, nkye nramanri nreqata uera ntorave, nkye omwata nronraqama kye nronranrave, kyarave nramanrive airiqama kye nronrave, nkye mwitaa hiqata nkye qumina vaisivanto ututo inraikyarara mwanriqave tiqatama mwia nrutu nraahu tuaahere varura. Nkye haaru mwitaa mwitaamaqi viqata qoraqama vita varura.

<sup>4</sup> Mwaa entara nkye mwi kyaiqara qaqlira kyeta variavata hia Kotira qua riaa nraakye qorahua nkyiara nkyevata tire hiarante hiate qiaavata nkye mwihua qua hia riaraitita variavata mwihua nrihanrama vita mwia kyaara nkyiara qora qua ti variara.

<sup>5</sup> Qio riaata. Mwihua nraakiara ekyaa qua avuqavu hianinra vuqaa variqatama mwihua nkyiari uaqlia hiani kyaiqara utira timwa qovarama kyevara. Ekyaa qua avuqavu hiariva Kotiva variqaro ekyaa qati varihuave, qutu vihuave, mwiva mwihua qua tukyama kyero riemwaqiro quananro.

<sup>6</sup> Mwianra rieqaroma Karaisiva haaru qutu vuhuavata kyuqe qua timwa nyunra. Haaru (Noaava varu entara) nraakye qora mwihua Kotira qua nteqa kyovaro Kotiva mwihua ru kyovata qutu vura. Mwihua mwanraquravanto Kotiva qati varintema kyero qati variqita quate tiro, (Karaisiva) mwihuavata kyuqe qua timwa nyunra.

### *Ekyara enta qaumaqa hirara rieqata kyuqema kye nrohiqata variata*

<sup>7</sup> Mwaa mwataro taiqaari entava qaumatoma vahiro. Nkye mwianra riaivaro nkyi mwutukyaqitairo hia raraqa tairata kyuqema kyeta nkyetaqaa ntakikyiqata nkyi mwutukyavanto qihakya hi varirata variata. Vu nraato ntapihirata rieqata variata. Nkye mwitaamaqi viqata qioma Kotirara aakyara ntamwaqita vivara.

<sup>8</sup> Vuni mwaa quara nraante riaata. Nkye nanrianra nanrianra mpoqama kyeta mwutukya vahirata variata. Nkye mwitaamaqita vivaro Kotiva nkye airi uaqlia hi kyaiqara utira taunru kyaananro.

<sup>9</sup> Kyuqema kyeta nkyeta nraamwuqi nkyeta qata vakyaahua Jesusira nraaqiara sita vateta kyara nyiata. Nyiqatama hia nrutu nraunru tiraitita, qati kyara nraahu nyiata.

<sup>10</sup> Kotiva nkyi kyuqema nyateqaro nkyi kuua kuua mwihua mpo kyaiqa mpo kyaiqa nyaamwutero mwi kyaiqara varera kepukyavata nyinranra tita, nkye mwi kyaiqara varaqi viqata nai kyaahaqa hi nai kyaahaqa hitamaqita quata.

<sup>11</sup> Vaisivanto mwaanra tirera hiqaro Kotira qua nraahuma qiananro. Vaisivanto mpora kyaiqa vara mwatarera hiro tiqaro, Kotiva ni kyaahaqa hi varihana nte qioma i kyaiqa vara mwataaninrave, qiananro. Nkye mwitaamaqita vivaro Jesusi Karaisiraqatairo Kotira nrutuvanto nronraqa hiari. Kotira nrutuvantovata Kotira kepukyavantovata ekyaa enta qati vahiqiro nraahu quananrove. Nte quitaama tuqo.

### *Muaanra varaqi viqata kyuqe aanraqaa nraahu quate tura*

<sup>12</sup> Ni mwatanaa tuaavo, qiaqotairo mwataara hintema kyero mpo inraikya mpo inraikyavanto nkyi mwataara hi varihata nkye variara. Qio hia nkye nrihanrama vi tiqata, Nanraqamave mwi inraikyava qoraqama timwa te variho? qiata.

<sup>13</sup> Nkye mwitaama qiata: Karaisiva nriqa vi inraikyara varairara rieqama tirevata mwia kyaahaqa hiqata nriqa vi inraikyara varaqita vi varuro, qiata. Nkye mwitaa timwa kyeta variqi vivaro Karaisira peqa okyaravanto qovarama quani entaraqaa nkyi mwutukyaqitairo kyuqe hirata varivara.

<sup>14</sup> Nkye Karaisira vataqi vihua varivata mwia kyaara nkyiara uaqlia hi quara tivera, nkye qamwateqata nraahuma variata. Mwihua nkyiara uaqlia hi quara tivata nkye qioma tiqata, Kotira mwanraqura mpoqaraava tirivata varihata varurahuave, tivara. Mwianra rieqatama qamwateqata variata.

<sup>15</sup> Nkye vaisi ru kyera kyaarave, nkye mpuara utira kyaarave, nkye kamaninra qua nteqa kyera kyaarave, nkye mpo vaisi kyaiqara qumina antua qua tira kyaarave, nkyi qoraqama nyataivata nriqa vira inraikya varevora.

<sup>16</sup> Nkye Karaisira nraaqiara variqata kyuqe aanraqaa nrohira kyaara nkye nriqa vira inraikya varaivera, nkye hia kyaurira inraikya varauro qiata. Mwataama qiata, Tire Karaisira nraaqiara varurahuara tita, mwianra rieqatama tire Kotira nrutu tuaaheraqi virerave, qiata.

<sup>17</sup> Kotiva ko qiani entava nri ntairaro Kotiva tiri nai qua riaarahua nraante qua avuqavu hiananro. Mwiva vuni tiri qua nraante avuqavuma kyero, qikye, mwia nraakiara hia mwia nai qua riehua ko tiqaro nataama quave mwihuqaqa vataananrove.

<sup>18</sup> Kotira mpukuqi mwitaama tiro:

Avuqavu nrohiari vaisiva mwukyaari tu kyero  
kyuqe aanraqaa nrohiraro  
Kotiva mwia huvantu kyero vitaananrove.  
Avuqavu nrohiani vaisira okyaravanto mwitaama  
vahirara tita, hia Kotira qua riehua  
uaqia hi kyaiqara nraahu vare varihua  
qora aanraqaa nrohita variqi vita qikye, mwihuqaqa  
nraakiara tainive uro taiqa vivarave? tura. (Snd 11:31)

<sup>19</sup> Kotira kyakya hiariva nkyiara qiomma nriqa vi inraikyara varaqi vivarave tirera, nkye Kotirara mwutukya qihakyama kyeta vateta kyuqe kyaiqa mwia qati nraahu varaqi quata. Kotiva tiri utu taiva hiama nai kyauqu nriqiqaa vateqaro qutaa qua tiriara ti quara taunru kyaananro.

## 5

### *Nronra vaisinramwuanra mwitaa hiate tura*

<sup>1</sup> Nte nkyiqa ntaqikyi variahua nronra vaisinramwuanra tirera. Ntevata nkyi votima kyena Iesusira nraakye qoraqaa ntaqikyi varuvama varina. Karaisiva nriqa vu inraikyara vare varuvana nte variqana ntena puqotaina taqaavara. Nraakiara mwia peqa okyaravanto qovara hiani entaraqaa ntevata variqana ntena puqotaina taqaaninra. Nte nkyi nronra vaisiara mwitaa hiate qianinra riaata.

<sup>2</sup> Kotiva sipisipi votima kyero nkyinramwu nyinra nkyenramwu mwi nraakye qorahuaqaa kyuqema kyeta ntaqikyiqi quata. Kotira kyakya hiva nkyiara mwi kyaiqara varaaate tirara tita, nkye hia qoriri hiraitita, nkye mwihuqaqa kyuqema kye ntaqikyiataa hirata mwihuqaqa ntaqikyiqi quata. Hia kyoqaara rieqata mwi kyaiqara vararaitita, nraakye qorara nronraqama kye riaivaro nkyi mwutukyaqitai varaataa hirata qamwateqata varaata.

<sup>3</sup> Kotiva nkyinramwuanra ni nraakye qoraqaa ntaqikyi mataate tirara tita, hia nkyenramwu tire nronra vaisi varuro tiqata mwihuara mwitaa hiate timwaqi viraitita, nkyenramwu mwihuua suni variqata kyuqe kyaiqa vare varivata nraakye qoravanto nkyinramwu kyaiqa taqamwaqi viqata mwihuavata kyuqe kyaiqa varaqita quata.

<sup>4</sup> Nkye mwitaamaqi vi varivaro nraakiara sipisipi qova vunyaava tumuaninraqaa mwiva nkyi nronraqama kyairata nkye nronraqama vita vari okyarava ekyaa enta qati nraahu vahiqiro quananro.

### *Qaraakya vaisinramwuanra tura*

<sup>5</sup> Nkye qaraakya vaisivantovata nkye kyuqema kyeta nkyeta nronra vaisi mwemwani variqata mwihuua qua riemwaqita quata. Nkye ekyaa hini nraakye qora mwihuavata hia nkyeta nyutuara nronraqama kyeta riaraitita, nkye nai kyaahaqa hi nai kyaahaqamaqita quata. Kotira mpukuqi mwitaama tiro:

Nai nrutu nraahu tuaaheraani vaisira  
Kotiva raaquta kyaananrove.

Nai vara mwataniqa hiani vaisira Kotiva mwianra  
po kye timwa mwatero mwia kyuqema mwataananrove,  
tura. (Snd 3:34)

<sup>6</sup> Nkye mwi quara rieqatama nkyeta vara mwataniqama kyaivaro Kotiva kepukyavanto nkyiqa ntaqikyiqiro viqaro nraakiara mwivama kyuqe ihera nai mwatama taani iherara nkyi nyutu tuaahera kyaari.

<sup>7</sup> Hia qumina mpo inraikyara mpo inraikyara nronraqama kye riemwaqita vivaro nkyi mwutukyavanto uaquia hiari. Kotiva nkyiara nronraqama kyero rie varirara tita, nkye ekyaa mwi quara Kotira timwa mwivaro Kotiva nkyi kyaahaqa hiari.

<sup>8</sup> Nkye vu ntapairi kyeta viti viri taqeta rauriqata variata. Vaisi rukye vari vairiva, raionivanto nruqua timwaqiro viqaro vaisi ru kyarera uti varintema kyero nkyi nramwutaa Saataaniva vaisi taiqa kyarero uti variqaro viro nrinro hi varira.

<sup>9</sup> Nkye riavata ekyaa nkyi qata vakya mpoqi mpoqi variahua nkyi nraantantamwa kyeta Iesusira kyaara nriqa vi inraikyara vare variarara tita, nkyevata Kotira qua nraahu riemwaqi vita kyaakueqama variqata hia Saataaninra qua riaata.

<sup>10</sup> Nkye uqenraa nraakye qorahua variqata nriqa vi inraikyara quaahaqa varaqita vivaro Kotiva naima nkyi kepukyaqama kyaananro. Kotiva nkyi kepukyaqama kyairata nkye kepuky nraakye qora nraahu variqatama ntapihi kye variqi vivara. Kotiva tiri kyaahaqa hirero kyuqema timwa te variva, mwivama nkyiara mwihua Karaisira vatama kyeta kuaaqi variqata kepukyaqama kyeta ekyaa enta variqita quate tiro, nkyi nyaanrama taira.

<sup>11</sup> Kotiva ekyaa enta variqiro viraro mwia peqavanto ekyaa enta vahiqiro quanarove. Qutaave.

### *Qua mwanteqaro ekyara qua tura*

<sup>12</sup> Nte mata mwaa quaqiara nkyi timwa nyinrenra huqaro Sairaasiva qara ntumwa taihana nkyini vatena. Nte Sairaasirara mwiva ni katavanto hia ni qaqlira kyaraitiro, ni kyuqema kyero kyaahaqamaqiro vi vari vaisivama variho tura. Nkyi mwutukyavanto kyuqe hirata variate tina, nte qara mwaaqi Kotiva nkyi kyuqema nyataani okyarara nkyi timwa nyunra. Kotiva nkyi kyuqema nyatairata nkye avuqavuma kyeta nraahu nrohiata.

<sup>13</sup> Kotira nraakye qora Papironini variahua nkyi voti hiahua Kotiva nai kyaama tai nraakye qorahua variqatara tita, mwihua nkyi nramwunaahua variqatama mwihua nkyi qua mwante varita. Nte ni maaquve tu vaisiva Maakiva mwivavatama nkyi qua mwante variro.

<sup>14</sup> Nkye Iesusira nraaqiara variqata nanrianra nanrianra mwutukya vahirata kyuqema kyeta nai quamwante nai quamwante hiata. Nkye Karaisira vatama kyeta kuaaqi varihua varivaro nkyi mwutukyavanto qihaakya hirata variata.

## 2 PITAA

### Pitaava nraakiaraa qara vara kyora

Iesusira qati vara sivuma kyovaro nyaamwuni uro varuvaro airi ihi nritarovaro Pitaava mwaa quara qara ntumwa tora.

Iesusira nraakyе qoravanto kyuqema kye Iesusi Karaisira qua riemwaqi viqata hia unra qua mwaanra ti varia vaisihua qua riaate tiro, Pitaava mwaa quara qara ntumwa tora.

<sup>1</sup> Nte Saimoni Pitaavama. Iesusi Karaisiva ni nronraqama kyero ni titaihana nte mwia mwakyaakya timwaqi viqana mwia kyaiqa vaisima varina. Nte nkyiara rieqanama mwaa quara qara ntumwa tena.

Tiri mwanriqavanto tiri tivitaari vaisiva Iesusi Karaisiva, mwiva tiri avuqavuma timwa taihatara tita, nkye tiri nraantanteta kyuqe mwakyaakya nritarero vahira riemwaqi vi variarave.

<sup>2</sup> Nkye Kotira okyaravata, tiri vunyaa vaisi Iesusira okyaravata, ntapihi kyaahuara tita, nkye kyuqema kye variqi vivaro nkyi mwutukyaqitairo qihaakya hi varirata variqi quata.

#### *Kotiva tiri nai kyaama tairara tura*

<sup>3</sup> Karaisiva variharo Kotira mwanriqa okyara kepuqya okyaravanto Karaisiraqi variharo Karaisiva tiriara mwihua hia uaqia hi kyaiqara utiraitita, kyuqema kye variqi quate tiro, tiri kepuqyaqama kyaihata tire Kotira okyara ntapihi kye riemwaqi vunanra. Kotiva tiri nai kyaama torara tita, nraakiara tire mwia vatama kye variqata mwia peqa okyara taqeta mwiva kyuqema kyero variqiro quani okyarara taqeqlata variqi quananra.

<sup>4</sup> Kotiva nai kyauqu nriqiqaa vateqaro tiriara mpoqaraa qua turara tita, tire mwi quara rieqatama mwatani variqata hia api inraikyara mwutukya ntiraqe vita uaqama viraitita, tire Kotiva kyuqema kyero variqiro vintema kyeta tirevata variqi quara.

<sup>5</sup> Nkye Kotiva mpoqaraa qua turara riemwaqi viqata nkye kepuqyaqama kyeta variqi viqata kyuqe kyaiqa nraahu varaataa hirata varaqi viqata variata. Nkye Kotirara kepuqyaqama kye riemwaqi viqata kyuqe kyaiqa nraahu vareqata kyuqe okyara, mpo okyara mpo okyara ntapihi kye taqamwaqita quata.

<sup>6</sup> Nkye kyuqe okyara taqamwaqi viqata nkyeta nyamwantaqo uaqia hi kyaiqara utuaro timwa kyeqata, nkyeta nyamwantaqaa kyuqema kye ntaqikyiqi viqata variqi quata. Mwitaamaqi viqata hia qoriri hiraitita, kepuqyaqama kyeta variqi quata. Nkye kepuqyaqama kyeta variqi viqata Kotirara nraahu riemwaqita quata.

<sup>7</sup> Nkye Kotirara nraahu riemwaqi viqata nkyeta hena nraakyе qorara kyuqemaqita quata. Mwitaamaqi viqata nanrianra nanrianra mwutukya vahirata variata.

<sup>8</sup> Nkye mpoqiaavata mwitaamaqi vivera, nkyi kyaiqavanto hia qumina kyaiqa vahiraitiro, nkyi kyaiqavanto kyuqe kyaiqa nraahu vahirata nkye tiri vunyaa vaisi Iesusi Karaisira okyara ntapihi kyeta taqamwaqi vivara.

<sup>9</sup> Vaisi mpovanto hia mwitaamaqiro vi variva, mwiva vu qipa vi vaisira votima kyero variqaro hiama qio Kotira qua okyara taqero. Mwi vaisiva Karaisiva mwiva haaru uaqia hi kyaiqara utu quara nruka mwatairara qumimaqama kyeqaro apima variro.

<sup>10</sup> Ni kata pakyaa tuaavo, Kotiva nkyi nyaanrama kyero nkyi nai kyaama tairara tita, qutaa mwi quava nkyiqi mwivau vahiarive tita, nkye Kotira kyaiqa mpoqiaavata varaqita quata. Nkye mwitaamaqi viqata hia api aanra vivera,

<sup>11</sup> nkye tiri vunyaa vaisivanto Iesusi Karaisiva ntaqikyinani vihuama varivara. Tiri huvantu timwa taariva ntaqikyiari mwatava, mwi mwatava ekyaa enta qatima vahiqiro quananro.

<sup>12</sup> Mwi quara qutaa qua nkye riemwaqi viqata kepukyaqama kye vi variara nte ntapihi kyaurave. Nte mwianra rieqanama nte qati nraahu qaiqaavata qaiqaavata mwi quara nkyi timwa nyiqana mwi quara vu nraatoqi vateta riemwaqi viqata variate timwaqi virera.

<sup>13</sup> Ni mamanta mwaava hia qutu viraqe nte qati variqi quani entara nte qioma qaiqaavata qaiqaavata nkyi timwa nyianriva vahiananro.

<sup>14</sup> Ni mamantavanto haraara nraamwu votima kyeroma vahiro. Pataqia nraahu vari kyena nte ntena mamanta mwaini kyena nyaamwuni virerave. Tiri vunyaa vaisivanto Iesusi Karaisiva mwatani variqaro nte qutu quaninranra ntapihi kyero tihana riaurave.

<sup>15</sup> Nte ntena qutuariva qauma vahirara rienama nte tiqana, Nte qutu quarita nkye mwi quara riemwaqita quate tinama nte qaiqaavata qaiqaavata kyuqe aanra nrohi okyarara nkyi timwa nyinrenrave, ti varura.

*Tire teta tivuqotai Karaisira peqa okyara ntuvaahhe vari okyarara taqaunananrave tura*

<sup>16</sup> Tire tiri vunyaa vaisi Iesusi Karaisira okyara nkyi timwa nyiqata hia teta riemwa kye uri qua mwaanra nraantantamwa kyeta nkyi timwa nyunananravauma. Tire variqata teta tivuqo Karaisira peqa okyara taqaavananrave.

<sup>17</sup> Karaisira qova nritarero nyaamwuni kepukyavanto variva, Kotiva nai mwaaqu Iesusira ntuvaahama mwatero tiqaro, Mwaa ni maaqvantomava variho. Ni mutukyavanto mwianra mpoqiaavata vahana nte mwianra qamwateqana varuqo, tura.

<sup>18</sup> Haaru Kotiva mwitaa tuvata tire tetavanto mwi entara taaqi kyotata mwiaqaa Iesusira vatama kye variqata Kotiva nyaamwusairo tu quara riaavanranrave.

<sup>19</sup> Tire mwi inraikyara mwi inraikyara taqaunananra tita, tire poropeti vaisinramwuvanto haaru qovarama kyo quava, mwi quava qutaa qua vaiho tunanra. Nkyevata mwi quara anoma kye riemwaqi vivera, nkye qioma varivara. Poropeti vaisinramwuvanto tu quava, mwi quava omwavanto kyokiraqi itaintema kyeroma itamwaqiro vi variro. Mwi quava omwa votima kyero itamwaqiro viharo qaatastarera iharo mwiaqatairo itataraaravanto nruru ntuvaahaintema hianaro. Iesusira quavanto qaatarenani itataraaravanto ntuvaahhe varintema kyeroma nkyi mwutukyqaqti ntuvaahama nyate variananro.

<sup>20</sup> Nkye poropetivanto tu quarara rieqatama mwaa quara nraante ntapihi kye rieqata variata. Poropetivanto qara ntumwa to quara mpukuqi vahira, haunri vaisi mpovanto nai riemwa kyero tiqaro, Mwi quara okyaravanto mwitaa mwitaamama vaiho, qiankyora.

<sup>21</sup> Hia poropeti mwihua nkyiari riemwa kyeta ekyaa mwi quara turavauma. Kotira mwanraquravanto poropeti mwihua kyaahaqa hi varuvata mwihua Kotira qua qovarama kye varurama.

## 2

*Unra timwa kyeqata tire poropeti vaisima varuro tu vaisihuara tura*

<sup>1</sup> Haaru vaisi mpo uhua qovarama vita nraakye qora utaqaa variqata unra tiqata, Tire poropetivanto variqata Kotira qua qovarama kyeqatama nkyi timwa nyi varuro, tura. Mwihua mwitaa timwa kyeqata unra qua nraahu ti varurave. Mwihua ti varuntema kyeta nraakiara vaisi mponramwuvanto qovarama vita nkyi utaqaa variqata unra qua nraahu nkyi timwa nyiqi vivarave. Mwihua qua mwakyaakyavanto unra qua vahiraro mwi quara riaariva viro uaqiamama quananro. Tiri vunyaa vaisivanto Iesusiva mwihua huvantu kyaihata mwihua mwiaqatai qaqira kyeta Iesusira

qoririma mwate variarara tiro, mwia kyaara mwihua taiqa kyaariva qaumatoma vahiro.

<sup>2</sup> Mwihua kyaurira kyaiqa varaqi vivata nraakye qora airivanto mwihua qua rieqata mwihua sataqita vivara. Mwihua kyaurira kyaiqa varaqi vivata nraakye qora mpo ihua mwihua kyaiqa taqetama tiqata, Qikye, Karaisira qua qutaa qua rieqata mwia vataqi vi varia aanrava uaqia hi aanranravema tivara.

<sup>3</sup> Unraqama kyeqata Kotira qua ti varihua qovarama vita mwihua kepukyaqama kyeqata nkyi munima ntavihi kye vararerera utiqata mwihua nkyiari riemwate quara nkyi timwa nyivara. Mwi vaisihua mwitaamaqi vi varirara tiro, Kotiva haaru mwihua kyaiqa kyaara mwihuaqaa qua vataira. Mwihua taiqa kyaariva hiama vaite variro.

<sup>4</sup> Haaru nyaamwunyaahua mponramwuvanto Kotira qua nteqa kyovaro Kotiva hia mwihua taqe kyaraitiro, Kotiva mwihua nkyiari uaqia hu kyaiqara utura qaara qutu quahua varianani vara kyero tuto kyorave. Mwihua mwini rupa taihata variqata Kotiva ko qiani entara vekyvariarama.

<sup>5</sup> Haaru varu entara nraakye qoravanto hia Kotirara riaraitita, variqi vi varuvaro Kotiva mwia kyara hia mwihua taqe kyaraitiro, Kotiva tuvaro humwunravanto mwihua taiqa tuto kyorave. Mwi entara Noaava nraahu Kotira okyara avuqavu hu okyarara nraakye qora timwa nyi varurara tiro, Kotiva mwiavata mwia vataahua 7 nramwuvata vekyahu nyatovata qio varura.

<sup>6</sup> Haaru Sotomiqi varuhuavata Komoraaqi varuhuavata uaqia hi kyaiqara uti varuvaro mwia kyaara Kotiva mwatukya mwitana qiaqotairo taiqa kyovaro qarapaa nraahu vahura. Nraakiara hia Kotirara riehua variqata Kotiva tirivata mwitaama kye taiqa kyaankyo tiqata variate tiro, Kotiva mwihua mwitaama kyora.

<sup>7</sup> Kotiva mwi mwatukyatana taiqa kyarerera hiro mwiva Rotira nraahu vaitutuma kyero kyaahaqama kyovaro qati vura. Rotira vaisi kyuqeva Sotomiqi variqaro taqovata mwi mwatanaahua vaisivanto mpo qua mpo qua nteqa kyeqata nanrianra nanrianra nrohiqata qora kyaiqa uti varuvaro Rotira mwutukyavanto uaqia huvaro varura.

<sup>8</sup> Rotira vaisi kyuqeva variqaro mpo enta mpo enta mwi mwatanaahua kyapata variqiro viqaro mwihua uaqia hu kyaiqara uti varuvaro vuqo taqoraravata, nraatoqo rioraravata, mwia mwutukyavanto uaqia huvaro varura.

<sup>9</sup> Haaru Kotiva mwitaamaqiro vurara tita, tire ntapihi kyauraro Kotiva kyuqe hia vaisihua qati vaitutuma kyeqaro kyaihata quavaro qora hia vaisihua rukye varivama variro. Kotiva uaqia hi kyaiqara uti variahua tuteru variqiro viro nraakiara ko qiani entaraqaama mwihua ko qiananro.

<sup>10</sup> Vaisivanto hia Kotira quavata mpohua quavata riaraitita, mwihua nkyiari mwamwanta kyakya hi kyaiqara nraahu vare variavaro mwia kyaara Kotiva mwihuaqaa qua nronrama vataananro.

Unraqama kyeqata Kotira mwakyaakya ti varia vaisihua okyarara tirerave. Mwihua nkyiari qua timwa kyeqata nyaamwunyaahua nronra vaisiara qumina vaisive tiqata mwihuaravata uaqia hi quara nraahu timwaqi vi variarave.

<sup>11</sup> Mwi vaisihua uapaa vaisivanto variqata nyaamwunyaahua nyutu vara mwataniqa hiqata ti variavata nyaamwunyaahua nronravanto variqatavata hia mwihua nraantantamwa kyeta qua qiara. Nyaamwunyaahua Kotira vuqaa varita tiqata, Tire mpohua nyutu vara mwataniqa hiqata uaqia hi quara qiarorave, tiqata hia mpohuara uaqia hi quara qiara.

<sup>12</sup> Nyaamwunyaahua mwitaa ti variavata unraqama kyeqata Kotira mwakyaakya ti varia vaisihua hia ntapihia inraikyara mwi inraikydarara uaqia hi quara nraahu ti variara. Mwihua qaakyau quara vairi hia vu nraatovata vahua votima kyeta variara. Qaakyau quara vairi mwihua hia taqeqa qati kyakya hiarave. Mwihua ru nraahu

kyakya hiarave. Mwia nraantantamwa kye nraakiara mwi vaisihuavata ru kyairata vita raupirima vivarave.

<sup>13</sup> Mwi vaisihua henahua uaqama nyate variarara tiro, nraakiara nkyiarivata Kotiva uaqama nyatairata raupirima vivarave. Nraakyе qoravanto huariqaa ntuvantuama vita omwata nre variavata mwi vaisihua airi kyaravata kepuuya nramanrivata mwia nraahu nreta tiqata, Tire mwi inraikyara nraahu nramwaqi viqata qamwateqata varirerave, ti variarave. Mwihua mwitaamaqi viqata nkyivata kyara nreqata nkyiari unra kyaiqara qamwataqi viqata nkyi kyaurira inraikya vara nyi variarave.

<sup>14</sup> Mwi vaisihua suvanto mpo enta mpo enta mpohua nyaatamwanraqaa nraahu vahata mwihuavata nrohirera uti variqata qio uaqia hi kyaiqara nraahu utuqi vi variarave. Mwi vaisihua hia kepuuyaqa hia nraakyе qorahua unra qua qihaakyama kyeqata timwa nyiqi quavata mwi nraakyе qorahua uaqama vi variara. Mpova hi inraikyara mwutukya nti varia okyarava mwihuaci nronraqama kyero vahirave. Mwihua mwitaamaqi vi variarara tiro, Kotiva mwia kyaara mwihuara uaqama vita variate tihata uaqama vita variarave.

<sup>15</sup> Mwi vaisihua kyuqe aanra avuqavuma kye nrohi varia aanranra qaqlira kyeta api aanraqaa nraahu nrohi variarave. Haaru vetato varu entara vaisi mpovanto mwia nrutu Mperaamuva Mpeora mwaaquvanto uaqia hu aanranraqaa vuntema kyeta, mwi vaisihuavata kuaa aanra mwiaqaa nraahu virera uti variarave. Haaru mwi entara Mperaamuva munimanra nraahu rieqaro uaqia hu kyaiqara vararerera uti varuvaro

<sup>16</sup> mwiaqatairo mwia ntonkivanto hia qua ti inraikyava, mwi entara vaisivanto qua tunteema kyero qua tiqaro mwia inronra huvaro Mperaamuva qaqlira kyero uaqia hu kyaiqara vararerera tura hia varorave.

<sup>17</sup> Mwi vaisihua rumwu nramanrivanto ekyaa tati vira votima kyeta variara. Toqa nronraqama kyero tiqaro tonamwu raapu varero vi varintema kyeta mwi vaisihua variara. Qikye, Kotiva mwihuani veva vevani viro upi kyokikina ri mwatuqyara terama tairave.

<sup>18</sup> Mwi vaisihua quaqama vahira turo tiqata qumina qua nraahu ti variarave. Mwi vaisihua tiqata, Qioma nkye nraakyе qora apì qaraqita nrohivarave, qia quaraqo nraakyе qora mpo hiahua qora kyaiqa qaqlira kye kyuqe aanra virera uti variahua vara apiqama taavata mwi vaisihua qua rieta, mwihua qaiqaa uaqama vita variarave.

<sup>19</sup> Mwi vaisihua tiqata, Tiri quavanto nkyi huvantu kyairata nkye qiomma variqi vivarave, tiqata mwitaa ti variavaro mwihua uaqia hi kyaiqava mwihua nkyiari rupa taihata variara. Uaqia hiari kyaiqava mpoqara mpoqara hiariva vaisi mpo nraatara kyero mwia rupa tairaro mwi vaisiva uaqia hi kyaiqara mwia kyaiqa vaisima variananro.

<sup>20</sup> Uaqia hi kyaiqava tiri rupa taihata varuraro Iesusi Karaisiva tiri vunyaa vaisivanto tiri huvantu kyaihata tire qati varunanra. Mpovanto Iesusira qua riero huvantu viro variqiro viro mwiaqatairo qaqlira kyero qaiqaa uaqia hi kyaiqara utuqi virera, uaqia hi kyaiqava mwia tuqara kye rupa tairaro mwiva qaqlira kyero nrumu ntantero kyuqe aanraqaa quariva hiama vahiananrove.

<sup>21</sup> Vaisivanto Karaisira qua avuqavu nrohi variani okyarara riemwaqi viro mwiaqatairo mwi vaisiva hiavata mwi quara qoririma mwataarive. Nte Kotira qua qoririma mwataani vaisirara mwitaama tina: Po, e Karaisira qua hia riaraitira, qati variraqe nte iara qiove qiaqara vahara e Karaisira qua riera mwiaqataira qaqlira kyera uaqia hi kyaiqara utuqira quarana nte iara po tuqo tirerave. (Haaru Karaisirara hia riaana entara iqaa qua pataqia vahara mwiaqataira e Karaisira qua riera mwianra nraahu riemwaqi quataara vahara e mwia qua qoririma kyaararoma mwia kyaara iqaa nronraqama kyeroqua vahiananrove qianinra.)

<sup>22</sup> Vaisivanto uaqia hi kyaqara qaqira kyero variro qaiqaa uro uaqia hi kyaqara vararerera uti vari vaisirara haaruua quavanto mwataama tiro:

Mwi vaisiva vairivanto mwunru vihi taira uro  
qaiqaa nai nraintema kyeroma variho, tura.

Qaiqaavata quavanto mwitaama tiro:

Quara hiqama taiva nruru ntantero  
uro qaiqaa horaqi henoma ntintema kyero  
mwi vaisiva variho, tura. (Snd 26:11)

Vaisivanto uaqia hi aanranra qaqlira kyaariva qaiqaa uro uaqia hi aanranra mwiaqaa quaninranra quavanto mwitaamama vahiro.

### 3

#### *Karaisiva uro ntante tumuaninranra tura*

<sup>1</sup> Ni nramwunaa tuaavo, nte qara mpo nkyini kyenama qaiqaa-vata mwaa qarara nkyini kyuqo. Nkyiara mwihua ni qara kyaara ntqata mwi quara mwi quara riemwa tegata kyuqe qua nraahu su nyaatoqi vahirata variqi quate tina, qara ntumwa taura.

<sup>2</sup> Nkye poropetivanto qara ntumwa to quara riaate tina, nte qara ntumwa taurave. Tiri vunyaa vaisivanto tiri huvantu kyaiva mwitaamaqi quate tiqaro tiri nai nronraqama kyai vaisihua timwa timwuvata tire mwi quara nkyi timwa nyiavanana. Nkye mwi quaravata hia taunru kyaraitita, qati nraahu riemwaqi quate tinama, nte mwaa quarà qara ntumwa tena.

<sup>3</sup> Nkye mwaa quara nraante ntapihiata. Nraakiara ekyaara enta qaumato vahirata vaisi airivanto qovarama vita variqata mwihua nkyiari kyakya hi kyaqara varaqi viqata nkyiara raima nyatevarave.

<sup>4</sup> Mwihua raima nyateqata mwitaama tivara, Nraakiara nte uro ntante tuminrenrave tu vaisiva tanave variho? Tiri haivaqahua variqi vita qutu vuntema kyetama mwaa entaravata qati nraahu mwitaamaqi vi variavata varuro. Haaru mwata mwaa utu toraqaatai ekyaa inraikyavanto kuaa qarama kye mwitaama nraahuma vahiqiro vi variho, timwa kyeqatama nkyiara raima nyatevarave.

<sup>5</sup> Mwi vaisihua mwitaa tiqatama Kotiva haaru tuvaro nyaamwuvantovata mwatavantovata qovarama vura mwi quara hia riarerave timwa kyeta hia mwianra nraato tuaavo. Mwi entara nramanrivanto nraahu vahuvaro Kotiva tuvaro nramanriqitairo aahara mwata qovarama viro vahura.

<sup>6</sup> Mwia nraakiara Kotiva mwatani varuhua nramanriqotairo vehi utu nyatero ru taiqa kyora.

<sup>7</sup> Nraakiaravata Kotiva qaiqaa tiraro qiaavanto nyaamwuvata mwaa mwataravata itamwa kyairaro taiqa quananrove. Mate Kotiva nai ko tirera hiani okyarara rieqaroma nyaamwuqaavata mwataqaavata ntaqikyiqiro viraro mwi entava nri ntairaro Kotiva uaqia hia nraakyne qorahuaqaa qua votima mwiaqaatairo mwiva mwihua vehi utu nyateqaro nyaamwuvata mwatavata qiaqotairo taiqama kyaananro.

<sup>8</sup> Ni nramwunaa tuaavo, nkye mwaa quara taunru kyevorave. Nronravanto Kotiva 1,000 ihi mwianra ni puqaa kuaa ihera votima kyero vahirave timwa kyero kuaa ihera mwianra 1,000 ihi votima kyero vahirave tirama.

<sup>9</sup> Haaru nronravanto Kotiva nai kyuqu nriqiqaa vateqaro nte mwitaa hirerave tuvaro mwi entaraqaatairo airi ihi nritaraihata haunri nkye tiqata, Qikye Kotiva qakyoma kyero mwitaa hiananrove, tivora. Kotiva hia mpoqiaavanto viro raupiri hirata ekyaa mwihua nkye uaqia hi aanranra qaqlira kyaate tiro, mwiva qakyoma kyero nkyi sekyama variro.

#### *Nyaamwuvata mwatavata taiqaaninranra tura*

<sup>10</sup> Mpuara vaisivanto nrihanrama mwatero nri ntema kyeroma nronravanto qovara hiani entava nriananro. Mwi entaraqaa nyaamwuvanto nronraqama kyero takuma viro hia vahiananro. Takuma viraro nyaamwuqi vahi inraikyara mpo inraikya mpo inraikya qavanto itamwa kyairaro taiqa quananro. Mwata mwaavata mwiaqaa vahiani inraikyara mwia rirantema qavanto itamwa taiqa kyairaro taiqama quananro.

<sup>11-12</sup> Mwi inraikyava mwi inraikyava mwitaamaqiro viro taiqa quaninranra tita, nkye mate mwaa entara nataama kyetave variqi vivara? Nkye Kotiva qovara hiani entara vekya variqata nkye hia uaqia hi kyaiqara utiraitita, kyuqema kye variqi viqata Kotirara nronraqama kyeta riemwaqi viqata varivama vahiro. Nkye mwitaamaqivi vivaro mwi entava qamwanramama nri ntaananro. Mwi entava nri ntairaro qavanto nyaamwu itamwa kyairaro mwatani vahiali inraikyava kepukya inraikyavanto iteroravita viro taiqama quananro.

<sup>13</sup> Mwitaamaqiro vi variraqe tire Kotiva nai kyauqu nriqiqaa vateqaro tu quava mwivau vahianinra vekyama variananra. Mwi entara nyaamwu qaraakyavantovata, mwata qaraakyavantovata, qovara hianinranra taqeqata qamwateqata variananra. Mwi mwatuqyarara avuqavu nrohi vari nraakye qorahua tiqata, Tiri mwaata tuanarravema, tivara.

<sup>14</sup> Ni nramwunaa tuaavo, mwi entara vekya variqatama Kotiva nkyiara hia uaqia hi kyaiqara uti variahua kyuqe nraakye qora nraahu variavo timwa kyero nkyi qihakyama nyataarive tita, nkye mwaa entara ntuvaihaa vita ekyaa tonani uro kyuqema kye variqi quata.

<sup>15</sup> Tiri vunyaa vaisivanto hia vaakya tuminra mwianra nkye mwataama kye rieqata variata. Mwiva hia vaakya tuminra mwia airi nraakye qoravanto uaqia hi kyaiqara qaqira kyaivaqe mwihua sitaankye tiroma hia vaakya tumiho, qiata. Tiri tiqata vakyaa Poruva varuvaro Kotiva mwia kyaahaqa huvaro mwivavata kuaa qua mwia nraahu kyuqema kyero qara ntumwa teqaro nkyi timwa nyunrave.

<sup>16</sup> Poruva mwi quara okyarara tiqaroma mwiva mpo qara mpo qaraqi mwitaa timwa kyeqaro ti varura. Mwiva qara ntumwa tai quava mpohi quava nronra qua vaihatara tita, mpohia vaisihua, hia kyuqe su nyaato vataahua, mwi quara hia ntapihi kye riaraitita, apiqama kyeqata mwi quara okyara ti variarave. Mwi vaisihua hia kuaa qua rie varia vaisihua, mwihua mpo qua mpo qua rie variahua tita, mwihua Porura quavata, Kotira mpukuqi mpo qua qara ntumwa toraravata, hia ntapihi kye riaraitita, mwi quara okyara apiqama kyeqata ti variarave. Mwihua mwitaa ti variarara tita, mwihua nkyiari apiqama vita raupirima vivarave.

<sup>17</sup> Qio ni nramwunaa tuaavo, nkye mwi vaisihua okyara ntapihi kyaarave. Nkye mwaa entara Karaisira qua ntapihi kye rieqata qiomma kepukyaqama kyeta variavo. Nraakiara hia Kotira qua rie vari vaisihua qovarama vita ap̄i qua tiqatama api aanraqaa nkyi sita vatevorave tita, rauriqata variata.

<sup>18</sup> Iesusi Karaisiva tiri vunyaa vaisivanto tiri huvantu kyaivama variro. Karaisiva nkyi kyuqemaqiro virata nkye mwia nraaqiara variqata mwia okyara mpoqiaavata ntapihiqata kyuqema kye nronra tuemwaqi quata.

Nrivaqe mwia nrutu tuaaheraarava matevata, qakyovata vahiqiro nraahu quari. Quataave.

## 1 IONI

### Ioniva vunyaa qara vara kyora

Iesusira qati vara sivuma kyovaro nyaamwuni uro varuvaro airi ihi 60 ihive nritarovaro Ioniva mwaa quara qara ntumwa tora. Iesusi Karaisiva qutaa vaisiqama viro mwatani variqiro vu okyarara ntapihi kyeta riaate tiro, Ioniva mwi quaravata, Kotirara mwutukya vate okyararavata, timwa nyiqanro qara ntumwa tora.

#### *Ioniva Iesusi Karaisirara tu quara*

<sup>1</sup> Toharoraqaatairo qati variqiro vi varu vaisira, mwi vaisirara nkyi timwa nyinrenra. Tire mwi vaisira tetu tivuqotaita taqaavanranrave. Mwiva qua tuvata tire mwia qua riaavanranrave. Tire mwia taqeta tetu kyauquqo mwia tu varaavanranrave. Tire taqauraro mwiva timwa tai quaraqaatairo ekyaa inraikyavanto vahiqiro viqaro hia taiqaraitiro, qati nraahu vahiqiro vi varira.

<sup>2</sup> Mwiva qati variqiro vi variva variqaro mwiva tiri tivuqaa qovarama viro varihata taqaunanra. Tire mwia taqaunanranra tita, tire nkyiara mwitaama tita, Ekyaa enta qati variqiro vi variva mwiva nai qokytiri variva, mwiva mwaa mwataraqaa qovarama vihata tire mwia taqaunanranrama turo.

<sup>3</sup> Tire mwia qoravata mwia mwaaqu Iesusi Karaisiravata kyuqema kye kuaaqi variqata variqi vi varunanra. Kuua qarama kye nkyevata tirivata kyuqema kye kuaaqi variqata variqi quate tita, tire mwia taqeta mwia qua riaunanranra nkyivata timwa nyi varita.

<sup>4</sup> Nkyevata tirevata qamwataarava mpoqiyavata vahiarive titama, tire mwaa quara qara nti varuro.

#### *Omwaqaa nrohiqata variate tura*

<sup>5</sup> Tire mwaa quara Karaisiva tiri timwi quara nkyivata timwa nyinrenra. Kotiva varirero omwavantomava variro. Hia kyokira rivavata mwiaqi vahira.

<sup>6</sup> Tire uaquia hi aanranra enta hiani aanranraqaa nrohiqata tire tiqata, Kotiravata kuqema kye kuaaqi variqi vi varurahuave, qiarera, tiri quavanto unra qua vahiraro tiri kyaiqvantovata unra kyaiqama vahiananro.

<sup>7</sup> Kotiva omwaqaa varintema kyeta tirevata omwaqaa variqita quarera, qutaama tire nanrianra nanrianra qamwateqatama kuaaqi variqita quananra. Tire mwitaama variqita quarera, Kotira mwaaqu Iesusira nraanrevanto tire uaquia hi kyaiqara utuana quara nruka kyero hiqama timwa taqiro quananro.

<sup>8</sup> Tire tiqata, Hia tire uaquia hi kyaiqara uti varurahuave, qiarera, tire tetu unra qiararo qutaa quavantovata hiama tiriqi vahiananro.

<sup>9</sup> Tire tetu uaquia hi kyaiqara uti variananra qoqaa timwa qovarama kyaarera, Kotiva avuqavuma timwa te variva, mwiva qutaama tiri uaquia hi kyaiqara uti varuna quara nruka timwa tero kyuqema kyero tiri tivu nraato hiqama timwa taananro.

<sup>10</sup> Kotiva ekyaa nraakye qorara uaquia hi kyaiqara uti variahuate tirara tita, tire tiqata, Tire hia uaquia hi kyaiqara uti varurahuave, qiarera, tire mwitaa tiqatama Kotirara mwiva unra qua tivavema qiananra. Tire mwitaa qiarera, Kotira quavanto hiama tiriqi vahiananro.

## 2

#### *Iesusiva tiri kyaahaqama timwa taarivama variho tura*

<sup>1</sup> Ni nraaqiaranramwu tuaavo, nkye hia uaquia hi kyaiqara utuate tinama, nte mwaa quara qara nti varina. Tiriqitairo vaisi mpovanto uaquia hi kyaiqara utu kyairera,

Iesusi Karaisiva avuqavu nrohi variva, mwiva Kotira nai qora nraaqani variqaro mwi vaisirara rieqaro nai qorara po kye tiqaro mwi vaisira kyaahaqamama mwataananro.

<sup>2</sup> Kotiva tire uaqia hi kyaiqara uti varuna quara nruka timwa taarive tiro, Iesusiva tiriara rieqaro qutu vura. Iesusiva hia tire uaqia hi kyaiqara uti varunanranra nraahu rieqaro qutu viraitiro, mwiva ekyaa mwaa mwataraqaa variahua uaqia hi kyaiqararavata rieqaro qutu vura.

<sup>3</sup> Tire Kotiva mwitaa mwitaa hiate qiani quara riemwaqita quarera, tire qioma tiqata, Tire Kotira okyara ntapihi kye taqaurahuave, qiananra.

<sup>4</sup> Mpowanto Kotiva mwitaa mwitaa hiate qiani quara hia riemwaqiro viraitiro, mwiva tiqaro, Tire Kotira okyara ntapihi kye taqaurahuave, tirera, mwi vaisiva unra ti variari vaisiva variraro quataa quavantovata hia mwi vaisiraqi vahiananro.

<sup>5-6</sup> Vaisi mpovanto Kotira qua nraahu riemwaqiro vi vari vaisiva varirero mwi vaisiva quataaqama kyero Kotirara mwutukya vahi vaisivama variro. Karaisiva nrohintema kyero nrohi variva, mwi vaisiva ntapihi kyero tiqaro, Nte Kotikyantiri kuaaqi variqina vi varuvave, ti variro. Tire Karaisiva nrohintema kyeta nrohiarera, tire qioma tiqata, Tire Kotiravata kuaaqi variqita vi varurahuave, qiananra.

### *Qaraakya qua vatairara tura*

<sup>7</sup> Ni nramwunaa tuaavo, nte mwaa quara qara ntiqana Kotiva vatai quara hia qaraakya quavauma nkyi timwa nyi varuqo. Kotiva haaru mwi quara vataihata nkye haaru vuni Jesusirara quataave timwa kyeta variqata mwi quara riaara. (Kotiva haaru tiqaro, Nanrianra nanrianra mwutukya vahirata nrohiate tu quara nkye mwi quara riaarave.)

<sup>8</sup> Mate nte mwi quara qaraakya qua votima kyena nkyi timwa nyinrenrave. Karaisiva mwi quara riovaro nkyiara nronraqama kyero mwia mwutukya vahura. Nkyevata mwi quara riaavarao nanrianra nanrianra nkyi mwutukya vaihata variarama. Nkye mwitaa hiarara tita, nkye enta hiraqi nrohi varia entava taiqero vi variharo omwavantoma qovara hi variro.

<sup>9</sup> Vaisi mpovanto hia nai hena vaisiara mwutukya vahiraro mwianra ua vu nraato ti variva tiqaro, Nte omwaqaa nrohi varuvave, ti variva, mwi vaisiva kyokiraqi nraahuma nrohi variro. Mwi vaisiva nai haaru kyokiraqi nrohi varuntema kyeroma mwaa entaravata kyokiraqi nraahu nrohi variro.

<sup>10</sup> Nai hena vaisiara mwutukya vahiraro nrohiariva, mwi vaisiva omwaqaama nrohi variananro. Mwi vaisira kyaiqqaatairovata hiama mpovanto uaqia hi kyaiqara utuananro.

<sup>11</sup> Vaisi mpovanto nai hena vaisiara qora vu nraato vate variva, mwi vaisiva kyokiraqi hia nai vi aanranra ntapihiraitiro, apiqama kyero vi variro. Enta hi inraikyava mwia vu entama kyaiharo mwia vuvanto qipa viharora tiro, mwi vaisiva nai quani aanranra hia taqaraitiro, api vi variro.

<sup>12</sup> Ni nraaqiaranramwu tuaavo, Kotiva Karaisira kyaiqarave tiro, mwiva nkye uaqia hi kyaiqara uti varia quara nruka nyatairara tina, nte nkyini qara ntumwa nyatauqo.

<sup>13</sup> Nkye nraaqiara sohuamwanra tuaavo, tauraaqama kyero toharoraqaatairo qati variqiro vi varu vaisira nkye mwi vaisirara ntapihi kyeta riaarara tina, nte nkyinivata qara ntumwa nyatauqo. Nkye qumwanraa tuaavo, nkye Saataaninra nraatara kye variarara tina, nte mwaa quara nkyinivata qara ntumwa nyatauqo.

<sup>14</sup> Ni nraaqiaranramwu tuaavo, nkye tiri tiqora ntapihi kyaarara tina, nte nkyinivata qara ntumwa nyatauqo. Nkye nraaqiara sohuamwanra tuaavo, tauraaqama kyero toharoraqaatairo qati variqiro vi varu vaisira, nkye mwi vaisirara ntapihi kyeta riaarara tina, nte nkyinivata qara ntumwa nyatauqo. Nkye qumwanraa tuaavo, nkye kepuqyaqama kyeqata variqita vi variavaro Kotira quavanto nkyi su nyaato

mwutukyaqi vahata nkye Saataaninra nraatara kye variarara tina, nte nkyini mwaa qarara ntumwa nyatauqo.

<sup>15</sup> Hia mwata mwaaqaanaa okyararave, mwata mwaaqaanaa inraikyalarave, nkyi mwutukya ntirata variata. Vaisivanto variraro mwia mwutukyavanto mwatanyaaa inraikyara nraahu vahirera, hia mwi vaisira mwutukyavanto tiri tiqora Kotirara vahianano.

<sup>16</sup> Nraakye qoravanto nkyiari qamwaterarave, nkyiari varaataa hiani inraikyalarave, vairiqahi okyararave, airi inraikya vateqata nkyiari mwahuta ti vari okyararave, ekyaa mwi okyarava mwi okyarava hia tiri tiqova hinasairo tuminraitiro, nai mwata mwaaqaanaa okyarama vahiro.

<sup>17</sup> Mwaa mwatavavata, mwaa mwataraqanaa inraikyara mwutukya nti varihata varia inraikyavavata, ekyaa mwi inraikyava mwi inraikyava taiqama quananro. Kotira qua riemwaqiro vi variari vaisiva, mwiva nraahuma ekyaa enta ekyaa enta qati variqiro quananro.

### *Karaaisira nramwutaara tura*

<sup>18</sup> Ni nraaqiaranramwu tuaavo, ekyara entavanto qaumatomma vahiro. Iesusi Karaaisira nramwutaavanto qovara hiananrove tu quara nkye riaarave. Mwaa entara Karaaisira nramwutaa airivanto qovarama vita variavata tire qio ntapihi kyauraro ekyara entavanto qaumatomma vahiro.

<sup>19</sup> Karaaisira nramwutaahua hia tiriqinaahuara titama, mwihua tiri kyeta vita. Mwihua tiriqinaahua hiatiri, tirivata variatiri. Mwihua tiri kyeta quavata mwiaqama tire ntapihikye tiqata, Qutaama mwihuaqitairo hia mpokuvanto tiriqinaavave, tita.

<sup>20</sup> Qio nkye Kotira mwanraqura nkyiqi rauru kyaihata varaahua variqatara tita, nkye ekyaa Kotira qua qutaa qua ntapihi kyeta riaara.

<sup>21</sup> Nte hia nkyiara tiqana, Nkye hia qutaa qua riaarave, turave. Nkye Kotira qua qutaa qua riaarara tina, nte mwaa quara nkyini qara ntumwa tauqo. Hia Kotira qua qutaa quaqaatairo unra quavanto qio qovara hiananrove. Nkye mwia ntapihiarave.

<sup>22</sup> Unra qua ti vari vaisiva varirero mwiva tavave? Iesusiva hia Kotiva hinasairo tiri kyaahaqa hirero tumivave qiariva, mwivama mwi vaisiva. Mwi vaisiva mwitaa tiqaroma Iesusira nramwutaa variqaro mwiva mwia qoravata mwia mwaaquvata qorrima mwate variro.

<sup>23</sup> Vaisivanto Kotira mwaaqu Iesusira qorrima mwateqaroma mwia qora Kotiravata qorrima mwatero. Vaisi mpovanto Iesusirara qutaa mwiva Kotira mwaaquve qiariva, mwi vaisiva mwia mwaaqu vatama kyero kuaaqi variqaroma mwia qora Kotira vatama kyero kuaaqi varianano.

<sup>24</sup> Taura vuni riemwataa quara, mwi quara nraahu tuqara kyeta tuteta riemwaqita quata. Mwi quava nkyiqi kepukyaqama kyero vahiqiro virera, nkye mwia mwaaquvata mwia qoravata mwitanahua kyapata kuaaqi variqita vivara.

<sup>25</sup> Mwia mwaaquvanto tiriara mwihua mwitaamaqita viqata ekyaa enta ekyaa enta qati variqita quate tiro, nai kyauqu nriqiqaa vateqaro tura.

<sup>26</sup> Vaisi mponramwuvanto nkyi sitaqita uro uaqia hi aanranraqaa kyarerata uti variahua rieqanama nte mwaa quara nkyini qara ntumwa tena.

<sup>27</sup> Qio Kotiva nai mwanraqura nkyi nyihata varaara. Kotira mwanraquravanto nkyiqi variqaro nkyi Kotira okyarara ntapihi kyero timwa nyinranra tiro, hia qumina mpovanto nkyi timwa nyianinra. Kotira mwanraquravanto mpo okyara mpo okyara ekyaa okyara nkyi nyaamwuteqaro hia unra qua nkyi timwa nyinraitiro, qutaa qua nraahuma nkyi timwa nyi varira. Kotira mwanraquravanto nkyi timwa nyiqiro vi variratara tita, nkye mwia qua riemwaqita viqata Karaaisira vatama kyeta kuaaqi variqi vivara.

<sup>28</sup> Ni nraaqiaranramwu tuaavo. Karaisira vatama kyeta kuaaqi variqi viqata variata. Tire mwitaamaqita quararo nraakiara Karaisiva qovarama viro tumu ntairaqaeta tire hia aatu hiqata kyauriraitita, mwia vuqaa variqata mwutukya qihakyama kyeta variananra.

<sup>29</sup> Karaisiva hia uaquia hi kyaiqara utiraitiro, ntapihi kyero nraahu nrohi vari okyarara, nkye ntapihi kyaahuara tita, nkye taqaivaro vaisi mpovanto Karaisira votima kyero ntapihi kyero nrohi varirera, nkye qioma mwi vaisirara Kotira nraaqiarave tivara.

### 3

#### *Tire Kotira nraaqiarama varuro tura*

<sup>1</sup> Qikye, nataamave Kotiva tiriara mwutukya vahiva vahiro? Kotiva tiri tiqova mpoqama kyero tiriara mwutukya vaiharora tiro, mwiva tiriara nkye ni nraaqiarave ti varira. Qutaaqama kyeta tire mwia nraaqiaranramwuma varita. Mwatani hini hia nraakye qorahua Kotira okyara hia ntapihi kyaahuara tita, mwihua tiri okyararavata hia ntapihi kyaara.

<sup>2</sup> Ni nramwunaa tuaavo, mate mwaa tire Kotira nraaqiarama varita. Nraakiara tire nataamave variananra? Hiama tire mwi okyarara ntapihi kyeta. Tire mwaa quara nraahu riaunanra: Nraakiara Karaisiva qovarama viraqeta tire mwia votima kyetama variananra. Mwi entara tire mwia vitama kyeta taqeta mwiaqataita tire mwia votima kyeta variananra.

<sup>3</sup> Mwi entara vekya variahua uaquia hi kyaiqara utuaro tita, Karaisiva kyotataqama kyero nrohintema kyeta mwihuavata kyotataqama kyeta nrohiqata mwia vekya varivara.

<sup>4</sup> Vaisivantove nraakyevantove uaquia hi kyaiqara utiqaroma Kotira qua nteqa kye variro. Kotira qua nteqa kye variva, mwiva uaquia hi kyaiqara uti varirama.

<sup>5</sup> Nkye ntapihi kyaavarao Karaisiva nraakye qoravanto uaquia hi kyaiqara uti variara nruga nyatarero qovarama vira. Karaisiva hia uaquia hi kyaiqara uti varivama variro.

<sup>6</sup> Mwiyantiri variqiro quariva hia uaquia hi kyaiqara utuqiro quananro. Uaquia hi kyaiqara utuqiro vi vari vaisiva hia Karaisira taqero, mwiva Karaisira okyara hia ntapihiva varira.

<sup>7</sup> Po, ni nraaqiaranramwu tuaavo, haunri mpovanto unra qua nkyi timwa nyiankyora. Vaisi mpovanto ntapihi kyero nrohi vaisiva, mwi vaisiva ntapihi kyero nrohi vari vaisivama variro. Mwi vaisiva Karaisiva nrohintema kyero ntapihi kyero nraahu nrohi varira.

<sup>8</sup> Saataaniva haaru toharama kyero uaquia hu kyaiqara nraahu varaqiro vurara tiro, uaquia hi kyaiqara nraahu vare vari vaisiva, mwi vaisiva Saataaninra nraaqiarama variro. Kotira mwaaquvanto Saataaninra kyaiqa taiqa kyarero mwaa mwataraqaa qovarama vira.

<sup>9</sup> Vaisivanto Kotira nraaqiara variharo Kotira vu nraatovanto mwi vaisiraqi vaharora tiro, mwi vaisiva hia qio uaquia hi kyaiqara utuqiro quananro. Kotiva mwia qova variharora tiro, mwi vaisiva hiama qio uaquia hi kyaiqara utuqiro quananro.

<sup>10</sup> Tire nataama kyetave mwi vaisirara Kotira nraaqiarave variho, Saataaninra nraaqiarave variho, qiananra? Mwataama kyeta tire mwia ntapihi kyeta taqaananra. Vaisi mpovanto hia avuqavu hiani kyaiqara varaarivave, hia nai henai vaisiara mwutukya vahiarivave, mwi vaisivama hia Kotira nraaqiara variro.

#### *Nanrianra nanrianra mwutukya vahirata variate tura*

<sup>11</sup> Nkye tauraaqama kyeta riemwataa quava, mwi quava tiriara mwataama tiro: Nkye nanrianra nanrianra mwutukya vahirata variate, tura.

<sup>12</sup> Tire haaru varu vaisira Keninra nraantantaarora. Mwi vaisiva Saataaninra nraaqiara variqaro nai qata ntuqutu kyora. Nanra kyaarave Keniva nai qata ntuqutu kyero? Keninra kyaiqvanto uaquia hu kyaiqava nraahu vahuvare mwia qata kyaiqvanto kyuqe kyaiqa nraahu vahuvare mwia kyaara Keniva nai qata ntuqutu kyora.

<sup>13</sup> Ni kata pakyaa tuaavo, Keninra nraantanteta mwata mwaqaanaahua nkyi uaqiamma nyataivera, hia mwi inraikyara nrihanrama quata.

<sup>14</sup> Tire teta qata vakyaahuara mwutukya vahata variqatara tita, tire hia ekyaara qutu quarahua variraitita, tire ekya enta qati variqita quarahuama varita. Nai qata vakyaahuara hia mwutukya vahiraro variari vaisiva, mwiva ekyaara qutu quarivama variro.

<sup>15</sup> Vaisi mpovanto nai hena vaisi uaqiamma mwataaninranra rie variva, mwi vaisiva mpohua rukye vari vaisira nraantatamwa kyeroma variro. Nkye mwia ntapihi kyaarave. Vaisivanto hena vaisi rukye variva, mwi vaisiva hia ekya enta qati variqiro quarivama variro.

<sup>16</sup> Iesusiva tiriara rieqaro qutu virara tiro, Iesusira mwutukyavanto tiriara vahi okyarara tiri tinraamwutaihata taqaunana. Iesusiva mwitaa hirara tita, tirevata Iesusira votima kyeta teta qata vakyaahu kyaahaqa hirerata qioma qutu quataa hiraqeta qutu quananra.

<sup>17</sup> Vaisi mpovanto airi inraikya vataariva taqairaro mwia qata vakya mpovanto kyarave mpo inraikyave hia vatairaro mwianra hia po tiro kyuqema mwatairera, nataama kyerove mwi vaisiva Kotirara ni mutukyavanto iara vaiho qiananro?

<sup>18</sup> Ni nraaqiaranramwu tuaavo, tire hia teta qata vakyaahu kyaahaqa hiraitita, tire qumina nroqitaita nraahu tiqata, Ni mutukyavanto ni kata pakyaa mwianra vahana varuqo, qiarora. Tire teta qata vakyaahu mpo kyaiqa varaqi viqata mwiaqataitama teta qata vakyaahuara mwutukya vahata varuro qiaravama qio vahiananro.

### *Kotira vuqaa tire hia aatu hiraitita variananranra tura*

<sup>19</sup> Tire teta qata vakyaahu kyaahaqamaqita quarera, tire qutaa okyara nraahuma riemwaqita vuro qiananra. Tire mwitaamaqita viqata Kotira vuqaa variqata hia aatu hiraitita, mwutukya qihakyma kyeta variananra.

<sup>20</sup> Tire mwitaamaqi quararo tiri vu nraato mwutukyavanto tiriqaa qua vatero tiqaro, Nkye hiama Kotira nraaqiara variavo, tirarovata Kotiva tiri vu nraato mwutukya nraatara kyero ekya inraikya taqe variva, (mwiva tiriara nkye ni nraaqarama variavo qiananro).

<sup>21</sup> Po, ni nramwunaa tuaavo, tire teta vu nraatoqitaita kyuqe kyaiqa nraahu vare varuro qiarava qio vahirera, tire hia aatu hiraitita, Kotira vuqaa variqata mwutukya qihakyma kyeta variananra.

<sup>22</sup> Tire Kotira qua riemwaqi vita Kotira kyakya hi kyaiqara varaqi quarera, tire mpo inraikya mpo inraikyara Kotira nyaanru hiararo Kotiva mwi inraikyara tiri timwiananro.

<sup>23</sup> Kotiva mwaa quara vatero tiqaro, Nkye Iesusi Karaisirara qutaama mwiva Kotira mwaaquve tiqatama mwianra kepuqyaqama kyetama riemwaqita quate. Iesusi Karaisiva nkyiara nkye nanrianra nanrianra mwutukya vahirata variate ti quara, mwi quara riemwaqita quate, tiro tura.

<sup>24</sup> Vaisi mpovanto Kotira qua riemwaqiro nrohi vari vaisiva, mwi vaisiva Kotira vatama kyero kuaaqi variqiro vi variharo Kotiva mwi vaisira vatama kyero kuaaqi variqi vi varira. Kotiva nai mwanraqura tiri timwinranra tita, tire tiqata, Kotiva tirivata kuaaqi variqiro vi varihata varunanrave, qiananra.

## 4

*Nkye vaanavanto qiani quararavata Kotira quave tivorave tura*

<sup>1</sup> Po, ni nramwunaa tuaavo, unra vaisi airivanto mpo mwatani mpo mwatani nrohita tiqata, Nte Kotiva qua mpo qovarama kyaihana nte timwa nyi varuvave, ti variara. Vaisi mpovanto nri ntero nkyiara mwitaa tirera, mwia quara qamwanrama kyeta quutaave tivora. Nkye mwia kyaiqavata mpore kyaiqavata tukyama kyeta taqaata. Kotira mwanaquravanto mwia kyaahaqa hi variharove mwiva tiho, vaanavanto kyaahaqa hi variharove mwiva tiho, timwa kyetama mwia kyaiqavata mpore kyaiqavata tukyama kyeta taqaata.

<sup>2</sup> Mwataama kyeta nkye Kotira mwanaquravanto qiani quara ntapihi kyeta rievara. Nkye vaisi mpo tukyama kyeta taqaivaro mwiva tiqaro, Qutaama Iesusi Karaisiva Kotira hinasairo tuminro vaisi tuemwa virave, tirera, nkye mwi vaisirara, Qutaama Kotira mwanaquravanto mwia kyaahaqa hi variharo ti variho, qiata.

<sup>3</sup> Nkye vaisi mpo tukyama kyeta taqaivaro mwiva Iesusira okyarara unra quave tirera, nkye mwi vaisirara mwitaama qiata: Hia Kotira mwanaquravanto mwia kyaahaqa hi variharo unra qua ti variho. Vaanavanto Saataaniva varinasairo mwi vaisira quavanto qovara hi variho, qiata. Karaisira nramwutaaqa hi variani okyarava nrianinra nkye mwianra ntapihi kyaara. Mate mwaa iherara unra vaisinramwu Karaisira nramwutaaqua qovarama vita Saataaninra qua ti variara.

<sup>4</sup> Po, ni nraaqiaranramwu tuaavo, nkye Kotiranivantoma varita. Kotira mwanaquravanto nkyi mwutukyaqi variva mwiva kepukyavanto variqaro mwatani vari vaananra nraatara kyaihatara tita, vaanavanto kyaahaqa hi varihata unra qua ti varia vaisihua nkye nraatara kyaara.

<sup>5</sup> Mpo hiahua hia Kotira nraaqiara variahua, mwihua mwata mwaaqaanaa qua okyara nraahu rie variara. Mwitaama kyeta variarara tita, mwihua mwatanyaa okyarara nraahu timwa nyiavata hia Kotira qua riaa nraakye qorahua mwihua nraato nyitama mwihua qua rie variara.

<sup>6</sup> Tire hia mwihua votima kyeta variraitita, tire Kotiranivantoma varita. Kotirara rie variariva, mwiva tiri qua qioma riaananro. Hia Kotirara rie variariva tiri quavata hiama qio riaananro. Tire mwi inraikyaraqaa vitama kye taqeqlata mwaa vaisiva Kotira nraaqiarave, mwaa vaisiva hia Kotira nraaqiarave, qiananra.

*Kotira mwutukyavanto mpohuara vahi okyarara tura*

<sup>7</sup> Po, ni nramwunaa tuaavo, nrivagenramwu nanrianra nanrianra mwutukya vahiraqeta variara. Mwi okyarava Kotiva hinasairo tuminra. Mpohuara mwutukya vaiharo nrohi vari vaisiva, mwiva Kotira nraaqiarama variro. Mwi vaisiva qioma Kotira okyara ntapihi kyena taqauqo qiananro.

<sup>8</sup> Kotira okyaravanto vahirero mpohuara mwutukya vahivama variro. Mwia okyaravanto mwitaama vahirara tiro, vaisivanto mpohuara hia mwutukya vahiariva, mwi vaisiva hia qio Kotira okyara ntapihi kyena taqauqo qiananro.

<sup>9</sup> Tiriara ni maaquqaataita qati variqita quate tiro, Kotiva nai mwaaqu kuaiqia vataira mwatani titovaro tiriara rieqaro tuminro qutu vura. Kotiva mwitaama kyero nai mwaaqu titorara tita, tire taqauraro Kotira mwutukyavanto nronraqama kyero tiriara vahira.

<sup>10</sup> Kotira mwutukya vahi okyarava mwataamama vahiro: Tire hia Kotirara mwutukya vahuvata variavararo Kotiva mwiva nraahu tiriara mwutukya vahuvavora tiro, mwiva nai mwaaqu titovaro mwiva tire uaquia hi kyaiqara utuna quara nruka timwa taarive tiro, mwiva tiriara rieqaro qutu vura.

<sup>11</sup> Po, ni nramwunaa tuaavo, Kotira mwutukyavanto tiriara mwitaama kyero vahirara tita, tirevata nanrianra nanrianra mwutukya vahiraqeta variaravama vahiro.

<sup>12</sup> Haaruvata matevata hia vaisi mpovanto Kotira taqaivama variro. Tire nanrianra nanrianra mwutukya vahiraqeta variqita quarera, Kotiva tirivata variqiro viraro tiri mwutukyavanto quutaama Kotirara vahiananro.

<sup>13</sup> Kotiva nai mwanraqura tiri timwinranra tita, tire qioma tiqata, Tire Kotiravatama kyeta kuaaqi variqi vi varuraro Kotiva tirivata kuaaqi variqiro vi varirave, qiananra.

<sup>14</sup> Tire mwia mwaaqu tetu tivuqotaita taqaurahuara tita, tire nkyivata timwa nyita tiqata, Tire mwatani variarahua hia raupirima viraitita, ekyaa enta qati variqita quananranra rieqaro, mwia qova nai mwaaqu titovaro tiri huvantu timwa tarero tumunrave, tita.

<sup>15</sup> Ta vaisivave Iesusirara quutaama mwiva Kotira mwaaquvanto variho tirera, Kotiva mwi vaisiravatama kyero variharo mwiva Kotiravatama kyero variqiro quananro.

<sup>16</sup> Tire taqauraro quutaama Kotira mwutukyavanto tiriara vahiro. Kotira okyaravanto vahirero Kotiva mpohuara mwutukya vaiharo varivama variro. Vaisivanto mpohuara mwutukya vahiraro variariva, mwi vaisiva Kotiravatama kyero variqiro vi variraro Kotiva mwiavatama kyero variqiro quananro.

<sup>17</sup> Tire mwitaama kyeta variqi quararo mwiaqatairo tiri mwutukyavanto quutaaqama Kotirara vahiraqe tire mwatani variqata Karaisira votima kyeta nrohiananra. Tire Karaisiva nrohintema kyeta variqi vita, nraakiara ekyaara enta Kotiva ko qiani entaraqaa tire variqata hia aatu hiraitita, mwutukya qihaakyama kyeta variananra.

<sup>18</sup> Kotirara mwutukya vahiariva hiama Kotira nraatu aatu hiqaro variananro. Mwiva quutaaqama kyero Kotirara mwutukya vaharora tiro, mwiva hia Kotira nraatu aatu hiqaro variananro. Nai uaqia hi kyaiqara kyaara Kotiva ni ntuqutuankyo tiro Kotira nraatu aatu hiqaro variariva, mwi vaisiva hia qio quutaaqama kyero Kotirara mwutukya vahiarivama variananro.

<sup>19</sup> Kotiva nraante tiriara mwutukya vaiharo varirara tita, tirevata nanrianra nanrianra mwutukya vahihata varunanra.

<sup>20</sup> Vaisi mpovanto tiqaro, Ni mutukyavanto Kotirara vaiho, timwa kyero nai qata vakyaa mporara hia kyuqe vu nraato riemwa mwatairera, mwi vaisiva Kotirara qiani quavavata unra qua nraahuma vahiananro. Mwiva nai vuqo taqaani vaisirara hia mwia mwutukya vahirera, nataama kyeroove mwi vaisiva Kotira hia taqaaninranrvata mwia mwutukya vahiananro?

<sup>21</sup> Karaisiva mwaa quara vataihata tire ntapihi kyaunanra. Mwitaama tiro: Kotirara mwutukya vahiariva nai hena vaisiaravata mwutukya vahiraro variarive, tura.

## 5

### *Tire mwata mwaaqaanaa okyara nraatara kyaunanranra tura*

<sup>1</sup> Ta nraakye qorahuave Iesusirara tiqata, Mwiva quutaama mesaiaavanto variho. Quutaama Kotiva mwi titaiharo tiri kyaahaqama timwa tarero mwatani tuminrave, tihua, mwi nraakye qorahua Kotira nraaqiarama varivaro Kotiva mwihua sovama variananro. Vaisivanto mwia qora Kotirara mwutukya vahiariva, mwi vaisiva Kotira nraaqiararavatama mwia mwutukya vahiananro.

<sup>2</sup> Tiri mwutukyavanto Kotirara vahiraqeta Kotiva vatai quara riemwaqita quarera, tire qioma tiqata, Tiri mwutukyavanto Kotira nraaqiararavata vaiho, qiananra.

<sup>3</sup> Tire Kotira qua riemwaqita quarera, tire qioma tiqata, Tiri mwutukyavanto Kotirara vaiho, timwa kyeta mwia quavata riemwaqita quarava hiama muaanraqama kyero vahiananro.

<sup>4</sup> Tire Kotira nraaqiara variqataro tita, qioma mwatanyaa okyara nraatara kyaananra. Tire Iesusirara kepuqyaqama kyeta riemwaqi viqata qioma mwatanyaa inraikya nraatara kyaananra.

<sup>5</sup> Ta vaisivave mwatanyaaa okyara qio nraatara kyaananro? Vaisivanto Iesusirara mwiva quataama Kotira mwaaquvanto variho qiariva, mwi vaisiva nraahuma mwatanyaaa okyara nraatara kyaananro.

### *Kotiva Iesusi Karaisira okyarara ntapihi kyero tura*

<sup>6</sup> Iesusi Karaisiva mwatani tumu ntero nramanri varovaro mwia nraanre rauruvaro qutu viro. Iesusiva hia nramanri nraahu vararaitiro, mwiva nramanri varovaro mwiaqaatairo mwia nraanrevata rauruvaro qutu vura. Kotira mwanraquravanto quataa qua nraahu ti variva variqarora tiro, mwivavata Iesusira okyarara ti varira.

<sup>7</sup> Taarampo nramwuvanto Iesusira okyarara ti variara.

<sup>8</sup> Mwinramwuhua qua tiqata kuua qua nraahu ti variara. Kotira mwanraquravantove. Iesusiva nramanri varaivave. Iesusira nraanrevanto kyatariqaa raurivave, mwinramwuhua taarampo nramwuvanto Iesusira okyarara tiri timwa timwi variara.

<sup>9</sup> Qati qumina vaisivanto mwitaama taqaunansrave ti varia quara, tire mwi quarara quataave ti varunanra. Tire qumina vaisivanto ti vari quarara quataave qiarera, Kotiva qiani quara nronra quaravata tire mpoqiaavata quataave qiarera. Kotiva Iesusirara mwiva ni maaquvanto variho tirara tita, tire qiomaa quataave qiananra.

<sup>10</sup> Vaisivanto Kotira mwaaquara quataa mwivave tiharora tiro, mwia mwutukyaqitairovata mwi quarara quataa quama vaiho tiro. Kotira quara hia quataa quave ti vari vaisiva, mwi vaisiva Kotirara unra qua ti varivave tiro. Kotiva Iesusirara ni maaquve ti quara, mwi vaisiva hia quataa quave tiqarora tiro, mwiva Kotirara unra ti varivave tiro.

<sup>11</sup> Kotiva timwa tai quava mwataamama vahiro: Tiriara mwihua ekyaa enta kyuqema kyeta qati variqita quate tiro, Kotiva nai mwaaqu tiri timwinra. Qati variqita vi okyarava nai mwaaquqi vahirara tiro,

<sup>12</sup> Kotira mwaaquntiri variqiro quariva qati variqiro quananro. Hia Kotira mwaaquntiri variqiro quariva hiama qati variqiro quananro.

### *Tire ekyaa enta qati variqita quananranra tura*

<sup>13</sup> Nte nkye Kotira mwaaquara quataa mwivave qia nraakye qorahuani qara ntumwa nyatauquo. Nkye nkyeta ekyaa enta qati variqita vi okyarara ntapihiate tina, nte mwaa quara nkyini qara ntumwa nyatauquo.

<sup>14</sup> Tire Kotira kyakya hianinranra rieqata mpo inraikya mpo inraikyara mwia ntumwahiamwa hiararo mwiva tiri qua qiomaa riaananro. Mwiva tiri qua qio riaariva varirara tita, tire hia aatu hiraitita, Kotirara aakyara nteqata varunanra.

<sup>15</sup> Kotiva tiri qua qioqama kyero riaariva varihatara tita, tire ntapihi kyauraro mwiva tire ntumwahiamwa hiana inraikyara tiri qio timwianrivama variro.

<sup>16-17</sup> Nkye taqaivaro Kotira nraaqiara nkyi sata sakya mpo vanto hia mwia kyaara ekyara qutu quani kyaiqara qora kyaiqa utu kyairera, nkye mwi vaisirara Kotirara aakyara ntaivaro Kotiva mwia kyaahaqama mwatairaro mwi vaisiva qora kyaiqa qaqlira kyero qati variqiro quari.

Hia nte anoma kyero uaqia hi aanranraqaa nrohi varirara tuqo. Ekyaa uaqia hi kyaiqara utuava Kotira qua nteqa kyaavama vahiro. Uaqia hi kyaiqava mpo vahira, vaisivanto mwia utu kyaariva, mwiva qiomaa Kotirara aakyara ntaananro. Uaqia hi kyaiqava mpo vahira, vaisivanto mwia utu kyairera, mwi kyaiqara utuaninra kyaara mwiva ekyarama qutu quananro. Nkye mwi kyaiqara utu kyaani vaisirara rieqata hia Kotirara aakyara qia.

<sup>18</sup> Tire ntapihi kyaunansrave. Kotira nraaqiara vanto hia qaiqaavata qaiqaavata uaqia hi kyaiqara utuqiro quananro. Kotira mwaaquvanto mwiaqaa ntaqikyi varirara tiro, mwiva qio variraro Saataaniva hiama mwia qoraqama mwataananro.

<sup>19</sup> Tire ntapihi kyaunanrave. Tire Kotira nraaqiara varurata qati mwatani varia nraakyе qorahua hia Kotira qua riaahua variavaro Saataaniva mwihuaqaa ntaqikyi varira.

<sup>20</sup> Tire ntapihi kyaunanrave. Kotira mwaquivanto mwatani tuminro tiri tivu nraato kyaahaqama kyaiharo tiri tivu nraatovanto ntapihi vihata tire qutaa mwanriqa Kotiva varirara ntapihi kyaunanra. Tire mwia mwaqu Iesusi Karaisira vatama kyeta variqi viqata tire qutaa Kotira vatama kyeta variqita vi varunanra. Kotiva qutaa mwanriqvantoma variro. Mwiva qutaaqama kyero ekyaa enta qati variqita vi varia okyarava, mwivama variro.

<sup>21</sup> Po, ni nraaqiaranramwu tuaavo, nkye unra mwanriqa mwoqa nyita qatiraqaa variatema, tuquo.

## 2 IONI

### Ioniva tavaaraqinaa qara vara kyora

Iesusira qati vara sivuma kyovaro nyaamwuni uro varuvaro airi ihi 60 ihive nritarovo Ioniva mwaa quara qara ntumwa tora. Nraakyе mpovanto nai nraaqiaranramwuanravata hia unra qua mwaanra riaraitita, kyugema kyeta Karaisira qua riemwaqita quate tiro, Ioniva mwaa quara mwinramwuhuani qara ntumwa nyatora.

**1** Nte Kotira nraaqiaraqaa ntaqikyi varuva i Kotiva nai kyaama tai nraakyeraravata, i nraaqiara mwihuaravatama, qara mwaa ntumwa nyatena. Ntevata ekyaa Kotira qua qutaa qua riaahuavata nkyiara mwutukya vahata varuro.

**2** Kotira qua qutaa quavanto tirinramwuqi vahirara tita, tire nkyiara mwutukya vahata varuro. Mwia quavanto tirinramwuqi ekyaraqama kyero qati nraahu vahiqiro quananro.

**3** Tire qutaa qua riemwaqita viqata nanrianra nanrianra mwutukya vahiraqeta variararo Kotiva tiri tiqovavata mwia mwaaku Iesusi Karaisivavata tiri kyugema timwa teta tiriara po tita tiri mwutukya qihakayama timwa taivaqeta variara. Qutaaqama kye nanrianra nanrianra mwutukya vahirata variate tura

**4** Tiri tiqova tiqaro, Qutaa qua nraahu riemwaqita quate, tuvata i nraaqiara hininramwuvanto mwiva tuntema kyeta nrohi variarara tina, nte mwihuara qamwateqanama varina.

**5** Nini nraakyе kyugeva, e riaante. Nte qua mpo i timwa mwinrenrave. Hia Kotiva qaraakya qua vataira nte i timwa mwinrenranavauma. Tire haaru variqata mwaa quara riaunanra. Mwianra rieqatama po, nrivaqenramwu nanrianra nanrianra mwutukya vahiraqeta variara.

**6** Tire Kotiva vatai quara riemwaqita quarera, tire qioma tiqata, Kotirara mwutukya vahata varuro, qiananra. Kotiva vatai quava mwataamama vahiro: Nanrianra nanrianra mwutukya vahirata nrohiate. Nkye haaru tauraqaqama kyeta mwi quara riaarave.

#### *Unra qua ti varia vaisihuara tura*

**7** Unra qia vaisihuua airivanto nraakyе qora unra qua timwa nyinrenrata mpo mwatani mpo mwatani nrohi variara. Mwihua Iesusi Karaisirara mwiva hia nyaamwusairo qutaa tuminro vaisi tuemwa vivave, ti variara. Mwi quara ti vari vaisiva unra qua nraahu ti vari vaisivama variro. Mwiva Karaisira nramwutaavantomava variro.

**8** Nkye mwi quara ti vari vaisihuara rauriqata variate. Nkye mwihua quara qutaa quave tivarо nkye tauraa Iesusirani kyaiqa varataava quminavau quankyora. Nkye Karaisira kyaiqa nraahu varaqita vivita uro nkyeta kyoqaa varaata.

**9** Vaisi mpovanto hia Karaisira qua kyugema kyero tutaraitiro, qaqlira kyero mpo qua riemwaqiro virera, Kotiva hiama qio mwikyantiri variananro. Vaisi mpovanto Karaisira qua kyugema kyero tutoro variqi virera, Kotiva nai mwaaku ntiri mwiatama kyero variqiro quananro.

**10** Hia Karaisira qua ntapihi kyero timwa nyinraitiro, mpo qua ti variari vaisiva nkyivata varirero nrinrenra, hia mwia qamwata mwateta nkyeta nraamwuqi vita vataata. Hia mwi vaisira qua mwantaata.

**11** Mwi vaisirara kyakya hiqaro mwia qua mwantaariva, mwivavata mwi vaisira kyaiqa voti hianinra uaqia hi kyaiqara nraahuma varaananro.

#### *Ekyara quara tura*

<sup>12</sup> Nte airi qua nkyi timwa nyianriva vaihanavata nte hia qaraqitaina nraahu nkyi timwa nyinrenra. Nte ntenavanto uro nkyivata variqana timwa nyiankye timwa kyenama varina. Nkyivata uro variqana qua timwa nyiqanama nkyevata ntevata qamwataananra.

<sup>13</sup> I nrunra Kotiva nai kyaama tai nraakyera nraaqiaranramwu mwaini variahua i qua mwantaavo.

### 3 IONI

## Ioniva ekyaaara qara vara kyora

Iesusira qati vara sivuma kyovaro nyaamwuni uro varuvaro airi ihi 60 ihive nritarovaro Ioniva mwaa quara qara ntumwa tora. Vaisi mpovanto Kaiasiva varuvaro Ioniva mwianra kyugema kyera Iesusira nraaqiaravanto nyianrasaita nrumeru varihuaqa ntaqikyiqira quante timwa kyero vaisi mpo Ntiotarepirara uaquia hi kyaiqara uti variho timwa kyero Ntemitiriaasirara kyuqe kyaiqa vare variho timwa kyero qara ntumwa tora.

<sup>1</sup> Kaiasio, nte Ioniva Kotira nraaqiaraqaa ntaqikyi varuvama mwaa quara ini qara ntumwa tena. Po, Kaiasio, qutaaqama kyeroma ni mutukyavanto iara vahiro.

<sup>2</sup> Ni katao, e hia nriqa quani inraikyara varairaro i mwamwantavanto kyugema kyero vahiarive tina, nte iara rieqanama Kotirara aakyara nte varura. Nte ntapihi kyauqaro i vu nraato mwutukyavanto Kotirara kyugema kyero vahara variananra.

<sup>3</sup> Tiri tiqata vakya mponramwuvanto e hiananrasaita mwaini nri nteta iara mwiva kyugema kyero qutaa qua tutero variqiro vi variho qiavana nte mwi quara riena qamwateqana varuqo. Qio nte i ntapihi kyauqara e Kotira qua qutaa qua nraahu riemwaqira vi variaravama variaro.

<sup>4</sup> Qikye, nte qaiqaa nanra qua mpo rienave nte qamwataaninra. Ni nraaqiarara mwihua qutaa qua nraahu riemwaqita vi variavo ti vari quara, mwi quara rieqanama nte nronraqama kyena qamwataaninra.

#### *Ioniva Kaiasirara kyuqe kyaiqa vare variaro tura*

<sup>5</sup> Ni vaisio, e tiri tiqata vakya kyaahaqama nyateqarama hia viri taqaarahuavata kyaahaqama nyateqarama kyugema kyera kyaiqa vare varira.

<sup>6</sup> I mwutukyavanto mwihuara vahira mwihua tiri timwa timwiavata tire Iesusira nraakye qora mwaini varurahua riaunanra. Mwi vaisihua Kotira kyaiqa vare varirara tira, e mwihua kyugema kyera kyaraqotairave, mpo inraikyaqotairave, kyaahaqama nyatairata aanraqaa quata.

<sup>7</sup> Hia Iesusira qua riaa nraakye qorahua variavata mwihuara hia mwihuara munima timwivaqeta aanraqaa tuvare quare tiraitita, mwihua Iesusi Karaisira nrutuara rieqata mpo mwatukya mpo mwatukya nrohiqata Karaisira qua timwa nyi variara.

<sup>8</sup> Mwihua mwitaamaqita vi variarara tita, tire mwihuara qamwateqata sita kyeta vateta kyaahaqama nyataaravama vahiro. Tire mwihua kyaahaqamaqita viqata mwihuavata tirevata kuua kyaiqa mwia vare variararo qutaa quavanto qiomava viro nrinro hiananro.

#### *Ioniva Ntiotarepisiva uaquia hi kyaiqara utiho tura*

<sup>9</sup> Nkye Iesusira nraakye qora mwini variahua, nte nkyini qara vara kyauqaro Ntiotarepisiva kyaakueqama kyero hia tiri qua riarero uti variro. Mwi vaisiva nronra vaisiqama viro mpohuaqaa ntaqikyianinranra nraahuma mwia mwutukya vaharo variro.

<sup>10</sup> Nraakiara nkye hinani uro ntena nte mwia uaquia hi kyaiqara qovarama kyarerera. Mwiva tiri nrutuvanto mwatani tumi quarive tiro, unra qua tiriara ti variho. Hia mwi qiaara nraahuve. Mwiva varihata tiri qata vakyaahua mpo mwatukya mpo mwatukyanu nrohi variahua nriavaro mwiva kepukyaqama kyero hia nte mwihua qamwata nyatarerave timwa kyero taqaiharo mpovanto mwihuara qamwatero sita kyero nai nraamwuqi vatarero utiharo mwiva mwihua vaharo vu nraato nrenro tiqaro, E mwihua sita vatairera, mwia kyaara i raaquta kyaarara hia tirivata variqara Kotira qua rienanrave, tiro. Mwiva mwitaa tiqaro mpohuaavata antuare varira.

*Ntemitiriaasira kyuqe kyaiqara tura*

<sup>11</sup> Ni vaisio, hia uaqia hi kyaiqara utihua vi aanranraqaa quante. Kyuqe kyaiqa nraahu vare aanranra mwiaqaa nraahu quante. Kyuqe kyaiqa nraahu vare variva, mwiva Kotira nraaqjarama variho. Uaqia hi kyaiqara uti vari vaisiva hia Kotira okyara taqaivama.

<sup>12</sup> Vaisi mpovanto Ntemitiriaasiva varihata ekyaa nraakyе qora mwi vaisirara kyuqe vaisive ti variara. Mwihua taqaavaro mwi vaisiva quataaqama kyero Kotira kyaiqa vare varira. Tirevata mwi vaisirara kyuqe vaisive turo. Tire mwitaa tunanra evata riaararo quataa qua nraahuma vahiro.

*Ekyara qua mwanteqaro tura*

<sup>13</sup> Nte airi qua i timwa mwianriva vaihanavata nte hia qaraqitaina i timwa mwinrenra.

<sup>14</sup> Nte pataqia vari kyena nte uro i viri taqeqlana ivata qua tirera.

<sup>15</sup> Kotiva i kyaahaqama mwatairaro i mwutukyavanto qihaakyama vahirara variante.

I qata vakya mwaini variahua i qua mwantaavo. Ni kata pakya mwini variahua nianra mwiva nkyi qua mwantaiho tira timwa nyante.

## IUTI

### Iutiva qara vara kyora

Iesusira qati vara sivuma kyovaro nyaamwuni uro varuvaro 40 ihive 50 ihive nritarovaro Iutiva mwaa quara qara ntumwa tora. Iutiva Iesusira qatavanto variqaro nraakye qora hia unra qua mwaanra riemwaqi viraitita, kyuqema kye Iesusi Karaisira qua riemwaqi quate tiro, Iutiva mwaa quara qara ntumwa tora.

<sup>1</sup> Nte Iutiva Iesusi Karaisira kyaiqa vaisima varuqo. Nte Iemisira qatavantoma varuqo.

Nte Kotiva nyaanrama tai nraakye qorahuanima mwaa quara qara ntumwa tauqo. Kotira tiri tiqora mwutukyavanto nkyiara vaihata nkye variara. Iesusi Karaisiva nkyiara aanra kyugeraqaa quate tiro, nkyiqa ntaqikyi varira.

<sup>2</sup> Kotiva nkyiara po tiraro nkyi mwutukyaqitairo qihaakya hi varirata variqata nanrianra nanrianra mwutukya vahirata variata. Nkye mpoqiatava mwitaamaqita quata.

#### *Unra mwaanra okyara tu vaisihuara tura*

<sup>3</sup> Ni nramwunaa tuaavo, nte Kotiva nkyivata tirivata huvantu kyaani okyarara qara ntigana nkyi timwa nyiankye tura qaqira kyena mpo qua nkyi timwa nyinrenra. Vaisi mponramwuvanto tire Karaisira qua riauna quara qaqira kyaa vaisihua nkyi qua nraatara kyevorave tina, nte nkyi timwa nyianrita nkye Karaisira qua kepuqyaqama kye tuteqata variqi quata. Kotiva Karaisiva tiri kyaahaqa hiani okyarara tire qutaave tunanra kuaa nani timwinranra tita, tire mwia nraakye qoravanto variqata mpo qua hia tiraitita, avuqavuma kye mwia qua timwaqi virera.

<sup>4</sup> Nkye hia taqaavata mpohia vaisihua tirema kye uro nkyi utaqi variara. Haaru Kotira mpukuqi qara ntumwa tova tiqaro, Mwitaa hi vaisihuqaa Kotiva nronraqama kyero qua vataananrove, tura. Mwi vaisihua hia Kotirara nronraqama kye riaraitita, Kotiva tiri kyuqema timwa taani quara, mwi quara api tuqasaa kye unrasi tiqata, Tire qiomaa naitarama kye nraata vaati varaaana okyarara qaqira kyeta api nrohiana okyarara nraahu riemwaqita quare, ti variara. Mwihua mwitaa tiqata Iesusi Karaisira qoririma mwate variara. Iesusi Karaisiva tiriqaa ntaqikyi vari vaisiva tiri vunyaa vaisivanto varihata mwihua mwia qoririma mwate variara.

<sup>5</sup> Nkye mwaa quara vaakya riaaravata nte qaiqaa nkyi timwa nyinrenrave. Haaru Kotiva nai Isareri nraakye qora Isipiqitairo kyaahaqama kye sitaqiro uro kyero variqiro uvata mpo enta nai nraakye qoraqitai mpo uhua Kotira quara hia qutaa quave tuvaro mwia kyaara Kotiva hia mwihua vekyahu nyataraitiro, mwihua taiqa kyorave.

<sup>6</sup> Mwi quara rieta nkye nyaamwunyaahuaravata rieqata variata. Haaru nyaamwunyaaahua mpo uhua Kotiva mwihua nronraqama kyero nkyiari mwatukya nyunra mwiaqaa varuvaro pupohovata qaqira kyeta mpo kyaiqa varaaare tuvaro mwia kyaara Kotiva mwihua nronraqama kyero enta huraqi kyero seniqo rupa tora. Mwihua mwini variqi vita ekyaa entaqaa nronraqama kyetama qua varevara.

<sup>7</sup> Nkye Sotomianravata, Komoraaravata, mwitana tataaqa vahu mwatukyahuaravata, riaata. Mwi mwatukyaraqi varuhua nyaamwunyaahua ua kyaiqa varontema kyeta avuqavuma kye nai vare nai vare hi okyarara qaqira kyeta quara vairi nraanttamwa kyeta vaisivanto nraakyevanto nanrianra nanrianra api nrohi varuvaro mwia kyaara Kotiva qiaqotairo mwihua tatoqa tuto kyorave. Ekyaa nraakye qoravanto Kotira qia hia qipaani qiarara taunru kyevorave tiro, Kotiva qiaqotairo mwihua tatoqa kyora.

<sup>8</sup> Mwi quarara nraato tuataara vaihata mate unra mwaanra okyara ti varia vaisihua hia mwi quarara riaraitita, mwihua api kyaiqa nraahu vare variarave. Mwi vaisihua nkyiari su nyaatoqi api nrohi okyarara nraahu rieqata uaqia hi kyaiqara utiqata mwihua nkyiari mwamwanta uaqama kyeqata nronra vaisinramwuvanto qia quara hia riaraitita, nyaamwunyaahua kepukya inraikyaratava uaqia hi quara tiqata mwoqanyaa qua ti variarave.

<sup>9</sup> Haaru nyaamwunyaava Maikeriva nyaamwunyaahua vunyaa vaisivanto variqaro mwiva Saataaninravata Mosesira mwamwanta varaaninranra inronra hi variqaro mwiva tiqaro, Ntena Saataaninranra uaqia hi quara tiqana mwoqanyaa qua qiankyorave, timwa kyero Saataaninranra tiqaro, Kyairaro niqaa ntaqikyi variva, Kotiva iara qiarive, tura. Maikeriva nronravanto mwitaa tu quava vaihata mate mwi vaisihua hia mwi quarara nronraqama kye riaraitita, nyaamwunyaahua uaqia hi quara tiqata mwoqanyaa qua ti variarave.

<sup>10</sup> Mwi vaisihua unra mwaanra okyarara ti varia vaisihua mwi okyara mwi okyarara hia ntapihiraitita, ekyaa mwi okyarara uaqia hi okyararave tiqata uaqia hi quara mwianra tiqata mwoqanyaa qua ti variara. Mwihua quara vairi su nyaatoqa ihata quara vairivanto rieta taqe hia okyarara nraahu mwihua rie taqe hiarave. Mwi vaisihua mwi okyarara utuqi vi varivaro mwi okyarava mwihua vara raupirima kyaananro.

<sup>11</sup> Nte mwihuara poma tuqo. Mwihua Keniva nrohuntema kyeta api aanraqaa nrohi variarave. Haaru Mperamuva munimanra nraahu rieqaro nraakye qorara unra mwanriqa nrutu tuaahereqa variate tuntema kyeta mwaa entara mwi vaisihuavata munimanra nraahu uti variara. Haaru Koraava Mosesira nramwutaaqa hiqaro mwia nraatara kyarerera utuvaro ru kyontema kyeta mwi vaisihuavata taiqa vivara.

<sup>12</sup> Nkye nanrianra nanrianra mwutukya vaihata ntuvantuama viqata kyara nre variaraqi mwi vaisihua uaqia hia vaisihua nkyi utaqaa variqata mwihua tauma rumpuara uaqia hira votima kyeta nkyi utaqaa variqata mwihua nkyiariara nraahu rieqata kyara nre variarave. Mwi vaisihua qumina tonamwu nraantantamwa kyeta variarama. Toqavanto tonamwu mwia ntupupuata kyaiharo hia vativata vaiharo aahara tonamwu vhira votima kyeta variarama. Kyatari mwanrevanto ekyaa quvaruma viharo hia tamwa riaira votima kyeta variarama. Kyatari tuqavata ntaru kyaiharo aaharama vira votima kyeta variarama.

<sup>13</sup> Nramanri aisaakya votima kyero mwihua uaqia hi kyaiqava qoqaa vahirama. Mwihua qovoravanto qakyaa hiro nrohiro qipa vintema kyeta variara. Mwi vaisihua anoma kyero enta hiro upi kyokikina ri mwatukyaraqi ekyaa enta variqi quate timwa kyero, Kotiva mwi mwatukyara mwihuani terama kyero vataira.

<sup>14</sup> Ataamuva tohare varu vaisiva variro vaisi mpo mwata tovaro mwi vaisiva vara mwata tovaro mwitaamaqiro viro Inokura 6 vanto mwata tovaro mwiva 7 okyara mwiva varurama. Inokuva mwi entara variqaro Kotira qua qovarama kyero tiqaro, Taqaate, nraakiara nronravanto nyaamwunyaahua airi sita varero

<sup>15</sup> ekyaa nraakye qora qua avuqavu hirero tumuananrove. Nraakye qora Kotira qoririma mwatetwa mwianra qora qua ti varihua rirero tumuananrove tura. Inokuva haaru mwi quara turama.

<sup>16</sup> Unra qua mwaanra ti varia vaisihua *nrutu nraunru/nrunru nraanru* tiqata mpohuaqaa qua vateta tiqata, Nkyiqaama qua okyaravanto vaiho, ti variarave. Mwihua nkyiari api varaataa hi kyaiqara nraahu vare variqata nkyiari nyutu nraahu tuaahereqa variarama. Mwihua nkyiari kyuqema kye varirara nraahu riemwaqi viqata mpohua vara mwataniqa hi quara nraahu ti variarave.

<sup>17</sup> Ni nramwunaa tuaavo, mwihua mwitaa timwaqi vi varivata nkye hia mwihua hiante hiate. Tiri vunyaa vaisivanto vaisi mponramwu nronraqama kyovata mwihua qia quara nkye qati nraahu riemwa taata.

<sup>18</sup> Mwihua mwitaama titaa:  
Ekyaara enta qaumato vahiani entaraqaa  
nraakye qora qovarama vita  
mwihua Kotira aanraqaa nrohi varihuara raima  
nyateta mwihua hia Kotirara riaraitita,  
mwihua nkyiari api nrohiataa hirata nrohivarave, tura.

<sup>19</sup> Mwi vaisihua nkyi Iesusira nraakye qora ntainra kyarerera uti variarave. Hia Kotira mwanraquravanto mwihua kyaahaqa ihata mwihua mwi kyaiqara utuqi vi variara. Mwihua quara vairivanto nrohiantema kye mwihua nkyiari mwutukyavanto varaataa hi kyaiqara nraahu varaqi viqata nrohi variarave.

<sup>20</sup> Ni nramwunaa tuaavo, hia nkye mwihua nrohiantema kye nrohiata. Nkye Karaisira qua riaahuama. Karaisira quavanto mpo qua mpo qua nraatara kyero kyuqe quama vahiro. Nkye kepuuya nraakye qoravanto varirerata mwi quara nraahu mpoqiaqata quata. Kotira mwanraquravanto nkyi kyaahaqa hirata Kotirara aakyara nteqata variata.

<sup>21</sup> Nkye Kotira qua riemwaqita vivaro Kotira mwutukyavanto nkyiara vahirata variata. Nkye mwitaamaqi viqata tiri vunyaa vaisi Iesusi Karaisira vekya varivaro nkyi kyuqema nyatairata nkye ekyaa enta qati variqi quata.

<sup>22</sup> Karaisira quara hia kepuuyaqama kye riaraitita, taara vu nraato tihua, mwihuara nkye mpo titaa, mwihua kyaahaqamaqata quata.

<sup>23</sup> Vaisivanto qiaqi variharo mwiqitairo pati qatinani kyaintema kyeta nkye mwi nraakye qorahua kyaahaqamaqi vivata mwihua uaquia hi aanranraqaa hia quata. Nkye po tiqata mpohua kyaahaqa hirera hita mwihua qora kyaiqavanto nkyivata apiqama taankyo titaa, nkye qakyoma kye taqamwaqi viqata mwihua kyaahaqa hiata. Mwihua qora kyaiqavanto ntenra vi tuavaaqara voti hiva vahira nkye tu varevora.

### *Kotirara kyuqeve tura*

<sup>24</sup> Kotiva qiomaa nkyiqa ntaqikyiqiro virata nkye Kotira aanraqaa nrohiqatama hia qora kyaiqa varaqi vivaro hia nkyiqa qua vahirata nkye mwutukyavantai qamwate variqata vivita mwiva kepuuyaqavanto varinani uro ntevara.

<sup>25</sup> Kotiva mwanriqa kuaiqavanto variqaro mwiva tiri nronra vaisi Iesusi Karaisira kyaiqara rieqaro tiri huvantu timwa te varira. Mwivama vunyava variro. Mwiva ekyaa inraikyaqaa ntaqikyiqiro varivama. Mwiva kepuuyaqama kyeqaro kyaiqa vare varivama. Haaru Kotiva mwitaamaqiro vi varurama. Mate mwaa entaravata mwiva mwitaamaqiro vi varira. Nraakiaravata mwiva mwitaamaqiro nraahu vi variananrove. Nte quutaama tuqo.

## QOVARAMA KYORA

### **Uqetato quara Karaisiva qovarama kyero Ioninra timwa mwunra**

Iesusira qati vara sivuma kyovaro nyaamwuni uro varuvaro airi ihi 60 ihive nritarovaro Ioniva mwaa quara qara ntumwa tora.

Mwi entara mpo uhua Iesusira nraakye qora uaqiamaqita vi varuvaro Ioniva Iesusira nraakye qorara hia pupohairata kyuqema kye Iesusi Karaisira qua riemwaqita quate tiro, mwaa quara qara ntumwa tora.

Ioniva hia vaitaraitiro, qati variqaro ruvaata voti hora taqamwaqiro viqaro mpo inraikya mpo inraikyavanto nraakiara qovara hianinra taqero mwi quara qara ntumwa nyatora.

<sup>1</sup> Kotira kyaiqa vaisinramwuvanto varivaro nraakiara hia mpuahaama viraro mpo inraikya mpo inraikyavanto qovara hianinranra ntapihiate tiro, Kotiva mwaa quara Iesusi Karaisira timwa mwuvaro mwiva mwi quara qovarama kyora. Iesusi Karaisiva nyaamwunya vaasi mpo titovaro mwiva tumu ni timwa mpuvana nte Ioniva Iesusi Karaisira kyaiqa vaisivanto variqana

<sup>2</sup> ruvaata votima kyena taqeqlana mwi inraikyara mwi inraikyara taqaavarara rieqana qara ntumwa taura. Nte mwaa quarara qutaa Kotira mwakyaakya vaiharo qutaa Iesusi Karaisiva mwi inraikyara mwi inraikyarara timwa mpuvana riaavararama tuqo.

<sup>3</sup> Mwaa quara kyaara nti variani vaisira Kotiva kyuqemama mwataananro. Mwiva kyaara nti varirata mwaa quara rie vari nraakye qorhua, mwihuavata mwaa quarara nronraqama kye riemwaqi vivera, Kotiva mwihuavata kyuqemama nyataananro. Mwaa quava qutaaqama kyero qovara hiani entava qaumatoma vahiro.

#### *Kotira nraakye qora mwatukya 7 nramwuqi varuhuara qua mwanteqaro tura*

<sup>4</sup> Kotira nraakye qora Esiaani mwatukya 7 nramwuqi variahua nte Ionivama nkyi qua mwantena. Kotiva mate qati variqiro vi varivama. Haaruvata mwiva qati variqiro vi varuvama. Nraakiaravata mwiva qati variqiro viqaro tumuanrivama variro. Kotiva nkyi kyuqemaqiro viraro nkyi mwutukyaqitairo qihaakya hi varirata variata. Kotiva nai taintaqaa mwatakyaa viro variharo mwia vuqaa mwanraqura 7 nramwu variahua, mwihuavata nkyi kyuqemqa qitairo vivaro nkyi mwutukyaqitairo qihaakya hi varirata variata.

<sup>5</sup> Iesusi Karaisivavata nkyi kyuqemaqiro viraro nkyi mwutukyaqitairo qihaakya hi varirata variata. Iesusi Karaisiva hia qoriri hiraitiro, kyuqema kyero Kotira okyara tiri timwa timwi variva, mwiva nraante vunyaa qutu quaraqitairo siviro qati variqi vi variro. Mwatani vunyaa vaasi airivanto variavaro mwiva ekyaa mwihua vunyaa vaisivantoma variro. Mwia mwutukyaqitairo vivaro nkyi mwutukyaqitairo qihaakya hi varirata variata.

Mwiva tiriara rieqaro qutu vurara tiro, Kotiva tiri uaqia hi quara nruka timwa taihata tire huvantu vita variqata

<sup>6</sup> tiri vunyaa vaisivata variqata qioqama kye mwia qora Kotira kyaiqa varaqi quarahuama varita. Nrivaqe mwia nrutu tuaaheraqi quara. Mwiva kepukyavanto variqaro ekyaa enta qati variqiro quananrove. Qutaave.

<sup>7</sup> Qio taqaate. Mwiva tonamwuqi variqaroma qaiqaa tumuananrove.

Mwiva tumi varirata ekyaa hia mwia taqe varivaroma tumuananrove.

Mwia mwamwantaqi hiqaariqo ruto vaisihua, mwihuavata mwia taqe varivararo tumuananrove.

Mwi entara mwatani varihua mpo mwatanaa mpo mwatanaavanto mwia taqeta ntate varivarave.

Mwi inraikyava qio mwitaama hiananrove. Qutaave.

<sup>8</sup> Kotiva nronravanto ekyaa inraikya nraatara kyaiva tiqaro, Nte toharena vuni variavantema kyena ekyaararaqaavata variarivama varuqo, tiro. Kotiva mate qati variqiro vi varivama. Haaruvata mwiva qati variqiro vi varuvama. Nraakiaravata mwiva qati variqiro viqaro tumuanrivama variro.

### *Ioniva nai ruvaata taqorara tura*

<sup>9</sup> Nte Ioniva nkyi sata sakyaavantoma varina. Nkyevata ntevata Jesusiravata kuaaqi variqi vi varunanra. Nte nkyi kyapata variqi viqana nriqa vi inraikyarave, muaanrave, varaqina vi varura. Mwitaamaqi vi varuraro Kotiva tiriqaa ntaqikyi varihata tire mwia nraaqiara varunanranra tita, nkyevata tirevata kepukyaqama kyeta variqi vi varunanra. Nte mwitaamaqi viqana Kotira qua nraakye qora timwa nyiqi vina, Jesusiva qovarama kyai quara nraakye qora timwa nyiqi vi variavata mwia kyaara ni rupaqita uro kyaarerera utaqaa vahi mwatara Patimosiqa kyorama.

<sup>10</sup> Nte mwini variqana tiri vunyaa vaisi nrutu tuaaheraani entaraqaa variavaro Kotira mwanraquravanto nivata varuvana nte nronraqama kyena Kotirara riemwaqi viqana variavaro ni moqasairo quavanto nronraqama kyero ntoma nruqua taara tiqaro

<sup>11</sup> mwitaama tiro: E taqe varina inraikyara qara ntumwa kyera mwi qarara vara kyairaro Kotira nraakye qora mwatukya 7 nramwuqi varinani quarive. Mwi mwatukyara nrutu vahirero Epesaasi, Simenaa, Pekamaami, Taiataira, Saatisi, Pirateripiaa, Reotisiaa, mwi mwatukyara nrutu mwitaamama vaiho, tiro.

<sup>12</sup> Mwitaa ti varuvana nte mwi quara ti varu vaisira taqaankye tina, tuqasaavi taqaavaro omwa ite varu inraikyava 7 nramwu koriqo ututo inraikyava vahuvaro

<sup>13</sup> mwia utana vaisi mwiva varura. Mwia viri vahirero nte mwatani mwatatai nraaqiarava varuqo tu vaisira viri votima kyero vahura. Mwiva tuavaaqa mpuahaa utu tovaro kyuqu taaqi tumitarovaro varuvaro mwetokyaqaa mwiva koriqotairo ututo hoqukyara hutero varura.

<sup>14</sup> Mwia qiata kyaahi vahirero turomunrave, vahi vosouve, mwia voti huva vahuvaro mwia vuvanto qia votima kyero ite varura.

<sup>15</sup> Mwia kyuqu qaini voti hira mwia nrutu mparaasi ravita kyero kyuqema kye utu kyero vahamwenra qutaiharo takyuqira votima kyero takyuqi varuvaro mwia quavanto vahirero aisaakya nruqua taara ti varura.

<sup>16</sup> Mwitaama vahuvaro mwiva nai kyauqu tuananrani qovora 7 nramwu tutovaro paipa hini hini mpoqama kyero vahova mwia nroqitairo qovarama vuvaro aaqu tero varura. Mwitaama vahuvaro mwia virivanto huarivanto ihera itaintema kyero iteqaro takyuqi varura.

<sup>17</sup> Mwi vaisiva mwitaama varu vaisiva varuvana nte mwia taqena tumu ntina qutu vu vaisira votima kyena mwia kyuqutarani variavara. Nte mwitaama variavaro mwiva nai kyauqu tuananraqotairo ni mamantaqaa vatero tiqaro, Hia aatu hiante. Nte tohare vuni variavantema kyena nte ekyaararanivata variarivama varuqo.

<sup>18</sup> Nte qati variqi vi varuvama varuqo. Qio taqaante. Nte qutu quavavavata mate qati variqi viqana ekyaa enta qati variqi virerave. Nte ntaqikyiqana nte qariroma vaisivanto qutuananrove. Nte qariroma vaisivanto uaquia hi mwatara nronraqama kyero qia itaaninraqi quananrove.

<sup>19</sup> E taqe varina inraikyara qara ntumwa taante. Mate mwaa entara qovara hianinravata, nraakiara qovara hiani inraikyararavata, qara ntumwa taante.

<sup>20</sup> E ni kyauqu tuananrani qovora 7 nramwu taqe variananravata, omwa qupi kye vataa inraikyara koriqotairo utu kye 7 nramwu vataaravata, nte mwi quara okyara uqeta taira vutu kyena i timwa mwinrenrave.

Qovora 7 nramwu mwia okyara vahirero mwihua nyaamwunyaai vaisi 7 nramwu variarave. Nyaamwunyaai vaisi 7 nramwu vaakya tura Kotira nraakye qoravanto varia mwatukyara 7 nramwuqaa ntaqikyi variarave. Omwa qupi kye vataa inraikyara 7 nramwu taqe variananra okyara mwitaamama vahiro. Mwi inraikyava Kotira nraakye qoravanto varia mwatukyara 7 nramwuma vaiho, tiro.

## 2

### *Epesaasiqi varu nraakye qorahua qua nyunra*

<sup>1</sup> Mwitaa timwa kyero mwiva tiqaro, Epesaasiqaa ntaqikyi varira nyaamwunyaanrani mwataama kyera qara ntumwa taante. Nte ntena kyauqu tuananrani qovora 7 nramwu tutena omwa qupi kye vataa inraikyara koriqotairo utu taara 7 nramwu vataara utaqaa nrohi varuva, ntema nkyi qua timwa nyuqo:

<sup>2</sup> Nte nkye kyaiqa vare variara taqaurave. Nte taqauqata nkye toqaamwu tu kyeta kyaiqa varaqi viqata hia pupohaihata kepukyaqama kyeta variqi quarave. Nte taqauqata nkye uaquia hia vaisihua hia qamwata nyataraitita, mwihuara quate qiarave. Uaquia hu vaisihua mponramwu qovarama vita tiqata, Tire Iesusiva nronraqama kyaihata varurahuave, tuvata nkye mwihuara hiqata taqovata mwihuara unra tu vaisihua varurave.

<sup>3</sup> Nte taqauqata nkye nianra rieqata muaanra varaqi viqata hia qoriri hiraitita, kepukyaqama kye variarave.

<sup>4</sup> Nkye mwitaamaqi viqata qio variavanavata nte mpo qua kyaara nkyiara tirerave. Nkye tohareta varu entara nkyi mwutukyavanto nianra mpoqiaavata vahurave. Mwaa entara nkyi mwutukyavanto hia nronraqama kyero nianra vaiho.

<sup>5</sup> Mate nkyi kyaiqvanto tumu ntira mwianrama riaate. Nkyeta qora kyaiqa qaqlira kyeta haaru kyuqe kyaiqa varonema kyeta varaaite. Nkye hia nkyeta qora kyaiqa qaqlira kyaivera, nte nkye hinani uro ntena nkye omwa qupiqeqata vataa inraikyara mwia vara qatinani kyaaninrave.

<sup>6</sup> Mwitaa tiqanavata nte nkyi qua mpo rieqana nkyi qamwata nyatauqo. Nte ti varuntema kyeta nkye tiqata, Nikoraasiqinaahua utua kyaiqarara tiri tiqo itaiho, ti variave. Nkye mwitaa qiarara tina, nte nkyi qamwata nyatauqo.

<sup>7</sup> Nkyi su nyaato kyuqe su nyaato vahirera, Kotira mwanraquravanto Kotira nraakye qora timwa nyi vari quara rieqata variate. Vaisi mpovanto qora kyaiqa hia utiraitiro, qora kyaiqa nraatara kyeqaro variqiro viraqe nte mwi vaisirara qio Kotira aakyoqi uro variqarama kyatari mpo mwia tamwa nreta qati nraahu variqi vira hiqu kyera nrenanrave qianinrave, tiro.

### *Simenaaci varu nraakye qorahua qua nyunra*

<sup>8</sup> Mwitaa timwa kyero mwiva tiqaro, Simenaaciqaa ntaqikyi varira nyaamwunyaanrani mwataama kyera qara ntumwa taante. Nte toharena vuni variavantema kyena nte ekyaararanivata variarivama varuqo. Nte qutu quavava mwaa entara qati variqi vi varuvama varuqo.

<sup>9</sup> Nte qianinra riaate. Nte taqauqata nkye muaanra nronraqama kye vare variarave. Hia nkyini mpo inraikyavata vahata nkye vehiqama kye variarave. Qio nkyini airi inraikya nyaamwunima vaiho. Nte riauqata Iutaa vaisinramwuvanto tiqata, Tire Iutaavanto nraahu Kotira nraaqiara varuro, tiqata nkyiara uaquia hi quara qiaqata variarave. Mwihuara hia Kotira nraaqiara variraitita, mwihuara Saataaninra nraaqarama variavo.

<sup>10</sup> Nronraqama kyero muaanravanto qovara hirata hiama aatu hiqata variate. Riaate. Saataaniwa nkyi mwataara hirero nkyi mponramwu sitaqiro uro karavuqi kyaananrove. Nkyi karavuqi uro kyairata nkye kyauqurutana iherara mwipi variqi vivata nkyi qoraqama nyatevarave. Nkyi qoraqamaqita vivata nkye hia ni qoririma mataraitita, nianra nraahu nraato tuqita quate. Nkyi nronraqama kye ntuqutuqi vita uro nkyi ntuqutu kyaivera, nianra nraahu vu nraato tiqata varivaqena nte ntenavanto mwia qiata nkyi kyoqaa nyiqana qati variqi vira nkyi nyianrita kyuqema kye qati variqi quate.

<sup>11</sup> Nkyi su nyaato kyuqe su nyaato vahirera, Kotira mwanraquravanto Kotira nraakye qora timwa nyi quara riaata. Vaisivanto nraatara kyeqaro kyuqe aanraqaa variqiro viro uro qutu quari vaisiva qio variraro nraakiara qutu quariva hiama mwia tu varaananrove, tiro.

### *Pekamaamiqi varu nraakye qorahua qua nyunra*

<sup>12</sup> Mwitaa timwa kyero mwiva tiqaro, Pekamaamiqaa ntaqikyi varira nyaamwunyaanrani mwataama kyera qara ntumwa taante. Nte paipa hini hini mpoqama kyero vaihira vatauvama varuqo. Nte qianinra riaate.

<sup>13</sup> Nkyi mwatukya mwia nte ntapihi kyaurave. Nkyi mwatukyaqi airi nraakye qora Saataaninra qua rieqata mwia kyaiqa vare variavata nkye mwini variqata nianra nraahu riemwaqi vi variarave. Saataaninra kyaiqa vare variahua airivanto variavaro nkyiqitairo mpovanto Antipaasiva kyuqema kyero ni qua ti varihata mwia kyaara mwia ru kyaavata nkye mwiaqatai hia aatu hiraitita, nkye kepuqyaqama kyeta nianra nraahu riemwaqi vi variarave.

<sup>14</sup> Nkye mwitaamaqi viqata qio variavanavata nte mpo qua kyaara nkyiara tirerave. Nkyi utani vaisi mponramwuvantovata api qua ti variavata nkye mwihua qua rie variarave. Haaru Mperaa-muva variqaro vaisi mpo mwia nrutu Mperekira timwa mwinro tiqaro, Kumwaanri mwataama kyera timwa nyiqanrama mwihua rapatama kyairata i mwatanaa Is-arerivanto i unra qua rieqatama unra mwaniqiqani vate kyarara nreqatama api qaraqita viqatama uaqiana quate, turave.

<sup>15</sup> Nkyi utaqitai vaisi mponramwuvantovata api qua ti variavata nkye mwihua qua rie variarave. Mwi vaisihua Nikoraasiqinaahua api timwa taa quara nkyi timwa nyi variavata nkye mwihua qua rie variarave.

<sup>16</sup> Nkye mwi quara mwi quara api qua qaqlira kyeta tuqasaaqita kyuqe qua nraahu riemwaqita quata. Nkye hia mwitaa hivera, nte nkye hinani uro ntene nkyi utaqaa api qua ti varihuavata ntene noqinaa paipaquo ntaquaninrave.

<sup>17</sup> Nkyi su nyaato kyuqe su nyaato vahirera, Kotira mwanraquravanto Kotira nraakye qora timwa nyi quara rieqata variata. Qio kepuqyaqamaqiro viqaro qora kyaiqa uro nraatara kyaani vaisira, nte mpo kyara *manaa* uqeta taura hini mwina mwiaqataina ori egarorivata mwianrinro mwiaqaa vahi nrutura mwia varaari vaisiva, mwiva nraahuma ntapihiananrove, tiro.

### *Taiatairaqi varu nraakye qorahua qua nyunra*

<sup>18</sup> Mwitaa timwa kyero mwiva tiqaro, Taiatairaqaa ntaqikyi varira nyaamwunyaanrani mwataama kyera qara ntumwa taante. Nte qua qianinra riaate. Nte Kotira mwaaquvanto ni puvanto qia votima kyero ite varihana varuvave. Ni kyuqu qaini voti hira mwia nrutu mparaasiqaa vahaamwenra qutaiharo takyuqira votima kyero takyuqi varihana varurave.

<sup>19</sup> Nte variqana nkyi kyaiqa taqe varurave. Nte taqauqata nkye nanrianra nanrianra mwutukya vaihata variarave. Nkye Kotirara kepuqyaqama kye rieqata variarave. Nte taqauqata nkye mpohua kyaahaqa hiqata variarave. Nkye muaanra nrihata hia qoriri

hiraitita, kepukyaqama kyeta variqata varaqi vi variarave. Vuni nkye Kotira kyaiqa pataqia varaqi vita mate nkye mwi kyaiqara nronraqama kye vare variarave.

<sup>20</sup> Nkye mwitaamaqi viqata qio variavanavata nte mpo qua kyaara nkyiara tirerave. Nraakyе mpovanto mwia nrutu Ieseveriva nai tiqaro, Nte Kotira qua qovarama kye varuvave, timwa kyero nkyi utaqi varihata nkye mwia qati taqe kyaavarо nkyivata varirave. Mwi nraakyeva api qua timwa nyi varihata ni kyaiqa vaisinramwu mwia qua rieqata api qareqata unra mwanriqani vataa kyarara nre variarave.

<sup>21</sup> Mwi nraakyeva nai qora kyaiqa qaqlira kyaarive tina, nte mwia vekya mpuahaama variqi vi varuqaro mwiva hia qaqlira kyaraitiro, mwi kyaiqara qati nraahu utuqiro vi varirave.

<sup>22</sup> Mwia kyaara nte mwi nraakyera ntuquutariro mwiva nronraqama kyero nriqa quani inraikyara varaqiro quananrove. Mwiavata api nrohi vari vaisihua, mwihuavata hia nkye po kye titi tiqata, Hia mwi nraakyeravata nrohiataarave, tivera, nte qamwanrama kyenama mwihuavata ruarita mwihuua nronraqama kyetama nriqa vi inraikyara varaqita vi varivarave.

<sup>23</sup> Nte mwitaama kyena mwi nraakyera vataqi vihua, mwihuavata ekyaa ntuqutu kyaarita qutu vivarave. Nte mwitaamaqi quarita Kotira nraakyе qora mpoqi mpoqi varihua ni okyara ntapihi kyeta taqevarave. Nraakyе qoravanto su nyaatoqi vahi quarave, mwihuua vare varia kyaiqarave, nte mwi quara mwi quara tukyama kyena ekyaa ntapihi kyaurave. Nraakyе qora kuaiqia kuaiqiyavanto nkyiari qora kyaiqa varera mwiaqama nkyiari koqaa tukyama kyena nyianinrave. Ni okyara mwitaama vahirave.

<sup>24</sup> Nkye mponramwuvanto Taiatairaaci variahua hia mwi nraakyera qua rie variarave. Mpo qua mwi quarara Saataaniva uqeta tai quarave ti varia quara, nkye mwi quaravata hia riaraitita, variqi vi variarave. Nkye mwitaa hiarara tina, nte hia mpo muaanra nkyiqi vataaninrave, tuqo.

<sup>25</sup> Nkye kyuqe inraikya tutara mwi inraikyara tuqara kyeta tute variqi vivaqe nte tumuankye.

<sup>26</sup> Kepukyaqamaqi viqaro qora kyaiqa nraatara kyero ni mutukya vahianinra nraahu varaqiro vi variqia vaisira, nte nronraqama kyaariro mwiva mpo mwatanaa mpo mwatanaahuaqaa ntaqikyiqiro quananrove.

<sup>27</sup> Ni kova mwitaama kyero ni nronraqama kyaihana nte ntaqikyiqi vi varuntema kyeta mwihuavata mpo mwatanaa mpo mwatanaahuaqaa ntaqikyiqi vivarave.

Mwihuua ntaqikyiqi viqata qaini kyauru tuqi viqata

mwiaqotai tave ntukuraa kyaintema kyeta

mwihuua mpo mwatanaa mpo mwatanaahua

ntuqutuqi viqata mwihuuaqaa ntaqikyiqi vivarave. (Sng 2:9)

<sup>28</sup> Nte mwi vaisihua nronraqama kyena qovora nrumu qaataate varira itataraaravata nyianinrave.

<sup>29</sup> Nkyi su nyaato kyuqe su nyaato vahirera, Kotira mwanraquravanto Kotira nraakyе qora timwa nyi vari quara rieqata variate, tiro.

### 3

#### *Saatisiqi varu nraakyе qorahua qua nyunra*

<sup>1</sup> Mwitaa timwa kyero mwiva tiqaro, Saatisiqaa ntaqikyi varira nyaamwunyaanrani mwataama kyera qara ntumwa taante. Nte qiani quara riaate. Nte Kotira mwanraqura 7 nramwu tutena varuvama varuqo. Nte qovora 7 nramwu tutena varuvama varuqo. Nte nkyi kyaiqa taqamwa ntapihi kyaurave. Mpo hiahua nkyiara kyuqema kyeta mwihuua qati variqi quahuave ti variavanavata nte nkyiarama nkye qutu quahuave tuqo.

<sup>2</sup> Vu ntapairi kyeqata sivi variate. Nkyeta hini vataa inraikyava hia qutu vira, mwi inraikyara kepukyaqama kyaivaro hia qutu quarive. Nte taqauqaro nkyi kyaiqavanto Kotira vuqaa hiama qioqama kyero vahiro.

<sup>3</sup> Nkyi kyaiqavanto mwitaama vahirara tita, nkyi timwa nyuvata rio quara, mwi quara riemwa teta mwi quara nraahu riemwaqi viqata qora kyaiqa qaqlira kyaata. Nkye hia su ntapairi kye sivita varivera, nte mpuara vaisivanto nrihanrama nyatero nri ntema kyena nkyi rirera nrianinrave. Nte nrintaani entara nkye hia qio ntapihi kyeverave.

<sup>4</sup> Nkye mpo hiahua Saatisiqi variahua, nkyeta tuavaaqa hia qainaamaqama kyaavo. Nkyi kyaiqavanto qio vaihatara tita, nkye qiomma egarori tuavaaqa utu teta nivatama kye variqi vivarave.

<sup>5</sup> Qio kepukyaqamaqi viqaro qora kyaiqa nraatara kyaani vaisira, mwi vaisira nrutu nraakye qora qati variqi vi nrutura qara ntumwa tai mpukuraqitai nte hia nraka kyaraitina, qati kyena, egarori tuavaaqa utu mwataaninrave. Nte ni kora vuqaavata, nyaamwunyaahua suqaavata, variqana qoqaa vutu kyena tiqana, Mwi nraakye qorava ninivantoma variho, qianinrave.

<sup>6</sup> Nkyi su nyaato kyuqe su nyaato vahirera, Kotira mwanraquravanto Kotira nraakye qora timwa nyi vari quara rieqata variate, tiro.

### *Pirateripiaaqi varu nraakye qorahua qua nyunra*

<sup>7</sup> Mwitaa timwa kyero mwiva tiqaro, Pirateripiaaqaa ntaqikyi varira nyaamwunyaanrani mwataama kyera qara ntumwa taante.

Nte qianinra riaate. Api okyarave, qora okyarave, hia niqi vahana nte kytataqama kyena nraahu varuvave. Qutaa okyaravanto nraahu niqi vahana varuvave. Nte vitiva haaru tuto kiqara ntema mwi kiqara tutauquo. Nte mwi kiqaraqotai qesa qatua kyaariro hiama qio mpovanto titi taananrove. Nte mwi kiqaraqotaina qesa ru taariro hiama qio mpovanto qatua kyaananrove.

<sup>8</sup> Nte nkye vare varia kyaiqara ntapihi kyaurave. Nte nkyi suni qesa mpo qatua nyatauqaro vahira, hiama qio mpovanto titaananrove. Nte taqauqaro nkyi kepukya pataqia vaiho. Mwitaama vaihatavata nkye hia ni qoririma mataraitita, ni qua qati riemwaqi vi variarave.

<sup>9</sup> Iutaa mponramwuvanto tiqata, Tire Iutaavanto nraahu Kotira nraaqiara varuro, ti variahua, mwi vaisihua Saataaninra nraaqiara, unra ti varia vaisihua variarave. Nte mwi vaisihua ntavaaqavuqina uro nkyi kyuqutarani kyaarita mwihua tumu ntita variqata nianra quitaama mwia mwutukyavanto nkyiara vaharo variho tivarave.

<sup>10</sup> Nte nkyiara hia qoriri hiraitita, kepukyaqamaqi quate qiyata nkye ni qua kyuqema kye riemwaqi quarara tina, nte nkyiqa ntaqikyiaro nronraqama kyero muaanra vahiali entava qovara hiariva hia nkyiqa qovara hiarive. Mwi entara nronraqama kyero muaanravanto qovarama viro ekya mwatanaa mwataaramaqi virata mwihua anomia kye uaqama variqita vivarave.

<sup>11</sup> Nte qamwanrama tumuntaaninrave. Nkyeta vataa inraikyara tuqara kyeta tuaate. Nkyeta kyaiqa ututaa kyoqaara nkyi nyianinra haunri mpovanto ntavihi kye varaankyorave.

<sup>12</sup> Kepukyaqamaqi viro uro qora kyaiqa nraatara kyaani vaisira nte mwi vaisira vara kyena ni mwanriqa Kotira nraamwuqi rataariro nraamwu kyaara kepukyavanto variananrove. Mwi vaisiva hia mwi nraamwunra kyaraitiro, mwipi mwanriqanraqama kyero variqiro quananrove. Nte mwi vaisiraqaa ni mwanriqa Kotira nrutu qara ntumwa mwatena, Kotira mwatukya nrutuvata mwi vaisiraqaa qara ntumwa mwataaninrave.

Mwi mwatukyaya Ierusaremi qaraakya mwatukyama vahiananro. Mwi mwatukyaya nyaamwuni Kotiva varinasairo tumu vahiananrove. Ntena nutu

qaraakya nrutuvata mwi vaisiraqaa qara ntumwa mwataaninrave. Kepukyaqamaqi viqata qora kyaiqa nraatara kye nraakye qorahuaqaa nte mwitaama kyeqana qara ntumwaqina virerave.

<sup>13</sup> Nkyi su nyaato kyuqe su nyaato vahirera, Kotira mwanraquravanto Kotira nraakye qora timwa nyi vari quara rieqata variate, tiro.

### *Reotisiaaqi varia nraakye qorahua qua nyunra*

<sup>14</sup> Mwitaa timwa kyero mwiva tiqaro, Reotisiaaqaa ntaqikyi varira nyaamwunyaan-rani mwataama kyera qara ntumwa taante.

Nte qua qiarita riaate. Ekyaa Kotira quara nte qio quataave ti varuvama. Nte ekyaa Kotira kyaiqa taqaurara hia uqetaraitina, vutu kyeqana ntapihikye timwa nyi varuvama. Nte ekyaa Kotiva ututai inraikyara mwia okyaravantoma varuquo.

<sup>15</sup> Nte nkye vare varia kyaiqara taqaurave. Nte taqauqata nkye hia anomia kyero anterove, anomia kyero qia itai nramanrinra votima kye variavo. Nkye pataqia tutoqa hi nramanrinra votima kye variavo. Nkye anomia kye antai nramanrinrave, anomia kyero qia itai namanrinra votima kye varivae nte qiove qiataarave.

<sup>16</sup> Nkye hia anomia kye anteta, hia anomia kye qia itaihata, pataqia tutoqa hi nramanrinra votima kye variavanana tina, nte nkyi ntena nroqitaina mwunru vihi kyarerave.

<sup>17</sup> Nkye tiqata, Tire airi inraikya vataurahua qiomia varuro. Tire hia qumina mpo inraikyara aara ntaananrave, ti variarave. Nte nkyiara po tuquo, nkye mwitaa tiqatama nkye nkyeta vehiqama kye variara hia ntapihi kye taqaavo. Po, mpohua nkyiara po kye tiva nraahu vaiho. Nkye vehi nraakye qora nraahu variavo. Nkye tuavaaqa hia vahata tokyavanto variavo. Nkye vu qipa vihata vuara kyaara hiahua variavo.

<sup>18</sup> Nte nkyiara mwataa hiatema tina, Nkye niqaatai kyoqaa hiata. Kori qiaqotairo hiqama kyaira kyuqera mwia niqaatai koqaama kye varaivaro nkyini kyoqaa airi vahiarive. Nkye tokya variqata kyauriqata variarara tita, niqaatai egarori tuavaaqa vara kyeta nkyeta mwamwantaqa ntumwaqu taate. Niqaatai manrasini vara kyeta nkyeta suqaa qu taivaro nkyi suvanto ntapairi virata kyuqema kye taqaate.

<sup>19</sup> Ni mutukya vahi nraakye qorahua kyuqema variate tina, mwihua timwa nyate-qana mwihua ntuqutuqina vurave. Mwianra rieqatama nkye qora kyaiqa qaqlira kyeta, ni kyaiqa kyuqe kyaiqa nraahu varaqi quate.

<sup>20</sup> Qio riaate. Nte mwaatani qesaqaa variqana qesa ntukuakua hiqana varuquo. Vaisi mpovanto ni qua riero qesa qatua matairera, nte mwi vaisira nraamwuqi verante mwi vaisiravata kyara nre variariro mwi vaisiva nivata variqaro kyara nre variananrove.

<sup>21</sup> Kepukyaqamaqiro viqaro uro qora kyaiqa nraatara kyaani vaisira nte mwi vaisira nronraqama kyaariro mwiva nivatama kyero mwatakyaa viro variqaro ntaqikyiqiro quananrove. Nte qora kyaiqa nraatara kyena kepukeyavanto variqananra tina, nte ntena kora mwia taintaqaa mwatakyaa vina variqana mwikyantiri ntaqikyiqi vivarurama. Kepukyaqamaqi viqata uro qora kyaiqa nraatara kyehua ni votima kyeta variqata ni kyauqu tuananrani mwatakyaa vita varivarave.

<sup>22</sup> Nkyi su nyaato kyuqe su nyaato vahirera, Kotira mwanraquravanto Kotira nraakye qora timwa nyi vari quara rieqata variate, tiro. (Mwiva mwitaa tuvana nte Ioniva ruvaata taqontema kyena mwia qua riaavarave.)

## 4

### *Nyaamwuni Kotira tainta nronra taqorara tura*

<sup>1</sup> Nte Ioniva variqana nte ruvaata votima kyena qaiqaa mpo taqaavarave. Nte nyaamwuni taqaavarao qesavanto qatua viro vahurave. Nte mwini taqe variavaro quavanto ntoma nruqua votima kyero tauraa ni timwa mpu quava qaiqaa nianra

tiqaro, Mwaini nrumu variraqe nraakiara mpo inraikya mpo inraikya qovara hianinra nte i nraamwutaankye, tiro.

<sup>2</sup> Quavanto mwitaa tuvaro qamwanrama kyero Kotira mwanraquravanto kepuqyaqama kyero nivata varuvana nte variqana taqaavaro ni puni nyaamwuni tainta nronra, vunyaa vaisi tainta vahuvaro mwiaqaa mpovanto mwatakyaa viro varura.

<sup>3</sup> Mwiva taintaqaas mwatakyaa viro varuvaro mwia virivanto takyuqiqaro nronra munima kyai orira mwia nrutu *iasipaave*, mpo ori nraanre ori mwia nrutu *konirianive*, ori mwitana takyuqi varintema kyero mwia virivanto takyuqi varura. Mwi vaisiva taintaqaas mwatakyaa viro varuvaro haunrikyavanto mwia tainta vara ututuma kyero vahuvaro haunrikyaa mwiva vuhanaa ori *emaraari* votima kyero vhura.

<sup>4</sup> Tainta nronra vhura mwia vara ututu tainta 24 nramwu vahuvaro tainta mwinramwunraqaa 24 vaisi nronra vaisinramwu mwatakyaa vita varuvaro mwihua tuavaaqa egarori tuavaaqa vahuvaro mwihua qiataqaa koriqotairo ututo tovaqara quteta varura.

<sup>5</sup> Mwitaama vahuvaro tainta utaqaa vhuraqitairo aaquakyaavanto mpo uti varuvaro nyaanruva nruqua tintema kyero qua rara ti varuvaro tainta mwia vuni omwa 7 nramwu qupi tova ite varura. Omwa mwinramwuva vahirero Kotira mwanraqura 7 nramwu vhura.

<sup>6</sup> Mwitaama vahuvaro tainta vuni kyaarera, karaasi voti huva vahuvaro mwipi vevatovata qio taqaariva vhura.

Mwitaama vahuvaro tainta nronra tataaqani qati variqi vi varu inraikyava taaratana taaratana tainta utaqaa vahuvaro mwi inraikyaraqaa vu airivanto vuni mwoqani vhura.

<sup>7</sup> Mwi inraikyava vahirero mpovanto vairi raioni mwia viri voti huva vahuvaro, mpovanto purimakau nraati votihuva vahuvaro, mpovanto vaisi viri voti huva vahuvaro, mpovanto memonra hitero nrohi varintema kyero vhura.

<sup>8</sup> Mwi inraikyava taaratana taaratana qati variqi vi varu inraikya vahuvaro mwihua kuaiqia kuaiqiaqaa nraaokya 6 nramwu vahuvata ekyaa nraaokya mwia mwoqaqaavata mwemwanivata vu airinti vahuhua variqata ihi timwaqi viqata hia tekya hiraitita, iheravata entaqivata ihi timwaqi viqata mwitaama tita:

Nronravanto Kotiva kepuqyavanto  
ekyaa inraikya nraatara kyero nritarero varivave.

Mwiva kyotatavantove, mwiva kyotatavantove,  
mwiva kyotatavantove.

Mwiva haaru qati variqiro vuvave.

Mwiva mate qati variqiro vi varivave.

Mwiva nraakiara qati variqiro quariva tumuananrove,  
ti varura.

<sup>9</sup> Qati variqi vi varu inraikyava taaratana taaratanaavanto mwitaa timwaqi viqaro tainta nronraqa mwatakyaa vi varu vaisira mwia peqa okyara viriniqama kyero mwia nrutu tuaaherero mwia qamwata mwataqi viqaro mwiva ekyaa enta qati variqiro vi variananrove timwaqi vi varura.

<sup>10</sup> Qati variqi vi varu inraikyava mwitaa timwaqi vi varuvata 24 vaisi nronra, mwinramwuhuvata mwatasata tumu ntita variqata tainta nronraqa mwatakyaa viro varu vaisira qamwata mwateta tiqata, Mwiva ekyaa enta qati variqiro vi variananrove, tiqata nkyiari tovaqa qutora qatinani vara kyeta tainta nronra vhura mwia kyuqu vahunani tuto kye varura.

Mwitaamaqi vita mwihua tiqata,

<sup>11</sup> E mwanriqavanto Kotiva tiriqaa  
ntaqikyi variaravave.

E ekyaan inraikya utu kyera qovarama kyaaravave.  
 Mwitaa hi variananranra tita,  
 tire i qamwata mwateqata tiqata,  
 I okyara kepukya okyara nraahuma vaiho.  
 I nrutuvanto viriniqama viho.  
 I kepukyavanto nritaraiho,  
 E qua qiananraqaatairo ekyaan inraikyavanto  
 qovarama viro qati variqiro vi varirave, tura.

## 5

### *Nyaamwuni vahu mpukurara tura*

<sup>1</sup> Mwihaa mwitaa timwaqi vuvana nte Ioniva variqana taqaavaro tainta nronraqa mwatakyaa viro varuva variqaro nai kyauqu kyaatutani ququrama to mpukura tutero varuvaro mpuku mwia utanivata mwaqaqanivata qara ntumwa tova vahuvaro mpuku mwia iriqiro viqaro mwi quara taqevo tiro, qume voti horaqo taaqau tovaro qume voti huva mwiva 7 nramwu vhura.

<sup>2</sup> Mpukuvanto mwitaama kyero tita viro vahuvana nte variqana taqaavaro nyaamwunyaava nronra mpovanto aakyara ntero tiqaro, Ta vaisivave vaisi kyuqeva variariva mwaa mpukura vara kyero qume ntamwa kyero taaqau taira ntavahi kyero qua taqaananrove? tiro.

<sup>3</sup> Mwiva mwitaa tuvaro qume ntamwa kyero taaqau tora ntavahi kyaani vaisirara nyaamwunivata, mwatanivata, mwata mwemwanivata, puua huvaro hia mpovanto varura.

<sup>4</sup> Qumina puua hi taqovaro vaisi mpovanto qume ntamwa tora ntavahi kyero utaqi taqaariva hia varuvana nte nronraqama kye ntataqi vi variavara.

<sup>5</sup> Nte qati nraahu ntate variavaro vaisi nronra 24 nramwuqitairo mpovanto nianra tiqaro, Hia ntataante. Mwaini taqaante. Vaisi mpovanto, mwiva vairi raioni voti hiva Iutaara okyaraqinaava, mwi vaisiva Ntevitira kuaa okyaravanto nronraqama viro uaquia hi kyaiqara nraatara kyero kepukyavanto variho. Mwi vaisiva qiomaa 7 nramwu qumeqo ntamwa kyero taaqau taira ntavahi kyero mwi mpukura iri kyero taqaananrove, tiro.

<sup>6</sup> Mwitaa tuvana nte variqana taqaavaro tainta nronra utaqaa sipisipi nraativanto siviro varuvaro qati variqi vi varu inraikyava taaratana taaratanaavanto mwia vara ututu varuvata nronra vaisi 24 nramwuvantovata mwia ututuma teta varura. Mwitaama varuvana nte mwini variqana taqaavaro sipisipi mwia ru kyovaro qutu vu sipisipira votima kyero siviro varuvaro nriqiyau mwia qiaataqaa 7 nramwu vahuvaro mwia vuvata 7 nramwu vhurama. Ekyaa 7 inraikya mwi nramwunra okyara vahirero Kotira mwanraqura 7 nramwu vhura. Mwi mwanraqurahua okyara vahirero Kotiva nai mwanraqura 7 nramwu titovata mwatani nrohita tumu ntanteta uro varu mwanraqurahua varura.

<sup>7</sup> Mwitaama vahuvaro sipisipi nraati mwiva uro mwi taintaraqaa mwatakyaa viro varura kyauqu tuananraqitairo mpuku mwia varora.

<sup>8</sup> Sipisipi nraati mwiva mpuku qatinani tu varovata taaratana taaratana qati variqi vi varu inraikyavavata, vaisi 24 nronra vaisinramwuvantovata, sipisipi nraati mwia vuni tumu ntita varura. Mwihaa tumu ntita variqata kyaanta rupa tero ntuqtira kitaa voti hora tuteta koriqotairo ututo taanunravata tuteta varura. Taanu mwipi qia quarovaro kyuqe mwunta vu inraikyava vhura. Mwi inraikyara okyara vahirero Kotira nraakye qoravanto Kotirara aakyara nte variavaro vi vari quara votima kyero vhura.

<sup>9</sup> Mwitaama kyero vahuvata 24 vaisi nronra vaisinramwuvanto qaraakya ihi tirerata sipisipi nraatiara mwataama tita:

I ru kyaavaro i nraanre tumihanra e qutu vira  
 nraakye qora huvantu kyaarata  
 mwihua Kotira nraakye qoraqamavi variarara tira,  
 e mwi mpukura qume voti hiraqo taaqau taira  
 qioqama kyera ntavahi kyera taqeravama variaro.  
 Mwi nraakye qorahua ekyaa mpo okyara  
 mpo okyaraqitaitave,  
 ekyaa mpo qua mpo quaqitaive,  
 ekyaa mpo mwatanaa mpo mwatanaahuaqitaive,  
 ekyaa mpo mwamwanta mpo mwamwanta  
 vahiraqitaive, ekyaa qovara hivarave.

<sup>10</sup> E mwi nraakye qorahuaqaa ntaqikyiqira virata,  
 mwihua Kotirani kyaiqa varaqi viqata mwihua  
 mwatani mwi mwataraqaa ntaqikyiqi vivarave, tita.

<sup>11</sup> Mwi vaisinramwuhua mwitaa tuvana nte variqana taqaavata nyaamwunyaahua  
 airivanto ntuvantua huvana taqaavata nai qaiqaa nraahu kyaatavanto nrita ntuvantua  
 hita nai nronraqama kyeta tainta nronra mwia ututumavi varuvata taaratana  
 taaratana qati variqi vi varu inraikyavavata, 24 vaisi nronranramwuvantovata,  
 ututumavi variqata

<sup>12</sup> paa tita ihi timwaqi vita mwitaama tita:  
 Sipisipi ru kyovara qutu vurava i kyaiqvavanto  
 kyuqe kyaiqa nritarero vahi kyaiqava vahirara tiro,  
 Kotiva i nronraqama kyairave.  
 Mwitaama kyaihara  
 e ntaqikyiara vaisiva nronravanto variqara  
 airi inraikya vateqara variararo  
 i vu nraatovanto kyuqe vu nraato vaihara  
 kepukyavanto variqi quararo  
 i nrutuvanto nronraqama kyero vaiharo  
 i okyaravanto kepuqya okyara kyuqe okyara  
 vaihara variaro.  
 I kyaiqvavanto nritarero vahi kyaiqava vaiharo  
 Kotiva mwitaama kyero i nronraqama kyairara tita,  
 tire i nrutu tuaaheraqi virerave, tura.

<sup>13</sup> Nyaamwunyaahua mwitaa tuvana nte variqana riaavata Kotiva ututo inraikyava  
 ekyaa inraikyavanto, nyaamwuni vahu inraikyavave, mwata mwaaqa vahu inraikyavave,  
 mwata mwemwaqi vahu inraikyavave, nramanri nronraqi vahu inraikyavave, ekyaa mwi inraikyava mwi inraikyava ihi timwaqiro viqaro mwataama  
 tiro:

Nronravanto taintaqa mwatakyaa viro varira mwiavata,  
 sipisipi nraativata, tire mwitanahua nrutu  
 tuaaheraqi virerave.

Mwitanahua nyutu kyuqe nyutuma vaiho.  
 Mwitanahua kepuqyaqa hiqata ekyaa enta  
 qati variqi vivarave, tura.

<sup>14</sup> Ekyaa inraikyavanto mwitaa tuvaro qati variqi vi varu inraikyava taaratana  
 taaratavanto tiqata, Qutaa qiaovo, tuvata vaisi nronra 24 nramwuvanto tumu ntita  
 mwatasata variqata mwitanahuara qamwataqi viqata mwitanahua nyutu tuaahere  
 varura.

## 6

*Sipisipi nraati mwiva qume voti huraqo taaqau tora ntavahi kyorara tura*

<sup>1</sup> Mwitaamaqi vi varuvana nte variqana taqaavaro sipisipi nraati mwiva qume voti huraqo taaqau toraqitairo kuaiqia ntavahi kyovaro mwiaqatairo qati variqiro vi varu inraikyara taaratana taaratanaqitairo kuaiqavanto qua tirero nyaanruva nruqua tintema kyero qua tiqaro, Nriante, tura.

<sup>2</sup> Mwitaa tuvana nte variqana taqaavaro qosi eqara kyaahi vahuva ni puqaa varuvaro mwia mwoqaqa mpovanto huru tute varuvaro vunyaa vaisi tovaqa mwuvaro mwiva kepukyavanto ntaquqi viqaro nramwutaahua nraatara kya nraatara kya hiariva viro.

<sup>3</sup> Mwiva vuvaro sipisipi nraati mwiva qume mpo taaqau tora nampa 2 mwia ntavahi kyovana nte riaavaro qati variqi vi varu inraikyara taaratana taaratanaqitairo nampa 2 vanto, Nriante, tuvaro

<sup>4</sup> mwiaqatairo qosi mpo, nraanre qosivanto qovarama viro varuvaro mwia mwoqaqa varu vaisira kepukyia mwunra. Mwatani varihua ntaquqi viqata nai ru kye nai ru kye hiate tiro, kepukyia mwinro paipavata mwunra.

<sup>5</sup> Mwuvaro sipisipi nraati mwiva qumeqo taaqau tora nampa 3 ntavahi kyovana nte riaavaro qati variqi vi varu inraikyaraqitairo mpovanto nampa 3 vanto nriante tuvaro qosi mpo kyokiraqa huva qovarama viro varuvaro mwia mwoqaqaa varuva nai kyauquqi muaanra tukya hi varu inraikyara tutero varura.

<sup>6</sup> Tutero varuvana nte riaavaro qati variqi vu inraikyara taaratana taaratanaqitairo quavanto vaisivanto tuntema kyero tiqaro, Nkye uiti uru vararerata nkye kuaa enta kyaiqa utu kye munima varera ekyaa mwi munimanraqo uiti kuaa kaapu nraahuma kyoqaa hivarave. Nkye mpaari uru vararerata kuaa ihera kyaiqa utu kye vare munimanra mwiaqo taarampo kaapu nraahuma kyoqaa hivarave. Nkye vahamwenra kyatari oripi tamwa riaani kyatarira tutaara ntaru kyevorave. Nkye uaini tutaara ntaru kyevorave, tiro.

<sup>7</sup> Mwitaa tuvaro sipisipi nraati mwiva qumeqo taaqau tora nampa 4 ntavahi kyovana nte variqana riaavaro qati variqiro vi varu inraikyara taaratana taaratanaqitairo nampa 4 vanto nriante tura.

<sup>8</sup> Mwitaa tuvana nte taqaavaro qosi mpo qaamiantaqatova varuvaro mwia mwoqaqa mpovanto mwia nrutu *Qutu Quani Okyarava* varura. Mwiva varuvaro mwia nraakiara mpovanto mwia nrutu *Qutu Vu Mwatukyava* mwia nraaqani mwia vataqiro nri varura.

Mwitanahua varuvaro mwitanahua mwitaama tiro: Nkyetana ekyaa nraakye qora mwatani varihua taaratana taaratanaqaa tukyama kye vateta taaramponramwuqaa tukyama tehua qati varivata mpo mwikuraqa tukyama tehua ekyaa ru taiqa kyaate. Nkyetana ntaqi okyarara qovarama kyaivata mwihua ntaquqi viqata nai ru kye nai ru kye hiate. Nronraqama kye aara nte iherara qovarama kyairata airivanto qutuate. Nriqa quani inraikyara qovarama kyairata mwihua nriqa virata variqi vita uro qutu quate. Qaakyau quara vairi qovarama kyairata nraakye qora kutita uro ru taiqa kyaate. Mwitaa timwa kyero mwitanahua nronraqama kyora.

<sup>9</sup> Mwitaa timwa kyero sipisipi nraati mwiva qumeqo taaqau to mpukura nampa 5 ntavahi kyovana nte variqana taqaavaro quara vahi aasau ru kyeqaro vato taintava vahuvaro mwi taintara mwemwaqi nraakye qora mwanraqura airintivanto varura. Mwi nraakye qorahua qati varu entara Kotira qua nraakye qora timwa nyiqi vuvata mwia kyaara ru kyovata qutu vuvaro mwihua mwanraquravanto tainta mwia mwemwaqi varura.

<sup>10</sup> Mwihua mwanraquravanto mwiqitairo aakyara ntero tiqaro, Nronrao, kepukyavanto variaro. Uaqia hi inraikyava hiama qio iqi vahiananrove. E avuqavuma kyera

variqira vi variaravave. Mwatani varia nraakyе qorahua tiri ru kyaavata tire mwaaqi varuro. Nataama enta nritarairarave e ko tiqara mwihua nkyiarivata rinanrave? tita.

<sup>11</sup> Mwitaa tuvaro egarori tuavaaqa ekyaa mwi mwanraqurahua nyinro tiqaro, Pataqia varivata haaru nkyi ru kyontema kyeta nkyi henahua ni qua riaahua mponramwuvata ru kyaate. Nte mwitaa mwitaama nraakyе qora ru kyaate timwa tauhua qati variavo. Mwitaama kyaivaro Kotiva nkyi nramwutaahua nkyiarivata ru vuntuananrove, tiro.

<sup>12</sup> Mwitaa tuvana nte variqana taqaavaro sipisipi nraati mwiva qumeqo taaqau tora nampa 6 ntavahi kyovaro mwiaqaatairo mwaturavanto nronraqama kyero tuvaro huari vuvanto aamanaqama viro vakora tavuna votima kyero entama viro vahuvaro toravanto vaisi nraanre votima kyero nraanrenrusi utu vura.

<sup>13</sup> Mwitaa huvaro qovora aahoquravanto nyaamwusairo mwatani tumu nti tumu nti hi varuvaro toqavanto kyatari qakyaama kyaiharo kyatari tamwa ahoravanto tumu nti tumu nti hintema kyero qovora aahoquravanto nyaamwusairo mwatani tumu nti varura.

<sup>14</sup> Mwitaama vahuvana nte variqana taqaavaro pepaa ququra hintema kyero nyaamwuvanto ququramaqiro viro uro taiqa vura. Taiqovaro mwatani taaqvianto nai vahura mwia kyero uro mpoqi mpoqi apiqama kyero vahuvaro kyaarerera utaqaa vahuva mwata mwicqianiva nai vahuraqatairo siviro uro mpoqi mpoqi vahura.

<sup>15</sup> Mwitaa huvata mwatani varu nraakyе qorahua vunyaa vaisinramwuvantove, mpohuaqaa ntaqikyi varuhuave, ntaqu vaisihuqaa ntaqikyi varuhuave, airi inraikya vatohuave, nronra vaisive, mpo qara mpo qara hu nraakyе qorahua karavu vaisive, qati varu vaisihuave, ekyaa mwihua nronraqama kye aatu hita ori ontamwuqive, mupiqive, ori hakaraukaqi vita nrita ugetaaqetama vurave.

<sup>16</sup> Mwi nraakyе qorahua ora tatari taaqiara aakyara nteta tiqata, Ntuvuraavura hira tiriqaa ntumwaqu viraqe ugeta quare. Tainta nronraqa mwatakyaa viro variva tiri taqaakyorave. Sipisipi nraati mwivavata raraqa tairaro tiri taqaakyorave.

<sup>17</sup> Qikye, Kotira raraqa tairaro ko qari entava mate qovarama viho. Tavave mwate qio variananrove? tura.

## 7

### *Isareri nraakyе qora 144,000 nramwuanra tura*

<sup>1</sup> Nte Ioniva variqana taqaavata nyaamwunyaahua taaratana taaratana vantu varura. Mpovanto mwata mwaa hini tokyasataa varuvaro mpovanto hini tokyasataa varuvaro mpovanto hini tokyasataa varuvaro mpovanto hini tokyasataa varura. Ekyaa mwihua varuntema mwisairo hia toqavanto mwatave, nramanri nronrave, kyatarive, tiraro qakyaahiarive tita, mwini variqata toqa antua teta varura.

<sup>2</sup> Mwinramwuhua mwini varuvana nte variqana taqaavaro nyaamwunyaava mpovanto huari vu nrinasairo nri ntero nai kyauquqi Kotiva qati variqiro vi variva nai nraakyе qoraqaa aaraa vataani inraikyara tu varero nrinro. Mwiva nriqanro nyaamwunyaahua taaratana taaratana Kotiva nyaamwuvata mwatavata uaqiamka yate tuhuara mwitaama tiro,

<sup>3</sup> Nkyenramwu mwatavata, nramanri nronravata, kyatarivata, uaqiamka yarerera qiahua qati varivaqena nte nraante Kotira kyaiqa vaisi tiriqaa aaraa vataqina vina uro taiqa kyaarita nkyeta vararerera ti kyaiqara mwia varaate tiro.

<sup>4</sup> Mwitaa tuvana nte variqana riaavaro Isareri nraakyе qora 144,000 nramwu tiriqa aaraa vateqaro Kotira kyaama tovata varura. Isareri okyara 12 nramwu vahura. Nyaamwunyaava Isareriqaa aaraa vatarera hiro:

<sup>5</sup> Iutaara okyaraqitairo 12,000 nraakyе qora mwatama tero  
Ruveninra okyaraqitairo 12,000 nraakyе qora  
mwatama tero

Katira okyaraqitairo 12,000 nraakye qora mwatama tero  
<sup>6</sup> Asaara okyaraqitairo 12,000 nraakye qora mwatama tero  
 Napataraira okyaraqitairo 12,000 nraakye qora  
 mwatama tero  
 Manasaara okyaraqitairo 12,000 nraakye qora  
 mwatama tero  
<sup>7</sup> Simioninra okyaraqitairo 12,000 nraakye qora  
 mwatama tero  
 Rivaira okyaraqitairo 12,000 nraakye qora mwatama tero  
 Isakaara okyaraqitairo 12,000 nraakye qora  
 mwatama tero  
<sup>8</sup> Sepiuraaninra okyaraqitairo 12,000 nraakye qora  
 mwatama tero  
 Iosepira okyaraqitairo 12,000 nraakye qora  
 mwatama tero  
 Mpenisamininra okyaraqitairo 12,000 nraakye qora  
 mwatama tero mwitaamaqiro viro nyaamwunyaava  
 Kotiva nai kyaama teqaro aaraa vato inraikyara 144,000 mwihua tiriqaat vatovata  
 varura.

*Nronraqama kyeta nraakye qora ntuvantuama tohuara tura*

<sup>9</sup> Mwitaa tuvana nte variqana taqaavata nraakye qora airivanto varura. Mwihua airintivanto varuvarora tiro, mpovanto mwihua kyaara ntumwa kyero mwitaa mwitaamavanto variavo qiariva hia qioqa hora. wi nraakye qorahua ekyaa mpo mwatanaa mpo mwatanaaave, kyokirave, eqarave, mpo mwata mpo mwataqinaa nraakye qorave, mpo qua mpo qua tu nraakye qorahuave, ekyaa mwihua tainta nronra mwia vuqaavata, sipisipi nraati mwia vuqaavata, sivita variqata eqarori tuavaaqa utute variqata ekyaa mwihua qatokya mwanre voti hora tuteta

<sup>10</sup> paa tita tiqata,  
 Tiri mwanriqvanto Kotiva nai taintaqua mwatakyaa  
 viro varivavata sipisipi nraati mwivavata  
 mwitanahua tiri huvantu timwa taavata  
 tire kyuqema kyeta qiomma varuro, tura.

<sup>11</sup> Mwitaa tuvata ekyaa nyaamwunyaahua tainta nronra mwiavata, 24 vaisi nronranramwuvata, mwanraqura vahu inraikyara taaratana taaratana varuhuavata, ekyaa mwihua vara ututuma kye sivita varita mwiaqatai mwihua mwataqi tumu ntita nkyiari siri mwataqi vatateta nronra tainta vuqaa variqata Kotira qamwata mwateqata mwitaama tita:

<sup>12</sup> Qutaave, nrivaqe  
 tiri mwanriqa Kotira nrutu tuaaheraare.  
 Mwia okyaravanto kepukya okyarama vaiho.  
 Mwia vu nraatovanto kyuqe vu nraatoma vaiho.  
 Nrivaqe mwia nrutu nraahu tuaaheraqi viqata  
 mwianra nraahu qamwataqita quare.  
 Mwia kepukyavanto nritaraiharo  
 mwia kepukyavanto ekyaa enta qati nraahu  
 vahiqiro quananrove, quataave, tura.

<sup>13</sup> Nyaamwunyaahua mwitaa tuvaro 24 vaisi nronra vaisinramwuqitairo mpovanto ni kyaparama matero tiqaro, Nraakye qora mwaahua eqarori tuavaaqa ututaahua tahuahua tahuahua, taisai taisaive nrumu variavo? tuvana

<sup>14</sup> nte tiqana, Nronra vaisio, e mwia ntapihiananrave, qiavaro mwiva tiqaro, Mwaa nraakye qorahua varuvaro nronraqama kyero muaanravanto qovara huvata mwihua variqi uvata mpo uhua mwihua anomia kye uaqiamma nyatovata variqi vita mwaini

nriahuave. Mwihua nkyiari tuavaaqa sipisipi nraati nraanreqi hiqama kyorara tiro, mwihua tuavaaqavanto takyuqu vihata variarave.

<sup>15</sup> Mwitaa hi varia nraakye qorahua variarara tita, mwihua Kotira tainta vuqaa variqata iheravata, entaqivata, Kotira kyaiqa varaqi viqata Kotira nraamwuqi variqi vi variavaro tainta nronraqa mwatakyaa viro variva mwihuaqaa ntaqikyiqiro vihata kyuqema kye variqi vi variarave.

<sup>16</sup> Mwihua mwitaamaqi vi varivaro hia mwihua qaiqaavata nramanrive kyarave nraataa hiananrove. Mwihua varivaro huarivantove mpo inraikyavanto mwihua mwamwanta itaari inraikyava hia vahiananrove.

<sup>17</sup> Sipisipi nraati mwiva tainta utaqaa variva, mwiva mwihuaqaa ntaqikyiqaro sipisipi qova kyuqeva nraantantamwa kyero variqaro mwihua sitaqiro uro qati variqi quani nramanriva vahianinrani kyairata nrevarave. Mwitaa hiraro Kotiva mwihua suqitairo nruqunru nruka nyatairata mwi nraakye qorahua hia qaiqaavata ntatevarave, tura.

## 8

### *Qume voti horaquo taaqau tora nampa 7 ntava hi kyorara tura*

<sup>1</sup> Mwitaa huvana nte variqana taqaavaro sipisipi nraati mwiva qume voti horaquo taaqau tora nampa 7 mwia ntavahi kyovaro mwiaqatairo nyaamwuni hia mpovanto qua tuvaro ekyaa inraikyavanto tirema kyero vahiqiro vura. Pataqiara mwitaama vahuvana

<sup>2</sup> nte taqaavata nyaamwunyaahua 7 nramwuvanto Kotira vuqaa sivita varuhua varuvaro ntoma 7 nramwu mwihua nyuvata varora.

<sup>3</sup> Nyuvata varovaro nyaamwunyaava mpovanto nai kyuauquqi kori taanu tuvarero nrumu tainta mpo, kori tainta tataaqa siviro varura. Mwi taintaraqaa Kotira kyaiqa vara mwate varu taintava nronra tainta vuni vahuvaro nyaamwunyaava mwiva kori taanu varero tainta mwia nraaqani siviro varuvaro qia quara tairaro kyuqema kyero mwunta quani inraikyara mpoqiyavata mwinro tiqaro, Kotira nraakye qoravanto Kotirara aakyara nte variavaro vi vari quaravatama kyera e mwaa inraikyara qia quaraante, tuvaro

<sup>4</sup> nyaamwunyaava taanu tutoraqitairo qia munra kyuqe mwunta vuva viqaro Kotira nraakye qoravanto Kotirara aakyara nteqa tu quavavata viqaro Kotira vuqaa vi varura.

<sup>5</sup> Mwitaamaqiro viro uro munra taiqa kyero mwiaqatairo nyaamwunyaava kori taintaqatairo qia ite varura, mwia vara kyero nai taanu piqa kyero mwi taanunra mwatani mwaamwi tuto kyora. Tuto kyovaro nyaanruva nruqua ti varuvaro nrotaara aaquakya ti varuvaro mwatura ti varurave.

### *Ntomanramwuanra tura*

<sup>6</sup> Mwitaamaqi vuvata mwiaqatai nyaamwunyaahua 7 nramwuvanto ntoma 7 nramwu tuteta vuatarera tera hora.

<sup>7</sup> Mwinramwuhuaqitairo mpovanto nraante ntoma vuata kyovaro kaapura vativan-tovata qiyantovata nraanre vatama kyero mwatani vati ntintema kyero tumu nti tumu nti hi varura. Tumu ntiro mwata mwaa taarampotanaqaa tukyama kyero mpo mwia mwatavata kyatarivata itamwa kyero omwa ahikyave mwukyau mwia ekyaa itamwa taiqa kyora.

<sup>8</sup> Mwitaa huvaro mwiaqatairo nyaamwunyaahua 7 nramwuqitairo nampa 2 vanto ntoma vuata kyovaro taaqi nronra qia ite varura voti hora nramanri nronraqi tuto kyora. Nramanri nronra mwiqi tuto kyovaro ekyaa nramanri mwia tukyama kye taarampotana vahura taaratatanavanto qati vahuvaro kuaa mwiva vaisi nraanre nraantantamwa kyero nraanrenrusi utu vura.

<sup>9</sup> Nramanri tukyama kye taaratana qati vahuvaro mpo mwipi vahu inraikyava ekyaa qutu taiqa vura. Nramanri mwipi nrohuhua sipivata kuaa qarama tukyama kye taaratanaqi vahuva qati vahuvaro kuaaqi vahu sipiva taiqa vura.

<sup>10</sup> Mwitaa huvaro nyaamwunyaahua 7 nramwuqitairo nampa 3 vanto nai ntoma vuata kyovaro mwiaqaatairo qovora nronravanto omwa qupi kyaiharo itaintema kyero iteqaro nyaamwusairo tumu ntiro tumu ora tatari taaqiqitairove rumwuqitairo vihata nrauna nramanrinra mpoqi mpoqi tumu ntiro. Qovora mwiva ekyaa nramanri tukyama kye taarampotana vatoraqitairo taaratana qati vahuvaro kuaa mwipi tumu ntura.

<sup>11</sup> Qovora mwia nrutu *Ukaviva*. Mwiva nramanriqi tumu ntuvaro hini nramanri mwiva ekyaa uka vuvaro hini mwiva qati vahura. Nraakye qoravanto ukavu nramanrinra nrohua mwihua ekyaa qutu nraahu vurama.

<sup>12</sup> Mwitaa huvaro mwiaqaatairo nyaamwunyaahua 7 nramwuqitairo nampa 4 vanto nai ntoma vuata kyovaro huarivantove, toravantove, qovora aahoquravantove, iteqaro taaratanaqaa tukyama tora mwisataa qati ite varuvaro kuaa mwisataa ekyaa qipa viro hia itora. Qaatatoraqaa huarivanto hiniqi nraahu itamwaqiro viro hiniqi hia itovaro entaqivata tora qovora aahoquravantove hiniqi nraahu itovaro hiniqi hia itora.

<sup>13</sup> Mwitaa huvana nte tuaahera kyena virini taqaavaro memonra mpovanto virisata hitero nrohi variqaro aakyara ntero tiqaro, Po, po, po, nyaamwunyaahua taarampon-ramwuvanto hiama nkyiari ntoma vuataavo. Po, mwinramwuahuavata nkyiari ntoma vuata kyaivata mwatani nai uaqama kyeta varivarave, tiro.

## 9

### *Nampa 5 vanto nai ntoma vuata kyorara tura*

<sup>1</sup> Memonravanto mwitaa tuvaro mwiaqaatairo nyaamwunyaahua 7 nramwuqitairo nampa 5 vanto nai ntoma vuata kyovana nte variqana taqaavaro qovoravanto nyaamwusairo tumu ntiro mwatani vahuvaro mpovanto kiqa mwia mwunra. Mwi kiqava mupi, nai veva veva mwutukyani vu mupira qatuaraani kiqava vahura.

<sup>2</sup> Kiqa mwuvaro qovora mwiva kiqa mwiaqotairo mupi veva veva mwutukyana kyokikina rura qatua kyovaro mwipitairo qia munravanto nronraqama kyero nrivi varura. Nronraqama kyero qia itaiharo qia munravanto nrivi varintema kyero munravanto mwipitairo nriviqaro huarivata nyaamwuvata ntumwaqu kyovaro

<sup>3</sup> qia munraqitairo kainyaaqavanto qovarama viro mwatani vahura.

Kainyaaqa airivanto qovarama vita vahuvaro voravanto kutintema kyero kainyaaqavanto kutuarive tiro, kepukya nyinro tiqaro,

<sup>4</sup> Nkye vihua hiama uro mwukyau omwa ahikyave kyanta kyatari qupiqaaninra toqeta uaquia hiraitita, nkye taqaivaro nraakye qora tiriqa Kotiva hia nai kyaama tegaro aaraa vataarihua mwihua nraahu kutuate.

<sup>5</sup> Nkye mwi nraakye qorahua kyauquru torara kutuqita quate. Mwihua kutiqata hia mwihua ekyara ru kyairaitita, qati kutuqi quate, tuvata kainyaaqavanto uro voravanto kutintema kyeta nraakye qora kutuvata nraakye qora nyamwantavanto mpoqama kyero nriqa vuvata variqi vurama.

<sup>6</sup> Mwi entara nraakye qoravanto nronraqama kyero nriqa virata atura ntumwaqi virara rieqata mwihua qutuataa hirata qutirera hivarovata hia qioqa hiananrove. Qutira okyaravanto nyianratoma uro vahiananrove.

<sup>7</sup> Nte ruvaatayaa taqaavata vaisivanto ntaqirero nai qosi nraamwuma kyero ekyaa inraikya terama kyero vataintema kyeta kainyaaqa mwihua varurama. Nkyiari qiatqaqaa tovaqa kori tovaqa voti hora quteta mwihua siri vahirero vaisi siri votima kye vahuvaro

**8** mwihua qiata kyaahivanto nraakye qiata votima kyero mpuahaa vahuvaro mwihua aanraivanto raioni vairi aanrai votima kye vahuvaro

**9** mwetokyani qaini voti horaqo nraamwuma teta mwihua nraaokyavanto nronraqama kyero nruqua tiqaro qosi airivanto vaisivanto ntaqirerata variavata ntanrau vare qua inraikyava nruqua tintema kyeta harahara ti varura.

**10** Mwihua vora nraantantamwa kye varuvarovata mwihua raqani aanrai vhura mwiaqo nraakye qora kyauquru torara kutuqiro quariva vhura.

**11** Kainyaaqavanto mwitaama vahuvaro nyaamwunyaava mpovanto mwihuaqaa ntaqikyiqiro vi varura. Nyaamwunyaava mwiva nai mupi vevaveva mwutukyara vuraqi ntaqikyi varuva mwia nrutu Hivuru quaqitairo tirero *Apantonivave* tura. Mwaa quaraqitai tirera *Vaisi Taiqakye Varivave* tita.

**12** Qio riaate, kainyaaqavanto mwatani varihua uaqiamaqiro quari entava taiqa viraro qaiqaa nraakye qora qoraqama nyataariva taara inraikya qatima vahiananro. Mwianra tirerave.

### *Nampa 6 vanto nai ntoma vuata kyorara tura*

**13** Nte variqana taqaavaro nyaamwunyaahua 7 nramwugitairo nampa 6 vanto nai ntoma vuato kyovana nte mwiaqatai riaa varo kori tainta Kotira vuqaa vahu taintara hini hini vitiqitairo qua tura.

**14** Mwiqitairo quavanto nyaamwunyaanra nampa 6 mwianra mwitaama tiro: Nyaamwunyaahua taaratana taaratana rupa taihata nramanri nronra Iuparetisiqi variahua huvantu kyairata qati quate, tuvaro huvantu kyora.

**15** Mwinramwuhua variqata mwi ihirave mwi entararave tire vekeyaqa hiararo tiri huvantu kyairaqe qio mwi kyaiqara nraahu varaqi quare timwa kyeta, terama teta varuvaro mwinramwuhua huvantu kyovata mwihua mwatani varu nraakye qorahua tukyama kyeta taarampotanaqaa vateta taaratana qati kyeta kuaa mwiaqaa varu nraakye qorahua ntuqutu taiqa kyarerera vura.

**16** Mwihua ntaqu vaisihua varirerata airivanto ntaqu vaisihua qosi mwoqaqaa varura. Airivanto 200,000,000 vanto variavo tuvana riaavarama.

**17** Nte ruvaata taqamwaqi viqana vaisi mwihuavata mwihua qosivata taqaavarama. Mwi vaisihua mwetokyaqaa ntumwaquto inraikyava qia auru votima kyero nraanre-qahuva vahuvaro vakora vahuvaro qaamiantaqatova vhura. Mwitaama vahuvaro mwihua qosi qiata vahirero raioni vairi qiata voti huva vahuvaro qosi mwihua nyogitairo qiangantovata qia munravantovata oriqaatairo qia itovavata mwihua nyogitairo nritareqaro vi varura.

**18-19** Qiavantovata qia munravantovata ori qia itovavata qosi nroqitairo nritara nritara hiqaro nraakye qora ri varura. Mwihua qosivanto nai nroqitairo nraakye qora ruqiro viqaro mwihua ru kyero nkyiari riqanaqovata nraakye qora ri varura. Qosi riqana mwiva vahirero quaiha qiata voti huva vahuvaro mwiaqotairo nraakye qora kuti varura.

**20** Hini qati varu nraakye qorahua, mwihua hia nkyiari qora inraikya qaqira kyaraitita, nkyiari qora kyaiqa utura mwianra nraahu qamwataqita viqata varura. Mwihua mpo inraikya koriqotai utu teta, mpo inraikya munimaqotai utu teta, mpo ori mpo oriqotai utu teta, kyatariqo utu to inraikyava, ekyaa mwi inraikyava hia taqero riero nrohiro qakyaa hu inraikyava vahuvata nraakye qoravanto mwi inraikyarara tiri mwanriqa utu taunanrave timwa kyeta, mwi inraikyara qamwata mwateqata vaananravata qamwataqita vura.

**21** Nraakye qoravanto mwitaamaqi viqata mwihua nkyiari vaisi ru kyora hia mwianra nronraqama kye riaraitita, nkyiari vaana kyaiqa vare varura hia qaqira kyaraitita, api qaraqita nrohura hia qaqira kyaraitita, mpuara varo kyaiqara hia qaqira kyaraitita, uaquia hi kyaiqara mwia qati nraahu utuqi vi varura.

## 10

### *Ququrama to mpukura pata mpukuara tura*

<sup>1</sup> Mwihua mwitaa hi varuvana nte variqana taqaavaro nyaamwunyaava mpo, kepukyavanto nyaamwusairo tumi varura. Mwia tuavaaqa vahirero tonamwu vahuvare qiatani haunrikyavanto ututuma tero vahura. Mwia virivanto vahirero huarivanto itaintema kyero ite varuvaro mwia kyuqutanavanto qia auru nraantantamwa kyero ite varura.

<sup>2</sup> Nyaamwunyaanra mwamwantavanto mwitaama vahuvare nai kyuquqi pata mpuku iri kyero tu varero tuminro nai kyuqu tuananra kyaarerera nronraqa vatero nai kyaantaaqa kyuqu mwia mwataqaa vatero.

<sup>3</sup> Mwiaqatairo mwiva aakyara ntamwa kyero vairi raioni qua taanaanra tuvaro nyaanruva 7 nani nronraqama kyero qua tura.

<sup>4</sup> Nyaanruva mwitaa tuvana nte variqana nyaanruva qua tura mpukuqi qara ntirera hiavaro nyaamwusairo qua mpovanto tiqaro, Nyaanruva 7 nani ti quara mwini uqeta kyaante. Hia mwi quara qara ntumwa taante, tiro.

<sup>5</sup> Mwitaa tuvana nte variqana taqaavaro nyaamwunyaava nai kyuqu hini nramanriqaa vatero hini mwataqaa vatova, mwiva nai kyuqu nyaamwuni tuaahera kyero

<sup>6</sup> Kotira nrutu ntero tiqaro, Kotiva ekyaa enta qati variqi vi varivave. Mwiva nyaamwuvata ekyaa nyaamwuni vahi inraikyavata utu kyero vatero, mwatavata ekyaa mwataqaa vahi inraikyavata utu kyero, nramanri nronravata ekyaa inraikya nramanri mwiqi vahiravata utu taivave. Nte Kotira nrutu nteqana mwaa quara qutaa qua nraahu tirerave. Kotiva nai utirera qiani kyaiqara hia vari kyero utuananrove.

<sup>7</sup> Nyaamwunyaahua 7 nramwuqitairo nampa 7 vanto ekyara variva, mwiva nai ntoma vuata kyairaro Kotiva nai uqeta tai quara taiqa kyaananrove. Mwiva mwi quara nai kyaiqa vaisi poropeti vaisi haaru timwa nyunrave, tiro.

<sup>8</sup> Mwiva mwitaa tuvaro nyaamwusairo quavanto, vaakya riaava quava qaiqaa nianra tiqaro, Nyaamwunyaava siviro nai kyuqu mpo nramanri nronraqa ntamwa tero mpo mwataqaa ntamwa taira kyuquqitaira pata mpuku ququrama taira iri kyaira varaante, tuvana

<sup>9</sup> nte nyaamwunyaanra mwia uro mpuku mwianra mpiante qiaavaro mwiva nianra tiqaro, Mwaa mpukura vara kyera nraante. Mwi mpukura i vikyokyaqi viqaro qoragamama uka quananrove. E mwi mpukura nroqi nrainranro kyaaqavanto viti hintema kyeroma viti hiananrove, tiro.

<sup>10</sup> Mwitaa tuvana nte mwia kyuquqitaina mpuku mwia vara kyena nraavarave. Nte nroqi nreqana taqaavaro mwi mpukura kyaqa votima kyero viti huvana nte nrapitama kye taqaavaro ni pikyokyaqitairo mpoqama kyero uka vurave.

<sup>11</sup> Nte mwi mpukura nramwa taiqa kyaavaro ni timwa mpiri tiqaro, E qaiqaavata Kotira mwakyaakya qianta. E ekyaa mwatanaave, eqara vaisi upi vaisi mpo mwatanaa mpo mwatanaave, mpo qua mpo qua ti vari nraakye qorahuave, mwatani vunyaa vaisi variahuate, ekyaa mwihua mwihua Kotira qua qovarama kye timwa nyiante, tiro.

## 11

### *Kotira qua timwa nyiqi vi varu vaisitanahuara tura*

<sup>1</sup> Mwiva mwitaa timwa kyero kyairiqa mpoqia ni mpiri tiqaro, Sivira kyairiqaqotaira uro Kotira nraamwu mwatama kyera, quara vahi aasau ru kyeqata qia quara mwate varia taintara, mwivata mwatama kyera, nraakye qora Kotira nraamwuqi variqata mwia nrutu tuaahere variahua, mwihuavata kyaara ntumwa kyaante.

<sup>2</sup> Kotira nraamwu mwateqarama hiama nraamwu vara ututu vahiaro mwatukyara mwataante. Mwi mwatukyara qati kyairata nraakiara mpo mwatanaa qumina

mwatanaa, hia Kotira qua rie mwatanaahua mwi mwatukyara ntevarave. Mwihua taarampo ihi 6 tora variqi viqata Kotira mwatukya kyuqera ntamwaqi vi varivaro

<sup>3</sup> Kotiva nai qua timwa nyi vari vaisitanahua sitairata mwitanahua ua tuavaaqa ututeta Kotira mwakyaakya mwi entara 1,260 enta variqi viqata timwaqi vivarave.

<sup>4</sup> Kotira qua timwa nyiqi vi vari vaisitanahua oripi kyatari votima kyeta varivarave. Mwatani omwa taaratana Kotira vuqaa qupi kyero vataira, vaisi mwitanahua omwa mwitana votima kyetama varivarave.

<sup>5</sup> Nraakiara mwi entaraqaa mwitanahua varivaro mpovanto mwitana uaqiamya nyatarera uti varirera, mwitanahua nyogitairo qavanto qovara hiro mwihua itamwa tatoqa kyaananrove. Mwitanahua mwitaama kyeqatama nkyiari nramwutaahua rivarave. Tahuu tahuuve mwitanahua qoraqama nyatarera utivera, mwitanahua mwitaama kyeqata mwihua taiqaqita vivarave.

<sup>6</sup> Mwitanahua mwi entaraqaa Kotira qua timwa nyiqi vi varivaro mpo kepukya mwitanahua nyinrata mwitanahua qoma nyaamwu tita taivaro hia vati ntuananrove. Mwitanahua varivaro mpo kepukya nyinrata mwitanahua qoma nrumbu nramanri mpohira tuqasaa kyaivaro nraanre nramanri utuquan Grove. Mwitanahua varivaro mpo kepukya nyinrata mwitanahua qiove tivera, nkyiari kyakya hianinraqaa mwatani varihua ntuquqivata mpo qara mpo qarama kyero nriqa quani inraikyara varevarave.

<sup>7</sup> Mwitanahua Kotira qua timwa nyiqi vivaro mwiaqatairo mupi veva veva mwutukya viraqitairo qaakyau vairi voti hiariva mwiqitairo qovarama viro uro mwi vaisitanavata ntaquqiro viro mwitanahua ru kyaananrove.

<sup>8</sup> Qaakyau vairi voti hiva mwitanahua ru kyairaro mwitana mwamwantavanto mwatukya nronra mwiqi aanraqaama vahiananrove. Mwi mwatukyaraq haaru mwitanahua vunyaa vaisi kyatariqaa ru kyorave. Mwi mwatukyara mpo nrutu mwiqata Sotomive, Isipive, tivarave.

<sup>9</sup> Mwiva mwitana ru kyairaro mwitana mwamwantavanto aanraqaa qati vahirata ekyaa mpo mwatanaa mpo mwitanaahua eqarave upivantove, mpo qua mpo qua tihua mwitanahua mwamwanta nrumbu taqeta tiqata, Mwitanahua mwamwanta qati kyaivaro vahiarive. Hiama mwitana mwamwanta quintaate, tivaro mwihua mwamwantavanto taarampo iheravata mpo ihera hinivata qati aanraqaa vahiananrove.

<sup>10</sup> Mwi entara mwitanahua mwamwanta aanraqaa qati vahirata mwatani varihua mwitaama tivara, Mwiva mwia ru kyaihata mwianra tirevata qamwateqatama varuro. Mwitanahua qati variqata tiri nronra muaanra timwiavata uaqiamya kye variqi vi varunanrave, tivarave. Mwatani varihua mwitaa timwa kyeta qamwateqatama ihi timwaqi viqata kyarave, mpo inraikyave, nai mwi nai mwimaqi vivarave, tiro.

<sup>11</sup> (Nyaamwusairo quavanto nianra mwitaama kyero nraakiara qovara hianinranra ni timwa mpuvana nte Ioniva ruvaata votima kyena varigana taqaavaro) mwi vaisitana mwamwanta taarampo entavata mpo ihera hini entavata aanraqaa qati vahuvoro mwiaqatairo Kotiraqatairo nraaihovanto mwi vaisitanahuaqi vuvata mwitanahua sivita varuvata nraakye qoravanto mwitanahua taqovaro nyaatu qatovata aatu hiqata varura.

<sup>12</sup> Mwihua aatu hi variqata mwihua riovoro nyaamwusairo quavanto paa tiro mwitanahuara tiqaro, Mwaini nriate, tuvata mwitanahua tonamwuqi nyaamwuni vi varuvata mwitana nramwutaahua mwihua taqe varuvata nyaamwuni vura.

<sup>13</sup> Mwitanahua nyaamwuni vuvaro qamwanrama kyero mwaturavanto nronraqama kyero tura. Mwatura nronraqama kyero tiqaro mwi mwatukyara kyauqurutanaqa tukyama kyero 9 qati kyero kuaa mwia taiqa tuto kyero. Mwi mwatukyara taiqa tuto kyero nraakye qora airinti 7,000 nraakye qora ru taiqa kyora. Nraakye

qora airinti ru taiqa kyovata qati varu nraakye qorahua mpoqama kyero nyaatu qatovata aatu hi varita tiqata, Qikye, Kotiva nyaamwuni varira okyaravanto kepuanya okyarave, tura. (Mwitaa tuvana nte ruvaata taqeqlana mwi inraikyara mwi inraikyara taqaavarave. Ekyaa mwi inraikyava nraakiara qutaa qovara hiananrove.)

<sup>14</sup> Nraakiara mwatani varihua anomia kyeta uaqiamma vita vari entara taara entara qara ntumwa taurave. Rie varivaqena nronra enta nampa 3 entara timwa nyianri.

### *Nyaamwunyaava nampa 7 vanto ntoma vuata kyorara tura*

<sup>15</sup> Nte ruvaata taqaavarao nyaamwunyaava 7 nramwuqitairo nampa 7 vanto ekyaara varuva ntoma vuata kyovaro nyaamwusairo quavanto nronraqama kyero tiqaro, Mwaa entaraqaatairo Saataaniva tumitarairaro tiri nronravantovata mwiva titai vaisivavata nritareta mwaa mwataraqaa ntaqikyiqita vivarave, tiro.

<sup>16</sup> Quavanto mwitaa tuvata nronra vaisi 24 vaisinramwu Kotira vuqaa nkyiari taintaqaa nkyiari taintaqaa mwatakyaa vita varuhua, mwihua mwi quara rieta mwiaqaatai mwihua mwatasata tumu ntita nkyiari siri mwatani vateta Kotira qamwata mwate varita tiqata,

<sup>17</sup> Nronravanto, e kepukyavanto variqara

ekyaa inraikya nraatara kyera variaravave.

E qati variqira vi variaravave.

Haaruvata e qati variqira vi varuravave.

E kepukyaqha hiqara nraakye qoraqaa ntaqikyirera  
uti variarata tire iara qamwateqa varuro.

<sup>18</sup> Mpo mwatanaa mpo mwatanaahua raraqa tovata  
variqi vu entava taiqama viho.

Mwaa entara i raraqa tairara

variqira vira entavama nri ntaiho.

Mwaa entara e qutu vihua ko tira entavama nri ntaiho.

I kyaiqa vaisi poropeti vaisivata,

ekyaa i nraakye qoravata, nronra vaisive pata vaisive,  
iara nronraqama kyeta

rie vari nraakye qorahua varivara

mwaa entara e mwihua qamwata nyateqara

e mwihua nkyiari kyoqaa nyina entava nrintaiho.

Mwaa mwatara uaqiamma kyaahua varivara e mwihua

nkyiarivata uaqiamma kyera entavama nri ntaiho, tura.

<sup>19</sup> Mwihua mwitaa tuvaro Kotira nraamwu nyaamwuni vahu nraamwunra qesavanto qatua viro vahuvana nte taqaavarao Kotiva nraakye qora kyapata kuaaqi variate timwa to quara vokuheqi nraamwu mwipi vahura. Mwipi vahuvoro mwiaqaatairo aaquakyaavanto mpo uti varuvaro nyaanruva nruqua ti varuvaro mwatura ti varuvaro kaapura vati nti varurave.

## 12

### *Nraakyeravata, evari voti huru nronra qumina inraikya qaakyau inraikyaravata, tura*

<sup>1</sup> Mwitaamaqiro vi varuvana nte Ioniva variqana taqaavarao nyaamwuni nai nraahumwa mpo qara hu inraikyava qovarama viro vahura. Nraakye mpovanto mwini varuvaro mwia tuavaaqavanto vahirero huari vu nraahu vahuvoro mwia kyuqu mwemwani toravanto vahuvoro mwiva qitaaqaa qovora 12 nramwu tovaqa qutaantema kyero qutero varura.

<sup>2</sup> Mwi nraakyeva nraaqiara tuaqa huva nraaqiara mwatarera hiro atura ntigaro kye kye timwaqiro vura.

<sup>3</sup> Mwi nraakyeva nyaamwuni varuvaro nai nraahumwa mpo qara huva mpo inraikyavantovata nyaamwuni varura. Mwini qaakyau inraikya evari voti huva qaqira quitaava mwia qiata 7 nramwu vahuvaro kyaava 10 nramwu vahuvaro ekyaa nai qiata kuaiqia kuaiqiaqaa nronra vaisi tovaqa qutero varura.

<sup>4</sup> Mwi inraikyava nyaamwuni variqaro nai riqanaqotairo qovora aahoqura kuaastaataa vhura ntupi kyero mwatani kyero qovora aahoqura taarasataa vhura qati kyora. Qaakyau inraikya, evari voti huva nronra qaqiraquataava, mwiva uro nraakye vuni siviro variqaro mwiva nraaqiara mwata kyairaqe nraankye timwa kyero varura.

<sup>5</sup> Varuvaro nraakye mwiva qoraisi nraaqiara mwata tovaro nraaqiara mwiva nronra tuemwa viro qaini kyaamwu tutero variqi viqaro ekyaa mwatanaaqa ntaqikyiariva varuvaro qaakyau inraikya mwiva nraaqiara mwia ru kyero nranrenra huvata nraaqiara mwia ntavihi kyeta uro Kotiva nai taintaqaa varunani kyora.

<sup>6</sup> Mwia nraaqiara ntavihi kyeta varaqita uro kyovaro mwi nraakyeva hiantero qumina mwatani Kotiva mwi nraakyerara rieqaro terama kyero vatonani vuva uro mwini variqaro 1,260 enta variqi vuvata mwiaqaa kyuqema kyeta ntaqikyiqi vuvare varura.

<sup>7</sup> Mwi nraakyeva mwini varuvaro nyaamwuni ntaquva nronraqama kyero qovara hura. Qovarama vuvare nyaamwunyaava nronravanto, Maikerivavata nyaamwunyaahua mponramwuvantovatama kyeta qaakyau inraikya evari voti hura mwiatama kye mwia kyuquqaa vitinto vaanahua mponramwuvatama kye ntaqura.

<sup>8</sup> Ntaquvaro Maikerivavata nyaamwunyaahua mwia kyuquqaa vitintohua kepuqyaqama kye ntaquqi vita qaakyau inraikya evari voti hura mwiatata, mwia kyuquqaa vitintohua mwihuavata, nraatara kyora. Mwihua nraatara kyero qaakyau inraikya mwianra tiqaro, E hiama qio mwaini nyaamwuni varinanrave, Nyaamwunyaahua i kyuquqaa vitintaahua, mwihuavata hiama qio mwaini varivarave, tiro.

<sup>9</sup> Timwa kyero qaakyau inraikya evari voti hura mwia nyaamwusairo mwata mwaini mwaamwi tuto kyorave. Qaakyau inraikya evari voti huva mwiva haaruua qarura mwia nrutu Nramwutaavave Saataanivama variro. Saataaniva ekyaa mwata mwaqa variahua unra qua timwa nyi varivama variro. Mwiavata, nyaamwunyaahua mponramwuvanto mwia kyuquqaa vitintohuavata, nyaamwusairo mwatani vara mwaamwi tuto kyorave.

<sup>10</sup> Tuto kyovana nte variqana riaavar o nyaamwusairo quavanto mwitaama tiro:  
Mate Kotiva nraakye qora huvantu nyataani entava  
nri ntaiho.

Kotiva kepuqyaqama kyero nraakye qoraqaa  
ntaqikyiqiro virerove.

Kotiva titai vaisiva, mwivavata mate nronraqama viho.  
Mwitanahua Saataaninra nyaamwusaita  
vara mwaamwi tuto kyaarave.

Saataaniva mpo enta mpo enta Kotira vuqaa variqaro  
tiri qata vakyaahuaqaa qua vatarera uti varira  
mwitanahua mwia vara mwaamwi tuto kyaarave.

<sup>11</sup> Tiri qata vakyaahua Saataaninravata ntaquqi viqata  
sipisipi nraati mwia nraanreqo  
Saataaninra nraatara kyaarave.

Mwihua Kotira qua timwaqi viqata  
Saataaninra nraatara kyaarave.  
Mwihua Karaisirara rieqata hia nkyiari mwataqaa kyuqema  
varirara nronraqama kye riemwaqi viraitita,  
hia aatu hiraitita, qiona qutu quananrave timwa kyeta,

mwihua Saataaninra nraatara kyaarave.

<sup>12</sup> Mwihua mwitaamaqi viqata

Saataaninra nraatara kyaarara tita,  
nyaamwuvantovata, nyaamwuni variahuavata,  
nkye mwihuara qamwateqata variate.

Nte mwataravata nramanri nronranravata po tuqo.  
Saataaniva mwini variqaro mwiva ntapihi kyaiharo  
mwiva taiqaari entava qaumaqa iharora tiro,  
nai mwia mpoqama kyero raraqa te variharo variho, tiro.

<sup>13</sup> Nyaamwusairo quavanto mwitaa tuvana nte taqaavaro qaakyau inraikya evari  
mwia vu nraato ntapihi vuvaro mwiva tiqaro, Qikye ni vara mwaamwi kyaavanama  
mwatani varuqo, timwa kyero mwiva siviro nraaqiara mwatato nraakyera, mwia  
vataqiro rirero uti varura.

<sup>14</sup> Evari nronra uaquia huva mwia vataqiro rirera uti varuvata nraakyeh  
kyaahaqa hiqata mwianra rieqata mwata terama tonani hia vaisivata varunani qumi-  
nasata hitero uro taarampo ihivata hini ihivata variraro evarivantove qaruravantove  
mwia hia ruarive tita, memonra nraakya taaratana mwunra.

<sup>15</sup> Mwuvaro nraakyevanto hiante vi varuvaro qaruravanto nai nroqitairo nramanri  
vihi kyovaro mwi nramanriva humwunra votima kyero nteqaro mwi nraakyera  
vataqiro viqaro mwia raaqu kyarerera huvaro

<sup>16</sup> mwatavanto nraakyeh mwia kyaahaqa hiqaro nai nro qaqaama kyero nramanri  
mwia nramwa taiqa kyero.

<sup>17</sup> Nramanri nramwa taiqa kyovaro evarivanto nraakyeh mwianra raraqa tovaro  
mwiva mwia nraaqiara hini uhuavata ntaquariva viro. Mwiva uro Kotira qua  
rioahuavata, Karaisiva timwa nyu quara riohuavata, ntaqirero vura.

<sup>18</sup> Ntaqirero vuva uro evari voti hiro qarura voti huva kyaarera nronra tokyani siviro  
varura.

## 13

### *Qaakyau vairi voti huva kyaarera nronraqitairo qovarama vurara tura*

<sup>1</sup> Nte variqana ruvaata taqe variavaro kyaarera nronraqitairo qaakyau inraikya-  
vanto qovarama viro. Mwi inraikyava vahirero kyaava 10 nramwu mwia mwamwan-  
taqaa vahuvare mwia qiata 7 nramwu vahuvare mwia kyaava mpoqaa mpoqaa  
nronra vaisi tovaqa vahuvare mwia qiata mpoqaa mpoqaa Kotirara uaquia hi quara  
tu nrutuva vahura.

<sup>2</sup> Nte taqaavaro mwi inraikyava qaakyau vairi, *repaati* vairi voti huva vahuvare  
mwia kyuquvanto aasau *mpea* kyuqu voti huva vahuvare mwia nrovanto vairi *raioni*  
nro votima kyero vahura. Mwi inraikyava qaakyau vairi votima kyero varuvare evari  
nronra mwiva nai mwia votima kye variarive tiro, mwia vara nronraqama kyero nai  
kepukya okyara mwia mwinro nai ntaqikyu kyaiqara mwia mwunra.

<sup>3</sup> Qaakyau inraikya evari mwiva nai kepukya qaakyau vairi mwia mwuvana nte  
taqaavaro mwi inraikyara qiata mpo teqa kyovaro qauma qutu quariva vahuvarevata  
qaiqaa tavanta viro qio vahura. Mwia qiata mpovanto qutu quataara vahuvare  
tavanta vuvaro qati variqiro vi varuvatara tita, mwatani varuhua nrihanrama vita  
mwia inraikyara kepukyavantove timwa kyeta, mwia vataqi vi varura.

<sup>4</sup> Evari qora inraikya mwiva nai kepukya qaakyau vairi voti huru mwia mwunranra  
tit, mwatani varu nraakyeh qorahua qaakyau vairi mwia nrutu tuaahera kyeta  
tiqata, Qaakyau vairivanto nraataraarivama variho. Hia mpovanto mwia nraatara  
kyaananrove, tura.

<sup>5</sup> Mwi entara Kotiva qaakyau vairi mwia qati kyovaro mwiva nronraqama viro variqaro 42 tora variqiro viqaro Kotirara mwaqa uaqia hi quara timwaqiro vi varura.

<sup>6</sup> Mwiva nai nro qaqaama kyero Kotirara uaqia hi quara tiro, mwia mwatukyavaravata uaqia hi quara tiro, ekyaa nyaamwuni varuhuaravata uaqia hu quara timwaqiro vi varura.

<sup>7</sup> Mwitaa timwaqiro vi varuvaro Kotiva mwia qati kyovaro mwiva Kotira nraakye qoravata ntaquqi viro mwihua nraatara kyora. Mwiva mwihua nraatara kyero qaakyau vairi voti huva, mwiva nronraqama viro ekyaa mpo mwatanaa mpo mwatanaahua eqarave, upive, ekyaa mwatanaa mpo qua mpo qua ti varuhuave, mwiva ekyaa mwihuaqaa ntaqikyiqiro vi varura.

<sup>8</sup> Nte ruvaatakyaa mwi inraikyava nraakiara qovara hianinra taqaavarave. Nraakiara ekyaa mwatani varihua mpo mwatanaa mpo mwatanaavanto qaakyau vairi mwianra qamwataqi viqata mwia nrutu tuaaherevarave. Haaru mwata mwaa hia ututo entara Kotiva nraakye qora nrutu mpukuqi qara ntumwa tohua, mwihua nraahuma vairi nrutu mwia hia tuaaherevara. Mpuku mwia qati variqi vihua nyutu vatai mpukuva vaiharo haaru sipisipi nraati ru kyova, mwivama mwi mpukuraqaa ntaqikyi variro.

<sup>9</sup> Nkyi su nyaato vahirera, nkye mwaa quara okyarara vu nraato tita ntapihiata.

<sup>10</sup> Mwia ntavaaqavu kye rupate vaisiva varirata mwihua mwia ntavaaqavu kye rupa kyeverave.

Paipaqtaita mwia rukye vaisiva varirata mwihua mwia paipaqtaita ru kyeverave. Mwihua mwitaamaqi vivata nkye Kotira nraakye qoravanto Kotirara riemwaqita vira kepukyaqama kyeta tutaata.

### *Qaakyau vairi voti huva mpovanto mwataqitairo qovarama vurara tura*

<sup>11</sup> Nte variqana ruvaata taqaavarao qaakyau vairi voti huva mpovanto mwataqitairo qovarama vura. Vairi mwia kyaava taaratana sipisipi nraati kyaavatana voti huva mwia mwamwantaqaa vahuvaro evari qora inraikya mwia qua votima kyero tura.

<sup>12</sup> Mwia quavanto mwitaama vahuvaro qaakyau vairi mwiva nronraqama viro vuni varura qaakyau vairi mwia kyaiqa nraahu vararero variqaro mwia kepukya kyaiqa okyara vareqaro ekyaa mwatani varuhuaqaa ntaqikyiqiro viqaro vuni varu vairira mwia qiata teqa kyovaro tavanta vuvaro qati varura, mwianra kepukyaqama kyero tiqaro, Nkye mwia nrutu nraahu tuaaheraqita quate, tiro.

<sup>13</sup> Mwitaa timwa kyero nraakiara qovara huva qaakyau vairi mwiva variqi viqaro nronra kyaiqa nraahu vare variqaro nraakye qora suqaa variqaro mwiva tuvaro nyaamwusairo qiaavanto mwatani tumuvata nraakye qora taqora.

<sup>14</sup> Mwiva vuni varu vairira kyaahaqa hiqaro nronra kyaiqa varaqiro viqaro nraakye qora unra utu kyovatara tita, nraakye qora mwatani varuhua mwianra qamwataqi viqata vuni varu vairira, mwia qiata teqa kyovaro tavanta vura, mwia nrutuvanto viriniqa hiarive tita, mwanraquhave mwanrahahave utu mwatora.

<sup>15</sup> Nraakye qoravanto vuni varu vairira mwia mwanraqura utu tovaro nraakiara qovarama vuva qaakyau vairi mwia Kotiva qati kyovaro mwiva nai nraaiho vuata kyovaro mwanrahavanto qakyaa hiro qua tiqaro varuvata nraakye qora mpo uhua mwia nrutu hia tuaaherohua varuvaro mwanraqura ututo inraikyava mwiva mwihua qio ru kyaariva varura.

<sup>16</sup> Mwanraquravanto mwitaama vahuvaro nraakiara qaakyau vairi qovarama viro varuva variqaro ekyaa nraakye qora nronra vaisive, pata vaisive, airi inraikya vatohuave, hia airi inraikya vatohuave, karavu vaisive, qati varu vaisihuave, mwiva mwihuara kepukyaqama kyero tiqaro, Mwaa nampaara nkyeta kyauqu tuananranivata tiriqaavata nampaavatora.

<sup>17</sup> Qaakyau vairi mwia nampaave, mwia nrutuve, hia varo vaisira mwianra qaoqama tovaro mwi vaisiva hia qio kyoqaama kyero mpo inraikya varero hia nai vato inraikyara nyiqanro munima varorave.

<sup>18</sup> Tiri tivu tinraato kyuqema kye vahirera, tire qioma qaakyau vairi mwia nampaaa okyara ntapihiananrave. Mwi nampaara okyara vahirero vaisi nrutuma vahiro.

Nampaa mwia vahirero 666.

## 14

### *Taaqi Saioniqaa ntuvantuama vita varura taqorara tura*

<sup>1</sup> Nte variqana ruvaata taqaavaro sipisipi nraati mwiva taaqi Saioniqaa siviro varuvata mwia kyapata 144,000 nraakye qora varuvaro mwihua tiriqaa sipisipi nraati nrutuvata mwia qora nrutuvata qara ntumwa tovata varura.

<sup>2</sup> Mwihua mwini varuvana nte variqana riaavaro nyaamwusairo quavanto nramanri nruqua taarave, nyaanruva nruqua tintema kyeroove, ti varura. Nte riaavaro vaisi airivanto kitaa ntuavarro nruqua tintema kyero qua ti varuvata

<sup>3</sup> nraakye qora 144,000 airivanto sivita variqata Kotira tainta nronra vuqaa variqata, mwihua qati variqi vi varu inraikyara taaratana taaratana suqaa variqata, mwihua 24 vaisi nronranramwu suqaavata variqata, qaraakya ihi timwaqita vi varura. Sipisipi nraati mwiva mwihua mwatasairo huvantu nyatorara tita, 144,000 nraakye qora mwihua nraahu mwi ihira timwaqi vi varura. Mwihua nraahu mwi ihira riovata mpohua hia mwi ihira riora.

<sup>4</sup> Vaisivanto hia nraakyevata nrohintema kyero mwi nraakye qorahua Kotirara nraahu riemwaqi viqata sipisipi nraati mwiva tainive virera hunani mwi nraakye qorahua mwia nraahu vataqita vi varura. Mwatani varu nraakye qorahuaqitairo mwihua nraante huvantu kyero sitaqiro uro Kotiravata sipisipi nraativata mwitanahua nyunra.

<sup>5</sup> Uro nyuvata mwi nraakye qorahua hia unra qua timwaqi vuvaro hia mpo quavata mwihuaqaa vahuvata kyuqe kyaiqa nraahu vare varuhua varura.

### *Nyaamwunyaahua taaramponramwu taqorara tura*

<sup>6</sup> Nte Ioniva qati nraahu ruvaata taqe variqana taqaavaro nyaamwunyaava mpovanto nyaamwu virisata hitero vi varuvaro Kotiva mwia titero uro mwatani varihua mpo mwatanaa mpo mwatanaahua egarave, upive, ekyaa mpo qua mpo qua ti variahuate, mwihua kyuqe mwakyaakya ekyaa enta qati variqi vi quara timwa nyianti timwa kyero mwia titovaro mwiva nyaamwu virisata nrohiqaro

<sup>7</sup> paa tiro aakyara ntero tiqaro, Kotiva nraakye qora ko qari entava nri ntaihatara tita, nkye Kotirara aatu hiqata mwia nrutu tuaaheraate. Mwiva nyaamwuvata, mwatavata, nramanri nronravata, rumwu nramanrivata, utu tairave. Mwia nraahu qamwata mwateqata tiri mwanriqavanto variho, qiate, tiro.

<sup>8</sup> Mwitaa tuvaro mwia nraakiara nyaamwunyaava mpovanto mwia nraakiara viqaro mwitaama tiro, Papironi mwatukyavanto taiqama viho. Mwi mwatukyava uaquia hi kyaiqara nraahu utuqi viqaro ekyaa mpo mwatanaa mpo mwatanaahua ni uaini nraate tuvata mwihua nreqata mwihuavata api qaraqita vi varurave, tiro.

<sup>9</sup> Mwitaa tuvaro mwitanahua nyaakiara nyaamwunyaava mpovanto mwitanahua sataqiro viro paa tiro aakyara ntero tiqaro, Vaisi mpovanto qaakyau vairi qamwata mwateqaro ni mwanriqave timwa kyero, mwia nampaa nai tiriqaave, nai kyauqu tuananranive, vatairera,

<sup>10</sup> Kotiva mwi vaisirara mpoqama kyero raraqa tairaro mwianra ni uaini nreqanro ni raraqa taani okyarara taqaananrovema qiananro. Kotiva hia qihakyama kyero mwi vaisira ru mwataananrove. Kotira mpoqama kyero raraqa tairaro uaqiamma kyero mwi vaisira ntuqutu mwataananrove. Kotiva mwi vaisira ntuqutu kyairaro mwiva

nyaamwunyaahua kyuqehua suqaavata sipisipi nraati mwia vuqaavata variqaro nronraqama kyero qia itaaninraqi nriqintuna uka quani qiava itaaninraqi variqiro viqaro nronraqama kyero atura ntinqaro variananrove.

**11** Mwiqi variqiro viraro mwi qiava hia qiparaitiro, qati nraahu ekyaa enta ita-mwaqiro quananrove. Mwiqi varihua ekyaa enta itamwaqiro quananrove. Nraakye qora qaakyau vairivata mwia mwanraquhavata qamwata mwateqata tiri mwanriqave tiqata mwia nampaavata varehua, mwihua entaqi ihera nronraqama kye qia itaaninraqi hia tekyavata ihua ekyaa enta atura ntinqata variqi vivarave, tura.

**12** Mwi quara rieqanama nte Ioniva nkyiara tiqana, Nkye Kotira nraakye qora variqata kepukyaqama kyeqa Kotira qua riemwaqita quatema, tuqo. Nkye Iesusirara nraahu nraato tuqi quaterama, tuqo.

**13** Qio nyaamwunyaava mwitaa tuvana nte variqana riaavarro nyaamwusairo quavanto nianra mwitaama tiro, Mwaa quara qara ntumwa taante. Mate mwaa entaraqaatai nraakye qoravanto Kotira kyaiqa varaqi vita qutu vihua varivaro Kotiva mwihua kyuqema nyataananrove, tiro.

Nyaamwunyaava mwitaa tuvaro Kotira mwanraquravanto tiqaro, Qutaama qiaro. Mwi nraakye qorahua muaanra varaqi vira qaqira kyeta uro tekyu hivarave. Mwihua vare kyaiqava kyuqe kyaiqa vahianinranra titi, mwi kyaiqaravata vare vihua uro nyaamwuni tekyu hivarave, tiro.

### *Mwataqaatairo kyara vanturara tura*

**14** Mwitaa tuvana nte variqana taqaavaro tonamwu turomunra vahuvaro mwiaqaa mpovanto mwatakyaa viro varura. Mwia viri vahirero nte mwatani mwatatai nraaqiarava varuqo tu vaisira viri voti huva vahuvaro qiatqaa kori tovaqa qutero kyauquqi paipa mpoqama kyero vahora tutero varura.

**15** Varuvaro mwiaqaatairo Kotira nraamwuqitairo nyaamwunyaava mpovanto veva ntero iro tonamwuqaa mwatakyaa viro varu vaisirara aakyara ntero tiqaro, E kyara vantira entava nri ntaiho. Ena paipaqtaira kyara vantu varera nriante. Mwatani kyaravanto naitarama viho, tiro.

**16** Mwitaa tuvaro tonamwuqaa mwatakyaa viro varu vaisiva nai paipa tuto kyero mwatani vahu kyarara teqa kyero vantura.

**17** Mwiva mwitaa huvana nte variqana taqaavaro Kotira nraamwuqitairo nyaamwunyaava mpovanto veva ntero mwivavata nai kyauquqi paipa mpoqama kyero vahora tutero varura.

**18** Mwiva veva ntero varuvaro nyaamwunyaava mpovantovata qiaqaa ntaqikyi varuva, mwiva Kotira qamwata mwateqaro qia quara to taintaraqaatairo nri ntero nyaamwunyaava paipa vahora tutorara aakyara ntero tiqaro, Ena paipaqtaira mwatani ito uaini tутera mwia tamwa ekyaa teqa vare nriante. Mwi tamwava keko timwa viho, tiro.

**19** Mwitaa tuvaro nyaamwunyaava mpovanto mwatani nai paipaqtairo uaini tamwa teqa kyero varero Kotiva uaini tati kyeqaro vataani tanunraqi tuto kyero. Tuto kyovaro mwi tanuva vahirero Kotira mpoqama kyero raraqa to tanuva vahuvaro

**20** mwiqi tuto kyovaro uaini tamwa mwia tati varuvaro mwi tanuva nronra mwatukya mwaqaani vahuvaro mwitqitairo tatito nramanriva nraanrevanto viqaro humwunra nramanri votima kyero nai nyianra 300 kiromitaa uto taiqora. Vaisi mwamwanta ekyaa nrapitama kyero qiatu nraahu qoqaa vahi nramanrinra votima kyero nraanre mwiva nteqaro humwunra nramanri votima kyero nai nyianrani uto taiqora.

## 15

*Nyaamwunyaahua 7 nramwuvanto variqata nraakye qora uaqiamma nyate inraikyara tute varurara tura*

<sup>1</sup> Nte Ioniva variqana ruvaata taqeqlana nyaamwuni taqaavaro nronra inraikya nraahumwa inraikyavanto qovarama viro vahura. Mwini nyaamwunyaahua 7 nramwuvanto variqata nraakye qora qoraqama nyatarera hu inraikyara 7 nramwu qora inraikya tute varura. Mwi inraikyara nraakye qora ekyaara nyivaro Kotiva nraakye qorara raraqa taariva taiqa quananro.

<sup>2</sup> Mwihua mwia tute varuvana nte taqaavaro kyaarerera nronravanto karaasi voti huva mwiqi mpoqi qia ite varuva vahura. Mwitaama vahuvana nte taqaavata nraakye qora airivanto qaakyau vairi nraatara kyohua varura. Mwihua qaakyau vairivata mwia mwanraqura mwi inraikyara nampaa qara ntumwa tora nraatara kyeta uro kyaarerera karaasi voti hora tokyani sivita variqata nkyiari kyauquqi kitaa voti hora Kotiva nyu kitaara tuteta varura.

<sup>3</sup> Mwihua mwini variqata Mosesira Kotira kyaiqa vaisi ihivata, sipisipi nraati ihivata, timwaqi viqata mwitaama tita:

Nronrao, Kotio, i kepukyavanto nraatara kyero vaiho.

I kyaiqvanto nronra kyaiqa vaihatara tita, tire

mwia taqeqlana kyauqu ntukikinraaqateqa varuro.

E ekya mpo mwatanaa

mpo mwatanaahua vunyaava variaravave.

I kyaiqa okyaravanto avuqavu okyara

qutaa okyara nraahuma vaiho.

<sup>4</sup> Nronrao, tavave i nraatu hia aatu hiananrove?

Ekyama i nraatu aatu hiqata varivarave.

Tavave hia i nrutu tuaaheraananrove?

Ekyama i nrutu tuaaherevarave.

Iqi nraahuma hia qora okyaravanto vaiharo

kyuqe okyaravanto nraahuma vaiho.

E avuqavuma kyera varaara kyaiqava

qoqaa vahara variananranra tita,

ekya mpo mwatanaa mpo mwatanaahua

i kyaiqa taqeta uro i vuqaa variqata,

i qamwata mwateqata i nrutu tuaaherevarave, tura.

<sup>5</sup> Mwihua mwitaa timwa kyeta ihi timwa taiqa kyovana nte taqaavaro nyaamwuni Kotira nraamwu qesavanto qatua viro vahuvare Kotiva nainive tu mwatuqyava qoqaa vahura.

<sup>6</sup> Mwitaama vahuvata nyaamwunyaahua 7 nramwuvanto nraakye qora uaqiamma nyatarera hu inraikyara 7 nramwu qora inraikya tutohua, mwihua Kotira nraamwuqtai veva ntora. Mwinramwuhua veva nteta kyuqe tuavaaqta takyuqi tuavaaqara utu teta mwetokyaaqaa kori naaqunta voti hora rupa teta varura.

<sup>7</sup> Varuvaro qati variqi vu inraikyara taaratana taaratanaqitairo mpovanto tanu 7 nramwu nyaamwunyaahua 7 nramwu nyunra. Mwi tanunra 7 nramwu kori tanu vahuvare mwiqima Kotiva ekya enta qati variqiro vira mwia raraqa tova piqaro vahura.

<sup>8</sup> Mwi tanunra nyaamwunyaahua nyuvaro Kotira peqa okyaravanto takyuqi varuvaro mwiaqatairo qia munravanto viqaro Kotira nraamwuqi uro piqa vuvata mwia kyaara mpovanto hia qio mwia nraamwuqi vera ntaariva vahura. Nyaamwunyaahua 7 nramwuvanto nraakye qora uaqiamma nyatarera hu inraikyara hia taiqa kyovaro qati vahurara tita, mwihua mwiqi viqeteva hia vahura.

## 16

### *Kotira raraqa tova piqa vu tanunra 7 nramwuanra tura*

<sup>1</sup> Mwitaama vahuvana nte variqana ruvaata taqeqlana riaavaro Kotira nraamwuqtairo quavanto nyaamwunyaahua 7 nramwuanra paa tiro aakyara ntero tiqaro, Kotira raraqa taiva piqai tanunra 7 nramwu vareta uto mwatani rauru kyaate, tura.

<sup>2</sup> Mwitaa tuvaro nyaamwunyaahua 7 nramwuqtairo mpovanto nai tanu varero uto mwatani rauru kyora. Rauru kyovata qaakyau vairi nampaa vareta mwi mwanraqrara qamwateta tiri mwanriqave tuhua, mwihua varuvaro mwihua mwamwanta taqa tauma rumpuara uaquia huva qovarama viro mwihua mwamwanta nre varuvata varura.

<sup>3</sup> Rumpuaravanto mwihua nre varuvata varuvaro nyaamwunyaahua 7 nramwuqtairo nampa 2 vanto tumu nai tanu kyaarerera nronraqa rauru kyovaro ekyaa kyaarerera mwiva tuqasaa viro qutu vu vaisira nraanre votima vuvaro mwipi ekyaa qati variqi vi varu inraikyava vahuva ekyaa qutu taiqa vura.

<sup>4</sup> Ekyaa qutu taiqa vuvaro nyaamwunyaahua 7 nramwuqtairo nampa 3 vanto nramanri nronraqaavata nrumwuqtai tumu nramanrinraqaavata tumu nai tanu rauru kyovaro mwi nramanrivavata vaisi nraanre tuemwa vura.

<sup>5</sup> Mwitaa huvaro nte riaavaro nyaamwunyaava nramanriqaa ntaqikyi varuva Kotirara tiqaro,

I kuaaraqi nraahuma uaquia hi okyarava hia vaihara kyotatavanto variaro.

E qati variqira vi variaravave.

Haaruvata e qati variqira vi varuravave.

E mwataama kyera nraakye qora ntukutiqara avuqavuma kyera mwitaa hiqara kyuqema hira hiaro.

<sup>6</sup> Mwihua i nraakye qoravata,

i qua qovarama kyaa vaisihuavata,  
ru kyaavaro mwihua nraanrevanto raurirave.

Mwia kyaara e nkyiari ntukutiqara  
nraanre mwihua nyianrata nramwa kyaara  
nte mwianra huviqaravema tuqo, tiro.

<sup>7</sup> Nyaamwunyaava Kotirara mwitaa tuvana nte riaavaro Kotirani mpo inraikya mpo inraikya qia quara mwate varu taintaraqaatairo quavanto tiqaro,

Nronrao, Kotio, i peqvavento mpoqiaavata vaiho.

E mwitaa hiqara nraakye qora ntukutiqara

avuqavuma kyera ntukutuaro.

Nte mwianra qiovema tuqo, tiro.

<sup>8</sup> Mwitaa tuvaro nyaamwunyaahua 7 nramwuqtairo nampa 4 vanto uro nai tanu huari vuqaa rauru kyovaro Kotiva huari mwia qati kyovaro huarivanto mpoqama kyero iteqaro mwatani varu nraakye qorahua itamwa tatoqa kye varura.

<sup>9</sup> Huarivanto nraakye qora nronraqama kyero ite varuvata mwihua Kotirara qora qua titi tiqata, Mwivama nyaamwunyaahua sitaihata mwihua nkyiari tanu rauri variavaro qora inraikyavanto qovarama vi variho, titi. Mwitaa timwa kyeta mwihua nkyiari qora kyaiqa qaqla kyeta Kotira nrutu tuaaheraataara vahuvata mwihua hia mwitaa hura.

<sup>10</sup> Mwihua hia mwitaa huvaro nyaamwunyaahua nramwuqtairo nampa 5 vanto nai tanu uto qaakyau vairivanto mwatakyaa vi varu taintaraqaa rauru tovaro qaakyau vairivanto ntaqikyu mwataraqaa enta hu inraikyava qovarama viro entamaqiro vi varura. Entamaqiro vi varuvata nraakye qoravanto mpoqama kye nriqa vu inraikyara vareqata nkyiari mwaaqinri toqe varura.

<sup>11</sup> Mwitaamaqi viqata mwihua nkyiari nriqa vura kyaaravata, nkyiari tauma rumpuara itora kyaaravata, Kotirara qora qua tiqata hia nkyiari qora kyaiqa qaqlira kyaraitita, qati nraahu mwi kyaiqara utuqi vi varura.

<sup>12</sup> Mwihua nkyiari qora kyaiqa qati nraahu utuqi vi varuvaro nyaamwunyaahuaqtairo nampa 6 vanto nai tanu uto nramanri nronra, Iuperetisi nramanri mwiaqa rauru kyovaro mwi nramanriva tati viro huari vu nrinanyaahua nronra vunyaaahua aanra vihi nyatora.

<sup>13</sup> Mwitaa huvana nte taqaavaro qaakyau inraikya evari nronra voti hora nroqitairovata, qaakyau vairi nroqitairovata, Kotira qua unra qua tu vaisira nroqitairovata, vaana taaramponramwu vihaunta voti uhua qovarama vita varura.

<sup>14</sup> Vaana mwinramwuhua Saataaninra vaanavanto nronra kyaiqa vare varuhua varura. Mwinramwuhua qovarama vita uro ekyaa mwatani varuhua vunyaaahua rapateqata nrivaqe ntuvantua hita Kotiravata ntaquare tura. (Nte Ioniva ruvaata taqeqlana nraakiara qovara hianinra taqaavara.) Kotiva kepukyavanto ekyaa inraikya nraatara kyaiva variraro nraakiara mwiva ko qiani entava qaumato vahirata ekyaa mwatani varihua vunyaa vaisivanto ntuvantuama vita Kotiravata ntaqirera utivarave.

<sup>15</sup> (Karaisiva nai uro ntantero tumuani entarara mwataama tiro): Riaate, Nte mpuara vaisi nraantantamwa kye tumuaninrave. Vaisivanto hia vaitaraitiro, vu ntapairi kyero nai tuavaaqqa kyuqema kyero ntaqikyi variariva, mwi vaisiva qamwateqaro variananrove. Mwi vaisiva mwi entaraqaa nraakye qora suqaa nrohiqaro hia tokya variariva hiama kyaurira inraikya varaananrove, tura.

<sup>16</sup> Nte ruvaata taqe variavaro vaana taaramponramwuvanto uro tunrenrasata, Hivuru quaqitai mwata mwia nrutu Amaketoni mwatave tura, mwini uro mwatani varu vaisihua vunyaaahua ntuvantuama kyovata ntaqirerata uti varura.

<sup>17</sup> Ntaqirerata Amaketoni tunrenrasata ntuvantuama vita varuvaro nyaamwunyaahua 7 nramwuqitairo nampa 7 vanto ekyaa tokyaqaa varuva nai tanu virira nyaamwuni rauru kyovaro Kotira nraamwuqi vahu taintaraqaatairo quavanto paa tiro tiqaro, Taiqama viho,

<sup>18</sup> tuvaro mwiaqatairo aaquakyaa ti varuvaro nyaanruva nruqua ti varuvaro mwaturavanto nronraqama kyero ti varura. Mwaa mwataru ututo entaraqaatairo hia mwitaa hi mwaturava utuvata nraakye qoravanto taqorave. Mwi entara mwatura tiqaro nai nraahumwa mpo qarama kyero turave.

<sup>19</sup> Mwaturavanto tiqaro mwatukya nronra mwia vara mwata mwatama kyero taarampotanaqaa tuqamu viro vahuvavarot ekyaa mwatani nronra mwatukya, mpo mwatukya mpo mwatukyaqi vahu inraikyava tumantiro ntuvuraavura hiro uaqima vura.

Mwitaamaqi vuvaro Kotiva hia Papironivata taunru kyaraitiro, mwiva mpoqama kyero raraqa tovaro mwi mwatukyarara tiqaro, Evata ni uaini ni raraqa tai nramanrinra nraante, timwa kyero mwi mwatukyaravata ntaqu mwatovaro

<sup>20</sup> kyaarerera nronra utaqaa pata mwata airi vahuvavata raupirima viro hia vahuvavar mwataqaa ora tatari taaqi vahuvavata viviro hia vahura.

<sup>21</sup> Mwitaamaqi vuvaro nyaamwusairo vati kaapura ori nronra voti huva mwia muaanra 50 kirovanto vaisiqaa ntqaro vaisi ri varura. Vaisi ri varuvata mwihua Kotirara uaquia hi quara tita tiqata, Kotiva nronraqama kyero tiriqaa qua vatero tiri ntuquti variho, tita. Timwa kyeta mwia qorama timwa mwatoria.

vari nraakyera ruani okyarara i nraamwutaankye. Mwi nraakyeva mwatakyaa viro variqaro ntaqikyiari taintava nronra nramanri, mpo nramanri mpo nramanriqaa vahirave.

<sup>2</sup> Ekyaa mwatani variahua vunyaa vaisivanto mwi nraakyeravata mpuaraqama kye api nrohi variarave. Mwi nraakyeva vaisi kyapata api qaraqiro nrohiqaro nai uaini, api nrohi vari nramanrinra, ekyaa mwatani varia nraakyе qorahua nyihata mwihua nramanri mwia nreta ueraqama quavo, tiro.

<sup>3</sup> Mwitaa tuvaro Kotira mwanraquravanto kepukyaqama kyero nivata varuvaro nyaamwunyaava ni pitaqiro uro quminasata kyovana nte mwini variqana taqaavaro nraakyе mpovanto qaakyau vairi mwia mwoqaqa mwatakyaa viro varuvaro vairi mwia nraanre vairi varuvaro mwiaqa mpo nrutu mpo nrutu mwaaquqa hi nrutura nraahu qara ntumwa tovaro vahura. Qaakyau vairi mwia qiata 7 nramwu vahuvare kyaava kyauqurutana vahura.

<sup>4</sup> Qaakyau vairi mwiva mwitaama varuvaro nraakyе mwiva nraanre tavunavata titiqa tavunavata nronra munima kyo tavunana rupatero variqaro nronra munima kyo orira korive, mpo ori mpo orive, mwiaqo nai mwamwanta mwunruqama tero variqaro nai kyauquqi kaapu tuteru varura. Mwi kaapuraqi nai api qaraqiro nrohi varuraqaatairo uaquia hu inraikyava, mpo inraikya mpo inraikyavanto nraahu piqa viro vahura.

<sup>5</sup> Kaapu mwia tuteru nai tiriqa uqetato quara mpo qara ntumwa tovaro vahura. Mwi nrutuva mwataama tiro:

MWAA PAPIRONIVE.

EKYAA API QARAQITA NROHI VARIAHUAVE,

EKYAA QORA INRAIKYA UTI VARIAHUAVE,

MWIHUA VARIOVARO MWAA NRAHESIVA

MWIHUA NYOVAMA VARIHO, tiro.

<sup>6</sup> Mwi quara mwitaama kye qara ntumwa tovaro vahuvana nte taqaavaro mwi nraakyeva airi nraakyе qora nraanre nramwa varovaro mwia vu nraato apiqa huvaro varura. Kotira nraakyе qora nraanreve, Iesusira qua nraahu riemwaqi vura kyaara ru kyo nraakyе qorahua nraanreve, ekyaa mwi nraanrenra mwi nraakyeva nramwa kyero ueraqama viro varura. Mwi nraakyeva varuvana nte mwia taqena mpoqama kye kyauqu ntukikinraaqate variavaro

<sup>7</sup> nyaamwunyaava nianra tiqaro, Nanraqamave e mwi nraakyera taqera kyauqu ntukikinraaqate variaro? E rie varirage nte mwi nraakyera okyara tuqetatairavata, mwia mwoqaqa mwatakyaa viro vairira mwia qiata 7 nramwuvata kyaava 10 nramwuvata vahi vairira okyaravata, i timwa mwiankye.

<sup>8</sup> Mwi vairira e taqaarava mwiva haaru qati variqiro vi varurave. Mate mwiva hia qati variqiro vi variho. Nraakiara mwiva mupi nronraqitairo uaqiamma virero mwataqa mwaanri ntero quananrove. Mwi vairiva qaakyau vairivanto mwataqaa nrohi varirata mwatani varihua mpo ihua mwia taqeta nkyiari kyuqu kyauqu ntukikinraaqate varivarave.

Haaru hia mwaa mwatara ututo entara Kotiva hini hia nraakyе qorahua ni nraakyе qora variqata ekyaa enta qati variqi vivarave timwa kyero, mwihua nyutu mpukuqi qara ntumwa tora. Vairi mwianra kyauqu ntukikinraaqate vari nraakyе qorahua nyutu hiama mwi mpukuraqi vaiho. Mwihua nyutu mpukuqi hia vahiarhua qaakyau vairi mwia taqeta, nkyiari kyauqu ntukikinraaqate varivarave. Mwi vairiva haaru varuvave. Mwaa entara mwiva hia variho. Nraakiara mwiva qaiqaa qovarama quaninranra tita, mwi nraakyе qorahua mwianra nkyiari kyauqu ntukikinraaqate varivarave.

<sup>9</sup> Kyuqe vu nraato vahiariva nraahu mwaa quara okyarara riemwaqiro quananrove. Qaakyau vairi mwia qiata 7 nramwuvanto mwia okyara vahirero taaqi 7 nramwu

vahira mwiaqaa mwatakyaa viro variho. Vairi mwia qidata 7 nramwuvanto qaiqaa mwia okyara vahirero nronra vaisi 7 nramwu variarave.

<sup>10</sup> Vaisi 7 nramwuqitairo hini kyauquruvanto mwatani variqi vita qutu quavaro kuaiqavanto qati ntaqikyi variharo mpovanto nronra vaisi vunyaava variariva qatima variho. Nraakiara mwiva qovarama viro mwiva pata qiquqiarama variananro.

<sup>11</sup> Qaakyau vairi mwiva haaru qati variqiro vuvave, mate hia qati variqi viva, mwivama nraakiara vunyaa vaisi mwihua nampa 8 qama kyaananro. Mwiva 7 nramwu vunyaa vaisi mwihua kuaa okyarama variananro. Mwiva qaiqaa qovarama viro uro taiqa virero quananrove.

<sup>12</sup> Kyaava kyauqurutana taqaananra mwia okyara vahirero mwi inraikyava vunyaa vaisi kyauqurutana variarave. Mwaa entara mwi vaisihua hia nronraqama vita kepuuya vareta mpo mwataqaa mpo mwataqaa ntaqikyiraitita, qati variarave. Nraakiara mwinramwuhua nronraqama vita qaakyau vairi kyapata ntaqikyiqi viqata huari vu kuaiqiaqaa nai qiquqiaqa ntaqikyiqi vivarave.

<sup>13</sup> Mwi vaisinramwuhua vunyaa vaisi kyauqurutanavanto variqi viqata kuaa vu nraato nraahu vateta mwihua qaakyau vairi kyaahaqa hirerata nkyiari kepuuya mwia nraahu mwivarave.

<sup>14</sup> Mwihua sipisipi nraativata ntaquqi vivaro sipisipi nraati mwiva nronravanto variqaro ekyaa inraikyaa ntaqikyiro ekyaa vunyaa vaisiqaa ntaqikyivara tiro, mwiva mwihua kepuuya nteqa kyero nraatara kyaananrove. Mwi entara sipisipi nraati mwiva ntaquqi virata mwia kyuquqa nai nyaanrama kyero nai kyaama tai nraakyne qorahua, nai mwianra nraahu riemwaqi vihua, mwihuama mwia vataqi viqata nraatara kyevarave, tiro.

<sup>15</sup> Nyaamwunyaava mwita timwa kyero mwiva nianra qaiqaa tiqaro, Api qaraqiro nrohi vari nraakyeva mwatakyaa viro vari nramanrinra mwatavau nronra nramanri mpo nramanri mpo nramanri vira mwia okyarara tirerave. Ekyaa mwi nramanrinra okyaravanto vahirero ekyaa mpo mwatanaa mpo mwatanaahuama variavo. Upi mwamwanta vaihuave, eqara mwamwanta vaihuave, mpo qua mpo qua qiahua, variarave.

<sup>16</sup> Qaakyau vairivata kyaava kyauqurutanavata taqaananra, mwihua variqata api qaraqiro nrohi vari nraakyera mpinqama kyeta uaqama mwatevarave. Mwihua mwia nramwutaaqa hiqata mwia vehiqama mwateta mwia kyaivaro tokyama variananrove. Mwihua mwia vehiqama mwateta mwia mwamwanta mwati toqa nrupepaama kye nramwa kyeta qiaqotai mwia mwamwanta itamwa tatoqa kyevarave.

<sup>17</sup> Kotiva mwihuara ni mutukya vahiani kyaiqara varaqi quate qianinranra tita, mwihua kuaa vu nraato nraahu tu kyeta nkyiari kepuuya mwia qaakyau vairi mwia nraahu mwivarave. Mwihua mwitaamaqi vivaro Kotira quavanto qutaa mwivauma vahiananrove.

<sup>18</sup> Mwi nraakyera taqaarava mwia okyaravanto vahirero mwiva nronra mwatukyavanto mwatani variahua vunyahuaqaa ntaqikyi varivama variro.

## 18

### *Papironi mwatukyavanto taiqa vurara tura*

<sup>1</sup> Nte mwi inraikyara mwi inraikyara ruvaatakyaa taqena qaiqaa taqaavaro nyaamwunyaava vaisi mpovanto nyaamwusairo tumu varuvaro mwia nronraqama kyero nronra kepuuya mwuvaro mwia mwunruqamato inraikyava mpinqama kyero takyuqiqaro ekyaa mwata maata ntuaahamaqiro vi varura.

<sup>2</sup> Mwiva paa tiro aakyara ntero tiqaro, Mwi mwatukyava taiqa viho. Papironi mwatukya nronra mwatukyavanto uaqama viho. Mate mwi mwatukyaraqi hia

kyuqe inraikya vaanavanto nraahu variqi vi variavo. Nyaamwa uaqia hiahua mwi mwatuukyaraqi variqi vi variavo.

<sup>3</sup> Haaru mwi mwatuukyava nai uaini uaqia hora mpo mwatanaa mpo mwatanaahua nyunranra tiro, mate mwiva taiqa viho. Ekyaa mwata maata vahintema vunyaa vaisi variahua ekyaa mwihua mwiavata api qaraqita nrohi varurave. Mwi mwatuukyava api qaraqita nrohu kyaiqara uti varuvatara tita, munima kyaiqa vare varuhua, mwihua kyaiqavanto nronraqa huvata munima vare varurave, tiro.

<sup>4</sup> Nyaamwunyaava mwitaa tuvana nte variqana riaavarro nyaamwusairo quavanto mwitaama tiro:

Ni nraakyе qora tuaavo,  
mwi mwatuukyara qaqlira kyeta nritaraate.

Nkye mwihua mwiavata variqata qora kyaiqa varevorave.  
Nkye mwatuukyava mwipi varivaqena  
haunri nte mwia riqana nkyivata ruankyorave.

<sup>5</sup> Mwi mwatuukyara uaqia hi kyaiqava nritarero  
nyaamwu mwutukyani viro piqa viho.

Kotiva mwia qora kyaiqa mwianra  
qati nraahu riemwatero hia taunru kyaiho.

<sup>6</sup> Mwi mwatuukyava nkyi uaqjama nyataintema kyeta  
nkye naivata uaqjama mwataate.

Mwiva nkyi kuaiqia nyinranra rieqata  
nkye mwia taaraqia mwiate.

Mwiva uaqia hi nrumanrinra nkyi nyinra  
nkye mwi tukyara nraatara kye  
mpoqjavata mwia mwiate.

<sup>7</sup> Nkye mwiva nai nrutu tuaahera kyairara rieqata  
mwiva nanrianra qamwateqaro kyuqe inraikya  
mwunruqa hiani inraikyara vatairara rieqatama,  
nkye mwia nrutu vara mwataniqama kyeta  
nriqavira inraikya mpoqjavata mwia mwiate.

Mwiva nanrianra timwaqiro viro tiqaro,  
Nte vunyaa nraakyevantoma varuqo.

Nte hia tetoga nraakyе varuqo.

Hia muaanravanto niqaa vahiraqe ntataaninrave, tiho.

<sup>8</sup> Mwi nraakyeva mwitaa tirara tiro, mwiva variqaro  
qioma varuqo tiraro kuaa enta mwiaqaa nraahu  
uaqia hiari inraikyava, mpo inraikya  
mpo inraikya mwia ruananrove.

Nriqa vi inraikyavarre, mwutukyava uaqiahiani inraikyavarre,  
kyara nraataahiari inraikyavave, ekyaa mwi inraikyava

mwi inraikyava mwi nraakyera ru kyairaro

qjavanto mwia tatoqa kyaananrove.

Nronravanto Kotiva mwiaqaa qua vataariva  
kepukyavanto varirave.

<sup>9</sup> Ekyaa mwatanaa vunyaa vaisivanto mwi nraakyeravata api qaraqita nrohiqata  
qora kyaiqavata vare varihua, mwihua variqata taqaivarro mwi mwatuukyava qia  
iteqaro munra vi varirata mwihua munra mwia taqegetama ntatevarave.

<sup>10</sup> Mwihua nyianrasata variqata mwi nraakyera nronraqama kyero nriqa quaninra  
taqeta aatu hiqata varivarave. Mwihua tiqata:  
Qikye, uvo, Papironi mwatuukya mwaavao,

e nronra mwatukya kepukya mwatukyavanto  
variarava variararo mate pataqiaqa  
i taiqa kyaihara raupirima quaro, tivarave.

<sup>11</sup> Mwi mwatukyava uaqjama virata munima kyaiqa vare varihua varivaro mpov-  
anto mwihua hi inraikyara kyoqaa hiva hia varirata mwihua ntatevarave.

<sup>12</sup> Mwihua hi inraikyava vahirero korive, munima orive, mpo ori mpo ori kyuqe  
orive, kyau mwukyaarive, kyuqe tavuna mpo tavuna mpo tavunave, nraanre tavu-  
nave, vakora tavunave, kyuqe mwunta vi vari kyatarirave, vahi aasau aanraiqa utute  
inraikyarave, kyatari kyuqeraqo utute inraikyarave, kapaave, qainive, egarorive, mwi  
orira mwi oriraqotai utute inraikyarave,

<sup>13</sup> kyaravata nraivaro qiakyaahiani inraikyarave, kyuqe mwunta quarive tiro qia  
quare vari inraikyarave, mwuntavi inraikyara mpo inraikya mpo inraikyave, uainive,  
oripi kyatari tamwa mwia vahamwenrave, uitivata uiti qaupavatave, purimakauve,  
sipisipive, qosivata nai mwia raqa kaari votihiravatave, qati inraikyara munima  
kyontema kyeta munima kyeqata kyoqaa ututo vaisihuave, ekyaa mwi inraikyara hia  
mpovanto kyoqaa hiariva variananrove.

<sup>14</sup> Munima kyaiqa varehua mwi mwatukyarara mwataama tivara: Qikye, ekyaa  
e hiarava mpo inraikya mpo inraikyavanto taiqama viho. E mwunruqama taara  
inraikyava taiqama viho. Ekyaa mwi inraikyara vataarava hiama qaiqaavata qovara  
hiananrove, tivarave.

<sup>15</sup> Mwi entara mwi mwatukyaraqi variqata mpo inraikya mpo inraikya nyiqata  
nronra munima vare vari vaisihua, mwihua nyianrasata variqata mwi mwatukyara  
taiqa kyaaninra taqeta mpoqama kye aatu hita ntateqata varivarave. Mwi entara  
mwihua qutu vi vaisirara kyora mwata hiantre hivarave.

<sup>16</sup> Mwihua tiqata:  
Qikye, po, nronra mwatukyave, kyuqe tuavaaqa  
nraanreve, vakora tuavaaqave, utute variqara  
e mwunruqama taara inraikyava korive, mpo orive,  
kyau mwukyaarive, takyuqi varihara variararo

<sup>17</sup> i pataqiaqa taiqa kyaiharavira raupirima quaro,  
tivarave.

Sipiqaa ntaqikyi varihuavata, ekyaa sipiqa nrohi varihuavata, ekyaa sipiqa kyaiqa  
vare varihuavata, mwihua nyianrasata variqata

<sup>18</sup> taqaivaro mwi mwatukyava qia iteqaro munra vi varirata qia munra mwia taqeta  
tiqata, Mwaa mwatukyava nai nronra mwatukya vahirave. Hia mpo mwatukyavanto  
mwaa mwatukyara nraatara kyaiharo vahivama taiqa viho, tivarave.

<sup>19</sup> Mwitaa timwa kyeta mwihua nkyiari qiaqata qaupa quvareta ntateqata tiqata:  
Tire mwi mwatukyara po kye turo.

Mwi mwatukyava airi inraikya varaqiro vi varihata  
sipi qohua airivanto mwia nrumu mwitaa inraikya  
mwiqata nronra munima varaarave.

Mwi mwatukyava mwatukya nronra vaiharo pataqiaqa  
mwia ntuqutu raupirima kyaiho, tivarave, tiro.

<sup>20</sup> (Nyaamwusairo quavanto nraakiara qovara hiani inraikyarara  
timwa mpi taiqa kyero mpo qua mwataama tiro):

Mwi mwatukyava taiqa virara rieqata  
nkye nyaamwuni varihua qamwateqata variate.  
Kotira nraakyte qoravata, Iesusiva nronraqama kyai  
vaisihuavata, Kotira qua qovarama kye vaisihuavata,  
nkye ekyaa qamwateqata variate.

Mwi mwatukyava nkyi uaqiamma nyatairara rieqaro  
mwia kyaara Kotiva nai kyoqaa mwirnave, tiro.

<sup>21</sup> Quavanto nyaamwusairo mwitaa tuvana nte ruvaata taqaavaro  
nyaamwunyaava nronravanto ori nronra qumina inraikya  
kyavuhu kyero kyaarera nronraqi tuto kyero tiqaro:  
Ori mwia tuto kyaqaro vivintema kyero  
Kotiva Papironi mwatukya taiqa kyairaro  
raupirima viraro mpovanto hia qaiqaavata  
mwia taqaananrove.

<sup>22</sup> Papironi mwatukyave, e ihi tiqara e kitaa ntuananrave,  
ntoma ntuananrave, mpo inraikya mpo inraikya ntuararo  
nruqua tira hia qaiqaavata iqitai rievarave.

Mpo kyaiqa mpo kyaiqa okyara taqehua  
hiama qaiqa iqi kyaiqa varevarave.

Uiti uru oriqa ntuqutu qaupaqama kye varianinra,  
mwia nruquavata hia iqitai qaiqaavata rievarave.

<sup>23</sup> Hiama qaiqaavata omwa qupi kyeta vataivaro  
iqitairo itaananrove.

Nraakye qoravanto nai vare nai vare hivavata  
hiama iqi qaiqaavata vahiananrove.

Haaru ini munima kyaiqa varo vaisihuara mwatani  
variahua, mwihuara nronra vaisive ti varurave.

E ena quahave, qasokyave, vuhaa pahaa inraikyaqo  
mwatani varia nraakye qorahua unra utu nyateqara  
qora aanra sitera vi variananrave.

<sup>24</sup> Kotiva taqaiharo Kotira nraakye qora ru kyaahua  
nraanrevanto iqima vaiho.

Kotiva taqaiharo Kotira qua qovarama kye varu  
vaisihu nraanrevanto iqima vaiho.

Mwitaa hiananranra tiroma,  
Kotiva i Papironi mwatukya taiqa kyaiho, tiro.

## 19

### *Papironivanto taiqa vurara nyaamwuni varuhua nronraqama kye qamwatora*

<sup>1</sup> Nyaamwunyaava nronravanto mwitaa tuvana nte riaavata nyaamwuni varu  
nraakye qorahua airivanto nronraqama kye tiqata:  
Nrivaqe Kotira nrutu tuaaheraare.

Tire raupirima virera huraro

Kotiva tiri huvantu timwa taihata qio varuro.

Kotira okyaravanto kepukya okyara nraahuma vaiho.

Mwiva kepukyavanto variqaro

kepukyaqa hiqaro variqiro quananrove.

<sup>2</sup> Mwiva ko tiqaro avuqavuma kyeqaro qutaa ko ti varivave.

Papironi mwatukya nronravanto api qaraqiro nrohi vari  
nraakyera votima kyero api qaraqiro nrohi varihata  
ekyaa mwatanaavanto mwiaavata api nrohiqata

uaqiamma quarara tiro, mwia kyaara mwi mwatukyaraqaa

Kotiva qua vatero mwia ntuqutu raupirima kyaiho.

Mwi mwatukyava Kotira kyaiqa vaisi airi ru kyaiharo  
mwia kyara Kotiva mwia nai kyoqaa mwiqanro

mwia ntuqutirave, tita.

<sup>3</sup> Mwihua mwitaa timwa kyeta qaiqaa nronrama kyeta tiqata,  
Nrivaqe tire Kotira nrutu tuaaheraare.

Mwi mwatukyava qia ite variharo mwiqitairo  
qia munravanto ekyaa enta nrivi variananrove, tura.

<sup>4</sup> Mwihua mwi quara mwitaa tuvata nronra vaisi nramwuvata, qati variqi vi varu  
inraikyava taaratana taaratanavata, mwihua mwatasata tumu ntita varuvaro Kotiva  
nai taintaqa mwatakyaa viro varuvata mwihua mwia qamwata mwateta tiqata,  
Quataave. Nrivaqe tirevata Kotira nrutu tuaaheraare, tita.

<sup>5</sup> Mwihua mwitaa tuvaro Kotira tainta nronra taintaqitairo qua  
mpovanto mwitaama tiro:

Nkye Kotira kyaiqa vara mwate varia nraakye  
qorahuave, nkye Kotira nraatu aatu hiqata  
nrohi varia nraakye qorahuave,  
nkye nronra vaisivantove, pata vaisivantove,  
nkye ekyaa Kotira nrutu tuaaheraate, tiro.

### *Nyaamwuni sipisipi nraativanto nraata varovata nronraqama kye kyara nronra*

<sup>6</sup> Quavanto mwitaa tuvana nte variqana rie variavaro airi nraakye qoravanto qua  
tuntema kyero quavanto ti varura. Mwi quava aisaakya nronraqitairo hara hara  
tuntema kyero tiro. Mwi quava nyaanruva nruqua tintema kyero tiqaro mwitaama  
tiro:

Nrivaqe tire Kotira nrutu tuaaheraare.

Tiri nronravanto Kotiva ekyaa inraikya nraatara kyairave.

Mwiva ekyaa inraikyaqa ntaqikyi varivave.

<sup>7</sup> Nrivaqe tire Kotira okyarara kepukya okyarave  
timwaqi viqata mwianra qamwataqi viqata variare.

Sipisipi nraati mwiva nraakye varaari entava qaumato  
vaiho. Mwia mwitai nraakyeva terama teroma variho.

<sup>8</sup> Mwi nraakyerara kyuqe tuavaaqa, egarori tuavaaqa  
takyuqi varira, utute variarive tiro mwia mwinrave, tiro.

Mwia nraata mwiva varirero ekyaa Kotira nraakye qorama  
varita. Tuavaaqa kyuqera egarori mwia okyara vahirero Kotira  
nraakye qoravanto kyuqe kyaiqa varaaavama vahiro.

<sup>9</sup> Mwi quava mwitaa tuvaro nyaamwunyaava nianra tiqaro,  
Mwaa quara mwitaama kyera qara ntumwa taante. Sipisipi nraati  
mwiva nraakye varaani omwatara nranrenra hiro nai nraakye  
qora nyaanrama taarihua, mwi nraakye qorahua qamwateqatama  
varivarave, tiro. Mwitaa timwa kyero mwiva qua mpo  
tiqaro, Mwi quara Kotira qua, qutaa quama vaiho, tiro.

<sup>10</sup> Nyaamwunyaava mwitaa tuvana nte mwia kyuqutarani tumu ntina mwia  
qamwata mwateqana mwia nrutu tuaahererera utuavaro mwiva tiqaro, Qaqao, hia  
mwitaa hiante. Nte i nraantantena Kotira kyaiqa vaisima varuqo. Nte ivata i  
qata vakyaahuavata nraantantena Jesusira qua timwa nyiqi vi varurahuama varuqo.  
E Kotirara nraahu ni mwanriqave tiqarama mwia qamwata mwataante. Kotira  
mwanraquravanto haaru poropeti vaisi kyaahaqama nyate varuvata mwihua Kotira  
qua qovarama kye varurave. Mwia votima kyero Kotira mwanraquravanto tirivata  
kyaahaqama timwa te varihata tire Jesusira qua timwa nyiqi vi varunanrave, tiro.

### *Qosi egarori mwoqaqa mwatakyaa viro varurara tura*

<sup>11</sup> Nyaamwunyaava mwitaa tuvana nte variqana taqaavaro nyaamwuvanto qatua  
vuvaro qosi egarorivanto qovarama viro. Qovarama viro varuvaro mwia mwoqaqa

vaisi mpovanto varuvaro mwi vaisirara Kotirara nraahu rie vari vaisivave timwa kyero, qutaa vaisive tura. Mwi vaisirara mwitaa tuvaro mwi vaisiva mpohuaqa qua vatarero hirove, mpohua rirero hirove, mwiva avuqavuma kyeqaro mwitaa hora.

<sup>12</sup> Mwi vaisiva varirero mwia vuvanto qia votima kyero ite varuvaro mwia qiataqaa nronra vaisi tovaqa airi vahuvaro mwi vaisiraqaa nrutu mpo qara ntumwa tova vahuvaro hia mpovanto mwi nrutura ntapihi kyovaro nai mwi vaisiva nraahu mwi nrutura ntapihi kyora.

<sup>13</sup> Mwi vaisiva nai nraahu naiqaa qara ntumwa to nrutura ntapihiro variqaro vaaqa ututovaro vaaqa mwiva nraanreqi ntamwa kyova vhura. Mwi vaisira nrutu *Kotira Quavantove*, tura.

<sup>14</sup> Mwi vaisira nrutu mwitaama vahuvaro mwiva vi varuvata nyaamwusai ntaquhua mwia kyuquqa vitinteta mwia vataqi viqata mwihuavata qosi ecaroriqaa viqata kyuqe tuavaaqa ecarori tuavaaqa takyuqi varura ututeta vi varura.

<sup>15</sup> Vi varuvaro mwi vaisira nroqitairo paipa vahova nrintero vahuvaro mwi paiparaqotairo ekyaa mwatanaa nraatara kyaariva varura. Mwi vaisiva ekyaa mwatanaa nraatara kyero mwiva qaini kyauru tu varero viqaro mwihuqaa ntaqikyiqiro quananro. Mwiva mwihuqaa ntaqikyiqiro viqaro uaini tamwa tanu nronraqi kyero tatintema kyero mwi vaisiva Kotiva ekyaa inraikya nraatara kye variva, raraqa taani nraakye qorahua ntuququqiro quariva varura.

<sup>16</sup> Mwi vaisiva varuvaro mwia tuavaaqa ututoraqaaavata mwia tukyaqaaavata qua mpo qara ntumwa tova mwitaama tiro:

Ekyaa vunyaa vaisi variavaro

mwaa vaisiva mwihua vunyavaa varirave.

Ekyaa nronra vaisi variavaro

mwiva mwihua nronra vaisi varirave, tiro.

<sup>17</sup> Mwitaa hi varuvana nte taqaavaro nyaamwunyaaisi mpovanto huari vuqisiviro variqaro nronraqama kyero qua tiqaro ekyaa hiteta nrohi varu nyaamwahua nyaanrenro tiqaro, Nkye ekyaa nriate. Kotiva omwata nronra nrainani nrumu nraate.

<sup>18</sup> Nkye nrumu vunyaa vaisi mwamwanta mwati nreta ntaqua vaisihua mwihuqaa nronraqahi vaisira mwamwanta mwati nreta, nronra vaisi mwihua mwamwanta mwati nreta, qosivata mwihuqa mwatakyaaavi varia vaisihuavata, ekyaa mwatanaavata, rupa taa vaisihuavata, qati varia nraakye qorahuavata, nrutu vataa nraakye qoravata, hia nrutu vataa nraakye qoravata, nkye ekyaa mwihua mwihua mwamwanta mwati nrumu nraate, tiro.

<sup>19</sup> Nyaamwunyaaisi vaisivanto mwitaa tuvana nte taqaavata qaakyau vairivavata, mwatani vunyaa vaisinramwuvantovata, mwihua ntaqu vaisihuavata, mwihua kuaaqa ntuvaantuama vita qosiqaa mwatakyaa viro varu vaisira mwiavata, mwia kyuquqa nruhua ntaqu vaisihua mwihuavata, ntaqirerata uti varura.

<sup>20</sup> (Ntaquqi vi varuvaro qosiqaa varu vaisiva mwihua nraatara kyero) qaakyau vairi mwia rupa tero vaisi mpovanto unra tiqaro, Kotira qua qovarama kye varuqo, tu vaisiravata rupa tora. Unra vaisi mwiva vuni qaakyau vairi kyaahaqa hiqaro nraahumwa mpo kyaiqa nronra kyaiqa vare varuvata nraakye qoravanto qaakyau vairi nampaa varohua qaakyau vairi mwanraquhara tiri mwanriqave tiqata qamwata mwatohua, mwihua unra vaisi mwia kyaiqa taqeta qutaama mwiva Kotira qua ti varuvave tura. Unra vaisi mwiavata qaakyau vairi mwiavata hia ru kyaraitiro, mwitanahua qia nronraqama kyero itoraqi tuto kyovatatana mwiqi varura. Mwi qiaava ite varuvaro mpoqama kyero nriqiqi viqaro munravanto ukavi varu qiaava vhura.

<sup>21</sup> Mwitanahua qiaqi tuto kyero qosiqaa varu vaisiva uro ntaquqi viro mwitanahua kyuquqaa vitinto vaisihua ruqiro viro nai paipa, nroqitairo nru paiparaqotairo,

mwihua ru taiqa kyovaro nyaamwa ekyaa mwihua nrumu mwihua mwamwanta mwati toqa ntupepaama kyeta nkyiari nraataa huntema nramwa vura.

## 20

### *Saataaninra 1,000 ihiara rupa tairaro varianinranra tura*

<sup>1</sup> Mwitaa huvana nte variqana taqaavaro nyaamwunyaa vaisi mpovanto nyaamwusairo kiqa mpo, mupi nronra qesa qatuaa kigara nai kyauquqi tu varero seni muaanrantora, mwiavata tu varero tuminro.

<sup>2</sup> Mwiva tumu evari nronra votihura qora inraikya mwia ntavaaqavu kyora. Evari qarura uaqiahuva mwiva haaru varuvave. Mwiva Saataaniva Kotira nramwutaavanto varuvaro mwia ntavaaqavu kyero mwia rupa taariro 1,000 ihiara karavuqi variarive timwa kyero, seniqotairo mwia rupa kyora.

<sup>3</sup> Rupa kyero mupi nronraqi mwia mwaamwi tuto kyero mwianra 1,000 ihiara mwipi variqaro hia qaiqaa mwaanri ntero nraakye qora unra qiarive tiro, qesa mwia tita tero roki ruteru qumeqo taaqau tora. Nte ruvaatakyaa nraakiara qovara hianinra taqaavarave. Nraakiara Saataaninra rupa tairaro mwiva 1,000 ihiara karavuqi variqiro uro taiqa kyairaro mwi entaraqaatairo Saataaninranra mwiva mpo enta pata entanramwu qatinani mwaanri ntero nrohiarive tiro, mwia huvantu kyaananrove.

<sup>4</sup> Nte ruvaatakyaa taqaavaro tainta nronra mpo tainta mpo taintavanto vahuvata mwiaqaa nronraqama vu vaisihua mwatakyaa vita varura. Mwi vaisinramwuhua ko qiate tiro, nronraqama kyovata varuvana nte mwihua taqeqlana nraakye qora mwanraqura airivata taqaavara. Mwi nraakye qorahua mwatani varu entara Iesusirara nraakye qora timwa nyiqata Kotira qua ti varuvata mwia kyaara mwihua nyunta teqa kyora. Mwi nraakye qorahua mwatani variqatama hia qaakyau vairivata mwia mwanraquharavata qamwateta tiri mwanriqave tiraitita, nkyiari kyauquqaavata tiriqaavata hia mwia nampaa varora. Nte taqaavata mwi nraakye qorahua qaiqaa qati sivita variqata Karaisiravatamakyne mwaa mwataraqaa ntaqikyiqi viqata 1,000 ihiara variqi vura.

<sup>5</sup> Mwi nraakye qorahua qaiqaa qati sivi variqata mwitaamaqi vuvata hini nraakye qora qutu vuhua hia siviraitita, qati nraahu variqi vuvaro 1,000 ihi nritarovata mwihuavata qaiqaa qati sivita nrohi varura. Vaakya tu nraakye qorahua nraakiara mwihua nraante qaiqaa qati sivi variqi vi vari nraakye qorahuama varivara.

<sup>6</sup> Tahuave varivaro Kotiva mwihua nraante sivuma kyaarihua mwihua qamwateqata varivaro Kotiva mwihua kyuqema nyatairata varivarave. Mwihua kepukyavanto qio vahiraro qaiqaa mwihua qutu viva hiama qio vahiananro. Mwihua qaiqaa qutu viva hia qioqahirata mwihua Karaisiravata 1,000 ihiara ntaqikyiqi viqata Kotiravata Karaisiravata kyaiqa varaqi vivara.

### *Saataaninra ekyara nraatara kyaaninranra tura*

<sup>7</sup> Nraakiara Saataaniva 1,000 ihiara karavuqi variqi viro uro taiqa kyairaro mwia huvantu kyairaro

<sup>8</sup> mwiva veva ntero pataqiara qatinani variqaro uro ekyaa mwatanaa unra qua tirata mwihua mwia quara qutaave tivara. Nraakiara mwi entara mwatani varihua mpo mwatanaa Nkoku mwatanaahua varivata mpo mwatanaahua Menkoku mwatanaahua varivara. Mwi mwatanaahua variqata mwihua Saataaninra quara qutaa quave tivaro Saataaniva ntaqirero mwi mwatanaahuatana ntuvantua tairata mwihua nramanri nronra tokyasataa nruqa vahira mwia votima kyeta vaisi airintivanto ntuvantua hivarave.

<sup>9</sup> Nte ruvaatakyaa taqaavata mwi mwatanaahua Kotira nraakye qoravata ntaqirerata uti variqata ekyaa mwata maata variqi viqata uro Kotira nraakye qora ututuma kyeta Kotira mwutukya vahi mwatuqyara mwiavata ututuma kye varura.

Nkoku mwatanaa mwihuavata Menkoku mwatanaa mwihuavata Kotira nraakye qora ututuma kye mwihua rirera huvaro nyaamwusairo qavanto tumu mwihua itamwa taiqa tuto kyora.

<sup>10</sup> Mwihua taiqa kyovaro Saataaniva mwihua unra utu nyatova varuvaro mwiaavata vara kyero qia ori egaroripaatairo ite varuraqi tuto kyora. Vuni qaakyau vairivata unra qua tiqaro, Kotira qua qovarama kye varuvave, tu vaisiravata tuto kyoraqi Saataaninravata tuto kyora. Nraakiara mwinramwuhua mwi qiaava itaaninraqi variqi viqata iheravata entaqivata ekya enta atura ntumwaqi vivara.

### *Kotiva ekyaara entaqaa variqaro ko qianinranra tura*

<sup>11</sup> Nte ruvaatakyaa taqaavaro tainta nronra egarori tainta vahuvaro mwiaqaa mpovanto mwatakyaa viro varura. Mwiva tainta mwiaqaa mwatakyaa viro varuvaro nyaamwuvantovata mwatavantovata tiqaro, Hiama qio mwia vuqaa varianinrave, timwa kyero aatu ntuqema kyero vivuvaro hia mpinqiavantovata mwia qaiqaa taqora.

<sup>12</sup> Mwitaa huvana nte taqaavata nraakye qora qutu vuhua nrutu nronra vataahuave, pata nrutu vataahuave, mwi taintara vuqaa sivita varura. Qutu vuhua tainta mwia vuqaa sivita varuvaro taintaqaa mwatakyaa viro varuva mpuku vara kyero mpo mpuku mpo mpuku iritero variqaro mpuku mpo, mwiqi ekya enta qati variqi vi nraakye qorahua nyutu vahu mpukura, iri kyero ko timwaqiro vura. Qutu vuhua mwatani qati varu entara mpo kyaiqa mpo kyaiqa vare varu quara mwi mpukuraqi mwi mpukuraqi qara ntumwa tovaro vahuvaro taintaqaa mwatakyaa viro varuva mpukuqi qara ntumwa to quara rieqaro ko timwaqiro vura.

<sup>13</sup> Mwiva ko timwaqiro vuvata kyaarera nronraqi ntaqutu vu nraakye qorahua mwiqitai qovarama vita uro tainta mwia vuqaa varuvata qutu quahua uro varia mwatukyaraqitaivata nraakye qora qovarama vita uro mwi taintara vuqaa varuvaro taintaqaa mwatakyaa viro varuva mwihua qati varu entara kyaiqa vare varurara rieqaro ko timwaqiro vura.

<sup>14</sup> Mwiva ko timwaqiro viro uro taiqa kyero mwiaqatairo qutu vuhuavata, qutua okyararavata, qia nronra itoraqi vara mwaamwi tuto kyora. Nraakiara Kotiva qia nronra itaaninraqi tuto kyairata mwihua mwi entara tiqata, Po, mate ekyaarama qutu vuro, tivara.

<sup>15</sup> Tainta nronraqa mwatakyaa viro varuva variqaro taqovaro ta nraakye qorahuave nyutu hia mpukuqi ekya enta qati variqi vi nraakye qorahua nyutu qara ntumwa to mpukuraqi vahuvaro mwia qia nronra itoraqi vara mwaamwi tuto kyora.

## 21

### *Nyaamwu qaraakyavata mwata qaraakyavata qovarama quaninranra tura*

<sup>1</sup> Mwitaa huvana nte taqaavaro nyaamwu qaraakyavantovata mwata qaraakyavantovata vhura. Nyaamwu haaruaavavata mwata haaruaavavata ekyaara vivuvaro kyaarera nronravantovata hia vhura.

<sup>2</sup> Mwitaa huvana nte taqaavaro Kotiva hunasairo nyaamwusairo mwatukya kyuqeva, hia mwiqi uaquia hi inraikyavavata vahu mwatukyava, qaraakya Ierusaremi-vanto tumi varura. Nraakyevanto nai vaati vararerera hiro nai mwamwanta mwunruqama taintema kyero mwi mwatukyava tumi varuvana

<sup>3</sup> nte riaavaro tainta nronraqaatairo quavanto mwitaama tiro: Mwaa entaraqaatairo Kotiva nai nraakye qora kyapata variqiro quananrove. Mwiva mwihua kyapata variqiro virata mwihua mwia nraakye qorama varivarave. Kotiva naivanto mwihua kyapata variqiro virata mwihua mwianra tiri mwanriqave tivarave.

<sup>4</sup> Mwihua varivararo mwiva mwihua nruqunru nruka nyatairata mwihua qio variqata hia qaiqaa qutiraitita, hia ntataraitita, hia mwutukya uaqahirata variraitita, hia

nriqavira inraikya vararaitita, kyuqema kye variqi vivarave. Haaruua okyara taiqa virara tita, mwihua mwitaamaqita vivarave, tiro.

<sup>5</sup> Quavanto mwitaa tuvaro tainta nronraqa mwatakyaa viro varuva tiqaro, Nte mate ekyaa inraikya qaraakyaqama kyarerave, tiro. Timwa kyero nianra tiqaro, Mwaa quava qutaa qua vaiharo mpovanto qio mwi quara riemwaqiro quaninranra tira, e mwaa quara qara ntumwa taante, tiro.

<sup>6</sup> Mwitaa timwa kyero mwiva qaiqaa tiqaro, Qio nte mwi kyaiqara taiqama kyauqo. Nte haaru vuni variavavama varuqo. Nte nraakiara ekyaarara vitinivata variarivama varuqo. Vaisi mpovanto nramanri nraataa hirera, nte nrumwuqitairo qati variqiro quani nramanrinra, mwia mwiqanama hia kyoqaara nyaanru hiraitina, qati mwianrinro nrenro mwiva qati variqiro quananrove.

<sup>7</sup> Vaisivanto uaquia hi kyaiqaravata ntaquqiro viro qio nraatara kyaariva, mwivama nte hiani inraikyara qio varaananrove. Nte mwihua mwanriqavanto variarita mwihua ni maaqu naamwunra varivarave.

<sup>8</sup> Mpo hia nraakye qorahua ni kyaiqa nraatu aatu hiqata ni pataqi nria aanranra qaqlira kyaahuave, hia nianra riemwaqita vihuave, mwaaku kyaiqa uti varihuave, hena vaisi ru kyehuave, api qaraqita nrohi varihuave, qumina unra inraikyara tiri mwariqave tiqata qamwata mwate varihuave, ekyaa unra qua ti varihuave, ekyaa mwi kyaiqara mwi kyaiqara uti varihua qia nronravanto ori eqaroriqaatairo itaaninraqi vivarave. Mwihua mwini uro variqata, Qikye, ekyaarama qutu vuro tivarave, tiro.

### *Qaraakya Ierusaremianra tura*

<sup>9</sup> Mwitaa huvaro nyaamwunyaahua 7 nramwu mwihua nraakye qora ekyara uaqlama nyatarera hu inraikyara tanu 7 nramwu piqa kyeta tutoraqitairo mpovanto nte hiavanani nri ntero nianra tiqaro, Nrinraqe nte sipisipi nraati mwiva varaani nraakyera i nraamwu taarira taqaante, tiro.

<sup>10</sup> Mwita tuvaro Kotira mwanraquravanto kepukyaqama kyero nivata varuvana nte variavaro nyaamwunyaava mwiva ni pita varero taaqi nronra mpo nritaroraqaa uro kyero ni naamutovana nte taqaavarao Ierusaremi kyuqera hia mwipi qora inraikyavanto vahu mwatukyaya tumiqanro Kotiva varura nyaamwusairo tumi varura.

<sup>11</sup> Mwi mwatukyaya tumi varuvaro Kotira peqa okyaravanto mwi mwatukyaraqitairo takyuqi varuvaro tuminro. Mwi mwatukyaya takyuqiqaro nronra munima kyaani orira voti hira mwia nrutu *iasipaa* ori votima kyero takyuqiqaro karaasi votima kyero itero ante anta hi varura.

<sup>12</sup> Mwi mwatukyara vasaamwunra vahirero nronra nritarero vahuvaro mwia qesa 12 nramwu vahuvata nyaamwunyaahua 12 nramwuvanto mwi quesara kuaa kuaaqa ntaqikyi varuvaro qesa mwiaqaa Isareri okyara 12 nramwu nyutu qara ntumwa tovaro vhura.

<sup>13</sup> Mwi mwatukyara vasaamwunra riqanani taarampo qesa vahuvaro kyaavani taarampo qesa vahuvaro vetara hini taarampo qesa vahuvaro mwaa hini taarampo qesa vhura.

<sup>14</sup> Vasaamwunra mwia vara ututu qesa 12 nramwu mwitaama vahuvaro ori 12 nramwuqa vasaamwunra mwia ratova ori mwinramwunraqa sipisipi nraati mwiva nronraqama kyo vaisihua 12 nramwu nyutu qara ntumwa tovaro vhura.

<sup>15</sup> Mwitaama vahuvaro nianra qua ti varu vaisiva nyaamwunyaaisivanto variqaro mwataani kyaamwunra koriqotairo ututora nai kyauquqi tutoero mwi mwatukyaraqavata, mwi mwatukyara qesavata, mwi mwatukyara vasaamwunravata, mwatarero uti varura.

<sup>16</sup> Mwi mwatukyava vahirero kyaava riqana nraantera hini hini mwinramwuva kuaaqarama vhura. Mwitaama vahuvaro nyaamwunyaa vaisivanto mwi mwatukyara mwatama kyero taqovaro vasaamwunra hinisataa 2,200 kiromitaa vahuvaro mwatukyaya mwia virinivata mpianivata mwatama kye taqovaro 2,200 kiromitaa kuaa qarama kyero vhura.

<sup>17</sup> Mwitaama vahuvaro nyaamwunyaa vaisivanto vasaamwunra mwia mwatama kye taqovaro mwia mpuahaa mwiva 144 mitaa vhura. Vaisivanto kyairiqa vara kyero mwataara hi varintema kyero nyaamwunyaa vaisivanto mwi mwatukyara mwatama kye taqero mwi quara timwa mpuvana nte riaavarave.

<sup>18</sup> Vasaamwunra mwia *iasipaa* oriqtairo ututova vahuvaro mwatukyaya utaqi vahu nraamwunra *kori* oriqtairo ututovaro karaasivanto itero ante anta hintema kyero itero ante anta hiqaro vhura.

<sup>19</sup> Mwitaama vahuvaro vasaamwunra mwemwani vahu orira munima nronraqama kyaani orira mpo ori mpo ori mwunruqama tova *iasipaa* ori vahuvaro mwiaqaa nampa 2 ori kukyanumwu votihuva *sapaia* ori vahuvaro mwiaqaa nampa 3 ori egarori votihura aketi ori vahuvaro mwiaqaa nampa 4 ori vuhanaa votihuva emaraari ori vahuvaro

<sup>20</sup> mwiaqaa nampa 5 ori nraanrevata egarorivata vahu orira *sontonisiki* ori vahuvaro

mwiaqaa nampa 6 ori nraanre ori *koniriani* ori vahuvaro

mwiaqaa nampa 7 ori qaamiantaqatova *karisoriti* ori

vahuvaro

mwiaqaa nampa 8 ori kyatari mwanre votihura *mperiri* ori

vahuvaro

mwiaqaa nampa 9 ori *topaasi* ori vahuvaro

mwiaqaa nampa 10 ori korisopareri ori vahuvaro

mwiaqaa nampa 11 ori qia votihura *haiasini* ori vahuvaro

mwiaqaa nampa 12 ori nraanre votihura *ametisi* ori vhura.

<sup>21</sup> Ori 12 nramwu vahuvaro qesa 12 nramwu kyau mwukyaari voti huvave, kinaa voti huvave, vhura. Hia kinaa pataqiani vara kyero tomaqa kyeqaro qesa mwia utiraitiro, kinaa nronra kuaikuqo qesa mwia utuqiro viro ekyaa qesa 12 mwinramwunra taiqa kyora. Qesavanto mwitaama vahuvaro mwi mwatukyaraqi vahu aanrava koriqo ututovaro karaasi nraantantoraqitai vutura hinivata qio taqe inraikyava vhura.

<sup>22</sup> Mwi mwatukyaraqi vahu aanrava mwitama vahuvana nte taqaavararo Kotira qamwata mwate nraamwuva hia vhura. Kotiva ekyaa inraikya nraatara kye variva mwivavata, sipisipi nraati mwivavata, mwitanahua mwi nraamwuva varura.

<sup>23</sup> Mwi mwatukyava vahuvaro Kotira peqa okyaravanto itero takyuqiqaro ntuvaahe varuvaro sipisipi nraati mwiva omwa votima kyero ite varuvarora tiro, huarivavata toravantovata hia mwia kyaiqa vhura.

<sup>24</sup> Nraakiara mwi mwatukyava qovarama virata ekyaa mwatanaa nrohivaro mwi mwatukyava ntuvahairata nrohi varirave. Mwihua mwitaama kye nrohi varivata mwatani vunyaa vaisinramwuvanto nkyiari kyuqe inraikya vatera varaqita uro mwi mwatukyaraqi kyevarave.

<sup>25</sup> Mwihua nkyiari vate inraikyara varaqita uro kyeta varivararo qaataaninraqa mwi mwatukyara quesavanto qati nraahu qatua viro vahiraro mwini hia enta hianinranra tiro, hia mwi gesara titi taananrove.

<sup>26</sup> Mwi mwatukyara qesa qati qatuaviro vahirata ekyaa mwatanaavanto nkyiari vatera kyuqe inraikya varaqita mwipi qio uro kyevarave.

<sup>27</sup> Mwi inraikyara mwi inraikyara uro kyeqatama kyuqe inraikya nraahuma uro kyevara. Mpo inraikya qora inraikyavanto hiama mwi mwatuqyaraqi viqetaananro. Vaisivanto kyaurira kyaiqa varaarivave, unra qua qiarivave, ekyaa mwitaa hi vaisihua hiama mwi mwatuqyaraqi viqetevare. Sipisipi nraati mwia mpukuqi ekyaa enta qati variqi vi nraakyе qorahua mwihua nyutu qara ntumwa tai nraakyе qorahua, mwihua nraahuma mwi mwatuqyaraqi qio viqetevare.

## 22

### *Qati variqi vi nramanrinranravata qati variqi vi kyatariraravata tura*

<sup>1</sup> Nyaamwunyaa vaisivanto mwi mwatuqyara ninaamutero mwiva nramanri mpo ni naamutovana taqaavara. Mwi nramanriva, qati variqiro vi vari nramanriva, kyuqema kyero takyuqiro itero ante anta hiqaro Kotiravata sipisipi nraati mwitana taintaqitairo tumi varura.

<sup>2</sup> Mwi nramanriva mwiaqitairo viqaro mwi mwatuqyara aanra utaqaa vi varuvaro nramanri tokya hini hini kyatari, qati variqi vi variva vahura. Mwi kyatariva kuaa ihi mwipi kuaa tora kuaa tora tamwa rieqaro 12 nani tamwa riemwaqiro vivi hora. Mwi kyatarira mwanrevanto ekyaa mwatanaahua hemwaa votima kyero mwihua kyuqema nyataariva vahura.

<sup>3</sup> Kotiva uaqlama quarive qari inraikyava hiama mwi mwatuqyaraqi vahiananro.

Mwi mwatuqyaraqi Kotiravata sipisipi nraativata mwitanahua taintama vahiananro. Mwi taintava mwi mwatuqyaraqi vahirata Kotira kyaiqa vaisi mwia nraakyе qora, mwihua Kotirara tiri mwanriqave tiqatama qamwata mwatevara.

<sup>4</sup> Mwihua mwianra qamwataqi viqata mwia viri taqamwaqi vi varivaro Kotira nrutu mwihua tiriqa qara ntumwa tairaro vahiananro.

<sup>5</sup> Mwihua mwitaama kyeta Kotirara qamwataqita vivaro hiama mwini enta hinanro. Nronravanto Kotiva mwihua ntuvahama nyate varianinranra tiro, huarivantovata omwavantovata hiama mwia kyaiqa vahiananro. Kotiva mwihua ntuvahama nyatairata mwihua vunyaa nraakyе qora variqata ekyaa enta ntaqikyiqita vivara.

### *Iesusiva uro ntantero tumuaninranra tura*

<sup>6</sup> Nyaamwunyaa vaisivanto qaiqaa nianra tiqaro, Mwaa quava qutaa quama vaiho. Qioma vaisi mpovanto mwi quara riemwaqiro quananrove. Nronravanto Kotiva nai mwanraqura poropeti vaisi nyuvaro mwiva mwihua kyaahaqa hi varuvata mwihua Kotira qua qovarama kye varurave. Kuaa qarama kyero Kotiva matevata nai kyaiqa vaisiara mwihua nraakiara pataqia vari kyero qovara hianinra ntapihi kyeta riaate tiro, nyaamwunyaa vaisi mpo titairave, tura.

Mwiva mwita tuvana nte Ioniva ruvaatakyaa nraakiara ekyaa mwi inraikyava qovara hianinra taqaavara.

<sup>7</sup> Iesusiva mwitaama tiro: Nte nkye hinani qamwanrama uro ntantena tumuaninrave. Mwaa mpukuraqi nraakiara qovara hianinra qara ntumwa taurave. Mwi quara riemwaqiro quariva variraro Kotiva mwia kyuqema mwatananrove, tura.

<sup>8</sup> Nte Ioniva ruvaatakyaa mwi inraikyara riena mwi inraikyara taqaavara. Nte mwi inraikyara rie taqe hina mwiaqatai nyaamwunyaa vaisivanto ni naamutora mwia kyuqutarani tumu ntina mwia nrutu tuaahererera uti variavaro

<sup>9</sup> mwiva qaqao tiro, Hia ni nutu tuaaheraante. Nte i voti huva Kotira kyaiqa vaisima varuqo. I qata vakyaahuave, poropeti vaisive, mwaa mpukuraqi qara ntumwa tai quara riaa nraakyе qorahuave, nte mwihua votima kyena Kotira kyaiqa vaisima varuqo. E Kotirara nraahu ni mwanriqave timwa kyera mwia nraahu qamwata mwataante, tiro.

<sup>10</sup> Mwitaa timwa kyero qaiqaa tiqaro, Mwaa quara nraakiara qovara hianinra qovarama kyauqara qara ntumwa taananra hia uqeta taante. Ekyaa mwi quava quataa qovara hiari entava qaumato vahirara tira, e hia uqetataante.

<sup>11</sup> Qora kyaiqa utuani vaisira qati kyairaro mpoqiaavata qora kyaiqa utuqiro quarive. Api nrohiani vaisira qati kyairaro api nrohiani kyaiqara mpoqiaavata utuqiro quarive. Kyuqe kyaiqa varaani vaisira qati kyairaro kyuqe kyaiqa nraahu mpoqiaavata varaqiro quarive. Kotira kyaiqa nraahu varaani vaisira qati kyairaro Kotira kyaiqa nraahu varaqiro quarive, tura.

<sup>12</sup> Iesusiva mwitaama tiro: Riaate, nte qamwanrama uro ntantena tuminrenrave. Nte mwi entara nraakye qora nyianri inraikyara varena nraakye qora mwihua nkyiari kyaiqa kuaiqia kuaiqiaqta qeqana kyoqaa nyianinrave.

<sup>13</sup> Nte haaru vuni variavavama varuqo. Nte nraakiara ekyaarara vitinivata variavama varuqo. (Nte nraahuma okyaranivata mwutunivata varuvama varuqo.)

<sup>14</sup> Nraakye qora nkyiari tuavaaqa kyuqema kye hiqama tehua, mwihua qamwateqata varivarave. Ekyaa enta qati variqi vi kyatari tamwanra mwi nraakye qorhua qio hiqu kye varevama vahiananrove. Mwi nraakye qorhua qioma Kotira mwatukya qesa qatua kye vera ntevama vahiananrove.

<sup>15</sup> Mwihua mwi mwatukyaraqi varihua varivaro mpohua mwi mwatukyaraqi viva hiama qio vahiananrove. Mwihua mwaqaqani vairi votima kyeta varivarave. Tuhive haaqa quaakyara kyaiqa vare varihuave, nraakye qora api qaraqita nrohi varihuave, vasisru kyehuave, unra inraikyara tiri mwanriqave tiqata qamwata mwate varihuave, unra quavata unra kyaiqavata vare varihuave, mwihua hia Kotira mwatukyqaq viraitita, mwaqaqani varivarave.

<sup>16</sup> Nte Iesusiva Kotira nraakye qora mpoqi mpoqi variahua, mwihua mwi quara riaate tinama, nte nyaamwunyaa vaisi mpo titauqaroma mwi quara mwihua timwa nyiho. Nte Ntevitira okyara kuaa okyaravantoma varuqo. Itataraaravanto qaatastarera hinani itaira nte mwia votima kyena iteqana ntuvaahe varuvama varuqo, tiro.

<sup>17</sup> Kotira mwanraquhavantovata sipisipi nraativanto varaari nraakyeavata mwianra tumuantema, tita. Mwitanahua mwitaa ti variarara tita, nkye mwaa quara riehuavata Iesusirara tumuante qiata. Tavave nramanri nraataa iharo variho? Nrinra hia kyoqaa hiraitira, qati vara kyera nraante.

### *Ekyara qua tura*

<sup>18</sup> Nte Ionivama tina. Nraakiara qovara hiani quara qara ntumwa taura nkye mwi quara riehuara tirera. Nte nkyiara kepuqyaqama kyena mwitaama tina, Vaisi mpoqavanta nte tu quaraqa mpo qua tomaqa taakyorave. Mwiva mwitaa hirera, qora inraikya qovara hininranra mwaqaq tura, Kotiva ekyaa mwi inraikyara mwi vaisiraqaa vataananrove.

<sup>19</sup> Nraakiara qovara hiani quara nte qara ntumwa tauraqatairo mpovanto mpo qua vara qatinani kyaankyorave. Mwiva mwi quara vara qatinani kyairera, Kotiva mwi vaisirara hiama mwiva ekyaa enta qati variqi vina kyatari tamwanra nrenanrave qiananrove. Mwiva hiama ni mwatukya kyuqeraqi quananrove, qiananrove. Nte kyatari mwianravata, mwatukya mwianravata, mwaa mpukuraqi qara ntumwa taurave.

<sup>20</sup> Ekyaa mwi quara mwi quara qovarama kyai vaisiva, Iesusiva, nai kyauqu nriqiqaa vateqaro mwataama tiro, Nte quataama tuqo. Nte qamwanrama kye uro ntantena tumuaninrave, turave.

Iesusiva mwitaa tihana nte tiqana, Qutaama tira hiaro. Nronrao, Iesusio, e tumuante, tuqo.

<sup>21</sup> Nkye varivaro tiri vunyaa vaisi Iesusiva nkyivata variqaro nkyi kyuqemaqiro quarive. Qutaave.

## Read the New Testament daily

*January*

date	Scripture
1	Matiu 1:1-2:12
2	Matiu 2:13-3:6
3	Matiu 3:7-4:11
4	Matiu 4:12-25
5	Matiu 5:1-26
6	Matiu 5:27-48
7	Matiu 6:1-24
8	Matiu 6:25-7:14
9	Matiu 7:15-29
10	Matiu 8:1-17
11	Matiu 8:18-34
12	Matiu 9:1-17
13	Matiu 9:18-38
14	Matiu 10:1-23
15	Matiu 10:24-11:6
16	Matiu 11:7-30
17	Matiu 12:1-21
18	Matiu 12:22-45
19	Matiu 12:46-13:23
20	Matiu 13:24-46
21	Matiu 13:47-14:12
22	Matiu 14:13-36
23	Matiu 15:1-28
24	Matiu 15:29-16:12
25	Matiu 16:13-17:9
26	Matiu 17:10-27
27	Matiu 18:1-22
28	Matiu 18:23-19:12
29	Matiu 19:13-30
30	Matiu 20:1-28
31	Matiu 20:29-21:22

*February*

date	Scripture
1	Matiu 21:23-46
2	Matiu 22:1-33
3	Matiu 22:34-23:12
4	Matiu 23:13-39
5	Matiu 24:1-28
6	Matiu 24:29-51
7	Matiu 25:1-30
8	Matiu 25:31-26:13
9	Matiu 26:14-46
10	Matiu 26:47-68
11	Matiu 26:69-27:14
12	Matiu 27:15-31
13	Matiu 27:32-66
14	Matiu 28:1-20
15	Maaki 1:1-28
16	Maaki 1:29-2:12
17	Maaki 2:13-3:6
18	Maaki 3:7-30
19	Maaki 3:31-4:25
20	Maaki 4:26-5:20
21	Maaki 5:21-43
22	Maaki 6:1-29
23	Maaki 6:30-56
24	Maaki 7:1-23
25	Maaki 7:24-8:10
26	Maaki 8:11-9:1
27	Maaki 9:2-29
28	Maaki 9:30-10:12

date	Scripture
1	Maaki 10:13-31
2	Maaki 10:32-52
3	Maaki 11:1-26
4	Maaki 11:27-12:17
5	Maaki 12:18-37
6	Maaki 12:38-13:13
7	Maaki 13:14-37
8	Maaki 14:1-21
9	Maaki 14:22-52
10	Maaki 14:53-72
11	Maaki 15:1-47
12	Maaki 16:1-20
13	Ruku 1:1-25
14	Ruku 1:26-56
15	Ruku 1:57-80
16	Ruku 2:1-35
17	Ruku 2:36-52
18	Ruku 3:1-22
19	Ruku 3:23-38
20	Ruku 4:1-30
21	Ruku 4:31-5:11
22	Ruku 5:12-28
23	Ruku 5:29-6:11
24	Ruku 6:12-38
25	Ruku 6:39-7:10
26	Ruku 7:11-35
27	Ruku 7:36-8:3
28	Ruku 8:4-21
29	Ruku 8:22-39
30	Ruku 8:40-9:6
31	Ruku 9:7-27

date	Scripture
1	Ruku 9:28-50
2	Ruku 9:51-10:12
3	Ruku 10:13-37
4	Ruku 10:38-11:13
5	Ruku 11:14-36
6	Ruku 11:37-12:7
7	Ruku 12:8-34
8	Ruku 12:35-59
9	Ruku 13:1-21
10	Ruku 13:22-14:6
11	Ruku 14:7-35
12	Ruku 15:1-32
13	Ruku 16:1-18
14	Ruku 16:19-17:10
15	Ruku 17:11-37
16	Ruku 18:1-17
17	Ruku 18:18-43
18	Ruku 19:1-27
19	Ruku 19:28-48
20	Ruku 20:1-26
21	Ruku 20:27-47
22	Ruku 21:1-28
23	Ruku 21:29-22:13
24	Ruku 22:14-34
25	Ruku 22:35-53
26	Ruku 22:54-23:12
27	Ruku 23:13-43
28	Ruku 23:44-24:12
29	Ruku 24:13-53
30	Ioni 1:1-28

date	Scripture
1	Ioni 1:29-51
2	Ioni 2:1-25
3	Ioni 3:1-21
4	Ioni 3:22-4:3
5	Ioni 4:4-42
6	Ioni 4:43-54
7	Ioni 5:1-23
8	Ioni 5:24-47
9	Ioni 6:1-21
10	Ioni 6:22-40
11	Ioni 6:41-71
12	Ioni 7:1-29
13	Ioni 7:30-52
14	Ioni 7:53-8:20
15	Ioni 8:21-30
16	Ioni 8:31-59
17	Ioni 9:1-41
18	Ioni 10:1-21
19	Ioni 10:22-42
20	Ioni 11:1-53
21	Ioni 11:54-12:19
22	Ioni 12:20-50
23	Ioni 13:1-30
24	Ioni 13:31-14:14
25	Ioni 14:15-31
26	Ioni 15:1-27
27	Ioni 16:1-33
28	Ioni 17:1-26
29	Ioni 18:1-24
30	Ioni 18:25-19:22
31	Ioni 19:23-42

date	Scripture
1	Ioni 20:1-31
2	Ioni 21:1-25
3	Kyaiqa Varora 1:1-26
4	Kyaiqa Varora 2:1-47
5	Kyaiqa Varora 3:1-26
6	Kyaiqa Varora 4:1-37
7	Kyaiqa Varora 5:1-42
8	Kyaiqa Varora 6:1-15
9	Kyaiqa Varora 7:1-29
10	Kyaiqa Varora 7:30-50
11	Kyaiqa Varora 7:51-8:13
12	Kyaiqa Varora 8:14-40
13	Kyaiqa Varora 9:1-25
14	Kyaiqa Varora 9:26-43
15	Kyaiqa Varora 10:1-33
16	Kyaiqa Varora 10:34-48
17	Kyaiqa Varora 11:1-30
18	Kyaiqa Varora 12:1-23
19	Kyaiqa Varora 12:24-13:12
20	Kyaiqa Varora 13:13-41
21	Kyaiqa Varora 13:42-14:7
22	Kyaiqa Varora 14:8-28
23	Kyaiqa Varora 15:1-35
24	Kyaiqa Varora 15:36-16:15
25	Kyaiqa Varora 16:16-40
26	Kyaiqa Varora 17:1-34
27	Kyaiqa Varora 18:1-21
28	Kyaiqa Varora 18:22-19:12
29	Kyaiqa Varora 19:13-41
30	Kyaiqa Varora 20:1-38

date	Scripture
1	Kyaiqa Varora 21:1-16
2	Kyaiqa Varora 21:17-36
3	Kyaiqa Varora 21:37-22:16
4	Kyaiqa Varora 22:17-23:10
5	Kyaiqa Varora 23:11-35
6	Kyaiqa Varora 24:1-27
7	Kyaiqa Varora 25:1-27
8	Kyaiqa Varora 26:1-32
9	Kyaiqa Varora 27:1-20
10	Kyaiqa Varora 27:21-44
11	Kyaiqa Varora 28:1-31
12	Romeni 1:1-17
13	Romeni 1:18-32
14	Romeni 2:1-24
15	Romeni 2:25-3:8
16	Romeni 3:9-31
17	Romeni 4:1-12
18	Romeni 4:13-5:5
19	Romeni 5:6-21
20	Romeni 6:1-23
21	Romeni 7:1-14
22	Romeni 7:15-8:6
23	Romeni 8:7-21
24	Romeni 8:22-39
25	Romeni 9:1-21
26	Romeni 9:22-10:13
27	Romeni 10:14-11:12
28	Romeni 11:13-36
29	Romeni 12:1-21
30	Romeni 13:1-14
31	Romeni 14:1-23

date	Scripture
1	Romeni 15:1-21
2	Romeni 15:22-16:7
3	Romeni 16:8-27
4	1 Korinti 1:1-17
5	1 Korinti 1:18-2:5
6	1 Korinti 2:6-3:4
7	1 Korinti 3:5-23
8	1 Korinti 4:1-21
9	1 Korinti 5:1-13
10	1 Korinti 6:1-20
11	1 Korinti 7:1-24
12	1 Korinti 7:25-40
13	1 Korinti 8:1-13
14	1 Korinti 9:1-18
15	1 Korinti 9:19-10:13
16	1 Korinti 10:14-11:1
17	1 Korinti 11:2-16
18	1 Korinti 11:17-34
19	1 Korinti 12:1-26
20	1 Korinti 12:27-13:13
21	1 Korinti 14:1-17
22	1 Korinti 14:18-40
23	1 Korinti 15:1-28
24	1 Korinti 15:29-58
25	1 Korinti 16:1-24
26	2 Korinti 1:1-11
27	2 Korinti 1:12-2:11
28	2 Korinti 2:12-17
29	2 Korinti 3:1-18
30	2 Korinti 4:1-12
31	2 Korinti 4:13-5:10

date	Scripture
1	2 Korinti 5:11-21
2	2 Korinti 6:1-13
3	2 Korinti 6:14-7:7
4	2 Korinti 7:8-16
5	2 Korinti 8:1-15
6	2 Korinti 8:16-24
7	2 Korinti 9:1-15
8	2 Korinti 10:1-18
9	2 Korinti 11:1-15
10	2 Korinti 11:16-33
11	2 Korinti 12:1-10
12	2 Korinti 12:11-21
13	2 Korinti 13:1-14
14	Karesia 1:1-24
15	Karesia 2:1-16
16	Karesia 2:17-3:9
17	Karesia 3:10-22
18	Karesia 3:23-4:20
19	Karesia 4:21-5:12
20	Karesia 5:13-26
21	Karesia 6:1-18
22	Epesaasi 1:1-23
23	Epesaasi 2:1-22
24	Epesaasi 3:1-21
25	Epesaasi 4:1-16
26	Epesaasi 4:17-5:2
27	Epesaasi 5:3-33
28	Epesaasi 6:1-24
29	Piripai 1:1-26
30	Piripai 1:27-2:18

date	Scripture
1	Piripai 2:19-3:6
2	Piripai 3:7-4:1
3	Piripai 4:2-23
4	Korosi 1:1-20
5	Korosi 1:21-2:7
6	Korosi 2:8-23
7	Korosi 3:1-17
8	Korosi 3:18-4:18
9	1 Tesaronaika 1:1-2:9
10	1 Tesaronaika 2:10-3:13
11	1 Tesaronaika 4:1-5:3
12	1 Tesaronaika 5:4-28
13	2 Tesaronaika 1:1-12
14	2 Tesaronaika 2:1-17
15	2 Tesaronaika 3:1-18
16	1 Timoti 1:1-20
17	1 Timoti 2:1-15
18	1 Timoti 3:1-16
19	1 Timoti 4:1-16
20	1 Timoti 5:1-25
21	1 Timoti 6:1-21
22	2 Timoti 1:1-18
23	2 Timoti 2:1-21
24	2 Timoti 2:22-3:17
25	2 Timoti 4:1-22
26	Taitaasi 1:1-16
27	Taitaasi 2:1-14
28	Taitaasi 2:15-3:15
29	Pirimoni 1:1-25
30	Hivuru 1:1-14
31	Hivuru 2:1-18

date	Scripture
1	Hivuru 3:1-19
2	Hivuru 4:1-13
3	Hivuru 4:14-5:14
4	Hivuru 6:1-20
5	Hivuru 7:1-19
6	Hivuru 7:20-28
7	Hivuru 8:1-13
8	Hivuru 9:1-10
9	Hivuru 9:11-28
10	Hivuru 10:1-18
11	Hivuru 10:19-39
12	Hivuru 11:1-16
13	Hivuru 11:17-31
14	Hivuru 11:32-12:13
15	Hivuru 12:14-29
16	Hivuru 13:1-25
17	Iemisi 1:1-18
18	Iemisi 1:19-2:17
19	Iemisi 2:18-3:18
20	Iemisi 4:1-17
21	Iemisi 5:1-20
22	1 Pitaa 1:1-12
23	1 Pitaa 1:13-2:10
24	1 Pitaa 2:11-3:7
25	1 Pitaa 3:8-4:6
26	1 Pitaa 4:7-5:14
27	2 Pitaa 1:1-21
28	2 Pitaa 2:1-22
29	2 Pitaa 3:1-18
30	1 Ioni 1:1-10

date	Scripture
1	1 Ioni 2:1-17
2	1 Ioni 2:18-3:2
3	1 Ioni 3:3-24
4	1 Ioni 4:1-21
5	1 Ioni 5:1-21
6	2 Ioni 1:1-13
7	3 Ioni 1:1-14
8	Iuti 1:1-25
9	Qovarama Kyora 1:1-20
10	Qovarama Kyora 2:1-17
11	Qovarama Kyora 2:18-3:6
12	Qovarama Kyora 3:7-22
13	Qovarama Kyora 4:1-11
14	Qovarama Kyora 5:1-14
15	Qovarama Kyora 6:1-17
16	Qovarama Kyora 7:1-17
17	Qovarama Kyora 8:1-13
18	Qovarama Kyora 9:1-21
19	Qovarama Kyora 10:1-11
20	Qovarama Kyora 11:1-19
21	Qovarama Kyora 12:1-18
22	Qovarama Kyora 13:1-18
23	Qovarama Kyora 14:1-20
24	Qovarama Kyora 15:1-8
25	Qovarama Kyora 16:1-21
26	Qovarama Kyora 17:1-18
27	Qovarama Kyora 18:1-24
28	Qovarama Kyora 19:1-21
29	Qovarama Kyora 20:1-15
30	Qovarama Kyora 21:1-27
31	Qovarama Kyora 22:1-21